


Lenavolo Lovoang  
Kaala Maxat La Sam



The New Testament and Psalms in the Madak Language of Papua  
New Guinea

**Lenavolo Lovoang Kaala Maxat La Sam**  
**The New Testament and Psalms in the Madak Language of Papua New Guinea**  
**Nupela Testamen na Buk Song long tokples Madak long Niugini**

copyright © 1995, 2011 Wycliffe Bible Translators, Inc.

Language: Madak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-24

---

PDF generated using Haiola and XeLaTeX on 18 Apr 2025 from source files dated 31 Aug 2023  
746cf984-10cb-5215-870d-023c1da5c00d

## Contents

.....	1
.....	2
Sam .....	4
Metiu .....	109
Mak .....	172
Luk .....	210
Jon .....	274
Leven Gugu .....	321
Rom .....	381
1 Korin .....	409
2 Korin .....	438
Galesia .....	455
Epesas .....	466
Pilipai .....	476
Kolosi .....	483
1 Tesalonia .....	490
2 Tesalonia .....	496
1 Timoti .....	500
2 Timoti .....	508
Taitas .....	514
Pilimon .....	518
Ibru .....	520
Jems .....	542
1 Pita .....	550
2 Pita .....	558
1 Jon .....	563
2 Jon .....	571
3 Jon .....	573
Jut .....	575
Lisilimet .....	578
OTH .....	610
Sam I Paase Mumu Ne	
Iesu .....	611
Loklox Axasep .....	612
Loklok Tooro .....	623

## Lenavolo Lovoang Kaala Maxat La Sam

### Madak New Testament and Psalms [mmx]

Translation: © 1995, 2011, Wycliffe  
Bible Translators

Web version  
2015, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).

- **Noncommercial.** You may not use this work for commercial purposes.

- **No Derivative Works.** You may not alter, transform, or build upon this work.

- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

#### Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em

i tok olsem **yu ken givim kopi long narepela manmeri.** Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

## Levelinga Loklox Axasep Ti Na Lubuk

Anai lubuk ni *Lenavolo: Lovoang Kaala Maxat La Sam* keneng at lavapaase Madak. I ven ngan lavalimo larabin sangsangaun kobot mi lavalimo sangsangaun kobot 5500 limixin di paase i na lavapaase, la di nemen to rinotno xantubu at lenep Niu Ailan at lenep silok Papua New Guinea.

*Lovoang Kaala Maxat* ni i paase mumu ne Iesu Karisito. Gano migomgo lentaba at limixin at ne Moroa diga malagan i na levelinga mi loklok tooro at Loroonan Kaala. Diga malagan i na *Lovoang Kaala Maxat* at lavapaase Grik, la melemu at lentaba levenmaares diga raba pukus i ri lempapaase vetpes. Lubuk Sam diga malagan i at lavapaase Ibru (Hebrew) la melemu diga raba pukus i ri lempapaase vetpes.

At lurutu kaxat at levenbuk getgesara levelinga loklox axasep mo ik lok; i paase mumu mo lubuk. Lara loklok katling ik lok ti lox epeseves mo lubuk ti lengkot lixilik. Uba ven bok loxolinga lamaares. Anai ni levenmaares kopla lamaares diga malagan mo lubuk teren. Mo do una ven i do i volo legesa maares, una xasep do luvuttadi leklen dixo xasep bok do diga malagan i mo lubuk lingisa, ketla di doma i do diga malagan i at tentaba tevenaleng keneng at mo levenmaares.

Keneng bok at *Lovoang Kaala Maxat* lentaba levengkolinga mo luvuttadi mamalagan diga lok ka i boro at Lovoang Kaala Migomgo. Maga lok li bok leveloklok katling lixilik kerekngan i na “ ” la mo levelinga it kis kantubu at lempoang. Melemu avit ap mo levempapaase boro at Lovoang Kaala Migomgo maga lok li levenbuk, lara put silok, la lengkakan lixilik teren, ua mo levelinga i laala meve.

To maxopok at lempoang getgesara maga lok li legepu vanga. Lara avot ni levesoksoxomus ti lentaba levengkolinga keneng at mo lovoang. Mo levengkolinga, loklok katling teren i ven ngan i na \*. Mo do una ven tara, una ven to maxopok at mo lovoang la uba utus losoksoxomus teren. Lara lavanga bok, to maxopok at lempoang maga lok li bok levenbuk eburu mi laraput silok la lengkakan ua i epovo xusu naba lok tooro u at tentaba tengkakan ap mo lubuk nenu u vutus i.

Uba ven bok lokok katling keretna [ ] eburu mi tentaba tevelinga kantubu ren. Dola una ven i na, unaklen i do luvuttadi leklen at *Lenavolo* di doma i do mo levelinga xopmen ni levenep tuturun at *Lenavolo*, lentaba luvuttadi diga lox abeles mene i melemu ap mo levelinga gak lok pam keneng teren. Mo levelinga xopmen dina nemen keneng at lentaba levenmamalagan at lavapaase Grik mo nedik di ruuna i.

To melemu at nai levenbuk axap at *Lenavolo: Lovoang Kaala Maxat La Sam* uba ven levelinga keneng at Lubuk Sam i paase mumu ne Iesu, la uba ven bok levelinga loklox axasep ti lentaba levengkolinga matmatkun, la uba ven bok lempatlak linga i mumu asu lixitkis atnedi. Uba ven bok levenampoovo at levennep kangka, kusu ri lok tooro u. Maga lok li i na xusu ri lok tooro u la uba xasep nunuan at levelinga at ne Moroa.

### English Preface

*Lovoang Kaala Maxat La Sam* is a translation of the New Testament and Psalms into the Madak language of Papua New Guinea. The Madak live in the central area of the New Ireland Province. There are approximately 5500 speakers of this language.

This book includes several extra features designed to help the reader better understand the message of the New Testament and Psalms. Each book has an introduction that tells a little bit about the author, and

explains the situation that caused the book to be written. These are written from a conservative theological point of view. Parallel passages are noted after section headings, especially in the Gospels. Cross references are placed at the bottom of the page with the verse that is being cross-referenced in bold print. Abbreviations used in the parallel passage references and cross references can be found on the following pages. The English titles are also included. At the end of the book are included a list of the Messianic Psalms, a glossary of key New Testament terms, a topical index, and a set of maps.

## Sam Levempixan at ne Devit Levelinga Loklox Axasep

Na lubuk Sam i umsu mi levempixan ne Devit la lentaba luvuttadi vetpes diga malagan i. Buaang limixin di tong i do na lubuk, ni lubuk at ne Devit. Ketla neni goxo malagan na levempixan axap. Luvuttadi vetpes bok diga malagan lentaba levempixan. Nedi ne Kora, Asap, Moses, Solomon, Etan, la lentaba vetpes ua nedik kopmen atanaklen levenasen atdi. Lentaba at na levempixan ik lok ti lok tooro limixin, i ngan nedi di meres, nedi di umsu mi lainbulu, nedi ua laxapmek ik lok keneng at lorooro atdi, nedi di marat at limixin munepen midi. Lentaba levempixan ik lok ti anasa limixin mi levelinga mumu ne Moroa la lodoxoma ren. Lentaba bok mo ik lok kusu ti emi asu min. Na lubuk i anasa limixin mi legepu lempapaase. Lara avot i lok keretna. Limixin dina nunu saga at ne Moroa. La lara sepsev agepura i lok keretna. Moroa i balamu aleng limixin teren. Na lubuk Sam ik lox asuusu langangan loklok tooro tinedi dina utus i. Dinaba lok kaka lomomo i silok aleng do dina utus i at levenaleng axap.

### Lengkot silok keneng at na lubuk

1-41 Levempixan mumu loklok at limixin la mumu bok luruntudum li at lempanga axap.

42-72 Levempixan mumu lubang mixin me Israel la ne Moroa ga lox sepsu di basinge limixin munepen midi.

73-89 Levempixan mumu lotu saparap ne Moroa la mumu bok loogu laplavang.

90-106 Levempixan mumu lavatpas at limixin at na lavatbung menemen.

107-150 Levempixan mumu leemi asu ri ne Moroa la mumu bok levelinga ren.

## 1

### *Lomomo Ruturun*

<sup>1</sup> Lomomo rinedi di raba rulu levelinga loklok tooro at limixin kapmek la dixo mumu asu lampoovo at limixin di lok laxakapmek, kopla dinak lok esogo minedi di paase aksaksa ri ne Moroa.

<sup>2</sup> Ketla, di suma ka lomomo atla di mumu asu Laulis Linga at Leeme Silok, la dim doma mumu amisix i at levenaleng kangking la at levenaleng kanimin bok.

<sup>3</sup> Di lok ngan larauna di suusu ro at lisigege dan, la di pisix akmokso levempeven at levengaaling pipisik at laxampeeve, la levenang atdi kopmen nak mada si, la na mamang. Mo limixin di ngasang kobot at levempanga axap di lox i.

<sup>4</sup> Ketla limixin kapmek dixok lok kuren. Di lok ngan mun levempusuvus at levenbeo, lamanman it mas kepe i.

<sup>5</sup> At laaleng ne Moroa na viila mumu loklok at limixin axap, ni naba lok li lumumuat mavana at limixin kapmek, la naba solasu xepe di basinge limixin akmokso ren.

<sup>6</sup> Limixin manmanton dit pas keneng at loklok tatao at Leeme Silok, ne Moroa, ketla nedi di mumu asu langas kapmek, dinaba seeve.

## 2

### *Loorong Soksoxolik At Ne Moroa*

<sup>1</sup> Tila ba, limixin at levenabung mixin petpes di sevut li leventaangas kapmek kusu dinokok lok maxopok at ne Moroa? Tila ba limixin di mumu asu lodoxoma gamasa xerepmo?

<sup>2</sup> Lavaorong at na lavatbung menemen, di gagas ti esep eburu mi ne Moroa. La luvuttadi amgomgo dit kis buru ri puse ngas ti lox asi Leeme Silok, eburu mi Lanarong no neni ga soxolik ka i.

<sup>3</sup> La di lok, "Ata lox asepmus dik basinge lamgomgonga atnedu, la ataba ke xepe levelinga atnedu."

<sup>4</sup> To vana at loxonin orong teren at lebelen laxalibet, Leeme Silok ing longon mumu mo lodoxoma atdi, la i paase kalise ba ridi.

<sup>5</sup> La melemu neni i belengatngas tinotno, la i paase sok di la lumuk-musak silok teren ing long amarat aleng tinotno di.

<sup>6</sup> Ni i lok tidi, "To Saion at lakaana xaala rak, ara vaxaxis aulis li vam loorong tarax e."

<sup>7</sup> Loorong i lok, "Nia anaba vaase asu bok levempanga Leeme Silok i tong atkatla li i. La ni ga lok tia, 'Nenu ne Nuruk. Ningina nia a lok ngan ne Tamam.

<sup>8</sup> Una sing ia, la nia anaba raba u mi larabung mixin axap. Unaba ruuna ka axap lavatbung menemen.

<sup>9</sup> La unabam gomgonga di mi lakdak aen i lolos, la unaba sep povorok nedi ngan lengkong sosopen kangka i reporok.' "

<sup>10</sup> Kuren la nemi lavaorong, mina xasep at levelinga rak la nemi lubang amgomgo at na lavatbung menemen, mina ronga avukat na levempapaase aronga.

<sup>11</sup> Mina lotu saparap ne Moroa mi loklok ngangao, la mina pavanga i mi lanmarat.

<sup>12</sup> Minat kis tintiding to melamgo ren. Naba lok kapmek do ni na musak la soso mun nemi axap mina uu. Nedi axap dik sixit uto saparap ne Moroa kusu ne Moroa na lok see atdi, dinaba momo.

### 3

#### *Lisingising Ti Loklok Tooro Maxantamak Suubu*

<sup>1</sup> Leeme Silok, limixin solo di munepen minia. La buaang bok limixin di vas taba rulu xepe nga ia, dira munepen minia.

<sup>2</sup> La di paase mumu ia la dik lok keretna, "Moroa noxo lok tooro i."

<sup>3</sup> Ketla nenu, Leeme Silok, amisik nenu Lenban tia at levenaniu. Nenu mene u raba ia mi lolos ti sak tup mi limixin dit kis munepen minia.

La nenu mun u lox alolos ia ngan laabelemes.

<sup>4</sup> A sing lolos Leeme Silok mo ik lok tovana at lakaana kaala ren Saion la ing tonga ka lanteng tarak kusu ti loklok tooro.

<sup>5</sup> A subu midi xopok la a unga, la a nemen avukat at laxanimin axap atla Leeme Silok ik lok see rak.

<sup>6</sup> Nia axo marat at legesa sangaun larabin sangaun kobot limixin munepen minia di tu xangkan ia at levengkot axap.

<sup>7</sup> Ude u, Leeme Silok! Lox asepsu ia, Moroa rak! Unaba lox i atla uk lox asongot limixin munepen minia, la uk lok kepe lolos basinge di kusu di noxo lox asongor ia.

<sup>8</sup> Leeme Silok ik lok tooro limixin teren la di sak tup mi limixin munepen midi. La a sing i xusu neni naba lox anarong limixin teren.

### 4

#### *Lisingising Ti Loklok Tooro Ukantinao*

<sup>1</sup> O Moroa, nenu Lentupe ria! Una vaase porang ia do ana sing u. Dola nia aga ekip tangarang mi levenmu-muat, nenu ga lok tooro ia. Monga una lox asuusu lebelen tuntun taram tia la una ronga lising tarak.

<sup>2</sup> Lingisa ba nemi limixin kapmek miba xap ti paase aksaksa ria? Lingisa ba uba xap ti vavara solo ri levempanga xopmen turuturun teren, la ti mumu asu levempanga xaxarang?

<sup>3</sup> Ketla mina xasep do Leeme Silok ira soxolik ka vam limixin manmanton kusu tin, la ing tonga ia do a toro rin.

<sup>4</sup> Mi guta ke gat lebelemamao na sat arup nemi at laxapmek, la mina ke xepe libilinga. Do minak midi at laraora atnimi, minak midi pilo la minam doma mumu avukat na levelinga.

<sup>5</sup> Minaplavang ti Leeme Silok mi levempanga naba lox epovo at lodoxoma ren, la minat kis la mina nunu saga ren.



<sup>6</sup> Buaang nedi di ngising keretna, “O Leeme Silok, una raba nema mi laxaloklox anarong solo. Una lox asuusu amisik lebelemulus tinama.”

<sup>7</sup> Ketla mo lomomo rak tu, ne Moroa, i volo mo lomomo nedi dinaba ruuna i, ap mo laaleng levempipisik at leventaamang piao eburu mi laxadan vaen na umsu aleng.

<sup>8</sup> Dola a subu midi, a unga xeneng at lenmila. O Leeme Silok nenu xusuk, u xok nunuan ia.

## 5

### *Lisingising Ti Ne Moroa Nak Lok See At Laradi*

<sup>1</sup> O Leeme Silok. Una ronga levelinga rak. Una ronga ia, at mes silok.

<sup>2</sup> Una ronga res at lerengteng tarak ti loklok tooro. Nu ne Moroa rak la Loorong Silok tarak! Nia a sing tu.

O Leeme Silok,

<sup>3</sup> ung tonga laxaka rak maxantamak suubu. At laxangking i soo su, a tong asu levesingising tarak, la at kis ngangais ti lovoporang taram tia.

<sup>4</sup> Nenu xopmen lomoroa no uk lok momo ri libilinga. Uxo esuuxun mi libilinga.

<sup>5</sup> Nenu uxo tu ebelen tinotno minedi limixin loklox aaso. U belengatngas tino rinedi axap limixin kapmek.

<sup>6</sup> U sesele utut kepe limixin kaxarang. La u bulunga xepe rino nedi limixin sesep, la nedi di babala vukpuk limixin petpes.

<sup>7</sup> Ketla mumu mene labalamu silok taram, u ke avolo ia xusu ana vubeles at loogu laplavang taram i melemelengan. La ana lotu saparav u go, la ana xis tintiding saparav u mi loklok ngangao.

<sup>8</sup> O Leeme Silok, buaang limixin di munepen minia! Unamgonga ia xusu ana mumu asu lavavara xa ram. Una lox axasep langas taram kusu nia ana mumu asu i.

<sup>9</sup> Levempanga salai limixin munepen minia dina tong i, anoxo mu asu i. Nedi mun limixin sepsep tadi. Levelinga atnedi ik sixit

nunuan ketla ni levelinga loklox atdan mun la i umsu mi laxaxarang arup kusu dina sev amet limixin.

<sup>10</sup> O Moroa, una vaase asi di la una lox asongot di. Naba lox avukat do mo leveloklok kakapmek atnedi naba lox asuusu levenmumuat silok tidi. Una xala xepe di basinge u, mumu loklok kakapmek mi lorong-tonga xepe atnedi saparav u.

<sup>11</sup> Ketla nedi dik lok keneng at loklok tatao ram, dina momo la dinak pixan momo amisik. Una lok see atnedi di vavara aleng u. Nedi di momo aleng mumu mun u.

<sup>12</sup> O Leeme Silok, uk lox anarong nedi di mumu asu levelinga ram. Labalamu ram i tupe di ngan lenban.

## 6

### *Lisingising At Laradi Mekmeres*

<sup>1</sup> O Leeme Silok, nemen uta musak la uta vaase sox ia. Nemen uta lox asongor ia keneng mun at lebelema-mao ram.

<sup>2</sup> O Leeme Silok, lengkot tarak i molo axap; una lox asuusu lebelen tuntun tia! Una lox alolos ia, nia na ara molos axap.

<sup>3</sup> O Leeme Silok, labalak i reng aleng. Lingisa ba unaba lok tooro ia?

<sup>4</sup> O Leeme Silok, ude u, la una lox asepsu ia. At lebelen tuntun taram una lox asepsu ia basinge lanmet,

<sup>5</sup> atla to at lemenemen at labarongan, limixin kopmen dinam doma su ram, la kopmen tara na emi asu minu go.

<sup>6</sup> Lanbulu silok i suxuna ia la lolos tarak i auret na xap. At laxangkanimin axap loora rak mi lavatlingun imlumlu at levengkamkabili dan at lamarak.

<sup>7</sup> Axo epovo do ana reven avukat ta. Luxatli rak ira dang pe axap, atla ang teng amisik at limixin munepen minia ding long areng amisix ia.

<sup>8</sup> Nemi limixin kapmek, uto nimi basinge ia. Leeme Silok ing tonga lerengteng tarak.

<sup>9</sup> I ronga bok lerengteng tarak ti loklok tooro la ni naba sep siam at levesingising tarak.

<sup>10</sup> Limixin munepen minia dinaba ekip tangarang mi lainmangan la langangan lumumuat atla Leeme Silok naba sak tup midi. Soso mun dinaba lok tangtangu la ni naba xala oo di.

## 7

### *Lisingising Ti Lomokmokso*

<sup>1</sup> O Leeme Silok, nu ne Moroa rak. Anaa nia a vot saparav u kusu una lok see rak. Una lok tooro ia la una lox asepsu box ia basinge nedi di xala mu rak.

<sup>2</sup> Naba lok kapmek do dina lok ngan lavatlaion la dina xip kepe ia uto vaxalom la kopmen tara go ri lok tooro ia, la dinaba lais axakalik labantuxu rak.

<sup>3-4</sup> O Leeme Silok, la nu ne Moroa rak, dola aga lok pam tibilinga ri tara, la dola aga bala vukpuk tara tarapentangas tarak, kopla aga lok tavanga i lok kapmek tino ti laradi munepen minia la kopmen tavausun teren, kopla aga xarang taba tara. Dola nia agara lok pam tevempanga at na i,

<sup>5</sup> i lox avukat do una ke avolo limixin munepen minia dina mamat mu ia la dina rebeng alis kaka ia la dina sev asi ia la dina sev amer ia, la dina ke xepe labantuxu rak nak midi gamasa go at laxangka!

<sup>6</sup> O Leeme Silok, una lox asusu lebelemamao ram. Una beleku kaxat, la una tupe lumukmusak silok at limixin munepen minia, la una lok tooro ia. Nenu u vavara mene limixin dina rooro ngan limixin manmanton.

<sup>7</sup> Kuren la unak lok bubua ka axap limixin saparav u, la unam gomgonga di boro vana at lixitkis orong taram.

<sup>8</sup> Nenu laradi rongtonga linga at limixin axap. O Leeme Silok, una ru ria, uklen i do nia laradi sepse.

<sup>9</sup> Nenu ne Moroa manmanton la u viila mumu levendoxoma atnema, la lavavara bok atnema. Una lox axap loklok kakapmek at limixin kapmek. La una raba luunun ti limixin nunuan.

<sup>10</sup> Moroa ni Lurutu See Pe rak. Neni ik lox asepsu nedi di mumu asu levelinga ren.

<sup>11</sup> Moroa ni lagale laradi rongtonga linga la levelinga ren ik mokso. Amisik ni i paase asi limixin kapmek.

<sup>12</sup> Dola kopmen dinak lox ekun loklok atdi, Moroa naba sua ka lavarise esep teren la naba rep tong pen labanara ren la na lox agagas li i.

<sup>13</sup> Ni naba lok kaka levempanga esep teren, la na lok dola na so asu mi levesoso xao ren.

<sup>14</sup> Moroa, una ven ba limixin kapmek di doxoma gagas li leventaangas ti laxakapmek. Dik soxovo li levenmumuat la di xaxarang arup limixin.

<sup>15</sup> Ketla nedi xa di onon at lara-pelixo di lili i ri leventaba vetpes.

<sup>16</sup> Kuren la di ruuna ka losong-songot mumu xa laxakapmek atnedi. La lemusak mi lesep di gagas min ti leventaba vetpes i lok kapmek axa di.

<sup>17</sup> A tong aorong ti Leeme Silok atla i tong asu lavapaase ramtaba ina mi lodoxoma mokmokso. Ak pixan emi asu ri Leeme Silok, ni Leeme Avolo.

## 8

### *Laasen Silok At Ne Moroa Mi Laasen At Limixin*

<sup>1</sup> Leeme Silok, nenu xusuk mun Leeme Silok atnema. Limixin axap at na lavatbung menemen di ven lempanga uga rudum li i, la kerepmo di ven kibis i do nu u silok aleng. Leemi asu saparav u di rongga i rovana at lebelen laxalibet.

<sup>2</sup> Laxamdak mi laxaalik kakalik dik pixan emi asu minu la lubungskadede bok. Uga bos loroboro ri lok pe lebelemamao at limixin dit kis munepen minu la atnedi dik sok tixirixes kepe levelinga ram.

<sup>3</sup> Dola a ven laxalibet nu ga rudum li i, lagaaling mi laxampenti uga vaxaxis di at levengkot atnedi la am doma xeretna.

<sup>4</sup> Limixin nedi lempanga salai, la uram doma mu solo di. Nedi lempanga gamasa mun, ketla uk lok tatao avukat tino di.

<sup>5</sup> Nenu uga raba di mi lolos pana at lempanga axap, ketla lolos atdi i lixilik mun ti lolos taram ne Moroa. La uga lox asilok di mi levenasen silok la lisisinang nunuan.

<sup>6</sup> Uga lok katling di xusu dinam gomgonga levempanga axap nu ga rudum li i. Uga lox asilox di mavana at levempanga axap,

<sup>7</sup> i ngan levesipsip, laxanbulumaxao, la laxampanga sio axap bok at laxairing, <sup>8</sup> la lavapixa mi levenmat, la levempanga axap at lebelen laras.

<sup>9</sup> O Leeme Silok, nenu xusuk mun Leeme Silok atnema. Limixin axap at na lavatbung menemen di ven lempanga uga rudum li i, la kerepmo di ven kibis i do nu u silok aleng.

## 9

### *Laradi I Tong Loklox Avukat Ti Ne Moroa Ti Lomokmokso Ren*

<sup>1</sup> Leeme Silok, nia ana emi asu minu mi labalak axap. Anaba tong asu axap nom levempanga nunuan nu ga lox i.

<sup>2</sup> Anabak pixan mi lomomo, lava-suun teren ataram. Anabak pixan emi asu minu, ne Moroa, nu Lannaraavuk.

<sup>3</sup> Limixin munepen minia dik sixiro do di ven u, dik sak subu epopolo ri lanmet.

<sup>4</sup> Ut kis at loxot tongtonga linga ram, la u tong asu lavapaase mi lodoxoma mokmokso. Uga ronga linga rak la uga ru ria.

<sup>5</sup> Uga paase asi lavamoln, la uga sele utut kepe limixin kapmek. La kopmen tara noxo doma asu bok ba atdi.

<sup>6</sup> Lavamunepen minema ma noxo ven bok ba di. Ura sele utut kepe vam laramenemen silok atnedi, la limixin axap dira domampe axap pam di.

<sup>7</sup> Ketla Leeme Silok, neni Loorong Avolo la naba nemen amisik kuren, la kopmen tekavaxap teren. Ira lox agagas li vam loxonin orong teren ti viila mumu loklok at limixin.

<sup>8</sup> Ni im gomgonga lavatbung menemen mi lavapaase mokmokso. Mi lodoxoma mokmokso i viila mumu loklok at limixin boro at larabung mixin.

<sup>9</sup> Leeme Silok i tu ngan Loxot Loklox Alipe, la limixin baava di epovo dina vubeles ap mo Loxot Loklox Alipe ren, la dina nemen nunuan e at levenaleng kakapmek.

<sup>10</sup> Leeme Silok, nedi dikleklen u, dinaba nunu saga ram. La uxu raba rulu tara do lebelen i ngaongao ru.

<sup>11</sup> Minak pixan emi asu ri Leeme Silok, mo it kis ngan Lamgongo rovana Saion. Mina tong axasev i ri limixin at larabung mixin axap mumu levempanga ni gak lox i.

<sup>12</sup> Moroa im doma su amisik atnedi ding songot mi laxanmumuat. Neni ixong tonga xepe lerengteng atnedi, ketla ik lox asongot nedi di lox abaava di.

<sup>13</sup> O Leeme Silok, una lox asuusu lebelen tuntun tia! Una ven na levesongsongot limixin munepen minia dik lox i ria! O Leeme Silok. Lox asepsu ia basinge lanmet,

<sup>14</sup> kusu anaba tu ro melango at limixin to Jerusalem, la ana tong asu i ridi ri levempanga nia a emi asu minu min. La ana lox asuusu lomomo rak atla uga lox asepsu ia.

<sup>15</sup> Lavamoln diga xe lemet kusu ti sep limixin taram. Ketla nedi xa diga subu tup teren, nedi xa diga onon at larapelixo atdi.

<sup>16</sup> Leeme Silok ira lox asuvos pam i keneng at lorongtonga linga at langas ik mokso, la limixin kakapmek dinaba tu at lavapaase mumu leveloklok atnedi.

<sup>17</sup> Lanmet ni langas at limixin axap dik lok laxakapmek, la tinedi axap bok dik sok sisixe ne Moroa.

<sup>18</sup> Moroa noxo domampe rino amisik limixin dik pakes. Moroa noxo ke xepe amisik levendoxoma

voovo at limixin banbalo ti loklok tooro la ni noxo lox abulubun kepe amisik di.

<sup>19</sup> Leeme Silok, ude u! Nemen uta ke xepe limixin dina lox abulubun kepe levelinga ram! Una lam kaka lavamolun uto melamgo ram la una vaxaru di at lavapaase.

<sup>20</sup> O Leeme Silok. Una lox amarat di, la una lox asuma xibis di do nedi luvuttadi mun kuren la dina ekip tangarang mi lanmet.

## 10

### *Laradi I Ngising Ne Moroa Ri Loklok Tooro*

<sup>1</sup> Leeme Silok, tila ba u nemen paxalom basinge nama? Tila u lipe basinge nema, dola nema ma ekip tangarang mi lumumuat?

<sup>2</sup> Laradi xapmek it las i la ik lox asongot limixin banbalo. Una rebeng alis ka i at larapelixo i lili i xusu ti lox asubu limixin taram.

<sup>3</sup> Laradi xapmek it las i mi leven-doxoma xakapmek teren. Laradi mokmorong i paase aksaksa ri Leeme Silok la im taba sinta i.

<sup>4</sup> Laradi xapmek kopmen nak lok ngangao at Leeme Silok. Ik lox aaso, kuren la at lodoxoma ren i lox abulubun ne Moroa.

<sup>5</sup> Laradi xapmek ipnovos at levempanga axap ni ik lox i. Ketla ni ixo epovo na xasep avukat at lavapaase ramtaba ina at ne Moroa. Neni i paase aksaksa ri limixin munepen min.

<sup>6</sup> Neni ik lok tin axa xeretna, “Kopmen tepanga naba lox abulu ia la ana ekip tangarang mi levenmumuat at lorooro axap tarak.”

<sup>7</sup> Levempapaase ren i umsu mi lavapaase aksaksa, laxaxarang la levelinga xikiilu, la i paase asu soso mun levelinga bilinga.

<sup>8</sup> Neni it kis alipe ro at laramenemen, la i gagas kusu nap sev amet limixin nunuan. La neni i kuxut tangais luvuttadi mokmokso,

<sup>9</sup> la neni it kis alipe ro at loxot kukuxut teren ngan lavatlaion. Ik midi tangais limixin banbalo, la im

tebeng alis kaka di at lelixo ren, la i sasat pes kaka di.

<sup>10</sup> Kopmen tara go ti lok tooro di, kuren la ip sev asi di la di subu uto xopok, la lolos silok teren ik lok kakapmek tino di.

<sup>11</sup> Laradi xapmek im doma i do, “Moroa xopmen nam doma solo limixin! Ira vamet pam la kopmen na epovo ri ven ia!”

<sup>12</sup> O Leeme Silok, una lox asongot mo limixin kakapmek la una doma nedi limixin ua dim suma mo losongsongot!

<sup>13</sup> Kereva lodoxoma at limixin kakapmek? Dim taba sinta ne Moroa, la dim doma i do, “Neni noxo lox asongot dik.”

<sup>14</sup> Ketla nenu, Leeme Silok, u ven lenget ka mo levenmumuat la levesongsongot dik lox i ri limixin baava, la u gagas amisik kusu una lok tooro di. Limixin pakpakes di vot pasa u xusu una lok tooro di atla nenu laradi loklok tooro at limixin pakpakes.

<sup>15</sup> Una lox axap lolos at luvuttadi xapmek, unak lox asongot di mumu levempanga xapmek dira lok pam i, kusu di noxo lok bok ba i.

<sup>16</sup> Leeme Silok, neni Loorong Avolo la kopmen tekavaxap teren. Nedi di lotu saparap lomoroa vetpes, dinaba sonao rino basinge lenep kangka ren.

<sup>17</sup> O Leeme Silok, unabang tonga levesing at limixin di lox alixilik di maxopok taram. La unaba lox abelemes nedi.

<sup>18</sup> Unabang tonga levesing at lubangkarun la atnedi limixin baava. Unaba ru ridi, kusu limixin at lavatkangka di noxo lox amarat bok ba di.

## 11

### *Laradi I Nunu Lolos At Ne Moroa*

<sup>1</sup> Nia a nunu saga at Leeme Silok, ni laradi xumkubak pe ria. Kuren la anoxo ronga res at limixin tangtangu di tong i ria dola, “Una rava oo ngan lapka uto vana at lem-patkaana,

<sup>2</sup> atla limixin kapmek di gagas kusu dina so u mi levesoso atdi. Di kuxut tangais luvuttadi avukat to at levengkot buxumin kusu do dina soso di.

<sup>3</sup> Laradi avukat naba lok lavanga salai, dola limixin axap ding tonga xepe levelinga at lubung amgomgo la kerepmo lorooro at limixin ik lok kapmek aleng?”

<sup>4</sup> Leeme Silok, mo it kis at loogu laplavang teren i melemelengan. Loxonin orong teren ik lok toxun pana at lebelen laxalibet. I reven tatao limixin axap at lavatbung menemen la ikleklen levempanga axap dik lox i.

<sup>5</sup> I viila mumu loklok at limixin avukat la limixin kapmek bok. Neni i belengatngas tino ti limixin di los polo Laulis Linga ren.

<sup>6</sup> Neni naba soli asi laxao bokbolot la nabak bolot limixin kapmek mi la salpa (sulfur). La naba lox asongot di mi lamanman kapmek iplivi aleng.

<sup>7</sup> Loklok at Leeme Silok in mantan la i vara mun leven gugu nunuan. Laradi ik lok lempanga avukat nabat kis esogo eburu min to at lemene-men teren.

## 12

### *Lisingising Ti Loklok Tooro*

<sup>1</sup> O Leeme Silok. Lok tooro nema. Kopmen bok ba taradi avukat go i nemen. U noxo ven kaka bok ba taradi ruturun go ik lok kantubu at limixin axap.

<sup>2</sup> Nedi axap di vekarang taba, la di velox atdan ka la kerepmo dira xaxarang arup bok di.

<sup>3</sup> O Leeme Silok. Una vamngus nedi limixin di velox atdan ka, la una vamngus bok nedi limixin dim simi aurut di la dik lok keretna,

<sup>4</sup> “Mi levelinga atdik dik ta lok kaka levempanga dik ta vara rin. La dik ta tong levempanga nedik ta vara i do ata tong i, la ixo epovo tara na sep pepe dik.”

<sup>5</sup> Ketla Leeme Silok i vaase xeretna, “Na nia anaba vot, atla di lox abaava limixin dik pakes. La

nedi di sev asongot labantuxu atdi mo dit mes silok mi losongsongot. Anaba raba nedi limixin baava mi nom lixitkis avukat ding kongkat tin.”

<sup>6</sup> I epovo rinotno do ata nunu at leveng kakaape at Leeme Silok atla leveng kakaape ren i lok ngan loxon siliva uat gamgames din tin i at laxao bokbolot ise at lavanuti rintin axap la i nunuan axap.

<sup>7-8</sup> Limixin kakapmek di umsu at lengkot axap la nedi axap di emi asu mi laxakapmek. O Leeme Silok. Una lok tatao avukat nema basinge di. La una lok tooro nema xusu limixin kerepmo di noxo lok kapmek nema.

## 13

### *Lisingising Ti Loklok Tooro*

<sup>1</sup> O Leeme Silok, ningisa ba unaba doma su rak? Kereva, u domampe rino nga ia? Tila rinotno la u lipe lamaram basinge ia?

<sup>2</sup> Ningisa ba unaba lox axap na levenmumuat nia arap kip tutu min? Lavanisa aleng kangking la kanimin lanbulu silok i nemen keneng at lorooro rak? Ningisa ba unaba lok tooro ia xusu anoxok lok bok ba at loklok tatao at limixin munepen minia?

<sup>3</sup> O Leeme Silok, nu ne Moroa rak. Doma su rak. Una sep siam at lising tarak. Una raba amlong ia mi lolos tarak. La nemen uta ke xepe ia xusu ana met.

<sup>4</sup> Nemen uta ke avolo limixin munepen minia dina tong i do, “Nedik tara sev asubu vam i.” Nemen uta ke avolo di kusu dina lok momo aksaksa ria mumu i nom.

<sup>5</sup> Ketla a nunu saga ram, atla labalamu lexen taram tia naba nemen amisik. Anaba momo dola una lox asepsu box ia basinge limixin munepen minia.

<sup>6</sup> O Leeme Silok. Anabak pixan tu, atla ugara lox anarong pam ia.

## 14

### *Loklok Kakapmek At Limixin*

<sup>1</sup> Mo limixin di doma i do, “Kopmen tomoroa go.” Nedi limixin tangtangu. Lodoxoma atnedi i bilingot axap tino mi laxakapmek. La dira lok pam levempanga ik lok kapmek aleng tinotno, kopmen tara atdi i lok levempanga i lox avukat.

<sup>2</sup> Leeme Silok ik milik si boro vana at lebelen laxalibet, la i reven limixin axap, do ni naba epovo ri ven kaka taradi leklen la tara bok i lotu saparav i.

<sup>3</sup> Ketla nedi axap digara oon soogong pam, lorooro atnedi axap ira mau axap pam. Kopmen tinotno tara atdi ik lok lempanga i lox avukat, kopmen tinotno tegesara.

<sup>4</sup> Leeme Silok i sue xeretna, “Kopmen dinaklen leventaangas nunuan? Kereva, nedi axap na dik lok laxakapmek, kopmen takleklen atdi? Dip kip pilo amisik limixin tarak, la kopmen tinotno dina ngising tia.”

<sup>5</sup> Ketla melemu dinaba lingun aleng, atla ne Moroa i nemen eburu minedi limixin di mumu asu levelinga ren.

<sup>6</sup> Nedi dik lox aekarakat levempanga luvuttadi banbalo di vara i do dina lox i. Ketla Leeme Silok nabak lok see atdi.

<sup>7</sup> Nia a vara aleng tinotno i do ne Moroa na sak tiki tara boro Saion kusu na lox asepsu limixin me Israel basinge limixin munepen midi. Melemu limixin me Israel dinaba lok momo dola Leeme Silok na lox asang kobot amu manga di.

## 15

### *Loklok Ne Moroa I Vara I*

<sup>1</sup> Leeme Silok, nege i epovo na vubeles at loogu xaala ram? Nege i epovo na nemen eburu minu ro Saion at lakaana xaala ram?

<sup>2</sup> Neni laradi i mumu asu lavavara at ne Moroa at leventaangas axap, la ik lox amisik leveloklok in mantan la levelinga ren i ruturun amisik.

<sup>3</sup> La kopmen ni na paase asi taasen at tara ukopok. Kopmen na lok

tibilinga ri larapen tangas teren, kopla na paase mumu nedi dik lox auret tin.

<sup>4</sup> Neni i rexes nedi no ne Moroa i raba rulu nedi. Ketla neni ip kiv aurut levenasen atnedi di mumu asu levelinga at Leeme Silok. Ik lox epovo amisik leveng kakaape ren, keke i do i lolos aleng tin, ni ixo epovo na ke xepe i.

<sup>5</sup> Im taba levendinau, ketla kopmen dina porang i mi luunun i volo. Ixo epovo do tara na un i mi tevempilas kusu na vaxaru taradi manmantan at tavapaase.

Laradi i mumu asu na leveloklok, lixitkis teren naba nemen matmatkun.

## 16

### *Laradi I Nunu La I Ngising Ne Moroa*

<sup>1</sup> O Moroa, una lok see rak, a nunu saga ram kusu una kubak pe ia basinge limixin munepen minia.

<sup>2</sup> A tong i ri Leeme Silok, “Nenu Leeme Silok tarak. Levempanga nunuan axap tarak, nenia a ruuna i, nenu axa um taba ia min.”

<sup>3</sup> Limixin tuturun at Leeme Silok, nedi limixin nunuan. Ak lok momo amisik ti nemen eburu midi.

<sup>4</sup> Limixin dit pas uto at levenmoroa vetpes, dinaba ekip tangarang mi laxanmumuat solo. Nia noxo nemen eburu midi at levelaplavang atnedi. La nia noxo lotu saparap levenmoroa atnedi.

<sup>5</sup> Leeme Silok, nenu mun tarak la kopmen tomoroa bok. Ang sang kobot mumu mun u, la kopmen bok ba tepanga vetpes nia anak pakes tin. Lorooro axap tarak i nemen at lukngam.

<sup>6</sup> A ruuna ka leventamtaba nunuan mun taram la di lox avukat tinotno.

<sup>7</sup> A emi asu mi Leeme Silok, atla neni im lam lorooro rak, la at leveng kanimin lodoxoma rak i anasa ia mi loklox avukat.

<sup>8</sup> Nia a xasep amisik ti Leeme Silok i nemen to melamgo rak. Mi mo i

tu saparap lakngak tino la kopmen tavanga noxo sev asubu ia.

<sup>9</sup> Kuren la lorooro rak i umsu mi lomomo, la levelinga rak i paase asu mun lososoro. La kopmen tinotno nia na marat tangarang ka tepanga,

<sup>10</sup> atla nenu u noxo raba rulu ia xusu anat pas uto at lemenemen at labarongan, la u noxo ke xepe Laradi Melemelengan taram la labantuxu ren napso.

<sup>11</sup> Unaba lox ase ia mi langas it pas uto at loxot ti lorooro. Ut kis esogo minia, la a momo amisik. Uk lox aumsu ia mi lososoro mo naba nemen amisik la kopmen tekavaxap teren.

## 17

### *Lisingising At Laradi Manmanton Ga Tu At Lavapaase*

<sup>1</sup> O Leeme Silok, una ronga lorooro rak la una ru ria mi levelinga rurun. Una ronga res at lerengteng tarak saparav u ri loklok tooro. Una ronga na lising tuturun tarak saparav u.

<sup>2</sup> Nenu uklen leveloklok in manton, kuren la unaba ronga linga rak la unaba ru ria.

<sup>3</sup> Uklen lorooro rak. Uga vot pasa ia at laxanimin la uga viila mumu axap lorooro rak, u goxo vuse kaka tibilinga rak. Nenia axo paase kapmek,

<sup>4</sup> ngan leventaba vetpes di lox i. A mumu asu amisik levelinga ram, la kopmen ana mu asu langas at lemusak la leesep.

<sup>5</sup> At pas amisik at langas taram, la kovisi nia ana vas aase ren.

<sup>6</sup> O Moroa, a sing saparav u atla uk lox epovo levesingising tarak. Una xa roolong tia la una ronga levelinga rak.

<sup>7</sup> Una lox asuusu nom labalamu avukat taram la una lox asepsu ia. Nia at kis esogo minu la kopmen nia ana marat at limixin munepen minia.

<sup>8</sup> Una lok see rak ngan uk lok tatao luxatli ram. Una lipe ia at lamamau at luvapa ram,

<sup>9</sup> kusu limixin kapmek di noxo sev asi ia.

Limixin munepen minia di tu kangkan ia kusu dina sev amer ia.

<sup>10</sup> Kopmen dina balamu leventaba vetpes. Dit las amisik di.

<sup>11</sup> Nanga ding kan ia, at levengkot nia a tepukus taba ve, di mamat mu amisix ia kusu dina sev asubu ia.

<sup>12</sup> Di lok ngan lubunglaion, di kuxut tangais ia, di vara i xusu dina lais koxorop axakalik labantuxu rak.

<sup>13</sup> O Leeme Silok, ude u. Una esep tangarang limixin di munepen minia, la una sak tup midi. Una lox asepsu ia basinge limixin kapmek mi lavarise esep taram.

<sup>14</sup> O Leeme Silok, una lox asepsu ia mi lolos taram basinge nedi limixin at na lorooro di ruuna ka levempanga axap nedi xa di vara i. Una lox asongot di mi levesongsongot nu ga gagas li i ridi, teventaba bok ti laxamdak mi laxaalik atdi, la teventaba naba volo bok ti luvuttubuno avolo atdi.

<sup>15</sup> Ketla nia anaba ven lamaram atla nia goxo lok tibilinga. Dola ana aus, anaba umsu mi lososoro atla anaba nemen eburu minu.

## 18

### *Loxompixan At Ne Devit, Ti Lok Momo*

<sup>1</sup> O Leeme Silok. A vavara aleng tu! Nenu Lentupe ria.

<sup>2</sup> Leeme Silok ik lok see rak basinge limixin munepen, atla neni Loogu Matmatkun tarak. Moroa rak, neni Lurutu See Pe rak, la keneng mun teren nia a nemen matmatkun. I tupe ia ngan Lenban. I tu tooro ia, la i kubak pe ia basinge limixin munepen minia.

<sup>3</sup> A toro ri Leeme Silok, la i lox asepsu ia basinge limixin munepen minia. Leemi asu ri Leeme Silok!

<sup>4</sup> Loxoxo uu ga suxuna ia ngan ta lovo paxanao sesele utut ga vuulus labaaxin tarak.

<sup>5</sup> Loxoxo uu ga suxuna ia ngan ta loos ga itis ia. Lamaaut ga lok do na xonom ia.

<sup>6</sup> At lumumuat keneng at lorooro rak, aga ro ke at Leeme Silok. Aga ro ke at ne Moroa rak ti loklok tooro ro xeneng at loogu laplavang teren la ni ga ronga laxaka rak. La ga ronga bok lerengteng tarak ti loklok tooro basinge limixin munepen minia.

<sup>7</sup> La ne Moroa ga musak di la ga lox angne lavatangka la lempar abuxumkun at lempatkaana gang nengne.

<sup>8</sup> Lusuxa ga ravasu at lisna ren la langangao at laxao bokbolot tintin asonao vanga eburu mi laxali kao bokbolot ga ravasu at lungusno.

<sup>9</sup> Ni ga vaxat kuang laxalibet la ni ga vas si ude xopok, mi loxontakabu bibi maxopok at luxangkedek teren.

<sup>10</sup> Ni ga xis pana at lavanga raptava ren (cherubim) la ga rava si soso min ude xopok ngan lamanman silok.

<sup>11</sup> Ni ga xua pe i mi lubuxumin. Lengkon takabu lolos ga umsu mi laxadan gak lok kangkan i.

<sup>12</sup> Laxampengkos uat gan bun aleng ga subu la laxao mi lavanga ga mam gangomgo rin, la ga soosoo das su at loxon takabu bibi.

<sup>13</sup> To vana at laxalibet, Leeme Silok gap kup butbutki ngan lerepaavat. La limixin axap diga ronga laxaka at Leeme Avolo.

<sup>14</sup> Ni ga so limixin munepen mi laxasoso ren, la diga oo epeseves, la diga sixiro basinge laxasep at lavanga ga mam etitit.

<sup>15</sup> To maxopok at lebelen laras gamdi saxaven, la lavara buxumkun at lavatangka bok gamdi saxaven, at loxonaleng nu Leeme Silok uga musak limixin munepen minu, la uga vaase lolos aleng tidi.

<sup>16</sup> Leeme Silok ga song asi boroxun pana la ga rebeng tu rak. La ni ga rev asu ka ia boro xeneng at lamaxat.

<sup>17</sup> Ni ga lox asepsu ia basinge limixin lolos diga munepen minia, la basinge bok di, di belengatngas tia. Nedi diga lolos polo ia.

<sup>18</sup> Nia ga nemen keneng at lumumuat, diga esep minia, ketla Leeme Silok ga lok see rak.

<sup>19</sup> Ni ga lok tooro ia basinge laniu, la ga lox asepsu ia atla ni ga lok momo minia.

<sup>20</sup> Leeme Silok im taba ia mi luunun atla nia laradi manmanton la ni ik lox anarong ia atla nia laradi sepsen.

<sup>21</sup> Agara mumu asu Laulis Linga at Leeme Silok. A goxo raba sinta ne Moroa rak.

<sup>22</sup> Agara mumu asu amisik leven-taangas axap teren. Nia goxo ronga xepe at levempapaase ali ren.

<sup>23</sup> Iklen i do kopmen tibilinga rak, la aga lok tatao avukar axa ia la nia goxo lok taxakapmek.

<sup>24</sup> Kuren la im taba ia mi luunun atla nia aga lok mun leveloklok manmanton la iklen i do nenia laradi sepsen.

<sup>25</sup> O Leeme Silok, nenu u ruturun tinedi di ruturun saporav u. La uk lox avukat tinotno rinedi din mantan tino.

<sup>26</sup> La uk lok lempanga i dadat tinedi loklok atdi i dadat. Ketla do tentaba dik lok laxakapmek, nenu u lok ngan laradi munepen midi.

<sup>27</sup> Uk lox asepsu nedi di lox asi di ukopok, la uk lox asi nedi dim simi aurut di.

<sup>28</sup> O Leeme Silok, um taba ia mi laxasep, la uk lok kepe ia basinge loklok at lamain. <sup>29</sup> Um taba box ia mi lolos ti vesep mi limixin munepen minia, la lolos tip sev asi di.

<sup>30</sup> Na ne Moroa, loklok teren in mantan tino. Dola ni na xaape mi tavanga, ni naba lox i. La neni Lenban tinedi di vot pasa i xusu na lok see atdi.

<sup>31</sup> Leeme Silok, neni xusuk ne Moroa. Moroa xusuk i lok ngan Lentupe ridik.

<sup>32</sup> Neni mun ne Moroa ik lox alolos ia, la neni mun ik lok tatao lavatpas tarak.

<sup>33</sup> Neni mun i su auru ia at lavatpas tarak ngan lavanga mi lavanuet kangkedek it pas matmatkun. Ik lok tatao box ia rovana at lempatkaana.

<sup>34</sup> Ik lox ase ia ri vesep, kusu anaba soso avukat mi lososo lolos.

<sup>35</sup> O Leeme Silok, uk lok see rak la uk lox asepsu ia. Loklok tooro ram



ira lox asilok pam ia, la lolos bok taram ga kubak pe ia basinge limixin munepen minia.

<sup>36</sup> Uga lok tatao avukar ia basinge di la di goxo xoxo ka ia. La nia goxo subu bok.

<sup>37</sup> Nia ga xala limixin munepen la aga rebeng alis kaka di. Nia goxo lok mamas se aga sev amet axap di.

<sup>38</sup> Aga bobo amet di, la digoxo epovo na xatu kaxar amlong. Digak midi etaba ro melamgo rak.

<sup>39</sup> Uga raba ia mi lolos ti nom leesep, la nia aga sak tup mi limixin diga munepen minia.

<sup>40</sup> Uga lox aoo limixin munepen minia la diga sixiro rak. Agap sep kakapmek tino nedi diga belengatngas tia.

<sup>41</sup> Digang teng ti loklok tooro, ketla tara goxo lox asepsu di. Diga toro ri Leeme Silok, ketla ni goxo ronga res atdi.

<sup>42</sup> Aga long povorok tino di la di lok ngan ta lakbus kao no lamanman it mas kepe i. Aga vas asi di, ngan ta at pas at lapke ro at langas.

<sup>43</sup> Uga lox asepsu ia basinge limixin tongtonga xepe la uga lox asilox ia ngan loorong at levenabung mixin axap. Limixin nia goxoklen di, nanga nia am gomgonga di.

<sup>44</sup> Limixin boro xadiong dit kis tintiding mi levempatgulom atnedi saporav ia. Dola di ronga ia, di ronga res at levelinga rak.

<sup>45</sup> Dixo abelemes bok ba, la di dede aleng, mo do di on basinge laraogu matmatkun atdi.

<sup>46</sup> Leeme Silok ni Luntoo Avolo rak. A emi asu min, ni Lentupe ria. Ana tong asu i ri limixin do ne Moroa i silok aleng la ik lox asepsu ia basinge limixin munepen minia.

<sup>47</sup> Im taba ia mi lolos ti sak tup mi limixin munepen minia, la i tupe ia at limixin kapmek. La neni mun ik lox asi at larabung mixin axap kusu diba nemen maxopok tarak,

<sup>48</sup> la ik lox asepsu ia basinge limixin munepen minia.

O Leeme Silok, u raba vam ia

mi lolos kusu ti sak tup mi limixin munepen minia, la u lok see rak kusu limixin sepsep di noxo sev asi ia.

<sup>49</sup> Ni lavasuun teren la nia ana emi asu minu kantubu at limixin at levenabung mixin petpes. Anak pixan emi asu mi laasen taram.

<sup>50</sup> Moroa im taba lolos silok ti loorong teren kusu nak sak tup mi limixin munepen min. Ik lox asuusu labalamu lexen teren ti no lara neni xa ga soxolik kaka i, ti ne Devit la ri luvuttubuno avolo umelemu.

## 19

### *Luruntudum Li At Ne Moroa I Lox Asuusu Laasen Silok Teren*

<sup>1</sup> Laxalibet ik lox asuusu lisisixam at ne Moroa. La levempanga axap go ik lox asuusu lugugu silok neni ga lox i.

<sup>2</sup> At levenaleng kangking axap mo levempanga dik lox asuusu i. La levenaleng kanimin axap bok, dik lox asuusu i.

<sup>3</sup> Kopmen dina vaase asu tevelinga la kopmen bok ata ronga asu i.

<sup>4</sup> Levempapaase atdi i ravasu ri limixin at lavatbung menemen axap. La levelinga atdi it pas ti latnese at na lavatkangka. Moroa ga lok loxot kitkis to vana at lamavangkap ti laxangking.

<sup>5</sup> Ip tavasu maxantamak suubu ngan laradi i epot maxat la i lok momo ri vas su, i ngan bok laradi lolos i lok momo ti sixit at lekampoovo.

<sup>6</sup> Laxangking i ravasu ro at lenep kavaxap at lavatbung menemen la ik sixit korop uto at lara lenep kavaxap bok. Kopmen tempanga i epovo na lipe basinge liplivi ren.

### *Laulis Linga At Ne Moroa*

<sup>7</sup> Laulis Linga at Leeme Silok ik mokso axap. Im taba lolos maxat ti limixin di mu asu i. Levempapaase ali at Leeme Silok, i epovo do dik ata nunu saga ren. La im taba lodoxoma avukat tinedi xopmen to-doxoma avukat atnedi.

<sup>8</sup> Laulis Linga at Leeme Silok ik mokso aleng, la nedi di mumu asu

i di momo. Levempapaase ali at ne Moroa i nunuan, la im taba lodoxoma avukat ti limixin.

<sup>9</sup> I lox avukat do laradi na lok ngangao at Leeme Silok, la limixin dinaba lok ngangao epasum amisik. Levelinga loklox akmokso at Leeme Silok in manton la i lox avukat amisik.

<sup>10</sup> I lox avukat do limixin dina vara aleng i polo logol. La i so avukat tino ri limisiu.

<sup>11</sup> Leeme Silok, leventaangas taram im taba ia mi lakleklen, nia lasaxaruki ram. Anabak lok kaka luunun teren, mo do nia ana mumu asu levelinga ram.

<sup>12</sup> Leeme Silok, kopmen tara i epovo xusu ni na ven lenget ka axa libilinga ren, kuren la una doxoma xepe mo libilinga nia xopmen na xasep teren.

<sup>13</sup> Una lok tooro ia xusu nia noxo lok laxapmek ua nenia a vara i. Nemen uta ke xepe i na sak pavaa ia xusu nia anaban manton la anaba sepmus basinge lolos at libilinga.

<sup>14</sup> Nia a vara i do levempapaase rak mi lodoxoma rak nan manton at lamaram. O Leeme Silok, nenu Loxot Loklox Alipe rak, la nenu Lentu Kopro Pe rak.

## 20

### *Lisingising Ti Lok Tooro Loorong At Leesepe*

<sup>1</sup> Ma sing Leeme Silok, ni ne Moroa at ne Jakop, do ni naba ronga ram dola una ekip tangarang mi lumumuat, la naba lok see ram!

<sup>2</sup> Ma sing box i do loklok tooro ru naba laa boro xeneng at loogu laplavang teren, la loklok tooro bok tu naba vot boro Saion at lakaana ren.

<sup>3</sup> Ma sing box i do ni naba siam ka ampana letaba ram, la ni naba momo rino bok mi levelaplavang taram.

<sup>4</sup> Ma sing box i do ni naba raba box u mi lempanga ung kongkat tin, la ni naba lox asoxos levendoxoma gagas taram.

<sup>5</sup> Do Leeme Silok na lox epovo na levesingising la una sak tup mi limixin munepen minu, manabap kup mi lomomo, la manaba lok katling i mi leemi asu ri ne Moroa. Ma sing Leeme Silok naba lox asoxos axap levesingising taram.

<sup>6</sup> Na nia aklen i do Leeme Silok im taba lolos ti loorong soksoxolik teren kusu ti sak tup mi limixin munepen min. Neni i paase porang levelinga ro at loxot melemelengan teren keneng at lebelen laxalibet at ne Moroa. At lolos axa ren neni im taba i mi lolos avolo aleng ti sev asi limixin munepen. <sup>7</sup> Leventaba di nunu saga at leveng karis esep atnedi, la leventaba di nunu saga laxanos atdi. Ketla nedik ta nunu saga at lolos at Leeme Silok, ni ne Moroa atdik.

<sup>8</sup> Limixin kerepmo dinaba vas kais la dina subu, ketla nedik tanaba xatu upana la manaba tu tuxuruxun.

<sup>9</sup> O Leeme Silok, una raba lolos ti loorong kusu na sak tup mi limixin munepen min. La una ronga atnema do mana toro ke ram.

## 21

### *Moraa I Lok Tooro Loorong La Loorong I Xiv Aurut Laasen Teren*

<sup>1</sup> O Leeme Silok. Loorong i lok momo, atla nenu ugam taba i mi lolos. I sosoro atla nenu ugam taba i mi lolos tik sak tup mi limixin munepen min.

<sup>2</sup> Uga raba vam i mi levempanga axap lebelen ga tu i. Uga raba box i mi mo lavanga neni ga ngising tin.

<sup>3</sup> Uga raba i mi leveloklox anarong silok, la ugara vaxasiga i mi lavatbungorong gol at lavatlak teren.

<sup>4</sup> Ni ga sing u ri lorooro, la nu ga raba vam i min, lorooro abao naba baalom aleng.

<sup>5</sup> Lisisilok teren i volo, atla nenu uk lok tooro i. Laasen silok mi lisisinang teren, nenu xa uga raba i min.

<sup>6</sup> Um taba amisix i mi leveloklox anarong, la ik lok momo atla ut kis esogo amisik min.

<sup>7</sup> Loorong i nunu saga at Leeme Silok, ni Lanaraavuk. Nom labalamu lexen at Leeme Silok naba tu amisik, kuren la lixitkis orong teren nabak lox amisik.

<sup>8</sup> Loorong naba xoxo alis ka limixin axap di munepen min, la ni naba xoxo alis axap nedi di belengatngas tin.

<sup>9</sup> La ni naba sele utut kepe axap di ngan laxao, imsum at laxairing, dola ni na ru asuvos.

Leeme Silok naba lox asi axap di mi lebelemamao ren, la laxao naba rin asonao di.

<sup>10</sup> La kopmen tara at livipisik li atnedi noxo sepsu at lanmet. Loorong naba sep kepe axap di.

<sup>11</sup> Di epaase li la di sevut li lev-entaangas kusu dinaba lok kapmek loorong, ketla di noxo lox epovo i.

<sup>12</sup> Ni naba xala di mi levesoso ren, la dinaba repukus la dinaba sixiro.

<sup>13</sup> Leeme Silok, ma emi asu minu, ti mo langsung lolos taram! Manabak pixon la mana emi asu mi lev-eloklok taram i lolos aleng.

## 22

### *Lanteng At Laradi Mekmeres*

<sup>1</sup> Moroa rak, Moroa rak, tila u raba rulu ia? Arang teng pupuse aleng ti loklok tooro ram, ketla uxu lok tooro ia.

<sup>2</sup> Moroa rak, a toro ru at lax-analeng kangking, la uxu vorang lisingising tarak. La at levengkanimin bok a toro ru, ketla uxok lox amamana labalak.

<sup>3</sup> Ketla nenu ut kis at loxonin orong taram ngan Laradi Melemelengan. Nenu mun limixin me Israel di emi asu minu.

<sup>4</sup> Lavalabat atnema diga nunu saga ram. Diga nunu at levelinga ram, la uga lox asepsu di.

<sup>5</sup> Diga ro ke ram la di goxo ekip tangarang mi levenaniu. Diga nunu saga ram la uga lox epovo levendox-oma atdi.

<sup>6</sup> Ketla nia xopmen bok ba ana ngan laradi, a lok ngan ta laxalon. Limixin axap di lele abulubun ia!

<sup>7</sup> Limixin di ven ia, la di paase aksaksa ria. Dim lem gam tia la dira piriapat patlak.

<sup>8</sup> Dik lok tia xeretna, “Nenu ga nunu saga at Leeme Silok, tila neni xopmen na mulus ti lox asepsu u? Dola Leeme Silok i vavara ru, tila ni xopmen na lok tooro u?”

<sup>9</sup> Nenu mene, ne Moroa, uga lox asu avukar ia at lebelen ne naga at laaleng pipisik tarak. Nenia nove aga xadede, uga lok tatao avukar ia.

<sup>10</sup> Agam doma saga ram, ga ru xaka i at laaleng ne naga ga visix ia ren, la at levenaleng axap tarak, nenu mun ne Moroa rak.

<sup>11</sup> Nemen uta nemen paxalom basinge ia! Levenmumuat mo i aurret, la kopmen tara ri lok tooro ia.

<sup>12</sup> Limixin solo di munepen minia, la di tu xangkan ia ngan ta laxanbulumaxao temes, ngan ta laxanbulumaxao mukmusak boro Basan.

<sup>13</sup> Di vavangangba la di booro ngan ta lubunglaion, di gagas ti atat lalais ka ia ngan levempanga anan.

<sup>14</sup> Lolos tarak ira xap pam, i xap ngan laxadan i soli su ri laxangka. Levennin etudum at levesi rak ira rem kida vam. Labalak i umsu mi lainmarat i silok aleng.

<sup>15</sup> Luxukung tarak ira vatmang axap ngan laxakup, la lagam tarak i xis pe langsung. Nenu xa u ke xepe ia la ak midi ro at laxangka xusu ana met.

<sup>16</sup> Libinam tadi at limixin kakapmek nanga di ru xangkan pam ia. Di lok ngan ta lubang man di xala sa rak, di atat lais koxorop luxangkedek tarak mi lukngak.

<sup>17</sup> Ara gelegen axap. Limixin munepen minia di reven tooro ia la di paase aksaksa ria.

<sup>18</sup> Diga lu buru mi lengkon uat kusu ti lok kisip ka nege ba lok ka levempanga singsiga rak.

<sup>19</sup> O Leeme Silok, nemen uta on basinge ia! Ude, una lox asepsu soso mun ia!

<sup>20</sup> Lox asepsu ia basinge lemparise at limixin esep. Lox asepsu ia basinge na lubang man.

21 Lox asepsu ia basinge na lubunglaion. Axo epovo kusu ti sixiro basinge na laxanbulumaxao sio.

22 Nenia anaba tong asu laasen taram ti luvutnetak. Anaba emi asu minu ro at lovtotpot buru atnedi.

23 Nemi livisik li at ne Jakop me Israel, mi lok ngan lavasaxaruki at Leeme Silok, mina vemi asu amisik min. Mina raba asinorong i la mina lotu saparap amisix i!

24 Leeme Silok ixo raba sinta limixin baava dip kip levesongsongot. La ixo raba rulu bok di, ketla ing tonga di do di toro ri loklok tooro.

25 Anaba emi asu mi laasen taram to at lovtotpot buru silok, ti levempanga ugara lok pam i. Anaba tu ro melamgo atnedi di lotu saparav u la anabaplavang tu mi levempanga nia aga xaape min.

26 Limixin banbalo dinaba an mais at leveluxa di vavara rin. Nedi di repukus taba Leeme Silok, dinaba emi asu min. A sing ne Moroa na lox anarong di xusu dina ngasang kobot amisik at levenaleng axap i tu melamgo!

27 Limixin boro at larabung mixin axap dinabam domasu amisik at Leeme Silok. Boro at lengkot axap at lavatbung menemen, dinaba repukus taba i, la levenasen bantuxu axap dinaba lotu saparav i.

28 Leeme Silok neni Loorong Silok mavana at limixin axap. La neni im gomgonga limixin at levenabung mixin axap.

29 Limixin dit las nedi, dinaba xis tiktikbu saparav i. Limixin at lavatbung menemen axap dinaba xis tiktikbu saparav i.

30 Lavaola melemu dinaba gugu taba amisix i. Limixin dinaba tere avolo na loklok at Leeme Silok ti lavaola mo dinabat pot melemu.

31 Limixin kovisi dina visik nedi, dinabaklen i do, "Leeme Silok ga lox asepsu limixin teren basinge limixin munepen midi."

## 23

### *Lisingising At Laradi Loklok Tatao Sipsip*

1 Leeme Silok, ni laradi ik lok tatao ia ngan laradi ik lok tatao levesipsip teren. Kuren la a ruuna ka axap levempanga ak pakes tin.

2 I lox amdi ia ro at lenep kangka i ruuna levempivilis avukat kusu ana lok mamana ren, la i lam kaka box ia uto at laradan i sesen atnaasan kusu ana inin. 3 Neni im taba ia mi lolos maxat. La im lam ase ia keneng at larangas mokmokso, ngan ni gara vaase ali vam i.

4 Keke i do ana vas beles keneng at langsung lamain bonot, nia noxo marat. Leeme Silok, u nemen eburu amisik minia, luvuukup mi lakdak taram ik lox amenemen amisix ia.

5 U lok gagas li leluxa silok tia, kuren la limixin munepen minia, dinaba ven ia, dola una seega rangarang ia ngan laradi silok. La unantu aumsu aleng lavanga inin tarak.

6 Aklen i do loklok nunuan mi labalamu ram naba kuxun amisik keneng at lorooro axap tarak, la loogu ram naba lok ngan loogu aulis tarak at levenaleng axap nia anaba rooro ren.

## 24

### *Loorong Silok*

1 Lavatbung menemen la levempanga axap di nemen keneng teren, ni at Leeme Silok. Lavatkangka mi levempanga axap di rooro, ateren mun.

2 At lurutu kaxat, neni ga lok li laxangka ro mavana at lamaxat. La ni ga lok li bok levenamkumkun to xa maxopok at lisimaramain.

3 Loklok atnege i lox avukat kusu neni ba epovo na vas urut uto vana at lakaana at Leeme Silok ti lotu saparavi? Loklok atnege i lox avukat kusu neni ba epovo na vubeles uto xeneng at loogu laplavang teren i xaala?

4 Nedi mene di dadat at loklok atnedi la lodoxoma atnedi, la kopmen dina lotu saparap laxampoovo

moroa la kopmen dina tong asu leveng kakaape xaxarang.

<sup>5</sup> Leeme Silok naba lox anarong di. Moroa ni Luntoo Avolo atdi la naba tong atkatla li i ridi do nedi limixin sepse.

<sup>6</sup> Limixin kerepmo di ngaongao ri ne Moroa, la dit pas amisik ti lotu saporap ne Moroa at ne Jakop.

<sup>7</sup> Mina suang soso mene lempatban at langas uat, mina suang axap lempatban diga lox i ganoxa kusu Loorong Silok na vubeles.

<sup>8</sup> Nege na Loorong i silok solo? Ni Leeme Silok la Lanaraavuk. Lolos teren i volo la ik sak tup mi limixin munepen min at levenaleng at leesepe. Neni Leeme Silok.

<sup>9</sup> Mina suang soso mene lempatban at langas uat, mina suang axap lempatban diga lox i ganoxa, kusu Loorong Silok na vubeles.

<sup>10</sup> Nege na Loorong i silok solo? Neni Leeme Silok, la Lanaraavuk. Neni Loorong Silok.

## 25

### *Lisingising Ti Loklok Tatao La Logongonga At Leeme Silok*

<sup>1</sup> O Leeme Silok, a lok lisingising tu mi lorooro axap tarak.

<sup>2</sup> O Moroa rak, a nunu mene ram. Una lok tooro ia kusu ana sak tup mi limixin munepen minia la nia anoxo ruuna ka lainmangan at leesepe. Nemen uta ke xepe di xusu dina sev asubu ia la dina lok momo aksaksaria.

<sup>3</sup> Limixin di nunu saga ram, limixin munepen midi noxo epovo na sak tup minedi, ketla nedi mene ding tonga viribang at levelinga ram, dinaba subu at leesepe.

<sup>4</sup> O Leeme Silok, una anasa ia mi leventaangas taram. Una lox axasev i ria.

<sup>5</sup> Una anasa ia xusu ana rooro mu asu levelinga ruturun taram, atla nenu ne Moroa rak, la uk lox asepsu ia. A nunu saga amisik taram.

<sup>6</sup> O Leeme Silok, una doma amlong ti lebelemulus taram mi labalamu

lexen taram, ugara lox asuusu vam i, ga ruka i ganoxa at lereot.

<sup>7</sup> Una doxoma xepe axap leveng kakapmek la levesoogong tarak, aga lok pam i, ganoxa ga laau mun be ia. O Leeme Silok, una domasu rak mumu labalamu lexen taram mi loklox avukat!

<sup>8</sup> Loklok at Leeme Silok in manton tino la i lox avukat. Kuren la i lox ase limixin kakapmek mi langas i epovo dina mumu asu i.

<sup>9</sup> Nedi dik lox axakalik di, neni im gomgonga di at langas ik mokso. La i lox ase bok di mi lavavara ren.

<sup>10</sup> Nedi di mumu asu lekabus teren eburu mi levempapaase ali ren, neni im gomgonga nedi mi loklok tuturun la labalamu.

<sup>11</sup> Leeme Silok, una lox epovo laxakaape ram la kerepmo una doxoma xepe laxaloklok kakapmek axap tarak, atla a ruuna laxaloklok kakapmek solo.

<sup>12</sup> Nedi ding tonga res at Leeme Silok, ni naba anasa di mi langas dina mumu asu i.

<sup>13</sup> Limixin kerepmo dinaba ngasang kobot amisik la laxamdak mi laxaalik atnedi dinaba ruuna ka mo lenep kangka aulis atdi.

<sup>14</sup> Leeme Silok neni lentangas atnedi ding tonga res teren, la neni i lox amuat levelinga at lekabus teren eburu minedi.

<sup>15</sup> Am tem saga amisik ti Leeme Silok ti loklok tooro, la ik lox asepsu amisix ia basinge levenaniu.

<sup>16</sup> O Leeme Silok, una doma amlong tia, la una lox asuusu lebelen tuntun tia, atla ak lok tuntun la kopmen tololos tarak.

<sup>17</sup> Una lox asooloo ia basinge lodoxoma saasaa, la una lox asepsu ia at laxanmumuat tarak.

<sup>18</sup> Una doma loklok tuntun mi laxaloklox asongot tarak, la una doxoma xepe laxangkakapmek axap tarak.

<sup>19</sup> Una doma mumu i do buaang nedi limixin di munepen minia la di belengatngas tia.

<sup>20</sup> Una lok see rak, la una lox asepsu ia, kusu limixin di munepen minia di noxo sak tup minia. A vot

pasa u kusu una xubak pe ia basinge di.

<sup>21</sup> Nia a sing u xusu unaba lok tatao amisix ia atla a nunu saga ram, la loklok tarak i nunuan la i ruturun.

<sup>22</sup> O Moroa, una lox asepsu leme Israel basinge levenmumuat axap atdi. Una lox asepsu leme Israel, nedi limixin tinotno ram.

## 26

### *Lisingising At Laradi Manmanton*

<sup>1</sup> O Leeme Silok, una tong atkatla li i ria do, nenia laradi sepsen, atla nia a nunu saga mun taram la ak lox amisik levempanga ik mokso.

<sup>2</sup> Una lok tong pen axap na lorooro rak, la una ven mumu avukar ia. La una viila mumu lavavara axap keneng at labalak eburu mi lodoxoma rak.

<sup>3</sup> Una lox i na atla um gomgo ria mi labalamu lexen taram, la um lam amisix ia at lavatpas tarak la kopmen tinotno una ke aie xepe ia at tengkon aleng.

<sup>4</sup> Nia xopmen ana vemu eburu mi luvuttadi ekarakterat. Nia axot kis esogo mi luvuttadi sosolo arup.

<sup>5</sup> Nia axo vesum mi limixin kakapmek, la a tu asepsu basinge di.

<sup>6</sup> O Leeme Silok, na a gos lukngak ti lox asuusu i do nia laradi sepsen. La at pas emi asu kangkan loxonin laplavang taram.

<sup>7</sup> A vixan loxompixan ti tong avukat tu la a tong asu levempanga nunuan ugak lox i.

<sup>8</sup> O Leeme Silok. A vara rinotno na loogu laplavang, ua nenu u nemen teren. Ni na loxot lisisixam taram i nemen e.

<sup>9</sup> Nemen uta sele utut kepe ia eburu mi limixin kapmek, la una ke ia basinge levenmumuat uba raba limixin sepsev amet min.

<sup>10</sup> Nedi limixin dik lox amisik laxakapmek la di gagas amisik ti siam ka lempilas ti lox alolos lenngitngit atdi.

<sup>11</sup> Ketla nenia, ak lox amisik leveloklok in manton. Una lox asuusu

lebelen tuntun tia la una lox asepsu ia basinge di!

<sup>12</sup> La xerepmo nia ana nemen avukat basinge levenaniu. La anaba emi asu mi Leeme Silok to at lovtopot buru at limixin teren.

## 27

### *Lisingising Emi Asu*

<sup>1</sup> Leeme Silok ni Laxasep la Laradi Loklox Asepsu rak. Nia anoxo marat tangarang ka teta. Leeme Silok neni Loogu Matmatkun tarak ti pe levenaniu. Kuren la nia noxo marat bok ba.

<sup>2</sup> Dola limixin kakapmek dina esep tangarang minia xusu dina sev amer ia, dinaba sak kikixin la dinaba subu.

<sup>3</sup> Keke i do buaang atnedi limixin esep dina ru xangkan ia, nenia noxo marat. Dola limixin munepen dina lox agagas do dina sev asi ia, nenia move anaba nunu saga at ne Moroa.

<sup>4</sup> Nia ara sing pam Leeme Silok mi legesa vanga. Legesa vanga mene nia a vara rin, do at lorooro axap tarak ana nemen ia ro xeneng at loogu ren, la anaba pavanga at leveloklok nunuan teren la nia anaba ngising i kusu nam lam lorooro rak.

<sup>5</sup> At levenaleng kakapmek neni naba lox ali pe ia ro xeneng at loogu ren. Neni naba xubak pe ia ro xeneng at loogu laplavang, la ni naba vaxaxis aurur ia uto vana at langsgan luuat kis silok kusu anaba nemen matmatkun teren.

<sup>6</sup> La kerepmo anaba sak tup mi limixin munepen minia do dina ru xangkan ia. Anabaplavang saparap Leeme Silok mi luxupkup momo ro xeneng at loogu laplavang teren. Anabak pixan, la ana emi asu min.

<sup>7</sup> O Leeme Silok, una ronga ia, dola ana toro ru! Una lox asuusu lebelen tuntun tia la una siam mu ia!

<sup>8</sup> Uga lok tia, "Ude u, una lotu saparav ia." Aga vorang i do, "Leeme Silok, anaba vot pasa u."

<sup>9</sup> Kuren la nemen gat uta lipe rak!

Nemen uta belemamao ia. Nemen uta musak kepe ia, lasaxaruki ram, atla nenu Laradi Loklok Tooro rak. Nemen uta on basinge ia! Nemen

uta raba rulu ia atla nenu ne Moroa, Laradi Loklox Asepsu rak.

<sup>10</sup> Keke i do ne tamak mi ne naga duna raba rulu ia, ketla nenu, Leeme Silok, unabak lok tatao ia.

<sup>11</sup> O Leeme Silok, una lox ase ia mi langas sala u vara i do nia ana mumu asu i. La unam lam ia at langas nunuan, atla a ruuna buaang limixin munepen.

<sup>12</sup> Nemen gat uta on taba rulu xepe ia ri levengkikngen limixin di munepen minia. Di xaxarang taba amisix ia, la di lok momo aleng ti vaaban ia.

<sup>13</sup> Nia akleklen i do anaba ven luvukat at Leeme Silok at na lorooro.

<sup>14</sup> Kuren la minam doma ngangais ti Leeme Silok, la mina lolos. Nemen gat mita doma abulubun kepe i, mina nunu saga at Leeme Silok.

## 28

### *Lisingising Ti Loklok Tooro*

<sup>1</sup> O Leeme Silok, nenu Lentupe ria, na nia a ro ke ram! Una ronga lanteng tarak! Dola u noxo ronga ia, nenia anaba lok ngan nedi diba si uto xopok at lemenemen at labarongan.

<sup>2</sup> Una ronga ia at loxonaleng nia anang teng saparav u ri loklok tooro, la at loxonaleng ana xip aurut lukngak ti loogu laplavang taram i xaala aleng.

<sup>3</sup> Nemen gat uta lii lumumuat tarak at loxonaleng u vaase asi limixin kakapmek, la eburu minedi dik lok libilinga. Nedi limixin levelinga atnedi ik sixit nunuan, ketla lodoxoma atdi i umsu mi loklok kakapmek.

<sup>4</sup> Una lox asongot nedi mumu leveloklok kakapmek atnedi eburu mi lempanga bilinga digara lok pam i. Una lox asongot nedi mumu xa leveloklok atnedi, la una raba bok nedi mi luunun i epovo at loklok atdi.

<sup>5</sup> Kopmen dina ven kisip levempanga Leeme Silok gara lok pam i, koplā at levempanga neni ga rudum li i. Kuren la ni naba lox asongot di la naba sele utut kepe axap tino di.

<sup>6</sup> Leemi asu ri Leeme Silok, atla ni ira ronga ka vam lanteng tarak ti loklok tooro.

<sup>7</sup> Leeme Silok ik lok see rak, la i tupe ia. Labalak it kis saga ren, neni im taba ia mi loklok tooro, la ik lox amomo box ia. A tong avukat tin mi livikpixon momo.

<sup>8</sup> Leeme Silok ik lok see at limixin teren la neni i lok ngan lenban tidi, la ik lox asepsu mo loorong ni ga soxolik ka i.

<sup>9</sup> Leeme Silok, una lox asepsu limixin taram, la una lox anarong nedi limixin manmanton taram. Una nemen ngan laradi loklok tatao sipsip tinedi, la mo loklok tatao ram noxo xap.

## 29

### *Laxaka At Leeme Silok Keneng At Lamanman Silok*

<sup>1</sup> Nemi limixin lolos toxun pana at laxalibet, mina emi asu mi Leeme Silok, mina emi asu min mumu lisisixam la lolos teren.

<sup>2</sup> Mina emi asu mi laasen silok at Leeme Silok. Mina xis tintiding to melamgo at Laradi Melemelengan do ni na ru asuvos.

<sup>3</sup> Limixin di ronga laxaka at Leeme Silok to at levengkot axap at laras la lagale lo Moroa silok ik lox asuusu leretepaavat. Laxaka at Leeme Silok i onon to mavana at laras aaxa.

<sup>4</sup> Limixin di ronga i atla laxaka ren i silok la i lolos aleng.

<sup>5</sup> Laxaka at Leeme Silok ik sak pirivit larauna Seda (Cedar), keke i do ni larauna i silok aleng to Lebanon.

<sup>6</sup> Neni inglong angne larakaana ro Lebanon kusu dinat los ngan laxan-natnat bulumaxao, la lakaana Emon nat los ngan lanat bulumaxao temes.

<sup>7</sup> Laxaka at Leeme Silok ik lox asuusu lavanga i mam.

<sup>8</sup> Laxaka ren i lox angne lamatbin, la ingnengne bok lamatbin to Kades.

<sup>9</sup> Laxaka at Leeme Silok ingne larauna Ok la it mas kepe larapavaxan una, at loxonaleng limixin axap to

xeneng at loogu laplavang teren din-abap kup silok keretna, “Leemi asu ri ne Moroa.”

<sup>10</sup> Leeme Silok ni Loorong mavana at lisimaramain. Ni im gomgonga amisik limixin ngan Loorong Avolo la kopmen tekavaxap teren.

<sup>11</sup> Leeme Silok im taba lolos limixin teren la ik lox anarong nedi mi limila.

### 30

#### *Lisingising Ti Tong Avukat*

<sup>1</sup> Leeme Silok, nenia a emi asu minu, atla nu uga lox asepsu ia. La uga rupe limixin munepen minia di goxo lok momo aksaksa ria.

<sup>2</sup> O Leeme Silok, nia agang teng saparav u ri loklok tooro. Nenu ne Moroa rak, la uga lox aroo ia basinge lanmeres.

<sup>3</sup> La uga lox asepsu ia basinge lamaaut atla ga auret kusu ana met. Nia aga mumu langas uto xa xopok at lemenemen at labarongan, ketla nenu uga lox asepsu ia basinge lanmet.

<sup>4</sup> Nemi luvuttadi ruturun teren, minak pixan emi asu ri Leeme Silok! Mina doma lempanga silok Laradi Melemelengan gara lok pam i, la mina tong loklox avukat tin.

<sup>5</sup> Lumukmusak teren kopmen nak lox abao, ketla loklok nunuan teren i nemen at levenaleng axap at lorooro rak. Kuren la levengkamkabili dan ba sesen su at luxatli rak at laxanimin, ketla lomomo naba ravasu maxantamak suubu.

<sup>6</sup> Nia aga nemen avukat, la aga doma i do, tepanga noxo sev asi ia.

<sup>7</sup> Leeme Silok, ugak lok lempanga nunuan tia. Uga rupe ia ngan loogu matmatkun to at lempatkaana silok. Ketla melemu uga lox alipe manga rak la nia aga marat.

<sup>8</sup> Leeme Silok, gano aga ro ke ram. Aga ngising aleng u ri loklok tooro keretna.

<sup>9</sup> O Leeme Silok, uba ruuna ka lavanga salai at lanmet tarak? Luunun salai uba ruuna ka i do nia ana si uto at lamaaut? Kereva, i epovo limixin

diga met pam dina emi asu minu? I epovo bok dina tong asu lebelen tuntun lexen taram?

<sup>10</sup> Leeme Silok, una ronga ia, la una lox asuusu lebelen tuntun tia! Lok tooro ia, Leeme Silok!

<sup>11</sup> Ketla monga lingina ura lok kun pam lanbulu rak mi liriti momo. Ura lok kepe vam lumumuat at labalak, la ura lox aumsu ia mi lososoro.

<sup>12</sup> Kuren la nia noxo vamngus, anak pixan emi asu minu. Leeme Silok, nenu ne Moroa rak. Anaba tong avukat amisik tu.

### 31

#### *Lisingising At Laradi I Nunu Saga At Ne Moroa*

<sup>1</sup> Leeme Silok, na a vot parav u xusu unak lok see rak. Nemen uta ke avolo limixin munepen minia dina sep kapmex ia la ana lok mamangan. Loklok taram in manton tino, na a sing u do una lox asepsu ia basinge di.

<sup>2</sup> Una ronga ia, na! Una lox asepsu ia basinge di! Nenu una nemen ngan Loxot Loklox Alipe rak, kusu una lok see rak. La una rupe avukar ia, kusu anaba nemen avukat, la limixin munepen minia di noxo sep kapmex ia.

<sup>3</sup> Nenu mun Loxot Loklox Alipe rak la Lentupe ria. Unam gomgonga ia, la unam lam ia at nom langas nenu ga xaape min.

<sup>4</sup> Una kubak pe ia basinge lelixo no diga lok li ngais ia min. Una xua pe ia mi lolos taram basinge laniu.

<sup>5</sup> A lok li loroonan tarak at lukngam. Leeme Silok, nenu ne Moroa u ruturun amisik ti limixin tarak, la unaba lox asepsu ia.

<sup>6</sup> U belengatngas tinedi di lotu saparap leven moroa xaxarang. Ketla nia a nunu saga ram.

<sup>7</sup> Anaba momo la ana sosoro mumu nom labalamu lexen taram. Ura ven pam laxasongsongot nia a ruuna i. La uklen bok levenmumuat tarak.

<sup>8</sup> Nenu u goxo ke xepe limixin munepen minia, gita xoxo ka ia. Nu uga lok tooro ia la nia aga nemen



avukat, la nia agat pas tangtagap at lavavara axa rak.

<sup>9</sup> Leeme Silok, una lox asuusu lebelen tuntun tia, na nia a ruuna langangan lumumuat. Luxatli rak ira ung axap at lerengteng. Lengkot tarak ira molo axap.

<sup>10</sup> Lanbulu rak at laxanmumuat i lox atmut lorooro rak. Ara molos axap at na laxanmumuat tarak, labantuxu rak ira meramun axap.

<sup>11</sup> Limixin munepen minia, la nedi di nemen aurer ia, di ven ia la di paase aksaksa ria mumu lanmeres tarak. Nedi dikleklen ia, dik marat tarak. Dola di ven ia at pas to at langas, dik sixiro rak.

<sup>12</sup> Limixin axap dira domampe vam ia, ngan ta dola agara met pam. Nia a lok ngan ta lavanga no digara lu xepe vam min.

<sup>13</sup> A ronga buaang limixin munepen di paase siksikma mu ia. Lanmarat silok i suxuna ia. Di seput li leventaangas kusu dina rebeng alis ia la dina sev amer ia.

<sup>14</sup> O Leeme Silok, lununu rak i tu mun taram, la nenu ne Moroa rak.

<sup>15</sup> Nia a nemen amisik keneng at loklok tatao ram. Una lox asepsu ia basinge limixin munepen minia, la basinge bok nedi di lox asongor ia.

<sup>16</sup> Nia lasaxaruki ram, la unak lok tatao ia mi lebelemulus taram. Una lox asepsu ia atla u ruuna labalamu lexen.

<sup>17</sup> Leeme Silok, na nia a ro ke ram. Nemen gat uta ke avolo limixin munepen minia dina lox amangan ia. Keke nedi limixin bilinga dina lok mamangan. La dina rakdu aleng kusu dina lok pilo mun at loxonaleng dina si uto xopok at lemenemen at labarongan.

<sup>18</sup> Una vamngus limixin di xaxarang, nedi dit las di la dim simi aurut di, di paase aksaksa mumu limixin manmanton, la di paase asi di.

<sup>19</sup> Nenu u umsu mi lempanga avukat, mo ura gagas li vam i kusu na lox asuusu i rinedi dim taba asinorong u! Uk lok see atnedi di nunu

saga ram, la limixin axap di ven kibis i.

<sup>20</sup> Uk lox alipe nedi maxopok at loklok tatao ram basinge lodoxoma ali at limixin kapmek la uk lox amaaui di basinge levelinga aksaksa at limixin munepen minedi.

<sup>21</sup> Leemi asu ri Leeme Silok! Ni ga lox asuusu nom labalamu nunuan teren tia at laaleng limixin munepen minia diga ru xangkan ia ri leesep!

<sup>22</sup> Nia aga marat la nia aga nua i do ni ga lok kepe ia basinge loklok tatao ren. Ketla ni ga ronga lanteng tarak, at levenaleng nia aga sing i ri loklok tooro.

<sup>23</sup> Nemi luvuttadi mi nunu saga at levelinga at Leeme Silok. Lebelen nemi na ngaongao rin. Leeme Silok ik lok see atnedi luvuttadi ruturun teren. Ketla ni ik lox asongot nedi dit las di, mo losongsongot i epovo rinedi limixin kerepmo.

<sup>24</sup> Nemi axap limixin mina doxoma ngangais ti Leeme Silok. Mina tu tuxuruxun la minam doma abelemes.

## 32

### *Lavapaase Asu Laxakapmek Mi Lodoxoma Xepe*

<sup>1</sup> Nedi, dira sepmus pam basinge laxakapmek atnedi, dina momo. Laxakapmek atnedi ne Moroa ira doxoma xepe vam i.

<sup>2</sup> Do taradi go la Leeme Silok kopmen na vuse ka taxapmek teren la kopmen bok taxaxarang teren, ni na lok momo.

<sup>3</sup> Ga ruka i nia goxo vaase asu laxakapmek tarak, agang teng amisik at levenaleng kangking la kanimin, kuren la labantuxu rak ira xat molos.

<sup>4</sup> At levenaleng kangking la kanimin, nenu Leeme Silok ugap sev aleeng ia. Kuren la lolos tarak gara ravasu axap pam. Ik lok ngan laxangking at lamaares ik lox avatmang laxangka.

<sup>5</sup> La na nia aga vaase asu laxakapmek tarak tu, kopmen a goxo lipe toxot teren basinge u. Aga vara i

do ana soxomus laxakapmek axap tarak tu, la uga doxoma xepe axav i.

<sup>6</sup> Kuren la i lox avukat do limixin tuturun taram dinaba sing saporav u at levenaleng at levenmumuat. Dola langsung lekarakat i rava beles mu nedi ngan ladanut, kopmen noxo lox abaava di.

<sup>7</sup> Nenu Loxot Loklox Alipe rak, la unaba lox asepsu ia basinge levenmumuat. Ak pixan momo at loklok tooro ram, atla nenu uk lok see rak.

<sup>8</sup> Leeme Silok i lok keretna, "Nia anaba lox ase u mi langas unabat pas teren. Nia anaba anasa u, la anaba vaase aronga box u.

<sup>9</sup> Nemen gat nu tangtangu ngan la os koplak dongki. Limixin di lok li loxonaen at lungusno at lavaros la di xoxo alu labanoos to melemu at lavatlak teren, kusu na rongga res atdi."

<sup>10</sup> Limixin kakapmek dinaba ekip tangarang mi laxasongsongot, ketla nedi di nunu saga at Leeme Silok, di nemen ma xeneng at loxokok at labalamu lexen teren.

<sup>11</sup> Nemi limixin manmanton, mina momo la mina sosoro at levempanga Leeme Silok gak lox i. Nemi ming tonga res teren, minap kup momo.

### 33

#### *Loxompixan Emi Asu*

<sup>1</sup> Nemi axap limixin manmanton, minap kup mi lomomo mumu levempanga Leeme Silok gak lox i. Nemi axap ming tonga res teren, mina emi asu min!

<sup>2</sup> Mina tong loklox avukat ti Leeme Silok mi lempat taaleng. Mina vixan tin mi leven gita.

<sup>3</sup> Mina vixan loxompixan maxat saporav i. Mina sep maraanu lerengteng at ligita, kusu naba reng nunuan, la minap kup mi lomomo!

<sup>4</sup> Levelinga at Leeme Silok i ruturun, la i epovo do ata nunu saga at leven gugu ren.

<sup>5</sup> Leeme Silok i vavara mo leveloklok in manton la i ruturun. Labalamu lexen teren i umsu at lavatbung menemen.

<sup>6</sup> Leeme Silok ga rudum li laxalibet mi lavapaase mun teren. Laxangking, lagaaling mi laxampenti ga ravasu mun at levelinga ni ga tong asu i.

<sup>7</sup> Ni ga lok bubua laras at lara loxot, la ni ga lok li lisimaramain utou xa xopok at loxot teren.

<sup>8</sup> Limixin at lavatangka axap, mina lotu saporap Leeme Silok! Nemi axap limixin at lavatbung menemen minam taba asinorong i.

<sup>9</sup> Ni ga vaase mene, la lavatbung menemen ga raut. At lavapaase mun teren levempanga axap ga ravasu.

<sup>10</sup> Leeme Silok ik lox amun lodoxoma ali at limixin amgongo at levenabung mixin petpes la kopmen dinak lox epovo levendoxoma bele-mamao atnedi.

<sup>11</sup> Ketla leven doxoma gagas teren i nemen amisik, la mo do ni i doma i xusu na lok tavanga, ni nabak lox epovo amisik axa i.

<sup>12</sup> Nedi lubang mixin ne Moroa it kis ngan Leeme Silok atnedi, dina momo, atla Moroa ga soxolik ka di ngan teren axa, dina momo.

<sup>13</sup> Leeme Silok ik milix asi boro vana laxalibet, la i reven limixin axap.

<sup>14</sup> Ni it kis tovana at loxot kitkis orong teren, la ik milik asi ri limixin axap di nemen at na lavatbung menemen.

<sup>15</sup> Neni xa ga lox araut lodoxoma atnedi la ikleklen axap levempanga dik lox i.

<sup>16</sup> Loorong at lavatbung menemen ixo epovo na sep kepe axap limixin munepen min mumu i do i ruuna buaang limixin esep la di lolos aleng. La laradi esep ixo sak tup mi limixin munepen min mumu lolos axa ren.

<sup>17</sup> Laxan os ti leesep ixo epovo ri sev asi limixin munepen mi lolos axa atdi. Lolos silok atnedi ixo epovo na lox asepsu tara.

<sup>18</sup> Ketla Leeme Silok i reven tatao nedi dik lok ngangao aleng teren, la nedi di nunu saga at labalamu lexen teren.

<sup>19</sup> Neni ik lox asepsu di basinge lanmet, la ni ik lok tatao nedi at levenaleng at loroxo.

<sup>20</sup> Ata nunu saga at Leeme Silok. Neni Lurutu See Pe la Laradi Loklok Tooro atdik.

<sup>21</sup> Ata momo saga ren, la ata nunu at laasen teren i melemelengan.

<sup>22</sup> O Leeme Silok, ma sing u do labalamu lexen taram na nemen eburu amisik minema. La ma doxoma ngangais tu.

### 34

#### *Leemi Asu Ri Luvukat At Ne Mo- roa*

<sup>1</sup> Nia anaba tong loklox avukat amisik ti Leeme Silok, la anoxo xap mun at leges aleng ti emi asu min.

<sup>2</sup> Nia anaba emi asu min ti levempanga ni gak lox i. Nedi limixin baava dina rongga i la dinak lek.

<sup>3</sup> Nedik eburu ata tong asuusu i ri limixin do Leeme Silok i silok aleng. Nedik eburu axap ata emi asu mi laasen teren!

<sup>4</sup> Nia aga sing saporap Leeme Silok la ni ga rongga ia. Ga lox asepmus ia basinge levenanmarat axap tarak.

<sup>5</sup> Limixin baava diba ven tu ren la dinabak lek, la di noxo doma abulubun.

<sup>6</sup> Luvuttadi baava di toro ke ren, la ni ing tonga nedi, la ik lox asepmus di basinge laxanmumuat axap atnedi.

<sup>7</sup> Laangelo at leeme Silok ik lok tatao nedi dim taba asinorong i, la ik lox asepsu nedi basinge levenaniu.

<sup>8</sup> Nemi xa mina ven terek luvukat at Leeme Silok. Laradi ik soxolik ka loxokok at Leeme Silok, ni na sosoro.

<sup>9</sup> Nemi axap limixin teren, minam taba asinorong Leeme Silok. La nedi ding tonga res teren, di ruuna xobot kaka levempanga axap dik pakes tin.

<sup>10</sup> At lepenaleng lubunglaion dik toxo la dik pakes ti levempanga anan, ketla nedi ding tonga res at Leeme Silok kopmen dinak pakes ti levempanga avukat, atla Leeme Silok im taba amisik di.

<sup>11</sup> Ude nemi, laxamdak loklox ase, la mina rongga rak, la ana anasa nemi

kusu minaba raba asinorong Leeme Silok.

<sup>12</sup> Do nemi mi vara i xusu mina ruuna lorooro nunuan, la mi vara i xusu mina ven levenaleng avukat,

<sup>13</sup> mina ke xepe lavapaase kapmek, la mina axav i at laxaxarang.

<sup>14</sup> La nemi mina ke xepe laxakapmek la minak lok luvukat, la mina lolos ti lok ka lenmila keneng axap at lorooro axap atnemi.

<sup>15</sup> Atla Leeme Silok i reven tatao limixin manmanton la ing tonga res at levesingising atnedi.

<sup>16</sup> Ketla ik sok tixirixes kepe nedi dik lok laxakapmek, kusu dola dina met, limixin axap dinaba domampe soso mun nedi.

<sup>17</sup> Limixin manmanton di toro ke at Leeme Silok, la ni ing tonga res atnedi. Neni ik lox asepsu di basinge levenmumuat atnedi.

<sup>18</sup> Leeme Silok i gagas amisik ti lok tooro nedi dik lok tuntun, la i lox asepsu nedi ua lodoxoma abulubun i suxuna rinotno di.

<sup>19</sup> Do laradi nunuan na ekip tangarang mi laxanmumuat solo, Leeme Silok naba lox asepmus i basinge axap mo lempanga.

<sup>20</sup> Leeme Silok naba lok tatao axav i, la kopmen toxosi ren naba repit.

<sup>21</sup> Limixin kakapmek dinaba met nop loklok kakapmek atdi. Nedi di belengatngas ti limixin manmanton, dinabap kip ka losongsongot.

<sup>22</sup> Leeme Silok naba lox asepsu limixin teren. Nedi dinaba repukus taba i ri loklok tooro ren, di noxo ruuna ka lumumuat mavana atdi.

### 35

#### *Lisingising Ti Loklok Tooro*

<sup>1</sup> Leeme Silok, una tupe nedi di tu tangarang ia, la una esep eburu minedi di vara esep minia!

<sup>2</sup> Una lok kaka lenban taram la una siga lisingsiga esep taram la una lox asepsu ia basinge di.

<sup>3</sup> Una rebeng aurut lososo mi laasop taram ti esep eburu minedi nom di xaxala mu rak do dina sev ia.

Una xaape do unaba lox asepsu ia basinge di.

<sup>4</sup> Nedi nom di lok do, dina sev amer ia, una sev asi axap di kusu dinaba lok mamangan. Nedi nom di vengir ia, una sax amlong di la una lox ekarakat lodoxoma atnedi,

<sup>5</sup> la dina lok ngan levempavagam mang, lamanman it mas kepe i, at loxonaleng laangelo at Leeme Silok i xaxala mu di!

<sup>6</sup> Keke langas atnedi na main pe la na gagai, ap mo loxonaleng laangelo at Leeme Silok na sev asubu di!

<sup>7</sup> Gano goxopmen tavasuum teren, la diga lok li pe ia mi lelixo, la diga xe lemeroon kusu anaba subu tup teren la dina rebeng alis kaka ia.

<sup>8</sup> Ketla langsung lumumuat naba vor asangu nedi, la nedi xa dinaba on at lara pelixo atnedi, la dinaba subu tup at langsung leeteke!

<sup>9</sup> Kuren la nia anaba momo ri Leeme Silok. Nia anabak lek atla neni ga lox asepsu ia basinge di.

<sup>10</sup> Anaba tong i ri Leeme Silok mi lodoxoma axap tarak keretna, "Kopmen teta i lok ngan u. Uk lok see amisik at limixin kopmen tololos atnedi basinge limixin lolos, la limixin banbalo basinge limixin loklok papavas."

<sup>11</sup> Limixin kakapmek di vaxaru ia at lavapaase la dik sok taba ia mi leveloklok kakapmek mo nenia xopmen anaklen i.

<sup>12</sup> Dip sepo loklox avukat tarak mi laxakapmek, kuren la lodoxoma abulubun i suxuna ia.

<sup>13</sup> At levenaleng nedi digak meres, aga siga leventamon ti lox asuusu lanbulu rak la agan mun anan. Agat kis tintiding aleng ukopok la agang sing tinedi.

<sup>14</sup> Ga ngan ta dola nia aga ngising ti lentangas tarak kopla netak. Nia agat pas tangtagap eburu mi langsung lanbulu, ga ngan ta do a bulu mu ne naga.

<sup>15</sup> Ketla do nia aga ekip tangarang mi levenmumuat, diga lok momo. Diga tu xangkan ia, la diga paase

aksaksa ria. Limixin kadiong bok digak lox asongor ia, amisik digap sev ia.

<sup>16</sup> Diga lok ngan limixin di lok sese laradi luxangkedek teren i molo, la diga reven angtungun bok tia mi lebelangatngas.

<sup>17</sup> Leeme Silok. Kereva ura reven kepe amisik di? Una lox asepsu ia basinge leveloklox asongot atdi. Lox asepsu ia basinge na lubunglaion!

<sup>18</sup> Do kuren, nia anaba tong loklox avukat tu ro melamgo at lovtopot buru at limixin taram. Nia anaba emi asu minu ro melamgo atnedi axap.

<sup>19</sup> Mo limixin di munepen minia, nedi limixin kaxarang. Nemen gat uta ke avolo di, dina lok momo aksaksa ria mumu lumumuat tarak. Nemen gat uta ke avolo nedi dina lok sese ia. La nemen gat uta ke avolo nedi di belangatngas parang gamasa ria la dina momo mu lanbulu rak.

<sup>20</sup> Kopmen dina paase atnaasan, dim doma xaka levelinga xaxarang kusu dina bala raba limixin loklok mulus min.

<sup>21</sup> Dik sok taba ia mi levelinga, la dip kup keretna, "Maga ven u, uga lok nom levempanga xapmek!"

<sup>22</sup> Ketla nenu, Leeme Silok, ugara ven pam i do nenia ap sepsen. O Leeme Silok, nemen bok ba uta vamngus. Nemen uta nemen paxalom!

<sup>23</sup> O Leeme Silok, una xatu la una paase tooro ia. O Moroa rak, una xatu kaxat upana la una ru ria at na levelinga.

<sup>24</sup> O Leeme Silok, loklok taram in manton tino. Kuren la una tong atkatla li i ria do nia ap sepse. Nemen uta ke avolo limixin munepen minia dina lok momo aksaksa ria mumu mo lumumuat tarak.

<sup>25</sup> Nemen gat uta ke avolo di, dina lok keretna, "I lox avukat tinotno, dik tara lok pes pam i la ta lox epovo ba lavavara atnedik kuren."

<sup>26</sup> Nedi nom di lok momo at levenmumuat i vot saparav ia, una lox ekarakat levelinga atdi la una lox amangan di. Nedi nom di lok do dik

mokso polo ia, una lox abaava di la una lox amangan di.

<sup>27</sup> Naba lox avukat do nedi nom di vara i do ana sepse, dinap kup momo atla nenia a sepmus pam. La dina tong amu amgo ba i do, "Leeme Silok i silok aleng. Neni ik lok momo mi lasaxaruki ren na nemen avukat."

<sup>28</sup> La kerepmo nia anaba tong asu loklok manmanton taram, la anaba emi asu minu at levenaleng axap.

## 36

### *Laxapmek At Laradi*

<sup>1</sup> Laxakapmek ik lox atdan laradi xapmek keneng at lebelen. Ik sok sisixe ne Moroa, la kopmen naklen loklok tik lox asuusu loklok ngangao ri ne Moroa.

<sup>2</sup> Im doma asilox axa i, kuren la i doma i do ne Moroa ixo epovo na ven lenget ka libilinga ren la noxo vaase asi rino i.

<sup>3</sup> Lavapaase ren i lok kapmek la i umsu mi laxaxarang. Ik sok tixirixes kepe lodoxoma avukat la leveloklok i nunuan.

<sup>4</sup> Im doma agagas li levempanga xakapmek do ik midi ro at loora ren. Kopmen nak lok tevempanga avukat, la kopmen tinotno nak sok sisixe lempanga xapmek.

### *Luvukat At Ne Moroa*

<sup>5</sup> O Leeme Silok, labalamu lexen taram i silok aleng tinotno la i urut se rovana at laxalibet. La uk lox epovo amisik leveng kakaape ram nade xopok la i se tu at lamavangkap.

<sup>6</sup> Loklok manmanton taram i tu tuxuruxun ngan lempatkaana. Lempapaase ramtaba ina ram i lolos aleng ngan laras i ekapus. Limixin axap mi levempanga mi lavanuet kangkedek di nemen maxopok at loklok tatao ram.

<sup>7</sup> O Moroa, labalamu lexen taram i lox avukat tinotno! Ma ven kaka loxokok taram tinema maxopok at luvapa ram.

<sup>8</sup> Ma anan mais avukat mi laxaluxa solo um taba nema min, la u ke nema ma ruuna ka lorooro nunuan i sesen su ram ngan ladan sen.

<sup>9</sup> Nenu lavasuun at lorooro at lempanga axap, la mumu mun lodoxoma xasep taram, nema ma ruuna ka laxakasep.

<sup>10</sup> Labalamu ram na tu epasum tinedi dikleklen u. La una lok luvukat tinedi di ruuna loklok in manton tino.

<sup>11</sup> Nemen uta ke avolo limixin loklox aaso dina esep minia, kopla limixin kapmek dina lox amamar ia la ana sixiro.

<sup>12</sup> Nema ma ven ba no loxot limixin kakapmek di saksubu e. Mo dik midi, la ixo epovo do dina xatu kaxat.

## 37

### *Laxavaxap At Limixin Avukat La Limixin Kapmek*

<sup>1</sup> Nemen gat mita doma mu solo loklok at limixin kapmek, la nemen mita ngaongao ri loklok atnedi di lok libilinga.

<sup>2</sup> La ma lixilik mun dinaba sonao axap ngan levempivilis i mamang, dinabap sopso ngan larauna.

<sup>3</sup> Ketla nemi mina nunu saga at Leeme Silok la mina lok luvukat mun, kusu minaba nemen at lenep kangka aulis atnemi la minaba rooro avukat.

<sup>4</sup> Mina puse ri lomomo rinimi keneng at Leeme Silok, kusu ni naba raba nimi mi levempanga no lebelen nimi i tu solo i.

<sup>5</sup> Mina ke raba Leeme Silok mi lorooro ram. Mina nunu saga ren la ni naba lok tooro nimi,

<sup>6</sup> la ni naba lox asaxaven loklok sepse atnemi ri limixin la naba xasep ngan labaranan. La loklok manmanton atnemi naba tu asaxaven ngan laxangking tubu.

<sup>7</sup> Mina mulus mun, la mina nemen tangais Leeme Silok na lok tooro nimi. Nemen mita doma mu solo nedi di ngasang kobot, kopla nedi di lox asoorun leventaangas kakapmek atnedi diga vit li i.

<sup>8</sup> Nemen gat mita musak, la mina ke xepe lebelemamao atla i sasat ka limixin ukeneng at laxakapmek.

<sup>9</sup> Nedi di nunu saga at Leeme Silok, dinaba ruuna ka lenep kangka aulis



levempapaase ali ren. Dola mina lox i xuren, ni naba raba asinorong nimi mi laramtaba, neni lenep kangka aulis atnimi. La minaba ven limixin kakapmek, Leeme Silok naba saksu di basinge lenep kangka aulis atdi.

<sup>35</sup> Nia agaklen laradi xapmek, ni laradi vapavas. Ni ga ru polo limixin axap ngan ta luuna Seda (Cedar) boro Lebanon i ru polo larauna axap.

<sup>36</sup> Ketla melemu nia aga volo go, la kopmen ta i go, nia aga reven tin, ketla agoxo vuse xaka i.

<sup>37</sup> Mina ven mu asu loklok at laradi nunuan eburu mi laradi manmanton. Laradi lorooro ren i umsu mi limila naba ruuna luvuttubuno avolo,

<sup>38</sup> ketla limixin kapmek dinaba ekip tangarang mi leeteke. La Leeme Silok naba xobo pes axap livipisik li atdi.

<sup>39</sup> Leeme Silok ik lox asepsu limixin manmanton, la ik lok see atdi at levenaleng kapmek.

<sup>40</sup> Ik lok tooro di la ik lox asepsu di basinge limixin kakapmek, atla di vot pasa i xusu ni nak lok see atdi.

## 38

### *Lising At Laradi I Suma Losongsongot*

<sup>1</sup> O Leeme Silok, nemen uta lox asongor ia mi lebelemamao ram!

<sup>2</sup> Ura so abi vam ia mi levesoso ram, la ura sev asubu vam ia ukopok.

<sup>3</sup> Nia a xip tutu mi langsung losongsongot mumu lebelemamao ram tia. La labantuxu axap tarak iram suma lanmeres mumu libilinga rak.

<sup>4</sup> Laxakapmek tarak i umsu ngan ladan kam la i epovo ana xong keneng teren. I lok ngan laknixip silok i mumuat aleng tia rip kiv i.

<sup>5</sup> Nia lavanga rangtangu mun mumu laxakapmek tarak la kerepmo nia a meres la levenabi rak i so mau, la ip sopso.

<sup>6</sup> Lantuk iran baloolo, la laxakapmek tarak ik sak palaga rino ia, arang teng tuntun at levenaleng axap.

<sup>7</sup> Lanmeres to xeneng at labantuxu rak i lok ngan laxao la i auret kusu ana met.

<sup>8</sup> Labantuxu rak ira molos axap, i lok ngan ta lavatpanga mumuat mo ik sak palaga ia. Labalak i lok kapmek tino, la at mes mi labaava at losongsongot.

<sup>9</sup> O Leeme Silok, uklen lavanga sala nia a vara aleng tin, nenu uklen losongsongot tarak. U ronga ia at mes silok.

<sup>10</sup> Leveve rak itlos etitit, lolos tarak ira xap pam, luxatli rak kopmen bok ba na reven avukat.

<sup>11</sup> Larapentangas tarak mi lev-entaba aurer ia di noxot pas saparav ia, atla a ruuna laxanabi solo, la leventaba bok tarak di noxo nemen eburu minia.

<sup>12</sup> Mo limixin di vara na sev amer ia di lili larapelixo ria, la nedi di vara na lox asongor ia, di lok do dina lok kakapmek axav ia. Dixo vaxap ti vengit ia, kusu dina lok kapmex ia.

<sup>13</sup> Nia a lok ngan laradi baulang, kopmen nang tonga, la kopmen na paase.

<sup>14</sup> Nia xopmen ana paase porang, atla a lok ngan laradi lubaalung teren i rebonot.

<sup>15</sup> Ketla a nunu saga ram, Leeme Silok. La nenu Leeme Silok, unaba vaase porang ia.

<sup>16</sup> Nemen uta ke avolo limixin munepen minia dina lok momo aksaksa ria mumu lusumsubu rak la dina lok momo mumu lumumuat tarak.

<sup>17</sup> Nia na ana subu nga, la a suma amisik langsung losongsongot silok.

<sup>18</sup> Nia a tong asu laxakapmek tarak, atla mo laxakapmek ik lox abulu amisix ia.

<sup>19</sup> Limixin di munepen minia di ruuna lorooro avukat mi lolos. Buaang nedi di belengatngas parang gamasa mun tia.

<sup>20</sup> Nedi di sepo lununuan mi laxakapmek. Kopmen dina etaba belen minia atla nia a mumu asu langas mokmokso.

<sup>21</sup> O Leeme Silok, nemen uta raba rulu ia. Moroa rak, nemen uta nemen paxalom basinge ia!

<sup>22</sup> O Leeme Silok, nu Laradi Loklox Asepsu rak! Soso mun! Una lox tooro ia.

## 39

### *Lelengeleng At Laradi I Suma Losongsongot*

<sup>1</sup> Nia ara tong pam i, “Nia anaba lok tatao avukat langsung mi levempanga anaba lox i, kusu noxo sar asoogong ia. Nia anoxo tong tepanga xerepmo mo do luvuttadi xapmek dik lok auret.”

<sup>2</sup> Nia agak lox atnaasan, la agoxo tong toxolinga. I ruturun tinotno, nia agoxo tong tepanga mumu levempanga nunuan! Ketla lumumuat tarak ga sisilox amisik,

<sup>3</sup> la lodoxoma saasaa ga suxuna lorooro axap tarak. Nia agam doma solo i, la kerepmo labalak gan tun aleng. La nia agoxo epovo na lok pilo mun. La aga ruka i xusu ana sing keretna,

<sup>4</sup> “Leeme Silok, lavanisa levenmaares nia ana rooro amisik teren? Ningisa ba ia anaba met? Una tong i ria, do ningisa lorooro rak naba xap.”

<sup>5</sup> Nu uga lok lorooro rak kopmen na baalom solo! At levereven taram levenaleng ti lorooro rak ni i lok ngan lavanga gamasa. I ruturun tinotno do, limixin axap di rooro, di lok ngan mene legesa mamas silok,

<sup>6</sup> di lok ngan mun lamamau. Levempanga axap, limixin dik lox i, naba ravasu gamasa mun. Dipnovos li lempanga, ketla di xoklen i do nege naba ruuna ka i.

<sup>7</sup> Lavanga sala bok ba i mo xusu nia anam doma ngangais tin, Leeme Silok? Nia a nunu saga ram.

<sup>8</sup> Una lox asepsu ia basinge laxaloklok kakapmek axap tarak, la nemen gat nu uta ke xepe limixin baulang dina vaase aksaksa ria.

<sup>9</sup> Nia anaba lok pilo la anoxo tong toxolinga, atla nenu mun uga raba ia mi na levesongsongot.

<sup>10</sup> Nemen bok ba uta sev aleeng solo ia! La ma lixilik kusu ana met at leven akpiksa mun taram.

<sup>11</sup> Uk lox asongot laradi mumu laxakapmek teren mi lavapaase kuxurung taram, la u lox asonao axap levempanga neni ing kongkat min ngan levempide ip sep larauna. Laradi i lok ngan mene legesa mamas ip tava su at lungusno!

<sup>12</sup> Leeme Silok, una ronga lising tarak. Una ronga ri lanteng tarak. Una lok tooro ia do nia anang teng tuntun. Nia a lok ngan lavalabat tarak diga nemen ngan lavaose ram nade xopok at na lavatbung mennen atla di goxo rooro abao.

<sup>13</sup> Una ke xepe mulus ia kusu anaba momo avot ti loonon tarak la di noxo ven tu bok ba rak.

## 40

### *Loxompixan Emi Asu*

<sup>1</sup> Nia aga ngangais atnaasan ti loklok tooro at Leeme Silok tia. La ni ga ronga bok lanteng tarak la ga ronga res tarak.

<sup>2</sup> Ni ga sar asu ka ia at lemeroon kapmek, la ga sar asu xaka box ia at lububura. Ni ga vaxaru li avukar ia ro vana at luuat kis silok kusu anat pas avukat la anoxo marat at tempanga.

<sup>3</sup> Ga lox ase ia rik pixan loxompixan maxat, loxompixan emi asu ri ne Moroa atnedik. Buaang nedi limixin dinaba ven kibis lolos teren, dina sangu aleng la dina ii doxoma la dinaba nunu saga at Leeme Silok.

<sup>4</sup> Lomomo rinedi di nunu saga at Leeme Silok, la rinedi bok kopmen dina repukus mu laxampoovo moroa, kopla dina nemen eburu minedi di lotu saparap laxanmoraa xaxarang.

<sup>5</sup> O Leeme Silok, nenu ne Moroa atnema. Buaang laxampanga avukat ugara lok pam i rinema. Kopmen tara i nunuan polo u! Ugara lox asuusu vam buaang lempanga sangsangu nunuan tinema. Ixo



epovo xusu nia ana tong ampana le-exes atdi atla mo levempanga i umsu aleng!

<sup>6</sup> Nenu uxu vavara solo ri levelaplavang mi leventamtaba, nenu uxu ngising ti levempanga mi lavanuet kangkedek kusu mana kotos asonao i ro vana at loxonin laplavang, kopla ri levelaplavang ti ves kepe laxakapmek. Ketla uga raba ia mi lubaalung ting tonga res taram.

<sup>7</sup> Kuren la nia aga lok tu xeretna, “Nenia nga na, levelinga mumu ia i nemen keneng at Laulis Linga.”

<sup>8</sup> Moroa rak, a vavara mene i xusu ana gugu mu asu mun lavavara ram! Levempanga axap uga lox ase ia min, i nemen keneng at labalak.

<sup>9</sup> O Leeme Silok, to melango at lovotpot buru at limixin axap taram, nia aga vaase asu lagale lavavang dola uk lox asepsu nema limixin taram. Nu uklen i do nia anoxo vamngus ti tong asu i.

<sup>10</sup> Agoxo vam luxun kaka lagale lavavang ti loklok tooro ria xusuk. Nia a tong asu amisik pam i do uk lok tooro limixin la uk lox asoorun levelinga ram tidi. Kopmen agoxo vamngus ti tong asu lixitkis esogo mi labalamu lexen taram to melango at lovotpot buru at limixin taram.

<sup>11</sup> Leeme Silok, nia aklen i do lebelen tuntun taram tia noxo xap. Labalamu mi loklok tatao tuturun taram naba kok avukat amisix ia.

### *Lisingising Ti Loklok Tooro*

<sup>12</sup> Laxanmumuat solo i tu xangkan ia la nia xo epovo xusu ana exes ampana di! Laxaloklok kakapmek tarak i sak pavaa rino ia, la axo epovo nga ri milik kadas. Di volo aleng ti leexes at levengkabinim at lavatlak tarak, la labalak i doma abulubun.

<sup>13</sup> Leeme Silok, una lox asepsu ia! Lok tooro nga ia na!

<sup>14</sup> Nedi nom di lok do dina sev amer ia, nia a vara i do una sak tup midi, la una lox ekarakat tinotno di. Nedi nom di momo atla laxanmumuat i sak pavaa ia. A vara i do una xala xepe di la una lox amangan di.

<sup>15</sup> Nedi nom di lok kalise ia, una lox amangan tino di mumu loklok di lox i ria.

<sup>16</sup> Nia a vara i do nedi di repukus taba u, dina momo la dina sosoro. La nedi nom di tong loklox avukat ti loklok tooro amisik, dina tong i do, “Leeme Silok i nunuan aleng pologat.”

<sup>17</sup> O Leeme Silok, labantuxu rak ira xat molos axap la arat kis banbalo nga, ketla kopmen una doxomampe ia. Nenu Laradi Loklox Asepsu rak, la nenu ne Moroa rak. Una lok tooro soso mun ia!

## 41

### *Lisingising At Laradi Anmeres*

<sup>1</sup> Nedi di doma mu solo limixin banbalo, dina momo. Leeme Silok naba lok tooro di mo do dina ekip tangarang mi levenmumuat.

<sup>2</sup> Leeme Silok naba lok see atdi la naba xok avukat lorooro atnedi. La ni naba sinang di mi lorooro avukat at lenep kangka me Israel. La ni noxo raba rulu di kusu limixin munepen minedi dina lok kapmek di.

<sup>3</sup> Dola dina meres, Leeme Silok naba lok tooro di. La ni naba lok kepe levenanmeres basinge di, la na lox alolos manga nedi.

<sup>4</sup> Nia aga tong i do, “Nia ara lok pam libilinga ru, Leeme Silok ne Moroa. Una lox asuusu lebelen tuntun tia la una lox asepsu ia.”

<sup>5</sup> Limixin munepen minia di vaase kuxurung mumu ia. Di vara i do nia ana met kusu limixin axap dinaba domampe ia.

<sup>6</sup> Nedi dit pot pasa ia, di sosolo asu linga rak. La ding senge ka levelinga xapmek mumu ia la dira tere mumu ia at levengkot axap.

<sup>7</sup> Nedi di belangatngas tia, di epaase nemnem mu ia, di nunua i do levempanga xakapmek mo na lok kapmek tino nga ia.

<sup>8</sup> Di lok do, “Lanmeres lolos mo ira sogo xaka vam i la ixo epovo do naba roo xat basinge loora mekmeres teren.”

<sup>9</sup> Lentangas tino bok tarak, aga nunu saga ren. Neni mo lara ga anan eburu minia, la neni bok ira raba rulu ia.

<sup>10</sup> Leeme Silok, una lox asuusu lebelen tuntun tia, kusu ana ru-una ka amlong lorooro nunuan, la ana sepo amlong loklok atnedi di munepen minia.

<sup>11</sup> Di noxo epovo ri sak tup minia, la kerepmo nia anabaklen i do uk lok momo minia.

<sup>12</sup> Unaba lok tooro ia, atla nia ak lox amisik levempanga ik mokso. Unabat kis esogo eburu minia at levenaleng axap i tu melamgo.

<sup>13</sup> Leemi asu ri Leeme Silok, ne Moroa me Israel! Leemi asu rin na, la kopmen tekavaxap teren! Tuturun. Tuturun.

## 42

### *Lisingising At Laradi Moroa Ga Riki Xepe I Uto At Lenep Petpes*

<sup>1</sup> Nia ang kongkat mu u, O Moroa, kerekngan lavanga mi lavanuet kangkedek (deer) i minu aleng la ik sikit pupuse dan mumudut ti inin.

<sup>2</sup> Nu ne Moroa Luntoo Avolo, labalak i ngaongao amisik tu. Ningisa ba, uba siam ka ia xusu anat pas uto at loogu ram la ana lotu saparav u ro melamgo ram?

<sup>3</sup> Levenaleng kangking la kanimin nia ang teng, la kopmen ana anan. Amisik limixin munepen minia di susue ia do, "Ne Moroa ram ua?"

<sup>4</sup> Lainbulu i suxuna ia at lox-onaleng am doma su at levenaleng migomgo. At nom levenaleng nia aga emu mi limixin solo uto at loogu at ne Moroa. La nia agam gomgonga di at nom lavatpas. Buaang limixin digat pas mi lomomo, livikpixmap mi luxupkup mi leemi asu saparap ne Moroa.

<sup>5</sup> Tila nia ak bulu amisik? Tila nia am doma saasaa? Nia anam doma ngangais ti ne Moroa, kusu anaba emi asu amu bok min, ni Laradi Loklox Asepsu la ne Moroa rak.

<sup>6-7</sup> Lanbulu i suxuna ia nade at loxokoxo xeneng at lemenemen xadiong. Kuren la lodoxoma rak i repukus tin. Im taba ia mi lanbulu silok ngan leretepit paxanao i tepit pavaa ia. Lentaba ik sak pavaa ia ngan ladanut, la ngan ladan i tem soobang su ro at ladan Joridan mo i sesen boro vana at lukaana Emon la Misar.

<sup>8</sup> Leeme Silok na lox asuusu labalamu lexen teren at laaleng kangking, kusu nia anabak pixmap at laxanimin, ni lisingising tarak ti ne Moroa mo im gomgonga lorooro rak.

<sup>9</sup> Ti ne Moroa, Lentupe ria, nia a vaase xeretna, "Tila u domampe ia? Tila nia anap kip tutu amisik mi losongsongot at na laxanmumuat at longlong kuxurung at limixin di munepen minia?"

<sup>10</sup> Labantuxu rak ira meleexot axap at loklok kalise atnedi di susue ulu amisix ia dola, "Moroa nga ua ram?"

<sup>11</sup> Tila nia ak bulu amisik? Tila nia am doma saasaa? Nia anam doma ngangais ti ne Moroa, kusu anaba emi asu amu bok min, ni Laradi Loklox Asepsu rak la ne Moroa rak.

## 43

### *Lisingising At Laradi I Nemen At Lememen Kadiong*

<sup>1</sup> O Moroa, una tong atkatla li i ria do nia ap sepse, la una ru at lenep tarak tinedi limixin dixo nunu ram. Una lox asepsu ia basinge limixin kaxarang la limixin kapmek.

<sup>2</sup> Nenu Lurutu See Pe rak, tila u on taba rulu ia? Tila nia a ekip tangarang amisik mi laxaloklox asongot limixin munepen minia dik lok kuxurung ia min?

<sup>3</sup> Una lox asuusu laxasep taram eburu mi levelinga ruturun tia. Dunam gomgonga ia la duna lam ka amlong ia uto Saion, lakaana xaala ram, la uto bok at loogu laplavang taram nenu u nemen teren.

<sup>4</sup> Melemu nia anabat pas uto at loxonin laplavang taram, O Moroa. Nenu mun lavasuun at lomomo rak.

Nia anabak pixan eburu mi loxon-  
taaleng ti emi asu minu. O Moroa,  
nenu ne Moroa rak.

<sup>5</sup> Tila nia ak bulu amisik? Tila nia  
amdama saasaa? Nia anam doma  
ngangais ti ne Moroa, kusu anaba  
emi asu amu bok min. Ni Laradi  
Loklox Asepsu rak la ne Moroa rak.

## 44

### *Lisingising Ti Ne Moroa Nak Lok See At Limixin Teren*

<sup>1</sup> O Moroa, nema maga ronga  
rinotno mo lempanga matmatkun.  
Lavalabat atnama diga ga ven i nom  
levempanga sangsangu ugak lox i at  
levenaleng atdi gano migomgo.

<sup>2</sup> Maga ronga i do nenu xa uga  
saksu mi lavamolon, la uga vax-  
axis limixin taram at lenep kangka  
atnedi. Uga lox asongot bok limixin  
at levenabung mixin petpes la uga  
lox anarong lubang mixin taram la  
diga ngasang kobot.

<sup>3</sup> Lubung mixin taram di goxo  
ruuna xaka nom lenep kangka at  
teesep. Kopmen di goxo ruuna xaka  
box i mi lolos atnedi. Diga ruuna ka i  
mi lolos mun taram, la digaklen i do  
uga nemen eburu minedi. Nom i ga  
lox asuusu i do uga balamu di.

<sup>4</sup> Nenu Loorong Silok tarak la ne  
Moroa rak, uk lok tooro limixin  
taram la dik sak tup mi limixin  
munepen midi.

<sup>5</sup> La mi lolos mun taram, nema  
ma sak tup mi limixin munepen  
minema. Keneng at laasen taram ma  
sev asi di.

<sup>6</sup> Nia xopmen ana nunu at lososo,  
kopla at lavarise esep tarak ba lok  
tooro ia xusu na lox asepsu ia.

<sup>7</sup> Ketla nenu, ne Moroa, uga  
lox asepsu nema basinge limixin  
munepen minema, la uga sak tup  
minedi diga belengatngas tinema.

<sup>8</sup> Nema manaba emi asu amisik  
minu la manaba tong loklox avukat  
amisik tu la kopmen tekavaxap  
teren.

<sup>9</sup> Ketla nanga ura sok sisixe nema,  
kuren la limixin munepen minema  
diga sak tup minema. Kopmen bok

ba una emu buru mi limixin esep  
atnema.

<sup>10</sup> Uga lok nema la maga sixiro at  
limixin munepen minema, la diga  
lok kaka levempanga atnema.

<sup>11</sup> Uga siam taba di minema xusu  
dina sev amet nema ngan lubang  
sipsip, la uga lox epeseves nema uto  
ri levenabung mixin petpes.

<sup>12</sup> I lok ngan ta do uga sesep mi  
limixin taram ti luunun lixilik mene.  
Maga lok ngan lempanga gamasa  
mun.

<sup>13</sup> Levenabung mixin petpes dik  
lok saparap nama, diga ven lavanga  
uga lox i rinema, di paase kalise la  
ding longon atnema.

<sup>14</sup> Uga ke aie xepe nema la limixin  
boro at lengkot petpes ding longon  
arup nema, di piriapat patlak la ding  
longon sese nema at levempanga it  
pot saparap nema.

<sup>15</sup> Lainmangan i umsu at lorooro  
rak mumu mo levelinga atnedi

<sup>16</sup> dit kis munepen minia la atnedi  
bok di belengatngas tia. Di tong  
asu lavapaase aksaksa la levelinga  
kapmek mumu nama.

<sup>17</sup> Na lempanga axap ga vot  
saparap nama ketla ma goxo do-  
mampe u kopla nema gita los polo  
lekabus taram uga lox i rinema.

<sup>18</sup> Ma goxo raba sinta u, la kopmen  
ma goxo ronga xepe bok at levempa-  
paase ali ram.

<sup>19</sup> Ketla uga ke aie xepe nema  
kantubu at na limixin di lok ngan  
laxampanga sio. Uga raba rulu nema  
keneng at lamain bonot.

<sup>20</sup> Mo dola nema gita xap ti lotu  
saparav u, ne Moroa atnema, la do  
nema gita sing saparap lomoroa vet-  
pes,

<sup>21</sup> nenu gitabaklen i, atla nenu  
ukleklen levendoxoma nemnem at-  
nema.

<sup>22</sup> Nema limixin taram, kuren la  
amisik dip sev amet nema. Amisik  
dip sev amet etaba nema ngan ta  
lubung sipsip, mo kopmen tara ri  
tupe di.

<sup>23</sup> Leeme Silok, una aus! Una  
beleku kaxat! Una xatu upana!

Nemen uta raba rulu rino axap ta nema!

<sup>24</sup> Tila u lipe avolo nema? Nemen uta domampe levesongsongot mi levenmumu atnema.

<sup>25</sup> Diga vas amdanda nama, la maga subu midi xopok at laxangka. Mak midi ngan ta luvuttadi met!

<sup>26</sup> Ude, una lok tooro nema! U ruuna labalamu lexen tinama, kuren la una lox asepsu nema!

## 45

### *Loklok Epot At Loorong At Leme Israel*

<sup>1</sup> Levelinga nunuan i umsu at loxoxoma rak, la nia ara rivit na loxompixan ti loorong at leme Israel. Nenia a gagas ti tong asu i ngan laradi akleklen ti malagan avukat mo i gagas lavanga mamalagan teren.

<sup>2</sup> Loorong, nenu lampeneves, kopmen tara na lok ngan u. Levelinga ram ik sixit nunuan amisik. Moroa ik lox anarong amisix u.

<sup>3</sup> Loorong lolos, una lox agagas lavarise esep taram. Lisisinang taram i umsu la laasen bok taram i silok aleng.

<sup>4</sup> Nenu loorong mi laasen silok, ut kis pana at la os ti esep. La uk sak tup mi limixin munepen minu ti lox alolos loklok manmanton la levelinga ruturun.

<sup>5</sup> Levesoso ram i kasum, di soso beles at larapeve at limixin munepen minu. Limixin at levenabung mixin petpes di subu mi loklok ngangao ro saparap luxangkedek taram.

<sup>6</sup> Mo lixitkis amgomgo ne Moroa ga raba u min, naba nemen amisik la kopmen noxo xap. Nu um gomgonga limixin taram mi levelinga manmanton.

<sup>7</sup> Uk lok momo mun mi leveloklok in manton la u belangatngas ti leveloklok ik lok kapmek. Ni lavasuun teren la ne Moroa, ni ne Moroa ram, ga soxolik ka u ngan loorong la ga raba u mi langsung lomomo i volo lomomo atnedi lentaba lavaorong.

<sup>8</sup> Levempanga singsiga ram i so mavak ngan la mea (myrrh) la alos (aloes). Limixin diga sinang laraogu at loorong mi levempanga nunuan (ivory), la di lox amomo u go mi leveng kompixan nunuan.

<sup>9</sup> Kantubu at lavakin di ruuna levenasen silok, laxaalik at lavaorong mo di tu. La at lenep tino at loxonin orong taram, loorong tixin mo i tu, diga sinang i mi levempanga diga lox i mi logol i nunuan aleng.

<sup>10</sup> Nenu loono ri loorong, una ronga na levelinga ana tong i ru. La uguta doma solo limixin taram mi libibinat taram.

<sup>11</sup> Loorong naba veneves at levereven nunuan taram. Neni laradi silok taram, la una mumu asu levelinga ren.

<sup>12</sup> Limixin boro Taia dinaba raba u mi leventamtaba. Limixin nopnovos bok dinaba lok tong i xusu dina sat lodoxoma ram, kusu una lok tooro di.

<sup>13</sup> Loono ri loorong no i nemen keneng at loogu at loorong, neni loono maraanu rino! Ni i sigaara mi lisingsiga diga sokgatga i mi leteret gol.

<sup>14</sup> Ni i sigaara mi lisingsiga gigiliton teren, la di lam kaka i uto at loorong. Ni i emu eburu mi lavakin pentangas teren, la di lam kaka bok di uto at loorong.

<sup>15</sup> Di vubeles at loogu at loorong mi lomomo la lososoro.

<sup>16</sup> Nenu loorong tarak, unaba ru-una laxanmadak temes solo, dinaba tu kun u eburu mi lavalabat taram ngan lavaorong. La unaba lok katling di kusu dina gomgonga mavana at limixin axap at na lavatbung menemen.

<sup>17</sup> Na loxompixan tarak naba tong asu laasen silok taram kusu nedi lavaola melemu dinaba tere avolo laasen taram, la limixin axap dinaba emi asu amisik minu la kopmen tekavaxap teren.

## 46

### *Moraa Ik Lok Eburu Minedik*

<sup>1</sup> Moroa ni Loxot Loklox Alipe atnedik la lolos atnedik. I gagas amisik tik lok tooro dik at levenaleng nedik ta ekip tangarang mi levenmuat.

<sup>2</sup> Kuren la dik ta noxo marat, keke i do lavatkangka axap nangne, la lempattaavut na subu tup utou xopok at lebelen laras.

<sup>3</sup> Keke i do laras na luulung aleng mi leretepit la lempattaavut nangne mumu leretepit at lara paxanao.

<sup>4</sup> Lara ladan mo i nemen, im taba lomomo ri limixin at lemenemen silok at ne Moroa, ti loogu xaala at Leeme Avolo.

<sup>5</sup> Moroa mo i nemen ap mo lemenemen silok la kopmen tempanga noxo sele utut kepe i. Atla ni naba rupot ti lok tooro mo limixin at larangubo, maxantamak suubu.

<sup>6</sup> Limixin boro at levenabung mixin petpes dinaba rakdu mi lanmarat, levengkot silok nabangne. Moroa naba vaase butbutki, la lavatbung menemen naba sonao.

<sup>7</sup> Leeme Silok, ni Lanaraavuk la i nemen eburu midik. Moroa at ne Jakop ni Loxot Loklox Alipe atnedik.

<sup>8</sup> Nemi limixin axap. Ude nimi la mina ven leveloklok Leeme Silok irak lok pam i. Mina ven levempanga sangsangu ira lok pam i nade xopok at lavatbung menemen.

<sup>9</sup> I lox axap levenesep to at levengkot axap at lavatbung menemen. Im bapit levenbanara eburu mi levesoso, la i xotos asonao axap larapenban at laxao. <sup>10</sup> Moroa i lok keretna, "Lumulum! Na xap ta lesep, la mina xasep do nia ne Moroa. Nia Loorong Avolo mavana at larabung mixin axap, nia Loorong Avolo mavana at lavatbung menemen axap."

<sup>11</sup> Leeme Silok ni Lanaraavuk la i nemen eburu midik. Moroa at ne Jakop ni loogu matmatkun atdik.

## 47

*Lamgomgo Pana At Lempanga Axap*

<sup>1</sup> Nemi limixin axap at na lavatbung menemen, mina pasa tingen mi lomomo! Mina emi asu mi ne Moroa mi livikpixan lolos!

<sup>2</sup> Leeme Silok, ni Leeme Avolo. Dik atana lok ngangao aleng teren. Neni Loorong Silok, im gomgonga na lavatbung menemen axap.

<sup>3</sup> Ni ga raba dik mi lolos ti sak tup mi limixin munepen minedik. Ga lox asilok nedik kusu atam gomgonga levenabung mixin petpes.

<sup>4</sup> Neni ga lok katling ka na lenep kangka atnedik livipisik li at ne Jakop ua tana nemen teren. Ni i balamu limixin teren mo di lok momo mi lenep kangka atnedi.

<sup>5</sup> Moroa i urut utoxun pana at loxonin orong teren. Limixin di ven i la dip kup silok aleng mi lomomo la leregteng silok at laratu.

<sup>6</sup> Mina vixan emi asu ri ne Moroa, mina vixan emi asu ri Loorong Silok atnedik!

<sup>7</sup> Moroa ni Loorong Silok ti limixin axap at na lavatbung menemen. Mina emi asu min mi livikpixan!

<sup>8</sup> Moroa it kis to at loxonin orong teren i melemelengan, la im gomgonga larabung mixin axap.

<sup>9</sup> Luvuttadi amgomgo atdi di vot eburu mi limixin at lo Moroa at ne Abaram. Lolos teren i volo lolos atnedi axap limixin esep at na lavatbung menemen. Ni Loorong i silok aleng ti lavaorong axap.

## 48

*Saion Lemenemen Silok At Ne Moroa*

<sup>1</sup> Leeme Silok i silok aleng. Ni ne Moroa atdik la i lox avukat aleng do ata emi asu amisik min to xeneng at lemenemen silok la at loxongkaana kaala ren.

<sup>2</sup> Saion neni mo lakaana at ne Moroa, no xa it kis kasep pana la i maraanu aleng. Ni lemenemen silok at Loorong Silok, ik lox amomo limixin axap at na lavatbung menemen.

<sup>3</sup> Moroa gara lox ase limixin do dinaba nemen avukat mene ro xeneng at laraogu matmatkun at na lemenemen silok.

<sup>4</sup> Lavaorong silok eburu mi limixin esep atdi diga vot buru la diga lok do dina esep polo limixin boro at lakaana Saion.

<sup>5</sup> Ketla diga ven mo lakaana la diga sangu aleng, diga marat la diga sixiro.

<sup>6</sup> Diga dede xapmek tino mi lanmarat, la diga lingun, ngan ta latkin i gagas kusu na visik.

<sup>7</sup> Lodoxoma atdi gak sixit saasaa ngan lempatmon dik sixit ekarakat to at laras keneng at langangan lamanman.

<sup>8</sup> Nema magara ronga vam levelinga at levempanga sangsangu ne Moroa gak lox i, la mara ven pam i ro at lemenemen silok at ne Moroa atnema. Ni Leeme Silok la Larnaavuk, naba lok tatao amisik mo lemenemen silok at levenaleng axap i tu melango.

<sup>9</sup> O Moroa, to xeneng at loogu laplavang taram ma doma asu at langangan labalamu lexen taram.

<sup>10</sup> Limixin at levengkot axap di emi asu aleng minu, la limixin at levengkot axap at na lavatbung menemen dira ronga levelinga mumu u. Nenu um gomgonga limixin mi levelinga manmantan.

<sup>11</sup> Kuren la limixin axap di nemen to at lakaana Saion dina momo! Nu ung tonga linga mi lodoxoma mokmokso. Kuren la limixin axap boro at levengkot silok Juda dina momo.

<sup>12</sup> Nemi limixin at ne Moroa, mina vas kangkan lemenemen Saion, la mina exes laraogu likling i baalom upana.

<sup>13</sup> Mina ven katling axap larangas uat la mina reven anga bok laraogu matmatkun, kusu minaba tong avolo i rinedi lavaola melemu.

<sup>14</sup> Mina tong i ridi do na ne Moroa, neni ne Moroa atnedik at levenaleng axap i tu melango. Ni nabam gomgonga dik at levenaleng axap naba vot melemu.

## 49

### *Larangtangu At Lununu Saga At Lapnovos*

<sup>1</sup> Nemi axap, mina ronga ka i na! Limixin at levengkot axap, mina ronga xaka i na.

<sup>2</sup> Nemi limixin amgomgo mi limixin gamasa, limixin apnovos eburu mi limixin banbalo, mina ronga xaka i na.

<sup>3</sup> Lodoxoma rak naba xasep tinimi, la nia anaba vaase asu levelinga ri raba nimi mi lodoxoma avukat.

<sup>4</sup> Nia anaba vaase asu levelinga voovo, la anaba soxomus bok lava-suun teren do anak pixan eburu mi loxontaaleng.

Lavapaase rak i lok keretna.

<sup>5</sup> Nia xopmen anak marat ti ekip tangarang mi levenmumuat, at loxon-aleng limixin munepen minia di ru kangkan ia.

<sup>6</sup> Mo limixin kakapmek di nunua i do dinaba ruuna ka lorooro nunuan mumu laxampanga solo atdi la dim simi xaka di at leven apnovos atdi la dik lox aru ka bok di.

<sup>7</sup> Ketla laradi ixo epovo ri ru korop ti lorooro axa ren, ixo epovo ri ru korop tin mi tuunun ti ne Moroa.

<sup>8</sup> Atla luunun ti lorooro at laradi i silok aleng. Lavanga salai i vara na unun i min noxo epovo rinotno,

<sup>9</sup> ri lox aase i basinge lamaaut, la ni naba roo avolo.

<sup>10</sup> Limixin axap di reven i do luvuttadi akleklen bok di remet, ngan bok luvuttadi rangtangu mi luvuttadi baulang. Nedi axap dinaba met basinge levenapnovos atdi la levempapisik li atdi dinaba ruuna xaka i.

<sup>11</sup> Levenmaaut atdi naba lok ngan levenmenemen avolo atnedi. At levenaleng axap i tu melango dinaba nemen di e, keke i do diga ruuna lengkongkangka.

<sup>12</sup> Lixitkis silok at laradi noxo lox asepsu i basinge lanmet. Ni naba met bok ngan levempanga mi lavanuet kangkedek.

<sup>13</sup> Limixin di nunu saga atnedi xa, diba ekip tangarang mi lavanga salai mo? Lanmet ni laxavaxap atnedi.

Di momo gamasa mene mi leven apnovos atdi.

<sup>14</sup> Lanmet naba mumu asu di, la dinaba met ngan lubang sipsip. Limixin manmanton dinabat kis silok polo di, atla nedi limixin kapmek dinaba nemen to at lemenemen at labarongan. La levenbaaxin tadi atnedi nabap soso ro vaxalom basinge lara menemen aulis atnedi.

<sup>15</sup> Ketla ne Moroa naba lox asepsu ia, ni naba lox asepsu ia basinge lolos at lanmet.

<sup>16</sup> Nemen gat uta doxoma mu solo i do tara napnovos, la dola lapnovos teren na sisilok.

<sup>17</sup> Neni noxo xip kaka mo lapnovos eburu min dola ni na met. Lapnovos teren noxo emu min ti lorooro melemu.

<sup>18</sup> Keke i do tara i ruuna lomomo at na lorooro. La keke i do limixin di emi asu min dola ni laradi nopnovos.

<sup>19</sup> Ni naba vot pasa lavalabat teren at lanmet, ap mo loxot lamain bonot kopmen noxo xap, ketla naba nemen amisik.

<sup>20</sup> Lixitkis silok at taradi noxo lox asepsu i basinge lanmet. Neni naba met bok ngan levempanga mi lavanuet kangkedek.

## 50

### *Laplavang Tuturun*

<sup>1</sup> Lanaraavuk, neni Leeme Silok ne Moroa i paase. Ni i toro ri limixin axap at na lavatbung menemen i ruka i at loxot laxangking it losu e la i se ro at loxot laxangking it los tuv e.

<sup>2</sup> Lisisixam at ne Moroa i soosoo su boro Saion, lemenemen silok i nunuan axap la i milik maraanu rino.

<sup>3</sup> Moroa atnedik nom boro naba vot, ketla ni noxo vot atnaasan. Laxao bokbolot nabam gomgo rin, eburu mi langsung lamanman bet nabak lok kangkan i.

<sup>4</sup> Ni naba ro ka laxalibet mi lavatbung menemen kusu dunaba ru rin la duna reven i na ila mumu loklok at limixin teren.

<sup>5</sup> Moroa i lok, "Muna lok bubua raba ia mi limixin tuturun tarak.

Nedi nom diga lok lekabus eburu minia at loxonaleng digaplavang tia."

<sup>6</sup> Laxalibet i tong asuusu i do ne Moroa neni Laradi Manmanton, la neni xa laradi rongtonga linga.

<sup>7</sup> Moroa i lok keretna, "Limixin tarak, mina ronga ia ana vaase. Nia anaba ruuna tevelinga rinemi, limixin tarak me Israel. Nia ne Moroa, la Moroa atnemi.

<sup>8</sup> Nia anoxo vaase sok nimi mumu levelaplavang atnemi la leventamtaba bok mi kotos asonao amisix i ria.

<sup>9</sup> Axok pakes bok ti mo leven bulumaxao temes boro at laraogu bulumaxao atnemi kopla mo levenme boro at levenmenemen atnemi.

<sup>10</sup> Atla levempanga axap di ruuna lavanuet kangkedek di nemen at laxairing, atarak axap, eburu mi laxan bulumaxao at lasangaun lara-bin sangsangaun kobot (1000) kaana.

<sup>11</sup> Lavapixa eburu mi levempanga axap di rooro ro xolonu, ni atarak kusak.

<sup>12</sup> Dola nia gita roxo, nia gitoxo sing nimi ri toxompanga anan, atla lavatbung menemen mi levempanga axap keneng teren, ni atarak kusak.

<sup>13</sup> Nia xopmen ana anan levenuut bulumaxao temes kopla ana inin levenda meme.

<sup>14</sup> Loklok ti tong avukat, ni lagale laramtaba atnemi ria, ne Moroa. La mina raba nenia Lanaraavuk mi levempanga migara xaape vam i.

<sup>15</sup> Naba lox avukat do mina ro ke rak mo do mina ekip tangarang mi levenmumuat, la anaba lox asepsu nemi, la minaba raba asinorong ia."

<sup>16</sup> Ketla ne Moroa i tong i ri limixin kakapmek keretna, "Kopmen tava-suun teren la nemi mi utus empampana axap Laulis Linga rak. La kopmen tava-suun teren la nemi mi vepaase mumu lekabus tarak,

<sup>17</sup> atla mi ven abulubun kepe lava-paase sok tarak la mik sok sisixe bok leventaangas tarak.

<sup>18</sup> Mi etangas mi luvuttadi xipkip pilo, la mi vemu eburu mi limixin longlongka.

<sup>19</sup> Amisik mi vavara na paase xapmek, la soso mun mi tong asu levelinga xaxarang.

<sup>20</sup> Amisik mi gagas tik lok li luvutneton nimi at lavapapaase, la mira lele asu bok atdi.

<sup>21</sup> Miga lok na levempanga axap, ketla nia a goxo tong toxolinga, la miga doma i do nia a lok ngan nimi. Ketla nanga ana paase sok nimi la ana lox asuvos nemi at lavapaase.

<sup>22</sup> Nemi mim taba sinta ia, mina rong a i na. Naba lok kapmek do nia ana vaxat lalais nemi, la kopmen bok ba tara go naba lox asepsu nemi.

<sup>23</sup> Loklok ti tong avukat, ni lagale laramtaba ip kip aurut laasen tarak, la nia anaba lox asepsu rinotno nedi di rong a res tarak.”

## 51

### *Lisingising Ti Doxoma Xepe Libilinga*

<sup>1</sup> O Moroa, una lox asuusu lebelen tuntun taram tia, mumu nom labalamu lexen taram. Una ves kepe leveloklok kakapmek tarak atla nenu u umsu mi langsung lebelemulus.

<sup>2</sup> Una gos kepe axap libilinga rak la una lox amaxar ia basinge leveloklok kakapmek tarak!

<sup>3</sup> Nia ara ven kisip pam i do lava-suun teren atarak. La aklen amisix i do nenia lavanga bilinga.

<sup>4</sup> Nia agara lok pam libilinga ru, tu xusuk mun la aga lok lempanga ua nenu u tong i mi laxakapmek. Kuren la ik mokso do una ila mumu lorooro rak, la ik mokso bok do una tong i do nenia laradi xapmek.

<sup>5</sup> Nia aga xapmek, tuka xa i at laaleng diga visix ia ren. Kovisi ne naga ga visix ia nia agara xapmek pam.

<sup>6</sup> Nenu u vavara limixin kusu dina umsu mi lununuan mi levelinga ruturun taram. Una suxa aumsu lodoxoma rak mi lodoxoma avukat taram.

<sup>7</sup> Una ves kepe libilinga rak, kusu nia ana dadat. Una gos amaxar ia, kusu nia anaba dadat ngan labantamon bunbun tino.

<sup>8</sup> Nia a vara i xusu ana rong a limixin dina lok momo mi leklek. Keke i do ugara lox asi aleng pam ia, uga lox amenemen pam lodoxoma rak, nia anaba momo manga.

<sup>9</sup> Una vampe luxatli ram kusu unoxo ven libilinga rak, la una ves kepe axap laxakapmek tarak.

<sup>10</sup> O Moroa, una lox amaxat labalak, la una lox aumsu lorooro rak mi lodoxoma maxat mo ik mokso la i ruturun tu.

<sup>11</sup> Nemen gat uta sok gingin kepe ia, lavanga ana nemen paxalom basinge u. Nemen bok uta lok kepe Loroonan Kaala ram basinge ia.

<sup>12</sup> Una raba amlong manga ia mi nom lomomo at loklok tooro ram, la una lok lodoxoma rak kusu ana vavara ri rong a res taram.

<sup>13</sup> Melemu nia anaba lox ase limixin kapmek mi leventaangas taram, la dinaba rem gili bilong mu u.

<sup>14</sup> O Moroa, una lok tooro ia xusu nia anoxo met atla nenu Laradi Loklox Asepsu rak. La nia anaba tong asu ba loklok manmanton taram mi lomomo.

<sup>15</sup> Una siam do ana vaase asu lava-paase emi asu ru, la nia anaba emi asu minu.

<sup>16</sup> Nenu xopmen una vavara ri leventaba lempanga mabap lavang min. La kopmen bok una lok momo mi levempanga ma kotos asonao i ru. Kuren la anoxo raba u mi levelaplavang.

<sup>17</sup> O Moroa, a lox akalix ia la a nemen maxopok taram. Nom i ni laramtaba rak tu. Nia aklen i do, nenu uxo epovo una sok sisixe laradi i lox akalix i maxopok taram la i ven kibis libilinga ren.

<sup>18</sup> O Moroa, una balamu limixin me Saion la una lok tooro di. Una ii aurut amu levenngas uat to Jerusalem.

<sup>19</sup> Kuren la unaba lok momo mi levelaplavang atnema manaba xotos axav i ru kerekngan uga tong i. La leven bulumaxao temes manabap lavang min tu rovana at loxonin laplavang taram.



## 52

### *Laxavaxap At Laradi Kapmek*

<sup>1</sup> Nu laradi silok, ixo lox avukat do um simi u at laxapmek taram, la mumu bok mo lempanga xapmek uk lox i ri limixin at ne Moroa.

<sup>2</sup> U gagas li leventaangas ti lok kapmek leventaba vetpes. Levelinga ram ing sengsen ngan loxonise. Nenu u puse ngas amisik ti xaxarang.

<sup>3</sup> Nenu u vavara aleng ti laxakapmek la u ke xepe luvukat. U vavara aleng ti levelinga xaxarang la u ke xepe levelinga ruturun.

<sup>4</sup> Nenu laradi xaxarang, u vavara aleng do unak lox asongot mene limixin mi laxalinga xaxarang taram!

<sup>5</sup> Kuren la ne Moroa noxo xap ti lok kapmek amisik tino u. Ni ba ranga alis ka u la ni naba saksu minu basinge loogu ram. La ni naba lox axap tino lorooro ram la unoxo nemen bok ba at lemenemen at limixin di rooro.

<sup>6</sup> Limixin manmanton dinaba ven i na la dinaba lingun. La dinabang longon arup u la diba lok do,

<sup>7</sup> "Mina ven ba na laradi goxo vara i do ne Moroa na lok see ren. Ketla ni ga nunu saga at lapnovos silok teren, la ga nunua i do loklok kakapmek naba lox aulis i."

<sup>8</sup> Ketla nenia a lok ngan luuna Olip i suusu avukat to xeneng at loogu at ne Moroa. Nia a nunu saga at labalamu lexen teren naba nemen amisik la noxo xap.

<sup>9</sup> Nia anaba tong loklox avukat amisik tu, ne Moroa, ti lempanga axap ugara lok pam i. Nia anaba tong asu i do nenu u lox avukat to melamgo at limixin taram.

## 53

### *Laxapmek At Limixin*

<sup>1</sup> Mo limixin di doma i do, "Kopmen tomoroa go i rooro." Nedi limixin tangtangu. Lodoxoma atnedi i bilingot axap tino mi laxakapmek. La dira lok pam levempanga ik lok

kapmek aleng tinotno, kopmen tara atdi na lok levempanga i nunuan.

<sup>2</sup> Leeme Silok ik milik si boro vana at lebelen laxalibet, la i reven limixin axap, do ni naba epovo ri ven kaka taradi leklen la tara bok i lotu saparav i.

<sup>3</sup> Ketla nedi axap digara oon soogong pam, lorooro atnedi axap ira mau axap pam. Kopmen tinotno tara atdi ik lok lempanga i lox avukat, kopmen tinotno tegesara.

<sup>4</sup> Moroa i sue xeretna, "Kereva, kopmen dinaklen leventaangas nunuan? Kereva, nedi axap na dik lok laxakapmek, kopmen takleklen atdi? Dip kip pilo amisik limixin tarak, la kopmen tinotno dina ngising tia."

<sup>5</sup> Ketla melemu dinaba lingun aleng tino, at nom lanmarat kovisi di goxo suma i gano, atla ne Moroa naba sax epeseves levesi at limixin di munepen mi limixin teren. Moroa ira sok sisixe kepe vam di. Kuren la limixin me Israel dinaba sak tup tino midi.

<sup>6</sup> Nia a vara aleng tinotno i do ne Moroa naba sak tiki tara boro Saion, kusu na lox asepsu limixin me Israel basinge limixin munepen midi. Melemu limixin me Israel dinaba lok momo do ne Moroa naba lox asang kobot amu manga di!

## 54

### *Lisingising Ti Lox Asepsu I Basinge Lavamunepen*

<sup>1</sup> O Moroa, una lox asepsu ia mi lolos taram, una lox asepmus ia basinge limixin munepen minia.

<sup>2</sup> O Moroa, una ronga lising tarak, una ronga ka levelinga rak.

<sup>3</sup> Limixin loklox aaso di lok do dina esep minia. La limixin sepsep di lok tong pen i do dina sev amer ia. Nedi mo limixin, kopmen dina doma solo ne Moroa.

<sup>4</sup> Ketla i ruturun tinotno do ne Moroa ni Laradi Loklok Tooro rak. Leeme silok, ni Lentupe ria.

<sup>5</sup> Nia a vara aleng i do ne Moroa na vorang taba amlong di mi laxakapmek diga lox i ria. La ni naba sele utut kepe axap di. Atla neni laradi ik lox asoorun leveng kakaape ren.

<sup>6</sup> O Leeme Silok, nia anaba lok letaba ru mi lomomo. Nia anaba tong loklox avukat tu atla nenu u lox avukat tinotno.

<sup>7</sup> Uga lox asepsu ia basinge laxanmumuat axap tarak. La nia aga reven u, ugak sak tup tino mi limixin munepen minia.

## 55

### *Lisingising At Laradi Ua Lentangas Teren*

#### *Ga Lok Laxaurup Tin*

<sup>1</sup> O Moroa, una ronga na levelinga rak. Nemen uta ronga aie xepe lisingising tarak.

<sup>2</sup> Una ronga lising tarak la una vaase porang ia. Levenmumuat i lok kapmek tino lorooro rak.

<sup>3</sup> Labantuxu rak i marat aleng atla limixin munepen minia di kiilu ia. Na limixin kapmek di lok do dina sev amdanda ia mi levenmumuat. Di musax ia la di belengatngas bok tia.

<sup>4</sup> Kuren la nia a marat kapmek tinotno, la lanmarat at lanmet i suxuna ia la lavarampen abulubun ta ia na.

<sup>5</sup> Nia a suma rino langsung lanmarat la a dede. Lanmarat i suxa aumsu lorooro rak.

<sup>6</sup> A vara rino i do nia di ruuna tuvapa ngan at lamno. Nia giba rava kaxat uto at loxot petpes, la lodoxoma rak dira lok mamana.

<sup>7</sup> Nia diba rava uto vaxalom kusu ana nemen mimila ro at lamatbin.

<sup>8</sup> Nia diba lok soso ri vuse ka toxot ti lipe, at langsung lasaii mi lamanman bet.

<sup>9</sup> O Leeme Silok, una lox ekarakat levelinga axa atnedi limixin munepen minia.

Nia a reven limixin di esep keneng at lemenemen silok, la di lok kapmek tino limixin.

<sup>10</sup> At levenaleng kangking la kanimin nia a reven di, dit pas saasaa

ro at lengkot axap la dik lok leveloklok mamangan la dik paxaru kaxat buaang laxan ekarakat.

<sup>11</sup> Leeteke ik lok at levengkot axap. Larangas axap i umsu mi loklok papavas mi laxaxarang ka levempanga at leventaba vetpes.

### *Laradi Mamalagan Ga Paase Ri Lentangas Teren*

<sup>12</sup> Dola tara at limixin munepen minia na lok kalise kapmex ia, i epovo do nia noxo doxoma solo i. Dola ni natlas i mavana rak, nia giba tu asepsu basinge i.

<sup>13</sup> Ketla nenu mun, lentangas tarak, nenu xa uga lok na leveloklok kakapmek tia. Gano neda tagat kis esogo amisik la taga emu eburu, ketla uga lok na lavanga ria.

<sup>14</sup> Amisik neda taga etangas mi lavapaase la taga lotu buru vam to at loogu laplavang.

<sup>15</sup> Nia a vara aleng i do limixin munepen minia dinaba mer avot ti loxonaleng meremet, no ne Moroa ga vit li i ridi. Nia a vara i do dinat pas uto at lemenemen at labarongan ngan limixin move di rooro, atla laxakapmek i umsu rino xeneng at lebelen di la keneng bok at laraogu atnedi.

<sup>16</sup> Ketla nenia a ro ke at Leeme Silok ne Moroa ri loklok tooro, la ni naba lox asepsu ia. <sup>17</sup> At lenmaxantamak suubu, at levenaleng kangking la at levenaleng kanimin, nia a vel-evanga mi levesingising lolos tarak mo i turut saparav i, la ni naba ronga ia.

<sup>18</sup> Ni naba lox amlong avukar ia ap mo levenesep nia a vesep teren, la kopmen tepanga naba sep kapmex ia, kantubu atnedi buaang limixin munepen minia.

<sup>19</sup> Moroa im gomgonga na lavatbung menemen, ga ruka axa i ganoxa at lereot, la ni naba ronga ia la ni naba sak tup midi. Atla di xopara na repukus, la kopmen dina marat teren.

<sup>20</sup> Mo laradi nia aga vemu min, ga esep eburu mi larapentangas teren, ga los polo leveng kakaape ren.

<sup>21</sup> Levelinga ren ga nunuan aleng, ketla lebelengatngas ga umsu at lebelen. Levelinga ren gang sengsen ngan lavarise esep, keke levelinga ren ga reng nunuan mun.

<sup>22</sup> Una ke raba Leeme Silok mi laxanmumuat taram, ni naba tupe u. Ni xopmen na ke xepe limixin manmanton kusu limixin petpes dina sak tup midi.

<sup>23</sup> Ketla nenu, O Moroa, unaba lam bubua ka limixin sepsev amet mi limixin kaxarang uto xopok at levenmaaut atnedi at loxonaleng move di aau, la kovisi na epovo rinedi ri met. Ketla nenia, ana nunu saga ram.

## 56

### *Lisingising At Lununu Saga At Ne Moroa*

<sup>1</sup> O Moroa, una lox asuusu lebelen tuntun tia, atla nia na a nemen at leesep. Limixin munepen minia dik lox asongot amisix ia.

<sup>2</sup> At levenaleng kudun axap limixin munepen minia di esep tangarang minia. Buaang neddi di vesep eburu minia.

<sup>3</sup> Nu Leeme Silok, nu Lanaraavuk. Dola nia ana marat, ana nunu saga mun taram.

<sup>4</sup> Nia a nunu saga at ne Moroa la axo marat. Nia a emi asu min atla ni naba lox epovo mo levempanga ni ga xaape min. Ixo epovo rinotno xusu limixin mun diba lok tavanga xapmek tia.

<sup>5</sup> Limixin munepen minia dip sev ia mi levenmumuat at levenaleng kudun axap. Dim doma agagas li amisik leventaangas kusu dina lox asongor ia.

<sup>6</sup> Dit pot buru ri kuxut tangais ia at levengkot lipe, la di reven levempanga axap nia ak lox i, la dit kis tangais ia do dina sev amer ia.

<sup>7</sup> O Moroa, una lox asongot di, mumu loklok kakapmek atnedi. Una lox asuusu lebelemamao ram la una sak tup midi mi lolos taram.

<sup>8</sup> Ukleklen i do nia a xip tutu mi levenmumuat. Nenu ugak lok katling leveng kamkabili dan ga sesen su at luxatli rak. A doma i do uga malagan li i at lubuk taram.

<sup>9</sup> At laaleng nia ana xup tu, limixin munepen minia dinaba oo bilong. Legesa vanga mun nia akleklen i, Moroa i tu tooro ia.

<sup>10</sup> Nia a emi asu mi Leeme Silok mumu leveng kakaape ren.

<sup>11</sup> Nia a nunu saga mun teren, la nia anoxo marat at tempanga. Ixo epovo rinotno xusu limixin mun at na lavatbung menemen diba lok tavanga xapmek tia.

<sup>12</sup> O Moroa, nia anabam taba u mi levempanga aga xaape min tu. Nia anaba raba u mi laramtaba ti lox asuusu lorotong avukat tu.

<sup>13</sup> Atla uga lox asepsu ia basinge lanmet, la uga lok tooro ia la limixin munepen minia di goxo sak tup minia.

Kuren la nia anabat pas maxopok at loklok tatao at ne Moroa. Neni ik lox axasep lodoxoma at limixin kusu dina rooro.

## 57

### *Lisingising Ti Loklok Tooro*

<sup>1</sup> O Moroa, una lox asuusu lebelen tuntun tia. Una lox asuusu lebelen tuntun tia, atla nia a vot pasa u xusu unak lok see rak basinge limixin munepen minia. Una kok avukar ia maxopok at lamamau at luvapa ram. Una lok ngan Lenban tia, se at nom laaleng na levenmumuat axap na on basinge ia.

<sup>2</sup> Nia a toro ri ne Moroa, ni Leeme Avolo, mo im taba ia mi lempanga axap nia ak pakes tin.

<sup>3</sup> Ni naba vaase porang ia boro vana at laxalibet la naba lox asepsu ia. Ni naba sev asi axap limixin loklok papavas. Moroa naba lox asuusu mo labalamu lexen la loklok tuturun teren tia.

<sup>4</sup> Nia ak lok kantubu at limixin munepen minia di lok ngan lubanglaion. Di lok gagas kusu dina sev amet limixin la dina anan di. Leven gisangsa atnedi i anan ngan

ta lempatsoso, la leven gam atnedi i anan ngan ta lemparise esep.

<sup>5</sup> O Moroa, una lox asuusu lolos silok taram to vana at lamavangkap, la una lox asuusu lisisixam taram at levengkot axap at na lavatbung menemen.

<sup>6</sup> Limixin munepen minia dira sat pam laxatkat kusu dina rebeng alis kaka ia. Lorooro rak i umsu mi levenmumuat i sak pavaa ia. Diga sep pe langas patpas tarak mi lavatmet i si aleng, ketla nedi xa diga subu tup teren.

<sup>7</sup> O Moroa, nia a nunu saga rinotno ram, nia anabak pixan emi asu minu.

<sup>8</sup> Lodoxoma rak, una xapsik. Nia ana gagas li loxontaaleng tarak mi ligita. Nia anaba sak aus laxangking at labara kooxot mi loxompixan.

<sup>9</sup> O Leeme Silok, nia anaba tong loklox avukat tu ro melamgo at larabung mixin axap. Nia anabak pixan emi asu minu ro melamgo at limixin axap.

<sup>10</sup> Labalamu lexen taram i umsu aleng upana i se axa ro at laxalibet. Loklok tuturun taram tinama i se tu at lamavangkap.

<sup>11</sup> O Moroa, una lox asuusu lolos silok taram to vana at lamavangkap, la una lox asuusu lisisixam taram at levengkot axap at na lavatbung menemen.

## 58

### *Lisingising Ti Ne Moroa Na Lox Asongot Limixin Kapmek*

<sup>1</sup> Nemi luvuttadi amgomgo. Kereva, mi lox akmokso levelinga at limixin mi loklok i nunuan? Kereva, mi rongga avukat levelinga atnedi la mi tu xantubu?

<sup>2</sup> Kopmen tino. Mi doxoma mene ri leveloklok kakapmek mi lok do mina lox i, la mik lox asongot aleng limixin mede Israel.

<sup>3</sup> Limixin kakapmek dik lok laxakapmek at levenaleng axap at lorooro atdi. Di paase asu amisik levelinga xaxarang, ga ruka axa i at levenaleng diga visik di ren.

<sup>4</sup> Di lok ngan laxasii angkang atla mo levelinga xaxarang atnedi i umsu mi losomamao. La di lok ngan bok lisii xapmek di so asen i mi la Kobra, ua kopmen na rongga levelinga

<sup>5</sup> la ing tonga xepe laxaka at laradi leklen at laxasii ik pixan kusu lisii naba tii, kopla at laradi ikleklen aleng levesangsanga.

<sup>6</sup> O Moroa, una sak pirivit kepe leven gisangsa atnedi di lok ngan lubunglaion.

<sup>7</sup> Naba lox avukat do dina sonao ngan laxadan i sesen su axap, la dina lok ngan levempivilis dit pas amling i ro at langas.

<sup>8</sup> Naba lox avukat dina lok ngan levendemdem i remet la i rap sopso. La di lok ngan bok lamdak mumulum nenen i visix amer i la kopmen bok ba na ven laxasep at laxangking.

<sup>9</sup> Kovisi dinaklen i, la una lok kepe di ngan lempivilis di vixis asi i. Moroa, una mas kepe di mi lolos at lebelemamao ram do nedi move dina rooro.

<sup>10</sup> Limixin manmanton dinaba momo dola dina ven ne Moroa na lox asongot limixin kakapmek. La dinabat pas beles mi leveng kangkedek atdi ro xeneng at lada at limixin kakapmek, mo ne Moroa naba sev amet di.

<sup>11</sup> La melemu limixin dinaba tong i do, "I ruturun do limixin manmanton dik lok kaka leveloklox anarong boro at ne Moroa. La i ruturun tinotno do ne Moroa mo i nemen la i viila mumu loklok at limixin at na lavatbung menemen."

## 59

### *Lisingising Ti Loklok Aratao*

<sup>1</sup> O Moroa, nenu ne Moroa rak. Una lox asepsu ia basinge limixin di esep tangarang minia. Una lok see rak ap mo limixin di lok do na sev amer ia.

<sup>2</sup> Una lox asepsu ia basinge di nom limixin kakapmek, la una lok kaka amlong ia at leven tikngen di nom limixin sepsev amet.

<sup>3</sup> Pen ba i, di kuxut ngais ia kusu dina sev amer ia. Na limixin sepsep di vot buru kusu dina esep eburu minia. Kopmen dola nia aga lok taxakapmek kopla aga lok tavanga goxo nunuan,

<sup>4</sup> la kopmen bok do at tosoogong tarak. O Leeme Silok, di gagas kusu dina sev amer ia.

<sup>5</sup> Leeme Silok, nu Lanaraavuk. Una ronga ia. Ude u la una lok tooro ia. Moroa at limixin me Israel, nenu xa una ven ba loklok at lavamolon. Una beleku kaxat la una lox asongot di. Nemen gat uta lox asuusu lebelen tuntun tinedi di raba rulu limixin axa atdi.

<sup>6</sup> Dimlomlong at levengkantinao bungbung main uto at lemenemen silok, la dip kup saasaa ngan lubang man, do dit pas saasaa go.

<sup>7</sup> Una ronga ba lavapaase aksaksa la levelinga xikiilu atdi. Leven gam atnedi i lok ngan lemparise esep keneng at levenngusno atnedi. Ketla dim doma i do kopmen tara nang tonga di.

<sup>8</sup> Ketla Leeme Silok, nenu ung longon atnedi, u lok kalise mun di lavamolon.

<sup>9</sup> O Moroa, nu Lanaraavuk tarak. Nia a nunu saga at lolos taram. Nenu mun Loxot Loklox Alipe rak.

<sup>10</sup> Moroa rak i balamu ia, la naba lox asepsu ia basinge limixin munepen minia. La ni naba keke ia kusu anaba ven i na sak tup midi.

<sup>11</sup> O Moroa, nemen gat uta sev amet soso limixin munepen minia, kusu limixin tarak dina ven mo levesongsongot dinap kiv i. Kuren la limixin tarak di noxo domampe nom lolos taram. Una sak epeseves limixin munepen mi lolos taram la una sak tup midi. O Leeme Silok, nenu Lurutu See Pe atnema.

<sup>12</sup> Laxakapmek i nemen mene at levenngusno di. Levelinga axap atnedi i lok kapmek. I lox avukat do dina onon at larapelixo mumu latlas atnedi, la levelinga atdi i umsu mi lasaxaek la di xaxarang.

<sup>13</sup> Kuren la una sele utut kepe di mi lebelemamao ram. Una sele utut kepe axap di, kusu limixin axap dinabaklen i do ne Moroa ni Lamgomgo at leme Israel. La im gomgonga limixin axap at na lavatbung menemen.

<sup>14</sup> Limixin munepen minia dimlomlong at levengkantinao bungbung main la dip kup saasaa ngan lubang man. La dit pas saasaa ro at lemenemen silok.

<sup>15</sup> Di lok ngan lubang man dik sixit pupuse panga anan, la di booro do kopmen dina anan mais.

<sup>16</sup> Ketla nia anaba vixan loxompixan i tong asu lolos taram. Amisik at leven maxantamak suubu anabak pixan asu labalamu lexen taram. Nenu Loxot Loklox Alipe rak, la u kua pe ia at levenaleng mo do nia a ekip tangarang mi levenmumuat.

<sup>17</sup> Nia anaba emi asu minu, nenu Lentupe ria.

Ne Moroa, nenu Loxot Loklox Alipe rak, nu ne Moroa u balamu ia.

## 60

### *Lavamunepen Diga Sak Tup Mi Limixin Me Israel*

<sup>1</sup> Moroa, ugara sox sisixe xepe vam nama, la uga sev asubu vam nama. Ugara musak kepe vam nama, ketla na manga una repukus bilong mu nama.

<sup>2</sup> Kuren la nanga ura lox angnengne vam na lenep kangka atnema la ugara lox arem bang pam i. Una i axatu na levenmenemen atnema atla i lok do na subu epeseves.

<sup>3</sup> Ura lok pam nema limixin taram kusu mana ekip tangarang mi laxanmumuat solo la laxaloklox asongot silok. Ma saaban ngan ta do ma inin laxangkadan lolos.

<sup>4</sup> Nu ugara vaase aronga vam nedi nom di lok ngangao ram, kusu dinaba sepsu basinge leeteke.

<sup>5</sup> Una lox asepsu nama mi lolos taram. Una siam at levesingising atnema, kusu una lox asepsu su nema limixin atla u balamu nema.

<sup>6</sup> To at loogu xaala ren Moroa ga tong i xeretna, “Nia anaba sak tup mi limixin munepen minia la ana sak epeseves di basinge lenep kangka rak. Nia anabapdo epes nom lemenemen Sekem ti limixin tarak, la anapdo episa mo lasa ro Sukot.  
<sup>7</sup> Nia a ruuna mo lunep Gileat, la Manase. La lenep Epraem bok ni lavatkiam tarak i tupe ia at leesep. La lenep Juda ik lox asuusu lubung amgomgo ri limixin tarak.

<sup>8</sup> Ketla lenep Moap naba lok ngan lavattingtigon gosogos panga. Nia anaba lu mi luxompanga vatpas tarak uto at leme Edom, ngan loklok katling do nenia Lamgomgo atdi. Limixin me Pilstia diga lok do dinaba sak tup minia, ketla digoxo epovo.”

<sup>9</sup> O Moroa, nege bamgo ria ti lok tooro ia keneng at leesep eburu mi leme Edom? Nege ba lok tooro ia xusu ana sak tup midi ro at lemene-men silok atdi, mo diga bos kangkan i mi larangas uat i baalom upana.

<sup>10</sup> Kereva, ura sok sisixe xepe rino vam nema? Kereva, ixo epovo bok ba xusu una vas su eburu bok ba mi limixin esep atnema?

<sup>11</sup> Una lok tooro nama kusu mana sep limixin munepen, atla lolos at limixin noxo lox epovo tavanga.

<sup>12</sup> Do ne Moroa na ru eburu minedik, tanaba sak tup mi limixin munepen, neni naba sev asubu di.

## 61

### *Lisingising Ti Ne Moroa Nak Lok See At Laradi*

<sup>1</sup> O Moroa, una ronga ri lanteng tarak, una ronga lising tarak.

<sup>2</sup> Lodoxoma abulubun i suxuna ia la ak lok to vaxalom basinge lemenemen tarak, la a ngising tu. Una lok kaka ia uto at Loxot Loklox Alipe,

<sup>3</sup> atla nenu Lurutu See Pe rak. Nenu u tu lolos pe ia at limixin munepen minia.

<sup>4</sup> Una ke avolo ia kusu ana nemen amisik to at loogu kaala ram at lorooro axap tarak. Una kubak pe

ia maxopok at luvapa ram, kusu ana nemen matmatkun.

<sup>5</sup> O Moroa, uga ronga vam leveng kakaape rak, la uga raba ia mi mo leveloklox anarong mo u gagas min tinedi dim taba asinorong u.

<sup>6</sup> Nia a sing u do una lox epasum levenmaares at loorong. Una ke avolo i xusu ni na rooro bok be at taxanmaares solo.

<sup>7</sup> O Moroa, lixitkis amgomgo ren na nemen maxopok at loklok tatao ram at levenaleng axap i tu melamgo. Una suxuna i mi labalamu lexen la luruturun taram.

<sup>8</sup> Kuren la anabak pixan emi asu amisik tu, do at levenaleng getgesara anam taba u mi leventamtaba nia aga xaape min.

## 62

### *Lununu Saga At Loklok Aratao At Ne Moroa*

<sup>1</sup> Nia a tu atnaasan to melamgo at ne Moroa, la a ngangais i xusu na lox asepsu ia, atla nenia a nunu saga ren, la kopmen tara bok.

<sup>2</sup> Neni xusuk ik lok see rak la ik lox asepsu ia. Neni Lentupe ria, la kopmen tara naba sev asubu ia.

<sup>3</sup> Lavanisa aleng nemi limixin munepen mi vara i do mina esep eburu minia, atla nenia laradi kopmen tololos tarak ngan loroboro i rem tereve si?

<sup>4</sup> Mi vara mene i do mina lox asi ia basinge nom loxot kitkis silok tarak. Mi lok momo rik lox asuusu levelinga xaxarang. Mi paase asu levelinga loklox anarong, ketla keneng at lebelen nimi mim doma ali nemnem lasaxaek tia.

<sup>5</sup> Nia ak lok sogo xusuk mun at ne Moroa la nia amdama ngangais tin.

<sup>6</sup> Neni xusuk ik lok see rak la ik lox asepsu ia. Neni Lentupe ria la kopmen tinotno tara noxo sev asubu ia.

<sup>7</sup> Nia a nunu saga mun at ne Moroa, atla ik lox asepsu ia la i lox asilox ia. Neni i ruuna lolos ngan Lurutu See Pe rak. Neni i lok ngan loogu matmatkun i kubak pe ia.

<sup>8</sup> Nemi limixin tarak. At leveleng axap mina nunu saga at ne Moroa. Mina tong asu levenmumuat atnemi rin, atla neni Loxot Loklox Alipe atnedik.

<sup>9</sup> Ketla nemen gat mita nunu saga at limixin atla di lok ngan mene legesa mamas silok laradi i mas abeles ka i. Limixin silok la lixilik di lok ngan levempanga gamasa mun. Do mina lok li di at lisikel, kopmen tumumuat atnedi. Di balalak ngan mene lamamas gamasa.

<sup>10</sup> Nemen gat mita doma i do mina sak paxat ka tempanga, la nemen gat mita doma i do mina ruuna ka tavanga at loklok tip kip pilo. Keke i dola lapnovos atnemi na sisilok. Nemen mita doma saga solo ren.

<sup>11</sup> Buaang levenaleng nia agara ronga vam ne Moroa ga tong i do, lolos axap, ateren mene,

<sup>12</sup> la labalamu ren i tu amisik.

O Leeme Silok, nenu naba raba unun ti legetgesara mumu xa levempanga ni ga lox i.

## 63

### *Lavavara Ti Ne Moroa*

<sup>1</sup> O Moroa, nenu ne Moroa rak. Labalak i ngaongao ru. Lorooro axap tarak i vavara ru, atla i ngan laxangka i vat dexes, la i soso vavagam ngan lasa mes. Labalak ik minu ru.

<sup>2</sup> A vara i do anaba ven u ro at loogu xaala, a vara i do ana ven lolos la lisisixam taram.

<sup>3</sup> Labalamu lexen taram i lox avukat ti lorooro rak, kuren la anaba emi asu minu.

<sup>4</sup> Nia anaba tong loklox avukat tu at levenmaares axap nia ana rooro ren, la anaba xip aurut lukngak do ana sing u.

<sup>5</sup> Nia anaba lok momo, i ngan nia a lok leluxa la a an mais. La anaba vixan leveng kompixan momo ri leemi asu ru.

<sup>6</sup> Dola nia ak midi ro at loora rak, am doma su ram. At laxanimin axap nia am doma u,

<sup>7</sup> atla nenu uga lok tooro amisix ia, kuren la nia ak pixan mi lomomo ro maxopok at luvapa ram.

<sup>8</sup> Nia at kis pepeve ram la lakngam tino i kubak pe ia basinge limixin munepen minia.

<sup>9</sup> Nedi mo dik lok tong pen i do dina sev amer ia, dinaba rava si axap uto xopok at lemenemen at labarongan.

<sup>10</sup> Dinaba met keneng at leesep, la lubang man sio dinaba anan levenbaaxin tadi atnedi.

<sup>11</sup> Loorong naba momo mi ne Moroa atla ne Moroa naba raba i mi lolos kusu na sak tup mi limixin munepen min. Nedi nom dik lok leveng kakaape mi laasen at ne Moroa, dinaba emi asu min, ketla ne Moroa naba vamngus luvuttadi xaxarang.

## 64

### *Lisingising Ti Ne Moroa Nak Lok See At Laradi*

<sup>1</sup> Nia na a nemen keneng at lumumuat. Moroa una ronga lising tarak! Nia a marat at limixin munepen minia, una lox asepsu lorooro rak basinge di.

<sup>2</sup> Una rupe ia at lenngitngit at limixin kakapmek, basinge bok nedi buaang limixin bilinga.

<sup>3</sup> Levelinga atnedi ip sep ngan ta lemparise esep ing sengsen, la levelinga xakapmek atnedi ik sixit mokmokso ngan levesoso.

<sup>4</sup> Kopmen di marat kusu dina paase palas asu soso laxalinga xaxarang atnedi. Kuren la dik lok kapmek tinotno lorooro at limixin avukat mi levelinga xaxarang la di paase asi levenasen at limixin.

<sup>5</sup> Nedi xa di epang aru kusu dina lok laxakapmek. Di epaase do dinaba li lara pelixo atnedi ua. La di tong i do, "Kopmen tara naba ven dik."

<sup>6</sup> Di seput li leventaangas kakapmek la di tong i do, "Dik tara gagas li vam langas i nunuan aleng." Lebelen mi lodoxoma at limixin kerepmo ing tangku axap.

<sup>7</sup> Ketla ne Moroa naba soso di mi levesoso ren, la soso mun dinaba ruuna ka levennin kooxing.

<sup>8</sup> Ni naba sele utut kepe di mumu mo levelinga xapmek atdi. La limixin petpes diba ven di, diba piripat lempatlak atnedi kusu ti lok kalise di.

<sup>9</sup> La nedi axap dinaba marat, atla dinaba domasu at levempanga ne Moroa gara lok pam i, la dinaba tong asu mo leveloklok silok teren.

<sup>10</sup> Nedi axap limixin manmanton dinaba momo ap mo levempanga Leeme Silok gara lok pam i. Dinaba nemen matmatkun maxopok at loklok tatao ren. Limixin axap di nunuan, dinaba emi asu min.

## 65

### *Leemi Asu Mi Laramtaba Rotong Avukat*

<sup>1</sup> O Moroa, ik mokso xusu mana emi asu minu ro Saion, la mana doma xatling leveng kakaape atnema ru,

<sup>2</sup> atla up sep siam at levesing atnema. Limixin at levengkot axap dinaba vot pasa u.

<sup>3</sup> Loklok kakapmek atnema i sev asubu nema, ketla nenu u doxoma xepe i.

<sup>4</sup> Nedi nom una soxolik ka di, dina momo. U lok kaka nedi xusu dina nemen to at loogu xaala ram. Manabat kis mimila at levempanga nunuan keneng at loogu ram eburu mi leveloklox anarong at loogu laplavang taram i xaala. Mo naba lox epovo lavavara atnema.

<sup>5</sup> Up sep siam at levesingising atnama mo do um taba nema mi lolos ti sak tup mi limixin munepen minema. La uk lok bok levempanga nunuan ti lox asepsu nema. Limixin at levengkot axap at na lavatbung menemen la at levennep tas paxalom bok di nunu saga ram.

<sup>6</sup> Uga vaxaxis lempattaavut mi lolos taram, la kerepmo uga lox asuusu lolos silok taram.

<sup>7</sup> Uk lox amila leretepit at laras mi lulung at levempo paxanao, la uk lox axap bok levenekarakat at limixin.

<sup>8</sup> Limixin at lavatbung menemen axap ding sangu aleng mumu levempanga ugak lox i. Leven gugu ram i lox asu luxupkup momo boro at lara lenep kavaxap at lavatbung menemen uto at lara lenep.

<sup>9</sup> Nenu uk lox asuusu loklok tatao ram ti laxangka, uk lox asi larabet tik lox ababaum laxangka kusu larauna na pisik avukat. Nenu uk suxa aumsu laradan sen mi levengkadan la um taba lavatbung menemen mi levempanga anan. Uk lox i xeretna.

<sup>10</sup> Up sep bet avukat ti leventaa-mang, la uk lox amlu laxangka mi levendan bet. U lox amumulum laxangka mi limisimisi bet la i lox asuusu larauna maxat.

<sup>11</sup> Loklok taram i nunuan kuren la um taba aleng levempanga anan mukun avukat. At levengkot axap ut pas teren, i umsu mi laxampanga anan.

<sup>12</sup> Ap mo levengkot laxampanga mi lavanuet kangkedek, di umsu ro at levengkot anan atdi, la limixin di nemen at laxasigege kaana di umsu mi lososoro.

<sup>13</sup> Levengkot loklok tatao levempanga mi lavanuet kangkedek i umsu mi laxasipsip. To at larasa i umsu mi laxam piaoa. Levempanga axap i nunuan aleng la limixin dipkup la dik pixan momo.

## 66

### *Loxompixan Emi Asu Mi Lorotong Avukat*

<sup>1</sup> Nemi axap limixin, mina emi asu mi ne Moroa mi luxupkup momo!

<sup>2</sup> Minak pixan ti lox aurut laasen teren la mina tong asu leemi asu i nunuan aleng tin!

<sup>3</sup> Mina tong i ri ne Moroa xeretna, "Levempanga uk lox i, i nunuan aleng! Lolos taram i silok aleng, kuren la limixin munepen minu di xis tintiding to melamgo ram mi lanmarat.

<sup>4</sup> Limixin axap at lavatbung menemen di lotu saparav u. Dik pixan emi asu saparav u, dik pixan emi asu ri laasen taram."



<sup>5</sup> Nemi limixin, ude nimi, la mina ven levempanga ne Moroa gak lox i. Ni gak lok leveloklok sangsangu ren kantubu at limixin.

<sup>6</sup> Ni ga lox arepukus Loxontas Memele ga ngan ta laxangka mesemes. Melemu lavalabat atnedik diga vas korop lavatdan sen silok mi lengkangedek mene. Ap mo loxot diga lok momo mi mo lavanga ni ga lox i. <sup>7</sup> Lixitkis amgomgo ren naba nemen amisik mi lolos teren, la ni i reven tatao larabung mixin axap. La neni noxo ke xepe limixin tongtonga xepe dina lox asilok di mavana ren.

<sup>8</sup> Nemi limixin at larabung mixin axap, mina emi asu mi ne Moroa atnedik, mina emi asu silok min.

<sup>9</sup> Neni ga lok tatao lorooro atdik basinge laniu, la ni xopmen goxo ke limixin munepen midik gita sak tup midik.

<sup>10</sup> Moroa, uga lok li nema at loklok tong pen, i ngan lisiliva laxao i aan adatdar i. Kerepmo ura lok tong pen pam nema.

<sup>11</sup> Uga ke nema la maga subu tup at lemet diga sep li rangais nama min la uga lok li levenaknixip mumuat pana at levenantuno nama.

<sup>12</sup> Uga ke xepe limixin munepen minema diga vas asi nama. Magat pas keneng at laxao silok mi ladanut. Ketla nanga ura lok kaka nema uto at loxot ua manaba nemen matmatkun maxopok at loklok tatao ram.

<sup>13</sup> Nia anaba lok kaka levelaplang ti kotos uto at loogu ram. Anabam taba u mi leven tamtaba nia aga xaape min tu.

<sup>14</sup> Nia anaba raba u mi levempanga nia aga tong i do anaba raba u min, at levenaleng nia aga nemen keneng at lumumuat.

<sup>15</sup> Anabam taba u mi levesipsip, kusu ti xotos i ro at loxonin laplang. Anabaplang mi levenbulumaxao remes la levenme, la losobu ren naba urut uto vana at lamavangkap.

<sup>16</sup> Nemi mim taba asinorong ne Moroa, ude nimi, la mina ronga i

na. Nia ana tong asu axap nom levempanga ni gak lox i ria.

<sup>17</sup> Agang teng tin ti loklok tooro, nia agak pixan emi asu min.

<sup>18</sup> Dola lorooro rak gi umsu mi laxakapmek, Leeme Silok gixo ronga rak.

<sup>19</sup> Ketla i ruturen tinotno do ne Moroa ira ronga vam ia, ira ronga res pam at lisingising tarak.

<sup>20</sup> Nia a emi asu mi ne Moroa, atla ni xopmen nak sox sisixe lisingising tarak, koplak ni na rebeng alis labalamu lexen teren tia.

## 67

### *Loxompixan Totong Avukat*

<sup>1</sup> Moroa, una lox asuusu lebelen tuntun tinema la una lox anarong bok nema. Una lox asuusu lebelemulus taram tinema,

<sup>2</sup> kusu limixin at lavatbung menemen axap dinabaklen lodoxoma ram, la kusu limixin at larabung mixin axap dinabaklen i do u lox avukat la uk lox asepsu limixin taram.

<sup>3</sup> O Moroa, naba lox avukat do limixin at levengkot axap dina emi asu minu. La naba lox avukat tinotno do larabung mixin axap dina emi asu minu!

<sup>4</sup> Naba lox avukat do limixin axap boro at levenabung mixin petpes dina sosoro la dinak pixan mi lomomo, atla nu u viila mumu loklok at limixin mi lodoxoma mokmokso la levelinga ruturen, la um gomgonga limixin at larabung mixin axap at lavatbung menemen.

<sup>5</sup> O Moroa, naba lox avukat bok do limixin dina emi asu minu. I epovo rinotno do limixin axap dina emi asu minu!

<sup>6</sup> Laxangka ira lox asu vam leventaamang mukun teren. Moroa, ni ne Moroa atnedik ira lox anarong pam dik.

<sup>7</sup> Moroa ira lox anarong pam dik, la naba lox avukat do limixin at levengkot axap dinam taba asinorong i.

## 68

### *Loxompixan Ti Lox Asilok Laasen At Ne Moroa*

<sup>1</sup> Moroa i beleku kaxat la ik sak epeseves limixin munepen min. Nedi di belengatngas tin, dik sixiro atla ik sak tup midi.

<sup>2</sup> I lok ngan lamanman it mas kepe lusuxa, la i xala xepe di. I lok ngan levelumlut misiu i sonao at liplivi kao. Kerepmo la limixin kapmek di seeve ro melamgo at ne Moroa.

<sup>3</sup> Ketla limixin manmanton dik lek la di momo at lemeren ne Moroa. Dik lok momo la dip kup mi lososoro.

<sup>4</sup> Minak pixan ti ne Moroa, minak pixan emi asu mi laasen teren. Mina gagas li langas tin mo it kis pana at loxontakabu. Laasen teren ne Leeme Silok. Mina lok momo ro melamgo ren!

<sup>5</sup> Moroa i nemen to xeneng at loogu laplavang teren i xaala. Ni i kok lubangkarun la ik lok tatao lubang naa rixin, lavatlok atdi diga met pam.

<sup>6</sup> Ni im taba lavanat mamangan mi limixin kusu dina nemen eburu midi, la i sasar asepmus asu nedi limixin di nemen at loxokoxo xusu dina momo. Ketla nedi dixo etu ebelen min, dinaba nemen at lenep kangka i vat dexes.

<sup>7</sup> O Moroa, at levenaleng ugam gomgo ri limixin taram, la ugat pas korop lamatbin midi,

<sup>8</sup> lavatbung menemen axap gang-nengne, la lamavangkap ga soobang asu lebet, mumu lovtopot at ne Moroa boro at lakaana Sinai, lovtopot at ne Moroa me Israel.

<sup>9</sup> Nenu uga lox asu larabet nunuan ti lox amonok amu laxangka i vat dexes.

<sup>10</sup> Limixin taram diga vaxaru li levenmenemen atnedi go, la keneng at luvukat taram uga lox epovo lavak-pakes at limixin banbalo.

### *Leme Israel Diga Sak Tup Mi Lava-munepen Midi*

<sup>11</sup> Leeme Silok ga raba asu levelinga, la buaang lavakin diga etong aonon na levelinga ren keretna,

<sup>12</sup> “Lavaorong mi limixin esep atnedi dira sixiro!” Lavakin to xolonu diga episa levempanga, limixin esep diga esep kaka i.

<sup>13</sup> Mo levempanga ga ngan ta levempoovo amno, diga vop di mi lisiliva, lempapa atdi gam games aleng mi leven gol avukat. (Tila levantaba atnemi diga lipe ro xeneng at loroboro at lubangtipsip at laaleng esep?)

<sup>14</sup> Ap mo laaleng, Lanaraavuk ne Moroa ga sak epeseves lavaorong to at lavattaavut Salmon, ni ga lox asi lusugao mumudut (snow) ri subu ap mo loxot.

<sup>15</sup> Nu lavattaavut Basan u silok aleng tino, nu lavattaavut mi laxampatlak solo ram!

<sup>16</sup> Nu lavattaavut mi laxampatlak solo, tila uk milik angtungun lavattaavut ne Moroa ga lok katling i do rin ti nemen, la u doma i do ni lavanga gamasa? Leeme Silok naba nemen amisik ap mo lavattaavut.

<sup>17</sup> Leeme Silok ga rupot boro Sinai eburu mi laxanabin sangsangaun kobot laxang karis esep lolos teren, la ni ga vubeles at loxot kaala ren.

<sup>18</sup> Ap mo laaleng ni gat pas uto vana, ni ga emu ka buaang limixin kokoxo eburu min. Ni ga ruuna ka leventamtaba atdi mo limixin tongtonga xepe. Leeme Silok ne Moroa naba nemen go.

<sup>19</sup> Leemi asu ri Leeme Silok, neni ip kip levenmumuat atnedik at levenaleng getgesara. Neni ne Moroa ik lox asepsu dik.

<sup>20</sup> Moroa atnedik ni ne Moroa ik lox asepsu limixin. Ni Looorong Avolo la ik lox asepsu dik basinge lanmet.

<sup>21</sup> Moroa naba rit povorok tuturun tinotno levempatlak at limixin munepen min. Lempatlak atnedi di xopara na xap at leveloklok i bilinga.

<sup>22</sup> Leeme Silok ga tong i xeretna, “Nia anaba lok kaka amlong limixin munepen minemi boro at lengkot axap. Keke i do di nemen to at

lempat kaana Basan koplā to xa maxopok at lisimaramain, nia anaba lok kaka amlong nedi,

<sup>23</sup> kusu minabat pas keneng at lada atnedi la lubang man atnemi dinaba dem ka solo laxanda ri lox axap lavavara atdi.”

<sup>24</sup> O Moroa, limixin axap di reven u, ut pas to melamgo at limixin taram melemu at loxonaleng u sak tup mi limixin munepen minu ap mo lesep. O Moroa, nenu Loorong Silok tarak ut pas beles uto xeneng at loogu xaala ram.

<sup>25</sup> Nedi dik pixon, dit pas to melamgo. Nedi dik sak gita, dit pas to melemu. La laxaalik dit pas to xantubu, dik sak leven tambarin.

<sup>26</sup> La digak pixon, “Ata emi asu mi ne Moroa ro xeneng at lovtopot buru at limixin teren. Nemi axap livipisik li at ne Jakop, mina emi asu mi Leeme Silok!”

<sup>27</sup> Loxonabung mixin at ne Beniamin dimgomgo, nedi di xakalik ti levenabung mixin axap. Melemu ren lubang amgomgo at leme Juda eburu mi loxon binam tadi atnedi, la lubang amgomgo me Sebulon la Napitali di mumupit to melemu.

<sup>28</sup> O Moroa, una lox asuusu lolos taram, nom lolos uga ru min tinema.

<sup>29</sup> Una lox asuusu lolos taram boro xa at loogu laplavang taram to Jerusalem, ap mo loxot lavaorong silok dim taba u mi levantamtaba ve.

<sup>30</sup> Una vaase sok leme Isip. Nedi di lok ngan lavatpanga sio mi lavanuet kangkedek i nemen to at lisigege dan. Una vaase sok limixin at levenabung mixin petpes. Nedi limixin tongtonga xepe, di lok ngan laxanbulumaxao remes mi laxannat bulumaxao. Una paase lolos tidi se dinaba xis tiktikbu ro melamgo ram la dina lok letaba ru mi levesiliva. Una sak epeseves mo limixin di vavara esep amisik!

<sup>31</sup> Luvuttadi rutu katling dinaba vot boro Isip. Leme Itiopia dinaba xip aurut tikngen mi levesingising atnedi ri ne Moroa.

<sup>32</sup> Nemi larabung mixin at lavatbung menemen, mina vixan mi leemi asu saparap ne Moroa. Mina vixan emi asu saparap Leeme Silok,

<sup>33</sup> mo it pas tangtagap de vana at lamavangkap, mo lamavangkap me ganoxa at lereot. Mina ronga levelinga ren i lubang silok boro vana at laxalibet.

<sup>34</sup> Tong asu lolos at ne Moroa i lubang aleng, la im gomgonga mavana leme Israel. I lox asuusu lolos teren tovana at lamavangkap.

<sup>35</sup> Moroa me Israel i vas su boro xeneng at loogu xaala ren, la limixin dinaba lubang teren! Neni im taba lolos ti limixin teren.

Leemi asu ri ne Moroa!

## 69

### *Lerengteng Ti Loklok Tooro*

<sup>1</sup> O Moroa, una lox asepsu ia! Ladan na ira urut pam ti laxaka rak.

<sup>2</sup> Nia na ara dong tup silatla nga at lapke, la kopmen toxongkangka lolos ti tu ren. Nia nga na xeneng at ladan i si aleng, la lara paxanao i lok do nak mir axong ia.

<sup>3</sup> Laxaka rak ira xo axap mi luxupkup ti loklok tooro, luxukung tarak ira songot. Luxatli rak ira ung mi lerengteng, nia a ngangais ti loklok tooro ram.

<sup>4</sup> Nedi limixin munepen minia, kopmen tavasuun at lebelengatngas atdi saparav ia, la di umsu aleng tino polo leexes at levengkabinim at lavatlak tarak. Di xaxarang taba ia. Di lolos aleng la di lok do dina sev amer ia. Di xaxarang taba ia do aga xip pilo xaka lempanga nia agoxo xip pilo xaka i. La di tong i ria do ana raba amlong i.

<sup>5</sup> O Moroa, libilinga rak kopmen na nemen alipe ram, nu uklen larangtangu rak.

<sup>6</sup> O Leeme Silok, nenu Loorong Avolo la Lanaraavuk. Nemen gat uta ke xepe limixin nunu ram dina mangan mu loklok tarak. Moroa me Israel, nemen gat uta ke mo loklok

tarak na sox asu lainmangan tinedi di lotu ruturun saparav u.

<sup>7</sup> Limixin munepen minia di paase aksaksa ria mumu mun u la ara umsu mi lainmangan.

<sup>8</sup> Luvutnetak di reven ia ngan laradi votpot mun, la a lok ngan laradi me xadiong keneng at lixitkis koetemen atnema.

<sup>9</sup> Lodoxoma rak i tu at loogu laplavang taram. I anan tos keneng tarak ngan ta laxao. Levempapaase aksaksa dik lox i ru, im subu mavana rak.

<sup>10</sup> Ak lox asi mun ia mi loklok ti mun anan, la limixin dirak lox aksaksa ria.

<sup>11</sup> Ang sigaara mi levesingsiga ri duudu, la ding longon tarak.

<sup>12</sup> Di paase mumu ia ro xeneng at larangas silok, la limixin inin tangtangu di voovo lengkompixan mumu ia.

<sup>13</sup> Leeme Silok, nenia anaba ngising parav u. Moroa, unaba sep siam mu ia at loxonaleng axa nenu una lok katling i. Una vaase porang ia atla labalamu lexen taram i silok aleng la unaba lox epovo laxakaape ram tik lox asepsu limixin taram.

<sup>14</sup> Una lox asepsu ia kusu anoxo dong si rino ukopok at lapke. Una kubak pe ia basinge limixin munepen minia, la una lox asepsu ia basinge lisimaramain.

<sup>15</sup> Uguta ke xepe gat ladanut na vaxat ka ia. Uguta ke xepe ia la ana xong to xeneng at lisimaramain, koplana dong tup to xeneng at lamaaut.

<sup>16</sup> Leeme Silok, una rongares tarak mumu luvukat at labalamu lexen taram. Una repukus mu ia mi lebelemulus silok taram!

<sup>17</sup> Uguta lipe axa u basinge ia lasaxaruki ram. Nia na ak lok at langangan lumumuat, la una rongares tarak!

<sup>18</sup> Una vot parav ia la una lox asepsu ia. Una lox asepmus ia basinge limixin munepen minia.

<sup>19</sup> Uklen i do di paase aksaksa ria, la dixo lok ngangao rak la dirak lox

abaava ia. U ven axap di na limixin munepen minia.

<sup>20</sup> Levempapaase aksaksa atnedi ira ba koxorop pam leveve rak. Lavarampen abulubun ta ia na. Aga vara tara xusu ti lox amenemen ia, ketla goxopmen tara go ga lox amenemen ia.

<sup>21</sup> At loxonaleng aga roxo, diga raba ia mi laxanbasa. At loxonaleng aga minu, diga raba ia mi laxadan mamao.

<sup>22</sup> Keke levenanan atdi nabak paxaru kaxat lasaxaek. La keke levempeluxa kaala atnedi naba lox ekarakat di kusu dina subu tup at leeteke.

<sup>23</sup> Una sep di mi lemeramain! Unak lox amolos amisik lempat sintun atdi!

<sup>24</sup> Una soobang asu lebelemamao ram mavana atnedi. Keke lebelemamao mokmokso ram na sak pavaa di.

<sup>25</sup> Keke lara menemen atnedi nak midi kixinak tino, la teta noxo roo su go xeneng at laraogu kadis atdi.

<sup>26</sup> Dik lox asongot nedi no nenu uga lox aleeng nedi. La di paase mumu nedi no nenu uga sev abi nedi.

<sup>27</sup> Una malagan li xatling leveloklok kakapmek axap atnedi la uguta ke avolo di xusu dina ruuna xaka toxot at loklok tooro ram.

<sup>28</sup> Una lok pes levenasen atnedi ro at lubuk at lorooro. Uguta malagan li gat levenasen atdi eburu mi levenasen at limixin taram.

<sup>29</sup> Ketla nia lampen abulubun, ak lok keneng at losongsongot. O Moroa, una lox aurur ia la una lox asepsu ia basinge na levenmumuat!

<sup>30</sup> Anaba emi asu mi ne Moroa mi loxompixan. Anaba paase asu laasen silok teren at loxonaleng ana tong avukat tin.

<sup>31</sup> Neni na, naba lox amomorinotno Leeme Silok la naba volo mo loklok tim taba mi levenbulumaxao, la naba volo bok laplavang tin mi lavat bulumaxao temes.

<sup>32</sup> At loxonaleng limixin baava dina ven i na, dinabak lek aleng.

La nedi di ngising parap ne Moroa, dinaba lok momo aleng.

<sup>33</sup> Leeme Silok ing tonga res atnedi dik pakes la ixom domampe limixin teren dik lok at loogu xokoxo.

<sup>34</sup> O laxalibet mi lavatkangka, muna emi asu mi ne Moroa. Laras bok mi lempanga xeneng teren, mina emi asu min.

<sup>35</sup> Neni naba lox asepsu leme Jerusalem basinge limixin munepen midi la na vaxaru amlong levenmenemen silok at lenep Juda. Limixin teren dinaba ruuna ka mo lenep kangka la dinaba nemen amisik go.

<sup>36</sup> Livipisik li at limixin axa ren dinaba ruuna ka i. La nedi ua di vavara aleng i, dinaba nemen amisik go.

## 70

### *Lisingising Ti Loklok Tooro*

<sup>1</sup> O Moroa, lox asepsu ia! Leeme Silok, lok tooro soso nga ia!

<sup>2</sup> Keke lodoxoma ekarakat na suxuna nedi di lok do dina sev amer ia. La una sak tup midi. Keke leklek atnedi dik lek mumu levenmumuat tarak, na repukus ti lainmangan.

<sup>3</sup> Una xala xepe nedi di lok kalise xapmex ia, kusu dinaba mangan.

<sup>4</sup> Naba lox avukat do nedi di vot parav u, dina momo la dinak lek. Naba lox avukat do nedi di tong avukat ti loklok tooro ram, dina paase amisik keretna, "Moroa i silok aleng!"

<sup>5</sup> O Moroa, nenia na ara molos ta la arat kis banbalo de. Soso mun, una vot pasa ia. Nenu Laradi Loklox Asepsu la Leeme Silok tarak. Lox asepsu soso ia!

## 71

### *Lisingising At Laradi Amgomgo*

<sup>1</sup> Leeme Silok, a vot parav u mi lisingising kusu una lok see rak basinge limixin munepen minia. Uguta ke xepe di, dina sak tup minia!

<sup>2</sup> Nenu Laradi Manmanton, kuren la una lok tooro ia la una lox asu ia

at na lumumuat. Una ronga ia la una lox asepsu ia basinge di!

<sup>3</sup> Una lok ngan lomoo vungpung tia, la loogu lolos la matmatkun ti lok see rak. Nenu Lentupe ria la Loroboro rak. La nenia ak lok alipe ro xeneng taram.

<sup>4</sup> Lomoroa rak, una lox asepsu ia basinge limixin kapmek, la basinge lolos at limixin kapmek ding long kuxurung.

<sup>5</sup> Leeme Silok, nenu Loorong Avolo. Una ronga res tarak atla a doma sogo nga na ram. Ga ruka i at laau rak, agara nunu saga vam taram.

<sup>6</sup> Agara sep sogo vam taram ap mo axap laxanmaares nia aga rooro ren. La tuka i at laaleng ne naga ga visix ia, uga lok see rak. Anaba emi asu amisik minu.

<sup>7</sup> Lorooro rak ga lok ngan lampoovo avukat ti buaang nedi limixin diga mu asu i, atla nenu uga lok ngan loroboro lolos ga tu xangkan ia.

<sup>8</sup> Kuren la a emi asu amisik minu at levenaleng axap, la a paase asu lununuan taram.

<sup>9</sup> Uguta raba rulu ia at na lox-onaleng nenia a sioxo nga. La uguta doxoma xepe ia mumu i do ara ventaae nga.

<sup>10</sup> Lavamunepen minia di vara i do dina sev amer ia. Di vepaase nem-nem levendoxoma ri levempanga diba lox i ria.

<sup>11</sup> Di paase xeretna do, "Moroa ira raba rulu vam i. Ata mu arup ta i la ata lox epovo lodoxoma atnedik. Kopmen bok ba teta go xusu naba lok tooro i."

<sup>12</sup> O Moroa. Uguta nemen paxalom basinge ia. Lomoroa rak, una lok kepe soso na lumumuat tarak!

<sup>13</sup> Una lox asi nedi di sox ia mi levelinga xaxarang, una sev asubu di. La keke nedi di lok do dina lox asongor ia, dina mangan la dina baava.

<sup>14</sup> Anabam doma saga amisik taram. Anaba emi asu amisik minu la leemi asu rak tu naba nemen epasum.

<sup>15</sup> Anaba tong asu luvukat taram. La at levenaleng axap, anaba paase mumu loklok tooro ram, la keke i do axoklen ausuv i.

<sup>16</sup> Anabat pas keneng at lolos at Loorong Avolo. Anaba paase asu kusuk mun mo luvukat taram to at lemeren limixin axap.

<sup>17</sup> Ugarak lox ase vam ia, tuka axa i at levenmaares nia aga aau ren, la nia move a paase mumu leveloklok maraanu ram.

<sup>18</sup> Ananga ara sioxo la leveng-abinim at lavatlak tarak irak sokso. O Moroa, uguta raba rulu ia. Una su auru ia at levenaleng ana paase asu lolos silok taram tinedi lavaola axap mo dibap tavasus.

<sup>19</sup> Moroa, lempanga axap at na lavatbung menemen kopok la lempanga axap toxun pana at laxalibet, ik lox asuusu loklok taram in manton tino. Ugara lok pam levempanga silok. Kuren la kopmen teta go na lok ngan u.

<sup>20</sup> Ugara li vam levenmumuat mi levesongsongot mavana rak. Ketla unaba suxa kun ia mi lorooro nunuan la unaba lox asepsu ia basinge lamaaut.

<sup>21</sup> Unaba lox asilox ia polo mo levenmaares avot tarak la unaba lox amamana bok ba lodoxoma rak.

<sup>22</sup> Nia anaba emi asu ruturun minu mi loxontaaleng. Moroa rak, anaba emi asu mi loklok tuturun tia. Anabap sep levengkom pikan tu ro at ligita rak. Nenu Laradi Melemelengan at limixin me Israel.

<sup>23</sup> Anabap kup mi lososoro ru at loxonaleng anak sak loxontaaleng. Anabak pikan mi lorooro axap tarak, atla ugara lox asepsu vam ia.

<sup>24</sup> At levenaleng kudun axap anaba paase asu loklok manmanton taram, atla ugara sev asi vam nedi ua diga vara i do dina lok kapmex ia. Uga sak tup midi la nanga dira baava.

## 72

### *Lisingising Ti Loorong*

<sup>1</sup> O Moroa, una anasa loorong kusu ni naba viila mumu loklok at limixin

mi lodoxoma mokmokso i ngan mun taram. Una lox ase i mi levelinga loklox akmokso ram,

<sup>2</sup> kusu neni naba viila mumu avukat limixin taram at levenaleng neni naba nemen ngan lamgomgo atnedi. La neni nabam gomgonga nedi luvuttadi ua di baava. Neni naba lox i na mi levelinga manmanton.

<sup>3</sup> Nia a sing bok do limixin at na lenep kangka ren dina ngasang kobot, la na lenep na umsu mi loklok manmanton.

<sup>4</sup> La loorong na ila leveloklok at luvuttadi banbalo mi lodoxoma ruturun. La neni na lok tooro luvuttadi vakpakes la nat pas asi luvuttadi loklok papavas.

<sup>5</sup> La a sing bok do limixin taram dina lotu saparap amisix u at levenaleng laxangking i soosoo, la at levenmaares lagaaling im taba asu lososoo ren ti na loola la ti mo bok lavaola dibap tavasus.

<sup>6</sup> La loorong na lok ngan larakabu ri leventaamang la naba ngan bok levengkaramis dan im subu ro vana at laxangka.

<sup>7</sup> La loklok manmanton na sisilok lolos kantubu at limixin at ne Moroa keneng at levenaleng axap at lorooro ren. La dina ngasang kobot amisik kerekngan lagaaling im taba amisik laxasep.

<sup>8</sup> La a sing bok do lixitkis orong teren na vung kimit mo levennep kangka ik lok saparap laras, la na sisilok, ruka i ro at ladan sen Iupretis la na se at latnese at lavatbung menemen.

<sup>9</sup> La limixin boro at lamatbin dina tu tiktikbu mi lempatgulom atdi ro melango ren. La limixin munepen min dina subu midi gamasa mi lenbantuxu atnedi uto xopok at laxangka ri lok ngangao ren.

<sup>10</sup> La lavaorong me Spein la boro at levesoxan bok, dinak lok leven-tamtaba rin. Lavaorong me Sheba la Seba dinabam taba i mi leven-tamtaba.

<sup>11</sup> La lavaorong axap dinat kis tiktikbu ro melango ren. Limixin at

larabung mixin axap dina gugu taba i.

<sup>12</sup> La a sing bok do loorong na lox asepsu luvuttadi banbalo ua di toro rin basinge lorooro etaba, la nedi bok ua dik pakes la lavapen abulubun.

<sup>13</sup> Neni na lox asuusu lebelen tun-tun tinedi dixo ruuna lolos la di banbalo. Neni na lox asepsu limixin pakpakes basinge lanmet.

<sup>14</sup> Neni na lox asepsu di basinge limixin loklok papavas, limixin muk-musak, la limixin sepsep tadi, atla lorooro atnedi i lok ngan lavanga matmatkun tin.

<sup>15</sup> Naba lox avukat do loorong na rooro amisik! La limixin dinam taba i mi levengol boro Sheba. La keneng at levesingising at limixin, dina tong ke amisik teren at levenaleng axap. La loklox anarong at ne Moroa na nemen amisik pana ren!

<sup>16</sup> La na lenep kangka na umsu mi laxam piao. La lengkong kaana nam tebonot pe mi levempieve anan, la dina pisik solo ngan leventauna ro Lebanon. Keke mo laramenemen silok teren na umsu mi limixin, la na lok ngan laxangka i umsu mi levempivilis.

<sup>17</sup> Naba lox avukat do limixin di noxo domampe laasen at loorong at levenaleng axap i tu melamgo. La keke mo lakleklen at limixin mumu i, na nemen amisik ngan laxangking. La limixin at larabung mixin petpes bok dina ngising ne Moroa ri lox anarong nedi ngan ni gara lox anarong pam loorong.

<sup>18</sup> Leemi asu ri Leeme Silok ne Moroa me Israel! Neni xusuk mun ik lok mo levempanga maraanu.

<sup>19</sup> Leemi asu amisik la kopmen tekavaxap teren ti laasen meleme-lengan teren! Keke lisisinang teren na suxuna axap lavatbung memen. Tuturun! Tuturun!

<sup>20</sup> Neni na laxavaxap at levesingising at ne Devit, lamdak at ne Jesi.

## Moraa

<sup>1</sup> Moroa ga vukat tuturun tinotno ri leme Israel, la tinedi ua levempeve atnedi i kasep.

<sup>2</sup> Ketla nenia, aga auret tinotno xusu lesepep sogo rak at ne Moroa gita xap. La lununu rak gita subu,

<sup>3</sup> atla nenia ga bele mumuat tinedi digak lox aaso, la at levenaleng aga reven levempanga gak sixit avukat tinedi limixin kapmek.

<sup>4</sup> Dixo ekip tangarang mi levesong-songot, la di lolos la dixok meres.

<sup>5</sup> Dixong songot ngan lentaba luvuttadi ding songot kuren. Dixon tuuna bok tevenekarakat ngan lev-entaba vetpes din tuuna i.

<sup>6</sup> Kuren la ding sigaara mi loklox aaso i ngan levenonga di vonga i at lengkaka atdi, la ding siga bok lemusak mi leesep i ngan lengkontamon babaalom di vitis korop di min.

<sup>7</sup> Lempatpeve atnedi ip kip soobang asu laxapmek, la levendoxoma atnedi ik lox angtang tinotno mi levendoxoma alipe xapmek.

<sup>8</sup> Ding longon aksaksa ri limixin la di paase mumu levempanga xapmek. Dik lox aaso la dik lox agagas li leventaangas kusu tik lox abaava lentaba vetpes.

<sup>9</sup> Di paase vupu ri ne Moroa mo ik lok toxun pana at laxalibet, la di paase asu avut lemet ti limixin at lavatbung menemen.

<sup>10</sup> Kuren la mo limixin at ne Moroa di repukus ti mu asu di la di nunu lolos tinotno at lempanga di paase i.

<sup>11</sup> Mo limixin kapmek di tong i do, "Ne Moroa noxoklen i. Leeme Avolo noxo long terek nedik."

<sup>12</sup> Limixin kapmek di paase kerepmo. Di ruuna laxampanga solo la move dirak lok ka panga bok.

<sup>13</sup> Kereva ba nenia, aga kok avukat gamasa mene lorooro rak, la agoxo lok laxapmek?

<sup>14</sup> O Moroa, uga lox asongot solo ia at laxanaleng axap. At leven maxan-tamak amisik ugap sev asongor ia.

## 73

### *Levelinga Loklox Akmokso At Ne*

<sup>15</sup> Do nia agita paase asu tevelinga vetpes kerekngan mo limixin kapmek, agitaba lox asuusu i do nenia xopmen lara atnedi limixin taram.

<sup>16</sup> Aga lok tong pen i do ana doxoma mumu na lumumuat, ketla ga lolos tinotno ria ri lox akmokso i,

<sup>17</sup> ga se at loxonaleng aga beles uto at loogu laplavang taram. Go ba i, aga long lenget ka ba i do lavanga salai mo naba vot atnedi limixin kapmek.

<sup>18</sup> Unaba lok li di ro at lenep i gagai, la unaba lok nedi diba subu tup at leeteke!

<sup>19</sup> Di naba pubeles soso mun at lesorexales. La laxavaxap atnedi, dinabap tava si rinotno uto xopok at loxot pis.

<sup>20</sup> Dinabak lok ngan lapnobo i xap basinge lodoxoma at laradi at len maxantamak. La kerepmo bok at loxonaleng nenu, Leeme Silok, una beleku kaxat, dinaba sonao.

<sup>21</sup> At levenaleng levendoxoma rak ga soogong tu la labalak ga mamao ru.

<sup>22</sup> Agang tangku ngan lavanga mi lavanuet kangkedek. A goxo xasep at lodoxoma ram.

<sup>23</sup> Ketla nanga a nemen saparap amisix u, la um tebeng lakngak tino.

<sup>24</sup> Um lam ase ia mi levenanasa ram la at laxavaxap teren, unaba siam ka ia mi leemi asu ram tia.

<sup>25</sup> Nege bok ba nia a ruuna ka i ro at laxalibet? Nenu xusuk mun. At na levenaleng nenia a ruuna u, a vara bok ba tavanga sala i de at lavatbung menemen?

<sup>26</sup> Do lodoxoma rak la labantuxu rak na molos, nu ne Moroa, nenu lolos tarak. Nenu xusuk mun nia ak pakes tu.

<sup>27</sup> Nedi di raba rulu u, ne Moroa, dinaba seeve. Unaba sele utut nedi di babala vukpux u mi lorooro atnedi.

<sup>28</sup> Ketla i lox avukat tinotno do nenia a nemen saparap ne Moroa, nu Lurutu See Pe rak. Nenu Leme Silok, Loorong Avolo. La i lox avukat tinotno bok mo do a paase asu lempanga axap nenu gara lok pam i!

## 74

### *Lisingising Ti Lox Asepmus Leme Israel*

<sup>1</sup> O Moroa. Ua lavasuun teren la u raba rulu nema xeretna? Kereva, lebelemamao ram ti limixin akmokso ram naba nemen amisik ta, la noxo xap?

<sup>2</sup> Una doma limixin taram mo nenu uga soxolik ka axa di gano xusu nedi ataram. La nedi ua uga lam asu ka di at loxokoxo kusu diba ravasu ngan lubang mixin akmokso ram. Una doxoma lakaana Saion, no nenu uga nemen bok be ve kantubu atnema.

<sup>3</sup> Una vas mavana at loogu laplavang taram ga rem utut. Lavamunepen minema digara sele utut axap pam lempanga ro xeneng teren.

<sup>4</sup> Lavamunepen minu digap kup silok tinotno mi lomomo ro xeneng at loogu laplavang taram. Diga lox aurut leventamon i ru katling lenep silok atnedi, i ngan lampoovo do, nedi diga sak tup minema la diga ruuna ka loogu laplavang.

<sup>5</sup> Diga esep ngan luvuttadi ratara una diga tara asi laxanuna mi levenmatao atdi.

<sup>6</sup> Diga tit povorok levengkon una diga xovox i at levengkot kitkis, levenora anan, la at laramusmaragu mi levenasop la lempatmatao silok atdi.

<sup>7</sup> Diga ut tereve xepe loogu laplavang taram la diga song arup laxao ren. Diga lox amexexe rinotno Loxot Kaala ua limixin diga lotu saparav u.

<sup>8</sup> Diga vara i do dina vas amdanda axap nema. La diga kotos asi laraogu axap i xaala at na lenep kangka.

<sup>9</sup> Ma xopmen na ven bok ba tempanga abis. Kopmen ta teputadi vapaase ali go dik lok, la kopmen teta naklen i do na lumumuat naba nemen at lavanisa maares axap.

<sup>10</sup> O Moroa, naba vanisa maares mo na limixin munepen minema dibang longon sese u? Kereva, diba paase vupu amisik ta ri laasen taram la kopmen tekavaxap teren?



11 Ua lavasuun teren la u rongga xepe ri lok tooro nema? Tila ba uk lok li lukngam to melemu ram?

12 O Moroa, ugarat kis orong silok pam tinema, tuka axa i at lurutu kaxat at lubung mixin me Israel, la buaang laxanaleng ugak lox asepsu vam nema at levenmumuat.

13 Uga lok langas to at laras mi lolos silok taram, la uga tit povorok lempatlak at laxampanga silok boro xeneng at laras.

14 Uga rit povorok lempatlak at lavatpanga silok ne Levietan, la uga raba lempanga mi lavanuet kangkedek no at lamatbin mi laban-tuxu ren, tidi ri anan.

15 Uga lok levempuuvut dan mi levendan lixilik digara sen bok ba. La uga lox ames lempatdan sen silok.

16 Uga rudum li laaleng kangking, la laxanimin. Uga vaxaxis li laxangking mi lagaaling at luxot atdu.

17 Uga lok li latnese at na lavatbung menemen. Uga lok lamaares mi laavat.

18 Ketla, Leeme Silok tarak, unaklen i do limixin munepen minu ding longon sese u, atla diplavang ti levenmoroa xaxarang, kuren la dik sok tixirixes u.

19 Uguta raba rulu limixin axap taram. Di lok ngan mun limixin pentaae. La uguta ke xepe di kusu dina vubeles at longlong kuxurung at limixin munepen midi. Uguta domampe limixin taram mo dim suma leveloklox asongot.

20 Una doma laxakaape uga lox i eburu minema kusu una lok tatao nama. Levenekarakat mo ik lok at lengkon mesuluk main axap at na lenep kangka.

21 Uguta ke xepe luvuttadi baava kusu dina mangan. Una lok tooro mo luvuttadi banbalo mi lavamun panga xusu diba emi asu minu.

22 O Moroa, una beleku kaxat, la una tu xa at lenep taram mumu na levenmumuat atnema. Una doxoma box i do limixin tongtonga xepe ding longon sese amisix u at laxanaleng axap.

23 La uguta domampe leven aknuxup belemamao at limixin munepen minu, mo di gagang linga amisik taram.

## 75

### *Moroa Neni Laradi Rongtonga Linga*

1 O Moroa, ma tong avukat tu, ma tong avukat tu! Ma tong aonon lisisilok taram atla u silok aleng, la ma tong aonon bok levempanga maraanu ugara lok pam i.

2 Moroa ga vaase xeretna, "Nia ara vit li vam laaleng ti leete, kusu anaba ila loklok at limixin la anoxo tong asu levelinga xaxarang.

3 Keke i do levempanga axap di ruuna lorooro, dina dede mi lanmarat, la lavatbung menemen nang nengne, ketla nenia anabak lox aru lolos laamkumkun at na lavatkangka.

4 A paase ri limixin tongtonga xepe xusu dinak lok ngangao la di noxo simi aurut di.

5 La dina xap ta di rik lox aru axa di la na xap bok tit las di."

6 Mo laradi rim gonga leete, noxo ravasu do boronak koplak borois, la noxo ravasu do borou xopla boroxun.

7 Neni axa ne Moroa naba ila loklok at limixin la ni naba riki xepe lentaba la na vuxaxis avukat lentaba.

8 Leeme Silok im tebeng lavanga runtu dan to at lekngen, la i umsu mi laxadan vaen lolos mo i ru katling lebelemamao ren. Neni i soobang asu i, la limixin kapmek di inin i. Di inin asi rinotno i se at lengkootu avit.

9 Ketla nenia noxo xap at lava-paase asu levelinga mumu Lomoroa at ne Jakop koplak anak pixan emi asu rin.

10 Neni naba ba koxorop lolos at limixin kapmek, ketla lolos atnedi di ruuna loklok manmanton naba sisilok.

## 76

### *Moroa Laradi Vatpas Asi*

<sup>1</sup> Limixin to Juda dikleklen ne Moroa, la dim taba asinorong laasen teren to Israel.

<sup>2</sup> I ruuna langkolonu ro Jerusalem. Loogu ren i nemen to at loxongkaana Saion.

<sup>3</sup> Ap mo loxot neni ga sak pirivit levesoso at laradi munepen min, la ga sak pirivit bok larapenban mi lemparise esep atdi, la lempanga esep axap bok atdi. Na levelinga i raturun tinotno.

<sup>4</sup> O Moroa, u silok aleng. Laasen silok, neni ataram kusuk mun, at loxonaleng ugamlong boro vana at levengkaana, ap mo loxot ua uga sev asi limixin munepen minu.

<sup>5</sup> Limixin taram diga sak paxat ka axap lempanga atnedi mo limixin esep lolos, la monga dira vunga ngan luvuttadi met. Levelolos atnedi mi lakleklen atdi ri vesep ga ravasu ngan lempanga gamasa.

<sup>6</sup> O Moroa at ne Jakop, at loxonaleng uga paase lolos tinedi, lemparos eburu mi luvuttadi ro vana ren digam subu ri lanmet.

<sup>7</sup> Ketla nenu Leeme Silok, limixin axap dik marat taram. Teta ixo epovo xusu na ru tangarang u at loxonaleng u belemamao.

<sup>8</sup> To vana at laxalibet uga tong axasep limixin axap mi levelinga loklox akmokso ram. La limixin at lavatbung menemen diga marat, kuren la mo digat kis sixim mun.

<sup>9</sup> Atla uga ru kaxat kusu ti vaase asu lempapaase ramtaba ina ram, la kusu ti lox asepsu limixin baava de at lavatbung menemen.

<sup>10</sup> Lebelemamao at limixin at lavatbung menemen ik lox asuusu mun leemi asu silok tu. Nedi di roo su at levenesep silok, dinabak lok katling amisik levenaleng silok taram.

<sup>11</sup> Nemi levenabung mixin petpes, mina raba Leeme Silok, neni ne Moroa atnemi mi levempanga no migapliplis i min. Mik lok auret leme Israel, minabam taba i mi leven-tamtaba atnemi. Moroa ik lok limixin axap kusu dinak marat teren.

<sup>12</sup> Neni ik lox asi laxamdak at lavaorong silok dit las di, la lavaorong dik marat aleng tinotno teren.

## 77

### *Loklox Amamana Xeneng At Levenaleng Songsongot*

<sup>1</sup> Nia ang teng silok ti ne Moroa, ang teng silok la ing tonga ia.

<sup>2</sup> Angising ti Leeme Silok keneng at levenaleng at levenmumuat. La at levenaleng kanimin axap, angosong aurut mi lukngak keneng at levesingising tarak, ketla lodoxoma rak kopmen nat kis bus.

<sup>3</sup> At lengkonaleng amdoma mumu ne Moroa, lamamas tarak ixot lottu saga la arat mas gaaga. La mo do anam doma mumu levelinga ren, arak lox abulubun bok tarak.

<sup>4</sup> Neni ik lox ia ara tuang aan at lengkanimin. Lodoxoma saasaa i suxuna lorooro rak, kuren la axo epovo ri vaase tekolonga.

<sup>5</sup> Am doma levenaleng ira vovolo vam la aram doma su bok at levenmaares me gano axa.

<sup>6</sup> At laaleng kanimin axap, a pubeles at levendoxoma lolos aleng. Am doma mumu u ne Moroa, la ara susue bok axa ia xeretna.

<sup>7</sup> “Kereva, Leeme Silok naba lox abulubun kepe amisik nedik limixin me Israel? Koplala neni noxo momo bok ba minedik?”

<sup>8</sup> Kereva, labalamu ren tinedik ira xap ta koplala ira los polo vam laxakaape ren ti kok avukat dik?

<sup>9</sup> Kereva, Moroa ira domampe vam i xusu neni na lox asuusu lebelen tuntun ti limixin teren? Koplala lebelemamao ren na ira soxun asu vam lebelen tuntun teren?”

<sup>10</sup> Melemu aga vaase xeretna, “Lara lavanga i lox abulu ia xeretna, neni na ne Moroa ixo lok tatao bok ba nedik.”

<sup>11</sup> Ketla nenia anabam doma amisik leven gugu silok taram ugak lox i, Leeme Silok. Anabam doma su la ana paase asu lempanga sangsangu no nenu ugarak lok pam i ga migomgo.

<sup>12</sup> Anabam doma mumu mo levempanga axap nenu ugarak lok pam i. Anaba paase eburu minu mumu na levempanga lolos nenu uga lox i.

<sup>13</sup> O Moroa, leven gugu axap nenu uk lox i, ik mokso aleng tinotno. Kopmen bok ba temoroa go i silok ngan u.

<sup>14</sup> Nenu vam nom ne Moroa uk lok lempanga sangsangu. La ugak lox asusu lolos silok taram kusu levenabung mixin petpes dina ven i.

<sup>15</sup> La mumu mun mo lolos taram, uga lox epovo i xusu una lox asepmus limixin taram, nedi livipisik li at ne Jakop la at ne Josep.

<sup>16</sup> O Moroa. At loxonaleng laradan mi laras diga reven u, digak marat. La lisimaramain at laras ga dede.

<sup>17</sup> Lempat main bet ga soobang asu larakabu. La leretepaavat boro vana at laxalibet, la lavanga ga mam su boro at laramera manman axap.

<sup>18</sup> Leretepaavat at lengkon takabu ram ga teposok su, la losoosoo at lavanga ga mam ga soosoo axasep lavatbung menemen. La lavatbung menemen ga dede la gangne.

<sup>19</sup> Ugat pas kantubu at loxontas, la uga xoxorop loxontas main. Ketla maxo epovo ri ven kaka lenain at luxangkedek taram.

<sup>20</sup> Ugam lam limixin taram ga ngan laradi loklok tatao sipsip, la uga lok li ne Moses mi ne Aron kusu dunam gomgonga di.

## 78

### *Moraa Eburu Mi Limixin Teren*

<sup>1</sup> Limixin tarak, minang tonga ka i na levenanasa rak, la minam doma mumu lempanga nia ana paase i.

<sup>2</sup> Nia anaba tong asu levempa-paase poovo ridi la ana re musumus levempanga megano ua gak lox alipe.

<sup>3</sup> Mo levelinga ua tagara ronga vam i la tagaklen ka i, mo levelinga ua lavalabat atdik diga tere avolo i ridik.

<sup>4</sup> Ata xo lok pepe i na at lax-amdak mi laxaalik atnedik. Ataba tere i ri mo lavaola dibap tavasu

melemu mumu mo lolos at Leeme Silok, la leven gugu silok teren la levempanga maraanu ua neni gara lok pam i.

<sup>5</sup> Neni ga raba leventaangas manmanton mi Laulis Linga ren ti limixin me Israel, nedi livipisik li at ne Jakop. Neni ga paase alolos i ri lavalabat atnedik kusu dinaba anasa lax-amdak mi laxaalik atnedi mi Laulis Linga,

<sup>6</sup> kusu mo lavaola melemu dinabakleken i la dinaba tere avolo box i ri luvutnitna di.

<sup>7</sup> La mumu mun na langas, dinaba nunu saga rinotno at ne Moroa la dinoxom domampe lempanga neni garak lok pam i, ketla diba mumu asu amisik Laulis Linga ren.

<sup>8</sup> Di noxok lok ngan lavalabat atnedi ua diga gagang linga, la digang tonga xepe amisik levelinga at ne Moroa. La lesepsep sogo atnedi rin goxo lolos la di goxo ruturun amisik tin.

<sup>9</sup> Leme Epraem, diga ruuna lax-anbanara eburu mi levesoso, diga sixiro at laaleng at leesep.

<sup>10</sup> Diga los polo lekabus atnedi mi ne Moroa. La di goxopara na ronga res at Laulis Linga ren.

<sup>11</sup> Diga domampe lempanga neni ga lok pam i, i ngan mo lempanga sangsangu ni ga lox i ro melango atdi.

<sup>12</sup> Ap mo levenaleng lavalabat atnedi diga reven tinotno ne Moroa gak lok lempanga sangsangu ro at lemelubu ro Soan ua ik lok keneng at lenep silok Isip.

<sup>13</sup> Neni ga lox epeseves loxontas la ga lam avolo di ren. La ni ga lok mo lunep tas ga tu ngan luvat kapkapla.

<sup>14</sup> At levenaleng kangking, neni gam lam di mi lovotakabu la at lengkanimin ni gam lam di mi langangao at laxao.

<sup>15</sup> Neni gak lok pagam lemparuat to at lamatbin la gam taba di mi levendan boro xa xopok at lebelen laxangka.

<sup>16</sup> Neni ga lok ladan kusu na sen su boro xeneng at lavaruat la ga lok mo

ladan ga sesen ngan lavatdan silok.

<sup>17</sup> Ketla nedi leme Israel di goxo xap tik lok leveloklok kakapmek ti ne Moroa, la digang tonga viribang at Leeme Avolo ro at lamatbin.

<sup>18</sup> Diga lox asuusu rinotno i xusu dina lok tong ne Moroa keneng at levempapaase lolos atnedi ri lev-eluxa salai diga vavara rin.

<sup>19</sup> Diga tere asu at ne Moroa xeretna, “Kereva, i epovo ne Moroa naba raba dik mi teveluxa de at na lamatbin?”

<sup>20</sup> I raturun do neni ga viksa lavaruat, la ladan ga rem soobang su ngan ladanut. Ketla kereva, i epovo bok do neni na raba bok nema mi lengkongkide eburu mi tempanga lomlomon?”

<sup>21</sup> Kuren la Leeme Silok ga ronga di la ga belemamao aleng di. La neni ga lox asongot di mi laxao, la lebelemamao ren tinedi ga sisilok.

<sup>22</sup> Atla di goxo nunu saga ren la di goxo nunu bok do neni naba lok tatao di ro at lamatbin.

<sup>23</sup> Ketla neni ga vaase ri laxalibet no vana la ga tong i ri laramus-maragu ren kusu na rem suang.

<sup>24</sup> Ap mo levenaleng neni ga raba di mi lamaana boro vana at laxalibet. At na mun langas ni ga lox asu lempanga anan tinedi ri anan.

<sup>25</sup> Kuren la diga anan leveluxa at lubang angelo, la ne Moroa ga lox epovo axap lavavara atnedi.

<sup>26</sup> Mi lolos teren neni ga lok bok lemere manman boronak kusu nat mas. Ni ga lox araut lamatmas at lemere manman boroxun,

<sup>27</sup> la ga raba asu laxampixa ukopok ti limixin la diga buaang aleng ngan laxanit kapulang nou loxon.

<sup>28</sup> La digam subu ro xantubu ap mo lemenemen la kangkan laraogu kadis.

<sup>29</sup> Kuren la limixin diga vanan la diga anan mais. Ne Moroa ga raba nedi mi leveluxa ua nedi diga vavara i.

<sup>30</sup> Ketla di goxok lox axap ba langaogao anan atnedi, keke i do move digara vanan.

<sup>31</sup> Kuren la ne Moroa ga belema-mao di la ga sev amet nedi luvuraau lolos avukat at leme Israel.

<sup>32</sup> Ketla limixin di goxo doma mu i na levempanga la move digak lok leveloklok kakapmek. Lempanga sangsangu bok di goxo doxoma mu i la diga ke xepe lununu saga ren.

<sup>33</sup> Kuren la ne Moroa ga lox axap soso mun leventooro atnedi mi langsung lumumuat la levenaleng at lorooro atdi ga xap kot.

<sup>34</sup> At lengkonaleng neni gap sev amet lentaba atnedi, nedi mo lentaba diga ba tepukus taba i. Diga ngaleeng la diga ngising tin mi lorooro axap atnedi.

<sup>35</sup> Diga doma ka i do ne Moroa neni Lurutu See Pe at lorooro atnedi, la do mo Lanaraavuk ga vot ngan Laradi Loklok Tooro atdi.

<sup>36</sup> Ketla levelinga atnedi ga umsu mi laxaxarang la goxopmen teruturun at levelinga atdi.

<sup>37</sup> Di goxo raturun tin, la di goxo mumu asu lekabus diga lox i eburu min.

<sup>38</sup> Ketla ne Moroa ga lox asuusu lebelen tuntun tidi atla nedi limixin teren. Neni ga doxoma xepe leveng kakapmek atnedi la ni goxo sev amet nedi. Buaang laxanaleng neni gam tebeng amlong lumukmusak teren la gak lox asi mo lolos ap mo lebelema-mao silok teren.

<sup>39</sup> Neni gakkelen i do nedi limixin mun ua neni ga rudum nedi mi laxangka, la lorooro atnedi goxo babaalom. Diga lok ngan mun lamanman it mas polo la ira onon tino nga.

<sup>40</sup> Digang tonga viribang solo ren to at lamatbin. La buaang mene nga laxanaleng digak lox antun i.

<sup>41</sup> La digak lok tong pen amu amgo ne Moroa la digak lox abulu i, keke i do neni ne Moroa la Laradi Meleme-lengan me Israel.

<sup>42</sup> Diga doma aie i do lolos teren i silok aleng, la mo bok laaleng ua neni ga lox asepsu di basinge limixin munepen minedi,

<sup>43</sup> la ga lok bok levempanga sangsangu silok to at lemelubu ro Soan keneng at lenep silok Isip.

<sup>44</sup> Neni ga vuk gili laradan ti lok ngan lada, la leme Isip di goxo ruuna tevendan ti inin.

<sup>45</sup> Neni ga riki abeles laxanulang ukeneng tidi ua ga raba nedi mi losongsongot silok, la laxangkoak ua ga lok kapmek levenmenemen atdi.

<sup>46</sup> Neni ga riki asu laxasixu ri anan levempееve atnedi la ga lok kapmek axap leventaamang atnedi.

<sup>47</sup> Neni ga sev amet larauna vaen mi lavatbet uat, la ga sev amet bok larauna angnu mi langsgangan lumudut.

<sup>48</sup> Neni ga sev amet laxanbulumaxao atnedi, mi lavatbet uat, la ga sev amet laxasipsip atnedi mi lavanga ga mam.

<sup>49</sup> Ni ga lox abaava rinotno di at loxonaleng ni ga soobang asu lebelemamao sepsep teren, mo gat pot ngan ta laradi sepsev amet tadi.

<sup>50</sup> Neni goxo ranga alis lebelemamao ren koplа gita lox asepsu nedi leme Isip, ketla ga sev amet di mi levenanmeres sepsev amet.

<sup>51</sup> Neni ga sev amet laxamdak avot at lara koenasun axap me Isip.

<sup>52</sup> Melemu neni ga lam asu limixin teren me Israel ngan laradi loklok tatao sipsip la ga lam avolo di ro lamatbin.

<sup>53</sup> Neni gam lam aratao avukat di la di goxok marat. Ketla laras ga repit pavaa limixin munepen minedi la diga met axap pam.

<sup>54</sup> Neni ga lam li di ro at lenep kangka xaala ren la uto at levengkaana no neni ga los kaka i.

<sup>55</sup> Neni ga saksu mi limixin mego at levenaleng limixin teren diga pubeles. La ga vesinga laxangka atnedi xantubu at levenabung mixin me Israel, la gam taba limixin teren mi laramenemen atnedi limixin mego.

<sup>56</sup> Ketla leme Israel diga ronga viribang at Lanaraavuk ne Moroa, la diga lok tong pen i mi leveloklok

atnedi. Digoxo ronga res at Laulis Linga ren,

<sup>57</sup> ketla diga ronga viribang la di goxo ruturun tin ngan lavalabat atdi di goxo ruturun tin. Digak lok ngan lososo xakauk ixo sixit akmokso.

<sup>58</sup> Digak lox abelemamao i atla diga lotu saparap levenmoroa xaxarang. Digak lox abelengatngas tinotno i mi laxampoovo moroa atnedi.

<sup>59</sup> Moroa ga belemamao at loxonaleng ni ga ven mo lempanga. Kuren la ni ga sok sisixe axap tino limixin teren.

<sup>60</sup> Neni ga on basinge rino loogu kadis teren to Silo, ni lanemen ua neni gak lok kantubu at limixin teren. <sup>61</sup> Neni ga siam avolo limixin munepen minedi xusu dina sak paxat ka lobokis at lekabus, neni mo loklok poovo at lolos la lisisixam teren.

<sup>62</sup> Neni ga belemamao limixin akmokso ren la ga ke xepe di xusu limixin munepen midi nabap sev amet di.

<sup>63</sup> Luvuraaу atlok diga remet at levenesep, la luvuraaу rixin di goxo ruuna bok ba tavatlok kusu tidi ri vepot atdi.

<sup>64</sup> Lavamaasa diga remet keneng at levenesep, la limixin munepen digap sep pepe lavakin atnedi lavamaasa xusu dinoxok saxaanu.

<sup>65</sup> La soso mun, Leeme Silok ga beleku kaxat, ga lok ngan ta do ni ga rakdu tuang ngan boro at lanunga. Neni ga lox agagas lodoxoma ren ngan leeme lolos i inin laxadan vaen kusu ti gagas ti esep.

<sup>66</sup> La neni ga sak tup tinotno mi limixin munepen min la digak lok mamangan aleng amisik.

<sup>67</sup> Ketla neni ga lox abulubun kepe livipisik li at ne Josep, nedi lubang mixin me Epraem. Ni goxo soxolik ka di.

<sup>68</sup> Ketla ni ga soxolik ka manga lubang mixin me Juda mi lakaana Saion, mo loxot ua lebelen ga tu rinotno i.

<sup>69</sup> La neni ga vaxaru loogu laplavang tin go, i lok ngan lemenemen aulis teren noxun pana at laxalibet. Neni ga lox atmatkun tinotno i ngan at na xa lavatkangka axap, la gak lox alolos i kusu naba nemen avukat amisik kuren.

<sup>70</sup> Neni ga soxolik ka lasaxarukiren ne Devit ngan loorong. Ni ga lam asu xaka i ro at loxot anan at laxasipsip,

<sup>71</sup> ap mo loxot ua neni ne Devit gak lok tatao laxasipsip teren. La ne Moroa ga vaxaxis li i ngan loorong me Israel, ga neni laradi loklox aratao at limixin at ne Moroa.

<sup>72</sup> Devit gak lok tatao nedi la goxo reven kepe tepentaba la neni gam gongonga nedi mi lodoxoma avukat teren.

## 79

### *Lisingising Ti Lox Asepmus Leme Israel*

<sup>1</sup> O Moroa, lavamolon digara buxup beles pam at lenep kangkaram. Digara lox amexexe vam loogu laplavang taram i xaala la ira lok kapmek axap. La diga sele utut kepe lemenemen silok Jerusalem.

<sup>2</sup> Diga ke xepe lenbantuxu at limixin taram kusu ti lempatpixa silok. Diga ke xepe lenbantuxu at limixin akmokso ram kusu ti laxampanga sio mi lavanuet kangkedek atdi ri anan.

<sup>3</sup> Digap sev asu ladaada at limixin taram ngan ta ladan, la ladaada ga sesen ngan ladan to at lengkot axap keneng Jerusalem. Goxopmen tara ga roo su xusu tik mikmit avukat limixin diga remet.

<sup>4</sup> Limixin at lubang mixin petpes ua dik lok saparap nema, di paase mumu parang nama. Ding longon sese nama la di paase aksaksa rinama.

<sup>5</sup> Leeme Silok. Kereva, lebelemamao ram tinema noxo xap ta? Kereva, mo lebelemamao ram nabak lox amisik ta la naba lox asongot nama ngan laxao?

<sup>6</sup> Una lok pukus mo lebelemamao ram kusu na subu mavana ap mo limixin petpes no dixo lotu saparav u, la pana atnedi no dixo ngising saparav u.

<sup>7</sup> Atla diga sev amet pam limixin taram. Digara lok kapmek lengkot axap at lenep Israel, ni lenep kangkaram.

<sup>8</sup> Uguta lox asongot nema mumu laxakapmek at lavalabat atnema. Una lox asusu nga lebelen tuntun tinema mo, atla lodoxoma abulubun na i suxuna rinotno nga nama.

<sup>9</sup> O Moroa, una lok tooro nema la una lox aroo nema. Una lox asepsu nema basinge na lumumuat la una doma xepe laxapmek atnema xusu levenabung mixin petpes diba raba asinorong u.

<sup>10</sup> I lok kapmek do limixin at levenabung mixin petpes diba lok tinema dola, "Ne Moroa nga ua atnemi?" Ma vara i do una lox asongot levenabung mixin petpes atla digap sev amet buaang atnema limixin axaram.

<sup>11</sup> Una ronga lerengteng at limixin dik lok at loogu xokoxo, la mi mo lolos taram una lox asepmus nedi mo limixin munepen di gagas kusu dina sev amet di.

<sup>12</sup> Leeme Silok, una vorang i ridi levenabung mixin petpes, mi tavanuti teveloklox asongot axap, mumu mo laxaloklox aksaksa digak lox i ru.

<sup>13</sup> Kuren la nema limixin taram, ma ngan laxasipsip taram, manaba tong avukat amisik tu la manaba emi asu amisik minu at levenaleng axap i tu melamgo.

## 80

### *Lisingising Ti Vaxaru Amlong Lubung Mixin Me Israel*

<sup>1</sup> O laradi loklok tatao sipsip me Israel. Nenu Lamgomgo at limixin taram, una ronga atnema. Ut kis at loxonin orong taram ik lok mavana at lempanga raptava (cherubim).

<sup>2</sup> Una ru asuvos ti levenabung mixin taram me Epraem, Benjamin,

la Manase. Una lox ase nema mi lolos taram. Ude u la una lox asepsu nema!

<sup>3</sup> O Moroa, una siam ka amlong nema! Una lox asuusu lebelen tuntun taram tinema, kusu manaba roo su.

<sup>4</sup> Leeme Silok, nu Lanaraavuk ne Moroa. Naba se ba ua mo lebelema-mao ram ti levesingising at limixin taram?

<sup>5</sup> Ugara raba vam nema mi levenanbulu ua ga lok an mais nema ngan lempanga anan, la i lok ngan ta do magara inin pam lempatbuxom kamkabili dan at lengkatli atnema.

<sup>6</sup> Uga lox avolo limixin at levenabung mixin petpes dik lok saporap nema xusu dina vesepe eburu ti lok kaka mo lenep kangka atnama. La monga limixin munepen minema di paase aksaksa rinema.

<sup>7</sup> Lanaraavuk ne Moroa, una lok ka amlong nema basinge na lumumuat. Una lox asuusu lebelen tuntun taram tinama, kusu manaba roo su.

<sup>8</sup> Uga xip ka nema limixin taram boro Isip ngan labanoos vaen. La uga saksu mi limixin at levenabung mixin petpes la ugatlo mo labanoos vaen to at lenep kangka atnedi.

<sup>9</sup> Uga lox axasep lenep kusu tin ti suusu. La levenixe ren ga si rinotno uto xopok tubu, la levenoos teren gat las to mavana ap mo lenep kangka axap.

<sup>10</sup> Ni gang pung kimit lengkong kaana mi lamamau ren la levengakkan teren ga engeng urut at lemparuna Seda (Cedar) la ga kua abuxumin axav i.

<sup>11</sup> Ni ga lox asu levengakkan teren utois axa saporap loxontas Mediteranian la utonak axa bok at ladan sen lupretis.

<sup>12</sup> Tila ba la uga ut asi loroboro no gak lok kangkan i? La monga limixin munepen dit pas polo go, i epovo mene dinam nem kaka lempeven teren.

<sup>13</sup> La laxanbo sio dirat pas axangka i, la laxampanga vetpes bok mi lavanuet kangkedek atdi boro laxairing, dira vanan levempeven teren.

<sup>14</sup> Lanaraavuk ne Moroa, una repukus tinema! Una ven asi boroxun pana at laxalibet tinema. Ude u la una lox asepsu limixin taram!

<sup>15</sup> Ude u la una lox asepsu na labanoos vaen no nenu ugatlo li i. Na labanoos vaen tamaxat ba mo, nu uga lox asuusu dangdangun la alolos bok i.

<sup>16</sup> Lavamunepen minema digara ra koxorop asi vam i la digara song arup laxao ren. Una sep di mi lebele-mamao ram la una sev amet asonao rino di!

<sup>17</sup> Una lok see atnema limixin no nenu uga soxolik ka vam nama. Nema lubang mixin ua nenu uga lox alolos nema.

<sup>18</sup> Ma noxo repukus basinge bok ba u. Una kox arooro nema, kusu manaba vemi asu minu.

<sup>19</sup> Leeme Silok, Lanaraavuk ne Moroa. Una siam ka amlong nema, una lox asuusu lebelen tuntun taram tinema, kusu manaba roo su.

## 81

### *Loxompixan Ti Lok Katling Laaleng Silok*

<sup>1</sup> Nemi minap kup mi leklek ti ne Moroa, neni Lentupe rinedik. Minak pixan emi asu ri ne Moroa at ne Jakop!

<sup>2</sup> Mina vaxaru kaxat laxaka at livixan la minak sak leven tambarin. Minak sak lengkaka pixan avukat to at lempat taaleng mi lempat gita.

<sup>3</sup> Minat mas lempat tu ap mo levenaleng silok, at laaleng at lagaaling maxat la at laaleng at lagaaling i re kobot.

<sup>4</sup> Neni na Laulis Linga at leme Israel, la neni langas ne Moroa at ne Jakop ga tong taba di min.

<sup>5</sup> Neni ga raba i ri limixin me Israel melemu at loxonaleng neni ga lox asongot limixin at lenep kangka me Isip.

Nenia aga rongga laxaka at laradi ua nia a goxo rongga xibis i, ga lok keretna,

<sup>6</sup> "Nia aga lok kepe levenmumuat boro at levenantuno atnemi. Aga lok

nemi xusu miba soxope asi lempat aknixip uat (birikis).

<sup>7</sup> At levenaleng migak lok keneng at levenmumuat to Isip, miga tororia, la nia aga lox asepsu nemi. Aga lox epovo leventotoro atnemi at loxonaleng agak lok to xeneng at loxot alipe rak no xeneng at lamanman takabu. Aga lok tong pen nemi ro at levem puuvut dan to Meriba.

<sup>8</sup> Limixin tarak, mina rongga i na levempapaase aronga rak. Leme Israel, a vara rinotno i xusu minang tonga res tarak!

<sup>9</sup> Nemen tinotno nemi guta lotu saparap teven moroa vetpes.

<sup>10</sup> Nenia mun Leeme Silok ne Moroa atnemi, la nenia mun aga lam asu nemi boro Isip. Mina vangangba, la anaba raba luxa nemi.

<sup>11</sup> Ketla nemi limixin tarak me Israel mi goxo rongga ia, migita goxo rongga res tarak.

<sup>12</sup> Kuren la aga ke aie nemi mila lodoxoma atnemi ga vatken mi lorongtonga rubu linga. La miga mumu asu lavavara atnemi keneng at leveloklok miga vavara i.

<sup>13</sup> Nia a vavara rinotno i xusu nemi limixin tarak minang tonga ia. La a vara rinotno i xusu minang tonga res tarak!

<sup>14</sup> Mo do kuren, nia gitaba sak tup soso mun mi limixin munepen minemi la gira vas asi nedi diga tu tangarang nemi.

<sup>15</sup> Nedi ua di belangatngas tia, dinabak milik tiding mi lanmarat to melango rak. La mo loklox asongot tinedi naba nemen amisik noxo xap.

<sup>16</sup> Ketla anabak lox anan nemi mi levempiao i so misigisigis la anabak lox axap lavavara atnemi mi leven dan misiu boro xanubuan.”

## 82

### *Moraa Neni Lamgomgo Me Vana Axap*

<sup>1</sup> Moroa it kis silok keneng at lix- itkis buru roxun at laxalibet. Neni i sevut li levendoxoma avit keneng at lixitikis buru at leven moroa. Mo levelinga ren i lok keretna,

<sup>2</sup> “Mina xap tinotno nga at liila gesenep at levenaleng mik lok levenete. Mi gutak tu taba limixin kapmek!

<sup>3</sup> Mina viila mumu avukat loklok atnedi limixin banbalo la lubungkarun mi lodoxoma mokmokso. Mina paase mi luruturun tinedi dik pakes la dixo ruuna tevenasen silok.

<sup>4</sup> Minak lox asepmus di boro at lolos at limixin kapmek.

<sup>5</sup> Laxampanga vereven aie nimi! Langas panga rangtangu! Loklok atnemi ipsopso aleng tinotno! La kopmen tara atnemi at na lavatbung menemen i tong asu levelinga manmanton ting tong ina.”

<sup>6</sup> La nenia aga lok bok tidi, “Nemi lavaanat moroa. Nemi axap luvutnitna Leeme Avolo.

<sup>7</sup> Ketla minaba remet ngan luvut- tadi at na laxangka. Lorooro atnemi naba vaxap ngan bok lorooro at luvutnitna lavaorong.”

<sup>8</sup> O Moroa, ude u la unam gomgonga lavatbung menemen. Larabung mixin axap, ni ataram.

## 83

### *Lisingising Ti Sak Tup Mi Lavamunepen*

<sup>1</sup> O Moroa, ugutak lok sixim, ugatang longivilo, la ugatam pamngus!

<sup>2</sup> Una ven ba limixin munepen minu di lolos kusu diba remkaa su, la nedi no di belangatngas tu dirang tonga viribang.

<sup>3</sup> Di vetong li leven taangas alipe xusu dibak lok mo laxakapmek ti limixin taram. Dik lok leven taangas kusu ti sosolo arup nedi ua uk lok see atdi.

<sup>4</sup> Di paase xeretna, “Ude nemi, ata sele utut lenep silok Israel eburu mi limixin di nemen go, kusu limixin axap diba domampe axap tino di.”

<sup>5</sup> Di sisiam mu mo levempapaase li atdi la dik lok momo ri tu buru xusu ti vekini minu, ne Moroa.

<sup>6</sup> Nedi limixin me Edom la me Ismael, leme Moap mi leme Agirit;



<sup>7</sup> limixin me Gebal mi leme Amon; limixin me Amalek, leme Pilistia la leme Taia.

<sup>8</sup> Leme Asiria di ru buru bok midi atla di vara i xusu dina lok tooro leme Amon la Moap, nedi livipisik li at ne Lot.

<sup>9</sup> Unap sep kapmek bok di ngan ugap sep kapmek leme Midien, Sisera, la Jabin to at ladan Kison.

<sup>10</sup> Uga sak tup midi ro Endo, la lenbantuxu atnedi garap sopso ro at laxangka.

<sup>11</sup> Una sev asi bok lubang amgomgo atnedi ngan uga lox i ri ne Orep mi ne Seep, la una sak tup mi lavaeme silok atnedi ngan i mo uga lox i ri ne Zeba mi ne Salmona xuren.

<sup>12</sup> Atla nedi diga vaase xeretna, "Ataba lok kaka amlong mo lenep kangka at ne Moroa ridik."

<sup>13</sup> O Moroa, una sak epeseves di ngan laxakup, la ngan leventuxu piao no lamanman it mas kepe i.

<sup>14</sup> Naba lok ngan laxao i kavat lavatbuan, la ngan langangao at laxao i kavat lengkong kaana.

<sup>15</sup> Una xala xepe di mi lamanman takabu ram la una lox amarat aleng di mi lavatmanman silok taram.

<sup>16</sup> O Leeme Silok, una suxuna di mi lainmangan, la una lok nedi xusu dinaba ven kibis lolos taram.

<sup>17</sup> Naba lox avukat do una sak tup midi la lainmarat atnedi nabak lox amisik la noxo xap. Keke di dina remet eburu mi lainmangan i silok aleng.

<sup>18</sup> Naba lox avukat do dina xasep do nenu xusuk mun Leeme Silok, la Lamgomgo silok tinotno. Nenu u lolos aleng pana axap at lavatbung menemen.

## 84

### *Lavavara Ri Loogu At Ne Moroa*

<sup>1</sup> Leeme Silok, nu Lanaraavuk. Nia angkongkat mu loogu laplavang taram!

<sup>2</sup> A vavara aleng i xusu ana lotu saparav u go! Am doma onon amisik uto at loogu laplavang taram. La anabak pixan momo mi lorooro axap tarak tu, Luntoo Avolo.

<sup>3</sup> Leveng kamkabilin bok dip kip levempotpos atdi ro xeneng at loogu laplavang, la larapixa lixilik (sparrow) bok din tuuna laraogu axa atdi go. La dik lok tatao luvutnitna di ro saparap loxonin laplavang taram. Nenia bok a vara i xusu nak lok saparav u, nu Leeme Silok la Lanaraavuk. Nu Loorong Silok la ne Moroa rak.

<sup>4</sup> Lomomo silok atnedi dik lox amisik to at loogu laplavang taram dim suma i, la dik pixan emi asu amisik tu.

<sup>5</sup> Lomomo silok atnedi ua nenu um taba di mi lolos dim suma i, la nedi di vavara rinotno i xusu dinat pas ngan lavaose uto lakaana Saion at loogu laplavang.

<sup>6</sup> Kuren la at loxonaleng dit pas polo lemelubu vatmang no at lasa Baka, di reven mo lenep na ravasu ngan lenep at levempuuvut dan, la leventakabu avot ik suxa i mi levempat tibung dan.

<sup>7</sup> Ap mo lavatpas di ruuna ka lolos maxat. La dinaba rupot to vana at loxongkaana Saion la nedi getgesara dinaba tu ro melamgo at ne Moroa, mo i silok ti levenmoroa axap.

<sup>8</sup> O Leeme Silok nu Lanaraavuk ne Moroa, una ronga res at lisingising tarak. O Moroa at ne Jakop, tonga ia!

<sup>9</sup> O Moroa, una lox anarong loorong atnema, mo loorong ua nenu ugara soxolik ka vam i.

<sup>10</sup> Mo legesa aleng mak lok teren to xeneng at loogu laplavang taram, i silok aleng ti mo legesa abin sanggaun kobot aleng mak lok teren to vetpes. Naba lox avukat do ana tu mun amisik to maxamang saparap lumusmaragu at loogu at ne Moroa rak la nemen gat ana nemen avukat amisik to at laraogu at luvuttadi dik lok laxapmek.

<sup>11</sup> Leeme Silok, nenu Lurutu See Pe atnema la nu Loorong Silok i ruuna lisisinang, la uk lox asuusu lebelemulus tinama la uk lox asilok nama kusu limixin dina raba asinorong nama. Nenu uxom tebeng

alis lempanga avukat basinge nedi dik lok luvukat.

<sup>12</sup> Leeme Silok nu Lanaraavuk. Nedi di nunu saga ram din tuuna xaka i lomomo silok!

## 85

### *Lisingising Ti Lebelen Tuntun At Leeme Silok*

<sup>1</sup> Leeme Silok, ugara lox asusu vam lebelen tuntun tinema limixin taram me Israel. Ugara lok pam nema la uga lox asang kobot amu manga nama.

<sup>2</sup> Ugara doxoma xepe vam lengkakapmek atnema limixin taram la ugara gos kepe vam levesoogong atnama.

<sup>3</sup> Lebelemamao ram tinama ga xap tino la uga rebeng alis amlong mo lebelemamao sesele utut taram.

<sup>4</sup> O Moroa, nenu Laradi Loklox Asepsu atnema, monga una rebeng ka amlong manga nema basinge levenmumuat, la na xap ta u ri belengatngas amisik tinema!

<sup>5</sup> Kereva, unabak belemamao amisik ta nema la noxo xap? Kereva, mo lebelemamao ram noxo xap ta?

<sup>6</sup> Una lox alolos amu manga nema, kusu nema limixin taram manaba emi asu minu.

<sup>7</sup> O Leeme Silok, una lox asusu mo labalamu lexen taram, la una lok tooro nema xusu manaba sepmus.

<sup>8</sup> Nenia ang tonga lempanga Leeme Silok ne Moroa i paase i. Neni i xaape mi lenmila ridik limixin akmokso ren, mo do ata xomlong ti loklok tangtangu atnedik.

<sup>9</sup> Tuturun tinotno do neni i gagas kusu tik lox asepsu nedi dim taba asen silok tin, la mo loklok tooro ren naba nemen amisik eburu minedik at na lenep kangka atnedik.

<sup>10</sup> Labalamu eburu mi luruturun at ne Moroa dunaba vot eburu kantubu atnedik. La loklok manmanton eburu mi lenmila ren dunabak lok bok.

<sup>11</sup> Limixin mede xopok dinaba ruturun ti ne Moroa, la ne Moroa naba lox asusu loklok manmanton teren boro vana at laxalibet ti limixin mede xopok.

<sup>12</sup> Leeme Silok naba lox asang kobot amu manga dik, la lenep kangka atnedik naba lox asusu lev-eluxa dangdangun avukat.

<sup>13</sup> At lengkot axap Leeme Silok it pas teren, loklok manmanton naba umsu la kerepmo langas i gagas tin.

## 86

### *Lisingising Ti Loklok Tooro*

<sup>1</sup> Leeme Silok, una ronga ia. Una sep siam mu ia, atla ara molos axap la axo epovo ri lok tooro axa ia.

<sup>2</sup> Una lox asepsu ia basinge lanmet, atla nia a ruturun amisik tu. Una lox aroo ia, atla nia lasaxaruki ram la a nunu saga ram.

<sup>3</sup> Nenu ne Moroa rak, kuren la una lox asusu lebelen tuntun tia. At levenaleng axap, a ngising tu.

<sup>4</sup> O Leeme Silok, una lox aklek ia, lasaxaruki ram, mila levesingising tarak i ruturun amisik tu.

<sup>5</sup> Uk lok luvukat tinema limixin taram la um doxoma xepe laxakapmek atnema, la u umsu mi labalamu lexen tinedi axap no di ngising parav u.

<sup>6</sup> Leeme Silok, una ronga i na levesingising tarak. Una ronga na lerengteng tarak ti loklok tooro.

<sup>7</sup> A toro ru xeneng at levenaleng at levenmumuat, atla up sep siam at levesingising tarak.

<sup>8</sup> O Leeme Silok, kopmen bok ba temoroa go i lok ngan u, la xopmen tino teta go ga lok tavanga silok ngan mo lempanga nenu ga lox i.

<sup>9</sup> Mo levenabung mixin petpes ua nenu uga rudum li di, dinaba vot pasa u la dina xis tintiding to melango ram. La dinaba emi asu minu atla nenu u silok aleng.

<sup>10</sup> Nenu Lanaraavuk la uk lok lempanga maraanu. Nenu xusuk mun ne Moroa.

<sup>11</sup> Leeme Silok, una anasa ia mi lempanga u vara i xusu ana lox i, la anaba ronga res amisik taram. Una anasa ia xusu anaba gugu taba u mi lorooro axap tarak.

<sup>12</sup> O Leeme Silok ne Moroa rak, anaba emi asu minu mi labalak axap.

Anaba vavang asu lisisilok taram at levenaleng amisik la noxo xap.

<sup>13</sup> Labalamu lexen taram tia i silok aleng! Ugara lox asepsu vam ia basinge lamaaut.

<sup>14</sup> O Moroa, limixin loklox aaso nga mo dit pas tangarang ia. La libinam tadi longlong kuxurung mo di lok do dina sev amer ia. Nedi limixin ua dik lox abulubun kepe levelinga ram.

<sup>15</sup> Ketla nenu ne Moroa la Leeme Silok tarak, u ruuna lebelen tuntun la labalamu lexen. Uk lox atnaasan, uk belen tuntun, la u ruturun amisik ti limixin taram.

<sup>16</sup> Una repukus mu ia la una lox asuusu lebelen tuntun tia. Lox alolos ia la una lox asepsu ia, atla nia a gugu taba u ngan lasaxaruki rinotno ram.

<sup>17</sup> Leeme Silok, una lox asuusu mo luvukat taram tia, kusu nedi ua di belengatngas tia, dinaba mangan at loxonaleng dina ven i do ura kok avukar ia la ura lok tooro ia.

## 87

### *Leemi Asu Mumu Ne Jerusalem*

<sup>1</sup> Leeme Silok ga vaxaru lemenemen silok teren to vana at loxongkaana Saion, mo loxongkaana i xaala.

<sup>2</sup> La lavavara ren ti mo lemenemen silok Jerusalem i volo axap mo levenmenemen petpes bok keneng at lenep silok Israel.

<sup>3</sup> Nemi limixin boro at lemenemen silok at ne Moroa, mina rongga i mo levempanga maraanu neni i tong asu nom lemenemen mumu u xeretna,

<sup>4</sup> "At loxonaleng ana siam ka nedi limixin at levenabung mixin no ding tonga res tarak, anaba lox abeles bok leme Isip mi leme Babilon. Anaba siam abeles ka bok nedi leme Pilistia, Taia, la Itiopia ukeneng la dinaba nemen go ngan limixin bus tinotno me Jerusalem."

<sup>5</sup> Melemu limixin petpes dinaba epaase mumu mo loxot Saion, la diba tong i do larabung mixin axap, nedi mego di. La mo Lanaraavuk naba vaxaxis atmatkun mo loxot.

<sup>6</sup> Leeme Silok naba malagan levennasen ap mo limixin me xadiong la

naba lox abeles axap di kusu dina ravasu ngan leme Jerusalem tino nga.

<sup>7</sup> Dinabak pixan la dinaba tii. Mo loxompixan atdi naba lok keretna, "Lemenemen Saion neni xusuk mun laamkumkun at leveloklox anarong atnedik."

## 88

### *Lerengteng Ti Loklok Tooro*

<sup>1</sup> Leeme Silok ne Moroa, nu Laradi Loklox Asepsu rak, ang teng tu at levenaleng kangking la at lengkanimin at pas parav u mi lisingising.

<sup>2</sup> Lox epovo lisingising tarak. Tonga ia na ang teng kusu una lok tooro ia!

<sup>3</sup> Laxanmumuat solo na ira subu vam mavana rak la i auret kusu ana met.

<sup>4</sup> A lok ngan mun nedi ua di auret kusu dina met. Levelolos axap tarak ira xap pam.

<sup>5</sup> Ak lok ngan laradi diga ke xepe i ro at lanmet eburu mi labarongan. A lok ngan lau ik midi ro xeneng at lamaaut at labarongan. La nenu ugara domampe axap pam nedi, la ixo epovo bok ba xusu una lok tooro nedi.

<sup>6</sup> Ugara lu arup pam minia uto xopok tubu at lamaaut, uto rinotno at lemeroon ua i si aleng.

<sup>7</sup> Lebelemamao ram ik midi mavana rak la i lolos aleng. I lok ngan ta do ara dong si axap pam uto at larapo paxanao.

<sup>8</sup> Uga lok larapentangas tarak la digara raba rulu ia. Uga lox ia la limixin di milingot tarak. Ak lok keneng at loxokoxo at lanmeres, la axo epovo na sepsu.

<sup>9</sup> Luxatli rak na ira molos ta mumu laxasongsongot. Leeme Silok, a toro amisik tu at levenaleng axap, la ara ngosong aurut mi lukngak keneng at levesingising tarak.

<sup>10</sup> Kereva, uk lok lempanga sangsangu ri labarongan? Kopla di rooro xat la dira vemi asu minu?

<sup>11</sup> Kereva, di paase asu labalamu lexen taram to xeneng at lamaaut

kopla di paase asu luruturun taram to at lenep i umsu mi leeteke?

<sup>12</sup> Kereva, di ven levempanga sangsangu ram to xeneng at lenep i main bonot kopla di ven luvukat taram to lemenemen at labarongan, ua limixin diga domampe di? Kopmen tinotno.

<sup>13</sup> Leeme Silok, a toro ru xusu una lok tooro ia. A ngising amisik tu at levenmaxantamak, kusu una lox asepsu ia basinge lanmet.

<sup>14</sup> Leeme Silok, tila la u sok tixirixes kepe ia? Ua lavasuun teren la u raba rulu ia?

<sup>15</sup> Ga ruka axa i at levenmaares nia aga aau, agam suma levesongsongot la aga auret kusu ana met. Nia na ara soklu axap at laxanmumuat at leveloklox asongot taram.

<sup>16</sup> Laxan belemamao silok taram ik lox amdanda ia. La lesepep taram ik lox abaava rino ia.

<sup>17</sup> At levenaleng amisik duk lok kangkan ia ngan ladanut. La dura si etang amisik tarak to at lengkot axap.

<sup>18</sup> Ugara lok pam larapentangas tinotno rak la digara raba rulu vam ia, la lubuxumin ta mo i lok ngan laradi i vemu minia la kopmen tara bok.

## 89

### *Loxompixan Keneng At Levenaleng Mumuat*

<sup>1</sup> O Leeme Silok, anabak pixan amisik mumu mo labalamu lexen taram. Anaba vavang amisik do nenu u ruturun tinema limixin taram at levenaleng axap i tu melamgo.

<sup>2</sup> Aklen i do labalamu la loklok tatao ram tidi naba tu tuxuruxun amisik, la na nemen tino ngan laxalibet.

<sup>3</sup> Uga vaase xeretna, "Nia agara lok pam lekabus mi mo laradi nia aga soxolik kaka i. Neni lasaxaruki rak ne Devit la a agara xaape vam tin, keretna,

<sup>4</sup> 'Lavaorong nabap tavasus amisik keneng at livipisik li ram la mo lugugu ti lavaorong nabak lok at

livipisik li ram amisik la noxo xap basinge nedi.' "

<sup>5</sup> Leeme Silok. Lempixan ip tavasus boro vana laxalibet mumu mo lempanga maraanu uk lox i. Luvuttadi melemelengan dik pixan do u ruturun amisik ti limixin taram.

<sup>6</sup> Leeme Silok, kopmen teta roxun pana at laxalibet i lok ngan u. Kopmen teta at lempanga rooro no vana at laxalibet i epovo eburu minu.

<sup>7</sup> Keneng at lixitkis buru at limixin kaala, dik marat aleng taram. La nedi axap ding sangu aleng taram.

<sup>8</sup> Leeme Silok ne Moroa nu Lanaraavuk, kopmen teta go, lolos teren i volo aleng ngan u. O Leeme Silok, nenu u ruturun at lempanga axap.

<sup>9</sup> Um gomgonga mavana ap mo laras lolos, la uk lox amila lolos lempat popaxanao.

<sup>10</sup> Uga rit amdanda mo lavatpanga sio ne Raap la uga sev amer i. Uga sak tup mi limixin munepen mi mo lolos silok taram.

<sup>11</sup> Laxalibet neni ataram, la lavatbung menemen bok. Uga rudum lavatbung menemen la lempanga axap bok di nemen keneng teren.

<sup>12</sup> Uga rudum li lunep borou la boroxun. Lakaana Tabor mi lakaana Eremon dik pixan mi lomomo ru.

<sup>13</sup> U lolos pologat! Lolos taram i silok la i volo aleng!

<sup>14</sup> Lixitkis amgomgo ram it kis mavana at levelinga manmanton mi lodoxoma avukat. Labalamu eburu mi luruturun dip tavasus asaxaven keneng at lempanga nenu uk lox i.

<sup>15</sup> Nedi di lotu saporav u mi levempixan la dik lok maxopok at lebelemulus taram, dinabak lok momo aleng!

<sup>16</sup> La di momo amisik at levenaleng axap mumu mun u, la di vemi asu minu mumu luvukat taram.

<sup>17</sup> Uk lok nema la mak sak tup mi limixin munepen minema. Uk lok nema xusu mana sak tup midi atla, mumu mun labalamu ram tinama.

<sup>18</sup> O Leeme Silok, nenu xa uga soxolik ka lurutu see pe rinema. Nenu

xa ne Moroa Melemelengan me Israel. Uga raba nema mi loorong ti lok see atnema.

*Laxakaape At  
Ne Moroa Ri Ne Devit*

<sup>19</sup> Keneng at lara lisilimet gano, uga paase ri lavaeme vapaase ali ram ua diga ruturun amisik tu. Uga lok keretna, "Nia ara raba vam lok-lok tooro ri mo laasesep doxodok. Ara raba vam lugugu at loorong tin, neni mo lara nia a soxolik kaka i ro xeneng at limixin.

<sup>20</sup> Neni lasaxaruki rak ne Devit ara vaxaxis pam i ngan loorong at lox-onaleng aga lox anarong i mi ladan momonok i xaala.

<sup>21</sup> Lolos tarak nabak lox amisik eburu min, lolos tarak naba lox alo-los i.

<sup>22</sup> Lavamunepen min di noxo epovo ri vas asi i. Limixin kapmek di noxo epovo ri sak tup min.

<sup>23</sup> Anaba sax amdamda nedi di esep tangarang min, la anaba sev amet nedi axap ua di belangatngas tin.

<sup>24</sup> Anaba balamu i la ana lok tatao amisix i. Anaba lox i xusu limixin munepen min di noxo sak tup min.

<sup>25</sup> Anaba lox epasum lixitkis orong teren, tuka i ro at laras Mediterenian la uto epopolo at ladan lupretis.

<sup>26</sup> La neni naba vaase ria xeretna, 'Nenu ne Tamak la ne Moroa rak. Nenu Lurutu See Pe rak la Laradi Loklox Asepsu rak.'

<sup>27</sup> Anaba lox asilox i ngan lamdak avot tarak, la neni naba silok axap ti lavaorong axap at na lavatbung menemen.

<sup>28</sup> Anaba lox epovo amisik laxakaape rak tin, la lekabus tarak eburu min naba nemen amisik la noxo xap.

<sup>29</sup> La mo leesooxun ngan lubang amgomgo keneng at livipisik li ren, naba nemen amisik ngan laxalibet. Tavaorong nabap tavasus amisik boro at livipisik li ren.

<sup>30</sup> Ketla do livipisik li ren dina rongaxepe at Laulis Linga rak la di noxo rooro mu asu leventaangas tarak,

<sup>31</sup> la do di noxo doxoma mu levempapaase axasep tarak, la dixo mu asu levempapaase ali rak,

<sup>32</sup> anaba lox asongot di mumu laxakapmek atnedi. Anaba lok nedi dina baava mu mo laxapmek atdi.

<sup>33</sup> Ketla labalamu rak ti ne Devit noxo xap kopla ana subu kot ap mo laxakaape rak tin.

<sup>34</sup> Anoxo los polo lekabus tarak eburu min kopla ana ke xepe tara taxakaape go agara lox pam i eburu min.

<sup>35</sup> Aga xaape gesara mene nga keneng at laasen kaala rak la noxo lox ekun bok ba i. La mo laxakaape naba nemen amisik. Anoxo xarang tinotno ne Devit.

<sup>36</sup> Neni naban tuuna amisik taxampipisik li, la anaba reven aratao lixitkis orong teren at levenaleng axap laxangking mo ik lok.

<sup>37</sup> Na loklok tatao rak naba nemen amisik ngan lagaaling, ua neni i soosoo axasep amisik to vana at lamavangkap."

*Lanteng Ti Loorong Diga Sak Tup Min*

<sup>38</sup> Ketla nenu ne Moroa, u belemamao mo loorong nenu uga soxolik ka i. Ugara raba rulu vam i la uga sok sisixe i.

<sup>39</sup> Ugara los polo vam lekabus taram eburu mi ne Devit, lasaxaruki ram, la ura lox asi aleng i basinge lixitkis teren ngan loorong.

<sup>40</sup> Ura ut tereve asi vam larangas uat ik lok kangkan lemenemen silok teren, la ura lok kapmek pam laraogu esep matmatkun teren.

<sup>41</sup> La nedi limixin ua dit pas polo go, dim nem kaka lempanga ren. La nedi dik lok saparav i, ding longon sese i.

<sup>42</sup> Ura lok tooro vam limixin munepen min kusu dina sak tup mi limixin taram. Ura lok pam limixin munepen la dira momo aleng.

<sup>43</sup> U lok lempanga esep teren i lok ngan lempanga gamasa nga la limixin munepen minu dirak sak tup etaba nga midi keneng at levenesep.

<sup>44</sup> Ura lok kepe vam laasen silok teren la ura lok pes pam i basinge lixitkis orong teren.

<sup>45</sup> Ura lox asioxo vemput ta i la ura vung kimir i mi lainmangan.

### *Lisingising Ti Loklox Asu*

<sup>46</sup> Leeme Silok, kereva, unak lox alipe rino nga basinge nema? Mo lebelemamao ram na babao ngan laxao la naba se ba ua?

<sup>47</sup> Una doma mumu be na lorooro rak it mut tinotno. La unaklen box i do nenu uga rudum li nema mi lenbantuxu gamasa mun!

<sup>48</sup> Nege ba naba rooro amisik la noxo met? Taradi naba lok ba xereva xusu ni noxo beles at lamaaut?

<sup>49</sup> Leeme Silok, ua nga no lempanga nenu uga lox asuusu i ri lox asaxaven mo labalamu ram? Ua nga no leveng kakaape nenu uga lox i ri ne Devit?

<sup>50</sup> Uguta domampe i do ram, la aga vekip mi mo lempapaase vupu at lavamolon.

<sup>51</sup> O Leeme Silok. Limixin munepen minu diga paase xapmek ti loorong soksoxolik taram. Di paase aksaksa rin ap mo axap lengkot neni it pas teren.

<sup>52</sup> Leemi asu amisik ti Leeme Silok la kopmen tekavaxap teren! Tuturun! Tuturun tinotno!

## 90

### *Levelinga Mumu Ne Moroa La Limixin*

<sup>1</sup> O Leeme Silok, nenu ugak lok ngan amisik loogu aulis atnema lavaola axap.

<sup>2</sup> Avot ti laaleng uga rudum li levengkaana la lempanga di rooro xeneng at lavatbung menemen, nenu ugak lox axa ngan ne Moroa i rooro lexen, la unabat kis Moroa amisik la kopmen tekavaxap taram.

<sup>3</sup> U tong i ri luvuttadi axap kusu dinaba vee kangka ngan diga ravasuren. U baba gili amlong di xusu dina repukus ti laxakup.

<sup>4</sup> Nenu u ven legesa abin sangaun kobot maares di lok ngan mun legesa

aleng. Di lok ngan mun laaleng itionongo, ira onon pam, i lok ngan mun legesa xonatat aleng at laxanimin.

<sup>5</sup> Up kip pes kaka nema ngan ladanut. Maxo rooro abao bok, ma ngan lapnobo i sonao. Ma lok ngan levenang i suu valas maxantamak suubu,

<sup>6</sup> di suu la di repalas asu lama-raanu, la melemu dira molos la dira met manga ukantinao.

<sup>7</sup> U sesele utut nema mi mo lebelemamao ram. Ma emilik sak mumu lebelemamao ram.

<sup>8</sup> U saali leveloklok kakapmek atnema ro melamgo ram, mo leveloklox alipe atnema ik lok go ap mo loxot nenu u epovo ri reven kaka di.

<sup>9</sup> La lorooro atnema, nenu u tara korop atmur i mi mo lebelemamao ram. La i sonao ngan lavapaase siksikma.

<sup>10</sup> Lorooro atnema it pot mun at lavanuti sangaun maares la do ma lolos, maba se ka lavanuan sangaun maares. Ketla ana levenmaares move im taba nema mi leven ekarakat la lainbulu. La soso mun lorooro atnema i vaxap kot, la mara onon tino nga.

<sup>11</sup> Kopmen tara go gata suma vam lolos silok at lebelemamao ram. Kopmen bok teta iklen ka ba lanmarat silok, mo lebelemamao silok taram i epovo ri lox asuusu i xeneng atnema.

<sup>12</sup> Una anasa nema do lorooro atnema it mut mun kusu manaba ruuna ka lodoxoma avukat.

<sup>13</sup> O Leeme Silok, lebelemamao ram naba xap ba lingisa? Una belen tuntun mu nema, limixin me Israel, atla nema limixin tinotno ram!

<sup>14</sup> Una suxa amisik nema at leven maxantamak mi labalamu lexen taram, kusu manabak pixon la mana sosoro keneng at lorooro axap atnema at na lavatbung menemen.

<sup>15</sup> Una raba nema mi lomomo silok ngan bok pam mo lanbulu silok uga raba nema min ap mo levenmaares magak lok keneng at laxanmumuat solo.

<sup>16</sup> Una lox avolo nema lavasaxaruki ram kusu mana ven leven gugu lolos taram. Una lok bok livipisik li

atnema xusu dina ven mo lolos silok taram.

<sup>17</sup> Leeme Silok ne Moroa atnema, una ke mo loklox anarong taram nak lok keneng atnema. Una lox epovo levendoxoma atnema keneng at leven gugu axap nema ma lox i!

## 91

### *Moróa Lurutu See Pe Atnedik*

<sup>1</sup> Nege it kis esogo eburu mi Leeme Silok, la ik lok maxopok at loklox aratao at Lanaraavuk,

<sup>2</sup> i epovo xusu dina tong i rin keretna, “Nenu Lentupe ria la Lurutu See Pe rak. Nenu ne Moroa rak, la nia a nunu saga ram.”

<sup>3</sup> Neni naba lox asepsu u basinge levempanga sepsep mo ik lox alipe la basinge bok levenanmeres sepsev amet.

<sup>4</sup> Neni naba kok u mi luvapa ren, la unabak lox avukat keneng at loklok tatao ren. Neni i ruturun ti limixin teren, kuren la ni naba lok tatao la na tu banpe u. <sup>5</sup> Unoxo marat at tepanga sepsep at laxanimin koplá limixin sepsep diba vot soso mun at laxangking,

<sup>6</sup> koplá tevenanmeres kapmek na lutpot at laxanimin koplá mo lubang gas kapmek dip sep at lengkangking.

<sup>7</sup> Tegesa abin sangaun kobot giba met mun go saparav u, la legesa sangaun larabin sangaun kobot go xangkan u, ketla dixo epovo ba ri lok kapmek tekot taram.

<sup>8</sup> Unabak milik kaxat la una reven ba i mo limixin kapmek dik lok ka levesongsongot kuren.

<sup>9</sup> Ura siam ka vam Leeme Silok i ngan Lentupe ru. Ni Leeme Avolo i ngan Lurutu See Pe ru.

<sup>10</sup> Kuren la ba xopmen bok ba tumumuat naba sak pavaa u, la tempanga loklox asongot nat pot saparap laraogu aulis taram.

<sup>11</sup> Moroa naba lok li lubang angelo ren kusu dinabak lok tatao u, la kusu dinabak lok see ram at levengkot axap unat pas teren.

<sup>12</sup> Dinaba rebeng aurur u mi lengkikngén di xusu tuuat noxo lox asongot tekot at luxangkedek taram.

<sup>13</sup> Unabat pas povorok asi lempat-laion mi lempat sii, mo lempatlaion atat la lempat sii mamao.

<sup>14</sup> Moroa i vaase xeretna, “Nia anaba lox asepsu mo lara i vavara aleng ia la anaba lok see ap mo lara ua i ven kibis ia do nenia Leeme Silok.

<sup>15</sup> At loxonaleng ni na ro ke rak, anaba sep siam at levesingising teren. Do ni na ekip tangarang mi levenmumuat, anabak lok eburu min kusu ti lok tooro i. Anaba lox asepmus i basinge mo levenmumuat la ana xip aurut laasen atdi.

<sup>16</sup> Anaba lox anarong i mi lorooro abao, la anabak lox asepmus i at levenmumuat.”

## 92

### *Loxompixan Emi Asu*

<sup>1</sup> O Leeme Silok, loklox avukat tinotno mo do mana tong avukat tu, la manak pixan tim taba asinorong u, O Moroa Avolo.

<sup>2</sup> La i lox avukat bok do at lenmax-antamak axap, mana vavang asu mo labalamu lexen taram. La mana vavang asu loklok tuturun tinama at lengkanimin axap.

<sup>3</sup> Mana lox i na mi lerengteng at leven gita la lenaon at lengkon taaleng.

<sup>4</sup> O Leeme Silok, leven gugu lolos taram ik lox aklek ia. La ak pixan momo mumu mun mo lempanga ugara lok pam i.

<sup>5</sup> Leeme Silok, mo leven gugu uga lox asusu i, i silok aleng! La levendoxoma ram i si aleng!

<sup>6</sup> La ixo epovo xusu taradi baulang naklen mo lempanga. Taradi rangtangu bok ixo epovo ri xasep teren.

<sup>7</sup> Keke i do limixin kapmek dina posok aleng ngan levempivilis, la nedi dik lok leveloklok bilinga diba ngasang kobot. Ketla ne Moroa naba sele utut axap tino bok di,

<sup>8</sup> atla nenu Leeme Silok u silok aleng mavana at lempanga axap la

unaba nemen amisik kuren la kopmen tekavaxap teren.

<sup>9</sup> Makleklen i do limixin munepen minu dinaba remet kot, la unaba sak tup minedi axap limixin dik lok laxapmek.

<sup>10</sup> Ugara lox alolos pam ia ngan lavatbulumaxao aaxa. Ugara lox anarong pam ia mi lomomo.

<sup>11</sup> Agara ven pam u, uga sak tup mi limixin munepen minia la aga ronga lerengteng at limixin dik lok laxapmek.

<sup>12</sup> Limixin manmanton dinaba ngasang kobot ngan lempar iivin ua i pisik aleng. Dinaba lolos ngan levenuna Seda (Cedar) boro Lebanon. <sup>13</sup> Dinaba lok ngan larauna i suusu ro xeneng at loogu at Leeme Silok, i suusu dangdangun to xeneng at loogu laplavang at ne Moroa atnedik.

<sup>14</sup> Mo larauna me gaxatdo nga la ira mukun ta, ketla move ira pisik peeve la lempavaxan move ren i mamaxa la i lolos.

<sup>15</sup> Anai, i lox asuusu i do levelinga at Leeme Silok in manton tino amisik, la kopmen tesooogong keneng at Lurutu See Pe rak.

## 93

### *Morua Ni Loorong Silok*

<sup>1</sup> Leeme Silok ni Loorong Silok. Laasen teren i volo aleng la neni Lanaraavuk. Kuren la lavatbung memen mo it kis atmatkun at loxot teren la ixo epovo ri repes meeve.

<sup>2</sup> O Leeme Silok, lixitkis taram ngan Loorong Silok ga tu tuxuruxun ka axa at lurutu kaxat, la nenu uga rooro avot ti levenaleng ga ru kaxat.

<sup>3</sup> O Leeme Silok, laaknuxup silok ip tava su boro xopok tubu at laras main. Dik lox areng silok lengkaka atnedi mi laaknuxup silok.

<sup>4</sup> Leeme Silok it kis amgomgo toxun pana at laxalibet, la lolos teren i volo aleng. I silok ti mo laaknuxup silok boro at laras main, la i lolos polo larapo paxanao at laras.

<sup>5</sup> Leeme Silok, Laulis Linga ram i nemen amisik, la loogu laplavang taram i xaala rinotno amisik la kopmen tekavaxap teren.

## 94

### *Morua Ni Laradi Naba Ila Limixin Axap*

<sup>1</sup> Leeme Silok, nenu ne Moroa uk lox asongot limixin kapmek. Una lox asuusu lebelemamao ram tidi!

<sup>2</sup> Nenu laradi ila mumu lorooro at limixin axap. Una beleku kaxat la una raba nedi luvuttadi loklox aaso mi luunun ti laxakapmek atdi!

<sup>3</sup> Mo leklek ap mo limixin dik lok laxapmek naba se ba ua? Naba se ba ua, Leeme Silok?

<sup>4</sup> Mo loklox aaso at luvuttadi dit los polo Laulis Linga la dirak lox aru di mumu leveloklok kakapmek atnedi. Mo loklok atdi naba xap ba lingisa?

<sup>5</sup> Leeme Silok, di rubut puuvus limixin taram, la dik lox abaava nedi no nenu u ruuna di.

<sup>6</sup> Dip sev amet lempatnaa mi lubangkarun, la dip sev amet bok lavaose mo dik lok at na lenep kangka atnema.

<sup>7</sup> La di paase xeretna do, "Leeme Silok ni kopmen na reven nedik. Moroa me Israel ixo ven lenget ka na loklok tak lox i."

<sup>8</sup> Limixin tarak, kereva rinotno la mik lok sorova baulang gamasa? Minabaklen ba lingisa?

<sup>9</sup> Moroa ga lok levenbaalung atnedik. Kereva, neni ixo epovo na ronga nimi? Neni ga lok lengkatli atdik, kopla ni noxo reven nimi?

<sup>10</sup> Neni i metlaat ti levenabung mixin petpes, kereva ni noxo lox asongot bok nemi? Neni Laradi Anasa at limixin axap, kereva, kopmen takleklen teren?

<sup>11</sup> Leeme Silok iklen axap leven-doxoma at limixin. La iklen latnese at levendoxoma etaba atdi.

<sup>12</sup> Leeme Silok, lomomo silok mene i mo ik lok ap mo laradi ua nenu u paase aru amisix i, mo laradi ua nenu u anasa amisix i mi Laulis Linga ram!



<sup>13</sup> Uk lox amamana i basinge levenaleng at levenmumuat, ise at laaleng di xe lavatmet tik lixo ka luvuttadi dik lok laxapmek.

<sup>14</sup> Leeme Silok noxo raba rulu limixin teren. Neni noxo lox abulubun nedi ua neni i ruuna di.

<sup>15</sup> Levendoxoma mokmokso nabamlong keneng at levenaleng dina tu at lavapaase. La nedi axap limixin manmanton dinaba su auru rino mo levendoxoma.

<sup>16</sup> Nege ga ru katling ia ri ru tangarang mo limixin kapmek? Nege ga lok ka loxot tarak kusu ti ru tangarang mo limixin bilinga?

<sup>17</sup> Mo do Leeme Silok gitoxo lok tooro ia, nia ro agita onon soso vam uto at lemenemen at labarongan, ni lemenemen at lavaanat pamngus.

<sup>18</sup> Aga vaase xeretna, "Am subu si na ukopok." Ketla, labalamu lexen taram, Leeme Silok, gam tebeng ama aurur ia.

<sup>19</sup> At levenaleng nia a suma levenmumuat la lodoxoma saasaa i suxuna lorooro rak, nenu uk lox amemen ia la urak lox aklek ia.

<sup>20</sup> Nenu kopmen nak lok momo mi luvuttadi rongtonga linga gesenep ua di xaxarang pepe lolos tinotno luvukat at levenaleng ete, la di sisiam ka laxakapmek.

<sup>21</sup> Dik lok li levenmumuat mavana at luvuttadi avukat, la di tong aurut liina ti luvuttadi sepsen la kerepmo di sev amet nedi.

<sup>22</sup> Ketla Leeme Silok ik lok ngan Lentupe ria. Ne Moroa rak ni Lurutu See Pe.

<sup>23</sup> Neni naba lox asongot di mumu mo leveloklok kakapmek atnedi. La ni naba sele utut di mumu mo libilinga atnedi. Leeme Silok ne Moroa atnedik naba lok pes axap tino di.

## 95

### *Loxompixan Emi Asu*

<sup>1</sup> Ude nemi, ata emi asu mi Leeme Silok! Atak pixan mi leklek ti ne Moroa, neni ua ik lok see atnedik!

<sup>2</sup> Ata vot saparav i mi levelinga rong tong avukat la atak pixan lengkom-pixan leklek la emi asu rin.

<sup>3</sup> Atla Leeme Silok neni Lanaraavuk ne Moroa. Neni Loorong Silok i lolos kimit axap levenmoraa xaxarang.

<sup>4</sup> Neni im gomgonga mavana axap at lavatbung menemen, tuka i ro xeneng tubu at lempatbuang i si aleng, la uto xa vana at lempatkaana babaalom.

<sup>5</sup> Neni im gomgonga mavana at laras no neni ga lox i. La laxangka bok no neni axa ga rudum i.

<sup>6</sup> Ude nemi, la ata xis tintiding la ata ngising tin. Ata xis mi lempatgulom atdik at lemeren Leeme Silok, neni Laradi Runtudum Li atdik!

<sup>7</sup> Neni ne Moroa atnedik. La neni ik lok tatao nedik limixin, ta ngan levesipsip no neni im taba luxa di.

Mo do mina rongga laxaka at ne Moroa lingina,

<sup>8</sup> "Mi gutak lox ametarauat lebelen nemi, ngan lavalabat atnemi digak lox i ro Meriba, la kerekngan bok mo laaleng digak lok to at lamatbin Masa.

<sup>9</sup> Diga edak minia go, la diga lok tong ia, keke i do digara ven pam lempanga silok agak lox i ridi.

<sup>10</sup> At lavanuet sangaun maares axap, aga bele songsongot tinotno mi limixin ap mo loola. Aga lok keretna, 'Lebelendi i onon petpes amisik basinge ia la diga rongga xepe levempapaase ali rak.'

<sup>11</sup> Kuren la aga belemamao nedi la aga lok laxakaape matmatkun tinotno xeretna, 'Dixo epovo rinotno xusu dina beles ap mo loxot loklox amas tarak.' "

## 96

### *Moraa Ni Loorong Silok Ik Lok Mavana Axap*

<sup>1</sup> Mina vixan toxompixan maxat ti Leeme Silok! Limixin at na lavatbung menemen axap, minak pixan ti Leeme Silok!

<sup>2</sup> Minak pixan ti Leeme Silok, la mina emi asu min! At levenaleng

axap mina vavang mi lagale lava-  
vang do neni ga lox asepmus nedik.

<sup>3</sup> Mina vavang asu lisisixam teren  
uto at larabung mixin petpes, la  
mina tere limixin axap mi mo lem-  
panga lolos neni gak lox i.

<sup>4</sup> Leeme Silok, neni i silok aleng.  
Kuren la i epovo rinotno do leemi  
asu atdik tin na silok aleng. Lok-  
lox asinorong atnedik tin naba volo  
axap levenmoroa xaxarang at na  
lavatbung menemen.

<sup>5</sup> Leven moroa ap mo levenabung  
mixin petpes, nedi levempoovo  
vanga mun. Ketla mo Leeme Silok,  
neni ga rudum li lempanga axap  
tovana at lamavangkap.

<sup>6</sup> Lisisixam mi lisisinang duk lok  
kangkan i. Lolos eburu mi lempanga  
maraanu du umsu xeneng at loogu  
laplavang teren.

<sup>7</sup> Nemi limixin axap at lavatbung  
menemen, mina emi asu mi Leeme  
Silok. Mina emi asu mi lisisinang la  
lolos teren.

<sup>8</sup> Leemi asu ri laasen melemelen-  
gan at Leeme Silok. Mina emu eburu  
mi leventamtaba atnimi la mina be-  
les de at loogu laplavang teren.

<sup>9</sup> At loxonaleng mo Laradi  
Melemelengan na vor asuvos,  
mina xis tintiding to melamgo ren.  
Lavatbung menemen axap, mina  
lok ngangao aleng mi lanmarat to  
melamgo ren.

<sup>10</sup> Mina paase i ri larabung mixin  
axap do, "Leeme Silok, neni Loorong  
Silok!" Ni lavasuun teren la lavat-  
bung menemen it kis tuxuruxun to  
at loxot teren la teta noxo vuk gili  
i. Neni naba ila mumu limixin mi  
lodoxoma mokmokso.

<sup>11</sup> Limixin at lavatkangka eburu  
mi laxalibet, minak lek! Laras, una  
luulung mi lomomo! Lempanga dik  
lok keneng taram, dinap kup momo.

<sup>12</sup> Levennep kangka eburu mi lev-  
empanga dik lok keneng atnimi, mi-  
nak lek! La larauna ro xeneng at  
laxairing, dinabap kup mi leklek,

<sup>13</sup> at loxonaleng Leeme Silok na  
vot kusu tim gomgonga lavatbung  
menemen. Neni nabam gomgonga

limixin at lavatbung menemen mi  
lodoxoma mokmokso la levelinga ru-  
turun.

## 97

### *Moraa Neni Lamgomgo Ik Lok Mavana Axap*

<sup>1</sup> Leeme Silok neni Loorong Silok!  
Lavatangka, unak lek! Nemi  
levesoxan kantubu at laras, mina  
sosoro!

<sup>2</sup> Lengkon takabu mi lubuxumin  
dung kan i. Neni im gomgonga  
limixin mi levelinga manmanton la  
lodoxoma avukat.

<sup>3</sup> Laxao im gomgonga i la i kotos  
kepe limixin munepen min mo dik  
lok kangkan i.

<sup>4</sup> Neni ik lox asu lavanga i mam la i  
soosoo axasep lavatbung menemen.  
La lavatangka i reven i la ira dede.

<sup>5</sup> Lengkong kaana di xadan ngan  
levelumlut misiu ro melamgo at  
Leeme Silok, go melamgo at Leeme  
Silok at lavatbung menemen axap.

<sup>6</sup> La laxalibet i lox asusu i do  
Leeme Silok ni laradi manmanton la  
larabung mixin axap di reven lisisi-  
nang teren.

<sup>7</sup> Ik lox amangan nedi axap no  
di lotu saparap laxampoovo vanga.  
Laxanmoroa xaxarang axap dit kis  
tintiding to melamgo at Leeme Silok.

<sup>8</sup> O Leeme Silok, limixin me Saion  
dik lek, la laramenemen silok at leme  
Juda di sosoro atla u tong asu lava-  
paase ramtaba ina ram mi lodoxoma  
mokmokso.

<sup>9</sup> Leeme Silok Lanaraavuk, nenu  
lamgomgo at lavatbung menemen  
axap. Nenu u silok tinotno rinedi  
axap levenmoroa xaxarang.

<sup>10</sup> Leeme Silok i balamu nedi di  
belangatngas ti laxapmek. Neni ik  
lok tatao lorooro at limixin teren.  
Neni ik lox asepmus di basinge lolos  
at limixin dik lok lengkakapmek.

<sup>11</sup> Leveloklox anarong i ngan lax-  
asep i soosoo mavana atnedi limixin  
manmanton. La leklek ik lok atnedi  
lurvattadi avukat.

<sup>12</sup> Nemi limixin manmanton mi-  
nak lek ap mo lempanga Leeme Silok  
gara lok pam i! Mina doxoma aklen

ti mo lempanga ne Moroa Meleme-  
lengan gara lok pam i rinimi, la mina  
tong avukat tin.

## 98

### *Moraa Ni Lamgomgo At Lavat- bung Menemen*

<sup>1</sup> Mina vixan toxompixan maxat  
ti Leeme Silok. Neni gara lok pam  
lempanga maraanu! Neni gara sak  
tup mi limixin munepen mi lolos  
kaala axa ren.

<sup>2</sup> Leeme Silok ga vaase asu i do ni  
ga sak tup mi limixin munepen min.  
La neni ga vaase aronga larabung  
mixin axap mi mo lolos teren ti lox  
asepmus limixin.

<sup>3</sup> Neni ga lox epovo laxakaape ren  
ti limixin me Israel la i ruturun  
amisik tidi la ik lox asuusu labalamu  
lexen tidi. Limixin at lengkot axap  
digara ven pam ne Moroa atnedi ga  
sak tup mi limixin munepen min.

<sup>4</sup> Nemi axap limixin at na lavat-  
bung menemen, minak pixan sosoro  
ri Leeme Silok. Mina emi asu rin mi  
lempixan la luxupkup sosoro!

<sup>5</sup> Minak pixan mi lengkompixan  
emi asu ri Leeme Silok! Minak sak  
lerengteng maraanu ro at lempat  
taaleng!

<sup>6</sup> Minat mas lempat tu mi  
lengkongkidi, la minap kup mi  
lososoro ri Leeme Silok, ni Loorong  
Silok atdik.

<sup>7</sup> Laras eburu mi lempanga dik  
lok keneng taram, mina vaas mi  
luxupkup. Lavatbung menemen mi  
lempanga axap dik lok mavana ram,  
minak pixan!

<sup>8</sup> Laradan sen, mina pasa leventin-  
gen nimi. Lengkong kaana, minak  
pixan eburu mi lososoro at lemeren  
Leeme Silok,

<sup>9</sup> atla i vot kusu nam gomgonga  
lavatbung menemen. Neni nabam  
gomgonga limixin at lavatbung men-  
emen mi lodoxoma mokmokso la  
levelinga ruturun.

## 99

### *Moraa Ni Loorong Silok Ik Lok Pana Axap*

<sup>1</sup> Leeme Silok, neni Loorong Silok.  
Larabung mixin dina dede mi lan-  
marat. Neni it kis at loxonin orong  
teren mavana at lempanga raptava  
(cherubim) la lavatbung menemen  
ing nengne.

<sup>2</sup> Leeme Silok neni Lanaraavuk to  
xeneng Saion, neni ik lok mavana  
xasep tinotno ri larabung mixin  
axap.

<sup>3</sup> Limixin axap dinaba emi asu mi  
mo laasen silok doxodok teren la  
dinaba tong i do, neni i melemelen-  
gan!

<sup>4</sup> Loorong Silok nenu Lanaraavuk,  
u vavara aleng leveloklok in man-  
ton. Ugara vaxaru vam leventaan-  
gas manmanton kusu limixin diba  
mumu asu i ro xeneng Israel. Ugara  
xip pot pam mi loklok manmanton la  
levelinga ruturun.

<sup>5</sup> Leemi asu ri Leeme Silok ne Mo-  
roa atnedik. Mina lotu saparav i  
ro melamgo at loxonin orong teren!  
Neni i melemelengan!

<sup>6</sup> Moses mi ne Aron duga gugu  
ngan lumaasa ren, la ne Samuel neni  
ga ngising tin. Diga ngising ti Leeme  
Silok la neni ga lox epovo levesingis-  
ing atnedi.

<sup>7</sup> Neni ga paase ridi boro xeneng  
at lovotakabu ga baalom upana. Di-  
gang tonga res at leventaangas la  
levelinga neni gam taba nedi min.

<sup>8</sup> O Leeme Silok, nenu ne Moroa  
atnema, uga lox epovo lodoxoma at  
limixin taram. Uga lox asuusu i ridi  
do nenu ne Moroa umdoma xepe  
lengkakapmek, la uga lox asongot  
nedi mumu levengkakapmek atdi.  
Ketla melemu uga doxoma xepe lax-  
akapmek atnedi.

<sup>9</sup> Leemi asu ri Leeme Silok ne Mo-  
roa atnedik, la ata ngising tin to at  
loxongkaana xaala Saion! Leeme  
Silok ne Moroa atnedik i melemelen-  
gan.

## 100

### *Loxompixan Emi Asu*

<sup>1</sup> Nemi limixin at lavatbung menemen axap, minak pixan ti Leeme Silok!

<sup>2</sup> Mina lotu saporap Leeme Silok mi lososoro. Minat pot parav i mi lempixan loklok momo!

<sup>3</sup> La mina ven kibis i do Leeme Silok neni ne Moroa. Neni ga rudum dik, la nedik ateren akmokso. Nedik limixin teren, nedik laxasipsip teren.

<sup>4</sup> Minak beles at langas povolo ukeneng at loogu laplavang mi leven-tamtaba ri tong avukat tin. Minak beles eburu mi leemi asu rin uto xeneng at lenep tongtonga linga ren. Mina tong avukat tin la mina vemi asu min.

<sup>5</sup> Leeme Silok, neni i lox avukat. Labalamu ren ik lox amisik la luruturun teren ti limixin naba nemen amisik la noxo xap.

## 101

### *Laxakaape At Loorong At Leme Israel*

<sup>1</sup> O Leeme Silok. Loxompixan tarak i paase mumu labalamu ram la um gomgonga limixin at langas in manton. La nia anak pixan emi asu minu.

<sup>2</sup> Loklok tarak nabap sepse. Ningisa ba unaba vot pasa ia? Lorooro rak naba dadat to xeneng at loogu rak,

<sup>3</sup> la anoxo esuuxun mi laxapmek. Nia ak lox angtungun ti leveloklok atnedi limixin tongtonga xepe. Nia a noxot kis esogo rinotno bok ba eburu minedi.

<sup>4</sup> Anoxo babala vukpuk, la anoxo emu mi limixin kapmek.

<sup>5</sup> Anaba riki xepe nege di, di vepaase siksikma xapmek mumu lentaba vetpes. A belengatngas ti taradi loklox aaso la im simi aurur i.

<sup>6</sup> Anaba siam kaka nedi di ruturun tu la anaba siam abeles nedi xusu dinabak lok eburu minia ro xeneng at loogu rak. La nedi ua dixo babala vukpuk, anaba siam ka di xusu dina gugu ria.

<sup>7</sup> Naba xopmen tetadi xaxarang naba nemen eburu minia ro xeneng at loogu rak. La xopmen tinotno tetadi sosolom naba nemen saporav ia.

<sup>8</sup> At levenaleng amisik anaba sesele utut limixin ua dik lok leveloklok kapmek keneng at lenep kangka atnema. Anaba saksu minedi lorooro atdi i bilinga rino uto xamang basinge lemenemen silok taram.

## 102

### *Lisingising At Laradi Mumu Lumumuat Teren*

<sup>1</sup> O Leeme Silok, una ronga lerengteng tarak la una lox epovo lisingising tarak ti loklok tooro ram tia.

<sup>2</sup> Uguta raba rulu ia at loxonaleng ak lok at lumumuat. At loxonaleng ana ro ke ram, una ronga res tarak la una lox epovo soso levesingising tarak!

<sup>3</sup> Lorooro rak na i sonao ngan lusuxa. La lanmet tarak i anan labantuxu rak ngan laxao.

<sup>4</sup> Limixin munepen minia dip sev asi ia ngan levempivilis mang, la lavavara anan tarak ira xap pam.

<sup>5</sup> Nia at mes silok tinotno. Labaaxin tarak ira gelegen axap la labantuxu rak na ira vaa nga at laxasi.

<sup>6</sup> A lok ngan lavatpixa aaxa no xeneng at lamatbin, a lok ngan bok lavatdudu i nemen kusuk to at lemenemen ira bin pam.

<sup>7</sup> Axo vunga at lengkanimin. Ak lok ngan tinotno lapka ik lok tutulu kap to vana at loogu.

<sup>8</sup> At laxanaleng axap limixin munepen minia di paase vupu ria. La nedi ua di paase aksaksa ria, di tong laasen tarak at loxonaleng di paase asi lentaba vetpes.

<sup>9-10</sup> La mumu i mo lebelemamao silok taram, laxakup i lok ngan ta leveluxa rak, la a inin elong levendan inin mi levengkabili dan at luxatli rak. Uga rebeng kaka ia la uga lu xepe minia.

<sup>11</sup> Lorooro rak i lok ngan ta lama-  
mau ukantinao noxo nemen abao. A  
lok ngan tinotno levempivilis mang.

<sup>12</sup> Ketla nenu Leeme Silok, unaba  
nemen amisik ngan Loorong Avolo.  
Lavaola axap dinabam domasu ram.

<sup>13</sup> Unaba ravasu la una lox aru  
amu lemenemen Saion. Loxonaleng  
ira vot pam kusu tu ri lox asu-  
usu lebelen tuntun tin, loxonaleng  
mokmokso nga na ren.

<sup>14</sup> Lavasaxaruki ram di vavara  
aleng i, keke i do limixin petpes diga  
sele utur i la ira bin ta. La keke i do  
mo lemenemen ira lok kapmek axap  
pam, ketla move lebelendi i tu aleng  
i.

<sup>15</sup> Larabung mixin axap dinaba  
marat taram, Leeme Silok. La  
lavaorong axap at lavatbung mene-  
men dinaba marat at lolos taram.

<sup>16</sup> Nenu Leeme Silok, unaba  
vaxaru amlong lemenemen Saion,  
kerepmo nenu unaba lox asaxaven  
lolos taram.

<sup>17</sup> Nenu unaba rongga res atnedi  
limixin taram di baava, la unaba lox  
epovo levesingising atnedi.

<sup>18</sup> I epovo do tara na malagan li mo  
lempanga nenu, Leeme Silok, uga lox  
i xusu mo lavaola melemu diba utus  
i, la dinaba emi asu minu.

<sup>19</sup> Nenu, Leeme Silok, uga reven su  
boro vana at lenep kaala ram. Uga  
reven su boro vana at lemenemen  
taram ude xopok at lavatbung men-  
emen.

<sup>20</sup> Uga rongga lanteng atdi digak lok  
at loogu xokoxo la uga lox asepmus  
nedi ua limixin petpes diga lok do  
dina sev amet nedi.

<sup>21</sup> Kuren la limixin dinabap kip au-  
rut laasen taram to Saion, la dinaba  
emi asu minu ro xeneng Jerusalem.

<sup>22</sup> Ap mo loxonaleng levenabung  
mixin axap eburu mi limixin at le-  
vengkitkis orong dinaba etu buru la  
dina lotu saporav u, Leeme Silok.

<sup>23</sup> Kovisi nia ana sioxo la ura lox  
amolos pam ia. Ura lox atmut pam  
lorooro rak.

<sup>24</sup> O Moroa, kovisi nia ana sioxo la  
uguta lok kepe soso ia.

O Leeme Silok, nenu u rooro  
amisik.

<sup>25</sup> Uga rudum li lavatbung mene-  
men ganoxa, la uga lok laxalibet mi  
lukngam akmokso.

<sup>26</sup> Mo lempanga naba sonao, ketla  
nenu unaba nemen amisik. Dinaba  
maut ngan lenbantamon. Unaba lu  
asu midi ngan lenbantamon, la dina  
sonao.

<sup>27</sup> Ketla levelinga ram kopmen nak  
lox ekun, la lorooro ram noxo xap.

<sup>28</sup> Laxamdak mi laxaalik atnema  
dinaba nemen avukat atla unabak  
lok see atdi. Levempipisik li atnedi  
dinaba rooro avukat mun.

## 103

### *Labalamu At Ne Moroa*

<sup>1</sup> Labalak, una emi asu mi Leeme  
Silok! Lorooro axap tarak, una emi  
asu mi laasen kaala ren!

<sup>2</sup> Labalak, una emi asu mi Leeme  
Silok, la uguta domampe na levelok-  
lox anarong ik lox asuusu i.

<sup>3</sup> Neni i doxoma xepe lengkakap-  
mek axap tarak la ni i lok kepe lev-  
enanmeres axap tarak.

<sup>4</sup> Ik lox asepsu ia basinge lamaaut  
la ik lox anarong ia mi labalamu la  
lebelen tuntun.

<sup>5</sup> Ik suxa lorooro rak mi lempanga  
avukat, kusu anaba nemen ngan  
laau la ana lolos ngan lamaalom.

<sup>6</sup> Leeme Silok i tu at lenep at lim-  
ixin baava la ik lox asepmus nedi ua  
limixin di lox asi di.

<sup>7</sup> Neni ga lox asuusu leven doxoma  
ali ren ti ne Moses la ni ga lok leme  
Israel kusu dina ven leven gugu lolos  
teren.

<sup>8</sup> Leeme Silok neni laradi at lebelen  
tuntun la labalamu, la ixok belemam-  
mao soso ketla i umsu mi labalamu  
lexen.

<sup>9</sup> Ni noxo paase lolos amisik,  
la lebelemamao ren noxo nemen  
amisik.

<sup>10</sup> I epovo xusu atap kip ka levelok-  
lox asongot teren, ketla neni xopmen  
nak lox asongot nedik na epovo mi  
levengkakapmek atnedik. La ixo po-  
rang leveng kakapmek la leveloklok  
bilinga atdik.

<sup>11</sup> La labalamu ren i urut aleng  
upana at lamavangkap mavana at

lavatbung menemen la kerepmo labalamu ren i silok aleng tinedi ua dit kis esogo min.

<sup>12</sup> La ik lok kepe leveloklok bilinga atdik uto vaxalom tino, i ngan utonak at lemeren laxangking la utois kopok tino.

<sup>13</sup> I ngan ne temen laxamdak mi laxaalik i lox asusu lebelen tuntun tidi. I lok ngan bok Leeme Silok i lox asusu lebelen tuntun tinedi ua dit kis esogo min.

<sup>14</sup> Neni iklen i do ga rudum dik mi lavanga salai. Iklen i do nedik laxakup mene nga.

<sup>15</sup> Kuren la nedik, lorooro atnedik i lok ngan mun lempivilis. Nedik ta suusu la ta tepoposok ngan levempusuvus aaxa.

<sup>16</sup> La lamanman it mas i la ira vaxap manga, la ata noxo ven ka bok ba i.

<sup>17</sup> Ketla nedi di mumu asu Leeme Silok, labalamu ren ik lox amisik mavana atnedi. La luvukat teren ik lox amisik tinedi lavaola axap,

<sup>18</sup> la tinedi bok di ruturun ti lekabus teren la ding tonga res tuturun amisik at levempapaase ali ren.

<sup>19</sup> Leeme Silok ga vuxaxis li loxot kitkis teren to vana at laxalibet. La neni i ngan Loorong Silok mavana at lempanga axap.

<sup>20</sup> Nemi lubang angelo lolos, mina emi asu mi Leeme Silok. La nemi bok ua ming tonga res at levempapaase ali ren, la ming tonga lempanga neni i tong i.

<sup>21</sup> Nemi limixin lolos axap to vana at laxalibet, mina emi asu mi Leeme Silok. La nemi bok lavasaxaruki ren no mik lok leven gugu mu asu lavavara ren.

<sup>22</sup> Nemi lempanga vipis axap teren at lengkot axap neni ik lok gomgo ren, mina emi asu mi Leeme Silok.

Labalak, una emi asu mi Leeme Silok!

## 104

### *Leemi Asu Ri Laradi Runtudum Li*

<sup>1</sup> Labalak, una emi asu mi Leeme Silok! O Leeme Silok, Moroa rak, u

nunuan aleng pologat! Ung sigaara mi lisixam la lisisinang.

<sup>2</sup> U bom u mi laxasep. Uga rep asala laxalibet ngan ta loogu kadis

<sup>3</sup> la uga vaxaru loogu silok tu ro mavana at ladan ik lok tovana. La ut kis to mavana at lengkon takabu ngan lagengen taram la lamanman it mas aonon u.

<sup>4</sup> Uk lok luvuttadi loklok ka linga ram di lok ngan laramera manman la lavasaxaruki ram di lok ngan laxao at lavanga i mam.

<sup>5</sup> Ugara vaxaxis li atmatkun pam lavatkangka to vana at laamkumkun teren, la ixo epovo do tara na ut asi bok ba i.

<sup>6</sup> Uga lok li laras to mavana ren ngan labantamon, la ladan gak mit lempat kaana.

<sup>7</sup> At loxonaleng uga vaase sok laradan, diga sixiro. Diga ekakala oo at loxonaleng diga rongga levelinga lolos taram.

<sup>8</sup> Digam tem soobang su boro vana at lempat kaana la uto xopok at larasa, ugo ap mo loxot nenu uga lok li i xusu tidi.

<sup>9</sup> Uga lok li lapdopdo mo nedi di noxo los polo i, tik lok pe di xusu di noxo sak pavaa bok ba lavatkangka.

<sup>10</sup> Uga lok levempuuvut dan i sesen to at larasa, la lempat dan silok i sesen kantubu at levengkaana.

<sup>11</sup> Dik lox asusu levendan ti levempanga sio mi lavanuet kangkedek atdi. Laxan dongki sio dik lox axap lanminu atdi go.

<sup>12</sup> La lavapixa dip kip levempotpos atdi, go at larauna at larasigege dan la dirak pixan.

<sup>13</sup> La uk lox asu larakabu boro vana at laxalibet uto vana at lengkong kaana, la lavatkangka i unumsu mi leveloklox anarong taram.

<sup>14</sup> Uk lox asusu levempivilis ti laxan bulumaxao la levempanga suusu ri limixin, la kusu dibat lotlo bok leveluxa ridi,

<sup>15</sup> la dinak lox asusu leven vaen tik lox amomo di, la levenmonok dan olip nabak lox aklek di, la lengkongkide nabam taba di mi lolos.

<sup>16</sup> Laxanbet it pot solo at lempar una Seda (Cedar) ro Lebanon, mo laxanuna at Leeme Silok axa gatlo li di.

<sup>17</sup> La lavapixa dik lok laraogu atnedi go. La lempatboxon dip kip levempotpos atdi ro at larauna kaa (fir tree).

<sup>18</sup> Laxanme sio dik lok to vana rubu at lempatkaana, la lempat pusi sio di lipe ro xeneng at lempat buang.

<sup>19</sup> Uga rudum li lagaaling kusu tik lok katling leven gaaling. La laxangking ikleklen loxonaleng teren ti lotup.

<sup>20</sup> Uga lok laxanimin, la keneng ap mo lamain, laxampanga sio axap dip tavasus.

<sup>21</sup> Levelaion maxat di booro lolos at loxonaleng di puse luxa. Di puse ri mo levempanga anan no ne Moroa im taba i.

<sup>22</sup> La do laxangking na rip su, dimlomlong la dirak midi ro at lempatmamara atdi.

<sup>23</sup> Melemu limixin dip tavasus xusu tik lok leven gugu atdi la dira gugu abung tino.

<sup>24</sup> O Leeme Silok. Ugara rudum li vam laxampanga solo. Mi lakleklen silok taram uga lok di. Lavatbung menemen i umsu mi laxampanga vipis axap taram.

<sup>25</sup> Pen ba mo laras, i silok tinotno la ip teplas, la i umsu mi mo lara met panga vipis silok la lixilik ua ata xo epovo ri exes i, di nemen teren.

<sup>26</sup> La lempatmon di sesen to vana ren, la mo lavatpanga sio boro at laras, ne Levietan no nenu uga lox i, i gosogos go xeneng ap mo laras.

<sup>27</sup> Nedi axap na di nunu li ram kusu unabam taba luxa di mo do dinak toxo.

<sup>28</sup> Nu um taba luxa di la di vanan i. Nenu um taba leveluxa xusu tik lox axap lavavara atdi.

<sup>29</sup> Mo do u raba rulu di, dik marat. Mo do una lok pes lamamas taram atdi, di remet la diramlomlong ti laxakup no nedi diga ravasus ren.

<sup>30</sup> At loxonaleng u rudum di, u raba di mi lamamas taram, la di ruuna ka lorooro. La lempanga axap

di ravasus at na lavatbung menemen, um taba di mi lorooro maxat.

<sup>31</sup> Naba lox avukat do lisisixam at Leeme Silok naba nemen amisik la kopmen tekavaxap teren! Naba lox avukat do Leeme Silok na momo mi lempanga neni ga rudum pam i!

<sup>32</sup> Neni i reven tooro lavatbung menemen la lavatbung menemen ing nengne. Neni inglong tu at lempat kaana, la dirap kip soobang asu lusuxa.

<sup>33</sup> Anabak pixan ti Leeme Silok keneng at lorooro axap tarak. At levenaleng nia ana rooro ren, anabak pixan emi asu ri ne Moroa rak.

<sup>34</sup> A vara i do ni naba momo at lengkom pixan tarak, atla leklek tarak i laala boro ren.

<sup>35</sup> A vara i xusu limixin kapmek dina sonao basinge na lavatbung menemen, la noxopmen bok ba timixin kapmek.

Labalak, una emi asu mi Leeme Silok!

Leemi asu ri Leeme Silok!

## 105

### *Moraa Ga Lok Tatao Limixin Teren Me Israel*

<sup>1</sup> Nedik ata tong avukat ti Leeme Silok, ata tong asu laasen silok teren. Ata tong axasev i ri levenabung mixin buaang, mumu lempanga sangsangu neni ira lok pam i.

<sup>2</sup> Atak pixan emi asu ri Leeme Silok. Ata tong asu lempanga nunuan neni ira lok pam i.

<sup>3</sup> Ata momo mila nedik ateran. La nedi di lotu parav i mi lebelendi axap dina sosoro.

<sup>4</sup> Atat pas parap Leeme Silok atdik kusu ti lok ka leveloklok tooro, la ata lotu parap amisix i.

<sup>5-6</sup> Nemi livipisik li at ne Abaram, laradi gugu at ne Moroa, la nemi livipisik li at ne Jakop, mo laradi ne Moroa ga soxolik ka i. Minam doma aklen ti lempanga sangsangu ne Moroa ga lox i, la mo levenmumuat neni ga raba limixin munepen min.

<sup>7</sup> Leeme Silok neni ne Moroa atdik. La mo levempapaase ali ren ti limixin axap at na lavatbung menemen.

<sup>8</sup> At levenaleng axap i tu melamgo neni naba tu at lekabus teren, la naba lox epovo mo leveng kakaape ren tinedi larabin sangaun kobot laraola, mo naba vot melemu.

<sup>9</sup> Neni naba doma amisik livirivit li ni ga lox i mi ne Abaram la mo laxakaape ren ti ne Isak.

<sup>10</sup> Leeme Silok ga lok lekabus mi ne Jakop, mo lekabus ua naba nemen amisik la noxo xap.

<sup>11</sup> Ni ga lok ti ne Jakop keretna, “Nia anaba raba u mi na lenep silok Kanan, la na lenep kangka naba nemen ngan ataram axa.”

<sup>12</sup> Limixin at ne Moroa di goxo buaang, la diga nemen kadiang ngan lavaose to at lenep silok Kanan.

<sup>13</sup> Diga vovo saasaa onon mun at levennep silok uto at levennep silok petpes, la at lara kitkis orong silok uto at lara kitkis orong silok petpes.

<sup>14</sup> Ketla ne Moroa goxo ke xepe ba tara gita lox abaava nedi. Neni ga lok see atnedi, la ga sak pinak lavaorong silok mi levelinga i lok keretna,

<sup>15</sup> “Nemen gat mita lox asongot limixin soksoxolik tarak. La nemen gat bok mita lox asongot lavaeme vapaase ali rak.”

<sup>16</sup> Leeme Silok ga riki asi lean kangking ti mo lenep kangka at limixin teren, la leveluxa atdi gara xap pam.

<sup>17</sup> Ketla neni ga riki amgo lara laradi uto Isip, laasen teren ne Josep, mo diga sesep min kusu naba ravasu ngan lasaxaruki go.

<sup>18</sup> Diga xoxo alis luxangkedek teren mi lemparoos sen, la diga vaxa onga i mi loxon aen.

<sup>19</sup> Josep ga nemen ngan laradi xokoxo, ga se ap mo laaleng lava-paase ali ren ga soorun. Levelinga at Leeme Silok ti ne Josep ga lox asusu i do neni goxo raba rulu i.

<sup>20</sup> Loorong me Isip ga soxomus asu i, ni lamgomgo at levenabung mixin buaang la ga lox asepmus i.

<sup>21</sup> Neni ga lok li ne Josep kusu nam gomgonga lagavaman teren. La ga

lok li box i ri lok tatao mavana ap mo lenep silok Isip.

<sup>22</sup> Ni ga ruuna lolos mavana atdi lentaba luvuttadi amgomgo at loorong la gak lok ka bok levelinga ren kusu ti anasa luvuttadi vapaase at loorong.

<sup>23</sup> Melemu ne Jakop eburu mi limixin teren diga beles ukeneng Isip, la digara nemen ta go ap mo lenep silok.

<sup>24</sup> La Leeme Silok ga lox avosok aleng nedi go, la ga lok nedi diga lolos aleng tinotno ri limixin munepen midi.

<sup>25</sup> Neni ga lok limixin me Isip diga bele mumuat ti limixin teren, nedi lavasaxaruki ren. La leme Isip diga xarang arup amisik di.

<sup>26</sup> Melemu Leeme Silok ga riki ne Moses, lasaxaruki ren uto ri limixin teren, la ga riki bok ne Aron, mo neni ga soxolik ka i.

<sup>27</sup> Duga lok leveloklok katling at ne Moroa kantubu atdi, la lempanga sangsangu bok teren keneng at lenep silok Isip.

<sup>28</sup> Neni ga riki lamain bonot la ga lox amain axap mo lenep kangka. Ketla leme Isip move diga ronga xepe levelinga ren.

<sup>29</sup> Neni ga vuk gili laradan atdi ri lada, la laxanmat axap digara met.

<sup>30</sup> La lenep kangka atdi ga umsu mi laxangkoak, mo digat los beles bok uto xeneng at lengkot mikmidi at lubang amgomgo.

<sup>31</sup> La ne Moroa ga tong i, la laxanulang mi laxan ngirobo diga umsu aleng ap mo lenep silok axap.

<sup>32</sup> La ni ga lok pe larakabu ketla ga riki lavatbet uat eburu mi lavanga ga mam, ukeneng ap mo lenep silok atdi.

<sup>33</sup> La ni gak paksa asi larauna vaen atdi, eburu mi larauna pik (fig) bok la ga lox asubu bok larauna axap.

<sup>34</sup> Neni ga tong mun i la, laxasixu diga vot, ga buaang aleng la di goxo epovo rinotno kusu ti exes di,



<sup>35</sup> diga van axap lempanga ga usu at laxangka. La diga van axap bok lempanga digat lotlo i.

<sup>36</sup> Neni ga sev amet axap laxam-dak temes avot keneng at lara kitkis koetemen to Isip.

<sup>37</sup> Melemu neni ga lam asu limixin me Israel, digap kip ka laxa siliva la gol at leme Isip, la nedi axap diga rooro nunuan la diga lolos.

<sup>38</sup> Limixin me Isip diga momo aleng at limixin me Israel diga vas kaxat basinge di, mila diga marat aleng atdi.

<sup>39</sup> Moroa ga vung pavaa nedi mi loxontakabu kusu ti lok tatao di, la lababao at laxao ti raba nedi mi laxasep at lengkanimin.

<sup>40</sup> Diga sing ne Moroa, la neni ga raba nedi mi levempixa (quail) kusu tidi ri anan, la ga raba avan mais nedi mi lengkide boro vana at laxalibet.

<sup>41</sup> Neni ga lox arem suang lara lavaruat, la ladan ga rem soobang su ukamang. Ga ngan lavatdan sen la ga sesen go xeneng at lamatbin.

<sup>42</sup> Mila neni gam doma mo laxakaape xaala ren, ga raba i ri ne Abaram, laradi gugu ren.

<sup>43</sup> Kerepmo neni ga lam asu limixin soksoxolik teren basinge lenep silok Isip, mi langsgangan lososoro, la digak pixan la digap kup momo.

<sup>44</sup> Neni ga raba nedi mi lenep kangka at lentaba levenabung mixin petpes, la digara ruuna ka nga leven-taamang atdi,

<sup>45</sup> kusu limixin teren diba rongga res at levempapaase ali ren, la dina mumu asu Laulis Linga la leventaang axap teren.

Leemi asu ri Leeme Silok.

## 106

### *Leveloklok Anarong At Leeme Silok Ti Limixin Teren*

<sup>1</sup> Leemi asu ri Leeme Silok.

Ata tong avukat ti Leeme Silok, mila neni mun i lox avukat, la labalamu ren naba nemen amisik.

<sup>2</sup> Kopmen tara i epovo na tong axap leven angsgangan lempanga

silok neni gara lok pam i. Kopmen tara i epovo xusu naba lox epovo lodoxoma ren mi leemi asu rin.

<sup>3</sup> Nedi dinang tonga res at levempapaase ali at ne Moroa la dinak lox amisik lempanga ik mokso, Moroa naba lox anarong di.

<sup>4</sup> O Leeme Silok. Uguta domampe ia, mo do una lok tooro limixin taram. Una us abeles box ia ukeneng at limixin taram, mo do una lox asepsu di.

<sup>5</sup> Una ke ia aba ven limixin taram dinaba ngasang kobot, la ana ruuna bok tomomo eburu minedi la anak lok eburu bok midi xusu ti emi asu minu.

<sup>6</sup> Nema marak lok pam laxakapmek kerekngan lavalabat atnama diga lox i. Mara soogong pam la mara bixurun.

<sup>7</sup> Lavalabat atnama di goxo xasep nunuan at lempanga sangsangu neni ga lox i ro Isip. Diga domampe mo levenaleng buaang neni ga lox asuusu labalamu ren tidi. La digang tonga viribang tin, Lanaraavuk to at Loxontas Memele.

<sup>8</sup> Ketla Leeme Silok ga lox asepsu di go kusu ti lox asilok laasen teren, la ni ga lox asuusu mo langsgangan lolos teren.

<sup>9</sup> Neni ga tong mun i ri Loxontas Memele, la laras gara mes ta, la neni ga lam avolo limixin teren at laxangka mesemes.

<sup>10</sup> Neni ga lok tooro di basinge limixin munepen midi, la ga lox asepsu di basinge limixin esep boro Isip.

<sup>11</sup> Laras ga vula pe axap di, la kopmen tinotno tara ga roo su basinge lanu.

<sup>12</sup> Kuren la limixin teren diga nunu at leveng kakaape ren, la digak pixan emi asu min.

<sup>13</sup> Ketla diga domampe soso mun lempanga silok ne Moroa ga lox i, la di goxo ngangais ba ri tevelinga axasep teren.

<sup>14</sup> To at lamatbin diga umsu aleng mi langaongao anan, la diga lok tong pen ne Moroa.

<sup>15</sup> Kuren la neni ga raba nedi mi levempanga nedi diga sing tin, ketla

neni ga sep bok nedi mi lanmeres kapmek.

<sup>16</sup> La to bok at lamatbin diga tere mumu aleng ne Moses, la ne Aron, ni lamaasa kaala at Leeme Silok.

<sup>17</sup> Melemu lavatangka ga rem suang la ga xonom ne Datan, la garak mit bok ne Abiram midi loxoetemen.

<sup>18</sup> La laxao ga si boro vana la ukopok tinedi diga mumu asu du, la ga rin asonao axap mo luvuttadi.

<sup>19</sup> Melemu leme Israel diga lok lovovo at lubulumaxao maxat to Sinai, la digara lotu parav i ngan mo lomoroa xaxarang.

<sup>20</sup> Diga sok sisixe ne Moroa mo i silok aleng la diga xap ti lotu saparav i, la diga lotu parap mo lovovo at lubulumaxao, mo i anan pivilis.

<sup>21</sup> Diga domampe rinotno ne Moroa mo ga lox asu di, mi levempanga silok teren to Isip.

<sup>22</sup> Diga domampe mo lempanga nunuan, neni ga lox i go, la lempanga sangsangu neni ga lox i ro at Loxontas Memele.

<sup>23</sup> Melemu ne Moroa ga lok do naba sele utut kepe limixin teren. Ketla laradi gugu ren ne Moses, mo ni ga soxolik ka i, ga vaase pe ne Moroa xusu noxo lox asuusu lebelemamao ren tidi.

<sup>24</sup> Melemu diga sok tixirixes kepe mo lenep kangka avukat, mila di goxo nunu at laxakaape at ne Moroa.

<sup>25</sup> Digak lok to xeneng at laraogu kadis atdi la digara gagalinga amisik la di goxo ronga ba levelinga at Leeme Silok.

<sup>26</sup> Kuren la neni ga xaape rinedi mi luruturun do ni naba lok nedi dina remet to at lamatbin.

<sup>27</sup> La na lok livipisik li atdi, dina epeseves ti levenabung mixin petpes la na ke xepe nedi, dina remet etaba onon to at levenep silok petpes.

<sup>28</sup> Melemu nedi limixin at ne Moroa digak lok to Pior, diga lotu saparap lomoroa xaxarang ne Baal la digara anan leventamtaba digap lavang min ti lenmoroa kopmen torooro atdi.

<sup>29</sup> Kuren la diga lox axatu lebelemamao at Leeme Silok mi leventup-tuvuk kapmek atdi, la langangan lanmeres kapmek ga vot kantubu atdi.

<sup>30</sup> Ketla ne Penias ga ru upana la ga sev amet mo luradi xapmek la mo lanmeres ga xap ta.

<sup>31</sup> Na lavanga avukat, ne Penias ga lox i, move limixin at ne Moroa dim doma i. La dinabam doma su bok teren at na levenaleng i tu ume-lamgo.

<sup>32</sup> Melemu diga lox amusak Leeme Silok to Meriba at levempuuvut dan. La ne Moses ga xip tutu mi mo lumumuat mumu laxakapmek atdi.

<sup>33</sup> Diga lox abelemamao aleng i, kuren la ni ga paase solo la ga paase tupgat ta.

### *Leme Israel Diga Rupot To At Lenep Kangka Ramtaba*

<sup>34</sup> Leme Israel di goxo sev amet lavamolun ap lenep kangka ramtaba kerekngan Leeme Silok ga tong taba di min ti lox i.

<sup>35</sup> Ketla diga epot ka di, la diga reven seo ka loklok benben atdi.

<sup>36</sup> Limixin at ne Moroa diga lotu parap laxampoovo vanga, kuren la diga oon at levesin mumu mo loklok atdi.

<sup>37</sup> Digam taba mi laxamdak mi laxaalik atdi, ngan laplavang atdi ri levenmoroa xaxarang me Kanan.

<sup>38</sup> Diga sev amet mo laxamdak mi laxaalik ua kopmen taxakapmek atdi, la mumu mun mo langas diga lox abilinga mo lenep kangka ramtaba.

<sup>39</sup> La kerepmo bok diga lox abilinga nedi xa. Digoxo ruturun ti ne Moroa.

<sup>40</sup> Kuren la Leeme Silok ga belemamao aleng limixin teren, neni ga bulunga xepe rino di.

<sup>41</sup> La neni ga raba rulu kepe di kusu lavamolun, limixin munepen minedi limixin me Israel dinabam gomgonga di.

<sup>42</sup> Diga baava aleng mi levenaknixip, mo limixin munepen midi diga raba nedi min. La diga nemen

aleng maxopok at lolos at levendox-oma atnedi limixin munepen.

<sup>43</sup> Buaang levenaleng Leeme Silok ga rebeng asu ka limixin teren basinge di. Ketla move digang tonga xepe levelinga ren, la digam subu tup tino ukeneng at laxakapmek silok.

<sup>44</sup> Ketla Leeme Silok ga ronga nedi, at loxonaleng digang teng tin, la neni ga ronga xibis lumumuat atdi.

<sup>45</sup> Mumu mo lumumuat atdi, neni ga doma mo lekabus teren. La mumu langsgangan labalamu ren, neni ga lox ekun lodoxoma ren.

<sup>46</sup> La neni ga lok limixin munepen midi, diga suma xapmek mumu lok-lok diga lox i ridi.

<sup>47</sup> O Leeme Silok ne Moroa atnama. Lox asepsu nama, la una lam asu nama boro xantubu at na larabung mixin, kusu maba tong avukat tu la mana emi asu mi laasen kaala ram.

<sup>48</sup> Leemi asu ri Leeme Silok, Moroa me Israel. Leemi asu rin monga la at levenaleng axap. La limixin axap dina vaase xeretna, "Tuturun!" Leemi asu ri Leeme Silok!

## 107

### *Leemi Asu Ri Ne Moroa Mumu Labalamu Ren*

<sup>1</sup> Nedik ata tong avukat ti Leeme Silok mila neni axa i lok nunuan. Labalamu ren naba tu lexen!

<sup>2</sup> Nemi axap ua neni ga lox asepsu nimi, mina tong amisik na levelinga ti emi asu mi Leeme Silok i lok keretna, "Labalamu ren naba tu lexen!" Neni ga lox asu ka nimi basinge limixin munepen minimi,

<sup>3</sup> la gara lam amlong nimi ude boro at levenabung mixin petpes, at lenep meso la mesi la boro bok at lenep mero la mexun.

<sup>4</sup> Lentaba diga soronga ro at lamatbin aaxa la di goxo epovo xusu dina vuse ka tangas tidi uto at temenemen silok kusu diba nemen e.

<sup>5</sup> Nedi digak toxo la digak minu, la diga doma i do, di mo dina seeve nga.

<sup>6</sup> Melemu diga ro ke at Leeme Silok mumu lumumuat atdi, la neni ga lox asu di basinge lixitkis etaba.

<sup>7</sup> La neni ga lam nedi at langas manmanton uto at lemenemen silok, la diga nemen e.

<sup>8</sup> Kuren la ik mokso do dina tong avukat ti Leeme Silok mumu mo labalamu lexen teren, la ri lempanga nunuan neni gara lok pam i ridi.

<sup>9</sup> Atla Leeme Silok im taba dan limixin dik minu, la im taba nedi dik toxo mi lempanga anan avukat.

<sup>10</sup> Lentaba vetpes digang songot keneng at lamain bonot ngan luvuttadi xokoxo, mo diga xoxo nedi mi levenoos sen.

<sup>11</sup> Digak lok go mila diga ronga viribang at levempapaase ali at ne Moroa, ni Lanaraavuk. La diga sok tixirixes xepe levenanasa ren.

<sup>12</sup> Kuren la ni ga lox abaava rinotno di mi laxan gugu solo, la digak sak saaban, la goxopmen tara go ri lok tooro di.

<sup>13</sup> La melemu diga ro ke at Leeme Silok at levenaleng at levenmumuat la neni ga lox asepmus di basinge mo labaava.

<sup>14</sup> Neni ga lam asu nedi basinge lamain la loxokoxo, la ga ba koxorop pes levenoos sen basinge di.

<sup>15</sup> Kuren la ik mokso do dina tong avukat ti Leeme Silok mumu mo labalamu lexen teren, la lempanga nunuan neni gara lok pam i ridi.

<sup>16</sup> Neni i tit dadas asi lempatban silok limixin dik lox i mi lobarons (bronze), la i tit amdanda lengkompanga soksoxoba matmatkun dik lox i mi la aen.

<sup>17</sup> Lentaba vetpes diga lok ngan ta luvuttadi baulang, la diga xip levesongsongot mumu leveloklok kakapmek la leventaangas kapmek atdi.

<sup>18</sup> Digak bulunga levempanga anan, la ma lixilik diga lok do dina met.

<sup>19</sup> Melemu diga ro ke at Leeme Silok mumu levenmumuat digap kiv i, la neni ga lox asepmus di basinge mo levenaknixip.

<sup>20</sup> Neni ga tong asu levelinga ren ti lok pes leven anmeres atdi, la neni ga lox asepsu di basinge lanmet.

<sup>21</sup> Ik mokso do nedu dina tong avukat ti Leeme Silok, mumu mo labalamu lexen teren, la mo lempanga nunuan neni gara lox pam i ridi.

<sup>22</sup> Ik mokso do dina tong avukat ti Leeme Silok la dina raba i mi leven-tamtaba eburu mi livikpitan momo, mo naba tong asu mo lempanga neni ga lok pam i.

<sup>23</sup> Lentaba vetpes diga sen tangtagap mi lempatmon to at laras aaxa, kusu dina ruuna kaka lempilas ap mo lugugu atdi rovana at lempatmon.

<sup>24</sup> Diga ven lempanga sangsangu Leeme Silok ga lox i mi mo lolos teren to at laras. Mo lempanga ga nunuan aleng. <sup>25</sup> Neni ga vaase, la ga lok kaxat mo langsung lamanman silok, mo ga lox axatu kaxat lempo paxanao.

<sup>26</sup> Lempopaxanao ga xip kaxat mo lempatmon upana xasep la ukopok tino. La mumu mo laniu di goxo doma abelemes bok ba do diba roo.

<sup>27</sup> Diga saaban onon la digat pas tangtangu ngan diga inin lengkadan lolos. Di goxo epovo na lok tavanga, keke i do lakleklen solo mo atdi.

<sup>28</sup> Melemu diga ro ke at Leeme Silok mumu mo levenmumu atdi, la neni ga lox asu nedu basinge mo laniu.

<sup>29</sup> Neni ga lox amila lamanman bet la garak lox atnaasan ta, la lempotas at laras bok digak midi mila.

<sup>30</sup> Diga momo aleng at lavanga ga mila, la neni ga mu asu lavavara atdi diga oso avukat to at losoolom.

<sup>31</sup> Ik mokso do dina emi asu mi Leeme Silok, mumu labalamu lexen teren la lempanga nunuan neni ga lok pam i ridi.

<sup>32</sup> Ik mokso do dina tong asu laasen silok teren keneng at lovtopot buru at limixin, la dina emi asu min kantubu at lovtopot buru at luvuttadi amgomgo.

<sup>33</sup> Leeme Silok ga vuk gili leven menemen dan ga ngan ta lamatbin patmang. La lengkandan i puuvut su, neni ga lox amesemes i,

<sup>34</sup> la laxangka liliun neni ga lox i ga ngan ta lomontep. Neni ga lok na lempanga mumu laxapmek atnedu diga nemen go ap mo leven menemen dan.

<sup>35</sup> Melemu neni ga ba gili lamatbin patmang, ga ngan manga lengkandan i puuvut su, la neni ga lox asen amu laradan sen go ap mo lenep.

<sup>36</sup> Neni ga siam avolo limixin digak pakes ti lempanga anan kusu dina nemen go, la diga xip lemenemen silok tidi ri nemen e.

<sup>37</sup> Digat lotlo leventaamang la laxanoos vaen, la digap sepkin aleng.

<sup>38</sup> Neni ga lox anarong nedu limixin teren, la diga vosok aleng. Neni goxo ke xepe ba levesipsip mi levenbulumaxao atdi gita mun pipisik.

<sup>39</sup> Melemu limixin munepen diga sak tup mi mo limixin at ne Moroa la diga lox amangan nedu, la diga lox abaava aleng nedu mi leven aknixip la levesongsongot silok.

<sup>40</sup> Ketla ne Moroa ga lox asongot nedu limixin munepen. Ni ga riki di uto at lamatbin aaxa kusu dina soronga go.

<sup>41</sup> Ketla neni ga lam aase mo limixin pakpakes teren, basinge levenmumu atdi. La ga lox anarong di kusu dina vosok aleng ngan laxasipsip.

<sup>42</sup> Do limixin manmanton dina ven i na, dina momo, ketla nedu limixin kapmek dinaba vamus levenngusno atdi.

<sup>43</sup> Do nege lodoxoma ren i xasep nunuan, ni na doma mumu i na lempanga, la na doma mumu avukat bok labalamu lexen at Leeme Silok.

## 108

*Lisingising Ti Loklok Tooro Keneng At Leesep*

<sup>1</sup> O Moroa, labalak it kis saga ram. Anak pitan tu, la ana emi asu minu. Labalak, una aus!

<sup>2</sup> Loxontaaleng tarak mi ligita, muna gagas. Nia anaba sak aus laxangking at labara kooxot mi loxompixan.

<sup>3</sup> O Leeme Silok. Ana tong avukat tu kantubu at larabung mixin axap, la anabak pixan emi asu minu kantubu at limixin axap.

<sup>4</sup> Mila labalamu lexen taram i silok aleng tinotno, la i umsu bok to mavana at laxalibet. La luruturun taram i suxuna axap lamavangkap.

<sup>5</sup> O Moroa, una lox asuusu lolos taram tovana at lamavangkap, la una lox asuusu bok lisisixam taram to at lengkot axap at na lavatbung menemen.

<sup>6</sup> Una rebeng nama mi lolos taram la una lox asepsu nama basinge limixin munepen minama. La una sep siam at lisingising tarak, kusu una lox asu ka nema limixin taram, mo u balamu nama, basinge limixin munepen minama.

<sup>7</sup> To at loogu xaala ren Moroga tong i xeretna, "Nia anaba sak tup mi limixin munepen minia la ana sak epeseves di basinge lenep kangka rak. Nia anabapdo epes nom lemenemen Sekem ti limixin tarak, la anapdo episa mo lasa ro Sukot tidi.

<sup>8</sup> Nia a ruuna mo lunep Gileat la Manase, la lenep Epraem bok ni lavatkiam tarak i tu katling ia at leesep. La lenep Juda ik lox asuusu lubang amgomgo ri limixin tarak.

<sup>9</sup> Ketla lenep Moap naba lok ngan lavattingigon gosogos panga. Nia anaba lu mi luxompanga vatpas tarak uto at lenep Edom, ngan loklok katling do nia a ruuna i. At laaleng nia anaba sak tup mi limixin me Pilistia, anabap kup mi lomomo."

<sup>10</sup> O Moroa, nege bamgo ria uto at lenep silok Edom? Nege ba lok tooro ia xusu ana sak tup midi ro at lemenemen silok atdi, mo diga bos kangkan i mi larangas uat?

<sup>11</sup> Kereva, ura sok sisixe xepe rino vam nema, limixin taram? Kereva, ixo epovo bok ba xusu una vas su eburu bok ba mi limixin esep atnema?

<sup>12</sup> Una lok tooro nema kusu mana sep limixin munepen, atla lolos at limixin noxo lox epovo tavanga.

<sup>13</sup> Do ne Moroa na ru eburu minedik, tanaba sak tup mi limixin munepen, neni naba sev asubu di.

## 109

### *Lisingising At Laradi I Ekip Tangarang Mi Lumumuat*

<sup>1</sup> Moroa, nenu xusuk mun, nia a emi asu minu. Nemen gat utam pamngus,

<sup>2</sup> mila limixin kapmek la limixin sosolo arup, monga di paase sox ia, la dira li laxaxarang mavana rak.

<sup>3</sup> Di xarang taba ia, mi laxalinga belengatngas atdi. Dik sok taba parang mun ia mi levelinga la kopmen tavasuun teren.

<sup>4</sup> Nia agat kis etangas eburu midi la aga ngising tidi, ketla dixo tu tooro ba ia.

<sup>5</sup> Di vorang amlong lununuan tarak tidi mi laxakapmek, la lixitkis etangas tarak tidi di vorang i mi lebele ngatngas atdi.

<sup>6</sup> O Moroa, una lok katling ka taradi sosolo arup, kusu ti lok li laradi munepen minia at lavapaase, la mo laradi sosolo arup na sok taba i mi levelinga.

<sup>7</sup> La do dina ronga linga ren, a vara i xusu diba vuse ka laxapmek teren. La i epovo do limixin dina ronga levesingising teren la dinaba ronga xibis i do ni laradi xapmek.

<sup>8</sup> A vara i xusu levenaleng at lorooro ren na xap kot. A vara i do tara vetpes na lok ka lixitkis amgomgo ren.

<sup>9</sup> A vara i do laxamdak mi laxaalik teren dina ravasu ngan lubangkarun, la latkin teren nak lok naa.

<sup>10</sup> A vara i do laxamdak mi laxaalik teren dina lok ngan luvuttadi singising panga. A vara i xusu dina sakala su midi boro at loogu tem dadas atdi.

<sup>11</sup> A vara i do na laradi xapmek, do tevendinau go ren, mo luvuttadi na laradi xapmek ga dinau atdi, dina vot la dina lok ka axap lempanga

ren. A vara i do limixin petpes bok dina lok ka mo lempanga ni ga gugu ka i.

<sup>12</sup> A xopara tara na lox asu loklox anare rin, koplā na balamu mo laxamdak mi laxaalik teren melemu at lanmet at ne temen di.

<sup>13</sup> A vara mo livipisik li ren dina met ut, la laasen teren dina sakpun kepe i ap mo laraola melemu.

<sup>14</sup> A vara i do laxakapmek at lavalabat teren nak lox amisik at lodoxoma at Leeme Silok, la mo laxapmek at nenen, na nemen amisik la nemen gat di guta lok pes kepe i.

<sup>15</sup> A vara mo laxapmek atdi nak lox amisik to melango at Leeme Silok la neni naba ra korop asu xepe levenasen atnedi basinge lodoxoma at limixin.

<sup>16</sup> Mo laradi xapmek goxom doma i do nak lok toloklox anare, ketla gak lox asongot limixin banbalo la gap sev amet di eburu mi limixin pakpakes la baava.

<sup>17</sup> Neni ga vavara solo i xusu na lili lasaxaek, a vara i do mo laxasaxaek namlong mu i. Neni goxopara i xusu nak lox anarong limixin, a vara i do teta noxo lox anarong i.

<sup>18</sup> Neni gak lok momo rik lox asaxaek limixin, ngan lasakula ren. La a vara i do mo loklox asaxaek teren na suxuna amlong i ngan ladan la ngan bok ladan momonok i beles ukeneng at levesi ren.

<sup>19</sup> A vara i do lasaxaek na nemen amisik eburu min ngan lavanga singsiga ren, la na ngan labanbaane diga sevut li i ren.

<sup>20</sup> O Leeme Silok. A vara i do una mu asu mo langas la una lox asongot nedi limixin munepen minia, atla di xaxarang taba ia do nia laradi xapmek.

<sup>21</sup> Ketla nenu Leeme Silok la Loorong Avolo. Una lok tooro ia kerekngan uga xaape min, la una lox asu ka ia basinge di mumu labalamu nunuan taram.

<sup>22</sup> Nenia mun laradi banbalo la pakpakes, la no xeneng at lavatpeve rak ing songot aleng tinotno.

<sup>23</sup> La i auret do ana sonao mun ngan lovovo at laradi laxangking i soosoo rin ukantinao, la a lok ngan mun lasku lamanman i mas kepe i.

<sup>24</sup> Luvatgulom tarak i meramun axap mila anmun anan. La laban-tuxu rak ira gelegen ta la ira molobe nga.

<sup>25</sup> Do limixin di ven ia, dik lok kalise ia. La do di ven kora ia, dira piriapat patlak ta.

<sup>26</sup> Leeme Silok ne Moroa rak. U ruuna labalamu lexen, kuren la una lok tooro ia la una lox asepsu ia basinge limixin munepen minia.

<sup>27</sup> Una lok di dinaklen i do nenu Leeme Silok, uga lox asepsu ia basinge di.

<sup>28</sup> Diba li lasaxaek tarak, ketla nenu unaba lox anarong ia. A vara i do una lox amangan nedi limixin loklox asongot kusu nenia, lasaxaruki ram anaba lok momo.

<sup>29</sup> A vara i do limixin munepen minia dinaba ruuna ka lainmangan silok, la mo lainmangan naba suxuna di ngan lavanga singsiga atdi.

<sup>30</sup> Nia anaba tong avukat aleng ti Leeme Silok la ana emi asu min kantubu at lovotpot buru at limixin.

<sup>31</sup> Mila Leeme Silok i tu at lenep at limixin banbalo, la ik lox asepsu nedi basinge limixin sepsev amet.

## 110

### *Leeme Silok Mi Loorong Soksoxolik Teren*

<sup>1</sup> Leeme Silok ga vaase ri leeme silok tarak keretna, "Unat kis de saparap lakngak tino, se nenia ana lok li limixin munepen minu na ngan loxot burubut ti luxangkedek taram."

<sup>2</sup> Leeme Silok naba lox asilok mo lixitkis amgomgo ram naba ruka i ro Saion. La unabam gomgonga nedi limixin munepen minu.

<sup>3</sup> At levenaleng at leesepe limixin esep taram diba xulubi aleng kusu ti esep. La no mun at lenmaxantamak suubu, luvuraau radi ram dibat pot pasa u ro vana at lempatkaana i xaala.

<sup>4</sup> La Leeme Silok gara xaape vam la kopmen noxo lox ekun bok ba loxoxoma ren. Neni ga lok keretna, "At levenaleng axap i tu melamgo nenu unaba nemen amisik ngan lamaasa kerekngan ne Melkisedek."

<sup>5</sup> Leeme Silok mo i tu at lenep taram ti lok see ram, la neni naba vas adamda lavaorong silok ap mo laaleng neni naba lox asuusu lebelemamao ren.

<sup>6</sup> Neni naba viila mumu loklok at larabung mixin axap, la naba lili bubua lenbantuxu at limixin ni ga sev amet pam di, la na sak tup mi limixin amgomgo at lavatbung menemen axap.

<sup>7</sup> Loorong naba in dan to at ladan sen saporap langas ti lox alolos amu i. Kuren la neni naba sak tup mi limixin munepen axap teren.

## 111

### *Leemi Asu Ri Leeme Silok*

<sup>1</sup> Leeme asu ri Leeme Silok.

Anaba tong avukat ti Leeme Silok mi labalak axap kantubu at lovtopot buru at limixin manmanton teren.

<sup>2</sup> Leven gugu at Leeme Silok i nunuan aleng, la limixin axap di lok momo min, dim doma solo i.

<sup>3</sup> La lempanga neni i lox i, i lox aurut laasen kaala ren la i lox asuusu lolos silok teren. La loklok manmanton teren naba nemen lexen.

<sup>4</sup> Neni ira lok pam nedik kusu atabam doma amisik mo lempanga nunuan neni ik lox i. Leeme Silok neni ik lox anare ka limixin la i umsu mi lebelen tuntun tidi.

<sup>5</sup> Neni mun im taba leveluxa, tinedi dim taba asinorong i. La neni im doma amisik lekabus neni ga lok pam i eburu mi limixin teren.

<sup>6</sup> Neni ira vaxase vam limixin teren mi lolos at leven gugu ren keretna. Ni ga raba nedi limixin teren mi levennep kangka at levenabung mixin petpes.

<sup>7</sup> Leven gugu axap at lukngen i nunuan la ik mokso. La kopmen taxaxarang keneng at Laulis Linga ren.

<sup>8</sup> Laulis Linga naba nemen lexen, mila mo levelinga ga laa boro at Leeme Silok la i ruturun la in mantontino.

<sup>9</sup> Neni xusuk mun Laradi Loklox Asepmus ti limixin teren, la ga vaxaxis aulis mo lekabus teren kusu naba nemen amisik. La laasen mun teren i melemelengan la i silok aleng.

<sup>10</sup> Loklox asinorong ti Leeme Silok, neni lurutu kaxat ti levendomdoma nunuan. La im taba lodoxoma mokmokso rinedi ding tonga res at levempapaase ali ren.

Leemi asu rin naba nemen amisik la kopmen tekavaxap teren.

## 112

### *Lomomo At Laradi Nunuan*

<sup>1</sup> Leemi asu ri Leeme Silok.

Luvukat ti mo laradi im taba asinorong Leeme Silok, la i lok momo aleng ting tonga res at levempapaase ali at ne Moroa.

<sup>2</sup> Laxamdak mi laxaalik teren dinaba ruuna levenasen silok go at lenep kangka ramtaba la Leeme Silok naba lox anarong livipisik li ren.

<sup>3</sup> Nedi loxoetemen dinaba ngasang kobot at laxampanga solo la dinap novos aleng. La at levenaleng axap i tu melamgo di noxok pakes bok ba ti tempanga.

<sup>4</sup> Do lamain na vot, laxasep mo ik lok ti laradi manmanton. La ik lox asuusu lebelen tuntun, loklox anare, la loklok ik mokso rin.

<sup>5</sup> Luvukat nabat pot ti mo lara im taba gamasa, la ik lok mo lugugu pilas teren mi lomokmokso.

<sup>6</sup> Lugugu ap mo laradi avukat noxo subu, la limixin bok di noxo domampe i.

<sup>7</sup> Neni noxo marat ba at tevelinga mumu tumumuat boro vetpes neni i ronga i, mila lununu ren i lolos la i nunu saga at Leeme Silok.

<sup>8</sup> Leveve ren ira xus pam, la neni kopmen na marat at tempanga. I nunu do ne Moroa naba sak tup mi limixin munepen min.

<sup>9</sup> Neni im taba leventamtaba solo mi lebelemulus ti limixin banbalo. La amisik ik lox asuusu labalamu

ren ti limixin. La naba ruuna laasen silok la limixin dina lok ngangao aleng teren.

<sup>10</sup> La limixin kapmek dinaba ven i la dina musak, la dinabak milik angtungun tin. Ketla levenasen silok atdi ba si aleng tino la mo leven-doxoma agagas atdi kopmen noxo soorun tinotno.

## 113

### *Leemi Asu Ri Lununuan At Leeme Silok*

<sup>1</sup> Leemi asu ri Leeme Silok.

Nemi luvuttadi gugu at Leeme Silok, mina emi asu mi laasen teren.

<sup>2</sup> I lox avukat do limixin dina emi asu mi laasen teren mo, la at levenaleng axap i tu melango.

<sup>3</sup> Limixin axap boro at lavanuet mera manman at na lavatbung menemen, mina emi asu mi Leeme Silok.

<sup>4</sup> Leeme Silok mun im gomgonga larabung mixin axap, la lisisixam teren i lox avukat aleng ti lempanga rovana at lamavangkap.

<sup>5</sup> Kopmen tara i lok ngan Leeme Silok ne Moroa atdik, neni mo it kis tovana at loxonin orong teren pana.

<sup>6</sup> La mo ik milik si ukopok ti reven lamavangkap mi lavatkangka.

<sup>7</sup> Neni ik lox axatu nedi luvuttadi banbalo basinge laxakup la iram tebeng luvuttadi pakpakes basinge laxakup at lempat balangkao.

<sup>8</sup> La irak lox asilok nedi kusu dina etangas eburu mi lavanarong at loorong, nedi di silok kantubu at limixin teren.

<sup>9</sup> Neni ik lox amenemen lodoxoma at lavakin kopmen dina pisik, la im taba nedi mi laxamdak mi laxaalik.

Leemi asu ri Leeme Silok.

## 114

### *Loxompixan At Lovovolo Pe*

<sup>1</sup> At laaleng limixin me Israel, nedi livipisik li at ne Jakop, diga vas kaxat boro Isip. Diga on basinge lara lubang mixin at lavapaase vetpes.

<sup>2</sup> Nedi leme Juda diga ravasu ngan limixin kaala at ne Moroa, la nedi

leme Israel diga ravasu bok ngan limixin tinotno ren.

<sup>3</sup> At lavatpas atdi boro Isip, Loxontas Memele ga ven tangarang di la ga sonao, la ladan sen Joridan ga mes korop,

<sup>4</sup> la lempattaavut digat los ngan lempatme, la lengkong kaana digat los ngan lempatnat sipsip.

<sup>5</sup> Tila ba la nenu loxontas uga sonao, la tila ba la nenu ladan sen Joridan uga mes korop?

<sup>6</sup> La tila nemi bok lempattaavut migat los ngan laxanme, la nemi lengkong kaana migat los ngan lempatnat sipsip?

<sup>7</sup> Lavatkangka axap, una dede at lovtopot at Leeme Silok, atla ne Moroa at ne Jakop naba ru asaxaven.

<sup>8</sup> Ni ga lok das asu ladan sen boro xeneng at lavaruat, la lengkodan ga puuvut das su at lempat buang uat.

## 115

### *Legesa Moroa Ruturun Mene*

<sup>1</sup> O Leeme Silok, ik mokso do limixin dina xip aurut laasen taram, la ixok mokso do dina xip aurut levenasen atnama. Ketla nenu xusuk mun u epovo ri lok ka leemi asu, mumu labalamu lexen taram la uk lox epovo amisik levelinga ram.

<sup>2</sup> Tila ba la larabung mixin di sue nedik do, "Ua nga no ne Moroa atnimi?"

<sup>3</sup> Moroa atdik ik lok toxun pana at laxalibet, la neni ik lok lempanga salai neni i momo min.

<sup>4</sup> Levenmoroa atdi di lox i mi lisiliva la gol, la di lok mun i mi levengkikngen di.

<sup>5</sup> Levenngusno mo atdi, ketla dixo epovo na paase. Lengkatli mo atdi, ketla dixo epovo ti reven.

<sup>6</sup> Levenbaalung mo atdi, ketla dixo epovo nang tonga. Levenisna mo atdi, ketla dixo epovo nam sumak.

<sup>7</sup> Levengkikngen mo atdi, ketla dixo epovo na suma xisip. Lengkangkedek mo atdi, ketla dixo epovo nat pas. La dixo epovo na tong toxolina.



<sup>8</sup> Naba lox avukat do nedi di vop na lempat poovo moroa eburu bok minedi di nunu saga atdi, dinaba vee voovo vanga bok.

<sup>9</sup> Nemi limixin me Israel, mina nunu saga mun at Leeme Silok. Neni mun Laradi Loklok Tooro la Lenban bok atnemi.

<sup>10</sup> Nemi bok lavamaasa at ne Moroa, mina nunu saga at Leeme Silok. Neni mun Laradi Loklok Tooro la Lenban bok atnemi.

<sup>11</sup> La nemi axap mi lotu saparap Leeme Silok, mina nunu saga ren. Neni mun Laradi Loklok Tooro la Lenban bok atnemi.

<sup>12</sup> Leeme Silok im doma dik, la neni xa naba lox anarong dik. Neni naba lox anarong nedik limixin me Israel, la naba lox anarong bok nedi lavamaasa at ne Moroa.

<sup>13</sup> Neni naba lox anarong bok nedi dik lok ngangao ren, nedi limixin amgomgo la nedi bok limixin gamasa.

<sup>14</sup> A sing Leeme Silok do na raba nemi mi taxamdak mi taxaalik, tinemi eburu bok mi livipisik li atnemi.

<sup>15</sup> A sing Leeme Silok kusu na lox anarong nemi. Neni Laradi Runtudum Li at laxalibet mi lavatkangka.

<sup>16</sup> Laxalibet, neni at Leeme Silok kusuk mun, ketla neni ga raba lavatkangka ri limixin.

<sup>17</sup> Luvuttadi dira met pam, dixo epovo kusu dina emi asu mi Leeme Silok, koplala nedi dirat pas pam uto at lemenemen at labarongan.

<sup>18</sup> Ketla nedik limixin, move ata rooro, ata tong aorong ti Leeme Silok, monga la amisik, kopmen taxavaxap teren.

Leemi asu ri Leeme Silok.

## 116

### *Laradi Ne Moroa Ga Lox Asepsu I Basinge Lanmet*

<sup>1</sup> Labalak i tu aleng Leeme Silok, mila neni ing tonga ia, neni i rongares at lisingising tarak.

<sup>2</sup> Neni ing tonga ia at lorooro axap tarak.

<sup>3</sup> Loxoxo uu ga suxuna ia, la lainmarat at lamaaut ga suxa aumsu ia, la lodoxoma saasaa ga suxuna axap lorooro rak.

<sup>4</sup> Melemu aga ro ke at Leeme Silok, "O Leeme Silok, lox asepsu ia."

<sup>5</sup> Leeme Silok i umsu mi lebelen tuntun la luvukat. Moroa atdik neni Laradi Balamu.

<sup>6</sup> Leeme Silok ik lok see at limixin banbalo. At laaleng nenia aga ekip tangarang mi laniu, neni ga lox asepsu ia.

<sup>7</sup> Labalak, una nunu saga at Leeme Silok, mila Leeme Silok irak lok pam lempanga nunuan tia.

<sup>8</sup> La neni ga lox asepsu ia basinge lanmet, la ga lok kepe lainbulu rak, la ga lok tooro ia xusu nia anoxo sak saaban.

<sup>9</sup> Kuren la nia at pas eburu mi Leeme Silok at na lorooro nade xopok.

<sup>10</sup> Nia aga nunu saga at Leeme Silok kuren la aga vaase, keke i do aga lox abulubun mumu levenmu-muat ga lok do na sev amer ia.

<sup>11</sup> La keke i do aga marat aleng, la aga lok keretna, "Nia axo epovo kusu ana nunu saga at teta atla limixin axap di luvuttadi xaxarang."

<sup>12</sup> Anaba vorang amlong lununuan at Leeme Silok ik lox i ria xereva?

<sup>13</sup> Anaba raba Leeme Silok mi lisingintan dan vaen ngan laramtaba, kusu ti tong avukat tin mumu neni ga lox asepsu ia.

<sup>14</sup> Anaba lox epovo mo laxakaape rak ti Leeme Silok, to melango at lovtopot buru at limixin teren.

<sup>15</sup> Leeme Silok ik bulu aleng mo do tara at limixin axa ren i met.

<sup>16</sup> O Leeme Silok, nenia laradi guguram. Nenia anaba lok lugugu ram kerekngan ne naga ga lok lugugu ram. Ugara lox asepsu vam ia basinge lanmet.

<sup>17</sup> Anaba lok tetaba ti tong avukat tu la ana ro ke at laasen taram.

<sup>18</sup> Anaba lox epovo laxakaape rak tu ro melango at lovtopot buru at limixin axap taram.

<sup>19</sup> Anaba lox i na ro at lemelua saparap loogu xaala ram, keneng tinotno at lemenemen Jerusalem.

Leemi asu ri Leeme Silok.

## 117

### *Leemi Asu Ri Leeme Silok*

<sup>1</sup> Nemi axap limixin kopmen nemi me Juda, mina emi asu mi Leeme Silok. Limixin at lengkot axap, mina xip aurut laasen teren.

<sup>2</sup> Mila mo labalamu ren tidik i silok aleng, la luruturun teren tidik naba tu amisik la kopmen taxavaxap teren.

Leemi asu ri Leeme Silok.

## 118

### *Lisingising Ti Tong Avukat Ti Leeme Silok*

<sup>1</sup> Ata tong avukat ti Leeme Silok, mila neni mun i lox avukat la labalamu ren i tu lexen.

<sup>2</sup> Limixin me Israel, mina tong i do, labalamu ren i tu lexen.

<sup>3</sup> Nemi lavamaasa, livipisik li at ne Aron, mina tong box i do, labalamu ren i tu lexen.

<sup>4</sup> Nedi bok limixin di lotu saparap Leeme Silok, dina tong i do, labalamu ren i tu lexen.

<sup>5</sup> Keneng at levenaleng at levenmumuat, aga toro ke at Leeme Silok la ni ga ronga ia la ga lox asepsu ia basinge mo levenmumuat.

<sup>6</sup> Leeme Silok ik lok eburu minia, la nia xopmen anoxo marat at lempanga limixin kapmek diba lox i ria.

<sup>7</sup> Leeme Silok ik lok eburu minia. Neni mun Laradi Loklok Tooro rak. La nenia anaba ven Leeme Silok na sak tup mi limixin munepen minia.

<sup>8</sup> Naba lox avukat do nedik ata nunu saga at Leeme Silok, la nemen gat dik guta nunu saga at limixin.

<sup>9</sup> Naba lox avukat do ata doxoma saga at Leeme Silok, la nemen gat dik guta doxoma saga at lubang am-gomgo at limixin.

<sup>10</sup> Lavamunepen buaang diga tu kangkan ia, ketla aga sele utut kepe axap di mi lolos at Leeme Silok.

<sup>11</sup> Diga tu kangkan ia at lengkot axap, ketla aga sele utut kepe axap di mi lolos at Leeme Silok.

<sup>12</sup> Diga tu kangkan mu ia ngan laxampo masum, ketla soso mun diga met axap ngan ta laxao i anan levempivilis mang. Ara sele utut kepe axap di mi lolos at Leeme Silok.

<sup>13</sup> Diga esep tangarang minia la ga auret do dina sev amer ia, ketla Leeme Silok ga lok tooro ia.

<sup>14</sup> Leeme Silok ik lox alolos ia la neni ga lox asepsu ia basinge di.

<sup>15</sup> Limixin mo dip kup mi lomomo keneng at laraogu kadis at limixin manmanton, mila dira sak tup pam mi limixin munepen midi. La lolos mun at Leeme Silok ga lox i na lempanga. <sup>16</sup> Lolos at Leeme Silok ga lok tooro dik kusu ti sak tup mi limixin munepen midik. Lolos teren ga lok tooro dik keneng at leesepe.

<sup>17</sup> Nenia anoxo met, ketla anaba rooro, la anaba paase asu lempanga Leeme Silok ga lok pam i.

<sup>18</sup> Leeme Silok ira sep aleeng kapmek tinotno vam ia, ketla neni ixo ke pepe ba ia xusu ana met.

<sup>19</sup> Mina suang lempatban at loogu laplavang, kusu aba beles la ana tong avukat ti Leeme Silok.

<sup>20</sup> Anai ni lumusmaragu at Leeme Silok. Limixin manmanton kujuk mun di epovo kusu dina beles teren.

<sup>21</sup> Leeme Silok, nia a emi asu minu, mila uga ronga lisingising tarak. La uga lok tooro ia xusu ana sak tup mi limixin munepen minia.

<sup>22</sup> Mo luuat limixin kipkip gu diga sok tixirixes kepe i, ga ravasu ngan Luuat Kis la lugugu ren i silok aleng.

<sup>23</sup> Leeme Silok axa ga lox i na, la i lox avukat aleng at levereven atdik.

<sup>24</sup> Na xa laaleng ni laaleng ti lok katling loklok tooro at Leeme Silok. Ata sosoro la ata momo aleng min.

<sup>25</sup> Leeme Silok, una lox asepsu nama basinge limixin munepen minama. O Leeme Silok, una lok tooro nama xusu mana ngasang kobot at lempanga nunuan mak pakes tin.

<sup>26</sup> Luvukat ti na laradi it pas mi laasen at Leeme Silok. Manaba lox anarong nemi axap mira vubeles pam to xeneng at loogu laplavang at Leeme Silok.

<sup>27</sup> Leeme Silok, neni ne Moroa, la neni ira lox anarong pam dik. Ataba tu eburu mi lengkakan bisi at lentina dik at na laaleng momo la atap tii ben kangkan mo loxonin laplavang.

<sup>28</sup> Nenu mun ne Moroa rak, la a tong aorong tu. La a xip aurut laasen taram mumu lolos silok taram.

<sup>29</sup> Ata tong avukat ti ne Moroa, mila neni mun i lok nunuan. Mo labalamu ren naba nemen lexen.

## 119

### *Laulis Linga At Leeme Silok*

<sup>1</sup> Leveloklox anarong mo ik lok tinedi lorooro atdi kopmen tosoogong teren, la di rooro mumu asu Laulis Linga at Leeme Silok.

<sup>2</sup> Lomomo mo ik lok tinedi di mumu asu lempapaase matmatkun at Leeme Silok la ding tonga res teren mi lebelendi axap.

<sup>3</sup> Dixo lok tempanga i bilinga, ketla dit pas mu asu leveloklok at Leeme Silok.

<sup>4</sup> Leeme Silok, nenu ura li vam levempapaase auru ram, kusu nema manang tonga res mu nunuan tino i.

<sup>5</sup> Naba lox avukat aleng mo do nenia a ruturun tim tebeng atmatkun leventetere avolo ram.

<sup>6</sup> Do nia anam doma aklen amisik ti mo levempapaase ali ram, nia noxo ruuna ka lainmangan.

<sup>7</sup> Aba emi asu minu mi labalak i xasep, dola nenia anaklen avukat ka leventaangas mokmokso ram.

<sup>8</sup> Aba ronga res mu axap leventetere avolo ram, kuren la nemen uta rexes kepe ia.

### *Lorongtonga Res Mu Laulis Linga At Leeme Silok*

<sup>9</sup> Tamdak aau naba lok lorooro ren kereva xusu na nemen manmanton? Neni na rooro mu mun levelinga ram.

<sup>10</sup> Nia a lolos kusu ana gugu taba u mi labalak axap, la una lok tooro

ia xusu nia anoxo ronga xepe mo levempapaase ali ram.

<sup>11</sup> Ara xonom ka axap pam levelinga ram mi labalak, kusu nenia anoxo lok taxakapmek tu. <sup>12</sup> O Leeme Silok, leemi asu mun tu. Una anasa ia mi leventetere avolo ram.

<sup>13</sup> Nenia anaba paase asu amisik mo leventaangas nenu uga raba nema min.

<sup>14</sup> A momo ri mumu asu levempapaase matmatkun taram. Mo lomomo i volo lomomo at laradi i lok momo mumu langsung lapnovos teren.

<sup>15</sup> A viila mumu levempapaase auru ram la aram doma mumu avukat levenanasa ram.

<sup>16</sup> A momo aleng at leventetere avolo ram, kuren la anoxo doma aie xepe ba levelinga ram.

### *Lomomo Keneng At Laulis Linga At Leeme Silok*

<sup>17</sup> Una lok lununuan tia, laradi gugu ram, kusu nia aba rooro, la abang tonga res at levelinga ram.

<sup>18</sup> Una valas luxatli rak kusu aba ven kibis levenanasa nunuan keneng at Laulis Linga ram.

<sup>19</sup> A nemen ngan loose at na lavatangka, la nemen gat uta lipe levempapaase ali ram basinge ia.

<sup>20</sup> Lorooro axap tarak, mo i ngaongao mu leventaangas taram. A vara i xusu ana xasep avukat teren at levenaleng amisik.

<sup>21</sup> U paase sok luvuttadi loklox aru, la lasaxaek ik lok mavana atnedi dit pas taba rulu mo levempapaase ali ram.

<sup>22</sup> Una sep pinak di kusu di noxo paase aksaksa ria la dinoxo paase kapmek bok tia, mila nenia a mumu asu lempapaase matmatkun taram.

<sup>23</sup> Keke i do luvuttadi amgomgo dina xis buru, la dina puse ngas ti sev amer ia. Ketla nenia abam doma mumu amisik leventetere avolo ram.

<sup>24</sup> Lempapaase matmatkun taram i so misigisigis, ni mun ik lok tooro ia xusu ana ruuna ka lodoxoma avukat.

*Laradi Na Lolos Kusu  
Na Mumu Asu Laulis Linga At Leeme  
Silok*

<sup>25</sup> Nia mo ak midi rinotno ro xeng at laxakup la i auret kusu ana met. Una lox aroo ia kerekngan levelinga ram.

<sup>26</sup> Aga tong asu axap lorooro rak, la uga ronga ia. Una anasa ia mi leventetere avolo ram.

<sup>27</sup> Una lok tooro ia xusu ana xasep at levenanasa at levempapaase auru ram, kusu abam doma mumu mo leven gugu nunuan taram.

<sup>28</sup> Lorooro rak mo i umsu mi lainbulu, kuren la una lox alolos ia kerekngan levelinga ram.

<sup>29</sup> Una tupe ia xusu anoxo beles at leveloklok i lok kapmek. La una lox ase ia mi Laulis Linga ram atla u balamu ia.

<sup>30</sup> Ara soxolik ka vam langas ti mumu asu levelinga ruturun taram. Ara ronga avukat pam leventaangas linga ram.

<sup>31</sup> O Leeme Silok, am tebeng lolos lempapaase matmatkun taram. Nemen uta ke xepe ia la limixin dina lox amangan ia.

<sup>32</sup> A lolos aleng kusu ana mumu asu mo levempapaase ali ram, mila uba suxa amu manga ia mi lodoxoma avukat.

*Lisingising Ti Lok Ka Lodoxoma  
Avukat*

<sup>33</sup> O Leeme Silok, una lox ase ia kusu ana xasep at leventetere avolo ram, la anabang tonga res teren at levenaleng axap.

<sup>34</sup> Una soxomus asu Laulis Linga ram tia la abam tebeng atmatkun teren. La anang tonga res teren mi labalak axap.

<sup>35</sup> Una lam ia xusu ana mumu asu mo levempapaase ali ram, mila ik lox asuusu lomomo ria.

<sup>36</sup> Una lok labalak kusu ana mumu asu lempapaase matmatkun taram, la kopmen nia anoxo vara solo lapnovos silok mede xopok.

<sup>37</sup> Una lok luxatli rak kusu anoxo veneves at laxampanga gamasa

la una lox anunuan lorooro rak kerekngan levelinga ram.

<sup>38</sup> Una lox epovo laxakaape ram tia, laradi gugu ram, i ngan uk lox epovo i rinedi ding tonga res taram.

<sup>39</sup> Una ru pepe mo lempapaase aksaksa, ua ik lox amaran ia. Leventaangas taram i lox avukat.

<sup>40</sup> A vara rinotno i xusu ana mumu asu levempapaase auru ram. Una lox amaxat lorooro rak mila loklok taram in manton tino.

*Tanam Tebeng Atmatkun At  
Laulis Linga At Leeme Silok*

<sup>41</sup> Leeme Silok, una lox asuusu labalamu ram tia, la una lox asepsu ia kerekngan laxakaape ram tia,

<sup>42</sup> kuren la aba epovo na vaase porang levelinga ap mo luvuttadi di paase aksaksa ria, mila nia a nunu saga at levelinga ram.

<sup>43</sup> Nemen uta lok pes mo levelinga ruturun taram basinge ia, mila nia aga lok li lodomdoma voovo rak at leventaangas taram.

<sup>44</sup> Anabang tonga res amisik at Laulis Linga ram at levenaleng axap i tu melamgo.

<sup>45</sup> Anaba nemen asepmus basinge levenmumuat, mila nia a mumu asu levempapaase auru ram.

<sup>46</sup> Anaba paase asu levempapaase matmatkun taram ti lavaorong silok, la nia anoxo mangan.

<sup>47</sup> Levempapaase ali ram ik lox asuusu lomomo ria, la labalak i tu i.

<sup>48</sup> A lok ngangao aleng ap mo levempapaase ali ram la labalak i tu mun i, la abam doma mumu amisik mo leventetere avolo ram.

*Laradi I Nunu Ruturun At Laulis  
Linga At Leeme Silok*

<sup>49</sup> Leeme Silok, una doxoma mo laxakaape ram tia, laradi gugu ram, mila i lox alolos ia xusu ana nunu saga ram.

<sup>50</sup> Uga lox amenemen ia at laaleng aga nemen keneng at losongsongot, mila uga lox epovo laxakaape ram tia la uga lox asepsu ia.

<sup>51</sup> Limixin loklok keexee dik lok kalise amisix ia, ketla nia axo vas basinge ba Laulis Linga ram.

<sup>52</sup> O Leeme Silok, a doma mo lev-entaangas taram me gaxatnak, la im taba ia mi loklox amenemen.

<sup>53</sup> Dola nia a ven limixin kapmek di los polo Laulis Linga ram, lebele-mamao i suxuna lorooro rak.

<sup>54</sup> At lorooro rak at na lavatkangka, a vo lengkompixan mi leventetere avolo ram.

<sup>55</sup> Leeme Silok, am doma u at lengkanimin, la am doma mumu bok Laulis Linga ram.

<sup>56</sup> Lomomo it pot tarak mumu mun levempapaase auru ram, la nia ang tonga res mu i.

*Laradi I Raba Axap Lorooro Ren Ti Laulis Linga At Leeme Silok*

<sup>57</sup> O Leeme Silok, labalak i tu xusuk mun u. Nia a xaape do anabang tonga res mu amisik levelinga ram.

<sup>58</sup> A sing u mi labalak axap do una lox asuusu lebelen tuntun taram tia, ngan ugara xaape vam min.

<sup>59</sup> Ara ila mumu vam lorooro rak, la ara ba gili lorooro rak kusu ana mumu asu levempapaase matmatkun taram.

<sup>60</sup> Aba lok soso mun la anoxok lok sila kusu ti mumu asu mo levempa-paase ali ram.

<sup>61</sup> Keke i do limixin kapmek di-nam kobot ia mi laxalinga xaxarang, anoxo ke xepe ba Laulis Linga ram.

<sup>62</sup> At lengkanimin tubu a katu kaxat kusu ana tong avukat tu ri nom leventaangas mokmokso ram.

<sup>63</sup> Nenia lentangas atnedi axap limixin dik lok ngangao ram la atnedi axap bok di mumu asu levempa-paase auru ram.

<sup>64</sup> O Leeme Silok, lavatbung menea i umsu aleng mi labalamu lexen taram. Una anasa ia mi leventetere avolo ram.

*Laulis Linga At Leeme Silok I Nunuan Aleng*

<sup>65</sup> O Leeme Silok, urak lox anarong pam ia, laradi gugu ram, kerekngan levelinga ram.

<sup>66</sup> Una anasa ia mi levendoxoma nunuan la lakleklen, mila nia a nunu saga at levempapaase ali ram.

<sup>67</sup> Nia aga vas soogong, la uga sev asongor ia. Ketla ananga nia ang tonga res at levelinga ram.

<sup>68</sup> Nenu u umsu mi lununuan, la uk lox asuusu loklox anare ri limixin. Una anasa ia mi leventetere avolo ram.

<sup>69</sup> Limixin loklox aaru di paase xaxarang mumu ia, ketla mi labalak axap ang tonga res at levempapaase auru ram.

<sup>70</sup> Mo luvuttadi kopmen tevendox-oma nunuan atdi ti levelinga ram, ketla nia an tuuna ka lomomo boro at Laulis Linga ram.

<sup>71</sup> Mo levesongsongot uga raba ia min ga lok tooro ia, kuren la agaklen ka avukat leventetere avolo ram.

<sup>72</sup> Mo Laulis Linga nenu uga raba ia min, ni i lok nunuan aleng ti lempilas axap at na lavatbung menemen.

*Laulis Linga At Leeme Silok Ni In Manton*

<sup>73</sup> Uga rudum ia mi lukngam la uk lox alipe ia basinge laniu. Una raba ia mi levendoxoma nunuan kusu ti lox ase at levempapaase ali ram.

<sup>74</sup> Nedi dim taba asinorong u, dik lok momo do dina reven tarak. Mila nia a nunu saga at levelinga ram.

<sup>75</sup> O Leeme Silok, aklen i do lev-entaangas taram ik mokso aleng, la ugak lox aleeng ia mila nenu u rutu-run at laxakaape ram.

<sup>76</sup> Una lox asuusu mo labalamu lexen taram kusu na lox amenemen ia, kerekngan uga xaape vam min tia, laradi gugu ram.

<sup>77</sup> Una lox asuusu lebelen tuntun taram tia xusu lorooro rak naba neman avukat mila an tuuna ka lomomo boro at Laulis Linga ram.

<sup>78</sup> Naba lox avukat do una lox amangan nedi limixin loklox aaru, mila di lili laxalinga xaxarang mumu ia. Ketla nenia, anabam doma mumu levempapaase auru ram.

<sup>79</sup> Naba lox avukat do nedi dim taba asinorong u, dina vot pasa ia kusu dina etaba belen minia. Nedi

bok di xasep at lempapaase matmatkun taram.

<sup>80</sup> Naba lox avukat do labalak nang tonga res mu avukat leventetere avolo ram, kusu naba lox asepsu ia basinge lainmangan atdi mo dik lox asi ia.

*Lisingising Ti Lox Asu Lara At Loxokoxo*

<sup>81</sup> O Leeme Silok, lengkot axap tarak ira meleexot axap la a ngangais tu xusu una lox asepsu ia. Nia a nunu saga at levelinga ram.

<sup>82</sup> Luxatli rak ira molo nga ri reven pupuke ri leveng kakaape ram. La ara lok, "Lingisa ba uba lok tooro ia?"

<sup>83</sup> Nenia a lok ngan mun labantamon tem dadas. Ketla axo ke xepe ba leventetere avolo ram.

<sup>84</sup> Nenia laradi gugu ram, anaba ngais alika ba? Lingisa ba uba sev asongot nedi dik lox asongor ia?

<sup>85</sup> Limixin loklox aaru di ke xepe Laulis Linga ram, dira lok pam lenngitngit tia.

<sup>86</sup> Levempapaase ali ram i epovo rinotno xusu limixin dina nunu saga ren. Una lok tooro ia, mila limixin dik lox asongot gamasa mun ia la kopmen tavasun teren.

<sup>87</sup> Ga auret kusu dina sev amer ia. Ketla nia axo raba rulu ba levempapaase auru ram.

<sup>88</sup> Mumu labalamu lexen taram, una lok lempanga nunuan tia, kusu abang tonga res at levempapaase matmatkun taram.

*Laradi I Nunu At Laulis Linga At Leeme Silok*

<sup>89</sup> O Leeme silok, levelinga ram nabak lok at levenaleng axap i tu melamgo, la mo levelinga i tu tuxuruxun kerekngan laxalibet.

<sup>90</sup> Nenu unaba ruturen amisik ti limixin la kantubu bok at lavaola axap mo dibap tavasun melemu. Uga vaxaxis aulis na lavatkangka la mo it kis tuxuruxun kuren.

<sup>91</sup> Laulis Linga ram mo i nemen tuxuruxun se at na levenaleng, mila lempanga axap i lok ngan lavasaxaruki ram.

<sup>92</sup> Mo do Laulis Linga gixo lox amomo ia, nia ro gira met pam mumu laxasongsongot tarak.

<sup>93</sup> Anoxo ronga xepe levempapaase auru ram, mila mumu mun i na levelinga loklok tooro ram, nenu urak lok tatao lorooro rak basinge lanmet.

<sup>94</sup> Una lox asepsu ia mila nenia ataram. La nia ara lolos amisik kusu ana mumu asu levempapaase auru ram.

<sup>95</sup> Limixin kapmek mo di kuxut tangais ia xusu dina sev amer ia. Ketla nenia abam doma mumu levempapaase matmatkun taram.

<sup>96</sup> Araklen ba i do lempanga axap noxo nemen abao, ketla mo levempapaase ali ram kopmen taxavaxap teren.

*Lodoxoma At Laradi Ri Levelinga At Leeme Silok*

<sup>97</sup> Labalak i tu mun Laulis Linga ram, la am doma mumu amisix i at levenaleng kangking la kanimin.

<sup>98</sup> Mo levempapaase ali ram, ik lox amisik keneng at lodoxoma rak, la i lox ia, a xasep nunuan aleng polo nedi limixin munepen minia.

<sup>99</sup> Aklen aleng polo nedi axap luvuttadi loklox ase rak, mila am doma mumu amisik levempapaase matmatkun taram.

<sup>100</sup> Aklen aleng polo nedi loxongkulao mukun, mila ang tonga res at levempapaase auru ram.

<sup>101</sup> Aga lok tatao alabat lavatpas tarak basinge lempatpas ua ga xapmek, kusu aba ronga res mu levelinga ram.

<sup>102</sup> Axo ke xepe leventaangas taram, mila nenu axa uga anasa ia min.

<sup>103</sup> Levelinga ram i so misigisigis aleng, la i volo loso at ladan misiu.

<sup>104</sup> Lempapaase auru mun taram im taba ia mi levendoxoma nunuan. Kuren la nia a xopara aleng mo langas kapmek limixin dit pas teren.

*Laxasep Boro At Laulis Linga At Leeme Silok*

<sup>105</sup> Levelinga ram i lok ngan lababao rim lam ia, la i lok ngan bok laxasep ti langas tarak.

<sup>106</sup> Anaba lox epovo laxakaape lolos tarak do, anaba mumu asu amisik mo leventaangas mokmokso ram.

<sup>107</sup> Leeme Silok, levesongsongot tarak i silok aleng tinotno. Una lok tatao nunuan lorooro rak, kerekngan levelinga ram.

<sup>108</sup> O Leeme Silok, una mulus ka lisingising emi asu rak, la una anasa ia mi leventaangas taram.

<sup>109</sup> Laniu i tu saparap amisix ia xusu na lok korop kepe lorooro rak, ketla nia axo ke xepe gamasa ba Laulis Linga ram.

<sup>110</sup> Limixin kapmek di lili lara-pelixo ria, ketla nia axo ronga xepe lempapaase auru ram.

<sup>111</sup> Lempapaase matmatkun taram i lok ngan loxom pulus nunuan naba nemen amisik eburu minia, la i lox aumsu labalak mi lomomo.

<sup>112</sup> Nia a doma vam i do anabang tonga res at leventetere avolo ram, naba se at laaleng lorooro rak naba xap.

#### *Laradi Na Tu Tuxuruxun At Laulis Linga At Leeme Silok*

<sup>113</sup> A belengatngas tinedi dixo rururun tinotno ru. Ketla labalak i tu mun Laulis Linga ram.

<sup>114</sup> Nenu Lentupe la Lurutu See Pe rak, a nunu saga at levelinga ram.

<sup>115</sup> Nemi luvuttadi loklok kakapmek, uto nimi basinge ia, nenia anaba mumu asu levempapaase ali at ne Moroa rak.

<sup>116</sup> Nenu una lox alolos ia kerekngan laxakaape ram, kusu nenia abarooro. La nemen uta ke xepe ia ketla una lox asepsu ia kerekngan lavavara rak.

<sup>117</sup> Unam tebeng ia mi lukngam, kusu nia anoxo ekip tangarang mi lumumuat. La abam doma mumu amisik leventetere avolo ram.

<sup>118</sup> Uk sok tixirixes nedi luvuttadi di ronga xepe leventetere avolo ram. Mo levendoxoma xaxarang atdi naba xet polo.

<sup>119</sup> Nenu u ven limixin kapmek ngan laxanboobong, ketla labalak i tu lempapaase matmatkun taram.

<sup>120</sup> Nenia a dede aleng atla a marat taram, la a lingun aleng mumu leventaangas taram.

#### *Lorongtonga Res At Laulis Linga At Leeme Silok*

<sup>121</sup> Ara lok pam lempanga in manton la i nunuan, kuren la nemen uta ke avolo ia ri limixin munepen minia.

<sup>122</sup> Una xaape ria, laradi gugu ram do, unaba lok tooro ia, la nemen uta ke xepe luvuttadi loklox aaru dina lox abaava ia.

<sup>123</sup> Luxatli rak ira molo nga ri reven tangarang ti nom loklok tooro la kusu ti lox asepsu ia basinge di kerekngan ugara xaape vam min.

<sup>124</sup> Una reven tatao ia, laradi gugu ram, kusu naba epovo rinotno mi labalamu lexen taram, la una anasa ia mi leventetere avolo ram.

<sup>125</sup> Nenia laradi gugu ram. Una lox axasep lodoxoma rak, kusu abaxasep at lempapaase matmatkun taram.

<sup>126</sup> Leeme Silok, limixin dirat los polo amisik pam Laulis Linga ram. Kuren la levenaleng ira vot pam, kusu una lox asongot di.

<sup>127</sup> Labalak i tu aleng levempapaase ali ram i volo lavavara ri leven gol, la mo leven gol i nunuan aleng.

<sup>128</sup> Kuren la ara mumu asu lempapaase auru ram. La ak sok sisixe leveloklox axap i lok kapmek.

#### *Langaongao Kusu Ting Tonga Res At Laulis Linga*

<sup>129</sup> Lempapaase matmatkun taram i lok nunuan aleng, kuren la nia arang tonga res mu i mi labalak axap.

<sup>130</sup> Losoksoxomus at levelinga ram im taba ia mi laxasep, la im taba bok lakleklen avukat tinedi kopmen takleklen atdi.

<sup>131</sup> La nia a belengaongao rinotno ri levempapaase ali ram.

<sup>132</sup> Una repukus mu ia la una lox asuusu lebelen tuntun tia, kerekngan pam uk lox i rinedi axap di vavara aleng u.

<sup>133</sup> Unam lam aratao ia at lavat-pas tarak, kerekngan levelinga ram. Nemen uta ke xepe laxakapmek nak sak tup minia.

<sup>134</sup> Una rebeng asu ia basinge levenmumuat at luvuttadi xapmek dim taba ia min, kusu nenia anabang tonga res at levempapaase auru ram.

<sup>135</sup> Unak lox amisik eburu minia ngan loklox anarong tia, la una anasa ia mi leventetere avolo ram.

<sup>136</sup> Lengkabili dan ing pengkos su aleng at lamarak, mila limixin dixong tonga res at Laulis Linga ram.

#### *Laulis Linga At Leeme Silok Ik Mokso*

<sup>137</sup> Leeme Silok, loklok taram in manton tino, la leventaangas bok taram ik mokso.

<sup>138</sup> La mo lempapaase matmatkun uga li i, ik mokso la i epovo rinotno do nema manat mas saga ren.

<sup>139</sup> Mo lebelemamao keneng tarak i lok ngan laxao, mila limixin munepen minia dik lox abulubun levelinga ram.

<sup>140</sup> Mo leveng kakaape ram agara lok tong pen pam i, kuren la nenia a vara aleng i.

<sup>141</sup> Nenia mun laradi gamasa la limixin di lele abulubun ia, ketla axo ke xepe ba levempapaase auru ram.

<sup>142</sup> At levenaleng axap i tu melamgo loklok taram naba nemen manmanton tino, la Laulis Linga ram i ruturun amisik.

<sup>143</sup> Levenmumuat mi lodoxoma saasaa mo ira ebosa mavana rak, ketla levempapaase ali ram ik lox amomo ia.

<sup>144</sup> Mo lempapaase matmatkun taram ik mokso aleng tino. Una raba ia mi lodoxoma avukat kusu nia aba rooro.

#### *Lisingising Ti Loklox Asepsu Basinge Laniu*

<sup>145</sup> O Leeme Silok, nia a ro ke ram mi labalak axap. Una ronga res tarak

la anabang tonga res at leventetere avolo ram.

<sup>146</sup> A ro ke ram kusu una lox asepsu ia basinge laniu. La nia anabam tebeng avarang at lempapaase matmatkun taram.

<sup>147</sup> A aus kaxat no mene maxantamak suubu la ang teng tu xusu una lok tooro ia. Atla a nunu saga at levelinga ram.

<sup>148</sup> A tuuang aan amisik at lengkanimin, kusu ana i doxoma mu leveng kakaape ram.

<sup>149</sup> O Leeme Silok, labalamu ram i nemen lexen. Kuren la una ronga ia. Una lox asuusu lebelen tuntun taram la una lok tatao lorooro rak kerekngan levelinga ram.

<sup>150</sup> Nedi mo dik lox asongot kapmex ia monga dit pas aurer ia, la dik lok paxalom tinotno basinge Laulis Linga ram.

<sup>151</sup> Ketla nenu Leeme Silok uk lok auret mun ia, la nom axap levempapaase ali ram i ruturun amisik.

<sup>152</sup> Ga ruka xa i gano, aga lox ase boro at lempapaase matmatkun taram, ua nenu uga vaxaxis i la naba nemen lexen.

#### *Lorotoro Ri Loklok Tooro*

<sup>153</sup> Una ven mumu laxasongsongot tarak la una lox asepsu ia basinge i, mila xovisi toxonaleng go nia ara ke xepe vam Laulis Linga ram.

<sup>154</sup> Una ru at lenep tarak la una lox asepmus ia. Una lok tatao lorooro rak kerekngan leveng kakaape ram.

<sup>155</sup> Nenu u noxo lox asepsu limixin kapmek, mila dixo mumu asu leventetere avolo ram.

<sup>156</sup> Leeme Silok, labalamu ram i silok aleng. Una lok tatao lorooro rak kerekngan leventaangas taram.

<sup>157</sup> Buaang nedi limixin munepen dik lox asongor ia, ketla nia axo raba rulu ba lempapaase matmatkun taram.

<sup>158</sup> A ven tinedi limixin tongtonga viribang, la a bele mumuat mila dixo mumu asu levelinga ram.

<sup>159</sup> Leeme Silok. Pen ba ia, a vara aleng levempapaase auru ram.



Una lok tatao lorooro rak mila nenu Laradi Balamu.

<sup>160</sup> Levelinga axap taram i ruturun la nom axap leventaangas taram ik mokso la naba nemen amisik la kopmen tekavaxap teren.

### *Lavavara Ri Mu Asu Laulis Linga*

<sup>161</sup> Limixin silok dik lox asongot parang ia, la kopmen tavasuun teren. Ketla leveve rak it kat tava mu levelinga ram.

<sup>162</sup> Levengkakaape ram ik lox amomo ia, kerekngan laradi i ruuna laplus i silok aleng.

<sup>163</sup> A xopara rino laxaxarang axap la labalak i xapmek tin, ketla labalak i tu aleng Laulis Linga ram.

<sup>164</sup> Keneng at leges aleng, a tong avukat tu i vanuti mumu leventaangas taram ik mokso.

<sup>165</sup> Nedi di vavara aleng Laulis Linga ram, dinaba ruuna ka limila silok keneng at lorooro atdi la kopmen ba tavanga naba lox angtang nedi kusu dinak sak saaban.

<sup>166</sup> Leeme Silok, a ngangais ti loklok tooro ram, la a mumu asu levempapaase ali ram.

<sup>167</sup> Ang tonga res at lempapaase matmatkun taram, mila a vara aleng tinotno i.

<sup>168</sup> Ang tonga res at levempapaase auru ram la nom lempapaase matmatkun bok taram, atla ukleklen axap leveloklok tarak.

### *Lisingising Ti Loklok Tooro*

<sup>169</sup> Leeme Silok, una ronga lanteng tarak saparav u ri loklok tooro. Una lox asuusu lodoxoma aklen taram tia kerekngan laxakaape ram.

<sup>170</sup> Una ronga res at lisingising tarak, la una lox asepsu ia kerekngan laxakaape ram.

<sup>171</sup> Ana emi asu amisik minu, mila nenu u anasa ia mi leventetere avolo ram.

<sup>172</sup> Anabak pixan mumu levelinga ram, mila levempapaase ali ram ik mokso.

<sup>173</sup> Una gagas amisik ti lok tooro ia, mila nia a mumu asu levempapaase auru ram.

<sup>174</sup> O Leeme Silok, labalak ing teng aleng ti loklok tooro ram. La Laulis Linga ram ik lox amomo ia.

<sup>175</sup> Una lok tatao lorooro rak kusu aba emi asu minu. La una ke mo leventaangas taram na su auru ia.

<sup>176</sup> Ara vas soronga nga ngan lisipsip i soronga. Una puse ria, laradi gugu ram, mila nia axok lox aie xepe levempapaase ali ram.

## 120

### *Lisingising Ti Loklok Tooro*

<sup>1</sup> Nia aga ngising ti Leeme Silok keneng at levenmumuat tarak, la neni ga sep siam at lisingising tarak.

<sup>2</sup> Leeme Silok, una lox asepsu ia basinge luvuttadi xaxarang la sosolo arup.

<sup>3</sup> Nemi limixin kaxarang, lavanga salai mo ne Moroa naba lox i rinimi? La neni naba lox asongot nemi xereva?

<sup>4</sup> Neni naba lox asongot nemi mi levesoso ing sengsen at luvuttadi esep la mi laxangkali kao iplivi aleng.

<sup>5</sup> Axot kis avukat kantubu atnemi limixin kapmek. Nemi mi lok ngan limixin tongtonga viribang di nemen to Mesek la to Kedar.

<sup>6</sup> A molo tik lok eburu minedi limixin ua dixo sisiam ka limila.

<sup>7</sup> La do a paase rinedi mi limila, di vavara na vesep mun.

## 121

### *Leeme Silok Neni Lurutu See Pe Atdik*

<sup>1</sup> A milik aurut at lengkong kaana, la a lok keretna, "Loklok tooro ria naba laa meava?"

<sup>2</sup> Loklok tooro naba susu xusuk boro at Leeme Silok, neni ga rudum li laxalibet mi lavatkangka.

<sup>3</sup> Neni noxo ke xepe ba u la una subu. Atla neni mo Lurutu See Pe ram kopmen na vunga.

<sup>4</sup> Mo Lurutu See Pe at leme Israel neni xopmen na vunga xis koplana vunga met.

<sup>5</sup> Leeme Silok naba reven tatao u. Neni naba nemen saparav u kusu nak lok see ram.

<sup>6</sup> Laxangking noxo sev asongot ba u at levenaleng kangking la lagaaling noxo sev asongor u at lengkanimin.

<sup>7</sup> Leeme Silok axa nabak lox asepsu amisix u basinge levenaniu, la ni naba kubak pe u.

<sup>8</sup> Ni nabak lok see ram at levempat-pas taram at nai levenaleng la ap mo bok levenaleng axap i tu melamgo.

## 122

### *Leemi Asu Ri Lemenemen Silok Jerusalem*

<sup>1</sup> Aga momo aleng atla diga lok tia, "Uto dik at loogu at Leeme Silok."

<sup>2</sup> La ananga nedik tara vubeles pam at langas povolo la tara tu nga ro xeneng at lemenemen silok Jerusalem.

<sup>3</sup> Diga vaxaru li amu na lemene-men ngan lemenemen silok la diga penbixa avukat tinotno i.

<sup>4</sup> La nedi larabibinat me Israel dit pas pot de. Nedi dit pas kusu dina tong avukat ti Leeme Silok, kerekngan mo levempapaase ali Leeme Silok ga raba di min.

<sup>5</sup> Nade lavaorong boro Israel digat kis at lengkonin orong atdi xusu di-nang tonga linga at limixin.

<sup>6</sup> Nemi mina sing kusu limila nak lok to lemenemen Jerusalem keretna, "Nedi di vavara aleng na lemenemen, dina ngasang kobot.

<sup>7</sup> I epovo bok do limila nak lok keneng at na lemenemen la Leeme Silok na lok tatao avukat limixin keneng at laraogu silok atdi."

<sup>8</sup> Nia a lok lisingising mumu lemenemen Jerusalem keretna, "Limila nak lok keneng teren." Ak lox i xerepmo kusu lentaba rak la larapentangas tarak dinaban tuuna lorooro nunuan.

<sup>9</sup> Nia a sing bok Leeme Silok kusu nemi limixin mego mina sang kobot avukat atla loogu at Leeme Silok ne Moroa atdik ik lok go.

## 123

### *Lisingising Ti Labalamu*

<sup>1</sup> O Leeme Silok, a milik aurut tu, toxun pana at laxalibet at loxot nenu ut kis teren la um gomgonga limixin nade xopok.

<sup>2</sup> O Leeme Silok, nenu ne Moroa atnama. Lavasaxaruki di nunu saga at lubang amgomgo atdi, la lavasaxaruki rixin di nunu saga at lavakin amgomgo atdi. La kerepmo bok nema manaba nunu saga amisik taram, se at loxonaleng una lox asu-usu lebelen tuntun taram tinama.

<sup>3</sup> O Leeme Silok, una lox asuusu lebelen tuntun tinama. Una lox asuusu lebelen tuntun tinama, mila mara baava nga na mi laxanmumuat dik lok li i mavana atnama.

<sup>4</sup> Mara baava nga na mumu laxalinga sese limixin loklox aaru dik lox i rinama. La limixin apnovos bok di lele abulubun nama.

## 124

### *Moraa Neni Lurutu See Pe At Limixin Teren*

<sup>1</sup> Mo do Leeme Silok gixo tu at lenep atdik, nedik limixin axap me Israel giba ekip tangarang mi lempanga salai?

<sup>2</sup> Mo do Leeme Silok gixo tu at lenep atdik, limixin munepen midik giba esep tangarang midik.

<sup>3</sup> La lebelemamao atdi giba lok kapmek aleng tidik, la nedi giba linge bintoo nedik

<sup>4</sup> la di lok ngan ladanut giba vula pe nedik, la na vaxat ka nedik uto vetpes,

<sup>5</sup> la nedi di lok bok ngan laraan silok gibak mir axong nedik.

<sup>6</sup> Ata tong avukat ti Leeme Silok atla goxo ke kepe limixin munepen midik kusu dina sele utut dik.

<sup>7</sup> Nedik tara sixiro vam kerekngan lapka i sixiro basinge lelixo, nai lelixo ira rexerop pam, la nedik na tara sepmus ta.

<sup>8</sup> Loklok tooro atdik ip tavasu boro at Leeme Silok, neni ga rudum li laxalibet mi lavatbung menemen.

## 125

### *Lixitkis Nunuan Ti Limixin At Ne Moroa*

<sup>1</sup> Nedi di nunu saga at Leeme Silok, di lok ngan Lakaana Saion ua ixo epovo do tara nakma asubu i, ketla naba tu atmatkun lexen tino.

<sup>2</sup> Larakaana dit kis kangkan lemenemen Jerusalem, la kerepmo bok Leeme Silok nabang kan pe axap limixin teren monga la at levenaleng axap i tu melamgo.

<sup>3</sup> Limixin kapmek di noxom gomgonga amisik lenep kangka atnedik limixin manmanton teren. Mo do dina lox i xuren, limixin manmanton bok giba vubeles at laxakapmek.

<sup>4</sup> Leeme Silok, una lok lununuan tinedi dik lok nunuan, la tinedi bok ding tonga res at levempapaase aliram.

<sup>5</sup> Ketla una lox asongot nedi dit pas at leventaangas i xakauk, la una lox asongot nedi bok di sok tixirixes kepe leventaangas taram.

Limila nak lok to Israel.

## 126

### *Lisingising Ti Leeme Silok Ti Sang Kobot*

<sup>1</sup> Gase Leeme Silok ga lam asu amlong nema limixin kokoxo uto Saion, maga nunua i do magam tobo mun.

<sup>2</sup> Kuren la magang longon aleng mi lekkek, la magak pixan momo aleng. La levenabung mixin petpes diga lok keretna, "Leeme Silok ga lox anarong solo vam nedi."

<sup>3</sup> I raturun do Leeme Silok ga lok lempanga silok tinama, kuren la maga umsu mi lomomo.

<sup>4</sup> Leeme Silok, una lox asang kobot amu manga nama kerekngan larakabu ik lox aumsu amu laradan to at lamatbin Negev.

<sup>5</sup> Ma vara i xusu mana lok ngan mun nedi digat pas titlotlo la digang teng. Ketla uga lok tooro di kusu dinak lok momo at levenaleng dina sepkin.

<sup>6</sup> Nedi digat pas la digap kip levenit piao titlotlo i la digang teng.

Melemu diga laa boro at leventaa-mang la digak pixan momo mi lempanga anan atnedi.

## 127

### *Leemi Asu Ri Leeme Silok Mumu Lununuan Teren*

<sup>1</sup> Mo do Leeme Silok noxo vaxaru loogu, limixin kipkip gu di noxo lox adak toxot. La do Leeme Silok noxo lok see bok at temenemen silok, luvuttadi pereven tatao di noxo lox adak toxot.

<sup>2</sup> Kopmen tavasuun teren kusu limixin dina gugu lolos to at leventaamang atdi at laxanaleng axap, tuka i at lenmaxantamak suubu la naba se ukantinao bungbung main, mila Leeme Silok nabam taba nedi mo neni i balamu di. La i gagas li i at lengkanimin, keke i do nedi mo di unga.

<sup>3</sup> Laxamdak temes di lok ngan leventamtaba boro at Leeme Silok. Laxamdak mi laxaalik di lok ngan loklox anarong ti limixin.

<sup>4</sup> Laxamdak temes at latlok maxat, di lok ngan levesoso ro at lekngen laasesep.

<sup>5</sup> Luvukat ti mo laradi i visik buaang atdi. Limixin munepen min di noxo vas asi ba mo laradi mo do neni na ekip tangarang midi ro at loxot tongtonga linga.

## 128

### *Leveloklok Anarong Boro At Leeme Silok*

<sup>1</sup> Lomomo mo ik lok tinedi ding tonga res at Leeme Silok, la lavatpas atdi i mumu asu leventaangas teren.

<sup>2</sup> Do nemi bok mina ronga res teren, mo lugugu atnimi naba lox asuusu lempanga ri lox epovo lavakpakes atnimi, la minabak lok momo la minaba ngasang kobot at lempanga axap.

<sup>3</sup> La lavakin atnimi dinaba lok ngan loos vaen to xolonu ua i pisik aleng. Laxamdak mi laxaalik atnimi dinaba rooro avukat ngan larauna olip maxat to xeneng at levenang kolonu atnimi.

<sup>4</sup> Do laradi nang tonga res at Leeme Silok, neni naba lok kaka rururun leveloklox anarong kerepmo.

<sup>5</sup> Naba lox avukat do Leeme Silok boro Saion, naba lox anarong nimi. Naba lox avukat bok do at levenaleng axap at lorooro atnimi minaba ven lemenemen Jerusalem na vosok.

<sup>6</sup> La naba lox avukat bok do mi noxo met se minaba ven luvut-tubuno nimi.

Limila nak lok to Israel.

## 129

*Lisingising Ti Lok Pe  
Lavamunepen*

*Mi Limixin Me Israel*

<sup>1</sup> Limixin me Israel, mina tong asu mo levenngas ua limixin munepen minemi diga lox asongot nemi min, ga ruka i at lurutu kaxat at lubang mixin atnedik.

<sup>2</sup> Ap mo levenmaares limixin munepen minema digak lox asongot kapmek tinotno nema, ketla di goxo epovo ri vas asi nema.

<sup>3</sup> Ga lok ngan ta do diga tara lempat nin kooxing at leven antuno atnema, la gak milik ngan ta laxangka ding kin li i ritlotlo vanga anan.

<sup>4</sup> Ketla Leeme Silok, ni Laradi Manmanton, gara lox asepmus pam nema basinge lasaksaxango at limixin munepen.

<sup>5</sup> A vara Leeme Silok do, neni naba sep aoo nedi limixin ua di belengatngas ti limixin me Saion.

<sup>6</sup> A vara i do dinaba lok ngan levempivilis i suu xat ro vana at lavatlagu, ua naba mang soso mun.

<sup>7</sup> La teta noxo dik kaka tempanga ren kopla nap kos eburu i la na xip kaka i uto at loogu ren.

<sup>8</sup> La do tentaba na ekip tangarang midi ro at langa nedi noxo tong i ridi do, "Ma sing Leeme Silok kusu na lox anarong nimi. Ma lox anarong nimi mi laasen at Leeme Silok."

## 130

*Lisingising Ti Doxoma Xepe  
Laxapmek*

<sup>1</sup> I lok ngan ta do nenia at kis keneng tubu at lamain bonot, atla lodoxoma abulubun i suxuna ia, la a ro ke ram, Leeme Silok.

<sup>2</sup> O Leeme Silok, una ronga lanteng tarak. Una ronga res at lorotoro rak la una lox asuusu lebelen tuntun taram tia.

<sup>3</sup> Nege giba sixiro at loklox asongot taram mo do nenu gitak lok katling leveloklok kakapmek atnema? Kopmen tinotno tara giba sixiro.

<sup>4</sup> Ketla u doxoma xepe laxapmek atnema limixin taram, kuren la ma pavanga u mi loklok ngangao.

<sup>5</sup> Nia a xulubi aleng ti loklok tooro at Leeme Silok, la a nunu saga at levelinga ren.

<sup>6</sup> A xulubi aleng ti loklok tooro at Leeme Silok, la axo lok ngan luvuttadi xukuxut di xulubi ri labara kooxot. Lavavara rak ti xulubi ri Leeme Silok i volo mo lavavara at luvuttadi xukuxut di ngangais ti labara kooxot.

<sup>7</sup> Leme Israel, mina nunu saga at Leeme Silok atla, labalamu ren naba nemen lexen, la neni i vavara amisix i xusu nak lox asepsu limixin basinge leveloklok kakapmek.

<sup>8</sup> Neni naba lox asepsu limixin teren me Israel basinge leveloklok kakapmek atnedi.

## 131

*Lisingising At Laradi Nunu Ik Lok  
Atnaasan*

<sup>1</sup> Leeme Silok, nenia xopmen laradi loklox aaso, la nia xopmen na vavanga xa ia. Axo doma mumu bok ba mo leveloklok ua i silok aleng tia. La nia xopmen na xasep avukat teren.

<sup>2</sup> Ketla at kis atnaasan mi limila xeneng tarak. Ak lok ngan laxadede ik midi pilo ro at lukngen nenen, la no xeneng at labalak i xis saga.

<sup>3</sup> Leme Israel, mina nunu saga at Leeme Silok, monga la amisik, kopmen tekavaxap teren!

## 132

*Leemi Asu Ri Loogu Laplavang*

<sup>1</sup> Leeme Silok, nemen uta do-  
mampe ne Devit mumu mo leven-  
mumuat neni ga vekini min.

<sup>2</sup> Leeme Silok, una doxoma aklen  
ti mo laxakaape ren gara lok pam i  
ru. Nenu Lanaraavuk ne Moroa at  
ne Jakop. Devit ga lok keretna,

<sup>3</sup> “Nia anoxo onon uto xolonu xo-  
pla ana midi ro at loora rak.

<sup>4</sup> Anoxo lok mamana xopla ana  
unga,

<sup>5</sup> naba se rinotno at loxonaleng  
anaba lok katling tenep kangka ri  
Leeme Silok ngan ta lang kolonu ri  
lok loogu ri Lanaraavuk ne Moroa at  
ne Jakop.”

<sup>6</sup> Nema maga ronga levelinga ro  
Betilem mumu lobokis at lekabus la  
maga long lenget kaka i ro at laraa-  
mang gak lok saparap lemenemen  
Jaar.

<sup>7</sup> La maga lok keretna, “Atat pas  
uto loogu at Leeme Silok, la ata lotu  
saparav i ro melango at loxonin  
orong teren.”

<sup>8</sup> Leeme Silok, una beles eburu  
mi lobokis at lekabus uto xeneng at  
loogu laplavang, neni lampoovo at  
lolos taram.

<sup>9</sup> A vara i do lavamaasa ram dina  
siga loklok in mantan. La a vara  
i do limixin taram dinap kup mi  
lomomo!

<sup>10</sup> Uga lok laxakaape ri lasaxaruki  
ram ne Devit. Kuren la Leeme Silok,  
uguta sok sisixe loorong soksoxolik  
taram.

<sup>11</sup> Uga lok laxakaape lolos ti ne  
Devit la ni laxakaape ua u noxo lok  
ka amlong i, la i lok keretna, “Ne-  
nia anaba soxolik tara tamdak taram  
kusu naba ravasu ngan loorong, la  
naba rukun u rim gomgonga limixin  
tarak.

<sup>12</sup> La mo do luvutnurum dina ru-  
turun ti lekabus tarak, la ti levelinga  
nia anam taba di min, luvutnitna di  
bok dinaba tu kun u ngan lavaorong  
ap mo bok leven maares melemu.”

<sup>13</sup> Leeme Silok ira soxolik ka vam  
lemenemen Saion. La i vara i xusu  
na lox i ngan langkolonu aulis teren,  
i lok keretna,

<sup>14</sup> “Nia anaba nemen amisik ba ia  
de. La nia a vara i xusu anabat kis  
ngan Loorong Silok de at na loxot.

<sup>15</sup> Anaba lox apnovos lemenemen  
Saion mi mo lempanga neni ik pakes  
tin. La anaba lox epovo lavakpakes  
at luvuttadi banbalo mego mi lem-  
panga anan tidi.

<sup>16</sup> Anaba lox anarong lavamaasa  
mego keneng at leven gugu axap  
nedi dinak lox i. La limixin dik  
lok keneng teren, dinabak pixan la  
dinabap kup mi lomomo.

<sup>17</sup> Nade anaba soxolik kaka tara at  
livosik li at ne Devit go xeneng kusu  
nabat kis ngan loorong mi laasen  
silok teren. La anaba lok tatao  
avukat lixitikis orong at loorong sox-  
olik tarak.

<sup>18</sup> Anaba sak tup mi limixin  
munepen min kusu dina suma ka  
lainmangan. Ketla limixin at lixitikis  
orong teren dinaba ngasang kobot la  
dinap novos.”

## 133

### *I Lox Avukat At Labalamu Ela At Limixin At Ne Moroa*

<sup>1</sup> I milik maraanu la i nunuan  
aleng at loxonaleng limixin at ne Mo-  
roa di nemen buru xeneng at lenmila  
oon.

<sup>2</sup> I nunuan ngan ta loxodan  
momonok maraanu gano diga lox  
anarong lamaasa ne Aron min. Diga  
soli asu mo loxodan to mavana at  
lavatlak teren la mo loxodan ga  
sesen su boro at laraes teren, la ga  
sesen si uto at laxaka at lavanga  
singsiga ren.

<sup>3</sup> I lox avukat ngan bok ledemi  
boro at lakaana Eremon it pot at  
lengkong kaana lixilik to Saion. La  
ap mo loxot ne Moroa ga xaape kusu  
naba lox anarong limixin mi lorooro  
lexen.

## 134

### *Lorotoro Ri Emi Asu Mi Leeme Silok*

<sup>1</sup> Nemi axap lavaanat saxaruki at  
Leeme Silok, ude nemi la mina emi  
asu min. Nemi ua mi gugu ro xeneng

at loogu laplavang at lengkanimin, mina emi asu min.

<sup>2</sup> Mina xip aurut kikngen keneng at lisingising to xeneng at loogu laplavang, la mina emi asu mi Leeme Silok.

<sup>3</sup> A sing Leeme Silok i nemen de Saion la ga rudum li laxalibet mi lavatbung menemen naba lox anarong nemi!

## 135

### *Loxompixan Ti Emi Asu*

<sup>1</sup> Leemi asu ri Leeme Silok.

Nemi lavasaxaruki at Leeme Silok, mina emi asu mi laasen teren.

<sup>2</sup> La nemi bok mo mi gugu ro at loogu laplavang at Leeme Silok, ni loogu at ne Moroa atnedik, mina emi asu mi laasen teren.

<sup>3</sup> Mina emi asu mi Leeme Silok atla neni i vukat. Minak pixan emi asu ri laasen teren, atla mo loklok i nunuan aleng.

<sup>4</sup> Neni ga soxolik kaka limixin at ne Jakop kusu tin. Neni ga soxolik ka limixin me Israel kusu ateren akmokso.

<sup>5</sup> Aklen i do Leeme Silok atnedik i nunuan aleng pologat, la i silok polo mo leven moroa vetpes.

<sup>6</sup> Neni i epovo na lok lempanga salai neni i vara i to vana at laxalibet, la de at lavatbung menemen, to xeneng at laras la to xopok tubu at lisimaramain.

<sup>7</sup> Neni ik lox asuusu lamanman takabu boro axa at latnese at lavatbung menemen. La ik lok lavanga i mam su boro at lamanman takabu, la i susuang asu lamanman boro at loogu lili ren.

<sup>8</sup> Neni ga sev amet laxamdak temes avot at limixin me Isip, la lempanga bok mi lavanuet kangkedek atdi.

<sup>9</sup> Neni ga lox asuusu bok lempanga lolos la sangsangu xusu ti lox asongot loorong eburu mi luvuttadi silok ua diga gugu maxopok teren.

<sup>10</sup> Neni ga sele utut buaang levenabung mixin, la ga sev amet lavaorong lolos.

<sup>11</sup> Nedi ne Sion loorong at leme Amor, Ok loorong at leme Basan, la nedi lavaorong axap me Kanan.

<sup>12</sup> Neni ga lok ka levennep kangka atnedi na lavaorong la ga raba limixin teren min. Neni ga raba leme Israel min.

<sup>13</sup> Leeme Silok, limixin dinaba tong asuusu amisix i do nenu ne Moroa. La lavaola axap melemu dinabam domasu ram.

<sup>14</sup> Leeme Silok naba tupe limixin teren. Neni naba lox asuusu lebelen tuntun ti lavaanat soxolik teren.

<sup>15</sup> Limixin boro at levenabung mixin petpes dik lok levenmoroa atdi mi la siliva la gol. Luvuttadi mun mede xopok di vop di mi lev-entingen di.

<sup>16</sup> Di ruuna leven ngusno ketla dixo epovo ri paase. La levengkatli bok mo, ketla dixo epovo ri reven.

<sup>17</sup> Levenbaalung mo atdi, ketla dixo epovo ring tonga. La dixo epovo rinotno bok tik lok ka lamamas.

<sup>18</sup> A vara i do mo luvuttadi diga vop mo lempoovo vanga la dira nunu saga atdi, dinaba vee voovo vanga ngan mo lentaba diga vop di!

<sup>19</sup> Limixin me Israel, mina emi asu mi Leeme Silok. Nemi lavamaasa at ne Moroa, mina emi asu min.

<sup>20</sup> Nemi lubung mixin me Levi, mina emi asu mi Leeme Silok, la nemi axap mo mi lotu saporav i, mina emi asu min.

<sup>21</sup> Mina emi asu mi Leeme Silok to xeneng Saion, neni ik lok to xeneng at langkolonu aulis teren Jerusalem.

Leemi asu ri Leeme Silok!

## 136

### *Loxompixan Ti Tong Avukat*

<sup>1</sup> Ata tong avukat ti Leeme Silok, atla neni i lox avukat; kopmen tekavaxap at labalamu ren.

<sup>2</sup> Ata tong avukat ti ne Moroa mo i silok ti leven moroa axap; kopmen tekavaxap at labalamu ren.

<sup>3</sup> Ata tong avukat ti Lanaraavuk i lolos silok polo nedi lavaame silok axap; kopmen tekavaxap at labalamu ren.

<sup>4</sup> Neni xusuk mun ik lok lempanga sangsangu i silok aleng; kopmen tekavaxap at labalamu ren.

<sup>5</sup> Neni ga rudum li laxalibet mi mo lakleklen teren; kopmen tekavaxap at labalamu ren.

<sup>6</sup> Neni ga vaxaxis li laxangka to mavana at laras; kopmen tekavaxap at labalamu ren.

<sup>7</sup> Neni ga rudum laxangking mi lagaaling; kopmen tekavaxap at labalamu ren.

<sup>8</sup> La mo laxangking ti lok tatao levenaleng kangking; kopmen tekavaxap at labalamu ren.

<sup>9</sup> La lagaaling mi laxam penti rik lok tatao levenaleng kanimin; kopmen tekavaxap at labalamu ren.

<sup>10</sup> Neni ga sev amet laxamdak temes avot at leme Isip; kopmen tekavaxap at labalamu ren.

<sup>11</sup> Neni ga lam asu limixin me Israel basinge lenep silok Isip; kopmen tekavaxap at labalamu ren.

<sup>12</sup> Neni ga lox i mo mi lolos silok teren atla lekngen i lolos aleng; kopmen tekavaxap at labalamu ren.

<sup>13</sup> Neni ga lok langas to xantubu at loxontas memele; kopmen tekavaxap at labalamu ren.

<sup>14</sup> Neni ga lam avolo limixin teren go xantubu at laras; kopmen tekavaxap at labalamu ren.

<sup>15</sup> Ketla ni gak mit axong loorong mi luvuttadi esep me Isip; kopmen tekavaxap at labalamu ren.

<sup>16</sup> Neni ga lam avolo limixin teren to at lamatbin; kopmen tekavaxap at labalamu ren.

<sup>17</sup> Neni ga sev amet lavaorong mi levenasen silok atdi; kopmen tekavaxap at labalamu ren.

<sup>18</sup> Neni ga sev amet bok mo lavaorong mi levenasen silok; kopmen tekavaxap at labalamu ren.

<sup>19</sup> Sion loorong at leme Amor ga met at lekngen Leeme Silok; kopmen tekavaxap at labalamu ren.

<sup>20</sup> Ok loorong me Basan ga met at lekngen Leeme Silok; kopmen tekavaxap at labalamu ren.

<sup>21</sup> Neni ga raba limixin akmokso ren mi levennep kangka atnedi na lavaorong; kopmen tekavaxap at labalamu ren.

<sup>22</sup> Neni ga raba levennep kangka ri limixin me Israel, nedi lavaanat saxaruki ren; kopmen tekavaxap at labalamu ren.

<sup>23</sup> Neni goxo domampe nedik at levenaleng limixin munepen diga sak tup midik; kopmen tekavaxap at labalamu ren.

<sup>24</sup> Neni ga lox asepmus dik basinge limixin munepen minama; kopmen tekavaxap at labalamu ren.

<sup>25</sup> Im taba luxa lempanga axap di rooro; kopmen tekavaxap at labalamu ren.

<sup>26</sup> Ata tong avukat amisik ti ne Moroa boro vana at laxalibet; kopmen tekavaxap at labalamu ren.

## 137

### *Lanteng At Leme Israel Keneng At Loxokoxo*

<sup>1</sup> Nema magat kis saparap leven dan sen to Babilon. La maga dudu go at loxonaleng magam doma lemenemen Saion.

<sup>2</sup> La magak paxa suke lempat taaleng atnema ro at levenuna vilou (willow) mo ga tu auret laradan sen.

<sup>3</sup> Nedi mo diga vaxat kaka nema, diga tong i rinema do manak pixan. Diga tong i rinema do manak pixan kusu tik lox amomo nedi. Digak lok keretna, "Minak pixan tinema mi toxompixan mumu lemenemen Saion."

<sup>4</sup> Ga lolos aleng tinama xusu mana vixan toxompixan ti Leeme Silok nade at na lenep at limixin petpes.

<sup>5</sup> Do ana domampe lemenemen aulis tarak Jerusalem, ba lox avukat anoxo epovo xusu ana sak bok ba ligita rak mo!

<sup>6</sup> Do ana domampe lemenemen Jerusalem la anoxo doma bok ba i ngan neni lavanga loklox amomo rinotno rak, ba lox avukat do anoxo epovo xusu ana vixan bok ba.

<sup>7</sup> Leeme Silok, una vorang mo levelinga xapmek leme Edom diga lox

i gano. Ap mo laaleng leme Babilon diga sele utut lemenemen Jerusalem la digara vaxat kaka nema. Una vorang mo levelinga atnedi leme Edom diga tong amisik i do, "Mina sele utut asi Jerusalem ukopok at laxangka!"

<sup>8</sup> Nemi leme Babilon. Melemu limixin esep dinaba sele utut lemenemen silok Babilon mumu mo loklok kakapmek miga lox i rinema. La mo limixin ua dinaba vorang mo loklok ti leme Babilon, lomomo ridi.

<sup>9</sup> La dinaba lok kaka levengkadede atnemi leme Babilon la na saava amdanda di ro at lavaruat.

## 138

### *Lisingising Ti Tong Avukat*

<sup>1</sup> Nenia a tong avukat tu Leeme Silok mi labalak axap tarak. A vixan emi asu ru ro melamgo at leven moroa axap.

<sup>2</sup> A ru gili ri loogu laplavang taram i xaala. La a rikbu emi asu mi laasen taram mumu labalamu lexen la loklok tuturun taram tia. La a emi asu minu atla uga lox asusu i do laasen taram i silok pologat la levelinga ram i silok aleng la duk lok mavana at lempanga axap at na lavatbung menemen.

<sup>3</sup> Uga ronga res tarak at loxonaleng aga ro ke ram, la uga lox alolos ia mi lolos taram.

<sup>4</sup> Leeme Silok, lavaorong axap at lavatbung menemen dinaba emi asu minu, atla digara ronga vam leveng kakaape ram.

<sup>5</sup> Dinabak pixan mumu lempanga ugara lok pam i la mumu laasen silok taram.

<sup>6</sup> Keke i do nenu u silok polo lempanga axap, ketla uk lok tatao luvut-tadi gamasa de xopok. Ketla limixin loklox aaso nenu u nemen paxalom basinge di.

<sup>7</sup> At levenaleng levenmumuat i tu kangkan ia, nenu uk lok tatao lorooro rak. Nenu up sep tangarang limixin munepen minia, di belema-mao ia, la uk lox asepsu ia mi lolos taram.

<sup>8</sup> Nenu naba lox epovo lempanga uga xaape min tia. Leeme Silok,

labalamu ram naba nemen lexen. Una lox epovo axap ta mo lugugu ua ugara vaxaru kaxat pam i.

## 139

### *Lakleklen Axap Mi Loklok Tatao At Ne Moroa*

<sup>1</sup> Leeme Silok, ugara ila mumu avukat pam ia, kuren la uklen avukat tinotno ia.

<sup>2</sup> Ukleklen axap mo lempanga nia ak lox i. Uk lok paxalom tino, ketla ukleklen axap levendoxoma rak.

<sup>3</sup> U reven ia at levenaleng nia a gugu xopla ak lok mamana. Nenu uklen axap leveloklok tarak.

<sup>4</sup> Keke i do a xovisi ana vaase, uraklen pam levelinga salai anaba vaase i.

<sup>5</sup> U turu too rak at lengkot axap. La u reven aratao ia mi lolos silok taram.

<sup>6</sup> Lakleklen taram tia i si aleng. La mo lakleklen taram mumu ia, a sanga aleng teren.

<sup>7</sup> Anaba sixiro ua basinge u? Anaba vas taba ia ua basinge levereven taram?

<sup>8</sup> Mo do anat pas uto vana at laxalibet, nenu uk lok go. La do ana midi ro at lemenemen at labarongan, nenu uk lok go.

<sup>9</sup> La mo do ana rava kaxat uto at lenep, laxangking i losu ve xopla anak lok to vaxalom at lenep laxangking i lotup e,

<sup>10</sup> nenu mo unabak lok go xusu tim gongonga ia la unaba nemen go rik lok tooro ia.

<sup>11</sup> Mo do nia giba epovo ri tong i ri lamain kusu na lipa ia, koplaxasep mo ik lok kangkan ia na repukus ngan laxanimin, nenu naba epovo na ven ia.

<sup>12</sup> Ketla lamain bok kopmen na lok ngan lamain at levereven taram, la laxanimin i kasep ngan ta laaleng kangking. Lamain eburu mi laxasep, nedu du epovo mun at levereven taram.

<sup>13</sup> Uga rudum lengkot axap at labantuxu rak. Uga vop etang ia ro xeneng at latnenat at ne naga.



<sup>14</sup> A emi asu minu atla nenu uk lok lempanga sangsangu. Leven gugu ram i lok petpes la i nunuan aleng. Akleklen tino i mi lodoxoma axap tarak.

<sup>15</sup> At levenaleng levesi rak ga taut etang avukat tinotno ro xeneng at latnenat at ne naga. La ap mo levenaleng nia aga sisilok nemnem go xeneng, nenu ugaraklen pam i do nenia mo agak lok,

<sup>16</sup> la uga reven ia avot ti laaleng ne naga ga visix ia. Leexes at levenaleng at lorooro rak uga rivit li i ria, ugara malagan li xatling pam i at lubuk taram, avot ti mo levenaleng nat pot saparav ia.

<sup>17</sup> O Moroa, i lolos aleng tia xusu ana xasep at leven doxoma ram. La lavanisa axap mo levendoxoma ram ik lok!

<sup>18</sup> La amo do ana us mo levendoxoma ram, diba buaang polo laxanit kangkaneng. At loxonaleng nia a rakdu tuang, nenu move uk lok buru minia.

<sup>19</sup> O Moroa, a vara i do una sev amet luvuttadi sepsev amet tadi! A vara i do luvuttadi sepsev amet dinaba ke xepe mulus ia!

<sup>20</sup> Di paase leveloklok kakapmek mumu u. La di paase asu loklok bilinga rik lok kapmek laasen taram.

<sup>21</sup> O Leeme Silok, a belengatngas tino rinedi mo di belengatngas tu! A rexes tinotno nedi ua ding tonga viribang u!

<sup>22</sup> A belengatngas tinedi mi langsgan lebelemamao. A tong di do limixin munepen minia.

<sup>23</sup> O Moroa, una ila mumu ia la unaklen labalak. Una lok tong pen ia, la unaba long terek ka leven doxoma rak.

<sup>24</sup> Una ila mumu ia do teveloklok kakapmek tarak, la unam gomgonga amisix ia at langas at lorooro avolo.

## 140

*Lisingising Ti Ne Moroa Nak Lok See At Laradi*

<sup>1</sup> Leeme Silok, una lox asepsu ia basinge limixin kapmek. Una

lok tatao avukar ia basinge limixin sepsep.

<sup>2</sup> Nedi di rivit li nemnem amisik leveloklok kakapmek, la dik paxaru kaxat amisik leegang.

<sup>3</sup> Lorooro atdi i umsu mi laxakapmek ngan lempatmaaut. Leven gam atdi ik lok ngan lempat sii angkang la levelinga atdi ik lok ngan lasak at lavatmoora.

<sup>4</sup> Leeme Silok, una lok see rak basinge lolos at limixin kapmek. Una lok tatao ia basinge limixin sepsep ua digam nem mu ia xusu dina sev asubu ia.

<sup>5</sup> Limixin loklox aaso dira li vam lelixo ria, dira saga vam lengkutkut atdi, la dira li laxam pelixo ro at langas kusu ti lixo xaka ia.

<sup>6</sup> Na a vaase ru Leeme Silok keretna, "Nenu ne Moroa rak." Leeme Silok, una ronga lerengteng tarak kusu ti loklok tooro ram!

<sup>7</sup> Leeme Silok, nenu Loorong Avolo, la nenu Lentupe lolos tia. Ugarak lok see rak keneng at leven esep.

<sup>8</sup> Leeme Silok, nemen gat utam taba nedi limixin kapmek mi mo lempanga ua nedi di vavara rin. La nemen uta ke avolo mo leven doxoma nemnem atnedi xusu na soorun.

<sup>9</sup> Uguta ke mo limixin munepen minia dinak sak tup minia. Ketla una see antan mo loklok dik lox i ria, nabamlong mu di.

<sup>10</sup> A vara i do una lox asu laxali kao bokbolot na subu mavana atdi. La una lu arup midi ro xeneng at lemeroon kusu dinoxu eng su bok ba.

<sup>11</sup> A vara i do nedi mo dik sok taba lentaba vetpes mi levelinga xaxarang, di noxo lox epovo tekot. La a vara i do laxapmek na suxuna limixin sepsep, la na lok kapmek tino di.

<sup>12</sup> Leeme Silok, aklen i do nenu u tu see at limixin banbalo, la u tu at lenep atnedi dik pakes.

<sup>13</sup> I ruturun tinotno do limixin manmanton dinaba emi asu minu, la dinaba nemen maxopok at loklok tatao ram.

## 141

### *Lisingising Ti Leng Kantinao*

<sup>1</sup> Leeme Silok, a ro ke ram at na loxonaleng. Soso mun una lok tooro nga ia! Una ronga ia at loxonaleng a ro ke ram.

<sup>2</sup> Una siam ka lisingising tarak ngan ta lusuxa i so mavak, la una siam ka lukngak angosong aurut min naba lok ngan ta laramtaba ru ukantinao.

<sup>3</sup> Leeme Silok, una lok li taradi rutu mu ram nade at lungusno rak, la naba reven tatao bok levelinga rak.

<sup>4</sup> Una beng ia basinge lavavara rik lok laxapmek, la basinge lixitkis etangas eburu mi luvuttadi loklok kakapmek. Axopara i do ana anan eburu midi at lara peluxa atdi atla mo leveluxa atdi naba lox abilinga ia.

<sup>5</sup> I lox avukat do laradi nunuan na vaase sox ia mumu laxakapmek kopla na sep aleeng ia. Ketla anoxo siam kaka lasinorong at luvuttadi xapmek. A ngising amisik kusu di noxo lok bok ba leveloklok kakapmek.

<sup>6</sup> La amo do dina so gingin suu mi lubang amgomgo atnedi boro vana at labarabaras buang uat, limixin diba tong asu ba i dola lavapaase aronga rak ga ruturun.

<sup>7</sup> Naba ngan loxonuna di vagam i, la dira ra koxorop axakalix i. Kerepmo laxan si atdi bak midi ekarakat go at lisigege at lamaaut.

<sup>8</sup> Ketla nia move a nunu saga ram, Leeme Silok, Loorong Avolo rak. A vara i do unak lok see rak, la uguta ke xepe ia ana met!

<sup>9</sup> Una lox asepsu ia basinge laxampelixo mo di lili pe ia min, la basinge mo lempanga kutkut at luvuttadi xapmek.

<sup>10</sup> A vara i do limixin kapmek dinaba oon tubun axa at lara pelixo atdi kusu nia nabat pas sepsu la anoxo ruuna ka taniu.

## 142

### *Lisingising Ti Loklok Tooro*

<sup>1</sup> Nenia a ro ke at Leeme Silok ti loklok tooro ren, la a sing lolos tinotno i.

<sup>2</sup> A tong taba i mi levenmumuat tarak. La a tong axasep axav i mi lempanga lolos keneng at lorooro rak.

<sup>3</sup> At loxonaleng a lok do ana doma abulubun, neni iraklen pam lodomdoma salai ana mumu asu i, kusu ana sepsu basinge mo lara pelixo, limixin munepen minia dira li pe vam ia min ap mo langas nia at pas teren.

<sup>4</sup> Amo do a reven tangtagap kangkan ia, axo ven tara go xusu naba lok tooro ia. Kopmen teta go nak lok see rak.

<sup>5</sup> Leeme Silok, a reng taba u xusu una lok tooro ia. Leeme Silok, nenu Lurutu See Pe rak, la a vavara xusuk mun u keneng at na lorooro.

<sup>6</sup> Una ronga ia, ang teng ti loklok tooro ram atla lodoxoma abulubun i suxuna axav ia. Una lox asepsu ia basinge limixin munepen minia atla di lolos aleng polo lolos tarak.

<sup>7</sup> Una lox asepmus ia basinge levenmumuat tarak, kusu anaba emi asu minu ro at lovtopot buru at limixin taram, atla uga lok luvukat tia.

## 143

### *Lisingising Ti Loklok Tooro*

<sup>1</sup> Leeme Silok, una ronga lisingising tarak! Una ronga i na lisingising lolos tinotno rak atla loklok taram in mantan aleng. Uk lox epovo leveng kakaape ram, kuren la una ronga ia!

<sup>2</sup> Nenia lasaxaruki ram, kuren la uguta lok li ia at loklok tong pen, atla kopmen teta ip sepsen at lamaram.

<sup>3</sup> Lavamunepen minia digara vuse ka vam ia la dira sep kapmek tinotno ia. Dira lok li vam ia at loogu xokoxo i main bonot, la a lok ngan tino nga nedi ua diga met axa gano at lereot.

<sup>4</sup> Kuren la a gagas kusu ana raba xepe nga lorooro rak, atla lodoxoma abulubun na i suxuna rinotno nga ia.

<sup>5</sup> A doxoma su ap mo levenaleng gara oon pam. La a doma mo lempanga nenu ugara lok pam i, la mo

leven gugu ram i vot manga at lodox-oma rak.

<sup>6</sup> A song aurut mi lukngak tu keneng at lisingising tarak. La labalak ik minu ru ngan ta loxongkangka vatmang.

<sup>7</sup> Leeme Silok, soso mun una rongares tarak! Nia ara doma abulubuntino. Uguta lok alipe u basinge ia, lavanga ana emu buru minedi ua di si uto xopok at lemenemen at labarongan.

<sup>8</sup> Unak lox adoxoma ia at leven maxantamak axap mi mo labalamu lexen taram, atla lununu rak i tu saga ram. Leve singising tarak i uturut upana ru, kusu una lox ase ia mi langas nia anaba mumu asu i.

<sup>9</sup> Leeme Silok, a vot saporav u xusu unak lok see rak. La una vaxat asu ia basinge limixin munepen minia.

<sup>10</sup> Nenu ne Moroa rak. Una lox ase ia mi langas ti mumu asu lavavara ram. Una ke Loroonan Avukat taram na lam ia at langas nunuan.

<sup>11</sup> Leeme Silok, una sat asu ia basinge limixin munepen minia ngan uga xaape vam min. Nenu uk lox avukat, kuren la una lox asepmus ia basinge na leven mumuat tarak!

<sup>12</sup> Una sev amet limixin munepen minia, atla nenu u balamu ia. La una lox abaava tino di mo dik lox asongor ia, atla nenia lasaxaruki ram.

## 144

### *Lorotong Avukat At Looorong Ti Ne Moroa*

<sup>1</sup> Nia a emi asu mi Leeme Silok, ni Lurutu See Pe rak! Neni i arala ia mi loklok ti esep, la ik lox agagas ia ri leesep silok.

<sup>2</sup> Neni Lurutu See Pe la Lentupe ria, la Loogu Matmatkun la Laradi Loklox Asepsu rak. Neni laradi ua a nunu saga ren kusu naba kubak pe ia. La neni ik sak tup mi levenabung mixin petpes la ik lok li di maxopok at loklok tatao rak.

<sup>3</sup> Leeme Silok, limixin nedi lempanga salai, la uram doma mu solo di. Nedi lempanga gamasa mun ketla ung tonga levelinga atdi?

<sup>4</sup> Nedi di lok ngan mun lamanman i rava polo. La levenaleng atdi i lok ngan mun lamamau i sonao.

<sup>5</sup> O Leeme Silok, una vaxat das laxalibet la una vas si ude xopok. Una long tu at lempatkaana la dinaba soobang asu lusuxa.

<sup>6</sup> Una riki asu lamam (lavanga i mam) la una sak epeseves limixin munepen minia. Una so asu mi levesoso ram kusu naba lox amarat di la dina sixiro.

<sup>7</sup> Una song asi boro vana, la una sat asu ka ia boro xeneng tubu at lamaxat dan, la una lok li asepsu ia basinge mo limixin munepen. Una lox asepsu ia basinge lolos at limixin me xadiong,

<sup>8</sup> ua kopmen tinotno dina tong asu rinotno luruturun. Ketla di xaxarang mun, keke i do diga xaape do diba tong asu levelinga ruturun.

<sup>9</sup> O Moroa, anaba vixan loxom-pixan maxat tu. Anabak sak ligita rak la anak pixan tu.

<sup>10</sup> Uk lox alolos lavaorong kusu dinak sak tup mi limixin munepen midi, la uk lox asepsu ia, lasaxaruki ram ne Devit.

<sup>11</sup> Una lox asepmus ia basinge lebelemamao at limixin munepen minia. La una lox asepsu ia basinge lolos at limixin boro vetpes ua dixo tong asu luruturun. Ketla di xaxarang mun, keke i do diga xaape do diba tong asu levelinga ruturun.

<sup>12</sup> Nema ma sing u do laxamdak purau atnema dinaba lok ngan larauna i suusu urut, la i lolos. La ma sing bok do laxamposono maxat atnema dinaba milik maraanu ngan levempos diga xovox i, mo i nganang levenmesuluk axap at loogu at loorong.

<sup>13</sup> La ma sing bok do laraogu lili atnema naba unumsu mi lara met luxa axap. La ma sing bok do leve sipsip to at levenang kolonu atnema, dina pisik aleng ngan lasangaun larabin sangsangaun kobot.

<sup>14</sup> Ma sing bok do laxan bulumaxao atnema, dina pisik aleng la di noxo pisik amet kopla dina

seeve. Ma sing bok do xopmen tanbulu xopla tanteng kopla toxokoxo mumu levenesep eburu mi limixin munepen nak lok to at levenang kolonu atnema.

<sup>15</sup> La lomomo naba vot parap mo lubung mixin mo do na lempanga na ravasu raturun tidi. La lomomo naba vot parap nedi ua Leeme Silok, neni ne Moroa atnedi!

## 145

### *Loxompixan Emi Asu*

<sup>1</sup> Moroa, nenu Loorong Silok tarak. Anaba tong asuusu laasen silok taram. Anaba tong avukat amisik tu la anoxo xap tinotno ri tong avukat.

<sup>2</sup> Anaba tong avukat tu at levenaleng axap. Anaba emi asu amisik minu la anoxo xap ti emi asu minu.

<sup>3</sup> Leeme Silok neni i nunuan aleng pologat, la i epovo rinotno do limixin dina emi asu min. Atla ixo epovo xusu anaba re sa at lununuan teren ua i volo lakleklen tarak.

<sup>4</sup> Limixin dinaba emi asu minu ri levempanga ugara lok pam i, tuka i at lara loola vetpes la ti lara loola melemu. Dinaba tong asuusu levempanga lolos ugarak lok pam i.

<sup>5</sup> Dinaba paase asu lixitkis orong taram i silok aleng tinotno la i volo lempanga axap. La nia anabam doma mumu leven gugu maraanu nenu ugak lox i.

<sup>6</sup> Limixin dinaba paase mumu leven gugu lolos nenu ugak lox i, la nia anaba paase asu laasen silok taram.

<sup>7</sup> Dinaba tere mo luvukat silok taram la dinak pixan mumu labalamu ram.

<sup>8</sup> Leeme Silok i ruuna labalamu mi lebelen tuntun, la kopmen nak belemamao soso ketla i umsu mi labalamu lexen.

<sup>9</sup> Neni i vukat ti limixin axap la i ruuna labalamu tinedi limixin axap ni ga rudum di.

<sup>10</sup> Leeme Silok, lempanga rooro axap nenu uga rudum li di, dinaba emi asu minu, la limixin axap taram dinaba tong avukat tu.

<sup>11</sup> Dinaba paase mumu lisisixam la lolos at lixitkis orong taram, la dina tong axasep limixin mi lolos taram,

<sup>12</sup> kusu limixin axap dinabak leklen leven gugu lolos taram la lisisixam maraanu at lixitkis orong taram.

<sup>13</sup> Lixitkis orong taram naba nenen lexen, la nenu Loorong Avolo, kopmen tekavaxap taram.

Leeme Silok ik lox asoorun amisik leveng kakaape ren. La ik lox asuusu labalamu ren keneng at leven gugu axap teren.

<sup>14</sup> Ik lok tooro nedi di vekip tangarang mi levenmumuat, la imtebeng aonon nedi ua diga subu.

<sup>15</sup> Leeme Silok, levempanga rooro axap di reven tu mi leven doxoma voovo atdi, la um taba nedi mi lev-eluxa ua dik pakes tin.

<sup>16</sup> Um taba epovo rinotno nedi, la uk lox epovo rinotno levem pak-pakes atnedi axap.

<sup>17</sup> Loklok at Leeme Silok in manton tinotno keneng at levempanga axap neni ik lox i, leven gugu ren ik lox i, ik lox i eburu mi lebelen tuntun teren.

<sup>18</sup> Neni ik lok saparap nedi mo di ngising tin, nedi mo di ngising tin mi luruturun.

<sup>19</sup> Neni im taba epovo ri levem pak-pakes atnedi ua dim taba asinorong i. Ing tonga leven anteng atnedi la irak lox asepsu nedi.

<sup>20</sup> Neni ik lok see atnedi ua di vavara aleng tin, ketla neni naba sev amet nedi limixin dixo mumu asu i.

<sup>21</sup> Anaba emi asu amisik mi Leeme Silok. La mo lempanga axap ua neni ga rudum i, dina emi asu amisik mi laasen kaala ren la kopmen tekavaxap at leemi asu rin.

## 146

### *Leemi Asu Ri Ne Moroa Luntoo*

<sup>1</sup> Leemi asu ri Leeme Silok! Labalak, una emi asu mi Leeme Silok!

<sup>2</sup> Anaba emi asu min at levenaleng axap, nenia ana rooro ren. La anabak pixan ti ne Moroa rak keneng at lorooro axap tarak.

<sup>3</sup> Mi guta nunu saga at lubung amgomgo mede at lavatbung mennen ti loklok tooro, atla kopmen teta mede xopok i epovo na lox asepsu nemi.

<sup>4</sup> Mo do dina met, dinabam long ti laxangka. La ap mo laaleng, leven doxoma ali atdi naba xap.

<sup>5</sup> Laradi naba ruuna xaka lomomo mo do neni na siam kaka ne Moroa at ne Jakop kusu tik lok tooro i, la neni i nunu saga at Leeme Silok ne Moroa ren,

<sup>6</sup> atla neni Laradi Runtudum Li at laxalibet mi lavatkangka la laras, la mo lempanga axap bok di nemen keneng at na lengkot axap. Neni ik lox epovo amisik leveng kakaapen.

<sup>7</sup> Ing tonga linga avukat at lava baava, la im taba luxa nedi dik toxo.

Leeme Silok ik lox asepmus luvuttadi xokoxo,

<sup>8</sup> la irak lox arepalas lengkatli atnedi ua dixo reven. Neni im tebeng aonon nedi ua diga subu mi levenmumuat. Neni i balamu aleng tinotno nedi limixin manmanton teren.

<sup>9</sup> Neni ik lok see atnedi limixin me xadiong ua di nemen keneng at lenep kangka atnedik. Ik lok tooro lempat naa rixin eburu mi lubung karun, ketla ik lox asaxaek tino nedi luvuttadi loklok kakapmek.

<sup>10</sup> Leeme Silok neni Loorong Avolo la kopmen tekavaxap teren. O leme Saion, ne Moroa atnimi nabat kis amgomgo lexen tinotno.

Leemi asu ri Leeme Silok!

## 147

### *Leemi Asu Ri Ne Moroa Lanaraavuk*

<sup>1</sup> Leemi asu ri Leeme Silok!

I lox avukat kusu atak pixan emi asu ri ne Moroa atnedik. Ik mokso rinotno la ik lox asuusu lomomo tinedi dina emi asu mi Leeme Silok.

<sup>2</sup> Leeme Silok ira vaxaru li amu lemenemen Jerusalem. Neni ira lam kaka amlong limixin kokoxo.

<sup>3</sup> Neni ik lox aroo nedi ua lempeve atnedi ga tepovorok la ga koxo pe levengin kooxing atdi.

<sup>4</sup> Neni gara doma vam i do naba rudum lavanisa laxampenti, la ikleklen leven asen atnedi getgesara.

<sup>5</sup> Leeme Silok atnedik i silok la i lolos aleng. La ixo epovo xusu ataba us sa mo lakleklen teren mi tepanga.

<sup>6</sup> Neni ip kip aurut nedi ua dik lox asi di, ketla it pas puuvus nedi luvuttadi loklok kakapmek uto xopok at laxangka.

<sup>7</sup> Atak pixan lengkom pixan emi asu ri Leeme Silok. Atak sak lerengteng avukat mi lempat taaleng ti ne Moroa atdik.

<sup>8</sup> Neni ik lok li lengkon takabu ro vana at laxalibet. Neni ik lox asuusu larakabu ude ri laxangka, la irak lox asuusu levem pivilis to vana at lengkong kaana.

<sup>9</sup> Neni im taba luxa lempanga mi lavanuet kangkedek atdi, la im taba bok leven natnat kooxo mo do dina sing panga ri anan.

<sup>10</sup> Lomomo ren kopmen na tu at lempat paaros lolos, la ixo momo solo mi luvuttadi esep lolos.

<sup>11</sup> Ketla in tuuna xaka lomomo boro atnedi limixin dim taba asinorong i la di nunu saga at labalamu lexen teren.

<sup>12</sup> O leme Jerusalem, mina emi asu mi Leeme Silok! O leme Saion, mina emi asu mi ne Moroa atnimi!

<sup>13</sup> Neni ik lox aru lolos lempatban at larangas uat atnimi la ik lox anarong limixin go.

<sup>14</sup> Neni ik lok tatao leven apdopdo atnimi basinge limixin munepen minimi, la irak lox aan mais nimi mi leven uit maraanu.

<sup>15</sup> Neni i paase levelinga ri lempanga at na lavatkangka, la ik lox epovo soso mun mo levelinga neni i tong i.

<sup>16</sup> Neni i vavaxat palas asu lusugao mumudut (snow) ngan ta lavat tamon bukburu, la ira tereve ledemi mumudut (frost) ngan ta laxakup.

<sup>17</sup> Neni ik lox asu lempat betlom ngan ta laxariri uat. La ixo epovo xusu tara na ekini mi mo lumudut silok ua neni ik lox asuusu i!

<sup>18</sup> Melemu neni i paase asu levelinga ren, la mo ladan uat (ice)

ira kadan amu. Neni im taba asu lamanman la mo ladan ira sesen ta.

<sup>19</sup> Neni ga raba limixin teren me Israel mi mo levelinga ren, ni leven-taangas la Laulis Linga ren.

<sup>20</sup> Neni goxovisi na raba i ri lubang mixin petpes. Kuren la dixok leklen levelinga ren.

Leemi asu ri Leeme Silok!

## 148

### *Langavang Axap*

#### *Na Emi Asu Mi Ne Moroa*

<sup>1</sup> Leemi asu ri Leeme Silok.

Nemi mi nemen to vana rubu rino, mina emi asu mi Leeme Silok ik lok to vana at laxalibet.

<sup>2</sup> Nemi lubang angelo eburu mi limixin esep teren, mina emi asu min.

<sup>3</sup> Laxangking mi lagaaling, muna emi asu min, la laxampenti soosoo, mina emi asu min.

<sup>4</sup> Laxalibet pana xasep la ladan ik lok ma vana at laxalibet, mina emi asu min.

<sup>5</sup> Nedi axap mina emi asu mi laasen at Leeme Silok! Neni ga tong mun i la nedi na lempanga ga raut.

<sup>6</sup> Neni ga tong mun i la mo lempanga ga xis bus ap mo lengkot atdi la dinaba nemen lexen go la di noxo rongga xepe levelinga ren.

<sup>7</sup> At na lavatbung menemen, laras main tubu, la lempat konomus, mina emi asu min.

<sup>8</sup> La lamam mi lebetlom uat, lusugao mumudut (snow) mi lengkon takabu, la lara manman lolos ua ding tonga res at levelinga ren, mina emi asu min.

<sup>9</sup> Nemi lengkong kaana mi lempattaavut, la larauna vipisik peeve eburu mi lempatbuan, mina emi asu min.

<sup>10</sup> Nemi bok lempanga mi lavanuet kangkedek, lentaba sio la lentaba roonu, la laxa siisi mi lavapixa, mina emi asu min.

<sup>11</sup> Nemi axap lavaorong mi limixin axap, lavanarong eburu mi lubang amgomgo vetpes bok, mina emi asu min.

<sup>12</sup> Nemi bok laxamposono mi luvuraau atlok, la limixin asioxo mi laxaalik kakalik bok, mina emi asu min.

<sup>13</sup> Naba lox avukat do nedi axap dina emi asu mi laasen at Leeme Silok! Laasen teren i silok ti limixin axap. La lolos teren i volo lolos at lempanga axap at lavatbung menemen eburu mi laxalibet.

<sup>14</sup> Neni ga lox alolos lubang mixin teren, kusu limixin axap teren dinaba emi asu min. Limixin me Israel di silok tinotno at lodoxoma ren.

Leemi asu ri Leeme Silok!

## 149

### *Loxompixan Emi Asu*

<sup>1</sup> Leemi asu ri Leeme Silok!

Mina vixan loxom pixan maxat ti emi asu mi Leeme Silok. Mina emi asu min to at lovtopot buru atnedi limixin ua di ruturun tin!

<sup>2</sup> Nemi leme Israel, minak lek mumu Laradi Runtudum Li atnemi. Nemi limixin me Saion mina momo mumu mo Loorong Silok atnemi!

<sup>3</sup> Mina tii momo ri emi asu mi laasen teren. Mina pasa levengkuvu eburu mi lempat taaleng ti emi asu min.

<sup>4</sup> Leeme Silok in tuuna ka lomomo mumu limixin teren. Im taba asinorong nedi ua dik lok atnaasan la im taba di mi lolos ti sak tup mi limixin munepen midi.

<sup>5</sup> Naba lox avukat do limixin at ne Moroa dina momo mi leepang silok atla diga sev asi nedi, la dinak pixan momo maraanu rinotno at lengkanimin axap.

<sup>6</sup> Naba lox avukat do dinap kup silok at loxonaleng dina emi asu mi ne Moroa, la dinam tebeng levenise esep sengsen atnedi,

<sup>7</sup> kusu tik sak tup mi levenabung mixin petpes, la rik lox asongot di,

<sup>8</sup> la kusu ti koxo lavaorong atnedi mi lempat sen, la mo lubang amgomgo atnedi bok mi lempat sen aen.

<sup>9</sup> Na lempanga naba ravasu kusu ti lok li liina mavana at levenabung mixin petpes ngan ne Moroa gara vit li vam i. Nai i ngan lasinorong at

limixin at ne Moroa. Kuren la dinaba  
lok kaka laasen silok teren.  
Leemi asu ri Leeme Silok!

## 150

### *Leemi Asu Ri Leeme Silok*

<sup>1</sup> Leemi asu ri Leeme Silok!

Mina emi asu mi Leeme Silok to xeng  
at loogu laplavang teren! Mina  
emi asu mi lolos teren toxun pana at  
laxalibet!

<sup>2</sup> Mina emi asu min mumu lev-  
empanga lolos neni gara lok pam i.  
Mina emi asu min atla neni i silok  
solo mavana at lempanga axap.

<sup>3</sup> Mina emi asu min mi lara tu.  
Mina emi asu min mi lempat taaleng  
la leven gita.

<sup>4</sup> Mina tii momo la minak sak  
gaamit ti emi asu min. Mina emi  
asu min mi lempat gita la leveng  
kaatu. <sup>5</sup> Mina emi asu min mi lasak-  
sak lempat tingtigon aen (simbol).  
Minak sak silok lempat tingtigon aen  
(simbol) ti emi asu min.

<sup>6</sup> Levempanga rooro axap, mina  
emi asu min.

Leemi asu ri Leeme Silok!

**Metiu**  
**Lagale Lavavang At Ne**  
**Iesu Karisito**  
**Metiu Ga Malagan I**  
**Levelinga Loklox**  
**Axasep**  
**Lamaares 58 A.D.**

Metiu neni lara atnedi lasangaun mi legepura lavaun pinivu at ne Iesu, lara laasen bok teren ne Levi. Neni laradi loklok ka pilas at lagavaman boro Rom. Melemu ne Iesu ga soxolik ka i la ni ga ravasu ngan lun pinivu ren. Metiu ga malagan i na lubuk ti lubung mixin mokmokso ren me Judaia. At laaleng ne Metiu ga malagan na lubuk limixin me Judaia diga doma i do ne Moroa na soxolik ka soso mun laradi naba vot kusu neni na lok ngan Loorong Silok atdi. At lavapaase Ibru diga so asen i mi la Mesaia (Lanarong), la at lavapaase Grik diga so asen i mi ne Karisito. Luvuttadi amgomgo at limixin me Judaia di goxoklen i do ne Iesu ga vot ngan Lanarong. Metiu ga vara i xusu na lox asuusu i ridi do ne Iesu neni Lanarong tuturun la Loorong Silok at leme Judaia, kuren la neni ga paase mumu ne Iesu ga vot kerepmo, i ngan Loorong Silok. Ne Metiu ga malagan li bok lentaba levelinga boro at Lovoang Kaala migomgo atdi mumu Lanarong at ne Moroa. At na levelinga ga sooxos at lovotpot at Lanarong.

**Lengkot silok keneng at na lubuk**

*1:1-2:23* Diga visik ne Iesu.

*3:1-12* Jon laradi sep susu ga gugu.

*3:13-4:11* Satan ga lok tong pen ne Iesu.

*4:12-18:35* Iesu gat pas tangtagap la ga vavang to Galili.

*19:1-20:34* Iesu gat pas uto Jerusalem.

*21:1-25:46* Lempanga salai ne Iesu ga lox i ro Jerusalem.

*26:1-27:66* Larangtanga alis la lanmet at ne Iesu.

*28:1-20* Iesu ga roo xat basinge lanmet.

*Leretere Ri Lavalabat*  
*At Ne Iesu*  
*(Lu 3:23-38)*

<sup>1</sup> \*Anai ni leretere ri levenasen at lavalabat at ne Iesu Karisito, neni livisik li at ne Devit, la ne Devit neni livisik li at ne Abaram.

<sup>2</sup> Abaram neni temen ne Aisak; Aisak neni temen ne Jakop; Jakop neni temen ne Juda eburu mi luvutneton;

<sup>3</sup> \*Juda neni temen ne Peres mi ne Sara. (Nenen du laasen teren ne Tema); Peres neni temen ne Esron; Esron neni temen ne Ram;

<sup>4</sup> Ram neni temen ne Aminadap; Aminadap neni temen ne Nason; Nason neni temen ne Salmon;

<sup>5</sup> \*Salmon neni temen ne Boas (Raap neni nenen); Boas neni temen ne Obet (Rut neni nenen); Obet neni temen ne Jesi.

<sup>6</sup> \*Jesi neni temen ne Devit, loorong.

Devit neni temen ne Solomon (nenen ni latkin at ne Uraia);

<sup>7</sup> Solomon neni temen ne Roboam; Roboam neni temen ne Abaisa; Abaisa neni temen ne Asa;

<sup>8</sup> Asa neni temen ne Josepat; Josepat neni temen ne Joram; Joram neni temen ne Usaia;

<sup>9</sup> Usaia neni temen ne Jotam; Jotam neni temen ne Eas; Eas neni temen ne Esekia;

<sup>10</sup> Esekia neni temen ne Manase; Manase neni temen ne Amon; Amon neni temen ne Josaia;

<sup>11</sup> \*Josaia neni temen ne Jekonia eburu mi luvutneton. Ap mo levenaleng limixin esep boro Babilon diga lok ka limixin me Israel uto Babilon ti loxokoxo.

\* **1:1:** 1 Let 17:11; Lur 22:18    \* **1:3:** Lur 38:29-30; Rut 4:18-22    \* **1:5:** Rut 4:13-17    \* **1:6:** 2 Sml 12:24    \* **1:11:** 2 Lav 24:14-15; 2 Let 36:10; Jer 27:20    \* **1:12:** Esr 3:2



12 \*Melemu at nai, ne Jekonia neni temen ne Salatiel; Salatiel neni temen ne Serababel;

13 Serababel neni temen ne Abiut; Abiut neni temen ne Eliakim; Eliakim neni temen ne Aso;

14 Aso neni temen ne Sadok; Sadok neni temen ne Akim; Akim neni temen ne Eliuda.

15 Eliuda neni temen ne Eliasa; Eliasa neni temen ne Matan; Matan neni temen ne Jakop;

16 Jakop neni temen ne Josep, latlok at ne Maria, nenen ne Iesu, ga ruuna ka laasen do Lanarong.

17 Kuren la ga ruka i at ne Abaram la uto at ne Devit ga epovo at lasangaun mi lavanuet lavaola. La ga ruka i at ne Devit ga se leme Babilon diga lok ka limixin me Israel uto Babilon ga epovo at lasangaun mi lavanuet lavaola. La ga ruka i melemu at loxokoxo at limixin me Israel uto Babilon la ga se at livipisik at Lanarong ga epovo at lasangaun mi lavanuet lavaola.

#### *Livipisik At Ne Iesu Karisito (Lu 2:1-7)*

18 \*Anai ni leretere ri livipisik at ne Iesu Karisito. Maria, nenen ne Iesu diga ora ka i xusu latkin ti ne Josep, ketla kovisi du goxo epot, Maria ga long lenget ka i do neni mo ga balan madak mi lolos at Loroonan Kaala.

19 Ne Josep, latlok teren, neni la-gale laradi la ga mumu asu avukat Laulis Linga at ne Moses. Ga lok lodoxoma ren kusu na ke xepe ne Maria. Ketla neni goxo vara i xusu na lox amangan i ro at lemeren limixin axap. Neni ga lok do na lok kepe nemnem mene i.

20 Josep gam doma mumu i na la at lara laxanimin laangelo at ne Moroa ga vot saparav i at loromtobo la ga lok, "Josep. Livisik li at ne Devit. Nemen gat uta marat kusu una lok ka ne Maria ngan latkin tu, mila mo labalan madak neni i ruuna i, neni at Loroonan Kaala.

21 \*Neni naba visik lamdak temes la una so asen i mi ne Iesu, (Lava-suun teren do laradi loklox arooro) mila neni naba lox arooro limixin teren basinge laxakapmek atdi."

22 Ana lempanga axap ga vot kusu ti lox asoorun levelinga at ne Moroa ga ravasu at lungusno at leeme vappaase ali ren, ga lok keretna,

23 "Tatkin maxat naba balan madak la naba visik tamdak temes la dinaba so asen i mi ne Emanuel." *Ais 7:14*  
Lavasuun teren do, "Moroa eburu midik."

24 La ne Josep ga xatu kaxat ap mo laaleng petpes la ga mu asu levelinga at laangelo at Leeme Silok ne Moroa, la ni ga epot ka ne Maria.

25 \*Ketla neni goxo midi eburu mi ne Maria, se neni ga visik lamdak teren. La ne Josep ga so asen i mi ne Iesu.

## 2

### *Lovotpot At Luvuttadi Leklen*

1 Maria ga visik ne Iesu ro Betilem, at lenep silok Judaia. Ap mo levenaleng ne Erodes ga nemen ngan loorong. Melemu lentaba luvuttadi leklen at larapenti digat pas boro at lenep laxangking it losu e uto Jerusalem

2 \*la diga sue limixin me go, "Lumumulum ua diga visix i kusu neni Loorong Silok ti limixin me Judaia? Maga ven lenti ren to at lenep laxangking it losu e, la marat pas ude xusu mana lotu saparav i."

3 Erodes ga ronga i na, la lebelen ga xatu, la limixin axap go Jerusalem lebelendi ga xatu bok.

4 Erodes ga ro bubua ka nedi axap luvuttadi amgomgo at lubangmaasa la luvuttadi loklox ase at Laulis Linga la ga sue di xeretna, "Lanarong diba visix i ua?"

5 La diga vorang i rin keretna, "To at lemenemen Betilem at lenep Judaia, mila leeme vappaase ali ga malagan i xeretna,

6 \*‘Lemenemen Betilem at lenep Juda, neni i silok aleng ti levenmenemen petpes to Juda. Tara me dom naba vot ngan laradi gomgo la naba lok tatao limixin tarak mede Israel kerekngan laradi loklok tatao sipsip.’” *Mai 5:2*

7 La ne Erodes ga ro nemnem ka mo luvuttadi leklen la ga sue di mi laaleng salai mo lenti ga so su ren.

8 Melemu neni ga riki di uto Betilem mi levelinga xeretna, “Minat pas la mina puse avukat ti mo lamdak. La do mina vuse sa ren, minaba tong axasep box ia min, kusu nenia bok anaba vot pasa i la ana lotu saparav i.”

9-10 Melemu at na levelinga at loorong ne Erodes, diga vas kaxat, la at lavatpas atdi ro at langas diga ven manga mo lenti, no diga ven avot pam i ro at lenep laxangking it losu e. At loxonaleng diga ven i, lomomo atdi ga silok aleng. Mo lenti gam gomgo ridi se ga ru ro mavana ap mo loogu ne Iesu gak midi ren.

11 \*Diga beles ukeneng la diga ven lamdak eburu mi ne Maria, nenen. Diga xis tiktikbu mi lempatgulom atdi la diga milik tiding si ukopok la diga lotu saparav i. La diga suang lengkontonom ka atdi la diga lok letaba rin mi logol (gold), perengkin-sen (frankincense), la mea (myrrh).

12 Melemu at nai Moroa ga vaase di xeneng at loromtobo do nemen gat ditamlong uto saparap ne Erodes. Kuren la diga vas bilong uto at lenep kangka atdi at lara langas petpes.

### *Josep Ga Oo Mi Ne Maria Du Lenan Uto Isip*

13 Se mo luvuttadi leklen diga vas kaxat pam, laangelo at Leeme Silok ne Moroa ga vot parap ne Josep keneng at loromtobo. La ga lok, “Una xatu kaxat la una lok kaka lamdak eburu mi nenen la mina sixiro uto Isip. Mina nemen go se nenia anaba tong i rinimi do mina on basinge mo

lenep, mila ne Erodes mo naba reven pupuke ri lamdak kusu na sev amer i.”

14 Kuren la ne Josep ga xatu kaxat, la ga lok kaka lamdak eburu mi nenen, la ap mo mene laxanimin diga vas kaxat basinge mo lemenemen Betilem la uto Isip.

15 \*La diga nemen go se ne Erodes ga met. Nai lempanga ga vot kusu ti lox asoorun levelinga at ne Moroa ga vaase asu i at lungusno leeme vapaase ali ren keretna, “Aga xup kaka lamdak tarak boro Isip.” *Ose 11:1*

### *Diga Sev Amet Laxamdak Temes To Betilem*

16 Se ne Erodes gaklen ka i do luvuttadi leklen diga bala vukpux i, neni ga musak aleng. Neni ga raba linga limixin esep teren kusu dina sev amet laxamdak temes, levenmaares atdi ga epovo at legepura la maxopok, to Betilem la at levenmenemen bok gak lox auret, mumu levelinga neni gara ronga vam i boro at luvuttadi leklen, mumu laaleng lenti ga soo su.

17 La mo levelinga, ne Moroa ga vaase i at lungusno at leeme vapaase ali ren ne Jeremaia ga soorun, la ga lok keretna,

18 \*‘Lerengteng at lara mo diga ronga i ro Rama, ni lanteng silok. Rakel mo i duudu mumu laxamdak teren. La kopmen tara ga epovo do na lox amenemen i mila laxamdak axap teren mo dira met pam.’” *Jer 31:15*

### *Josep Mi Ne Maria La Ne Iesu Digamlong Boro Isip*

19 Melemu at lanmet at ne Erodes, laangelo at Leeme Silok ne Moroa ga vot saparap ne Josep keneng at loromtobo to Isip.

20 \*La ga lok, “Una xatu kaxat, la una lok ka lamdak eburu mi nenen, la minamlong uto at lenep silok Israel. Mila mo luvuttadi diga lok do

\* 2:11: Sam 72:10-15; Ais 60:6 \* 2:15: Ose 11:1

\* 2:18: Lur 35:19 \* 2:20: Pas 4:19

dina sev amet nom lamdak, dira met pam.”

<sup>21</sup> Kuren la ne Josep ga xatu kaxat, la ga lok ka lamdak eburu mi nenen la digamlong uto Israel.

<sup>22</sup> Se ne Josep ga rongga i do ne Akeleas mo ga lok ka lixitkis at ne temen, ne Erodes, ngan loorong boro Judaia, neni ga marat kusu ti nemen go. La laangelo ga raba linga manga i xeneng at loromtobo, kuren la digat pas uto at lenep silok Galili.

<sup>23</sup> \*La diga nemen to Nasaret. La levelinga at lavaeme vapaase ali ga soorun. Mo levelinga ga lok keretna, “Dinaba so asen i do neni lanat me Nasaret.”

### 3

*Jon Laradi Sep Susu Ga Vavang Ti Limixin*

(*Mk 1:1-8; Lu 3:1-20; Jo 1:19-28*)

<sup>1</sup> Buaang levenmaares gara volo, la ne Jon, laradi sep susu ga ru asuvos to at lamatbin at lenep silok Judaia la ga ruka lugugu ren.

<sup>2</sup> \*Neni ga vavang keretna, “Mina leeng basinge leveloklok kakapmek atnimi, mila langas ti Linintoo no vana at laxalibet monga ira auret!”

<sup>3</sup> Leeme vapaase ali ne Aisaia ga paase mumu ne Jon mi levelinga i lok keretna,

“Lara mo ip kup to at lamatbin keretna, mina lox agagas li langas ti Leeme Silok. Mina lox akmokso langas tin!” *Ais 40:3*

<sup>4</sup> \*Jon ga siga labantamon diga lox i mi lengkabinim at lakamel. Neni ga dodos i mi labanbaane diga lox i mi labantuxu at lavanga mi lavanuet kangkedek teren. La neni ga anan levenasku mi laxanmisiu boro at laxairing.

<sup>5</sup> Limixin digat pot saparav i boro Jerusalem, boro at levennep axap Judaia, la boro bok at levennep

saparap ladan sen Joridan kusu dinang tonga levelinga ren.

<sup>6</sup> Diga tong asu leveloklok kakapmek atdi la ne Jon ga sep susu nedi ro at ladan sen Joridan.

<sup>7</sup> \*At loxonaleng ne Jon ga ven buaang nedi lubung Parisi mi lubung Sadiusi diga vot pasa i kusu neni na sep susu nedi, neni ga lok tidi xeretna, “Nemi laxamdak at lempasii. Kereva, mi lok do mina sixiro at lebelemamao at ne Moroa mo naba vot saparap limixin kakapmek?”

<sup>8</sup> Minak lok lempanga i nunuan kusu naba lox asuusu i do mira leeng basinge vam leveloklok kakapmek atnimi.

<sup>9</sup> \*Ketla mi guta nua i do miba sixiro at lebelemamao at ne Moroa mumu nga i do ne Abaram, neni lurubuno avolo atnimi. A tong i rinimi do Moroa i epovo na ba gili na laxanuut la dina vee ngan livipisik li avolo ri ne Abaram.

<sup>10</sup> \*Moroa mo i gagas kusu ti tara asi larauna ro xa at laraixe atdi. Larauna do kopmen dina pisik asu lempeven una nunuan, neni naba ra asi di la na lu arup midi ro at laxao.”

<sup>11</sup> \*La ne Jon ga lok bok, “A sep susu nemi mi ladan kusu na lox asuusu i do mira leeng pam basinge leveloklok kakapmek atnimi. Ketla lara mo naba mumu bok ba rak. Neni naba sep susu nemi mi Loroonan Kaala la laxao ri limixin tongtonga xepe. Lolos teren i volo lolos tarak. Axo epovo kusu anap kip luvanga vatpas teren mila i silok aleng tia.\*

<sup>12</sup> \*Neni naba rongga linga at limixin axap, la naba lok pes mun limixin avukat basinge limixin kakapmek, kerekngan laradi loklok tatao laraamang i epes lenbolo avukat basinge lenbolo i gu. Limixin avukat, neni naba lox arooro di uto vana at laxalibet. La limixin kakapmek, neni naba lok li di at lemenemen

\* **2:23:** Lu 2:39; Ais 11:1; 53:2; Jo 1:46 \* **3:2:** Mt 4:17; Mk 1:15 \* **3:4:** 2 Lav 1:8 \* **3:7:** Mt 12:34; 23:33 \* **3:9:** Jo 8:33,39; Ro 2:28-29; 4:12 \* **3:10:** Mt 7:19; Lu 13:6-9 \* **3:11:** Jo 1:26-27,33; Gu 1:5 \* **3:11:** Anai ni lavapaase poovo ri lox asuusu i do ne Jon ga lox asu langsung loklok ngangao ren ti ne Iesu. \* **3:12:** Mt 13:30

songsongot, i ngan lenbolo gu di tara kutkut di.”

*Jon Ga Sep Susu Ne Iesu  
(Mk 1:9-11; Lu 3:21-22)*

<sup>13</sup> Goxo lox abao la ne Iesu ga vas kaxat boro Galili la uto Joridan, la ga vot pasa ne Jon kusu neni na sep susu i.

<sup>14</sup> Ketla ne Jon ga lok tin, “Ixo epovo xusu una mu asu i na. I epovo do nenu una sep susu ia. La tila xa la ura sing ia do ana sep susu u?”

<sup>15</sup> Ketla ne Iesu ga vorang i rin keretna, “Una lok lavanga salai nia ara tong pam i, mila at na mun i langas la neda ata naba lox asoorun lempanga salai ik mokso kerekngan ne Moroa i vara i.” Kuren la ne Jon ga mu asu lodoxoma at ne Iesu.

<sup>16</sup> \*Melemu at ne Jon ga sep susu ne Iesu, neni ga vas urut basinge ladan la uto at lisigege dan. La ne Moroa ga suang laxalibet ti ne Iesu, la neni ga ven Loroonan at ne Moroa ga si boro vana la ukopok. Ga ven ngan ta lamno la ga nemen at ne Iesu. <sup>17</sup> \*La laxaka at ne Moroa boro vana at laxalibet ga lok, “Neni na ne Nuruk. Nia a balamu i la a momo aleng min.”

## 4

*Satan Ga Lok Tong Ne Iesu  
(Mk 1:12-13; Lu 4:1-13)*

<sup>1</sup> \*Melemu Loroonan Kaala ga lam ka ne Iesu uto at lamatbin kusu ne Satan na lok tong i.

<sup>2</sup> \*Melemu at lumun anan teren at lavanuet sangaun aleng kangking la kanimin, neni ga roxo ba.

<sup>3</sup> Satan ga vot pasa i la ga lok tin, “Mo do nenu ne Nitna ne Moroa, una tong i ri na laxanu at la dina vee xongkide.”

<sup>4</sup> La ne Iesu ga vorang i rin keretna, “Lovoang Kaala i tong i do, ‘Laradi kopmen na rooro xusuk mun at loxongkide, ketla neni i rooro at levelinga axap at

ne Moroa ik lok keneng at Lovoang Kaala.’ ” *Lal 8:3*

<sup>5</sup> Melemu ne Satan ga lok ka ne Iesu uto at lemenemen kaala, Jerusalem la ga vaxaru li i ro vana at langkut at loogu laplavang.

<sup>6</sup> La ga lok tin, “Mo do nenu ne Nitna ne Moroa, una los si ukopok, mila Lovoang Kaala i tong i do,

‘Moroa naba lok li lubang angelo ren, la dinaba rebeng aurur u mi lengkikngan di, kusu tuuat noxo sev asongot tekot at luxangkedek taram.’ ” *Sam 91:11-12*

<sup>7</sup> Iesu ga lok tin keretna, “Lovoang Kaala i tong box i do,

‘Nemen uta lok li ne Moroa, Leeme Silok taram at loklok tong.’ ”

*Lal 6:16*

<sup>8</sup> Melemu ne Satan ga lok ka ne Iesu uto vana at lakaana ga nemen kasep pana la ga lox ase i mi laramenemen axap at na lavatbung menemen la lisisinang atdi.

<sup>9</sup> La ne Satan ga lok tin, “Anaa axap lempanga anaba raba u min mo do una xis tiktikbu mi luvatgulom taram de melango rak la una lotu saparav ia.”

<sup>10</sup> La ne Iesu ga lok tin, “Satan! Pas kaxat basinge ia. Lovoang Kaala i tong i do,

‘Una lotu saparap ne Moroa, Leeme Silok taram la neni xusuk mun una mumu asu i.’ ” *Lal 6:13*

<sup>11</sup> \*La ne Satan ga on basinge i, la lubang angelo diga vot la diga lox alolos ne Iesu.

*Iesu Ga Vaxaru Kaxat Lugugu Ren To Galili  
(Mk 1:14-15; Lu 4:14-15)*

<sup>12</sup> \*Se ne Iesu ga rongga i do ne Jon mo diga lok li i at loogu xokoxo, neni ga vas kaxat bilong uto Galili.

<sup>13</sup> \*Neni goxo nemen to Nasaret, ketla gat pas la ga nemen to Kapre-naum. Na lemenemen gak lok

\* **3:16:** Jo 1:32 \* **3:17:** Sam 2:7; Ais 42:1; Mt 12:18; 17:5; Lu 9:35 \* **4:1:** Ib 2:18; 4:15 \* **4:2:** Pas 34:28; Lur 3:1-7 \* **4:11:** Ib 1:6,14 \* **4:12:** Mk 6:17; Lu 3:19-20 \* **4:13:** Jo 2:12

saparap lavatdan kis Galili at lapdopdo at lunep kangka Sebulon la Napitali.

<sup>14</sup> Neni ga nemen to Kaprenaum kusu ti lox asoorun levelinga ne Moroa ga vaase asu i at leeme vapaase ali ne Aisaia ga tong i do,

<sup>15</sup> “At lenep kangka Sebulon, la lenep kangka Napitali, langas uto at laras mo ik lok, la neni bok lenep kangka saparap Joridan, la lenep silok Galili, na ik lok la limixin kopmen di me Judaia di nemen go.

<sup>16</sup> La limixin at na levennep mo dik lok at lamain, dinaba ven langsung laxasep at ne Moroa. La tinedi limixin labaroonan atdi gara met pam laxasep naba soosoo ridi.” *Ais 9:1-2*

<sup>17</sup> \*Ga ruka i ap mo levenaleng ne Iesu ga vavang ti limixin keretna, “Mina leeng basinge leveloklok kakapmek atnimi, mila langas ti Linintoo no vana at laxalibet monga ira auret!”

*Iesu Ga Ro Xaka Lavanuet Luvuttadi Sepsep Mat*  
(*Mk 1:16-20; Lu 5:1-11*)

<sup>18</sup> At lara laaleng Iesu gat pas saparap lavatdan kis Galili, neni ga ven lueton. Nedu luradi sepsep mat, Saimon (laasen bok teren ne Pita) la neton laasen teren ne Endru. Duga loloa mi laxatkat to at lavatdan kis.

<sup>19</sup> \*La ne Iesu ga lok tidu, “Ude numu, muna emu minia la nia anaba lox ase numu mi langas ti sat kaka limixin i ngan tai mo, nemu mu loloa ka lenmat.” <sup>20</sup> \*La soso mun duga on basinge laxatkat la duga emu mi ne Iesu.

<sup>21</sup> Neni ga vas mu manga loloxon la ga ven manga lara lueton petpes, Jems mi ne Jon, lunitna ne Sebedi. Dugak lok go at lese pang eburu mi ne temen du ne Sebedi. Digak lox agagas li levengkatkat atdi. La ne Iesu ga ro xaka du.

<sup>22</sup> La soso mun duga on basinge lese pang eburu mi ne temen du, la duga emu mi ne Iesu.

*Iesu Ga Anasa Ga Vavang La Ga Lox Aroo Limixin*  
(*Lu 6:17-19*)

<sup>23</sup> \*Iesu gat pas at lengkot axap Galili, ga anasa limixin mi levenanasa at ne Moroa ro xeneng at laraogu singising atdi. La ga vavang mi Lagale Lavavang mumu Linintoo, la gak lox aroo limixin basinge laxanasen anmeres axap.

<sup>24</sup> \*Levelinga mumu ne Iesu ga epeseves keneng at lenep silok axap Siria. Kuren la limixin diga lok kaka nedi luvuttadi digak meres mi levenanase anmeres axap, la nedi bok diga suma levesongsongot silok, la nedi luvuttadi mi lubunggas ga suxuna di, la nedi diga ruuna lanmeres diga so asen i do lobomet, la nedi labantuxu atdi ga molo axap. La ne Iesu ga lox aroo nedi axap.

<sup>25</sup> \*Buaang nedi limixin diga mumu asu i, nedi boro Galili la boro bok Dekapolis, la boro Jerusalem, la Judaia, la boro bok at lenep silok Perea.

## 5

*Iesu Ga Vavang Ti Limixin To Vana At Lakaana*  
(*Lu 6:20-23*)

<sup>1</sup> Iesu ga ven nedi buaang limixin la ni ga urut upana at lakaana, ni ga xis kopok, la diga xis to melamgo ren,  
<sup>2</sup> la neni ga ruka i do na anasa di.

<sup>3</sup> \*Iesu ga lok keretna, “Nedi dikleklen i do labaroonan atdi ik pakes ti ne Moroa, dina momo, mila limixin kerepmo dinaba vubeles at Linintoo no vana at laxalibet.

<sup>4</sup> \*Nedi mo dik lok bukbulu, mila laxakapmek i umsu at na lavatbung menemen, dina momo, mila ne Moroa naba lox amenemen nedi!

\* **4:17:** Mt 3:2    \* **4:19:** Lu 5:1-11; Mt 13:47    \* **4:20:** Mt 19:27    \* **4:23:** Mk 1:39; Mt 9:35; Gu 10:38  
\* **4:24:** Mk 6:55    \* **4:25:** Mk 3:7-8    \* **5:3:** Ais 57:15    \* **5:4:** Ais 61:2-3; Li 7:17    \* **5:5:** Sam 37:11

5 \*Nedi dik lox asi di, dina momo, mila ne Moroa naba raba di mi lix-  
itkis to xeneng at Linintoo ren.

6 \*Nedi di ngaongao ri loklok man-  
manton, dina momo, mila ne Moroa  
naba lox epovo mo lavavara atdi.

7 \*Nedi di lox asuusu lebelen tun-  
tun ti limixin, dina momo, mila ne  
Moroa naba lox asuusu lebelen tun-  
tun tinedi.

8 \*Nedi lebelen nedi i dadat aleng,  
dina momo, mila dinaba ven ne Mo-  
roa.

9 \*Nedi, di lok lumulum kantubu  
atnedi dit kis munepen, dina momo,  
mila ne Moroa naba so asen nedi do  
luvutnitna.

10 \*Nedi dip kip levesongsongot  
mumu loklok manmanton at ne Mo-  
roa, dina momo, mila dinaba ruuna  
ka lixitikis to xeneng at Linintoo no  
vana at laxalibet.

11 \*Do limixin diba vaase aksaksa  
rinimi la diba sev asongot nimi la  
diba paase mumu nimi mi levelinga  
xaxarang, mina momo, mila nemi  
limixin tarak.

12 \*Do dina lox i xuren, mina  
momo la mina sosoro, mila langsan-  
gan luunun minaba ruuna ka i ro  
vana at laxalibet. Limixin kakapmek  
megano diga lox asongot lavaeme  
vapaase ali no diga rooro gano. La  
kerepmo limixin kakapmek dinaba  
lox asongot bok nimi.”

*Limixin At Ne Iesu Di Lok Ngan  
Laxakures La Laxasep  
(Mk 9:50; Lu 14:34-35)*

13 La ne Iesu ga lok bok tidi, “Nemi  
mi ngan laxakures ti limixin axap.  
Ket do lolos at laxakures na xap,  
kopmen bok ba tangas kusu naba so  
kakures manga. Kopmen bok ba na  
epovo xusu dina lok li i at teveluxa,  
kuren la diba lu xepe mun min la  
limixin dibat pas abilinga i.

14 \*Nemi mi ngan laxasep ti limixin  
at na lavatbung menemen. Lemen-  
emen silok do it kis to mavana at  
lakaana kopmen na epovo do na lipe.

15 \*Kopmen teta na sox aros  
lababao xusu na lok li i ro maxopok  
at lavatbaaket. Ketla neni i lok li  
i ro at lenep kasep, kusu laxasep  
teren naba so epeseves tinedi axap  
go xeneng at loogu.

16 \*La kerepmo bok laxasep at-  
nemi na soosoo ro melamgo at lim-  
ixin, kusu diba reven leveloklok  
nunuan mik lox i, la diba emi asu mi  
ne Moroa ne Temen nimi boro vana  
at laxalibet.”

*Iesu Ga Paase Mi Laulis Linga At  
Ne Moses*

17 \*La ne Iesu ga lok bok tidi, “Ne-  
men gat mita nua i do aga vot kusu  
ana lok pes Laulis Linga at ne Moses  
la levenanasa at lavaeme vapaase  
ali. A goxo vot kusu ana lok pes i,  
ketla aga vot ti lox epovo levelinga  
ren.

18 \*A tong tuturun i rinimi. Lax-  
alibet mi lavatbung menemen naba  
nemen at laxanaleng solo, la ap mo  
levenaleng kopmen tamangkot lix-  
ilik at levelinga keneng at Laulis  
Linga naba xap asonao, ba se ap mo  
laaleng levelinga ren naba soorun.

19 \*Kuren la, do tara i los polo  
tamangkot lixilik at Laulis Linga, la  
ia lox ase lentaba vetpes do dina los  
polo box i, neni naba lixilik tinotno  
at Linintoo no vana at laxalibet. Do  
tara i ronga res at Laulis Linga, la ira  
lox ase bok lentaba vetpes kusu dina  
ronga res teren, neni naba silok to at  
Linintoo no vana at laxalibet.

20 A tong i rinimi. Mo do lurup-  
tuvuk atnemi noxo lox avukat ti lu-  
ruptuvuk at luvuttadi loklox ase at  
Laulis Linga la lubung Parisi, kop-  
men mi noxo vubeles at Linintoo, no  
vana at laxalibet.”

\* 5:6: Ais 55:1-2 \* 5:7: Je 2:13 \* 5:8: Sam 24:3-4; 51:10; 73:1 \* 5:9: 1 Jo 3:2-3 \* 5:10: Ib  
12:4; 1 Pi 3:14 \* 5:11: 1 Pi 4:14; Je 1:2 \* 5:12: 2 Let 36:16; Gu 7:52; Ib 11:32-38; Je 5:10 \* 5:14:  
Jo 8:12; 9:5 \* 5:15: Mk 4:21; Lu 8:16; 11:33 \* 5:16: Ep 5:8-9; 1 Pi 2:12 \* 5:17: Mt 3:15; Ro 3:31;  
10:4 \* 5:18: Lu 16:17; 21:33 \* 5:19: Je 2:10 \* 5:21: Pas 20:13; 21:12; Mas 24:17; Lal 5:17

*Iesu Ga Paase Mumu Lumuk-musak*

21 \*La ne Iesu ga lok bok, “Miga ronga i do lavalabat atdik gano migomgo diga tong i do, ‘Nemen gat mitap sev amet tadi. La do nege i sev amet taradi, neni naba tu at lavapaase ro melamgo at laradi rongtonga linga.’

22 \*Ketla monga ana tong i rinimi do, nege i musak mi neton, neni naba tu at lavapaase ro melamgo at laradi rongtonga linga. La do nege i tong i ri neton do ‘Nenu laradi pis,’ neni naba tu at lavapaase ro melamgo at lixitkis buru at lavanuti sangaun nedi loxongkulao silok at limixin me Israel. La do nege i lok ti neton do ‘Nenu lavanga baulang,’ i auret do ne Moroa naba riki i uto xeneng at laxao at lemenemen songsongot.

23 \*Kuren la, do unat pas kusu una raba letaba ram ti ne Moroa ro at loxonin laplavang, la go ura doma su at netam i emusak minu,

24 una ke xepe be letaba ram go melamgo at loxonin laplavang, la unat pas avot be xusu una lok lumulum eburu mi netam. La melemu ba unamlong la una raba letaba ram ti ne Moroa.

25 \*Mo do tara na lok ka u ri lavapaase kusu na lok li lumumuat taram, una etangas nunuan min at langa kusu una lok lumulum eburu min. Do kopmen, neni naba lok ka u uto at laradi rongtonga linga, la laradi rongtonga linga naba lok li u at laradi rutu mu, la ni naba lok li u at loogu xokoxo.

26 Nia a tong tuturun i do unabak lok go, naba se rinotno do una un axap lempilas at nom lavapaase.”

*Loklok Ti Elongka Mi Latkin At Lara Vetpes*

27 \*La ne Iesu ga lok bok tadi, “Miga ronga vam lavapaase diga tong i do,

‘Nemen gat mita elongka mi lavakin at lentaba vetpes.’

28 \*Ketla monga ana tong i rinimi, do tara na ven peves at tatkin petpes, i lok ngan neni ia longka vam mi nom latkin to xeneng at lebelen.

29 \*Do laxatli tino ram na lox u la una subu, una lik gogo su min. I lox avukat tu do una lok pes tenep at labantuxu ram. Lavanga labantuxu axap taram nat pas ti lemenemen songsongot.

30 \*Mo do lakngam tino na lox u la una lok laxakapmek, una ra korop pes i la una lu min! I lox avukat tu do una lok pes lara lakngam. Lavanga labantuxu axap taram nat pas ti lemenemen songsongot.”

*Loklok Ti Ba Korop Epot*

*(Mt 19:9; Mk 10:11-12; Lu 16:18)*

31 \*La ne Iesu ga lok bok tadi, “Gano diga lox ase bok limixin keretna. Taradi do na soxope latkin teren, ni na malagan taba i mi tevelinga axasep do neni mo na ba korop ta leepot atdu.

32 Ketla monga ana tong i rinimi. Mo do taradi na soxope latkin teren, ketla mo latkin goxo longka, mo laradi i lok latkin teren ira longka, mo do neni ira epot manga at taradi vetpes. La mo laradi bok i epot ka mo latkin, i longka vam mila ik midi eburu mi latkin at laradi vetpes.”

*Lavapaase Mumu Loklok Ting Pangpe*

33 \*La ne Iesu ga lok bok tadi, “Miga ronga bok pam i do diga tong i ri limixin gano do, ‘Nemen mita los polo lavangpangpe atnemi saparap ne Moroa, ketla mina lox epovo lempanga salai mira xaape vam min.’

34 \*Ketla monga ana tong i rinimi xeretna. Nemen gat mita lok lavangpangpe mi laasen at ne Moroa. Nemen mita lox amuat tevelinga mi lavangpangpe atnimi la mina tong

\* 5:22: 1 Jo 3:15 \* 5:23: Mk 11:25 \* 5:25: Mt 6:14-15; 18:34-35 \* 5:27: Pas 20:14; Lal 5:18

\* 5:28: 2 Pi 2:14 \* 5:29: Mt 18:9; Mk 9:47; Kl 3:5 \* 5:30: Mt 18:8; Mk 9:43 \* 5:31: Lal 24:1-4;

Mk 10:4; 1 Ko 7:10-11 \* 5:33: Pas 20:7; Mas 19:12; Kex 30:2; Lal 23:21 \* 5:34: Ais 66:1; Je 5:12; Mt 23:22; Gu 7:49

laxalibet, mila neni loxonin orong at ne Moroa.

<sup>35</sup> \*La nemen mita lox amuat tevelinga atnimi mi lavangpangpe mi lavatbung menemen, mila neni loxot burubut ti luxangkedek teren. La nemen mita lox amuat tevelinga mi lavangpangpe mi ne Jerusalem, mila neni lemenemen silok at ne Moroa.

<sup>36</sup> Nemen mita lox amuat tevelinga vangpangpe mi lengkabinim at lempatlak atnimi mila nemi xa mixo epovo xusu miba lok tamang kabinim at lempatlak atnimi nan bun kopla na bibi.

<sup>37</sup> \*Mina tong mene i do, 'I ruturun!' kopla 'Kopmen!' Toxolinga bok tara na tong i mavana at nai, i laa boro at ne Satan."

*Loklok Ti Porang Amlong Leveloklok At Taradi*  
(Lu 6:29-30)

<sup>38</sup> \*La ne Iesu ga lok bok tidi, "Miga ronga bok pam i diga tong i do, 'Mo do una lik su mi laxatli at tara, laxatli bok taram dina lik su min. La do una sep pit tasangsa at tara, lasangsa bok taram dina rit pir i.'

<sup>39</sup> \*Ketla monga ana tong i rinimi xeretna. Nemen mita vorang amlong laxakapmek at tara do i lox i ru. Mo do tara na vasa lavapaales tino ram, una ke box i na vasa lavapaales piang taram.

<sup>40</sup> \*La do tara na lok ka u ri lava-paase kusu na li levelinga mumuat mavana ram mumu lavanga singsiga ram, una ke raba box i mi lavanga singsiga silok taram.

<sup>41</sup> La do tara at limixin esep na pu soso u do una xip laknixip teren uto vaxalom, unap kiv i uto vaxalom axa.

<sup>42</sup> Mo do tara na sing u mi tavanga, una raba i min. La mo do tara i vara i do na lok ka be tavanga ram kusu na gugu min, una siam taba i min."

*Iesu Ga Anasa Limixin Mi Langas Ti Balamu Lavamunepen*  
(Lu 6:27-28,32-36)

<sup>43</sup> \*La ne Iesu ga lok bok tidi, "Miga ronga bok pam i, diga tong i do, 'Mina balamu larapen tangas atnimi, la mina belengatngas tinedi di munepen minimi.'

<sup>44</sup> \*Ketla monga ana tong i rinimi xeretna. Mina balamu nedi di munepen minimi, la mina ngising tinedi dik lox asongot nimi,

<sup>45</sup> \*kusu minaba ravasu ngan luvutnitna rinotno at ne Temen nemi ne Moroa no vana at laxalibet, mila neni ga lok laxangking kusu na soosoo mavana at limixin kakapmek i ngan mun tinedi bok limixin nunuan. La im taba bok larakabu ridi dik lok lununuan la tidi bok dik lok laxakapmek.

<sup>46</sup> Mo do nemi xa mi balamu xusuk mun nedi di balamu nemi, ne Moroa xopmen noxo raba nemi mi luunun. Limixin kapmek kerekngan luvut-tadi loklok ka pilas bok dik lox i na.

<sup>47</sup> La mo do mi paase momo mun ti luvutneton nemi, na loklok kopmen lavanga silok, mila limixin dixo nunu at ne Moroa di mumu asu box i na.

<sup>48</sup> \*Kuren la mina nemen manmanton tino kerekngan mun ne Temen nemi no vana at laxalibet in manton tino."

## 6

*Langas Ti Lok Tooro Limixin Banbalo*

<sup>1</sup> \*La ne Iesu ga lok bok tidi, "Mina lok tatao alabat nemi, la nemen mita lok leveloklok nunuan to melamgo at limixin kusu dina ven i la diba emi asu minimi. Mo do mina mu asu na loklok, mi noxo lok ka luunun tinimi boro at ne Temen nemi no vana at laxalibet.

<sup>2</sup> Kuren la, do mina raba tavanga ri taradi banbalo, nemen mita tong asu i na ro melamgo at limixin axap

\* 5:35: Sam 48:2; Ais 66:1 \* 5:37: Je 5:12 \* 5:38: Pas 21:24; Mas 24:20; Lal 19:21 \* 5:39: Mas 19:18; Jo 18:22-23 \* 5:40: 1 Ko 6:7 \* 5:43: Mas 19:18 \* 5:44: Pas 23:4-5; Lu 23:34; Gu 7:60; Ro 12:14,20 \* 5:45: Ep 5:1 \* 5:48: Mas 19:2; Lal 18:13 \* 6:1: Mt 23:5



kerekngan luvuttadi loklok sosolom, dik lox i ro xeneng at laraogu singising la to at larangas. Dik lox i xusu limixin diba emi asu midi. A tong tuturun i rinimi do luunun atdi dira lok ka axap pam i.

<sup>3</sup> \*Ket do mina lok tooro taradi banbalo, mina lox i at langas, nemi xusuk mun miklen i, la nedi dik lox auret nimi di noxoklen i.

<sup>4</sup> La kerepmo kopmen tara noxoklen i, ketla ne Temen nimi mene, mo i reven mo leveloklok ik lox alipe, naba raba nimi mi luunun.

*Lisingising Saparap Ne Moroa  
(Lu 11:2-4)*

<sup>5</sup> \*Do mina ngising, nemen mitak lok ngan luvuttadi loklok sosolom. Di vavara aleng i do dina tu la dina ngising to xeneng at laraogu lotu la to bok at larangas etang kusu limixin diba reven di. A tong tuturun i rinimi do dira lok ka axap pam luunun atdi.

<sup>6</sup> \*Ket do mina vara sing, mina beles uto at leventaogu atnimi la mina sat pe lempatban la mina sing ti ne Temen nimi, mixo epovo mina ven i. La ne Temen nimi i reven lempanga salai i nemen alipe at lemeren limixin, naba raba nimi mi luunun.

<sup>7</sup> \*Keneng at levesingising atnimi, nemen mita tong lengkolinga xopmen tempasuun teren, kerekngan lavamolon di mumu asu i. Di doxoma i do ne Moroa mo naba ronga di mumu levesingising babaalom atdi.

<sup>8</sup> \*Nemen mita mu asu na loklok atdi mila ne Temen nimi ne Moroa iraklen avot pam levenai mik pakes tin, avot ti levesingising atnimi.

<sup>9</sup> \*Do mina sing, mina mu asu i xeretna,  
‘Temen nama no vana at laxalibet,  
mana lok ngangao at laasen taram.

<sup>10</sup> \*Linintoo ram na vot, lavavara ram limixin dina mu asu i nade xopok at na lavatbung menemen, i

ngan mun di mu asu i ro vana at laxalibet.

<sup>11</sup> Una raba nema mi leveluxa lingina.

<sup>12</sup> \*Doxoma xepe laxakapmek atnema, kerekngan nema ma doxoma xepe laxakapmek atnedi di lox i rinema.

<sup>13</sup> \*Nemen uta lok li nema ri leveloklok tong pen i lolos, ketla unang tanga amlong ka nema basinge ne Satan.’

<sup>14</sup> \*Mo do mina doxoma xepe laxakapmek limixin di lox i rinimi, ne Temen nimi no vana at laxalibet naba doxoma xepe bok laxakapmek atnimi.

<sup>15</sup> Ket do mixo doxoma xepe laxakapmek at limixin petpes, ne Temen nimi ro vana at laxalibet noxo doxoma xepe laxakapmek atnimi.”

*Iesu Ga Paase Mi Lumun Anan*

<sup>16</sup> \*La ne Iesu ga lok bok tidi, “La do mina mun anan, nemen gat mita ven bukbulu, i ngan luvuttadi loklok sosolom di mumu asu i. Dit pas saasaa ro xantubu at limixin kusu limixin diba reven lemeren di do nedi mo di mun anan. A tong tuturun i rinimi do luunun atdi, dira lok ka axap pam i.

<sup>17</sup> Do mina mun anan, mina saba nunuan lempatlak atnimi mi ladan momonok at la olip la mina gos avukat lenmeren nimi,

<sup>18</sup> kusu nedi vetpes di noxoklen i do nemi mo mi mun anan. Ketla ne Temen nimi, kopmen mina epovo na ven i, neni xusuk mun nabaklen i. La ne Temen nimi, mo i reven lempanga salai i nemen alipe at lemeren limixin, naba raba nimi mi luunun.”

*Iesu Ga Paase Mi Lapnovos To Vana At Laxalibet  
(Lu 12:33-34)*

<sup>19</sup> \*La ne Iesu ga lok bok tidi, “Nemen mita lili gat lapnovos tinemi nade xopok at na lavatkangka, mila i epovo do laxanuvivis naba an asonao

\* 6:3: Mt 25:37-40 \* 6:5: Mt 23:5; Lu 18:10-14 \* 6:6: 2 Lav 4:33 \* 6:7: Ais 1:15; 1 Lav 18:26-29

\* 6:8: Mt 6:32 \* 6:9: Jo 17:6 \* 6:10: Mt 7:21; 26:39; Lu 22:42 \* 6:12: Mt 6:14-15; 18:21-35

\* 6:13: Lu 22:40; Je 1:13; Jo 17:15; 2 Ts 3:3; 2 Ti 4:18; 1 Let 29:11-13 \* 6:14: Mk 11:25-26 \* 6:16:

Ais 58:5-9 \* 6:19: Je 5:1-3

mun i, la lamamao tas na long i la ba lok kapmek, la luvuttadi xipkip pilo dinaba das beles ukeneng at leventaogu atnimi la dina xip pilo ka i.

<sup>20</sup> \*Ketla mina lok leveloklok nunuan naba lok ngan lapnovos tinimi ro vana at laxalibet, mo go laxanuvis mi lamamao tas noxo lok kapmex i, la luvuttadi xipkip pilo di noxo das beles ukeneng la dina xip pilo xaka i.

<sup>21</sup> Mina lox i xuren mila lebelen nimi nabaplivi mu mo lapnovos atnimi.”

*Iesu Ga Paase Mi Laxasep  
At Labantuxu  
(Lu 11:34-36)*

<sup>22</sup> La ne Iesu ga lok bok keretna, “Lengkatli atnimi i ngan laxasep ti lorooro atnimi. Dola lengkatli atnimi na reven pupuse ri lempanga avukat, lorooro atnimi naba umsu mi laxasep.

<sup>23</sup> Ket do lengkatli atnimi na reven pupuse ri lempanga xapmek, lorooro atnimi naba umsu mi lamain. Kuren la, mo do laxasep kopmen nak lok keneng at lorooro atnimi, lamain i silok aleng nabak lok keneng teren.

*Limixin Kopmen Dina Epovo Na Gugu Ri Legepu Radi  
(Lu 16:13; 12:22-31)*

<sup>24</sup> Kopmen tara i epovo na nemen ngan lasaxaruki at legepu radi. Neni naba belengatngas ti lara la na vavara mo lara. Neni naba ruturun ti lara, la ni na sok tixirixes mo lara. Kopmen na epovo do tara na nemen ngan lasaxaruki at ne Moroa la lebelen na ngaongao mu lempilas.

<sup>25</sup> \*Kuren la a tong i rinimi do nemen gat mita doma solo mu lempanga anan mi lengkadan mik pakes tin, koplal lempanga singsiga kusu ti labantuxu atnimi. Kereva, lempanga anan i silok ti lorooro la lempanga singsiga i silok ti labantuxu?

<sup>26</sup> \*Mina ven lavapixa dip tava saasaa, dixotlotlo tevenit panga, la dixo lili buru levempeven una do ik mukun, la dixo lili i ro at levempovos pixa atdi. Ketla ne Temen nemi no vana at laxalibet i reven tatao nedi. La nemi mi silok aleng ti lavapixa.

<sup>27</sup> Kopmen tara na epovo do na lox epasum toxot ti lorooro ren mo do neni na bulu mu i.

<sup>28</sup> La tila mik bulu mu amisik lempanga singsiga? Mina ven be lempusuvus aaxa di suusu. Kopmen dina gugu la dinak sok etang lempanga singsiga ridi.

<sup>29</sup> \*Ketla a tong i do loorong ne Solomon mi langsung lapnovos teren ga ruuna lempanga singsiga kopmen goxo nunuan aleng ti nom lempusuvus.

<sup>30</sup> Ne Moroa xa ik paxasiga lempivilis aaxa, mo lempivilis i rooro mun lingina la kantamak manga ira mada si, la dira kotos i ro at laxao. Ketla neni naba lox angtang mu aleng nimi kusu na vaxasiga nimi. Lununu atnemi saporap ne Moroa i lixilik mun.

<sup>31</sup> Kuren la nemen mita bulu la mina lok do, ‘Leveluxa ridik naba laa meva?’ koplal ‘Lengkadan tidik naba laa meva?’ koplal ‘Lempanga singsiga ridik naba laa meva?’

<sup>32</sup> \*Nedi xopmen dina nunu at ne Moroa dik bulu mu lempanga xeretna. Ne Temen nemi no vana at laxalibet ikleklen i do mik pakes ti na lempanga.

<sup>33</sup> \*Ketla mavana at lempanga axap, mina lolos avot be ri puse ka Linintoo at ne Moroa la leveloklok manmanton teren, la neni naba raba bok nemi mi nom lempanga mik pakes tin.

<sup>34</sup> \*Kuren la nemen mita bulu mu mo lempanga ba ravasu ap mo laaleng kantamak, mila levenainbulu mo bak lok ti laaleng kantamak. La levenainbulu at leges aleng i epovo ri mo laaleng.”

\* **6:20:** Mt 19:21; Lu 18:22; Kl 3:1-2 \* **6:25:** Pl 4:6; 1 Ti 6:6-8; Ib 13:5; 1 Pi 5:7 \* **6:26:** Mt 10:29-31; Lu 12:6-7 \* **6:29:** 1 Lav 10; 2 Let 9 \* **6:32:** Mt 6:8 \* **6:33:** 1 Lav 3:13-14; Sam 37:4,25; Ro 14:17 \* **6:34:** Pas 16:4,19; Mt 6:11

## 7

*Nemen Mita Ila Mumu Loklok At  
Tentaba Vetpes*  
(Lu 6:37-38,41-42)

<sup>1</sup> \*La ne Iesu ga lok bok keretna, “Nemen mita ila mumu loklok at tentaba vetpes, kusu ne Moroa noxo ila mumu loklok atnimi.

<sup>2</sup> \*Mo do mina ila mumu loklok at tentaba vetpes, ne Moroa naba ila mumu nimi ap mo mun langas. La lumumuat mi lok li mavana atnedi lentaba vetpes, neni mun i nom ne Moroa naba raba nimi min.”

<sup>3</sup> La ne Iesu ga paase poovo bok keretna, “Nemen mita reven ti nom levendon i nemen at laxatli at neton nimi, la nemi xa kopmen mina doma mu levengkonuna ik lok pe lengkatli atnimi.

<sup>4</sup> Mi tong i ri neton nimi keretna, ‘Netak, una mulus tia kusu ana lok pes nom levendon at laxatli ram,’ ketla nemi xa xopmen mina ven kibis levengkonuna ik lok pe lengkatli atnemi getgesara.

<sup>5</sup> Nemi luvuttadi loklok sosolom. Mina lok pes avot nom levengkonuna ik lok pe lengkatli atnimi, la melemu ba minaba ven avukat ba i xusu mina lok pes ba levendon no at laxatli at neton nimi.

<sup>6</sup> \*Nemen gat mita raba lubangman mi lempanga i xaala. Mo do mina lox i xuren, dinaba rem gili mu nimi la diba at koxorop nimi. La nemen mita lu raba lababo mi leven peal (pearl) atnimi. Mo do mina lox i xuren, dinaba but axangka i mi lengkangedek atdi.”

*Moraa Im Taba Lempanga  
Nunuan Tinedi  
Di Ngising Parav I*  
(Lu 11:9-13)

<sup>7</sup> \*La ne Iesu ga lok bok keretna, “Mina ngising, la minaba ruuna xaka i. Mina puse, la minaba vuse xaka i. Minap dipdi, la lumusmaragu naba rem suang tinimi.

<sup>8</sup> \*Mila do mina ngising ne Moroa, minaba lok kaka i. La do nemi mina puse, minaba vuse ka i, la lumusmaragu naba rem suang tinemi mi dipdi.

<sup>9</sup> Kereva, i epovo do ne temen tamdak na raba ne nitna mi toxonuat, modo neni na sing ti toxongkide?

<sup>10</sup> Kopla i epovo kusu neni na raba i mi tisii mo do neni na sing ti temat?

<sup>11</sup> \*Keke i do nemi limixin bilinga, ketla mikleklen i do mim taba laxamdak mi laxaalik atnimi mi lempanga nunuan. La kerepmo i epovo rinotno do ne Temen nimi ro vana at laxalibet naba lok momo aleng ti raba bok lempanga nunuan tinedi di ngising tin.

<sup>12</sup> \*Leveloklox axap mina lox i ri lentaba vetpes, na lok ngan mun leveloklok mi vara i do dina lox i rinimi. Anai ni lavasuun tinotno at Laulis Linga at ne Moses la levelinga at lavaeme vapaase ali.”

*Lumusmaragu I Veleot*  
(Lu 13:24)

<sup>13</sup> \*La ne Iesu ga lok bok, “Mina beles keneng at lumusmaragu i veleot kusu ti lok ka lorooro, mila lumusmaragu uto at lemenemen songsongot i repalas la langas ugo at lemenemen songsongot kopmen na lolos ti mumu asu i, la buaang nedi limixin di pubeles teren.

<sup>14</sup> \*Lumusmaragu uto at lorooro ni i veleot mun la langas tin i lolos aleng tino la ixo buaang nedi limixin di pubeles teren.”

*Luuna Mi Lempeven Teren*  
(Lu 6:43-44)

<sup>15</sup> \*La ne Iesu ga lok bok, “Mina lok tatao nemi mumu loklok atnedi lavaeme vapaase ali xaxarang. Diba vot pasa nimi mi levelinga xaxarang la diba tong i do nedi luvuttadi at ne Moroa. Ketla di lok ngan lempatman atat, di siga lempanga singsiga diga

\* 7:1: Ro 2:1; 1 Ko 4:5; Je 4:11-12 \* 7:2: Mk 4:24 \* 7:6: Mt 10:11 \* 7:7: Mk 11:24; Jo 14:13; 15:7; 16:23-24 \* 7:8: Je 1:5; 1 Jo 3:22; 5:14-15 \* 7:11: Je 1:17 \* 7:12: Mt 22:39-40; Lu 6:31; Ro 13:8-10 \* 7:13: Jo 10:7,9 \* 7:14: Gu 14:22 \* 7:15: Mt 24:4,24; Gu 20:29; 2 Pi 2:1

lox i mi lengkabinim at levesipsip kusu dina xarang limixin.

<sup>16</sup> \*Miba ven kibis nedi mi levempipisik at lorooro atnedi. Ixo epovo do mina dik ka tempeven una nunuan boro at taban gagas, la ixo epovo do miba dik ka tempeven una at loxoon boro at tabaniles.

<sup>17</sup> La kerepmo luuna nunuan i pisik lempeven una nunuan, ketla luuna mamao i pisik lempeven una mamao.

<sup>18</sup> Luuna nunuan ixo epovo do na visik tempeven una mamao, la luuna mamao ixo epovo do na visik tempeven una nunuan.

<sup>19</sup> \*Larauna axap do dixo pisik nunuan, di tara korop asi nedi la di lulu arup midi ro at laxao.

<sup>20</sup> \*Kuren la miba ven kisip lavaame vapaase ali xaxarang mi levempipisik at lorooro atdi.”

*Laaleng Ete*  
(Lu 13:25-27)

<sup>21</sup> \*La ne Iesu ga lok bok tidi, “Limixin dinaba tong ia do Leeme Silok, Leeme Silok. Ketla kopmen nedi axap diba beles at Linintoo no vana at laxalibet. Nedi xusuk mun di mumu asu lavavara at ne Tamak, dinaba vubeles teren.

<sup>22</sup> At laaleng ete buaang nedi limixin dinaba lok tia, ‘Leeme Silok, Leeme Silok, maga paase ali ri limixin mi laasen taram, la maga riki asu lubanggas basinge limixin mi laasen taram, la maga lok buaang laxampanga sangsangu mi laasen taram.’

<sup>23</sup> \*Melemu anaba vaase ridi xeretna, ‘Nia xopmen tinotno anaklen nimi. Uto nimi basinge ia, nemi limixin kakapmek.’ ”

*Luradi Xipkip Gu*  
(Lu 6:47-49)

<sup>24</sup> La ne Iesu ga lok bok tidi, “Kuren la, do tara i ronga na lempapaase rak la i ronga res mu i, neni i lok ngan laradi leklen ga xip loogu ren la ga

sev asi lemet ukopok tinotno la ga lok nom loogu ren pana at laxanuat.

<sup>25</sup> Larakabu ga vot, la ladanut ga sen, la lamanman gat mas lolos mo loogu, ketla loogu goxo rem sup, mila ni gasbo i mi laxanuat.

<sup>26</sup> Ket do lara i ronga na levelinga rak la kopmen ni na mu asu i, neni i lok ngan laradi tangtangu, ga xip loogu ren la gasbo pe i mi laxapulang.

<sup>27</sup> Larakabu ga vot, la ladanut ga sen at laradan, la lamanman ga vot lolos at nom loogu, la loogu ga rem sup la ga rem utut axap.”

*Levenanasa At Ne Iesu Ga Mumuat*

<sup>28</sup> Se ne Iesu ga vaase axap na lempapaase, buaang nedi limixin diga sangu aleng at levenanasa ren,

<sup>29</sup> \*mila neni ga anasa di, la levelinga ren ga mumuat, neni xopmen goxo anasa ngan luvuttadi loklox ase at Laulis Linga.

## 8

*Iesu Ga Lox Aroo Laradi*  
(Mk 1:40-45; Lu 5:12-16)

<sup>1</sup> Iesu ga si boro vana at lakaana la buaang limixin diga emu min.

<sup>2</sup> La lara laradi ga meres mi lanmeres gu (leprosy) ga vot pasa ne Iesu la ga xis tiktikbu mi luvatgulom teren la ga sing i, “Leeme Silok. Mo do u vara i, una lox aroo ia.”

<sup>3</sup> Iesu ga song asu mi lekngen la ga long tu ren, la ga lok tin, “A vara i. Lanmeres taram na xap ta.” La soso mun mo lanmeres ga xap basinge mo laradi.

<sup>4</sup> \*La ne Iesu ga lok tin, “Nemen uta tong box i na ri tara, ketla unat pas uto at lamaasa, la neni na ven mumu u. Melemu una lok laramtaba ram ti ne Moroa ngan ne Moses ga tong i, kusu ti lox asuusu i ri limixin axap do nenu mo ura lox avukat ta.”

\* 7:16: Ga 5:19-22; Je 3:12 \* 7:19: Mt 3:10; Lu 3:9; Jo 15:6 \* 7:20: Mt 12:33 \* 7:21: Lu 6:46; Mt 21:31; Ro 2:13; Je 1:22,25 \* 7:23: Sam 6:8; Mt 10:33; 25:41; Mt 13:41-42; 2 Ti 2:19 \* 7:29: Mk 1:22; Lu 4:32; Jo 7:46 \* 8:4: Mas 14:1-32; Mt 9:30; Mk 7:36; Lu 17:14

*Iesu Ga Lox Aroo Lasaxaruki At  
Laasesep Boro Rom  
(Lu 7:1-10)*

5 \*Iesu ga vubeles at lemenemen Kaprenaum, la lara laasesep at limixin esep boro Rom ga vot pasa i la ga sing i ri loklok tooro xeretna,

6 “Leeme Silok. Lasaxaruki rak no ik midi ro at loogu rak. Lengkot axap teren i molo la ing songot aleng.”

7 La ne Iesu ga lok tin, “Nia anat pas ti lox aroo i.”

8 La mo laasesep ga lok tin keretna, “Leeme Silok, nenu Leeme Silok la ixo lox avukat do una beles at loogu rak. Ketla una tong mun i la lasaxaruki rak naba lox avukat.

9 Nenia aklen i do nenu u epovo ri lox i na mila nenia bok a nemen maxopok at lentaba amgomgo rak la lentaba bok di nemen maxopok tarak. La mo do a lok ti tara, ‘Unat pas,’ neni nabat pas. Do a lok ti tara, ‘Ude u,’ neni nabat pas saparav ia. La do a lok ti lasaxaruki rak, ‘Una lox i na,’ la neni naba lox i.”

10 \*Se ne Iesu ga ronga i na, ni ga sangu aleng la ga lok tinedi diga emu min, “Nia a tong tuturun i. Keneng at lengkot axap Israel, a goxo ven tara, lununu ren i silok ngan i na.

11 \*Nia a tong i rinimi do buaang limixin dinaba laa boro at lengkot axap at na lavatbung menemen la dinaba xis kopok eburu mi ne Abaram, Aisak la ne Jakop at laanan tarak to xeneng at Linintoo no vana at laxalibet.

12 \*Ketla limixin me Judaia, avot be diga nemen ngan lavaanat at Linintoo, ketla ne Moroa naba lu asu midi uto at lamain bonot la mo go dinabang teng aleng la dinaba rungur igisa.”

13 La ne Iesu ga lok ti mo laasesep, “Unamlong uto xolonu ram. Lasaxaruki ram naba lox avukat kerekngan lununu ram.” La lasaxaruki ren ga lox avukat ap mo mun loxonaleng.

*Iesu Ga Lox Aroo  
Buaang Limixin  
(Mk 1:29-34; Lu 4:38-41)*

14 \*Iesu ga rupot to at loogu at ne Pita, la ni ga ven luvutulom at ne Pita gak midi at loora, ga meres mi liplivi.

15 Neni ga long tu at lekngen la liplivi ga on basinge i, la ni ga xatu kaxat upana la ga lox agagas lev-eluxa rin.

16 Ga ukantinao, limixin diga lam ka larapen tangas atdi uto at ne Iesu, nedi lubunggas ga suxuna di. La ne Iesu ga paase lengkolinga, la ni ga riki asu lubunggas basinge di. La neni ga lox aroo limixin axap digak meres.

17 Kerepmo ne Iesu ga lox asoorun levelinga at leeme vapaase ali ne Aisaia, i lok keretna;

“Neni ga lox alolos nama basinge levenainmolo la ga lox aroo nama basinge levenanmeres.”

*Ais 53:4*

*Loklok Atnedi Di Mumu  
Asu Ne Iesu  
(Lu 9:57-62)*

18 Se ne Iesu ga ven buaang limixin digak lok saparav i, ni ga tong i ri lavaun pinivu ren do dina sen polo lavatdan kis uto at lenep meo.

19 La lara laradi loklox ase at Laulis Linga ga vot pasa i la ga lok tin, “Leeme loklox ase, nia ana emu minu uto at lengkot axap ut pas uve.”

20 \*La ne Iesu ga lok tin, “Lubungman sio di ruuna lengkot mikmidi atdi, la lavapixa di ruuna levempotpos atdi, ketla nenia, Laradi Mevana, axo ruuna temenemen kusu tia rik midi la na lok mamana ren.”

21 \*La lara laradi vetpes, lara at lavaun pinivu ren ga lok tin, “Leeme Silok. Una ke xepe be ia, kusu anat pas la anak mit ne tamak.”

22 Ketla ne Iesu ga lok tin, “Una mumu asu ia, la una ke laxampanga met dinak mikmit luvuttadi met.”

*Iesu Ga Lox Amila Lamanman  
(Mk 4:35-41; Lu 8:22-25)*

\* 8:5: Jo 4:47 \* 8:10: Mt 15:28 \* 8:11: Sam 107:3; Lu 13:29 \* 8:12: Mt 22:13; 25:30; Lu 13:28  
\* 8:14: 1 Ko 9:5 \* 8:20: 2 Ko 8:9 \* 8:21: 1 Lav 19:20; Jo 5:25

<sup>23</sup> La ne Iesu ga los kas at lese pang eburu mi lavaun pinivu ren la diga sen kaxat.

<sup>24</sup> \*La soso mun langsung lamaanman ga mas lolos mo lavatdan kis, la ga auret do lese pang gita dong si. Ketla ne Iesu mo ga unga.

<sup>25</sup> La lavaun pinivu diga vot pasa ne Iesu la diga lox aus i la diga lok, "Leeme Silok, una lox aroo dik, ata seeve nga na."

<sup>26</sup> \*La ni ga lok tidi, "Kereva, kopmen tununu atnimi? Mi marat tila?" La ni ga xatu kaxat la ga vaase lolos pe lamaanman mi lavatdan kis la duga lox atnaasan la langsung lenmila ga nemen ta.

<sup>27</sup> La diga sangu aleng la diga lok, "Laradi salai na? I vaase sok lamaanman mi lavatdan kis la dura rongares teren."

### *Iesu Ga Riki Asu Lubunggas Basinge Legepu Radi*

(Mk 5:1-20; Lu 8:26-39)

<sup>28</sup> Se ne Iesu eburu mi lavaun pinivu ren diga vot to at lenep meo, diga oso ro at lenep silok Gadarin, la legepu radi duga laa boro at larabuang, limixin me go digak mikmit labarongan e, lubanggas ga nemen atdu. La duga ekip tangarang mi ne Iesu. Nedu luradi sepsep la limixin ap mo lenep silok di goxot pas ti mo lenep.

<sup>29</sup> \*La duga xup ti ne Iesu xeretna, "Nitna ne Moroa. Lavanga salai u vara na lox i rinama? Kereva, u vot de xusu una lox asongot nama avot ti laaleng ete?"

<sup>30</sup> Buaang laxanbo mo diga nemen to vaxalom lixilik, diga anan.

<sup>31</sup> La lubanggas diga sing ne Iesu, "Do una riki asu nama basinge na luradi, una riki abeles nama ri nom laxanbo."

<sup>32</sup> La ni ga lok tidi, "Mina vas su uto." La diga sixisu ap mo luradi la diga vubeles ap mo laxanbo la nedi axap nom laxanbo diga sixisi

at lakaana la diga los tup ukopok at lavatdan kis la diga xong axap.

<sup>33</sup> La nedi mo luvuttadi digak lok tatao laxanbo, diga ven i na. La diga sixit kaxat uto ap mo lemenemen. La diga tong na lavanga ri mo limixin, la diga tong bok mo lavanga ne Iesu ga lox i ri mo luradi.

<sup>34</sup> La limixin axap ap mo lemenemen diga vas su la diga vot pasa ne Iesu. Se diga ven i, diga sing i do ni na on basinge mo lenep silok atdi.

## 9

### *Iesu Ga Lox Aroo Laradi Labantuxu Ren Ga Molo Axap*

(Mk 2:1-12; Lu 5:17-26)

<sup>1</sup> \*La ne Iesu mi lavaun pinivu ren diga los kas at lese pang la diga sen kaxat la diga rupot to at lemenemen at ne Iesu.

<sup>2</sup> Lentaba luvuttadi digap kip lara laradi mi loora, labantuxu ren ga molo axap la diga vot pasa ne Iesu. Se ne Iesu ga ven kibis lununu atdi, ni ga lok ti mo laradi mekmeres keretna, "Nuruk, una lolos. Leveloklok kakapmek axap taram, a doxoma xepe i."

<sup>3</sup> Lentaba luvuttadi loklox ase at Laulis Linga diga rongga i na la diga epaase xantubu atdi xeretna, "Na laradi i paase vupu ri ne Moroa."

<sup>4</sup> \*Iesu gaklen levendoxoma atdi la ga lok tidi xeretna, "Tila levendoxoma atnimi i umsu mi laxapmek mumu na lavanga?"

<sup>5</sup> Ua levelinga kopmen na lolos ti tong i? Leveloklok kakapmek taram ara doxoma xepe vam i, kopla ana tong i do, katu kaxat la unat pas?

<sup>6</sup> \*Ketla a vara minaklen i do nenia, Laradi Mevana, a ruuna lolos at na lavatbung menemen kusu ti doxoma xepe leveloklok kakapmek." La ne Iesu ga vaase bok ti mo laradi xeretna, "A tong i ru, una xatu upana la una xip kaka loora ram la una vas kaxat uto xolonu."

\* 8:24: Sam 4:8 \* 8:26: Mt 14:31; 16:8; Sam 89:9 \* 8:29: Mk 1:24; Lu 4:34,41 \* 9:1: Mt 4:13

\* 9:4: Mt 12:25; Lu 9:47; Jo 2:25 \* 9:6: Jo 17:2; 5:8

<sup>7</sup> La mo laradi ga xatu kaxat la gat pas uto xolonu.

<sup>8</sup> Se mo limixin axap diga ven i na, diga lingun, la diga emi asu mi ne Moroa, mo ga raba lolos kerepmo ti limixin.

*Iesu Ga Ro Ka Ne Levi*  
(Mk 2:13-17; Lu 5:27-32)

<sup>9</sup> Iesu ga vas kaxat basinge mo lenep la ni ga ven lara laradi, laasen teren ne Metiu, mo gat kis at loogu xekepe pilas. La ne Iesu ga lok tin, "Una mumu asu ia." La ne Metiu ga xatu upana la ga mumu asu i.

<sup>10</sup> La ne Iesu gat kis at laanan to xeneng at loogu at ne Metiu la buaang atnedi luvuttadi loklok ka pilas, la lentaba limixin kakapmek bok diga rupot. La diga anan eburu mi ne Iesu la lavaun pinivu ren.

<sup>11</sup> \*Se lubung Parisi diga ven i na, diga sue lavaun pinivu ren keretna, "Tila leeme loklox ase atnimi i anan eburu mi limixin loklok ka pilas la limixin kakapmek?"

<sup>12</sup> Iesu ga ronga i nom la ga lok tidi xeretna, "Limixin di lox avukat, kopmen dinak pakes ti loklok tooro, ketla nedi xusuk mun dik meres.

<sup>13</sup> \*La minat pas la minaklen ka lavasuun at na levelinga keneng at Lovoang Kaala i lok keretna,

'Nia axopara levelaplavang, a vara i xusu mina lox asusu lebelen tuntun.'

Nia aga rupot kusu ti ro xaka limixin bilinga kusu dina leeng, la kopmen nia a goxo rupot kusu tinedi limixin manmanton."

*Iesu Ga Paase Mumu Loklok At Lumun Anan*  
(Mk 2:8-22; Lu 5:33-39)

<sup>14</sup> \*Lavaun pinivu at ne Jon, laradi sep susu, diga vot pasa ne Iesu la diga sue i, "Nema mi lubung Parisi ma mun anan amisik, ketla lavaun pinivu ram kopmen dina mun anan. Ua lavasuun teren?"

<sup>15</sup> \*Iesu ga vorang i ridi mi lava-paase poovo xeretna, "At loklox

anarong at leepot, lentaba at laradi epot di noxo bulu mila laradi epot move ik lok eburu midi. Ketla laaleng mo naba rupot la limixin petpes dinaba lam ka laradi epot basinge lentaba ren, la dina mun anan ba ap mo levenaleng."

*Lempapaase Poovo Mumu Levenanasa Maxat At Ne Iesu*

<sup>16</sup> \*La ne Iesu ga vaase bok tidi mi lavapaase poovo xeretna, "Kopmen teta na balais ka loxontamon maxat kusu na sok gatgat pe lamamara at labantamon maut min. Mo do neni na lox i xuren, labantamon maxat ira lok kapmek pam la kopmen na epovo bok ba kusu na lok tavanga min. La nom loxontamon maxat noxo epovo xusu na lok pe avukat lamamara at loxontamon maut."

<sup>17</sup> La ne Iesu ga vaase bok tidi mi lavapaase poovo. Ni ga lok keretna, "Kopmen tara na soli li laxadan vaen maxat uto xeneng ti labantuxu at lavatme i maut pam. Mo do neni na lox i xuren, mo labantuxu ba remdas la laxadan vaen naba soli su axap, la labantuxu maut naba lok kapmek. Laxadan vaen maxat mina soli li i at labantuxu maxat, la kopmen tempanga ba lok kapmek."

*Iesu Ga Lox Aroo Loolik At Laradi Gomgo*

(Mk 5:21-43; Lu 8:40-56)

<sup>18</sup> Ap mo mun loxonaleng ne Iesu ga tong i na, lara laradi ga vot, neni lara atnedi luvuttadi amgomgo at loogu singising ap mo lemene-men. Ni ga xis tiktikbu mi luvatgulom teren saparap luxangkedek at ne Iesu la ga lok tin, "Anaa vam, loolik tarak i met. Ketla una ven be i la una long tu ren la ni naba roo."

<sup>19</sup> La ne Iesu ga xatu kaxat la ga emu min, la lavaun pinivu bok teren.

<sup>20</sup> La lara latkin mo ga nemen. Lanmeres gaaling gak lok teren at levenaleng amisik. Ni ga ruuna nom lanmeres at lasangaun mi legepu maares. Ni ga vas mu ne Iesu ro

melemu la ga long tu at lungusungus at lavanga singsiga ren.

21 \*Ni ga doma i do neni na long tu at lavanga singsiga ren, neni ba lox avukat.

22 La ne Iesu ga rem gili la ga ven kora ka i. La ga lok tin, "Latkin. Una lolos. Lununu ram ira lox avukat pam u." La ap mo mun loxonaleng mo latkin ga lox avukat ta.

23 Se ne Iesu ga vubeles at loogu ap mo laradi gomgo, ni ga ven buaang limixin, lentaba diga mas lengkaatu atdi, la lentaba digang teng la diga saxaanu ap mo loolik.

24 \*Ni ga lok tidi, "Uto nimi. Loolik kopmen na met, neni i unga mun." Ketla diga lok sese i.

25 La diga vas su ukamang, la ne Iesu ga vubeles la ga ranga at lekngen loolik la ga lox axatu kaxar i.

26 La levelinga mumu i na ga epe-seves at lengkot axap ap mo lenep silok.

### *Iesu Ga Lox Aroo Luradi Levengkatli Atdu Ga Main*

27 \*La ne Iesu ga vas kaxat la at lavatpas teren, legepu radi levengkatli atdu ga main, duga mumu i la duga toro keretna, "Livisik li at ne Devit. Una lox asuusu lebelen tuntun tinama."

28 La ne Iesu ga vubeles at lara loogu la mo luradi ga vot pasa i, la ni ga lok tidu xeretna, "Kereva, mu nunu do nenia a epovo na lox avukat levengkatli atnumu?"

Duga vorang i rin keretna, "Laaba, Leeme Silok."

29 \*La ne Iesu ga long tu at levengkatli atdu la ga lok tidu, "Nemu mu nunu rak la kerepmo levengkatli atnumu na lox avukat."

30 \*La levengkatli atdu ga lox avukat ta. La ne Iesu ga paase lolos tidu xeretna, "Nemen muta tong i na ri teta."

31 Ketla duga vas kaxat basinge mo loogu la duga tong i ri limixin at lengkot axap ap mo lenep silok.

### *Iesu Ga Riki Asu Lagas Kapmek Basinge Laradi*

32 Melemu atnedu duga on basinge ne Iesu, limixin diga lam ka lara laradi uto saparap ne Iesu. Lagas kapmek ga nemen ap mo laradi la goxo epovo na paase.

33 \*Se ne Iesu ga riki asu mo lagas, mo laradi ga epovo ba xusu na paase. Mo limixin diga sangu la diga lok, "Kopmen tempanga kerepmo maga ven i nade Israel."

34 \*Ketla lubang Parisi diga lok keretna, "Neni i riki asu lubanggas mi lolos at laradi gomgo at lubanggas."

### *Limixin Gugu At Ne Moroa Kopmen Dina Buaang*

35 \*Iesu gat pas kantubu at levenmenemen silok axap, eburu mi lengkon menemen kakalik, ga anasa limixin to at laraogu singising atdi la ga vavang mi Lagale Lavavang mumu Linintoo at ne Moroa. La ne Iesu ga lox avukat limixin basinge levenasen anmeres axap.

36 \*Kuren la ne Iesu ga ven nedi buaang limixin la ga balamu di mila diga baava mi levenaknixip la digak pakes aleng, kerekngan levesipsip kopmen taradi loklok tatao atdi.

37 \*La ne Iesu ga lok ti lavaun pinivu ren, "Laraamang mo ira mukun pam, ketla ixo buaang nedi limixin kusu ti lox abeles leveluxa ukeneng at laraogu.

38 Kuren la mina sing ti laradi loklok tatao at laraamang kusu neni naba riki asu tuvuttadi kusu ti lox abeles leveluxa."

\* 9:21: Mt 14:36 \* 9:24: Jo 11:11 \* 9:27: Mt 20:29-34 \* 9:29: Mt 8:13 \* 9:30: Mt 8:4 \* 9:33: Mk 2:12 \* 9:34: Mt 12:24; Mk 3:22; Lu 11:15 \* 9:35: Mt 4:23; Mk 1:39 \* 9:36: Mt 14:14; Kex 27:17; 1 Lav 22:17; Isi 34:5 \* 9:37: Sak 10:2; Mk 6:34; Lu 10:2 \* 10:1: Mk 6:7; Lu 9:1



## 10

### *Iesu Ga Riki Asu Lasangaun Mi Legepura*

(Mk 3:13-19; Lu 6:12-16)

<sup>1</sup> \*Iesu ga xup buru ka nedi lasangaun legepura lavaun pinivu ren saporav i la ni ga raba di mi lolos kusu dina riki asu lubunggas basinge limixin la dina lox aroo luvuttadi mi levenanmeres ga lox abinis labantuxu atdi, la levenasen anmeres bok basinge limixin.

<sup>2</sup> Ni levenasen atnedi na lasangaun legepura luvuttadi vavang. Avot tinotno ne Simon (laasen bok teren ne Pita), la ne Endru neni neton; la ne Jems eburu mi neton laasen teren ne Jon, nedu lumdak at ne Sebedi.

<sup>3</sup> Pilip la ne Batolomiu; Tomas la ne Metiu, neni laradi loklok ka pilas; Jems, nitna ne Alpias, la ne Tadias.

<sup>4</sup> Simon, neni at libinam tadi me Selot, la ne Judas Iskariot, neni mo laradi ga song araba ne Iesu ri limixin kakapmek.

### *Iesu Ga Vaase Asu Lempanga Luvuttadi Vavang Dinaba Lox I*

(Mk 6:7-13; Lu 9:1-6)

<sup>5</sup> \*Iesu ga riki asu na lasangaun legepura luvuttadi mi levelinga xeretna, "Nemen gat nimi gutat pas uto at tenep at limixin kopmen di me Judaia koplata uto at temenemen at leme Samaria.

<sup>6</sup> \*Mina vot pasa mene limixin boro Israel, di lok ngan laxisipsip di soogong.

<sup>7</sup> \*At lavatpas atnimi, mina vavang ti limixin do Linintoo boro vana at laxalibet monga ira auret!

<sup>8</sup> \*Mina lox avukat levenanmeres, la mina lox arooro amlong luvuttadi met, la mina lox avukat nedi lanmeres gu (leprosy) ik lok atdi, la mina riki asu lubunggas basinge limixin. Nia ara raba gamasa vam nimi mi lolos ti lok na leven gugu.

Kuren la mina gugu min la nemen gat mita ro unun tin.

<sup>9</sup> \*Nemen gat mita xip ka tempilas eburu minimi.

<sup>10</sup> \*Nemen mita xip kaka teventat eburu minimi at lavatpas atnimi, koplata tavanga singsiga ri vetara xun, koplata tuvanga vatpas, koplata takdak tit pas, mila laradi gugu at ne Moroa i epovo na lok ka lempanga anan tin boro at limixin neni i vavang tidi."

<sup>11</sup> La ne Iesu ga lok bok tidi xeretna, "La do mina vas pot at temenemen silok koplata temenemen lixilik, mina puse ri taradi avukat la mina nemen eburu min se mina vas kaxat basinge mo lemenemen.

<sup>12</sup> \*Do mina vubeles ukeneng at tara toogu, mina lok tidi xeretna, 'Limila nak lok eburu minimi.'

<sup>13</sup> Do limixin ap mo loogu di siam ka nimi, mina ke limila atnimi nak lok eburu midi. Ket do dixo siam ka nimi, mina ke limila namlong mu nimi.

<sup>14</sup> \*La do tara ixo siam ka nimi kusu na ronga ka levelinga atnimi, mina semla xepe laxakup basinge lengkangkedek atnimi at loxonaleng mina vas kaxat basinge mo loogu koplata mo lemenemen silok.\*

<sup>15</sup> \*A tong tuturun i rinimi do at laaleng ete, ne Moroa naba lox asuusu lumumuat ti limixin boro Sodom la Gomora, ketla neni naba lox asuusu lumumuat silok tinotno ri limixin ap mo lemenemen tongtonga xepe!"

### *Levenmumuat La Levesongsongot Naba Vot*

(Mk 13:9-13; Lu 21:12-17)

<sup>16</sup> \*La ne Iesu ga lok tidi, "Mina ronga i na! Ana riki aanon nimi ngan laxisipsip kantubu at laxanman sio. Mina lok tatao avukat nimi i ngan lisii neni ikleklen solo la minak lox atnaasan ngan levenamno.

\* **10:5:** Gu 13:46 \* **10:6:** Jer 50:6; Mt 15:24 \* **10:7:** Mt 3:2; 4:17; Lu 10:9,11 \* **10:8:** Gu 20:33

\* **10:9:** Lu 10:4 \* **10:10:** Kex 18:31; Lu 10:7; 1 Ko 9:14; 1 Ti 5:18 \* **10:12:** Lu 10:5-6 \* **10:14:**

Lu 10:10-12; Gu 13:51; 18:6 \* **10:14:** Na loklok i lox asuusu i do ne Moroa naba raba lumumuat ti limixin ap mo lemenemen. \* **10:15:** Mt 11:24; Ju 1:7 \* **10:16:** Lu 10:3; Jo 10:12; Gu 20:29; Ro

16:19 \* **10:17:** Mk 13:9-11; Lu 12:11-12; 21:12-15

17 \*Mina reven avukat, mila lentaba luvuttadi mo dinaba ranga alis nimi la dina lok ka nimi ri lavapaase. La dinabak pixis nimi ro xeneng at laraogu singising atdi.

18 \*Dinaba vaxaru nimi ro melamgo at luvuttadi amgomgo la to bok melamgo at lavaorong, mila mi mumu asu ia, la minaba tong asu Lagale Lavavang tidi la ti limixin kopmen di me Judaia.

19 Do dina lok li nimi at lavapaase, nemen gat mita bulu do miba tong lavanga salai la mina vaase xereva. Se at loxonaleng na vot tinimi do ri vaase, ne Moroa axa naba raba nimi mi levelinga kusu mina vaase asu i,

20 \*mila levelinga mina vaase i, kopmen atnimi xa. Ketla Loroonan Kaala at ne Moroa, ne Temen nimi naba paase asuusu i at levenngusno atnimi.

21 \*Lara koeton axa dinaba etaba tuntuna mi luvutneton di ri lanmet. La luvuttemen laxamdak dinaba etaba tuntuna mi laxamdak la laxaalik atdi. La laxamdak mi laxaalik dinabang tonga xepe levelinga at luvuttemen di mi luvutnen di la dinaba lok li di at lanmet.

22 \*Limixin axap dinaba belengatngas tinimi mila mi mumu asu ia. Ketla lara do i tu atmatkun keneng at levesongsongot ise at laxavaxap ap mo levenaleng, ne Moroa naba lox arooro i.

23 \*Do dina lox asongot nimi at tara temenemen, mina sixiro uto at tara temenemen petpes. A tong tuturun i rinimi do nenia, Laradi Mevana, anaba vot la kovisi mi noxo lok axap lugugu atnimi ap mo laramenemen at lenep silok Israel.

24 \*Kopmen tamdak loklox ase na silok ti leeme loklox ase ren, koplata saxaruki na silok ti laradi gomgo ren.

25 \*I epovo do lamdak loklox ase na ngan mun leeme loklox ase ren.

La lasaxaruki na ngan mun laradi gomgo ren. Mo do limixin dina so asen lamgomgo at lixitkis koetemen mi ne Belsebul, diba so asen gilipu levenasen atdi axap di nemen keneng ap mo loogu mi levenasen kapmek!”

*Nemen Mita Marat At Limixin  
(Lu 12:2-7)*

26 \*La ne Iesu ga lok bok keretna, “Nemen gat mita marat at limixin di munepen minimi. Mila levenai monga di se bopbop li i, naba nemen at lasaxaven, la lempanga sai mo dik lox alipe, naba ravasu at lasaxaven la limixin axap dinabaklen i at laaleng ete.

27 Levenai nia a paase xusuk nimi min at lamain, mina vaase i at lemeren limixin axap. La levenai miga ronga i, aga vaase nemnem i rinimi, mina tu ro vana at lempatlagu la mina tong asu i ri limixin axap.

28 \*Nemen mita marat atnedi dipsev amet labantuxu, ketla kopmen dina epovo ri sev amet loroonan. Kusuk mun minak marat at ne Moroa, neni i ruuna lolos kusu ti sev amet labantuxu la na riki loroonan at laradi uto at lemenemen songsongot.

29 I epovo do mina un kaka tegepu natdik mi tegesu xuyen pilas mene. Ketla kopmen tara atdu noxo met gamasa la ne Moroa xopmen naklen i.

30 La tinimi, lengkabinim at lempatlagu atnimi ne Moroa iraklen axap pam i.

31 \*Kuren la nemen gat nemi mita marat. Nemi mi nunuan aleng at lemeren ne Moroa!”

32 La ne Iesu ga lok bok tidi, “Nege do i tong asu i do neni laradi mumu asu ia, ro melamgo at limixin axap. At laaleng ete, anaba tong asu bok

\* 10:18: Gu 25:23; 27:24 \* 10:20: Jo 14:26; 1 Ko 2:4 \* 10:21: Mai 7:6; Mt 10:35; Mk 13:12; Lu 21:16 \* 10:22: Mt 24:9,13; Mk 13:13; Lu 21:17; Jo 15:18-21 \* 10:23: Mt 16:28 \* 10:24: Lu 6:40; Jo 13:16; 15:20 \* 10:25: Mt 9:34; 12:24; Mk 3:22; Lu 11:15 \* 10:26: Mk 4:22; Lu 8:17 \* 10:28: Je 4:12 \* 10:31: Mt 6:26; 12:12 \* 10:33: Mk 8:38; Lu 9:26; 2 Ti 2:12

neni ro melamgo at lemeren ne Moroa to vana at laxalibet do neni laradi rak.

<sup>33</sup> \*Ket do tara na sok tixirixes ia ro melamgo at limixin axap, anaba sok tixirixes kepe box i ro melamgo at ne Tamak to vana at laxalibet.”

*Kopmen Luruburu, Ketla Leepe-seves*

(Lu 12:51-53; 14:26-27)

<sup>34</sup> La ne Iesu ga lok bok tidi, “Nemen mita nua i do nia aga vot kusu ana raba limila ri na lavatbung menemen. Kopmen, a goxo vot kusu ana raba limila, ketla aga vot kusu ti lox aepeseves limixin.

<sup>35</sup> Aga vot kusu ana lok,

‘Laxamdak temes di noxo epen mi luvuttemen di, la laxaalik di noxo epen mi luvutnen di. La loxoenen di noxo epen eburu.

<sup>36</sup> La laradi noxo epen tinotno minedi di nemen at loogu ren.’ *Mai 7:6*

<sup>37</sup> \*Do nege i balamu aleng ne temen koplana nenen la ixo vavara aleng ia, neni xopmen na epovo do na ravasu ngan laradi rak. Do nege i balamu aleng ne nitna xopla ne nitnono, la ixo vavara aleng ia, neni xopmen na epovo do na lok ngan laradi rak.

<sup>38</sup> \*Do nege i xopara na xip ka levenmumuat, i lok ngan laradi na solok ka laxaba ren la ira mumu asu ia, neni xopmen na epovo do na nemen ngan laradi rak.

<sup>39</sup> Do nege i vara i do na ranga alis lorooro ren, neni naba sang apkav i. Ket do nege i soxope lorooro ren ti lok luvukat tarak, neni naba lok kaka lorooro avolo.”

*Luunun Tinedi Di Momo Ka Luvut-tadi Mumu Asu*

*At Ne Iesu*

(Mk 9:41)

<sup>40</sup> \*La ne Iesu ga lok bok tidi, “Do nege i seega rangarang nemi, neni i seega rangarang ia. La do nege i seega rangarang ia, neni i seega

rangarang ne Moroa mo ga riki ia ude at na lavatbung menemen.

<sup>41</sup> Do nege i seega rangarang leeme vapaase ali mila neni leeme vapaase at ne Moroa, neni naba lok ka luunun ngan at leeme vapaase ali. La do nege i seega rangarang ka laradi nunuan, neni naba lok ka luunun ngan at laradi nunuan.

<sup>42</sup> \*A tong tuturun i rinimi. Do nege i raba loxodan mumudut ti tara atdi na limixin tarak, mila neni lun pinivu rak, neni naba lok kaka kobot luunun teren.”

## 11

*Iesu La Ne Jon*

*Laradi Sep Susu*

(Lu 7:18-35)

<sup>1</sup> Se ne Iesu ga raba linga axap ti lasangaun mi legepura lavaun pinivu ren, neni ga vas basinge mo loxot la gat pas uto Galili kusu na lox ase limixin la na vavang to at laramenemen atdi.

<sup>2</sup> \*Ap mo levenaleng ne Jon laradi sep susu ga nemen at loogu xokoxo, neni ga ronga lempanga ne Karisito ga lox i, la neni ga riki lentaba lavaun pinivu ren uto saporap ne Iesu mi levelinga xeretna,

<sup>3</sup> \*“Tong axasev i rinama do xereva, nenu vam Lanarong, koplana tara gove manaba ngangais i?”

<sup>4</sup> La ne Iesu ga vorang i ridi, “Minamlong la mina tong i ri ne Jon mumu lempanga mi ronga i la mi ven i.

<sup>5</sup> \*Nedi limixin mi lengkatli main, mo di reven manga. Nedi lengkangedek atdi ga lok kapmek, mo dit pas avukat. La nedi dik meres mi lanmeres gu (leprosy), di lox avukat pam. La nedi levenbaalung atdi i repe, ding tonga manga. La nedi diga met pam mo di roo xat amlong pam. La limixin banbalo, mo ding tonga Lagale Lavavang.

\* **10:37:** Lal 33:9 \* **10:38:** Mt 16:24-25; Mk 8:34-35; Lu 9:23-24; 17:33; Jo 12:25 \* **10:40:** Mk 9:37; Lu 10:16; Jo 13:20 \* **10:42:** Mt 25:40 \* **11:2:** Mt 14:3 \* **11:3:** Mal 3:1 \* **11:5:** Ais 35:5-6; 61:1

6 \*Luvukat ti neni laradi kopmen noxo subu basinge ia la lebelen ixo lok kapmek ti na lugugu rak.”

7 \*Se lavaun pinivu at ne Jon diga vas kaxat pam, Iesu ga tong levelinga mumu ne Jon tinedi limixin keretna, “At levenaleng migat pas do mina ronga linga at ne Jon to at lamatbin, laradi salai nemi miga lok do miba ven i? Kereva, miga nua i do miba ven taradi naba lok ngan lovobeo, lamanman it mas amdi i?”

8 Lavanga salai migat pas do mina ven i? Kereva, miga ven laradi ga siga lavanga singsiga avukat? Kopmen. Limixin di siga lempanga singsiga avukat la di ruuna lapnovos silok, nedi dina nemen keneng at laraogu ngan loogu nunuan at loorong.

9 \*Mina tong i ria, laradi salai migat pas do mina ven i? Taradi vapaase ali? I ruturun tinotno. A tong i rinimi, do nemi miga ven laradi ga silok aleng ti lavaeme vapaase ali.

10 \*Jon neni laradi mo Lovoang Kaala ga paase mumu i. Moroa ga lok keretna,

‘Laradi vapaase rak, anaba riki amgo i ru kusu na lox agagas li langas tu.’” *Mal 3:1*

11 La ne Iesu ga lok bok, “Nia a tong tuturun i rinimi, Jon laradi sep susu, neni i silok aleng tinedi limixin axap at na lavatbung menemen. Ketla do tara i lok ngan laradi gamasa la neni lanat at Linintoo no vana at laxalibet, ni i silok ti ne Jon.

12 \*Ga ruka i at laaleng ne Jon ga vavang kaxat, la i se at na laaleng lingina, Linintoo no vana at laxalibet gat pot mi lolos, ketla i ekip tangarang mi limixin kakapmek di lolos kusu dina rupe i.

13 Levelinga at lavaeme vapaase ali, la Laulis Linga, limixin diga mumu asu i, se at lovtopot at ne Jon.

14 \*La mo do mi epovo do mina siam ka lempapaase atdi, mina nunu do neni ne Elaisa, mo diga tong i do neni nabamlong.

15 Do mi ruuna levenbaalung, mina ronga avukat na levelinga.”

16 La ne Iesu ga lok bok keretna, “Limixin at na levenaleng, ana vaase poovo midi mi levelinga salai? Nedi di lok ngan laxamdak mi laxaalik kakalik dit kis to at lengkot etang. Lara libinam atdi dip kup ti mo lara libinam atdi,

17 ‘Magak pixan lengkompixan epot tinimi, ketla mi goxopara na tii momo. Magak pixan lengkompixan bukbulu, ketla mi goxopara nang teng.’

18 \*Jon ga vot, la ni ga mun anan la goxo inin vaen, la limixin diga lok do, ‘Lagas i nemen teren!’

19 \*Ketla nenia, Laradi Mevana, aga vot, la nia axo mun anan la a inin vaen, la limixin di lok, ‘Mina ven ba i na laradi! Neni laradi xoxo anan la laradi inin vaen, la i etangas mi luvuttadi loklok ka pilas eburu mi limixin kakapmek!’ Ketla lugugu at ne Moroa i pisik avukat la kerepmo i lox asuusu i do lodomdoma ali at ne Moroa i lox avukat.”

*Laramenemen Ua Kopmen Di Goxo Nunu At Ne Iesu (Lu 10:13-15)*

20 Melemu Iesu ga ruka i xusu na vaase mukmusak ti limixin ap mo laramenemen ua neni ga lok buaang lempanga sangsangu e, mila limixin ap mo laramenemen kopmen di goxo leeng basinge laxakapmek atdi.

21 \*Iesu ga lok keretna, “Naba lok kapmek aleng tinemi limixin me Korasin. La naba lok kapmek aleng bok tinemi limixin me Betsaida. Mo levempanga sangsangu nia aga lox i ro xantubu atnimi, mo do nia gita lox i ro Taia la Sidon, soso mun limixin me go, nedi gita leeng pam la gita etara mun lengkontamon kapmek, la

\* 11:6: Mt 13:57; 26:31 \* 11:7: Mt 3:5 \* 11:9: Lu 1:76 \* 11:10: Mk 1:2; Jo 3:28 \* 11:12: Lu 16:16 \* 11:14: Mal 4:5; Mt 17:10-13; Mk 9:11-13 \* 11:18: Mt 3:4 \* 11:19: Mt 9:14 \* 11:21: Jna 3:6

gita reeve vam laxakup at lengkot atdi.

22 \*Ketla ana tong i rinimi do at laaleng ete, ne Moroa naba lox asuusu lumumuat uto ri limixin at lumenemen Taia la Sidon, ketla langangan lumumuat naba nemen mavana atnimi.

23 \*La nemi limixin me Kapre-naum. Mi vavara i do mina silok ti limixin axap, ketla ne Moroa naba sok gingin asi minimi uto at lemenemen songsongot. Mo lempanga sangsangu, aga lox i dom kantubu atnimi, mo do nia gita lox i ro Sodom, nedi gitaba leeng basinge laxakapmek atdi la ne Moroa gitoxo sele utut kepe mo lemenemen.

24 \*A tong i rinimi do at laaleng ete, Moroa naba lox asu lumumuat ti limixin kakapmek to Sodom, ketla tinemi limixin, lumumuat naba silok aleng tinimi.”

*Iesu Ga Emi Asu Mi Ne Moroa  
(Lu 10:21-22)*

25 \*Ap mo laaleng ne Iesu ga lok ti ne Moroa, “Nia a emi asu minu, Tamak. Nenu Leeme Silok at laxalibet mi lavatkangka. Nia a emi asu minu mila ugara lox ase vam nedi limixin kopmen tevenasen silok atdi mi levelinga mumu Linintoo. La uga lipe i basinge limixin leklen la limixin loklox ase.

26 I rurun, Tamak. Anai uga lox i mi lodoxoma la lomomo ram.”

27 \*La ne Iesu ga lok ti mo limixin, “Tamak ira raba vam ia mi lempanga axap. Kopmen teta naklen ia, ketla ne Tamak kusuk mun. La kopmen teta naklen ne Tamak, ketla nenia ne Nitna xusuk mun, la tinedi mun nenia a vara i kusu ana lox ase di min.

28 \*Nemi axap mik sak saaban mi laxanakhixip keneng at lorooro atnimi, mina vot pasa ia, la ana raba nimi mi loklox amas.

29 \*Mina siam ka loklok tarak la mina ronga ka levenanasa rak. Mila lorooro rak i umsu mi loklok mulus mene, kuren la minaba lok ka loklox amas ti labaroonan atnimi.

30 \*Mina siam ka ia mila levenanasa rak kopmen na lolos la loklok tarak noxo lok ngan lavanga mu-muat tinimi.”

## 12

*Iesu Ga Paase Mumu  
Laaleng Kaala*

*(Mk 2:23-28; Lu 6:1-5)*

1 \*Ap mo levenaleng, ne Iesu gat pas kantubu at leventaamang at laaleng kaala. La lavaun pinivu ren diga roxo la diga xidik kaka lempeven at lempiao, la diga anan i.

2 \*Lubung Parisi diga ven di, la diga lok ti ne Iesu, “Pen ba i. Lavaun pinivu ram dira los polo vam Laulis Linga, i tong i do nemen mitak lok lempanga xeretnom at laaleng kaala.”

3 \*La ne Iesu ga sue di xeretna, “Mi doma bok levelinga at Lovoang Kaala mumu ne Devit? At lara laaleng neni eburu mi limixin teren diga roxo.

4 \*Neni ga vubeles at loogu at ne Moroa la ga lok ka lengkongkide digam taba min ti ne Moroa, la neni eburu mi limixin teren diga anan i. La kerepmo diga los polo vam Laulis Linga mila lavamaasa xusuk mun diga anan mo lengkongkide.

5 \*Mina domangke at levelinga at Laulis Linga i tong i do at laaleng kaala lavamaasa di los polo Laulis Linga mila di gugu ro xeneng at loogu laplavang ap mo laaleng. Ketla kopmen taxpmek atdi mumu i nom.

6 \*Nia a tong i rinimi do lara i silok ti loogu laplavang ira vot pam.

\* 11:22: Ais 23; Isi 26-28; Jol 3:4-8; Amo 1:9-10; Sak 9:2-4 \* 11:23: Ais 14:13-15; Lur 19:24-28

\* 11:24: Mt 10:15; Lu 10:12 \* 11:25: 1 Ko 1:26-29 \* 11:27: Mt 28:18; Jo 3:35; 17:2; Pl 2:9; Jo 1:18;

10:15 \* 11:28: Jer 31:25 \* 11:29: Jer 6:16 \* 11:30: 1 Jo 5:3 \* 12:1: Lal 23:25 \* 12:2: Pas

20:10 \* 12:3: 1 Sml 21:1-6 \* 12:4: Mas 24:5-9 \* 12:5: Kex 28:9-10 \* 12:6: Mt 12:41-42; Lu

11:31-32 \* 12:7: Mt 9:13

7 \*Nemi xopmen mina xasep at levelinga at Lovoang Kaala mo i lok keretna, 'A vara i do lebelen tuntun na umsu atnimi, a xopara loklok tiplavang.'

*Ose*  
6:6

Do nemi gitaklen lavasuun at nai, nemi gitoxo lok li lumumuat atnedi kopmen taxakpemek atdi."

8 \*La ne Iesu ga lok bok, "Nenia Laradi Mevana. La nenia Lamgomgo at laaleng kaala la ak lok tatao mo laaleng."

*Iesu Ga Lox Aroo Laradi Lekngen Ga Molo*  
(Mk 3:1-6; Lu 6:6-11)

9 Iesu ga vas kaxat basinge mo loxot la ga vubeles uto at loogu singising atdi.

10 \*Lara laradi mo ga nemen lekngen ga molo. La lubang Parisi diga doma i do dina bala raba ne Iesu, kuren la diga sue i, "Ik mokso do tara na lox aroo taradi at laaleng kaala?"

11 \*Iesu ga lok tidi, "Do tara atnimi i ruuna lisipsip, la mo lisipsip na subu uto at tamamara silok at laaleng kaala, neni ba rebeng ka i la ba xiv asu ka i.

12 La laradi i silok aleng ti lisipsip. Kuren la ik mokso do ata lok lempanga avukat at laaleng kaala."

13 La ni ga lok ti mo laradi, "Una song asu mi lakngam." La mo laradi ga song asu mi lekngen, la lekngen ga lox avukat axap ta kerekngan mo lara lekngen. 14 \*Ketla lubang Parisi diga sixisu la diga puse ngas kusu dina sev amet ne Iesu.

*Iesu Neni Lasaxaruki At Ne Moroa*

15 \*Iesu gaklen mo levendoxoma atdi la ga vas kaxat basinge mo lemenemen. Buaang limixin diga mumu asu i la neni ga lox aroo nedi digak meres.

16 \*Neni ga tong alolos i ridi do di noxo tong asu i do neni nege.

17 Iesu ga lox i na kusu na lox asoorun levelinga at leeme vapaase ali ne Aisaia keneng at Lovoang Kaala, i lok keretna,

18 \*"Neni na lasaxaruki rak, mo nia aga soxolik ka i. Nenia a balamu i la a lok momo aleng min. Nenia anaba suxa aumsu i mi Loroonan tarak. La neni naba paase axasep loklok manmanton ti limixin axap.

19 Neni noxo etep mi levelinga kopla nap kup mukmusak. Neni noxo ru asuvos i ro melamgo at limixin axap.

20 Neni noxo ru mi loboat tinedi limixin molobe kopla na lok kapmek nedi limixin pakpakes. Neni naba gugu se limixin diba siam kaka lev-eloklok in mantan.

21 La levenabung mixin axap dinaba nunu at laasen teren." *Ais 42:1-4*

*Iesu Ga Paase Mumu Ne Belsebul*

(Mk 3:20-30; Lu 11:14-23)

22 \*La limixin diga lam ka lara laradi uto at ne Iesu. Lagas kapmek ga suxuna i la goxo epovo na paase la luxatli ren ga main. La ne Iesu ga riki asu lagas basinge mo laradi la ni ga lox epovo i xusu na paase la na reven.

23 La limixin axap diga sangu la diga esue, "Kereva, na laradi neni Lanarong, la livisik li at ne Devit?"

24 \*La lubang Parisi diga rongga i na la diga lok ti mo limixin, "Neni i riki asu lubanggas mi lolos at ne Belsebul, laradi gomgo at lubanggas."

25 Ketla ne Iesu gaklen levendoxoma atdi la ni ga tong lavapaase poovo ridi xeretna, "Dola tubung mixin di epes di ri lengkon binam tadi, la dia esep eburu minedi xa, letuna atdi kopmen noxo lok nunuan. La limixin at legese mennen kopla loxoetemen do di epes di kusu ti esep, dinabat kis epeseves.

26 Kuren la mo do ne Satan eburu mi limixin teren dina epeseves ti

\* 12:8: Mt 8:20 \* 12:10: Lu 14:3 \* 12:11: Lu 14:5 \* 12:14: Jo 5:16 \* 12:15: Mk 3:7-10  
\* 12:16: Mt 8:4; Mk 3:12 \* 12:18: Mt 3:17 \* 12:22: Mt 9:32-33 \* 12:24: Mt 9:34; 10:25

legepu binam tadi la dina esep, lolos teren naba nemen atmatkun kereva?

<sup>27</sup> Mo do nia a lox asu di mi lolos at ne Belsebul, limixin atnimi di lox asu di xereva? Nedi di lox asuusu i do levelinga atnimi kopmen nak mokso.

<sup>28</sup> \*Ket do a lox asu di mi lolos at Loroonan Kaala at ne Moroa, Linintoo at ne Moroa monga ira vot pam saparap nimi.

<sup>29</sup> \*Do tara i vara na xip pilo xaka lempanga at loogu at taradi lolos, neni na xoxo alis be mo laradi la melemu na xip kaka ba mo lempanga ren.

<sup>30</sup> \*Do taradi kopmen na xis esogo eburu minia, neni i munepen minia. La do tara kopmen nak lok tooro ia tip kup bubua ka laxasipsip, neni mo laradi ik sak teteles laxasipsip.

<sup>31</sup> \*La a tong i rinimi xeretna. Moroa naba doxoma xepe laxakapmek axap la lavapaase vupu. Ket do tara na vaase vupu ri Loroonan Kaala, ne Moroa noxo doxoma xepe mo laxakapmek.

<sup>32</sup> La ne Moroa naba doxoma xepe tara i paase kapmek mumu ia, Laradi Mevana. Ketla neni noxo doxoma xepe tara i paase kapmek mumu Loroonan Kaala, at na levenaleng la at lorooro melemu bok.

*Luuna Avukat Naba Pisik Larapeven Una Avukat*  
(Lu 6:43-45)

<sup>33</sup> \*Luuna avukat, ni i pisik larapeven una avukat. Luuna xapmek, ni i pisik mun larapeven una kapmek. Limixin di ven kibis luuna at larapeven teren i pisik asu i.

<sup>34</sup> \*Nemi laxamdak at lempasii. Nemi xopmen mina epovo na tong asu levelinga avukat mila nemi mi umsu mi laxakapmek. Levenngusno nemi i paase asuusu lempanga lebelen nemi i umsu min.

<sup>35</sup> Laradi avukat ik lox asuusu lempanga nunuan ik lok at lorooro ren, ketla laradi xapmek ik lox asuusu

mun lempanga xapmek ik lok at lorooro ren.

<sup>36</sup> Nia a tong i rinimi. Limixin dinaba tu at lavapaase ro melamgo at ne Moroa at laaleng ete mumu levelinga xapmek axap diga tong pam i.

<sup>37</sup> Mo do levelinga at tara ga lox avukat, Moroa naba lox asepmus i. Mo do levelinga at tara ga lok kapmek, Moroa naba lok li lumumuat silok teren.”

*Limixin Diga Sing Ne Iesu Kusu Na Lok*

*Tavanga Sangsangu*

(Mk 8:11-12; Lu 11:29-32)

<sup>38</sup> \*Melemu lentaba at lubung Parisi la luvuttadi loklox ase at Laulis Linga diga lok ti ne Iesu, “Leeme loklox ase. Ma vara i do una lok tavanga sangsangu.”

<sup>39</sup> \*La ne Iesu ga lok tidi xeretna, “Limixin at na levenaleng nedi limixin kakapmek tinotno. Di sue ri tavanga sangsangu, ketla kopmen a noxo lok tara ridi. Ketla i epovo do dina doma mumu mun leretere at leeme vapaase ali, ne Jona.

<sup>40</sup> \*Jona ga nemen to xeneng at lebelen lavatmat silok at lavantun aleng kangking la lavantun aleng kanimin. La kerepmo nenia, Laradi Mevana, anaba nemen to xeneng tubu at lavatkangka at lavantun aleng kangking la lavantun aleng kanimin.

<sup>41</sup> \*At laaleng ete limixin boro Nineve dinaba xatu kaxat upana la dina tong asu laxakapmek atnimi, mila diga leeng basinge laxakapmek atdi at nom laaleng diga rongga ne Jona ga vavang tidi. La lara laradi ik lok kantubu atnimi, neni i silok ti ne Jona.

<sup>42</sup> \*At laaleng ete latkin gomgo boro Sheba naba xatu kaxat la na tong asu laxakapmek atnimi limixin at na levenaleng, mila neni gat pas at lavatpas babaalom aleng kusu na rongga lakleklen at ne Solomon. La

\* 12:28: Gu 10:38; 1 Jo 3:8 \* 12:29: Ais 49:24; 1 Jo 4:4 \* 12:30: Mk 9:40; Lu 9:50 \* 12:31: 1 Ti 1:13; Ib 6:4-6; 10:26 \* 12:33: Mt 7:16-20 \* 12:34: Mt 3:7; 15:18; 23:33; Lu 3:7 \* 12:38: Mt 16:1; Lu 11:16; Jo 6:30; 1 Ko 1:22 \* 12:39: Mt 16:4 \* 12:40: Jna 1:17 \* 12:41: Jna 3:5 \* 12:42: Mt 12:6; 1 Lav 10:1-10

lara laradi ik lok pam kantubu at-nimi, neni i silok ti ne Solomon.”

*Lomlong At Lagas Kapmek  
(Lu 11:24-26)*

<sup>43</sup> La ne Iesu ga lok bok, “Do lagas kapmek na oo su basinge laradi, bat pas saasaa at lengkot kopmen tadan teren, la ba reven ti toxot kusu tin ti lok mamana. Mo do noxo vuse ka toxot,

<sup>44</sup> naba doma i xeretna, ‘Anamlong uto at no laradi, nenia aga on basinge i.’

La neni bamlong la na long lenget ka i do mo loxot imgames la ira lox avukat pam la kopmen tara ro xeneng teren.

<sup>45</sup> \*La neni bat pas la na lok ka bok lavanuti lubunggas, laxakapmek atdi i volo aleng i, la dibat pas la diba vubeles ap mo laradi. Kuren la mo laradi ba nemen kakapmek tino. Limixin kakapmek at na levenaleng dinabak lok kuren.”

*Luvutneton Mi Nenen Ne Iesu  
(Mk 3:31-35; Lu 8:19-21)*

<sup>46</sup> \*Iesu move ga paase ri limixin la nenen mi luvutneton diga tu ro xamang, diga vara i do dina epaase min.

<sup>47</sup> [Lara laradi ga lok ti ne Iesu, “Nenam eburu mi luvutnetam no di tu xamang la di vara i do dina ven u.”]

<sup>48</sup> La ne Iesu ga lok, “Nege ne naga, la nege di luvutnetak?”

<sup>49</sup> La ne Iesu ga song ti lavaun pinivu ren la ga lok, “Na luvuttadi nedi di lok ngan ne naga mi luvutnetak.

<sup>50</sup> \*Neni mun i mu asu lavavara at ne Tamak no vana at laxalibet, neni netak, koplana neinuk, koplana ne naga.”

## 13

*Lavapaase Poovo  
Ri Laradi Lotlo  
(Mk 4:1-9; Lu 8:4-8)*

<sup>1</sup> Ap mo mun laaleng Iesu ga vas kaxat basinge mo loogu la gat pas uto

at lisigege at lavatdan kis, la ni ga xis kopok la ga anasa limixin.

<sup>2</sup> \*Ketla limixin diga umsu xangkan i, diga buaang aleng. Kuren la ni ga los kas at lese pang la ni ga xis teren, la limixin diga tu ro loxon.

<sup>3</sup> Neni ga paase poovo ridi mi lempanga buaang. Ni ga lok keretna, “Lara laradi lotlo ga vas su kusu natlotlo piao.

<sup>4</sup> Se neni gatlotlo levenit piao ro at laraamang, lentaba levenit ga subu ro at langas la lavapixa diga vot la diga rok axav i.

<sup>5</sup> Lentaba atdi ga subu ro at laxanuat la lengkongkangka lixilik mene gak lok teren. Levenit piao ga suu xat soso mun mila goxopmen taxangka solo.

<sup>6</sup> Ga se laxangking ga losu upana, ga sev amolos axap nom lempiao, mila levenixe atdi goxo si aleng ukopok la nom lempiao suusu diga met axap.

<sup>7</sup> Lentaba at nom levenit piao ga subu ro at livin gagas la livin gagas ga suu xat la ga is nom lempiao la di goxo epovo bok ba ri suu.

<sup>8</sup> Ketla lentaba levenit piao ga subu ro at loxongkangka nunuan, la ga visik. Lentaba ga visik legesa sangaun kobot (100), lentaba lavanna sangaun, la lentaba lavantun sangaun.”

<sup>9</sup> La ne Iesu ga lok, “Mo do levenbaalung go atnimi, mina rongga avukat na levelinga.”

*Lempasuun At  
Lempapaase Poovo  
(Mk 4:10-12; Lu 8:9-10)*

<sup>10</sup> Melemu lavaun pinivu ren diga vot pasa ne Iesu la diga sue i xeretna, “Tila u tong asu lempapaase poovo ri limixin mo do u paase ridi?”

<sup>11</sup> La ne Iesu ga vorang i ridi xeretna, “Moroa ira raba vam nimi mi lakleklen at Linintoo no vana at laxalibet, gano ga nemen ali pe. Ketla tinedi limixin petpes kopmen.

\* 12:45: 2 Pi 2:20 \* 12:46: Mt 13:55 \* 12:50: Jo 15:14; Ro 8:29 \* 13:2: Lu 5:1-3 \* 13:12: Mt 25:29; Mk 4:25; Lu 8:18; 19:26



12 \*La mo do taradi i ruuna lakleklen kerepmo, Moroa naba raba box i kusu neni naba ruuna lakleklen solo. Ketla ti laradi, kopmen takleklen solo ren, Moroa naba lox asu axap mo lakleklen basinge i, keke i do neni i ruuna laman akleklen lixilik mun.

13 \*Lavasuun teren do nenia a paase ridi mi lempapaase poovo i lok keretna,

‘Nedi di reven lugugu, ketla di noxo ven kibis i. Ding tonga mo levelinga, ketla di noxo xasep teren.’

14 \*Kuren la na lavapaase ali at ne Aisaia ira soorun pam. Moroa ga lok keretna,

‘Minabang tonga amisik, ketla mi noxo xasep. Minaba reven amisik, ketla mi noxo ven kibis.’

15 Lavasuun teren do levendoxoma at na limixin ira rebonot pam, la dira bong pe vam lenbaalung atdi la dira vam pe bok pam lengkatli atdi. Do kopmen, lengkatli atdi naba reven la lenbaalung atdi nang tonga la levendoxoma atdi na xasep la dina leeng la ana lox avukat nedi.’ *Ais 6:9-10*

16 \*Ketla Moroa ik lox anarong nemi lavaun pinivu mila lengkatli atnimi i reven la lenbaalung atnimi ing tonga.

17 A tong tuturun i rinimi! Buaang nedi lavaeme vapaase ali la buaang bok nedi limixin at ne Moroa diga vavara aleng i do dina reven na lugugu rak mi reven i, ketla di goxo epovo. La diga vavara box i do dina ronga levelinga rak ming tonga i, ketla di goxo epovo.”

*Iesu Ga Soxomus Lavasuun At Laradi Gatlotlo Piao (Mk 4:13-20; Lu 8:11-15)*

18 La ne Iesu ga lok bok keretna, “Mina ronga avukar i na, la mina xasep avukat at lavasuun at na lava-paase poovo at laradi gatlotlo levenit piao.

19 Tinedi di ronga lempapaase mumu Linintoo, ketla dixo xasep teren, nedi di lok ngan levenit piao ga subu ro mun at langas. Satan i vot la i lok pes nom levelinga basinge lorooro atdi.

20 Ti levenit piao ga subu ro at laxanuat, lengkongkangka lixilik gak lok teren, ni i ru katling nedi limixin di ronga levelinga la soso mun di siam ka i mi lomomo.

21 Ketla ixo vubeles ukeneng at lorooro atdi, la lununu atdi ixo nemen abao solo. Kuren la ise do levenmumuat i vot eburu mi levesongsongot mumu levelinga at ne Moroa, lununu atnedi i subu soso mun.

22 \*Ti levenit piao ga subu ro at livin gagas, ni i ru katling nedi limixin di ronga levelinga, ketla dik bulu mu solo laxampanga at na lorooro, la nom lavavara atnedi ri lapnovos i itis nom levelinga la dixo pisik tempeven una.

23 La ti levenit piao ga subu at laxangka nunuan, ni i ru katling nedi limixin di ronga levelinga at ne Moroa la di xasep teren, la di pisik lempeven una. Lentaba di visik lempeven una i epovo at legesa sangaun kobot (100) la lentaba lavanna sangaun la lentaba lavantun sangaun.”

*Lavapaase Poovo Ri Lempivilis Kapmek*

24 Iesu ga tong bok lara lavapaase poovo ridi, ni ga lok, “Linintoo no vana at laxalibet i lok ngan laradi gatlotlo levenit piao avukat to at laraamang teren.

25 At laxanimin limixin axap diga unga, la lara lumunepen ga vot la gatlo lempivilis kapmek to xeneng at nom laraamang piao, la no nga i gara onon.

26 Ise levenit ga suu xat la ga lok do na visik, lempivilis kapmek bok ga suu xat.

27 Lavasaxaruki ap mo laradi at laraamang diga vot pasa i la diga lok, ‘Leeme silok. Levenit piao avukat ugatlotlo i. I lok kereva la lempivilis

\* 13:13: Lal 29:4 \* 13:14: Jo 12:40; Gu 28:26-27 12:16-21; 1 Ti 6:9-10,17

\* 13:16: Lu 10:23-24 \* 13:22: Mt 6:19-34; Lu

kapmek ta mo ira suu kantubu at lempiao?’

<sup>28</sup> La ni ga vorang i ridi, ‘Taradi i munepen minia ga lox i nom.’

La diga lok tin, ‘Kereva, u vara i do manat pas la mana xat kepe i?’

<sup>29</sup> La ni ga lok, ‘Kopmen, mila lavanga mina xat kepe lempiao eburu mi lempivilis kapmek.

<sup>30</sup> \*Keke lempiao eburu mi levempivilis kapmek dina suusu eburu se at laaleng ti sep kin. Ap mo laaleng anaba tong i ri limixin gugu rak keretna. Mina rep asu ka avot levempivilis kapmek la minap kos ka di la mina lu arup midi ro at laxao. La mina lok bubua ka lempiao la mina lok li di ro at loogu lili rak.’ ”

*Lavapaase Poovo Ri Liit  
At Luuna Mastet  
(Mk 4:30-32; Lu 13:18-19)*

<sup>31</sup> Iesu ga vaase bok tidi mi lara lavapaase poovo xeretna, “Linintoo no vana at laxalibet i lok ngan lara laradi ga lok ka levenit mastet la gatlotlo i ro xataamang teren.

<sup>32</sup> Nom levenit i lixilik aleng ti levenit axap, ketla do ira suu xat, neni i silok aleng ti lempanga axap i suusu ro xataamang. La ira lok ngan ta luuna, la lavapixa dit pot, la dirap kip gu go at lengkakan una ren.”

*Lavapaase Poovo  
Mumu Liis (Yeast)  
(Lu 13:20-21)*

<sup>33</sup> Melemu ne Iesu ga vaase bok di mi lara lavapaase poovo xeretna, “Linintoo no vana at laxalibet i ngan liis (yeast). Latkin i lok ka i la i lok eburu i mi loxompalava solo kusu na lok lengkongkide min. Liis (yeast) i vubeles axap uto xeneng at loxompalava xusu na so xat.”

*Ua Lavasuun Teren La Ne Iesu Ga Lok Lempapaase Poovo  
(Mk 4:33-34)*

<sup>34</sup> Iesu gak lok lempapaase poovo ri tong i na lempanga ri limixin. Ni

goxo tong tavanga ridi la kopmen lavapaase poovo.

<sup>35</sup> La kerepmo ne Iesu ga lox asoorun levelinga at leeme vapaase ali ga vaase i xeretna,

“Nia anaba tong asu lempapaase poovo ridi. La ana re musumus levempanga megano ua gak lox ali pe, ga ruka i at luruntudum li at na lavatbung menemen.” *Sam 78:2*

*Lavasuun At Lavapaase Poovo  
Mumu Lempivilis Kapmek*

<sup>36</sup> Iesu ga on basinge limixin la ga beles ukeneng at lara loogu, la lavaun pinivu ren diga vot pasa i la diga lok tin, “Una tong asu lavasuun at lavapaase poovo mumu lempivilis kapmek ga su ro xataamang.”

<sup>37</sup> La ne Iesu ga lok tidi xeretna, “Nom laradi itlotlo levenit piao avukat, nenia vam, Laradi Mevana.

<sup>38</sup> \*Nom laraamang i ru katling na lavatbung menemen. Levenit piao avukat, ni limixin dinaba vubeles ti Linintoo. La lempivilis kapmek, ni limixin di mumu asu ne Satan.

<sup>39</sup> La laradi munepen itlotlo lempivilis kapmek, neni ne Satan. Laaleng ti lok bubua limixin, i ru katling laaleng kavaxap at na lavatbung menemen. La limixin gugu, nedi lubangangelo.

<sup>40</sup> \*Lempivilis kapmek di lok bubua di la dira xotos di ro at laxao, naba lok mun kuren tinedi limixin kakapmek at laaleng kavaxap at na lavatbung menemen.

<sup>41</sup> \*Nenia, Laradi Mevana, anaba riki asu lubangangelo rak ti lok ka nedi di lox asubu limixin eburu mi limixin kakapmek uto basinge limixin nunu.

<sup>42</sup> \*La lubangangelo dinaba lu arup midi ro at lemenemen song-songot. Ap mo loxot dibang teng la dina rungur igisa.

\* 13:30: Mt 3:12 \* 13:38: 1 Ko 3:9 \* 13:40: Mt 7:16; Jo 15:6 \* 13:41: Mt 24:31; 25:31-46; Mk 13:27 \* 13:42: Mt 8:12 \* 13:43: Dan 12:3

43 \*La limixin manmanton dinaba soosoo ngan laxangking to at Linintoo at ne Temen di. Do lenbaalung mo atnimi, minang tonga avukat!”

*Lavapaase Poovo Ri Lapnovos Diga Lipe I*

44 \*La ne Iesu ga lok bok tidi, “Linintoo no vana at laxalibet i lok ngan lapnovos di lipe i ro at laxangka. La lara laradi i ven terek ka i la ni ia lipe manga i, la ni i lok momo aleng la ni ia sesep mi lempanga axap teren la neni imlong la ia un kaka mo lenep kangka axap la ia ruuna ka mo lapnovos.”

*Lavapaase Poovo Ri Luuat Gamgames*

45 La ne Iesu ga lok bok tidi, “Linintoo no vana at laxalibet i lok ngan laradi sesep i puse ri laxanuut gamgames.

46 La do ira vuse ka lara, langsung luunun teren, neni it pas la ira sesep mi lempanga axap teren, la ni iramlong ba la ira un ka ba mo luuat.”

*Lavapaase Poovo Ri Laxatkat*

47 La ne Iesu ga lok bok tidi, “Linintoo no vana at laxalibet i lok ngan laxatkat. Limixin sepsep mat di loloa min to at laras la dira sao ka laxanase mat solo min.

48 \*Se mo laxatkat i umsu mi laxanmat, di rep ka i uto loxon la dira xis be xusu dina episa lenmat. Lentaba nunuan di lok li di ro at lengkaxi atdi la lentaba xapmek di lu xepe midi.

49 Naba lok mun kuren at laaleng kavaxap at na lavatbung menemen. Lubungangelo dinaba vot la dina lok ka limixin kakapmek basinge limixin avukat,

50 \*la dinaba lu arup midi ro at lemenemen songsongot. Mo go dinabang teng la dina rungur igisa.”

*Lempanga Maxat La Lempanga Megano*

51 Iesu ga sue di xeretna, “Mi xasep at na lempapaase poovo?”

La diga vorang i rin keretna, “Laaba.”

52 La ni ga lok, “Kuren la nedi axap luvuttadi loklox ase at Laulis Linga do dina mumu asu levelinga at Linintoo no vana at laxalibet, nedi di lok ngan laradi at loogu i xip asu lempanga maxat mi lempanga maut boro xeneng at loogu lili ren kusu na raba limixin min.”

*Limixin Boro Nasaret Diga Sok Tixirixes Kepe Ne Iesu*

*(Mk 6:1-6; Lu 4:16-30)*

53 \*Ise ne Iesu ga vaase axap na lempapaase poovo, neni ga on basinge mo lenep,

54 \*la gamlong uto at lemenemen aulis teren. Ni ga anasa ro at loogu singising atdi. La limixin diga ronga i la diga sangu. Diga esue xeretna, “Ni ga lok ka na lakleklen solo meva? La ga lok ka lolos meva xusu ti lok na lempanga sangsangu?”

55 \*Neni mun lamdak at ne Josep laradi xipkip gu! La ne Maria neni nenen, la ne Jems, la ne Josep, la ne Simon, la ne Judas di mun luvutneton,

56 la luvurinen dik lok bok de. Ni ga lok ka na lakleklen meva?”

57 \*Kuren la diga sok tixirixes kepe i.

La ne Iesu ga lok tidi, “Leeme vaapaase ali, limixin di lok ngangao ren at lengkot axap, ketla to at lemenemen teren, limixin eburu mi libibinat teren, kopmen dina lok ngangao ren.”

58 Iesu goxo lok solo tempanga sangsangu go mila di goxo ruuna epovo lununu.

## 14

*Lanmet At Ne Jon*

*Laradi Sep Susu*

*(Mk 6:14-29; Lu 9:7-9)*

\* 13:44: Mt 19:29; Lu 14:33; Pl 3:7 \* 13:48: Mt 22:9-10 \* 13:50: Mt 13:42; Lu 13:28 \* 13:53: Mt 7:28 \* 13:54: Jo 7:15 \* 13:55: Jo 6:42 \* 13:57: Jo 4:44

<sup>1</sup> Ap mo levenaleng Erodos laradi gomgo boro Galili ga ronga lempanga ne Iesu ga lox i.

<sup>2</sup> La ni ga lok ti luvuttadi guguren, “Agut neni ne Jon to ga roo xat amlong, kuren la neni ira lok nom lempanga sangsangu mi mo lolos teren.”

<sup>3-4</sup> \* \*Avot at na ne Erodos ga sak paxat ka latkin at neton, laasen teren ne Pilip. Laasen ap mo latkin ne Erodias. La ne Jon laradi sep susu ga vaase sok ne Erodos mumu na loklok. La neni ga lok ti ne Erodos, “Ixok mokso do uga epot ka ne Erodias.”

Kuren la ne Erodos ga riki luvuttadi guguren kusu dina ranga alis ne Jon la diga xoxo i la diga lok li i at loogu xokoxo.

<sup>5</sup> \*Erodos ga lok do na sev amer i, ketla neni ga marat bok at limixin me Judaia. Mila diga lok do ne Jon leeme vasa ali.

<sup>6</sup> At laaleng loklok katling at livipisik at ne Erodos, ne nitnono ne Erodias ga tii ro melamgo at limixin. La ne Erodos ga lok momo aleng min,

<sup>7</sup> la ga lok laxakaape do neni naba raba mo loono mi tavanga neni na sing tin.

<sup>8</sup> Neni ga mu asu lodoxoma xa at nenen la ga lok, “Una raba nga ia mo mi lavatlak at ne Jon, laradi sep susu, to at tavattingigon silok.”

<sup>9</sup> Loorong ga ronga i la ga bulu aleng. Ketla neni goxo epovo na los polo mo laxakaape neni ga lok pam i ro melamgo at limixin. Kuren la neni ga raba linga luvuttadi guguren kusu dina sev amet ne Jon kerekngan mo loono ga sing tin.

<sup>10</sup> \*Kuren la diga ra korop ka lavatlak at ne Jon to at loogu xokoxo.

<sup>11</sup> La diga lok li mo lavatlak to at lavattingigon silok la diga raba loono min, la ga raba nenen min.

<sup>12</sup> La lavaun pinivu at ne Jon digat pas la diga lok ka labantuxu ren la

digak mir i. Melemu digat pas la diga tong i na ri ne Iesu.

*Iesu Ga Raba Luxa  
Buaang Limixin*

*(Mk 6:30-44; Lu 9:10-17; Jo 6:1-14)*

<sup>13</sup> Iesu ga ronga lanmet at ne Jon la neni xusuk mun ga mu lese pang uto at loxot mimila. La buaang limixin diga ronga levelinga mumu i na la diga mumu asu i uto loxon boro at levenmenemen atdi.

<sup>14</sup> \*Se ne Iesu ga oso la ga ven nedi buaang limixin, ni ga balamu aleng di la ga lox aroo nedi, diga meres.

<sup>15</sup> Ga ukantinao nga, lavaun pinivu ren diga vot pasa i la diga lok tin, “Ukantinao nga na la na loxot, ni loxot mimila rino, la loxonaleng ti anan ira volo vam. Una riki aonon limixin kusu dibat pas uto at levenmenemen la dina un ka tempanga anan tidi.”

<sup>16</sup> La ne Iesu ga lok tidi, “Ixok epovo do dina on basinge na loxot. Nemi xa mina raba di mi teveluxa kusu dina anan.”

<sup>17</sup> La diga lok tin keretna, “Ma ruuna mun lavalimo lengkongkide la legepu venmat.”

<sup>18</sup> La ne Iesu ga lok tidi, “Mina raba ia mi nom leveluxa.”

<sup>19</sup> \*La neni ga tong i ri mo limixin kusu dina xis kopok ap mo levempivilis avukat. La ni ga lok ka mo levengkongkide la legepu venmat, la ga milik aurut uto vana at laxalibet, la ga tong avukat ti ne Moroa. La neni ga sebek mo lengkongkide la ga raba i ri lavaun pinivu ren, la diga raba limixin min.

<sup>20</sup> \*La limixin axap diga anan la diga an mais. La lavaun pinivu diga luxa lasangaun mi legepura leventat silok mi leveluxa mo limixin diga an ake ren.

<sup>21</sup> La nedi luvuttadi remes diga anan, diga epovo at lavalimo lara-bin sangsangaun kobot. (5000) La lentaba lavakin la laxamdak mi laxaalik kakalik bok diga anan.

\* **14:3-4:** Mt 11:2 \* **14:3-4:** Mas 18:16; 20:21 \* **14:5:** Mt 21:26 \* **14:10:** Mt 17:12 \* **14:14:** Mt 9:36 \* **14:19:** Mt 15:35-39; Mk 8:6-10 \* **14:20:** 2 Lav 4:44

*Iesu Gat Pas To Mavana At Lavatdan Kis Galili*  
(Mk 6:45-52; Jo 6:15-21)

22 La soso mun ne Iesu ga tong i ri lavaun pinivu ren kusu dina los kas at lese pang, la dinamgo rin uto at lenep meo. La neni ga riki aonon limixin.

23 \*Se neni ga riki aonon kepe vam di, neni xusuk ga vas urut uto vana at loxongkaana kusu na ngising. Neni gak lok go se at laxanimin.

24 La ap mo loxonaleng lese pang no garak lox atbutbu nga. La lempoxanao gak paksa ekakat lese pang mila lamanman gat mas lolos tangarang i.

25 Kantubu at lavantun mi lavanna konaleng at laxanimin, Iesu ga vot pasa lavaun pinivu ren to kantubu at lavatdan kis, neni gat pas mun to mavana at lavatdan kis.

26 \*Se diga ven i gat pas to mavana at ladan, diga marat aleng tinotno la diga lok, "Loroonan panga nom!" La digap kup aleng mi lainmarat.

27 La soso mun ne Iesu ga lok tidi, "Nemen gat mita marat, mina lolos. Nenia mun na."

28 La ne Pita ga lok, "Leeme Silok. Do nenu ruturun pam nom, una tong box i ria kusu anat pas mavana at ladan la u dom saporav u."

29 \*La ne Iesu ga vorang i rin keretna, "Ude u."

Kuren la ne Pita ga xatu kaxat boro at lese pang la gat pas to mavana at lavatdan kis uto at ne Iesu.

30 Ketla se neni ga ven lamanman, neni ga marat la gara dong si silatla nga ukopok at ladan. La neni ga xup keretna, "Leeme Silok, una lox aroo ia!"

31 \*Soso mun Iesu ga song asu mi lekngen la ga ranga ka i la ga lok, "Nenu u ruuna lununu i xakalik mun. Tila uxu nunu do nenia a epovo ana lox u xusu unat pas to mavana at ladan ude saporav ia?"

32 La nedu eburu duga los kas at lese pang, la lamanman gara xap matmas nga.

33 \*La lavaun pinivu ro xeneng at lese pang diga lok, "I ruturun aleng do nenu ne Nitna ne Moroa." La diga lotu saporav i la diga emi asu min.

*Iesu Ga Lox Aroo Limixin Mekmeres To Genesaret*  
(Mk 6:53-56)

34 Diga xan polo lavatdan kis la diga oso ro Genesaret.

35 Limixin go diga ven kisip ne Iesu, la diga lox aonon levelinga ri limixin diga ruuna levenanmeres ap mo lengkot axap do ne Iesu mo ga vot. La limixin diga lok ka di uto saporav ne Iesu.

36 \*La diga sing i xusu na ke limixin mekmeres dina long tu at lungusungus at lavanga singsiga ren. La nedi axap diga long tu ren, diga lox avukat ta.

## 15

*Levenanasa At Lubung Parisi La Lubung Sadiusi*  
(Mk 7:1-13)

1 Lentaba lubung Parisi mi luvut-tadi loklox ase at Laulis Linga diga vas kaxat boro Jerusalem la diga vot pasa ne Iesu la diga sue i,

2 \*"Tila ba lavaun pinivu ram di ronga xepe leveloklox ase at lavalabat atdik? Dixo sogos avot be levengkikngen di la melemu dina anan."

3 La ne Iesu ga vorang i ridi xeretna, "La tila ba ming tonga xepe levelinga at ne Moroa xusu mi epovo do mina mumu asu xa levenanasa atnimi?"

4 \*Levelinga at ne Moroa i lok keretna,

'Mina lok ngangao at luvuttemen nimi mi luvutnen nimi, la do tara i paase kapmek ti ne temen mi nenen, limixin dina sev amer i.' *Pas 20:12; 21:17*

\* 14:23: Lu 6:12; 9:28 \* 14:26: Lu 24:37 \* 14:29: Jo 21:7 \* 14:31: Mt 8:26 \* 14:33: Mk 4:39  
\* 14:36: Mt 9:20-21; Mk 5:27-28; Lu 8:44 \* 15:2: Lu 11:38 \* 15:4: Lal 5:16

5-6 Ketla nemi mi lok keretna. Mo do tara na ruuna tempanga do ri lox epovo lavakpakes at ne temen kopla nenen, nemi mi tong i rin do neni na mumu asu leveloklok at lavalabat la na raba ne Moroa min la neni na ke loklok ti lok tooro du. At na mun langas nemi ming tonga xepe levenanasa at ne Moroa la mira mumu asu nga leveloklok atnimi.

7 Nemi luvuttadi loklok sosolom. Aisaia ga paase ali nunuan mumu nimi. Ni ga tong asu levelinga at ne Moroa keretna,

8 'Na limixin di lok ngangao rak mi levelinga mun atdi, ketla lebelen di i vaxalom tino basingea ia.

9 Dixo lotu saporav ia mi luruturun, la dik lox ase mi levelinga at limixin mun!' ”

*Ais 29:13*

*Lempanga I Lox Abilinga Lorooro At Laradi (Mk 7:14-23)*

10 Melemu Iesu ga ro xaka limixin saporav i la ga lok tidi, “Mina rongka ka nunuan lempapaase rak la mina xasep teren.

11 \*Lempanga i vubeles keneng at lungusno laradi, anai xopmen na lox abilinga i. Ketla levelinga laradi i vaase asu i at lungusno, anaa i lox abilinga i.”

12 Melemu lavaun pinivu diga vot pasa i la diga lok, “Uklen pam i do lubang Parisi di suma xapmek ti levelinga ram?”

13 La ni ga lok tidi, “Larauna axap ne Tamak goxotlo li di, neni naba xat pes di.

14 \*Mina ke xepe di mi levenanasa atdi. Nedi di lok ngan lengkatli main la di lok do nedi luvuttadi loklok tooro at limixin. Do laxatli main im lam lara laxatli main, nedu buru dunaba subu tup at lemet.”

15 Pita ga lok ti ne Iesu, “Una soxomus be lavasuun at nom lavapaase poovo rinama.”

16 La ne Iesu ga sue di, “Kereva mo? Nemi bok kovisi mina xasep?”

17 Mina xasep do lempanga anan laradi i anan i la i beles keneng at lebelen, nom i neni i lox asu box i.

18 Ketla lempapaase laradi i vaase asu i at lungusno ren, nom i, i ravasu boro xeneng at lorooro ren. La na mun levelinga, ni i epovo na lox abilinga i.

19 \*Na levempanga xapmek i ravasu boro at lorooro at laradi i lok keretna. Levendoxoma xapmek, la loklok tip sev amet tadi, loklok ting longka, la leveloklok kakapmek maxamang at lixitkis epot, loklok tip kip pilo, la lavapaase xaxarang mu tara, la loklok ti lox asi tara.

20 La nai lempanga i lox abilinga laradi. Ketla do tara na anan la kopmen na gos avot be lukngen, nom kopmen na lox abilinga i.”

*Iesu Ga Lox Aroo Loolik At Latkin Kopmen Boro Israel (Mk 7:24-30)*

21 Iesu ga on basingea mo lemene-men la gat pas uto at lengkot saporap Taia la Sidon.

22 Lara latkin me Kanan mo ga nemen ap mo lenep ga vot pasa ne Iesu, la ga xup silok tin keretna, “Leeme Silok! Livisik li at ne Devit. Una lox asusu lebelen tuntun tia la una lok mumu be loolik tarak. Lagas i suxuna i la i lox atpospa rino i.”

23 Ketla Iesu goxo tong tekolanga rin. La lavaun pinivu ren diga vot pasa ne Iesu la diga lok tin, “Una riki aonon mo latkin! Ia mumu asu dik la irak lox avurupit amisik dik.”

24 \*La ne Iesu ga lok ti mo latkin keretna, “Moroa ga riki ia xusu tinedi mene limixin me Israel diga on soogong.”

25 Nom latkin ga rongka i na la ga xis tiktikbu mi luvatgulom teren la ga lok, “Leeme Silok. Una lok tooro ia.”

26 La ne Iesu ga lok tin keretna, “Ixok mokso do ana lok ka lempanga

\* 15:11: Mt 12:34 \* 15:14: Mt 23:16,24; Lu 6:39; Ro 2:19 \* 15:19: Lur 8:21; Mt 12:34 \* 15:24: Mt 10:6 \* 15:26: Limixin me Judaia diga so asen limixin petpes mi lubangman.

anan at laxamdak la ana lu raba lubungman min.”\*

27 Ketla nom latkin ga lok, “Leeme Silok. I ruturun, ketla lubungman di anan bok lengkon mumus luxa im subu su boro vana at loxonin anan at luvuttadi atdi.”

28 \*La ne Iesu ga lok tin, “Latkin. Lununu ram i silok aleng. Ana lox epovo lisingising taram.” La ap mo mun loxonaleng loolik teren ga lox avukat ta.

### *Iesu Ga Lox Aroo Buaang Limixin*

29 \*La ne Iesu ga vas kaxat me go la gat pas to loxon at lavatdan kis Galili. La ni ga vas urut at lakaana la gat kis go.

30 La buaang nedi limixin, diga vot pasa i la diga lam ka limixin, lengkot atdi ga molo, la lengkatli main, la lentaba levengikngen di la lengkangkedek atdi ga lok kapmek. La lenbaalung baa la buaang bok nedi luvuttadi mi levenanmeres kerepmo, la diga lok ka di uto saparap ne Iesu la ni ga lox aroo di.

31 \*Limixin diga sangu aleng atla diga ven lenbaalung baa diga paase, la luvuttadi mi levengikngen di mi lengkangkedek ga lok kapmek, diga lox avukat. La nedi di goxot pas gano, digat pas ta. La lengkatli main, diga reven. La diga emi asu aleng mi ne Moroa me Israel.

### *Iesu Ga Raba Luxa Buaang Limixin* (Mk 8:1-10)

32 \*Iesu ga ro xaka lavaun pinivu ren saparav i la ga lok, “A balamu aleng na limixin, mila ira vantun ta levenaleng nedi dik lok eburu minia, la kopmen ta tempanga anan kusu tidi ri anan. Axo para i do ana riki aonon gamasa nedi mi lantoxo atdi. Lavanga dina meroxon mu langas uto at laramenemen atnedi.”

33 La lavaun pinivu diga sue i, “Ata ba lok ka tempanga anan ua at na

lenep gamasa kusu naba epovo at na limixin solo?”

34 La ne Iesu ga sue di xeretna, “Lavanisa lengkangkide nemi mi ruuna i?”

La diga vorang i, “Lavanuti lengkangkide la lutpen mat lixilik bok.”

35 La ne Iesu ga tong i ri limixin kusu dina xis kopok at laxangka.

36 La ni ga lok ka lavanuti lengkangkide la lutpen mat la ni ga tong aorong ti ne Moroa, la ga sebex i, la ga raba lavaun pinivu ren min, la diga raba limixin min.

37 La limixin axap diga anan la diga an mais. La melemu lavaun pinivu diga lok ka lavanuti leventat silok la diga suxa aumsu di mi lempanga anan limixin diga an ake ren.

38 Luutus atdi na lavatlok ga epovo at lavanuet larabin sangsangaun kobot (4000). Lavakin mi laxamdak la laxaalik lixilik kopmen di goxo nemen at na luutus.

39 Melemu Iesu ga riki aonon limixin uto at laramenemen atdi la ga los kas at lese pang la ga sen uto at lenep Magadan.

## 16

### *Diga Sing Ne Iesu Kusu Na Lok Tavanga Sangsangu* (Mk 8:11-13; Lu 11:29-32)

1 \*Lubung Parisi mi lubung Sadiusi diga vot pasa ne Iesu la diga vara i do neni na lok tavanga sangsangu xusu dina lok tong pen i.

2 La ne Iesu ga lok tidi xeretna, “Do mi ven laxalibet i memele ukantinao, la mi lok, ‘Laaleng naba lox avukat kantamak.’

3 La do maxantamak, mira lok, ‘Larakabu mo naba vot mila laxalibet i memele la lengkontakabu bok mo.’ Mi reven lavatbung menemen la laxalibet, la mi epovo ri tong asu lavasuun at na lempanga. Ketla xopmen mina xasep at leveloklok

\* 15:28: Mt 8:10,13 \* 15:29: Mk 7:31 \* 15:31: Mk 7:37 \* 15:32: Mt 14:14 \* 16:1: Mt 12:38; Lu 11:16 \* 16:4: Mt 12:39; Lu 11:29

katling ne Moroa im taba nimi min at na levenaleng.

4 \*Limixin kapmek mo dira on basinge vam ne Moroa, di vara tavanga sangsangu, ketla nia noxo lox ase di mi tara. Ketla mina doma mumu loklok katling at ne Jona, no ga nemen at lavantun aleng kangking la lavantun aleng kanimin to xeneng at lebelen leemat.” La ne Iesu ga vas kaxat basinge di.

*Levenanasa At Lubung Parisi Mi Lubung Sadiusi*  
(Mk 8:14-21)

5 Iesu mi lavaun pinivu ren, diga los kas at lese pang la diga sen kaxat uto at lenep meo ap mo lavatdan kis. La lavaun pinivu diga domampe i xusu dina lok ka tengkongkide eburu midi.

6 \*La ne Iesu ga lok tidi, “Mina lok tatao avukat nimi mumu liis (Yeast) at lubung Parisi mi lubung Sadiusi.”\*

7 La lavaun pinivu ren diga epaase kantubu atdi xeretna, “I vaase mo levelinga mila nedik kopmen ta lok ka tengkongkide.”

8 Iesu ga xasep pam at levelinga atdi, kuren la ni ga sue di, “Tila mi emaangun pilo min kantubu atnimi, mumu lengkongkide xopmen mina lok ka i? Lununu atnimi i lixilik.

9 \*Kovisi mina xasep. Kereva, mira domampe vam lavalimo lengkongkide aga sebex i ri lavalimo larabin sangsangaun kobot (5000) limixin? La lavanisa leventat nemi miga suxa i?

10 \*Kereva, mira domampe vam lavanuet larabin sangsangaun kobot (4000) limixin aga raba di mi lavanuti lengkongkide? La lavanisa leventat miga suxa i?

11 Tila la mixo xasep do nenia xopmen ana paase rinimi mumu lengkongkide? Mina lok tatao

avukat nimi mumu liis (yeast) at lubung Parisi mi lubung Sadiusi.”

12 Melemu levendoxoma atdi ga xasep ba do, Iesu xopmen goxo paase ridi mumu liis (yeast) dik lok eburu i mi lengkongkide. Ketla mumu levenanasa\* at lubung Parisi la lubung Sadiusi.

*Pita Ga Tong Asu*  
*Lorooro At Ne Iesu*  
(Mk 8:27-30; Lu 9:18-21)

13 Ap mo laaleng ne Iesu ga vot to at lenep kangka saparap lemenemen, Sisaria Pilipai, la ni ga sue lavaun pinivu ren, “Limixin di lok do nenia, Laradi Mevana, nege?”

14 \*La diga vorang i rin keretna, “Lentaba di lok do nenu ne Jon laradi sep susu. Lentaba di tong i do nenu ne Elaisa, la lentaba di tong i do nenu ne Jeremaia koplara lara leeme vapaase ali megano.”

15 La ne Iesu ga sue di, “Kereva ba nimi? Nemi mi lok do nenia nege?”

16 \*Simon Pita ga vorang i xeretna, “Nenu Lanarong, Nitna ne Moroa, Luntoo Avolo.”

17 \*Iesu ga lok tin, “Loklok anarong tu, ne Simon lamdak at ne Jona, mila kopmen taradi ga tong asu i na ru, ketla ne Tamak no vana at laxalibet.

18 \*Nia a tong i ru do, nenu ne Pita la nenu luuat kis la nia aba vaxaru ka lotu rak to mavana ram, la limixin lolos at ne Satan diba lok tong i kusu dina sele utut kepe i, ketla di noxo epovo.

19 \*Nia anaba raba u mi lengki ri suang lumusmaragu at Linintoo no vana at laxalibet. La mo leveloklok nenu u siam min koplara u sep pepe i nade xopok at na lavatbung menemen, ne Moroa naba siam min to vana at laxalibet.”

20 \*La neni ga vaase lolos ti lavaun pinivu ren do di noxo tong asu i na ri teta.

\* 16:6: Lu 12:1 \* 16:6: Liis (Yeast) i ru katling leveloklox ase at lubung Parisi mi lubung Sadiusi.

\* 16:9: Mt 14:17-21 \* 16:10: Mt 15:34-38 \* 16:12: Di goxo xasep do digak pakes kusu dina ru asepsu at levenanasa at lubung Parisi. \* 16:14: Mt 14:1-2; Mk 6:14-15; Lu 9:7-8 \* 16:16: Jo 6:69

\* 16:17: Mt 17:5; Ga 1:15-16 \* 16:18: Jo 1:42; Ep 2:20 \* 16:19: Mt 18:18; Jo 20:23 \* 16:20: Mt 17:9; Mk 9:9



*Iesu Ga Paase Mumu  
Lanmet Teren  
(Mk 8:31-9:1; Lu 9:22-27)*

<sup>21</sup> Ga se ap mo laaleng ne Iesu ga ruka i xusu na tong i ri lavaun pinivu ren do neni na onon uto Jerusalem. La mo go loxongkulao silok, lava-maasa silok la luyuttadi loklox ase at Laulis Linga dinaba lox asongot aleng i la dina sev amer i. La at laaleng sepsev avantun neni naba roo xat amlong.

<sup>22</sup> Pita ga lam ka ne Iesu basinge lavaun pinivu la ga vaase sox i xeretna, "Leeme Silok. Nemen uta paase xeretnom. Na lempanga xapmek kopmen noxo vot saparav u."

<sup>23</sup> Iesu ga rem gili ri ne Pita la ga lok tin, "Uto u basinge ia. Nenu u lok ngan ne Satan. U vara i do una lok pe ia. U xopara na mu asu lavavara at ne Moroa, ketla u vara mun levendoxoma at limixin."

<sup>24</sup> \*La ne Iesu ga lok ti lavaun pinivu ren, "Mo do tara i vara i do na emu eburu minia, neni na domampe lorooro axap teren, la na gagas li i xusu nap kip losongsongot solo, la neni na mumu asu ba ia.

<sup>25</sup> \*Do nege i vara i do na ranga alis lorooro ren, neni naba sang apkav i. Ket do nege i soxope lorooro ren ti mumu asu ia, neni naba lok kaka lorooro avolo.

<sup>26</sup> \*I lok kapmek do taradi na ru-una ka lempanga axap at na lavatbung menemen, ketla neni ira subu vam basinge lorooro at ne Moroa. Laradi ixo epovo na un ka lorooro avolo.

<sup>27</sup> \*Nenia, Laradi Mevana, mo anaba vot mi lisisixam silok at ne Tamakla eburu mi lubungangelo. La ap mo laaleng limixin axap dinaba lok kaka luunun i epovo mi leveloklok diga lox i.

<sup>28</sup> La a tong tuturun i rinimi do lentaba atdi di tu de, di noxo met

avot ti lovotpot tarak at laaleng nenia, Laradi Mevana, anaba vot ngan Loorong Silok."

## 17

*Moraa Ga Lox Arepukus  
Ne Iesu  
(Mk 9:2-13; Lu 9:28-36)*

<sup>1</sup> Melemu at lavanna levenaleng Iesu ga sat kaka ne Pita, Jems du lueton mi ne Jon, la diga urut uto vana xasep at lakaana. Nedi lavanuet kusuk mun digak lok.

<sup>2</sup> \*Ap mo loxot Moroa ga lox arepukus ne Iesu to melamgo at lavantun lavaun pinivu ren. Lemerenga soosoo ngan laxangking la lempanga singsiga ren gan bun kereknagan lovotas i sovosok.

<sup>3</sup> La soso mun ne Moses la ne Elaisa duga rupot to melamgo atdi la duga epaase eburu mi ne Iesu.

<sup>4</sup> La ne Pita ga lok ti ne Iesu, "Leeme Silok. I lox avukat tinotno do nema mak lok de. Do u vara i, nia anaba xip tavantun taraogu kukuxut, tara ru, tara ri ne Moses la tara ri ne Elaisa."

<sup>5</sup> \*Pita move ga paase la lusugao gamgames ga ravasi la ga vaa di. La diga ronga laxaka at lara boro at lusugao ga lok, "Anaa ne Nuruk, mo a balamu i la a lok momo aleng min. Mina mumu asu levelinga ren."

<sup>6</sup> Ga se lavaun pinivu diga ronga i na, diga subu rintiding ti laxangka, la diga marat aleng.

<sup>7</sup> Ketla ne Iesu ga vot pasa di la ga long tu atdi la ga lok tidi, "Mina xatu upana. Nemen mita marat."

<sup>8</sup> La diga milik aurut upana la di goxo ven tara, Iesu xusuk mun mo gak lok.

<sup>9</sup> \*Diga si at lakaana la ne Iesu ga tong lolos i ridi do, "Nemen mita tong i na ri teta, naba se nenia, Laradi Mevana, anaba roo xat amlong basinge lanmet."

\* **16:24:** Mt 10:38; Lu 14:27 \* **16:25:** Mt 10:39; Lu 17:33; Jo 12:25 \* **16:26:** Mt 4:8-9 \* **16:27:** Mt 25:31; Sam 62:12; Ler 24:12; Ro 2:6; Li 22:12 \* **17:2:** 2 Pi 1:16-18 \* **17:5:** Sam 2:7; Ais 42:1; Mt 3:17; Mk 1:11; Lu 3:22; Lal 18:15 \* **17:9:** Mt 16:20 \* **17:10:** Mal 4:5

10 \*La lavaun pinivu ren diga sue i, “Ua lavasuun teren la luvuttadi loklox ase at Laulis Linga di tong i do ne Elaia naba rupot avot ti Lanarong?”

11 La ne Iesu ga vorang i ridi, “I raturun tinotno. Elaia naba rupot avot la na lox amokso lempanga axap.

12 \*Ketla a tong i rinimi do ne Elaia ga vot pam la limixin di goxo ven kibis i, la diga lok lempanga xapmek tin kerekngan diga vara i. La kuren mun dinaba lox asongor ia, Laradi Mevana.”

13 \*La lavaun pinivu diga xasep ba do ne Iesu ga paase mumu ne Jon, laradi sep susu.

*Iesu Ga Riki Asu Lagas Basinge Lara Lamdak*  
(Mk 9:14-29; Lu 9:37-43a)

14 Iesu mi lavaun pinivu ren digat pas la diga ekip tangarang mi buaang limixin, la lara laradi ga vot pasa ne Iesu la ga xis tiktikbu mi luvatgulom teren.

15 La ni ga lok, “Leeme Silok. Una balamu lamdak tarak. Ing kanovot amisik mi lobomet la i ekip tangarang aleng mi laxasongsongot. La im subu tup amisik at laxao la at ladan.

16 Nia a lam ka i saparap lavaun pinivu ram kusu dina lox aroo i, ketla dixo epovo.”

17 \*La ne Iesu ga lok, “Limixin at na levenaleng kopmen tununu atnimi la levendoxoma atnimi i onon soogong. Lavanisa aleng tinotno nenia aba xip tutu mi levenmumuat atnimi? Nemi mi lox amolo ia. Una lam ka lamdak ude.”

18 La ne Iesu ga vaase lolos ti mo lagas, la lagas ga sixisu basinge nom lamdak. La ap mo mun loxonaleng lamdak ga lox avukat ta.

19 \*Melemu lavaun pinivu xusuk mun diga vot pasa ne Iesu la diga sue i, “Ua lavasuun teren la nema ma

xo epovo xusu mana riki kepe nom lagas?”

20 \*La ne Iesu ga vorang i ridi xeretna, “Lununu atnimi i lixilik aleng. Do mi ruuna lununu i xakalik kerekngan liit mastet, nemi minaba epovo na lok ti na lakaana, ‘Una vas kaxat mede la uto at toxot petpes,’ la ni naba ronga res. La minaba epovo na lok lempanga axap bok.

21 [Lisingising kujuk mene i epovo ri riki xepe lagas kapmek keretnom.”]

*Iesu Ga Paase Manga Mumu Lanmet Teren*

(Mk 9:30-32; Lu 9:43b-45)

22 \*Gase ne Iesu eburu mi lavaun pinivu diga vot eburu ro Galili, Iesu ga lok tidi, “I auret kusu limixin dinaba ranga alis ia, Laradi Mevana la dinaba song araba ia ri limixin esep.

23 La dinaba sev amer ia, ketla melemu nenia anaba roo xat amlong bok at laaleng sepsev avantun.” La lavaun pinivu diga bulu aleng.

*Lexekepe Pilas Ti Loogu Laplavang*

24 \*Iesu eburu mi lavaun pinivu ren diga rupot to Kaprenaum, la luvuttadi loklok ka pilas diga vot pasa ne Pita la diga sue i, “Kereva, laradi loklox ase ram i kepe pilas bok ti loogu laplavang?”

25 La ne Pita ga vorang i, “Laaba.”

Pita ga vot to at loogu ne Iesu gak lok teren, la ne Iesu ga vaase avot tin, la ga lok, “Simon. Kereva lodoxoma ram? Lavaorong at na lavatbung menemen di lok ka pilas meva? At limixin at lenep silok atdi koplata at limixin boro vetpes?”

26 Pita ga lok, “At limixin boro vetpes.”

La ne Iesu ga lok, “I ven ngan ta do limixin mede kopmen di noxo kepe pilas. Kuren la ixo epovo do neda ta kepe pilas.

\* 17:12: Mt 11:14; 14:10 \* 17:13: Lu 1:17

\* 17:20: Mt 21:21; Mk 11:23; Lu 17:6; 1 Ko 13:2

\* 17:17: Lal 32:5,20; Jo 14:9 \* 17:19: Mt 10:1

\* 17:22: Mt 16:21 \* 17:24: Pas 30:13; 38:26

<sup>27</sup> Ketla ta noxo lox amusak nedi na limixin. Kuren la unat pas uto at lavatdan kis la una axanom. La leemat avot una rep ka i, unaba long lenget ka legesa derakma silok to xeneng at lungusno la mo legesa derakma silok naba epovo rida kusu ti kepe pilas ti loogu laplavang.”

## 18

### *Nege I Silok At Linintoo At Ne Moroa (Mk 9:33-37; Lu 9:46-48)*

<sup>1</sup> \*Ap mo mene loxonaleng lavaun pinivu at ne Iesu diga vot pasa i la diga sue i, “Nege i silok at Linintoo boro vana at laxalibet?”

<sup>2</sup> La ne Iesu ga ro ka lara lamdak, la ga vaxaru i ro melamgo atdi,

<sup>3</sup> \*la ga lok, “A tong tuturun i rinimi, tara do ixo leeng basinge laxakapmek teren la ixo lok ka luruvtuvuk at laxamdak kakalik, neni xopmen na epovo do na vubeles at Linintoo no vana at laxalibet.

<sup>4</sup> Laradi do i lox asi luruvtuvuk teren i lok ngan luruvtuvuk at lamdak lixilik, mo laradi naba ruuna ka laasen i silok aleng at Linintoo no vana at laxalibet.

<sup>5</sup> \*La do nege i seega rangarang tamdak keretna at laasen tarak, i lok ngan ta do neni i seega rangarang ia.”

### *Leveloklok Tong Pen Mo Naba Vot (Mk 9:42-48; Lu 17:1-2)*

<sup>6</sup> \*La ne Iesu ga lok bok, “Naba lok kapmek aleng ti tara do na lox asubu tara atdi na laxamdak kakalik di nunu rak. Naba lox avukat tin do dina xoxo li tangsangan tuuat to at laxaka ren la dina dong asi i min uto xopok at lisimaramain.

<sup>7</sup> I lok kapmek aleng ti limixin do lentaba lempanga mo i lox asubu lununu atdi basinge ia. Lempanga xerepmo naba vot, ketla naba lok kapmek ti lara i lok kaxar i!

<sup>8</sup> \*Mo do lakngam mi laxangkedek taram na lox asubu lununu ram, una ra korop pes i la una lu xepe min. I lox avukat do una beles at lorooro avolo mi tenep mene at luxangkedek mi lukngam. Lavanga ne Moroa na lu arup minu at laxao at lemenemen songsongot i nemen amisik.

<sup>9</sup> La do laxatli ram na lox u la lununu ram na subu, una lik gogo asu min la una lu xepe min. I lox avukat do una beles at Linintoo mi tegesa xatli mun. Lavanga ne Moroa na lu arup minu ro at laxao mo do u ruuna legepu xatli.”

### *Lisipsip Ga Soogong (Lu 15:3-7)*

<sup>10</sup> \*La ne Iesu ga lok bok tidi, “Nemen mita sok tixirixes kepe tara at na laxamdak kakalik mila lubung angelo atdi dit pot pasa amisik ne Tamak to vana at laxalibet. Nia a tong tuturun i.

<sup>11</sup> \*[La nenia, Laradi Mevana, aga vot kusu ana puse rinedi diga soogong la ana lox arooro di.]”

<sup>12</sup> La ne Iesu ga tong lavapaase poovo ridi, “Dola tara atnimi i ruuna legesa sangaun kobot (100) laxasipsip la legesara atdi na soogong, neni ba lok lavanga salai? Neni ba on basinge lavasik sangaun mi lavasik laxasipsip to at lenep avukat, la ni nabat pas kusu na ven ti mo legesara no ga on soogong, i se ni naba long lenget ka i.

<sup>13</sup> Nia a tong tuturun i do, mo neni na vuse ka i, neni naba lok momo aleng. Lomomo ren naba volo lomomo ri mo lavasik sangaun mi lavasik di goxo soogong.

<sup>14</sup> La kuren mun ne Temen nimi no vana at laxalibet i xopara i do legesara atdi na laxamdak lixilik na soogong basinge i.”

### *Una Lok Tooro Netam Mo Do I Subu At Laxakapmek*

<sup>15</sup> \*La ne Iesu ga lok bok tidi, “Mo do netam i lok tavanga i lok kapmek

\* 18:1: Lu 22:24 \* 18:3: Mt 19:14; Mk 10:15; Lu 18:17 \* 18:5: Mt 10:40; Lu 10:16; Jo 13:20  
\* 18:6: Lu 17:1-2 \* 18:8: Mt 5:29-30 \* 18:10: Ib 1:14 \* 18:11: Lu 19:10 \* 18:15: Mas 19:17; Lu 17:3; Ga 6:1

tu, una vot pasa i la una vaxase i mi mo losoogong teren, ketla mo lavanga nak lok kantubu xusuk mene atnumu. Mo do ni ba ronga res at levelinga ram, ura lok kaka amlong pam i ri langas in manton.

16 \*Ket do ixo ronga res at levelinga ram, una lok ka bok tegesara xopla tegepu radi eburu minu xusu miba epen mi levelinga atnimi lavantun, kerekngan lovoang kaala i tong i do, 'Levenekarakat nabak mokso mo do tegepura xopla tavantun dina epen mi levelinga.'

17 \*Ket do ixo ronga di, una tong i ri limixin axap di nunu. La do ixo ronga res at limixin nunu, mina sok tixirixes kepe i ngan lavamolon kopla laradi loklok ka pilas."

18 \*La ne Iesu ga lok bok tidi, "Nia tong i rinimi xeretna. Mo levelinga u siam min kopla u sep pepe i nade xopok at na lavatbung menemen, Moroa naba siam min to vana at laxalibet.

19 \*Ana tong box i rinimi do tegepura du mulus do duna sing ti tavanga du vara rin, ne Tamak no vana at laxalibet naba raba du min.

20 \*Mila do legepura xopla lavantun di vot buru xusu dina sing ia xeneng at laasen tarak, nenia mo ak lok eburu midi."

### *Mina Doxoma Xepe Laxakapmek At Luvutneton Nimi*

21 Melemu Pita ga vot pasa ne Iesu la ga sue i, "Leeme Silok. Nenia aba doxoma xepe laxakapmek at netak i lox i ria naba vanisa? Ba vanuti?"

22 \*La ne Iesu ga vorang i xeretna, "Nia a tong i ru. Kopmen do una doxoma xepe laxakapmek teren na vanuti mene, ketla lavanuti sangaun mi lavanuti.

23 Ana vaase u mi na, mila Linintoo no vana at laxalibet i lok keretna. Lara loorong mo ga doxoma i do nakling lugugu pilas ap mo luvuttadi gugu ren.

24 Se neni ga vaxaru kaxat ka lugugu ren, lara ap mo luvuttadi gugu ren diga lox abeles i, ga lok ka legesa sangaun larabin sangaun kobot talen.

25 Ketla neni goxo epovo na vorang mo lempilas. Kuren la loorong ga tong lolos i ri mo laradi gugu kusu neni mo diba sesep min eburu mi latkin teren la laxamdak kakalik atdu, la lempanga axap neni ga ru-una i kusu ti vorang mo lempilas.

26 Laradi gugu ga xis tiktikbu mi luvatgulom teren la ga lok ngangao ro melango at loorong la ga sing aleng i, 'Una balamu ia, la anaba sepo axap ba lempilas taram melemu.'

27 Loorong ga balamu i, kuren la neni ga doma xepe axap mo langsgan lempilas na laradi gugu ga lok ka i la loorong ga soxomus asu i.

28 Melemu mo laradi gugu ga vas su la ga ekip tangarang mi lara laradi gugu bok mo neni ga raba vam i mi legesa sangaun kobot denarias. Neni ga ranga alis i la ga long kukung kaka i la ga lok, 'Una sepo lempilas tarak.'

29 La mo laradi ga xis tiktikbu mi luvatgulom teren la ga sing i xeretna, 'Una balamu ia la melemu aba vorang i!'

30 Ketla neni goxopara, la ga lok ka mo laradi la ga lox abeles i ro at loogu xokoxo kusu na nemen go se at laaleng neni naba vorang amlong mo lempilas teren.

31 Se lentaba luvuttadi gugu diga ven na lavanga, diga bulu aleng. La digat pas uto at loorong la diga tong asu mo lempanga axap tin.

32 La neni ga ro xaka mo laradi gugu ukeneng la ga lok tin, 'Nenu laradi xapmek. Aga doma xepe axap lempilas nenu uga lok ka i rak, mila uga sing ia.

33 Kereva, uxo epovo na balamu mo laradi xerekngan nia aga balamu u?'

34 \*Loorong ga musak, la ga lox abeles mo laradi gugu uto at loogu

\* 18:16: Jo 8:17 \* 18:17: 1 Ko 5:13 \* 18:18: Mt 16:19; Jo 20:23 \* 18:19: Mk 11:24; Jo 15:7

\* 18:20: Mt 28:20; Jo 14:23 \* 18:22: Lu 17:4 \* 18:34: Mt 5:25-26

xokoxo, kusu na nemen at losong-songot naba se at laaleng neni naba vorang axap mo lempilas.”

<sup>35</sup> \*La ne Iesu ga lok, “Ne Tamak no vana at laxalibet naba lok mun nimi xuren do nemi mi noxo doxoma xepe laxakapmek tara i lox i rinimi.”

## 19

### *Iesu Ga Paase Mumu Loklok Ti Ba Korop Epot*

*(Mk 10:1-12)*

<sup>1</sup> Iesu ga vaase axap mo levelinga, la ni ga vas kaxat me go Galili la gat pas uto at lenep Judaia at lenep dan meso at ladan sen Joridan.

<sup>2</sup> La buaang nedi limixin diga mumu asu i la neni ga lok aroo nedi go.

<sup>3</sup> \*Lentaba lubang Parisi diga vot pasa ne Iesu la diga lok tong i mi lara lususue xeretna, “Kereva, Laulis Linga atdik i mulus bok kusu tara na soxope latkin teren mumu mene tepanga gamasa mun?”

<sup>4</sup> \*La ne Iesu ga vorang di xeretna, “Nemi mina xasep do Lovoang Kaala i tong i do ganoxa at lurutu kaxat Moroa ga rudum li lavatlok la lavakin.

<sup>5</sup> \*La ni mun lavasuun at nai la ne Moroa ga lok do laradi remes naba on basinge ne temen mi nenen la nak lok eburu mi latkin teren la nedu dunak lok eburu ngan mun legesara keneng at labantuxu atdu.

<sup>6</sup> La nedu du noxo lok ngan bok ba legepura, ketla legesara mun. Kuren la kopmen tara noxo ra korop leepot at leremes mi latkin teren, mila ne Moroa axa ga ven etang du.”

<sup>7</sup> \*La lubang Parisi diga sue i, “Tilaba ne Moses ga raba nama mi levelinga xeretna, do tara na malagan tevelinga axasep ti latkin teren do neni mo i xopara na epot ta ren la na riki xepe i?”

<sup>8</sup> La ne Iesu ga lok, “Moses ga raba nemi mi nom mila lebelen at

lavalabat atnimi ga vatken, ketla at lurutu kaxat kopmen goxo lok kuren.

<sup>9</sup> \*A tong tuturun i rinimi. Do laradi i soxope latkin teren la kopmen goxo lok loklok ti longka, mo laradi ira longka vam mo do i epot at lara latkin petpes manga.”

<sup>10</sup> \*La lavaun pinivu ren diga lok tin, “Mo do i lok kuren kantubu at leremes mi latkin, i lox avukat do keke leepot.”

<sup>11</sup> La ne Iesu ga lok, “Na laanasa rik lok naa kopmen na vung pavaa limixin axap, ketla tinedi xusuk mun ne Moroa i raba nedi min.

<sup>12</sup> Buaang levempasuun mo ik lok, tila la lavatlok kopmen dina epot. Lentaba mumu i do diga visik axa di xuren. Lentaba mumu nga i do limixin diga lok di xuren kusu di noxo epot. La lentaba dixo epot mila, di raba lorooro atdi kusu dina gugu ngan nedi lavaanat at ne Moroa. Nege do i epovo na siam ka na laanasa ti ke leepot, i vukat do neni na mumu asu i.”

### *Iesu Ga Lox Anarong Laxamdak Mi*

#### *Laxaalik Kakalik*

*(Mk 10:13-16; Lu 18:15-17)*

<sup>13</sup> Lentaba limixin diga lok kaka laxamdak mi laxaalik kakalik atdi uto at ne Iesu kusu neni na lok li lukngen mavana atdi la na lox anarong di. Ketla lavaun pinivu ren diga ven di la diga sep pepe di.

<sup>14</sup> \*La ne Iesu ga lok, “Mina ke laxamdak mi laxaalik kakalik dina vot pasa ia. La nemen mita sep pepe di, mila Linintoo no vana at laxalibet i epovo ridi na.”

<sup>15</sup> Iesu ga lok li vam lukngen mavana atdi, la ni ga vas kaxat ta.

#### *Laradi Gapnovos*

*(Mk 10:17-31; Lu 18:18-30)*

<sup>16</sup> Lara laradi ga vot pasa ne Iesu la ga sue i, “Laradi loklox ase. Anaba lok lavanga avukat salai kusu anaba lok ka lorooro avolo?”

\* **18:35:** Mt 6:15; Mk 11:25; Ep 4:32; Kl 3:13 \* **19:3:** Mt 16:1 \* **19:4:** Lur 1:27; 5:2 \* **19:5:** Lur 2:24; Ep 5:31 \* **19:7:** Lal 24:1-4; Mt 5:31 \* **19:9:** Mt 5:32; 1 Ko 7:10-11 \* **19:10:** 1 Ko 7:1-2,7-9 \* **19:14:** Mt 18:2-3 \* **19:17:** Mas 18:5; Lu 10:28

17 \*La ne Iesu ga vorang i rin keretna, “Ua lavasuun teren la u sue ia mi lavanga salai i lox avukat? Legesara mun i lok avukat la neni ne Moroa. Do u vara na vubeles ti lorooro, una ronga res at Lasangaun Levenaulis Linga.”

18 \*La nom laradi ga sue, “Ua lentaba?”

La ne Iesu ga lok,

“Nemen uta sev amet tara, nemen utang longka tixin, nemen uta xip pilo, nemen uta xarang taba mumu tara mi levelinga xaxarang,

19 \*una lok ngangao at ne tamam mi nenam, la una balamu nedi di nemen saparav u xerekngan u balamu xa u.”

*Pas 20:12-16*

20 La nom laradi ga lok, “Nia aga mumu asu na levelinga axap. Lavanga salai bok move nia ak pakes tin?”

21 \*Iesu ga vorang i rin keretna, “Do u vara loklok taram nan manton tino, una sesep mi lempanga axap taram, la una raba lempilas at nom lempanga ri limixin banbalo la unaba ruuna ka lapnovos silok to vana at laxalibet. La una mumu asu ba ia.”

22 Nom laradi ga ronga i na, la ni ga vas kaxat mi lainbulu silok mila neni gapnovos aleng.

23 La ne Iesu ga lok ti lavaun pinivu ren, “A tong tuturun i rinimi. I lolos aleng do laradi nopnovos na vubeles at Linintoo no vana at laxalibet.

24 Ana tong box i xeretna. I lolos aleng do lavatkamel na vubeles at lamamara at linil, la kerepmo i lolos aleng bok ti laradi nopnovos kusu ti beles at Linintoo at ne Moroa.”

25 Lavaun pinivu diga ronga i na, la diga sangu aleng la diga sue ne Iesu, “Nege ba naba lok kaka lorooro avolo?”

26 \*La ne Iesu ga ven tooro di la ga lok, “Kopmen na epovo do taradi na

lox i na, ketla i epovo do ne Moroa na lok lempanga axap.”

27 La ne Pita ga lok tin, “Kereva ba nama, maga on basinge vam lempanga axap atnama kusu mana mumu asu u. Lempanga salai mo ne Moroa ba raba nama min?”

28 \*La ne Iesu ga vorang i ridi, “Nia a tong tuturun i rinimi. At laaleng ne Moroa na lox amaxat lempanga axap, ap mo laaleng nenia, Laradi Mevana, anabat kis at loxonin orong tarak mi lisisixam silok tarak, la nemi mi mumu asu ia, minabat kis bok at lasangaun mi legapura lengkot kitkis orong la minabang tonga linga at lasangaun mi legapura levenbibinat at limixin me Israel.

29 \*La nedi axap diga on basinge laraogu atdi, luvutneton di, luvurinen di, luvuttemen di, luvutnen di, laxamdak mi laxaalik kakalik atdi, la leventaamang atdi kusu dina lok lugugu rak, nedi dinaba ruuna ka laxampanga solo la dinaba rooro amisik at lorooro melemu.

30 \*Ketla buaang limixin di ruuna levenasen silok at na lorooro, di noxo silok at lorooro melemu. La nedi kopmen dina silok at na lorooro, dinaba silok at lorooro melemu.”

## 20

### *Luunun Ti Luvuttadi Diga Gugu*

1 \*La ne Iesu ga lok bok ti lavaun pinivu ren, “Linintoo no vana at laxalibet i lok keretna. Lara laradi mo ga suubu suu maxantamak, kusu na lok ka tuvuttadi kusu dina gugu ro at laraamang vaen teren.

2 Mo laradi ga mulus kusu na un nedi mi legesa denarias at leges aleng, la neni ga riki aonon ta di uto at laraamang vaen.

3 At lavasik konaleng neni gat pas manga uto at loxot etang, la ga ven manga lentaba luvuttadi mo diga tu gamasa mun go.

\* 19:18: Lal 5:16-20 \* 19:19: Mas 19:18 \* 19:21: Mt 6:20; Lu 12:33; Gu 2:45; 4:34-37 \* 19:26: Lur 18:14; Jop 42:2 \* 19:28: Mt 25:31; Lu 22:30; Li 3:21 \* 19:29: Ib 10:34 \* 19:30: Mt 20:16; Lu 13:30 \* 20:1: Mt 21:33

<sup>4</sup> La neni ga lok tidi, 'Nemi bok minat pas la mina gugu ro at laraamang vaen tarak, la nia aba un nimi mi luunun i epovo at lugugu.'

<sup>5</sup> La diga vas kaxat.

At lasangaun mi legepu xonaleng la at lavantun konaleng neni ga lok ka lentaba bok ti gugu.

<sup>6</sup> Ga auret kusu na valimo xonaleng la ni gat pas manga uto at loxot etang la neni ga ven manga lentaba luvuttadi mo diga tu go, la ni ga sue di, 'Kereva, mia tu gamasa mun nade at na laaleng axap la kopmen mina lok tepanga?'

<sup>7</sup> La diga lok tin, 'Kopmen tara na lok kaka nama ri gugu.'

La ni ga lok, 'Minat pas la mina gugu bok to at laraamang vaen tarak.'

<sup>8</sup> \*Ukantinao at lavanna konaleng temen laraamang vaen ga lok ti laradi loklok tatao at luvuttadi gugu, 'Una xup kaka luvuttadi gugu la una un nedi mi luunun atnedi. Una ruka i atnedi nia a lok ka nedi ri lugugu na ukantinao at lavalimo konaleng la naba xap atnedi, nia a xup ka avot di maxantamak suubu.'

<sup>9</sup> Luvuttadi diga gugu kaxat at lavalimo konaleng diga lok ka legesa denarias ti legetgesa radi.

<sup>10</sup> La nedi mo laradi gomgo ga xup kaka avot nedi, diga vot la diga nua i do dinaba xip ka mavana lixilik ap mo luunun, ketla nedi getgesara diga lok ka bok legesa denarias.

<sup>11</sup> Diga lok ka mo lempilas la diga ruka i xusu dina paase mukmusak ti ne temen mo laraamang.

<sup>12</sup> Diga lok, 'Na luvuttadi nenu ua xup kaka amupit di, la di gugu at loxonaleng lixilik mun. La nema ma gugu at na laaleng axap maxopok at na liplivi at laxangking, ketla luunun atdi i lok ngan bok atnama.'

<sup>13</sup> Ketla temen laraamang ga lok ti legesara atdi, 'Lentangas tarak, axo bala vukpux u. Nenu xa u siam do

aba un u mi legesa denarias at leges aleng.

<sup>14</sup> Una lok ka lempilas taram la una onon uto xolonu. A vara i do ana un na luvuttadi di mupit mi lempilas buaang kerekngan mun a un u min.

<sup>15</sup> Ik mokso ria do ana lok lavanga salai mi lempilas tarak. La nenu u paase mumu parang ia mila nenia laradi ramtaba.'"

<sup>16</sup> \*La ne Iesu ga lok, "La kerepmo bok nedi di mumupit at na lorooro, dinabam gomgo at lorooro melemu la nedi dim gomgo, dinaba mumupit."

### *Iesu Ga Tong Asu*

#### *Lanmet Teren*

*(Mk 10:32-34; Lu 18:31-34)*

<sup>17</sup> At lavatpas at ne Iesu uto Jerusalem, ni ga lam ka lasangaun mi legepura lavaun pinivu ren to basinge limixin la ga lok tidi,

<sup>18</sup> \*"Nedik atanaba onon uto Jerusalem la lara laradi naba song araba ia, Laradi Mevana, ri lava-maasa silok eburu mi luvuttadi loklox ase at Laulis Linga. Nedi dinaba lok li ia at lavapaase la dinaba lok li lumumuat tarak do nenia ana met.

<sup>19</sup> La dinaba song araba ia ri limixin esep boro Rom kusu dina paase aksaksa ria la dinabak pixis ia la dinaba vaxarem ia at laxaba. Melemu at laaleng sepsev avantun nenia anaba roo xat amlong."

### *Nenen Ne Jon Mi Ne Jems Ga Lok*

#### *Lising Ti Ne Iesu*

*(Mk 10:35-45)*

<sup>20</sup> Melemu latkin at ne Sebedi ga vot parap ne Iesu mi lumdak teren. Ni ga xis tiktikbu mi luvatgulom teren to melamgo at ne Iesu, la ga vara sing i mi tara tavanga.

<sup>21</sup> \*La ne Iesu ga sue i, "U vara lavanga salai?"

La ni ga lok, "Una siam do na lumdak tarak dubat kis saporav u at Linintoo ram, lara ro at latno la lara at liviang taram."

\* **20:8:** Mas 19:13; Lal 24:15 \* **20:16:** Mt 19:30; Mk 10:31; Lu 13:30 \* **20:18:** Mt 16:21; 17:22-23

\* **20:21:** Mt 19:28; Lu 22:30 \* **20:22:** Mt 26:39; Jo 18:11

22 \*Ketla ne Iesu ga lok, “Mixoklen laai nemi mi sing tin.”

La ni ga lok ti mo luun pinivu ren, “Kereva, mu epovo do muna suma losongsongot silok eburu minia mo a gagas kusu anaba xip tutu min?”

La duga vorang i rin keretna, “Ma epovo.”

23 La ne Iesu ga lok, “I raturun do nemu munaba suma levesongsongot silok. Ketla kopmen lugugu rak do nia aba tong i do nege nabat kis saparap lakngak tino la saparap lakngak kia. Mo luxot ik lok mun tinedi ne Tamak gara soxolik ka vam di.”

24 Se lasangaun lavaun pinivu diga rongga i na, diga edak du.

25 \*La ne Iesu ga ro bubua ka di la ga lok, “Miklen i do luvuttadi amgomgo at limixin kopmen di me Judaia, di ruuna lolos mavana at limixin atdi.

26 \*Ketla nemen gat na loklok nak lok kantubu atnimi. Mo do tara atnimi i vara i do na silok, neni na lok ngan lasaxaruki atnemi axap.

27 La do tara atnimi i vara i do nam gomgo, neni na lok ngan lasaxaruki gamasa atnimi.

28 \*Nenia Laradi Mevana, la loklok tarak ik lok bok kuren. Nia xopmen a goxo vot kusu limixin dinaba lok ngan lavasaxaruki rak. Ketla nia aga vot kusu ana lok ngan lasaxaruki ridi, la kusu ana raba lorooro rak ngan laxaavuk tidi buaang limixin.”

*Iesu Ga Lox Aroo Luradi Lengkatli Atdu Ga Main*

*(Mk 10:46-52; Lu 18:35-43)*

29 Iesu eburu mi lavaun pinivu ren, diga vas kaxat basinge lemenemen Jeriko, la buaang limixin diga emu eburu midi.

30 \*La legepu radi, lengkatli atdu ga main, mo dugat kis at lisigege ngas. Se duga rongga i do ne Iesu ga vas polo du, duga xup keretna, “Leeme Silok. Livisik li at ne Devit. Una balamu nama.”

31 La mo limixin diga tong i ridu do duna lok pilo, ketla dugap kup aleng, “Leeme Silok. Livisik li at ne Devit. Una balamu nama.”

32 La ne Iesu ga ru la ga ro xaka du la ga sue du, “Lavanga salai mu vara i do ana lox i rinumu?”

33 Duga vorang i xeretna, “Leeme Silok. Ma vara i do lengkatli atnama na xasep.”

34 Iesu ga balamu du la ga long tu at lengkatli atdu. La soso mun lengkatli atdu ga xasep la duga emu mi ne Iesu.

## 21

*Iesu Ga Beles To Jerusalem Ngan Loorong Silok*

*(Mk 11:1-11; Lu 19:28-40; Jo 12:12-19)*

1 Iesu mi mo limixin buaang diga vas auret lemenemen silok Jerusalem, la diga rupot to at lemenemen Betpage gak lok at Lakaana Olip. La ne Iesu ga riki amgo legepu radi pinivu ren.

2 Avot be ni ga lok tidu xeretna, “Munat pas uto at nom lemenemen ik lok to melamgo atnumu. La soso mun munaba long lenget ka lodongki eburu mi lodongki maxat teren, mo diga xoxo li du go. Muna soxomus ka du la muna lok ka du ude.

3 \*Mo do tara na sue numu do, ‘Tila nemu mu soxomus ka i nom ludongki,’ muba lok tin do Leeme Silok i vara du la soso mun neni ba raba numu midu.”

4 Anai ga ravasu xusu na lox asoorun levelinga at ne Moroa lara leeme vapaase ali ga tong asu i,

5 \* “Una tong i ri limixin to Jerusalem do, ‘Pen ba i. Loorong Silok atnimi it pas saparap nimi, neni laradi loklok mulus mene la it kis at lodongki, ni lodongki maxat.’ ” *Sak 9:9*

6 La mo luun pinivu duga mumu asu levelinga at ne Iesu.

\* 20:25: Lu 22:25-26 \* 20:26: Mt 23:11; Mk 9:35; Lu 9:48 \* 20:28: Lu 22:27; Pl 2:7; 1 Ti 2:6

\* 20:30: Mt 9:27; 15:22 \* 21:3: Mt 26:18 \* 21:5: Ais 62:11



<sup>7</sup> Dugat pas la duga lok ka nom lodongki eburu mi lodongki maxat teren. Duga lok li levempanga singsiga atdu teren la ne Iesu ga xis teren.

<sup>8</sup> \*La buaang limixin diga sa li levempanga singsiga atdi ro at langas. La lentaba vetpes diga ra ka lengkakan bisu la diga lok li mu langas min.

<sup>9</sup> La nedi buaang limixin digat pas to melango la nedi axap digat pas melemu digap kup momo xeretna,

“Leemi asu ri livisik li at ne Devit, Luvukat ti na laradi it pas mi laasen at Leeme Silok. Leemi asu silok tin.” *Sam 118:26*

<sup>10</sup> Se ne Iesu ga beles at lemenemen silok Jerusalem, limixin axap diga sangu la diga esue xeretna, “Nege mo?”

<sup>11</sup> \*La mo limixin diga emu mi ne Iesu la diga vorang i ridi xeretna, “Na ne Iesu, leeme vapaase ali boro Galili at lemenemen Nasaret.”

### *Iesu Ga Beles To Xeneng At Loogu Laplavang*

(*Mk 11:15-19; Lu 19:45-48; Jo 2:13-22*)

<sup>12</sup> La ne Iesu ga beles ukeneng at loogu laplavang la ga xala su mi limixin diga unun panga la limixin diga sesep mi lempanga atdi. La ni ga ba gili levenora lili atnedi digak lox ekun lempilas la ga ba gili levengkonin kitkis atnedi diga sesep mi levenamno.

<sup>13</sup> \*La ni ga lok tidi, “Levelinga at ne Moroa ik lok keneng at Lovoang Kaala i lok keretna,

‘Loogu rak dinaba so asen i mi loogu singsising.’ *Ais 56:7*

Ketla nemi mira lok kapmek pam i, i ngan loogu loklox alipe at luvuttadi dip sep paxat ka panga.”

<sup>14</sup> Limixin mi lengkatli atdi ga main digat pot pasa i la nedi bok

lengkangkedek atdi ga lok kapmek digat pot pasa i la ni ga lox aroo di.

<sup>15</sup> Ket lavamaasa silok la luvuttadi loklox ase at Laulis Linga diga ven mo lagale lempanga sangsangu ren, la diga ronga levelinga at laxamdak mi laxaalik kakalik digap kup keretna, “Ata emi asu mi livisik li at ne Devit.” La nedi diga musak.

<sup>16</sup> La diga lok tin, “Kopmen nak mokso na levelinga at na laxamdak mi laxaalik.”

La ne Iesu ga lok tidi, “Mina domangke at na levelinga ik lok at Lovoang Kaala i lok keretna,

‘Nenu ne Moroa ura lox ase vam laxamdak mi laxaalik kakalik eburu mi lengkadede kusu dina emi asu minu.’” *Sam 8:2*

<sup>17</sup> La ne Iesu ga vas kaxat basinge di la ga vas su at lemenemen silok Jerusalem la uto Beteni, la ga midi go at laxanimin.

### *Iesu Ga Vaase Sok Luuna Pik (Mk 11:12-14,20-24)*

<sup>18</sup> Ga maxantamak suubu at lomlong teren uto at lemenemen silok, Iesu ga roxo.

<sup>19</sup> \*La ni ga ven luuna pik go at lisigege ap mo langas la ni ga vas li ren kusu na dik ka teveven una. Ketla ni goxo ven lenget ka tempeven teren, ga vavaxan gamasa mene. La ni ga lok ti mo luuna pik, “U noxo visik bok ba tempeven una!” La soso mun luuna pik ga mang ta.\*

<sup>20</sup> Lavaun pinivu diga ven i na la diga rakdu aleng, la diga sue i, “I lok kereva na la ira mang soso?”

<sup>21</sup> \*La ne Iesu ga lok tidi, “A tong tuturun i rinimi. Mo do mina nunu ruturun at ne Moroa la kopmen lodoxoma atnemi na sixit ekarakat at levelinga ren, minaba epovo do mina lok mun lempanga xerekngan nia a lox i ri na luuna pik. La kopmen na xusuk mun i, ketla minaba epovo bok do minaba vaase lolos ti

\* **21:8:** 2 Lav 9:13 \* **21:11:** Mt 21:46 \* **21:13:** Jer 7:11 \* **21:19:** Lu 13:6 \* **21:19:** Na lavapaase poovo rinedi limixin me Judaia la lavanga salai naba vot parap di do di noxo visik asu teveloklok nunuan. \* **21:21:** Mt 17:20; Lu 17:6; 1 Ko 13:2; Jo 14:12 \* **21:22:** Mt 7:7-11; 18:19; Jo 14:13-14

na lakaana, la ni na xatu kaxat la na subu tup ti laras.

<sup>22</sup> \*Do mi ruuna lununu ruturun, ne Moroa naba raba lovoporang ti mo lempanga mi sing tin.”

*Lususue Mumu Lolos Ne Iesu Ga Gugu Min*

(Mk 11:27-33; Lu 20:1-8)

<sup>23</sup> \*Iesu ga vubeles uto at loogu laplavang, la neni ga anasa limixin, la lavamaasa silok mi loxongkulao silok at lubung mixin me Judaia diga vot pasa i la diga lok, “Lavapaase axasep salai nenu u ruuna i xusu ti lox i na lempanga? La nege ga raba u mi nom lavapaase axasep?”

<sup>24</sup> La ne Iesu ga vorang i ridi xeretna, “Ana sue bok nimi mi lara lususue, la do mina vorang avukat taba ia min, aba vaase axasep ba nimi, do nenia a lok na lempanga mi lavapaase axasep salai nom.

<sup>25</sup> Lesep susu at ne Jon ga laa meva, boro at ne Moroa kopla boro mun at limixin?”

La diga epaase xantubu atdi, la diga lok, “Mo do ata lok ‘Boro at ne Moroa,’ neni naba lok tidik keretna, ‘Tila ba mi goxo nunu at levelinga at ne Jon?’

<sup>26</sup> \*La mo do ata lok, ‘Boro at limixin,’ ata marat bok at limixin, mila nedi axap di nunu do ne Jon neni leeme vapaase ali.”

<sup>27</sup> Kuren la diga lok ti ne Iesu, “Maxoklen i.”

La ne Iesu ga lok tidi, “Nia bok a noxo tong i rinimi do, nenia a lox i na lempanga mi lavapaase axasep atnege.”

*Iesu Ga Vaase Asu Leretere Mumu Lumdak La Ne Temen Du*

<sup>28</sup> \*La ne Iesu ga lok bok tidi, “Mina doxoma avukat i na. Lara laradi ga ruuna lumdak, la ni ga vot pasa mo lamdak avot la ga lok, ‘Nuruk, a vara i do unat pas uto at laraamang vaen mo lingina la una gugu.’

<sup>29</sup> La ne nitna ga lok, ‘Nia a noxot pas.’ Ketla melemu neni ga lox ekun lodoxoma ren la gat pas.

<sup>30</sup> La ne temendu ga vot pasa manga lamdak sepsev agepura la ga vaase manga rin mi lempapaase kerekngan neni ga vaase avot pam min ti lamdak avot. La mo lamdak ga lok, ‘Tamak, nia anaba lox i.’ Ketla neni goxot pas.

<sup>31</sup> Ua lara atdu na ga lok lugugu ne temendu ga tong i?”

La diga lok, “Mo lara avot.”

Kuren la ne Iesu ga lok tidi, “A tong tuturun i rinimi xeretna. Luvuttadi loklok ka pilas la lavakin ngarangat mo dinabam gomgo avot tinimi uto at Linintoo at ne Moroa.

<sup>32</sup> \*Lavasuun teren keretna. Jon, laradi sep susu, ga vot pasa nimi la ga vavang tinimi mi langas ti loklok manmanton, ketla mi goxo nunu ren. Ketla luvuttadi loklok ka pilas mi lavakin ngarangat diga nunu ren. Miga ven nedi diga leeng, ketla nemi mi goxo leeng la mi gita nunu ren.”

*Lavapaase Poovo Ti Luvuttadi Kapmek Diga Lok*

*Tatao Laraamang*

(Mk 12:1-12; Lu 20:9-19)

<sup>33</sup> \*La ne Iesu ga lok bok tidi, “Mina ronga bok na lara lavapaase poovo. Lara laradi ga ruuna loxongkangka la gatlo laraamang vaen teren. La ni ga bos kangkan i la ga xe lamamara kusu ti loplok li levendan vaen teren. La melemu ga lok loogu xukuxut. La ni ga raba lentaba luvuttadi min kusu dina lok tatao i la neni ga vas kaxat uto at lenep petpes.

<sup>34</sup> Laaleng ga vot kusu dina dik ka lempeven una at nom laraamang, laradi at laraamang ga riki lentaba lavasaxaruki ren kusu dina lok ka mo levempeven una.

<sup>35</sup> \*Ketla nom luvuttadi loklok tatao at laraamang diga ranga alis di la diga tit pupu lara, diga sev amet lara la diga lu amet lara sepsev avantun.

\* 21:23: Jo 2:18 \* 21:26: Mt 14:5; 21:46 \* 21:28: Lu 15:11 \* 21:32: Lu 3:12; 7:29-30 \* 21:33: Ais 5:1-2; Mt 25:14 \* 21:35: Mt 22:6

<sup>36</sup> La neni ga riki lavasaxaruki vetpes bok uto saporap di, buaang atdi digat pas ugo. Ketla luvuttadi loklok tatao diga lok kapmek di kerekngan nedi no avot.

<sup>37</sup> La at laxavaxap neni ga riki ne nitna. Neni ga lok, 'Nedi diba lok ngangao at lamdak tarak.'

<sup>38</sup> \*Ketla luvuttadi loklok tatao diga ven ne nitna gat pas go boro, la diga lok, 'Lamdak akmokso at laradi at na laraamang nom it pas boro. Ata sev amer i, la ataba ruuna ka na laraamang.'

<sup>39</sup> \*La diga ranga alis i la diga lu asu min ukamang ap mo laraamang la diga sev amer i."

<sup>40</sup> La ne Iesu ga sue di, "At laaleng laradi at nom laraamang naba vot pasa nom luvuttadi loklok tatao, neni naba lok lavanga salai ridi?"

<sup>41</sup> Diga vorang i rin keretna, "Neni naba sev amet di la naba raba nom laraamang ti luvuttadi vetpes kusu dina lok tatao i la at laaleng ti sep kin dinaba raba i mi loxot teren at lempeven una at nom laraamang."

<sup>42</sup> \*La ne Iesu ga lok tidi, "Mina domangke at levelinga at Lovoang Kaala i lok keretna,

'Mo luuat luvuttadi xipkip gu diga sok tixirixes kepe i, ga ravasu ngan Luuat Kis la lugugu ren i silok aleng. Leeme Silok axa ga lox i na la i lox avukat aleng at levereven atdik.' *Sam*  
*118:22-23*

<sup>43</sup> Kuren la a tong i rinimi. Moroa naba lok kepe Linintoo basinge nemi limixin me Judaia la naba raba i ri limixin mo diba lox asuusu levempeven una nunuan.

<sup>44</sup> \*'[Do tara na subu at nom luuat, neni naba rekoxorop axakalik. La do, mo luuat na subu ro mavana at tara, neni naba remumus axap.]'

<sup>45</sup> Lavamaasa silok la lubung Parisi diga ronga na lempapaase poovo at ne Iesu la digaklen i do neni ga paase poovo mumu di.

<sup>46</sup> \*La diga puse ngas kusu dina ranga alis i, ketla di goxo epovo mila diga marat at limixin mo diga lok do ne Iesu neni leeme vapaase ali at ne Moroa.

## 22

### *Lavapaase Poovo Ri Leluxa* *(Lu 14:15-24)*

<sup>1</sup> Iesu ga paase manga ridi mi lava-paase poovo, ni ga lok,

<sup>2</sup> "Linintoo no vana at laxalibet i lok ngan loorong ga gagas li leluxa ri loklox epot at lamdak teren.

<sup>3</sup> Neni ga riki lavasaxaruki ren ti mo limixin ni gara tong li vam atdi ri mo leluxa kusu dina tong i ridi do laaleng ti leluxa ga vot pam, ketla diga ronga xepe mo levelinga.

<sup>4</sup> \*La ni ga riki manga lentaba lavasaxaruki mi levelinga xeretna, 'Mina tong i rinedi no nenia aga tong li vam atdi do ara gagas li vam leluxa. Nia ara sep pam laxanbulumaxao, la lempanga axap ara gagas li vam i. Mina tong i ridi do dina vas kaxat ta ri leluxa at loklox epot.'

<sup>5</sup> Ketla nedi diga ronga xepe mo levelinga la digak lox angtang mene at leven gugu atdi xa. Lara avot ga vas kaxat uto at laraamang teren. Lara bok ga lok lugugu ti sesep mi lempanga.

<sup>6</sup> \*La nedi lentaba vetpes diga ranga alis lavasaxaruki la diga lox asongot di la diga sev amet di.

<sup>7</sup> La mo loorong ga musak teng. Ni ga riki limixin esep teren la diga sev amet di la diga xotos axap lemene-men silok atdi.

<sup>8</sup> La neni ga lok ti lavasaxaruki ren, 'Leluxa i gagas pam, ketla mo luvuttadi nia aga ro ka di ti na leluxa nedi limixin kakapmek mun la ixo epovo do limixin kakapmek dinat kis at na laanan.

<sup>9</sup> Minat pas uto at larangas la mina ro xaka limixin, mi ekip etangarang

\* **21:38:** Mt 27:18    \* **21:39:** Ib 13:12    \* **21:42:** Gu 4:11; Ro 9:33; 1 Pi 2:6-8    \* **21:44:** Dan 2:44-45

\* **21:46:** Mt 21:26    \* **22:4:** Mt 21:36    \* **22:6:** Mt 21:35

midi go kusu dina rupot ti leluxa rak.’

<sup>10</sup> La lavasaxaruki ren diga epe-seves uto at larangas la diga ro xaka limixin axap diga ekip tangarang midi, nedi limixin avukat eburu mi limixin kakapmek. La loogu ri loklok epot ga umsu mi mo limixin.

<sup>11</sup> Ketla loorong ga vubeles ti ven mo limixin, la ni ga ven lara laradi goxopmen tevempanga singsiga ren ti loklox epot.

<sup>12</sup> La ni ga sue nom laradi, ‘Lentangas tarak. Nenu u beles ude xereva la kopmen tevempanga singsiga ram ti loklox epot?’ Ketla mo laradi goxo tong toxolinga.

<sup>13</sup> \*La loorong ga tong i ri luvuttadi gugu ren keretna, ‘Mina xoxo lukngen mi luxangedek teren la mina lu asu min uto xamang kusu neni na vubeles at lamain bonot no limixin dinabang teng boron la dinaba rungur ivivilis.’ ”

<sup>14</sup> La ne Iesu ga lok bok, “Limixin dinaba lok kuren mila ne Moroa i toro rinedi buaang limixin, ketla lentaba mene atdi ne Moroa ba sox-olik ka di.”

*Lexekepe Pilas Ti Ne Kaisar  
(Mk 12:13-17; Lu 20:20-26)*

<sup>15</sup> \*La lubung Parisi diga vas kaxat basinge mo lenep la diga gagas kusu dina bala arup ne Iesu mi levelinga.

<sup>16</sup> La diga riki lavaun pinivu atdi eburu mi limixin diga mumu asu ne Erodes uto saporap ne Iesu. Diga lok tin keretna, “Leeme loklox ase. Maklen i do nenu laradi ruturun la u anasa limixin mi leveloklok at ne Moroa la mo levelinga ram ik mokso. Uxo lok tooro legesa binam tadi xusuk mun mila uxu doxoma solo i do tara i ruuna levenasen silok kopla kopmen.

<sup>17</sup> Una tong i rinama do ua lusumsuma ram. Kereva, ik mokso do mana xepe pilas ti ne Kaisar kopla kopmen?”

<sup>18</sup> Iesu ga ven kibis laxaxarang atdi la ga lok tidi, “Nemi luvuttadi loklok sosolom. Tila mi lok do mina lixo ia?”

<sup>19</sup> Mina lox ase ia mi tuxuven denarias mo mi kepe min.” La diga raba i mi legesa denarias.

<sup>20</sup> La ni ga sue di, “Lamang la laasen atnege i nemen teren?”

<sup>21</sup> \*La diga vorang i, “At ne Kaisar.”

La ni ga lok tidi, “Mina raba ne Kaisar mi lempanga i epovo at ne Kaisar, la mina raba ne Moroa mi lempanga i epovo at ne Moroa.”

<sup>22</sup> Diga ronga lovoporang teren, la diga sangu, la diga on basinge i.

*Lususue Mumu Laxakatu Kaxat  
Amlong*

*(Mk 12:18-27; Lu 20:27-40)*

<sup>23</sup> \*Ap mo mun laaleng lentaba at lubung Sadiusi diga vot pasa ne Iesu, diga lok do limixin diga met pam, di noxo roo xat amlong. Diga lok tong pen ne Iesu xeretna,

<sup>24</sup> \* “Leeme loklox ase. Moses ga tong i rinama do taradi na met la kopmen tamdak teren, neton nom laradi naba epot ap mo lanaa rixin, kusu duba visik tamdak ti ruuna ka lempanga ap mo laradi ga met.

<sup>25</sup> Ga lavanuti loxoeton diga nemen kantubu atnama. Lara gomgo ga epot la ga met, kopmen ni goxo visik taxamdak, kuren la lara sepsev agepura ga epot manga at nom latkin.

<sup>26</sup> La lara sepsev agepura ga met bok la lara sepsev avantun bok ga met. La nedi loxoeton axap diga epot at nom latkin diga met.

<sup>27</sup> La melemu nom latkin ga met.

<sup>28</sup> At laaleng dola limixin dina xatu kaxat amlong, ti nege rinotno nom latkin, mila nedi axap diga epot teren?”

<sup>29</sup> La ne Iesu ga vorang i ridi xeretna, “Nemi mi soogong at na lavanga mila nemi xopmen mina xasep at levelinga at Lovoang Kaala la lolos at ne Moroa.

\* 22:13: Mt 8:12; 25:30; Lu 13:28 \* 22:15: Mk 3:6 \* 22:21: Ro 13:7 \* 22:23: Gu 23:8 \* 22:24: Lal 25:5

<sup>30</sup> Ap mo laaleng limixin dinaba xatu kaxat amlong, di noxo epot. Dinaba nemen naa ngan lubungan-gelo ro vana at laxalibet.

<sup>31</sup> Ketla a vara i do ana lox axasep nimi mumu laxakatu kaxat amlong at limixin basinge lanmet. Nemi mixo xasep at levelinga at ne Moroa ga raba nimi min.

<sup>32</sup> \*Mo levelinga i lok keretna, 'Nia ne Moroa at ne Abaram, Moroa at ne Aisak, la Moroa at ne Jakop.'

*Pas 3:6*

Ap mo laaleng ne Moroa ga tong i na, nedi lavantun diga met pam. La neni ne Moroa atnedi limixin di rooro, la kopmen atnedi luvuttadi met."

<sup>33</sup> Limixin diga rongga i na, la diga sangu aleng at levenanasa at ne Iesu.

*Ua Levelinga At Ne Moroa I Silok Aleng*

*(Mk 12:28-34; Lu 10:25-28)*

<sup>34</sup> Lubung Parisi diga rongga i do ne Iesu ga vaase pe lubung Sadiusi, la nedi diga vot eburu la diga vot pasa ne Iesu.

<sup>35</sup> Legesara atdi, neni gaklen avukat Laulis Linga, ga lok tong pen ne Iesu. Ni ga sue i,

<sup>36</sup> "Leeme loklox ase. Ua levelinga at Laulis Linga i silok ti levelinga axap teren?"

<sup>37</sup> La ne Iesu ga vorang i rin, " 'Mina vavara aleng Leeme Silok, ne Moroa atnemi mi lebelen nimi axap, la mi lороonan axap atnemi, la mi levendoxoma axap atnemi.'

*Lal 6:5*

<sup>38</sup> Na loxot neni imgomgo la i silok ti levelinga axap teren.

<sup>39</sup> La lara bok sepsev agepura i lok ngan lara gomgo, i lok keretna.

'Mina balamu mo limixin di nemen saparap nimi kerekngan pam mi balamu nimi.'

*Mas 19:18*

<sup>40</sup> \*Laulis Linga eburu mi levenmalagan at lavaeme vapaase ali i nemen maxopok at na levelinga."

*Lususue Mumu Lanarong*

*(Mk 12:35-37; Lu 20:41-44)*

<sup>41</sup> Lubung Parisi digak lok eburu la ne Iesu ga sue di,

<sup>42</sup> \*"Lanarong, neni lurubuno avolo atnege mo?"

La diga vorang i xeretna, "Neni lurubuno avolo at ne Devit."

<sup>43</sup> \*La ni ga lok tidi, "Do kuren, tila ba ne Devit mi lodoxoma at Loroonan Kaala ga soxor i do Leeme Silok teren? Mila levelinga ren at Lovoang Kaala i lok keretna,

<sup>44</sup> 'Leeme Silok ne Moroa ga lok ti Leeme Silok tarak. Una xis de saparap lakngak tino se nenia ana lok li limixin munepen minu na ngan loxot burubut ti luxangkedek taram.'

*Sam*

*110:1*

<sup>45</sup> Mo do ne Devit ga so asen i do Leeme Silok, i lok kereva la Lanarong neni lurubuno avolo at ne Devit?"

<sup>46</sup> Kopmen teta atdi gita epovo na vorang levelinga ren, la ga ruka i ap mo laaleng, kopmen tara gita sue i mi tususue.

## 23

*Iesu Ga Paase Asi Limixin Silok*

*(Mk 12:38-39; Lu 11:43,46; 20:45-46)*

<sup>1</sup> Melemu ne Iesu ga vaase ri limixin eburu mi lavaun pinivu ren. Ni ga lok keretna,

<sup>2</sup> "Luvuttadi loklox ase at Laulis Linga la lubung Parisi di ruuna lix-itkis silok ngan ne Moses, mo gam gomgonga ri leme Israel.

<sup>3</sup> \*Kuren la mina rongga res axap at lempanga di tong i rinimi la mina mumu asu rinotno i. Ketla nemen gat mita mu asu luruptuvuk atdi, mila dixok lok lempanga nedi di vavang min.

<sup>4</sup> Dim taba limixin mi laxantaangas solo, i lok ngan di koxo li lara aknixip doxodok at limixin, la i mu-muat aleng kusu dinap kiv i. Ketla nedi xa kopmen dinak lok tooro limixin kusu tip kip mo levenaknixip.

\* 22:32: Mt 8:11 \* 22:40: Mt 7:12; Ro 13:10; Ga 5:14 \* 22:42: Jo 7:42 \* 22:43: Mt 26:64

\* 23:3: Mal 2:7-8

<sup>5</sup> \*Lempanga axap dik lox i xusu limixin diba reven di la dina emi asu midi. Ni lavasuun teren la dik lok lengkonbokis lixilix tik lok li levelinga at ne Moroa ro xeneng teren. La mo lengkonbokis i silok ti mo lengkonbokis at limixin. La ding siga levempanga singsiga ri lox-onaleng singising la dik lox asuusu i do di baalom aleng kusu limixin dina nunua i do nedi limixin tuturun.

<sup>6</sup> \*Di vavara aleng lengkot kitkis nunuan to at lara peluxa, la dik lok ka lengkot avukat tit kis to xeneng at laraogu singising.

<sup>7</sup> La di vavara aleng box i do limixin dinak lok ngangao atdi ro at lengkot etang, la dinap kup tidi do 'Rabai'."

<sup>8</sup> La ne Iesu ga lok bok tidi, "Ixo lox avukat do tara na soxot nimi do Rabai, mila mi ruuna leges 'Eme Silok' la nemi mina epovo ngan mun loxoeton.

<sup>9</sup> La nemen gat nimi guta tong tara at na lavatbung menemen do ne temen nimi, mila legesara mun neni ne Temen nimi mo ik lok to vana at laxalibet.

<sup>10</sup> La nemen gat limixin dina so asen nimi do 'luvuttadi amgomgo' mila legesa radi gomgo atnimi la neni Lanarong.

<sup>11</sup> \*Neni do i silok kantubu atnimi neni na ngan mun lasaxaruki atnimi.

<sup>12</sup> \*La do nege i lox asilox i, ne Moroa naba lox alixilix i. La nege do i lox alixilix i, ne Moroa naba lox asilox i."

### *Iesu Ga Vaase Sok Luvuttadi Amgomgo*

(Mk 12:40; Lu 11:39-42,44,52; 20:47)

<sup>13</sup> La ne Iesu ga lok bok, "Naba lok kapmek aleng tinimi, luvuttadi loklox ase at Laulis Linga eburu minemi lubung Parisi. Nemi luvuttadi loklok sosolom. Mik soxoba pe lumusmaragu ri Linintoo no vana at laxalibet kusu limixin kopmen dina

epovo dina beles teren. Ketla nemi xa xopmen mi noxo beles teren la mi tupe mo lumusmaragu ri limixin dik lok tong i xusu dina beles.

<sup>14</sup> [Naba lok kapmek aleng tinimi, luvuttadi loklox ase at Laulis Linga eburu minemi lubung Parisi. Nemi luvuttadi loklok sosolom. Mip kip pilo lempanga at lempatnaa rixin, la melemu at na mik lok levesingising to melamgo at limixin kusu tik lox ase di do loklok atnimi i nunuan axap. Kuren la ne Moroa naba lok li lumumuat silok atnimi.]

<sup>15</sup> Naba lok kapmek aleng tinimi luvuttadi loklox ase at Laulis Linga eburu minemi lubung Parisi. Nemi luvuttadi loklok sosolom. Mit pas tangtagap at laxangka la miang kan bok at laras kusu minak lok ka tara xusu ni na ruuna ka lununu kereknagan lununu atnimi. La do tara ira ruuna ka vam mo lununu, mi gagas li i xusu neni naba epovo rinotno kusu nat pas epopolo uto at lemenemen songsongot.

<sup>16</sup> \*Naba lok kapmek aleng mun tinimi, mila nemi limixin lengkatli atnimi i main la nemi xa xopmen mina epovo kusu mina lok tooro limixin. Mi tong i do lavangpangpe at tara i ngan lavanga gamasa, mo do i vangpe mi loogu laplavang. Ket do ni i vangpe mi logol i nemen keneng at loogu laplavang, nemi miba doxoma atmatkun mo laxakaape ren.

<sup>17</sup> Nemi luvuttadi rangtangu la lengkatli at labaroonan atnimi i main. Loogu laplavang neni i lox axaala mo logol. La loogu laplavang i silok ti logol la i xaala aleng, kopmen logol.

<sup>18</sup> Mi tong box i do lavangpangpe at tara ni lavanga gamasa mun, mo do i vangpe mi loxonin laplavang to at loogu laplavang. Ket do ni na vangpe mavana at leventamtaba mo ik lok pana at nom loxonin laplavang, nemi mi lox amuat mo lavangpangpe ren.

\* 23:5: Mt 6:1; Pas 13:9; Lal 6:8; Kex 15:38-39 \* 23:6: Mt 6:5; Lu 14:7 \* 23:11: Mt 20:26; Mk 9:35; Lu 22:26 \* 23:12: Jop 22:29; Ler 29:23; Isi 21:26; Lu 14:11; 18:14 \* 23:16: Mt 15:14

19 Nemi laxangkatli main. Loxonin laplavang i silok ti mo leventamtaba la i lox axaala mo leventamtaba.

20 Kuren la do tara na vangpe mi loxonin laplavang, neni i lok lavang-pangpe min eburu mi leventamtaba mo ik lok teren.

21 La do i vangpe mi loogu laplavang, neni i vangpe min eburu mi ne Moroa mo ik lok keneng teren.

22 \*La do i vangpe mi laxalibet, neni i vangpe mi loxonin orong at ne Moroa eburu mi ne Moroa mo it kis teren.

23 \*Naba lok kapmek aleng tinimi luvuttadi loklox ase at Laulis Linga eburu minemi lubang Parisi. Nemi luvuttadi loklok sosolom! Mim taba ne Moroa mi loxot i sev asangaun ap mo levempanga ik lok at laraamang, ketla mixo mumu asu leveloklok silok at Laulis Linga, i ngan loklok manmanton, lebelen tuntun, loklok nunuan ti lentaba vetpes, la loklok tuturun ti lentaba vetpes. Na leveloklok i epovo do mina lox asusu i eburu mi mo loklok ti raba ne Moroa mi loxot i sev asangaun.

24 Nemi laxangkatli main. Mi mumu asu lengkot at Laulis Linga kopmen na mumuat, ketla mixo mumu asu solo mo leveloklok i mumuat. I ngan ta do mi lox asu leventalang kakalik basinge lengkadan vaen atnemi la mi ke lavatkamel nak lok teren.

25 \*Naba lok kapmek aleng tinimi luvuttadi loklox ase at Laulis Linga eburu minemi lubang Parisi! Nemi luvuttadi loklok sosolom. Mi sogos anunuan i no maxamang at leveng kap la leventingtigon, ketla no ma xeneng i umsu aleng mi loklok ti sak paxat ka panga la loklok ti belegaa.

26 Nemi lubang Parisi. Nemi lengkatli main. Mina gos anunuan avot be i no ma xeneng at lakap, la melemu no maxamang ba lok nunuan ba.

27 \*Naba lok kapmek aleng tinimi luvuttadi loklox ase at Laulis Linga eburu minemi lubang Parisi. Nemi luvuttadi loklok sosolom. Mi ven ngan tinotno lempat maaut diga mo anbutun i, i ven avukat to maxamang, ketla no ma xeneng i umsu mi laxasi tongan la laxanorang.

28 \*Nemi bok mi lok ngan i nom, maxamang atnemi, limixin di ven nemi ngan luvuttadi manmanton la mi mumu asu Laulis Linga, ketla ma xeneng at lebelen nemi mi umsu mi loklok sosolom la loklok kakapmek aleng tino bok.

29 Naba lok kapmek aleng tinimi luvuttadi loklox ase at Laulis Linga eburu minemi lubang Parisi. Nemi luvuttadi loklok sosolom. Mira vaxaru ka vam levenmaaut avukat ti lavaeme vapaase ali, la mi sisinang avukat levenmaaut at limixin manmanton.

30 La mi lok keretna, 'Mo do nedik gita nemen ap mo levenaleng lavalabat atdik diga rooro ren, nedik gitoxo sev amet lavaeme vapaase ali.'

31 \*La kerepmo mi tong asu i do nemi livipisik li ap mo limixin sepsep tadi, diga sev amet lavaeme vapaase ali.

32 Nemi bok limixin sepsep tadi, mi epovo do mina lox epasum na laxakapmek ti laxakapmek atnedi.

33 \*Nemi laxasii xapmek. Nemi laxamdak at lempasii. Ixo epovo do mina sixiro basinge lebelemamao at ne Moroa mo naba riki nemi uto at lemenemen songsongot.

34 \*Kuren la anaba riki lavaeme vapaase ali eburu mi luvuttadi leklen la luvuttadi loklox ase saparap nemi. Lentaba atdi minaba vaxarem di at larakaba la minabap sev amet di. La lentaba atdi minabak pixis di ro xeneng at laraogu singising la minaba xala su mi lentaba atdi basinge levenmenemen atdi la uto at levenmenemen petpes.

\* 23:22: Ais 66:1; Mt 5:34 \* 23:23: Mas 27:30; Mai 6:8 \* 23:25: Mk 7:4 \* 23:27: Gu 23:3

\* 23:28: Lu 16:15 \* 23:31: Gu 7:52 \* 23:33: Mt 3:7; 12:34; Lu 3:7 \* 23:34: 1 Ts 2:15; Mt 10:23

\* 23:35: Lur 4:8; Ib 11:4; 2 Let 24:20-21

<sup>35</sup> \*Kuren la minaba xip tutu mi lanmet at limixin manmanton at na lavatbung menemen. Ga ruka i mi lanmet at ne Abel ga se at lanmet at ne Sakaria, nitna ne Berakaia, mo lavalabat atnimi diga sev amer i ro xantubu at loogu laplavang la loxonin laplavang.

<sup>36</sup> Nia a tong tuturun i dola na loola di rooro lingina dinaba xip tutu mi na laxakapmek axap atnedi luvut-tadi sepsep tadi.”

*Iesu Ga Tong Asu Labalamu Ren Ti Limixin Me Israel*  
(Lu 13:34-35)

<sup>37</sup> \*La ne Iesu ga bulu aleng la ga lok, “Nemi limixin me Jerusalem. Lavalabat atnimi digap sev amet lavaeme vapaase ali at ne Moroa la diga lu amet nedi ne Moroa ga riki di. Buaang levenaleng a lok do ana kok nimi mi lukngak, i ngan lavat-palak kaxak i kok laxan natnat kaxak teren, ketla mixo siam ka ia.

<sup>38</sup> \*I ruturun. Monga Moroa i lox axap loklok tatao ren tinimi.

<sup>39</sup> \*A tong tuturun i rinimi do mi noxo ven bok ba ia, se at nom laaleng naba vot la minaba lok keretna, ‘Luvukat ti mo laradi it pas mi laasen at Leeme Silok.’ ” *Sam 118:26*

## 24

*Leveloklok Katling Ti Laxavaxap At Na Lavatbung Menemen*

(Mk 13:1-2; Lu 21:5-6)

<sup>1</sup> Iesu ga vas kaxat basinge loogu laplavang la at lavatpas teren, lavaun pinivu ren diga vot pasa i la diga paase mumu loogu laplavang la laraogu at ne Moroa ga tu saporav i.

<sup>2</sup> \*La ni ga lok tidi, “Mina ven avukat nom laraogu. A tong tuturun i rinimi. Taaleng naba vot la kopmen toxonuat at nom laraogu naba nemen at loxot teren. Limixin esep dinaba vot la dinaba ut tereve axav i ukopok.”

<sup>3</sup> Melemu ne Iesu gat kis to at Lakaana Olip la lavaun pinivu xusuk teren diga vot pasa i la diga sue i xeretna, “Una tong i rinama. Lingisa nom lempanga naba lok katling lovot-pot taram eburu mi laxavaxap at na levenaleng?”

<sup>4</sup> La ne Iesu ga vorang i ridi xeretna, “Mina lok tatao avukat nimi kusu tara noxo xarang arup nimi mumu i na lempanga.

<sup>5</sup> \*Mila buaang luvuttadi dinaba rupot mi laasen tarak la dina lok, ‘Nenia Lanarong!’ La dinaba sar asoogong buaang limixin mi laxalinga xaxarang atdi.

<sup>6</sup> Minaba rongga i do lara esep mo ik lok la lara esep bok naba vot, ketla nemen mita marat teren. Lempanga xerepmo naba vot ketla laxavaxap at na lavatbung menemen noxo vot ap mo levenaleng.

<sup>7</sup> \*Limixin at lentaba levenabung mixin dinaba esep eburu mi limixin at levenabung mixin petpes. Lavaorong at lentaba levengkitkis orong dinaba esep mi lavaorong at levengkitkis orong petpes. Lean kangking la levenangne naba vot at tengkot.

<sup>8</sup> Anaa axav i naba ru katling lavakpaxaru kaxat ap mo levenmaares at levenmumuat.

<sup>9</sup> \*Melemu limixin dinaba ranga alis nimi la dina lox asongot nimi la lentaba atnimi dinaba sev amet di la limixin at lengkot axap dinaba belengatngas tinimi mila nemi limixin tarak.

<sup>10</sup> Ap mo laaleng buaang limixin dinaba ke xepe lununu atdi la di noxo ebalamu ela la dinaba song araba di ri limixin kakapmek.

<sup>11</sup> \*La buaang lavaeme vapaase ali xaxarang dinaba vot la dinaba sar asoogong buaang limixin.

<sup>12</sup> Laxakapmek naba umsu, kuren la labalamu noxo nemen kantubu at

\* 23:37: Gu 7:59; 1 Ts 2:15 \* 23:38: 1 Lav 9:7-8; Jer 12:7; 22:5 \* 23:39: Mt 21:9 \* 24:2: Lu 19:44 \* 24:5: Mt 24:23-24; Gu 5:36-37; 1 Jo 2:18 \* 24:7: 2 Let 15:6; Ais 19:2 \* 24:9: Mt 10:22; Jo 15:18 \* 24:11: Mt 24:5,24; 1 Jo 4:1



limixin.

<sup>13</sup> \*Ketla do tara na tu tuxuruxun at lununu ren se at laxavaxap ap mo levenmaares, Moroa naba lox arooro i.

<sup>14</sup> \*La dinaba tong asu Lagale Lavavang mumu Linintoo ngan lava-paase asu ri limixin at lengkot axap, la melemu ba ren laxavaxap at na lavatbung menemen naba vot.”

*Lavanga Xapmek*  
(Mk 13:14-23; Lu 21:20-24)

<sup>15</sup> \*La ne Iesu ga lok bok tidi, “Minaba ven lavanga naba lok kapmek aleng, kerekngan leeme va-paase ali ne Daniel ga paase mumu i. Na lavanga xapmek naba tu ro xeneng at Loxot Kaala aleng at loogu laplavang la kerepmo naba lox amulao mo loxot.”

Nege do na us i na, neni na xasep avukat at lavasuun at na levelinga.

<sup>16</sup> La ne Iesu ga lok bok, “Ap mo laaleng nedi limixin do dina nemen to Judaia, dinaba sixiro uto at lempatkaana.

<sup>17</sup> \*Laradi do nak lok to mavana at loogu ren, ni noxo si kusu na lok ka lempanga ren boro xeneng ap mo loogu ren.

<sup>18</sup> La laradi do nak lok to xataamang, ni noxomlong bok ba uto at loogu ren kusu na lok ka lavanga singsiga ren.

<sup>19</sup> Mo laaleng naba lok kapmek aleng ti lavakin teenan eburu mi lavakin mi levengkadede atdi!

<sup>20</sup> Mina ngising ne Moroa do mo laaleng noxo vot saporap nemi edompo mi taaleng kabu kopla taaleng kaala.

<sup>21</sup> \*Levenmumuat ap mo levenaleng naba lok kapmek aleng tinotno. Ga ruka i at lurutu kaxat at na lavatbung menemen ise nga na lingina, kovisi taaleng kerepmo ga vot, la kopmen bok tara tumumuat kerepmo naba vot melemu.

<sup>22</sup> La mo levenaleng ti mo levenmumuat do ne Moroa noxo lox atmur i, kopmen teta naba roo su. Ketla ne Moroa naba lox asuusu labalamu ren ti mo limixin neni gara soxolik ka vam di, la ni naba lox atmur mo levenaleng.

<sup>23</sup> \*Ap mo levenaleng nemen gat mita nunu at levelinga at tara na lok tinimi xeretna, ‘Mina ven ba i, neni nga na Lanarong!’ Kopla na lok, ‘Neni nga no!’ Nemen mita nunu at nom levelinga atdi.

<sup>24</sup> \*Mila buaang nedi limixin babala dinaba lok do nedi mo lavanarong at ne Moroa la lavaeme va-paase ali ren. Dinaba lok tempanga sangsangu kusu dinaba sar asoogong lavaanat soxolik at ne Moroa, mo do di epovo.

<sup>25</sup> Mina ronga avukar i na. A tong ali avot ta i rinimi.

<sup>26</sup> \*La mo do tentaba dina lok tinimi, ‘Mina ven ba Lanarong, no nga i at lamatbin!’ Nemen gat nemi guta vas kaxat ugo. La do dina lok tinimi, ‘Mina ven ba i, nanga i lipe de at na loogu!’ Nemen gat nemi guta nunu atdi,

<sup>27</sup> \*mila nenia, Laradi Mevana, anaba vot soso ngan lavanga i mam to at levengkot axap, i tara koxorop lara takabu de vana at lamavangkap.

<sup>28</sup> \*Ap mo loxot limixin dinaba met teren, lempatmaalom dinaba vot buru ve kusu ti anan levenbaaxin tadi.”

*Lovotpot At Laradi Mevana*  
(Mk 13:24-27; Lu 21:25-28)

<sup>29</sup> \*La ne Iesu ga lok bok, “La soso mun melemu at levenmumuat ap mo levenmaares, leveloklok katling naba vot,

‘Losoosoo at laxangking naba xap, la lagaaling noxo soosoo. Larapenti naba subu si boro vana at lamavangkap eburu mi lempanga axap meve dinaba

\* 24:13: Mt 10:22 \* 24:14: Mt 10:18; 28:19 \* 24:15: Dan 9:27; 11:31; 12:11 \* 24:17: Lu 17:31  
\* 24:21: Dan 12:1; Jol 2:2; Li 7:14 \* 24:23: Mt 24:5,11 \* 24:24: Lal 13:1-3; 2 Ts 2:8-9; Li 13:13-14  
\* 24:26: Lu 17:23-24 \* 24:27: Mt 24:37-39 \* 24:28: Lu 17:37 \* 24:29: Isi 32:7; Jol 2:10,31; 2 Pi 3:10

sixit ekarakat la kopmen di noxo sixit mu larangas atdi.’  
*Ais 13:10; 34:4*

<sup>30</sup> \*Ap mo laaleng loklok katling tarak, Laradi Mevana naba vor asuvos to vana at lamavangkap, la limixin at larabung mixin axap dinabang teng. Dinaba ven ia, Laradi Mevana, anaba vot at loxontakabu mi langsung lolos la lisisixam silok.

<sup>31</sup> \*La lubung angelo dinaba rongal erengteng at lurus la nia anaba riki di uto at lengkot axap kusu dina lam kaka lavaanat soxolik at ne Moroa boro at lavanuet laramesuluk at lavanuet laramera manman at na lavatbung menemen.”

*Laanasa Mumu Luuna Pik  
(Mk 13:28-31; Lu 21:29-33)*

<sup>32</sup> La ne Iesu ga tong lara lavapaase poovo ridi xeretna, “Mina rongana laanasa mumu luuna pik. Dola levesisilik at larauna pik di mumulum la levenang i suu xat, nemi miklen i do lamaares i auret ta.

<sup>33</sup> La kerepmo do mina ven na lempanga loklok katling na vot, mina xasep do lovtopot tarak, Laradi Mevana i auret. I ngan laradi i tu at lumusmaragu at loogu la i gagas kusu na beles teren.

<sup>34</sup> \*Nia a tong tuturun i rinimi. Limixin at na loola di rooro lingina di noxo met se na lempanga naravašu.

<sup>35</sup> \*Laxalibet mi lavatbung menemen naba sonao, ketla levelinga rak noxo xap.”

*Kopmen Tara Iklen Laaleng  
Laradi Mevana Naba Vot  
(Mk 13:32-37; Lu 17:26-30,34-36)*

<sup>36</sup> \*La ne Iesu ga lok bok, “Kopmen tara naklen laaleng at lovtopot tarak. Lubung angelo bok kopmen dinaklen i la nenia, ne Nitna bok kopmen anaklen i. Tamak kusuk mun iklen i.

<sup>37</sup> \*At lovtopot at Laradi Mevana, loklok at limixin naba lok ngan loklok at limixin ap mo levenaleng at ne Noa.

<sup>38</sup> Ap mo levenaleng avot ti mo laraan limixin diga anan la diga inin, lavatlok la lavakin diga vepot ga se at nom laaleng ne Noa ga beles ti lavatmon.

<sup>39</sup> \*Mo limixin kopmen di goxoklen i do laraan mo naba vot, ketla ga rupot la ga sev amet axap nedi. Laaleng at lovtopot tarak, Laradi Mevana naba lok kuren.

<sup>40</sup> Ap mo laaleng tegepu radi dunaba gugu ro xataamang. Lubung angelo dinaba lok ka legesara la lara naba nemen alu.

<sup>41</sup> Tegeputkin dunaba sep povorok levempiao. Lubung angelo dinaba lok ka legesara la lara naba nemen alu.

<sup>42</sup> \*Kuren la mina lok tatao avukat nimi mila kopmen minaklen i do at ua laaleng nenia, Leeme Silok at nimi, anabamlong teren.

<sup>43</sup> \*Ketla mina xasep at na lavapaase poovo. Mo do laradi at loogu iklen i do at ua loxonaleng laradi xipkip pilo ba vot teren, neni ba kuxut avukat la laradi xipkip pilo noxo das beles at loogu ren.

<sup>44</sup> Kuren la mina gagas avukat mila nenia, Laradi Mevana, anaba vot ap mo laaleng limixin di doxoma i do nenia a noxo vot teren.

<sup>45</sup> Mo laradi ruturun la lasaxaruki avukat, neni mo, leeme silok teren ba lok katling i xusu na lok tatao lavasaxaruki ren la nam taba di mi levempanga anan at levengkonalleng mokmokso.

<sup>46</sup> Naba lox avukat ti mo laradi mo do leeme silok teren nabamlong la na long lenget ka i do i lox epovo lugugu ren.

<sup>47</sup> \*Nia a tong tuturun i do mo leeme silok naba lok li mo laradi kusu na lok tatao levempanga axap teren.

\* **24:30:** Li 6:12-13; Sak 12:10; Li 1:7; Dan 7:13 \* **24:31:** Ais 27:13; 1 Ko 15:52; 1 Ts 4:16 \* **24:34:** Mt 16:28 \* **24:35:** Mt 5:18 \* **24:36:** Gu 1:7; 1 Ts 5:1-2 \* **24:37:** Lur 6:5-8 \* **24:39:** Lur 7:21-23; 2 Pi 3:6 \* **24:42:** Mt 25:13 \* **24:43:** Lu 12:39-40; Li 16:15 \* **24:47:** Mt 25:21,23

48 Ket do nom laradi neni laradi xapmek la i lok, 'Leeme silok tarak noxomlong soso.'

49 La ip sev asongot lentaba lavasaxaruki la i anan la ira inin tangtangu eburu mi limixin di inin tangtangu amisik.

50 Leeme silok teren nabamlong at tara taaleng lasaxaruki ren ixo doxoma i do ni naba vot teren la at loxonaleng neni kopmen naklen i.

51 \*Nom leeme silok naba sev asongot aleng nom lasaxaruki ren la ni naba riki i uto at lemenemen songsongot kusu na nemen eburu minedi luvuttadi loklok sosolom. Mo go dinabang teng la dina rungur ivivilis."

## 25

### *Lavapaase Poovo Ri Lasangaun Lovosono Maxat*

1 \*La ne Iesu ga tong bok lavapaase poovo. Ni ga lok keretna, "At laaleng at lovtopot tarak, Linintoo no vana at laxalibet ba lok ngan lasangaun lovosono maxat diga lok ka levenbabao atdi la digat pas kusu dina ekip tangarang mi laradi ga gagas kusu na epot.

2 Lavalimo atdi diga baulang, la lavalimo atdi digakleklen.

3 Lovosono rangtangu diga lok ka levenbabao atdi, ketla di goxo lok ka tengkondan loklox antos ti mo levenbabao atdi.

4 Ketla lavalimo lovosono leklen diga lok ka levengkondan loklox antos babao eburu mi levenbabao atdi.

5 Nedi axap lovosono maxat diga ngangais abao rino, ketla mo laradi ga gagas ti epot kopmen goxo vot soso. Kuren la lemerendi ga unga la nedi axap diga unga nga.

6 At laxanimin tubu limixin diga xup aoon min keretna, 'Laradi i gagas ti epot nom ta i boro! Minat pas la mina ekip tangarang min!'

7 La nedi lasangaun lovosono maxat diga aus kaxat la diga lox agagas levenbabao atdi.

8 La lavalimo lovosono rangtangu diga lok ti mo lovosono leklen, 'Mina raba nama mi tengkondan soksox antos babao, mila levenbabao at-nama i xapkap tino.'

9 Ketla lavalimo lovosono leklen diga vorang i ridi xeretna, 'Kopmen. Agut lengkondan soksox antos babao xopmen na epovo do ridik axap. Minat pas uto at luvuttadi sesep la mina un kaka tengkot tinimi.'

10 La lovosono rangtangu digat pas kusu ti un kaka tengkondan soksox antos babao. Ise diga onon, laradi ga gagas ti epot ga vot, la nedi lavalimo lovosono leklen diga vubeles eburu min ukeneng at leluxa at loklox epot, la lumusmaragu ga repe nga.

11 \*Melemu lavalimo lovosono rangtangu diga vot la diga lok, 'Leeme silok. Leeme silok. Una suang abeles nama.'

12 \*Ketla ni ga vorang i ridi xeretna, 'Nia a tong tuturun i. Axoklen nimi!'

13 \*La ne Iesu ga lok tidi, "Mina gagas avukat, mila mi xoklen laaleng koplaxoxonatat aleng at lovtopot tarak, Leeme Silok atnimi."

### *Lavapaase Poovo Ri Levempilas (Lu 19:11-27)*

14 \*La ne Iesu ga tong bok lavapaase poovo. Ni ga lok, "Ap mo laaleng Linintoo no vana at laxalibet naba lok keretna. Lara leeme silok gat pas uto vaxalom. Avot ti lavat-pas kaxat teren, neni ga xup kaka lavasaxaruki ren la ga lok taba di mi levempanga ren kusu dinak lok tatao i.

15 \*Ti lasaxaruki avot teren neni ga raba i mi lavalimo talen. Ti lara sepsev agepura neni ga raba i mi leg-eputalen. La ti lara sepsev avantun neni ga raba i mi legesa talen. Neni ga raba di min kuren, ga epovo mi lakleklen atdi. La ni ga vas kaxat basinge di.

\* 24:51: Mt 8:12 \* 25:1: Li 19:7; Lu 12:35 \* 25:11: Lu 13:25-27 \* 25:12: Mt 7:23 \* 25:13: Mt 24:42 \* 25:14: Mk 13:34 \* 25:15: Ro 12:6

<sup>16</sup> Mo lara ga lok ka lavalimo talen, soso mun neni gat pas la ga gugu mi mo leventalen la ga ruuna ka bok lavalimo talen.

<sup>17</sup> La mo bok lara ga lok ka legepu talen, neni bok ga gugu min la ga ruuna ka bok legepu talen.

<sup>18</sup> Ketla mo lara ga lok ka legesa talen, neni gat pas, ga xe lamamara la ga lox alipe mo legesa talen at leeme silok teren.

<sup>19</sup> Melemu at lentaba leven gaaling ga volo, leeme silok ap mo lavasaxaruki gamlong la ga xup kaka di kusu dina paase mumu lempilas digara lok ka vam i.

<sup>20</sup> Mo lasaxaruki avot ga lok ka vam lavalimo talen, ga vot pasa mo leeme silok la ga lok tin, 'Leeme silok. Nenu ga raba ia mi lavalimo talen la nia agara gu asu vam lara lavalimo talen bok.'

<sup>21</sup> \*La mo leeme silok ga lok tin, 'I lox avukat aleng. Nenu lagale lasaxaruki rak. Nenu ga lok tatao avukat levempanga lixilik. Kuren la nia anaba raba u mi laxampanga solo kusu una lok tatao i. Ude u ri leluxa rak. Ata lok momo eburu.'

<sup>22</sup> La mo lasaxaruki ga lok ka legepu talen, ga vot pasa nom leeme silok la ga lok tin, 'Leeme silok. Nenu ga raba ia mi legepu talen la nia agara gu asu vam legepu talen bok.'

<sup>23</sup> Leeme silok ga lok tin, 'I lox avukat aleng. Nenu lagale lasaxaruki rak. Nenu ga lok tatao avukat levempanga lixilik. Kuren la nia anaba raba u mi laxampanga solo kusu una lok tatao i. Ude u ri leluxa rak. Ata lok momo eburu.'

<sup>24</sup> La mo lasaxaruki ga lok ka legesa talen, ga vot pasa nom leeme silok la ga lok tin, 'Leeme silok. Nia agaklen i do nenu laradi lolos. Uk lok kaka levempanga kopmen ataram, la u kaxat ka levempanga anan at leventaamang, nenu goxotlotlo i.

<sup>25</sup> Kuren la nia ga marat taram la agat pas la aga lox alipe na legesa

talen taram to xopok at laxangka. Legesa talen taram na.'

<sup>26</sup> La leeme silok ga lok tin, 'Nenu lasaxaruki kapmek la laradi molo. Nenu ugaklen i do ak lok kaka levempanga kopmen atarak, la a kaxat ka levempanga anan, nenia goxotlotlo i.

<sup>27</sup> Tila ba nenu u goxo lok li latalen tarak to at loogu loklok li pilas kusu dina gugu min ti lox asilox i.'

<sup>28</sup> La leeme silok ga lok ti lasaxaruki vetpes teren, 'Una lok ka latalen teren la una raba i ri mo lasaxaruki ira ruuna ka vam lasangaun talen.

<sup>29</sup> \*A tong i rinimi do nedi di ruuna levempanga la di lok lugugu at ne Moroa min, anaba raba bok di mi laxampanga solo. Ket do tara na ruuna levempanga lixilik la kopmen na lok lugugu min, nia anaba lok kaka amlong mo levempanga ren.

<sup>30</sup> \*La nia anaba lu asu mi mo lasaxaruki molos uto at lamain bonot. Limixin go dinabang teng boron la dinaba rungur ivivilis.' "

### *Laradi Mevana Naba Ronga Linga At Limixin Axap*

<sup>31</sup> \*La ne Iesu ga lok bok, "Do nenia, Laradi Mevana, ana vot mi lisisixam, eburu mi lubung angelo, nenia anabat kis at loxonin orong tarak mi lisisixam silok boro vana at laxalibet.

<sup>32</sup> \*La limixin axap at na lavatbung menemen dinaba tu ro melango rak. La nenia anaba epes di ri legepu binam tadi, kerekngan laradi loklok tatao sipsip ik lox epeseves laxasipsip basinge laxanme.

<sup>33</sup> Nenia anaba lok li laxasipsip uto saparap lakngak tino la laxanme uto saparap lakngak kia.

<sup>34</sup> La nenia, Loorong Silok, anaba lok ti limixin to saparap lakngak tino xeretna, 'Ude nimi, limixin ne Tamak ira lox anarong pam nimi. Minat pas ude la mina ruuna ka leveloklox anarong at Linintoo, ne Moroa ga

\* 25:21: Mt 24:45-47; Lu 16:10 \* 25:29: Mt 13:12; Mk 4:25; Lu 8:18 \* 25:30: Mt 8:12 \* 25:31: Mt 16:27; 19:28; Li 20:11-13 \* 25:32: Ro 14:10; Isi 34:17 \* 25:35: Ais 58:7

gagas pam min tinimi at lurutu kaxat at lavatbung menemen,

35 \*mila agak toxo la migam taba luxa ia. Agak minu la migam taba dan ia. Aga nemen ngan laradi xadiong la migak lok maraose minia.

36 Agak pakes ti levempanga singsiga la migam taba ia mi levempanga singsiga. Agak meres la migak lok tatao avukar ia. Agak lok at loogu xokoxo la migat pot pasa ia xusu minak lok tooro ia.'

37 La melemu mo limixin manmanton dinaba sue ia, 'Leeme Silok. Lingisa nema maga ven u, agak toxo la magam taba luxa u, la agak minu la maga vaxain u?

38 Lingisa nema maga ven u ngan laradi xadiong la magak lok maraose minu, koplaga uga nemen goxopmen tempanga singsiga ram, la magam taba u mi levempanga singsiga?

39 Lingisa nema maga ven u, agak meres, koplaga uga nemen at loogu xokoxo la magat pot pasa u xusu manak lok tooro u?'

40 \*La nenia, Loorong Silok, anaba vorang i ridi xeretna, 'A tong tuturun i rinimi. Do miga lox i na ri tara atdi limixin banbalo rak, i lok ngan mun miga lox i ria!'

41 \*Melemu nenia anaba lok tidi limixin to saparap lakngak kia, 'Uto nimi basinge ia, nemi limixin, lasaxaek naba suxuna nimi. Uto nimi at laxao i anan tos amisik, ne Moroa ga gagas min ti ne Satan la lubang angelo ren!

42 Agak toxo ketla mi goxo raba luxa ia. Agak minu ketla mi goxo vaxain ia.

43 Aga nemen ngan laradi xadiong, ketla mi goxo lok maraose minia. Agak lok goxopmen tempanga singsiga rak, ketla mi goxo raba ia mi tempanga singsiga. Agak meres la agak lok bok at loogu xokoxo ketla mi goxo vot pasa ia xusu migita lok tooro ia.'

44 La dinaba lok bok tia xeretna, 'Leeme Silok. Lingisa maga ven u, uga roxo, la uga minu, la uga nemen ngan laradi xadiong la agak lok goxopmen tempanga singsiga ram la agak meres la agak lok at loogu xokoxo, la ma goxo lok tooro u?'

45 La nenia anaba vorang i ridi xeretna, 'A tong tuturun i rinimi. Do mi goxo lox i na ri tara atdi limixin banbalo, mi goxo lox i ria.' "

46 \*La ne Iesu ga lok bok, "Na limixin Moroa naba riki aonon di ri losongsongot i nemen amisik, ketla limixin manmanton dinaba lok ka lorooro avolo."

## 26

*Diga Sevut Li Levelinga Ri Sev Amet Ne Iesu*

*(Mk 14:1-2; Lu 22:1-2; Jo 11:45-53)*

1 Se ne Iesu ga vaase axap na levempapaase, neni ga lok ti lavaun pinivu ren keretna,

2 \*"Miklen i do legepu aleng move ik lok ti leluxa at Lovovolo Pe. Laaleng i auret do limixin dinaba song araba ia, Laradi Mevana, ri limixin esep kusu dina vaxarem ia at laxaba."

3 Ap mo mun laaleng lavamaasa silok, la loxongkulao silok at limixin me Israel diga vot eburu to at loogu nunuan at lamaasa gomgo, laasen teren ne Kaiapas.

4 La diga sevut li levelinga xusu ti ranga alis ka nemnem ne Iesu la dina sev amer i.

5 Diga lok, "Ata noxo lox i na at laaleng at leluxa. Lavanga limixin dina lok kaxat turube."

*Latkin Ga Soli Li Laxadan Mavak To At Ne Iesu*

*Ro Beteni*

*(Mk 14:3-9; Jo 12:1-8)*

6 Iesu gak lok to Beteni at loogu at ne Simon. Gano lanmeres gu (leprosy) gak lok teren.

7 \*La ne Iesu gat kis la gagas ti anan, la lara latkin ga vot pasa i,

\* 25:40: Ler 19:17; Mt 10:42; 18:5; Mk 9:41 \* 25:41: Mt 7:23; Li 20:10 \* 25:46: Dan 12:2; Jo 5:29

\* 26:2: Pas 12:1-27; Mt 20:18 \* 26:7: Lu 7:37-38 \* 26:7: Na lubuxom tuntu diga xovox i mi luuat bunbun.

gap kip lubuxom avukat\* ga umsu mi laxadan mavak, luunun teren ga urut aleng, la ni ga soli i ro at lavatlak at ne Iesu.

<sup>8</sup> La lavaun pinivu ren diga ven i na, la diga musak, diga lok, “Tila i soli xepe gamasa i na?”

<sup>9</sup> Ni i epovo ri sesep mi na laxadan mavak kusu ni naba lok ka tuunun silok teren, la na lok tooro limixin banbalo min.”

<sup>10</sup> Iesu gaklen pam levendoxoma atdi, kuren la ni ga lok tidi, “Nemen mita lox angtang na latkin, mila neni i lok lavanga nunuan tia.

<sup>11</sup> \*Limixin banbalo mo dinabat pot pasa amisik nimi xusu minak lok tooro di, ketla nenia noxo nemen eburu amisik minimi.

<sup>12</sup> Ni i soli na laxadan mavak at labantuxu rak kusu ti lox agagas li labantuxu rak ti lamaaut.

<sup>13</sup> Nia a tong tuturun i rinimi do, at ua loxot at na lavatbung mennen axap limixin dinaba tong asu Lagale Lavavang, na lavanga neni i lox i, dinaba tong box i xusu limixin dinaklen i.”

*Judas Ga Siam Kusu Na Song Araba Ne Iesu*  
(Mk 14:10-11; Lu 22:3-6)

<sup>14</sup> \*Lara atnedi lasangaun mi leg-epura lavaun pinivu, laasen teren ne Judas Iskariot ga vot pasa lavamaasa silok.

<sup>15</sup> \*La ni ga sue di, “Do nenia ana song araba ne Iesu rinimi, miba raba ia mi tavanga salai?” La diga siam do dina raba i mi lavantun sangaun siliva.

<sup>16</sup> Ga ruka i ap mo laaleng ne Judas ga reven ti taaleng kusu na song araba ne Iesu ridi.

*Iesu Ga Anan Eburu Mi Lavaun Pinivu Ren*  
(Mk 14:12-21; Lu 22:7-13,21-23; Jo 13:21-30)

<sup>17</sup> \*At laaleng avot at leluxa ua diga ove vetpes lengkongkide,\* lavaun

pinivu at ne Iesu diga vot pasa i la diga sue i, “U vara i do mana lox agagas li laanan tidik ua?”

<sup>18</sup> \*La ni ga vorang i ridi xeretna, “Mina vubeles at lemenemen silok la mina vot pasa lara laradi, la mina lok tin keretna, ‘Leeme loklox ase atnama i tong i do laaleng meremet teren i auret la neni eburu mi lavaun pinivu ren diba lok katling Lovovolo Pe ro at loogu ram.’ ”

<sup>19</sup> La lavaun pinivu ren diga mumu asu levelinga at ne Iesu la diga lox agagas li leveluxa ri Lovovolo Pe.

<sup>20</sup> Ga ukantinao Iesu gat kis kusu ti anan eburu mi lasangaun mi leg-epura lavaun pinivu ren.

<sup>21</sup> Nedi diga anan la ni ga lok tidi, “Nia a tong tuturun i na rinimi. Leg-esara mo atnimi naba song araba ia ri limixin kakapmek.”

<sup>22</sup> La diga bulu aleng la nedi getgesara diga sue i, “Leeme Silok. Kopmen nenia, do?”

<sup>23</sup> \*La ne Iesu ga vorang i ridi, “Mo lara na song asu mi lekngen eburu minia ri levempanga anan, neni naba song araba ia ri limixin kakapmek.

<sup>24</sup> Nenia, Laradi Mevana, anaba met kerekngan Lovoang Kaala i tong i, ketla naba lok kapmek aleng ti mo laradi naba song araba ia ri limixin kakapmek. Giba lox avukat do nenen gitoxo visik ka i.”

<sup>25</sup> La ne Judas, mo ga gagas kusu na song araba i, ga lok, “Rabai. Kopmen nenia, do?”

La ne Iesu ga vorang i, “Nenu vam.”

*Laanan Kaala At Leeme Silok*  
(Mk 14:22-26; Lu 22:14-20; 1 Ko 11:23-25)

<sup>26</sup> \*Move diga anan la ne Iesu ga lok kaka loxongkide, ga tong avukat ti ne Moroa, ga sebex i la ga raba lavaun pinivu ren min la ga lok,

\* 26:11: Lal 15:11 \* 26:14: Jo 11:57 \* 26:15: Sak 11:12 \* 26:17: Pas 12:14-20 \* 26:17: Leluxa limixin me Judaia diga lok katling laaleng, diga vas kaxat boro Isip. La di goxo lok li liis (Yeast) at lengkongkide atdi. \* 26:18: Mt 21:3 \* 26:23: Sam 41:9 \* 26:26: Mt 14:19

“Mina lok kaka i na la mina anan i. Labantuxu rak na.”

<sup>27</sup> La neni ga lok kaka lakap inin, ga tong aorong ti ne Moroa, la ga raba di min la ga lok, “Nemi axap mina in at na.

<sup>28</sup> \*Lada rak na. I lok katling lekabus maxat. Lada rak naba sen su xusu ti limixin buaang, ne Moroa naba doxoma xepe leveloklok kakapmek atdi.

<sup>29</sup> Nia a tong i rinimi do nia noxo in at lavaen i ruka i lingina se ap mo laaleng nia anaba in lavaen maxat eburu minimi ro xeneng at Linintoo at ne Tamak.”

<sup>30</sup> \*Digak pixan mi loxompixan, la diga vas su la diga vas kaxat uto at Lakaana Olip.

*Iesu Ga Vaase Ali Do Ne Pita Naba Sok Tixirixes Kepe I*

*(Mk 14:27-31; Lu 22:31-34; Jo 13:36-38)*

<sup>31</sup> \*Melemu ne Iesu ga lok tidi, “Lingina at laxanimin, nemi axap minaba subu basinge ia. I lok ngan Lovoang Kaala i tong i xeretna,

‘Nia ne Moroa, anaba sep laradi loklok tatao at levesipsip la levesipsip dinaba epeseves.’

*Sak 13:7*

<sup>32</sup> \*Ketla melemu at laxakatu kaxat amlong tarak, nia anabamgo rinimi uto Galili.”

<sup>33</sup> La ne Pita ga lok tin, “Keke i do nedi axap dina subu basinge u, nenia xopmen tinotno noxo subu.”

<sup>34</sup> \*La ne Iesu ga lok tin, “Nia a tong tuturun i ru. Lingina at laxanimin laxaxak noxovisi na reng, la nenu unaba sev apkap naba vantun do uxoklen ia.”

<sup>35</sup> \*La ne Pita ga vaase lolos tin keretna, “Do dina lok do dina sev amer ia, nenia noxo sok tixirixes kepe u.” La lavaun pinivu axap diga tong box i xuren.

*Iesu Ga Ngising To Getesemane*

*(Mk 14:32-42; Lu 22:39-46)*

<sup>36</sup> Melemu ne Iesu gat pas uto at lara loxot, laasen teren Getesemane. Lavaun pinivu ren diga emu min, diga rupot la ni ga lok tidi, “Mina xis de. Anat pas lixilik uto xusu ana lok lising.”

<sup>37</sup> La ni ga lam ka ne Pita mi lumdak at ne Sebedi, la lainbulu silok ga suxuna lorooro ren.

<sup>38</sup> \*La ni ga lok tidi, “Lorooro rak i umsu mi lainbulu silok mo na lox amer ia. Minak lok de la mina kuxut tooro ia.”

<sup>39</sup> \*La ne Iesu ga vas uto vaxalom lixilik, la ni ga subu midi mi lemeren uto xopok at laxangka la ga sing ne Moroa xeretna, “Tamak. Kereva, i epovo do una lok pes na lumumuat basinge ia? Ketla nemen gat uta mumu asu lavavara rak, una mu asu lavavara ram.”

<sup>40</sup> La ne Iesu gamlong saparap lavaun pinivu ren la ga long lenget ka di, diga unga. La ni ga lok ti ne Pita, “Kereva, mixo epovo minap kip na lumumuat eburu minia at loxonaleng lixilik mun?

<sup>41</sup> \*Mina reven tatao la mina ngising kusu mi noxo subu at loklok tong pen. Loroonan at laradi i epovo ri ronga res, ketla labantuxu ren i molos.”

<sup>42</sup> La ne Iesu ga vas uto lixilik ga sev agepura la ga sing, “Tamak. Do ixo epovo una lok pes na lumumuat basinge ia se nia ana lox epovo i, i lox avukat. Ana mu asu mun lavavara ram.”

<sup>43</sup> Iesu gamlong uto at lavaun pinivu ren la ga long lenget ka di, diga unga manga, mila lemerendi ga unga.

<sup>44</sup> \*La ni ga ke di la ga vas kaxat basinge di ga sev avantun kusu na sing. La ga sing amu mi nom levellinga ni ga ngising pam min.

\* 26:28: Pas 24:8; Jer 31:31-34; Sak 9:11; 1 Ko 10:16 \* 26:30: Lu 22:39; Jo 18:1 \* 26:31: Jo 16:32

\* 26:32: Mt 28:7,16 \* 26:34: Mt 26:69-75 \* 26:35: Mt 26:56 \* 26:38: Jo 12:27 \* 26:39: Ib

5:7-8; Mt 6:10 \* 26:41: Mt 6:13; Ib 2:14; 4:15 \* 26:44: 2 Ko 12:8

<sup>45</sup> Melemu ni gamlong uto at lavaun pinivu ren la ga lok tidi, “Kereva, move mi unga? Pen ba i nom. Loxonaleng i auret do lara laradi na song araba ia, Laradi Mevana, ri limixin bilinga.

<sup>46</sup> \*Mina xatu. Ata vas tangarang nom laradi boro it pas kusu nam taba minia ri limixin kakapmek.”

*Diga Ranga Alis Ne Iesu*

(Mk 14:43-50; Lu 22:47-53; Jo 18:3-12)

<sup>47</sup> Iesu move ga paase la ne Judas ga rupert. Neni lara at lasangaun mi legepura lavaun pinivu at ne Iesu. Buaang limixin diga emu min, digap kip levemparise sepsep la levempukup sepsep. Lavamaasa silok la loxongkulao silok at limixin me Israel diga riki di.

<sup>48</sup> Avot ti na, ne Judas ga tong li loklok katling kusu diba ven kibis ne Iesu. Judas ga lok tidi, “Mo lara, nia aba nes i, neni vam ne Iesu. Mina ranga alis i.”

<sup>49</sup> La soso mun ne Judas ga vas saparap ne Iesu la ga lok, “Laxanimin avukat, Rabai.” La ni ga nes i.

<sup>50</sup> La ne Iesu ga lok tin, “Lentangas tarak. Una lok soso nom lavanga u vara i do una lox i.”

La mo limixin diga vot pasa ne Iesu la diga ranga alis i.

<sup>51</sup> \*Lara at lavaun pinivu ren ga ven i na la ga rev asu lavarise sepsep teren la ga sep korop kepe labaalung at lasaxaruki at lamaasa gomgo.

<sup>52</sup> \*La ne Iesu ga lok tin, “Lok li amlong lavarise sepsep taram mila nedi di sep limixin mi lemparise, diba met kuren.

<sup>53</sup> Nenia a epovo ana ro ri ne Tamak la neni naba raba ia mi lubang angelo, luutus atdi ba volo lavanuti sangaun mi legepura larabin sangsangaun kobot (72,000) lubang angelo.

<sup>54</sup> Ketla keke nga di mila nia anaba lox asoorun mo levengkot at

Lovoang Kaala i tong asu i do na lavanga naba vot.”

<sup>55</sup> \*Ap mo loxonaleng ne Iesu ga lok ti mo limixin, “Tila mi vot de mi levemparise sepsep la levempukup sepsep kusu mina ranga alis ia? Nenia xopmen ana vaxaru kaxat ka teesep. Buaang levenaleng nia agat kis to xeneng at loogu laplavang kusu ana anasa limixin, ketla nemi xopmen mi goxo ranga alis ka be ia go.

<sup>56</sup> \*Na levempanga i ravasu keretna xusu na lox asoorun levenmamalagan at lavaeme vapaase ali.” La lavaun pinivu ren diga sixiro axap.

*Iesu Ga Tu Ro Melamgo At Luvuttadi Amgomgo*

*At Leme Israel*

(Mk 14:53-65; Lu 22:54-55,63-71; Jo 18:13-14,19-24)

<sup>57</sup> Nedi diga ranga alis ne Iesu, diga lam ka i uto at ne Kaiapas, lamaasa gomgo. Go luvuttadi loklox ase at Laulis Linga la loxongkulao silok diga rupert pam.

<sup>58</sup> Pita ga mumu asu ne Iesu ro xa vaxalom la ga rupert saparap loogu at lamaasa gomgo la ga vubeles at lemelua. Ni ga xis kopok eburu mi luvuttadi rutu mu xusu na ven lavanga salai naba vot saparap ne Iesu.

<sup>59</sup> Nedi axap luvuttadi amgomgo eburu mi lavamaasa silok ap mo lixitkis buru diga puse ri tevelinga xaxarang kusu dina so raba ne Iesu min la diba epovo na sev amer i.

<sup>60</sup> Ketla di goxo epovo, keke do buaang luvuttadi diga vot kusu dina tong asu tevelinga xaxarang.

At laxavaxap, legepu radi duga vot,

<sup>61</sup> \*la duga lok, “Na laradi ga lok keretna, ‘Nenia a epovo na sele utut kepe na loogu laplavang at ne Moroa la anaba vaxaru amu box i xeneng at lavantun aleng.’ ”

\* 26:46: Jo 14:31 \* 26:51: Jo 18:26 \* 26:52: Lur 9:6; Li 13:10 \* 26:55: Lu 19:47; 21:37 \* 26:56: Mt 26:31 \* 26:61: Jo 2:19-21



<sup>62</sup> La lamaasa gomgo ga xatu la ga lok ti ne Iesu, “Ua lavasuun teren la uxu vaase? Kereva, u xopara na vorang na levelinga di sok taba u min.”

<sup>63</sup>\*Ketla ne Iesu kopmen goxo tong toxolinga.

La lamaasa gomgo ga lok tin, “At laasen at ne Moroa, Luntoo Avolo, una tong i rinama. Kereva, nenu Lanarong, Nitna ne Moroa?”

<sup>64</sup>\*La ne Iesu ga lok, “I ruturun, nenia vam. Ketla nia a tong i rinimi. Melemu minaba ven ia, Laradi Mevana, anabat kis saparap lekngen tino ne Moroa ni Lanaraavuk, la anaba vot at loxontakabu boro vana at laxalibet.”

<sup>65</sup>\*La lamaasa gomgo ga lais koprop lavanga singsiga ren la ga lok, “I paase vupu ri ne Moroa. I xapta lavapaase. Mira ronga vam levelinga ren.

<sup>66</sup>\*Kereva levendoxoma atnimi?”

La diga vorang i xeretna, “I epovo do neni na met.”

<sup>67</sup>\*La diga vubis abuxumin lemeren la diga tit pupu i, la lentaba diga pasa i mi levengkikngen di.

<sup>68</sup> Digak lok, “Do nenu Lanarong, una tong kisip ka i do nege i sev u.”

*Pita Ga Sev Apkap At Ne Iesu*  
(Mk 14:66-72; Lu 22:56-62; Jo 18:15-18,25-27)

<sup>69</sup> Pita gat kis to xamang at lemelua la lara loolik, neni lasaxaruki ga vot pasa ne Pita la ga lok, “Nenu bok gak lok eburu mi ne Iesu boro Galili.”

<sup>70</sup> Ketla neni ga sev apkap to melango atnedi axap, ni ga lok, “Nia xopmen naklen lavanga salai u paase min.”

<sup>71</sup> La ni gat pas uto at langas povolo la lara loolik bok ga ven i la ga vaase ri limixin diga tu go. Neni ga lok keretna, “Na laradi gak lok eburu mi ne Iesu boro Nasaret.”

<sup>72</sup> La ne Pita ga sev apkap manga la ga vangpe, ni ga lok, “Nia xopmen anaklen nom laradi.”

<sup>73</sup> Melemu lixilik mo limixin diga tu go, diga vot pasa ne Pita la diga lok, “I ruturun do nenu lara atdi mila lavapaase ram i lok ngan laradi boro Galili.”

<sup>74</sup> La ni ga vangpe mi levelinga vangpangpe xeretna, “Levelinga rak i ruturun. Do xopmen, ne Moroa naba lox asongor ia. Nia axoklen mo laradi.”

La soso mun laxaxak ga reng.

<sup>75</sup>\*La ne Pita ga doma su at levelinga at ne Iesu ga lok keretna, “Laxaxak kovisi noxo reng, la nenu unaba sev apkap naba vantun do uxoklen ia.” La neni ga vas su ukamang la gang teng silok aleng.

## 27

*Diga Lok Ka Ne Iesu*  
*Uto At Ne Paelat*  
(Mk 15:1; Lu 23:1-2; Jo 18:28-32)

<sup>1</sup> Ga maxantamak suubu nedi axap lavamaasa silok eburu mi loxongkulao silok at lubung mixin me Judaia diga li levendoxoma atdi mumu ne Iesu do dina sev amer i.

<sup>2</sup> Diga xoxo alis lukngen la diga sat ka i uto at ne Paelat, ni laradi gomgo boro Rom.

*Lanmet At Ne Judas*  
(Gu 1:18-19)

<sup>3</sup>\*La ne Judas, laradi ga song araba ne Iesu, ga ven i do diga gagas kusu dina sev amet ne Iesu, la neni ga umsu mi lainbulu silok la ga lox ekun lodoxoma ren la ga raba amlong lavantun sangaun siliva ti lavamaasa eburu mi loxongkulao silok.

<sup>4</sup> Ni ga lok, “Nia ara lok pam laxakapmek silok, la ara raba vam limixin esep mi laradi xopmen taxakapmek teren, la i auret ta loxonaleng kusu dina sev amer i.”

\* 26:63: Ais 53:7; Mt 27:12 \* 26:64: Sam 110:1; Dan 7:13; Mt 24:30 \* 26:65: Gu 14:14; Mt 9:3; Jo 10:33 \* 26:66: Mas 24:16; Jo 19:7 \* 26:67: Ais 50:6; 53:5 \* 26:75: Mt 26:34 \* 27:3: Mt 26:14-15

La diga lok tin, “Kopmen tekot at nom atnama. Lavanga nga nom taram!”

<sup>5</sup> Kuren la ne Judas ga lu abeles mi mo levempilas gamgames to at loogu laplavang la ga onon. Melemu neni gat pas la ga xut amer i.

<sup>6</sup> Lavamaasa silok diga lok ka mo levempilas gamgames la diga lok, “Anai levempilas i ru katling luunun ti lorooro at laradi. La Laulis Linga i tong i do ixo epovo bok ba xusu ataba lok li i ro at loxot lili pilas.”

<sup>7</sup> La diga epaase mumu i la diga un kaka loxongkangka, laasen teren Laraamang Pota, kusu tik mikmit limixin kadiiong.

<sup>8</sup> Kuren la diga so asen mo loxot do “Loxongkangka at Lada,” ise at na levenaleng mo laasen ik lok.

<sup>9</sup> At na mun levempanga la levelinga at leeme vapaase ali ne Jere-maia ga soorun, ni ga lok,

“Diga lok ka lavantun sangaun levempilas gamgames, ni luutus limixin me Israel diga siam min do ri un i,

<sup>10</sup> la diga lok ka mo levempilas kusu ti un Laraamang Pota kerekngan ne Moroa ga tong i ria.” *Sak 11:12-13; Jer 32:6-9*

*Iesu Ga Tu At Lavapaase To Melango At Ne Paelat*

*(Mk 15:2-5; Lu 23:3-5; Jo 18:33-38)*

<sup>11</sup> Ap mo mun loxonaleng ne Iesu ga tu ro melango at laradi gomgo ne Paelat la ne Paelat ga sue i, “Kereva, nenu loorong at limixin me Judaia?”

La ne Iesu ga vorang i, “I raturun. Nenu xa ura tong pam i.”

<sup>12</sup> \*Lavamaasa silok eburu mi loxongkulao silok diga sok taba i mi levelinga, ketla neni xopmen goxo vaase porang di.

<sup>13</sup> La ne Paelat ga sue i, “Kereva, u xopara na vorang levelinga atdi?”

<sup>14</sup> \*Ketla ne Iesu xopmen goxo vorang mo levelinga. Ni goxo vaase

asu tekolinga kusu ti vorang mo levelinga atdi. Laradi gomgo ga sangu aleng.

<sup>15</sup> At levenmaares axap laradi gomgo boro Rom ga mu asu lara loklok keneng at leluxa silok, laasen teren Lovovolo Pe. Neni gak soxomus asu lara laradi xokoxo do limixin diga lok katling i.

<sup>16</sup> Ap mo laaleng lara laradi, laasen teren ne Barabas gak lok at loogu xokoxo, neni laradi xapmek tinotno.

<sup>17</sup> Buaang limixin diga vot eburu xusu ti lok katling laradi xokoxo la ne Paelat ga sue di, “Ua lara mi vara i do nia ana soxomus asu raba nimi min, Barabas koplā ne Iesu di tong i do neni Lanarong?”

<sup>18</sup> \*Paelat gaklen i do lavamaasa silok la loxongkulao silok diga reven peves at ne Iesu la ni lavasuun teren la diga vara i do dina sev amer i.

<sup>19</sup> Ap mo loxonaleng Paelat gat kis at loxot kitkis at laradi rongtonga linga. La latkin teren ga lox aonon na levelinga rin, ga lok keretna, “Nemen gat uta lok tavanga ri na laradi kopmen taxakapmek teren, mila itinongo at laxanimin nia ata robo i la labalak ixo xis aulis tino.”

<sup>20</sup> Ketla lavamaasa silok eburu mi loxongkulao silok diga vaase lolos ti limixin do dina lok katling ne Barabas la dina sev amet ne Iesu.

<sup>21</sup> Paelat ga sue di, “Ua lara atdu nia ana soxomus asu raba nimi min?”

La diga vorang i rin, “Barabas.”

<sup>22</sup> La ne Paelat ga sue di, “La nenia aba lok lavanga sala ri ne Iesu, di tong i do Lanarong?”

La nedi axap diga vorang i xeretna, “Una vaxarem i at laxaba!”

<sup>23</sup> La ne Paelat ga sue di, “Tila mo? Neni ixo lok tavanga xapmek.”

Ketla digap kup silok keretna, “Paxarem i at laxaba.”

<sup>24</sup> \*Paelat ga ven kibis i do limixin di goxopara na ronga levelinga ren, la diga lok do dina ru kaxat ka leese-p. Kuren la neni ga lok ka loxodan la ga

\* **27:12:** Ais 53:7; Mt 26:63  
Mt 27:4

\* **27:14:** Jo 19:9

\* **27:18:** Jo 11:47-48; 12:19

\* **27:24:** Lal 21:6-9;

gos lukngen to melamgo at limixin la ga lok tidi, “Kopmen tekot tarak at na. Lavanga mun atnimi.”

25 \*La mo limixin diga lok, “Keke lumumuat at lanmet teren naba neman pana atnema eburu mi laxam-dak mi laxaalik atnama.”

26 La ne Paelat ga soxomus asu ne Barabas tidi. Ketla neni ga raba ne Iesu ri luvuttadi esep kusu dinak pixis i la dina vaxarem i at laxaba.

*Limixin Esep Diga  
Lok Kalise Ne Iesu  
(Mk 15:16-20; Jo 19:2-3)*

27 Melemu limixin esep at ne Paelat diga lok ka ne Iesu uto at loogu silok at laradi gomgo, la limixin esep axap go diga ru xangkan i.

28 \*Diga lok kepe levesingsiga ren la diga vaxasiga i mi lavanga singsigaara at loorong.

29 La diga lok lixiam tin mi livin gagas la diga vaxaxua lavatlak teren min, la diga vaxarebeng i mi lakdak at loorong to at lekngen tino. Melemu diga xis tiktikbu ro melamgo ren la diga paase xapmek tin. Diga lok, “Ma lok ngangao aleng taram, loorong at limixin me Judaia.”

30 \*La diga kalaubis sax i, la diga lok ka mo lakdak la digak pixis pat-lax i min.

31 Diga saba xangka axav i, la diga lok pes manga nom lavanga singsigaara basinge i la diga vaxasiga manga i mi lavanga singsiga ren. La diga sat ka nga i basinge loogu silok kusu dina vaxarem i at laxaba.

*Diga Vaxarem Ne Iesu  
At Laxaba  
(Mk 15:21-32; Lu 23:26-43; Jo 19:17-27)*

32 Luvuttadi esep mi ne Iesu diga sixisu ap mo loogu la diga ekip tangarang mi lara laradi boro Sairini, laasen teren ne Simon, la luvuttadi esep diga sox aruru parang i xusu

na xip ka laxaba at ne Iesu. 33 Diga rupot to at loxot, loxonasen kot go do Golgata. Lavasuun at na loxolinga do “Lavatlak Tongan.”

34 \*Diga raba ne Iesu mi ladan vaen kusu neni na inin i. Diga lok li vam lara lamarasin teren kusu na lok kepe losongsongot teren. Iesu ga in tong pen i, ketla goxopara i.

35 \*Diga vaxarem i at laxaba la melemu diga lu buru mi lengkonuat kusu ti lok kisip ka nege ba lok ka levempanga singsiga ren.

36 Melemu at nom, digat kis la diga reven ne Iesu.

37 To mavana at lavatlak teren diga lok li levelinga, mo ga tong asu lavasuun at lumumuat teren. Nom levelinga ga lok keretna, NENI NE IESU, LOORONG AT LIMIXIN ME JUDAIA.

38 \*La limixin esep diga vaxarem bok legepu radi xapmek saparap ne Iesu, lara saparap lekngen tino la lara saparap lekngen kia.

39 \*Limixin digat pas polo go la diga piriapat lempatlak atdi la diga paase aksaksa ri ne Iesu.

40 \*La diga lok keretna, “Nenu uga lok do unaba sele utut kepe loogu laplavang la unaba vaxaru amu box i at lavantun aleng. Una lox aroo nga u, mo do nenu ne nitna ne Moroa la una eng si basinge nom laxaba.”

41 La kerepmo bok lavamaasa silok eburu mi luvuttadi loklox ase at Laulis Linga la loxongkulao silok diga paase aksaksa rin mi levelinga lolos. Diga lok,

42 \* “Neni ga lox aroo lentaba vet-pes, ketla neni ixo epovo do na lox aroo axa i. Kereva, neni loorong tuturun pam me Israel? Do neni na eng si basinge laxaba, dik ataba nunu ba ren.

43 \*Ni i nunu at ne Moroa la i lok do neni ne nitna ne Moroa. Teren, ata ven be i do ne Moroa go naba lox aroo su ba i.”

\* 27:25: Mt 23:35; Gu 5:28 \* 27:28: Lu 23:11 \* 27:30: Ais 50:6 \* 27:34: Sam 69:21 \* 27:35: Sam 22:18 \* 27:38: Ais 53:12 \* 27:39: Sam 22:7; 109:25 \* 27:40: Mt 26:61; Jo 2:19 \* 27:42: Jo 11:50 \* 27:43: Sam 22:8

44 La kerepmo bok luradi xapmek duga merem saparav i, nedu bok duga lok kalise xapmex i.

*Lanmet At Ne Iesu*  
(Mk 15:33-41; Lu 23:44-49; Jo 19:28-30)

45 At lasangaun mi legepu xonaleng, lamain ga vung pavaa mo lenep silok axap, la gak lok se at lavantun konaleng.

46 \*At lavantun konaleng ne Iesu ga xup silok keretna, “Eloi, Eloi lama sabaktani?” Lavasuun at na levelinga xeretna, “Moroa rak, Moroa rak, tila u raba rulu ia?”

47 Lentaba luvuttadi diga tu go, diga ronga i la diga lok, “I toro ri ne Elaisa.”

48 \*La lara laradi ga sixit la ga lok ka loxontamon la ga lox amlu xaka i ro xeneng at lavaen mamao la ga xoxo li i ro at loxonuna la ga lok do na vaxain ne Iesu min.

49 Ketla lentaba luvuttadi diga lok, “Una tu be, ata ven be i do ne Elaisa go naba rupot ti lok tooro i.”

50 La ne Iesu ga xup kaxat silok manga la lamamas teren ga rekorop, la ni ga met ta.

51 \*Ap mo loxonaleng lavattamon silok ga merem to xeneng at loogu laplavang ga rem lais ka ro vana, ga su ro xopok la ga ra ngan ta legepu ban, la laxangka gangne la lemparuat ga tepavagam.

52 Laramaaut ga rem bang la buaang limixin at ne Moroa, no diga met ganoxa, diga roo xat amlong.

53 Diga onon basinge laramaaut atdi la melemu at laaleng ne Iesu ga roo xat amlong, nedi diga vubeles to xeneng at lemenemen kaala la buaang limixin diga ven di.

54 Ap mo loxonaleng laasesep eburu mi limixin esep teren diga tu la diga suma langne la levempanga axap ga vot ap mo loxonaleng, diga marat aleng la diga lok, “Neni lamdak tuturun pam at ne Moroa.”

55 \*Buaang lavakin bok mo diga tu vaxalom lixilik la diga reven mo levempanga ga vot. Nedi nom lavakin diga mumu asu ne Iesu boro Galili la digak lok tooro box i.

56 \*Ne Maria Magdalene eburu mi ne Maria, nenen ne Jems mi ne Josep. La nenen bok at lumdak at ne Sebedi.

*Limixin Digak Mit Ne Iesu*  
(Mk 15:42-47; Lu 23:50-56; Jo 19:38-42)

57 Taba nga ukantinao lara laradi nopnovos boro Arimatia, laasen teren ne Josep, ga vot la neni bok lara atnedi lavaun pinivu at ne Iesu.

58 \*Neni ga vot parap ne Paelat la ga sing i do neni na raba i mi labantuxu at ne Iesu. La ne Paelat ga siam dola na raba ne Josep min.

59 La ne Josep ga lok ka i la ga bom i mi labantamon maxat,

60 \*la ga lok li i ro xeneng at lamaaut maxat teren, limixin diga ke i ro xeneng at lavaruat. La melemu neni ga xavun pe lumusmaragu at lamaaut mi lavaruat la ga onon.

61 Maria Magdalene eburu mi lara ne Maria vetpes bok mo dugat kis to melango at lamaaut.

*Luvuttadi Rutu Mu Diga Kuxut Mi Lamaaut At Ne Iesu*

62 Ap mo laaleng melemu, ni laaleng kaala, lavamaasa eburu mi lubang Parisi diga vot pasa ne Paelat.

63 \*La diga lok tin keretna, “Leeme Silok, nema ma doma mumu levelinga ap mo laradi xaxarang at laaleng neni move ga rooro la ga lok keretna, ‘Anaba roo xat amlong basinge lanmet melemu at lavantun aleng.’

64 Kuren la, nema ma vara i do una tong i ri luvuttadi rutu mu la dinaba kuxut mi lamaaut teren naba se at laaleng sev avantun kusu lavaun pinivu ren di noxo epovo rit pas ti nem kaka labantuxu ren. La melemu dina tong i ri limixin dola

\* 27:46: Sam 22:1      \* 27:48: Sam 69:21      \* 27:51: Pas 26:31-33; Ib 10:19-20      \* 27:55: Lu 8:2-3  
\* 27:56: Mt 20:20      \* 27:58: Lal 21:22-23      \* 27:60: Ais 53:9      \* 27:63: Mt 12:40; 16:21; Jo 2:19-21

neni ira roo xat amlong pam basinge lanmet. La na laxaxarang melemu, ni naba lok kapmek tinotno ri mo lara avot.”

<sup>65</sup> La ne Paelat ga tong i ridi xeretna, “Mina lam kaka tuvuttadi rutu mu la minat pas la mina soxoba avukat lamaaut kerekngan miklen i.”

<sup>66</sup> \*Kuren la diga vas kaxat la diga soxoba avukat lamaaut mi levempanga soksoxoba ren, la diga on basinge luvuttadi rutu mu e ri reven tatao lamaaut.

## 28

### *Lorooro Xat Amlong*

*At Ne Iesu*

*(Mk 16:1-10; Lu 24:1-12; Jo 20:1-10)*

<sup>1</sup> Melemu at laaleng kaala, taba umaxantamak at laaleng avot ap mo luik, ne Maria Magdalene nedu mi lara ne Maria vetpes bok dugat pas ti ven lamaaut.

<sup>2</sup> La soso mene nga langne lolos ga vot, la laangelo at Leeme Silok ga vas si boro vana at laxalibet, gat pas ti lamaaut, la ga xavun kepe lavaruat at lamaaut la garat kis to mavana ren.

<sup>3</sup> \*Levereven teren ga lok ngan lavanga i mam, la levesingsigaara ren gan bun aleng ngan lusugao.

<sup>4</sup> Luvuttadi rutu mu diga marat aleng la diga dede la diga met aroo.

<sup>5</sup> La laangelo ga vaase ri lutkin keretna, “Nemen gat muta marat, aklen i dola nemu mu reven pupuse ri ne Iesu, no diga vaxarem i ro at laxaba.

<sup>6</sup> \*Ketla kopmen ta i de, no ira roo xat pam kerekngan levelinga ni ga tong i. Ude numu la muna ven loxot diga vaxamdi i ren.

<sup>7</sup> \*Muna vas kaxat soso la muna tong i ri lavaun pinivu ren dola neni ira roo xat amlong pam basinge lanmet la no nga iramgo vam tidi uto Galili la dinaba ven ba i ve. La monga nia a tong pam i rinumu.”

<sup>8</sup> Kuren la duga vas kaxat soso basinge lamaaut la duga umsu mi lanmarat, ketla duga umsu bok mi lomomo. Duga sixit soso ri tong i ri lavaun pinivu at ne Iesu.

<sup>9</sup> La soso mun ne Iesu ga ru tangarang du la ga lok tidu, “Lenmila nak lok buru minumu.” La nedu duga vas li ren la duga rebeng tu at luxangkedek teren la duga lotu saparav i.

<sup>10</sup> \*La ne Iesu ga lok tidu xeretna, “Nemen gat muta marat. Munat pas la muna tong i ri lavaun pinivu rak dola dinat pas uto Galili la dinaba ven ia ve.”

*Lavapaase Asu At Luvuttadi Rutu Mu*

<sup>11</sup> At loxonaleng lutkin duga vas kaxat basinge lamaaut, mo luvuttadi rutu mu diga reven tatao lamaaut, digamlong uto at lemenemen silok Jerusalem la diga tong asu levempanga axap diga ven i ri lavamaasa silok.

<sup>12</sup> Lavamaasa silok diga vot buru mi loxongkulao silok la diga vit li lodoxoma la diga raba laxampilas solo ri nom luvuttadi rutu mu.

<sup>13</sup> \*La diga lok tidi, “Minaba tong i dola lavaun pinivu ren diga vot at laxanimin la diga nem kaka labantuxu ren at loxonaleng nemi miga unga.

<sup>14</sup> Dola laradi gomgo, ne Paelat na ronga i na, nema maba vaase arepukus lodoxoma ren dola nemi mixo lok taxapmek at nai, la nemi guta doxoma mu solo i nom.”

<sup>15</sup> Kuren la luvuttadi rutu mu diga lok ka nom levempilas la diga lox epovo levelinga diga tong taba di min. Kuren la anaa lavapaase asu ira epeseves keneng at leme Judaia i se at na levenaleng.

*Iesu Ga Ru Asuvos*

*Ti Lavaun Pinivu Ren*

*(Mk 16:14-18; Lu 24:36-49; Jo 20:19-23; Gu 1:6-8)*

\* 27:66: Dan 6:17 \* 28:3: Mt 17:2; Gu 1:10 \* 28:6: Mt 12:40; 16:21 \* 28:7: Mt 26:32 \* 28:10: Ib 2:11 \* 28:13: Mt 27:64 \* 28:16: Mt 26:32; 28:7,10

<sup>16</sup> \*Melemu lasangaun mi legesara lavaun pinivu ren digat pas uto at loxongkaana ro Galili no ne Iesu ga tong li i ridi.

<sup>17</sup> La at loxonaleng diga ven i, diga lotu saparav i, ketla lentaba atdi lev-endoxoma atdi ga sixit ekarakat.

<sup>18</sup> \*La ne Iesu ga vas saparap nedil la ga lok tidi xeretna, "Moroa gara raba vam ia mi lolos axap to vana laxalibet la de xopok at lavatbung menemen.

<sup>19</sup> \*Kuren la mina onon la mina lox ase limixin at lengkot axap kusu dina ravasu ngan lavaun pinivu rak. La mina sep susu di mi laasen at ne Temen dik la ne Nitna eburu bok mi Loroonan Kaala.

<sup>20</sup> \*La mina lox ase di xusu dinang tonga res at levelinga axap nenia agara tong pam i rinimi. La nenia anabak lok eburu amisik minemi naba se at laxavaxap at na lavatbung menemen."

---

\* **28:18:** Dan 7:14; Jo 13:3; Ep 1:20-22    \* **28:19:** Mk 16:15-16; Gu 1:8    \* **28:20:** Gu 18:20; Jo 14:23

**Mak**  
**Lagale Lavavang At Ne**  
**Iesu Karisito**  
**Mak Ga Malagan I**  
**Levelinga Loklox**  
**Axasep**  
**Levenmaares 55–65 A.D.**

Mak neni ga malagan levelinga mumu ne Iesu, Nitna ne Moroa. Laasen at ne Mak neni ne Jon Mak, ni ga silok to Jerusalem la ga lok tooro ne Pita, Pol, la ne Banabas mi lugugu. Neni lamdak at neton ne Banabas, lentangas at ne Pol. Loxongkulao silok at lotu diga nua i do ne Mak nat pas uto Rom, la neni gak lok eburu mi ne Pita. Pita ga tere la ga paase la ne Mak ga malagan li levelinga at na lubuk. Neni ga malagan i xusu limixin boro Rom diba xasep at lempapaase at ne Iesu. Limixin boro Rom diga vavara aleng levenasen silok. Kuren la neni ga malagan na lubuk mi levelinga xeretna. Iesu ga silok aleng la ga ruuna lolos kusu ni na lox aroo limixin la na riki pes lubanggas basinge limixin, la na soxomus nedibasinge loxokoxo ap mo laxakapmek digak lok keneng teren.

**Lengkot silok keneng at na lubuk**

*1:1-13* Lovotpot at ne Jon, laradi sep susu, la ne Iesu.

*1:14-9:50* Leven gugu at ne Iesu ro Galili.

*10:1-52* Lavatpas at ne Iesu uto Jerusalem.

*11:1-14:3* Levenanasa at ne Iesu ro Jerusalem.

*14:4-15:47* Larangtanga alis la lanmet at ne Iesu.

*16:1-20* Iesu ga roo xat amlong basinge lanmet.

*Lavavang At Ne Jon*  
*Laradi Sep Susu Limixin*  
*(Mt 3:1-12; Lu 3:1-18; Jo 1:19-28)*

<sup>1</sup> Na Lagale Lavavang mumu ne Iesu Karisito, Nitna ne Moroa.

<sup>2</sup> \*Ga ruka i kerekngan ne Aisaia leeme vapaase ali at ne Moroa ga malagan ali i at Lovoang Kaala xeretna,

“Nenia naba riki laradi vapaase rak nabamgo ru la na gagas li langas tu.

<sup>3</sup> Lara mo ip kup to at lamatbin keretna, mina gagas li langas ti Leeme Silok kusu tin tit pas. Mina lox akmokso larangas tin.” *Mal 3:1; Ais 40:3*

<sup>4</sup> \*La ne Jon, laradi sep susu ga rupot to at lamatbin la ga sep susu limixin la ga vavang keretna, “Mina leeng basinge laxakapmek atnimi la mina lok ka lesep susu, kusu ne Moroa naba doxoma xepe leveloklok kakapmek atnimi.” <sup>5</sup> La buaang limixin digat pot pasa amisik ne Jon to at lamatbin. Digat pas boro at lemenemen silok Jerusalem la levengkot axap at lenep silok Judaia. La diga tong asu leveloklok kakapmek atdi la ne Jon ga sep susu ba di ro at ladan sen Joridan.

<sup>6</sup> \*Jon ga siga lavanga singsiga diga lox i mi laxabinim at lakamel. Neni ga etara avarang lavanga singsiga ren mi labanbaane diga lox i mi labantuxu at lavanga mi lavanuet kangkedek teren. La neni ga anan levenasku mi laxanmisiu boro at laxairing.

<sup>7</sup> \*La neni ga vavang bok keretna, “Melemu rak lara naba rupot. Lolos teren i volo lolos tarak. Axo epovo xusu ana soxomus luvanga vatpas teren mila neni i silok aleng tia.\*

<sup>8</sup> Nenia a sep susu nimi mi ladan mene nga, ketla neni naba sep susu nimi mi Loroonan Kaala.”

*Jon Ga Sep Susu Ne Iesu*  
*(Mt 3:13-17; Lu 3:21-22)*

<sup>9</sup> Ap mo levenaleng, ne Iesu ga laa boro at lenep Galili at lemenemen teren Nasaret la ga vot pasa ne Jon.

\* **1:2:** Mt 11:10    \* **1:4:** Gu 13:24; 19:4    \* **1:6:** 2 Lav 1:8; Mt 11:8    \* **1:7:** Gu 13:25    \* **1:7:** Anai ni lavapaase poovo ri lox asusu i do ne Jon ga lox asu langangan loklok ngangao ren ti ne Iesu.

La ne Jon ga sep susu i ro ladan sen Joridan.

<sup>10</sup> La ne Iesu ga vas basinge ladan la soso mun neni ga ven laxalibet ga rem suang, ga ven bok Loroonan Kaala ga lok ngan lamno ga rava si, la ga nemen teren.

<sup>11</sup> \*La laxaka at lara ga laa boro vana at laxalibet ga lok keretna, “Nena ne nuruk. A balamu i la a lok momo min.”

*Satan Gak Lok Tong  
Pen Ne Iesu*

*(Mt 4:1-11; Lu 4:1-13)*

<sup>12</sup> La soso mun Loroonan Kaala ga riki ne Iesu uto at lamatbin.

<sup>13</sup> \*La neni ga nemen e at lavanuet sangaun aleng. La ne Satan gak lok tong pen i. La ap mo lenep lempanga sio mi lavanuet kangkedek atdi diga nemen box e la lubungangelo digak lok tatao ne Iesu.

*Iesu Ga Ro Xaka Lavanuet Luvuttadi Sepsep Mat*

*(Mt 4:12-22; Lu 4:14-15; 5:1-11)*

<sup>14</sup> \*At lara laaleng diga ranga alis ne Jon la diga lok li i ro at loogu xokoxo, la melemu ren ne Iesu gamlong uto at lenep Galili la ga tong asu Lagale Lavavang at ne Moroa.

<sup>15</sup> \*Neni ga vavang keretna, “Levelaleng ngangais ira xap ta. Langas ti Linintoo at ne Moroa monga i auret. Mina leeng basinge leveloklok kakapmek atnimi la mina nunu at Lagale Lavavang.”

<sup>16</sup> La ne Iesu gat pas saparap lavatdan kis Galili la ni ga ven legepu radi sepsep mat, ne Simon mi ne Endru. Nedu leeton duga loloa mi laxatkat to at lavatdan kis.

<sup>17</sup> \*La ne Iesu ga lok tidu xeretna, “Ude numu, muna mumu asu ia. Nenia anaba lox ase numu mi langas ti sat kaka limixin i ngan tai mo, nemu mu loloa ka lenmat.”

<sup>18</sup> La soso mun nedu duga on basinge laxatkat atdu la duga emu min.

<sup>19</sup> La ne Iesu gat pas uto lixilik la ga ven ne Jems, nitna ne Sebedi la ga ven bok neton, ne Jon. Nedi digat kis at lese pang la diga lox agagas li lengkatkat.

<sup>20</sup> La soso mun ni ga ro xaka du la duga vas kaxat, duga on basinge ne temen du mi luvuttadi gugu ro at lese pang la duga emu min.

*Iesu Ga Riki Xepe Lagas Basinge Laradi  
(Lu 4:31-37)*

<sup>21</sup> \*La ne Iesu eburu mi lavaun pinivu ren diga onon uto at lemenemen Kaprenaum la at laaleng kaala diga vubeles at loogu singising la ne Iesu ga anasa limixin.

<sup>22</sup> \*La nom limixin diga sangu mila levelinga ren ga mumuat, neni xopmen goxo anasa ngan luvuttadi loklox ase at Laulis Linga.

<sup>23</sup> La soso mun lara laradi ga xatu upana ro xeneng at loogu singising, lagas ga suxuna i la ni gap kup keretna,

<sup>24</sup> \*“Iesu me Nasaret, unaba lok lavanga salai rinama? Uga rupot kusu unaba sep kepe axap nema, do? Aklen u. Nenu ne Nitna ne Moroa.”

<sup>25</sup> La ne Iesu ga vaase lolos tin, “Una lok pilo. Una sixisu basinge na laradi.”

<sup>26</sup> \*La nom lagas ga lox adede lolos nom laradi, la gap kup silok, la ga sixisu basinge ba i.

<sup>27</sup> La limixin axap diga sangu aleng la diga epaase xeretna, “Loklok salai mo? Laanasa maxat mo, do? Lolos teren i silok. I tong asu levelinga ti lubungas la di mu asu i.”

<sup>28</sup> \*La nom limixin diga onon la diga tong nom lavanga ne Iesu ga lox i la limixin axap to at lenep Galili diga rongga i.

*Iesu Ga Lox Aroo  
Buaang Limixin  
(Mt 8:14-17; Lu 4:38-41)*

\* 1:11: Sam 2:7; Ais 42:1; Mt 12:18; Mk 9:7 \* 1:13: Sam 91:11-13 \* 1:14: Mk 6:17 \* 1:15: Mt 3:2; Ga 4:4 \* 1:17: Mt 13:47; Lu 5:1-11 \* 1:21: Mt 4:13 \* 1:22: Mt 7:28-29 \* 1:24: Mk 5:7 \* 1:26: Mk 9:26 \* 1:28: Mt 4:24



<sup>29</sup> La ne Iesu ga vas su at loogu singising la soso mun nedi mi ne Jems la ne Jon diga vubeles at loogu at ne Simon la ne Endru.

<sup>30</sup> La luvutulom at ne Simon ga meres mi liplivi la gak midi ro at loora ren. Diga tong i nom ti ne Iesu,

<sup>31</sup> la soso mun ne Iesu ga vot pasa i, ga rebeng axatu i la liplivi ga xap basinge i. La ni ga lox agagas lempanga anan tinedi.

<sup>32</sup> Ga ukantinao laxangking ga lotup, limixin me go diga vot pasa ne Iesu, diga lam kaka limixin mi laxanassen anmeres la limixin lubanggas ga suxuna di.

<sup>33</sup> Buaang limixin ap mo lemene-men diga vot saparap ne Iesu ap mo loogu.

<sup>34</sup> \*La ne Iesu ga lox aroo limixin mekmeres la ga riki xepe lubanggas basinge limixin. Lubunggas digaklen i do ne Iesu nitna ne Moroa, ketla ne Iesu goxo siam do dina tong asu i ri limixin.

### *Iesu Ga Vavang To Galili (Lu 4:42-44)*

<sup>35</sup> \*Taba umaxantamak suubu gak lok main kakalik move, Iesu ga aus la ga vas su la gat pas uto at lenep mimila la neni ga lok lising.

<sup>36</sup> La ne Simon eburu mi larapen tangas teren diga puse rin

<sup>37</sup> se diga vuse ka i, la diga lok tin keretna, "Limixin axap di puse ru."

<sup>38</sup> La ne Iesu ga lok tidi xeretna, "Ata onon uto at levenmenemen petpes kusu ana vavang bok go. Ni lavasuun teren la nenia aga si ude xopok at lavatbung menemen."

<sup>39</sup> \*La ne Iesu gat pas tangtagap at levengkot axap at lenep Galili. La ni ga vavang to at laraogu singising atdi la ni ga riki xepe lubanggas basinge limixin.

### *Iesu Ga Lox Aroo Laradi (Mt 8:1-4; Lu 5:12-16)*

<sup>40</sup> At lara laaleng lara laradi ga vot pasa ne Iesu. Lanmeres gak lok

teren, diga tong i mila lanmeres gu (leprosy). La neni ga sing ne Iesu kusu ne Iesu na lox aroo i. La neni ga xis tiktikbu mi luvatgulom teren ti lok ngangao at ne Iesu la ga lok tin, "Do u vara i, una lox aroo ia."

<sup>41</sup> La ne Iesu ga balamu i la ga song asu mi lekngen la ga long tu ren la ga lok tin keretna, "A vara i, lanmeres taram na xap ta."

<sup>42</sup> La soso mun nom lanmeres ga xap la nom laradi ga lox avukat.

<sup>43</sup> La ne Iesu ga paase lolos tin la ga riki aonon i,

<sup>44</sup> \*ni ga vaase rin keretna, "Nemen uta tong asu i na ri teta, ketla unat pas uto at lamaasa la neni na ven mumu u. Melemu una lok laramtaba ram ti ne Moroa ngan ne Moses ga tong i xusu ti lox asuusu i ri limixin axap do nenu mo ura lox avukat ta."

<sup>45</sup> Ketla nom laradi ga vas kaxat la ga tong asu i ri limixin axap. Kuren la ne Iesu gat pas lipe mene ro at levenmenemen, mila buaang limixin diga lox angtang amisix i. La ni ga nemen to at lamatbin, ketla buaang limixin move diga tupot pasa i, diga laala boro at levengkot axap.

## 2

### *Iesu Ga Lox Aroo Laradi Labantuxu Ren Ga Molo Axap (Mt 9:1-8; Lu 5:17-26)*

<sup>1</sup> Lentaba levenaleng ga xap la ne Iesu gamlong uto Kaprenaum la limixin diga rongga levelinga do ne Iesu ga rupot to at loogu ren.

<sup>2</sup> La buaang limixin diga vot eburu go la nom loogu ga umsu la no maxamang bok saparap lumusmaragu ga umsu bok. La ne Iesu ga vavang tidi.

<sup>3</sup> La lentaba limixin diga rupot to at nom loogu la lavanuet atdi digap kip lara laradi mi loora ren. Nom laradi ga meres, labantuxu ren ga molo axap.

<sup>4</sup> La nedi di goxo epovo dina vot saparap ne Iesu min mila buaang

\* 1:34: Mk 3:11-12 \* 1:35: Mt 14:23; Mk 6:46  
14:1-32

\* 1:39: Mt 4:23; 9:35 \* 1:44: Mk 3:12; 7:36; Mas

limixin diga rupe lumusmaragu. Kuren la nedi diga eng urut at nom loogu la diga ut avolo loxot to mavana saparap ne Iesu la diga lox asi nom laradi mekmeres mi loora ren.

<sup>5</sup> \*La ne Iesu ga ven kibis lununu atdi la ga lok ti laradi mekmeres keretna, “Lentangas tarak. Leveloklok kakapmek axap taram, a doxoma xepe i.”

<sup>6</sup> La lentaba luvuttadi loklox ase at Laulis Linga digat kis go, diga ronga nom levelinga at ne Iesu la diga esue at levendoxoma atdi xeretna,

<sup>7</sup> \* “Na laradi i paase kereva? I paase vupu ri ne Moroa. Nege i epovo ti doxoma xepe leveloklok kakapmek? Moroa xusuk i epovo.”

<sup>8</sup> La soso mun ne Iesu ga doxoma xisip nom levendoxoma atdi la ga lok tidi xeretna, “Tila nemi mi doxoma ekarakat mumu i na levelinga rak?”

<sup>9</sup> Ua levelinga xopmen na lolos ti tong i? Leveloklok taram ara doxoma xepe vam i, koplana ana tong i do, katu kaxat la unat pas?

<sup>10</sup> Ketla a vara i do minaklen i do, nenia, Laradi Mevana, a ruuna lolos at na lavatbung menemen ti doxoma xepe leveloklok kakapmek.” La ni ga lok ti mo laradi mekmeres keretna,

<sup>11</sup> “A tong i ru, una xatu upana, la una xip kaka loora ram, la una vas kaxat ukolonu.”

<sup>12</sup> \*La nom laradi ga xatu kaxat, la ga xip kaka loora ren la ga vas kaxat. La nedi axap diga ven i, diga sangu aleng la diga emi asu mi ne Moroa la diga epaase xeretna, “Nedik goxovisi na ven tempanga xeretnom.”

*Iesu Ga Ro Xaka Ne Levi*  
(Mt 9:9-13; Lu 5:27-32)

<sup>13</sup> La melemu ne Iesu ga on basinge manga lemenemen Kaprenaum la gat pas saparap lavatdan kis Galili. La buaang limixin diga vot pasa i la neni ga anasa di.

<sup>14</sup> \*La melemu ni gat pas uto lixilik la ga ven ne Levi nitna ne Alpias, gat kis to at loogu xekepe pilas. La ne Iesu ga lok tin keretna, “Una mumu asu ia.” La ne Levi ga xatu la ga mumu asu i.

<sup>15</sup> Melemu ne Iesu gat kis la ga anan to at loogu at ne Levi. Luvuttadi xekepe pilas la limixin kakapmek\* diga anan eburu mi ne Iesu. Buaang limixin kakapmek diga mumu asu ne Iesu.

<sup>16</sup> \*La luvuttadi loklox ase at Laulis Linga mi lubang Parisi diga ven i do ne Iesu ga anan eburu mi nom limixin kakapmek la diga lok ti lavaun pinivu at ne Iesu xeretna, “Tila ne Iesu i anan eburu mi nom luvuttadi loklok ka pilas la limixin kakapmek?”

<sup>17</sup> La ne Iesu ga ronga i nom la ga lok tidi xeretna, “Limixin di lox avukat, kopmen dinak pakes ti loklok tooro, ketla nedi xusuk mun dikmeres. Aga rupot kusu ti ro xaka limixin kakapmek dikpakes kusu dina leeng, la nia goxo rupot kusu tinedi limixin manmanton.”

*Iesu Ga Paase Mumu Loklok Ti Mun Anan*

(Mt 9:14-17; Lu 5:33-39)

<sup>18</sup> At lara laaleng lavaun pinivu at ne Jon, laradi sep susu limixin, diga mun anan la lubang Parisi bok diga mun anan. La lentaba limixin diga vot pasa ne Iesu la diga sue i xeretna, “Lavaun pinivu at ne Jon di mun anan la lubang Parisi bok di mun anan. Tila ba lavaun pinivu ram kopmen dina mun anan?”

<sup>19</sup> La ne Iesu ga vorang i ridi mi lavapaase poovo xeretna, “At loklox anarong ti leepot, lentaba at laradi epot di noxo mun anan mila laradi epot ik lok eburu midi.

<sup>20</sup> Ketla laaleng move naba rupot la limixin petpes dinaba lam ka laradi epot basinge lentaba ren la dina mun anan ba ap mo laaleng.”

\* 2:5: Lu 7:48 \* 2:7: Ais 43:25; 1 Jo 1:9 \* 2:12: Mt 9:33 \* 2:14: Jo 1:43 \* 2:15: Anai, nedi luvuttadi me Judaia ua kopmen di goxo mumu asu avukat Laulis Linga mi leveloklok atdi limixin me Judaia. \* 2:16: Mt 11:19; Lu 15:1-2

*Lempapaase Poovo Mumu Leve-  
nanasa Maxat At Ne Iesu*

<sup>21</sup> La ne Iesu ga tong asu lava-  
paase poovo ridi xeretna, “Kopmen  
teta na balais ka loxontamon maxat  
kusu na sok gatgat pe lamamara  
at labantamon maut. Mo do neni  
na lox i xuren, loxontamon maxat  
ira lok kapmek pam la kopmen na  
epovo bok ba kusu ata ba lok tavanga  
min. La nom loxontamon maxat  
noxo epovo kusu na lok pe avukat  
lamamara at loxontamon maut.”

<sup>22</sup> La ne Iesu ga vaase bok tidi mi  
lavapaase poovo. Ni ga lok keretna,  
“Kopmen tara na soli li laxadan vaen  
maxat uto xeneng ti labantuxu at  
lavatme i maut pam. Mo do neni  
na lox i xuren, mo labantuxu maut  
ba repagam la laxadan vaen naba  
soli su ukamang, la labantuxu maut  
naba lok kapmek. Laxadan vaen  
maxat mina soli li i at labantuxu  
maxat.”

*Iesu Ga Paase Mumu  
Laaleng Kaala*

*(Mt 12:1-8; Lu 6:1-5)*

<sup>23</sup> At lara laaleng kaala Iesu mi  
lavaun pinivu ren diga vas polo  
lentaamang piao la lavaun pinivu  
ren diga dik ka levempeven piao la  
diga anan i.

<sup>24</sup> \*La lubung Parisi diga ven i  
nom la diga lok ti ne Iesu xeretna,  
“Pen ba i nom. Dira los polo vam  
Laulis Linga, i tong i do nemen mitak  
lok lempanga keretnom at laaleng  
kaala.”

<sup>25</sup> \*La ne Iesu ga lok tidi xeretna,  
“Mina doma su ap mo lempanga ne  
Devit, ga lox i at laaleng neni eburu  
mi limixin teren digak pakes la diga  
roxoxo.”

<sup>26</sup> \*Neni ga vubeles at loogu at ne  
Moroa ap mo lamaares ne Abaita  
neni laradi gomgo at lavamaasa. La  
ne Devit ga lok ka mo lengkongkide  
digam taba min ti ne Moroa, la ni  
ga anan teren la ga raba bok lengkot  
teren ti limixin teren. La kerepmo

diga los polo Laulis Linga, mila lava-  
maasa kusuk mun diga anan mo  
lengkongkide.”

<sup>27</sup> \*La ne Iesu ga lok bok tidi  
xeretna, “Moroa ga lok li laaleng  
kaala ri lok tooro limixin. Neni goxo  
rudum li limixin kusu ti lok tooro  
laaleng kaala.”

<sup>28</sup> Nenia Laradi Mevana. La nenia  
Lamgomgo at laaleng kaala la ak lok  
tatao mo laaleng.”

### 3

*Iesu Ga Lok Tooro Laradi Lekngen  
Ga Molo*

*(Mt 12:9-14; Lu 6:6-11)*

<sup>1</sup> La melemu ne Iesu ga vubeles  
manga to at loogu singising. Lara  
laradi mi lekngen ga molo gat kis go.

<sup>2</sup> Lubung Parisi diga reven pilo  
ne Iesu do neni naba lox aroo nom  
laradi at laaleng kaala. Diga vara  
i do nedi dina sok taba ne Iesu mi  
tevelinga.

<sup>3</sup> La ne Iesu ga tong i ri nom laradi  
mi lekngen ga molo keretna, “Una  
xatu kaxat ude melamgo at limixin  
axap.”

<sup>4</sup> \*La ne Iesu ga sue lubung Parisi  
xeretna, “Lavanga salai Laulis Linga  
i siam min kusu ata lox i at laaleng  
kaala? Ti lok tooro laradi kopla ti lox  
asongor i? Ti lox arooro laradi kopla  
ti sev amer i?” Ketla di goxo vorang  
i.

<sup>5</sup> \*La ni ga ven tangtagap tinedi la  
ga musak di la ga lok bukbulu aleng  
bok atla lebelendi ga lolos aleng.  
La ni ga lok ti nom laradi xeretna,  
“Una song asu mi lakngam.” La  
nom laradi ga song asu mi lekngen  
la lekngen ga lox avukat.

<sup>6</sup> \*La lubung Parisi diga on basinge  
loogu singising la soso mun diga vot  
pasa luvuttadi diga etangas mi ne  
Erodes. La nedi diga puse ngas kusu  
dina sev amet ne Iesu.

*Buaang Limixin Diga Mumu Asu  
Ne Iesu*

\* 2:24: Lal 23:25 \* 2:25: 1 Sml 21:1-6 \* 2:26: Mas 24:5-9 \* 2:27: Lal 5:14 \* 3:4: Lu 14:3  
\* 3:5: Jo 11:33 \* 3:6: Mt 22:15-16

<sup>7</sup> La ne Iesu mi lavaun pinivu ren diga on basinge loogu singising la diga vas si uto at lavatdan kis Galili. La buaang limixin diga mumu asu i. Nedi limixin diga laa boro at lengkot axap, lentaba boro at lenep silok Galili,

<sup>8</sup> \*Lentaba boro at lenep silok Judaia, lentaba boro at lemenemen silok Jerusalem, lentaba boro at lenep silok Idumia, lentaba boro Joridan at lenep dan meso, lentaba boro at lenep silok at lumenemen Taia la Sidon. Nedi axap diga vot pasa ne Iesu mila diga rongga nom lempanga neni ga lox i.

<sup>9</sup> \*La ne Iesu ga tong i ri lavaun pinivu ren dola dina lok ka lese pang lixilik tin ti ru ren. La neni ga vavang ti limixin to at nom lese pang mila buaang limixin diga vot saparav i la diga umsu aleng.

<sup>10</sup> \*Diga vot saparav i mila neni ga lox aroo buaang limixin. La limixin mi levenasen anmeres diga esi xakape ti long tu ren kusu levenanmeres atdi na xap.

<sup>11</sup> \*La lentaba limixin lubunggas ga suxuna di, diga rupot saparap ne Iesu la diga xis tiktikbu mi lempatulom atdi. Ga se diga ven i, digap kup silok keretna, "Nenu Nitna ne Moroa."

<sup>12</sup> \*La ne Iesu ga vaase pe lubunggas dola di noxo tong asu i ri limixin dola neni Nitna ne Moroa.

### *Iesu Ga Lok Katling Lasangaun Mi Legepu Radi*

*(Mt 10:1-4; Lu 6:12-16)*

<sup>13</sup> La melemu ne Iesu ga urut at lavatkaana la ga ro xaka mo luvuttadi neni ga vara i do dina gugu eburu min. La nedi diga vot pasa i.

<sup>14</sup> La ni ga lok katling lasangaun mi legepu radi la ga so asen di mi luvuttadi vavang. Ni ga soxolik kaka di xusu dina nemen eburu min la kusu neni naba riki di ti vavang

<sup>15</sup> la ti riki xepe lubunggas basinge limixin.

<sup>16</sup> \*Levenasen at nom luvuttadi, ne Simon, Iesu ga raba box i mi lara laasen, ne Pita.

<sup>17</sup> \*La ne Jems du lueton mi ne Jon, lumdak at ne Sebedi. Iesu ga raba bok du mi lara laasen, ne Boaneges, lavasuun at nom loxolinga xeretna, di paase mukmusak ngan lavanga i mam.

<sup>18</sup> La bok ne Endru la ne Pilip, la ne Batolomiu, la ne Metiu, la ne Tomas, la ne Jems nitna ne Alpias, la ne Tadius, la ne Simon, neni lara at libinam tadi me Selot,

<sup>19</sup> la ne Judas Iskariot, neni nom laradi ga song araba ne Iesu ri limixin kakapmek.

### *Iesu Ga Paase Mumu Ne Satan (Mt 12:22-32; Lu 11:14-23; 12:10)*

<sup>20</sup> Melemu ne Iesu midi diga vubelles uto at loogu la buaang limixin diga vot pasa manga di. La ne Iesu mi lavaun pinivu ren di goxo epovo na anan mila buaang limixin digak lox angtang di.

<sup>21</sup> \*Se lentaba at ne Iesu diga rongga i nom, diga lok do dina rupot ti lam kaka i mila diga lok do ne Iesu gang tangku.

<sup>22</sup> \*La luvuttadi loklox ase at Laulis Linga diga laa boro Jerusalem la diga lok keretna, "Belsebul i suxuna i mi lolos teren la neni leeme gomgo at lubunggas la neni ira riki xepe lubunggas."

<sup>23</sup> La ne Iesu ga ro xaka luvuttadi loklox ase at Laulis Linga la ga lok tidi xeretna, "Lavapaase atnimi xopmen nak mokso mila ne Satan noxo riki xepe lubunggas teren."

<sup>24</sup> La ne Iesu ga paase poovo ridi xeretna, "Dola tubung mixin di epes di ri lengkon binam tadi, la dia esep eburu minedi xa, kopmen noxo lok nunuan letuna atdi.

<sup>25</sup> Loxoetemen do di epes ti esep, dinaba xis epeseves.

\* **3:8:** Mt 4:25    \* **3:9:** Mk 4:1; Lu 5:1-3    \* **3:10:** Mt 14:36    \* **3:11:** Lu 4:41    \* **3:12:** Mk 1:34  
\* **3:16:** Jo 1:42    \* **3:17:** Lu 9:54    \* **3:21:** Jo 10:20    \* **3:22:** Mt 9:34; 10:25

<sup>26</sup> La kerepmo bok do ne Satan mi lubunggas dina esep, dinaba epe-seves la lolos at ne Satan naba xap.

<sup>27</sup> Do tara i vara na xip pilo xaka lempanga at loogu at taradi lolos, neni na xoxo alis be mo laradi la melemu na xip kaka ba lempanga ren.

<sup>28</sup> Nia a tong tuturun i rinimi. Moroa naba doxoma xepe leveloklok kakapmek at limixin axap la neni naba doxoma xepe levelinga kapmek limixin dina paase mumu i min.

<sup>29</sup> Ket do tara na vaase vupu ri Loroonan Kaala, ne Moroa noxo doxoma xepe rinotno i. Neni i bixurun mi laxakapmek ua ixo epovo do ne Moroa na doxoma xepe i.”

<sup>30</sup> Iesu ga tong i na atla luvuttadi loklox ase at Laulis Linga diga lok do lagas ga suxuna ne Iesu.

*Nege Libibinat Tuturun  
At Ne Iesu?  
(Mt 12:46-50; Lu 8:19-21)*

<sup>31</sup> \*La nenen mi luvutneton ne Iesu diga rupot. Diga tu ro xamang la diga riki lara ri ro xaka i.

<sup>32</sup> Buaang limixin digat kis kangkan i la diga tong i rin dola nenen mi luvutneton di puse i.

<sup>33</sup> La ne Iesu ga lok, “Nege mo ne naga la nege di luvutnetak?”

<sup>34</sup> La ne Iesu ga ven tinedi digat kis kangkan i la neni ga lok ti limixin axap keretna, “Na luvuttadi nedi di lok ngan ne naga mi luvutnetak.

<sup>35</sup> Neni mun i mu asu lavavara at ne Moroa, neni netak koplā neinuk koplā ne naga.”

## 4

*Lavapaase Poovo At Laradi Gatlotlo Piao  
(Mt 13:1-9; Lu 8:4-8)*

<sup>1</sup> \*La melemu ne Iesu ga anasa manga limixin saporap lavatdan kis Galili. Buaang limixin diga umsu la diga esi aleng. Kuren la ne Iesu ga vubeles to xeneng at lese pang la gat kis teren to at lavatdan kis la limixin

axap digat kis to loxon la digang tonga i ga paase.

<sup>2</sup> \*La ne Iesu ga tong asu laxampanga solo mi lempapaase poovo, la neni ga tong lavapaase poovo xeretna,

<sup>3</sup> “Mina rongā avukar i na. Lara laradi gat pas uto xataamang, la gatlotlo levennit piao, ga lulu reve min.

<sup>4</sup> La lentaba levennit piao ga subu at langa. Lavapixa diga vot la diga rok axav i.

<sup>5</sup> La lentaba levennit piao ga subu ro at laxanuat la lengkongkangka lixilik mene gak lok teren. Levenit piao ga suu xat soso mun, mila goxopmen taxangka solo.

<sup>6</sup> Ise laxangking ga losu upana, ga sev amolos axap nom lempiao, mila levenixe atdi goxo si aleng ukopok la nom lempiao suusu diga met axap.

<sup>7</sup> La lentaba ga subu ro at livin gagas. La nom livin gagas ga suu xat la ga is nom lempiao la levempiao goxo visik.

<sup>8</sup> La lentaba ga subu ro at loxongkangka avukat la ga suu xat, la ga suusu avukat, la melemu ga visik laxampeven teren. Lentaba ga visik lavantun sangaun, lentaba ga visik lavanna sangaun, lentaba ga visik legesa sangaun kobot (100).”

<sup>9</sup> La ne Iesu ga lok bok tidi xeretna, “Mina doxoma avukat nom levelinga rak kusu mina xasep teren.”

*Iesu Ga Paase Mumu Lempasuun  
At  
Lempapaase Poovo  
(Mt 13:10-17; Lu 8:9-10)*

<sup>10</sup> Melemu ne Iesu gak lok mi lavaun pinivu ren la lentaba petpes bok la nedi xusuk digak lok eburu min la diga sue i mi lempapaase poovo.

<sup>11</sup> La ne Iesu ga vorang i ridi xeretna, “Moroa ira raba vam nimi mi lakleklen at Linintoo at ne Moroa, gano ga nemen alipe. Ketla tinedi maxamang, di rongā mene lempapaase poovo.

\* **3:31:** Mk 6:3; Jo 2:12; Gu 1:14    \* **4:1:** Mk 3:7-9; Lu 5:1-3    \* **4:2:** Mt 13:34; Mk 4:33-34    \* **4:12:** Jo 12:40; Gu 28:26-27

12 \*Ni ik lox i xuren kusu, 'Nedi di reven lugugu, ketla di noxo ven kibis i. Ding tonga mo levelinga, ketla di noxo xasep teren. Do dina xasep, diba leeng la ne Moroa na doxoma xepe leveloklok kakapmek atdi.' " *Ais 6:9-10*

*Iesu Ga Tong Asu Lavasuun At Lavapaase Poovo*

*(Mt 13:8-23; Lu 8:11-15)*

13 La ne Iesu ga lok bok tidi xeretna, "Kereva, kopmen mina xasep at na lavapaase poovo? Do mixo xasep at na lavapaase poovo, i lolos do mina xasep at lempapaase poovo vetpes bok, ketla ana tong axasev i nom tinimi.

14 At na lavapaase poovo mo laradi lotlo i ru katling laradi i tong asu levelinga at ne Moroa.

15 Lentaba levennit piao ga subu ro at langa i ru katling limixin di ronga levelinga at ne Moroa, ketla ne Satan i tupot soso la ik lok pes i.

16 Ti levenit piao ga subu ro at laxanuat, lengkongkangka lixilik gak lok teren, ni i ru katling nedi limixin di ronga levelinga la soso mun di siam ka i mi lomomo.

17 \*Ketla ixo vubeles ukeneng at lorooro atdi, la lununu atdi ixo nemen abao solo. Kuren la ise do levemmumuat i vot eburu mi levesongsongot mumu levelinga at ne Moroa, lununu atnedi i subu soso mun.

18 Ti levenit piao ga subu ro at livin gagas, ni i ru katling nedi limixin di ronga levelinga,

19 \*ketla di bulu mu solo laxampanga at na lorooro la nom lavavara atnedi ri lapnovos, la levereven peves ti lempanga at na lavatkangka i vubeles at lorooro atdi la di itis nom levelinga la dixo visik tempeven una.

20 La ti levenit piao ga subu at laxangka nunuan, ni i ru katling limixin di ronga levelinga at ne Moroa la di siam kaka i la lempanga avukat

i ravasu at lorooro atdi. Lentaba di visik lempeven una i epovo at lavantun sangaun la lentaba lavanna sangaun la lentaba legesa sangaun kobot (100)."

*Lavapaase Poovo At Lababao*  
*(Mt 5:15; Lu 8:16-18; 11:33)*

21 \*La ne Iesu ga tong bok lavapaase poovo ridi xeretna, "Kereva, mi sox aros lababao la mi vung pavaa i mi lavatbaaket kopla mina lok li maxopok at loora? Kopmen. Mi lok li i ro at loxot kasep.

22 \*Lempanga no ga nemen alipe rinotno, naba ravasu ri lasaxaven. La levelinga, lavasuun teren no i nemen alipe, melemu naba xasep.

23 Do tara i ruuna lubaalung ting tonga, neni na ronga avukat na levelinga."

24 \*La ne Iesu ga lok bok tidi xeretna, "Minang tonga avukat na levelinga. La lempanga mi lox i rinedi vetpes, neni mun i nom ne Moroa naba raba nimi min, la loxot bok mavana ren.

25 \*Do tara na siam ka mo levelinga ne Moroa i raba i min, Moroa naba raba box i mi laxasep avukat at levelinga ren. Dola tara noxo siam ka levelinga at ne Moroa, Moroa naba lok pes bok laxasep kakalik teren, keke i do neni i doxoma i do im tebengi."

*Lavapaase Poovo At Levennit I Suusu*

26 La ne Iesu ga tong asu bok lavapaase poovo ridi xeretna, "Linintoo at ne Moroa i lok keretna. Lara laradi gatlotlo levennit piao ro xataamang,

27 \*la ni gak midi la ga aus at levenaleng axap. Mo levennit piao ga raut la ga suusu la nom laradi goxoklen i do mo levempiao ga suu kereva.

28 La laxangka axa ga lox asuusu mo levempiao. Levempiao ga raut avot, melemu ren levempavaxan

\* 4:17: Mt 26:31 \* 4:19: Mt 19:23-24 \* 4:21: Mt 5:15 \* 4:22: Mt 10:26; Lu 12:2 \* 4:24: Mt 7:2 \* 4:25: Mt 13:12 \* 4:27: Je 5:7 \* 4:29: Jol 3:13; Li 14:15

teren ga suu xat la melemu nom levennit piao ga visik.

<sup>29</sup> \*Se mo lempeven teren ga mukun, mo laradi ga riki luvuttadi gugu ren mi lemparise atdi ti sep kin ap mo lempeven piao.”

*Lavapaase Poovo  
At Levennit Mastet  
(Mt 13:31-32,34; Lu 13:18-19)*

<sup>30</sup> La ne Iesu ga tong asu bok lava-paase poovo ridi xeretna, “Nenia ana tong asu lavapaase poovo rinimi xusu mina xasep at Linintoo at ne Moroa i lok kereva.

<sup>31</sup> Linintoo at ne Moroa i lok ngan lara laradi ga lok ka levennit mastet la gatlotlo i ro xataamang teren. Nom levennit i xakalik tinotno ti lev-enit axap at na lavatbung menemen.

<sup>32</sup> Do tara natlotlo i, nom leven-nit ba suu xat silok, la ba silok polo levenuna axap to xataamang. Lengkakan teren ba silok kusu lava-pixa bat kis to xeneng at lamamau ren.”

<sup>33</sup> Laxampapaase poovo keretnom ni ga vaase asu i ri limixin axap at nom laaleng. Se diga epovo kusu di-naklen ka levelinga ren, ni ga vaase asu i ridi.

<sup>34</sup> Neni ga vavang mi lempapaase poovo xusuk la ni ga tong asu lava-suun at nai ri lavaun pinivu xusuk mene ren.

*Iesu Ga Lox Amila  
Lavatdan Kis  
(Mt 8:23-27; Lu 8:22-25)*

<sup>35</sup> Ap mo laaleng ga ukantinao ne Iesu ga lok ti lavaun pinivu ren keretna, “Ata sen polo lavatdan kis uto at lenep meo.”

<sup>36</sup> La lavaun pinivu diga on basinge buaang limixin la diga los kas at lese pang Iesu gat kis teren la diga sen kaxat. Lentaba bok diga sen kaxat mi levesepang atdi.

<sup>37</sup> La mo langsgangan lamanman ga mas lolos la lavatdan kis ga repit aleng la ladan ga vubeles uto xeneng at lese pang, la ma lixilik lese pang ga lok do na dong si.

<sup>38</sup> La ne Iesu gak midi ro melemu at lese pang la ga liingun at lavatliin-gun. La diga ro aus i la diga lok tin keretna, “Leeme loklox ase. Tila u unga? I auret kusu ata seeve.”

<sup>39</sup> La ne Iesu ga xatu kaxat la ga vaase lolos pe lamanman la ga lok ti lavatdan kis keretna, “Unak lok pilo. Una mila.” La lamanman ga xap la lavatdan kis ga mila.

<sup>40</sup> La ni ga lok tidi xeretna, “Tila nemi mi marat? Kereva, kopmen tununu atnimi?”

<sup>41</sup> La nedi diga sangu aleng la diga epaase xeretna, “Laradi salai na? Lamanman la lavatdan kis dura ronga res at levelinga ren.”

## 5

*Iesu Ga Riki Xepe Lubunggas  
Basinge Laradi  
(Mt 8:28-34; Lu 8:26-39)*

<sup>1</sup> La ne Iesu mi lavaun pinivu ren diga rupot to loxon ap mo lavatdan kis to at lenep Gerasa.

<sup>2</sup> \*La ne Iesu ga vas su at lese pang la soso mun lara laradi ga vot pasa i. Neni ga laa boro at lenep at larabuang digak mikmit labarongan to xeneng teren. Lagas ga suxuna nom laradi.

<sup>3</sup> Neni ga nemen to ap mo larabuang la limixin at nom lenep di goxo epovo ri xoxo alis i mi lavaroo sen. <sup>4</sup> Gano digak lok tong pen i do dina xoxo alis i mi lavaroo sen. Ketla neni ga ba korop nom lavaroo sen diga lok li i at lukngen la luxangkedek teren. La tara goxo epovo lolos kusu na ranga alis i.

<sup>5</sup> At levenaleng axap at levenaleng kangking la at lengkanimin neni gat pas tangtagap to xeneng at larabuang la to at lengkong kaana la ni gap kup silok la ga rivit koxorop labantuxu ren mi lengkonuat.

<sup>6</sup> Se ni ga ven ne Iesu ro vaxalom, ni ga sixit pasa i la ga xis tik-tikbu mi luvatgulom teren saporap luxangkedek at ne Iesu.

7-8 \*La ne Iesu ga lok tin keretna, “Una on basinge na laradi, nenu lagas kapmek.” La nom laradi gap kup silok ti ne Iesu xeretna, “Iesu, Nitna ne Moroa, Leeme Avolo. U rupot de ri lok lavanga sala ria? Una xaape ri ne Moroa dola u noxo sev asongoria.”

9 La ne Iesu ga sue i, “Nege laasen taram?”

Lagas ga vorang i xeretna, “Laasen tarak ne Limixin Buaang, mila nema buaang lubanggas ma suxuna na laradi.”

10 La ni ga sing lolos ne Iesu xusu neni noxo riki xepe di uto at lenep kangka vetpes.

11 Buaang laxanbo mo diga nemen auret, diga anan to at lakaana.

12 La lubanggas diga sing ne Iesu xeretna, “Una riki nama uto ap mo laxanbo la una siam do mana vubeles atdi.”

13 La ne Iesu ga ke aonon di la lubanggas diga sixisu basinge mo laradi la diga vubeles at laxanbo. La mo laxanbo diga sixit kaxat la diga sixisi ukopok at lakaana la diga los tup to at lavatdan kis la laxanbo diga xong axap. Nom laxanbo ga epovo at legepu abin sangsangaun kobot (2000).

14 La nedi diga lok tatao laxanbo diga sixit kaxat uto at lemenemen atdi la diga tong i na lavanga ri limixin me go la to bok at lengkot petpes. La nom limixin diga laa boro at levenmenemen atdi xusu dina ven mo lavanga ne Iesu ga lok pam i.

15 Diga vot pasa ne Iesu la diga ven laradi, laxan gas ga suxuna i gano, mo gat kis, la ga siga lempanga singsiga la lodoxoma ren ga lox avukat axap la nedi limixin diga marat.

16 La mo limixin diga vaase asu nom lavanga ne Iesu ga lox i ri nom laradi mi laxanbo.

17 La nom limixin diga sing lolos ne Iesu dola neni na on basinge mo lenep kangka.

18 La ne Iesu ga los kas at lese pang la mo laradi ga sing ne Iesu xeretna, “I epovo do ana emu minu?”

19 Ketla ne Iesu goxo siam la ga lok tin keretna, “Una onon uto xolonu ram la una tong lavanga salai Leeme Silok i lox i ru, la i lox asuusu lebelen tuntun tu.”

20 \*La nom laradi ga on basinge ne Iesu la gat pas tangtagap to at lenep silok Sangaun Menemen la ga tong nom lavanga ri limixin axap. La nedi limixin diga sangu aleng ap mo lavanga ne Iesu ga lox i ri nom laradi.

*Iesu Ga Lox Aroo Latkin  
(Mt 9:18-26; Lu 8:40-56)*

21 La ne Iesu gamlong bok polo ro at lavatdan kis mi lese pang. La buaang limixin diga vot pasa ne Iesu to loxon.

22 Lara laradi ga rupot, neni laradi gomgo at loogu singising, laasen at nom laradi ne Jairas. Ni ga ven ne Iesu la ga xis tiktikbu mi luvatgulom teren saparap luxangkedek at ne Iesu.

23 \*La ni ga sing lolos ne Iesu xeretna, “Loolik tarak i auret do na met. A vara i dola una vot pasa i la una lok li lukngam teren kusu una lox aroo i la neni noxo met.”

24 La ne Iesu ga emu min.

La buaang limixin bok diga emu min la digat pas esi xakape.

25 La lara latkin mo ga nemen. Lanmeres gaaling gak lox amisik teren at levenaleng axap, ga epovo at lasangaun mi legepu maares.

26 Ni gat pot pasa amisik luvuttadi sangsanga ketla diga raba mene i mi levesongsongot la di goxo lok tooro i. Lempilas teren ga xap la mo lanmeres ga sisilok.

27 La ni ga rongga i dola ne Iesu ga lox aroo limixin la neni ga vas mu ne Iesu ro melemu eburu mi limixin la ga rebeng tu at lavanga singsiga ren.

28 \*Mila ni ga lok do na long tu at lavanga singsiga ren, la ni ba lox avukat ba.

\* 5:20: Mt 4:25; Mk 7:31    \* 5:23: Mt 8:3; Mk 7:32    \* 5:28: Mt 14:36    \* 5:30: Lu 6:19



<sup>29</sup> La soso mun lanmeres teren ga xap la ni ga suma i do ga lox avukat ta.

<sup>30</sup> \*La soso mun Iesu ga suma i do lolos ga ravasu. La neni ga rem gili la ga sue, "Nege i long tu at lavanga singsiga rak?"

<sup>31</sup> La lara at lavaun pinivu ren ga vorang i xeretna, "Buaang limixin dit pas eburu minu. Tila u sue do, 'Nege i long tu at lavanga singsiga rak', mila a lok do buaang limixin di long tu at lavanga singsiga ram."

<sup>32</sup> La ne Iesu ga milik tangtagap la ga ven pupuse ti nom lara ga long tu at lavanga singsiga ren.

<sup>33</sup> La nom latkin ga umsu mi lanmarat silok, ni ga xasep do lanmeres teren ga xap la ni ga xis tik-tikbu mi luvatgulom teren saparap luxangkedek at ne Iesu la ga tong asu lorooro ren tin.

<sup>34</sup> \*Ketla ne Iesu ga lok tin, "Latkin, lununu ram i lox avukar u. Unat pas at lenmila la lanmeres ira xap tinotno nga."

### *Iesu Ga Lox Aroo Loolik*

<sup>35</sup> La ne Iesu move ga paase mi nom latkin la lentaba luvuttadi diga rupot pasa ne Jairas, laradi gomgo at loogu singising. La diga lok ti ne Jairas keretna, "Loolik taram ira met pam, la nemen uta lox angtang bok ba laradi loklox ase."

<sup>36</sup> Ketla ne Iesu goxo ronga res at levelinga atdi la ga lok ti laradi gomgo at loogu singising keretna, "Nemen uta marat. Una nunu mun tarak."

<sup>37</sup> La ni goxo ke tara xusu na emu min, kusuk mun ne Pita, ne Jems, du leeton mi ne Jon diga emu min uto at loogu at ne Jairas.

<sup>38</sup> La diga rupot to at loogu ren la ne Iesu ga ronga limixin diga velas solo, lentaba digang teng silok, lentaba diga saxaanu aleng.

<sup>39</sup> La ne Iesu ga vubeles at nom loogu la ga lok tidi, "Nemen mitang

teng. Loolik kopmen na met, neni i unga mene nga."

<sup>40</sup> \*La diga lok kalise i.

La ne Iesu ga riki asu di basinge loogu la ni ga lam ka ne temen mi nenen nom loolik eburu mi lavantun lavaun pinivu ren la diga vubeles uto at loxot loolik gak midi ren.

<sup>41</sup> \*La ni ga ranga axatu i mi lekngen la ga lok tin keretna, "Talita kumi." Lavasuun teren keretna. Loolik, a tong i ru, una xatu upana.

<sup>42</sup> La soso mun mo loolik ga xatu upana la gat pas tangtagap ap mo lenep. Levenmaares teren ga epovo at lasangaun mi legepura. La nedi digak lok go, diga sangu aleng tinotno.

<sup>43</sup> \*La ne Iesu ga tong lolos i ridi dola di noxo tong asu nom lavanga ri teta, la ni ga tong i ri ne temen mi ne nenen loolik dola duna raba i mi lempanga anan.

La ne Iesu gat pas tangtagap ti levenmenemen kusu na anasa limixin.

## 6

### *Limixin Me Nasaret Diga Raba Rulu Ne Iesu*

(Mt 13:53-58; Lu 4:16-30)

<sup>1</sup> La ne Iesu eburu mi lavaun pinivu ren diga vas kaxat basinge mo lemenemen la diga rupot to at lemenemen aulis teren, Nasaret.

<sup>2</sup> \*At laaleng kaala Iesu ga anasa ro at loogu singising la buaang limixin diga ronga i la diga sangu.

La diga esue xeretna, "Na laradi ga lok ka na lakleklen solo meva? La neni ga lok ka lodoxoma nunuan meva xusu neni i epovo na lok lempanga sangsangu?"

<sup>3</sup> \*Neni laradi gugu gu mene la neni ne nitna ne Maria la neni neton ne Jems, ne Joses, ne Judas, la ne Simon, nedi di nemen de la luvurinen bok di nemen de at na lemenemen." La kerepmo limixin diga raba rulu ne Iesu.

<sup>4</sup> \*La ne Iesu ga lok tidi xeretna, "Leeme vapaase ali, limixin di lok

\* 5:34: Mk 10:52; Lu 7:50; 17:19 \* 5:40: Jo 11:11  
Jo 7:15 \* 6:3: Jo 6:42 \* 6:4: Jo 4:44

\* 5:41: Lu 7:14 \* 5:43: Mk 1:44; 7:36 \* 6:2:

ngangao ren at lengkot axap, ket to at lemenemen teren, la kantubu at limixin teren la libibinat teren, kopmen dina lok ngangao ren.”

<sup>5</sup> La ne Iesu goxo epovo na lok lempanga sangsangu go, ketla neni ga lok li lukngen mavana at lentaba mun kusu na lox aroo di.

<sup>6</sup> La neni ga sangu aleng mila di goxo nunu.

### *Iesu Ga Riki Lavaun Pinivu Ren Ti Vavang*

*(Mt 10:5-15; Lu 9:1-6)*

<sup>7</sup> \*La ne Iesu ga ro xaka lasangaun mi legepura lavaun pinivu ren la neni ga riki gepgepura di uto at levenmenemen petpes. La neni ga raba di mi lolos kusu dina riki xepe lubanggas basinge limixin.

<sup>8</sup> \*La neni ga vaase pe di xeretna, “Mina lok kaka levengkidak atnimi, ketla nemen mita xip kaka tempanga vetpes bok. Nemen teveluxa, nemen teventat, nemen tevempilas at lempanga lukluxa.

<sup>9</sup> Mina siga luvanga vatpas, ketla nemen mita xip kaka tempanga singsiga ri etara xun.”

<sup>10</sup> La neni ga lok bok tidi, “Do mina vubeles at tara temenemen miba nemen at legesa gu, se miba on basinge mo lemenemen.

<sup>11</sup> \*Do limixin di noxo siam ka nemi la di noxo ronga levelinga atnimi, mina on basinge mo lemene-men la mina semla xepe lengkakup at lengkangkedek atnimi, i ngan loklok katling tidi xusu ti lox asusu levenmukmusak at ne Moroa.”\*

<sup>12</sup> La lavaun pinivu ren diga vas kaxat uto at levenmenemen la diga vavang do limixin dina leeng.

<sup>13</sup> \*La diga riki xepe lubanggas basinge limixin la diga so li ladan avukat at limixin mekmeres ngan loklok at lubang mixin me Judaia la diga lox aroo di.

### *Lanmet At Ne Jon Laradi Sep Susu Limixin*

*(Mt 14:1-12; Lu 9:7-9)*

<sup>14</sup> \*La ne Erodes, loorong at lenep silok Galili ga ronga levelinga at lugugu at ne Iesu, mila laasen at ne Iesu ga onon at levengkot axap. Lentaba diga lok do ne Iesu neni ne Jon, laradi sep susu limixin. Diga lok bok dola ne Jon ga roo xat amlong at lanmet, kuren la neni i epovo na lok lempanga sangsangu.

<sup>15</sup> Lentaba vetpes diga lok keretna, “Neni ne Elaisa leeme vapaase ali.”

Lentaba diga lok keretna, “Neni laradi vapaase ali kerekngan lavaeme vapaase ali megano.”

<sup>16</sup> Ketla ne Erodes ga lok keretna, “Neni ne Jon. Nia agara ra korop pam laxaka ren la ni ga roo xat manga.”

<sup>17</sup> Leretere at lanmet at ne Jon keretna. Erodes ga tong i ri luvuttadi esep teren ti ranga alis ne Jon la diga xoxo i la diga lok li i ro at loogu xokoxo. Erodes ga lox i na mila latkin teren ne Erodias ga musak ne Jon.

<sup>18</sup> \*Lavasuum at lumukmusak at nom latkin keretna. Ganoxa ne Jon ga vaase sok ne Erodes mila neni ga sak paxat ka ne Erodias, latkin at neton ne Pilip la ga epot teren.

<sup>19</sup> Kuren la ne Erodias ga musak ne Jon la ga vara na sev amer i ketla neni goxo epovo,

<sup>20</sup> mila ne Erodes ga marat at ne Jon la ga lok tatao i. Erodes gaklen i do ne Jon lagale laradi manmanton la gang tonga levelinga ren. Neni ga rangku mumu i nom levelinga at ne Jon, ketla ni ga lok momo ring tonga i.

<sup>21</sup> Ketla ne Erodias ga vuse ka langas ti sev amet ne Jon keretna. At lara laaleng ne Erodes ga lok laanan ti lok katling mo laaleng nenen ga visix i ren. Lavaeme silok at lugugu at ne Erodes mi luvuttadi

\* **6:7:** Lu 10:1   \* **6:8:** Lu 10:4-11   \* **6:11:** Gu 13:51   \* **6:11:** Na loklok i lox asusu i do ne Moroa naba raba lumumuat ti limixin ap mo lemenemen.   \* **6:13:** Je 5:14   \* **6:14:** Mt 16:14; Mk 8:28  
\* **6:18:** Mas 18:16

esep amgomgo ren mi loxongkulao amgomgo bok at lenep Galili digak lok at nom laanan.

<sup>22</sup> La lara loono maxat, neni loolik at ne Erodias ga tii, la ne Erodes eburu minedi diga anan diga lok momo ren la ne Erodes ga lok ti nom loono keretna, “Una tong asu lavavara ram ti tavanga la nia aba raba u min.”

<sup>23</sup> \*La neni ga lok lavangpangpe rin keretna, “A paase ruturen at lemeren ne Moroa. Nia aba raba u mi tevempanga u vara i, i epovo at loxonatat at lempanga axap tarak.”

<sup>24</sup> La mo loono ga sixisu la ga sue nenen keretna, “Lavanga sala nia ba sing ka i ren?”

La ne Erodias ga vorang i xeretna, “Una sing ti lavatlak at ne Jon.”

<sup>25</sup> La soso mun nom loono gamlong parap ne Erodes la ga lok, “Una raba ia mi lavatlak at ne Jon laradi sep susu limixin. Una lok li i at tavattingtigon silok.”

<sup>26</sup> La ne Erodes ga lok bukbulu aleng mila neni goxopara i do ne Jon na met. Ketla neni goxo epovo xusu ti lox ekun levelinga ren mila nom luvuttadi silok diga rongga vam nom lavangpangpe.

<sup>27</sup> La soso mun Erodes ga lox aonon lavapaase ri laradi esep teren do neni na sep korop laxaka at ne Jon la na xip kaka lavatlak teren uto saparav i. La nom laradi ga vas kaxat la ga sep korop laxaka at ne Jon to at loogu xokoxo.

<sup>28</sup> La neni ga lok li nom lavatlak to at lavattingtigon silok la ga rupot min la ga raba mo loono min la loono ga raba nenen min.

<sup>29</sup> La lavaun pinivu at ne Jon diga rongga i dola ne Jon ga uu la diga rupot la diga lok ka labantuxu ren la digak mir i ro at lubuang mikmit tongan.

*Iesu Ga Raba Buaang Limixin Mi Lempanga Anan*  
(Mt 14:13-21; Lu 9:10-17; Jo 6:1-14)

<sup>30</sup> \*La luvuttadi vavang at ne Iesu digamlong ta la diga tong asu lempanga axap diga lox i la levelinga diga anasa limixin min.

<sup>31</sup> \*La ne Iesu ga lok tidi xeretna, “Ude nemi, nedik kusuk ata onon uto at lamatbin kusu mina lok mamana lixilik be.” Mila buaang limixin diga rupot pasa amisik ne Iesu mi lavaun pinivu ren la di goxo epovo kusu dina anan.

<sup>32</sup> La diga sen kaxat mi lese pang uto at loxot petpes, ua limixin di goxo nemen teren.

<sup>33</sup> Ketla buaang limixin diga ven nedi diga sen mi lese pang la diga ven kibis di. Diga pas basinge levenmenemen atdi la diga mumu loxon la diga rupot avot to ap mo loxot ti ne Iesu mi lavaun pinivu ren.

<sup>34</sup> \*La ne Iesu eburu mi lavaun pinivu ren diga oso mi lese pang la ni ga ven buaang limixin solo. Neni ga balamu di mila diga lok ngan laxasipsip kopmen taradi loklok tatao atnedi. Kuren la ni ga anasa di mi laxampapaase solo.

<sup>35</sup> \*Ga ukantinao lavaun pinivu at ne Iesu diga rupot pasa ne Iesu la diga lok tin keretna, “Ukantinao nga na la na loxot, ni loxot mimila rino.

<sup>36</sup> Una riki aonon limixin kusu dibat pas uto at levenmenemen la dina un ka tempanga anan tidi.”

<sup>37</sup> Ketla ne Iesu ga lok tidi xeretna, “Nemi xa mina raba nedi mi teveluxa xusu dina anan i.”

La diga lok tin keretna, “Kereva, u vara i dola manat pas ti un kaka tevengkongkide mi legepu sangaun kobot (200) denarias atdik la mana un panga anan min tidi?” Mo lempilas ga epovo dola tara na gugu at lavanuti gaaling ti lok kaka i nom.

<sup>38</sup> La ne Iesu ga lok tidi xeretna, “Minat pas la mina ven lavanisa lengkongkide mo ik lok.”

La digaklen ka i la diga lok tin keretna, “Lavalimo lengkongkide la legepu venmat kakalik na.”

\* 6:23: Est 5:3,6; 7:2 \* 6:30: Lu 10:17 \* 6:31: Mk 3:20 \* 6:34: Mt 9:36 \* 6:35: Mk 8:1-9

<sup>39</sup> La ne Iesu ga lok tidi xeretna, “Mina lox axis limixin axap at levenbinam tadi at levennep mi lempivilis avukat teren.”

<sup>40</sup> La nedi diga xis kopok ap mo lenep, lepentaba legesa sangaun kobot (100) diga xis eburu, lentaba lavalimo sangaun limixin diga xis eburu, nedi axap digat kis kerepmo.

<sup>41</sup> \*La ne Iesu ga lok kaka levengkongkide mi luemat, la ga milik aurut uto at laxalibet la ga tong avukat ti ne Moroa. Ga sebek nom levengkongkide la ga raba lavaun pinivu ren min la diga raba limixin min. La ni ga raba bok luemat tidi.

<sup>42</sup> La limixin axap diga anan la diga an mais.

<sup>43</sup> La lavaun pinivu diga luxa lasangaun mi legepura leventat mi leveluxa mo diga an ake i ren.

<sup>44</sup> La nedi luvuttadi remes diga anan, diga epovo at lavalimo larabin sangsangaun kobot (5000).

### *Iesu Gat Pas To Mavana At Lavatdan Kis*

(Mt 14:22-36; Jo 6:15-21)

<sup>45</sup> La soso mun ne Iesu ga tong i ri lavaun pinivu ren do dina los kas at lesebang la dinamgo rin uto at lemenemen Betsaida. La ne Iesu ga riki aonon limixin.

<sup>46</sup> \*La neni ga vas kaxat basinge di la ga urut uto vana at lakaana xusu na ngising.

<sup>47</sup> At laxanimin lesebang at lavaun pinivu gak sixit kantubu at lavatdan kis la ne Iesu xusuk gak lok to loxon.

<sup>48</sup> La ne Iesu ga ven di, digatlatla lolos mila lamanman gat mas lolos tangarang di. Kantubu at lavantun konaleng la lavanna konaleng at laxanimin ne Iesu ga vas kaxat to mavana mun at lavatdan kis. La ni ga rupot saparap di la ga doma i do na vas polo di.

<sup>49</sup> \*Ketla at loxonaleng diga ven ne Iesu gat pas to mavana at lavatdan kis, diga lok do neni lороonan panga la digap kup silok,

<sup>50</sup> mila diga ven i la diga marat aleng.

La soso mun ne Iesu ga lok tidi xeretna, “Nemen gat mita marat. Mina lolos. Nenia mun na.”

<sup>51</sup> \*La neni ga los kas at lesebang la lamanman gara xap matmas ta. La lavaun pinivu ren diga sangaun aleng.

<sup>52</sup> \*Levendoxoma atdi ga repe. Di goxoklen lavasuun at lempanga sangsangu ne Iesu ga lox i mi mo lempanga anan.

<sup>53</sup> La diga xan polo lavatdan kis la diga oso to at lenep kangka Genesaret.

<sup>54</sup> La diga vas su at lesebang, la limixin ap mo loxot diga ven kibis ne Iesu.

<sup>55</sup> La digak sixit uto at lengkot axap ap mo lenep la digamlong mi luvuttadi mekmeres, lentaba atdi diga xip di mi levenora uto at lengkot no ne Iesu gat pas ue.

<sup>56</sup> \*La ne Iesu gat pas tangtagap at lengkot axap, levenmenemen kakalik, levenmenemen silok, laxairing bok la diga lok li limixin mekmeres to at lengkot etang. La diga sing ne Iesu do dina long tu at lavanga singsiga ren. La nedi axap diga long tu ren, diga lox avukat axap.

## 7

### *Iesu Ga Paase Mumu Leveloklok At Lubung Parisi*

(Mt 15:1-9)

<sup>1</sup> Lentaba lubung Parisi mi luvuttadi loklox ase at Laulis Linga diga vot eburu boro Jerusalem la diga vot pasa ne Iesu.

<sup>2</sup> \*La diga ven lentaba at lavaun pinivu at ne Iesu diga anan mi levengdikngan di, ua di goxo gos avot mun be lengdikngan di. La kerepmo lubung Parisi diga lok do lavaun pinivu diga lox abilinga lorooro atdi.

<sup>3</sup> Lubung Parisi mi limixin axap me Judaia diga sogos avot be levengdikngan di la melemu diga anan

\* 6:41: Mk 7:34 \* 6:46: Lu 5:16; 6:12; 9:28 \* 6:49: Lu 24:37 \* 6:51: Mk 4:39 \* 6:52: Mk 8:17 \* 6:56: Mt 14:36 \* 7:2: Lu 11:38

ba, la kerepmo diga mumu asu loklok at lavalabat atdi.

<sup>4</sup> \*Loklok bok at lavalabat atdi xeretna. Se digamlong boro at leetang, kopmen di goxo anan se digak lox adadat avot be di. Leveloklok petpes bok diga mumu asu i xeretna. Diga sogos amisik levengkap inin atdi, leventingtigon, la levesosopen.

<sup>5</sup> La lubung Parisi mi luvuttadi loklox ase at Laulis Linga diga sue ne Iesu xeretna, "Ua lavasuun teren la lavaun pinivu ram kopmen dina mumu asu leveloklok at lavalabat atdik, di anan lempanga anan mi levengikengen di xopmen na dadat?"

<sup>6</sup> La ne Iesu ga vorang i ridi xeretna, "Leeme vapaase ali at ne Moroa, ne Aisaia ga paase ali mi nom. Neni ga paase ruturun dola nemi luvuttadi loklok sosolom. Ni ga tong li levelinga xeretna,

'Na limixin di lok ngangao rak mi levelinga mun atdi, ketla lebelen di i vaxalom tino basinge ia.

<sup>7</sup> Dixo lotu saparav ia mi luruturun la di lox ase mi levelinga at limixin mun.' "

*Ais 29:13*

<sup>8</sup> La ne Iesu ga vaase sok di xeretna, "Mi onon basinge levelinga mumuat at ne Moroa, ketla mim tebeng lolos leveloklok at limixin.

<sup>9</sup> Mi gugu lolos ti vuse ka tangas ting tonga xepe levelinga at ne Moroa xusu mina mumu asu leveloklok at lavalabat atnimi.

<sup>10</sup> \*Gano ne Moses ga lok bok keretna,

'Mina lok ngangao at luvuttemen nimi mi luvutnen nimi. Do tara na paase xapmek ti ne temen koplana nenen, limixin dinaba sev amer i.' *Pas 20:12*

<sup>11</sup> Ketla nemi xopmen mina mumu asu mo levelinga at ne Moses, mi mumu asu na levelinga. Mo do tara i ruuna lempanga do ri lok tooro ne temen koplana nenen, nemi mi tong i rin kusu neni na mumu asu leveloklok at lavalabat la na raba ne Moroa min la na ke loklok tooro ridu.

<sup>12</sup> Kuren la mi lok pe i xusu neni ixo epovo na lok tooro lavakpakes at ne temen mi nenen.

<sup>13</sup> La kerepmo mi mumu asu loklok miga lok ka i at lavalabat atnimi la mi lox abulubun kepe levelinga at ne Moroa. La nemi mik lox amisik laxampanga xapmek keretnom."

*Iesu Ga Paase Mumu Lempanga Naba Lox Abilinga Lorooro At Tara (Mt 15:10-20)*

<sup>14</sup> La ne Iesu ga ro xaka limixin uto saparav i la ga lok lavapaase poovo ridi xeretna, "Nemi axap mina rongana levelinga rak la mina xasep teren.

<sup>15</sup> \*Kopmen tavanga ik lok to maxamang at laradi na lox abilinga i. Ketla levempanga, lorooro ren i lox asuusu i, naba lox abilinga i.

<sup>16</sup> [Do mi ruuna levenbaalung, mina rongana avukat na levelinga.]"

<sup>17</sup> La melemu ne Iesu ga on basinge nom limixin la ga vubeles at lara loogu la lavaun pinivu ren diga sue mu i mi mo lavapaase poovo.

<sup>18</sup> La ni ga sue di xeretna, "Kereva, kopmen mina xasep avukat teren? Mina rongana avukar i na. Lempanga anan laradi i anan i, noxo lox abilinga i.

<sup>19</sup> Nom lempanga noxo vubeles at lorooro ren, ketla i vubeles at leventine ren la melemu neni ba lok kepe ba i ukamang at labantuxu ren." La kerepmo ne Iesu ga tong i do leveluxa axap i lox avukat kusu laradi na anan i.

<sup>20</sup> La ni ga lok bok keretna, "Lentaba lempanga, laradi i lox asuusu i boro xeneng at lorooro ren, nom i epovo na lox abilinga lorooro ren.

<sup>21</sup> Mo lempanga xeretna. Leven-doxoma kapmek, leveloklok kakapmek maxamang at lixitkis epot, loklok tip kip pilo, loklok tip sev amet tara, loklok ti longka,

<sup>22</sup> loklok ti belegaa, leveloklok kakapmek petpes bok, loklok kaxarang, loklok mun mamangan,

\* 7:4: Mt 23:25 \* 7:10: Pas 21:17; Lal 5:16 \* 7:15: Gu 10:14-15

loklok ngaongao at lempanga at tara vetpes, loklok ti lox asi tara mi levelinga, loklox asilok, la loklok tangtangu.

<sup>23</sup> Anaa axap lempanga xapmek i ravasu boro xeneng at lebelen laradi la i lox abilinga i.”

*Latkin Ga Nunu At Ne Iesu*  
(Mt 15:21-28)

<sup>24</sup> La ne Iesu ga vas kaxat basinge mo lemenemen la ga onon uto at lenep kangka saparap lemenemen Taia. La ni ga vubeles at loogu la ga xopara i do tara naklen i dola neni ira rupot pam. Ketla neni goxo epovo xusu ti nemen lipe.

<sup>25</sup> La lara latkin ga ronga levelinga dola ne Iesu ga rupot la soso mun neni ga vot pasa i la ga xis tik-tikbu mi luvatgulom teren saparap luxangkedek at ne Iesu. Lagas ga suxuna loolik at nom latkin.

<sup>26</sup> Mo latkin, neni me Grik ketla diga visix i ro at lenep Siroponisia. La neni ga sing ne Iesu dola neni na riki kepe lagas basinge loolik teren.

<sup>27</sup> La ne Iesu ga tong lavapaase poovo rin keretna, “Nia ana raba panga anan avot mun be ri laxamdak mi laxaalik mila kopmen nak mokso ri lu raba lubangman\* mi lempanga anan at laxamdak.”

<sup>28</sup> La nom latkin ga lok ti ne Iesu xeretna, “I ruturun pam, Leeme Silok. Ketla lubangman di anan levenmumus panga anan im subu uto maxopok at loxot anan at laxamdak mi laxaalik.”

<sup>29</sup> La ne Iesu ga lok tin, “Lavapaase ram i nunuan, kuren la nenia ara lok kepe vam lagas basinge loolik taram. Unamlong ta uto at loogu ram.”

<sup>30</sup> La nom latkin gamlong uto xolonu ren la ga vot pasa loolik teren gak midi at loora ren la lagas ga on basinge vam i.

<sup>31</sup> \*La melemu ne Iesu ga vas kaxat basinge lenep kangka Taia, la ga vas

polo lenep kangka Sidon uto at lavat-dan kis Galili, la ga vubeles at lenep kangka Sangaun Menemen.

<sup>32</sup> La lentaba luvuttadi diga lam kaka laradi lubaalung teren ga ba uto saparap ne Iesu. Neni xopmen goxo paase avukat, la diga sing ne Iesu xusu na lok li lekngen teren la na lox avukar i.

<sup>33</sup> \*La ne Iesu ga lam ka i la nedu xusuk duga vas basinge nom limixin la ne Iesu ga lok li lusivisip teren at lubaalung at nom laradi la ga xalaubis, la ga long tu at lagam teren,

<sup>34</sup> \*la ga mas asu lamamas teren la ga lok tin keretna, “Epata.” Lava-suun teren keretna, una rem suang.

<sup>35</sup> La lubaalung ap mo laradi ga xasep ba. La mo lavanga ga lok pe lagam teren ga repes la neni ga vaase alabat ba.

<sup>36</sup> \*La ne Iesu ga tong alolos i ridi dola di noxo tong asu nom lavanga ri teta ketla di goxo ronga res teren, diga vaase asu i ri limixin axap. Amisik ne Iesu gap sep pepe limixin kerepmo, ketla amisik limixin diga tong asu lempanga sangsangu ne Iesu ga lox i.

<sup>37</sup> \*La nom limixin diga sangu aleng la diga lok keretna, “Lempanga axap ne Iesu ik lox i, i nunuan aleng. Ni i lox axasep levenbaalung at luvuttadi ba la i lox aroo luvuttadi kopmen dina paase.”

## 8

*Iesu Ga Raba Luxa*  
*Buaang Limixin*  
(Mt 15:32-39)

<sup>1</sup> Ap mo levenaleng, buaang limixin diga vot eburu saparap ne Iesu la goxopmen tempanga anan atdi. La ne Iesu ga ro kaka lavaun pinivu ren la ga lok tidi xeretna,

<sup>2</sup> \* “Nenia a balamu na limixin atla digak lok saparav ia at lavantun aleng ta la kopmen tempanga anan atdi.

\* 7:27: Limixin me Judaia diga so asen limixin petpes mi lubangman. \* 7:31: Mt 15:29-31 \* 7:33: Mk 5:23; Lu 4:40; 13:13 \* 7:34: Mk 6:41; Jo 11:41 \* 7:36: Mk 1:43-45 \* 7:37: Ais 35:5 \* 8:2: Mk 6:34-44

<sup>3</sup> Do ana riki aonon di uto at laramenemen atdi, tentaba diba meroxon to at langa e mi lantoxo atla lentaba diga rupot boro vaxalom.”

<sup>4</sup> La lavaun pinivu diga lok tin keretna, “Kopmen tempanga anan nade at na lenep gamasa, ataba lok ka tempanga anan ua ridi?”

<sup>5</sup> La ne Iesu ga sue di, “Lavanisa lengkongkide mi ruuna i?”

Diga vorang i, “Lavanuti na lengkongkide.”

<sup>6</sup> La ne Iesu ga tong i ri mo limixin do dina xis kopok at laxangka la neni ga lok ka mo lengkongkide, ga tong avukat ti ne Moroa la ga sebex i. Ni ga raba lavaun pinivu min kusu dina raba mo limixin min, la diga lox i xuren.

<sup>7</sup> Lavaun pinivu diga ruuna bok lutpen mat lixilik. Iesu ga lok ka i la ga tong avukat ti ne Moroa la ga tong i ri lavaun pinivu do dina raba limixin min.

<sup>8</sup> La limixin diga anan la nedi axap diga an mais. La lavaun pinivu diga lok ka lavanuti leventat silok la diga suxa aumsu di mi lempanga anan limixin diga an ake ren.

<sup>9</sup> La mo luvuttadi remes ga epovo at lavanuet larabin sangsangaun kobot (4000), la ne Iesu ga riki aonon di.

<sup>10</sup> La soso mun ne Iesu mi lavaun pinivu ren diga los kas at lese pang la diga sen kaxat uto at lenep kangka Dalmanuta.

<sup>11</sup> \*La lubung Parisi diga vot pasa ne Iesu la diga etep mi levelinga. Diga vara i dola ne Iesu na lok tempanga sangsangu ngan loklok katling boro vana at laxalibet ti lox asu ba i dola ne Moroa ga riki i.

<sup>12</sup> \*La ne Iesu ga lok bukbulu la ga lok tidi xeretna, “Ua lavasuun teren la limixin at na loola di vara lavanga sangsangu? Nenia a noxo lox ase nimi mi tempanga sangsangu.”

<sup>13</sup> La ne Iesu mi lavaun pinivu ren diga on basinge di la diga los kas

manga at lese pang la diga sen polo lavatdan kis.

<sup>14</sup> La lavaun pinivu diga domampe lempanga anan atdi, ketla legeso xongkide mene mo gak lok tidi xeneng at lese pang.

<sup>15</sup> \*La ne Iesu ga lok tidi xeretna, “Mina lok tatao avukat nimi basinge liis (yeast)\* at lubung Parisi mi ne Erodes.”

<sup>16</sup> La lavaun pinivu diga epaase kantubu atdi xeretna, “I vaase mo levelinga mila nedik kopmen ata lok ka tengkongkide.”

<sup>17</sup> \*La ne Iesu ga xasep at levelinga atdi la ga lok tidi xeretna, “Move mi paase mumu lengkongkide, mixoklen lavasuun at levelinga rak. Levendoxoma atnimi ira rebonot pam.

<sup>18</sup> \*Miga ven pam lugugu rak la miga ronga vam levelinga rak, ketla mixoklen lavasuun teren. Mina domangke at levempanga sangsangu rak.

<sup>19</sup> \*Nenia aga raba buaang limixin ga epovo at lavalimo larabin sangsangaun kobot (5000) mi lavalimo lengkongkide. Melemu lavanisa leventat miga suxa i mi levengkonatat panga anan?”

La diga vorang i, “Sangaun mi legapura axap.”

<sup>20</sup> \*La neni ga sue bok di, “Nenia aga raba buaang limixin ga epovo at lavanuet larabin sangsangaun kobot (4000) mi lavanuti xongkide la melemu lavanisa leventat silok miga suxa i mi levenmumus panga anan?”

La diga lok, “Lavanuti axap.”

<sup>21</sup> La neni ga lok tidi, “Kereva, nemi move mixo xasep at levelinga rak?”

*Iesu Ga Lox Aroo Laradi Luxatli Ren Ga Main*

<sup>22</sup> La ne Iesu mi lavaun pinivu ren diga rupot to at lemenemen Betsaida. La limixin meve diga lam ka lara laradi luxatli ren ga main

\* **8:11:** Mt 12:38 \* **8:12:** Lu 11:29 \* **8:15:** Lu 12:1 \* **8:15:** Liis i ru katling levenanasa at lubung Parisi mi ne Erodes. \* **8:17:** Mk 6:52 \* **8:18:** Jer 5:21; Mk 4:12; Gu 28:26 \* **8:19:** Mk 6:41-44 \* **8:20:** Mk 8:6-9

uto saparap ne Iesu, la diga sing i xusu neni na long tu ren kusu na lox avukar i.

<sup>23</sup> La ne Iesu ga rebeng tu at lekngen la ga lam ka i ukamang basinge nom lemenemen. La ni ga xalaubis luxatli ren, la ga lok li lukngen teren la ga sue i xeretna, “U ven tempanga?”

<sup>24</sup> La nom laradi ga milik urut la ga lok keretna, “A ven luvuttadi, ketla a ven di ngan larauna dit pas.”

<sup>25</sup> La ne Iesu ga lok li amu lukngen at luxatli ap mo laradi. La ni ga milik lolos la luxatli ren ga lox avukat la ga ven axasep ba.

<sup>26</sup> \*La ne Iesu ga riki aonon i uto at loogu ren la ga lok tin, “Nemen uta vubeles at na lemenemen.”

*Pita Ga Tong I Do Ne Iesu Lanarong At Ne Moroa*

(Mt 16:13-20; Lu 9:18-21)

<sup>27</sup> La ne Iesu eburu mi lavaun pinivu ren diga vas kaxat uto at levenmenemen at lenep kangka Sisaria Pilipai. To at langa neni ga sue di xeretna, “Limixin di lok do nenia nege?”

<sup>28</sup> \*La diga vorang i xeretna, “Lentaba di lok do nenu ne Jon laradi sep susu. Lentaba di lok do nenu ne Elaia. Lentaba di lok do nenu lara leeme vapaase ali megano.”

<sup>29</sup> \*La ni ga lok tidi, “Kereva ba nimi? Nemi mi lok do nenia nege?”

La ne Pita ga vorang i xeretna, “Nenu Lanarong at ne Moroa.”

<sup>30</sup> La ne Iesu ga vaase lolos tidi dola di noxo tong asu i na ri teta.

*Iesu Ga Paase Mumu Lanmet Teren*

(Mt 16:21-28; Lu 9:22-27)

<sup>31</sup> Melemu ne Iesu ga ru xaka levelinga ren keretna, “Nenia, Laradi Mevana, anaba xip levesongsongot silok. La loxongkulao silok at limixin me Judaia, lavamaasa silok, luvuttadi loklox ase at Laulis Linga dinaba sok tixirixes kepe ia la dinaba sep

amer ia la melemu at lavantun aleng nenia anaba roo xat amlong.”

<sup>32</sup> La ne Iesu ga vaase axasep nom lavanga ridi la ne Pita ga lam kaka ne Iesu basinge lavaun pinivu la ga vaase sok ne Iesu.

<sup>33</sup> La ne Iesu ga ru pukus la ga ven ti lavaun pinivu ren la ga vaase sok ne Pita. Neni ga lok keretna, “Satan, uto basinge ia. U xopara na mu asu lodoxoma at ne Moroa, ketla u vara mun levendoxoma at limixin.”

<sup>34</sup> \*La ni ga ro xaka limixin mi lavaun pinivu ren la ga lok tidi, “Mo do tara i vara na emu eburu minia, neni na domampe lorooro axap teren la na gagas li i xusu nap kip losongsongot at levenaleng axap la na mumu asu ba ia.

<sup>35</sup> Do nege i vara na ranga alis lorooro ren, neni naba sang apkav i. Ket do nege i soxope lorooro ren ti mumu asu ia la ti tong asu Lagale Lavavang, neni naba lok kaka lorooro avolo.

<sup>36</sup> I lok kapmek do taradi na ruuna ka lempanga axap at na lavatbung menemen, la neni i subu basinge lorooro at ne Moroa.

<sup>37</sup> Laradi xopmen na epovo na un ka lorooro avolo.

<sup>38</sup> \*Mo do taradi na lok mangan gan kepe ia eburu mi levelinga rak kantubu at limixin at na loola, nenia, Laradi Mevana, anaba sok tixirixes i ap mo laaleng nenia ana si ukopok mi lisisixam silok at ne Tamak la at lubungangelo ren.”

## 9

<sup>1</sup> \*La ne Iesu ga lok tidi xeretna, “Nenia a tong tuturun i rinemi, lentaba di tu de, di noxo met avot ti lovtopot at laaleng Linintoo at ne Moroa na vot mi lolos teren.”

*Moraa Ga Lox Arepukus Ne Iesu*

(Mt 17:1-13; Lu 9:28-36)

<sup>2</sup> La melemu at lavanna levenaleng ne Iesu ga lam kaka ne Pita, ne Jems, la ne Jon la diga urut uto

\* 8:26: Mk 7:36 \* 8:28: Mk 6:15 \* 8:29: Jo 6:68-69; Mk 9:9 \* 8:34: Mt 10:38-39 \* 8:38: Mt 10:33 \* 9:1: Mk 13:30



vana at lavatkaana silok, nedi lavanuet mun digat pas. Ap mo loxot ne Moroa ga lox arepukus ne Iesu to melamgo at lavaun pinivu ren,

<sup>3</sup> la lempanga singsiga ren gan bun tinotno. Limixin mede at lavatbung menemen kopmen na epovo ri lox abunbun tempanga singsiga xerepmo.

<sup>4</sup> La soso mun ne Elaisa mi ne Moses duga rupot to melamgo atdi la duga epaase eburu mi ne Iesu.

<sup>5</sup> La ne Pita ga lok ti ne Iesu xeretna, “Rabai, i lox avukat tinotno do mak lok de. Mana lok tavantun taraogu xukuxut, tara ru, tara ri ne Moses la tara ri ne Elaisa.”

<sup>6</sup> Mo levelinga at ne Pita goxo sixit avukat mila neni la ne Jems la ne Jon diga marat aleng.

<sup>7</sup> \*La lusugao ga ravasi la ga vung pavaa di la diga rongaxaka boro at lusugao ga lok keretna, “Neni na ne nuruk, nenia a balamu i. Mina mumu asu levelinga ren.”

<sup>8</sup> La soso mun diga ven ekula midi la di goxo ven ta ne Moses mi ne Elaisa, nedi mene nga lavantun diga nemen mi ne Iesu.

<sup>9</sup> \*La diga si ukopok at lavatkaana la ne Iesu ga sep pepe di do di noxotong asu na lavanga ri teta se at laaleng Laradi Mevana naba roo xat amlong.

<sup>10</sup> La di goxo tong asu i nom, ketla diga esue amisik mi ua lavasuun at levelinga at lorooro amlong.

<sup>11</sup> La diga sue ne Iesu xeretna, “Ua lavasuun teren la luvuttadi loklox ase at Laulis Linga di tong i dola ne Elaisa naba rupot avot ti Lanarong?”

<sup>12</sup> \*La ne Iesu ga vorang i ridi xeretna, “I ruturun, levelinga at ne Moroa i tong i do ne Elaisa naba rupot avot tin la na lox amokso amlong lempanga axap. Ketla mina doma na levelinga ik lok at Lovoang Kaala, i lok dola Laradi Mevana naba xip laxasongsongot la limixin dinabasok tixirixes i.

\* 9:7: Mt 3:17; 2 Pi 1:17-18; Lal 18:15; Gu 3:22  
22:1-18; Ais 53:3 \* 9:13: Mt 11:14

<sup>13</sup> \*Ketla a tong i rinemi, Elaisa ga rupot pam. Ketla limixin diga lok lempanga xapmek tin, kerekngan diga vara i, la Lovoang Kaala i tong asu i na.”

### *Iesu Ga Riki Xepe Lagas Basinge Lamdak*

(Mt 17:14-21; Lu 9:37-43)

<sup>14</sup> La ne Iesu eburu minedi lavantun diga si la diga vot pasa lavaun pinivu la diga ven buaang limixin diga tu kangkan di mi luvuttadi loklox ase at Laulis Linga diga vetep mi levelinga eburu minedi.

<sup>15</sup> La soso mun nom limixin axap diga ven ne Iesu la diga sangu aleng la digak sixit la diga seega rangarang i.

<sup>16</sup> La ne Iesu ga sue di, “Mi epaase mu lavanga salai?”

<sup>17</sup> La lara laradi xantubu at nom limixin ga vorang i rin keretna, “Leeme loklox ase, ma paase mumu ne nuruk. Nia a lok do ana lam kaka i saparav u atla lagas i suxuna i la nuruk kopmen na paase.

<sup>18</sup> I se mo lagas ip sev i, neni i sasava gamasa labantuxu ren at laxangka la lemeseng ip tavasu at lungusno, i rungur igisa, la labantuxu ren i tu todoslo. La a sing lavaun pinivu ram dola dina riki xepe lagas basinge i, ketla dixo epovo.”

<sup>19</sup> La ne Iesu ga rongaxaka nom levelinga la ni ga tong i ridi xeretna, “Nemi limixin at na levenaleng, kopmen tununu atnemi. Lavanisa aleng tinotno nenia aba xip tutu minemi? Nemi mi lox amolo ia. Mina lam ka lamdak ude.”

<sup>20</sup> La diga lam ka nom lamdak saparap ne Iesu. At loxonaleng lagas ga ven ne Iesu, soso mun lagas ga lox adede nom lamdak la nom lamdak ga subu ukopok at laxangka la gap kuvun la lemeseng ga ravasu at lungusno ren.

<sup>21</sup> La ne Iesu ga sue ne temen keretna, “Lavanisa maares ni gak lok

\* 9:9: Mt 12:16; Mk 8:30 \* 9:12: Mal 4:5; Sam

keretna?” La ne temen ga vorang i, “Ga lamdak lixilik axa i min.

<sup>22</sup> Amisik axa lagas i soso aruv i at laxao la at laradan la ik lok dola nap sev amer i. Dola u epovo, una balamu nama la una lok tooro nama.”

<sup>23</sup> \*La ne Iesu ga lok tin, “Nemen uta vaase mi na levelinga dola u epovo xeretnom. Moroa naba lok lempanga axap tu, mo do u nunu ren.”

<sup>24</sup> \*La soso mun temen mo lamdak ga xup keretna, “A nunu ram, ketla lununu rak ixo epovo, una lok tooro lununu rak.”

<sup>25</sup> La ne Iesu ga ven i dola buaang limixin digak sixit pot, la ni ga vaase lolos ti nom lagas keretna, “Nenu lagas, ugak lox angtangku na lamdak la uga lox aba i. Nia a tong i ru, una ravasu basinge na lamdak la nemen bok ba utamlong mu i.”

<sup>26</sup> \*La mo lagas ga xup silok la ga lox adede lamdak la ga sixisu basinge i. La lamdak ga lok ngan ta do ga met la buaang limixin diga lok do ira met pam.

<sup>27</sup> Ketla ne Iesu ga ranga ka lekngen la ga rebeng axatu i, la lamdak ga xatu upana.

<sup>28</sup> La melemu Iesu mi lavaun pinivu diga vubeles at loogu la nedi xusuk digak lok to xeneng. La nedi diga sue i xeretna, “Ua lavasuun teren la nema maxo epovo xusu mana riki kepe mo lagas?”

<sup>29</sup> La ni ga lok tidi, “Lisingising kujuk mene impana ri riki xepe lagas kapmek keretnom.”

*Iesu Ga Paase Mumu Manga Lanmet Axa Ren*

(Mt 17:22-23; Lu 9:43-45)

<sup>30</sup> \*Iesu eburu mi lavaun pinivu ren diga vas kaxat basinge mo lenep la digat pas polo lenep silok Galili. La neni goxopara i xusu tara naklen i do neni ua,

<sup>31</sup> \*mila neni ga anasa lavaun pinivu ren. La neni ga lok tidi

xeretna, “Nenia Laradi Mevana la lara laradi naba song araba ia ri limixin kakapmek kusu dinaba sev amer ia. La melemu at lavantun aleng anaba roo xat amlong.”

<sup>32</sup> \*Ketla lavaun pinivu ren di goxo xasep at levelinga ren la diga mangan kusu dina sue i mi lavasuun teren.

*Lavaun Pinivu Diga Paase Mumu Nege I Silok Atdi*

(Mt 18:1-5; Lu 9:46-48)

<sup>33</sup> La ne Iesu eburu mi lavaun pinivu ren diga rupot to Kaprenaum la diga vubeles at loogu la ne Iesu ga sue di, “To at langa mi epaase mi la?”

<sup>34</sup> Ketla digoxo vorang i mila diga epaase xantubu atdi do, nege lara i silok atdi.

<sup>35</sup> \*La ni ga xis kopok, la ga roka di lasangaun mi legepura lavaun pinivu ren la ga lok tidi xeretna, “Dola tara i vara i xusu neni na silok, neni ba mumu pit la na lok ngan lasaxaruki at limixin axap.”

<sup>36</sup> La neni ga lam ka lara lamdak kakalik, la ga vaxaru i kantubu atdi, la ga ot kongkoda ka i la ga lok tidi xeretna,

<sup>37</sup> \*Do nege i seega rangarang tamdak keretna at laasen tarak, i lok ngan ta do neni i seega rangarang ia. La do nege i seega rangarang ia, i lok ngan ta do i seega rangarang mo lara ga riki ia ude.”

*Do Tara Na Lok Tavanga At Laasen Tarak*

*Ni Lentangas Tarak*

(Lu 9:49-50)

<sup>38</sup> \*La ne Jon ga lok tin, “Leeme loklox ase, nema maga ven laradi ga riki xepe lubungas basinge limixin mi laasen taram. La neni kopmen na mumu asu nedik, la kerepmo nema maga sep pepe i.”

<sup>39</sup> \*La ne Iesu ga lok tin, “Nemen mi guta sep pepe i. Do tara taradi i lok tavanga sangsangu mi laasen

\* 9:23: Mt 21:21; Mk 11:23 \* 9:24: Lu 17:5 \* 9:26: Mk 1:26 \* 9:30: Jo 7:1 \* 9:31: Mk 8:31; 10:32-34 \* 9:32: Lu 9:45; 18:34 \* 9:35: Lu 22:24; Mt 20:25-27; Mk 10:43-44 \* 9:37: Mt 10:40 \* 9:38: Kex 11:27-29 \* 9:39: 1 Ko 12:3

tarak, neni noxompana ti paase xapmek soso mumu ia.

<sup>40</sup> \*Do taradi i ru ebelen minedik, neni lentangas atdik.

<sup>41</sup> \*Nia a tong tuturun i rinimi. Do tara na raba nimi mi toxodan ti inin mila nemi at ne Karisito, neni noxo sang apkap luunun teren.”

*Loklok Tong Pen Ti Laxapmek  
(Mt 18:6-9; Lu 17:1-2)*

<sup>42</sup> La ne Iesu ga lok ti lavaun pinivu ren keretna, “Naba lok kapmek ti tara do na lox asubu tara atdi na laxamdak kakalik di nunu rak. Naba lox avukat tin do dina xoxo li tangsang tuuat to at laxaka ren la dina dong asi i min uto xopok at lisimaramain.

<sup>43</sup> \*Mo do lakngam na lox asubu lununu ram, una ra korop pes i. I lox avukat do una beles at lorooro avolo mi legesakngam mene nga. Lavanga ne Moroa na lu arup minu eburu mi lukngam uto at laxao at lemenemen songsongot, mo laxao i nemen amisik.

<sup>44</sup> [Ap mo lenep leven got naba nemen amisik at labantuxu la noxo remet la laxao bok noxo xap.]

<sup>45</sup> Mo do laxangkedek taram na lox asubu lununu ram, una ra korop pes i. I lox avukat do una beles at lorooro avolo mi legesa xangkedek mene nga. Lavanga ne Moroa na lu arup minu eburu mi luxangkedek taram uto xeneng at lemenemen songsongot.

<sup>46</sup> [Ap mo lenep leven got naba nemen amisik at labantuxu la noxo remet la laxao bok noxo xap.]

<sup>47</sup> \*Mo do legesa xatli ram na lox asubu lununu ram, una lik gogo su min la una lu xepe min. I lox avukat una vubeles to at Linintoo at ne Moroa mi legesa xatli mene nga. Lavanga ne Moroa na lu arup minu eburu mi luxatli ram uto xeneng at lemenemen songsongot.

<sup>48</sup> ‘Ap mo lenep leven got naba nemen amisik at labantuxu la

noxo remet la laxao bok noxo xap.’” *Ais 66:24*

<sup>49</sup> La ne Iesu ga lok lavapaase poovo ridi xeretna, “Limixin axap dinaba suma losongsongot ti lox alo los lununu atdi. I lok ngan laxakures di lok li i xusu leveluxa na so avukat.

<sup>50</sup> \*Laxakures neni lavanga avukat. Ket do lolos teren na xap, kopmen bok ba tangas kusu diba lox i la na so xakures manga. Kuren la lorooro atnimi na umsu mi leven gugu nunuan kusu minaba tu buru at limila.”

## 10

*Iesu Ga Paase Mumu Lababa Korop Epot*

*(Mt 19:1-12; Lu 16:18)*

<sup>1</sup> La ne Iesu mi lavaun pinivu ren diga on basinge nom lemenemen la digat pas uto at lenep silok Judaia la diga vas korop ladan sen Joridan. La buaang limixin diga vot pasa manga i la ni ga anasa di ngan loklok teren.

<sup>2</sup> La lentaba lubang Parisi diga rupot la diga lok tong pen i mi lusue xeretna, “Kereva, Laulis Linga atdik i mulus bok kusu tara na soxope latkin teren?”

<sup>3</sup> La ne Iesu ga vorang i ridi mi lusue xeretna, “Mo lavapaase at ne Moses ga paase xereva at lababa korop epot?”

<sup>4</sup> \*La diga vorang i xeretna, “Moses ga raba nama mi levelinga do tara na malagan tevelinga axasep ti latkin teren do neni mo i xopara na epot ta ren la na riki xepe i.”

<sup>5</sup> \*La ne Iesu ga lok tidi xeretna, “Moses ga raba nimi mi nom, mila lebelen at lavalabat atnimi ga meta-rauat.

<sup>6</sup> Ketla ganoxa at lurutu kaxat Moroa ga rudum lavatlok la lavakin,

<sup>7</sup> \*Ia ne Moroa ga lok keretna, ‘Lavasuun mun at nai la laradi remes naba on basinge ne temen mi nenen la nak lok eburu mi latkin teren.

\* **9:40:** Mt 12:30; Lu 11:23 \* **9:41:** Mt 10:42 \* **9:43:** Mt 5:30 \* **9:47:** Mt 5:29 \* **9:50:** Mt 5:13; Lu 14:34; Kl 4:6 \* **10:4:** Lal 24:1-4; Mt 5:31 \* **10:5:** Lur 1:27; 5:2 \* **10:7:** Lur 2:24; Ep 5:31

<sup>8</sup> La nedu dunak lok eburu ngan mun legesara keneng at labantuxu atdu, la du noxo lok ngan bok ba legepura, ketla legesara mun.'

<sup>9</sup> Kuren la tara noxo ba korop leepot at leremes mi latkin teren, mila ne Moroa axa ga ven etang du."

<sup>10</sup> Melemu ne Iesu mi lavaun pinivu ren digak lok to at loogu, la diga sue i mi mo levelinga ren at loklok at leepot.

<sup>11</sup> \*La ni ga lok tidi xeretna, "Do laradi i soxope latkin teren, la i epot manga at lara latkin petpes, neni ira longka vam la i lok laxapmek ti latkin avot teren.

<sup>12</sup> Do tatkin na soxope latlok teren la na epot ka taradi vetpes, neni ira longka vam mi nom laradi."

### *Iesu Ga Lox Anarong Laxamdak Mi Laxaalik Kakalik*

*(Mt 19:13-15; Lu 18:15-17)*

<sup>13</sup> At lara laaleng lentaba limixin diga lam kaka laxamdak mi laxaalik kakalik atdi uto saparap ne Iesu xusu ni na lok li lukngen mavana atdi la na lox anarong di. Ketla lavaun pinivu ren diga sep pepe di.

<sup>14</sup> La ne Iesu ga ven i nom la ga vaase sok lavaun pinivu ren, ga lok tidi xeretna, "Mina ke laxamdak mi laxaalik kakalik dina vot pasa ia, la nemen mita sep pepe di, mila Linintoo at ne Moroa i epovo ridi na.

<sup>15</sup> \*A tong tuturun i rinimi. Do nege xopmen na siam kaka Linintoo at ne Moroa xerekngan lamdak kakalik, neni noxo beles teren."

<sup>16</sup> La ne Iesu ga rebeng kaka nom laxamdak mi laxaalik getgesara la ga lok li lukngen mavana atdi la ga lox anarong di.

### *Iesu Ga Paase Mi Laradi Ga Ruuna Laxampanga Solo*

*(Mt 19:16-30; Lu 18:18-30)*

<sup>17</sup> La ne Iesu ga vas kaxat uto at lenep petpes la lara laradi ga sEXIT pot, la ga xis tiktikbu mi luvatgulom

teren to melamgo at ne Iesu la ga lok tin keretna, "Leeme loklox ase avukat. Nenia ba lok lavanga sala, kusu anaba lok kaka lorooro avolo?"

<sup>18</sup> La ne Iesu ga lok tin keretna, "Tila u tong ia do a lox avukat? Kopmen tara na lox avukat ketla ne Moroa xusuk mun.

<sup>19</sup> \*Uklen pam lasangaun Levenaulis Linga i lok keretna.

'Nemen uta sev amet tara, nemen utang longka tixin, nemen uta xip pilo, nemen uta vaase xaxarang mumu tara, nemen uta xarang kaka tempanga at tara vetpes, una lok ngangao at ne tamam mi ne nenam.'

*Pas 20:12-16*

<sup>20</sup> La mo laradi ga lok ti ne Iesu xeretna, "Leeme loklox ase, ga ruka i, laau ia, aga mumu asu vam na levelinga."

<sup>21</sup> \*La ne Iesu ga ven tooro i la ga balamu i la ga lok tin keretna, "Nenu move uk pakes ti tegesa vanga. Una sesep mi lempanga axap taram la una raba lempilas at nai ri limixin banbalo la unaba ruuna ka lapnovos silok to vana at laxalibet. La melemu una mumu asu ba ia."

<sup>22</sup> La nom laradi ga milik angtun-gun la ni ga vas kaxat mi lainbulu silok mila neni gap novos aleng.

<sup>23</sup> \*La ne Iesu ga ven tangtagap la ga lok ti lavaun pinivu ren keretna, "Naba lolos aleng ti luvuttadi dip novos kusu dina vubeles at Linintoo at ne Moroa."

<sup>24</sup> La lavaun pinivu ren diga sangu at na levelinga ren. La ne Iesu ga lok bok tidi, "Loxongkulao, i lolos aleng do tara na vubeles at Linintoo at ne Moroa.

<sup>25</sup> I lolos aleng ti lakamel kusu na beles at lamamara at linil, la kerepmo i lolos aleng bok ti laradi nopnovos kusu ti beles at Linintoo at ne Moroa."

<sup>26</sup> La lavaun pinivu ren diga sangu aleng at nom levelinga la diga epaase

\* **10:11:** Mt 5:32 \* **10:15:** Mt 18:3 \* **10:19:** Laj 5:16-20; 24:14; Je 5:4 \* **10:21:** Mt 10:38; Mk 8:34 \* **10:23:** Mk 4:19; 1 Ti 6:17

xeretna, “Nege i epovo ba do na lok ka lorooro avolo?”

<sup>27</sup> La ne Iesu ga ven tooro di la ga lok tidi xeretna, “Kopmen na epovo do laradi na lox i na, ketla i epovo do ne Moroa na lok lempanga axap.”

<sup>28</sup> La ne Pita ga lok tin, “Kereva ba nema, maga on basinge vam lempanga axap atnama kusu mana mumu asu u.”

<sup>29</sup> La ne Iesu ga lok tidi xeretna, “A tong tuturun i rinimi. Do tara na on basinge lemenemen teren kopla luvutneton kopla luvurinen kopla nenen kopla temen kopla laxamdak mi laxaalik teren kopla leventaamang teren ti lok tooro ia la ri tong asu Lagale Lavavang at ne Moroa.

<sup>30</sup> Neni naba ruuna xaka luun silok at na lorooro, i ngan buaang laraogu, buaang luvutneton, buaang luvurinen, buaang luvutnen, buaang laxamdak mi laxaalik, laxantaamang solo. La neni naba lok kaka bok levesongsongot mumu Lagale Lavavang la neni naba rooro amisik at lorooro melemu.

<sup>31</sup> \*Ketla buaang limixin di ruuna levenasen silok at na lorooro, di noxo silok at lorooro melemu. La nedi kopmen dina silok at na lorooro, dinaba silok at lorooro melemu.”

<sup>32</sup> \*La melemu ne Iesu mi lavaun pinivu ren diga vas kaxat uto Jerusalem. Iesu gam gomgo ridi la diga sangu aleng mumu lavatpas teren. Limixin petpes bok diga mumu asu i, la nedi axap diga marat. La ne Iesu ga lam kaka lasangaun mi legepura lavaun pinivu ren uto vetpes la ga tong i ridi xeretna,

<sup>33</sup> “Nedik ta onon uto Jerusalem la lara laradi naba song araba ia, Laradi Mevana, ri lavamaasa silok eburu mi luvuttadi loklox ase at Laulis Linga. La nedi dinaba lok li ia at lavapaase la dinaba lok li lumumuat tarak kusu nenia ana met. La dinaba song araba ia ri limixin esep boro Rom.

<sup>34</sup> La dinaba paase aksaksa ria la dinaba vubis sanga ia la dinabak paxis ia la dinaba sev amer ia. Ketla melemu at lavantun aleng anaba roo xat amlong.”

*Jems Mi Ne Jon Duga Sue Ne Iesu Mi Tavanga*  
(Mt 20:20-28)

<sup>35</sup> La ne Jems mi ne Jon, lumdak at ne Sebedi, duga vot pasa ne Iesu la duga lok tin keretna, “Leeme loklox ase, lara lavanga mo ma lok do mana sue u min, la ma vara i do una vorang i rinama.”

<sup>36</sup> La ne Iesu ga sue du xeretna, “Lavanga salai muna sing ia min?”

<sup>37</sup> La duga vorang i xeretna, “Una siam do nema manat kis at luxot silok, lara saparap lakngam tino la lara saparap lakngam kia ap mo levenaleng unabat kis kantubu at lisisixam taram.”

<sup>38</sup> \*La ne Iesu ga lok tidu, “Nemu muxoklen lavanga nemu mu sing tin. Kereva, mu epovo munap kip levenmumuat ngan nenia anabap kiv i? La mu epovo xusu muna vubeles at langsung losongsongot nenia anaba vubeles teren?”

<sup>39</sup> \*La duga vorang i xeretna, “Ma epovo.” La ne Iesu ga lok tidu xeretna, “Munabap kip levenmumuat tarak la munaba vubeles at losongsongot tarak,

<sup>40</sup> ketla kopmen lugugu rak do nia aba tong i do nege bat kis saparap lakngak tino la saparap lakngak kia. Mo luxot ik lok mun tinedi no ne Tamak gara soxolik ka vam di.”

<sup>41</sup> La lasangaun lavaun pinivu ren diga rong nom levelinga la diga musak ne Jems mi ne Jon.

<sup>42</sup> \*La ne Iesu ga ro bubua ka nedi axap la ga lok tidi xeretna, “Miklen pam i dola luvuttadi amgomgo at limixin kopmen di me Judaia di ruuna lolos mavana at limixin atdi.

<sup>43</sup> \*Ketla nemen gat na loklok nak lok kantubu atnimi. Mo do tara

\* **10:31:** Mt 20:16; Lu 13:30    \* **10:32:** Mk 8:31; 9:31    \* **10:38:** Mk 14:36; Lu 12:50    \* **10:39:** Gu 12:2; Li 1:9    \* **10:42:** Lu 22:25-26    \* **10:43:** Mt 23:11; Mk 9:35

atnimi i vara i do na silok, neni na lok ngan lasaxaruki atnemi axap.

<sup>44</sup> La do tara atnimi i vara i do nam gomgo, neni na lok ngan lasaxaruki gamasa atnimi.

<sup>45</sup> \*Nenia Laradi Mevana la loklok tarak ik lok bok kuren. Nia xopmen a goxo vot kusu limixin dinaba lok ngan lavasaxaruki rak. Ketla nia aga vot kusu ana lok ngan lasaxaruki ridi, la kusu ana raba lorooro rak ngan laxaavuk ti buaang limixin.”

*Iesu Ga Lox Arepalas Luxatli At Ne Batimias*

*(Mt 20:29-34; Lu 18:35-43)*

<sup>46</sup> La ne Iesu eburu mi lavaun pinivu ren diga rupot to at lemenemen Jeriko. La diga vas kaxat basinge nom lemenemen la buaang limixin diga emu midi. La lara laradi laasen teren ne Batimias, nitna ne Timias, gat kis to at lisigege ngas la ga ngising panga mila luxatli ren ga main axap.

<sup>47</sup> \*La neni ga rongga i dola ne Iesu me Nasaret gat pas at nom langa, neni gap kup keretna, “Livisik li at ne Devit. Una balamu ia.”

<sup>48</sup> La buaang limixin diga tong i rin do na lok pilo, ketla neni gap kup silok keretna, “Livisik li at ne Devit. Una balamu ia.”

<sup>49</sup> La ne Iesu ga ru la ga lok, “Mina ro xaka i ude.”

La diga ro ka mo laradi la diga lok tin keretna, “Una lok momo la una xatu upana. Iesu no i toro ru.”

<sup>50</sup> La neni ga lok kepe lavanga singsiga me maxamang teren la ga xatu soso la ga vot pasa ne Iesu.

<sup>51</sup> La ne Iesu ga sue i xeretna, “U vara i do nenia na lok lavanga salai ru?”

La nom laradi ga vorang i xeretna, “Rabai, A vara i do luxatli rak na xasep.”

<sup>52</sup> \*La ne Iesu ga lok tin keretna, “Una vas kaxat. Lununu ram ira lox avukat pam u.” La soso mun luxatli ren ga xasep la neni ga emu mi ne Iesu ro at langa.

## 11

*Iesu Ga Vubeles To Jerusalem*

*(Mt 21:1-11; Lu 19:28-40; Jo 12:12-19)*

<sup>1</sup> La ne Iesu mi mo limixin solo digat pas uto auret ta lemenemen Jerusalem, diga rupot to at lumenemen Betpage la Beteni at Lakaana Olip. Iesu ga riki amgo legepura at lavaun pinivu ren.

<sup>2</sup> Avot be ni ga lok tidu xeretna, “Munat pas uto at nom lemenemen ik lok to melamgo atnumu. La soso mun munaba long lenget ka lodongki maxat, kovisi tara goxo xis teren. La muna soxomus ka i ude.

<sup>3</sup> Dola tara na sue numu do, ‘Tila nemu mu soxomus ka nom lodongki?’ muba lok tin keretna, ‘Leeme Silok i vara i la manaba lok li amlong soso bok ba i.’ ”

<sup>4</sup> La nedu duga vas kaxat la duga ven lenget ka lodongki at loogu gak lok saparap langa, diga xoxo li i go la duga soxomus ka i.

<sup>5</sup> Lentaba diga tu go diga sue du xeretna, “Mu lok lavanga salai, tila mu soxomus ka nom lodongki?”

<sup>6</sup> La duga vorang i ngan ne Iesu ga tong pam i ridu la nom limixin diga mulus taba du mi lodongki.

<sup>7</sup> La duga lok kaka lodongki uto saparap ne Iesu la duga lok li levempanga singsiga to vana ren la ne Iesu ga xis teren. <sup>8</sup> La nedi axap diga vas kaxat uto Jerusalem. Buaang limixin diga lok li levempanga singsiga atdi ro at langa la lentaba diga ra ka lengkakan bisi boro at leventaamang atdi la diga lok li i at langa.

<sup>9</sup> Lentaba digat pas to melamgo at ne Iesu la lentaba digat pas to melemu ren. Nedi axap digap kup momo xeretna,

“Leemi asu ri ne Moroa. Luvukat ti mo laradi it pas mi laasen at Leeme Silok.

<sup>10</sup> I lox avukat ti lovotpot at Linintoo at lurubuno avolo atdik ne Devit. Leemi asu aleng ti ne Moroa.” *Sam 118:25-26*

\* 10:45: 1 Ti 2:5-6 \* 10:47: Mt 9:27; 15:22 \* 10:52: Mk 5:34

11 La ne Iesu ga vubeles to Jerusalem la gat pas uto at loogu laplavang. Ni ga ven tangtagap at lempanga axap. Ketla ukantinao ren neni eburu mi lasangaun mi legepura lavaun pinivu ren diga sixisu la digat pas uto Beteni.

*Iesu Ga Vaase Poovo Mumu Lubung Mixin Me Judaia*  
(Mt 21:18-19)

12 Ap mo lara laaleng melemu ne Iesu eburu mi lavaun pinivu ren diga vas kaxat basinge lemenemen Beteni, la ne Iesu ga roxo.

13 \*La ni ga ven lara luuna pik to vaxalom la mo luuna ga xo vavaxan mene nga. La ne Iesu gat pas kusu na dik ka tevempeven una ren. Ketla goxopmen tevempeven una ren, ga xo vavaxan mene nga, mila goxovisi lagaaling tin ti visik.

14 \*La ne Iesu ga vaase lolos ti nom luuna xeretna, "Nenu u noxo visik bok ba tevempeven una."\* La lavaun pinivu ren diga rongga nom levelinga ren.

*Iesu Ga Vubeles To At Loogu Laplavang*  
(Mt 21:12-17; Lu 19:45-48; Jo 2:13-22)

15 La diga rupot to Jerusalem la ne Iesu ga vubeles to at loogu laplavang la ni ga xala su mi limixin diga sesep mi lempanga ro xeneng la nedi bok diga unun panga. La ni ga ba gili levenora lili atnedi no digak lox ekun lempilas la ga ba gili levengkonin kitkis atnedi diga sesep mi levenamno.

16 La neni ga sep pepe bok lentaba vetpes kusu nedi di noxo vas polo ro xeneng at loogu laplavang mi lempanga atdi.

17 \*La ne Iesu ga anasa di xeretna, "Levelinga at ne Moroa ik lok at Lovoang Kaala i lok keretna,

'Loogu rak dinaba so asen i mi loogu singising ti limixin at levengkot axap.' *Ais 56:7*  
Ketla nemi mira lok kapmek pam i, i ngan loogu loklox alipe at luvuttadi dip sep paxat ka panga."

18 \*La lavamaasa silok mi luvuttadi loklox ase at Laulis Linga diga rongga nom levelinga ne Iesu ga tong i. Kuren la diga puse ngas ti sev amer i. Diga marat teren mila limixin axap diga sangu at levenanasa ren.

19 Ga ukantinao nga la ne Iesu mi lavaun pinivu ren diga on basinge lemenemen silok Jerusalem.

*Iesu Ga Paase Mumu Lununu*  
(Mt 21:20-22)

20 \*Ga maxantamak manga diga vas kaxat la diga ven nom luuna ga mang axap, levenixe bok teren ga mang axap.

21 La ne Pita ga doma su at levelinga at ne Iesu la ga lok tin keretna, "Leeme Silok, una ven be nom luuna. Uta paase lolos tin itinongo la na i mang axap pam."

22 La ne Iesu ga lok tidi xeretna, "Mina nunu at ne Moroa.

23 \*A tong tuturun i rinimi. Do tara na tong i ri na lavatkaana xeretna, 'Una onon la una subu tup tou at laras,' la do neni i nunu ruturun keneng at lebelen la lodoxoma ren kopmen na sixit ekarakat, Moroa naba lox i xerepmo.

24 \*Kuren la a tong i rinimi. Dola una sing ne Moroa ri tempanga u vara rin, una nunu do ne Moroa na raba u min la neni naba lox i xuren.

25 \*At loxonaleng una sing, una doxoma xepe leveloklok kakapmek limixin diga lox i ru, kusu ne Moroa naba doxoma xepe leveloklok kakapmek taram.

26 [Do u noxo domampe leveloklok kakapmek at tara, Moroa noxo doxoma xepe leveloklok kakapmek taram."]

\* 11:13: Lu 13:6 \* 11:14: Mk 11:20 \* 11:14: Na lavapaase poovo rinedi limixin me Judaia la lavanga salai naba vot parap di do di noxo visik asu teveloklok nunuan. \* 11:17: Jer 7:11 \* 11:18: Mk 14:1 \* 11:20: Mk 11:14 \* 11:23: Mt 17:20 \* 11:24: Mt 7:7 \* 11:25: Mt 5:23; 6:14-15

*Lususue At Loxongkulao Silok At Lubung Mixin Me Judaia*

(Mt 21:23-27; Lu 20:1-8)

<sup>27</sup> La ne Iesu eburu mi lavaun pinivu ren diga rupot to Jerusalem. La ne Iesu ga vubeles to xeneng at loogu laplavang la lavamaasa silok mi luvuttadi loklox ase at Laulis Linga mi loxongkulao silok at lubung mixin me Judaia diga vot pasa i.

<sup>28</sup> La diga sue i xeretna, "Lava-paase axasep atnege nenu u ruuna i xusu ti lox i na lempanga? La nege ga raba u mi nom lolos?"

<sup>29</sup> La ne Iesu ga vorang i ridi xeretna, "Ana sue bok nimi mi lara lususue la do mina vorang avukat taba ia min, aba vaase axasep ba nimi, do nenia a lok na lempanga mi lavapaase axasep salai.

<sup>30</sup> Leeseep susu at ne Jon ga laa meva, boro at ne Moroa xopla boro mun at limixin?"

<sup>31</sup> La diga epaase xantubu atdi xeretna, "Mo do ata lok do, 'Boro at ne Moroa,' neni naba lok tidik keretna, 'Tila ba mi goxo nunu at levelinga at ne Jon?'"

<sup>32</sup> La mo do ata lok, 'Boro at limixin,' ata marat bok at limixin, mila di nunu do ne Jon neni leeme va-paase ali."

<sup>33</sup> Kuren la diga vorang i ri ne Iesu xeretna, "Maxoklen i." La ne Iesu ga lok tidi xeretna, "Nia bok a noxo tong i rinimi do, nenia a lox i na lempanga mi lavapaase axasep salai."

## 12

*Lempapaase Poovo Mumu Limixin Silok Me Judaia*

(Mt 21:33-46; Lu 20:9-19)

<sup>1</sup> \*La melemu ne Iesu ga tong lavapaase poovo ridi xeretna, "Lara laradi gatlotlo laraamang vaen, la neni ga bos kangkan i la ga xe lamamara xusu ti loplok li levendan vaen teren, la melemu ga lok loogu xukuxut. La neni ga raba lentaba luvuttadi min kusu dina lok tatao i la neni gat pas uto at lenep petpes.

<sup>2</sup> Laaleng ga vot kusu dina dik ka lempeven una at nom laraamang la laradi at laraamang ga riki lasaxaruki ren uto at nom laraamang ti lok kaka lenep at levempeven una.

<sup>3</sup> Ketla nom luvuttadi loklok tatao at laraamang diga ranga alis nom lasaxaruki la diga rit pupu i la diga riki amlong kixinax i.

<sup>4</sup> La nom laradi ga riki manga lara lasaxaruki, ketla diga sep patlak ka i la diga lox amamangan tinotno i.

<sup>5</sup> La ni ga riki manga lara lasaxaruki la diga sev amer i. La ni ga riki buaang lavasaxaruki vetpes teren. Ketla diga tit pupu lentaba la diga sev amet lentaba.

<sup>6</sup> \*La kopmen bok ba tavasaxaruki ren, ketla nitna xusuk ta mo gak lok, ni ga vavara aleng i. La ni ga nua i dola nom luvuttadi dinaba lok ngangao at ne nitna la ni ga riki ba i.

<sup>7</sup> Ketla nom luvuttadi loklok tatao diga ven i la diga etong i xeretna, 'Lamdak akmokso at laradi at na laraamang nom it pas boro. Ata sev amer i, la ataba ruuna ka na laraamang.'

<sup>8</sup> \*La diga ranga alis i la diga sev amer i la diga lu asu min uto maxamang at nom laraamang."

<sup>9</sup> La ne Iesu ga lok bok tidi xeretna, "La nom laradi i ruuna nom laraamang, neni ba lok lavanga salai ridi? Neni naba rupot la na sev amet nom luvuttadi, la na raba nom laraamang vaen ti tentaba tuvuttadi vetpes.

<sup>10</sup> Nemi mi xasep at Lovoang Kaala i lok keretna, 'Nom luuat luvuttadi xipkip gu diga sok tixirixes kepe i, ga ravasu ngan Luuat Kis la lugugu ren i silok aleng.

<sup>11</sup> Leeme Silok axa ga lox i na la i lox avukat aleng at lemeren dik.' " *Sam 118:22-23*

<sup>12</sup> Lavamaasa silok mi luvuttadi loklox ase at Laulis Linga diga puse ngas ti ranga alis i mila digaklen i dola ne Iesu ga paase poovo mumu di. Ketla diga marat at limixin la diga



ke ne Iesu la diga vas kaxat basinge i.

*Iesu Ga Paase Mumu  
Loklok Kekepe Pilas*

(Mt 22:15-22; Lu 20:20-26)

<sup>13</sup>\* Melemu nedi lubang amgomgo diga riki lubang Parisi mi larapen tangas at ne Erodes kusu dina lok tong pen ne Iesu mi levelinga.

<sup>14</sup> La diga rupot la diga lok tin keretna, “Leeme loklox ase, maklen i do nenu laradi ruturun la u anasa limixin mi leventaangas at ne Moroa la mo levelinga ram ik mokso. Uxo lok tooro legesa binam tadi xusuk mun mila uxu doxoma solo do tara i ruuna laasen silok kopla kopmen. Una tong i rinama do ua lusumsuma ram. Kereva, ik mokso do mana xepe pilas ti ne Kaisar kopla kopmen?”

<sup>15</sup> Maba un i xopla xopmen?”

Ketla ne Iesu gaklen levendoxoma xapmek atnedi la ga lok tidi xeretna, “Nemi mi lok tong ia mi levelinga, do? Kaka tuxuven denarias ude. Ana ven be i.”

<sup>16</sup> La diga raba i mi luxuven denarias la ne Iesu ga sue di xeretna, “Lamang la laasen atnege i nemen teren?”

La diga vorang i xeretna, “At ne Kaisar.”

<sup>17</sup>\* La ne Iesu ga lok tidi xeretna, “Mina raba ne Kaisar mi levempanga i epovo at ne Kaisar la mina raba ne Moroa mi levempanga i epovo at ne Moroa.”

La diga sangu aleng at levelinga ren.

*Iesu Ga Paase Mumu  
Lorooro Amlong*

(Mt 22:23-33; Lu 20:27-40)

<sup>18</sup>\* La lubang Sadiusi diga vot pasa ne Iesu. Diga lok do limixin diga met pam, di noxo roo xat amlong. Di ga lok tong pen ne Iesu xeretna,

<sup>19</sup>\* “Leeme loklox ase, Moses ga malagan na langas linga rinama. Mo do taradi na met la latkin teren mo i rooro, ketla kopmen taxamdak atdu, neton nom laradi naba epot ap mo

lanaa rixin kusu duba visik tamdak ti ruuna ka lempanga ap mo laradi ga met.

<sup>20</sup> Ga lavanuti loxoeton. Lara gomgo ga epot, la ga met gamasa kopmen ni goxo visik taxamdak.

<sup>21</sup> Lara sepsep agepura ga epot manga at nom latkin la neni ga met bok la goxo visik tamdak. La neton sepsep avantun ga lok box i xuren.

<sup>22</sup> La nedi loxoeton axap diga epot at nom latkin la nedi axap diga met la di goxo visik tamdak la melemu mo latkin bok ga met.”

<sup>23</sup> La diga sue ne Iesu xeretna, “At laaleng dola limixin dina xatu kaxat amlong, ti nege rinotno nom latkin, mila nedi axap diga epot teren?”

<sup>24</sup> La ne Iesu ga vorang i ridi xeretna, “Nemi mi soogong at na lavanga mila mixo xasep at levelinga xeneng at Lovoang Kaala la mixo xasep at lolos at ne Moroa.

<sup>25</sup> Ap mo laaleng limixin dinaba xatu kaxat amlong, di noxo epot. Dinaba nemen naa ngan lubang angelo boro vana at laxalibet.

<sup>26</sup> Mumu laxakatu kaxat amlong ne Moses ga vaase axasep tuturun i do luvuttadi met dinaba rooro xat amlong. Ni ga lox asuusu i at levelinga mumu luuna laxao gak lok teren. Moroa ga lok tin keretna,

‘Nenia ne Moroa at ne Abaram, Moroa at ne Aisak, la Moroa at ne Jakop.’

*Pas 3:6*

<sup>27</sup> Ap mo laaleng ne Moroa ga tong i na, nedi lavantun diga met pam. La neni ne Moroa atnedi limixin di rooro, la kopmen atnedi luvuttadi met. Levendoxoma atnemi xopmen nak mokso.”

*Levelinga Silok At  
Lovoang Kaala*

(Mt 22:34-40,42-45; Lu 10:25-28; 20:41-44)

<sup>28</sup>\* Lara at luvuttadi loklox ase at Laulis Linga ga rupot la ga rongga lavapaase atdi. Neni gaklen i do ne Iesu ga vorang avukat lususue atdi la neni bok ga sue ne Iesu xeretna,

“Ua levelinga at Laulis Linga i silok ti levelinga axap teren?”

<sup>29</sup> La ne Iesu ga vorang i rin keretna, “Levelinga i silok i lok keretna.

‘Lubung mixin me Israel, mina rongga i na. Moroa neni Leeme Silok atnimi la legesa Moroa mene nga.

<sup>30</sup> Mina vavara aleng Leeme Silok, ne Moroa atnimi mi lebelen nimi axap, mi lороonan axap atnimi, mi levendoxoma axap atnimi, la levelolos axap atnimi.’

*Lal 6:4-5*

<sup>31</sup> La lara bok sepsev agepura i lok ngan lara gomgo, i lok keretna,

‘Mina balamu mo limixin di nemen saparap nimi xerekngan pam mi balamu nimi.’ *Mas 19:18*  
Kopmen tevelinga ro xeneng at Lovoang Kaala i silok ti na luxot.”

<sup>32</sup> La nom laradi ga lok ti ne Iesu, “Leeme loklox ase, lavapaase ram ik mokso. U paase ruturun do legesa Moroa mene nga la kopmen tomoroa bok.

<sup>33</sup> \*La i ruturun bok do na levelinga i silok. Mina vavara aleng ne Moroa mi lebelen nimi axap, mi levendoxoma atnimi axap, mi levelolos atnimi axap la mina balamu limixin di nemen saparap nimi ngan mi balamu nemi. Na loklok i silok ti mo loklok tim taba ne Moroa mi leventamtaba la levempanga laplavang.”

<sup>34</sup> La ne Iesu ga rongga xisiv i do mo laradi ga paase mi lakleklen la ga lok tin keretna, “I auret kusu una vubeles at Linintoo at ne Moroa.” La melemu at na lubung amgomgo diga xopara i xusu dina sue ne Iesu mi tevesusue.

<sup>35</sup> La ne Iesu ga anasa ro at loogu laplavang. Ni ga sue xeretna, “Luvuttadi loklox ase at Laulis Linga dik lox ase limixin do Lanarong neni lurubuno ne Devit. I lok kereva na?

<sup>36</sup> Mila ne Devit ga tong asu levelinga mi lodoxoma at Lороonan Kaala la nom levelinga ik lok to xeneng at Lovoang Kaala xeretna,

‘Leeme Silok ne Moroa ga lok ti Leeme Silok tarak keretna, una xis de saparap lakngak tino se nenia ana lok li limixin munepen minu na ngan loxot burubut ti luxangkedek taram.’

*Sam 110:1*

<sup>37</sup> Mo do ne Devit ga so asen i do Leeme Silok, i lok kereva la Lanarong neni lurubuno at ne Devit?”

La buaang limixin diga lok momo ri rongga levelinga at ne Iesu.

*Lempanga Xakapmek At Luvuttadi Loklox Ase At Laulis Linga*

*(Mt 23:1-36; Lu 20:45-47)*

<sup>38</sup> La ne Iesu ga anasa bok keretna, “Mina lok tatao avukat nemi basinge loklok at luvuttadi loklox ase at Laulis Linga, mo di vavara i xusu dinat pas tangtagap mi levesingsigaara babaalom atdi la di vavara i xusu limixin dina seega rangarang di mi loklok ngangao ro at lengkot etang.

<sup>39</sup> La di vavara aleng i do dinat kis at lengkot kitkis avukat to at laraogu singising la lengkot avukat to at lara peluxa.

<sup>40</sup> La dik lok kaka gamasa lempanga at lubungnaa rixin, la di ngising babaalom kusu limixin dibak lok ngangao atdi. Losongsongot tidi naba lok kapmek aleng tinotno!”

*Laramtaba At Labannaa Rixin (Lu 21:1-4)*

<sup>41</sup> \*La ne Iesu gat kis to xeneng at loogu laplavang la ga reven limixin diga kepe lempilas atdi ro at loxot lili pilas. Buaang luvuttadi nopnovos diga kepe laxampilas solo.

<sup>42</sup> Ketla ni ga ven lara labannaa rixin banbalo ga xepe legepu xonatat pilas lixilik. Ni lempilas lixilik tinotno.

<sup>43</sup> \*La ne Iesu ga ro xaka lavaun pinivu ren la ga lok tidi xeretna, “A tong tuturun i rinimi do at lemeren ne Moroa, na labannaa rixin banbalo i lok li lempilas i silok ti lempilas atnedi axap di xepe lempilas atdi.

\* **12:33:** Lal 4:35; Ais 45:21; 1 Sml 15:22; Ose 6:6

\* **12:41:** 2 Lav 12:9 \* **12:43:** 2 Ko 8:12

<sup>44</sup> Mila nedi di raba ne Moroa mi loxot lixilik mun at lapnovos silok atdi, ketla neni i raba ne Moroa mi lempilas axap teren.”

## 13

*Iesu Ga Paase Mumu Lempanga Xakapmek*

*Naba Ravasu*

*(Mt 24:1-2; Lu 21:5-6)*

<sup>1</sup> La melemu ne Iesu ga on basinge loogu laplavang, lara at lavaun pinivu ren ga lok tin keretna, “Leeme loklox ase, pen ba lemparuat silok at loogu laplavang la laraogu avukat bok i tu saparav i.”

<sup>2</sup> \*La ne Iesu ga vorang i xeretna, “Una ven avukat na laraogu nunuan. Taaleng naba vot la kopmen tox-onuat at nom laraogu naba nemen at loxot teren. Limixin munepen dinaba vot la dina ut tereve axav i ukopok.”

<sup>3</sup> La melemu ni gat kis eburu mi lavaun pinivu ren to at Lakaana Olip. Diga reven loogu laplavang ga tu ro at lakaana vetpes. Pita la ne Jems la ne Jon la ne Endru, nedi xusuk digak lok mi ne Iesu la diga sue ne Iesu xeretna,

<sup>4</sup> “Una tong i rinama. Lingisa nom lempanga naba vot la loklok katling salai naba lok katling lovotpot ap mo levenaleng do mo lempanga na ravasu?”

<sup>5</sup> La ne Iesu ga vorang i ridi xeretna, “Mina lok tatao avukat nimi xusu tara noxo xarang arup nimi mumu i na lempanga,

<sup>6</sup> mila buaang luvuttadi dinaba rupot mi laasen tarak la dinaba lok, ‘Nenia Lanarong!’ La dinaba sar asoogong buaang limixin mi laxalinga xaxarang atdi.

<sup>7</sup> La minaba ronga i do laraesep mo ik lok la laraesep bok naba vot, ketla laxavaxap at na lavatbung mennen noxo vot ap mo levenaleng.

<sup>8</sup> \*Limixin at lentaba levenabung mixin dinaba esep eburu mi limixin at levenabung mixin petpes. Lavaorong at lentaba levengkitkis orong dinaba esep mi lavaorong at levengkitkis orong petpes. Levenangne naba rupot to at tevenngkot axap eburu mi leean kangking. Nom levempanga naba ru katling lavak-paxaru kaxat ap mo levenaleng, naba lok ngan losongsongot i rupot at latkin mo i auret kusu na visik.

<sup>9</sup> \*Ketla mina lok tatao avukat nimi. Tentaba dinaba ranga alis nimi la minaba tu at lavapaase ro melango at lavaeme silok la dinabak paxis nimi ro at laraogu singising. La minaba tu at lavapaase ro melango at lavaeme amgongo mi lavaorong mila nemi mi nunu rak, ketla minaba tong asu Lagale Lavavang tidi.

<sup>10</sup> La limixin boro at levennep axap dinaba ronga be Lagale Lavavang tarak la melemu ren laaleng silok naba rupot.

<sup>11</sup> \*Do dina ranga alis nimi la dina lam kaka nimi uto at lavapaase, nenen mita marat at levelinga salai miba tong asu i ridi. Mina tong asu mene mo levelinga nak lok at levendoxoma atnimi ap mo loxonaleng mila Loroonan Kaala naba raba nimi mi levelinga.

<sup>12</sup> \*Lara koeton axa dinaba etaba tuntuna mi luvutneton di ri lanmet. La luvuttemen laxamdak dinaba etaba tuntuna mi laxamdak la laxaalik atdi. La laxamdak mi laxaalik dinabang tonga xepe levelinga at luvuttemen di mi luvutnen di la dinaba lok li di ri lanmet.

<sup>13</sup> \*La limixin axap dinaba belengatngas tinimi mila mi mumu asu ia. Ketla lara do i tu atmatkun keneng at levesongsongot ise at laxavaxap ap mo levenaleng, ne Moroa naba lox arooro i.”

*Laradi Xapmek Naba Tu Ro At Loxot Kaala*

*(Mt 24:15-28; Lu 21:20-24)*

\* 13:2: Lu 19:44 \* 13:8: Ais 19:2; 2 Let 15:6 \* 13:9: Mt 10:17-20 \* 13:11: Lu 12:11-12 \* 13:12: Mt 10:21 \* 13:13: Mt 10:22; Jo 15:21 \* 13:14: Dan 9:27; 11:31; 12:11

14 \*La ne Iesu ga lok bok tidi xeretna, “Do mina ven lavanga i lok kapmek aleng na tu ro at loxot i xaala aleng to xeneng at loogu laplavang, nemi minaba nemen to at lenep Judaia, mina sixiro uto at lempatkaana. Mina xasep avukat at na.

15 \*Laradi do ik lok to mavana at loogu ren, ni noxo si kusu na lok ka lempanga ren boro xeneng ap mo loogu ren.

16 La laradi do nak lok to xataamang, noxomlong bok ba uto at loogu ren kusu na lok ka lavanga singsiga ren.

17 \*Mo laaleng naba lok kapmek aleng ti lavakin teenan eburu mi lavakin mi levengkadede atdi!

18 Mina ngising ne Moroa do mo laaleng noxo vot saporap nimi edompo mi taaleng kabu.

19 \*Mila levenmumuat ap mo levenaleng naba lok kapmek tinotno. Ga ruka i at lurutu kaxat at na lavatbung menemen mo ne Moroa ga rudum li i, ise nga na lingina. La kopmen bok tara tumumuat kerepmo naba vot melemu.

20 La mo levenaleng ti mo levenmumuat do ne Moroa noxo lox atmur i, kopmen teta naba roo su. Ketla ne Moroa naba lox asusu lebelen tuntun teren ti mo limixin neni gara soxolik ka vam di, la ni naba lox atmur mo levenaleng.

21 Ap mo levenaleng nemen gat mita nunu at levelinga at tara na lok tinimi xeretna, ‘Mina ven ba i, neni nga na Lanarong!’ Kopla na lok, ‘Neni nga no!’ Nemen mita nunu at nom levelinga atdi.

22 \*Mila buaang nedi limixin baba dinaba lok do nedi mo lavanarong at ne Moroa la lavaeme vapaase ali ren. Dinaba lok tempanga sangsangu xusu dina sar asoogong lavaanat soksoxolik at ne Moroa, mo do di epovo.

23 Kuren la mina doma mumu avukat na levelinga rak. A tong ali

avot ta i rinimi.”

*Laradi Mevana Naba Vot*  
(Mt 24:29-31; Lu 21:25-28)

24 \*La ne Iesu ga lok bok tidi xeretna, “Ketla ap mo levenaleng melemu at na levenmumuat leveloklok katling naba vot, ‘Losoosoo at laxangking naba xap, la lagaaling noxo soosoo.

25 La larapenti naba subu si boro vana at lamavangkap la lempanga mevana dinaba sixit ekarakat la kopmen di noxo sixit mu larangas atdi.’  
*Ais 13:10; 34:4*

26 La ap mo levenaleng limixin dinaba ven ia, Laradi Mevana, to vana at loxontakabu. Nenia anaba rupot mi langangan lolos la lisisixam silok.

27 \*La nenia anaba riki lubang angelo uto at levengkot axap la dinaba lam kaka lavaanat soksoxolik tarak boro at lavanuet laramesuluk at lavanuet laramera manman at na lavatbung menemen.”

*Lavapaase Poovo At*  
*Luuna Pik*

(Mt 24:32-35; Lu 21:29-33)

28 La ne Iesu ga tong lara lavapaase poovo ridi xeretna, “Mina ronga na laanasa mumu luuna pik. Dola levesisilik at larauna pik di mumulum la levenang i suu xat, nemi miklen i do lamaares i auret ta.

29 La kerepmo do mina ven i na lempanga loklok katling na vot, mina xasep do loxotpot tarak, Laradi Mevana i auret, i ngan laradi i tu at lumusmaragu at loogu la i gagas kusu na beles teren.

30 Nia a tong tuturun i rinimi. Limixin at na loola di rooro lingina di noxo met se na lempanga na ravasu.

31 Laxalibet mi lavatbung menemen naba sonao, ketla levelinga rak noxo xap.”

*Kopmen Tara Iklen Laaleng*  
*Laradi Mevana Naba Vot*  
(Mt 24:36-44)

32 La ne Iesu ga lok bok, “Kopmen tara naklen laaleng at loxotpot

\* 13:15: Lu 17:31 \* 13:17: Lu 23:29 \* 13:19: Dan 12:1; Jol 2:2; Li 7:14 \* 13:22: Lal 13:1-3; Li 13:13 \* 13:24: Li 8:12 \* 13:27: Mt 13:41

tarak. Lubung angelo bok kopmen dinaklen i la nenia, ne Nitna bok kopmen anaklen i. Tamak kusuk mun iklen i.

<sup>33</sup> Kuren la nemi mina reven avukat mila mixoklen i do lingisa mo laaleng naba rupot.

<sup>34</sup> \*I lok ngan lara leeme silok gat pas uto vaxalom la lavasaxaruki ren diga lok tatao loogu ren. Neni ga tong li leven gugu ridi getgesara la neni ga tong i ri legesara atdi dola neni na lok tatao lumusmaragu la na reven ti lomlong teren.

<sup>35</sup> \*La nemi mi lok ngan nom lasaxaruki ga lok tatao lumusmaragu. Mina reven avukat amisik mila mixoklen mo laaleng Leeme Silok nabamlong teren. I epovo na rupot ukantinao koplā at laxanimin tubu koplā at nom loxonaleng lengkaxak ing teng kaxat teren, koplā at loxonaleng laxangking it losu ren.

<sup>36</sup> Mina reven avukat, naba lok kapmek do mina unga ap mo loxonaleng neni na rupot teren.

<sup>37</sup> Nom levelinga ara tong pam i rinimi, la anaba tong box i ri limixin axap, mina reven avukat.”

## 14

*Loxongkulao Silok Diga Puse Ngas Ti Sev Amet Ne Iesu*

(Mt 26:1-5; Lu 22:1-2; Jo 11:45-53)

<sup>1</sup> \*At legepu aleng avot ti mo laaleng leluxa silok at Lovovolo Pe ga auret. La ap mo leluxa diga anan lengkongkide diga ove vetpes i. La lavamaasa silok la luvuttadi loklox ase at Laulis Linga diga puse ngas kusu dina ranga alis nemnem ne Iesu la dina lok li i at lavapaase xusu dina sev amer i.

<sup>2</sup> Ketla diga epaase xeretna, “Ata noxo lox i na at laaleng at leluxa. Lavanga limixin dina lok kaxat turube.”

*Latkin Ga Lox Agagas Li Ne Iesu Ri Lanmet Teren*

(Mt 26:6-13; Lu 7:37-50; Jo 12:1-8)

<sup>3</sup> \*Iesu gak lok to Beteni at loogu at ne Simon, gano lanmeres gu (leprosy) gak lok teren. La ne Iesu gat kis ti anan, la lara latkin ga vot pasa i, gap kip lubuxom avukat\* ga umsu mi laxadan mavak. Mo loxodan laasen teren naat, i nunuan aleng la luunun teren ga urut aleng. La neni ga ba pit kepe laxatli ap mo lubuxom dan mavak la ga soli i ro at lavatlatk at ne Iesu.

<sup>4</sup> La lentaba digak lok go diga ven i, la diga musak aleng la diga epaase xeretna, “Tila i soli xepe gamasa i na?”

<sup>5</sup> Ni i epovo ri sesep mi na laxadan mavak kusu na lok ka lavantun sangau kobot (300) denarias teren ti lok tooro limixin banbalo.” La diga paase mukmusak ti mo latkin.

<sup>6</sup> Ketla ne Iesu ga lok tidi, “Keke i. Nemen mita lox angtang na latkin, mila neni i lok lavanga nunuan tia.

<sup>7</sup> \*Limixin banbalo mo dinabat pot pasa amisik nemi xusu minak lok tooro di, ketla nenia noxo nemen eburu amisik minimi.

<sup>8</sup> \*La na latkin i lok lavanga avukat tia. Ni i soli na laxadan mavak at labantuxu rak kusu ti lox agagas li labantuxu rak ti lamaaut.

<sup>9</sup> A tong tuturun i rinimi. At ua lengkot axap at na lavatbung mennen, limixin dinaba tong asu Lagale Lavavang, la na lavanga neni i lox i, dinaba tong box i xusu limixin dinaklen i.”

*Judas Ga Siam Do Neni Na Song Araba Ne Iesu*

(Mt 26:14-16; Lu 22:3-6)

<sup>10</sup> La ne Judas Iskariot, lara at lasangaun mi legepura lavaun pinivu at ne Iesu ga vot pasa lavamaasa silok kusu neni na song araba ne Iesu ridi.

<sup>11</sup> La nedi diga lok momo aleng la diga tong i ri ne Judas do nedi

\* 13:34: Mt 25:14 \* 13:35: Lu 12:38 \* 14:1: Mk 11:18 \* 14:3: Lu 7:37-38 \* 14:3: Na lubuxom tuntu diga xovox i mi luuat bunbun. \* 14:7: Lal 15:11 \* 14:8: Jo 19:40

diba raba i mi lempilas. La ne Judas ga ngangais ti toxonaleng kusu naba epovo rin ti song araba ne Iesu ridi.

*Leluxa At Leeme Silok*  
(Mt 26:17-25; Lu 22:7-14,21-23; Jo 13:21-30)

12 \*At laaleng avot ap mo leluxa limixin me Judaia diga gagas li lengkongkide.\* Ap mo laaleng diga sep laxanat sipsip la diga ove i la diga anan i. Lavaun pinivu at ne Iesu diga sue i xeretna, “U vara i do mana lox agagas li laanan tidik ua?”

13 La ne Iesu ga lok katling leg-epura atdi la ga lok tidu xeretna, “Mo do muna beles ukeneng at lemenemen silok, lara laradi nabap kip lubuxom dan naba xip tangarang ka numu.

14 Muna mumu asu i uto at loogu ni na beles teren. La muna lok ti laradi at loogu xeretna, ‘Leeme loklox ase i sue u do, loxot ua at na loogu ram, neni eburu mi lavaun pinivu ren diba lok katling leluxa at Lovovolo Pe ve?’

15 La neni naba lox ase numu mi loxot silok, diga gagas li vam i no i nemen to vana ap mo loogu. Muna gagas li lempanga anan tidik go.”

16 La nedu duga vas kaxat la dugat pas uto at nom lemenemen, la duga long lenget ka lempanga xerekngan ne Iesu gara tong pam i ridu, la duga lox agagas li leveluxa ri Lovovolo Pe.

17 Ga ukantinao ne Iesu mi lavaun pinivu ren diga rupot.

18 \*La diga xis la digara anan, la ne Iesu ga lok tidi xeretna, “A tong tuturun i rinimi, lara atnimi naba song araba ia ri lavamaasa silok. Mo it kis de la i anan eburu minia.”

19 La diga lok bukbulu la nedi get-gesara diga sue i xeretna, “Kopmen nenia, do?”

20 La neni ga vorang i ridi xeretna, “Neni lara atnemi lasangaun mi leg-epura. Mo lara i lok kaka lengkom-panga anan eburu minia at loxot lili panga anan.

21 Nenia, Laradi Mevana, anaba met kerekngan Lovoang Kaala i tong i, ketla naba lok kapmek aleng ti mo laradi naba song araba ia ri lava-maasa silok. Gitaba lox avukat do nenen gitoxo visik ka i.”

22 Move diga anan, la ne Iesu ga lok kaka loxongkide, ga tong avukat ti ne Moroa la ga sebex i la ga raba lavaun pinivu ren min la ga lok, “Mina lok kaka i na. Labantuxu rak na.”

23 La neni ga lok kaka lakap inin, la ga tong avukat ti ne Moroa, la ga raba di min la nedi axap diga inin teren.

24 \*La ni ga lok, “Lada rak na. I lok katling lekabus maxat. Lada rak naba sen su kusu ti limixin buaang, ne Moroa naba doxoma xepe level-oklok kakapmek atnedi.

25 A tong tuturun i rinimi, nenia noxo in at lavaen i ru xaka i lingina se ap mo laaleng nia anaba in lavaen maxat to xeneng at Linintoo at ne Moroa.”

26 La digak pixan mi loxompixan la diga vas kaxat uto at Lakaana Olip.

*Iesu Ga Vaase Ali Do Ne Pita Naba Sok Tixirixes Kepe I*

(Mt 26:31-35; Lu 22:31-34; Jo 13:36-38)

27 \*La ne Iesu ga lok tidi xeretna, “Nemi axap minaba subu basinge ia. I lok ngan Lovoang Kaala i lok keretna,

‘Nenia ne Moroa, anaba sep laradi loklok tatao at laxasipsip, la lubang sipsip dinaba epe-seves.’” *Sak 13:7*

28 \*La ne Iesu ga lok bok tidi, “Ketla melemu at laxakatu kaxat amlong tarak anabamgo rinimi uto Galili.”

\* 14:12: Pas 12:6; 14:20 \* 14:12: Leluxa limixin me Judaia diga lok katling laaleng, diga vas kaxat boro Isip. La di goxo lok li liis (yeast) at lengkongkide atdi. \* 14:18: Sam 41:9 \* 14:24: Sak 9:11; Jer 31:31-34; 1 Ko 10:16; Ib 9:20 \* 14:27: Mk 14:50 \* 14:28: Mt 28:16; Mk 16:7

<sup>29</sup> La ne Pita ga lok tin, “Keke i do nedi axap dina subu basinge u, nenia xopmen tinotno a noxo subu.”

<sup>30</sup> La ne Iesu ga lok tin keretna, “Nia a tong tuturun i ru. Lingina at laxanimin laxaxak kovisi noxo reng gepura la nenu unaba sev apkap naba vantun do uxoklen ia.”

<sup>31</sup> \*Ketla ne Pita ga paase lolos tin, “Do di lok do dina sev amer ia, nenia noxo sok tixirixes u.” La lavaun pinivu axap diga tong box i xuren.

*Iesu Ga Sing To Getesemane  
(Mt 26:36-46; Lu 22:39-46)*

<sup>32</sup> \*La diga rupot to at lara laraamang laasen teren Getesemane, la ne Iesu ga lok ti lavaun pinivu ren keretna, “Mina xis de la ana lok be lising.”

<sup>33</sup> La ni ga lam ka ne Pita, ne Jems la ne Jon, la lainbulu silok ga suxuna lorooro ren.

<sup>34</sup> \*La ni ga lok tidi, “Lorooro rak i umsu mi lainbulu silok la i auret kusu na lox amer ia. Minak lok de la mina kuxut tangais ia.”

<sup>35</sup> La ni ga vas uto vaxalom lixilik la ni ga subu midi mi lemeren uto xopok at laxangka la ga sing ne Moroa do i epovo na lok kepe mo lumumuat naba rupot saparav i ap mo laaleng.

<sup>36</sup> \*Ni ga lok keretna, “Tamak, u epovo una lok lempanga axap. Kereva, i epovo do una lok pes na lumumuat basinge ia. Ketla nemen gat uta mumu asu lavavara rak, una mu asu mun lavavara ram.”

<sup>37</sup> La ni gamlong saparap lavaun pinivu ren la ga ven lenget ka di, diga unga la ni ga lok ti ne Pita, “Simon, tila u unga? Kereva, uxo epovo unap kip na lumumuat eburu minia at loxonaleng lixilik mun? <sup>38</sup> \*Mina reven tatao la mina ngising kusu mi noxo subu at loklok tong pen. Loroonan at laradi i epovo na ronga res, ketla labantuxu ixo lolos.”

<sup>39</sup> La ne Iesu ga vas xakalik manga la ga sing ngan no avot.

<sup>40</sup> La ne Iesu gamlong saparap di, la ga ven lenget ka di, diga unga manga, mila lemerendi ga muat. La di goxoklen i do dina tong toxolinga salai rin.

<sup>41</sup> La ne Iesu gat pas, la ga lok lising la gamlong sepsev avantun la ga lok tidi, “Kereva, move mi unga? I epovo vam. Loxonaleng ira rupot pam do dina song araba ia, Laradi Mevana, ti limixin kakapmek.

<sup>42</sup> Mina xatu. Ata vas tangarang mo laradi na song araba ia, nom boro it pas.”

*Larangtanga Alis At Ne Iesu  
(Mt 26:47-56; Lu 22:47-53; Jo 18:3-12)*

<sup>43</sup> La ne Iesu move ga paase la soso mun ne Judas, lara at lavaun pinivu at ne Iesu ga rupot la buaang nedi luvuttadi diga emu min. Digap kip lemparise sepsep la levempukup sepsep. Lavamaasa silok la luvuttadi loklox ase at Laulis Linga, la loxongkulao silok diga riki di.

<sup>44</sup> Avot ti na, ne Judas ga tong li loklok katling kusu diba ven kibis ne Iesu. Judas ga lok tidi, “Mo lara, nia aba nes i, neni vam ne Iesu. Mina ranga alis i.”

<sup>45</sup> La soso mun ne Judas ga vot pasa ne Iesu la ga lok tin, “Rabai.” La neni ga nes ne Iesu.

<sup>46</sup> La diga vas kaxat la diga ranga alis ka ne Iesu.

<sup>47</sup> La lara at lavaun pinivu ga tu auret la ga rev asu lavarise sepsep teren la ga sep korop kepe labaalung at lasaxaruki at lamaasa gomgo.

<sup>48</sup> La ne Iesu ga lok tidi xeretna, “Tila nimi mi vot de mi levemparise sepsep la levengkonbom sepsep kusu mina ranga alis ia? Nenia xopmen ana vaxaru kaxat ka leesep.

<sup>49</sup> \*Buaang levenaleng nia agat kis to xeneng at loogu laplavang kusu ana anasa limixin, ketla nemi mi goxo ranga alis ka be ia go. Ketla mi

\* **14:31:** Jo 11:16 \* **14:32:** Jo 18:1 \* **14:34:** Jo 12:27 \* **14:36:** Ro 8:15; Ga 4:6; Mk 10:38; Jo 6:38

\* **14:38:** Lu 11:4 \* **14:49:** Lu 19:47; 21:37; Jo 18:20

ranga alis ia xerekngan lavapaase at Lovoang Kaala i tong i.”

<sup>50</sup> La lavaun pinivu ren diga sixiro axap.

<sup>51</sup> La lara laau maxat ga mumu asu ne Iesu, neni ga siga mene lavanga singsiga nunuan. Diga ranga alis i,

<sup>52</sup> ketla neni ga sixiro beleben, ga ke lavanga singsiga ren mila diga rebeng alis ka i.

*Loxongkulao Silok Diga Lok Li Ne Iesu At Lavapaase*

(Mt 26:57-68; Lu 22:54-55,63-71; Jo 18:13-14,19-24)

<sup>53</sup> La diga lam ka ne Iesu uto at lamaasa gomgo. La lavamaasa silok mi loxongkulao silok mi luvuttadi loklox ase at Laulis Linga diga rupot bok.

<sup>54</sup> La ne Pita ga mumu asu ne Iesu ro xa vaxalom lixilik la ga vubeles at lemelua saparap loogu at lamaasa gomgo. La neni gat kis mamain eburu mi luvuttadi rutu mu.

<sup>55</sup> La lavamaasa silok la luvuttadi amgomgo axap diga puse ri tevelinga xaxarang kusu dina xarang taba ne Iesu min la dinaba epovo xusu dina sev amer i, ketla digoxo epovo.

<sup>56</sup> La buaang limixin diga bala raba i, ketla lavapaase atdi goxo sixit eburu.

<sup>57</sup> La melemu lentaba diga xatu kaxat la diga bala raba i xeretna,

<sup>58</sup> \**“Maga ronga levelinga ren keretna, ‘Nenia anaba sele utut kepe na loogu laplavang, no luvuttadi diga vaxaru i. La keneng at lavantun aleng nenia anaba vaxaru kaxat bok tara, luvuttadi di noxo gugu i.’ ”*

<sup>59</sup> La levempapaase atdi move goxo sixit emu.

<sup>60</sup> La lamaasa gomgo ga lok li ne Iesu to kantubu atdi la ga sue i, *“Ua lavasuun teren la uxu vaase? U xopara na vorang na levelinga di sok taba u min?”*

<sup>61</sup> \*Ketla ne Iesu goxo vaase la goxo vorang i rin la lamaasa gomgo ga sue

i, *“Kereva, nenu Lanarong, Nitna ne Moroa, Leeme Avolo?”*

<sup>62</sup> La ne Iesu ga vorang i rin keretna, *“Nenia vam. La nemi minaba ven ia, Laradi Mevana, anabat kis saparap lekngen tino at Lanaraavuk la anaba vot eburu mi lenbantakabu boro vana at laxalibet.”*

<sup>63</sup> La lamaasa gomgo ga lais korop lavanga singsiga ren, la ga lok, *“I paase vupu ri ne Moroa. Keke tevelinga bok ba.”*

<sup>64</sup> \**Mira ronga vam levelinga ren. Nemi mi doma xereva?”*

La diga vorang i do i epovo ne Iesu na met.

<sup>65</sup> La diga xalaubis lemeren la diga lok pe luxatli ren la diga tir i, la diga lok tin keretna, *“Una tong kibis i do nege ip sev u?”* La luvuttadi esep diga lam kaka i la diga pasa box i.

*Pita Ga Sok Tixirixes Ne Iesu*  
(Mt 26:69-75; Lu 22:56-62; Jo 18:15-18,25-27)

<sup>66</sup> La ne Pita gak lok to xamang at lemelua la lara loono maxat ga rupot, neni lasaxaruki at lamaasa gomgo.

<sup>67</sup> Neni ga ven ne Pita gat kis mamain la ga ven tooro i la ga lok, *“Nenu bok ugak lok eburu mi ne Iesu me Nasaret.”*

<sup>68</sup> Ketla ne Pita ga lok, *“Nia axoklen lavanga salai u paase min.”* La ni gat pas uto at loxot povolo at lemelua.

<sup>69</sup> La melemu nom loono ga ven manga ne Pita la ga lok ti luvuttadi diga tu go, *“Neni nom, lara at lavaun pinivu at ne Iesu.”*

<sup>70</sup> La ne Pita ga sev apkap manga.

La melemu lentaba diga tu saparap ne Pita, diga lok tin keretna, *“I ruturun, nenu lara atdi mila nenu bok boro Galili.”*

<sup>71</sup> La ne Pita ga vangpe mi levelinga vangpangpe xeretna, *“Levelinga rak i ruturun. Do xopmen, ne Moroa na lox asongor ia. Nia axoklen mo laradi.”*

\* 14:58: Jo 2:19-21

\* 14:61: Mk 15:5; Lu 23:9

\* 14:64: Jo 19:7

\* 14:72: Mk 14:30



<sup>72</sup> \*La soso mun laxaxak ga reng sepsev agepura. La ne Pita ga doma asu at lavapaase at ne Iesu ga lok keretna, “Laxaxak kovisi noxo reng gepura, la nenu unaba sev apkap naba sev avantun do uxoklen ia.” La ne Pita gang teng.

## 15

*Paelat Ga Susue Ne Iesu*  
(Mt 27:1-2,11-14; Lu 23:1-5; Jo 18:28-38)

<sup>1</sup> \*Ga maxantamak suubu lava-maasa silok mi loxongkulao silok la luvuttadi loklox ase at Laulis Linga, nedi lavaeme silok axap diga rupot eburu la diga epaase mumu ne Iesu. La diga xoxo alis lukngen la diga lam taba ne Paelat min.

<sup>2</sup> La ne Paelat ga sue ne Iesu xeretna, “Nenu loorong at limixin me Judaia?”

La ne Iesu ga vorang i rin keretna, “I ruturun. Nenu xa ura tong pam i.”

<sup>3</sup> La lavamaasa silok diga sok taba i mi laxalinga buaang.

<sup>4</sup> La ne Paelat ga sue box i xeretna, “Kereva, u xopara na vorang levelinga atdi? Una ronga ba di, di sok taba u mi laxalinga solo.”

<sup>5</sup> \*Ketla ne Iesu xopmen goxo vorang levelinga atdi la ne Paelat ga sangu aleng.

*Limixin Diga Lok,*  
*Paxarem I At Laxaba*  
(Mt 27:15-26; Lu 23:13-25; Jo 18:39-19:16)

<sup>6</sup> At levenmaares axap laradi gomgo boro Rom ga mu asu lara loklok. At leluxa silok at Lovovolo Pe, neni gak soxomus asu lara laradi xokoxo do limixin diga lok katling i.

<sup>7</sup> La lara laradi, laasen teren ne Barabas gak lok to at loogu xokoxo. Ganoxa neni mi luvuttadi vetpes diga esep eburu mi luvuttadi esep kusu dina lok kepe lagavaman, la neni ga sev amet lentaba.

<sup>8</sup> La limixin ap mo leluxa diga rupot pasa ne Paelat kusu neni na

lox asu tara taradi gak lok to at loogu xokoxo.

<sup>9</sup> La ne Paelat ga sue di, “Mi vara i do nenia na lox asu loorong atnemi limixin me Judaia?”

<sup>10</sup> Paelat gaklen i do lavamaasa silok diga reven peves at ne Iesu la ni lavasuun teren la diga vara i do dina sev amer i.

<sup>11</sup> \*Ketla lavamaasa silok diga lox axatu levendoxoma at limixin kusu dina sing ne Paelat do neni na lox asu ne Barabas.

<sup>12</sup> La ne Paelat ga sue di, “La nia ana lok lavanga salai mi na laradi mi so asen i mi loorong at limixin me Judaia?”

<sup>13</sup> La digap kup silok tin xeretna, “Paxarem i at laxaba.”

<sup>14</sup> La ne Paelat ga sue bok, “Tila? Neni ga lok laxakapmek salai?”

Ketla digap kup silok aleng keretna, “Paxarem i at laxaba.”

<sup>15</sup> Kuren la ne Paelat ga mu asu lavavara atdi la ga lox asu raba di mi ne Barabas. Ketla neni ga raba ne Iesu ti luvuttadi esep kusu dinak paxis i la dina vaxarem i at laxaba.

*Luvuttadi Esep Diga Lok Kalise Ne Iesu*

(Mt 27:27-31; Lu 23:11; Jo 19:2-3)

<sup>16</sup> La luvuttadi esep diga lam ka ne Iesu uto at loogu nunuan at laradi gomgo la diga ro bubua ka nedi axap luvuttadi esep.

<sup>17</sup> La diga vaxasiga i mi lavanga singsigaara at loorong la diga lok lixiam tin mi laban gagas la diga vaxaxua lavatlak teren min. Diga lok mo lempanga xusu ti saba xangka i.

<sup>18</sup> La diga lok keretna, “Ma lok ngangao ram loorong at limixin me Judaia.”

<sup>19</sup> La digak paxis patlak aleng i mi lakdak la diga vubis sanga i. La diga xis tiktikbu mi lempatgulom atdi la diga emi asu sese min.

<sup>20</sup> Diga lok kalise axav i la diga lok pes lavanga singsigaara basinge i la diga vaxasiga manga i mi lavanga singsiga xa ren. La diga sat ka i

basinge mo loogu silok kusu dina vaxarem i at laxaba.

*Diga Vaxarem Ne Iesu*

*At Laxaba*

(Mt 27:32-44; Lu 23:26-43; Jo 19:17-27)

21 \*La lara laradi, laasen teren ne Simon me Sairini, neni temen ne Aleksanda mi ne Rupas, la neni gat pas boro at lemenemen petpes la luvuttadi esep diga sox aruru parang i xusu na xip ka laxaba at ne Iesu.

22 La diga lam ka ne Iesu uto at lenep, loxonasen kot go do Golgata. Lavasuun at na loxolinga do, "Lavatlak Tongan."

23 La diga lok do dina raba i mi lavaen diga lok eburu mi lara laxadan mamao di tong i do mur,\* ketla ne Iesu goxopara i.

24 \*La diga vaxarem i ro vana at laxaba la melemu diga lu buru mi lengkkuat kusu ti lok kisip ka nege ba lok ka lempanga singsiga ren.

25 Diga vaxarem ne Iesu ga maxantamak at lavasik konaleng.

26 To mavana at lavatlak teren diga lok li levelinga, mo ga tong asu lavasuun at lumumuat teren. Nom levelinga ga lok keretna, LOORONG AT LIMIXIN ME JUDAIA.

27 La diga vaxarem bok legepu radi xipkip pilo saparap ne Iesu, lara saparap lekngen tino la lara saparap lekngen kia.

28 \*[Levelinga at ne Aisaia, leeme vapaase ali at ne Moroa ga ravasu ruturun keretna, "Limixin diga doma i do neni bok laradi xapmek."]

29 \*La limixin digat pas polo go la diga piripat lempatlak atdi la diga paase aksaksa ri ne Iesu xeretna, "Nenu ga lok do unaba sele utut kepe loogu laplavang la unaba vaxaru amu box i at lavantun aleng,

30 una eng si ukopok la una lox aroo axa u."

31 La kerepmo bok lavamaasa silok mi luvuttadi loklox ase at Laulis Linga diga paase aksaksa. Diga lok keretna, "Neni ga lox aroo lentaba vetpes, ketla neni ixo epovo do na lox aroo axa i.

32 Mo do neni Lanarong at ne Moroa la loorong at limixin me Israel, neni na eng si ukopok la nedik ataba nunu ba ren." Luradi duga merem saparav i, nedu bok duga paase rin mi laxalinga xapmek.

*Lanmet At Ne Iesu*

(Mt 27:45-56; Lu 23:44-49; Jo 19:28-30)

33 \*At lasangaun mi legepu xonaleng, laxangking ga xis tubu la lamain ga vung pavaa mo lenep silok axap la gak lok se at lavantun konaleng.

34 \*La at lavantun konaleng ne Iesu ga xup silok keretna, "Eloi, Eloi, lama sabaktani!" Lavasuun at na levelinga xeretna, "Moroa rak, Moroa rak, tila u raba rulu ia?"

35 Lentaba luvuttadi diga tu go, diga ronga i la diga lok, "Ata ronga i, neni i toro ri ne Elaisa."

36 \*La lara laradi ga sixit, la ga lok ka loxontamon la ga lox amlu xaka i ro xeneng at lavaen mamao la ga xoxo li i ro at loxonuna la ga lok do na vaxain ne Iesu min, la ga lok keretna, "Ata ven be i do ne Elaisa go naba rupot ti lok tooro i."

37 La ne Iesu ga xup silok la ga met.

38 La ap mo loxonaleng lavattamon silok ga merem to xeneng at loogu laplavang ga rem lais ka ro vana, ga su ro xopok la ga ra ngan ta legepu ban. 39 La laasesep ga tu go xopok to melamgo at ne Iesu ga ronga luxupkup teren la ga ven lanmet teren. Kuren la neni ga lok, "Neni lamdak tuturun pam at ne Moroa."

40 \*Lentaba lavakin mo diga tu ro vaxalom diga reven lanmet at ne

\* 15:21: Ro 16:13 \* 15:23: Lentaba di lok do anai ni lara la marasin kusu ti lok pes losongsongot.

\* 15:24: Sam 22:18 \* 15:28: Ais 53:12 \* 15:29: Sam 22:7; 109:25; Mk 14:58 \* 15:33: Amo 8:9

\* 15:34: Sam 22:1 \* 15:36: Sam 69:21 \* 15:40: Lu 8:2-3

Iesu. Levenasen atdi, Maria Magdalene, Maria nenen ne Jems kakalik mi ne Joses la ne Salomi.

<sup>41</sup> Ganoxa nedi diga mumu asu ne Iesu ap mo levenaleng neni ga nemen to Galili la diga lok tooro i. Lavakin petpes bok mo diga mumu asu ne Iesu uto Jerusalem.

### *Digak Mit Ne Iesu*

*(Mt 27:57-61; Lu 23:50-56; Jo 19:38-42)*

<sup>42</sup> Mo laaleng Iesu ga met teren, ni laaleng gagas, la laaleng avot ti laaleng kaala.

<sup>43</sup> Ga ukantinao Josep me Arimatia neni lara at lavaeme silok at limixin me Judaia la neni ga ngangais ti Linintoo at ne Moroa. Neni goxo marat la ga vot pasa ne Paelat la ga sing i do neni na raba i mi labantuxu at ne Iesu.

<sup>44</sup> La ne Paelat ga sangu do ne Iesu gara met pam. La neni ga ro ka laasesep teren la ga sue i dola ne Iesu ira met pam kopla kopmen.

<sup>45</sup> La mo laasesep ga tong i rin do mo levelinga i ruturun. La ne Paelat ga siam ta do ne Josep na lok ka labantuxu at ne Iesu.

<sup>46</sup> La ne Josep ga lok ka labantamon maxat la ga lox asi labantuxu at ne Iesu ukopok, la ga bom i mi nom labantamon. La diga lok li i ro xeneng at lamaaut, no diga xe i ro xeneng at lavaruat silok. La ne Josep ga xavun pe lumusmaragu at lamaaut mi lavaruat.

<sup>47</sup> La ne Maria Magdalene mi ne Maria nenen ne Joses duga ven katling mo loxot, lamaaut at ne Iesu gak lok teren.

## 16

### *Lorooro Xat Amlong*

#### *At Ne Iesu*

*(Mt 28:1-8; Lu 24:1-12; Jo 20:1-10)*

<sup>1</sup> Se laaleng kaala ga xap, Maria Magdalene, Maria nenen ne Jems la ne Salomi diga un kaka laxadan somavak kusu dina lok li i at labantuxu at ne Iesu.

<sup>2</sup> Ga maxantamak suubu at laaleng avot ap mo luik, laxangking ga losu la nedi lavakin digat pas uto at lamaaut at ne Iesu.

<sup>3</sup> Diga esue xeretna, “Nege naba xavun kepe lavaruat mo ik lok pe lungusungus ap mo lamaaut?”

<sup>4</sup> Se diga rupot go, diga milik upana la diga ven i do lara ga xavun kepe vam mo lavaruat silok basinge lamaaut.

<sup>5</sup> Diga vubeles at lamaaut, la diga ven lara laradi maxat, levesingsigaara ren ganbun aleng la neni gat kis at lenep tino la diga lingun teren.

<sup>6</sup> La neni ga lok tidi xeretna, “Nemen gat mita marat. Mi puse ri ne Iesu me Nasaret no ga rem at laxaba. Ketla neni ira roo xat pam. Mina ven loxot diga vaxamdi i ren, neni xopmen nak lok bok ba de.

<sup>7</sup> \*Mina onon la mina vot pasa ne Pita mi lavaun pinivu at ne Iesu la mina tong i ridi do ne Iesu iramgo vam tidi uto Galili. La dina mumu asu i la dinaba ven i ngan neni ga tong pam i ridi.”

<sup>8</sup> La nom lavakin diga dede la diga rangku mi lanmarat la diga sixisu boro xeneng at lamaaut la diga sixiro. La di goxo tong na lavanga ti tara mila diga marat.

### *Maria Magdalene Ga Ven Ne Iesu*

*(Mt 28:9-10; Lu 24:10-11; Jo 20:11-18)*

<sup>9</sup> \* [La ne Iesu ga roo xat amlong at laaleng avot ap mo luik. La ne Maria Magdalene ga ven avor i, ganoxa ne Iesu ga riki xepe lavanuti lubunggas basinge i.

<sup>10</sup> \* La ne Maria gamlong la ga vot pasa nedi diga mumu asu ne Iesu. Diga duudu la digang teng mumu ne Iesu la ne Maria ga tong i ridi do neni ga ven pam ne Iesu.

<sup>11</sup> At loxonaleng diga rongga i nom, di goxo nunu do ne Iesu mo ga roo xat pam la ne Maria ga ven i.

\* 16:7: Mt 26:32; Mk 14:28 \* 16:9: Lu 8:2 \* 16:10: Mt 28:10

*Lavaun Pinivu At Ne Iesu Diga Ven* aruturun lavapaase atdi mi lem-  
 I (Lu 24:13-35) panga sangsangu.]

<sup>12</sup> La melemu legepura at lavaun pinivu at ne Iesu dugat pas uto at lara lemenemen la duga ven ne Iesu ga ruuna levereven petpes.

<sup>13</sup> La melemu dugamlong la duga tong i ri lavaun pinivu ren, ketla di goxo nunu atdu.

<sup>14</sup> \*La melemu ne Iesu ga vot pasa lasangaun mi legesara lavaun pinivu ren at loxonaleng diga anan. La neni ga vaase sok di mila lununu atdi goxo lolos la di goxo nunu atnedi diga ven pam i.

<sup>15</sup> \*La neni ga lok tidi xeretna, “Mina onon uto at levengkot axap at na lavatbung menemen la mina tong asu Lagale Lavavang tarak ti limixin axap.

<sup>16</sup> \*Dola tara na nunu at Lagale Lavavang tarak la na lok ka lesep susu, neni naba roo su. Dola tara noxo nunu at Lagale Lavavang tarak, neni naba seeve.

<sup>17</sup> \*Nedi di nunu at Lagale Lavavang tarak, Moroa naba raba di mi leveloklok katling keretna. At laasen tarak dinaba riki xepe lubanggas basinge limixin. La dinaba paase mi levempapaase vetpes.

<sup>18</sup> \*La dinaba rebeng kaka levesii xapmek la limixin dinaba sep sak di, ketla di noxo meres la di noxo met, la dinaba lok li levengkikngen di at limixin mekmeres la nom limixin dinaba lox avukat.”

*Moroe Ga Lam Ka Ne Iesu*  
 (Lu 24:50-53; Gu 1:9-11)

<sup>19</sup> \*Se Leeme Silok ne Iesu ga vaase axap, Moroe ga lam ka i uto vana at laxalibet la neni ga xis saparap lekngen tino at ne Moroe.

<sup>20</sup> \*La lavaun pinivu ren diga vas kaxat la diga tong asu Lagale Lavavang to at levengkot axap la Leeme Silok ga gugu eburu midi la ga lox

\* 16:14: 1 Ko 15:5 \* 16:15: Gu 1:8 \* 16:16: Gu 2:38 \* 16:17: Gu 2:4; 8:7; 10:46 \* 16:18: Lu 10:19; Gu 28:3-6 \* 16:19: Gu 2:33-34 \* 16:20: Gu 14:3; Ib 2:3-4

**Luk**  
**Lagale Lavavang At Ne**  
**Iesu Karisito**  
**Luk Ga Malagan i**  
**Levelinga Loklox**  
**Axasep**  
**Levenmaares 59–60 A.D.**

Luk goxo ven leven gugu at ne Iesu mi luxatli ren, ketla neni ga puse lolos mumu lorooro at ne Iesu. Kuren la neni ga lok ka lakleklen boro atnedi diga ven ne Iesu. Neni ga malagan na lubuk Luk la Leven Gugu At Luvuttadi Vavang uto ri ne Tiopilas, neni lentangas atdi xeneng at lununu atdi parap ne Iesu. (Luk neni boro Grik). Neni ga vara i do ne Tiopilas na xasep nunuan mumu ne Iesu la leven gugu ren. Luk neni laradi loklok tooro at levenanmeres la ga nemen eburu mi ne Pol at lentaba levenaleng. Luk gaklen avukat la ga malagan mumu labalamu at ne Iesu tinedik getgesara. Neni ga malagan bok mumu levenanasa at ne Iesu, leemi asu ri ne Moroa, la lolos at Loroonan Kaala, la lising la luvuttadi banbalo la luvuttadi apnovos.

**Lengkot silok keneng at na lubuk**

1:1-4 Lavapaase Axasep

1:5-2:52 Livipisik at ne Iesu

3:1-22 Jon laradi sep susu limixin ga gugu.

3:23-38 Leretere at lavalabat at ne Iesu.

4:1-13 Satan ga lok tong pen ne Iesu.

4:14-9:50 Iesu gat pas tangtagap la ga vavang to Galili.

9:51-19:27 Iesu gat pas uto Jerusalem.

19:28-22:38 Levenanasa at ne Iesu.

22:39-23:56 Larangtanga alis la lanmet at ne Iesu.

24:1-53 Laxakatu kaxat amlong at ne Iesu.

*Lavapaase Axasep*

<sup>1</sup>\*Saparap leeme silok, ne Tiopilas.

Buaang nedi limixin diga lok tong i do dina malagan levelinga at lempanga ne Moroa ga lox i xantubu atnama at lukngen ne Iesu.

<sup>2</sup>\*Diga malagan ali lugugu at ne Iesu, mo maga ronga i boro atnedi diga ven na lempanga at lavakpaxaru kaxat teren, la diga tong asu na Lagale Lavavang.

<sup>3</sup>La nenia bok agara sue avukat ka vam levelinga mumu lorooro axap at ne Iesu. Kuren la a doma i do i lox avukat kusu ana malagan akmokso lempanga ne Iesu ga lox i.

<sup>4</sup>Ak lox i na kusu unaba xasep avukat ap mo levelinga uga ronga vam i mumu ne Iesu.

*Laangelo Ga Vaase Asu Lovotpot At Ne Jon Laradi Sep Susu*

<sup>5</sup>\*Ap mo levenaleng loorong ne Erodes gam gomgonga ro at lenep silok Judaia. Lara lamaasa, laasen teren ne Sakaria, neni lara atnedi lavamaasa diga nemen keneng at lara loxonbinam tadi, laasen ap mo loxonbinam tadi ne Abaisa. Latkin teren, laasen teren ne Elisabet. Neni eburu mi ne Sakaria boro at livisik li at lamaasa megano ne Aron.

<sup>6</sup>Nedu buru duga nemen manmanton at lemeren ne Moroa, la duga mumu asu amisik levelinga at ne Moroa, la leventaangas bok teren.

<sup>7</sup>Ketla du goxo ruuna taxamdak, mila ne Elisabet goxo pisik, la nedu lenasun dugak sokso nga.

<sup>8</sup>At lara laaleng libinam tadi at ne Sakaria digak lok to at loogu laplavang kusu dina lok lugugu atdi at lemeren ne Moroa, la ne Sakaria bok ga gugu.

<sup>9</sup>\*La diga soxolik ka i xusu na xotos levempavaxan una i so mavak to xeneng at Loxot Kaala at loogu laplavang. Diga soxolik ka i mi lara loklok at leme Judaia. Lavamaasa diga lu buru mi levenuat, la luuat at ne Sakaria ga subu avot at laxangka.

\* 1:1: Gu 1:1 \* 1:2: Jo 15:27 \* 1:5: 1 Let 24:10 \* 1:9: Pas 30:7

<sup>10</sup> At loxonaleng ti xotos levempavaxan una i so mavak, neni ga beles uto xeneng at Loxot Kaala at loogu laplavang at ne Moroa ti lok mo lavanga to at loxonin laplavang. Limixin lotu diga nemen to maxamang, diga ngising.

<sup>11</sup> La lara laangelo at ne Moroa ga rupot saparav i, ga tu ro at lenep tino ap mo loxonin laplavang, Sakaria ga xotos levempavaxan una mavak e.

<sup>12</sup> Ni ga ven laangelo la ni ga lingun la ga umsu mi lanmarat.

<sup>13</sup> Ketla laangelo ga lok tin, "Sakaria, nemen uta marat, Moroa ira ronga vam levesingising taram, la latkin taram ne Elisabet naba visik tamdak tu. Unaba so asen i mi ne Jon.

<sup>14</sup> Nenu unaba momo la una sosoro aleng, la buaang bok nedi dinaba momo aleng mo do latkin taram na visik tamdak,

<sup>15</sup> \*mila neni naba silok tinotno at lemeren ne Moroa. Nemen mo lamdak guta inin taxadan vaen la taxadan lolos. Ap mo laaleng nenen na visix i, neni naba umsu mi Loroonan Kaala.

<sup>16</sup> Neni naba sat ka amlong buaang nedi limixin me Israel saparap ne Moroa, Leeme Silok atdi.

<sup>17</sup> \*Neni nabamgo ri Leeme Silok, mi Loroonan Kaala la lolos, i ngan leeme vapaase ali ne Elaisa. Neni naba vaxaxis etangas avukat lavatlok eburu mi laxamdak atdi kusu lavatlok dinaba balamu laxamdak atdi. Neni naba ba gili levendoxoma at limixin tongtonga xepe kusu dina rebeng kaka lodoxoma manmanton. Neni naba lox agagas limixin at ne Moroa kusu dinaba gagas tangais Leeme Silok."

<sup>18</sup> \*Sakaria ga lok ti laangelo, "Abaklen i xereva do levelinga ram i ruturun? Mila nia laradi asioxo la latkin bok tarak neni iak sokso vam."

<sup>19</sup> \*Laangelo ga lok tin, "Nenia ne Gabriel. A tu amisik to saparap ne Moroa, mo i sak tiki ia xusu ana

vaase tu, la ana tong asu i na levelinga nunuan tu.

<sup>20</sup> \*Ketla uxu nunu at levelinga rak, mo naba soorun at loxonaleng ne Moroa ga vaase ali vam i ren. Kuren la na u noxo epovo una paase, se ap mo laaleng na lavapaase ali rak naba soorun."

<sup>21</sup> Ap mo mene loxonaleng mo limixin diga ngangais ti ne Sakaria, digam doma mumu i do laai mo ni ga lox angtang min to xeneng at Loxot Kaala at loogu laplavang.

<sup>22</sup> Se neni ga vas su ukamang, ni goxo epovo na vaase rinedi. Kuren la digaklen i do, ni mo ga ven pam lisilimet to xeneng at Loxot Kaala. Ni ga lok mun leveloklok poovo rinedi mi lukngen. Move ni goxo epovo kusu na vaase.

<sup>23</sup> Se neni ga lox axap mo lugugu ren to at loogu laplavang, neni gamlong uto xolonu.

<sup>24</sup> Melemu latkin teren ne Elisabet ga renan, la ni ga nemen tino go at loogu ren at lavalimo gaaling.

<sup>25</sup> \*Ni ga lok, "At na bai la ne Moroa ira balamu ba ia at na langas. Nia aga lok mamangan mila a goxo pisik, ketla a renan ta la lainmangan tarak ira xap pam."

### *Laangelo Ga Vaase Asu Livipisik At Ne Iesu*

<sup>26</sup> At lagaaling sepsev avanna at lereterenan at ne Elisabet, Moroa ga sak tiki laangelo ren, ne Gabriel uto Nasaret, lara lemenemen to at lenep silok Galili.

<sup>27</sup> \*Ni gat pas mi levelinga ti lara loono maxat laasen teren ne Maria, mo diga lok katling i xusu naba epot at lara laradi laasen teren ne Josep, at livisik li at ne Devit, loorong megano.

<sup>28</sup> Laangelo ga rupot saparap ne Maria la ga lok tin, "Lenmila na nemen eburu minu! Moroa i nemen eburu minu, la i vara aleng u la ni naba lox anarong u."

\* **1:15:** Kex 6:3 \* **1:17:** Mal 3:1; 4:5-6; Mt 17:11-13 \* **1:18:** Lur 18:11 \* **1:19:** Dan 8:16; 9:21; Ib 1:14 \* **1:20:** Lu 1:45 \* **1:25:** Lur 30:23 \* **1:27:** Mt 1:16,18; Lu 2:5

29 Maria ga lingun ap mo levelinga at laangelo, la gam doma mumu lavasuun ap mo levelinga.

30 Ketla laangelo ga lok tin, “Maria, nemen uta marat, mila ne Moroa ira lok momo vam minu.

31 \*Unaba renan la unaba visik tamdak, la unaba so asen i mi ne Iesu.

32 \*Neni naba silok aleng la neni naba ruuna na laasen do lamdak at Leeme Avolo ne Moroa. Moroa naba vaxaxis i ngan loorong, i ngan lara ren ne Devit, neni loorong megano.

33 \*Neni naba nemen amisik ngan loorong at livipisik li at ne Jakop la lixitkis orong teren noxo xap!”

34 Maria ga lok ti laangelo, “Nenia kopmen ana epot! Naba lok kereva na?”

35 \*Laangelo ga lok tin, “Loroonan Kaala naba vot saparav u, la lolos at Leeme Avolo ne Moroa naba los kis taram. Kuren la nom Lamdak Melemelengan dinaba so asen i do Nitna ne Moroa.

36 Una doxoma lara ram ne Elisabet. Diga tong i do ni noxo visik, ketla neni xa i vanna nga leven gaaling teren, keke i do neni ira sioxo vam.

37 \*Kopmen tempanga na lolos saparap ne Moroa kusu ni na lox i.”

38 Maria ga lok, “Nia mun lasaxaruki at Leeme Silok ne Moroa, i epovo do na lavanga na rupot saparav ia, i ngan ura tong pam i.” La laangelo ga on basinge i.

#### *Maria Ga Vot Pasa Ne Elisabet*

39 Melemu at lentaba levenaleng Maria ga lox agagas, la ni gat pas soso uto at lengkong kaana at lara lemenemen gak lok to at lenep kangka Judaia.

40 Ni ga vubeles uto xeneng at loogu at ne Sakaria la ga vaase momo ri ne Elisabet.

41 \*Ga se ne Elisabet ga ronga mo levelinga at ne Maria, lamdak ga

xuluxut to xeneng at lebelen. La ne Elisabet ga umsu mi Loroonan Kaala,

42 \*la ni ga vaase silok keretna, “Nenu loono u umsu mi loklox anarong tinedi lavakin axap, la nom lamdak nenu uba visix i, Moroa naba lox anarong i!

43 Tila ba la nenen Leeme Silok tarak ira vot pasa ia, nenia latkin gamasa mene?

44 Ap mo loxonaleng u paase ria, la lamdak na xeneng at labalak i xuluxut mi lososoro.

45 \*Moroa naba lox anarong u mila uga nunu do levelinga at ne Moroa naba soorun!”

#### *Livikpixan Emi Asu At Ne Maria*

46 \*Maria ga lok,

“Nenia a emi asu mi Leeme Silok ne Moroa.

47 Lorooro axap tarak i umsu mi lomomo mila ne Moroa neni Laradi Loklox Arooro rak,

48 \*la neni ira doxoma su vam tarak, latkin gamasa mun. La nenia lasaxaruki ren. Limixin axap dinaba rupot melemu dinaba tong i do ne Moroa ga lox anarong ia,

49 mila Lanaraavuk ne Moroa ira lok pam na lavanga silok tia. Laasen teren i melemelengan.

50 \*I lox asuusu labalamu ren tinedi di lok ngangao ren at laraola axap.

51 \*Neni ik lok lempanga silok, la i utut tereve levendoxoma at limixin di lox asilok nedi.

52 \*Ni ik lox asi lavaorong basinge lixitkis orong atdi, la ik lox asilok limixin etaba.

53 \*I suxa umsu limixin dik pakes mi lempanga nunuan, la ik tiki limixin dip novos la dit pas la kopmen bok ba tempanga dina ruuna i.

54 \*Ni ga doxoma lavapaase ali ren ga lox i rinedi lavalabat atdik, la ira lok tooro lubang mixin teren me Israel, nedi lavasaxaruki ren.

\* 1:31: Ais 7:14; Mt 1:21-23 \* 1:32: 2 Sml 7:12,13,16; Ais 9:7 \* 1:33: Dan 7:14; Mai 4:7 \* 1:35: Mt 1:20 \* 1:37: Lur 18:14 \* 1:41: Lu 1:15 \* 1:42: Lal 28:4 \* 1:45: Lu 1:20 \* 1:46: 1 Sml 2:1-10 \* 1:48: Lu 1:25; 11:27 \* 1:50: Sam 103:13,17 \* 1:51: 2 Sml 22:28 \* 1:52: Jop 12:19; 5:11; Sam 147:6 \* 1:53: 1 Sml 2:5; Sam 34:10; 107:9 \* 1:54: Ais 41:8; Sam 98:3 \* 1:55: Mai 7:20; Lur 17:7; 18:18; 22:17

55 \*La i lox asuusu amisik labalamu ren kerekngan ni ga lok lavapaase ali ren ti lavalabat atdik la ti ne Abaram, la ti livipisik li bok teren.”

56 Maria ga nemen eburu mi ne Elisabet at lavantun gaaling axap la melemu neni gamlong bok ba uto xolonu ren.

### *Elisabet Ga Visik Ne Jon Laradi Sep Susu*

57 Laaleng ga vot nga kusu ti ne Elisabet na ranga madak, la ni ga visik lamdak temes.

58 Lentaba no diga nemen saparav i la libibinat teren diga rongga i do ne Moroa ga lok loklox avukat aleng tin. Kuren la diga lok momo aleng eburu mi ne Elisabet.

59 \*Ga at laaleng sepsev avanuan digat pas kusu dina ven ne Sakaria na vit kepe loxontuxu at lamdak teren. Diga lok do dina so asen i mi ne Sakaria, laasen at ne temen.

60 \*Ketla nenen ga lok, “Kopmen! Laasen tin ne Jon.”

61 La diga lok tin, “Ketla kopmen tara at libibinat atnumu i ruuna nom laasen!”

62 Kuren la diga lok loklok poovo ti ne Sakaria, kusu dina sue i do ua laasen mo lamdak naba ruuna i.

63 Sakaria ga sing ti tovoang malmalagan la ni ga malagan keretna, “Laasen teren ne Jon.” La nedi axap diga sangu.

64 Ap mo mene loxonaleng Sakaria ga lox epovo manga i kusu na paase, la ni ga emi asu mi ne Moroa.

65 La mo limixin diga nemen saparav i diga sangu aleng, la lava-paase mumu i na lavanga ga epe-seves keneng at lengkot axap at lengkong kaana at lenep silok Judaia.

66 Nedi axap getgesara diga rongga i na, la digam doma mumu i la diga esue xeretna, “Anaa lamdak naba lok kereva?” Diga paase xerepmo

mila digaklen i do lolos at ne Moroa ga nemen eburu min.

### *Lavapaase Ali At Ne Sakaria*

67 Temen ne Jon ga umsu mi Loroo-nan Kaala, la ni ga vaase mi levelinga at ne Moroa,

68 \*Ata emi asu mi ne Moroa, Leeme Silok me Israel! Ga vot ti sox-omus asu limixin me Israel at loxokoxo at ne Satan.

69 \*Ni ga gagas li laradi lolos i ngan Laradi Loklox Arooro ridik, neni livisik li at ne Devit, laradi gugu ren.

70 Gano migomgo at lavaeme vappaase ali ren, neni ga tong i na.

71 \*Ga paase ali xusu na lox arooro dik basinge nedi dik lok munepen midik la basinge di, di belengatngas tidik.

72 \*Ni ga lox empana lavapaase ali ren ni ga lox i ri lavalabat atdik la kerepmo ga lox asuusu labalamu ren tidi.

73 \*Ni ga lok lavapaase ali ruturun ti ne Abaram, lamgomgo at lavalabat atdik,

74 la ga xaape do ni naba lox asepsu dik basinge limixin dik lok munepen midik, la na lok tooro dik kusu ataba epovo, la tanap kip mo lugugu ren la kopmen dik taxo marat.

75 \*At levenaleng axap at lorooro atdik, atap kip lugugu ren mi loklok i nunuan aleng la in manton tino.

76 \*La nenu lamdak tarak, unaba ruuna na laasen, laradi vappaase ali at Leeme Avolo. Mila unabam gomgo ri Leeme Silok kusu unaba gagas li langas tin.

77 \*La unaba tong i ri limixin teren do neni naba lox arooro di la neni naba doxoma xepe laxakapmek atdi.

78 \*Neni naba lox i na mila ne Moroa atdik i umsu mi lebelen tuntun la loklox anare. Kuren la ni naba riki asi Lanarong teren kusu na ravasu ude ri na lavatbung menemen ti lox arooro limixin.

\* 1:59: Lur 17:12; Mas 12:3; Lu 2:21 \* 1:60: Lu 1:13 \* 1:68: Sam 41:13; 72:18; 106:48; Lu 7:16

\* 1:69: Sam 18:2 \* 1:71: Sam 106:10 \* 1:72: Lur 17:7; Mas 26:42; Sam 105:8-9; 106:45 \* 1:73:

Lur 22:16-17; Mai 7:20 \* 1:75: Ta 2:12-14 \* 1:76: Ais 40:3; Mal 3:1; Mt 3:3 \* 1:77: Jer 31:34

\* 1:78: Ais 60:1-2 \* 1:79: Ais 9:2; 58:8; Mt 4:16



79 \*La ni naba lok ngan laxasep tinedi limixin di nemen keneng at lamain la tinedi bok dik lok maxopok at lamamau at lanmet. Neni naba sat lavatpas atdik ti langas at lumulum.”

80 \*Jon ga sisilok la luruptuvuk teren ga nunuan aleng. Ni ga nemen to at lamatbin se at laaleng neni ga vor asuvos tinedi limixin me Israel.

## 2

### *Livipisik At Ne Iesu (Mt 1:18-25)*

1 Ap mo levenaleng ne Kaisar Ogastas ga lox aonon lavapaase axasep tinedi limixin digak lok maxopok at lagavaman boro Rom kusu dina malagan amaxat ka levenasen atdi.

2 Kuirinias ga neni laradi gomgo ri lenep silok Siria, ap mo laaleng na lugugu ti lok ka asen ga vot.

3 Nedi limixin getgesara digat pas ti levenmenemen axa atdi kusu dina lok li levenasen atdi.

4 La ne Josep ga nemen at lemenemen Nasaret at lenep silok Galili. Ni ga ronga na levelinga la at lara laaleng ni ga vas kaxat uto at lemenemen, laasen teren, Betilem, mo gak lok at lenep silok Judaia; mo lemene- men at loorong ne Devit. Josep gat pas ugo, mila neni livisik li at ne Devit,

5 \*La kusu ni na lok li laasen teren eburu mi ne Maria, mo diga lok katling i xusu naba epot at ne Josep. Neni ga balan madak.

6 La nedu duga rupot to Betilem, la laaleng ga vot nga kusu ne Maria na visik lamdak teren.

7 \*La ni ga visik lamdak temes avot teren, la ga bom i mi leventamon la ga vaxamdi i ro at loxot anan at laxanbulumaxao, mila goxopmen toxot tidu ri nemen to at loogu mikmidi.

### *Luvuttadi Loklok Tatao Sipsip Mi Lubung Angelo*

8 Ap mo laxanimin lentaba luvuttadi loklok tatao sipsip diga nemen

ap mo lenep, digak lok tatao levesip- sip atdi.

9 La laangelo at Leeme Silok ne Moroa ga vot saparap di, la lisisixam at ne Moroa ga so axasep nedi la ga vung kamit mo loxot axap. La diga marat aleng tinotno.

10 Ketla laangelo ga lok tidi, “Nemen mita marat! Nenia ana tong lagale lavavang tinimi, mo naba lox amomo limixin axap. 11 Lingina at na laaleng to at lemenemen at ne Devit, Laradi Loklox Arooro atnimi dira visik pam i. Neni Lanarong la Leeme Silok!

12 Loklok katling at na lavanga i lok keretna. Minaba long lenget ka lumumulum di bom i mi leventamon la ik midi ro at loxot anan at laxanbulumaxao.”

13 La soso mun, buaang nedi lubung angelo boro vana at laxalibet diga vot eburu mi mo laangelo, diga emi asu saparap ne Moroa. Diga lok keretna,

14 \* “Leemi asu ri ne Moroa ik lok to vana at laxalibet, la lumulum at ne Moroa nak lok at na lavatbung menemen tinedi ne Moroa i momo midi.”

15 La lubung angelo diga on basinge di, la digamlong manga uto vana at laxalibet, la luvuttadi loklok tatao sipsip diga epaase minedi getgesara xeretna, “Atat pas uto Betilem la ata ven lumumulum, mo ne Moroa ira tong pam i ridik.”

16 \*La diga vas kaxat soso mun, diga vot pasa ne Maria la ne Josep, la diga long lenget ka lumumulum gak midi ro at loxot anan at laxanbulumaxao.

17 Ga se mo luvuttadi loklok tatao sipsip diga ven lumumulum, diga on basinge i, la diga paase asu levelinga at laangelo ri limixin axap.

18 La nedi mo diga ronga mo levelinga, diga sangu ren.

19 \*Ketla ne Maria ga doxoma na levelinga, la gam doma mumu amisix i.

\* 1:80: Lu 2:40; Mt 3:1 \* 2:5: Lu 1:27 \* 2:7: Mt 1:25 \* 2:14: Lu 19:38 \* 2:16: Lu 2:10-12  
\* 2:19: Lu 2:51

20 Luvuttadi loklok tatao sipsip digamlong, diga emi asu mi ne Moroa ti nom lempanga diga rongga i la diga ven pam i, kerekngan laangelo ga vaase di min.

*Diga So Asen Ne Iesu*

21 \*At laaleng sepsev avanuan melemu at livipisik at ne Iesu, nedu lenasun duga lok ka ne Iesu xusu dina vit kepe loxontuxu ren. La diga so asen i mi ne Iesu, no laasen laangelo gara so asen avot pam i min ap mo loxonaleng nenen goxovisi na renan min.

*Diga Lok Ka Ne Iesu Uto At Loogu Laplavang*

22 \*Laaleng ga vot nga kusu ne Josep mi ne Maria duna lok axap mo loklok ti lox adadat du kerekngan Laulis Linga at ne Moses ga tong i. La duga lok ka lamdak uto Jerusalem kusu duna raba ne Moroa min,

23 kerekngan levelinga gak lok to xeneng at Laulis Linga at ne Moroa i lok keretna,

“Laxamdak temes avot, mina song araba di ri ne Moroa.” *Pas 13:2,12,15*

24 \*Dugat pas bok kusu duna raba leventamtaba atdu. Laulis Linga at ne Moroa ga tong i do limixin dinaba raba i mi legepu bino, kopla legepu bilis.

25 \*Lara laradi ga nemen to Jerusalem laasen teren ne Simion. Neni lagale laradi, la ga lok ngangao bok at ne Moroa la ni ga lotu ruturun saparav i. Ni ga ngangais ti taradi kusu naba lox arooro limixin me Israel. Loroonan Kaala ga nemen teren.

26 La Loroonan Kaala ga tong pam i rin do ni noxo met se ni naba ven Lanarong at ne Moroa.

27 Ap mo laaleng Loroonan Kaala ga lam ka ne Simion uto at loogu laplavang. Ne temen mi nenen ne Iesu duga lox abeles lamdak ukeng kusu dina lox epovo loklok at

leme Judaia i ngan Laulis Linga ga tong i. 28 La ne Simion ga lok kaka lamdak mi lukngen, la ga emi asu mi ne Moroa xeretna.

29 “O, Leeme Silok! Lavapaase ali ram ira soorun pam, la nanga una ke ia, lasaxaruki ram kusu ana met basinge lugugu ram la ana nemen at lenmila.

30 \*Ara ven pam langas ti lorooro mi luxatli axa rak,

31 mo uga gagas min kusu limixin axap dinaba ven i.

32 \*I ngan laxasep kusu naba lox axasep langas taram ti limixin kopmen di me Judaia, la na raba lasinorong ti limixin taram boro Israel.”

33 Temen mi nenen lamdak duga sangu aleng ap mo levelinga at ne Simion.

34 \*Simion ga lox anarong di la ga lok ti ne Maria xeretna, “Anaa lamdak ne Moroa ga soxolik ka i xusu naba lok nedi limixin buaang me Israel dinaba subu la buaang bok nedi dinaba xatu at levelinga ren. Neni naba lok ngan loklok katling boro vana at ne Moroa la buaang nedi dinaba sok tixirixes i.

35 La ni naba lox asuvos levendoxoma nemnem at limixin. La lorooro ram naba umsu mi lainbulu.”

36 Lara latkin papaase ali laasen teren ne Ana loolik at ne Panuel, at libibinat at ne Asa. Neni lasioxo rixin, la ni ga epot mun at lavanuti maares.

37 \*La latlok teren ga met la melemu neni ga nemen naa. La levenmaares teren ga epovo at lavanuan sangaun mi lavanuet. Neni xopmen goxo onon basinge loogu laplavang. At lengkangking la lengkanimin, ni ga lotu saparap ne Moroa la ni gan mun anan la ga ngising.

38 \*Ap mo mun loxonaleng neni ga vot pasa di la ga tong loklox avukat saparap ne Moroa, la ga vaase ali mumu ne Iesu tinedi mo limixin diga

\* 2:21: Lu 1:31,59 \* 2:22: Mas 12:1-8 \* 2:24: Mas 12:8 \* 2:25: Ais 40:1; 49:13 \* 2:30: Ais 52:10; Lu 3:6; Ta 2:11 \* 2:32: Ais 42:6; 49:6; 52:10 \* 2:34: Ais 8:14; Mt 21:42; 1 Ko 1:23; 1 Pi 2:8 \* 2:37: 1 Ti 5:5 \* 2:38: Ais 52:9

ngangais ne Moroa kusu naba lox arooro limixin me Israel.

39 \*Se ne Josep mi ne Maria duga lox axav i mo lempanga kerekngan Laulis Linga at ne Moroa ga tong i, digamlong uto Nasaret lemenemen atdi gak lok at lenep silok Galili.

40 \*Lamdak ga sisilok la ga lolos. Ga umsu mi lakleklen, la letaba nabalamu at ne Moroa ga umsu at lorooro ren.

### *Lamdak Lixilik Ne Iesu To Xeneng At Loogu Laplavang*

41 \*At levenmaares axap ne Josep eburu mi nenen ne Iesu dugat pas uto Jerusalem ti leluxa, laasen ap mo leluxa, Lovovolo Pe.

42 Se ne Iesu ga lasangaun legepura laramaares teren, nedi loxoetemen digat pas uto ap mo leluxa kerekngan loklok at limixin me Israel.

43 \*La levenaleng ap mo leluxa ga xap ta, la nedu lenasun duga vas kaxat uto xolonu, la ne Iesu ga nemen go Jerusalem, ketla du goxoklen i.

44 Duga nua i do neni mo gat pas eburu mi lentaba ren boro Nasaret. Kuren la dugat pas ap mo laaleng se ukantinao, la melemu duga long lenget ka i do neni goxo emu mi limixin la duga vuse kaxat ba rin kantubu at lempat atdi la larapen tangas bok atdi.

45 Du goxo vuse ka i, la dugamlong uto Jerusalem kusu duna ven tin.

46 Melemu at laaleng sepsev avantan duga vuse ka i ro xeneng at loogu laplavang, gat kis eburu mi luvuttadi loklox ase at leme Judaia. Ni gang tonga di la ga susue bok di mi levesusue.

47 Nedi mo digang tonga i, diga sangu aleng at lakleklen teren la levempoporang teren.

48 Nedu lenasun duga vuse ka i, duga sangu aleng la nenen ga lok tin, "Nuruk, tila u lok nom loklok

tinama? Nema lenasun mara bulu aleng mu u."

49 \*Ni ga vorang i ridu keretna, "Tila mu lok do muna puse ria? Kereva, muxoklen i do nia aba nemen to at loogu at ne Tamak?"

50 Ketla du goxo xasep at na levelinga ne Iesu ga tong i ridu.

51 \*La ne Iesu gamlong eburu midu uto Nasaret, la neni gang tonga res amisik atdu. La nenen gam doma amisik na levelinga at ne Iesu la goxo domampe i.

52 \*La ne Iesu ga sisilok at labantuxu la at lakleklen bok. La loklok teren ga nunuan axap at lemeren ne Moroa la limixin.

## 3

### *Jon Laradi Sep Susu Ga Vavang*

(Mt 3:1-12; Mk 1:1-8; Jo 1:19-28)

1 At lamaares lasangaun mi lavalimo at lixitkis migomgo at ne Kaisar Taibirias. Pontias Paelat ga nemen ngan laradi gomgo to Judaia, la ne Erodes gam gomgonga limixin to lenep silok Galili, la neton, laasen teren ne Pilip gam gomgonga limixin to lunep silok Ituria la Tarakanitis. Lasinias gam gomgonga limixin to lenep silok Abilini.

2 \*La ne Anas mi ne Kaiapas duga nemen ngan lumaasa gomgo.

Ap mo levenaleng levelinga at ne Moroa ga rupot saparap ne Jon lamdak at ne Sakaria to at lamatbin.

3 \*La ni gat pas at lengkot axap saparap ladan sen Joridan la ga vavang tinedi diga vot pasa i. Ni ga lok keretna, "Mina leeng basinge laxakapmek atnemi la mina lok ka lesepsusu, la ne Moroa naba doxoma xepe laxakapmek atnemi."

4 Ga lok ngan laradi vapaase ali ne Aisaia ga malagan i at lubuk teren keretna.

"Lara mo ip kup to at lamatbin keretna, 'Mina lox agagas li

\* 2:39: Mt 2:23 \* 2:40: Lu 1:80; 2:52 \* 2:41: Pas 12:24-27; 23:14-17; Lal 16:1-8 \* 2:43: Pas 12:18 \* 2:49: Jo 2:16 \* 2:51: Lu 2:19 \* 2:52: 1 Sml 2:26; Ler 3:4; Lu 1:80 \* 3:2: Lu 1:80 \* 3:3: Gu 13:24; 19:4

langas ti Leeme Silok kusu tin tit pas. Mina lox akmokso larangas tin!

<sup>5</sup> Minas bosbo pe larasa upana, lempatkaana mi lengkong kaana xakalik mina lox amamana i. Larangas kakauk mina lox akmokso i la larangas i garasan mina lox amamasa i.

<sup>6</sup> La limixin axap dinaba ven ba lugugu loklox arooro at ne Moroa.’ ”  
*Ais 40:3-5*

<sup>7</sup> \*Buaang nedi limixin diga vot pasa ne Jon kusu na sep susu di. La ni ga paase lolos tidi xeretna, “Nemi mi lok ngan laxamdak at laxasii, mila loklok atnimi i lok kapmek aleng. Mi lok do mina lok kaka lesepe susu kusu mina sepsu at lebelemamao at ne Moroa mo naba vot melemu, ketla xopmen mi noxo epovo.

<sup>8</sup> \*Ketla mina lok leveloklok nunuan kusu naba lox asusu i do mira leeng basinge vam laxakapmek atnimi. La nemen nemi mita etong i kantubu atnimi do, “Taba nemen avukat mila nedik luvuttubuno avolo at ne Abaram.’ A tong i rinimi do Moroa i epovo xusu na lok ka na laxanu at la na lok di laxamdak ti ne Abaram!

<sup>9</sup> \*Lamatao mo i nemen gagas kusu na tara asubu larauna. Do larauna axap dixo pisik larapeven una avukat, Moroa naba ra asi di ukopok la na lu midi uto at laxao.”

<sup>10</sup> Limixin diga sue i, “Maba lok lavanga salai?”

<sup>11</sup> La ne Jon ga vorang i ridi xeretna, “Do nege i ruuna tegepu vanga singsiga, neni na raba tara ti mo laradi kopmen tara ren. La do nege i ruuna leveluxa, neni na raba box i ri mo laradi kopmen teveluxa ren.”

<sup>12</sup> \*Lentaba luvuttadi loklok ka pilas diga vot kusu ne Jon na sep susu di, la diga sue i, “Laradi loklox ase, manaba lok lavanga salai?”

<sup>13</sup> Ni ga lok tidi, “Nemen mita lok ka gamasa tempilas at limixin i volo lampoovo, luvuttadi amgomgo diga tong taba nedi min.”

<sup>14</sup> La lentaba luvuttadi esep bok diga sue i, “Kereva ba nama? Lavanga salai manaba lox i?”

La ni ga lok tidi, “Nemen mita pu soso ka tempilas at taradi la mina lox amamar i xopla mina bala raba tara. Levendoxoma atnimi na lox avukat ti luunun mik lok ka i.”

<sup>15</sup> Levendoxoma at limixin ga xatu kaxat la diga doxoma mumu ne Jon, diga nua i do neni mo Lanarong.

<sup>16</sup> \*Kuren la ne Jon ga lok tinedi axap, “Nenia a sep susu nimi mi ladan, ketla lara laradi naba vot. Lolos teren i volo lolos tarak. Axo epovo xusu ana soxomus luvanga vatpas teren mila neni i silok aleng tia. Neni naba sep susu nimi mi Loroonan Kaala la naba lok kepe laxakapmek atnimi kerekngan laxao i rin kepe levenboobong.

<sup>17</sup> Neni i gagas pam kusu ti lok pes larapeven piao basinge labantuxu ren la na lok li bubua larapeven piao uto xeneng at loogu ren. Ketla neni naba xotos leventuxu at levempiao ro at laxao kopmen noxo remet.”

<sup>18</sup> Buaang leventaangas axap Jon ga vavang min ti limixin kusu na tong asu Lagale Lavavang tinedi.

<sup>19</sup> \*Ketla ne Jon ga sok katli ka laradi gomgo ne Erodes mila neni ga vaxat ka ne Erodiat latkin at neton, la ga lok bok buaang lempanga xapmek.

<sup>20</sup> Kuren la ne Erodes ga lok bok lara lavanga ga lok kapmek aleng. Ni ga ranga alis ne Jon la ga lok li i at loogu xokoxo.

*Jon Ga Sep Susu Ne Iesu  
(Mt 3:13-17; Mk 1:9-11)*

<sup>21</sup> Avot ti loxokoxo at ne Jon, ni ga sep susu limixin. At lara laaleng ni ga sep susu bok ne Iesu. Laxalibet ga

\* 3:7: Mt 12:34; 23:33 \* 3:8: Jo 8:33,39 \* 3:9: Mt 7:19 \* 3:12: Lu 7:29 \* 3:16: Gu 13:25

\* 3:19: Mt 14:3-4; Mk 6:17-18 \* 3:22: Jo 1:32; Mt 17:5; Lu 9:35

rem suang ap mo loxonaleng ne Iesu ga lok lising.

<sup>22</sup> \*La Loroonan Kaala ga rava si ukopok, diga ven lovoovo ren ga ngan lamno la ga nemen at ne Iesu. La laxaka at lara ga laa boro vana at laxalibet ga lok keretna, “Nenu ne nuruk, La nia a balamu u la a momo minu.”

*Leretere At Lavalabat  
At Ne Iesu  
(Mt 1:1-17)*

<sup>23</sup> \*Se ne Iesu ga vaxaru kaxat leven gugu ren, lenmaares teren ga epovo at lavantun sangaun. Limixin diga doma i do neni nitna ne Josep. La ne Josep neni nitna ne Eli,

<sup>24</sup> Eli neni nitna ne Matat, Matat neni nitna ne Levi. Levi neni nitna ne Melkai, Melkai neni nitna ne Janai, Janai neni nitna ne Josep;

<sup>25</sup> Josep neni nitna ne Matatias, Matatias neni nitna ne Amos, Amos neni nitna ne Naum, Naum neni nitna ne Esli, Esli neni nitna ne Nagae;

<sup>26</sup> Nagae neni nitna ne Maat, Maat neni nitna ne Matatias, Matatias neni nitna ne Semen, Semen neni nitna ne Josek, Josek neni nitna ne Joda;

<sup>27</sup> \*Joda neni nitna ne Jonan, Jonan neni nitna ne Resa, Resa neni nitna ne Serababel, Serababel neni nitna ne Salatiel, Salatiel neni nitna ne Neri;

<sup>28</sup> Neri neni nitna ne Melkai, Melkai neni nitna ne Adai, Adai neni nitna ne Kosam, Kosam neni nitna ne Elmadam, Elmadam neni nitna ne Era;

<sup>29</sup> Era neni nitna ne Josua, Josua neni nitna ne Eliser, Eliser neni nitna ne Jorim, Jorim neni nitna ne Matat, Matat neni nitna ne Levi;

<sup>30</sup> Levi neni nitna ne Simion, Simion neni nitna ne Juda, Juda neni nitna ne Josep, Josep neni nitna ne Jonam, Jonam neni nitna ne Eliakim;

<sup>31</sup> \*Eliakim neni nitna ne Melia, Melia neni nitna ne Mena, Mena neni nitna ne Matata, Matata neni nitna ne Natan, Natan neni nitna ne Devit;

<sup>32</sup> \*Devit neni nitna ne Jesi, Jesi neni nitna ne Obet, Obet neni nitna ne Boas, Boas neni nitna ne Salmon, Salmon neni nitna ne Nason;

<sup>33</sup> \*Nason neni nitna ne Aminadap, Aminadap neni nitna ne Amin, Amin neni nitna ne Aanai, Aanai neni nitna ne Esron, Esron neni nitna ne Peres, Peres neni nitna ne Juda;

<sup>34</sup> Juda neni nitna ne Jakop, Jakop neni nitna ne Aisak, Aisak neni nitna ne Abaram, Abaram neni nitna ne Tera, Tera neni nitna ne Nao;

<sup>35</sup> Nao neni nitna ne Serak, Serak neni nitna ne Reu, Reu neni nitna ne Pelek, Pelek neni nitna ne Iba, Iba neni nitna ne Sila;

<sup>36</sup> \*Sila neni nitna ne Kenan, Kenan neni nitna ne Apaksat, Apaksat neni nitna ne Sem, Sem neni nitna ne Noa, Noa neni nitna ne Lamek;

<sup>37</sup> Lamek neni nitna ne Matusala, Matusala neni nitna ne Enok, Enok neni nitna ne Jare, Jare neni nitna ne Malalil, Malalil neni nitna ne Kenan;

<sup>38</sup> \*Kenan neni nitna ne Enos, Enos neni nitna ne Set, Set neni nitna ne Adam, la Adam neni nitna ne Moroa.

## 4

*Satan Ga Lok Tong Pen  
Ne Iesu  
(Mt 4:1-11; Mk 1:12-13)*

<sup>1</sup> Iesu gamlong boro at ladan sen Joridan, neni ga umsu mi Loroonan Kaala. La Loroonan Kaala ga lam ka i uto at lamatbin.

<sup>2</sup> Ap mo levenaleng ne Iesu gan mun anan, la melemu ni ga roxo. La ne Satan ga vot pasa i la ni gak lok tong pen i at lavanuet sangaun aleng.

<sup>3</sup> Satan ga lok tin, “Do nenu nitna ne Moroa, una tong i ri na luuat kusu na vee xongkide.”

\* 3:23: Lu 4:22; Jo 6:42 \* 3:27: 1 Let 3:17,19; Esr 3:2 \* 3:31: 2 Sml 5:14 \* 3:32: 1 Sml 16:1-13; Rut 4:17-22 \* 3:33: Lur 29:35 \* 3:36: Lur 11:10-26 \* 3:38: Lur 4:25-5:32 \* 4:4: Lal 8:3

<sup>4</sup> \*Iesu ga vorang i rin keretna, “Kopmen. Lovoang Kaala i tong i do, ‘Laradi ixo rooro xusuk mun at lakde.’”

<sup>5</sup> La ne Satan ga lok ka i upana at lavatkaana la soso mene nga ga lox ase i mi levengkot axap at na lavatbung menemen.

<sup>6</sup> \*La ne Satan ga lok, “Anaba raba u mi na levengkot axap la lapnovos teren kusu unam gomgo ren. La na lempanga axap nia aga lok kaka i, la nia xa anaba raba nege tara, do nia ana soxolik ka i.

<sup>7</sup> Anaa axav i, anaba raba u min, mo do una xis tiktikbu mi luvatgulom taram de melango rak la una lotu saparav ia.”

<sup>8</sup> \*Iesu ga vorang i rin keretna, “Kopmen. Lovoang Kaala i tong i do, ‘Una lotu saparap ne Moroa, Leeme Silok taram, la una gugu taba xusux i.’”

<sup>9</sup> La ne Satan ga lok ka i uto Jerusalem la ga vaxaru i ro vana at lavatlak gu at loogu laplavang, la ga lok tin, “Mo do nenu ne nitna ne Moroa, una los si basinge na loxot.

<sup>10</sup> Mila Lovoang Kaala i tong i do, ‘Moroa naba tong i ri lubung angelo ren kusu dinaba lok tatao avukar u.’ *Sam 91:11*

<sup>11</sup> La i tong box i do, ‘Dinaba rebeng aurur u mi lengkikngan di, kusu tuuat noxo sev asongot tekot at luxangkedek taram.’” *Sam 91:12*

<sup>12</sup> \*Iesu ga vorang i rin keretna, “Kopmen. Lovoang Kaala i tong i do, ‘Nemen uta lok li gat ne Moroa, Leeme Silok taram ti loklok tong pen.’”

<sup>13</sup> \*At leventaangas axap ne Satan ga lok tong pen ne Iesu ren, la melemu ne Satan ga on basinge i la ga ngangais manga i kusu ti tara taaleng melemu.

*Iesu Ga Vaxaru Kaxat Lugugu Ren To Galili*  
(Mt 4:12-17; Mk 1:14-15)

<sup>14</sup> Melemu, Iesu gamlong uto Galili, la lolos at Loroonan Kaala ga nemen teren la ga lok tooro i mi lugugu ren. Levelinga mumu ne Iesu, ga rem teles ap mo lengkot ga nemen saparap Galili.

<sup>15</sup> Neni ga anasa limixin to xeneng at laraogu singising la limixin axap diga emi asu aleng min.

*Limixin To Nasaret Diga Sok Tixirixes Ne Iesu*  
(Mt 13:53-58; Mk 6:1-6)

<sup>16</sup> At lara laaleng Iesu gat pas uto Nasaret, mo lemenemen ni ga silok e. La at laaleng kaala neni gat pas uto at loogu singising i ngan neni gak lok amisix i. Ni ga xatu upana kusu na us Lovoang Kaala.

<sup>17</sup> La laradi gomgo ap mo loogu singising ga song araba i mi lugun linga at leeme vapaase ali, ne Aisaia. Ni ga valas i la ni ga long lenget ka loxot ga lok keretna.

<sup>18</sup> “Loroonan Kaala at ne Moroa i nemen tarak, mila ira soxolik ka vam ia xusu ana vavang mi Lagale Lavavang tinedi limixin banbalo. Ira sak tiki vam ia xusu ana tong asu langas ti soxomus asu limixin di nemen at loogu xokoxo, la ana lox arepalas lengkatli atnedi luvuttadi mi lengkatli atdi i main. La ana soxomus asu limixin di baava mi laxanmuuat at na lavatangka,

<sup>19</sup> la ana tong asu levenaleng ne Moroa na vaxaru kaxat lugugu ti lox arooro limixin teren.” *Ais 61:1-2*

<sup>20</sup> La ne Iesu ga vegun ka lugun linga, la ga raba i ri laradi gak lok tatao loogu, la ni ga xis kopok. Limixin axap go xeneng at loogu singising diga ven tooro ne Iesu.

<sup>21</sup> La ni ga lok tidi xeretna, “Anaa levelinga at Lovoang Kaala ira soorun ta ningina, kerekngan tai mo mi rongga i.”

<sup>22</sup> \*Diga rongga ka levelinga ren la diga sangu mila levelinga ren ga sixit

\* 4:6: Mt 28:18 \* 4:8: Lal 6:13-14 \* 4:12: Lal 6:16; 1 Ko 10:9 \* 4:13: Ib 2:18; 4:15 \* 4:22: Lu 3:23; Jo 6:42

nunuan mun. Diga lok, “Neni nitna ne Josep mun, la kereva neni i epovo na tong i na levelinga?”

23 \*Ni ga lok tidi, “A lok do minaba tong asu i na lavapaase poovo ria, ‘Laradi sangsanga, una lox aroo xa u.’ La minaba lok bok tia, ‘Una lok mo lempanga sangsangu nade at lemenemen taram i ngan ta ugak lox i ro Kaprenaum.’ ”

24 \*La ne Iesu ga lok bok tidi, “A tong tuturun i na rinimi. Leeme vapaase ali, limixin di noxo siam ka i ro at lemenemen axa ren.

25 \*Mina ronga i na levelinga. At levenaleng at ne Elaisa, la goxopmen tara takabu at lavantun mi loxonatat maares la langsan lora xoxo rupot ap mo lenep axap. I ruturun do buaang lempatnaa to Israel,

26 \*ketla ne Moroa goxo riki ne Elaisa uto at teta atdi, ketla uto xusuk at lavatnaa boro Sarepat, at lenep silok Sidon.

27 \*La buaang nedi luvuttadi mi lanmeres gu (leprosy) diga nemen go Israel at levenaleng at leeme vapaase ali ne Elaisa. Ketla ne Moroa goxo lox aroo tara atdi, ni ga lox aroo ne Naiman kusuk mun boro at lenep silok Siria.”

28 Se limixin to xeneng at loogu singising diga rongga i na, diga musak aleng.

29 Diga xatu upana, la diga sar asu ne Iesu ukamang basinge mo lemenemen, la diga lok ka i uto lisigege at lakaana mo lemenemen atdi gat kis e, kusu dina lu asi min ukopok.

30 Ketla neni ga vas polo mene ro xantubu at limixin la ga onon ta.

### *Iesu Ga Riki Asu Lagas Basinge Laradi* (Mk 1:21-28)

31 \*Iesu gat pas uto Kaprenaum, lara lemenemen to Galili, la ga anasa limixin at laaleng kaala.

32 \*Diga sangu aleng at levenanasa ren mila levelinga ren ga mumuat.

33 \*Lara laradi go xeneng at loogu singising, lagas ga suxuna i, ga xup silok aleng la ga lok,

34 \*“Aa! Iesu boro Nasaret, lavanga salai u vara i atnama? Kereva, u vot de xusu una lok kapmek nama? Aklen i do nenu nege. Nenu Laradi Melemelengan at ne Moroa!”

35 La ne Iesu ga vaase lolos ti mo lagas keretna, “Una lok pilo, la una vas su basinge na laradi!” La mo lagas ga lu asi mi nom laradi ro melango atdi, la ga sixisu basinge i la kopmen goxo lok kapmek toxot at labantuxu ren.

36 La limixin diga sangu, la diga lok tinedi getgesara, “Kereva nom levelinga? Na laradi i vaase ri lagas, la lagas i rongga res teren. Levelinga ren i lolos la i mumuat aleng.”

37 La levelinga mumu ne Iesu ga onon at lengkot axap ap mo lenep.

### *Iesu Ga Lox Aroo Luvutulom At Ne Simon Pita*

(Mt 8:14-17; Mk 1:29-34)

38 Iesu ga on basinge loogu singising la gat pas uto at loogu at ne Simon la ga vubeles teren. Luvutulom at ne Simon ga meres aleng mi liplivi, la diga tong i na ri ne Iesu.

39 Ni gat pas la ga ru puvung i, la ga vaase lolos ti nom liplivi, la liplivi ga on basinge mo latkin. La soso mun ni ga xatu kaxat upana la ga lox agagas leveluxa ridi.

40 Ga ukantinao laxangking ga lok do na lotup, mo limixin diga vas kaxat eburu mi larapen tangas atdi, digak meres mi levenasen anmeres axap, diga lam ka di uto at ne Iesu. La ni ga lok li lukngen to mavana atnedi getgesara, la ga lox aroo nedi axap.

41 \*Iesu ga paase ri lubunggas la mo lubunggas bok diga vas su basinge buaang nedi limixin. La lubunggas digap kup keretna, “Nenu

\* 4:23: Mt 4:13; Jo 2:12 \* 4:24: Jo 4:44 \* 4:25: 1 Lav 17:1,7; 18:1 \* 4:26: 1 Lav 17:8-16 \* 4:27: 2 Lav 5:1-14 \* 4:31: Lu 4:23 \* 4:32: Mt 7:28-29; Jo 7:46 \* 4:33: Mt 8:29; Lu 8:28 \* 4:34: Jo 6:69 \* 4:41: Mt 8:29; Mk 3:11-12

nitna ne Moroa!” La ne Iesu ga vaase lolos tidi la ni xopmen goxo ke xepe tara atdi gita vaase, mila digaklen i do neni Lanarong.

*Iesu Ga Vavang To At  
Laraogu Singising  
(Mk 1:35-39)*

<sup>42</sup> Ga maxantamak suubu, Iesu ga on basinge mo lemenemen la gat pas uto at lenep mimila. Limixin diga puse rin, la se diga vuse ka i, diga lolos do nemen ni guta vas kaxat basinge di.

<sup>43</sup> \*Ketla neni ga lok tidi, “Anaba vavang bok mi Lagale Lavavang at Linintoo at ne Moroa to bok at lev-menemen petpes, mila ne Moroa ga riki ia xusu ana lox i.”

<sup>44</sup> \*La neni ga vavang to at laraogu singising at lengkot axap at leme Judaia.

## 5

*Lorotoro At Ne Iesu Ti  
Lavaun Pinivu Ren  
(Mt 4:18-22; Mk 1:16-20)*

<sup>1</sup> \*At lara laaleng Iesu ga tu ro loxon at lavatdan kis Genesaret. Limixin diga esi kakape kusu uto saporav i, kusu dina rong levelinga at ne Moroa.

<sup>2</sup> Ni ga ven legepu sepang to loxon, la luvuttadi sepsep mat no diga lok li vam du la digat gos laxatkat atdi.

<sup>3</sup> Iesu ga los kas at lara leseparang (neni leseparang at ne Simon) la ga tong i ri ne Simon kusu na so asu leseparang uto vaxalom lixilik basinge loloxon. Simon ga lox i kuren, la ne Iesu ga xis ap mo leseparang la ga anasa limixin.

<sup>4</sup> Se neni ga vaase axap, ni ga lok ti ne Simon, “So asu leseparang taram uto vaxalom lixilik at lisimaramain, la nenu eburu mi larapen tangas taram mina lox asi laxatkat atnimi ukopok kusu mina loloa.”

<sup>5</sup> \*Simon ga lok tin, “Leeme silok, ma gugu lolos at na laaleng kanimin axap la maxo sep ka tenmat. Ketla,

mo do u tong pam i, nema maba lox asi laxatkat.”

<sup>6</sup> Diga lox asi laxatkat, la laxatkat ga umsu mi laxanmat solo, la laxatkat ga lok do na rekoxorop ta.

<sup>7</sup> La diga xalim ka larapen tangas atdi to at lara leseparang petpes kusu dina vot pasa di la dina lok tooro di. Diga vot la diga suxa buru nom legepu sepang mi laxanmat la ma lixilik diga lok do dina dong si.

<sup>8-10</sup> \*Simon Pita eburu mi larapen tangas teren, diga sangu aleng at laxanmat diga loloa xaka i. Lumdak bok at ne Sebedi, Jems mi ne Jon duga sangu aleng. Se ne Simon Pita ga ven na lavanga ga vot, neni ga xis tiktikbu mi luvatgulom teren to melango at ne Iesu la ga lok, “Leeme Silok, uto u basinge ia! Nia laradi xapmek!”

Iesu ga lok ti ne Simon, “Nemen uta marat. I ruka i lingina una loloa ka limixin!”

<sup>11</sup> \*Digatla oso mi levesepang uto loxon, la diga on basinge lempanga axap, la diga mumu asu ne Iesu.

*Iesu Ga Lox Aroo Lara Laradi  
(Mt 8:1-4; Mk 1:40-45)*

<sup>12</sup> At lara laaleng Iesu ga nemen to at lara lemenemen. La ni ga ekip tangarang mi laradi ga meres mi lanmeres gu (leprosy), mo ga umsu at labantuxu ren. Se neni ga ven ne Iesu, ni ga xis tiktikbu mi luvatgulom teren la ga sing ne Iesu, “Leeme Silok. Mo do u vara i, una lox aroo ia!”

<sup>13</sup> Iesu ga song asu mi lekngen la ga long tu ren, la ga lok tin, “A vara i. Lanmeres taram na xap ta.” La soso mun mo lanmeres ga xap basinge mo laradi.

<sup>14</sup> \*Iesu ga vaase lolos tin, “Nemen uta tong box i na ri tara, ketla unat pas uto at lamaasa, la neni na ven mumu u. Melemu una lok laramtaram ti ne Moroa ngan ne Moses ga tong i, kusu ti lox asuusu i ri limixin axap do nenu mo ura lox avukat ta.”

\* 4:43: Lu 8:1 \* 4:44: Mt 4:23 \* 5:1: Mt 13:1-2; Mk 3:9-10; 4:1 \* 5:5: Jo 21:3-8 \* 5:8-10: Mt 13:47 \* 5:11: Mt 19:27 \* 5:14: Mas 14:1-32



15 Ketla levelinga mumu ne Iesu ga epeseves ampana uto at lengkot axap, la buaang limixin diga vot kusu dina rongga i la kusu neni na lox aroo nedi basinge levenanmeres atdi.

16 \*Ketla amisik neni gat pas uto at lengkot mimila, kusu na ngising.

*Iesu Ga Lox Aroo Laradi Labantuxu Ren Ga Molo*  
(Mt 9:1-8; Mk 2:1-12)

17 At lara laaleng ne Iesu ga anasa. Lentaba lubang Parisi la luvuttadi loklox ase at Laulis Linga mo digat kis, diga laa boro at laramenemen axap to Galili la boro bok Judaia, la boro bok Jerusalem. Lolos at ne Moroa ga umsu ren kusu na lox aroo levenanmeres.

18 Lentaba luvuttadi digap kip lara laradi mi loora, labantuxu ren ga molo axap la diga lok tong i do, dina xip ka i uto xeneng at loogu la dina vaxamdi i ro melamgo at ne Iesu.  
19 Ketla buaang nedi limixin diga umsu, la di goxo epovo kusu dina lox abeles lanmeres ukeneng. Kuren la diga xip kaka i upana at lavatlak gu, la diga lok das lenep teren, la diga lox asi lanmeres mi loora ren ukopok la diga lok li i ro melamgo at ne Iesu, kantubu at limixin.

20 \*Se ne Iesu ga ven kisip lununu atdi, neni ga lok ti nom laradi, "Lentangas tarak, leveloklok kakapmek axap taram, a doxoma xepe i."

21 \*Luvuttadi loklox ase at Laulis Linga eburu mi lubang Parisi diga epaase kantubu atdi xeretna, "Nege i na laradi i paase vupu ri ne Moroa xeretna? Kopmen teta i epovo kusu na doxoma xepe laxapmek at tara. Moroa xusuk mun i epovo!"

22 Iesu gaklen levendoxoma atdi la ga lok tidi, "Tila lodoxoma atnimi i ekarakat mumu na lavanga?"

23 Ua levelinga kopmen na lolos ti tong i. Leveloklok kakapmek taram ara doxoma xepe vam i, kopla ana tong i do, katu kaxat la unat pas?

24 \*Ketla a vara i do minaklen i do, nenia, Laradi Mevana, a ruuna lolos at na lavatbung menemen kusu ti doxoma xepe leveloklok kakapmek!"

La ne Iesu ga lok bok ti mo laradi xeretna, "A tong i ru, una xatu upana la una xip kaka loora ram la una vas kaxat ukolonu."

25 La soso mun mo laradi ga xatu kaxat to melamgo atdi axap, la ga xip ka loora mikmidi ren, la gat pas ukolonu, ga emi asu mi ne Moroa.

26 Nedi axap diga sangu. La diga emi asu mi ne Moroa, la diga lok, "Lavanga vetpes dik dira ven i lingina!"

*Iesu Ga Ro Ka Ne Levi*  
(Mt 9:9-13; Mk 2:13-17)

27 Melemu at nai, Iesu ga vas kaxat basinge mo lenep la neni ga ven laradi loklok ka pilas laasen teren ne Levi, gat kis to at loogu xekepe pilas. La ne Iesu ga lok tin, "Una mumu asu ia."

28 La ne Levi ga xatu kaxat, ga ke xepe lempanga axap teren, la ga mumu asu ne Iesu.

29 La ne Levi ga lok leluxa silok to at loogu ren do ri ne Iesu, la buaang nedi luvuttadi loklok ka pilas eburu mi lentaba luvuttadi bok, mo digat kis eburu min kusu ti anan.

30 \*Lentaba atnedi lubang Parisi la lentaba bok atdi luvuttadi loklox ase at Laulis Linga, diga vaase kuxurung ti lavaun pinivu at ne Iesu. Diga sue xeretna, "Tila mi anan la mi inin eburu mi luvuttadi loklok ka pilas la limixin kakapmek bok?"

31 Iesu ga rongga i nom la ga lok tidi xeretna, "Limixin di lox avukat, kopmen dinak pakes ti loklok tooro, ketla nedi xusuk mun dik meres.

32 Aga rupot kusu ti ro xaka limixin bilinga kusu dina leeng, la kopmen nia a goxo rupot kusu tinedi limixin manmanton."

*Lususue Mumu Loklok*  
*Ti Mun Anan*  
(Mt 9:14-17; Mk 2:18-22)

<sup>33</sup> Lentaba luvuttadi diga lok ti ne Iesu xeretna, “Lavaun pinivu at ne Jon din mun anan amisik, la di ngising amisik, la lavaun pinivu bok at lubang Parisi din mun anan. Ketla lavaun pinivu ram kopmen dina mun anan.”

<sup>34</sup> \*La ne Iesu ga vorang i ridi mi lavapaase poovo xeretna, “At loklox anarong ti leepot, lentaba at laradi epot di noxo mun anan mila laradi epot move ik lok eburu midi.

<sup>35</sup> Ketla laaleng move naba rupot la limixin petpes dinaba lam ka laradi epot basinge lentaba ren la dinan mun anan ba ap mo levenaleng.”

### *Lempapaase Poovo Mumu Levenanasa Maxat At Ne Iesu*

<sup>36</sup> La ne Iesu ga vaase bok tidi mi lavapaase poovo xeretna, “Kopmen teta na balais ka loxontamon maxat kusu na sok gatgat pe lamamara at labantamon maut. Mo do neni na lox i xuren, labantamon maxat ira lok kapmek pam la kopmen na epovo bok ba xusu ata ba lok tavanga min. La nom loxontamon maxat noxo epovo xusu na lok pe avukat lamamara at loxontamon maut.”

<sup>37</sup> La ne Iesu ga vaase bok tidi mi lavapaase poovo. Ni ga lok keretna, “Kopmen tara na soli li laxadan vaen maxat uto xeneng ti labantuxu at lavatme i maut pam. Mo do neni na lox i xuren, mo labantuxu maut naba repagam la laxadan vaen naba soli su ukamang, la labantuxu maut naba lok kapmek.

<sup>38</sup> Laxadan vaen maxat mina soli li i at labantuxu maxat!

<sup>39</sup> Kopmen tara i vara laxadan vaen maxat melemu do ni ira in pam laxadan vaen maut, neni ba lok, laxadan vaen maut i lox avukat tin.”

## 6

### *Iesu Ga Paase Mumu Laaleng Kaala*

(Mt 12:1-8; Mk 2:23-28)

<sup>1</sup> \*At lara laaleng kaala Iesu gat pas kantubu at leventaamang piao. La

\* 5:34: Jo 3:29 \* 6:1: Lal 23:25 \* 6:2: Jo 5:10  
Lu 14:1 \* 6:8: Lu 5:22; 9:47

lavaun pinivu ren diga xidik kaka lempeven piao, la diga sigis i mi levengikngen di ti lok pes labantuxu at lempiao la diga anan ba i.

<sup>2</sup> \*La lentaba lubang Parisi diga lok, “Laai nom mik lox i, la mira los polo Laulis Linga, i tong i do nemen mitak lok panga keretnom at laaleng kaala?”

<sup>3</sup> \*La ne Iesu ga vorang i ridi xeretna, “Mina doma su at lempanga ne Devit ga lox i at laaleng neni eburu mi limixin teren diga roxo.

<sup>4</sup> \*Neni ga vubeles uto at loogu at ne Moroa, la ga lok ka lengkongkide digam taba min ti ne Moroa, la ni ga anan i la ga raba bok lengkot ti limixin teren. La kerepmo diga los polo Laulis Linga, mila lavamaasa xusuk mun diga anan nom lengkongkide.”

<sup>5</sup> La ne Iesu ga lok bok, “Nenia Laradi Mevana. La nenia Lamgomgo at laaleng kaala la ak lok tatao mo laaleng.”

### *Iesu Ga Lox Aroo Laradi Lekngen Ga Molo*

(Mt 12:9-14; Mk 3:1-6)

<sup>6</sup> At lara laaleng kaala manga, Iesu ga beles to xeneng at loogu singising la ga anasa. Lara laradi mo ga nemen lekngen tino ga molo.

<sup>7</sup> \*Lentaba luvuttadi loklox ase at Laulis Linga la lubang Parisi digam doma i do dina lok li ne Iesu at lavapaase, la diga reven mumu i do neni naba lox aroo mo laradi at laaleng kaala.

<sup>8</sup> \*Ketla ne Iesu gaklen levendoxoma atdi, la ni ga lok ti mo laradi lekngen ga molo, “Katu kaxat la unat pas ude melamgo.” Nom laradi ga xatu kaxat la ga ru ro melamgo.

<sup>9</sup> La ne Iesu ga lok tidi, “Ana sue nimi. Lavanga salai Laulis Linga i siam min kusu ata lox i at laaleng kaala? Ti lok tooro laradi kopla ti lox asongor i? Ti lox arooro laradi kopla ti lok kapmex i?”

\* 6:3: 1 Sml 21:1-6 \* 6:4: Mas 24:5-9 \* 6:7:

<sup>10</sup> Ni ga ven tangtagap tinedi axap, la ga lok ti mo laradi, “Song asu mi lakngam.” Ni ga lox i xuren, la lekngen ga lox avukat ta.

<sup>11</sup> Ketla diga umsu mi lumukmusak la diga epaase mumu lavanga salai diba lox i ri ne Iesu.

*Iesu Ga Soxolik Ka Lasangaun Legepura Luvuttadi Vavang*  
(Mt 10:1-4; Mk 3:13-19)

<sup>12</sup> At lara laaleng Iesu gat pas uto vana at lakaana kusu na lok lising, la ap mo laxanimin axap, neni gak lok lising teren ti ne Moroa go.

<sup>13</sup> \*Se at laxangking ga losu ga maxantamak suubu, neni ga ro bubua ka lavaun pinivu ren saparav i la ga soxolik ka lasangaun legepura atnedi, mo ni ga so asen di do luvuttadi vavang.

<sup>14</sup> Simon (ni ga so asen i do ne Pita) la neton laasen teren ne Endru; Jems, la ne Jon, Pilip la ne Batolomiu,

<sup>15</sup> Metiu la ne Tomas, lara ne Jems bok nitna ne Alpias, la ne Simon (neni lara at libinam tadi Selot),

<sup>16</sup> Judas, nitna ne Jems mi ne piken ne Judas Iskariot. Neni mo laradi ga song araba ne Iesu ri limixin munepen kusu dina sev amer i.

*Iesu Ga Anasa La Ga Lox Aroo Limixin*  
(Mt 4:23-25)

<sup>17</sup> La ne Iesu eburu mi lavaun pinivu ren diga si boro vana at lakaana, la ne Iesu ga ru ro at loxot mamana eburu minedi buaang limixin diga mumu asu i. Buaang nedi limixin bok mo digak lok go, boro at lengkot axap Judaia, la boro bok Jerusalem, la boro loxon bok saparap lumenemen Taia la Sidon.

<sup>18</sup> Diga vot kusu dina rongga i la ni na lox aroo nedi basinge levenanmeres atdi. Nedi bok limixin, lubanggas ga lox asongot nedi, diga vot la ni ga riki asu lubanggas basinge di.

<sup>19</sup> La limixin diga lok tong pen i do dina long tu ren, mila lolos ga ravasu basinge i la ga lox avukat nedi axap.

*Iesu Ga Paase Mumu Lomomo La Loklok Tuntun*  
(Mt 5:1-12)

<sup>20</sup> Iesu ga ven ti lavaun pinivu ren la ga lok, “Nemi limixin banbalo, mina momo, mila minaba vubeles at Linintoo no vana at laxalibet.

<sup>21</sup> \*Nemi limixin mo mik toxo, mina momo mila minaba ruuna epovo leveluxa. Nemi limixin monga ming teng, mina lok momo mila melemu minabang longon mi lomomo.

<sup>22</sup> \*Mo do limixin kakapmek dina ven nemi mina mumu asu ia, Laradi Mevana, la dina belengatngas tinimi, la dina sok tixirixes nemi, la dina vaase kapmek tinimi, la dina lok tinimi do nemi limixin kakapmek, mina lok momo.

<sup>23</sup> Mina momo aleng do na lempanga na vot, la minat los mi lososoro, mila langsung luunun tinimi mo i nemen tangais nemi no vana at laxalibet. Do na lempanga na vot, nemen mita lok bukbulu. Lavalabat atnedi mo limixin kakapmek diga lok bok lempanga xapmek kerepmo tinedi lavaeme vapaase ali at ne Moroa.

<sup>24</sup> \*Ketla naba lok kapmek tinemi, mo mip novos. Mila mirap novos avukat pam at na lorooro.

<sup>25</sup> Naba lok kapmek tinimi monga mi umsu mi laxampanga solo, atla minabak toxo! Naba lok kapmek tinimi monga mik lok momo, mila minabak lok tuntun la minang teng!

<sup>26</sup> Naba lok kapmek tinimi, do limixin axap dina paase avukat mumu nemi, mila lavalabat atnedi mo limixin kakapmek diga paase avukat mumu nedi lavaeme vapaase ali xaxarang.”

*Loklok Ti Balamu Limixin Munepen Midi*  
(Mt 5:38-48; 7:12a)

\* 6:13: Jo 6:70 \* 6:21: Li 7:16-17; Sam 126:5-6; Ais 61:3 \* 6:22: Jo 15:19; 16:2 \* 6:24: Je 5:1

27 La ne Iesu ga lok bok tidi xeretna, “A tong i rinimi mo ming tonga ia. Mina balamu nedi dit kis munepen minimi, la mina lok luvukat tinedi di belengatngas tinimi.

28 Mina lox anarong nedi di vaase kapmek tinimi la mina sing tinedi di metlaat minimi.

29 Mo do tara na vasa lavapaales at tara atnimi, ni na ke box i do neni na vasa bok mo lenep meo. Mo do tara na lok kaka tavanga singsiga at tara atnimi, ni na ke box i do neni na lok ka tavanga singsiga silok bok.

30 Mina raba nedi di ngising nimi ri tempanga. La do tara na lok ka tavanga do atnimi, nemen mita sing amlong tin.

31 \*Loklok mina lox i rinedi, i ngan mun loklok mi vara i do dina lox i rinimi.

32 Mo do mi balamu xusuk mun nedi di balamu nimi, mi noxo ruuna ka loklox anarong at nom. Mila limixin kakapmek bok dik lox i xuren.

33 La mo do mina lok luvukat kusuk mun tinedi di lok luvukat tinimi, mi noxo ruuna ka loklox anarong at nom. Mila limixin bilinga bok dik lox i xuren.

34 La mo do mina raba xusuk nedi mo mi doxoma i do diba vorang i rinimi, mi noxo ruuna ka loklox anarong at nom. Mila limixin kakapmek bok pam, dim taba nedi limixin kakapmek kusu diba lok ka amlong bok lempanga ba epovo mi mo lempanga diga raba i.

35 \*Mina balamu limixin dit kis munepen minimi, la mina lok luvukat tidi. Mina raba di mi lempanga la nemen gat mita sing amlong tin. Do mina lok na lempanga avukat, minaba ruuna ka langsgangan luunun, la nemi minaba ngan laxamdak at Leeme Avolo. Mila Moroa ik lox avukat tinedi limixin kopmen dinak lox avukat tin la tinedi bok dik lok laxakapmek.

36 Mina balamu limixin axap, kerekngan mun ne Temen nimi ne Moroa i balamu limixin axap.”

### *Iesu Ga Paase Mumu Loklok Ti Ila Mumu Loklok*

#### *At Tara*

*(Mt 7:1-5)*

37 \*La ne Iesu ga lok bok tidi xeretna, “Nemen mita ila mumu loklok at tara kusu ne Moroa noxo ila mumu loklok atnimi. Nemen mita lok li tavapaase mavana at tara, kusu ne Moroa noxo lok li tavapaase mavana atnimi. Mina doxoma xepe laxakapmek atnedi di lox i rinimi, la kerepmo ne Moroa naba doxoma xepe laxakapmek atnimi.

38 \*Mina raba limixin petpes mi lempanga, kusu ne Moroa naba raba nimi mi lempanga. Minaba ruuna ka langsgangan luunun i umsu aleng, i ngan lempanga avukat di soli li i at levengkikngan nimi la mo axap lempanga mina sang kobot teren. Lempanga mi lox i rinedi vetpes, neni mun i nom ne Moroa naba raba i rinimi.”

39 \*La ne Iesu ga tong asu lara lava-paase poovo tidi xeretna, “Taradi mi luxatli main teren ixo epovo kusu na sat kaka taradi bok mi luxatli main teren. Mo do neni na lox i xuren, nedu buru duba subu tup ti lamamara.

40 \*Laxamdak loklox ase kopmen dina silok ti laradi loklox ase atdi. Ketla ise do nedi axap laxamdak loklox ase dira lox axap loklox ase atdi, nedi diba epovo ba mi laradi loklox ase atdi.”

41 La ne Iesu ga paase poovo bok keretna, “Nemen mita reven ti nom levendon i nemen at laxatli at neton nimi, la nemi xa kopmen mina long lenget ka loxonuna ik lok pe lengkatli atnimi.

42 Miba tong i ri neton nimi xeretna, ‘Neton nama, una mulus tinama xusu mana lok pes nom levendon at laxatli ram.’ Ketla nemi xa kopmen mina ven kibis lengkonuna ik lok pe lengkatli atnimi. Nemi luvuttadi loklok sosolom. Mina lok pes avot nom lengkonuna ik lok pe lengkatli atnimi la melemu ba, miba

\* 6:31: Mt 7:12 \* 6:35: Mas 25:35-36 \* 6:37: Mt 6:14 \* 6:38: Mk 4:24 \* 6:39: Mt 15:14

\* 6:40: Mt 10:24-25

lok epovo ba i xusu mina lok pes ba levendon no at laxatli at neton nimi.”

*Luuna Nunuan Kopmen Na Pisik Larapeven Una Xapmek*  
(Mt 7:16-20; 12:33-35)

<sup>43</sup> La ne Iesu ga paase poovo bok keretna, “Luuna nunuan kopmen na pisik larapeven una xapmek. La luuna xapmek kopmen na pisik tarapeven una avukat.

<sup>44</sup> Larauna axap, limixin di ven kibis di mi larapeven una atdi di pisix i. Kopmen mina lok ka larapeven at laban arakap to at laban gagas, kopla larapeven una at luuna vaen to at tuuna gamasa mun.

<sup>45</sup> Laradi avukat ik lox asu lununuan boro at lempanga avukat i nemen keneng at lebelen. Laradi xapmek ik lox asu laxakapmek boro at lempanga xapmek i nemen keneng at lebelen. La kerepmo lungusno at laradi i vaase asu lempanga salai i umsu at lebelen.”

*Luradi Xipkip Gu*  
(Mt 7:21-27)

<sup>46</sup> \*La ne Iesu ga tong bok lava-paase poovo ridi xeretna, “Tila mi tong ia do, ‘Leeme Silok, Leeme Silok,’ ketla kopmen mina mumu asu levelinga rak?”

<sup>47</sup> Ana lox ase nimi mi tara neni ing tonga levelinga rak la ira mumu asu i.

<sup>48</sup> Neni i ngan laradi ga vaxaru loogu. Ga sev asi lemet ukopok tinotno la gara lok li ba laraexem at nom loogu uto at laxanuat. Ladanut ga xip pot la gak ma nom loogu, ketla loogu kopmen goxo subu. Mila ni ga xip avukat tinotno i.

<sup>49</sup> Ketla mo laradi i ronga levelinga rak la kopmen na mu asu i, neni i ngan laradi ga vaxaru loogu to at laxangka, la kopmen ni goxo vaxaru i at laxanuat. Ise ladanut gak ma nom loogu, la soso mun ga subu, la ga rem utut axap.”

\* 6:46: Mal 1:6; Mt 7:21

## 7

*Iesu Ga Lox Aroo Lasaxaruki At Laasesep Boro Rom*  
(Mt 8:5-13)

<sup>1</sup> Iesu ga vaase axap mo levelinga rinedi limixin, la neni gat pas uto Kaprenaum.

<sup>2</sup> Lara laasesep at limixin esep boro Rom mo gak lok, neni ga ruuna lasaxaruki, la neni ga vavara aleng tinotno i. Mo lasaxaruki gak meres la ma lixilik neni ga lok do na met.

<sup>3</sup> Se nom laasesep ga ronga levelinga mumu ne Iesu, neni ga riki lentaba luvuttadi silok at leme Judaia saparap ne Iesu, kusu dina sing i do ni nat pas la na lox aroo mo lasaxaruki ren.

<sup>4</sup> Diga vot parap ne Iesu la diga sing aleng i xeretna, “I lox avukat tinotno do una lok tooro mo laasesep,

<sup>5</sup> mila neni i balamu aleng limixin me Judaia la neni ga raba pilas kusu na xip loogu singising atnama.”

<sup>6</sup> Kuren la ne Iesu ga emu eburu minedi.

Goxo vaxalom boro ap mo loogu, la mo laasesep ga riki lentaba larapen tangas teren kusu dina vot pasa ne Iesu. Diga tong asu levelinga at laasesep ga lok keretna, “Leeme Silok, nemen uta rupot saparav ia. Nenu u silok solo la ixo lox avukat do una beles at loogu rak,

<sup>7</sup> la nenia axo lox avukat kusu ana vot parav u. Ketla una tong mun i la lasaxaruki rak naba lox avukat.

<sup>8</sup> Nenia aklen i do nenu u epovo ri lox i na mila nenia a nemen maxopok at lentaba gomgo rak la lentaba bok di nemen maxopok tarak. A lok ti lara, ‘Unat pas!’ la ni it pas. A lok ti lara, ‘Ude u!’ la ni it pas saparav ia. La a lok ti lasaxaruki rak, ‘Una lox i na!’ la ni i lox i.”

<sup>9</sup> Iesu ga ronga i na levelinga, la ga sangu aleng. Neni ga ru gili la ga lok ti limixin diga mumu asu i, “A tong i rinimi do, keneng at lengkot axap Israel, a goxo long lenget tara lununu ren i silok ngan na laradi!”

10 Mo luvuttadi, laasesep ga riki nedi, digamlong uto at loogu ap mo laasesep la diga long lenget ka lasaxaruki ren mo ga lox avukat ta.

*Iesu Ga Lox Arooro Amlong Lamdak At Latkin Naa*

11 Melemu lixilik Iesu ga vas kaxat uto at lara lemenemen laasen teren Nain, la lavaun pinivu ren eburu minedi buaang limixin diga emu min.

12 Diga rupot go at langas povolo ap mo lemenemen. La limixin mo digap kip lara lorongan, neni leges amdak mun at labannaa, la buaang nedi limixin ap mo lemenemen digat pas eburu min.

13 \*Se Leeme Silok ga ven i, lebelen ga lok bukbulu aleng tin la ni ga lok ti mo labannaa, "Nemen utang teng."

14 \*La neni ga vas saparap mo lorongan la ga long tu at loora ren la mo luvuttadi digap kiv i, diga ru. Iesu ga lok, "Laau radi! A tong i ru do, una xatu kaxat!"

15 \*Laradi no ga met ga xis upana la ni ga vaase la ne Iesu ga lok ka i la ga raba amlong nenen min.

16 \*Limixin axap diga lingun la diga emi asu mi ne Moroa, la diga lok, "Langsangan leeme vapaase ali ira vot pam kantubu atdik! La ne Moroa ira vot pam kusu na lox arooro limixin teren!"

17 La na levelinga mumu ne Iesu ga epeseves ap mo lenep silok axap la at levennep petpes bok saparap Judaia.

*Jon Ga Riki Luradi Loklox Ase Ren Uto Saparap Ne Iesu (Mt 11:2-19)*

18 Lavaun pinivu at ne Jon diga tong mo levelinga mumu ne Iesu ri ne Jon. Neni ga ro xaka lura atdi saparav i,

19 \*la ga riki du saparap Leeme Silok kusu duna sue i mi levelinga

xeretna, "Kereva, nenu vam Lanarong, kopla tara gove manaba ngangais i?"

20 Duga rupot saparap ne Iesu la duga lok, "Jon laradi sep susu, i sak tiki nema kusu mana sue u, 'Kereva, nenu vam Lanarong, kopla tara gove manaba ngangais i?' "

21 Ap mo laaleng Iesu ga lox aroo buaang nedi limixin basinge levenanmeres la ga riki asu lubunggas basinge limixin la ni ga lox arepalas bok levengkatli atnedi buaang limixin, levengkatli atdi ga main.

22 \*Neni ga vorang luradi vapaase at ne Jon mi levelinga keretna, "Munamlong la muna tong i ri ne Jon mumu lempanga mu ven i la mu ronga i. Nedi limixin mi lengkatli main, mo di reven manga. Nedi lengkangkedek atdi ga lok kapmek, mo dit pas avukat. La nedi dik meres mi lanmeres gu (leprosy), mo di lox avukat. Nedi levenbaalung i repe, ding tonga manga. La nedi diga met pam, mo di roo xat amlong. La Lagale Lavavang mo a vavang min ti limixin banbalo.

23 \*Naba lox avukat ti neni laradi noxo subu basinge ia, la lebelen ixo lok kapmek ti na lugugu rak."

24 La luradi ne Jon ga riki du, dugamlong, la ne Iesu ga paase ri limixin mumu ne Jon. Ni ga lok, "Nemi migat pas uto saparap ne Jon to at lamatbin, laradi salai miga doxoma i xusu miba ven i? Kereva, miga lok do miba ven laradi i lok ngan lovobeo, lamanman it mas aonen i?"

25 Laradi salai migat pas la miga ven i? Kereva, miga ven laradi ga siga lavanga singsiga avukat? Kopmen. Limixin ding siga lempanga singsiga avukat la di ruuna lapnovos silok, nedi kopmen di nemen at lamatbin kerekngan ne Jon. Di nemen to at laraogu nunuan.

26 \*Mina tong i ria, lavanga salai migat pas kusu mina ven i? Taradi

\* 7:13: Lu 8:52 \* 7:14: Lu 8:54 \* 7:15: 1 Lav 17:23; 2 Lav 4:36 \* 7:16: Lu 1:68; 19:44 \* 7:19: Sam 40:7; Mal 3:1; Li 1:8 \* 7:22: Ais 35:5-6 \* 7:23: Ais 61:1; Lu 4:18 \* 7:26: Lu 1:76

vapaase ali? I ruturun. A tong i rinimi do nemi miga ven laradi i silok ti lavaeme vapaase ali at ne Moroa.

<sup>27</sup> Ne Jon neni laradi, Lovoang Kaala ga vaase min keretna,

‘Laradi vapaase rak, anaba riki amgo i ru xusu na lox agagas li langas tu.’”

*Mal*  
**3:1**

<sup>28</sup> La ne Iesu ga lok bok, “A tong i rinimi do ne Jon neni i silok aleng tinedi limixin axap at na lavatbung menemen. Ketla do tara i lok ngan laradi gamasa la neni lanat at Linintoo at ne Moroa, neni i silok aleng ti ne Jon.”

<sup>29</sup> \*Limixin axap eburu mi luvuttadi loklok ka pilas diga ronga levelinga at ne Iesu. Nedi mun na limixin diga lok kaka lesepe susu at ne Jon la kerepmo diga siam ka leven-taangas at ne Moroa.

<sup>30</sup> \*Ketla lubang Parisi eburu mi luvuttadi loklox ase at Laulis Linga diga ronga xepe lesepe susu at ne Jon, la kerepmo diga sok tixirixes losoxovo at ne Moroa ridi.

<sup>31</sup> La ne Iesu ga lok bok, “Limixin at na levenaleng ana vaase poovo midi mi lavanga salai?”

<sup>32</sup> Di lok ngan laxamdak mi laxaa-lik kakalik dit kis to at loxot etang. Lara libinam atdi dip kup ti mo libinam,

‘Magak pixan lengkompixan epot tinimi, ketla nemi mi goxopara na tii momo. Magak pixan lengkompixan bukbulu, ketla mi goxopara i do minang teng!’

<sup>33</sup> La ne Jon laradi sep susu ga vot, la ni ga mun anan la kopmen goxo inin laxadan vaen, la nemi miga lok do, ‘Lagas mo i nemen teren!’

<sup>34</sup> \*Ketla nenia, Laradi Mevana, aga vot, la nia aga anan la aga inin la miga lok, ‘Mina ven ba na laradi! Neni lavatpanga xoxo anan, la laradi inin, la i etangas mi luvuttadi loklok

ka pilas eburu mi limixin kakap-mek!’

<sup>35</sup> Ketla lugugu at ne Moroa i pisik avukat la kerepmo i lox asuusu i do losoxovo at ne Moroa i lox avukat.”

*Iesu Gat Kis To At Loogu At Ne Simon Neni La Parisi*

<sup>36</sup> \*Lara atnedi lubang Parisi ga lam kaka ne Iesu kusu na anan eburu min. Iesu ga beles to xeneng at loogu ren la ga xis kusu ti anan.

<sup>37</sup> \*Lara latkin mo ga nemen ap mo lemenemen, lorooro ren gat pospa aleng. Neni ga ronga i do ne Iesu mo ga anan to at loogu ap mo laradi. Kuren la ni ga lok ka lubuxom tuntu dan teren ga umsu mi laxadan mavak.

<sup>38</sup> La ni ga vot pasa ne Iesu la ga ru to melemu saporap luxangkedek teren, gang teng la gak lox amlu luxangkedek at ne Iesu mi leveng-abilidan at luxatli ren. La ni ga ves amesemes luxangkedek at ne Iesu mi lavatkabinim at lavatlak teren, la ga nes luxangkedek teren la ga soli laxadan mavak to at nom luxangkedek teren.

<sup>39</sup> Nom laradi no ga sat kaka ne Iesu ga ven i na, la neni ga doma i xeretna, “Mo do na laradi neni leeme vapaase ali ruturun, neni gi baklen i do latkin salai mo i long tu ren la lorooro bilinga mo i nemen teren!”

<sup>40</sup> La ne Iesu ga lok tin keretna, “Simon, a ruuna lara lavanga kusu ana tong i ru.”

Simon ga lok tin, “Laradi loklox ase, una tong i ria.”

<sup>41</sup> La ne Iesu ga tong lavapaase poovo mumu labalamu ap mo latkin. Ni ga lok keretna, “Lura luradi duga lok ka lempilas boro at laradi nop-novos. Lara ga lok ka lavalimo sangaun kobot (500) denarias, la mo lara lavalimo sangaun denarias.

<sup>42</sup> Nedu eburu du goxo epovo kusu duna vorang amlong mo lempilas teren. Kuren la ni ga lok tidu do

\* 7:29: Lu 3:12 \* 7:30: Mt 21:32 \* 7:34: Lu 15:2 \* 7:36: Lu 11:37 \* 7:37: Mt 26:7; Mk 14:3; Jo 12:3

nemen duta vorang i. Ua lara atdu na, ba balamu aleng mo laradi?”

<sup>43</sup> Simon ga vorang i rin keretna, “Nia a lok do mo lara, laradi nop-novos ga doxomampe lavalimo san-gaun kobot (500) denarias teren.”

Iesu ga lok, “Lovoporang taram ik mokso.”

<sup>44</sup> \*Melemu Iesu ga rem gili uto at latkin la ga lok ti ne Simon, “Una ven i na latkin. At pas ude at loogu ram, la uxo raba ia mi taxadan kusu ti gos luxangkedek tarak. Ketla neni i gos luxangkedek tarak mi lengkabilidan at luxatli teren la neni i ves mesemes i mi lavatkabinim at lavatlak teren.

<sup>45</sup> Nenu xopmen una nes ia, ketla se nenia a beles de xeneng, neni xopmen na molo ti nes luxangkedek tarak.

<sup>46</sup> \*Uxo lok li laxadan mavak at lavatlak tarak, ketla neni i soli laxadan mavak at luxangkedek tarak.

<sup>47</sup> Kuren la monga a tong i ru, do langsung labalamu ren mo ira lox asuusu vam i do a doxoma xepe buaang leveloklok kakapmek teren. Mo do nege, i ruuna lamanbalamu lixilik mun i lox asuusu i do laxakapmek lixilik mun, ara doxoma xepe vam i.”

<sup>48</sup> \*La ne Iesu ga lok ti mo latkin, “Leveloklok kakapmek taram, a doxoma xepe i.”

<sup>49</sup> Lentaba luvuttadi digat kis go, diga epaase kantubu atdi xeretna, “Nege i na laradi, la neni xa i doxoma xepe laxakapmek?”

<sup>50</sup> \*Ketla Iesu ga lok ti mo latkin, “Lununu ram ira lok arooro vam u. Unat pas mi limila.”

## 8

### *Lavakin Diga Emu Mi Ne Iesu*

<sup>1</sup> \*Melemu at lentaba levenaleng manga, Iesu gat pas kantubu at levenmenemen silok la lengkon mene-men kakalik, ga vavang mi Lagale Lavavang at Linintoo at ne Moroa.

Lasangaun legepura lavaun pinivu diga emu min,

<sup>2</sup> \*la lentaba lavakin bok, gano ne Iesu ga lox avukat nedi basinge levenanmeres atdi la ga riki asu lubung-gas basinge di. Ne Maria (laasen bok teren ne Magdalene) gano lavanuti lubunggas ga ravasu basinge i.

<sup>3</sup> Joana, latkin at ne Kusa, laradi gomgo gak lok tatao at loogu at ne Erodes. La ne Susana, la nedi buaang bok lavakin diga lok tooro ne Iesu eburu mi lavaun pinivu ren mi levempilas nedi digak pakes tin.

### *Lavapaase Poovo At Laradi Gatlotlo Piao*

(Mt 13:1-9; Mk 4:1-9)

<sup>4</sup> Buaang limixin digat pot saparap ne Iesu boro at levenmenemen axap. Se diga vot eburu, Iesu ga tong lava-paase poovo ridi xeretna.

<sup>5</sup> “Lara laradi lotlo gat pas uto xataamang kusu natlotlo piao. Lentaba levenit piao ga subu ro at langa, la limixin digat pas teren, la lavapixa diga rava pot la diga rok axav i.

<sup>6</sup> Lentaba levenit piao ga subu ro at loxongkangka laxanuat ga nemen teren. La se diga suu kaxat, diga met ta mila mo loxongkangka goxopmen tadan teren.

<sup>7</sup> Lentaba levenit piao ga subu ro at livin gagas, la diga suu xat eburu mi nom livin gagas. Ketla livin gagas ga itis di.

<sup>8</sup> La lentaba levenit piao ga subu ro at loxongkangka avukat. La na levenit piao ga suu xat la ga visik laxampeven piao solo.”

La ne Iesu ga lox axap mo lava-paase poovo la ga lok tidi xeretna, “Do mi ruuna levenbaalung, mina rongga avukat na levelinga.”

### *Lavasuun At Levempapaase Poovo*

(Mt 13:10-17; Mk 4:10-12)

\* 7:44: Lur 18:4 \* 7:46: Sam 23:5 \* 7:48: Lu 5:20-21 \* 7:50: Lu 8:48; 17:19; 18:42 \* 8:1: Lu 4:43 \* 8:2: Mt 27:55-56; Mk 15:40-41; Lu 23:49



<sup>9</sup> Lavaun pinivu diga sue ne Iesu do ua lavasuun ap mo lavapaase poovo.

<sup>10</sup> La ne Iesu ga lok tidi, “Moroa ira raba vam nimi mi lakleklen at Linintoo ren, gano ga nemen alipe. Ketla tinedi limixin petpes levelinga mumu Linintoo i lok ngan mun lava-paase poovo xusu limixin di noxo xasep teren. I ngan levelinga at Lovoang Kaala i lok keretna,

‘Nedi di reven lugugu, ketla di noxo ven kibis i. Ding tonga mo levelinga, ketla di noxo xasep teren.’” *Ais 6:9*

*Iesu Ga Soxomus Lavapaase Poovo At Laradi Gatlotlo (Mt 13:18-23; Mk 4:13-20)*

<sup>11</sup> \*La ne Iesu ga lok tidi xeretna, “Lavasuun at na lavapaase poovo i lok keretna. Levenit neni levelinga at ne Moroa.

<sup>12</sup> Ti levenit ga subu ro at langas, i ru katling nedi ding tonga mo levelinga. Ketla ne Satan i tupot la ik lok kepe nom levelinga basinge lebelen di, kusu ti lok pes lununu atdi la di noxo lok kaka lorooro.

<sup>13</sup> Ti levenit no ga subu ro at loxot uat, i ru katling nedi di rongga levelinga la di momo xaka i, ketla kopmen na si aleng ukeneng at lorooro atdi. Di nunu mun at loxonatat aleng la do loklok tong pen i vot, dira subu manga.

<sup>14</sup> Ti levenit ga subu to at loxongkangka mi laxan gagas, i ru katling nedi di rongga mo levelinga. Ketla levenainbulu la lapnovos la lomomo at na lorooro i umsu xeneng atdi la ira itis lorooro atdi. La kerepmo kopmen dina visik levempanga nunuan at lorooro atdi.

<sup>15</sup> Ti levenit no ga subu ro at loxongkangka avukat, i ru katling nedi di rongga mo levelinga la di lok li avukar i xeneng at lebelen di, mo i nunuan axap. La nedi di nemen lolos se di visik levempeven avukat.”

*Lavapaase Poovo At Lababao (Mt 5:15; Mk 4:21-25)*

<sup>16</sup> \*La ne Iesu ga tong lavapaase poovo ridi keretna, “Kopmen teta na sox aros lababao la na vung pavaa i mi lavatbaaket kopla na lok li i maxopok at loora. Ketla neni ik lok li i ro at lenep kasep, kusu limixin diba ven losoosoo ren mo do dina beles to xeneng ap mo loogu.

<sup>17</sup> \*Lempanga mumu Linintoo no ga nemen alipe rinotno, naba ravasu ti lasaxaven. La levelinga, lavasuun teren no i nemen alipe, melemu naba xasep.

<sup>18</sup> \*Kuren la mina lok tatao avukat nimi, kusu ting tonga avukat levelinga at ne Moroa. Do tara na siam ka mo levelinga Moroa i raba i min, Moroa naba raba box i mi laxasep avukat at levelinga ren. Dola tara noxo siam ka levelinga at ne Moroa, Moroa naba lok pes bok laxasep kakalik teren, keke i do neni i doxoma i do im tebeng i.”

*Luvutneton Mi Nenen Ne Iesu (Mt 12:46-50; Mk 3:31-35)*

<sup>19</sup> Nenen ne Iesu mi luvutneton diga vot pasa i, ketla di goxo epovo kusu dinat pas saparav i mila limixin diga umsu.

<sup>20</sup> Lara laradi ga lok ti ne Iesu, “Nenam eburu mi luvutnetam no di tu kamang la di vara i do dina epaase eburu minu.”

<sup>21</sup> Ketla ne Iesu ga lok tidi axap keretna, “Nedi mun ding tonga levelinga at ne Moroa la di mumu asu i, nedi mun luvutnaga mi luvutnetak.”

*Iesu Ga Lox Amila Lamanman (Mt 8:23-27; Mk 4:35-41)*

<sup>22</sup> At lara laaleng Iesu ga emu eburu mi lavaun pinivu ren la ni ga lok tidi, “Ata sen polo na lavatdan kis uto at lenep meo.” La diga los kas at lese pang la diga sen kaxat.

<sup>23</sup> Se diga sen, Iesu ga unga. La mo langsung lamanman ga mas lolos mo lavatdan kis, la larapotas ga luxa

lesepang la ga auret do lesepang na rem gili la nedi axap dina seeve.

<sup>24</sup> Lavaun pinivu diga vot pasa ne Iesu la diga sox aus i la diga lok, “Leeme Silok, Leeme Silok! Ata seeve nga na!”

Iesu ga xatu kaxat la ga vaase lolos pe lamanman mi laras ga ekapus. La duga lox atnaasan la langsung an lenmila nga ga nemen.

<sup>25</sup> La neni ga sue lavaun pinivu ren, “Kereva, kopmen tununu at-nimi?”

Ketla diga sangu aleng la diga lingun la diga sue nedi getgesara, “Laradi salai na? I vaase sok lamanman la lavatdan kis la dura rong a res teren!”

*Iesu Ga Riki Asu Lubunggas Basinge Laradi*

*(Mt 8:28-34; Mk 5:1-20)*

<sup>26</sup> La ne Iesu mi lavaun pinivu ren diga rupot to loxon ap mo lavatdan kis to at lenep Gerasa, na lemenemen ga nemen saparap lavatdan kis Galili.

<sup>27</sup> La ne Iesu ga vas su uloxon la ni ga ekip tangarang mi lara laradi me go ap mo lemenemen, lubanggas ga nemen teren. Buaang levenmaares neni gak lok beleben mene, la ni goxo nemen to xolonu. Ketla neni ga nemen amisik to at levenbuang digak mikmit labarongan e.

<sup>28</sup> Se neni ga ven ne Iesu, ni ga xup silok la ga xis tiktikbu mi luvatgulom teren to melamgo ren, la gap kup silok ti ne Iesu, “Iesu, Nitna Leeme Avolo, ne Moroa! Lavanga salai u vara i do una lox i ria? A sing u do nemen uta lox asongot aleng ia!”

<sup>29</sup> Ni ga tong i na mila ne Iesu ga tong pam i ri lagas kusu na vas su basinge i. Buaang laxanaleng na lagas ga sep kapmex i la ap mo levenaleng neni ga nemen maxopok at loklok tatao at limixin, diga xoxo lukngen la luxangkedek teren mi lemparoos sen. Ketla neni ga baba koxorop nom lemparoos sen la lagas ga sasat ka i uto at lenep goxopmen tempanga ren.

<sup>30</sup> Iesu ga sue i, “Nege laasen taram?”

La ni ga lok, “Laasen tarak ne Buaang.” Mila buaang lubanggas diga beles pam teren.

<sup>31</sup> La mo lubanggas diga ngising ne Iesu do nemen neni guta sak tiki di uto at lemeroon.

<sup>32</sup> Buaang laxanbo mo diga nemen auret, diga anan to at lakaana. Lubunggas diga sing ne Iesu kusu na riki asu di uto at nom laxanbo. La ni ga ke aonon di.

<sup>33</sup> La lubanggas diga sixisu basinge nom laradi la diga vubeles uto xeneng at nom lababo. La nedi axap nom laxanbo diga sixisi at lakaana la diga los tup ukopok at lavatdan kis la diga xong axap.

<sup>34</sup> Luvuttadi digak lok tatao mo laxanbo diga ven i na, la diga sixit kaxat la diga tong aonon na levelinga ri mo limixin to at lemenemen atdi la ri limixin to at lentaba lengkot petpes bok.

<sup>35</sup> La limixin digat pas kusu dina ven mo lavanga ga vot. Diga vot pasa ne Iesu la diga long lenget mo laradi, lubanggas ga vas su basinge vam i, mo gat kis saparap luxangkedek at ne Iesu, ga siga lempanga singsiga la lodoxoma ren ga xasep ta, la diga marat.

<sup>36</sup> Nedi diga ven i na diga tong ri limixin do mo laradi ga lox avukat kereva.

<sup>37</sup> La nom limixin ap mo lenep Gerasa diga sing ne Iesu kusu na onon ta, mila diga marat aleng. La ne Iesu ga los kas at lesepang la ga sen kaxat nga.

<sup>38</sup> La mo laradi lubanggas ga vas su basinge i, ga sing ne Iesu, “A vara i do ana emu eburu minu.”

Ketla ne Iesu ga riki aonon i, ga lok,

<sup>39</sup> “Unamlong uto xolonu la una tong na lavanga ne Moroa i lok pam i ru.” La mo laradi gat pas maxeneng at nom lemenemen axap ga tong mo lavanga ne Iesu ga lok pam i rin.

*Loolik At Ne Jairas*

*(Mt 9:18-26; Mk 5:21-43)*

<sup>40</sup> Se ne Iesu gamlong uto at lavatdan kis at lenep menak, buaang limixin diga paase momo min, mila nedi axap diga ngangais i.

<sup>41</sup> Ap mo mun loxonaleng lara laradi, laasen teren ne Jairas ga vot. Neni laradi gomgo at loogu singising me go. Ni ga xis tiktikbu mi luvatgulom teren saparap luxangkedek at ne Iesu la ga sing i xusu nat pas uto at loogu ren.

<sup>42</sup> Mila legesolik mun teren ga lasangaun mi legepu maares teren mo ga auret kusu na met.

Se ne Iesu gat pas uto at loogu at ne Jairas, buaang nedi limixin diga umsu saparav i at lengkot axap.

<sup>43</sup> La lara latkin mo ga nemen. Lanmeres gaaling gak lox amisik teren at levenaleng axap, ga epovo at lasangaun mi legepu maares. La buaang laxampilas teren ga xap gamasa mun ti luvuttadi sangsanga, ketla kopmen teta goxo epovo kusu na lox avukar i.

<sup>44</sup> Neni gat pas eburu mi limixin to melemu at ne Iesu la ga long tu at lungusungus at lavanga singsiga at ne Iesu la soso mun nom lanmeres ga xap ta.

<sup>45</sup> La ne Iesu ga sue di xeretna, "Nege i long tu rak?"

La nedi axap diga sev apkap la ne Pita ga lok, "Leeme Silok, buaang limixin mo dit pas saparav u la mo di mumu u."

<sup>46</sup> Ketla ne Iesu ga lok, "Lara mo i long tu rak, a suma i do lolos i sixisu basinge ia."

<sup>47</sup> La mo latkin ga ven i do diga long lenget ka i. Kuren la ni ga vot pasa ne Iesu, ga dede la ga xis tiktikbu mi luvatgulom teren saparav i. Mo go melamgo at limixin axap, neni ga tong asu ua lavasuun teren la ni ga long tu at ne Iesu la kereva neni ga lox avukat soso mun.

<sup>48</sup> \*La ne Iesu ga lok tin, "Latkin, lununu ram i lox avukar u. Unat pas at lenmila."

<sup>49</sup> Iesu move ga paase na levelinga la lara laradi gat pas boro at loogu at laradi gomgo, ne Jairas. La ni ga lok ti ne Jairas, "Loolik taram ira met pam, la nemen uta lox angtang bok ba laradi loklox ase."

<sup>50</sup> Ketla ne Iesu ga rongga i la ga lok ti ne Jairas, "Nemen uta marat, una nunu mun la neni naba rooro."

<sup>51</sup> Se neni ga vot to at loogu, neni goxo siam abeles tara ukeneng at loogu xusu dita vubeles eburu min, ketla ne Pita, Jon la ne Jems la ne temen mi nenen nom loolik kusuk mun.

<sup>52</sup> \*Limixin axap go digang teng la digak saxaanu ap mo loolik. La ne Iesu ga lok, "Nemen mitang teng. Loolik kopmen na met, neni mo i unga mun!"

<sup>53</sup> Diga lok kalise i mila digaklen i do loolik mo gara met pam.

<sup>54</sup> \*Ketla ne Iesu ga ranga axatu i mi lekngen la ga vaase lolos keretna, "Loolik, una xatu kaxat!"

<sup>55</sup> Loroonan teren gamlong la ni ga xatu kaxat soso mun upana. La ne Iesu ga tong i ridi xusu dina raba i mi toxompanga anan.

<sup>56</sup> \*Temen mi nenen duga sangu aleng, ketla ne Iesu ga vaase lolos di do nemen di guta tong i na lavanga ri teta.

## 9

### *Iesu Ga Riki Asu Lavaun Pinivu (Mt 10:1,5-15; Mk 6:7-13)*

<sup>1</sup> At lara laaleng Iesu ga ro bubua ka lasangaun legepura lavaun pinivu saparav i la ga raba nedi mi lolos kusu ti lox asu lubanggas la dina lox aroo limixin mekmeres.

<sup>2</sup> La neni ga lok do na riki asu di xusu dina vavang mi Linintoo at ne Moroa la dina lox aroo limixin mekmeres.

<sup>3</sup> La neni ga lok tidi, "Nemen mita xip kaka tempanga eburu minimi ri mo lavatpas. Nemen takdak, la

\* 8:48: Lu 7:50 \* 8:52: Lu 7:13 \* 8:54: Lu 7:14 \* 8:56: Mk 7:36; Lu 5:14

nemen mita lok kaka teventat, la nemen teveluxa, la nemen tevempilas, la nemen bok tevempanga singsiga etara xun.

<sup>4</sup> \*Mo do mina beles at tara toogu la limixin dina siam ka nimi, mina nemen eburu midi se minaba vas kaxat basinge mo lemenemen.

<sup>5</sup> \*Mo do limixin di noxo siam ka nimi, mina on basinge nom lemenemen la mina semla xepe laxakup basinge levengkangedek atnimi, i ngan loklok katling tidi kusu ti lox asuusu lebelemamao at ne Moroa.”\*

<sup>6</sup> La lavaun pinivu diga vas kaxat, la digat pas kantubu at lara mennen, diga vavang mi Lagale Lavavang, la diga lox aroo limixin at lengkot axap.

### *Erodes Ga Rangku*

*(Mt 14:1-12; Mk 6:14-29)*

<sup>7</sup> \*Erodes, laradi gomgo boro Galili, ga ronga mo lempanga ga vot. La ni ga rangku aleng, mila lentaba luvuttadi mo digak lok do, “Jon, laradi sep susu mo ga roo xat amlong bok!”

<sup>8</sup> Lentaba diga lok do ne Elaisa mo ga vot, la lentaba diga lok do lara leeme vapaase ali megano mo ga roo xat amlong ti lorooro.

<sup>9</sup> \*Erodes ga lok, “Agara ra korop pam laxaka at ne Jon. Ketla nege i na laradi, mo nia a ronga i do na lok na lempanga?” La ni gak lok tong pen i do na ven ti ne Iesu.

### *Iesu Ga Raba Luxa Buaang Limixin*

*(Mt 14:13-21; Mk 6:30-44; Jo 6:1-14)*

<sup>10</sup> Luvuttadi vavang digamlong la diga tong i ri ne Iesu do leven gugu axap diga lox i. Neni ga sat kaka di eburu min la nedi xusuk mun diga vas kaxat uto at lara lemenemen, laasen teren Betsaida.

<sup>11</sup> Se limixin diga ronga i na, diga mumu asu i. La neni ga siam ka di mi lomomo, la ga paase ridi mumu

Linintoo at ne Moroa, la neni ga lox aroo nedi, diga meres.

<sup>12</sup> Ga ukantinao lavaun pinivu diga vot pasa i la diga lok, “Una riki aonon limixin uto xusu dibat pas uto at levenmenemen la at lengkot petpes bok la dina puse ka tempanga anan la tengkot mikmidi bok tidi, mila na loxot i mimila rino.”

<sup>13</sup> Ketla ne Iesu ga lok tidi, “Nemi xa mina raba nedi mi teveluxa kusu ti anan.”

La diga vorang i xeretna, “Ma ru-una mun lavalimo lengkongkide la legepu venmat. Kereva, u vara i do manat pas la mana un kaka teveluxa rinedi na buaang limixin?”

<sup>14</sup> Luvuttadi remes go diga epovo at lavalimo larabin sangsangaun kobot. (5000)

Iesu ga lok ti lavaun pinivu ren, “Mina tong i ri limixin kusu dina xis kopok at lengkonbinam tadi i epovo at lavalimo sangaun.”

<sup>15</sup> Lavaun pinivu diga lox i xuren, la diga tong i ridi do dina xis kopok.

<sup>16</sup> Iesu ga lok kaka mo lavalimo lengkongkide la legepu venmat, la ga milik aurut uto vana at laxalibet, la ga tong avukat ti ne Moroa la ga sebex i, la ga raba lavaun pinivu min kusu dina epes i xantubu at limixin.

<sup>17</sup> La nedi axap diga anan la diga an mais. La lavaun pinivu diga luxa lasangaun legepura leventat mi leveluxa mo diga an ake ren.

### *Pita Ga Tong Asu Lununu Ren*

*(Mt 16:13-20; Mk 8:27-30)*

<sup>18</sup> At lara laaleng ne Iesu xusuk mun gat pas kusu nang sing, la lavaun pinivu diga vot pasa i. La neni ga sue di, “Limixin di lok do nenia nege?”

<sup>19</sup> \*Diga vorang i rin keretna, “Lentaba di lok do nenu ne Jon laradi sep susu. Lentaba di tong i do nenu ne Elaisa. La lentaba di tong i do nenu lara leeme vapaase ali megano mo i roo xat amlong.”

\* 9:4: Lu 10:4-11 \* 9:5: Lu 10:11 \* 9:5: Na loklok i lox asuusu i do ne Moroa naba raba lumumuat ti limixin ap mo lemenemen. \* 9:7: Mt 16:14; Mk 8:28; Lu 9:19 \* 9:9: Lu 23:8 \* 9:19: Lu 9:7-8

<sup>20</sup> \*La ne Iesu ga sue di, “Kereva ba nimi? Nemi mi lok do nenia nege?”

Pita ga lok, “Nenu Lanarong at ne Moroa.”

<sup>21</sup> La ne Iesu ga vaase pe lolos di, do nemen di guta tong i ri tara do neni Lanarong.

*Iesu Ga Paase Mumu  
Lanmet Teren*

(Mt 16:21-28; Mk 8:30-9:1)

<sup>22</sup> \*La ne Iesu ga lok tidi, “Nenia Laradi Mevana, anaba xip losongsongot solo, la loxongkulao silok at limixin me Judaia, la lavamaasa silok la luvuttadi loklox ase at Laulis Linga dinaba sok tixirixes kepe ia. Dinaba sev amer ia, la nenia anaba roo xat amlong at laaleng sepsev avantun.”

<sup>23</sup> \*La neni ga lok ti mo limixin axap, “Mo do tara i vara i do na emu minia, neni na domampe lorooro axap teren, la na gagas li i xusu nap kip losongsongot at levenaleng axap, la na mumu asu ba ia.

<sup>24</sup> \*Do nege i vara i do na ranga alis lorooro ren, neni naba sang apkav i. Ket do nege i soxope lorooro ren ti lok luvukat tarak, neni naba lok kaka lorooro avolo.

<sup>25</sup> I lok kapmek do taradi na ruuna ka lempanga axap at na lavatbung menemen, la neni i subu basinge lorooro at ne Moroa.

<sup>26</sup> \*Mo do taradi na lok mamangan kepe ia eburu mi levelinga rak, nenia, Laradi Mevana, anaba sok tixirixes xepe i ap mo laaleng nenia ana si ukopok mi lisisixam silok tarak la lisisixam silok at ne Tamak la lubung angelo melemeleangan teren.

<sup>27</sup> Mina doxoma i na! I ruturun tinotno, a tong i rinimi do lentaba atnimi na, di noxo met se at nom laaleng dinaba ven livipisik at levelinga mumu Linintoo at ne Moroa.”

*Moroo Ga Lox Arepukus  
Ne Iesu*

(Mt 17:1-8; Mk 9:2-8)

<sup>28</sup> Iesu ga vaase axap na levelinga, la melemu at lavanuan levenaleng gara volo, Iesu ga lam kaka ne Pita, ne Jon, la ne Jems eburu min. La diga urut uto vana at lakaana kusu dina ngising.

<sup>29</sup> Ga se neni ga lok lising, lemeren axap teren ga milik gamgames, la lavanga singsiga bok teren gam games aleng!

<sup>30</sup> La ne Moses mi ne Elaisa duga rupot boro vana at laxalibet eburu mi lisisixam silok ga vung pavaa du.

<sup>31</sup> \*La duga vot pasa ne Iesu la duga epaase eburu min do neni naba lox asoorun lavapaase ali at ne Moroa do neni naba met to Jerusalem.

<sup>32</sup> \*La ne Pita eburu mi larapen tangas teren diga unga met. Ketla diga aus kaxat la diga ven lisisixam silok at ne Iesu la luradi mo duga tu eburu min.

<sup>33</sup> Se luradi duga lok do duna on basinge ne Iesu, Pita ga lok ti ne Iesu, “Leeme Silok, i lox avukat tinotno at loklok atnama nade. Mana lok tavantun taraogu xukuxut, tara ru, tara ri ne Moses, la tara ri ne Elaisa.” Ni goxoklen tinotno i do laai mo ni ga paase min.

<sup>34</sup> Pita move ga paase, la lusugao ga ravasi la ga vung pavaa di. La lavaun pinivu diga marat aleng.

<sup>35</sup> \*La levelinga ga ravasu boro xeneng at lusugao ga lok keretna, “Anaa ne Nuruk. Aga soxolik ka vam i. Minang tonga levelinga ren.”

<sup>36</sup> Ga se na levelinga ga xap, Iesu xusuk mun mo ga nemen eburu mi lavaun pinivu ren. Lavaun pinivu digak lok pilo mumu na lempanga, la di goxo tong asu i na ri teta ap mo levenaleng.

*Iesu Ga Riki Xepe Lagas Basinge  
Lara Lamdak*

(Mt 17:14-18; Mk 9:14-27)

<sup>37</sup> Ap mo manga laaleng petpes Iesu mi lavaun pinivu ren diga vas si boro vana at lakaana, la buaang

\* 9:20: Jo 6:68-69 \* 9:22: Lu 9:44; 18:32-33 \* 9:23: Mt 10:38; Lu 14:27 \* 9:24: Mt 10:39; Lu 17:33; Jo 12:25 \* 9:26: Mt 10:33; Lu 12:9; 2 Ti 2:12 \* 9:31: Lu 9:22; 13:33 \* 9:32: Jo 1:14; 2 Pi 1:16-18 \* 9:35: Lu 3:22

limixin diga ekip tangarang mi ne Iesu.

<sup>38</sup> La lara laradi ga xup silok to xantubu atdi nom limixin, ga lok keretna, "Leeme loklox ase! Pen i na, a sing u do una ven mumu na lamdak. Neni legesamdak mun tarak!

<sup>39</sup> Lara lagas ing tanga tu ren la soso mun ip kup kaxat lolos la i lulu asi min uto ri laxangka. La lamdak i dede la lemeseng it kis pe lungusno ren! La na lagas ip sep amisix i la ma lixilik do na sev amer i!

<sup>40</sup> A sing lavaun pinivu ram kusu dina riki xepe lagas uto, ketla kopmen dina epovo."

<sup>41</sup> Iesu ga vorang i rin keretna, "Nemi limixin eburu mi lavaun pinivu, kopmen tununu atnemi! Lavanya aleng tinotno nenia anaba xip tutu minimi? Nemi mi lox amolo ia." La neni ga lok ti mo laradi, "Ude mi nom lamdak."

<sup>42</sup> Se nom lamdak ga vas saparap ne Iesu, mo lagas ga sev asi i uto xopok at laxangka la ga sev adede lolos i. La ne Iesu ga vaase lolos ti nom lagas la lagas ga on basinge mo lamdak la lamdak ga lox avukat ta, la ne Iesu ga raba amlong nom lamdak ti ne temen.

<sup>43</sup> Nom axap limixin diga sangu aleng at nom lolos silok at ne Moroa.

*Lesepev Agepura Lavapaase At Ne Iesu Mumu Lanmet Teren*

(Mt 17:22-23; Mk 9:30-32)

Limixin move diga paase mumu lempanga axap ne Iesu gak lox i, la neni ga lok ti lavaun pinivu ren,

<sup>44</sup> \* "Nemen mita domampe na levelinga ana tong i rinimi! Nenia Laradi Mevana, mo dinaba song araba ia uto ri lekngen di limixin kakapmek."

<sup>45</sup> \* Ketla lavaun pinivu di goxoklen ua lavasuun at levelinga ren. Lavasuun at nai levelinga ga lipe atdi.

Kuren la di goxo xasep, la diga marat ti sue i mumu i na lavanga.

*Nege I Silok*

(Mt 18:1-5; Mk 9:33-37)

<sup>46</sup> \* La leedak ga ravasu xantubu at lavaun pinivu mumu i do nege atdi ga silok.

<sup>47</sup> La ne Iesu gaklen lavanga salai lavaun pinivu diga doxoma mumu i. Kuren la neni ga lok kaka lara lamdak kakalik, la ga vaxaru saparav i min,

<sup>48</sup> \* la ga lok tidi "Do nege i lok loklok nunuan keneng at laasen tarak ti na lamdak kakalik, neni i lok loklok nunuan tia. La do nege i lok loklok nunuan tia, neni i lok loklok nunuan ti ne Moroa, neni ga riki ia. Mila do nege i lixilik tinotno xantubu atnemi axap, neni i silok tinotno."

<sup>49</sup> Jon ga lok, "Leeme Silok, maga ven lara laradi ga riki kepe lubanggas mi laasen taram, la maga tong i rin do na xap ta i, mila neni xopmen at libinam tadi atdik."

<sup>50</sup> \* Iesu ga lok tin la tinedi bok lavaun pinivu, "Nemen mita ru vepe i, mila do nege i sep tangarang mi ne Satan, neni lentangas atdik."

*Limixin Me Samaria Diga Lox Abulubun Kepe Ne Iesu*

<sup>51</sup> \* Levenaleng ga sixit auret ta xusu ne Moroa naba lok kaka ne Iesu upana at laxalibet, la neni ga lox agagas lodoxoma ren la ni ga vas kaxat uto Jerusalem.

<sup>52</sup> Ni ga riki amgo lentaba luvut-tadi mi lavapaase axasep. Diga on basinge i la digat pas uto at lara lemenemen to Samaria xusu diba lox agagas li lempanga axap tin kusu ba midi e.

<sup>53</sup> \* Ketla limixin me go di goxo siam kaka i, mila digaklen i do neni mo gat pas uto Jerusalem.

<sup>54</sup> \* Se ne Jems mi ne Jon luun pinivu duga ronga i na, duga lok, "Leeme Silok, u vara i do mana ro

xaka laxao boro vana at laxalibet la na xotos axap na limixin?”

<sup>55</sup> Iesu ga rem gili amlong la ga vaase sok du,

<sup>56</sup> la digat pas manga uto at lara lemenemen petpes.

*Levenmumuat Atnedi Di Mumu Asu Ne Iesu*  
(Mt 8:19-22)

<sup>57</sup> Digat pas ap mo langa, la lara laradi ga lok ti ne Iesu, “Anaba mumu asu u at lengkot axap unat pas teren.”

<sup>58</sup> Iesu ga lok tin, “Lubungman sio di ruuna lengkot mikmidi atdi, la lavapixa di ruuna levemposovos atdi, ketla nenia, Laradi Mevana, axo ruuna toogu kusu tia rimdi la na lok mamana ren.”

<sup>59</sup> La ne Iesu ga lok bok ti mo lara laradi vetpes, “Una mumu asu ia.”

Ketla mo laradi ga lok tin, “Leeme Silok, una ke xepe be ia, kusu anat pas la anak mit ne tamak.”

<sup>60</sup> Ketla ne Iesu ga vorang i rin keretna, “Una ke nedi limixin kopmen toxot tidi xeneng at Linintoo, dinak mit limixin nedi di met pam. Unat pas at laramenemen la una vavang mi Linintoo at ne Moroa.”

<sup>61</sup> \*Lara laradi bok ga lok tin, “Leeme Silok, aba mumu asu u, ketla una ke xepe be ia xusu ana lox abeese be lentaba rak.”

<sup>62</sup> Iesu ga lok tin, “Do tara i ru kaxat ka i xusu na gugu ria, la amisik neni ik milik amlong ti lempanga ren, neni xopmen na epovo ti lok lugugu at Linintoo at ne Moroa.”

## 10

*Iesu Ga Riki Aonon Lavanuti Sangaun Mi Legepura*

<sup>1</sup> \*Melemu at nai Leeme Silok ga soxolik ka bok lavanuti sangaun mi legepura luvuttadi la ga riki aonon di, legepura, legepura, kusu dinamgo

rin la dina vavang mi Lagale Lava-vang uto at lengkot axap, la at levenmenemen, neni ga lok do nabat pas ue.

<sup>2</sup> \*Neni ga paase poovo mi limixin di goxo nunu ren. Ni ga lok, “Langsangan laraamang mo ira mukun pam, ketla ixo buaang nedi luvuttadi gugu xusu ti lox abeles leveluxa ukeneng at laraogu. Kuren la mina sing laradi loklok tatao at laraamang kusu neni naba riki asu tuvuttadi xusu ti lox abeles leveluxa.

<sup>3</sup> \*Minat pas uto at laramenemen! Nenia ana sak tiki nemi ngan lubungsipsip uto xantubu at lubungman atat.

<sup>4</sup> \*Nemen mita xip kaka tengkon tonomka, kopla teventat, kopla tempanga vatpas. Nemen gat mita ru at langas kusu mina paase aleng mi tara.

<sup>5</sup> Dola mina beles ukeneng at toogu, levelinga avot mina tong i xeretna, ‘Lenmila na nemen at na loogu.’

<sup>6</sup> Mo do laradi at lenmila i nemen go ap mo loogu, mina ke nom lenmila atnemi na nemen eburu min. Mo do xopmen, mina lok kaka amlong nom lenmila basinge di.

<sup>7</sup> \*Mina nemen at nom leges ogu mene nga. I lox avukat do mina anan la mina inin lempanga salai dina raba nemi min, mila laradi gugu i epovo xusu na lok kaka luunun teren. Nemi mina nemen at leges ogu mene nga ap mo lemenemen.

<sup>8</sup> \*Mo do mina beles at temenemen silok la dina vaase momo rangarang nemi, mina anan lempanga anan dina lox agagas li i rinimi.

<sup>9</sup> Mina lox aroo levenanmeres ap mo lemenemen, la mina lok tinedi limixin me go do, ‘Langas ti Linintoo at ne Moroa monga i auret.’

<sup>10</sup> Ket do nemi mina beles at temenemen, la kopmen dina vaase momo rangarang nemi mi lomomo

\* **9:61:** 1 Lav 19:20 \* **10:1:** Mk 6:7 \* **10:2:** Mt 9:37-38; Jo 4:35 \* **10:3:** Mt 10:16 \* **10:4:** Mt 10:7-14; Mk 6:8-11; Lu 9:3-5; 2 Lav 4:29 \* **10:7:** 1 Ko 9:6-14; 1 Ti 5:18 \* **10:8:** 1 Ko 10:27 \* **10:11:** Gu 13:51; 18:6

go, mina vas su uto at langas, la mina lok tidi xeretna,

11 \*‘Laxakup at na lemenemen atnimi no ma vas kaka i mi lengkangedek atnama, ma semla xepe raba nimi min, kusu ti lox asuusu lebelemamao at ne Moroa rinimi. Ketla mina doxoma i na, langas ti Linintoo at ne Moroa monga i auret!’

12 \*A tong i rinimi do at laaleng ete, Moroa naba lox asu lumumuat ti mo limixin kakapmek to Sodom, ketla ti mo limixin tongtonga xepe, lumumuat naba silok aleng tidi.”

*Levenmenemen Kopmen  
Di Goxo Nunu  
(Mt 11:20-24)*

13 \*La ne Iesu ga lok bok, “Naba lok kapmek aleng tinemi limixin to Korasin! La naba lok kapmek aleng bok tinemi limixin to Betsaida! Mo do na levempanga sangsangu nia ga lox i ro atnimi, dita lox i ro Taia la Sidon, gano migomgo limixin me go, nedi gita leeng pam la gita etara mun lengkontamon kapmek, la gita reevi vam laxakup at lengkot atdi kusu ti lox asuusu i do dira leeng basinge vam laxakapmek atdi!

14 At laaleng ete Moroa naba lox asuusu lumumuat ti limixin at lumenemen Taia la Sidon, ketla langangan lumumuat naba nemen atnimi.

15 La nemi limixin to Kaprenaum! Mi vavara i do mina silok ti limixin axap, ketla ne Moroa naba sok gingin asi minimi uto at lemenemen songsongot!”

16 \*La ne Iesu ga lok ti lavaun pinivu ren keretna, “Do nege ing tonga nimi, neni ing tonga ia. La do nege i sok tixirixes nimi, i sok tixirixes ia. La do nege i sok tixirixes ia, i sok tixirixes ne Moroa ga riki ia ude.”

*Lomlong At Lavanuti Sangaun Mi Legepura*

17 Lavanuti sangaun mi legepura luvuttadi digamlong, diga umsu mi langangan lomomo la diga lok, “Leeme Silok, lubunggas diga ronga res atnama mo do maga vaase lolos tidi mi laasen taram!”

18 \*La ne Iesu ga vorang i ridi xeretna, “Nia aga ven lixitkis orong at ne Satan ga xap la ni ga subu soso boro vana at laxalibet ngan lavanga i mam.

19 \*Mina ronga i na. Ara raba vam nimi mi lolos, kusu minat pas mavana at laxasii la at laxan aksoxomet, la mavana bok at lolos at ne Satan la kopmen tepanga naba lox asongot nimi.

20 \*Ketla nemen mita momo mumu i do lubunggas di ronga res atnimi. Ketla mina momo mila levenasen atnimi, Moroa ira malagan pam i ro at laxalibet.”

*Iesu Ga Lok Momo  
(Mt 11:25-27)*

21 Ap mo mun loxonaleng Loroonan Kaala ga suxuna ne Iesu mi lomomo, la ni ga lok, “Tamak, nenu Leeme Silok at laxalibet mi lavatbung menemen! A tong avukat tu mila ugara lox ase vam nedi limixin kopmen tevenasen silok atdi mi na lempanga. La uga lipe i basinge limixin leklen la limixin dokdoxoma. I ruturun, Tamak. Anai uga lox i mi lodoxoma la lomomo ram.

22 \*Tamak. Ura raba vam ia mi lempanga axap. Kopmen teta naklen nege lamdak taram, ketla nenu xusuk. La kopmen teta naklen nege ne Tamak, ketla nenia xusuk mun, la tinedi mun nenia a vara i xusu ana lox asuvos i ridi.”

23 \*La ne Iesu eburu mi lavaun pinivu ren diga nemen kusuk la neni ga milik alu rinedi la ga lok tinedi, “I lox avukat aleng mun tinimi mi ven na lempanga!

24 \*A tong i rinimi do buaang lavaeme vapaase ali la lavaorong diga vara i do dina ven mo lempanga

\* 10:12: Lur 19:24-25; Mt 10:15; 11:24 \* 10:13: Mt 11:21-23 \* 10:16: Mt 10:40; Lu 9:48; Jo 5:23  
\* 10:18: Jo 12:31; Li 12:8-9 \* 10:19: Sam 91:13; Mk 16:18 \* 10:20: Mt 7:22; Pas 32:32; Pl 4:3; Li 3:5 \* 10:22: Jo 3:35; 10:15 \* 10:23: Mt 13:16-17 \* 10:24: 1 Pi 1:10



nemi mira ven pam i, ketla di goxo epovo. La diga vara i do dina rongga i mo levelinga mira rongga vam i, ketla di goxo epovo.”

*Lavapaase Poovo Ti Lagale Laradi Boro Samaria*

25 \*At lara laaleng lara laradi loklox ase at Laulis Linga ga xatu kaxat la ga doma i do na lok tong ne Iesu. Ni ga lok, “Laradi loklox ase. Nia anaba lok lavanga salai xusu ti lok kaka lorooro avolo.”

26 Iesu ga lok tin, “Laulis Linga i tong i do xereva? U doma i do ua lavasuun teren?”

27 \*La mo laradi ga vorang i rin keretna, “Mina vavara aleng Leeme Silok ne Moroa atnimi mi lebelen nimi axap, mi loroonan axap atnimi, mi lolos axap atnimi, la mi levendoxoma axap atnimi. La mina balamu mo limixin di nemen saparap nimi kerekngan pam mi balamu nimi.”

28 \*Iesu ga vorang i rin keretna, “Lesepepo ram ik mokso. Una lox i xuren la unaba rooro.”

29 Ketla laradi loklox ase at Laulis Linga ga vara i xusu na lok li i ri lomokmokso, kuren la ni ga lok ti ne Iesu “Nege mo lara i nemen saparap ia?”

30 Iesu ga vorang i rin, “Lara laradi ga vas kaxat boro Jerusalem uto Jeriko, la limixin kakapmek diga xala i. La diga sak mus pes levesingsiga ren, la digap sev i la diga on basinge i ga met aroo.

31 Ap mo mene loxonaleng lara lamaasa gat pas mu mo langas. Se neni ga ven i nom laradi, neni ga vas sengseng polo i uto at lisigege ngas.

32 La lara laradi gugu at loogu laplavang, neni bok ga vas polo go, la ga ven nom laradi, la ga vas polo manga i uto at lisigege ngas.

33 Ketla leeme boro Samaria mo ga mumu ngas ga rupot saparav i, la se neni ga ven i nom laradi, lebelen ga lok mu i.

34 Ni gat pas saparav i, la ga soli laxadan momonok at lo olip eburu mi lavaen to at levenin kooxing teren, la ga is pe mo levenin kooxing mi labantamon. La neni ga xip kaka nom laradi uto at lodongki ren la ga lok kaka i uto at loogu mikmidi, la neni gak lok tatao i.

35 Ap mo laaleng petpes ni ga lok kaka legepu denarias la ga raba mo laradi gak lok tatao mo loogu min, la ni ga lok ti mo laradi gak lok tatao loogu. ‘Unak lok tatao na laradi, mo do nia anamlong bok at na langas, anaba un amlong bok lempanga ram uga lok tooro na laradi min.’ ”

36 La ne Iesu ga lok, “At lodoxoma ram ua lara atdi na lavantun ga balamu aleng mo laradi limixin kipkip pilo diga sev i?”

37 Laradi loklox ase at Laulis Linga ga vorang i rin keretna, “Mo laradi ga lok tooro i.”

Iesu ga lok tin, “Una lok mun i xuren.”

*Iesu Ga Vot Pasa Ne Marta Mi Ne Maria*

38 Iesu eburu mi lavaun pinivu ren diga mumu mo langas la digat pas uto at lara lemenemen. La lara latkin, laasen teren ne Mata, ga xup kaka di uto at loogu ren.

39 \*Neni ga ruuna lara neton, laasen teren ne Maria, mo gat kis saparap luxangkedek at Leeme Silok la gang tonga leveloklox ase ren.

40 Ketla ne Mata gak lox angtang solo mi leven gugu neni ga lok do na lox i. Kuren la neni ga vas saparap ne Iesu la ga lok, “Leeme Silok, uxo doxoma ia do netak i ke xusus ia xusu anak lox angtang mi na lempanga? Tong i rin kusu nat pas ude la neni na lok tooro box ia!”

41 Leeme Silok ga lok tin, “Mata, Mata! Lodoxoma ram ingtang solo la urak lox angtang mi laxampanga solo.

42 \*Ketla legesa vanga mun uk pakes tin. Maria i vara i do nang

\* 10:25: Mt 22:35-40; Lu 18:18 \* 10:27: Lal 6:5; Mas 19:18 \* 10:28: Mas 18:5; Ro 10:5; Ga 3:12

\* 10:39: Jo 11:1; 12:2-3 \* 10:42: Mt 6:33

tonga leveloklox ase rak, la tara noxo lok pes i na basinge i.”

## 11

*Iesu Ga Lox Ase Lavaun Pinivu Ren Mi Lisingising*  
(Mt 6:9-13; 7:7-11)

<sup>1</sup>\* At lara laaleng Iesu ga ngising to at lara lenep. La melemu at lisingising teren, lara lun pinivu ren ga lok tin, “Leeme Silok, una lox ase nema mi lisingising, kerekngan ne Jon ga lox ase lavaun pinivu ren.”

<sup>2</sup> Iesu ga lok tinedi, “Mo do mina sing, miba vaase xeretna, “Temen nema, mana lok ngangao at laasen taram. Linintoo ram na vot.

<sup>3</sup> Unam taba nema mi leveluxa at levenaleng axap.

<sup>4</sup> Doxoma xepe laxakapmek atnema, kerekngan nema ma doxoma xepe laxakapmek atnedi di lox i rinema. La nemen uta lok li nema ri leveloklok tong pen i lolos.”

<sup>5</sup> La ne Iesu ga lok ti lavaun pinivu ren keretna, “Dola tara atnemi nat pas uto at loogu at lentangas teren at laxanimin tubu la na lok tin, ‘Lentangas tarak, una raba ia mi tavantun tengkongkide.

<sup>6</sup> Lentangas tarak it pas at langas babaalom, mo vam i rupot to at loogu rak, la axo ruuna teveluxa kusu ti raba i min.’

<sup>7</sup> La do lentangas taram na vorang levelinga ram to xeneng at loogu ren keretna, ‘Nemen uta lox angtang ia! Lumusmaragu dira vipe vam i, la nema loxoetemen na mara unga vam. A noxo xatu kaxat bok ba la ana raba u mi tempanga anan.’

<sup>8</sup>\* A tong i rinimi, keke i do ixo xatu kaxat la ixo raba u mi lengkongkide mila neni lentangas taram. Ketla neni naba xatu kaxat la na raba u mi lempanga axap nenu uk pakes tin mila nenu xa uxu mangan kusu una ngising aptaptang i.

<sup>9</sup> Kuren la a tong i rinimi do, mina ngising, la minaba ruuna xaka i. Mina puse, la minaba vuse xaka i.

Mina dipdi, la lumusmaragu naba rem suang tinimi.

<sup>10</sup> Mila, do mina ngising ne Moroa, minaba lok kaka i. La do nemi mina puse, minaba vuse ka i, la lumusmaragu naba rem suang tinemi mi dipdi.

<sup>11</sup> Kereva, i epovo do temen lamdak na raba ne nitna mi tisii mo do neni na sing ti temat?

<sup>12</sup> Kopla i epovo kusu neni na raba i mi laksoxomet mo do neni na sing ti taxabili kaxak? Kopmen.

<sup>13</sup> Keke i do mi bilinga, ketla miklen i do mim taba lempanga nunuan ti laxamdak atnemi. La kerepmo ne Moroa i nemen to vana at laxalibet naba raba Loroonan Kaala tinedi di ngising i!”

*Iesu Ga Paase Mumu Ne Belsebul*

(Mt 12:22-30; Mk 3:20-27)

<sup>14</sup> Iesu ga riki xepe lagas gak lok at laradi kopmen goxo paase. Se nom lagas ga sixisu, laradi ga lox epovo xusu na paase. Buaang limixin diga sangu.

<sup>15</sup>\* Ketla lentaba luvuttadi diga lok, “Neni i riki asu lubanggas mi lolos at ne Belsebul, leeme gomgo at lubanggas.”

<sup>16</sup>\* Lentaba diga vara i xusu dina lok tong pen i, kuren la diga sue i xusu na lok tavanga sangsangu xusu ti lox asusu i do ne Moroa ga riki i.

<sup>17</sup> Ketla ne Iesu gaklen levendoxoma atdi la ni ga tong lavapaase poovo ridi xeretna, “Dola tubung mixin di epes di ti lengkon binam tadi, la dia esep eburu minedi xa, kopmen noxo lok nunuan letuna atdi. Loxoetemen do di epes di xusu ti esep, dinaba xis epeseves.

<sup>18</sup> Kuren la mo do ne Satan eburu mi limixin teren dina epeseves ti legepu binam tadi la dina esep, lolos teren naba nemen babaalom kereva? Mi tong i do a lox asu lubanggas mila ne Belsebul i raba ia mi lolos kusu ti lox i.

\* 11:1: Lu 5:33 \* 11:8: Lu 18:5 \* 11:15: Mt 9:34; 10:25 \* 11:16: Mt 12:38

19 Mo do nia a lox asu di mi lolos at ne Belsebul, kereva ba limixin sangsanga atnimi di lox asu di? Nedi di lox asuusu i do levelinga atnimi kopmen nak mokso!

20 \*Ket do a lox asu di mi lolos at ne Moroa, Linintoo at ne Moroa monga ira vot pam parap nimi.

21 Mo do laradi lolos na lox agagas li lempanga esep teren, la na lok tatao loogu lolos teren, mo lempanga axap teren naba nemen avukat.

22 \*Ket do tara taradi, lolos teren i volo i, na esep eburu min la na sev asi i, neni naba lok ka lempanga esep at nom laradi gak lok tatao loogu ren min, la na epes lempanga salai neni ga xip pilo xaka i.

23 \*Taradi do kopmen neni atarak, neni i munepen minia. La do tara kopmen nak lok tooro ia ti xup bubua ka laxasipsip, neni i sak epe-seves laxasipsip.”

#### *Lomlong At Lagas (Mt 12:43-45)*

24 Iesu ga lok keretna, “Dola lagas na sixisu basinge laradi, bat pas saasaa at lengkot, ba reven ti toxot kusu tin ti lok mamana. Mo do noxo vuse ka toxot, naba doma i xeretna, ‘Anamlong uto at no laradi, nenia aga on basinge i.’

25 La neni bamlong la na long lenget ka i do mo loxot im games la ira lox avukat pam.

26 \*La neni bat pas la na lok ka bok lavanuti lubunggas, lolos atdi i volo i, la dibat pas la diba vubeles ap mo laradi. Kuren la mo laradi naba nemen kakapmek tino.”

#### *Lomomo Rururun*

27 \*Se ne Iesu ga vaase axap na levelinga, lara latkin to xantubu at limixin ga lok ti ne Iesu keretna, “Moroa na lox anarong latkin ga visix u la ga lox asilox u!”

28 \*Ketla ne Iesu ga vorang i rin keretna, “I rururun, ketla nedi mun

di ronga levelinga at ne Moroa la di mumu asu i, Moroa naba lox anarong di.”

#### *Limixin Diga Sing Ne Iesu Kusu Na Lok Tavanga Sangsangu (Mt 12:38-42)*

29 \*Se limixin diga umsu saparap ne Iesu, neni ga lok tidi xeretna, “Limixin at na levenaleng nedi limixin kakapmek tinotno! Di ngising ti tavanga sangsangu, ketla kopmen a noxo lok tara ridi. Ketla dina doma mumu mun leretere at ne Jona.

30 Lorooro at ne Jona neni lampoovo rinedi limixin boro Niveve. La kerepmo lugugu at Laradi Mevana neni lampoovo rinedi limixin at na levenaleng.

31 \*At laaleng ete latkin gomgo boro Seba naba xatu kaxat la na tong asu laxakapmek atnimi limixin at na levenaleng, mila neni ga vas kaxat boro vaxalom tinotno xusu na ronga levenanasa at ne Solomon. Ketla a tong i rinimi do lara laradi ik lok pam kantubu atnimi, neni i silok ti ne Solomon.

32 \*At laaleng ete limixin boro Niveve dinaba ru kaxat la dina bala raba nimi, mila diga leeng basinge laxakapmek atdi at nom laaleng diga ronga ne Jona ga vavang tidi. La a tong i rinimi do lara laradi ik lok kantubu atnimi neni i silok ti ne Jona.”

#### *Lavapaase Poovo Ti Laxasep I Nemen Keneng At Labantuxu (Mt 5:16; 6:22-23)*

33 \*La ne Iesu ga lok keretna, “Kopmen taradi na sox aros lababao la na lok li alipe i xopla na lok li i ro maxopok at lavatbaaket. Ketla neni i lok li i ro at loxot lababao i tu e, kusu limixin diba reven at laxasep teren do dina beles.

34 Lengkati atnimi i ngan laxasep ti lorooro atnimi. Dola lengkati i reven ti lempanga avukat, lorooro

\* 11:20: Pas 8:19 \* 11:22: Kl 2:15 \* 11:23: Lu 9:50 \* 11:26: Jo 5:14 \* 11:27: Lu 1:28,42,48  
\* 11:28: Lu 8:15,21 \* 11:29: Mt 16:4 \* 11:31: 1 Lav 10:1-10 \* 11:32: Jna 3:5-10 \* 11:33: Mk 4:21; Lu 8:16

atnimi mo naba umsu mi laxasep. Ket do lengkatli atnimi i reven ti lempanga xapmek, lorooro atnimi naba nemen at lamain.

<sup>35</sup> Mina lok tatao avukat nimi, kusu lorooro axap atnimi noxo umsu mi lamain.

<sup>36</sup> Do lorooro axap atnimi naba umsu mi laxasep, la kopmen tekot main go xeneng teren, nom lorooro axap taram nabam games, kerekngan mun lababao i lox axasep labantuxu mi lososoo ren.”

*Laxakapmek At Lubung Parisi  
(Mt 23:1-36; Mk 12:38-40)*

<sup>37</sup> \*Se ne Iesu ga vaase axap, lara atdi lubung Parisi ga lam ka i xusu na anan eburu min. La neni ga vubeles ukeneng at loogu la ga xis kopok kusu dina anan.

<sup>38</sup> Mo la Parisi ga rakdu aleng mila neni ga ven ne Iesu kopmen goxo gos avot be lukngen kusu ti anan.

<sup>39</sup> \*La Leeme Silok ga lok tin, “Nemi lubung Parisi mi gos anunuan no maxamang at lakap inin mi lavanga tingtigon, ketla no maxeneng atnimi, nemi mi umsu mi loklok ti belegao la loklok kakapmek petpes bok.

<sup>40</sup> Nemi limixin tangtangu! Kereva, kopmen ne Moroa goxo rudum i no maxamang la no bok maxeneng?

<sup>41</sup> Ketla mina raba lempanga salai no i nemen at lengkap mi levempelet atnimi tinedi limixin banbalo, la lorooro atnimi naban manton.

<sup>42</sup> Naba lok kapmek tinotno rinimi, lubung Parisi! Mim taba ne Moroa mi loxot i sev asangaun at lempanga atnimi, i ngan levengkuma mi leveloombo la lempanga vetpes bok. Ketla nemi mi sok tixirixes loklok manmanton la lavavara ri ne Moroa. Anai nemi mina lox i, la nemen mita sok tixirixes nom loklok ti raba ne Moroa mi lenep avot at lasangaun at lempanga.

<sup>43</sup> Naba lok kapmek tinotno tinimi lubung Parisi, mila mi vavara aleng lengkot kitkis to melamgo at limixin

keneng at laraogu singising. La mi vavara i do limixin dina seega rangarang nemi mi loklok ngangao ro at lengkot etang.

<sup>44</sup> Naba lok kapmek tinotno rinimi! Nemi mi lok ngan lara maaut kopmen di goxo lok katling di, la limixin dit pas teren la kopmen dinaklen laxakapmek ik lok teren.”

<sup>45</sup> Lara laradi loklox ase at Laulis Linga ga lok ti ne Iesu, “Leeme loklox ase, ise nenu u tong i na, nenu u vaase sok bok nama.”

<sup>46</sup> Iesu ga vorang i rin keretna, “Naba lok kapmek tinotno bok tinimi luvuttadi loklox ase at Laulis Linga. Mila mi lok li levenaknixip melemu at levenantuno atdi limixin, la i lolos aleng kusu dinap kiv i. Ketla nemi xa kopmen mina song asu lixilik mi tanatsivisip atnimi xusu mina lok tooro di tip kip mo levenaknixip.

<sup>47</sup> Naba lok kapmek tinotno rinimi! Mila miga lok lara maaut nunuan kusu ti lavaeme vapaase ali megano, ua lavalabat atnimi diga sev amet di.

<sup>48</sup> La kerepmo nemi mi lox asuusu i do, nemi xa miga siam ap mo laxakapmek lavalabat atnimi diga lox i. Mila diga sev amet lavaeme vapaase ali, la nemi miga lok li simen to mavana at lara maaut tidi.

<sup>49</sup> Kuren la ne Moroa mi lakleklen silok teren ga lok, ‘Nia anaba riki lavaeme vapaase ali la luvuttadi vavang, la lentaba atdi dinaba sev amet di la lentaba dinaba lox asongot di.’

<sup>50</sup> Kuren la limixin at nai levenaleng dinabap kip langsung lumumuat mumu laniu at lavaeme vapaase ali axap. Ga ruka i at laaleng at ne Moroa ga rudum li na lavatbung menemen,

<sup>51</sup> at laniu at ne Abel ga se at laniu at ne Sakaria. No lavalabat atnimi diga sev amer i ro xantubu at loxonin laplavang la loxot i xaala. I raturun tinotno. A tong i rinimi do limixin at na levenaleng dinabap kip langsung lumumuat mumu nedi axap!

<sup>52</sup> Naba lok kapmek tinotno rinimi, luvuttadi loklox ase at Laulis Linga!

\* 11:37: Lu 7:36; 14:1      \* 11:39: Mt 15:2

Nemi xa mi rebeng alis lolos levelinga at ne Moroa i tong asu langas ti ruuna ka lorooro. Ketla nemi xa kopmen mina xasep teren, la mi lok pe nedi di lok do dina lok kaka i.”

<sup>53</sup> Se ne Iesu ga vas kaxat basinge mo loxot, luvuttadi loklox ase at Laulis Linga la lubung Parisi diga ruka i xusu dina ven i ngan laradi munepen la dina sue i mi laxasusue.

<sup>54</sup> \*La kerepmo diga puse ngas kusu dina lok li ne Iesu at lavapaase silok mo do ni na tong kapmek toxolinga.

## 12

### *Lavapaase Mumu Laxaxarang At Lubung Parisi*

(Mt 10:26-27)

<sup>1</sup> Ap mo laaleng buaang nedi limixin diga vot buru, la diga umsu aleng, la diga epas gat. La ne Iesu ga vaase avot ti lavaun pinivu ren keretna, “Mina lok tatao avukat nimi basinge liis (yeast)\* at lubung Parisi. Nedi luvuttadi loklok sosolom.

<sup>2</sup> \*Do lavanga salai limixin dina sibo pe i, nom i naba xis asuvos. La levendoxoma alipe, nom i limixin dinabaklen axav i.

<sup>3</sup> Mo levelinga mina tong i at lamain, limixin dinaba ronga i at laxangking tubu. Mo levelinga nemi mi vaase nemnem min to at lenbaalung at luvuttadi to xeneng at laraogu vipi pe, nom dinaba xup aonon min to mavana at lavatlagu.”

### *Nege Mo Xusu Mina Marat Teren*

(Mt 10:28-31)

<sup>4</sup> La ne Iesu ga lok tidi xeretna, “Larapen tangas tarak! A tong i rinimi, nemen mita marat atnedi di sev amet labantuxu, ketla melemu ren kopmen di noxo epovo ti lok tavanga i lok kapmek tinimi.

<sup>5</sup> Ana tong i rinimi do legesa radi mun minak marat teren. Minak

marat at ne Moroa, melemu do ira sev amet tara, neni i ruuna bok lolos kusu na lu abeles min uto at lemenemen songsongot. I raturun tinotno. A tong i rinimi do minak marat kusuk mun at ne Moroa.

<sup>6</sup> Luunun at lavalimo pixa i epovo at legepu peni, ketla kopmen teta atdi ne Moroa naba domampe i.

<sup>7</sup> \*La kerepmo ne Moroa im doma mumu amisik nimi, ikleklen bok le-exes at lengkabinim at lempatlak at-nimi. Nemen mita marat mila luunun atnimi at lemeren ne Moroa i silok ti luunun at lavapixa.

<sup>8</sup> A tong tuturun i rinimi. Do nege i tong asu i do neni atarak to melamgo at limixin axap, nenia, Laradi Mevana, anaba tong box i do neni atarak to melamgo at lubung angelo at ne Moroa.

<sup>9</sup> \*Ket do nege i tong i do i xopara ia ro melamgo at limixin la i lok do neni kopmen atarak, nenia, Laradi Mevana, anaba sok tixirixes box i ro melamgo at lubung angelo at ne Moroa.

<sup>10</sup> Do tara na tong toxolinga bilinga mumu ia, Laradi Mevana, i epovo do ne Moroa naba doxoma xepe nom laxakapmek teren. Ketla do nege i tong levelinga i lok kapmek mumu Loroonan Kaala, ne Moroa noxo doxoma xepe nom laxakapmek teren.

<sup>11</sup> \*Do dina song araba nimi uto at laraogu singising kusu dina lok li nemi at lavapaase, koplala to melamgo at luvuttadi silok koplala to melamgo at luvuttadi amgomgo, nemen mita doxoma solo do minaba vaase pe nemi xereva xopla lavanga salai mina tong i.

<sup>12</sup> Mila Loroonan Kaala naba lox ase nemi mi levelinga ap mo mene loxonaleng la mina vaase asu i.”

### *Lavapaase Poovo At Laradi Nop-novos Gak Lok Tangtangu*

<sup>13</sup> Lara laradi ro xantubu atnedi nom limixin ga lok ti ne Iesu, “Leeme loklox ase, una tong i ri netak kusu

\* **11:54:** Lu 20:20 \* **12:1:** Liis i ru katling leveloklox ase at lubung Parisi mi lubung Sadiusi.

\* **12:2:** Mt 16:6; Lu 8:17 \* **12:7:** Lu 12:24; 21:18; Gu 27:34 \* **12:9:** Lu 9:26 \* **12:11:** Mk 13:11; Lu 21:12-15

na episa lapnovos at ne temen nama ga met basinge i xantubu atnama.”

<sup>14</sup> Iesu ga vorang i rin keretna, “Leeme, kopmen tara ga raba ia mi levelinga mumuat kusu ana rongalinga, koplana epes lempanga kantubu atnumu.”

<sup>15</sup> \*La ni ga vaase rinedi axap, “Mina reven avukat, la mina lok tatao avukat nimi basinge lempanga at na lorooro. Mila lorooro ruturun ti laradi kopmen dina lok ka i at na lavatkangka, keke i do neni ip novosaleng.”

<sup>16</sup> Melemu ne Iesu ga tong asu lara lavapaase poovo ridi xeretna, “Lara laradi gap novos, ga ruuna loxongkangka mi laraamang gak lok teren. La nom lempanga neni gatlo li i ga visik levempeven una avukat.”

<sup>17</sup> La ni ga doma i xeretna, ‘Axo ruuna toxot kusu ti lok li na lempanga. Aba lok lavanga salai?’

<sup>18</sup> La ni ga lok, ‘Anaba lox i xeretna. Anaba ut asi laraogu lili luxa rak la ana lok taraogu silok, la anaba lok li lempeven una rak go la lentaba lempanga vetpes bok.’

<sup>19</sup> La melemu aba lok keretna. Ara ruuna vam lempanga nunuan, i epovo ria at laxanmaares solo. A ruuna ka vam lorooro nunuan, ana anan, ana inin, la ana momo!’

<sup>20</sup> Ketla ne Moroa ga lok tin, ‘Nu laradi baulang! Lingina mun at laxanimin unaba met. La nenu noxo lok kaka nom lempanga uga gagas li i ru.’”

<sup>21</sup> \*La ne Iesu ga lok bok, “Anai i lok ngan nedi di lili laxampanga solo kusu tidi, ketla to at lemeren ne Moroa kopmen di, dinap novos.”

*Nemen Mita Bulu Mu Lempanga Anan  
La Lempanga Singsiga  
(Mt 6:25-34)*

<sup>22</sup> La ne Iesu ga lok ti lavaun pinivu ren keretna, “La kerepmo a tong i rinimi do nemen mita bulu mu leveluxa mik pakes tin kusu mina rooro,

kopla mumu levesingsiga mik pakes tin kusu ti etara.

<sup>23</sup> Lorooro i silok aleng ti leveluxa, la labantuxu i silok aleng ti levesingsiga.

<sup>24</sup> \*Mina ven lavapixa. Dixotlotlo tevempeven una, la dina lili buru leveluxa. Dixo ruuna taraogu koplatingkot lili. Ketla ne Moroa im taba di! Moroa im doma i do nemi mi silok aleng ti lavapixa.

<sup>25</sup> Ua lara atnimi i epovo xusu na nemen at tentaba tenmaares bok do ni na doma mu solo i?

<sup>26</sup> Mo do mixo epovo kusu mina lok na lavanga lixilik, nemen mita doma mu solo i, kusu mina ruuna ka lempanga at na lorooro.

<sup>27</sup> Mina ven lempatko i suusu, ixo gugu la kopmen nak lok tevesingsiga. Ketla a tong i rinimi do ne Solomon, gap novos aleng, ketla levesingsiga ren goxopmen goxom ngan i na lempatko.

<sup>28</sup> Ne Moroa axa ik paxasiga na lempatko, i ngan lempivilis mo i nemen de lingina, la kantamak dina rin asonao i ro at laxao. Kereva, Moroa ixo epovo xusu na raba nemi mi levesingsiga? Nemi limixin, lununu atnemi i lixilik aleng!

<sup>29</sup> Kuren la nemen nemi mita doma solo i do miba an lavanga salai la mina in lavanga salai.

<sup>30</sup> Limixin axap at na lavatbung menemen kopok di doma mu amisix i na lempanga. Ketla ne Temen nemi iklen i do nemi mik pakes ti na lempanga.

<sup>31</sup> Nemen mita doma solo ri na, ketla mina ruuna ka avot be Linintoo at ne Moroa, la ne Moroa naba raba epovo ba nemi mi lempanga anan la lempanga singsiga.”

*Lapnovos To Vana  
At Laxalibet  
(Mt 6:19-21)*

<sup>32</sup> \*La ne Iesu ga lok bok, “Limixin tarak, nemen mita marat, mila ne Temen nemi, i momo xusu naba raba nemi mi Linintoo ren.

\* 12:15: 1 Ti 6:9-10 \* 12:21: Mt 6:19-20 \* 12:24: Sam 147:9; Lu 12:7 \* 12:32: Lu 22:29; Li 1:6  
\* 12:33: Lu 18:22

33 \*Mina sesep mi lempanga atnimi la mina raba lempilas at nom lempanga rinedi limixin banbalo. La kerepmo mi noxo doma solo lengkontonom ka atnimi mo ba lok kapmek la lempilas atnimi na sonao. Ketla minaba ruuna ka lapnovos tinimi ro vana at laxalibet. 34 Mina lox i xuren mila lorooro axap atnimi naba lok mu lapnovos atnimi.”

*Lavapaase Poovo Ti Luvuttadi Gugu Diga Gagas*

35 \*La ne Iesu ga lok bok, “Mina gagas ti lomlong tarak i ngan laradi i etara avarang lisingsiga la lababao ren i ngangao,

36 \*kereknagan luvuttadi gugu di ngangais ti leeme silok atdi mo naba vot boro at loklox epot. Do neni na vot la nap dipdi, dinaba suang soso mun lumusmaragu rin.

37 \*Naba lox avukat tinedi na luvuttadi gugu do leeme silok atnedi i long lenget ka di do di tuang, la dia gagas mo do neni imlong! A tong i rinimi, do neni xa naba vaxasiga i mi labantamon maut kusu na gugu ridi, la na lox axis di ukopok la na raba panga anan di.

38 Naba lox avukat tinedi luvuttadi gugu mo do leeme silok atnedi i long lenget ka di, di gagas, mo do neni gi rupot at laxanimin tubu kopla at leregteng kaxak!

39 \*La mina xasep at nai! Mo do laradi at loogu iklen loxonaleng laradi xipkip pilo naba vot, neni noxo ke nom laradi xipkip pilo na das beles uto xeneng at loogu ren.

40 La nemi bok mina gagas mila Laradi Mevana naba vot at loxonaleng mi noxo doxoma i do ni naba vot teren.”

*Lavapaase Poovo Ri Laradi Gugu Avukat La Laradi Gugu Kapmek (Mt 24:45-51)*

41 Pita ga sue ne Iesu xeretna, “Leeme Silok. Kereva, u tong i

na lavapaase poovo rinema xusuk mun, kopla u doxoma i do ri limixin axap?”

42 Leeme Silok ga vorang i rin keretna, “Nege mo laradi ruturun la lasaxaruki avukat? Neni mo laradi, leeme silok teren naba lok li i xusu nak lok tatao loogu ren la na raba lavasaxaruki mi lempanga anan tidi at lengkonalleng mokmokso.

43 Naba lox avukat ti mo lasaxaruki, mo do leeme silok teren nabamlong la na long lenget ka i do i lox epovo lugugu ren.

44 \*A tong tuturun i rinimi do mo leeme silok naba lok li lasaxaruki ren kusu na lok tatao lempanga vipis axap teren.

45 Ket do nom lasaxaruki na doma i do, ‘Leeme silok tarak mo noxomlong soso.’ La nap sep lentaba lavasaxaruki, lavatlok eburu mi lavakin, la ira anan la ira inin la ira inin tangtangu.

46 Melemu leeme silok teren nabamlong at tara taaleng lasaxaruki ren ixo doxoma i do ni naba vot teren la at loxonaleng neni xopmen naklen i. Nom leeme silok naba sev asongot aleng nom lasaxaruki, la na lox aonon i uto at lemenemen kusu na nemen eburu minedi limixin kopmen tununu atdi.

47 \*Lasaxaruki iklen laai leeme silok teren i vara i do ni na lox i, ketla kopmen na lox agagas li i, la kopmen na lok epovo lavavara ren, neni naba lok kaka langangan losongsongot.

48 Ket lasaxaruki do xopmen naklen laai leeme silok teren i vara i, la i lok lempanga i epovo xusu dina vixis i, leeme silok teren naba sev asongot lixilik mun i. Laradi do ne Moroa i raba i mi lempanga solo, ne Moroa naba sing i xusu na raba amlong bok tempanga solo. La ti laradi ne Moroa i raba solo i mi laxampanga, ne Moroa naba sing i mi taxampanga solo bok.”

*Iesu Ga Vot Kusu Ti Lox Aepeseves*

\* 12:35: Pas 12:11; Mt 25:1-13 \* 12:36: 1 Pi 1:13; Mk 13:33-36 \* 12:37: Jo 13:4 \* 12:39: Mt 24:43-44; 1 Ts 5:2 \* 12:44: Mt 25:21,23 \* 12:47: Je 4:17

*Limixin**(Mt 10:34-36)*

<sup>49</sup> Iesu ga lok bok, “Aga vot kusu ana lok li na lavatkangka at laxao, la nia a vara i do nom laxao na bao soso!

<sup>50</sup> \*A ruuna lara lumumuat kusu anap kiv i, la labalak i muat aleng kusu ana lok kaka i se ana lox epovo i!

<sup>51</sup> \*Kereva, mi doxoma i do aga vot kusu ana lok li lumulum at na lavatbung menemen? A tong i rinimi do a goxo vot mi lumulum, ketla mi lixitkis epeseves.

<sup>52</sup> I ruka i lingina loxoetemen do lavalimo nedi dina epeseves, lavan-tun dinaba munepen mi legepura, la legepura dinaba munepen mi lavan-tun.

<sup>53</sup> \*Luvuttemen laxamdak dinaba munepen mi laxamdak atdi, la laxamdak dinaba munepen mi luvuttemen di, la lavakin dinaba munepen mi laxaalik atdi, la laxaalik dinaba munepen mi luvutnen di. La loxoenenen, dinaba emunepen eburu minedi xa.”

*Loklok Ti Reven Kisip Levengkonalleng**(Mt 16:2-3)*

<sup>54</sup> Iesu ga lok bok ti limixin, “Do nemi mi ven loxontakabu i ru kaxat to at loxot laxangking it lotup e, soso mun mi lok do, larakabu mo naba vot. La i ruturun.

<sup>55</sup> La do mi suma lamanman i laa boroxun at lamatbin, nemi mi lok, ‘A lok do nabaplivi mo.’ La i lok kuren.

<sup>56</sup> Nemi luvuttadi loklok sosolom! Mi reven lavatbung menemen mi laxalibet la mi epovo mina tong asu na lempanga. Tila ba, mixo doxoma xibis lovtopot at Laradi Mevana?”

*Mina Lok Lumulum Mi Limixin Munepen**(Mt 5:25-26)*

<sup>57</sup> Iesu ga lok bok, “Tila mi xopara i do mina mumu asu loklok nunuan la mirak lok li amisik limixin at lava-paase?”

<sup>58</sup> Mo do taradi na lok li lumumuat mavana atnimi la na lok kaka nimi ri lavapaase, mina lolos kusu mina lox akmokso nom lavapaase eburu min. Mina lox i at loxonaleng mit pas mu langas, kusu neni noxo vaxaru li nimi ro melamgo at laradi rongtonga linga. La laradi rongtonga linga na song araba nimi uto at laradi rutumu, la laradi rutumu na lok li nimi at loogu xokoxo.

<sup>59</sup> A tong tuturun i rinimi do mi noxo epovo xusu miba vas su basinge loogu xokoxo se do mina un axap pam luunun at nom lava-paase.”

**13***Mina Leeng Basinge Laxakapmek, Lavanga Mina Met*

<sup>1</sup> Ap mo mun loxonaleng lentaba luvuttadi mo diga nemen go, diga vaase ri ne Iesu mumu lentaba luvuttadi boro Galili, ne Paelat ga sev amet di at loxonaleng digaplavang saparap ne Moroa.

<sup>2</sup> \*La ne Iesu ga vorang i ridi xeretna, “Mi doxoma i do mo luvuttadi boro Galili diga xapmek tinotno rinedi leme Galili, kuren la diga met kerepmo.

<sup>3</sup> \*Kopmen tinotno! Ketla a tong i rinimi xeretna. Mo do mi noxo leeng basinge laxakapmek atnimi, nemi bok minaba seeve.

<sup>4</sup> La kereva ba di nom lasangaun mi lavanuan luvuttadi to Siloam diga met at loxonaleng loogu babaalom ga subu kimit di? Mi doxoma i do nom luvuttadi diga xapmek tinotno rinedi limixin avukat diga nemen to Jerusalem?

<sup>5</sup> Kopmen tinotno! Ketla a tong i rinimi xeretna. Mo do mi noxo leeng basinge laxakapmek atnimi, nemi bok minaba seeve.”

*Lavapaase Poovo Ri Luuna Goxo Visik*

<sup>6</sup> \*Melemu ne Iesu ga vaase ridi mi lavapaase poovo xeretna, “Lara

\* 12:50: Mk 10:38-39 \* 12:51: Mt 26:38; Jo 12:27 \* 12:53: Mai 7:6 \* 13:2: Jo 9:2 \* 13:3: Sam 7:12 \* 13:6: Mt 21:19



laradi ga ruuna luuna pik ga suusu ro at laraamang vaen teren. Ni gat pas kusu na ven ti tevempeven una go ap mo luuna pik, ketla ni goxo long lenget ka tara.

<sup>7</sup> \*Kuren la ni ga lok ti laradi loklok tatao at laraamang, 'At lavantun maares axap ta, nia agat pas ude xusu ana ven ti tempeven una at na luuna pik, la axo vuse ka leveven una. Tara asi i ukopok! Tila i tu amisik la ira vaaxap lomonok at laxangka?'

<sup>8</sup> \*Ketla laradi loklok tatao laraamang ga lok tin, 'Leeme silok, una ke bok be i at na mun legesa maares. La ana xe xangkan i la ana suxa i mi taxannorang una.

<sup>9</sup> La mo do na luuna na visik tevempeven una pik at na lamaares mavana, naba lox avukat. Mo do kopmen, i epovo do dina ra asi ba i!' ”\*

### *Iesu Ga Lox Avukat Lara Latkin At Laaleng Kaala*

<sup>10</sup> At lara laaleng kaala ne Iesu ga anasa limixin to xeneng at loogu singising.

<sup>11</sup> La lara latkin mo gak lok, la-gas ga nemen teren la ga lox i la gak meres at lasangaun mi lavanuan maares. Lantuno ga kauk la ni goxo epovo xusu na tu akmokso.

<sup>12</sup> Se ne Iesu ga ven i, neni ga ro ka i uto melamgo atdi la ga lok tin keretna, "Latkin, u lox avukat pam basinge nom lanmeres taram!"

<sup>13</sup> Iesu ga lok li lukngen to at nom latkin la soso mun latkin ga lox akmokso lengkot teren upana la ga emi asu mi ne Moroa.

<sup>14</sup> \*Laradi gomgo at loogu singising ga belemamao aleng ne Iesu do ga lox aroo mo latkin at laaleng kaala. La ni ga lok ti limixin, "Lavanna aleng kusu tidik ti lok leven gugu. Kuren la minat pas ude at nom levenaleng kusu miba lok avukat basinge

levenanmeres atnimi, ketla kopmen at laaleng kaala!"

<sup>15</sup> \*La Leeme Silok ga vorang i rin keretna, "Nemi luvuttadi loklok sosolom. At levenaleng kaala axap mi sepmus levendongki mi levenbulumaxao ro at levengkot mikmidi la mim lam kaka di xusu dina inin.

<sup>16</sup> \*La kereva ba, ixo lox avukat ti lok tooro na latkin me Judaia at laaleng kaala, Satan ga lok kapmex i xerepmo at lasangaun mi lavanuan levenmaares?"

<sup>17</sup> Anaa lovoporang teren ga lox amangan nedi diga munepen min, la nedi nom limixin diga lok momo aleng at nom lavanga sangsangu ne Iesu ga lox i ap mo loxonaleng.

### *Lavapaase Poovo Ti Liit Mastet I Lixilik Tinotno*

(Mt 13:31-32; Mk 4:30-32)

<sup>18</sup> Iesu ga sue di xeretna, "Linintoo at ne Moroa i lok ngan laai? La ana tong poovo i atla?"

<sup>19</sup> I lok ngan liit mastet, laradi ga lok kaka i la gatlo li i ro at loxongkangka ren. Liit mastet ga suu la ga vee una, la lavapixa diga xip lempotpos pixa atdi ro at lengkakan teren."

### *Lavapaase Poovo*

*Ri Liis (Yeast)*

(Mt 13:33)

<sup>20</sup> Melemu manga Iesu ga sue di, "Linintoo at ne Moroa ana tong poovo i atla?"

<sup>21</sup> I lok ngan liis (yeast) latkin i lok kaka i la ia lok eburu i mi loxompalava ise nom axap loxompalava i xip kaxat."

### *Lumusmaragu I Veleot*

(Mt 7:13-14)

<sup>22</sup> Iesu ga vas kaxat uto Jerusalem la at na lavatpas teren ni gat pas kantubu at levenmenemen silok la lengkon menemen kakalik, la ga anasa limixin.

\* **13:7:** Lu 3:9 \* **13:8:** 2 Pi 3:9,15 \* **13:9:** Na lavapaase poovo rinedi limixin me Judaia la lavanga salai naba vot parap di do di noxo visik asu teveloklok nunuan. \* **13:14:** Pas 20:9-10; Lal 5:13-14; Lu 6:7; Jo 5:16 \* **13:15:** Lu 14:5 \* **13:16:** Lu 19:9

<sup>23</sup> La lara laradi ga sue i, “Leeme Silok. Kereva, tentaba tuvuttadi mene diba lok kaka lorooro avolo?”

Iesu ga vorang i ridi xeretna,

<sup>24</sup> \* “Mina lolos kusu miba beles at lumusmaragu lixilik at Linintoo at ne Moroa, mila buaang limixin diba lok tong i do dina beles ukeneng, ketla di noxo epovo.

<sup>25</sup> \* Leeme gomgo at nom loogu naba xatu kaxat la na vi pe lumusmaragu. La do nemi mina tu ro maxamang la minap dipdi la minak lok, ‘Leeme Silok. Suang lumusmaragu rinama!’

Ketla neni naba lok tinimi, ‘Axoklen nemi, la axoklen i do meva nemi.’

<sup>26</sup> La miba vorang amlong i rin keretna, ‘Maga anan la maga inin eburu minu, la uga anasa nama ro at levenmenemen atnama!’

<sup>27</sup> \* Ketla neni naba lok manga, ‘Axoklen nemi la axoklen i do meva nemi. Uto nemi basinge ia, nemi limixin bilinga!’

<sup>28</sup> \* Minaba lok lerengteng silok la minaba rungur ivivilis ap mo laaleng minaba ven ne Abaram, la ne Aisak, la ne Jakop la nedi lavaeme vapaase ali ro at Linintoo at ne Moroa, ketla nemi xa dinaba lu asu minimi.

<sup>29</sup> \* Limixin dinabat pas boro at lengkot axap at lavatbung menemen la dinat kis eburu mi ne Moroa at Linintoo ren.

<sup>30</sup> \* I ruturen do nege nedi monga di lok ngan lempanga gamasa, dinaba ruuna ka levenasen silok. La nedi monga di ruuna levenasen silok, dinaba lok ngan lempanga gamasa.”

*Iesu Ga Lox Asu Labalamu Ren Ti Limixin To Jerusalem*  
(Mt 23:37-39)

<sup>31</sup> Ap mo laaleng lentaba atnedi lubung Parisi diga vot pasa ne Iesu la diga lok tin, “Una vas su basinge na lenep la unat pas uto at tengkot

petpes, mila ne Erodes i lok do na sev amer u de.”

<sup>32</sup> Iesu ga vorang i ridi xeretna, “Mina vot pasa nom lavatman sio la mina tong asu levelinga rak tin do, ‘Nenia anak tiki asu lubunggas basinge limixin la anak lox avukat limixin lingina la kantamak bok, la at laaleng sepsev avantun anaba lox axap lugugu rak.’

<sup>33</sup> Ketla nenia move anat pas at langas lingina, kantamak, la uatno. Kopmen nak mokso ri leeme vapaase ali kusu dina sev amer i ro at toxot petpes, ketla to Jerusalem mene nga.”

<sup>34</sup> La ne Iesu ga bulu aleng la ga lok bok, “Limixin me Jerusalem. Lavalabat atnemi digap sev amet lavaeme vapaase ali, la diga lulu vat nedi limixin papaase asu levelinga, ne Moroa ga riki nedi ude. Buaang levenaleng a lok do ana kok nemi mi lukngak, i ngan lavatpalak kaxak i kok laxannatnat kaxak teren, ketla mixo siam ka ia.

<sup>35</sup> Monga Moroa i lox axap loklok tatao ren tinimi. A tong i rinimi do mi noxo ven bok ba ia, se at nom laaleng naba vot la minaba lok keretna,

‘Moroa i lox anarong mo laradi it pas mi laasen at Leeme Silok.’”  
*Sam 118:26*

## 14

*Iesu Ga Lox Aroo Laradi Ga Meres*

<sup>1</sup> \* At lara laaleng kaala Iesu gat pas kusu na anan at leluxa ro at loogu at lara lamgomgo at lubung Parisi. La luvuttadi loklox ase at Laulis Linga diga reven pilo ne Iesu. Mo do neni na lox aroo taradi at laaleng kaala, diba lok li i at lavapaase.

<sup>2</sup> Lara laradi luxangkedek teren mi lukngen ga dang, ga vot pasa ne Iesu.

<sup>3</sup> \* La ne Iesu ga sue di eburu mi lubung Parisi xeretna, “Kereva, Laulis Linga atdik i tong i do ik

\* 13:24: Pl 3:12 \* 13:25: Mt 25:10-12 \* 13:27: Sam 6:8 \* 13:28: Mt 8:11-12 \* 13:29: Sam 107:3; Lu 14:15 \* 13:30: Mt 19:30 \* 14:1: Lu 11:37 \* 14:3: Lu 6:9

mokso ri lox aroo limixin at laaleng kaala kopla xopmen?"

<sup>4</sup> Ketla di goxo vorang levelinga at ne Iesu. Iesu ga lok ka mo laradi ga meres, la ga lox aroo i, la ga riki aonon i.

<sup>5</sup> \*La ne Iesu ga lok tidi, "Mo do tara atnimi i ruuna tamdak kopla tavatbulumaxao la i subu tup uto at lamamara at laaleng kaala. Kereva, ixo epovo xusu mina rep aurut ka i at laaleng kaala?"

<sup>6</sup> \*Ketla di goxo epovo xusu dina vorang levelinga ren.

<sup>7</sup> \*Iesu ga long lenger i do lentaba lavaose diga xis at lengkot nunuan. Kuren la neni ga vaase poovo mu i na loklok tinedi axap. Iesu ga lok keretna,

<sup>8</sup> \*"Dola taradi na lam kaka u uto at loklox epot, nemen utat kis to at lengkot nunuan. Lavanga tara gove i silok tu digara lam kaka vam i,

<sup>9</sup> la laradi gomgo at leluxa naba vot la na lok tu, 'Nemen utat kis at na loxot.' La kerepmo uba mangan, la diba lok kaka u la una xis to at lisigege.

<sup>10</sup> Dola tara na xup ka u uto at leluxa, unat pas la una xis to at lisigege, kusu nom laradi at leluxa naba vot la na lok tu xeretna, 'Ude u, lentangas tarak, uto u at loxot kitkis avukat.' Anai ba lox u la dina lok ngangao ram to melamgo atnedi lavaose.

<sup>11</sup> \*Lavasuun at na lavapaase poovo i lok keretna. Do nege i lox asilox i, ne Moroa naba lox alixilix i, la do nege i lox alixilix i, ne Moroa naba lox asilox i."

<sup>12</sup> La ne Iesu ga lok ti mo laradi ga lam kaka i uto ap mo leluxa, "Mo do una lok teluxa kanangking kopla ukantinao, nemen uta lam kaka lara-pen tangas taram, kopla luvutnetam kopla lentaba at libibinat taram, kopla nedi dipnovos di nemen saparav u, mila diba vorang amlong i ru, la at

na langas mun uba xip kaka luunun taram ti mo lavanga uga lox i.

<sup>13</sup> \*Mo do una lok leluxa, una lam kaka limixin banbalo, limixin levenantuno di i kauk, limixin labantuxu atdi i molo, la limixin katli main.

<sup>14</sup> \*La ne Moroa naba lox anarong u, mila kopmen dina epovo xusu dina vorang lempanga ram. Ketla ne Moroa axa naba raba u mi luunun at laaleng limixin manmanton dinaba xatu kaxat basinge lanmet."

### *Lavapaase Poovo Ri Leluxa (Mt 22:1-10)*

<sup>15</sup> \*Lara laradi gat kis to at laanan ga ronga i na la ga lok ti ne Iesu, "Luvukat tinedi no dinabat kis at leluxa silok to xeneng at Linintoo at ne Moroa."

<sup>16</sup> Iesu ga tong lavapaase poovo rin, "Lara laradi ga lok leluxa silok, la ni ga xup kaka buaang limixin.

<sup>17</sup> Ap mo laaleng ti leluxa, neni ga riki lasaxaruki ren kusu na tong i ri limixin do, 'Ude nemi, lempanga axap ira gagas pam!'

<sup>18</sup> Ketla nedi axap diga tong i rin do kopmen di noxot pas ti mo leluxa. Lara avot ga lok ti nom lasaxaruki, 'Nia a un ka loxongkangka, la anat pas kusu ana ven be i. Una ke be ia.'

<sup>19</sup> Lara bok ga lok, 'Nia a un ka lasangaun lempat bulumaxao la anat pas na xusu ana lok tong pen di ri lok lugugu. A sing u xusu una ke be ia.'

<sup>20</sup> \*Leta vetpes bok ga lok, 'Anaa vam nia epot, la at na mun lavasuun teren la nia noxot pas ti leluxa.'

<sup>21</sup> Lasaxaruki gamlong la ga tong axap na lempanga ti leeme gomgo ren. La leeme gomgo ap mo loogu ga musak teng tinotno la ga lok ti nom lasaxaruki ren, 'Soso mene nga u, unat pas uto at larangas silok la uto at lengkonnga lixilix bok, la una lok kaka limixin banbalo, limixin levenantuno atdi i kauk la lengkatli

\* 14:5: Mt 12:11; Lu 13:15 \* 14:6: Mt 22:46 \* 14:7: Mt 23:6 \* 14:8: Ler 25:6-7 \* 14:11: Mt 23:12; Lu 18:14 \* 14:13: Lal 14:29 \* 14:14: Jo 5:29 \* 14:15: Lu 13:29 \* 14:20: 1 Ko 7:33

main, la luvuttadi labantuxu atdi i molo.'

<sup>22</sup> La lasaxaruki ga lox i xuren la ga lok ti leeme gomgo xeretna, 'Levelinga ram ara lox epovo vam i, ketla lengkonnin angavang nave ri teventaba.'

<sup>23</sup> La leeme gomgo ga lok ti lasaxaruki, 'Unat pas uto at larangas silok la at levenngas lixilik to at laxairing la una lok kaka limixin ude xeneng, kusu loogu rak naba umsu.'

<sup>24</sup> A tong i rinimi axap do kopmen teta atdi nom limixin, nia aga xup kaka avot di ri leluxa, diba anan at leluxa rak.'

#### *Loklok At Lavaun Pinivu At Ne Iesu*

(Mt 10:37-38)

<sup>25</sup> Buaang nedi limixin diga emu eburu mi ne Iesu. La neni ga rem gili la ga lok tinedi,

<sup>26</sup> \*"Dola tara i vara i xusu na mumu asu ia la ni xopmen na doma asilox ia at ne temen la nenen la latkin teren la laxamdak mi luvutneton la luvurinen, la lorooro axa ren, neni xopmen na epovo xusu neni lun pinivu rak.

<sup>27</sup> \*Do nege xopmen na mulus kusu nap kip levenmumuat silok aleng la na mumu asu ia, neni xopmen na epovo xusu neni lun pinivu rak.

<sup>28</sup> Mo do tara atnimi i doxoma i do na xip toogu, neni na xis la na lox asu be luunun, do i epovo ri lox axap mo loogu.

<sup>29</sup> Mo do ixo lox asu avukat luunun at loogu, la neni xopmen na epovo ri lox axap mo loogu, neni ia vaxaru vam laraxem teren, limixin petpes diba ven i la dibak lok kalise i.

<sup>30</sup> Diba lok, 'Na laradi ga vaxaru kaxat na loogu, ketla neni xopmen na epovo ri lox axav i!'

<sup>31</sup> Mo do toorong silok i gagas mi legesa sangaun larabin sangsangaun kobot (10,000) limixin teren kusu diba esep mi lara loorong, neni i ruuna legepu sangaun larabin sangsangaun kobot (20,000), neni na

xis be la na doma mu i do kereva neni i epovo lolos kusu na esep mi mo lara loorong kopla xopmen.

<sup>32</sup> Mo do xopmen, neni naba riki taradi kusu na ekip tangarang mi nom loorong, dola neni move i nemen paxalom, kusu ba sing ti lok lumulum."

<sup>33</sup> La ne Iesu ga lok bok, "Lavasun at nai lempapaase poovo keretna. Dola tara xopmen na ke xepe lempanga axap teren, neni kopmen na epovo xusu neni lun pinivu rak."

#### *Loxong Kakures I Ru Katling Limixin Nunu*

(Mt 5:13; Mk 9:50)

<sup>34</sup> La ne Iesu ga lok bok tidi, "Laxakures neni lavanga avukat, ket do loso xakures teren na xap, kopmen bok ba tangas kusu diba lox i la na so xakures manga.

<sup>35</sup> Laxakures i lok kapmek pam, kopmen na epovo ri laxangka kopla na lok eburu i mi levente bulumaxao. Limixin diba lok kaka mene i la dina lu xepe nga min.

Laradi do i ruuna lubaalung ting tonga na levelinga, i lox avukat kusu neni nang tonga i."

## 15

#### *Lisipsip Ga Soogong*

(Mt 18:12-14)

<sup>1</sup> At lara laaleng buaang nedi luvuttadi loklok ka pilas mi luvuttadi xapmek diga vot kusu dinang tonga ne Iesu.

<sup>2</sup> \*La lubung Parisi eburu mi luvuttadi loklox ase at Laulis Linga diga paase ngunungun mu ne Iesu. Diga lok, "Anaa laradi ik lox avukat ti limixin kakapmek la neni i anan eburu bok midi!"

<sup>3</sup> La ne Iesu ga vaase ridi mi lara lavapaase poovo xeretna.

<sup>4</sup> \*"Dola tara atnimi i ruuna legesa sangaun kobot (100) sipsip la legesara atdi na soogong, neni naba lok lavanga salai? Neni naba on basinge lavasik sangaun mi lavasik

laxasipsip to at laxampivilis atdi, la nat pas kusu na ven ti nom legesara no ga vas soogong, se rinotno neni ira long lenget ka i.

<sup>5</sup> La neni naba lok momo aleng la na xip kaka i upana at laxaka ren,

<sup>6</sup> la na xip kaka amlong i uto xolonu. Melemu neni ba xup bubua ka larapen tangas teren la nedi lentaba di nemen aurer i, la na lok tidi, 'Ata momo aleng mila ara vuse ka vam lisipsip tarak ga vas soogong.'

<sup>7</sup> Kuren mun, la a tong i rinimi, do langsgangan lomomo aleng kantubu atnedi di nemen to vana at laxalibet mila tegesa radi xapmek neni i leeng basinge laxakapmek teren. Ketla ti lavasik sangaun mi lavasik, lomomo lixilik mun tinedi ro vana at laxalibet. Mila nedi diran mantan pam la dixok pakes ti leeng."

#### *Lavapaase Poovo Ti Legesu Xuven Pilas*

<sup>8</sup> La ne Iesu ga lok bok, "Dola tatkin na ruuna lasangaun denarias la na xip kepe tegesu xuven atdi, lavanga salai neni naba lox i? Neni naba sox aros lababao, la na suxu loogu ren, la ba reven avukat at lengkot axap se neni na vuse ka i.

<sup>9</sup> Dola neni na vuse ka i, neni naba xup bubua ka larapen tangas teren la nedi di nemen aurer i, la na lok tidi, 'Nia a momo aleng mila ara vuse ka vam legesu xuven denarias tarak, no aga xip kepe i. Ata lok leluxa silok!'

<sup>10</sup> A tong i rinimi do, lubung angelo at ne Moroa dinaba momo aleng do tegesa radi xapmek neni i leeng basinge laxakapmek teren."

#### *Lavapaase Poovo Ri Lamdak Aau Ga On Basinge Ne Temen*

<sup>11</sup> La ne Iesu ga lok bok tidi xeretna, "Lara laradi ga ruuna leg-epu madak.

<sup>12</sup> Lara mumu ga lok ti ne temen, 'Tamak, una raba nga ia mi lenep tarak keneng at laplus taram.' Kuren

la temen nom lamdak ga epes nom lempanga kantubu at lumdak teren.

<sup>13</sup> \*Melemu at lentaba levenaleng lamdak aau ga xip kaka lempanga ren la ga vas kaxat uto vaxalom at lara lenep petpes, la mo go neni ga gosogos gamasa mun mi nom lapnovos teren ti laxaloklok kapmek.

<sup>14</sup> Neni ga soxope axap nom lempanga neni ga ruuna i. La langsgangan loroxo ga vot ap mo lenep silok axap, la neni ga nemen gamasa nga la goxopmen ta tempanga neni ga ruuna i.

<sup>15</sup> Kuren la neni gat pas kusu na gugu at lara laradi ap mo lenep silok, la mo laradi ga riki i uto at lang kolonu bo ren kusu na lok tatao lababo.

<sup>16</sup> \*Ni ga vara aleng i do neni naba anan levenbasa at lababo diga anan i. La kopmen teta goxom taba i mi teveluxa kusu tin ti anan.

<sup>17</sup> At lara laaleng neni ga ven kibis lorooro salai neni ga ruuna i, la ga lok, 'Limixin gugu at ne tamak di ruuna laxampanga anan solo xusu tidi ri anan, la nenia na a lok do ana sala nga!

<sup>18</sup> \*Ana vas kaxat la anamlong uto at ne tamak la ana lok tin, "Tamak, agara lok pam laxakapmek ti ne Moroa la tu bok.

<sup>19</sup> Ixo epovo bok ba xusu una tong ia do lamdak taram, una lox ia ngan lasaxaruki ram."'

<sup>20</sup> Kuren la ga vas kaxat uto at ne temen.

Neni move gat pas to vaxalom la ne temen ga ven kibis ka i. La lebelen ga umsu mi labalamu la ni ga sixit kaxat, la ga ot kongkongan ka lamdak teren, la ga nes i.

<sup>21</sup> La lamdak ga lok, 'Tamak, agara lok pam laxakapmek ti ne Moroa la tu bok. Ixo epovo bok ba xusu una tong ia do lamdak taram.'

<sup>22</sup> Ketla ne temen ga ro ka lavasaxaruki ren la ga lok, 'Soso mun! Mina lok kaka lisingsiga nunuan tarak, la mina vaxasiga

\* 15:13: Ler 29:3 \* 15:16: Ler 23:21 \* 15:18: Sam 51:4; Jer 3:12-13

i min. Mina lok li lurung molot at lekngen la luvanga vatpas to at luxangkedek teren.

<sup>23</sup> La minat pas la mina lok ka lubulumaxao maxat, la mina sev amer i. Ata lok laanan la ata momo!

<sup>24</sup>\*Mila anaa lamdak tarak ga met, ketla ira roo xat amlong pam. Ga soogong, ketla ananga ara lok ka amlong pam i.' La diga ruka leluxa.

<sup>25</sup> Lamdak avot, ga nemen to at laraamang ga xananging tubu. At lomlong teren boro xataamang, neni ga ronga lagaamit gang teng at lox-onaleng neni ga vas auret loogu.

<sup>26</sup> La ni ga ro ka lara lasaxaruki la ga sue i, 'Lavanga salai mo?'

<sup>27</sup>\*La lasaxaruki ga lok tin, 'Netam iramlong pam ukolonu, la ne tamam i sep ka lubulumaxao maxat, mila neni ira lok ka amlong pam lamdak teren mi, lorooro avukat at laban-tuxu ren.'

<sup>28</sup> Lamdak avot ga musak la ni goxo vara i xusu na beles uto xeneng at loogu. Kuren la ne temen ga vas su ukamang la ga sing lolos i xusu na beles ukeneng.

<sup>29</sup> La lamdak ga lok ti ne temen, 'At na laxanmaares aga gugu lolos aleng tu la a goxong tonga xepe levelinga ram. La lavanga salai ugara raba vam ia min? Kopmen tinotno tanatme nenu gita raba ia min kusu tia ri lok leluxa eburu mi larapen tangas tarak!'

<sup>30</sup> Ketla anaa lamdak taram ga gosogos gamasa mi lapnovos taram at loklok ting longka lavakin. Se neni iamlong ukolonu, nenu ura sep ka ba lubulumaxao maxat tin!'

<sup>31</sup> Temen ga vorang amlong i rin keretna, 'Nuruk, amisik nenu uga nemen eburu minia la lempanga axap nia a ruuna i ataram.

<sup>32</sup> Ketla ata lok leluxa la ata momo, mila netam ga met, ketla ira roo xat amlong pam. Neni ga vuktanga, ketla ara vuse ka amlong pam i.' "

## 16

### *Lavapaase Poovo Ri Laradi Loklok Tatao Gugu*

<sup>1</sup> La ne Iesu ga lok ti lavaun pinivu ren keretna, "Lara laradi gap novos aleng, ga ruuna laradi ri lok tatao leven gugu ren. La lentaba luvuttadi diga tong i rin do mo laradi gugu ga gosogos gamasa mi lempilas teren.

<sup>2</sup> Ni ga ro ka i ukeneng la ga lok tin, 'Levelinga salai na a ronga limixin di paase mumu u min? Una malagan asu axap luunun at lempanga rak nenu ugak lok tatao i, mila xopmen una epovo xusu nenu laradi gugu rak.'

<sup>3</sup> Melemu laradi gugu ga doma i xeretna, 'Anaba lok lavanga salai? Leeme gomgo rak mo i lok do na lok pes ia at na lugugu. La nia axo epovo lolos kusu ti ke povorok laxangka, la a mamangan bok kusu ti ngising panga.

<sup>4</sup> Anaaba nia aklen lavanga salai nia aba lox i! La do ana xap at na lugugu, aba etangas minedi limixin kusu dibap kup kaka ia uto at laraogu atdi.'

<sup>5</sup> Kuren la ni ga xup kaka nedi limixin diga sing ka lempanga at leeme gomgo ren. La ni ga lok ti laradi avot, 'Lavanisa lempanga nenu una vorang i at leeme gomgo rak?'

<sup>6</sup> La mo laradi avot ga lok, 'Lavanuan sangaun kobot (800) buxom at la olip.'

La laradi gugu ga lok tin, 'Lok kaka na lovoang ti vaase axasev u mi lempanga nenu una vorang i la una xis kopok la una malagan asu lavanuet sangaun kobot (400).'

<sup>7</sup> La ni ga lok ti mo lara laradi mumu, 'La nenu, lavanisa nenu una vorang i?'

La laradi mumu ga lok, 'Leges abin sangaun kobot (1000) laxan lutlut piao.'

La laradi gugu ga lok tin, 'Lok kaka i na lovoang papaase axasep

\* 15:24: Ep 2:1,5; 5:14 \* 15:27: Lu 15:2 \* 16:8: Ep 5:8; 1 Ts 5:5

la una malagan lavanuan sangaun kobot (800).’

8 \*La leeme gomgo at nom laradi babala ga long lenget lodoxoma at laradi gugu ren la ga lok tin keretna, ‘Lakleklen taram i silok aleng.’ ”

La ne Iesu ga lok keretna, “I rurun aleng. Limixin at na lavatbung menemen dikleklen aleng ti lok leven gugu kantubu atdi. Ketla limixin at ne Moroa kopmen dina gugu avukat mi lugugu at ne Moroa.”

9 \*La ne Iesu ga lok bok tidi xeretna, “A tong i rinimi do mina lok kaka lempilas la minam taba limixin min kusu diba etangas avukat minimi. Do lempilas na xap asonao, Moroa naba lam kaka nimi uto at loogu ren i nemen amisik.

10 \*Do nege i rurun at lempanga lixilik, neni naba rurun bok at lempanga silok. La do nege i xaxarang at lempanga lixilik, neni naba xaxarang bok at lempanga silok.

11 Mo do kopmen mi goxo rurun tik lok tatao lempanga at na lavatbung menemen, kopmen tara naba raba nimi mi nom lapnovos tuturun at ne Moroa.

12 La mo do mi goxo rurun at lempanga at lara vetpes, Moroa noxo raba nimi mi lempanga atnimi, ik lok no vana at laxalibet.

13 \*Lasaxaruki kopmen na epovo xusu na gugu ri tegepu radi silok. Neni naba belangatngas ti lara la na vavara mo lara. Neni naba rurun ti lara la na sok tixirixes kepe tara. La kerepmo kopmen mina epovo xusu mina lotu rurun saparap ne Moroa la mina doxoma mumu amisik lapnovos at na lavatangka.”

14 \*Lubung Parisi diga rongga i na la diga lok kalise xapmek ne Iesu, mila diga vavara aleng lempilas.

15 \*La ne Iesu ga lok tidi, “Nemi vam nom mik lok do minak mokso at lemeren limixin, ketla ne Moroa ikleklen i do keneng at lebelen nimi

i umsu mi laxakapmek. Do lavanga salai limixin di doxoma i do i silok aleng, nom i ngan lavanga gamasa at lemeren ne Moroa.

16 \*Laulis Linga at ne Moses la levenmamalagan at lavaeme vapaase ali ga nemen se at levenaleng at ne Jon laradi sep susu. Ga ruka i go Lagale Lavavang mumu Linintoo at ne Moroa ga lok kun i min, la buaang nedi limixin di lolos do ukeneng di.

17 \*I lolos do laxalibet mi na lavatangka naba xap, ketla i lolos aleng ti tamangkot lixilik keneng at levelinga at Laulis Linga xusu naba sonao.

18 Do taradi na soxope latkin teren, la na epot ka tatkin petpes, neni ira longka vam. La do taradi i epot at tatkin, latlok teren ga soxope i, neni bok ira longka vam.”

### *Lasaro La Laradi Gap Novos*

19 La ne Iesu ga lok bok, “Laradi gapnovos gang siga levesingsiga ga lok nunuan aleng, la at levenaleng axap gan tuuna laxampanga solo.

20 Lara laradi banbalo bok ga nemen, laasen teren ne Lasaro, labantuxu ren ga umsu mi laxanabi, la amisik digak lok kaka i uto at lumusmaragu at loogu at nom laradi nopnovos.

21 \*Neni ga doxoma i do naba anan lengkonmumus luxa mo gam subu su boro at loxonin anan at nom laradi nopnovos. Lubungman bok digam dem laxanabi ren.

22 At lara laaleng laradi banbalo ga met la lubang angelo diga xip kaka i uto saparap ne Abaram, to vana at laxalibet. La nom laradi nopnovos bok ga met la digak mir i.

23 Neni ga suma aleng langsung losongsongot to Edesa, la ni ga milik aurut la ga ven ne Abaram gak lok paxalom tinotno, eburu mi ne Lasaro go saparav i.

24 La neni ga xup silok keretna, ‘Tamak ne Abaram, una balamu ia.

\* 16:9: Mt 6:20; Lu 14:14 \* 16:10: Lu 19:17-26  
Mt 23:28; Lu 18:9-14; Ler 6:16-17 \* 16:16: Mt 11:12-13

\* 16:13: Mt 6:24 \* 16:14: Mt 23:14 \* 16:15:  
\* 16:17: Mt 5:18 \* 16:21: Mt 15:27

Una riki ne Lasaro xusu na song arup lisivisip teren uto at taxadan, la na lox amumudut lagam tarak min. Nia na a nemen at langsung losong-songot keneng at na laxao!’

<sup>25</sup> Ketla ne Abaram ga lok, ‘Nuruk, una doxoma i na. At lorooro ram uga ruuna laxampanga solo, la ne Lasaro ga lok kaka lempanga xapmek. Ketla nanga neni mo i momo aleng nade, la nenu nga mo ura nemen keneng at langsung losongsongot.

<sup>26</sup> La lavanga bok na, langsung lavagam i si aleng ik midi kantubu atda, kusu do nege na vas kaxat mede la udom, kopmen noxo epovo. La tara medom ixo epovo xusu na volo ude.’

<sup>27</sup> Laradi nopnovos ga lok, ‘I lox avukat mene nga. A sing u do una riki ne Lasaro uto at loogu at ne tamak,

<sup>28</sup> kusu neni nabat pas la na vaase aronga bok lavalimo luvutnetak la di noxot pas bok ti na lemenemen songsongot.’

<sup>29</sup> Abaram ga lok tin keretna, ‘Luvutnetam di ruuna levelinga keneng at Laulis Linga at ne Moses eburu mi levelinga at lavaeme vapaase ali xusu ti vaase aronga di. I epovo do luvutnetam dina rongga mo levelinga’.

<sup>30</sup> Laradi nopnovos ga lok, ‘Tamak ne Abaram. Kopmen na epovo! Ket do tara na xatu kaxat amlong basinge lanmet la nat pas uto saparap di, agut diba leeng ba basinge laxakapmek atdi.’

<sup>31</sup> \*Ketla ne Abaram ga lok, ‘Mo do di noxo rongga res at Laulis Linga at ne Moses mi levelinga at lavaeme vapaase ali, di noxo leeng basinge laxakapmek atdi. La do tara na xatu kaxat amlong basinge lanmet la na vaase ridi, move di noxo leeng.’ ”

## 17

### *Laxakapmek* (Mt 18:6-7,21-22; Mk 9:42)

<sup>1</sup> Iesu ga lok ti lavaun pinivu ren keretna, “Leveloklok tong pen mo naba vot ti lox asubu limixin ti laxakapmek. Ketla naba lok kapmek tinotno ri tara do na lox asubu di.

<sup>2</sup> I epovo do diba sevut li tangsangan tavatkinem to at laxaka ren la diba dong asi i uto xopok at laras. Lavanga na lok tara at laxamdak kakalik dina beles at laxakapmek la na suma lebelemamao at ne Moroa.

<sup>3</sup> \*Kuren la mina lok tatao avukat nemi!

Mo do netam na lok laxakapmek, una vaase sox i, la mo do neni na leeng, una doxoma xepe mo laxakapmek teren.

<sup>4</sup> La mo do neni na lok tavanuti teveng kakapmek keneng at leges aleng tu, la na vot pasa amisix u la na lok, ‘Nia a leeng basinge laxakapmek tarak’, una doxoma xepe laxakapmek teren.”

### *Lununu I Xakalik Ngan Liit Mastet*

<sup>5</sup> \*Luvuttadi vavang diga lok ti Leeme Silok keretna, “Una lox asilok lununu atnama.”

<sup>6</sup> \*La Leeme Silok ga vorang i ridi xeretna, “Mo do mina ruuna lununu i xakalik ngan liit at lamastet, minaba epovo xusu mina tong i ri na luuna do, ‘Una remsup eburu mi levenixe ram la una tu tou at laras!’ La ni naba rongga res atnimi.”

### *Lugugu At Lasaxaruki*

<sup>7</sup> La ne Iesu ga lok bok tidi xeretna, “Mo dola nenu u ruuna lasaxaruki i gugugu to xataamang kopla ik lok tatao laxasipsip la do neni namlong uto xolonu, kereva uba tong i rin do, ‘Soso ude la una anan?’

<sup>8</sup> Kopmen tinotno! Ketla uba tong i rin do, ‘Una lox agagas li leveluxa rak, la una siga loxontamon avukat taram la una raba panga anan ia ana anan la ana inin. Melemu ba una anan la una inin.’

<sup>9</sup> Kereva, nom laradi ba tong loklox avukat bok ti lasaxaruki mila neni ga lox epovo laai laradi gomgo ga tong i rin? Kopmen tinotno.

\* 16:31: Jo 11:44-48 \* 17:3: Mt 18:15 \* 17:5: Mk 9:24 \* 17:6: Mt 17:20; 21:21



10 Nemi bok kuren. Mo do mira lok pam lempanga nenia a tong i rinimi, i epovo do mina lok, 'Nema lavasaxaruki gamasa mene, ma lok pam leven gugu atnama.' ”

*Iesu Ga Lox Aroo Lasangaun Luvuttadi Mekmeres*

11 \*At lavatpas teren to Jerusalem, Iesu gat pas at lapdopdo xantubu at lunep Samaria la Galili.

12 Neni gat pas uto at lara lemenemen la neni ga ekip tangarang mi lasangaun luvuttadi, lanmeres gu (leprosy) ga nemen atdi. Diga ru ro vaxalom,

13 \*la diga xup keretna, “Iesu, Leeme Silok! Una balamu nama!”

14 \*Iesu ga ven di la ga lok tidi, “Minat pas la mina lox ase labantuxu atnimi ro at lavamaasa.”

Diga vas kaxat la to at langas nedi axap diga lox avukat.

15 Legesara atdi ga ven i do ga lox avukat, gamlong, la gap kup silok mi leemi asu ri ne Moroa.

16 Neni ga xis tiktikbu mi luvatulom teren saparap ne Iesu, la ga tong aorong tin. Mo laradi neni boro Samaria.

17 La ne Iesu ga sue i xeretna, “Lasangaun nedi luvuttadi di lox avukat, lavasik bok ua?”

18 Tila ba la na laradi boro Samaria, neni xusuk mun legesara imlong kusu na tong loklox avukat ti ne Moroa?”

19 \*La ne Iesu ga lok bok tin, “Katu kaxat la una onon. Lununu ram ira lox avukat pam u.”

*Lovotpot At Linintoo  
(Mt 24:23-28,37-41)*

20 \*At lara laaleng lentaba lubang Parisi diga sue ne Iesu do at laaleng salai Linintoo at ne Moroa naba vot. La ne Iesu ga vorang i ridi xeretna, “Linintoo at ne Moroa kopmen na vot mi toloklok katling kusu miba ven i,

21 \*kopla tara noxo lok tinimi do, ‘Mina ven ba i, ananga i!’ kopla na tong i do, ‘Ano nga i!’ mila Linintoo at ne Moroa i nemen keneng at lebelen limixin.”

22 La ne Iesu ga lok ti lavaun pinivu ren keretna, “Laaleng naba vot la miba vara i do mina ven manga ia, Laradi Mevana, ketla mi noxo ven ia.

23 \*La lentaba diba lok tinimi, ‘Mina ven ba i no!’ Kopla, ‘Mina ven i nade!’ Ketla nemen mita vas su xusu mina ven tia,

24 mila lovotpot tarak naba lok petpes. Lavanga na mam la na soo gamgames to vana at lamavangkap la na soo xat boro at tenep la uto at tara tenep. La naba lok mun kuren ti Laradi Mevana ap mo laaleng teren.

25 \*Ketla avot be nenia anaba xip losongsongot aleng la limixin at nai levenaleng dinaba sok tixirixes aleng ia.

26 At lovotpot tarak limixin dinaba lok ngan mo limixin gano at levenaleng at ne Noa.

27 Limixin axap diga anan la diga inin, la lavatlok la lavakin diga epot, se at nom laaleng ne Noa ga beles ti lavatmon la laraan ga vot la ga sev amet nedi axap.

28 \*Naba lok ngan bok levenaleng at ne Lot. Limixin axap diga anan la diga inin, diga unun panga la diga sesep bok mi lempanga, digatlotlo taamang la digak paxaru laraogu.

29 At nom laaleng ne Lot ga on basinge lemenemen Sodom, laxao silok ga vot boro vana at laxalibet la ga sev amet nedi axap.

30 Naba lok mun kuren at nom laaleng, nenia, Laradi Mevana, ana ru asuvos.

31 \*Ap mo laaleng laradi do na nemen to mavana at langkut at loogu ren, nemen gat neni na vubeles bok ba ro at loogu ren kusu na lok kaka lempanga ren mo i nemen go. Kuren

\* 17:11: Lu 9:51-52; 13:22 \* 17:13: Mas 13:45-46 \* 17:14: Mas 14:2-3; Lu 5:14 \* 17:19: Lu 7:50 \* 17:20: Jo 3:3; 18:36 \* 17:21: Mk 13:21 \* 17:23: Lu 21:8 \* 17:25: Lu 9:22 \* 17:28: Lur 18:20; 19:25 \* 17:31: Lur 19:17,26; Mt 24:17-18 \* 17:33: Lu 9:24

mun do laradi nak lok to xataamang, neni noxomlong uto at loogu ren.

<sup>32</sup> Mina doxoma latkin at ne Lot!

<sup>33</sup> \*Do nege i lok do na ranga alis lorooro ren, neni naba sang apkav i. La do nege na soxope lorooro ren, neni naba ranga alis i.

<sup>34</sup> A tong i rinimi do, ap mo laxan-imin tegepura dunabak midi at teges ora. Lubung angelo dinaba lok ka tara, la tegesara naba nemen alu.

<sup>35</sup> Tegeputkin dunaba sep povovorok levempeven piao. Lubung angelo dinaba lok ka lara la tara naba nemen alu.

<sup>36</sup> [Tegepu radi dunaba gugu to xataamang. Lubung angelo dinaba lok ka legesara, la tara naba nemen alu.]

<sup>37</sup> \*La lavaun pinivu diga sue i, "Leeme Silok, na lempanga ba ravasu ua?"

La ne Iesu ga vorang i ridi xeretna, "Ap mo loxot lempatmaalom dinaba vot buru e, kusu dina anan laban-tuxu at laradi ga met."

## 18

### *Lavapaase Poovo Ri Latkin Naa La Laradi Rongtonga Linga*

<sup>1</sup> \*Melemu ne Iesu ga tong na lava-paase poovo ridi kusu ti lox ase di do diba ngising amisik la nemen gat dita molo.

<sup>2</sup> Ni ga lok keretna, "Lara laradi rongtonga linga ga nemen to at lara lemenemen la ni xopmen goxo lok ngangao at ne Moroa la kopmen goxo lok ngangao at limixin.

<sup>3</sup> La lara labannaa rixin bok mo ga nemen ap mo lemenemen, la amisik neni gat pot pasa mo laradi rongtonga linga la ga ngising i xusu neni na lok tooro i, ga lok tin keretna, 'Una lok tooro ia ri ronga linga rak mi laradi i munepen minia.'

<sup>4</sup> Ga lox abao la laradi rongtonga linga goxo mulus. Ketla melemu neni ga doma i xeretna, 'I ruturun

tinotno, nenia axo lok ngangao at ne Moroa la axo lok ngangao bok at limixin.

<sup>5</sup> \*Ketla na latkin ik lox angtang amisix ia. Kuren la nenia aba ronga linga ren. Lavanga neni nat pot pasa amisix ia la na lox amolo rinotno ia!'"

<sup>6</sup> La Leeme Silok ga lok, "Mina doxoma levelinga, nom laradi rongtonga linga xapmek ga tong i.

<sup>7</sup> La kereva, ne Moroa? Neni naba ronga linga at limixin axa ren, mo di ngising amisik tin kusu ti loklok tooro at lengkangkling la at lengkan-imin. La neni noxo lok sila bok kusu ti lok tooro di.

<sup>8</sup> A tong i rinimi do, neni naba ronga linga atdi la soso mun na lox epovo i. Ket do Laradi Mevana nabamlong ude at lavatbung mennen, kereva, neni naba long lenget ka limixin di nunu?"

### *Lavapaase Poovo Ti La Parisi La Laradi Loklok Ka Pilas*

<sup>9</sup> La ne Iesu ga tong bok na lava-paase poovo ri limixin mo digak lok do nedi mo din manton aleng ketla digak lox abulubun kepe limixin petpes.

<sup>10</sup> Ni ga lok keretna, "Legepu radi dugat pas uto vana at loogu laplavang kusu duna sing. Lara neni la Parisi, la lara neni laradi loklok ka pilas.

<sup>11</sup> \*La mo la Parisi ga ru kaxat upana la ga sing mi lodoxoma keretna, 'Moroa, nenia a emi asu minu, mila nia xopmen anak morong, la ana xaxarang, la anang longka tixin, kerekngan limixin petpes. A tong avukat tu mila nia xopmen ana lok ngan na laradi loklok ka pilas.

<sup>12</sup> \*An mun anan at legepu aleng at legese uik, la am taba u mi loxot i sev asangaun at lempanga rak'.

<sup>13</sup> \*Ketla laradi loklok ka pilas ga ru paxalom lixilik la neni xopmen goxo lox aurut lemeren uto vana at laxalibet, ketla neni ga sogotu at

\* 17:37: Jop 39:30 \* 18:1: Ro 12:12; Kl 4:2; 1 Ts 5:17 \* 18:5: Lu 11:7-8 \* 18:11: Lu 16:15

\* 18:12: Ais 58:2-3; Lur 14:20; Mt 23:23 \* 18:13: Sam 51:1

lobongobong teren la ga lok, 'Moroa, una balamu ia, laradi xapmek.' "

14 \*La ne Iesu ga lok, "A tong i rinimi do, anaa laradi, kopmen mo la Parisi, gan mantan at lemeren ne Moroa se neni gamlong ukolonu. Do nege i lox asilox i, Moroa naba lok alixilix i. La do nege i lox alixilix i, Moroa naba lox asilox i."

*Iesu Ga Lox Anarong Laxamdak Mi Laxaalik Kakalik*  
(Mt 19:13-15; Mk 10:13-16)

15 Lentaba limixin diga lok kaka laxamdak mi laxaalik kakalik atdi uto saparap ne Iesu xusu neni naba lox anarong di. Ketla lavaun pinivu ren diga ven di la diga sep pepe di.

16 Ketla ne Iesu ga ro bubua ka laxamdak mi laxaalik kakalik saparav i, la ga lok ti lavaun pinivu ren, "Mina ke laxamdak mi laxaalik kakalik dibat pas saparav ia. La nenen mita sep pepe di, mila Linintoo at ne Moroa i epovo ridi na.

17 \*Nia a tong tuturun i rinimi! Do nege xopmen na siam kaka Linintoo at ne Moroa kerekngan lamdak kakalik, neni noxo beles teren."

*Laradi Gap Novos*  
(Mt 19:16-30; Mk 10:17-31)

18 \*Lara lamgomgo at leme Judaia ga sue ne Iesu, "Laradi loklox ase avukat, anaba lok lavanga salai xusu anaba lok kaka lorooro avolo?"

19 La ne Iesu ga sue i, "Tila u tong ia do a lox avukat? Kopmen tara na lox avukat ketla ne Moroa xusuk.

20 \*Uklen Laulis Linga i lok keretna,

'Nemen utang longka tixin, nenen uta sey amef tara, nenen uta xip pilo, nenen uta xarang taba tara, la una lok ngangao at ne tamam mi nenen.' " *Pas 20:12-16*

21 Mo laradi ga vorang i rin keretna, "Ga ruka i, laau ia, aga mumu asu vam na levelinga axap."

22 Se ne Iesu ga ronga i na, neni ga lok tin, "Uk pakes bok kusu una lok legesa vanga. Una sesep mi lempanga axap taram la una raba lempilas ti luvuttadi banbalo, la unaba ruuna ka lapnovos to vana at laxalibet. La ude u la una mumu asu ia."

23 Ketla na laradi ga ronga i na, ga lok bukbulu aleng, mila neni gap novos aleng.

24 Iesu ga ven mo laradi ga bulu aleng la ni ga lok, "Naba lolos aleng ti luvuttadi dip novos kusu dina beles at Linintoo at ne Moroa!

25 I lolos aleng ti lakamel kusu na beles at lamamara at linil, la kerepmo i lolos aleng bok ti laradi nopnovos kusu ti beles at Linintoo at ne Moroa."

26 Mo limixin diga ronga i na, diga sue, "Nege ba naba lok kaka lorooro i nenen amisik?"

27 \*La ne Iesu ga vorang di xeretna, "I lolos aleng do laradi nopnovos na vubeles at Linintoo at ne Moroa, ketla kopmen na lolos do ne Moroa na lox arooro i."

28 La ne Pita ga lok, "Kereva ba nama? Maga on basinge vam lempanga axap atnama kusu manaba mumu asu u."

29 La ne Iesu ga lok, "Nia a tong tuturun i rinimi, mo do tara na on basinge loogu ren koplalatin teren, koplalaton, koplalaten mi nenen koplalaxamdak teren kusu ti tong asu levelinga at Linintoo at ne Moroa,

30 neni naba ruuna aleng laxampanga solo at na lorooro kopok, la at lorooro melemu ni naba rooro amisik."

*Iesu Ga Vaase Sepsev Avantun Mumu Lanmet Teren*  
(Mt 20:17-19; Mk 10:32-34)

31 \*Iesu ga lam kaka lasangaun mi legepura lavaun pinivu ren uto vetpes basinge limixin la ga lok tidi, "Mina ronga i na! Atat pas uto Jerusalem la lempanga axap

\* 18:14: Mt 23:12 \* 18:17: Mt 18:3 \* 18:18: Lu 10:25 \* 18:20: Lal 5:17-20 \* 18:27: Mk 14:36 \* 18:31: Lu 24:44

lavaeme vapaase ali diga malagan i mumu Laradi Mevana naba soorun.

<sup>32</sup> \*Limixin kapmek dinaba song araba i ri limixin kopmen di me Judaia la dinabak lok kalise xapmex i, la dina paase aksaksa rin, la dinaba xalaubis i.

<sup>33</sup> Dinabak pixis i la dinaba sev amer i, ketla at laaleng sepsev avantun, neni naba roo xat amlong bok.”

<sup>34</sup> \*Lavaun pinivu ren di goxo xasep at na levelinga. Lempasuun at na levelinga ga lipe aleng tidi, la di goxo xasep teren.

### *Iesu Ga Lox Aroo Laradi Luxatli Ren Ga Main*

(Mt 20:29-34; Mk 10:46-52)

<sup>35</sup> Iesu gat pas auret lemenemen Jeriko la lara laradi luxatli ren ga main, gat kis go at lisigege ngas, ga ngising panga.

<sup>36</sup> Se neni ga ronga limixin digat pas polo la neni ga sue di, “Lavanga salai mo?”

<sup>37</sup> La diga lok tin, “Iesu boro Nasaret na it pas polo.”

<sup>38</sup> \*La ni ga xup silok keretna, “Iesu! Livisik li at ne Devit! Una balamu ia!”

<sup>39</sup> Mo limixin digam gomgo, diga musax i la diga lok tin kusu nak lok pilo. Ketla neni gap kup silok tinotno, “Livisik li at ne Devit! Una balamu ia!”

<sup>40</sup> La ne Iesu ga ru la ga tong i ridi do dina lam kaka i saparav i. Se neni ga vas auret, Iesu ga sue i,

<sup>41</sup> “Lavanga salai u vara i do ana lox i ru?”

La ni ga lok, “Leeme Silok, a vara i do luxatli rak na xasep.”

<sup>42</sup> \*La ne Iesu ga lok tin, “Luxatli ram na xasep. Lununu ram ira lox avukat pam u.”

<sup>43</sup> La soso mun neni ga lox epovo i xusu na reven, la ni ga mumu asu ne Iesu, la ga emi asu mi ne Moroa. Se limixin diga ven i na, nedi axap diga emi asu mi ne Moroa.

## 19

### *Iesu La Ne Sakias*

<sup>1</sup> La ne Iesu ga vas polo xeneng at lemenemen Jeriko.

<sup>2</sup> La lara laradi gomgo at limixin loklok kaka pilas mo ga nemen, laasen teren ne Sakias, neni laradi gap novos.

<sup>3</sup> Neni gak lok tong pen i kusu ni na ven ne Iesu, do neni nege. Ketla neni laradi mutmut mun la ni goxo epovo kusu na ven ne Iesu mila buaang nedi limixin diga rupe i.

<sup>4</sup> Kuren la neni ga sixit migo ri limixin la ga eng urut at lara luuna pik kusu ti ven ne Iesu, do naba vas polo ap mo langas.

<sup>5</sup> Se ne Iesu ga vas pot ap mo loxot, neni ga milik aurut upana la ga lok ti ne Sakias, “Soso ukopok Sakias, mila lingina aba xis eburu minu to xeneng at loogu ram.” <sup>6</sup> Sakias ga eng si soso la ga siam ka ne Iesu mi lomomo uto at loogu ren.

<sup>7</sup> \*Mo limixin diga ven i na, diga epaase ngunungun keretna, “Leeme Silok it pas ngan loose uto at loogu at laradi xapmek!”

<sup>8</sup> \*Sakias ga ru ro melamgo at limixin la ga lok ti ne Iesu, “Leeme Silok. Nia anaba raba loxot atat at lempanga rak ti limixin banbalo. La do nenia agara xarang kaka vam tempilas, anaba un amlong i rin na vanuet.”

<sup>9</sup> \*Iesu ga lok ti limixin axap, “Lingina Moroa ira lox arooro vam limixin at na loogu. Nia a lok tooro na laradi mila neni livisik li at ne Abaram.

<sup>10</sup> \*La kerepmo, nenia, Laradi Mevana, aga vot kusu ana puse rinedi diga soogong la ana lox arooro di.”

### *Lavapaase Poovo Ri Lempilas*

(Mt 25:14-30)

<sup>11</sup> \*Limixin diga ronga vam na levelinga, la ne Iesu ga tong bok

\* 18:32: Lu 9:22,44 \* 18:34: Mk 9:32 \* 18:38: Mt 15:22 \* 18:42: Lu 7:50 \* 19:7: Lu 15:2 \* 19:8: Pas 22:1; Kex 5:6-7 \* 19:9: Gu 16:31; Lu 13:16 \* 19:10: Lu 15:4; Jo 3:17; 1 Ti 1:15 \* 19:11: Mt 25:14-30

lara lavapaase poovo ridi, mila neni mo gat pas auret ta lemenemen Jerusalem, la nedi diga nua i do, Linintoo at ne Moroa mo naba vor asuvos ap mo loxonaleng.

12 \*Neni ga lok, “Lara leeme silok gat pas uto vaxalom at lara lenep silok kusu diba lox i ngan loorong la melemu neni nabamlong ukolonu.

13 Avot at lavatpas kaxat teren neni ga xup kaka lasangaun lavasaxaruki ren la ga raba nedi getgesara mi legetgesu xuyen minas, la ga lok tidi, ‘Mina gugu mi na lempilas, se nenia anabamlong.’

14 \*Ketla limixin teren ap mo lenep silok diga belengatngas tin, kuren la diga riki luvuttadi mi levelinga kusu dina mumu ren la diba lok, ‘Ma xopara na laradi kusu na lok ngan loorong atnama.’

15 Ketla neni ga ruuna ka i nom lolos at loorong, la gamlong. La ni ga xup kaka lavasaxaruki ren, no neni ga raba vam di mi lempilas. La nedi diga ru ro melango ren, la neni ga sue di do lavanisa levempilas diga lok kaka i.

16 Lara avot ga vot pasa i la ga lok, ‘Leeme silok, aga gugu mi mo lempilas uga raba ia min, la ara ruuna ka vam lasangaun minas.’

17 \*Neni ga lok, ‘I lox avukat aleng. Nenu lagale lasaxaruki. Nenu uga gugu avukat mi lempanga lixilik, kuren la ana lok li u, kusu unak lok tatao lasangaun levenmenemen silok.’

18 Lasaxaruki sepsev agepura ga vas beles ukeneng la ga lok, ‘Leeme silok, aga gugu mi mo lempilas uga raba ia min, la ara ruuna ka vam lavalimo minas.’

19 Neni ga lok ti na laradi, ‘Nenu unaba lok tatao lavalimo levenmenemen silok.’

20 La lara lasaxaruki ga vot pasa i la ga lok, ‘Leeme silok, lempilas taram na. Aga bom alipe i ro xeneng at loxontamon.

21 Aga marat taram, mila nenu laradi lolos. Uk lok kaka lempanga kopmen ataram, la u kaxat ka lempanga anan, nenu xopmen u goxotlotlo i.’

22 La ni ga lok tin, ‘Nenu lasaxaruki xapmek! Anaba lok li u at lavapaase mumu levelinga axa ram. Uklen i do nia laradi lolos, ak lok kaka lempanga kopmen atarak la a kaxat ka lempanga anan kopmen nia agatlotlo i.’

23 Tila ba nenu u goxo lok li lempilas tarak to at loogu loklok li pilas? La i se mo nia aramlong nia giba lok kaka amlong ta i mi lentaba bok mavana ren.’

24 La neni ga lok tidi mo diga tu go, ‘Mina lok kaka amlong mo legesu xuyen minas basinge i la mina raba i ti lasaxaruki i ruuna lasangaun minas.’

25 Ketla diga lok tin, ‘Leeme silok! Neni i ruuna vam lasangaun minas!’

26 \*La mo leeme silok ga lok, ‘A tong i rinimi do nedi di ruuna lempanga la di lok lugugu at ne Moroa min, dinaba lok kaka bok laxampanga solo. Ket do lara na ruuna lempanga lixilik, la kopmen na lok lugugu min, neni naba lok pes i basinge di.

27 Ketla tinedi na limixin di munepen minia, la di goxopara i xusu nenia loorong atdi, mina lam kaka di ude la mina sev amet di de melango rak!’ ”

### *Iesu Ga Beles To Jerusalem Ngan Loorong Silok*

(Mt 21:1-11; Mk 11:1-11; Jo 12:12-19)

28 Iesu ga vaase axap na levelinga la neni ga vas migo ridi uto Jerusalem.

29 Se neni ga vas auret lumemen Betpage la Beteni dugak lok at Lakaana Olip, neni ga riki amgo luradi pinivu ren.

30 Avot be ni ga lok tidu xeretna, “Munat pas uto at nom lemenemen ik lok to melango atnumu. La do

muna vas beles ukeneng, muba long lenget ka lodongki diga xoxo li i la goxovisi dina xis teren. Muna soxomus ka i la muna lok kaka i ude.

<sup>31</sup> Mo do tara na sue numu do, “Tila nemu mu soxomus ka i nom lodongki?” Muba lok tin do, ‘Leeme Silok i vara rin.’ ”

<sup>32</sup> \*Dugat pas at langas la duga long lenget ka lempanga axap kerekngan ne Iesu ga tong pam i ridu.

<sup>33</sup> Se duga soxomus kaka i nom lodongki, luvuttadi loklok tatao at lodongki diga lok tidu, “Tila nemu mu soxomus ka i nom lodongki?”

<sup>34</sup> Duga lok tidi, “Leeme Silok i vara rin.”

<sup>35</sup> La duga lok kaka lodongki uto saparap ne Iesu. La duga lok kaka levesingsiga atdu la duga lok li i mavana at lodongki la duga rebeng amaurut ne Iesu uto vana at lodongki.

<sup>36</sup> \*Se neni ga xis at nom lodongki la gat pas, limixin diga sa li levesingsiga atdi ro at langas.

<sup>37</sup> Se neni ga vas auret Jerusalem, at loxot langas ga si ukopok at Lakaana Olip, buaang nedi limixin teren diga mumu asu i, diga xup kaxat mi lomomo la diga emi asu mi ne Moroa mi luxupkup silok mumu lempanga sangsangu nedi diga ven pam i.

<sup>38</sup> \*Digap kup keretna, “Luvukat ti Loorong Silok mo i vot mi laasen at Leeme Silok ne Moroa! Lumulum na nemen to vana at laxalibet, la leemi asu ri ne Moroa!” *Sam 118:26*

<sup>39</sup> Lentaba lubang Parisi diga vaase kaxat to xantubu at limixin diga mumu asu ne Iesu. Diga lok tin, “Laradi loklox ase, tong i ri limixin atnimi kusu dina lok pilo!”

<sup>40</sup> Iesu ga vorang i ridi xeretna, “A tong tuturun i rinimi. Mo do dina lok pilo, laxanuat dinabap kup mi leemi asu saparap ne Moroa.”

### *Iesu Gang Teng Mumu Limixin To At Lemenemen Jerusalem*

<sup>41</sup> \*Ni ga vas auret lemenemen silok Jerusalem la se neni ga ven i, neni gang teng mumu limixin teren,

<sup>42</sup> \*la ga lok keretna, “Lingina nemi limixin kopmen minaklen lavanga salai xusu naba lok lumulum. Ketla monga i nemen ali pe vam.

<sup>43</sup> Levenaleng naba vot, la limixin esep dinaba rit kangkan nemi mi larangas uat, la dina ru xangkan nemi, la dinabam tu xobot ka nemi at lengkot axap.

<sup>44</sup> \*Dinaba sele utut kepe nemi eburu mi laxamdak mi laxaalik atnimi dik lok maxeneng at langas uat. La kopmen tinotno tegesa xonuat dinaba ke i at toxot teren, mila mi goxo ven kibis i do ne Moroa ga vot kusu na lox arooro nemi!”

### *Iesu Ga Beles To Xeneng At Loogu Laplavang*

(*Mt 21:12-17; Mk 11:15-19; Jo 2:13-22*)

<sup>45</sup> La ne Iesu ga beles ukeneng at loogu laplavang la ga xala su mi limixin diga sesep mi lempanga atdi,

<sup>46</sup> la ga lok tidi, “Levelinga at ne Moroa i nemen keneng at Lovoang Kaala i lok keretna,

‘Loogu rak dinaba so asen i mi loogu singising.’ *Ais 56:7*

Ketla mira lok kapmek pam i, i ngan loogu loklox ali pe at luvuttadi dip sep paxat ka panga!”

<sup>47</sup> \*At levenaleng axap Iesu ga anasa limixin to at loogu laplavang. La lavamaasa silok mi luvuttadi loklox ase at Laulis Linga, la luvuttadi amgomgo at limixin diga vara i xusu dina sev amer i.

<sup>48</sup> \*Ketla di goxo lox epovo i mila diga marat at limixin la limixin axap digang tonga amisix i, mila diga vara aleng levelinga ren.

\* **19:32:** Lu 22:13    \* **19:36:** 2 Lav 9:13    \* **19:38:** Lu 2:14    \* **19:41:** Jo 11:35    \* **19:42:** Ais 6:9-10;  
Mt 13:14; Ro 11:8    \* **19:44:** Lu 21:6; 1:68    \* **19:47:** Lu 21:37; 22:53; Jo 18:20    \* **19:48:** Mt 21:46;  
Mk 14:1-2; Lu 20:19

## 20

### *Lususue Mumu Lolos Ne Iesu Ga Gugu Min*

(Mt 21:23-27; Mk 11:27-33)

<sup>1</sup> At lara laaleng ne Iesu ga nemen to xeneng at loogu laplavang, ga anasa limixin la ga vavang bok tidi mi Lagale Lavavang. La lavamaasa silok eburu mi luvuttadi loklox ase at Laulis Linga, la loxongkulao silok diga vot pasa i,

<sup>2</sup> la diga sue i, “Una tong i rinama, nege ga lok li u xusu una lok na lempanga? La nege ga siam avolo u xusu una lox i na?”

<sup>3</sup> La ne Iesu ga vorang i ridi xeretna, “Nia bok ana sue nimi mi lususue. Mina tong i ria,

<sup>4</sup> lesep susu at ne Jon ga laa meva? Boro at ne Moroa koplā boro mun at limixin?”

<sup>5</sup> La diga esue min kantubu atdi, la diga lok, “Ataba tong lavanga salai? Mo do ata lok keretna, ‘Boro at ne Moroa,’ neni naba lok, ‘Tila ba mi goxo nunu at ne Jon?’

<sup>6</sup> Do ata lok keretna, ‘Boro at limixin,’ anaa axap limixin diba lu amet dik mi laxanuāt, mila di nunu do ne Jon neni leeme vapaase ali.”

<sup>7</sup> Kuren la diga lok ti ne Iesu, “Max-oklen i do ga laa meva.”

<sup>8</sup> La ne Iesu ga lok tidi, “Nenia bok a noxo tong i rinimi do nia a lok na lempanga mi lavapaase axasep meva.”

### *Lavapaase Poovo Ti Luvuttadi Xapmek Diga Lok Tatao Laraamang*

(Mt 21:33-46; Mk 12:1-12)

<sup>9</sup> \*La ne Iesu ga vaase manga mi lara lavapaase poovo ri limixin, ni ga lok, “Lara laradi gatlo laraamang vaen, la ni ga raba luvuttadi min kusu dinak lok tatao laraamang. La ni ga vas kaxat uto at lara lenep silok at lentaba levenmaares.

<sup>10</sup> \*Se at laaleng ga vot kusu dina dik kaka lempeven una, neni ga riki lara lasaxaruki uto at luvuttadi

loklok tatao at laraamang kusu na lok ka toxot at lempeven una xusu tin. Ketla luvuttadi loklok tatao at laraamang digap sep nom lasaxaruki la diga riki amlong kixinax i.

<sup>11</sup> Kuren la ni ga riki manga lara lasaxaruki. Ketla luvuttadi loklok tatao at laraamang digap sep box i, la diga lox amangan tinotno i, la diga riki amlong kixinax i.

<sup>12</sup> Melemu neni ga riki lasaxaruki sepsev avantun, la luvuttadi loklok tatao at laraamang digap sep kap-mex i, la diga lu asu min ukamang.

<sup>13</sup> La mo laradi at nom laraamang vaen ga lok, ‘Anaba lok lavanga salai? Ana riki lamdak akmokso rak, la kerepmo nedi dinaba lok ngangao ren!’

<sup>14</sup> Ketla nom luvuttadi diga ven i, diga lok tidi xa, ‘Lamdak akmokso at laradi at na laraamang. Ata sev amer i, la ataba ruuna ka na laraamang!’

<sup>15</sup> Kuren la diga lu asu min ukamang at laraamang vaen la diga sev amer i.”

La ne Iesu ga sue di, “Lavanga salai laradi at nom laraamang naba lox i ridi nom luvuttadi loklok tatao?”

<sup>16</sup> Neni nabat pas la na sev amet nom luvuttadi, la na raba nom laraamang vaen ti tentaba tuvuttadi vet-pes.”

Se mo limixin diga rongā i na, diga lok, “Kopmen tinotno!”

<sup>17</sup> La ne Iesu ga ven tidi la ga sue di xeretna, “Laai lavasuun at na levelinga boro at ne Moroa?

‘Nom luuat luvuttadi xipkip gu diga sok tixirixes kepe i, ga ravasu ngan Luuat Kis la lugugu ren i silok aleng.’ *Sam 118:22*

<sup>18</sup> \*Dola tara na subu at nom luuat, neni naba rekoxorop axakalik. La do, mo luuat na subu ro mavana at tara, neni naba remumus ngan laxakup.”

### *Lexekepe Pilas Ti Ne Kaisar*

(Mt 22:15-22; Mk 12:13-17)

<sup>19</sup> \*Luvuttadi loklox ase at Laulis Linga eburu mi lavamaasa silok diga

lok tong i xusu dina ranga alis ne Iesu ap mo loxonaleng, mila digaklen i do ne Iesu ga tong na lava-paase poovo mumu mun di. Ketla di goxo ranga alis i mila diga marat at limixin.

<sup>20</sup> \*Diga ngangais ti toxonaleng petpes kusu ti ranga alis i. Diga un ka lentaba luvuttadi xusu dina lok poovo i do nedi luvuttadi vapaase ruturun. La diga riki nedi xusu dina bala arup ne Iesu mi lususue, kusu dina ranga ka i la dina lok li i at lavapaase ro melamgo at laradi gomgo.

<sup>21</sup> Nom larapentu sixim diga lok ti ne Iesu, "Leeme loklox ase, maklen i do levelinga axap taram ik mokso. Maklen i do uxo doxoma solo i do tara i ruuna laasen silok kopla xopmen. Ketla u lox ase luruturun mumu lavavara at ne Moroa ri limixin.

<sup>22</sup> Tong i rinama, kereva i epovo xusu mana kepe levempilas ti ne Kaisar, kopla xopmen?"

<sup>23</sup> Ketla ne Iesu ga ven kibis pam laxaxarang atdi la ga lok tidi,

<sup>24</sup> "Mina lox ase ia mi tuxuven denarias. Lemeren mi laasen atnege mo i nemen teren?"

<sup>25</sup> Diga lok, "At ne Kaisar na."

La ne Iesu ga lok, "I lox avukat mun, mina raba ne Kaisar mi lempanga i epovo at ne Kaisar, la mina raba ne Moroa mi lempanga i epovo at ne Moroa."

<sup>26</sup> La di goxo epovo xusu nedi gita ranga alis i ro melamgo at limixin. Kuren la digak lok pilo mun, mila diga sangu at lovoporang teren.

### *Lususue Mumu Laxakatu Kaxat Amlong*

*(Mt 22:23-33; Mk 12:18-27)*

<sup>27</sup> Lentaba at lubung Sadiusi diga vot pasa ne Iesu. (Nedi na luvuttadi diga lok do limixin di met pam, di noxo rooro xat amlong.) Diga sue ne Iesu,

<sup>28</sup> "Laradi loklox ase, Moses ga malagan na langas linga rinedik. Mo do taradi na met la latkin teren

move i rooro, ketla kopmen taxamdak atdu, neton nom laradi naba epot ap mo lanaa rixin, kusu diba visik tamdak ti ruuna ka lempanga ap mo laradi ga met.

<sup>29</sup> Ga lavanuti loxoeton. Lara gomgo ga epot, la ga met gamasa, kopmen ni goxo visik taxamdak.

<sup>30</sup> Lara sepsev agepura ga epot manga at nom latkin. Neni ga met bok la goxo visik taxamdak.

<sup>31</sup> La melemu lara sepsev avantun ga epot ka mo latkin la neni ga met bok la goxo visik taxamdak. Nedi axap loxoeton diga epot ap mo latkin la nedi axap diga met la di goxo visik taxamdak.

<sup>32</sup> Melemu mo latkin ga met."

<sup>33</sup> La diga sue ne Iesu xeretna, "At laaleng dola limixin diga met, dina xatu kaxat amlong, ti nege rinotno nom latkin? Nedi axap nom lavanuti loxoeton diga epot teren."

<sup>34</sup> Iesu ga vorang i ridi xeretna, "Lavatlak mi lavakin at na levenmaares di epot.

<sup>35</sup> Ketla lavatlak mi lavakin mo di epovo xusu dina rooro xat amlong at lanmet la dina nemen at lorooro melemu, kopmen di noxo epot.

<sup>36</sup> \*Nedi dinaba lok ngan lubung angelo la kopmen di noxo met. Nedi laxamdak at ne Moroa, mila ne Moroa gara lox arooro amlong pam di basinge lanmet.

<sup>37</sup> La ne Moses ga vaase axasep tuturun i do luvuttadi met dinaba rooro xat amlong. Ni ga lox asuusu i at levelinga mumu luuna laxao gak lok teren. Ni ga paase mumu ne Moroa do,

'Nenia ne Moroa at ne Abaram, la Moroa at ne Aisak, la Moroa at ne Jakop.'

*Pas 3:6*

<sup>38</sup> \*Lavasuun at na i do neni ne Moroa at luvuttadi di rooro, la kopmen at lanmet, mila keneng at lodoxoma ren, limixin axap di rooro."

<sup>39</sup> La lentaba luvuttadi loklox ase at Laulis Linga diga lok, "Laradi loklox ase, lagale lovoporang taram!"

\* 20:20: Lu 11:54 \* 20:36: 1 Jo 3:1-2 \* 20:38: Ro 14:8-9



<sup>40</sup> La di goxopara bok ba xusu dina sue i mi tevesusue.

*Lususue Mumu Lanarong*  
(Mt 22:41-46; Mk 12:35-37)

<sup>41</sup> La ne Iesu ga lok tidi, "Nemi mi tong i do Lanarong neni lurubuno avolo at ne Devit. Kereva, anai ik mokso kopla kopmen?"

<sup>42</sup> Mila ne Devit axa ga tong i ro at lempikpixon (Sam) teren do, 'Moroa ga lok ti Leeme Silok tarak. Unat kis de saparap lakngak tino,

<sup>43</sup> se nenia ana lok li limixin munepen minu na ngan loxot burubut ti luxangkedek taram.' *Sam 110:1*

<sup>44</sup> Devit axa ga so asen i do Leeme Silok. Ga lok kereva la Lanarong neni manga lurubuno avolo ren?"

*Iesu Ga Vaase Aronga Lavaun Pinivu Ren*  
(Mt 23:1-36; Mk 12:38-40)

<sup>45</sup> Nom limixin axap digang tonga i, la ne Iesu ga lok ti lavaun pinivu ren keretna,

<sup>46</sup> "Minak lok tatao avukat nimi basinge loklok at luvuttadi loklox ase at Laulis Linga, mo di vavara i xusu dinat pas tangtagap mi laxasingsigaara babaalom atdi. La di vavara i xusu limixin diba seega rangarang di mi loklok ngangao ro at lengkot etang. La di vavara aleng i do dinat kis at lengkot kitkis avukat to at laraogu singising la lengkot avukat to at lara peluxa.

<sup>47</sup> La di lok kaka gamasa lempanga at lubangnaa rixin, la di ngising babaalom kusu limixin dina lok ngangao atdi. Losongsongot tidi naba lok kapmek aleng tinotno!"

## 21

*Laramtaba At Labannaa Rixin*  
(Mk 12:41-44)

<sup>1</sup> La ne Iesu gat kis to xeneng at loogu laplavang la ga reven luvuttadi nopnovos diga kepe lempilas atdi ro at loxot lili pilas,

<sup>2</sup> la ni ga ven lara labannaa rixin banbalo ga xepe legepu xonatat peni.

<sup>3</sup> \*La ne Iesu ga lok, "A tong tuturun i rinimi do, at lemeren ne Moroa, na labannaa rixin banbalo i lok li lempilas i silok ti lempilas atdi nom axap.

<sup>4</sup> Nedi di raba loxot lixilik mun at lapnovos silok atdi. Ketla neni, na labantixin banbalo i raba axap lempilas ni ga ruuna i."

*Iesu Ga Paase Mumu Loogu Laplavang Naba Lok Kapmek*  
(Mt 24:1-14; Mk 13:1-13)

<sup>5</sup> Lentaba at lavaun pinivu ren diga paase mumu loogu laplavang, la lisisinang teren, la lemparuat avukat la leventamtaba limixin digam taba ne Moroa min. La ne Iesu ga lok,

<sup>6</sup> \*"Anaa axav i na lempanga mi ven i, laaleng naba vot la kopmen toxonuat at nai naba nemen to at loxot teren. Dinaba ut tereve axav i ukopok."

<sup>7</sup> La diga sue ne Iesu xeretna, "Leeme loklox ase, lingisa nom lempanga naba vot? La loklok katling salai naba ravasu do na lempanga na vot?"

<sup>8</sup> La ne Iesu ga lok, "Mina lok tatao avukat nimi. Lavanga tara na xarang nimi mumu na lempanga. Mila buaang nedi luvuttadi dinabat pas mi laasen tarak la dinaba lok, 'Nenia Lanarong!' La dinaba lok bok, 'Laaleng at lovtopot at Leeme Silok mo ia vot auret ta.' Ketla nemen mita mumu asu di.

<sup>9</sup> Nemen mita marat mo do mina rongga laraesep. Lempanga xerepmo naba vot avot, ketla laxavaxap at na lavatbung menemen kopmen noxo vot soso."

<sup>10</sup> La ne Iesu ga lok bok tidi, "Limixin at lentaba levenabung mixin dinaba esep eburu mi limixin at levenabung mixin petpes. Lavaorong at lentaba levengkitkis orong dinaba esep eburu mi lavaorong at levengkitkis orong petpes.

\* 21:3: 2 Ko 8:12 \* 21:6: Lu 19:44

<sup>11</sup> La langsungan levenangne naba vot at tengkot eburu mi leean kangking la levenanmeres silok, la leven angangan lempanga loklox amarat naba vot eburu mi teveloklok katling boro vana at laxalibet.

<sup>12</sup> Avot ti na lempanga naba vot, dinaba ranga alis nimi la dina lox asongot nimi. Dinaba song araba nimi ri lavapaase ro xeneng at laraogu singising la dina lok li nimi at laraogu xokoxo. La dinaba lok kaka nimi uto melango at lavaorong la luvuttadi amgomgo xusu dina lok li nimi at lavapaase mila nemi mi nunu rak.

<sup>13</sup> Ap mo loxonaleng minaba epovo xusu mina vaase asu Lagale Lavavang.

<sup>14</sup> \*Mina lox agagas li levendoxoma atnimi avot ti lavapaase la nemen mita bulu mumu levelinga sala minaba vaase pe nimi min.

<sup>15</sup> \*Mila nenia anaba raba nimi mi levelinga la laxasep at lakleklen kusu kopmen teta atdi di munepen minimi naba epovo xusu na vorang levelinga atnimi.

<sup>16</sup> \*Luvuttemen nimi, la luvutneton nimi, la lempat atnimi la larapen tangas atnimi dinaba song araba nimi uto atdi nom limixin di munepen minimi la dinaba sev amet lentaba atnimi.

<sup>17</sup> Limixin axap dinaba belengatngas tinimi mila nemi mi nunu rak.

<sup>18</sup> \*Ketla ne Moroa naba lok tatao avukat nimi.

<sup>19</sup> \*Do mina tu atmatkun, minaba ruuna ka lorooro avolo.”

*Iesu Ga Paase Mumu  
Luutut Tereve At  
Lemenemen Jerusalem*

*(Mt 24:15-21; Mk 13:14-19)*

<sup>20</sup> La ne Iesu ga lok bok, “Mo do mina ven limixin esep dina ru xangkan lemenemen silok Jerusalem, minaklen ta i dola ma lixilik la dina ut tereve i.

<sup>21</sup> La nedi no di nemen to Judaia dinaba sixiro uto at lempatkaana. La nedi no di nemen to at lemenemen silok, dinaba vas kaxat basinge i. La nedi no di nemen to maxamang at lemenemen silok, nemen di guta beles uto xeneng teren.

<sup>22</sup> \*Mila ap mo levenaleng Moroa naba vorang laxakapmek at limixin me Israel la kerepmo ni naba lox asoorun levelinga, Lovoang Kaala ga vaase i.

<sup>23</sup> \*Ap mo levenaleng naba lok kapmek aleng ti lavakin di renan, la ti lavakin mi lengkadede atdi! Langsungan losongsongot naba vot at na lenep silok Israel, la lumukmusak silok at ne Moroa naba vot saparap na limixin.

<sup>24</sup> \*Luvuttadi esep dinaba sev amet tentaba mi lemparise sepsep, la dinaba lam kaka tentaba ngan luvuttadi xokoxo uto at lengkot petpes. La limixin kopmen di me Judaia dinaba lok kapmek na lemenemen Jerusalem se ap mo levenaleng ne Moroa naba riki xepe di.”

*Lovotpot At Laradi Mevana  
(Mt 24:29-31; Mk 13:24-27)*

<sup>25</sup> \*La ne Iesu ga lok bok tidi, “Leveloklok katling naba vot at laxangk-ing, mi lagaaling la larapenti. La at na lavatbung menemen, limixin at lentaba levengkot dinaba lok bukbulu aleng la dinabak lok tangtangu la dinaba marat mila laras na lulung aleng mi lempopaxanao.

<sup>26</sup> Lodoxoma abulubun naba suxuna nedi di ngangais mo lempanga naba vot at na lavatbung menemen. Mila lempanga ro vana at laxalibet dinaba sixit ekarakat la kopmen di noxo sixit mu larangas atdi.

<sup>27</sup> \*Ap mo levenaleng limixin dinaba ven ia, Laradi Mevana, anaba vot at loxontakabu mi langsungan lolos mi lisisixam.

\* **21:14:** Lu 12:11-12    \* **21:15:** Gu 6:10    \* **21:16:** Mt 10:21-22    \* **21:18:** 1 Sml 14:45; Lu 12:7  
\* **21:19:** Ib 10:36    \* **21:22:** Lal 32:35; Jer 5:29; 46:10; Ose 9:7    \* **21:23:** 1 Ko 7:26    \* **21:24:** Esr 9:7; Sam 79:1; Ais 63:18; Ro 11:25; Li 11:2    \* **21:25:** Sam 46:2-3; 65:7-8    \* **21:27:** Dan 7:13; Mt 26:64; Li 1:7    \* **21:28:** Ro 13:11

28 \*Dola na lempanga na ruka i xusu na vot, mina xatu kaxat upana la mina milik aurut, mila laaleng loklox arooro atnimi mo i auret ta.”

*Lavapaase Poovo Ri  
Luuna Pik  
(Mt 24:32-35; Mk 13:28-31)*

29 La ne Iesu ga tong lara lavapaase poovo ridi xeretna, “Mina doxoma luuna pik la lentaba larauna vetpes bok.

30 Dola mi ven lempavaxan una atdi i lok do na suu xat, miklen i do levenaleng at lamaares monga i auret ta.

31 Mo do mina ven mo lempanga xapmek na vot, minabaklen i do Linintoo at ne Moroa i auret na vot.

32 Na levelinga rak i ruturun. Na limixin di rooro lingina di noxo met se na lempanga na ravasu.

33 \*Laxalibet mi lavatbung memen naba sonao, ketla levelinga rak noxo xap.”

*Mina Lok Tatao Avukat Nimi*

34 \*La ne Iesu ga lok keretna, “Mina lok tatao avukat nimi! Nemen mita esu solo mi loklok at lara peluxa la liinin lara kadan lolos, la nemen mita doma mu solo na lorooro. Lavanga nom laaleng na vot asangu nimi.

35 Mila mo laaleng naba vot at loxonaleng limixin di noxo gagas teren.

36 \*Mina reven avukat ti na lempanga xapmek la mina ngising amisik kusu mina ruuna ka lolos la mi noxo subu ap mo levenmumuat naba vot, la kusu mina epovo do mina ru ro melamgo rak, Laradi Mevana.”

37 \*Ap mo levenaleng ne Iesu ga anasa limixin to xeneng at loogu laplavang. At levenaleng kantinao neni gat pas su me go la gat pas uto at Lakaana Olip, la at lengkanimin neni ga nemen go.

38 La limixin axap digat pas no mene at lenmaxantamak uto at

loogu laplavang kusu dinang tonga i.

## 22

*Diga Sevut Li Levelinga Xusu Ti  
Sev Amet Ne Iesu  
(Mt 26:1-5; Mk 14:1-2; Jo 11:45-53)*

1 Laaleng ga sixit auret ta xusu ti leluxa at loxongkide diga ove vetpes i, laasen ap mo leluxa do Lovovolo Pe.\*

2 \*La lavamaasa silok eburu mi luvuttadi loklox ase at Laulis Linga diga puse ngas xusu ti sev amet ne Iesu la limixin di noxoklen i, mila mo lubang amgomgo diga marat atdi.

*Judas Ga Siam Kusu Neni Naba  
Song Araba Ne Iesu  
(Mt 26:14-16; Mk 14:10-11)*

3 \*Satan ga vubeles ukeneng at ne Judas, laasen bok teren ne Iskariot. Neni lara atdi lasangaun mi legepura lavaun pinivu.

4 La ne Judas ga vot pasa lava- maasa silok la luvuttadi amgomgo atnedi luvuttadi esep diga lok tatao loogu laplavang. Ni ga epaase eburu midi mumu teventaangas kusu neni naba song araba ne Iesu ridi.

5 Diga lok momo aleng la diga siam do diba un i mi tempilas.

6 La ne Judas ga siam ap mo levelinga la ni ga puse ri tangas kusu neni naba song araba ne Iesu rinedi xusu limixin noxoklen i.

*Iesu Ga Gagas Kusu Ti Laanan At  
Lovovolo Pe  
(Mt 26:17-25; Mk 14:12-21)*

7 \*Laaleng ga vot kusu ni leluxa at loxongkide diga ove vetpes i. Ap mo laaleng diga sev amet lempatnat sip- sip ti lok katling leluxa at Lovovolo Pe.

8 La ne Iesu ga riki ne Pita mi ne Jon mi levelinga xeretna, “Munat pas la muna lox agagas li leveluxa ri Lovovolo Pe xusu tidik ti anan.”

\* 21:33: Lu 16:17 \* 21:34: Mt 24:48-50; Mk 4:19; Lu 17:27; 1 Ts 5:3 \* 21:36: Mk 13:33; Li 6:17

\* 21:37: Lu 19:47 \* 22:1: Leluxa limixin me Judaia diga lok katling laaleng, diga vas kaxat boro Isip. La di goxo lok li liis (yeast) at lengkongkide atdi. \* 22:2: Lu 20:19 \* 22:3: Jo 13:2,27 \* 22:7: Pas 12:1-27

<sup>9</sup> La duga sue i, “U vara i do mana lox agagas li i at ua loxot?”

<sup>10</sup> La ne Iesu ga lok, “Muna rongga i na! Mo do muna beles ukeneng at lemenemen silok, lara laradi nabap kip lubuxom dan naba xip tangarang numu. Muna mumu asu i uto at loogu ni na beles teren.

<sup>11</sup> La muna lok ti laradi ap mo loogu xeretna, ‘Laradi loklox ase i sue u do, loxot ua at na loogu ram, nema eburu mi lavaun pinivu rak maba lok katling leluxa at Lovovolo Pe ren?’

<sup>12</sup> Neni naba lox ase numu mi loxot silok diga gagas li vam i no i nemen to vana at loogu, la muba lox agagas li lempanga anan go.”

<sup>13</sup> \*Duga vas kaxat la duga long lenget ka lempanga axap kerekngan ne Iesu gara tong pam i ridu, la duga lox agagas li leveluxa ri Lovovolo Pe.

#### *Leluxa At Leeme Silok*

(Mt 26:26-30; Mk 14:22-26; Jo 13:21-30; 1 Ko 11:23-25)

<sup>14</sup> Se at loxonaleng ti anan, Iesu ga xis eburu mi luvuttadi vavang teren saparap loxonin anan.

<sup>15</sup> La ni ga lok tidi, “A vara aleng i xusu ana lok katling na leluxa eburu minimi, avot at losongsongot mo anabap kiv i.

<sup>16</sup> \*A tong i rinimi do, a noxo lok katling bok ba na leluxa, se at loxonaleng anaba lox asoorun i ro at Linintoo at ne Moroa.”

<sup>17</sup> La ne Iesu ga lok kaka lakap inin, la ga tong avukat ti ne Moroa, la ga lok, “Mina lok kaka i na la mina in teren.

<sup>18</sup> A tong i rinimi do a noxo in bok ba at lavaen se at loxonaleng Linintoo at ne Moroa na vot.”

<sup>19</sup> \*La neni ga lok kaka loxongkide, la ga tong avukat ti ne Moroa, la ga sebex i, la ga raba di min, la ga lok, “Labantuxu rak na, a raba nimi min. Mina lox amisik na loklok kusu mina doma mumu ia.”

<sup>20</sup> Ap mo mun langas, neni ga lok kaka bok lakap inin la ga raba nedi min la ga lok, “Anaa lavaen i ngan lada rak la i lok katling lekabus maxat, la nenia anaba lox epovo i xusu ti lox arooro buaang limixin.

<sup>21</sup> \*Ketla lara laradi naba song araba ia ri luvuttadi munepen it kis de eburu midik.

<sup>22</sup> Nenia, Laradi Mevana, anaba met kerekngan lodoxoma at ne Moroa. Ketla naba lok kapmek aleng ti mo laradi na song araba ia uto at luvuttadi xapmek.”

<sup>23</sup> La diga esue min kantubu atdi do ua lara atdi naba lox i mo.

#### *Leedak Mumu Lisisilok*

<sup>24</sup> \*La leedak ga ravasu xantubu at lavaun pinivu, mumu ua lara atdi neni ga silok tidi.

<sup>25</sup> \*La ne Iesu ga lok tidi, “Lavaorong at na lavatbung menemen di ruuna lolos mavana at limixin atdi, la limixin di so asen di do, ‘Larapen tangas at limixin.’

<sup>26</sup> \*Ketla nemen mita mu asu mo langas atdi. Lara silok kantubu atnimi neni na lok ngan laradi maxat, la lara gomgo neni na lok ngan lasaxaruki.

<sup>27</sup> \*Nege i silok atdu na? Lara it kis to vana xusu na anan kopla lara i gugu rin? Mo lara it kis to vana. Ketla nenia a nemen kantubu atnimi ngan lasaxaruki.

<sup>28</sup> At levenaleng levesongsongot ga vot saparap dik, nemi goxo sixiro basinge ia.

<sup>29</sup> \*Ne Tamak ga lok li ia xusu tim gomgonga limixin, la ana lok li nimi xusu tim gomgonga limixin.

<sup>30</sup> \*Kuren la minaba anan la mina inin to at loxot kitkis tarak to xeneng at Linintoo rak. La minabat kis at lengkot kitkis orong la minam gomgonga lasangaun legepura larabibinat boro Israel.”

\* 22:13: Lu 19:32 \* 22:16: Lu 13:29 \* 22:19: Lu 24:30 \* 22:21: Sam 41:9; Jo 13:21-22 \* 22:24: Lu 9:46 \* 22:25: Mt 20:25-27; Mk 10:42-45 \* 22:26: Mt 23:11; Mk 9:35 \* 22:27: Jo 13:12-15 \* 22:29: Lu 12:32 \* 22:30: Mt 19:28

*Iesu Ga Vaase Ali Do Ne Pita Naba Sok Tixirixes I*

(Mt 26:31-35; Mk 14:27-31; Jo 13:36-38)

<sup>31</sup> \*La ne Iesu ga lok ti ne Simon, “Simon, Simon! Satan ira lok kaka vam lisisiam at ne Moroa xusu naba lok tong pen nemi axap. Kerekngan laradi loklok tatao at laraamang i mangma asu levennit piao boro at lengkakan teren la i lok kepe leven-tuxu piao.

<sup>32</sup> \*Ketla ara sing pam tu, ne Simon, kusu lununu ram noxo subu. La do una leeng basinge laxapmek taram, una lox alolos luvutnetam.”

<sup>33</sup> \*La ne Pita ga vorang i rin keretna, “Leeme Silok, a gagas kusu anat pas eburu minu uto at loogu xokoxo la anaba met bok eburu minu!”

<sup>34</sup> La ne Iesu ga lok tin keretna, “Pita, a tong i ru do laxaxak kovisi noxo reng lingina, la nenu unaba sev apkap naba vantun do uxoklen ia.”

<sup>35</sup> \*La ne Iesu ga lok bok tidi, “At nom laaleng nia aga riki aonon nimi xusu na lok lugugu rak la mi goxop kip tengkontonom ka, la lentat lukluxa, la tempanga vatpas. Kereva, migak pakes bok ti tempanga?”

La diga vorang i rin keretna, “Ma goxok pakes ti tempanga.”

<sup>36</sup> \*La ne Iesu ga lok, “Ketla monga, do nege i ruuna toxontonom ka koplata tarat lukluxa, neni nap kiv i. La do nege xopmen na ruuna tavarise sepsep, neni na sesep mi lavanga singsiga ren kusu ti un ka tara.

<sup>37</sup> \*A tong i rinimi do Lovoang Kaala i lok do, ‘Neni ga nemen eburu mi limixin bilinga.’ *Ais 53:12*

Anai naba soorun mumu ia. Lavanga salai diga malagan i at Lovoang Kaala mumu ia, monga na soorun.”

<sup>38</sup> La diga lok, “Leeme Silok, legepu varise sepsep na.”

La ni ga lok tidi, “I epovo!”

*Lakaana Olip*

(Mt 26:36-46; Mk 14:32-42)

<sup>39</sup> \*La ne Iesu ga vas su basinge mo lemenemen, la gat pas uto at Lakaana Olip, i ngan ni ga lox amisix i. Lavaun pinivu ren diga mumu asu i.

<sup>40</sup> Se diga rupot ap mo loxot, neni ga lok tidi, “Mina sing kusu mi noxo subu at loklok tong.”

<sup>41</sup> La neni ga vas uto vaxalom lixilik basinge lavaun pinivu, la ga xis tiktikbu mi luvatgulom teren la ga sing.

<sup>42</sup> \* “Tamak, mo do u vara i, una lok pes na lumumuat basinge ia. Ketla nemen gat uta mumu asu lavavara rak, ketla una mu asu mun lavavara ram.”

<sup>43</sup> La laangelo ga vot saporav i, ga si boro vana at laxalibet kusu na raba i mi lolos.

<sup>44</sup> La neni ga bulu aleng la ga sing lolos tinotno, la lantentelep teren ga sen su ukopok ti laxangka ga ngan lempatkaarum da.

<sup>45</sup> Se neni ga xatu kaxat, neni ga vot pasa lavaun pinivu ren la ni ga long lenget di, diga unga mila diga bulu aleng.

<sup>46</sup> La ne Iesu ga lok tidi, “Tila nemi mi unga? Mina xatu la mina ngising kusu mi noxo subu at loklok tong pen.”

*Larangtanga Alis At Ne Iesu*

(Mt 26:47-56; Mk 14:43-50; Jo 18:3-11)

<sup>47</sup> Iesu move ga paase la buaang nedi limixin diga vot, la lara laradi laasen teren ne Judas gat pas to melango atdi. Neni legesara atnedi lasangaun legepura lavaun pinivu, la neni ga vas auret ne Iesu la ga nes i. <sup>48</sup> La ne Iesu ga lok tin, “Judas, kereva, u song araba ia, Laradi Mevana, uto at limixin kakapmek mi lenetnes?”

\* 22:31: 2 Ko 2:11 \* 22:32: Jo 17:11,15,20; Sam 51:13 \* 22:33: Lu 22:54 \* 22:35: Lu 9:3; 10:4  
\* 22:36: Lu 22:49 \* 22:37: Lu 22:52 \* 22:39: Lu 21:37; Jo 18:1 \* 22:42: Mt 6:10 \* 22:49: Lu 22:36

49 \*La nom lavaun pinivu mo diga nemen eburu mi ne Iesu diga ven laai mo ga lok do na vot, la diga lok, "Leeme Silok, u vara i do mana esep bok mi luvarise sepsep atnama?"

50 La lara atdi ga ra korop kepe labaalung tino at lasaxaruki at lamaasa gomgo.

51 Ketla ne Iesu ga lok, "I epovo nga." La ni ga long tu at labaalung at nom laradi la ni ga lox avukar i.

52 \*La ne Iesu ga ven lavamaasa silok la luvuttadi amgomgo at loogu laplavang la loxongkulao silok at leme Judaia mo digat pas ugo xusu diba ranga alis i. La ni ga lok tidi xeretna, "Mit pas ude mi lemparise sepsep la levenasop, i ngan ta do nia lavanga xipkip pilo.

53 At levenaleng axap aga nemen eburu minimi ro xeneng at loogu laplavang, la mi goxo lok tong pen i xusu mina ranga alis ia. Ketla monga at laxanimin tubu, neni loxonaleng at ne Satan. Kuren la nemi mi lok na lavanga xapmek at lamain."

#### *Pita Ga Sev Apkap*

(Mt 26:57-58,69-75; Mk 14:53-54,66-72; Jo 18:12-18,25-27)

54 \*Diga ranga alis ne Iesu la diga lam kaka i uto at loogu at lamaasa gomgo. La ne Pita ga mumu asu di ro vaxalom.

55 Limixin mo diga mas laxao go xantubu at lemelmua, la ne Pita ga xis eburu minedi digat kis mamain.

56 \*La lara loolik, neni lasaxaruki, ga ven ne Pita gat kis go saparap laxao, neni ga ven avukar i la ga lok, "Na laradi bok ga nemen eburu mi ne Iesu."

57 Ketla ne Pita ga sev apkap, ga lok keretna, "Axoklen mo laradi!"

58 Melemu lixilik, lara laradi ga ven kibis ne Pita la ga lok, "Nenu bok lara atnedi lavaun pinivu ren."

Ketla ne Pita ga vorang i rin keretna, "Nia xopmen!"

59 La melemu at legesa xonaleng lara laradi vetpes manga ga vaase lolos keretna, "I ruturun tinotno, na laradi ga nemen eburu min, mila neni bok boro Galili."

60 Ketla ne Pita ga vorang i rin keretna, "Axoklen lavanga salai u paase min!" La soso mun ap mo loxonaleng, neni move ga paase, la laxaxak ga reng.

61 \*La Leeme Silok ga rem gili la ga ven mokmokso ri ne Pita, la ne Pita ga doma amlong ti levelinga at Leeme Silok, ga tong avor i rin keretna, "Avot ti laxaxak na reng lingina, unaba sev apkap naba vantun do uxoklen ia."

62 La ne Pita ga vas su ukamang la gang teng silok aleng.

#### *Diga Lok Kalise Ne Iesu*

##### *La Digap Sev I*

(Mt 26:67-68; Mk 14:65)

63 Mo luvuttadi esep diga lok tatao ne Iesu diga saba xangka i la digap sev i.

64 Diga is pe luxatli ren mi loxontamon la diga sue i, "Una tong kisip ka i do, nege mo i sev u?"

65 La diga vaase buaang bok laxalinga xapmek tin.

#### *Iesu Ga Ru Ro Melamgo At Lixitkis Buru*

(Mt 26:59-66; Mk 14:55-64; Jo 18:19-24)

66 Laxangking ga losu, la loxongkulao silok at leme Judaia, la lavamaasa silok, la luvuttadi loklox ase at Laulis Linga diga vot buru, la diga lok li ne Iesu uto melamgo atdi.

67 \*La diga lok, "Una tong i rinama. Kereva, nenu Lanarong?"

La ni ga vorang i ridi xeretna, "Mo do nia ana tong i rinimi, mi noxo nunu at levelinga rak.

68 La do nia ana sue nimi mi lusue, mi noxo vorang i.

69 \*Ketla i ruka nga i mo lingina, nenia, Laradi Mevana, anabat kis to

\* 22:52: Lu 22:37; Jo 7:30; 8:20; Kl 1:13 \* 22:54: Sam 31:11; Lu 22:33 \* 22:56: Gu 4:13 \* 22:61: Lu 22:34 \* 22:67: Jo 3:12; 8:45; 10:24 \* 22:69: Gu 7:56 \* 22:70: Lu 4:3,9

saparap lekngen tino at Lanaraavuk ne Moroa.”

<sup>70</sup> \*La diga lok, “Kereva ba, nenu ne Nitna ne Moroa?”

La ni ga vorang i ridi xeretna, “Levelinga atnimi ik mokso. Nenia vam.”

<sup>71</sup> La diga lok, “Keke bok ba tevelinga! Nedik axa tara ronga vam levelinga ren la i epovo dik ta lok li lumumuat teren!”

## 23

*Iesu Ga Ru At Lavapaase Ro Melango At Ne Paelat*

(Mt 27:1-2,11-14; Mk 15:1-5; Jo 18:28-38)

<sup>1</sup> Luvuttadi amgomgo axap diga xatu kaxat la diga lam kaka ne Iesu uto melango at ne Paelat.

<sup>2</sup> \*La diga bala raba i, diga lok, “Ma ranga alis na laradi, neni i sasar asoogong amisik limixin atnama. I tong i ridi do, nemen dita kepe pilas ti ne Kaisar, la ik lok bok do neni mo ne Karisito, loorong.”

<sup>3</sup> \*La ne Paelat ga sue i, “Kereva, nenu loorong at limixin me Judaia?”

La ne Iesu ga lok, “I ruturun. Nenu xa u tong i.”

<sup>4</sup> Melemu ne Paelat ga lok ti lava-maasa silok la limixin keretna, “Axo vuse ka tevelinga xusu ti sev amet na laradi.”

<sup>5</sup> Ketla digap kup aleng keretna, “Neni ik paxaru kaxat levenesep kantubu at limixin at lengkot axap Judaia mi leveloklox ase ren. Neni ga ruka i ro Galili la monga neni garat pas ude.”

*Iesu Ga Ru At Lavapaase Ro Melango At Ne Erodes*

<sup>6</sup> Se ne Paelat ga ronga i na, neni ga sue, “Kereva na laradi, neni boro Galili?”

<sup>7</sup> \*Se ne Paelat gaklen ba i do ne Iesu boro Galili, mo lenep ne Erodes gak lok tatao i, neni ga riki ne Iesu uto at ne Erodes, mo ga nemen go Jerusalem ap mo levenaleng.

<sup>8</sup> \*Se ne Erodes ga ven ne Iesu, neni ga lok momo aleng. Neni gang tonga mene levelinga mumu i, la buaang levenaleng neni ga vara i xusu na ven be ne Iesu. Ni ga vara aleng i xusu naba ven ne Iesu na lok tempanga sangsangu.

<sup>9</sup> Kuren la ne Erodes ga sue ne Iesu mi laxasusue solo, ketla ne Iesu goxo vorang i mi tekolonga.

<sup>10</sup> Lavamaasa silok mi luvuttadi loklox ase at Laulis Linga digak lok bok go, la diga vaase babala raba aleng ne Iesu.

<sup>11</sup> La ne Erodes eburu mi limixin esep teren diga saba xangka rino ne Iesu la diga vaxasiga i mi lavanga singsigaara at loorong kusu dina lok kalise i, la diga riki amlong i uto at ne Paelat.

<sup>12</sup> Ap mo mun laaleng Erodes mi ne Paelat duga etangas. Duga munepen avot mun be.

*Luvuttadi Amgomgo*

*Diga Sing Ne Paelat*

*Kusu Ne Iesu Na Met*

(Mt 27:15-26; Mk 15:6-15; Jo 18:39-19:16)

<sup>13</sup> Paelat ga xup bubua ka lava-maasa silok la luvuttadi amgomgo at limixin.

<sup>14</sup> La ni ga lok tidi, “Mi raba vam ia mi na laradi la mi lok do neni i sasar asoogong limixin. Monga nia a ven axasep teren de melango atnimi axap, la axo long lenget tavanga do neni ga bixurun at tavanga xapmek mi sok taba i min.

<sup>15</sup> Kopla ne Erodes gita long lenger i ga bixurun, mila neni i riki amlong i ude saparap dik. La kopmen tempanga na laradi ga lox i xusu neni na met teren.

<sup>16</sup> Ketla anak pixis mun i, la ana soxomus asu manga i.”

<sup>17</sup> Amisik at leluxa at Lovovolo Pe, laradi gomgo gak soxomus asu raba limixin mi taradi xokoxo.

<sup>18</sup> Ketla limixin axap diga xup silok la diga lok, “Sev amer i! Una soxomus asu raba nama mi ne Barabas!”

19 Diga lok li ne Barabas at loogu xokoxo mila leesep ga ru kaxat go at lemenemen silok, la ni ga sev amet lara laradi.

20 Paelat ga vara i xusu na soxomus asu ne Iesu uto, kuren la ni ga xup manga ti limixin.

21 Ketla diga vaase amlong tin, la diga lok, "Paxarem i. Paxarem i at laxaba!"

22 Paelat ga vaase manga ridi ga sev avantun, "Ketla laxapmek salai neni ga lox i? Axo vuse ka tevelinga xusu neni naba met teren! Anak pixis mene i la ana soxomus asu manga i."

23 Ketla digap kup silox amisik do ne Paelat na vaxarem ne Iesu at laxaba. La ne Paelat goxo epovo na ba gili levendoxoma atdi.

24 Kuren la ne Paelat ga mu asu lavavara at limixin mumu ne Iesu.

25 Neni ga soxomus asu mo laradi diga lok li i ro at loogu xokoxo mumu lesepsev amet tadi, la ni ga raba nedi mi ne Iesu xusu dina lok lavanga salai nedi diga vara i do dina lox i rin.

### *Diga Vaxarem Ne Iesu*

#### *At Laxaba*

(Mt 27:32-44; Mk 15:21-32; Jo 19:17-27)

26 Limixin esep diga lam kaka ne Iesu boro at loogu at ne Paelat la diga vas kaxat min uto at loxot diba sev amer i ren. At lavatpas atdi diga ekip tangarang mi lara laradi laasen teren ne Simon, boro Sairini, mo gat pas uto xeneng at lemenemen silok, ga laa boro at loxot petpes. Diga ranga alis i, la diga sox aruru parang i xusu nap kip laxaba la na mu asu ne Iesu at langas.

27 Buaang nedi limixin diga mumu asu ne Iesu. Kantubu atdi lentaba lavakin digang teng la diga duudu mumu i.

28 Iesu ga milik amlong tidi la ga lok, "Nemi lavakin boro Jerusalem!

Nemen mitang tingis ia, ketla minang tingis laxamdak mi laxaalik kakalik atnimi,

29 \*mila levenaleng songsongot naba vot la limixin dina lok, 'Luvukat ti lavakin kopmen dixo ru-una laxamdak mi laxaalik kakalik, la kopmen dina visik tengkadede.'

30 \*Ap mo levenaleng limixin dinaba lok ti lempattaavut keretna, 'Mina subu pavaa nama!' La ri lengkong kaana, 'Mina sak pavaa nama!' *Ose 10:8*

31 \*Do nedi di lok na lempanga xapmek tia, laradi avukat, Moroa naba vorang i ridi mi langsung lumumuat silok."

32 Limixin esep diga lok kaka bok legepu radi, nedu buru luradi xapmek, kusu dina vaxarem du saparap ne Iesu.

33 Diga rupot to at loxot laasen teren, "Lavatlak Tongan," la diga vaxarem ne Iesu ro at laxaba, la luradi xapmek bok, lara ga merem saparap lekngen tino at ne Iesu la lara ro saparap lekngen kia.

34 \*La ne Iesu ga lok, "Tamak, una doxoma xepe na laxakapmek atdi. Dixoklen lavanga salai mo di lox i." La luvuttadi esep diga epes levempanga singsiga ren kantubu atdi, diga lu buru mi lengkouat, kusu ti lok kisip ka nege ba lok ka i.

35 \*Limixin diga tu go diga reven lempanga diga lox i ri ne Iesu. La luvuttadi amgomgo at leme Judaia diga saba xangka i, diga lok keretna, "Neni gak lox arooro lentaba vetpes. Mo do neni Lanarong at ne Moroa ga soxolik ka i, neni na lox arooro xa i."

36 \*Luvuttadi esep bok diga saba xangka i, diga ru auret ne Iesu la diga raba i mi laxadan vaen.

37 La diga lok, "Una lox arooro xa u, mo do nenu loorong at limixin me Judaia!"

38 La na levelinga diga malagan i ro mavana ren keretna, NA LARADI NENI LOORONG AT LIMIXIN ME JUDAIA.

\* 23:29: Lu 21:23 \* 23:30: Li 6:16 \* 23:31: 1 Pi 4:17 \* 23:34: Ais 53:12; Mt 5:44; Gu 7:60; Sam 22:18 \* 23:35: Sam 22:7-8 \* 23:36: Sam 69:21



<sup>39</sup> La lara laradi xapmek ga merem go, ga vaase aksaksa rin, “Kereva, nenu Lanarong? Mo do nenu Lanarong, una lox arooro u eburu minama.”

<sup>40</sup> La mo lara ga vaase sox i, la ga lok, “Kereva, uxo lok ngangao at ne Moroa? Neda na ta lok ka loklox aleeng mumu laxakapmek atda.

<sup>41</sup> La lumumuat tida ik mokso mila taga lok laxakapmek, i epovo ri na lumumuat. Ketla na laradi goxo lok taxakapmek.”

<sup>42</sup> \*La ni ga lok ti ne Iesu xeretna, “Iesu, una doxoma ia, do unamlong ngan Loorong Silok!”

<sup>43</sup> La ne Iesu ga lok tin, “A tong turun i na ru, lingina unaba nemen eburu minia ro at lagale lemenemen at ne Moroa.”

*Lanmet At Ne Iesu*  
(Mt 27:45-56; Mk 15:33-41; Jo 19:28-30)

<sup>44</sup> \*Ga auret ti lasangaun legepu xonaleng, lamain ga lok pe laxangking la ga vung pe mo lenep silok axap se at lavantun konaleng.

<sup>45</sup> \*La lavattamon ga merem to xeneng at loogu laplavang ga rem lais ti legepu xot.

<sup>46</sup> \*La ne Iesu ga xup silok, ni ga lok, “Tamak, a lok li loraonan tarak at lukngam!” Ni ga tong i na la ga met ta.

<sup>47</sup> La laasesep ga ven i na la ni ga emi asu mi ne Moroa la ga lok, “I ruturun tinotno, neni laradi manmanton.”

<sup>48</sup> \*La limixin mo diga tu go xusu dina ven i na, diga vas kaxat uto xolonu, diga tit lenbongobong atnedi mi lainbulu.

<sup>49</sup> \*Mo limixin digakleklen ne Iesu, eburu mi lavakin no diga mumu ne Iesu boro Galili, diga tu paxalom lixilik kusu dina reven na lempanga.

*Digak Mit Ne Iesu*  
(Mt 27:57-61; Mk 15:42-47; Jo 19:38-42)

<sup>50</sup> Lara laradi laasen teren ne Josep boro at lara lemenemen at leme Judaia laasen teren Arimatia. Ga neni lagale laradi, la limixin diga lok ngangao aleng teren, la ni ga ngangais lovotpot at Linintoo at ne Moroa.

<sup>51</sup> \*Neni lara atnedi at lixitkis buru diga bala raba ne Iesu, ketla neni goxo siam mu levendoxoma la loklok diga lox i.

<sup>52</sup> Neni ga vot pasa ne Paelat la ga sing kaka labantuxu at ne Iesu.

<sup>53</sup> Melemu neni ga lox asi labantuxu at ne Iesu ukopok, la ga bom i mi labantamon nunuan. Ni ga lok li i ro at lamaaut, diga xe i ro at lavaruat silok, limixin di goxovisi na li rongan go.

<sup>54</sup> Mo laaleng ni laaleng gagas la laaleng kaala mo ga auret.

<sup>55</sup> \*Lavakin no diga mumu ne Iesu boro Galili diga emu mi ne Josep la diga ven lamaaut la labantuxu at ne Iesu ne Josep ga li i.

<sup>56</sup> \*Melemu digamlong ukolonu la diga lox agagas li levendan mavak mi levendan momonok ti soli i at labantuxu at ne Iesu. At laaleng kaala diga lox amas, kerekngan Laulis Linga ga tong i.

## 24

*Laxakatu Kaxat Amlong*  
*At Ne Iesu*  
(Mt 28:1-10; Mk 16:1-8; Jo 20:1-10)

<sup>1</sup> No mene maxantamak suubu at laaleng avot ap mo luik, lavakin digat pas uto at lamaaut, digap kip levendan somavak diga lox agagas li vam i.

<sup>2</sup> Diga ven lagalii uat lentaba vetpes diga xavun pes pam i boro at lungusungus at nom lamaaut.

\* 23:42: Mt 16:28 \* 23:44: Amo 8:9 \* 23:45: Pas 36:35 \* 23:46: Sam 31:5; Gu 7:59 \* 23:48: Lu 18:13 \* 23:49: Sam 38:11; 88:8; Lu 8:2-3 \* 23:51: Lu 2:25,38 \* 23:55: Lu 23:49 \* 23:56: Pas 20:10; Lal 5:14 \* 24:4: Gu 1:10

<sup>3</sup> Diga beles ukeneng, ketla di goxo ven lenget ka labantuxu at Leeme Silok ne Iesu.

<sup>4</sup> \*Diga tu go la diga rakdu aleng mumu i na, la soso mun legepu radi mi leventamon atdu gam games aleng, duga ru saparap di.

<sup>5</sup> \*La diga umsu mi lanmarat, la diga xis tiktikbu mi lempatgulom atdi to xopok at laxangka, la luradi duga lok tidi, "Tila mi puse ri laradi mo i rooro nade at loxot at labarongan?"

<sup>6</sup> \*Neni xopmen i de, neni ira roo xat pam. Mina doxomangke at levelinga neni ga vaase nimi min ap mo levenaleng neni ga nemen to Galili.

<sup>7</sup> Ni ga lok keretna, 'Dinaba song araba ia, Laradi Mevana ri limixin kakapmek, la dinaba vaxarem ia ro at laxaba, la anaba roo xat amlong at laaleng sepsev avantun.' "

<sup>8</sup> La lavakin diga domangke at levelinga at ne Iesu.

<sup>9</sup> La digamlong boro at lamaaut la diga tong na lempanga axap tinedi lasangaun legesara lavaun pinivu ren la tidi bok lentaba luvuttadi.

<sup>10</sup> \*Mo lavakin diga tong na lempanga ri lavaun pinivu. Levenasen atnedi, ne Maria Magdalene, Joana, la ne Maria nenen ne Jems la lentaba bok.

<sup>11</sup> Ketla lavaun pinivu diga nua i do levelinga at lavakin, ga levelinga gamasa mun, la di goxo nunu atdi.

<sup>12</sup> Ketla ne Pita ga xatu kaxat la ga sixit kaxat uto at lamaaut. Ni ga beles at lamaaut la ga ven lenbantamon mikmit tongan diga bom ne Iesu min la kopmen bok tempanga. La neni gamlong ukolonu la gam doma mumu na lavanga.

*Lavatpas At Luun Pinivu At Langas Uto Emaus*  
(Mk 16:12-13)

<sup>13</sup> Ap mo mun laaleng lura atdi lavaun pinivu at ne Iesu dugat pas uto at lara lemenemen laasen teren

Emaus. Lababaalom ti lavatpas boro Emaus uto Jerusalem i epovo at lasangaun mi legesa kilomita.

<sup>14</sup> La duga epaase xantubu atdu mumu mo lempanga gat pot go.

<sup>15</sup> \*Duga epaase la ne Iesu xa ga vot saparap du la ni ga emu eburu midu.

<sup>16</sup> Duga ven i, ketla du goxo ven kisiv i.

<sup>17</sup> La ne Iesu ga lok tidu, "Laai mo numu mu paase mumu i at na lavatpas atnumu?"

Duga ru pilo mi lainbulu.

<sup>18</sup> La lara atdu, laasen teren ne Kliopas, ga lok, "Nia a doma i do nenu xusuk mun u nemen kantubu at leme Jerusalem uxoklen lempanga salai mo gat pot go at na levenaleng gara xap."

<sup>19</sup> \*La ne Iesu ga sue du xeretna, "Lempanga salai?"

La duga vorang i rin keretna, "Mo lempanga ga rupot saparap ne Iesu boro Nasaret, anai laradi neni leeme vapaase ali la neni ga lok lempanga sangsangu la levelinga bok teren ga mumuat aleng at lemeren ne Moroa la limixin.

<sup>20</sup> Lavamaasa silok atnama la luvuttadi angomgo diga song araba i xusu na met, la diga vaxarem i at laxaba.

<sup>21</sup> \*La maga doma ruturun i do neni laradi ne Moroa ga riki i xusu naba lox arooro limixin me Israel. Maxeneng bok at nom, monga lingina ni laaleng sepsev avantun pe i nom lempanga ga vot,

<sup>22</sup> \*la lentaba lavakin at libinam tadi atnama di lox arakdu nema. Dit pas maxantamak suubu uto at lamaaut.

<sup>23</sup> Ketla kopmen dina long lenget ka labantuxu ren. Dimlong la di lok do nedi mo di ven lisilimet at luangelo la du tong i ridi do ne Iesu mo ia roo xat pam.

<sup>24</sup> \*Lentaba at libinam tadi atnama dit pas uto at lamaaut la di ven i do

\* 24:5: Lu 2:9 \* 24:6: Lu 9:22; 17:25 \* 24:10: Lu 8:2-3 \* 24:15: Mt 18:20 \* 24:19: Mt 21:11

\* 24:21: Lu 2:38; 19:11; Gu 1:6 \* 24:22: Lu 24:1-11 \* 24:24: Jo 20:3-10

levelinga at lavakin i ruturun. Ketla kopmen dina ven ne Iesu.”

<sup>25</sup> La ne Iesu ga lok tidu, “Nemu luradi rangtangu. Kereva, lodoxoma atnumu i repe vam la mu domampe levelinga at lavaeme vapaase ali?”

<sup>26</sup> \*Kereva, muxoklen i do Lanarong naba xip losongsongot at na lempanga la na beles at lixitkis orong teren?”

<sup>27</sup> \*La ne Iesu ga soxomus levelinga at Lovoang Kaala ridu mumu i, ga ruka i at levenbuk at ne Moses la levenmamalagan atnedi axap lavaeme vapaase ali.

<sup>28</sup> Diga vas saparap lemenemen mo duga lok do dunat pas tin. La ne Iesu ga lok do ni na vas basinge du.

<sup>29</sup> Ketla duga vaase lolos alis i, la duga lok, “Una nemen be minama at na loxonaleng mila laaleng na, ira xantinao nga na la lemenemen na ira buxumin ta.” Kuren la ni ga vas beles ukeneng la ga nemen eburu midu.

<sup>30</sup> \*La ni ga xis to at loxot kitkis eburu midu, la ga lok kaka loxongkide, la ga lox anarong i. Melemu neni ga sebek loxongkide, la ga raba du min.

<sup>31</sup> La lodoxoma atdu ga rem suang la duga ven kibis ba ne Iesu, ketla neni ga sonao basinge du.

<sup>32</sup> La duga lok tidu xa, “Lebelen da iplivi aleng at loxonaleng neda ta ronga levelinga ren to at langas la ira soxomus Lovoang Kaala rida.”

<sup>33</sup> La soso mun duga vas kaxat bilong uto Jerusalem, la duga vot pasa nedi lasangaun legesara lavaun pinivu digak lok eburu bok mi lentaba.

<sup>34</sup> \*Ketla lavaun pinivu diga lok tidu, “Leeme Silok ira xatu kaxat tuturun pam! Neni ira ru asuvos pam ti ne Simon!”

<sup>35</sup> La nedu duga tong ba i ridi mi mo lavanga salai ga vot parap nedu ro at langas, la lemeren du ga xasep

la duga ven kisip ba ne Iesu at loxonaleng neni ga sebek loxongkide.

*Iesu Ga Ru Asuvos Ti Lavaun Pinivu Ren*

(Mt 28:16-20; Mk 16:14-18; Jo 20:19-23)

<sup>36</sup> \*Nedu move duga tong na lempanga ri lavaun pinivu, la soso mun ne Iesu ga ru go xantubu atdi la ga lok tidi, “Lenmila na nemen eburu minimi.”

<sup>37</sup> \*Ketla diga umsu mi lainmarat aleng, diga nua i do nedi mo diga ven lороonan panga.

<sup>38</sup> Ketla neni ga lok tidi, “Tila nemi mik marat? La tila levendoxoma atnimi ik sixit ekarakat?”

<sup>39</sup> Mina ven lukngak la luxangkedek tarak bok la mina ven i do nenia mun. Mina long tu rak, la miba ven kibis ia, mila lороonan panga kopmen tabantuxu la tevesi ren, ketla nenia a ruuna labantuxu mi levesi.”

<sup>40</sup> [Ni ga tong i na la ni ga lox ase di mi lukngen la luxangkedek teren.]

<sup>41</sup> \*Ketla kovisi di goxo nunu, diga sangu la diga umsu mi lomomo. Kuren la ni ga sue di, “Mi ruuna bok tempanga anan nade kusu tia ri anan?”

<sup>42</sup> La diga raba i mi leemat tintin,

<sup>43</sup> la ne Iesu ga lok ka i la ga anan i ro at lemeren di.

<sup>44</sup> \*La neni ga lok tidi, “Anai lempanga nia aga tong i rinimi ap mo levenaleng nenia aga nemen eburu minimi. Lempanga axap diga malagan i mumu ia keneng at Laulis Linga at ne Moses, la levenmamalagan at lavaeme vapaase ali, la levempikpixon (Sam) mo ira soorun pam.”

<sup>45</sup> \*La neni ga lox arepalas levendoxoma atdi kusu dina xasep nunuan at Lovoang Kaala.

<sup>46</sup> La ni ga lok tidi, “Diga malagan i at Lovoang Kaala xeretna. Lanarong naba xip losongsongot la at laaleng

\* 24:26: Lu 9:22; 24:44 \* 24:27: Sam 22:1-21; Ais 53:12; Jo 13:31; Gu 3:13 \* 24:30: Lu 22:19  
 \* 24:34: 1 Ko 15:4-5 \* 24:36: 1 Ko 15:5 \* 24:37: Mt 14:26 \* 24:41: Jo 21:5 \* 24:44: Lu 9:22  
 \* 24:45: Lu 24:27

sepsev avantun neni naba roo xat amlong.

<sup>47</sup> \*La keneng at laasen teren dinaba tong asu Lagale Lavavang mumu loklok ti leeng la loklok ti doxoma xepe laxakapmek. Dinaba vavang min ti limixin axap at lavatbung menemen, naba ruka i de Jerusalem.

<sup>48</sup> \*La nemi minaba tong asu na lempanga.

<sup>49</sup> \*La nenia xa anaba riki mo laramtaba rinimi, mo ne Tamak gara xaape vam min do tinimi. Ketla mina nemen ngangais i ro Jerusalem se at loxonaleng mo lolos teren boro vana naba suxuna nimi.”

*Moroa Ga Lam Ka Ne Iesu Uto Vana At Laxalibet*

*(Mk 16:19-20; Gu 1:9-11)*

<sup>50</sup> La ne Iesu ga lam ka nga di boro Jerusalem la uto Beteni, la ni ga song aurut mi lukngen la ga lox anarong di.

<sup>51</sup> Se neni ga lox anarong pam di, neni ga on basinge di la ne Moroa ga lok kaka nga i uto vana at laxalibet.

<sup>52</sup> \*Diga lotu saparav i la digamlong uto Jerusalem, diga umsu mi langsung lomomo.

<sup>53</sup> La at levenaleng axap diga nemen to at loogu laplavang diga vemi asu mi ne Moroa.

\* **24:47:** 1 Ti 3:16  
14:28; 16:22

\* **24:48:** Jo 15:27; Gu 1:8

\* **24:49:** Jo 14:16; 15:26; 16:7; Gu 1:4

\* **24:52:** Jo

**Jon**  
**Lagale Lavavang At Ne**  
**Iesu Karisito**  
**Jon Ga Malagan I**  
**Levelinga Loklox**  
**Axasep**  
**Levenmaares 85–95 A.D.**

Jon neni lara atnedi lasangaun mi legepura lavaun pinivu at ne Iesu. Buaang levenaleng neni ga emu tangtagap mi ne Iesu, kuren la neni ga ven leven gugu ren la gang tonga levenanasa at ne Iesu. Mak mi ne Metiu, la ne Luk, nedi diga malagan avot levenbuk atdi la lempapaase atdi ga sixit emu mun. Ne Jon neni ga mu pit la ga malagan lempapaase ga lok petpes aleng tino. Do ata ven na levenmamalagan at ne Jon i ven ngan ta i do lara vetpes mo ga malagan i, ketla na levelinga ne Jon axa ga malagan i. Neni goxo vara i do na lox asilok axa i, kuren la neni ga lok. “Mo lavaun pinivu ren diga lok,” ua i epovo gita lok, “Mo lavaun pinivu ren maga lok.” Mo do una us lavavang ne Jon ga malagan i, uba ven i do ne Iesu neni lavatturunen at lempapaase ruturun. Neni lavatturunen at lisisixam la lorooro la neni lakde mi ladan at lorooro lexen. Neni laradi loklok tatao la neni ik lok tatao avukat dik. La neni langas nedik di lok ka i uto at ne Temen dik ne Moroa. Neni lentangas atdik, la Leeme Silok atdik, la lavatturunen atdik la neni mun ne Nitna ruturun at ne Moroa.

**Lengkot silok keneng at na lubuk**

1:1-18 Iesu neni ga laa meva kusu dina visix i de.

1:19-51 Iesu ga ro ka lentaba atnedi lavaun pinivu.

2:1-12:50 Iesu ga gugu saxaven to melamgo at limixin.

13:1-17:26 Levempapaase at ne

Iesu at laanan kaala.  
 18:1-19:42 Larangtanga alis la lanmet at ne Iesu.  
 20:1-21:25 Iesu ga roo xat basinge lanmet.

*Iesu Neni Lenavolo*

<sup>1</sup> \*Ganoxa at lereot Lenavolo mo gara nemen pam. La neni gak lok eburu mi ne Moroa, la neni ga epovo mun mi ne Moroa.

<sup>2</sup> Boro xa at lereot, Lenavolo gak lok eburu mi ne Moroa.

<sup>3</sup> \*Keneng teren ne Moroa ga rudum li levempanga axap. La kopmen tepanga at nai luruntudum li, gita ravasu boro at tara vetpes.

<sup>4</sup> \*Ga Lenavolo neni lavasuun at lorooro, la na lorooro ga raba laxasep ti limixin.

<sup>5</sup> \*La laxasep i soosoo ri limixin at lamain la mo limixin kopmen di goxo lox epovo i do gita lox asi i.

*Lovotpot At Ne Jon Laradi Sep Susu*

<sup>6</sup> \*Moroa ga riki laradi vapaase ren, laasen teren ne Jon.

<sup>7</sup> Ga vot kusu na paase ri limixin mumu nom laxasep, kusu nedi diba ronga i la dina nunu at laxasep.

<sup>8</sup> \*Neni xa xopmen mo laxasep. Neni ga vot mun kusu na tong asu levelinga ap mo laxasep.

<sup>9</sup> \*Anai ni laxasep tuturun, laxasep ga si ude at na lavatbung menemen la ik lox asuusu laxasep ti limixin axap.

<sup>10</sup> \*Lenavolo ga nemen at na lavatbung menemen, ketla limixin di goxo ven kibis i, keke do neni ga rudum li lempanga axap.

<sup>11</sup> Neni gat pas uto at lubang mixin teren, ketla limixin axa ren di goxo siam ka i.

<sup>12</sup> \*Ketla nedi diga siam ka i la diga nunu ren, ni ga lok li nedi ngan tinotno luvutnitna ne Moroa.

\* **1:1:** Jo 17:5; 1 Jo 1:1-2; Li 19:13    \* **1:3:** 1 Ko 8:6; Kl 1:16-17; Ib 1:2    \* **1:4:** Jo 5:26    \* **1:5:** Jo 3:19    \* **1:6:** Mt 3:1; Lu 1:13-17,76    \* **1:8:** Jo 1:20    \* **1:9:** Jo 8:12; 1 Jo 2:8    \* **1:10:** Jo 1:3; 17:25  
 \* **1:12:** Ga 3:26    \* **1:13:** Jo 3:3-6; Je 1:18; 1 Pi 1:23

13 \*Di goxo ravasu ngan luvut-nitna ne Moroa at loklok at na lavatbung menemen, i ngan ta do laxamdak mi laxaalik at lenasun, koplata lavavara at latlok, kopmen. Ne Moroa xa, neni ne Temen di.

14 \*Lenavolo ga vee radi la ga nemen kantubu atnama. Maga ven lisisixam teren, la ni ga umsu mi letaba nabalamu la levelinga ruturun at ne Moroa. La mo lisisixam neni ga lok ka i ngan legesamdak at ne Temen.

15 \*Jon ga vavang min la ga xup silok ti limixin keretna, "Neni na laradi nenia aga paase ali mumu i. Aga vaase xeretna, 'Laradi mo naba vot melemu rak, neni i silok aleng tia, mila neni ga rooro avot tia.'"

16 \*Letaba nabalamu ren i silok aleng tidik, la kerepmo neni ira lox anarong nedik, la iram taba amisik dik mi nom leveloklox anarong.

17 \*Moroa ga raba avolo ne Moses mi Laulis Linga. Ketla letaba nabalamu at ne Moroa mi levelinga ruturun ga ravasu at ne Iesu Karisito.

18 \*Tara goxovisi na ven ne Moroa. Ne Nitna xusuk mun, neni i epovo mi ne Moroa, neni it kis esogo mi ne Temen la neni xa ga paase axasep dik mi ne Moroa.

### *Levesusue Mumu Ne Jon Mi Lugugu Ren*

(Mt 3:1-12; Mk 1:1-8; Lu 3:1-18)

19 Limixin amgomgo ro Jerusalem diga riki aonon lentaba lavamaasa la lentaba luvuttadi gugu at loogu laplavang\* uto ri ne Jon la diga sue i do, "Nenu nege?"

20 \*Jon goxo rongaxepe di xusu neni gi toxo vorang lususue atdi, ketla neni ga vaase axasep di xusu dina xasep. Ni ga vaase xeretna, "Nenia xopmen Lanarong."

21 \*La diga sue manga i, "Nenu nege? Kereva, nenu mo leeme vapaase ali megano, ne Elaisa?"

Jon ga vorang i ridi xeretna, "Nenia xopmen."

La diga sue manga i xeretna, "Kereva, nenu leeme vapaase ali, ne Moroa ga xaape min at levelinga at ne Moses?"

La ni ga vorang i ridi xeretna, "Kopmen."

22 Melemu rinotno diga sue i, "Una tong i rinama do nenu nege. Ma vara i do maba lok ka tovoporang at na lususue uto atnedi limixin amgomgo diga riki nama. Una tong i do nenu nege."

23 Jon ga vorang i ridi mi levelinga at leeme vapaase ali ne Aisaia, ni ga lok keretna,

"Nenia mo lara ip kup to at lamatbin keretna, 'Mina lox akmokso langas ti Leeme Silok.' " *Ais 40:3*

24 La lentaba lubang Parisi, luvuttadi amgomgo diga riki di, diga vot pasa ne Jon.

25 \*Diga sue i xeretna, "Do nenu xopmen Lanarong, koplata ne Elaisa, koplata mo leeme vapaase ali, la tila u sep susu limixin?"

26 Jon ga vorang i ridi xeretna, "A sep susu limixin mi ladan mun. Kantubu atnimi laradi mo i tu, nemi xopmen minaklen i.

27 \*Neni mo naba vot melemu rak, ketla nenia axo epovo xusu ana soxomus luvanga vatpas teren mila i silok aleng tia."\*

28 \*Anaa levempanga ga ravasu ro Beteni, to at lara lenep dan Joridan, ne Jon ga sep susu limixin e.

### *Lanasip At Ne Moroa*

29 \*Ap mo manga lara laaleng Jon ga ven ne Iesu gat pas go boro, la ni

\* 1:14: Ais 60:1-2; Ga 4:4; Pl 2:7; Ib 2:14; Lu 9:32; Jo 2:11 \* 1:15: Jo 1:27,30; Mt 3:11 \* 1:16: Kl 2:10

\* 1:17: Pas 34:28; Ro 6:14; 10:4 \* 1:18: Pas 33:20; Jo 6:46; 1 Ti 6:16; 1 Jo 4:12; Mt 11:27 \* 1:19:

Na luvuttadi, nedi at libibinat at ne Levi la diga lok tooro lavamaasa ro xeneng at loogu laplavang.

\* 1:20: Jo 3:28 \* 1:21: Lal 18:15,18; Mt 11:14; Jo 6:14; 7:40 \* 1:25: Mt 21:25; Jo 1:33 \* 1:27:

Jo 1:15; Gu 13:25 \* 1:27: Anai ni lavapaase poovo ri lox asuusu i do ne Jon ga lox asu langangan

loklok ngangao ren ti ne Iesu. \* 1:28: Mt 3:6; Jo 10:40 \* 1:29: Ais 53:6-7; Jo 1:40; 1 Pi 1:18-19

ga vaase xeretna, “Pen ba i, ni nom Lanasip at ne Moroa naba doxoma xepe laxakapmek at limixin at na lavatbung menemen kopok.

30 \*Neni na laradi nenia aga paase min tinemi, la aga vaase do, ‘Laradi mo naba vot melemu rak, neni i silok aleng tia, mila neni ga rooro avot tia.’

31 Gano a goxoklen i do neni nege, ketla nenia aga vot de ngan laradi sep susu mene mi ladan kusu ti lox asuvos i ri leme Israel.”

32 \*La ne Jon ga tong asu lavapaase axasep keretna, “Aga ven Loroonan Kaala ga rava si boro vana at laxalibet la ga nemen teren, ga lok ngan lamno.

33 \*Nia xovisi goxoklen i, ketla ne Moroa ga riki ia xusu anap sep susu limixin mi ladan la neni ga lok tia xeretna, ‘Unaba ven Loroonan Kaala naba si boro vana la na nemen at tara taradi. Neni mo laradi naba sep susu limixin mi Loroonan Kaala.’

34 \*Agara ven pam i la a tong i rinimi do neni ne Nitna ne Moroa.”

#### *Lavaun Pinivu At Ne Iesu*

35 Ap mo manga lara laaleng melemu Jon ga nemen manga ro saparap ladan sen Joridan eburu mi legepu radi at lavaun pinivu ren.

36 \*At loxonaleng neni ga ven ne Iesu gat pas aurer i, la neni ga lok keretna, “Pen ba i. Neni na, Lanasip at ne Moroa.”

37 Mo luun pinivu ren duga rongga na levelinga la duga emu eburu nga mi ne Iesu.

38 Iesu ga rem gili la ga ven du, duga mumu asu i, la ga sue du, “Kereva mo?”

Duga vorang i rin keretna, “Rabai. Loogu ram ua?” (Lavasuum at loxolinga Rabai do, leeme loklox ase.)

39 La ne Iesu ga lok, “Uto dik ata ven i.” Kuren la duga emu min la duga ven lenep neni gak lok teren. La duga nemen go ap mo laaleng

axap eburu min, ga se at lavanuet konaleng ga ukantinao.

40 \*Endru, neton ne Simon Pita, neni lara atdu ga rongga mo levelinga at ne Jon la ga emu mi ne Iesu.

41 \*La soso mun ne Endru ga vot pasa neton, ne Simon la ga lok tin, “Mara long lenget ka vam Lanarong.” Lavasuun at loxolinga Lanarong do, Karisito.

42 \*Melemu neni ga lam ka ne Simon uto saparap ne Iesu. Iesu ga ven tin la ga lok tin keretna, “Nenu, ne Simon, nitna ne Jon. Laasen ta ru ne Kepas.” Na laasen i lok ngan mun ne Pita la lavasuun teren do luuat kis.

#### *Iesu Ga Ro Xaka Ne Pilip Mi Ne Natanael*

43 \*Ap mo manga lara laaleng Iesu ga vara i do nat pas uto Galili. Ni ga vot pasa ne Pilip la ga lok tin keretna, “Ude u, la una mumu asu ia.”

44 Pilip neni boro Betsaida, lemenemen at ne Endru mi ne Pita.

45 \*Pilip ga vot pasa ne Natanael la ga lok tin, “Mara long lenget ka vam laradi ne Moses ga malagan axasep mumu i ro xeneng at levenbuk at Laulis Linga. La lavaeme vapaase ali bok diga malagan mumu i. Neni ne Iesu, lamdak at ne Josep, boro Nasaret.”

46 \*La ne Natanael ga sue i, “I epovo xusu tempanga avukat naba vot boro Nasaret?”

Pilip ga lok, “Ata onon la una ven ba i.”

47 At loxonaleng ne Iesu ga ven ne Natanael ga vas auret, la ni ga vaase mumu i xeretna, “Neni laradi ruturun boro Israel, kopmen tempanga xaxarang nak lok at lorooro ren.”

48 \*La ne Natanael ga sue i. “Uklen ba ia xereva?”

Iesu ga vorang i rin keretna, “At loxonaleng ne Pilip kovisi na lam kaka u, ara ven pam u, ut kis to maxopok at luuna pik.”

\* 1:30: Jo 1:15 \* 1:32: Mt 3:16 \* 1:33: Lu 3:2-3 \* 1:34: Mt 3:17; 17:5; 27:54 \* 1:36: Jo 1:29  
\* 1:40: Mt 4:18-20 \* 1:41: 1 Sml 2:10; Sam 2:2; Jo 4:25 \* 1:42: Mt 16:18; Mk 3:16 \* 1:43: Mt 8:22; Mk 2:14 \* 1:45: Lal 18:18; Ais 7:14; 9:6; Jer 23:5; Isi 34:23 \* 1:46: Jo 7:41,52 \* 1:48: Sam 32:2

49 \*Natanael ga lok, “Rabai. Nenu ne Nitna ne Moroa. Nenu Loorong Silok mede Israel.”

50 Iesu ga lok tin, “U nunu mene rak mila nenia a tong i ru do a ven u ro maxopok at luuna pik. Unaba ven levempanga silok aleng ti na lavanga.”

51 \*La ni ga lok bok tidu, “A tong tuturun i rinumu do munaba ven laxalibet na rem suang la munaba ven lubang angelo at ne Moroa dinat pas si la dinat pas urut uto saparav ia Laradi Mevana.”

## 2

### *Loklox Epot To Kena*

1 \*Melemu at lavantun levenaleng, limixin diga lok leluxa loklox epot to Kena at lenep silok Galili. Nenen ne Iesu bok mo gak lok,

2 la ne Iesu eburu mi lavaun pinivu ren bok mo diga nedi do diba vot go at loklox epot.

3 Se limixin diga in axap levendan vaen, nenen ne Iesu ga lok tin, “Levendan vaen atdi ira xap pam.”

4 \*Iesu ga lok tin, “Naga, u noxo tong ase ia mi tavanga xusu ana lox i. Laaleng ti vaxaru kaxat lugugu rak kovisi na vot.”

5 \*Nenen ne Iesu ga lok ti mo luvuttadi gugu, “Mina mumu asu levempanga salai do neni na tong i rinimi.”

6 \*Limixin me Judaia diga ru-una leretere at loklok at lotu atdi mumu logosogos panga, ni lava-suun mun teren la lavanna lempat buxom tuntu mo ga nemen. Nedi getgesara diga epovo rin tuntu ka tegepu sangaun koplavantun sangaun lenbuxak kidi.

7 Iesu ga lok ti lavasaxaruki, “Minantu i na lempat buxom mi laxadan.” La digantu aumsu di mi laxadan.

8 La melemu neni ga lok tidi, “Monga minantu ka toxongkadan at

nom la mina lok ka i uto at laradi i lok tatao leluxa.”

Diga lok ka i uto saparap mo laradi, 9 la ni ga in tong pen mo loxongkadan, mo ga vee vaen pam. Ni goxoklen i do na lavaen ga laa meva, ketla lavasaxaruki ren digaklen i. Kuren la neni ga ro ka mo laradi diga lox aepor i,

10 la ga lok tin, “Limixin axap di in lagale lavaen avot la melemu do dira in aleng, nedi dira in ba lavaen i so gamasa, ketla nenu ura lili vam lavaen avukat ise nga mo.”

11 \*Nai lavanga sangsangu avot tinotno ne Iesu ga lox i. Ni ga lox i na ro Kena at lenep silok Galili. Neni ga lox asuusu lolos teren go, la lavaun pinivu ren diga nunu ren.

12 \*Melemu at nai, Iesu eburu mi nenen la luvutneton la lavaun pinivu ren digat pas uto Kaprenaum, la diga nemen lixilik go at lentaba levenaleng.

### *Iesu Ga Beles To Xeneng At Loogu Laplavang*

(Mt 21:12-13; Mk 11:15-17; Lu 19:45-46)

13 \*Laaleng ga auret ti leluxa at Lovovolo Pe at leme Judaia, kuren la ne Iesu ga urut uto Jerusalem.

14 To xeneng at loogu laplavang neni ga long lenget ka luvuttadi diga sesep mi laxanbulumaxao, laxasipsip, la levenamno atdi. La luvuttadi loklox ekun pilas bok mo digat kis saparap levengkot lili atdi. 15 Iesu ga lok lakpiksa mi luxua, la ga xala su mi nom levempanga mi lavanuet kangkedek atdi boro xeneng basinge loogu laplavang, laxasipsip eburu mi laxanbulumaxao. La ni ga sogo pupukus levengkot lili la ga reeve laxampilas atdi.

16 \*La ni ga lok ti luvuttadi diga sesep mi levenamno xeretna, “Mina lok kepe nom lavapixa uto xamang basinge na loogu. Nemen mita lok

\* 1:49: Mt 14:33; 16:16; 27:42; Mk 3:11 \* 1:51: Lur 28:12 \* 2:1: Jo 1:43 \* 2:4: Mt 12:48; Jo 19:26 \* 2:5: Jo 7:30; 8:20 \* 2:6: Mk 7:3-4 \* 2:11: Lu 9:32; Jo 1:14; 4:54; 11:40 \* 2:12: Mt 4:13 \* 2:13: Pas 12:1-27; Jo 6:4; 11:55 \* 2:16: Lu 2:49



loogu at ne Tamak na lok ngan ta loogu sesep.”

<sup>17</sup> Lavaun pinivu ren diga doxoma ka i do Lovoang Kaala ga lok,

“Lavavara rak ti na loogu ram ne Moroa i lolos aleng la ni lava-suun teren limixin bilinga din-aba sev amer ia.” *Sam 69:9*

<sup>18</sup> Luvuttadi amgomgo at limixin me Judaia diga paase lolos tin keretna, “Una lok tavanga sangsangu xusu ti lox asuusu i rinama do nenu u ruuna lavapaase axasep kusu ti lox i na.”

<sup>19</sup> \*La ne Iesu ga vorang i ridi xeretna, “Do mina ut asi na loogu laplavang, anaba vaxaru amlong manga i xeneng at lavantun aleng.”

<sup>20</sup> Diga sue i, “Uba vaxaru amlong i at lavantun aleng mene kereva? Diga lok na loogu laplavang at lavanuet sangaun mi lavanna maares axap.”

<sup>21</sup> \*Ketla ne Iesu xopmen goxo paase mi loogu laplavang, ketla neni ga paase mumu labantuxu ren.

<sup>22</sup> \*Melemu at laaleng neni ga rooxat amlong at lanmet, lavaun pinivu ren diga doma amlong ti na levelinga ren. La diga nunu at Lovoang Kaala la diga nunu bok ap mo levelinga ne Iesu ga tong i.

### *Iesu Iklen Limixin Axap*

<sup>23</sup> \*At laaleng ne Iesu ga nemen to Jerusalem at leluxa at Lovovolo Pe, buaang nedi limixin diga nunu at laasen teren atla diga ven mo levempanga sangsangu ren.

<sup>24</sup> Ketla Iesu goxo nunu atdi mila neni gaklen avukat limixin axap.

<sup>25</sup> \*Goxo epovo bok do teta gita re ri ne Iesu mumu loklok at limixin mila neni gaklen levempanga axap ga nemen keneng at lorooro atnedi.

## 3

### *Iesu Eburu Mi Ne Nikodimas*

<sup>1</sup> \*Lara laradi laasen teren ne Nikodimas, neni lara atdi luvuttadi amgomgo at leme Judaia la neni lara atnedi libinam tadi at lubung Parisi.

<sup>2</sup> \*At lara laxanimin neni ga mu bung ti ne Iesu la ga lok tin, “Rabai. Maklen i do nenu laradi loklox ase, la ne Moroa ga riki u. Kopmen tara na epovo xusu na lok nom lempanga sangsangu, mo do ne Moroa noxo lok tooro i.”

<sup>3</sup> \*Iesu ga vorang i rin keretna, “A tong tuturun i na ru. Do tara noxo lok kaka livipisik amaxat, neni noxo vubeles at Linintoo at ne Moroa.”

<sup>4</sup> Nikodimas ga sue i, “Naba lok kereva la laradi mukun dina visik amu box i? Neni xopmen na epovo xusu na beles at lavatpaasa at nenen la nenen na visik amu manga i.”

<sup>5</sup> \*La ne Iesu ga vorang i rin, “A tong tuturun i na ru. Do tara noxo lok kaka lesepe susu la noxo lok kaka livipisik amaxat boro at Loroonan Kaala, neni noxo beles at Linintoo at ne Moroa.”

<sup>6</sup> \*La laradi, nenen i visix i at loklok at ne temen mi nenen, neni at na lorooro xopok. Ket dola Loroonan Kaala i visik amaxar i, neni i ruuna lorooro maxat at Loroonan Kaala.

<sup>7</sup> Nemen uta sangu atla nia a tong i ru do, ‘Una lok ka livipisik amaxat.’

<sup>8</sup> \*Lamanman it mas mu lavavara ren. Ung tonga i, ketla uxoklen i do i laa meva la it mas ua. I lok ngan mun nedi limixin Loroonan Kaala i visik amaxat di.”

<sup>9</sup> Nikodimas ga sue i, “Naba lok kereva na?”

<sup>10</sup> Iesu ga vorang i rin, “Kereva, nenu laradi loklox ase silok at leme Israel la nenu xa uxoklen i na?”

<sup>11</sup> \*A tong tuturun i ru, nema ma paase mi lempanga makleklen i, la ma tong lempanga maga ven i, ketla kopmen tinotno tara atnimi limixin

\* 2:19: Mt 21:23; 26:61; 27:40; Gu 6:14 \* 2:21: 1 Ko 6:19 \* 2:22: Lu 24:6-8; Jo 12:16; 14:26

\* 2:23: Jo 7:31 \* 2:25: Mk 2:8 \* 3:1: Jo 7:50; 19:39 \* 3:2: Mt 22:16; Jo 9:16 \* 3:3: Mt 18:3;

1 Pi 1:23 \* 3:5: Isi 36:25-27; Ta 3:5 \* 3:6: Sam 51:5; Jo 1:13 \* 3:8: Akl 11:5 \* 3:11: Jo 3:32;

8:26 \* 3:12: Lu 22:67

amgomgo, na lok do na siam ka levelinga atnama.

12 \*Nenia ara vaase vam tu mi lempanga at na lavatbung menemen la uxu nunu at na levelinga rak. Uba nunu at levelinga rak kereva do nia ana paase ru mi lempanga boro vana at laxalibet?

13 \*La kovisi tara goxo urut uto vana at laxalibet, ketla legesa radi mene ga si boro vana at laxalibet la neni nenia, Laradi Mevana.

14 \*Moses ga rebeng aurut lovoovo sii ro at lamatbin kusu limixin dina ven i la dinaba roo. La kerepmo nenia, Laradi Mevana, limixin dinaba lox aurut box ia at laxaba,

15 \*kusu nege do i nunu rak, neni naba ruuna ka lorooro avolo.

16 \*Moroa ga balamu rinotno limixin axap at na lavatbung menemen, kuren la ni ga raba mi legesa madak mun teren, kusu do nege i nunu ren, neni noxo seeve, ketla neni naba ruuna ka lorooro avolo.

17 \*Moroa ga riki ne Nitna ude at na lavatbung menemen kopmen do neni na lok li loxokoxo ri limixin. Ketla Moroa ga riki ne Nitna xusu neni Laradi Loklox Arooro ridi.

18 \*Do nege i nunu at ne Nitna, neni noxo lok kaka loxokoxo. Do nege xopmen na nunu, neni ira sok ka vam loxot tin, mila neni xopmen na nunu at legesa madak mun at ne Moroa.

19 \*Limixin dinaba lok kaka lumumat atla, laxasep gara vot pam at lavatbung menemen, la diga lox abulubun i. Diga vavara aleng loklok at lubuxumin, mila leveloklok atdi ga lok kapmek.

20 \*Do nege i lok lempanga i lok kapmek, neni i xopara aleng tinotno laxasep la ni noxot pas uto at laxasep, mila neni ixo vara i do mo laxakapmek teren na nemen at lasaxaven.

21 Ket do nege luruptuvuk teren in mantan tino ngan luruptuvuk at ne Moroa, neni i nemen at laxasep la kerepmo limixin di ven kisip lorooro ren la diklen i do ne Moroa i nemen eburu min."

### *Iesu La Ne Jon*

22 \*Melemu at nai Iesu eburu mi lavaun pinivu ren digat pas tangtagap maxeneng at lenep silok Judaia. Ni ga nemen eburu midi go at lentaba leven gaaling, la neni gap sep susu limixin.

23 Jon bok gap sep susu limixin to Inon, goxo vaxalom solo boro Salim, mila levendan silok mo ga nemen go. Limixin digat pas parav i la ni gap sep susu nedi.

24 \*Ap mo levenaleng Jon kovisi goxo nemen at loogu xokoxo.

25 Lentaba lavaun pinivu at ne Jon eburu mi lara laradi boro Judaia diga etep mi levelinga mumu lususu rik lox adadat laradi at lemeren ne Moroa.

26 \*Kuren la diga vot pasa ne Jon la diga lok tin keretna, "Rabai. Nenu una doma bilong ti mo laradi ga nemen eburu minu ro auret ladan sen Joridan, laradi nenu ga paase mumu i. Neni mo ip sep susu limixin, la limixin axap mo di mumu asu i."

27 \*Jon ga vorang i ridi xeretna, "Kopmen teta naba ruuna ka tavanga do ne Moroa noxo raba i min.

28 \*Nemi xa miga ronga mo levelinga nia aga tong i xeretna, 'Nia xopmen Lanarong, ketla ne Moroa ga riki amgo ia rin.'

29 \*At loklox epot laradi i lok ka latkin tin, ketla lentangas teren i tu saporav i la ing tonga i. I lok momo xusu ti ronga levelinga ap mo laradi. La kerepmo nia a lok momo la lomomo rak i silok.

30 Neni naba silok aleng tia la nia anaba lixilik tin."

\* 3:13: Ler 30:4; Ro 10:6 \* 3:14: Kex 21:9; Jo 8:28; 12:32 \* 3:15: Jo 20:31 \* 3:16: Jo 3:36; 10:28; Ro 5:8; 8:32; 1 Jo 4:9-10 \* 3:17: Lu 19:10; Jo 5:22; 12:47; Gu 17:31 \* 3:18: Jo 3:36; 5:24 \* 3:19: Jo 1:5,9; 8:12 \* 3:20: Ep 5:11-13 \* 3:22: Jo 4:1-2 \* 3:24: Mt 4:12 \* 3:26: Jo 1:26-34 \* 3:27: Jo 19:11; 1 Ko 4:7; Ib 5:4 \* 3:28: Jo 1:20,23; Mt 11:10 \* 3:29: Mt 9:15

*Iesu Ga Si Boro Vana At Laxalibet*

<sup>31</sup> \*La ne Jon ga lok bok, “Do tara na si boro vana at laxalibet, neni i silok aleng tinotno ri limixin axap. Laradi mede xopok, neni at na lavatkangka mun la neni i paase ngan laradi mede at na lavatkangka. Ketla do tara na si boro vana at laxalibet, neni i volo aleng ti limixin axap.

<sup>32</sup> \*Neni i paase mi levempanga neni ga ven i la gang tonga i, ketla kopmen teta i siam ka levelinga ren.

<sup>33</sup> Do tara na siam ka levelinga ren, neni i lox asuusu i do ne Moroa neni Luruturun.

<sup>34</sup> \*Mo laradi ne Moroa ga riki i, i paase mi levelinga at ne Moroa mila ne Moroa ga raba i mi Loroonan Kaala kopmen tatnese ren.

<sup>35</sup> \*Moroa i balamu aleng ne Nitna la ira lok li vam levempanga axap maxopok at loklok tatao ren.

<sup>36</sup> \*Do nege i nunu at ne Nitna ne Moroa, neni naba ruuna ka lorooro avolo. La nege do i ronga xepe ne Nitna ne Moroa, neni noxo ruuna ka lorooro avolo la lebelemamao at ne Moroa ik lok mu amisix i.”

**4***Iesu Mi Latkin Boro Samaria*

<sup>1</sup> \*Lubung Parisi diga ronga i do limixin solo diga mumu asu ne Iesu la ni ga sep susu di la kopmen bok ba timixin solo diga mumu asu ne Jon.

<sup>2</sup> Ne Iesu xa xopmen goxo sep susu tara. Ketla lavaun pinivu mun teren digap sep susu limixin.

<sup>3</sup> Ne Iesu ga ronga i na levelinga la neni ga vas kaxat basinge nom lenep Judaia la gamlong manga uto Galili.

<sup>4</sup> At lavatpas teren ugo, ga epovo do neni nat pas keneng at lenep silok Samaria.

<sup>5</sup> \*Ni gat pas go Samaria la ga rupot to at lemenemen laasen teren Saikar. Goxo vaxalom solo boro at lenep

kangka ne Jakop ga raba lamdak teren ne Josep min.

<sup>6</sup> Lamamara dan at ne Jakop ga nemen e. La ne Iesu, ga molo ap mo lavatpas la ni ga xis go saporap lamamara dan. Taba ga xanangking.

<sup>7</sup> Lara latkin boro Samaria ga vas pot go xusu tintu dan. La ne Iesu ga lok tin, “Una raba ia mi toxondan ti inin.”

<sup>8</sup> Lavaun pinivu ren no nga di at lemenemen silok diga un panga anan.

<sup>9</sup> \*La nom latkin ga lok tin keretna, “Nenu laradi boro Judaia la nenia mede Samaria, tila u sing ia do anantu ka toxondan tu la una in?” Leme Judaia dixo inin at leventingtigon dan leme Samaria ding long tu ren.

<sup>10</sup> \*La ne Iesu ga vorang i rin, “Do nenu giklen laramtaba at ne Moroa la mo laradi i sing u ri toxondan, i epovo do una sing i ri laxadan too, la ni naba raba u min.”

<sup>11</sup> \*La nom latkin ga lok tin, “Leeme Silok, uxo ruuna tavat buxom silok kusu tintu dan la ladan no xa ik lok kopok. Uba lok ka rinotno nom laxadan too ua?”

<sup>12</sup> \*Lurubuno atnema ne Jakop ga xe na lamamara dan tinama, la neni eburu mi laxamdak teren, la lempanga mi lavanuet kangkedek atdi, diga inin de. La kereva u lok do nenu mo u silok ti ne Jakop?”

<sup>13</sup> La ne Iesu ga vorang i ri latkin keretna, “Do tara na in at nom laxadan, neni naba minu amu bok.

<sup>14</sup> \*Ket do tara na inin at laxadan nenia ana raba i min, neni noxo minu bok ba. I ruturun do laxadan nia ana raba i min naba lok ngan loxodan i puuvut su xeneng at lorooro ren, la naba raba i mi lorooro avolo.”

<sup>15</sup> La nom latkin ga lok tin, “Leeme silok, una raba ia mi nom ladan, kusu a noxok minu bok ba la a noxot pot amisik de kusu tin tuntu dan.”

\* **3:31:** Jo 8:23; 1 Jo 4:5 \* **3:32:** Jo 3:11 \* **3:34:** Jo 1:32 \* **3:35:** Mt 11:27; Jo 5:20; 10:17 \* **3:36:** Jo 3:16-18; 1 Jo 5:12; Lu 3:7 \* **4:1:** Jo 3:22,26 \* **4:5:** Lu 9:52; Lur 33:19; Jos 24:32 \* **4:9:** Esr 4:1-5; 9:1-10:44; Lu 9:52-53 \* **4:10:** Jo 4:26 \* **4:11:** Jo 7:37-38; Li 21:6 \* **4:12:** Jo 8:53 \* **4:14:** Jo 6:35

16 La ne Iesu ga lok tin, “Una onon be la una lam kaka latlok taram. La munamlong ba ude.”

17 Latkin ga lok tin, “Axo ruuna tatlok.”

La ne Iesu ga lok tin, “Ik mokso levelinga ram do kopmen tatlok taram.

18 Ugara epot pam at lavalimo lavatlok la ti latlok monga nenu u epot teren, kopmen neni latlok tinotno ram. Lavapaase ram tia i ruturun.”

19 \*Latkin ga lok, “Leeme Silok, a ven kisip ba i do nenu leeme vapaase ali.

20 \*Lavalabat atnama mede Samaria diga lotu parap ne Moroa at nai lakaana, ketla nemi leme Judaia mi tong i do lemenemen Jerusalem neni lenep ti lotu parap ne Moroa e.”

21 Iesu ga lok tin, “Latkin, una nunu at na levelinga rak. Laaleng naba vot la limixin axap di noxo lotu parap ne Moroa at na lakaana koplato Jerusalem.

22 \*Nemi limixin boro Samaria mixoklen tinotno ne Moroa mi lotu parav i. Nema limixin me Judaia maklen ne Moroa mila Laradi Loklox Arooro neni at lubang mixin me Judaia.

23 Ketla mo laaleng naba vot, nanga ira vot pam, la limixin lotu ruturun dinaba lotu parap ne Temen di mi Loroonan Kaala la mi luruturun. Nedi mo limixin lotu ruturun, ne Temen di i vara di do dina lotu saporav i.

24 \*Moroa neni loroonan. La nedi di lotu parav i, dina lotu saporav i mi Loroonan Kaala la mi luruturun.”

25 \*Latkin ga lok tin, “Aklen i do Lanarong, ne Karisito, naba vot. Do neni na vot, ni naba re axasep axap dik mi lempanga axap.”

26 \*Melemu ne Iesu ga lok tin, “Nenia vam na, mo nenu u epaase eburu min.”

### *Lavaun Pinivu Digamlong*

27 Ap mo mun loxonaleng lavaun pinivu ren digamlong. La diga rakdu mila ne Iesu ga epaase eburu mi nom latkin. Ketla kopmen tara atdi ga sue latkin do, “U vara lavanga salai?” Koplato gita sue ne Iesu do, “Tila u epaase eburu mi nom latkin?”

28 Latkin ga vas kaxat basinge lavatbuxom dan teren, la gamlong uto at lemenemen silok, la ga vaase ri limixin me go,

29 “Ude nemi la mina ven lara laradi. Neni i vaase axasev ia mi lempanga axap nenia agak lox i gano. Agut neni vam Lanarong.”

30 Kuren la diga on basinge mo lemenemen la diga vas kaxat uto ri ne Iesu.

31 Ap mo mun loxonaleng lavaun pinivu at ne Iesu, diga lok tin, “Rabai, una anan be.”

32 Ketla neni ga lok tidi xeretna, “Leveluxa mo rak ik lok ti anan la nemi mixoklen i.”

33 La lavaun pinivu ren diga esue xantubu atdi xeretna, “Kereva, tentaba go di raba i mi teveluxa?”

34 \*Ketla Iesu ga lok lavapaase poovo ridi, “Leveluxa rak keretna, ana ronga res at lavavara at ne Moroa ga riki ia la ana lox axap lugugu neni ga raba ia min.

35 \*Nemi mik lok do, ‘Lavanuet gaaling bok mo la melemu ba mina sep kin at laraamang.’ Ketla a tong i rinimi do mina ven avukat at laraamang. Levempeven panga monga ia mukun pam la monga i gagas.

36 Mo laradi ik lok kaka bubua levempipisik at laraamang, i gu kaxat pam la ira lok kaka luunun tin, la mo levempipisik teren i lok ngan lorooro avolo. La kerepmo mo laradi itlotlo la mo laradi ik lok kaka bubua levempipisik at laraamang, du buru duba momo.

37 I lox asoorun na levelinga i lok keretna, ‘Lara itlotlo la lara vetpes ik lok kaka bubua levempipisik at laraamang.’

\* 4:19: Jo 7:40; 9:17; 1 Ko 14:24-25 \* 4:20: Lal 12:5-14; Sam 122:1-5 \* 4:22: 2 Lav 17:29-41; Ais 2:3; Ro 9:4-5 \* 4:24: 2 Ko 3:17; Ro 12:1; Pl 3:3 \* 4:25: Jo 1:41 \* 4:26: Mk 14:61-62; Jo 9:37 \* 4:34: Jo 6:38; 17:4 \* 4:35: Lu 10:2

38 La kerepmo aga riki vam nimi xusu ti lok ka lempanga anan at laraamang, nemi xa xopmen mi goxotlotlo li i. Lentaba vetpes digatlotlo li i go la nemi mik lok kaka levempipisik teren.”

### *Buaang Limixin Me Samaria Diga Nunu*

39 Buaang atnedi limixin me Samaria ap mo lemenemen diga nunu at ne Iesu mila latkin ga lok do, “Neni ira tong axasep pam ia mi lempanga axap nenia agak lox i.”

40 Kuren la ap mo loxonaleng mo limixin diga vot pasa i, diga sing i xusu na nemen eburu be midi. La ne Iesu ga nemen eburu midi go at legepu aleng.

41 Buaang bok atnedi diga nunu at ne Iesu, mumu levelinga ren,

42 \*la diga lok ti mo latkin keretna, “Ma nunu ba, kopmen do at levelinga uga tong i, ketla nema axa mara rongga ba i, la maklen ba i do neni Laradi Loklox Arooro ruturun ti limixin at na lavatbung menemen.”

### *Iesu Ga Lox Aroo Lamdak At Laradi Gomgo*

43 \*Melemu at legepu aleng Iesu ga nemen go Saikar, neni ga vas kaxat basinge di la gat pas uto Galili.

44 \*Ganoxa ne Iesu ga lok, “Laradi vapaase ali, kopmen di noxo lok ngangao ren to at lemenemen axa ren.”

45 \*Se neni ga vot go Galili, limixin me go diga lok momo aleng min, mila at loxonaleng nedi digat pas uto Jerusalem ti leluxa at Lovovolo Pe, diga ven lempanga axap ne Iesu ga lok i ap mo leluxa.

46 \*Iesu gamlong uto Kena at lenep Galili, lemenemen neni ga ba gili laxadan ti lavaen e.

La lara laradi gomgo at la gava-man ga nemen to Kaprenaum la lamdak teren ga meres.

47 \*Se neni ga rongga i do ne Iesu ga vot boro Judaia la uto Galili, ni ga vot pasa i la ga sing i xusu nat pas uto Kaprenaum la na lox aroo lamdak teren, monga gak midi ameremet.

48 \*Iesu ga lok tin, “Kopmen tara atnemi noxo nunu se do mina ven lempanga sangsangu.”

49 Laradi gomgo ga lok tin, “Leeme Silok, una emu eburu minia. Dola kopmen, lamdak tarak naba met.”

50 \*Iesu ga lok tin, “Una onon, lamdak taram naba roo.”

Laradi gomgo ga nunu at levelinga at ne Iesu la ga vas kaxat.

51 At lavatpas teren uto xolonu lavasaxaruki ren diga xip tangarang kaka i la diga lok tin keretna, “Lamdak taram mo naba roo.”

52 La neni ga sue di mi loxonaleng salai lamdak teren ga lox avukat, la diga lok, “At legesa xonaleng itinongo xanangking mo liplivi ita repes basinge i.”

53 \*La temen lamdak ga doxoma bilong ti levelinga at ne Iesu ga vaase i rin at loxonaleng kerepmo do, “Lamdak taram naba roo.” Kuren la neni eburu minedi axap limixin diga nemen at loogu ren diga nunu at ne Iesu.

54 \*Na lavanga sangsangu, ni lugugu sepsev agepura at lempanga sangsangu ne Iesu ga lok i melemu at laaleng ni ga vas kaxat boro Judaia la uto Galili.

## 5

### *Iesu Ga Lox Aroo Laradi Ro At Ladan*

1 Melemu at nai, limixin me Judaia diga lok leluxa silok to Jerusalem la ne Iesu gat pas tin.

2 Ap mo lemenemen silok langas povolo silok gak lok, laasen teren “Langas Sipsip.” Ladan kis gak lok saparav i, laasen teren at lavapaase Ibru do Betsaida. Lavalimo lengkon gu mo gak lok.

\* 4:42: 1 Jo 4:14 \* 4:43: Jo 4:40 \* 4:44: Mt 13:57 \* 4:45: Jo 2:23 \* 4:46: Jo 2:1-11 \* 4:47: Mt 8:5-6 \* 4:48: Jo 2:18; 1 Ko 1:22 \* 4:50: Mt 8:13; Mk 7:29 \* 4:53: Gu 16:14-15,31 \* 4:54: Jo 2:11,23

3 Buaang atnedi limixin digak meres la mo digak midi ap mo lavalimo lengkon gu. Levengkatli main, la nedi bok di goxo epovo rit pas, la nedi bok lengkot atdi ga molo axap. [Digat kis ngais ladan kusu na vonen kaxat.

4 Mila at leventaba levenaleng laangelo at ne Moroa ga putup ap mo ladan la gak lox avonen i. La do laradi mekmeres ga los tup avot ap mo ladan do ga onen kaxat, neni naba lox avukat basinge lanmeres teren.]

5 Lara laradi mo ga nemen, lanmeres gak lok teren at lavantun sangau mi lavanuan maares axap.

6 Iesu ga ven i gak midi go, la gaklen pam i do mo laradi gak meres at buaang laxanmaares. Kuren la ne Iesu ga sue i, “Kereva, u vara box i do una lox avukat?”

7 Laradi mekmeres ga vorang i rin, “Leeme Silok. Axo ruuna tara nade xusu naba lok li ia ro at ladan kis, do ladan i vonen kaxat. Nia ak lok tong i do anat los tup teren, ketla leventaba vetpes ta giat los tup avot ta ria.”

8 \*Melemu ne Iesu ga lok tin, “Katu kaxat, kip kaka lempanga mikmidi ram la una onon.”

9 Soso mun mo laradi ga lox avukat ta, la ga xip kaka lempanga mikmidi ren la ga vas kaxat.

Na lavanga sangsangu ga vot at laaleng kaala.

10 \*Kuren la luvuttadi amgomgo at limixin me Judaia diga lok ti mo laradi ga lox avukat, “Lingina ni laaleng kaala, la ixok mokso at Laulis Linga atdik kusu unap kip lempanga mikmidi ram at na laaleng.”

11 La ni ga lok, “Laradi no i lox avukar ia, i tong i ria do ana xip ka lempanga mikmidi rak la ana onon.”

12 La diga sue i, “Nege nom laradi?”

13 Ketla laradi no ga lox avukat goxoklen i do nege i mo laradi, mila buaang nedi limixin diga umsu ap

mo loxot la ne Iesu no ga vas ekula kaxat pam.

14 \*Melemu ba, Iesu ga vas panga ka i ro xeneng at loogu laplavang la ga lok, “Una rongga i na. Monga u lox avukat pam. Una xap ta rik lok laxakapmek. Ixo lox avukat do tavanga i lok kapmek aleng na vot parav u.”

15 Melemu mo laradi ga vas kaxat la ga tong i ri luvuttadi amgomgo at limixin me Judaia, do ne Iesu vam mo ga lox avukar i.

*Luvuttadi Amgomgo Diga Puse Ngas*

*Ti Sev Amet Ne Iesu*

16 \*Kuren la luvuttadi amgomgo diga ruka i xusu dina munepen mi ne Iesu, mila neni ga lox aroo mo laradi at laaleng kaala.

17 \*Iesu ga lok tidi, “Ne Tamak i gugu at levenaleng amisik se lingina, la nenia bok a gugu.”

18 \*Na levelinga at ne Iesu ga lox axatu levendoxoma at luvuttadi amgomgo la diga puke ngas kusu dina sev amer i. Lavasuun teren do ne Iesu ga lox aroo laradi at laaleng kaala, la neni ga tong i do ne Moroa ni ne Temen, la at na mun i neni ga tong i do neni i epovo mun mi ne Moroa.

19 \*La ne Iesu ga lok tidi, “A tong tuturun i rinimi, nenia ne Nitna xopmen anak lok tevempanga mi lolos axa rak. Nenia ak lok mun levempanga salai nenia a ven i at ne Tamak. Levempanga salai ne Tamak ik lox i, nenia ne Nitna bok ak lox i.

20 \*Tamak i balamu ia, ne Nitna la ik lox ase ia mi levempanga salai neni axa ik lox i. Neni naba lox ase ia mi levempanga i silok aleng ti mo lempanga sangsangu, la nemi minaba sangu aleng.

21 \*Tamak ik lox axatu kaxat amlong nedi limixin diga met la im taba nedi mi lorooro. Kuren mun la nenia ne Nitna am taba lorooro

\* 5:8: Mt 9:6 \* 5:10: Jo 9:14; Nem 13:19; Jer 17:21; Lu 13:14 \* 5:14: Jo 8:11 \* 5:16: Mt 12:14  
 \* 5:17: Jo 9:4 \* 5:18: Mt 26:4; Jo 7:1,30; 10:30,33 \* 5:19: Jo 5:30; 8:28 \* 5:20: Jo 3:35 \* 5:21: Ro 4:17; Ep 2:5; Jo 11:25

rinedi, nenia a vara i do ana raba di min.

<sup>22</sup> \*Tamak ga ke xepe lugugu ri ronga linga. Ketla neni ga raba vam ia, ne Nitna mi lolos kusu ti ronga linga,

<sup>23</sup> \*kusu limixin axap diba lok ngangao rak ne Nitna kerekngan mun di lok ngangao at ne Tamak. Do tara noxo lok ngangao rak ne Nitna, i lok ngan ta do ixo lok ngangao at ne Tamak, mo ga riki ia, ne Nitna ude.

<sup>24</sup> \*A tong tuturun i rinimi. Do tara na ronga ka levelinga rak, la i nunu ap mo lara ga riki ia, neni ira lok ka vam lorooro avolo. Neni xopmen noxo tu at lavapaase at laaleng ete, ketla ira roo su vam basinge lanmet la ira ruuna ka vam lorooro avolo.

<sup>25</sup> \*A tong tuturun i rinimi. Laaleng mo i auret la nangai ira vot pam la limixin diga met pam dinaba ronga linga rak, ne Nitna ne Moroa. La do nedi dina ronga res tarak, dinaba roo.

<sup>26</sup> Tamak, neni Luntoo Avolo, kuren mun la neni ga lox ia, ne Nitna xusu nenia bok Luntoo Avolo.

<sup>27</sup> \*La neni ira siam avolo vam ia, ne Nitna xusu anaba ronga linga at laaleng ete, mila nenia Laradi Mevana.

<sup>28</sup> Nemen mita sangu at nai mila laaleng naba vot la limixin diga met pam dinaba ronga laxaka rak,

<sup>29</sup> \*la dinaba ru su boro at lara maaut atdi. La nedi, diga lok loklok nunuan, dinaba xatu la dina rooro. La nedi digak lok laxakapmek, dinaba xatu la dinat pas uto at lemene-men songsongot.

<sup>30</sup> \*Nenia axo epovo do ana lok lempanga mi lodoxoma axa rak. A ronga res mun at levelinga ne Moroa i tong i ria. Kuren la mo do nia ana ronga linga, a lox i mi langas i ruturun, mila axo lok tong i do ana lok lugugu xerekngan nia a vara i,

ketla a gugu mun mi lodoxoma ap mo lara ga riki ia ude.”

### *Lempapaase Aru Mumu Ne Iesu*

<sup>31</sup> \*La ne Iesu ga lok bok tidi xeretna, “Do nenia xusuk ana paase aru axa ia, levelinga nia a vaase i, noxo mumuat.

<sup>32</sup> \*Ketla ne Moroa i paase aru ia, la aklen i do mo levelinga ni i paase mu ia min, i ruturun.

<sup>33</sup> Miga riki luvuttadi vapaase at-nimi uto at ne Jon, la ni ga tong asu levelinga ruturun mumu ia.

<sup>34</sup> \*Axok pakes ti levelinga at tentaba vetpes kusu ti lox axasev i do nia nege. Ketla a tong na levelinga at ne Jon kusu nemi mina siam ka i la ne Moroa naba lox arooro nimi.

<sup>35</sup> Jon ga tong asu levelinga at ne Moroa la kerepmo ni ga lok ngan lababao i lox asu laxasep, la at lev-entaba leven gaaling miga lok momo ren.

<sup>36</sup> \*Ketla a ruuna levelinga mumu ia la i silok aleng ti levelinga ne Jon ga tong asu i. Leven gugu nia a lox i, ni leven gugu ne Tamak ga raba ia min. Anai levempanga nia a lox i, i lox asuusu i do ne Tamak ga riki ia.

<sup>37</sup> \*La ne Tamak, mo ga riki ia, neni bok i paase aru ia. Nemi mi goxo ronga xibis tinotno laxaka ren, koplami gita ven labantuxu ren.

<sup>38</sup> \*La nemi mi goxom tebeng tu avarang at levelinga ren keneng at lorooro atnemi, mila nemi mi goxo nunu rak, do neni ga riki ia ude.

<sup>39</sup> \*Mi reven mumu amisik Lovoang Kaala mila mi doxoma i do keneng teren miba vuse ka lorooro avolo. La mo levelinga i paase mumu ia.

<sup>40</sup> Ketla nemi xa mi xopara na nunu rak kusu mina lok ka lorooro.

<sup>41</sup> Nia a goxo vot de xusu ti lok ka leemi asu.

\* 5:22: Jo 3:17; 5:27; 9:39; Gu 10:42 \* 5:23: Pl 2:10-11; 1 Jo 2:23 \* 5:24: Jo 3:15-18; 8:51; 1 Jo 3:14 \* 5:25: Mt 8:22; Ep 2:5-6 \* 5:27: Jo 1:4; 5:22 \* 5:29: Dan 12:2; Mt 16:27; Jo 6:40; Gu 24:15 \* 5:30: Jo 5:19; 6:38 \* 5:31: Jo 8:13-14 \* 5:32: Jo 5:36-37; 1 Jo 5:9 \* 5:34: Jo 1:19-34; 3:27-30 \* 5:36: Jo 3:2; 10:25,38; 14:11 \* 5:37: Mt 3:17; Jo 5:32; 8:18 \* 5:38: Jo 6:29 \* 5:39: Lu 24:27,44; Gu 13:27; 2 Ti 3:15-17; 1 Pi 1:10-11

<sup>42</sup> Ketla akleken lebelen nimi. Aklen i do lavavara ri ne Moroa xopmen na nemen keneng at lebelen nimi.

<sup>43</sup> \*Agara vot eburu vam mi lolos at ne Tamak, ketla kopmen mina siam ka ia. Do tara na paase mi lolos axa ren, nemi minaba siam ka i.

<sup>44</sup> \*Mi vavara i xusu mina lok ka leemi asu boro atnemi xa, ketla mi xopara i do mina ruuna ka leemi asu boro at ne Moroa. La neni legesa Moroa xusuk mun, kusu neni naba emi asu minimi. Kuren la i lolos aleng kusu mina nunu.

<sup>45</sup> \*Nemen mita doma i do nia anaba sok taba nimi mi levelinga ro melamgo at ne Tamak. Ne Moses axa neni naba sok taba nemi mi levelinga, mila nemi mi nunua i do ne Moses naba lok tooro nemi.

<sup>46</sup> \*Do nemi mi nunu ruturun at levelinga at ne Moses, mina nunu ruturun tarak, mila neni ga malagan mo levelinga mumu ia.

<sup>47</sup> \*Ketla mo do mixo nunu at levelinga ren, miba nunu ba xereva at levelinga rak?"

## 6

### *Iesu Ga Raba Luxa Buaang Limixin*

(Mt 14:13-21; Mk 6:30-44; Lu 9:10-17)

<sup>1</sup> Melemu at nai Iesu ga volo korop manga at lavatdan kis Galili. (Laasen bok teren Tiberias.)

<sup>2</sup> La buaang nedi limixin diga mumu asu i, mila digara ven pam levempanga sangsangu neni ga lox i ri lox avukat nedi digak meres.

<sup>3</sup> Melemu ne Iesu ga vas urut uto vana at loxongkaana la ga xis eburu mi lavaun pinivu ren.

<sup>4</sup> \*Leluxa silok at limixin me Judaia diga so asen i do Lovovolo Pe monga ga auret.

<sup>5</sup> Iesu ga milik tangtagap la ga ven i do, buaang nedi limixin mo digat pas kusu dina vot pasa i. Kuren la ni ga

sue ne Pilip, "Ataba un kaka teveluxa ua xusu ba epovo ri na limixin?"

<sup>6</sup> Ni ga tong i na xusu ti lok tong pen ne Pilip. Neni gaklen pam laai neni naba lox i.

<sup>7</sup> Pilip ga vorang i rin, "Ixo epovo xusu ata un kaka tevengkongkide mi tegepu sangsangu kobot (200) denarias kusu tidi ri anan."

<sup>8</sup> Lara lun pinivu at ne Iesu, laasen teren ne Endru, neton ne Simon Pita ga lok,

<sup>9</sup> "Lara lamdak na, i ruuna lavalimo lengkongkide xakalik at levempiao bali la luemat kakalik. Ketla noxo epovo ri na limixin solo."

<sup>10</sup> La ne Iesu ga lok ti lavaun pinivu ren, "Mina tong i ri limixin kusu dina xis kopok."

Mo lenep ga umsu mi laxampivilis. Kuren la limixin diga xis kopok. Nedi luvuttadi remes diga epovo at lavalimo larabin sangsangu kobot (5000).

<sup>11</sup> Iesu ga lok ka loxongkide, la ga tong loklox avukat, la digam taba mo limixin min digat kis. Ni ga tong avukat bok ti ne Moroa mi luemat la ga raba bok limixin min, la nedi axap diga an mais ga epovo at lavavara atnedi.

<sup>12</sup> Se diga an mais axap, Iesu ga lok ti lavaun pinivu ren, "Mina lok ka bubua lengkon atat luxa. Nemen dik ata ke xepe tengkot."

<sup>13</sup> Kuren la diga lok kaka bubua axap nom lengkon atat luxa, la diga suxa aumsu lasangaun mi legepura leventat min boro at nom lavalimo lengkongkide at lempiao bali, mo limixin diga anan i.

<sup>14</sup> \*Mo limixin go diga ven mo lavanga sangsangu ne Iesu ga lox i, la diga lok, "I ruturun aleng. Neni mo leeme vapaase ali diga tong i do naba vot at na lavatbung menemen!"

<sup>15</sup> \*Iesu gaklen pam i do limixin mo dinaba vot pasa i la dina lok kaka i, kusu dina pu soso i ngan loorong tidi.

\* 5:43: Mt 24:5 \* 5:44: Jo 12:43 \* 5:45: Lal 31:26-27 \* 5:46: Lal 18:15; Gu 3:22 \* 5:47: Lu 16:31 \* 6:4: Jo 2:13 \* 6:14: Lal 18:15; Jo 5:46 \* 6:15: Jo 18:36; Mt 14:23



Kuren la neni xusuk ga vas kaxat uto at lengkong kaana vetpes.

*Iesu Gat Pas To Mavana At Lavatdan Kis Galili*

(Mt 14:22-33; Mk 6:45-52)

<sup>16</sup> Ga ukantinao bukbuxumin, lavaun pinivu at ne Iesu diga vas si uto xopok at lavatdan kis,

<sup>17</sup> la diga los kas at lesebang la diga sen bilong at lavatdan kis uto Kaprenaum. Lavanga mo garang bungmain ta, la ne Iesu goxovisi na vot pasa di.

<sup>18</sup> Langsangan lamanman lolos gat mas la ga lok lavatdan kis ga re ekapus.

<sup>19</sup> Lavaun pinivu digatla uto vaxalom la diga ven ne Iesu gat pas to mavana at lavatdan kis uto saparap di. La diga marat aleng.

<sup>20</sup> Iesu ga lok tidi, "Nemen mita marat. Nenia mun na!"

<sup>21</sup> La diga mulus ka i uto at lesebang. La soso mun lesebang ga oso uto loxon ap mo loxot nedi diga sesen tin.

*Limixin Diga Puke Ri Ne Iesu*

<sup>22</sup> Ap mo manga lara laaleng petpes, limixin no diga nemen to ap mo lenep ne Iesu ga raba nedi mi leveluxa e, diga ven i do legesa sepang mun mo ga nemen. Digaklen i do ne Iesu goxo emu eburu mi lavaun pinivu ren ap mo lesebang, la lavaun pinivu xusuk mun diga sesen.

<sup>23</sup> \*Melemu leventaba levesepang boro Tiberias diga oso go saparap mo lenep limixin diga anan lengkongkide e, melemu at Leeme Silok ga tong avukat ti ne Moroa.

<sup>24</sup> Se limixin diga ven i do Iesu goxok lox e, la lavaun pinivu ren bok, diga los kas at levesepang la diga sen uto Kaprenaum, kusu dina reven tin.

*Iesu Neni Lakde At Lorooro*

<sup>25</sup> Se limixin diga long lenget ne Iesu to Kaprenaum, diga lok tin, "Leeme loklox ase, u vot de lingisa?"

<sup>26</sup> \*Iesu ga vorang i ridi xeretna, "A tong tuturun i rinimi. Mi reven pupuse ria mila miga anan levengkongkide la nemi axap miga an mais teren, ketla kopmen do miga xasep avukat at lavasuun at levempanga sangsangu nenia aga lox i.

<sup>27</sup> \*Nemen mita gugu ri leveluxa ua naba sonao soso. Ketla mina gugu lolos ti leveluxa i nemen amisik ti lorooro avolo. Na leveluxa, nenia, Laradi Mevana, anaba raba nemi min, mila ne Moroa ne Temen dik ira soxolik ka vam ia."

<sup>28</sup> Kuren la diga sue i, "Maba lok lavanga salai xusu manaba lox epovo lavanga ne Moroa i vara i do maba lox i?"

<sup>29</sup> \*Iesu ga vorang i ridi xeretna, "Lavanga ne Moroa i vara i xusu mina lox i, i lok keretna. Mina nunu ap mo lara ne Moroa ga riki i."

<sup>30</sup> \*La diga sue rin keretna, "Lavanga sangsangu sala uba lox i xusu maba ven i la mana nunu ba ram? Uba lok lavanga salai?"

<sup>31</sup> \*Lavalabat atnama diga anan leveluxa at ne Moroa ro at lamatbin laasen teren lamaana, kereknagan Lovoang Kaala i tong i do, 'Ni ga raba nedi mi levengkide boro vana at laxalibet.' "

<sup>32</sup> Iesu ga lok tidi, "A tong tuturun i rinimi. Ne Moses goxo raba nemi mi lakde boro vana at laxalibet, ketla ne Tamak axa im taba nemi mi lakde ruturun boro vana at laxalibet.

<sup>33</sup> Mo lakde ne Moroa im taba i, neni ngan mo lara ga si boro vana at laxalibet la im taba lorooro ri limixin at na lavatbung menemen."

<sup>34</sup> \*Diga lok, "Leeme Silok. I ruka nga i mo lingina la melemu una raba amisik nema mi nom lakde."

<sup>35</sup> \*Iesu ga lok tidi, "Nenia Lakde At Lorooro. Mo do tara na vot pasa ia,

\* 6:23: Jo 6:11 \* 6:26: Jo 6:11-12 \* 6:27: Jo 4:14; 6:48-58 \* 6:29: 1 Jo 3:23 \* 6:30: Mt 16:1; Jo 2:18 \* 6:31: Pas 16:14-15; Kex 11:7-9; Sam 78:24 \* 6:34: Jo 4:15 \* 6:35: Jo 4:14; 6:48-58 \* 6:36: Jo 20:29

neni noxo roxo bok ba. La neni do i nunu rak, neni noxo minu bok ba.

36 \*A tong i rinimi do mira ven pam ia, ketla kopmen mina nunu rak, kerekngan a tong pam i rinimi.

37 \*Nedi axap ne Tamak i raba ia midi, dinaba vot pasa ia. La do tara na vot pasa ia, nenia noxo sok tixirixes i.

38 \*Nenia agoxo si boro vana at laxalibet do ti mu asu lavavara rak, ketla ti lox epovo lavavara ap mo lara ga riki ia ude.

39 \*Lavavara ap mo lara ga riki ia, i lok keretna. Nenia noxo ke asoogong tegesara atdi limixin neni ga raba vam ia midi, la anaba lox aroo xat di at laaleng ete.

40 \*Mila lavavara at ne Tamak i lok keretna, nedi do di ven kisip ne Nitna ne Moroa la di nunu ren, dinaba lok ka lorooro avolo, la nia anaba lox aroo xat di at laaleng ete.”

41 Limixin amgomgo diga epaase xuxurung mumu ne Iesu, mila neni ga lok do, “Nenia Lakde aga si boro vana at laxalibet.”

42 \*Diga lok, “Neni mun ne Iesu, nitna ne Josep la ne Maria. Nedik taklen ne temen mi nenen. I lok kereva la neni i tong i do ni ga si boro vana at laxalibet?”

43 La ne Iesu ga vorang i ridi xeretna, “Na xap ta nimi at lava-paase xuxurung kantubu atnimi.

44 \*Kopmen tara i epovo na vot pasa ia, se do ne Tamak na sat ka i ude saporav ia. La nia anaba lox aroo xar i at laaleng ete.

45 Lavaeme vapaase ali diga malagan li levelinga xeretna,

‘Limixin axap, ne Moroa naba anasa di.’

*Ais 54:13*

Nedi axap do di rongga ne Tamak la dia lok kaka laanasa ren, nedi dinaba vot pasa ia.

46 \*Kovisi tara na ven ne Tamak. Nenia aga laa boro at ne Moroa,

nenia xusuk mun agara ven pam ne Tamak.

47 \*A tong tuturun i rinimi. Do tara na nunu rak, neni naba ruuna ka lorooro avolo.

48 \*Nenia Lakde At Lorooro.

49 Lavalabat atnimi diga anan leveluxa at ne Moroa ro at lamatbin, la diga met.

50 Ketla na Lakde ga si boro vana at laxalibet, ni i lok petpes. La do tara na anan teren, neni noxo met.

51 Nenia Lakde At Lorooro la aga si boro vana at laxalibet. Do tara na anan at na Lakde, neni naba rooro amisik. Na Lakde, ni levenuut tarak. Anaba raba i ri limixin axap kusu dina rooro.”

52 Anai levelinga ga vaxaru kaxat ka lavapaase mukmusak kantubu at luvuttadi amgomgo la diga esue xeretna, “Na laradi ba raba dik mi levenuut teren kereva xusu ti anan?”

53 Iesu ga lok tidi, “A tong tuturun i rinimi. Do mi noxo anan at levenuut tarak, Laradi Mevana, la mi noxo inin at lada rak, mi noxo ruuna ka lorooro avolo.

54 Do tara na anan at levenuut tarak la na inin at lada rak, neni ira ruuna ka vam lorooro avolo, la nia anaba lox aroo xar i at laaleng ete.

55 Levenuut tarak ni leveluxa ruturun, lada rak ni laxadan tuturun ti inin.

56 Do tara na anan at levenuut tarak la na in at lada rak, neni i nemen tarak la nia a nemen teren.

57 \*Ne Tamak neni im taba lorooro, neni ga riki ia, la keneng mun teren, la nenia bok a rooro. Kuren la, do tara na anan at levenuut tarak, neni naba ruuna ka lorooro xeneng mun tarak.

58 Anai ni Lakde ga si boro vana at laxalibet. Ixo lok ngan lakde, lavalabat atdik diga anan i, la melemu diga met. Do tara na anan at na Lakde, neni naba rooro amisik.”

59 Iesu ga tong asu mo levelinga at laaleng neni ga anasa ro at loogu singising to Kaprenaum.

\* 6:37: Jo 17:6-8; Mt 11:28 \* 6:38: Mt 26:39; Jo 4:34 \* 6:39: Jo 10:28-29; 17:12 \* 6:40: Jo 11:24 \* 6:42: Mt 13:55 \* 6:44: Jo 6:65 \* 6:46: Jo 1:18 \* 6:47: Jo 3:15-16 \* 6:48: Jo 6:31,58 \* 6:57: Jo 15:4-5; 1 Jo 3:24

*Lavaun Pinivu Diga On Basinge Ne Iesu*

<sup>60</sup> Buaang atnedi lavaun pinivu at ne Iesu diga rongga i na la diga lok, “Anai levenanasa i lolos tinotno. Nege i epovo na siam ka i?”

<sup>61</sup> Iesu gaklen pam i do lavaun pinivu ren diga paase kuxurung mumu na levelinga ren. La ni ga sue di, “Kereva, na levelinga i lok kapmek lebelen nimi?”

<sup>62</sup> \*Kereva, dola mina ven ia, Laradi Mevana, ana urut uto vana at laxalibet, minaba siam ka ba levenanasa rak?

<sup>63</sup> \*Loroonan Kaala im taba limixin mi lorooro. Limixin kusuk mun kopmen dina epovo na lok tooro di. Levelinga nenia a vaase vam nimi min, neni levelinga at Loroonan Kaala la at lorooro.

<sup>64</sup> \*Ketla leventaba atnimi move xopmen dina nunu rak mi lununu atdi.”

At lavakpaxaru kaxat at lugugu ren, Iesu gaklen pam nege nedi leventaba di goxo nunu ren, la nege mo lara naba song araba i ri limixin kakapmek.

<sup>65</sup> \*La ni ga lok bok keretna, “Ni na levelinga neni lavasuun teren la nia ara tong i rinimi do tara noxo vot pasa ia se ne Tamak na lox avolo i xusu neni na nunu rak.”

<sup>66</sup> Melemu at nai, buaang atnedi lavaun pinivu ren digamlong basinge i la kopmen bok ba di goxo emu eburu min.

<sup>67</sup> La ne Iesu ga sue lasangaun mi legepura lavaun pinivu ren keretna, “La nemi bok mi vara i do minamlong?”

<sup>68</sup> Simon Pita ga vorang i rin keretna, “Leeme Silok, kopmen bok ba tara mabat kis esogo min. Nenu xusuk mun u ruuna levelinga im taba lorooro avolo.

<sup>69</sup> \*La monga ma nunu la maklen i do nenu Laradi Melemelengan boro at ne Moroa.”

<sup>70</sup> Iesu ga lok tidi, “Nia aga soxolik ka nemi lasangaun mi legepura ngan lavaun pinivu rak. Ketla legesara atnimi ni lamdak at ne Satan.”

<sup>71</sup> Iesu ga tong asu i na mumu ne Judas, lamdak at ne Simon Iskariot. Judas neni lara atnedi lasangaun mi legepura lavaun pinivu, la ga song araba ne Iesu ri limixin kakapmek.

## 7

*Iesu Mi Luvutneton*

<sup>1</sup> \*Melemu at nai, Iesu gat pas at levenmenemen to Galili. Ni goxo vara i xusu nat pas to Judaia, mila luvuttadi amgomgo diga vara i xusu dina sev amer i.

<sup>2</sup> \*Lara leluxa at leme Judaia mo ga sixit auret ta. Laasen at na leluxa do, “Leluxa at Laraogu Xukuxut.”

<sup>3</sup> Luvutneton ne Iesu diga lok tin, “Una vas kaxat basinge na loxot, la unat pas uto Judaia ti mo leluxa, kusu lavaun pinivu ram diba ven levempanga sangsangu uba lox i.

<sup>4</sup> Do u vara i do limixin dinaklen u, nemi uta nemi ali. Nenu uk lok levempanga sangsangu, kuren la una lox asuvos u ri limixin axap.”

<sup>5</sup> \*Diga tong asu i na mila kopmen tara atdi luvutneton ne Iesu ga nunu ren.

<sup>6</sup> \*La ne Iesu ga lok tidi, “Loxonaleng ti lox asuvos ia xovisi na vot. I epovo do nemi minat pas avot be ti mo leluxa at toxonaleng mi vara i,

<sup>7</sup> \*mila limixin at lavatangka di noxo belengatngas tinimi. Ketla dinaba belengatngas tia, mila nia a tong amisix i do loklok atdi i lok kapmek.

<sup>8</sup> Minat pas ti mo leluxa. Nenia noxot pas soso rin, mila loxonaleng ti lox asuvos ia xovisi na vot.”

<sup>9</sup> Ni ga tong i na, la neni ga nemi go Galili.

*Iesu Gak Lok At Leluxa At Laraogu Xukuxut*

<sup>10</sup> Melemu at luvutneton digat pas uto at leluxa, Iesu bok gat pas. Kusuk

\* 6:62: Jo 3:13; Gu 1:9-11 \* 6:63: 2 Ko 3:6 \* 6:64: Jo 13:11 \* 6:65: Jo 6:44 \* 6:69: Mt 14:33; 16:16; Mk 1:24; Jo 1:49 \* 7:1: Jo 5:18 \* 7:2: Mas 23:34 \* 7:5: Mt 13:55; Gu 1:14 \* 7:6: Jo 2:4 \* 7:7: Jo 15:18

mun neni goxot pas asuvos, ni gat pas epep mun kusu limixin di noxoklen i do neni mo gak lok ap mo leluxa.

11 \*Luvuttadi amgomgo diga reven tin go at leluxa, la diga susue mo limixin diga vot go at leluxa, "Ua nga i no?"

12 Buaang atnedi limixin diga paase siksikma mu ne Iesu. La leventaba luvuttadi diga lok, "Neni lagale laradi."

Leventaba diga lok, "Kopmen, neni i sasar asoogong buaang limixin."

13 \*Ketla kopmen teta goxo paase mumu i at lasaxaven, mila diga marat at luvuttadi amgomgo.

14 At laaleng sev avanuet ap mo leluxa, Iesu ga beles to xeneng at loogu laplavang la ga ruka i xusu na anasa limixin.

15 \*Luvuttadi amgomgo diga sangu aleng la diga esue, "Na laradi goxot pas ti loklox ase la ga lok ka na lakleklen meva?"

16 \*Iesu ga vorang i ridi, "Lavanga salai nia a anasa min kopmen at lakleklen tarak, ketla boro ap mo laradi ga riki ia ude.

17 Do tara i vara i do na lok levempanga ne Moroa i vara i, neni nabaklen kibis ka i do nenia a anasa mi levelinga boro at ne Moroa, kopla a paase aru mene nga ia mi lolos tarak.

18 \*Laradi do i paase aru xa i, neni i ngan do i lox asilok axa i. Do tara i vara i do na lox asilok mo lara ga riki i, neni i paase ruturun la kopmen taxaxarang na nemen teren.

19 \*Moses ga raba nemi mi Laulis Linga. Ketla kopmen teta atnimi i an amet at na Laulis Linga. La tila ba mik lok tong pen i do mina sev amer ia?"

20 \*La limixin diga lok, "Lagas kapmek i nemen keneng taram! Nege nga mo ik lok do nap sev amer u?"

21 \*La ne Iesu ga vorang i ridi xeretna, "Aga lok legesa vanga sangsangu la nemi axap miga sangu.

22 \*Moses ga tong i rinimi do mina rivit kepe levengkontuxu at laxamdak atnimi. Kopmen ne Moses ketla lempareme avolo atnimi mo diga vaxaru ka i. Kuren la miba vit kepe levengkontuxu at laxamdak lixilik atnimi at laaleng kaala.

23 \*Mo do mina vit tamdak at laaleng kaala xusu mi noxo los polo Laulis Linga, tila mi musak mila nia ga lox aroo laradi at laaleng kaala?

24 \*Nemen mita ila mumu ia mi lodoxoma at na lavatkangka, ketla mina ila mumu ia mi lodoxoma avukat boro at ne Moroa."

### *Agut Neni Na Lanarong*

25 \*Ap mo loxonaleng leventaba luvuttadi go Jerusalem diga lok, "Agut neni vam na laradi, luvuttadi amgomgo di lok do dina sev amer i.

26 Mina ven ba i neni i anasa at lemeren limixin axap. La kopmen tara na paase tangarang i. Agut limixin amgomgo diklen i do neni Lanarong.

27 \*Ketla do Lanarong na vot, teta noxoklen i do neni meva. La nedik ataklen na laradi do neni ga laa meva."

28 \*La at loxonaleng ne Iesu ga anasa ro at loogu laplavang, neni ga vaase silok keretna, "I ruturun do nemi miklen ia, la miklen i do nia aga laa meva. Ketla agoxot pas ude at lavavara axa rak. Mo lara ga riki ia, neni Lurururun. La nemi mixoklen i.

29 Ketla nenia aklen i, mila nenia agat pas boro ren la neni ga riki ia ude."

\* 7:11: Jo 11:56 \* 7:13: Jo 9:22; 12:42; 19:38; 20:19 \* 7:15: Mt 13:54; Lu 2:47 \* 7:16: Jo 12:49; 14:10 \* 7:18: Jo 5:44; 8:50 \* 7:19: Gu 7:53; Ro 2:21-24 \* 7:20: Jo 8:48,52; 10:20 \* 7:21: Jo 5:16 \* 7:22: Mas 12:3; Lur 17:9-13 \* 7:23: Jo 5:8-10,16 \* 7:24: Mas 19:15; Ais 11:3-4; Jo 8:15 \* 7:25: Jo 5:18 \* 7:27: Jo 7:41; 9:29 \* 7:28: Mt 11:27; Jo 8:55 \* 7:30: Jo 7:44; 8:20; 13:1

30 \*Melemu diga lok tong i do dina ranga alis i, ketla kopmen teta goxo long tu ren, mila loxonaleng teren goxovisi na epovo.

31 \*Ketla buaang atnedi limixin diga nunu ren diga lok keretna, "Na laradi i lok lempanga sangsangu i silok aleng, kuren la ixo epovo do tara vetpes na vot ngan Lanarong la na lok lempanga i silok tin."

#### *Luvuttadi Amgomgo Diga Riki Lentaba Uto Saparap Ne Iesu*

32 Lubung Parisi diga ronga limixin diga paase siksikma mu ne Iesu la levelinga ni ga tong i. Kuren la nedi eburu mi lavamaasa silok diga riki leventaba luvuttadi rutu mu at loogu laplavang uto at ne Iesu xusu dina ranga alis ka i.

33 \*Iesu ga lok, "A noxo nemen abao eburu minimi la melemu ba anabat pas ba uto saparap mo lara ga riki ia.

34 \*Minaba reven tia, ketla mi noxo vuse ka ia, mila mo lemenemen nia anaba nemen teren, nemi mixo epovo do minat pas uve."

35 Luvuttadi amgomgo diga epaase xantubu atdi xeretna, "I lok do ni mo nat pas ua xusu nedik noxo vuse ka i. Agut neni nabat pas uto at tara temenemen silok at limixin boro Grik. No limixin me Judaia dik lox e la neni naba anasa limixin boro Grik.

36 Neni i lok do, 'Minaba reven tia, ketla mi noxo vuse ka ia.' La i lok bok do, 'Nemi mixo epovo do minat pas ti mo lemenemen nenia anaba nemen e.' Ua lavasuun at na levelinga?"

#### *Ladan Im Taba Lorooro*

37 \*At laaleng kavaxap ap mo leluxa ni laaleng silok. Ap mo laaleng, ne Iesu ga ru upana la ga xup silok keretna, "Do tara go i minu, neni na vot pasa ia la na inin.

38 \*I ngan Lovoang Kaala i lok, 'Do tara na nunu rak, laxadan im taba

lorooro naba sesen su boro xeneng at lorooro ren.' "

39 \*Iesu ga vaase i na mumu Loroonan Kaala. Nedi diga nunu at ne Iesu, dinaba ruuna ka i melemu. Ap mo levenaleng ne Moroa goxovisi na raba Loroonan Kaala, mila ne Iesu goxovisi naurut uto vana ri lixitkis orong teren.

#### *Limixin Diga Paase Mumu Ne Iesu La Diga Epeseves*

40 \*Buaang atnedi limixin diga ronga ne Iesu ga tong na levelinga la diga lok, "I ruturun aleng do na laradi, neni mo leeme vapaase ali, ne Moses ga paase ali min."

41 \*La leventaba diga lok keretna, "Neni Lanarong."

Ketla leventaba vetpes diga lok, "Lanarong neni xopmen me Galili.

42 \*Lovoang Kaala i tong i do Lanarong naba vot boro at libibinat at ne Devit, la neni laanat me Betilem, lemenemen ne Devit gak lox e."

43 \*Kuren la limixin diga epeseves mumu ne Iesu.

44 \*Leventaba diga lok do dina ranga alis i, ketla kopmen teta goxo rebeng tu ren.

#### *Luvuttadi Amgomgo Di Goxo Nunu At Ne Iesu*

45 \*Luvuttadi rutu mu at loogu laplavang digamlong uto saparap lavamaasa silok mi lubung Parisi, la lavamaasa silok mi lubung Parisi diga lok, "Tila mixo lok ka i ude?"

46 \*La luvuttadi rutu mu at loogu laplavang diga lok, "Kopmen tara i paase asu levelinga mumuat kerekngan mo laradi."

47 La lubung Parisi diga lok, "Kereva, i bala vukpuk bok nemi?"

48 \*Kereva, tara at luvuttadi amgomgo koplata tara at lubung Parisi go i nunu ren?

\* 7:31: Jo 2:23; 8:30; 10:42; 11:45; 12:11,42 \* 7:33: Jo 13:33 \* 7:34: Jo 8:21; 13:36; 17:24 \* 7:37: Mas 23:36; Ais 55:1; Jo 4:10,14 \* 7:38: Ais 58:11; Sak 14:8 \* 7:39: Jo 16:7; 20:22; Gu 2:4 \* 7:40: Jo 6:14 \* 7:41: Jo 1:46; 4:29 \* 7:42: Sam 89:3-4; Mai 5:2; Mt 2:5-6 \* 7:43: Jo 9:16 \* 7:44: Jo 7:30 \* 7:45: Jo 7:32 \* 7:46: Mk 1:22 \* 7:48: Jo 12:42

<sup>49</sup> Kopmen tinotno! Mo limixin di ronga i, kopmen dinaklen tempanga xeneng at Laulis Linga at ne Moses, kuren la lasaxaek i mumu di.”

<sup>50</sup> \*Nikodimas neni lara atdi, no migo neni ga vot pasa ne Iesu at lara laxanimin. Neni ga lok tidi,

<sup>51</sup> \*“At Laulis Linga atdik ata xo lok li lumumuat mavana at tara, se do dia ronga linga vam teren kusu ti vuse ka laai neni ga lox i.”

<sup>52</sup> \*Diga vorang levelinga ren mi levelinga mukmusak, diga lok keretna, “Agut nenu bok laradi gamasa boro Galili? Una ven avukat Lovoang Kaala la uba xasep do kopmen teeme vapaase ali naba vot boro Galili.”

<sup>53</sup> [Melemu nedi axap diga epe-seves la digat pas ukolonu.

## 8

### *Diga Long Lenget Ka Latkin Ga Longka*

<sup>1</sup> \*La nedi getgesara digat pas uto xolonu atdi, ketla ne Iesu gat pas uto at Lakaana Olip.

<sup>2</sup> Ga maxantamak suubu ap mo lara laaleng petpes, neni gat pas uto at loogu laplavang. La nedi limixin axap diga tu bubua kangkan i, la ni ga xis kopok la ga anasa di.

<sup>3</sup> La luvuttadi loklox ase at Laulis Linga eburu mi lubang Parisi diga lam abeles lara latkin, diga long lenget ka i ga longka. La diga vaxaru li i ro melambo atdi axap.

<sup>4</sup> Diga lok ti ne Iesu, “Laradi loklox ase. Na latkin neni i epot la ma long lenget ka i, i longka lara latlok kopmen ateren.

<sup>5</sup> \*At Laulis Linga, ne Moses ga raba lara lavapaase lolos do tara tatkin na lok na loklok, taba lu amer i mi laxanuut. Ua levelinga ram ti na loklok?”

<sup>6</sup> \*Diga tong i na xusu ti lok tong ne Iesu mila diga vara i xusu dina bala raba i.

Ketla ne Iesu ga rikbu si la ga malagan to xopok at laxangka mi lisivisip teren.

<sup>7</sup> \*Diga tu go la diga susue ne Iesu mi levesusue, la neni ga ru urut akmokso upana la ga lok tidi, “Do tara atnimi goxovisi na lok taxapmek, neni na lok ka tuuat la na lu avot na latkin.”

<sup>8</sup> La neni ga rikbu manga la ga malagan manga ro xopok at laxangka.

<sup>9</sup> \*Se diga ronga i na, digat pas kaxat sisi basinge mo loxot, luvuttadi mukun avot. La melemu ne Iesu xusuk mun ga nemen eburu mi latkin move ga tu go.

<sup>10</sup> Iesu ga ru urut la ga lok tin, “Latkin. Ua nga di no? Kereva, tara gove i nemen kusu na vaxaru u at lavapaase?”

<sup>11</sup> \*La mo latkin ga lok tin, “Kopmen teta, Leeme Silok.”

Iesu ga lok tin, “Nenia bok kopmen ana vaxaru u at lavapaase. Una onon, ketla nemen uta lok bok ba taxakapmek.”]

### *Iesu Ni Laxasep Ti Lavatbung Menemen*

<sup>12</sup> \*La ne Iesu ga vaase manga ri limixin keretna, “Nia Laxasep ti limixin at na lavatbung menemen. Do tara na nunu rak, neni naba ruuna ka laxasep at lorooro, la kopmen noxot pas at lamain.”

<sup>13</sup> La lubang Parisi diga lok tin, “Nenu u lox amuat axa u, kuren la levelinga ram kopmen nak mokso.”

<sup>14</sup> \*Iesu ga vorang i ridi xeretna, “Keke i do nia a paase aru axa ia, ketla levelinga rak i ruturun, mila nenia aklen lemenemen nenia aga vas kaxat meve la anabat pas bok uve. Kopmen minaklen lemenemen

\* **7:50:** Jo 3:1-2 \* **7:51:** Lal 1:16 \* **7:52:** Jo 7:41-42 \* **8:1:** Lu 21:37 \* **8:5:** Mas 20:10; Lal 22:22-24 \* **8:6:** Mt 22:15 \* **8:7:** Lal 17:7 \* **8:9:** Mt 22:22 \* **8:11:** Jo 5:14 \* **8:12:** Ais 49:6; Jo 1:4-9; 9:5; 12:46 \* **8:14:** Jo 5:31-32; 7:28; 9:29 \* **8:15:** Jo 7:24; 12:47

nenia aga vas kaxat teren la ti lenep nenia anabat pas tin.

15 \*Nemi mi ila mumu limixin mi lodoxoma at na lavatkangka, ketla nia a noxo ila mumu loklok at tara.

16 \*Ket do nia ana ila mumu loklok at tara, levelinga rak naba ruturun. Mila kopmen nenia xusuk a tong mo levelinga, ketla ne Tamak ga riki ia, neni ik lox amumuat levelinga rak.

17 \*Levelinga ro xeneng at Laulis Linga atnimi i lok keretna. Do legepu radi duna siam at tevelinga, du lox amuat mo levelinga do i ruturun.

18 \*Nenia a lox amuat axa ia, la ne Tamak bok ga riki ia, i lox amuat box ia."

19 \*Diga sue i, "Ne Tamam ua?"

La ne Iesu ga lok, "Mixoklen ia la ne Tamak. Mo do minaklen ia, minabaklen bok ne Tamak."

20 \*Iesu ga tong na levelinga at loxonaleng neni ga anasa limixin to xeneng at loogu laplavang, to at loxot, levempanga lili pilas ga nemen e. Ketla kopmen tara goxo ranga alis i, mila loxonaleng tin goxovisi na epovo.

### *Mi Noxot Pas Ti Mo Lenep Nenia Anabat Pas Uve*

21 \*Iesu ga lok manga ridi xeretna, "Anaba onon basinge nimi, la miba reven tia. Ketla minaba seeve nop laxakapmek atnimi, la mixo epovo do minat pas ti mo lemenemen nenia anabat pas uve."

22 \*Luvuttadi amgomgo diga lok tidi xa xeretna, "Neni i lok do, 'Nedik dixo epovo rit pas ti mo lenep neni nabat pas uve.' Ua lavasuun at na levelinga? Agut i lok do neni naba sev amet axa i."

23 \*Iesu ga vorang i ridi xeretna, "Nemi limixin mede xopok, nenia boro vana. Nemi limixin at na lavatkangka, ketla nenia xopmen mede xopox ia.

24 Kuren la a tong i rinimi do nemi minaba seeve mumu laxakapmek atnimi. Do mixo nunu do nenia mo lara a tong pam i rinimi, minaba seeve mumu laxakapmek atnimi."

25 La diga sue i, "Nenu nege?"

Iesu ga vorang i ridi xeretna, "Nia ara tong pam i rinimi.

26 \*At laaleng ete nenia anaba ru-una laxampapaase solo mumu laxakapmek atnimi. Mo lara ga riki ia ude, neni Luruturun, la mo levelinga ni ga raba ia min, nia a tong asu i ri limixin axap at na lavatbung menemen."

27 Di goxo xasep do ne Iesu ga paase ridi mumu ne Temen.

28 \*Kuren la ne Iesu ga lok tidi, "Se do mina xip aurur ia, Laradi Mevana, ro vana at laxaba, minabaklen ba i do nenia nege la minabaklen ba i do nenia axo lok levempanga mi lavavara axa rak. Ketla a vaase mun mo levelinga ne Tamak ga lox ase ia min.

29 \*La mo laradi ga riki ia ude, mo ik lok eburu minia, ixo ke xepe xusux ia, mila nenia ak lox amisik levempanga i lox amomo i."

30 \*Buaang atnedi limixin diga ronga ne Iesu ga tong asu na levelinga, diga nunu ren.

### *Nege Laxamdak At Ne Abaram?*

31 Kuren la ne Iesu ga lok ti leme Judaia mo diga nunu vam teren, "Dola minam tebeng levenanasa rak, ba ruturun do nemi lavaun pinivu rak.

32 La kerepmo mibaklen levelinga ruturun at lorooro, la mo levelinga naba lox asepmus nemi."

33 \*La diga lok, "Nema livipisik li at ne Abaram, la kovisi toxonaleng ma nemen ngan lavaanat saxaruki at teta. Ua lavasuun at nom levelinga ram u tong i do, maba sepmus?"

34 \*Iesu ga lok tidi, "A tong tuturun i rinimi. Do tara i lok laxapmek,

\* 8:16: Jo 5:30; 8:29 \* 8:17: Lal 17:6; 19:15 \* 8:18: 1 Jo 5:9 \* 8:19: Jo 14:7 \* 8:20: Jo 7:30  
 \* 8:21: Jo 7:34,36; 13:33 \* 8:22: Jo 7:35 \* 8:23: Jo 3:31 \* 8:26: Jo 7:28; 12:49 \* 8:28: Jo 3:14; 5:19 \* 8:29: Jo 8:16; 16:32 \* 8:30: Jo 7:31 \* 8:33: Mt 3:9 \* 8:34: Ro 6:16,20; 2 Pi 2:19

neni ik lok maxopak at lolos at laxakapmek, la i lok ngan lasaxaruki at laxakapmek.

<sup>35</sup> Lasaxaruki neni noxo epovo xusu neni lara xeneng ap mo lixitkis koetemen, ketla neni i gugu mene ridi. Ketla lamdak ap mo loxoetemen, neni i nemen amisik keneng at lixitkis koetemen.

<sup>36</sup> Do nenia, ne Nitna na lox asepmus nemi, nemi minaba sepmsu tuturun.

<sup>37</sup> \*Aklen i do nemi livipisik li at ne Abaram. Ketla nemi move mi doma i do mina sev amer ia, mila mi noxo siam ka levelinga rak.

<sup>38</sup> A paase mumu levempanga ne Tamak ga lox ase ia min, ketla nemi mik lok levempanga ne temen nemi ik lox ase nemi min.”

<sup>39</sup> \*Diga lok tin keretna, “Temen nema ne Abaram.”

Iesu ga vorang i ridi xeretna, “Do nemi laxamdak tuturun at ne Abaram, minaba lok leven gugu nunuan kerekngan ne Abaram ga lox i.

<sup>40</sup> Nenia a tong asu mun levelinga ruturun aga ronga i boro at ne Moroa la mi vara aleng i do mina sev amer ia. Ne Abaram goxo lok tevempanga xerepmo.

<sup>41</sup> \*Nemi mik lok levempanga ngan ne temen nemi ik lox i.”

Diga lok, “Ne Moroa xusuk mun neni ne temen nama. La nema laxamdak tuturun teren.”

### *Luvutnitna Ne Satan*

<sup>42</sup> \*Iesu ga lok tidi xeretna, “Dola ne Moroa ne Temen nemi, lebelen nemi naba tu mun tia mila nenia aga laa boro at ne Moroa la monga nenia ak lok de. A goxo vas kaxat mi lodoxoma axa rak, ketla ne Moroa ga riki ia.

<sup>43</sup> \*Tila mixo xasep at levelinga rak? Lavasuun teren keretna, nemi mixo epovo do mina siam ka levelinga rak.

<sup>44</sup> Nemi laxamdak at ne temen nemi, ne Satan. La mi vavara aleng i do mina mumu asu lavavara at ne temen nemi. Ga ruka i at lurutu kaxat neni laradi sepsev amet tadi. La neni xopmen na tu at luruturun, mila kopmen turuturun keneng teren. Do neni i vaase laxaxarang, neni ik lok mene levempanga i epovo rin, mila neni laradi xaxarang, la neni lavasuun at laxaxarang.

<sup>45</sup> A paase ruturun, kuren la mixo nunu at levelinga rak.

<sup>46</sup> \*Kopmen tara atnemi i epovo na lox asuusu i do nenia aga bixurun mi laxakapmek. Dola a paase ruturun, tila ba mi xopara na nunu at levelinga rak?

<sup>47</sup> \*Laradi i laa boro at ne Moroa, neni nang tonga levelinga at ne Moroa. Nemi xopmen boro at ne Moroa, kuren la kopmen minang tonga levelinga ren.”

### *Iesu La Ne Abaram*

<sup>48</sup> \*Luvuttadi amgomgo diga lok ti ne Iesu xeretna, “Nenu laradi boro Samaria la lagas i nemen taram.”

<sup>49</sup> Iesu ga vorang i ridi xeretna, “Lagas kopmen na nemen taram. Nia a raba asinorong ne Tamak, ketla nemi mixo raba asinorong ia.

<sup>50</sup> \*Axo vara i do ana lox asilox ia xusu limixin dina raba asinorong ia. Ketla ne Moroa i vara i do limixin na raba asinorong ia la neni leme rongtonga linga.

<sup>51</sup> \*A tong tuturun i rinimi. Do tara na ronga res at levelinga rak, neni noxo seeve.”

<sup>52</sup> Luvuttadi amgomgo diga lok tin, “Anaa maklen ba i do lagas i nemen taram. Abaram ga met, la lavaeme vapaase ali bok diga met, la u lok keretna, do tara na ronga res at levelinga ram, kopmen noxo met.

<sup>53</sup> \*Temen nema ne Abaram ga met, la nenu u tong i do u silok ti ne Abaram, la lavaeme vapaase ali bok

\* 8:37: Jo 5:18 \* 8:39: Mt 3:9 \* 8:41: Lal 32:6; Ais 63:16; 64:8 \* 8:42: 1 Jo 5:1; Jo 16:28  
 \* 8:43: Ro 8:7; 1 Jo 3:8 \* 8:46: 2 Ko 5:21; 1 Pi 2:22; 1 Jo 3:5 \* 8:47: Jo 18:37; 1 Jo 4:6 \* 8:48:  
 Mk 3:21-22; Jo 7:20 \* 8:50: Jo 5:41 \* 8:51: Jo 5:24; 6:40,47 \* 8:53: Jo 4:12



diga met. U doxoma ba i do nenu nege?”

<sup>54</sup> Iesu ga vorang i ridi xeretna, “Dola nenia ana lox asilox ia, levelinga rak naba lok ngan lavanga gamasa. Ketla ne Tamak ik lox asilox ia. Nemi mi tong i do neni ne Moroa atnemi.

<sup>55</sup> \*Nemi xa xopmen minat kis ekilen mi ne Moroa, ketla nenia at kis ekilen min. Dola nia gita tong i do nia xopmen anat kis ekilen min, nenia a lok ngan laradi xaxarang, kerekngan nemi. Ketla nenia at kis ekilen min, la ang tonga res at levelinga ren.

<sup>56</sup> Temen nemi ne Abaram ga lok momo aleng do neni naba ven lovtopot tarak, neni ga ven i la ga lok momo.”

<sup>57</sup> Luvuttadi amgomgo diga lok tin, “Nenu xovisi lavalimo sangaun maares taram. La tila u tong i do uga ven pam ne Abaram?”

<sup>58</sup> \*Iesu ga vorang i ridi xeretna, “A tong tuturun i rinimi. Gano ne Abaram, goxovisi na visix i, nenia mo aga nemen pam.”

<sup>59</sup> \*Diga ranga ka laxanuat do ri lu ne Iesu. Ketla neni ga vas ekula kaxat la ga on basinge loogu laplavang.

## 9

### *Iesu Ga Lox Axasep Luxatli Main At Laradi*

<sup>1</sup> At lara laaleng Iesu gat pas at langa, la ni ga ven lara laradi luxatli ren ga main, nenen ga visik axa i min kuren.

<sup>2</sup> \*La lavaun pinivu at ne Iesu diga sue i, “Rabai, laxakapmek atnege ga lox i la luxatli ren ga main? Ateren koplata at nenen mi ne temen?”

<sup>3</sup> \*Iesu ga vorang i ridi xeretna, “Luxatli ren ga main kopmen toxot at laxapmek teren koplata at nenen mi ne temen. Luxatli ren i main kusu ti lox asuusu lolos at ne Moroa at lorooro ren.

<sup>4</sup> \*Levenaleng na ik lok kusu atak lok lugugu ap mo lara ga riki ia ude. Ketla laaleng naba vot la ata noxo epovo xusu ata gugu. I lok ngan laxangking move i soosoo la ata lok leven gugu, ketla dola lamain na vot, ata noxo gugu bok ba.

<sup>5</sup> \*Nenia move a nemen nade at lavatbung menemen la nenia laxasep ti limixin at na lavatbung menemen axap.”

<sup>6</sup> \*Melemu at na levelinga ren, neni ga xalaubis uto at laxangka, la ga gis nom loxongkangka. Ni ga lox amulum i la ni ga lok li i ro at luxatli at nom laradi.

<sup>7</sup> \*La neni ga lok tin, “Unat pas la una gos lamaram to at lavatdan kis Siloam.” Lavasuun at na laasen do, “Gariki.” La mo laradi ga vas kaxat, la ga gos lemeren la gamlong uto xolonu, luxatli ren monga ga repalas pam, ga reven ta.

<sup>8</sup> Nedi digak lox aurer i, la nedi bok limixin diga reven i ga ngising panga, avot be ri na lavanga sangsangu, la diga esue xeretna, “Kereva, neni vam na laradi no gat kis la ga ngising panga?”

<sup>9</sup> Leventaba diga lok, “Neni vam.” Ketla leventaba vetpes diga lok, “Kopmen, ketla neni i ven ngan i.”

Ketla mo laradi xa ga lok, “Nenia vam mo laradi.”

<sup>10</sup> La diga sue lolos i, “Luxatli ram i lox avukat kereva?”

<sup>11</sup> La ni ga vorang i ridi xeretna, “Lara laradi, laasen teren ne Iesu i xalaubis amumulum loxongkangka, la ia gis i de at luxatli rak, la ia lok tia do anat pas uto Siloam la ana gos lamarak. La nia a vas kaxat la ise do nia a gos lamarak, ara ven bok ba.”

<sup>12</sup> La diga sue i, “Ua nga mo laradi?”

La ni ga lok, “Axoklen i.”

### *Lubung Parisi Diga Ven Mumu Na Laradi*

\* **8:55:** Jo 7:28-29 \* **8:58:** Jo 1:1 \* **8:59:** Jo 10:31 \* **9:2:** Pas 20:5; Isi 18:20; Lu 13:2,4 \* **9:3:** Jo 11:4 \* **9:4:** Jo 5:17,20; 11:9; 12:35 \* **9:5:** Mt 5:14; Jo 8:12 \* **9:6:** Mk 8:23 \* **9:7:** 2 Lav 5:10 \* **9:14:** Lu 13:14

13 Melemu mo limixin diga lok ka na laradi, luxatli ren ga main uto at lubung Parisi.

14 \*Mo laaleng ne Iesu ga xalaubis loxongkangka la ga lox avukat luxatli ren, ni laaleng kaala.

15 Kuren la lubung Parisi diga sue mo laradi do luxatli ren ga lox avukat kereva. La ni ga lok tidi, "Mo laradi i lok li loxongkangka mumulum at luxatli rak, la a gos lamarak la monga a epovo xusu ana reven."

16 \*Leventaba lubung Parisi diga lok, "Laradi i lox i na, kopmen boro at ne Moroa mila i los polo Laulis Linga."

Ketla leventaba vetpes diga lok, "Neni xopmen laradi xapmek mila laradi kapmek ixo epovo xusu na lok tevempanga sangsangu ngan i na." La lekarakat ga ravasu xantubu atdi.

17 \*La lubung Parisi diga sue amu manga mo laradi, "U lok do neni i lox avukat luxatli ram. Kereva lodoxoma ram tin?"

La neni ga vorang i ridi xeretna, "Neni leeme vapaase ali."

18 La luvuttadi amgomgo di goxo nunu do luxatli ren ga main la monga neni ga epovo do na reven. Kuren la diga riki lara laradi xusu na lam ka ne temen mi nenen.

19 La diga sue du, "Lamdak atnumu na? La kereva, at laaleng nenen ga visix i, luxatli ren ga main? I lok kereva la neni i reven manga?"

20 Temen mi ne nenen duga vorang i ridi xeretna, "Maklen i do neni lamdak atnama, la maklen box i do maga visix i, luxatli ren ga main.

21 Ketla monga maxoklen i do i lok kereva la i epovo xusu na reven. La maxoklen box i do nege ga lox avukat luxatli ren. Mina sue i, neni laradi silok ta la neni xa ba vorang levesusue atnimi."

22 \*Temen mi nenen duga tong i na mila duga marat at luvuttadi amgomgo. Luvuttadi amgomgo diga

tong li vam levelinga do tara na tong i do ne Iesu neni Lanarong, diba sep pepe i xusu neni noxo vubeles bok ba uto at loogu singising.

23 Na lavasuun teren la ne temen mi nenen mo laradi duga lok, "Neni laradi silok ta. Mina sue i."

24 \*Diga ro ka amu manga mo laradi, luxatli ren ga main la diga lok tin, "Una xaape de melango at ne Moroa do nenu una vaase ruturun. Maklen i do na laradi ga lox avukaru, ni laradi xapmek."

25 Mo laradi ga vorang i ridi xeretna, "Axoklen i do neni laradi xapmek koplakopmen. Ketla legesa vanga mene aklen i xeretna, luxatli rak ga main, ketla monga a reven avukat."

26 Diga sue i, "I lok lavanga salairu? La i lok arepalas luxatli ram kereva?"

27 La mo laradi ga lok tidi, "Ara tong pam i rinimi, la nemi mixo ronga i. Tila mik lok do mina ronga amu manga i? Agut nemi bok, mi vara i do, mina lok ngan lavaun pinivu ren."

28 Diga vaase kapmek tin la diga lok tin keretna, "Nenu lun pinivu ren, nema lavaun pinivu at ne Moses.

29 \*Maklen i do ne Moroa ga paase ri ne Moses. Ketla ti nom laradi maxoklen tinotno i do neni ga laa meva."

30 Mo laradi ga vorang i ridi xeretna, "Lavanga vetpes na. Mo laradi i lox avukat luxatli rak la mixoklen i do neni i laa meva.

31 \*Ataklen i do ne Moroa kopmen nang tonga nedi limixin kakapmek. Ketla ing tonga mun nedi luvuttadi di lotu saparav i la nedi luvuttadi di mu asu lavavara ren.

32 Ga ruka i at lurutu kaxat at na lavatbung menemen, goxovisi tara ga lox arepalas tuxatli at taradi, nenen ga visik axa i, la luxatli ren ga main.

\* 9:16: Jo 3:2; 7:43; 9:31-33 \* 9:17: Jo 4:19 \* 9:22: Jo 7:13 \* 9:24: Jos 7:19 \* 9:29: Jo 8:14  
\* 9:31: Sam 34:15; 66:18; Ais 1:15; Ler 15:29 \* 9:33: Jo 9:16

<sup>33</sup> \*Do mo laradi, xopmen ne Mo-roa nak lok eburu min, neni gita xo epovo na lox arepalas luxatli rakngan tai na.”

<sup>34</sup> \*La diga lok tin keretna, “Nenu u umsu mi laxakapmek ga ruka i at nenam ga visix u, la kereva ba uk lok tong i do una lox ase nama?” Kuren la diga sep pepe i xusu neni noxo vubeles bok ba uto at loogu singising.

#### *Luxatli At Lebelen Laradi I Main*

<sup>35</sup> Iesu ga ronga i do diga sep pepe mo laradi. La ni ga vot pasa i la ga sue i, “Kereva, u nunu at Laradi Mevana?”

<sup>36</sup> Mo laradi ga lok, “Leeme silok, una tong i ria do neni nege, kusu anaba nunu ren.”

<sup>37</sup> \*Iesu ga lok tin, “Ura ven pam i, la neni monga i epaase eburu minu.”

<sup>38</sup> Mo laradi ga lok, “Leeme Silok, a nunu ram.” La ni ga xis tiktikbu mi luvatgulom teren to melamgo at ne Iesu la ga lotu saparav i.

<sup>39</sup> \*Iesu ga lok tin, “Aga vot nade at lavatbung menemen kusu ti ila mu loklok at limixin, la nedi lengkatli main dinaba reven avukat, la nedi di reven, levengkatli atdi naba main.”

<sup>40</sup> \*Leventaba lubang Parisi digak lok go eburu min, diga ronga na levelinga, la diga sue i, “U doxoma i do nema bok lengkatli atnama i main?”

<sup>41</sup> \*Iesu ga vorang i ridi xeretna, “Dola lengkatli atnimi i main, i lox asusu i do kopmen taxakapmek nak lok atnimi. Ketla mi tong i do, ‘Ma epovo ri reven.’ La lavasuun at nom levelinga do nemi move mi bixurun mi laxakapmek.”

## 10

### *Lavapaase Poovo Ri Loroboro At Laxasipsip*

<sup>1</sup> La ne Iesu ga lok bok tidi, “A tong tuturun i rinimi. Laradi do ixok beles at lumusmarakom at loroboro at

laxasipsip, ketla i xot lixa at lengkot petpes, neni laradi xipkip pilo la laradi saksak paxat panga.

<sup>2</sup> Laradi do ik lixa akmokso ro at lumusmarakom, neni laradi loklok tatao at laxasipsip.

<sup>3</sup> Laradi loklok tatao at lumusmarakom i susuang lumusmarakom tin. La laxasipsip diang tonga xisip laxaka ren do neni i toro ri levesipsip axa ren mi levenasen atdi, la i ram lam asu di ukamang.

<sup>4</sup> \*Do ira lam asu axap di ukamang, neni im gomgonga di, la laxasipsip dia mumu asu i, mila laxasipsip ding tonga xisip laxaka ren.

<sup>5</sup> Di noxo mu asu gamasa tara vetpes. Kopmen, dinaba epeseves basinge i, mila dixo ronga xisip laxaka ren.”

<sup>6</sup> \*Iesu ga tong na lavapaase poovo ridi, ketla di goxo xasep at na levelinga ren.

### *Iesu Neni Laradi Nunuan Ti Loklok Tatao Sipsip*

<sup>7</sup> Kuren la ne Iesu ga lok manga, “A tong tuturun i rinimi. Nenia lumusmarakom ti laxasipsip.

<sup>8</sup> \*Nedi luvuttadi vetpes digamgo ria, nedi luvuttadi saksak paxat panga la luvuttadi xipkip pilo, ketla laxasipsip digoxo ronga res atdi.

<sup>9</sup> \*Nenia lumusmarakom. Do tara na beles keneng at na lumusmarakom, neni naba ruuna ka lorooro avolo. Neni nabat pas beles la nat pas su la na puse xaka lempivilis nunuan.

<sup>10</sup> Laradi xipkip pilo ik beles mene rip kip pilo, tip sev amet, la rik lok kapmek laxasipsip. Nenia agara vot pam kusu ti raba lorooro nunuan ti limixin, la mo lorooro naba umsu atdi.

<sup>11</sup> \*Nenia laradi nunuan ti lok tatao laxasipsip la a gagas bok kusu ana met nop laxasipsip.

\* **9:34:** Sam 51:5; Jo 9:2    \* **9:37:** Jo 4:26    \* **9:39:** Jo 3:17; 8:15-16; Mt 13:11-15    \* **9:40:** Mt 15:14; 23:26    \* **9:41:** Jo 15:22    \* **10:4:** Jo 10:27    \* **10:6:** Jo 16:25    \* **10:8:** Jer 23:1-2; Isi 34:2-3    \* **10:9:** Sam 118:20; Jo 14:6    \* **10:11:** Sam 23:1; Li 7:17    \* **10:12:** Gu 20:29

12 \*Laradi do di un kaka mene i xusu ti lok tatao laxasipsip, la laxasipsip kopmen ateren. Neni ik sixiro do neni i ven tangarang ka lavatman sio it pas kusu ti sev amet laxasipsip. Do kuren, laman naba lox epeseves laxasipsip la naba atat alis ka tentaba atdi.

13 Mo laradi naba sixiro mila neni laradi diga un kaka mene i la neni ixo doxoma solo laxasipsip.

14 \*Nenia laradi nunuan ti lok tatao laxasipsip, la nenia akleklen mo laxasipsip do atarak, la nedi dikleklen ia,

15 \*kerekgan mun ne Tamak ikleklen ia, la nenia akleklen ne Tamak. La a gagas kusu ti met nop di.

16 \*Leventaba laxasipsip bok mo rak la dixok lok keneng at na loroboro. Anaba lok ka bok di ukeneng. La nedi bok dinabaronga laxaka rak la dinaba ngan legesi binam sipsip mene eburu minedi leventaba laxasipsip no dira nemen pam keneng at loroboro la legesa radi loklok tatao sipsip naba gomgonga di.

17 \*Tamak i balamu ia mila a momo xusu ti raba lorooro rak, la anaba lok ka amlong box i.

18 \*Kopmen teta naba lok pes lorooro rak basinge ia. Nenia anaba raba gamasa mun i at lavavara axa rak. La a epovo xusu ti raba lorooro rak la a epovo bok kusu ti roo xat amlong. Ne Tamak ga raba ia mi lolos ti lox i xuren.”

19 \*Na levelinga at ne Iesu ga lox epeseves manga nedi leme Judaia ri legepu binam tadi mi levendoxoma vetpes.

20 \*Buaang atnedi diga lok, “Lagas i nemen teren. Neni ing tangku. Tila ming tonga i?”

21 Ketla leventaba diga lok, “Laradi do lagas i nemen teren, kopmen

na epovo ri paase xerepmo. Lagas kopmen na epovo naba lox arepalas lengkatli main.”

### *Luvuttadi Amgomgo Di Goxo Nunu At Ne Iesu*

22 Laaleng ga vot nga xusu ti limixin me Judaia ri lok leluxa ro Jerusalem ti lok katling laaleng diga lox anarong loogu laplavang to Jerusalem. Ga ravasu ap mo leven gaaling at lamdut.

23 La ne Iesu gat pas to xeneng at loogu laplavang at lara loxot, laasen teren do “Lavatkon gu at ne Solomon.”

24 \*La luvuttadi amgomgo at limixin me Judaia diga vot pasa i la diga lok, “Lavanisa aleng ta unak lok nama la mana i doxoma? Tong axasep avukat nema do kereva nenu Lanarong?”

25 \*Iesu ga vorang i ridi xeretna, “Aga tong pam i rinimi, ketla kopmen mina nunu rak. Levempanga sangsangu ak lox i mi lolos at ne Tamak di lox asuusu ia.

26 \*Ketla kopmen mina nunu rak mila nemi xopmen laxasipsip tarak.

27 \*Laxasipsip tarak ding tonga laxaka rak. Akleklen di, la di mumu asu levelinga rak.

28 \*Am taba nedi mi lorooro avolo la di noxo seeve rinotno. La kopmen tara i epovo na lok kepe di basinge ia.

29 Ne Tamak ga raba ia mi nom laxasipsip la neni i silok ti levempanga vipis axap, la kopmen tara i epovo na lok kepe nedi laxasipsip basinge loklok tatao ren.

30 Nema mi ne Tamak ma lok ngan legesara.”

31 \*La diga ranga ka manga laxanuut kusu dina lu amer i.

32 Iesu ga lok tidi, “Agara lok pam laxampanga sangsangu ne Tamak ga raba ia min kusu ana lox i ro

\* 10:14: Jo 10:27; 2 Ti 2:19 \* 10:15: Mt 11:27; Jo 15:13; 1 Jo 3:16 \* 10:16: Ais 56:8; Jo 11:52; 1 Pi 2:25; Isi 34:23; 37:24 \* 10:17: Pl 2:8-9 \* 10:18: Jo 5:26; 14:31; 19:11 \* 10:19: Jo 7:43 \* 10:20: Jo 7:20; 8:48 \* 10:24: Gu 3:11; 5:12; Lu 22:67 \* 10:25: Jo 4:26; 5:36; 10:38 \* 10:26: Jo 6:64; 8:45 \* 10:27: Jo 8:47; 10:3 \* 10:28: Jo 3:16; 6:39; 18:9 \* 10:31: Jo 8:59

melamgo atnimi. Ti ua lara at nai nemi mi lok do mina luvar ia xusu nen?"

33 \*Diga vorang i rin keretna, "Maxo lok do mana luvar u mumu mo levempanga sangsangu, ketla u tong i do nenu ne Moroa. Nenu mun laradi, ketla uk lok tong pen i do una lox axa u xerekngan ne Moroa la kerepmo u paase vupu rin."

34 Iesu ga lok tidi xeretna, "Levelinga xeneng at Laulis Linga atnimi i lok keretna,

'Nenia aga tong i do nemi xa leven-moroo.' *Sam*  
82:6

35 \*Ataklen i do levelinga at Laulis Linga i ruturun tinotno. La ne Moroa ga tong di do levenmoroo, ti mo luvuttadi levelinga ren ga vot tidi.

36 La ne Tamak ga soxolik ka ia la ga riki ia ude at na lavatbung menemen. Tila ba la, mia tong i do nenia a paase vupu ri ne Moroa mila a tong i do nenia Nitna ne Moroa?

37 Dola nenia xopmen ana lok leven gugu at ne Tamak, nemen mita nunu bok ba rak.

38 \*Ket do anak lok leven gugu ren, la mixo nunu rak, mina nunu at leven gugu rak, kusu miba doxoma i, la minaklen i do ne Tamak i nemen keneng tarak, la nenia xeneng teren."

39 \*Diga lok do dina ranga alis i, ketla neni ga vas su mulus mene at lengkikngan di.

40 \*Iesu ga vas korop amu manga ladan sen Joridan uto at lenep ne Jon gap sep susu limixin e gano, la neni gak lok go.

41 Buaang nedi limixin diga vot pasa i, la diga lok, "Jon goxo lok levempanga sangsangu xeretna, ketla levelinga axap, ne Jon ga paase mumu na laradi min ga ruturun."

42 \*La buaang limixin go diga nunu at ne Iesu.

## 11

### *Lanmet At Ne Lasaro*

1 \*Lara laradi laasen teren ne Lasaro, ga nemen to Beteni, ga meres. Beteni ni lemenemen ua ne Maria mi ne Mata nedu lueton duga nemen go.

2 \*La ne Maria neni lara no ga sobili laxadan mavak to at luxangkedek at Leeme Silok la ga ves amesemes i mi lavatkabinim at lavatlak teren. Ne Lasaro neni neinen du, mo gak meres.

3 \*La na lueton duga lox aonon levelinga ri ne Iesu keretna, "Leeme Silok. Lentangas orong taram i meres."

4 \*Se ne Iesu ga ronga i na, neni ga lok, "Lanmet kopmen neni laxavaxap at nai ri ne Lasaro. Na lavanga i vot kusu ti emi asu mi ne Moroa, la kusu Nitna ne Moroa naba ruuna ka leemi asu."

5 Iesu ga balamu aleng ne Mata du lueton, la ne Lasaro.

6 Se ne Iesu ga lok ka levelinga do Lasaro ga meres, neni ga nemen avolo bok go ap mo lenep, neni gak lox e at legepu aleng bok.

7 Melemu neni ga lok ti lavaun pinivu ren, "Atamlong uto Judaia."

8 \*Ketla diga lok tin, "Rabai. Gamerena luvuttadi amgomgo diga lok do dina lu amer u, tila u lok do unamlong?"

9 \*Iesu ga vorang i ridi, "Laaleng kangking i ruuna lasangaun mi leg-e-pu xonatat aleng. Kuren la, mo do taradi nat pas at laxangking tubu, neni xopmen nak sak kikixin, mila neni i ven laxasep at na lavatbung menemen.

10 \*Ket do taradi nat pas at laxanimin, neni nak sak kikixin, mila kopmen taxasep na nemen keneng teren."

11 \*Iesu ga tong i na, la melemu ni ga lok bok, "Lentangas atdik ne

\* 10:33: Mas 24:16; Mt 26:65; Jo 5:18 \* 10:35: Mt 5:18 \* 10:38: Jo 14:10-11 \* 10:39: Lu 4:30; Jo 8:59 \* 10:40: Jo 1:28 \* 10:42: Jo 7:31 \* 11:1: Lu 10:38-39 \* 11:2: Jo 12:3 \* 11:3: Jo 11:36 \* 11:4: Jo 9:3; 11:40 \* 11:8: Jo 8:59 \* 11:9: Jo 9:4-5 \* 11:10: 1 Jo 2:11 \* 11:11: Mt 9:24

Lasaro mo i unga, ketla anabat pas la ana lox aus i.”

<sup>12</sup> La lavaun pinivu ren diga lok tin keretna, “Leeme Silok. Mo do neni go i unga, neni naba lox avukat.”

<sup>13</sup> Ketla lavasuun at levelinga at ne Iesu do Lasaro ga met. La lavaun pinivu diga nua i do Lasaro ga unga mene.

<sup>14</sup> Kuren la ne Iesu ga tong axasev i ridi do, “Lasaro mo ira met pam.

<sup>15</sup> Ketla a momo do nia goxok lok eburu min. La mumu mun i na, minaba nunu ba rak. Atat pas uto xusu tana vot pasa i.”

<sup>16</sup> \*Tomas lara laasen bok teren ne Didimas ga lok ti mo lavaun pinivu xeretna, “Ata emu eburu min, kusu ataba met eburu min.”

### *Iesu Neni Laxakatu Kaxat Amlong La Lorooro*

<sup>17</sup> Iesu ga vot, la neni ga long lenget ka i do limixin diga li vam ne Lasaro ro at lamaaut la lavanuet aleng gara volo vam i.

<sup>18</sup> \*Beten i goxo vaxalom boro Jerusalem,

<sup>19</sup> la buaang luvuttadi amgomgo at limixin me Judaia diga vot kusu dina ven ti ne Mata mi ne Maria la ti vaase amenemen du mumu lanmet at neinen du.

<sup>20</sup> Se ne Mata ga rongga i do ne Iesu mo ga vot, neni ga vas su xusu ti ekip tangarang min. Ketla ne Maria ga men alu go xolonu.

<sup>21</sup> \*Mata ga lok ti ne Iesu, “Leeme Silok. Mo do nu gitak lok de, neinuk gi toxo met.

<sup>22</sup> Ketla akleklen i do monga ne Moroa naba raba u mi lavanga salai do una sing i min.”

<sup>23</sup> Iesu ga lok tin, “Neinum naba rooro xat amlong.”

<sup>24</sup> \*La ne Mata ga lok, “Aklen i do neni naba rooro xat amlong at laaleng kavaxap.”

<sup>25</sup> Iesu ga lok tin, “Nenia Laxakatu Kaxat Amlong mi Lorooro. Do tara

i nunu rak, neni naba rooro amlong do neni na met.

<sup>26</sup> \*La do tara i rooro la i nunu rak, neni noxo met. Kereva, u nunu at na levelinga?”

<sup>27</sup> \*La ne Mata ga lok, “I ruturun, Leeme Silok. A nunu do nenu Lanarong, Nitna ne Moroa, la ne Moroa ga tong i do nenu unaba si ude xopok at lavatbung menemen.”

### *Iesu Gang Teng*

<sup>28</sup> Melemu at na levelinga at ne Mata, neni gamlong la ga vaase nem-nem ti ne Maria, la ni ga lok, “Leeme loklox ase nga mo i auret la i susue ru do una vot pasa i.”

<sup>29</sup> \*Se ne Maria ga rongga i na, neni ga xatu kaxat la ga vas soso mun kusu ti vas tangarang ka i.

<sup>30</sup> Iesu goxovisi na vot to xolonu, ketla neni move ga nemen ap mo lenep ne Mata ga xip tangarang ka i ve.

<sup>31</sup> Luvuttadi amgomgo mo digak lok go at loogu eburu mi ne Maria diga paase amenemen i. Se diga ven i ga xatu kaxat la ga vas su soso ukamang, diga mumu asu i. Diga nua i do neni mo gat pas uto at lamaaut, kusu nang teng go.

<sup>32</sup> \*Se ne Maria ga vot to at lenep ne Iesu ga nemen e la ga ven i, neni ga xis tiktikbu mi luvatgulom teren la ga lok, “Leeme Silok, mo do nu gitak lok nade, neinuk gi toxo met.”

<sup>33</sup> Iesu ga ven i gang teng, la luvuttadi amgomgo bok mo diga emu min digang teng, la lebelen ga lok tuntun aleng.

<sup>34</sup> La ni ga sue di xeretna, “Miga li i ua?”

La diga lok, “Atat pas la una ven i.”

<sup>35</sup> \*La ne Iesu gang teng.

<sup>36</sup> La luvuttadi amgomgo diga lok, “Mi ven ba i, neni i lok tuntun aleng ne Lasaro.”

<sup>37</sup> \*Ketla leventaba atdi diga lok, “Neni ga lox arepalas luxatli at laradi luxatli ren ga main. La kereva, ni

\* 11:16: Mk 14:31 \* 11:18: Mt 21:17 \* 11:21: Jo 11:32 \* 11:24: Jo 5:29 \* 11:26: Jo 8:51  
\* 11:27: Jo 6:69 \* 11:29: Jo 11:20 \* 11:32: Jo 11:21 \* 11:35: Lu 19:41 \* 11:37: Jo 9:6

goxo epovo do na lox aroo ne Lasaro xusu ni noxo met?"

*Iesu Ga Lox Axatu Amlong Ne Lasaro Basinge Lanmet*

<sup>38</sup> \*Lebelen ne Iesu ga lok tuntun amu bok, la neni gat pas uto at lamaaut. Mo lamaaut gak lok to at lubuang la lavaruat gak lok pe lungusungus ap mo lubuang.

<sup>39</sup> La ne Iesu ga lok tinedi xeretna, "Mina lok pes lavaruat basinge lubuang."

La ne Mata, neinen ne Lasaro ga lok, "Leeme Silok, lorongan naba somau mila at lavanuet aleng ta, neni gak midi ro xeneng at lamaaut."

<sup>40</sup> \*Iesu ga lok tin, "Kereva, nenia agoxo tong box i ru do unaba ven lolos at ne Moroa mo do una nunu?"

<sup>41</sup> Diga lok pes lavaruat, la ne Iesu ga milik urut upana la ga lok, "A tong aorong tu Tamak, do u ronga ia."

<sup>42</sup> \*Aklen i do amisik ung tonga ia, ketla a tong i na xusu na limixin dina nunu do uga riki ia."

<sup>43</sup> Melemu at na levelinga ren, neni ga xup silok keretna, "Lasaro. Pas su." <sup>44</sup> La ne Lasaro ga vas su nga, la lukngen mi luxangkedek teren diga is i mi lentamon itis tongan. La labantamon bok diga is pe lavatlak teren min.

La ne Iesu ga lok, "Mina soxomus asu i, la mina soxope i uto na onon."

*Luvuttadi Amgomgo Diga Lok Langas Linga Ri Sep Ne Iesu (Mt 26:1-5; Mk 14:1-2; Lu 22:1-2)*

<sup>45</sup> \*Buaang atnedi luvuttadi amgomgo mo diga vot kusu ti ven ne Maria, kuren la diga ven na lavanga ne Iesu ga lox i la diga nunu ren.

<sup>46</sup> \*Ketla leventaba atdi digamlong uto at lubang Parisi la diga tong i ridi mumu mo lavanga sangsangu ne Iesu ga lox i.

<sup>47</sup> Kuren la lubang Parisi la lava-maasa silok diga vot buru la diga

epaase, "Ataba lok lavanga salai? Na laradi ik lok buaang laxampanga sangsangu.

<sup>48</sup> Mo do ata ke xepe i nak lok na levempanga, limixin axap diba nunu ren, la limixin boro Rom dinaba musak la dina sele utut kepe loogu laplavang eburu mi limixin atdik."

<sup>49</sup> Lara atdi laasen teren ne Kaiapas, neni lamaasa gomgo ap mo lamaares ga lok, "Mixoklen tevempanga."

<sup>50</sup> \*Mina xasep do i lox avukat ti tegesa radi na met nop limixin kusu limixin axap me Judaia di noxo seeve."

<sup>51</sup> \*Ni goxo tong i na mi lodoxoma axa ren, ketla neni ga lamaasa gomgo ap mo lamaares, la neni ga paase ali do Iesu mo naba met nop limixin me Judaia,

<sup>52</sup> \*la kopmen tinedi xusuk, ketla tinedi bok limixin kopmen di me Judaia no diga epeseves la neni naba lox etang du ngan legesabung mixin.

<sup>53</sup> \*Ga ruka i ap mo laaleng luvuttadi amgomgo me Judaia diga puse ngas do ri sev amet ne Iesu.

<sup>54</sup> \*Kuren la ne Iesu goxot pas saxaven go Judaia. Ketla neni ga on basinge mo lenep la gat pas uto at loxot gak lok saparap lamatbin, uto at lemenemen laasen teren Epraem la gak lox eburu mi lavaun pinivu ren go.

<sup>55</sup> \*Leluxa at leme Judaia laasen teren Lovovolo Pe mo ga auret ta, la buaang limixin at lengkot axap at levennep Judaia digat pas uto Jerusalem, kusu ti lox adadat nedi at lemeren ne Moroa ri mo leluxa.

<sup>56</sup> \*Diga reven ti ne Iesu, la se diga vot go at loogu laplavang diga esue xa minedi getgesara, "Kereva, mi doxoma i do neni naba vot bok ti na leluxa?"

<sup>57</sup> Lubung Parisi mi lavamaasa silok diga raba linga vam di. Do tara na ven lenget ne Iesu go at toxot,

\* 11:38: Mt 27:60 \* 11:40: Jo 11:4,23-26 \* 11:42: Jo 12:30 \* 11:45: Jo 4:48; 7:31 \* 11:46: Lu 16:31 \* 11:50: Jo 18:14 \* 11:51: Lur 50:20 \* 11:52: Jo 10:16; 17:21; 1 Jo 2:2 \* 11:53: Jo 5:18 \* 11:54: Jo 7:1 \* 11:55: 2 Let 30:17; Gu 21:26 \* 11:56: Jo 7:11

neni naba tong i ridi xusu diba ranga alis i.

## 12

*Maria Ga Gos Luxangkedek At Ne Iesu Ro Beteni*

(Mt 26:6-13; Mk 14:3-9; Lu 7:37-38)

<sup>1</sup>\* At lavanna aleng avot ti leluxa at Lovovolo Pe, Iesu gat pas uto Beteni, mo lemenemen ne Lasaro gak lox e. Ni laradi ne Iesu ga lox arooro amlong i basinge lanmet.

<sup>2</sup>\* Limixin at ne Lasaro diga lox agagas li leveluxa rin go, la ne Mata ga raba luxa di, la ne Lasaro la leventaba luvuttadi bok diga anan eburu mi ne Iesu.

<sup>3</sup>\* La ne Maria ga lok ka lubuxom\* ga umsu mi laxadan mavak, laasen teren naat. Mo laxadan somavak lununun teren ga silok aleng. La neni ga soli i ro at luxangkedek at ne Iesu, la ga ves amesemes i mi lavatkabinim at lavatlak teren. Losomavak at na laxadan ga umsu go xeneng ap mo loogu.

<sup>4</sup>\* La lara lun pinivu at ne Iesu, ne Judas Iskariot, neni mo lara ga song araba ne Iesu ri limixin kakapmek, ga lok keretna,

<sup>5</sup>\* “Kereva, ixo epovo dina sesep mi na laxadan mavak la naba epovo at lavantun sangau kobot (300) denarias kusu dina raba limixin banbalo min?”

<sup>6</sup> Ni ga tong i na, mila neni laradi xipkip pilo la kopmen do ni ga doxoma limixin banbalo, ketla neni ga vara i do neni nam nem kaka i. Neni gak lok tatao lempilas atdi la amisik ni gam nem teren.

<sup>7</sup>\* Ketla ne Iesu ga lok, “Keke mulus na latkin. Na ladan neni ga gagas li i xusu tik mir ia.

<sup>8</sup>\* Limixin banbalo dinabat pot pasa amisik nimi xusu minabak lok tooro di, ketla nenia noxo nemen eburu amisik minimi.”

*Lavamaasa Diga Puse Ngas Ti Sev Amet Ne Lasaro*

<sup>9</sup>\* Buaang limixin me Judaia diga ronga i do ne Iesu gak lok to Beteni, kuren la digat pas ugo. Digat pas mila diga vara i do dina ven ne Iesu mi ne Lasaro, mo ne Iesu ga lox arooro amlong i basinge lanmet.

<sup>10</sup> Kuren la lavamaasa silok diga tong li levelinga do dinaba sev amet bok ne Lasaro,

<sup>11</sup>\* mila buaang nedi limixin me Judaia diga sok tixirixes lavamaasa la diga nunu nga at ne Iesu.

*Iesu Ga Beles To Jerusalem*

(Mt 21:1-11; Mk 11:1-11; Lu 19:28-40)

<sup>12</sup> Ap mo laaleng petpes buaang nedi limixin mo diga vot ti leluxa at Lovovolo Pe la diga ronga i do ne Iesu mo gat pas uto Jerusalem.

<sup>13</sup>\* Kuren la diga ra ka laxangkakan bisi la diga vas su xusu ti ekip tangarang min. La diga lok,

“Leemi asu ri ne Moroa. Luvukat ti mo laradi it pas mi laasen at Leeme Silok. Luvukat ti Loorong Silok boro Israel.”

*Sam 118:25-26*

<sup>14</sup> Iesu ga lok ka lodongki maxat la ga xis teren, kerekngan Lovoang Kaala ga tong i xeretna,

<sup>15</sup> “Limixin me Saion. Nemen mita marat. Loorong Silok atnimi nom it pas saparap nimi, it kis at lodongki maxat.” *Sak 9:9*

<sup>16</sup>\* Ap mo laaleng na lavanga ga ravasu, lavaun pinivu di goxo xasep at lavasuun ap mo levelinga. Ketla se at laaleng ne Iesu ga rooro xat amlong digaklen ba i do Lovoang Kaala ga tong asu na lavanga, la mo limixin diga lox i na ri ne Iesu.

<sup>17</sup>\* La mo limixin diga nemen eburu mi ne Iesu ap mo laaleng neni ga ro asu ka ne Lasaro boro at lamaaut, la ga lox aroo amlong i

\* **12:1:** Jo 11:1,43    \* **12:2:** Lu 10:40    \* **12:3:** Lu 7:37-38    \* **12:3:** Na lubuxom tuntu diga xovox i mi luuat bunbun.    \* **12:4:** Jo 18:3    \* **12:5:** Mt 19:21    \* **12:7:** Jo 19:40    \* **12:8:** Lal 15:11  
\* **12:9:** Jo 11:43-44    \* **12:11:** Jo 11:45    \* **12:13:** Mt 27:42; Jo 1:49    \* **12:16:** Jo 2:22    \* **12:17:** Jo 11:43-44



basinge lanmet. Diga tong asu na lavanga ro Jerusalem.

<sup>18</sup> La buaang nedi limixin digat pas kusu ti ekip tangarang min, mila diga ronga i do neni ga lox aroo amlong ne Lasaro.

<sup>19</sup> \*Kuren la lubung Parisi diga lok tinedi getgesara, “Mina ven ba i. Ata noxo lox asoxos toxot at levendox-oma atdik. Limixin axap mo dia mumu asu nga ne Iesu.”

### *Limixin Petpes Diga Lok Do Dina Epause Eburu Mi Ne Iesu*

<sup>20</sup> Ap mo laaleng at leluxa, lev-entaba limixin me Grik diga nemen kantubu ap mo limixin mo digat pas uto Jerusalem kusu ti lotu.

<sup>21</sup> \*Diga vot pasa ne Pilip, neni boro Betsaida at lenep Galili la diga lok tin, “Leeme silok. Ma vara i do mana vot pasa ne Iesu.”

<sup>22</sup> Pilip gat pas la ga tong i ri ne Endru, la nedu buru dugat pas la duga tong i ri ne Iesu.

<sup>23</sup> \*La ne Iesu ga lok tidu xeretna, “Loxonaleng mo ia epovo vam kusu ne Moroa na lox asilox ia, Laradi Mevana.

<sup>24</sup> \*A tong tuturun i rinumu. Lux-uvenit piao, do limixin di noxotlo i, noxo visik. Do i mang la ditlo li i at laxangka, melemu naba visik buaang levempeven piao.

<sup>25</sup> \*Do tara i vavara aleng lorooro ren, neni naba sang apkav i. La do tara ixo vara aleng lorooro ren at na lavatbung menemen kopok, neni nabam tebeng amisix i ri lorooro avolo.

<sup>26</sup> \*Do tara i vara i do na lok lugugu rak, neni na lok kaka be loklok tarak, kusu neni naba lok ngan lasaxaruki rak la na nemen ap mo lenep nenia anak lox e. Ne Tamak naba lox asilox i do neni na lok lugugu rak.”

### *Iesu Ga Paase Mumu Lanmet Teren*

<sup>27</sup> \*La ne Iesu ga lok bok tidi, “Monga labalak ixo xis saga la aba tong ka lavanga salai? Agut aba lok do, “Tamak, i epovo do una lok kepe na lumumuat basinge ia?” Kopmen. Nia aga si ude xusu ti beles at na loxonaleng at losongsongot.”

<sup>28</sup> \*La ne Iesu ga sing ne Temen keretna, “Tamak. Una lox asilok laasen taram.”

Melemu laxaka at lara ga si boro vana at laxalibet, ga lok, “Nia ara lox asilok pam i la anaba lox amu box i.”

<sup>29</sup> \*La limixin diga tu go diga ronga na levelinga la diga lok, “I mumuat ngan leretepaavat.” La leventaba diga lok, “Laangelo i paase rin.”

<sup>30</sup> \*La ne Iesu ga lok tidi, “Na levelinga mi ronga vam i, kopmen ti lok tooro ia, ketla ti lok tooro nimi.

<sup>31</sup> \*Monga loxonaleng kusu ne Moroa na ila mumu loklok at limixin at lavatbung menemen. La ne Moroa naba lox axap lolos at ne Satan, neni lamgomgo at na lavatbung menemen.

<sup>32</sup> \*Do dina vaxarem ia uto vana at laxaba la nia ana urut upana basinge na lavatbung menemen, nenia anaba sat tomtom ka limixin axap saporav ia.”

<sup>33</sup> \*Ni ga vaase i na mumu lanmet neni naba ekip tangarang min.

<sup>34</sup> \*La limixin diga lok, “Laulis Linga atdik i tong i do Lanarong na rooro amisik. Kereva u tong i do Laradi Mevana diba vaxarem i upana? La nege mo Laradi Mevana?”

<sup>35</sup> \*Iesu ga vorang i ridi xeretna, “Laxasep at ne Moroa noxo nemen abao eburu minimi. At lavatpas atnimi at na lavatbung menemen, mina nemen at laxasep mila laxasep move i nemen eburu minimi, kusu laxakapmek noxo los kis pavaa nimi ngan lamain. Mila lara do it pas at lamain ixokleklen i do neni it pas ua.

\* 12:19: Jo 11:48 \* 12:21: Jo 1:44; Lu 19:3; 23:8 \* 12:23: Jo 13:31-32; 17:1 \* 12:24: 1 Ko 15:36  
 \* 12:25: Mt 16:25 \* 12:26: Jo 14:3; 17:24 \* 12:27: Sam 6:3; 42:5; Mt 26:38 \* 12:28: Mt 3:17  
 \* 12:29: Gu 23:9 \* 12:30: Jo 11:42 \* 12:31: Jo 9:39; 14:30 \* 12:32: Jo 3:14 \* 12:33: Jo 18:32  
 \* 12:34: Sam 89:4,36; 110:4; Ais 9:7; Dan 7:14 \* 12:35: Jo 7:33; 8:12; 1 Jo 2:10-11 \* 12:36: Ep 5:8

36 \*Laxasep at ne Moroa move i nemen eburu minimi. Kuren la mina nunu ren, kusu nemi minaba nemen ngan limixin at laxasep.” Melemu at na levelinga ne Iesu ga tong i, neni ga vas kaxat la ga lox ali pe i basinge di.

*Buaang Atdi Limixin Me Judaia Di Goxo Nunu At Ne Iesu*

37 Iesu ga lok buaang levempanga sangsangu ro melamgo at leme Judaia, ketla move di goxo nunu ren.

38 \*La kerepmo diga lox aruturun levelinga at leeme vapaase ali ne Aisaia, ni ga lok,

“Leeme Silok, nege ga nunu at levelinga nema maga tong i? Kopmen tara. Leeme Silok ga lox asuusu lolos teren ti nege? La kopmen tara atdi goxo ven kibis i.” *Ais 53:1*

39 \*Na mun i lavasuun teren la di goxo epovo do dina nunu. Ne Moroa ga paase ali at lungusno ne Aisaia, neni ga lok,

40 “Moroa ira lox amain pam lengkatli atdi, la ira vipe vam levendoxoma atdi xusu lengkatli atdi noxo reven la levendoxoma atdi noxokleklen. La di noxo vot pasa ia xusu nenia anaba lox arooro di.” *Ais 6:10*

41 \*Aisaia ga tong i na mila neni ga ven lisisixam silok at ne Iesu la ni ga paase ali min.

42 \*La buaang luvuttadi amgomgo bok diga nunu at ne Iesu, ketla diga e amarat at lubung Parisi. Kuren la di goxo paase asu lununu atdi ri tentaba vetpes, mila lavanga lubung Parisi dina sep pepe di xusu di noxo pubeles bok ba at loogu singising.

43 \*Diga vavara aleng i xusu limixin dina emi asu midi, la di goxo doma solo mumu lemi asu boro at ne Moroa.

*Levelinga At Ne Iesu Naba Vaxaru Limixin At Lavapaase*

44 \*Iesu ga vaase silok ti limixin keretna, “Do tara na nunu rak, i nunu bok ap mo lara ga riki ia ude.

45 \*Do neni i ven ia, i ngan do i ven mo lara ga riki ia ude.

46 \*Nia aga rupot ti na lavatbung menemen ngan laxasep kusu tara na nunu rak, neni noxo nemen at lamain.

47 \*Do tara na ronga levelinga rak la kopmen na ronga res teren, nenia noxo lok li i at lavapaase, mila aga vot ti lox arooro limixin, la kopmen do ti lok li di at lavapaase.

48 \*La do tara i raba rulu ia la kopmen na sisiam ka levelinga rak, neni ira sok ka vam lenep tin, mila levelinga mun tarak naba lok li mo lara at lavapaase at laaleng ete.

49 Anai i ruturen aleng, mila kopmen nenia xusuk mo a paase mi lolos axa rak. Ketla ne Tamak neni ga riki ia, ni ga tong lolos mo levelinga ria do nia anaba tong i, la langas salai nia anaba mu i ri vaase axasev i.

50 \*La aklen i do levelinga lolos teren naba lok li limixin at lorooro avolo. Levelinga axap tarak, ni levelinga ne Tamak ga tong i ria xusu ana paase asu i.”

## 13

*Iesu Ga Gos Lengkangkedek At Lavaun Pinivu Ren*

1 \*At laaleng avot ti leluxa at Lovovolo Pe, Iesu gaklen pam i do loxon-aleng ga epovo vam kusu tin ti on basinge na lavatbung menemen la nat pas uto saporap ne Temen. Amisik ne Iesu ga balamu limixin axa ren. La ni ga lox asuusu labalamu ren tidi at laaleng neni ga met teren.

2 \*Iesu eburu mi lavaun pinivu ren digat kis eburu at laanan ga ukantinao. La ne Satan ga li vam lodoxoma

\* 12:38: Ro 10:16 \* 12:39: Mt 13:15 \* 12:41: Ais 6:1 \* 12:42: Jo 7:48; 9:22 \* 12:43: Jo 5:44  
 \* 12:44: Mt 10:40 \* 12:45: Jo 14:9 \* 12:46: Jo 8:12; 12:35 \* 12:47: Jo 3:17; 8:15 \* 12:48: Ib  
 4:12 \* 12:50: Jo 8:26,28 \* 13:1: Jo 7:30; 12:23; 15:13; 1 Jo 3:16; Pl 2:8 \* 13:2: Lu 22:3; Jo 13:27

ro xeneng at ne Judas Iskariot, lamdak at ne Simon do neni naba song araba ne Iesu ri limixin kakapmek.

<sup>3</sup> \*Iesu gaklen pam i do ne Temen ga lok li levempanga axap maxopok at loklok tatao ren, la gaklen box i do neni ga si boro vana at ne Moroa la nabamlong bok tin.

<sup>4</sup> Kuren la ne Iesu ga xatu kaxat, la ga soxomus pes lavanga singsiga ren boro maxamang, la ga dos korov i mi lavattamon. <sup>5</sup> Melemu neni ga lok ka laxadan la ga soli aruv i ro xeneng at lavatbaaket, la ga ruka i xusu na gos lengkangkedek at lavaun pinivu ren. La melemu ga ves amesemes lengkangkedek atdi mi lavattamon no neni ga dos korov i min.

<sup>6</sup> Iesu ga vas saparap ne Simon Pita, la ne Simon Pita ga sue ne Iesu xeretna, "Leeme Silok. Kereva, una gos bok luxangkedek tarak?"

<sup>7</sup> Iesu ga vorang i rin keretna, "Ux-oklen laai, monga nia ak lox i. Ketla melemu ba, unaba xasep teren."

<sup>8</sup> Ketla ne Pita ga lok, "A noxo ke xepe u xusu una gos luxangkedek tarak at toxonaleng."

La ne Iesu ga lok tin keretna, "Dola nia a noxo gos luxangkedek taram, kopmen toxot taram kantubu at limixin tarak."

<sup>9</sup> Simon Pita ga lok, "Leeme Silok, nemen uta gos kujuk mun luxangkedek tarak. Una gos bok lukngak mi lavatlak tarak."

<sup>10</sup> \*Ketla ne Iesu ga lok, "Do nege ira susu vam, neni ira dadat pam. La ixo epovo xusu ni na susu amu bok, i epovo mun na gos luxangkedek teren. Nemi axap mira dadat pam, ketla legesara mun atnimi, kopmen."

<sup>11</sup> Iesu garaklen pam i do mo lara atdi na song araba limixin kakapmek min. Kuren la neni ga lok, "Nemi axap mi dadat. Ketla legesara mun atnimi, kopmen."

<sup>12</sup> Iesu ga gos axap lengkangkedek at lavaun pinivu ren, la melemu neni ga etara amlong manga lavanga singsiga ren. La ni gamlong ti loxot kitkis teren to at laxangkaaning. La ga sue di xeretna, "Kereva, mi xasep at lavanga salai mo vam nia a lox i rinimi?"

<sup>13</sup> \*Mi tong ia do leeme loklox ase la Leeme Silok, la ik mokso xuren, mila nenia leeme loklox ase la Leeme Silok.

<sup>14</sup> \*La mo vam nia a gos lengkangkedek atnimi. Nemi bok, mina mu asu na loklok kantubu atnimi.

<sup>15</sup> \*Ara lok pam na loklok poovo xusu minaba lox i xerekngan nia ara lok pam i rinimi.

<sup>16</sup> \*A tong tuturun i rinimi, kopmen tasaxaruki na silok ti laradi gomgo ren, kopla laradi xipkip linga na silok ti lara ga riki i.

<sup>17</sup> \*Do mina xasep at na levelinga, la mina lox epovo i, Moroa naba lox anarong nimi."

### *Iesu Ga Vaase Ali Do Neni Naba Met*

<sup>18</sup> La ne Iesu ga lok tidi, "Ketla kopmen nemi axap ta minaba lok ka loklox anarong. Aklen nedi lev-entaba agara lok katling pam nedi ngan luvuttadi vavang tarak, ketla legesara mun atnimi, kopmen. Neni ik lok ti lox asoorun levelinga xeneng at Lovoang Kaala i lok keretna, 'Neni mo lara i an eburu minia at loxongkide, ira raba rulu ia.'

#### *Sam 41:9*

<sup>19</sup> \*A tong ta i mo rinimi avot ti mo lavanga naba rupot. La do na vot, minaba nunu ba do nenia Lanarong.

<sup>20</sup> \*A tong tuturun i rinimi, do nege na siam ka tara nia ana riki i, neni i ngan i siam ka ia. La do tara na siam ka ia, i siam ka mo lara ga riki ia ude."

<sup>21</sup> \*Iesu ga vaase axav i na la lebelen goxo xis saga avukat. La ga lok

\* **13:3:** Jo 3:35; 16:28    \* **13:10:** Jo 15:3; 6:64,70-71    \* **13:13:** Mt 23:8,10    \* **13:14:** Mt 20:28; Lu 22:27    \* **13:15:** Pl 2:5; Kl 3:13; 1 Pi 2:21    \* **13:16:** Mt 10:24    \* **13:17:** Mt 7:24; Je 1:25    \* **13:19:** Jo 14:29; 16:4    \* **13:20:** Mt 10:40    \* **13:21:** Jo 12:27

keretna, “A tong tuturun i rinimi, do lara mo xantubu atnimi naba song araba ia ri limixin kakapmek.”

<sup>22</sup> Lavaun pinivu ren diga epen etang, di goxoklen i do, Iesu ga paase mumu nege.

<sup>23</sup> \*La lara atdi, no ne Iesu ga vavara aleng tino i, gat kis saparap tinotno ne Iesu.

<sup>24</sup> Simon Pita ga lok loklok katling tin la ga lok, “Una sue i do, nege mo lara?”

<sup>25</sup> Kuren la ni ga sep sogo at lobongobong at ne Iesu, la ga sue i, “Leeme Silok, nege mo?”

<sup>26</sup> Iesu ga vorang i rin keretna, “Dola nia ana gos amlu xaka na loxongkide xeneng at laxadan sos, la ana raba mo laradi min, neni mo laradi.” Melemu neni ga lok ka loxongkide la ga gos amlu ka i, la ga raba ne Judas Iskariot min, lamdak at ne Simon.

<sup>27</sup> \*Se ne Judas ga ranga ka loxongkide, Satan ga beles ukeneng teren.

La ne Iesu ga lok tin, “Mo lavanga u vara i do una lox i, una lok soso nga i.”

<sup>28</sup> Ketla kopmen teta maxeneng at nom laanan ga xasep at lavasuun at levelinga ne Iesu ga tong i rin.

<sup>29</sup> \*Judas neni gak lok tatao lempilas, la leventaba atdi diga nua i do Iesu ga paase ri ne Judas kusu na un ka tevempanga anan ti leluxa kopla na raba tevempanga ri limixin banbalo.

<sup>30</sup> Melemu at ne Judas ga lok ka mo loxongkide, ni ga vas su nga ukamang. Lemenemen mo gara main ta.

*Iesu Ga Vaase Ali Do Ne Pita Na Sok Tixirixes I*

(Mt 26:31-35; Mk 14:27-31; Lu 22:31-34)

<sup>31</sup> \*Judas ga onon pam, la ne Iesu ga lok, “Monga lisisixam tarak, Laradi Mevana, naba ravasu asuvos, la maxeneng teren limixin dinaba

ven axasep avukat lisisixam at ne Moroa keneng tarak, ne Nitna.

<sup>32</sup> \*Do nenia ana lox asuvos lisisixam at ne Moroa, Moroa naba lox asuvos lisisixam teren keneng tarak, ne Nitna la naba lok soso mene nga i.

<sup>33</sup> \*Luvutnuruk. Anaba nemen eburu minimi at loxonaleng kakalik mun. La melemu minaba reven tia, kerekngan nia aga tong pam i ri leme Judaia. Kuren la a tong box i mo rinimi, mo loxot nia anat pas tin, ixo epovo do minat pas uve.

<sup>34</sup> \*Leretere maxat na ana raba nimi min. Mina ebalamu ela xeneng atnemi xerekngan nia aga balamu nimi.

<sup>35</sup> Limixin axap dinabaklen i do nemi lavaun pinivu rak, mo do mina ebalamu ela minimi xa.”

<sup>36</sup> \*Simon Pita ga sue i, “Leeme Silok, ubat pas ua?”

Iesu ga vorang i rin, “Loxot nia anat pas uve, nenu u noxot pas tin monga, ketla melemu nenu unaba mumu ba ia.”

<sup>37</sup> Pita ga sue box i, “Ua lavasuun teren la monga nia axo epovo na mumu asu u? Nia anaba met nov u.”

<sup>38</sup> La ne Iesu ga vorang i rin, “Kereva, u epovo ri raba ruturun lorooro ram tia? A tong tuturun i ru, avot ti laxaxak naba reng ningina nubung la unaba sev apkap naba vantun do uxoklen ia.”

## 14

*Iesu Ga Lox Amenemen Lavaun Pinivu Ren*

<sup>1</sup> \*Iesu ga lok ti lavaun pinivu ren keretna, “Nemen gat lebelen nimi na bulu. Mina nunu at ne Moroa, la mina nunu bok tarak.

<sup>2</sup> Buaang lengkantaogu lixilik mo i nemen at loogu at ne Tamak. Mo dola kopmen, nia gita ba tong i rinimi. Anat pas ugo xusu ana lox agagas li lengkot tinimi.

\* 13:23: Jo 19:26; 20:2; 21:7,20 \* 13:27: Jo 13:2 \* 13:29: Jo 12:6 \* 13:31: Jo 12:23 \* 13:32: Jo 17:5 \* 13:33: Jo 7:33-34 \* 13:34: Jo 15:12,17; 1 Jo 3:23; 2 Jo 1:5 \* 13:36: Jo 7:34; 21:18-19 \* 14:1: Jo 14:27 \* 14:3: Jo 12:26; 17:4

3 \*Dola anat pas ugo, ana lox agagas tengkot tinimi, la anabamlong bok la ana lam ka nimi ri mo lemenemen nenia ana nemen teren kusu nemi bok minaba nemen eburu minia.

4 Nemi miklen langas ti mo lemenemen nenia anat pas uve.”

### *Iesu, Neni Langas Ti Ne Temen*

5 Tomas ga lok ti ne Iesu, “Leeme Silok, maxoklen i do unat pas ua, kuren la mabaklen langas kereva?”

6 \*Iesu ga vorang i rin, “Nenia Langas, Luruturun mi Lorooro. Kopmen teta naba vot pasa ne Tamak at tangas petpes, ketla atarak kusuk mun.

7 \*Dola miklen avukar ia, minabaklen avukat bok ne Tamak. I ruka i mo lingina, miklen ba i la mira ven ba i.”

8 Pilip ga lok, “Leeme Silok, una lox ase nama mi ne Tamam la ni naba epovo atnama.”

9 \*Iesu ga lok tin keretna, “Pilip, aga nemen amisik eburu minu la nu xovisi unaklen ia do? Do lara ira ven pam ia, neni ira ven pam ne Tamak. Ixo epovo do una tong i do, una lox ase nama mi ne Tamam.

10 \*Kereva, uxu nunu do nia a nemen at ne Tamak, la ne Tamak i nemen tarak? Levelinga a paase i rinimi kopmen atarak axa. Ketla at ne Tamak axa, i nemen tarak neni gak lok mo leven gugu.

11 \*Mina nunu at levelinga a tong i do, nenia a nemen at ne Tamak la neni i nemen tarak. Dola kopmen, mina nunu rak mumu levempanga sangsangu nia agak lox i.

12 \*A tong tuturun i rinimi do nege i nunu rak, neni naba lok levempanga i ngan nia agak lox i. Neni naba lok levempanga i silok aleng ti mo levempanga nia agak lox i, mila nia anat pas uto vana at ne Tamak.

13 \*La do mina sing ti tevempanga xeneng at laasen tarak, anaba lox epovo i, xusu nenia Nitna ne Moroa, anaba lox asilok laasen at ne Tamak.

14 Minaba ngising ti levempanga nemi mi vara rin keneng at laasen tarak, la nia anaba lox i.

15 \*Do mina vavara aleng ia, minaba lok levempanga nia a tong i.”

### *Iesu Ga Vaase Ali Mi Lovotpot At Loroonan Kaala*

16 \*La ne Iesu ga lok bok, “Nia anaba sing ne Tamak, la neni naba raba bok nemi mi lara laradi loklok tooro, la neni naba nemen eburu amisik minimi.

17 \*Neni Loroonan Kaala at luruturun. Limixin at na lavatbung menemen dixo epovo na siam ka i, mila kopmen dina ven kibis i xopla dinaklen i. Ketla nemi miklen i mila neni i nemen eburu minimi la neni naba nemen keneng atnemi.

18 \*Dola ana onon, a noxo ke xepe nemi ngan lubangkarun, ketla anabamlong bok ude saporap nimi.

19 \*Noxo lox abao la limixin at na lavatbung menemen di noxo ven bok ba ia, ketla nemi minaba ven ia. Nenia anaba roo xat amlong, kuren la nemi bok minaba rooro avolo.

20 \*Dola mo laaleng na vot, minabaklen ka i do nenia a nemen eburu mi ne Tamak la nemi mi nemen tarak, kerekngan mun nenia a nemen keneng atnemi.

21 \*Do nege na siam ka levelinga rak la na rongga res teren, neni laradi i vavara aleng ia. La ne Tamak naba vavara aleng nege tara do na vavara aleng ia. La nenia bok anaba vavara aleng i la ana lox asuvos ia rin.”

22 \*Judas (kopmen ne Judas Iskar-iot) ga sue i, “Leeme Silok, naba lok kereva la una lok nama xusu mana ven u, la kopmen limixin at na lavatbung menemen?”

\* 14:6: Jo 11:25; Ro 5:1-2; Ib 10:20 \* 14:7: Jo 8:19 \* 14:9: Jo 12:45; Kl 1:15; Ib 1:3 \* 14:10: Jo 12:49; 14:24 \* 14:11: Jo 10:38; 14:20 \* 14:12: Mk 16:19-20 \* 14:13: Mt 7:7; Jo 15:16 \* 14:15: Jo 15:10; 1 Jo 5:3 \* 14:16: Jo 14:26; 15:26; 16:7 \* 14:17: Mt 10:20; Jo 16:13; Ro 8:26 \* 14:18: Jo 14:3 \* 14:19: Jo 16:16 \* 14:20: Jo 17:21-23 \* 14:21: Jo 15:10; 16:27 \* 14:22: Gu 10:41-42 \* 14:23: Mt 18:20; Jo 13:34; 2 Ko 6:16; Ep 3:17

23 \*Iesu ga vorang i rin keretna, “Do nege i vavara aleng ia, neni naba ronga res at levenanasa rak. Ne Tamak naba vavara aleng i, la nema mi ne Tamak, manaba esuuxun min la mana nemen eburu min.

24 \*Do nege xopmen na vara ia, neni noxo ronga res at levenanasa rak. La mo levenanasa miga ronga vam i, kopmen atarak, ketla boro at ne Tamak ni ga riki ia.

25 Agara tong pam na levelinga rinimi at na levenaleng nenia a nemen eburu minimi.

26 \*Ketla laradi loklok tooro, ni Loroonan Kaala ne Tamak naba riki i xeneng at laasen tarak. Neni naba anasa nimi mi levempanga vipis axap la naba vaase aronga nemi ri levempanga agara tong pam i rinimi.

27 \*Lenmila rak na nemen maxe-neng atnimi. Limila rak ana raba nimi min. Axo raba i na i ngan limixin at na lavatbung menemen dim taba i xuren. Nemen mita bulu la mina marat.

28 \*Mia ronga vam levelinga rak keretna. ‘Ana on basinge nimi, ketla anabamlong bok ude saparap nimi.’ Do mina vavara aleng ia, minaba momo aleng do nenia anat pas uto at ne Tamak, mila neni i silok aleng tia.

29 \*Agara tong avot pam na levempanga rinimi. Do na levempanga na vot, minaba nunu ba at na lempa-paase rak.

30 \*A noxo vaase babaalom eburu bok minimi mila laradi gomgo at na lavatbung menemen monga na vot. Kopmen tololos teren mavana rak.

31 \*Ketla limixin at na lavatbung menemen dinabaklen ka i do a vavara aleng ne Tamak, la nia ak lok levempanga axap kerekngan neni ga tong i ria. Dik ta mo, ata vas kaxat basinge na lenep.”

## 15

### *Iesu Neni Luuna Vaen Tutturun*

1 Iesu ga lok bok ti lavaun pinivu ren, “Nenia luuna vaen tuturun, la ne Tamak neni laradi loklok tatao at laraamang.

2 \*Neni i tara xepe mo lengkakan una rak, do kopmen dina pisik. La ip sep susudun mo lengkakan una do di pisik avukat, kusu dinaba pisik aleng.

3 \*Mo levelinga aga vaase i rinimi gara sep susudun pam nimi.

4 \*Mina sep sogo atmatkun tarak, la nia anaba sep sogo atmatkun atnimi. Laxakan una xopmen na epovo na visik do ni xopmen na nemen sogo at luuna. Nemi xopmen mina epovo ri visik lempeven una se do nemi mina sep sogo atmatkun tarak.

5 \*Nenia luuna vaen, la nemi mi ngan lengkakan una. Do nege i sep sogo atmatkun tarak, la nenia a sep sogo atmatkun teren, neni naba visik buaang tempeven una. Kopmen mina epovo do mina visik tempeven una do nemi mixo sep sogo atmatkun tarak.

6 \*Do nege xopmen na sep sogo atmatkun tarak, neni i lok ngan laxakan una dinaba ra korop pes i la dina lu asu min kusu na mang, la dina sigi bubua li i la dina xotos kepe i at laxao.

7 \*Do mina sep sogo atmatkun tarak, la do minam tebeng lolos levelinga rak, mina sing ti levempanga salai mi vara rin, la minaba ruuna ka i.

8 \*Do mina visik aleng, minaba lox asuusu ba i do nemi lavaun pinivu rak, la mina lox asilok laasen at ne Tamak.

9 A balamu nimi xerekngan mun ne Tamak i balamu ia. Mina nemen keneng at labalamu rak.

\* 14:24: Jo 7:16 \* 14:26: Jo 14:16 \* 14:27: Jo 14:1; 16:33; Pl 4:7 \* 14:28: Jo 14:3; 16:28; 20:17; Lu 24:52 \* 14:29: Jo 13:19 \* 14:30: Jo 12:31; 16:11; Ep 2:2 \* 14:31: Jo 10:18; 12:49; Mt 26:46 \* 15:2: Mt 3:10 \* 15:3: Jo 13:10 \* 15:4: Jo 6:56 \* 15:5: Jo 15:16; 2 Ko 3:5 \* 15:6: Mt 7:19; 13:42 \* 15:7: Mt 7:7 \* 15:8: Mt 5:16 \* 15:10: Jo 14:15; 1 Jo 2:5

10 \*Do mina rongga res at levelinga rak, minaba nemen keneng at labalamu rak, kerekngan mun nia agang tonga res at levelinga at ne Tamak la aga nemen keneng at labalamu ren.

11 \*A tong na levempanga rinimi xusu lomomo rak naba nemen keneng at lorooro atnimi, la nom lomomo atnimi naba silok.

12 \*Lavapaase rak keretna, mina ebalamu ela minimi xerekngan nia a balamu nimi.

13 \*Do tara na soxope lorooro ren ti lok tooro larapen tangas teren, nom i lox asuusu i do labalamu ren i silok aleng.

14 \*Do mina lok levempanga nia aga tong i rinimi, nemi larapen tangas tarak.

15 Axo tong bok ba nimi do lavasaxaruki, mila lasaxaruki xopmen naklen levempanga, lamgomgo ren ik lox i. Ketla, a tong nimi do larapen tangas tarak, mila agara vaase vam nimi mi levempanga axap ne Tamak ga tong i ria.

16 Nemi xopmen mi goxo soxolik ka ia. Nenia xa aga soxolik ka nimi xusu mina lok lugugu rak la mina visik asu tevempeven una nunuan, nom lempeven una nunuan kopmen noxop sopso, ketla naba nemen amisik. Kuren la ne Tamak naba raba nimi mi tevempanga salai mina sing tin keneng at laasen tarak.

17 \*Lavapaase rak tinimi xeretna. Mina ebalamu ela amisik minimi xa.

### *Lebele Ngatngas At Limixin At Na Lavatbung Menemen*

18 \*Do limixin at na lavatbung menemen dina belengatngas tinimi, minaklen i do nedi ga belengatngas avot tia.

19 \*Ketla nia aga soxolik ka nimi basinge na lavatbung menemen. Do nemi mede at na lavatbung menemen, limixin dinaba vara aleng nimi. Ketla kopmen nemi mede. Kuren

la limixin at na lavatbung menemen dinaba belengatngas tinimi.

20 \*Mina doxoma levelinga nia aga tong i rinimi i lok keretna, kopmen tasaxaruki na silok ti laradi gomgo ren. Do dina lox asongor ia, dinaba lox asongot bok nimi. Do dina rongga res at levelinga rak, dinaba rongga res bok at levelinga atnimi.

21 \*Dinaba lok na levempanga rinimi mila mi nunu rak la dixoklen mo lara ga riki ia.

22 Do nia gita vot la gita vaase ridi, nedi xa gitoxo bixurun mu laxakapmek atdi. Ketla monga, dixo epovo na tong i do xopmen dina ven kibis laxakapmek.

23 \*Do nege taradi i belengatngas tia, neni i belengatngas bok ti ne Tamak.

24 \*Do nia gi toxo lok teven gugu silok kantubu atdi, ua kopmen tara ga lok teven gugu xuren, ixo epovo xusu nedi gita bixurun mi laxakapmek. Ketla monga digara ven pam levempanga sangsangu nia aga lox i, la nedi move di belengatngas tia la ti ne Tamak.

25 Ketla anai i lox asoorun levelinga ik lok keneng at Laulis Linga atdi i lok keretna.

‘Nedi nom kopmen tavasuun at lebele ngatngas atdi saparav ia.’ ”

*Sam 35:19; 69:4*

### *Laradi Loklok Tooro Naba Vot*

26 \*La ne Iesu ga lok bok tidi, “Laradi loklok tooro naba vot. Neni Loroonan at luruturun, la ni naba si boro vana at ne Tamak. Anaba sak tiki i saparap nimi boro at ne Tamak, la neni naba tong asu levelinga mumu ia.

27 \*La nemi bok, minaba paase asuusu minia, mila nemi migara nemen eburu vam minia, ga ruka i at laaleng nenia aga ruka lugugu rak.”

\* 15:11: Jo 17:13    \* 15:12: Jo 13:34    \* 15:13: Jo 10:11; 1 Jo 3:16    \* 15:14: Mt 12:50    \* 15:17: Jo 13:34    \* 15:18: Mt 10:22; 1 Jo 3:13    \* 15:19: 1 Jo 4:5; Jo 17:14    \* 15:20: Jo 13:16    \* 15:21: Mt 5:11; Mk 13:13    \* 15:23: Lu 10:16    \* 15:24: Jo 9:41; 14:11    \* 15:26: Jo 14:26    \* 15:27: Lu 1:2; Gu 1:8,21-22

## 16

<sup>1</sup> La ne Iesu ga lok bok tidi, “Nenia agara tong axasep pam nimi mi na levempanga xusu mi noxo subu kot kantubu.

<sup>2</sup> \*Luvuttadi amgomgo dinaba sep pepe nimi xusu mi noxo vubeles bok ba uto at laraogu singising. La laaleng move naba vot, la do tara na sev amet tara atnimi, ni naba nua i do i lox i mo ri lox amomo ne Moroa.

<sup>3</sup> \*Dinaba lok na levempanga rinimi mila nedi xa xopmen dinaklen nema mi ne Tamak.

<sup>4</sup> \*La a tong pam i na rinimi, do levenaleng na vot kusu dina lok na levempanga, minaba doxoma bilong ti na levelinga rak.”

### *Lugugu At Loroonan Kaala*

La ne Iesu ga lok bok tidi xeretna, “Agoxo vaase i na levempanga at lavakpaxaru kaxat at levenanasa rak tinimi, mila aga nemen eburu minimi.

<sup>5</sup> \*Ketla monga anat pas uto ap mo lara, neni ga riki ia ude, ketla kopmen tara dom kantubu atnimi gita sue ia do, unat pas ua?

<sup>6</sup> La monga nia a tong na levempanga rinimi, kuren la lainbulu mo ira umsu nga at lorooro atnimi.

<sup>7</sup> \*Ketla a tong tuturun i rinimi. I lox avukat do nenia ana on basinge nimi. Do nenia a noxo onon, laradi loklok tooro noxo vot pasa nimi. Ketla do ana onon, nenia anaba riki aonon i ude saparap nimi.

<sup>8</sup> La do neni na vot, neni naba lox ase limixin at na lavatbung menemen do nedi di umsu mi laxakapmek la kopmen toloklok manmanton na nemen keneng atdi. La at laaleng ete, ne Moroa naba rongga linga at limixin axap.

<sup>9</sup> \*Neni naba lox ase di do di bixurun mi laxakapmek, mila kopmen dina nunu rak.

<sup>10</sup> \*Neni naba lox ase di mi loklok manmanton, mila nenia anabat pas

uto at ne Tamak la mi noxo ven bok ba ia.

<sup>11</sup> \*Neni naba lox ase di do laaleng ete at ne Moroa naba vot, mila laradi gomgo at na lavatbung menemen, ne Moroa ira lok li vam i at lavapaase la ira li lumumuat mavana ren.

<sup>12</sup> \*A ruuna bok laxalinga solo xusu ana vaase nimi min, ketla naba lolos aleng tinimi xusu mina doxoma xaka i.

<sup>13</sup> \*Ketla Loroonan Kaala naba vot, ni naba paase asu luruturun at levelinga at ne Moroa, la ni naba anasa nga nimi mi mo levelinga axap i ruturen. Ni noxo anasa nimi mi lodoxoma axa ren, ketla neni naba paase asu levempanga neni naba rongga i boro at ne Moroa la neni naba paase nimi mi levempanga move naba vot.

<sup>14</sup> Neni naba lox asilok laasen tarak mi lugugu ren, mila neni naba lok kaka levelinga rak la na anasa nimi min.

<sup>15</sup> Levempanga ne Tamak i ruuna i, mo axav i atarak. Kuren la a lok do Loroonan Kaala naba lok ka levelinga rak la ni na anasa nimi min.”

### *Lainbulu La Lomomo*

<sup>16</sup> \*La ne Iesu ga lok bok, “Noxo lox abao la mi noxo ven ia la noxo lox abao la minaba ven bok ba ia.”

<sup>17</sup> Leventaba atdi lavaun pinivu ren diga esue min kantubu atdi xeretna, “Ua lavasuun at na levelinga neni i tong i ridik? I lok do, ‘Noxo lox abao la mi noxo ven ia, la noxo lox abao bok la minaba ven ia.’ La i lok bok do, ‘Mila nenia anat pas uto at ne Tamak.’ ”

<sup>18</sup> La diga esue manga, “Ua lavasuun at na levelinga, ‘Noxo lox abao?’ Dik dixo xasep ap mo levelinga ren.”

<sup>19</sup> Iesu gaklen pam i do lavaun pinivu ren diga vara i do dina sue i mumu i na. Kuren la neni ga lok tidi, “A tong i do, noxo lox abao la mi noxo ven ia, la noxo lox abao bok la

\* 16:2: Mt 24:9; Lu 6:22; Jo 9:22

\* 16:7: Jo 14:16 \* 16:9: Jo 3:18

3:1-2 \* 16:13: Jo 14:26; 1 Jo 2:27

\* 16:3: Jo 15:21

\* 16:10: Gu 5:31; Ro 4:25

\* 16:16: Jo 14:19

\* 16:4: Jo 13:19

\* 16:11: Jo 12:31

\* 16:5: Jo 7:33; 13:36

\* 16:12: 1 Ko



minaba ven bok ba ia. La mi esue mi na xantubu atnimi, do?

<sup>20</sup> A tong tuturun i rinimi do, minabang teng la mina duudu. Ketla limixin at na lavatbung menemen dinaba momo. Minaba bulu, ketla lainbulu atnimi naba rem gili ri lomomo.

<sup>21</sup> \*Se do latkin i suma madak, neni i bulu, mila loxonaleng tin ti songot, ia vot pam. Ketla do neni ira ranga madak, neni xopmen na doxoma bok ba losongsongot teren, mila neni i momo mi lumumulum ira visik pam i.

<sup>22</sup> \*I lok kuren mun tinimi. Monga nemi mi bulu, ketla anaba ven bok ba nemi la minaba umsu mi lomomo, la kopmen tara naba lok pes mo lomomo basinge nemi.

<sup>23</sup> \*Do mo laaleng na vot, nemi noxo sue bok ba ia ri tavanga. A tong tuturun i rinimi, ne Tamak naba raba nemi mi levempanga salai nemi mina sing tin keneng at laasen tarak.

<sup>24</sup> \*Ga ruka i gano la ia se nga mo, mi goxo sing ti tevempanga xeneng at laasen tarak. Mina ngising ti tevempanga la minaba ruuna ka i, kusu lomomo atnimi naba umsu.”

### *Iesu Ira Lox Asi Vam Laxakapmek At Na Lavatbung Menemen*

<sup>25</sup> \*La ne Iesu ga lok bok tidi, “Aga vaase na levelinga rinimi mi lempapaase poovo. Ketla laaleng move naba vot la nenia xopmen a noxo tong asu bok ba lempapaase poovo. Ketla anaba vaase axasep ba i rinimi mumu ne Tamak la minaba xasep nunuan teren.

<sup>26</sup> Do mo laaleng na vot, minaba sing ne Moroa xeneng at laasen tarak. La axo tong i do nenia aba sing kusu ne Moroa naba lok tooro nimi.

<sup>27</sup> \*Nemi xa mina sing ne Tamak mila ne Tamak axa i balamu aleng nimi. I balamu nemi mila nemi mi balamu ia la mira nunu do nenia aga vas kaxat boro at ne Moroa.

<sup>28</sup> Agat pas boro at ne Tamak la aga vot nade at na lavatbung menemen. La monga ana on basinge na lavatbung menemen la anamlong manga uto at ne Tamak.”

<sup>29</sup> La lavaun pinivu ren diga lok tin, “I lox avukat, nenu mo u paase asaxaven ba, la kopmen bok ba una paase poovo.

<sup>30</sup> \*Monga maklen ba i do nenu uklen levempanga axap. Ixo epovo do tara naba sue u mi tevesusue. Anai i lok nema la ma nunu do nenu uga laa boro at ne Moroa.”

<sup>31</sup> La ne Iesu ga lok tidi xeretna, “Mi nunu ba mo, do?”

<sup>32</sup> \*Laaleng move naba vot, la nanga ia nemen pam, la minaba epe-seves basinge ia la nemi getgesara minabat pas uto laraogu atnimi. La nenia xusuk anabak lok. Ketla kopmen nenia xusuk, ne Tamak naba nemen eburu minia.

<sup>33</sup> \*Agara tong pam i na rinimi xusu minaba ruuna ka limila. Nemi minaba suma losongsongot boro at limixin at na lavatbung menemen. Ketla mina tu tuxuruxun. Ara los kimit pam laxakapmek at na lavatbung menemen.”

## 17

### *Lisingising At Ne Iesu*

<sup>1</sup> \*Melemu at na levelinga Iesu ga milik aurut uto vana at laxalibet la ni ga sing keretna, “Tamak. Laaleng ira vot pam kusu una lox asilok laasen tarak, ne Nurum, la kusu nenia, ne Nurum, anaba lox asilok laasen taram.

<sup>2</sup> \*Nenu ga raba ia mi lolos tim gomgo ri limixin axap kusu ana raba lorooro avolo rinedi, uga raba ia midi.

<sup>3</sup> \*Lorooro avolo i lok keretna. Do dinakleklen u, legesa Moroa ruturun kusuk mun la dinakleklen ia, ne Iesu Karisito, nenu ga riki ia ude.

\* 16:21: Ais 26:17    \* 16:22: Ais 66:14    \* 16:23: Mt 7:7    \* 16:24: Jo 15:11    \* 16:25: Jo 10:6  
 \* 16:27: Jo 14:21,23    \* 16:30: Jo 2:25    \* 16:32: Mt 26:31,56; Jo 8:29    \* 16:33: Jo 14:27; Ro 5:1; 2  
 Ti 3:12; 1 Jo 5:4    \* 17:1: Jo 11:41; 12:23    \* 17:2: Mt 11:27    \* 17:3: 1 Jo 5:20

4 \*Nia agara lox asilok pam laasen taram nade xopok at lavatbung menemen keretna, agara lox epovo vam lugugu uga raba ia min.

5 \*La monga, Tamak, una lox asilok laasen tarak to melamgo ram, la kerepmo una lox asuusu lisisixam tarak aga ruuna avor i ri luruntudum li at na lavatbung menemen, at levenaleng aga nemen eburu minu.”

#### *Iesu Ga Sing Ti Lavaun Pinivu Ren*

6 La ne Iesu ga sing bok keretna, “Nia aga lox asuvos laasen taram tinedi uga raba ia midi nade at na lavatbung menemen. Nedi limixin taram, la nenu uga raba ia midi la diga siam ka vam levelinga ram.

7 Monga diklen i do loklok tarak mi levelinga rak, nenu ga raba ia min la di nunu do nenia agat pas boro vana.

8 \*Nia aga raba avolo levelinga ram la diga siam ka i. Di xasep avukat do aga rupot boro vana la di nunu do nenu ga riki ia ude.

9 \*Nia a sing tidi. Nia xopmen na sing ti limixin at na lavatbung menemen ketla a sing tinedi uga raba ia midi, mila nedi ataram.

10 \*Levempanga axap tarak ik lok at lakngam, la levempanga axap taram ik lok at lakngak. La maxeneng teren uga lox asilok laasen tarak.

11 \*Nia noxo nemen nade at na lavatbung menemen, ketla nedi dinaba nemen de, la nia anaba vot pasa u. Tamak, nenu Laradi Melemelengan. Una lok tatao di mi lolos at laasen taram, neni mo laasen uga raba ia min, kusu nedi dinaba lok ngan legesara kerekngan neda ta lok ngan legesara.

12 \*At levenaleng aga nemen eburu midi, aga lok tatao di mi nom laasen uga raba ia min. Kopmen tara atdi ga seeve, ketla legesara mun atdi naba

seeve xusu na lox asoorun levelinga at Lovoang Kaala.

13 \*Monga ana vot pasa u, ketla a tong na levelinga ru at na lavatbung menemen kusu nedi na dinaba ru-una ka lomomo xerekngan lomomo rak.

14 \*Nia aga raba vam di mi levelinga ram ketla limixin at na lavatbung menemen diga belengatngas tidi. Mila nedi xopmen di mede at na lavatbung menemen, kerekngan nenia xopmen ia mede.

15 \*Lisingising tarak kopmen do una lam ka di basinge na lavatbung menemen, ketla una lok tatao di basinge mo Laradi Xapmek.

16 Nedi xopmen di mede at na lavatbung menemen kerekngan nenia kopmen mede at na lavatbung menemen.

17 \*Una suxuna di mi levelinga ram, mila levelinga ram i ruturun.

18 \*Aga riki nedi mi levelinga ram ti limixin at lavatbung menemen kerekngan mun uga riki ia ude at na lavatbung menemen.

19 \*La ana raba lorooro rak kusu ti lok tooro di la kusu nedi bok dinaba raba ruturun lorooro atnedi ri lugugu rak.”

#### *Iesu Ga Sing Ti Limixin Axap Di Nunu*

20 La ne Iesu ga sing bok ne Moroa keretna, “Kopmen ana sing kusuk tidi, ketla a sing bok tinedi vetpes dinaba nunu rak mumu levelinga atdi.

21 \*A sing u do nedi dina lok ngan mun legesara, Tamak, kerekngan mun nenu uk lok keneng tarak la nia ak lok keneng taram. Una lok li di xusu dinak lok keneng atda, la limixin mun at lavatbung menemen dinaba nunu do nenu uga riki ia ude.

22 \*Aga raba nedi mi lisisixam, kerekngan uga raba ia min, kusu

\* 17:4: Jo 4:34 \* 17:5: Jo 1:1; 17:24 \* 17:8: Jo 16:30 \* 17:9: Jo 6:37,44 \* 17:10: Jo 16:15  
 \* 17:11: Jo 10:30; 17:21 \* 17:12: Jo 6:39; 13:18; 18:9 \* 17:13: Jo 15:11 \* 17:14: Jo 15:19  
 \* 17:15: Mt 6:13; 2 Ts 3:3; 1 Jo 5:18 \* 17:18: Jo 20:21 \* 17:19: Ib 10:10 \* 17:21: Jo 4:11; Ga 3:28 \* 17:22: Gu 4:32

nedi dinaba ngan legesara, kerekngan neda di ngan legesara.

<sup>23</sup> Nenia xeneng atdi la nenu xeneng tarak, kusu nedi dinaba tu buru rinotno, la limixin at na lavatbung menemen dinabaklen i do nenu ga riki ia la uga balamu di ngan mun u balamu ia.

<sup>24</sup> \*Tamak. Uga raba vam ia midi, la a vara i xusu dina nemen eburu minia ap mo lenep nenia ana nemen e, kusu dina ven lisisixam tarak. Mo lisisixam nenu ga raba ia min, mila uga balamu ia avot ti luruntudum li at na lavatbung menemen.

<sup>25</sup> \*Tamak. Luruptuvuk taram in manton, la limixin at na lavatbung menemen kopmen dinaklen u, ketla nenia aklen u, la nedi na diklen i do uga riki ia ude.

<sup>26</sup> Aga lox asuvos u ridi, la anaba lox amisik box i, kusu labalamu u ruuna i ria naba nemen atdi, la nenia bok anaba nemen keneng atdi.”

## 18

### *Diga Ranga Alis Ne Iesu*

(Mt 26:47-56; Mk 14:43-50; Lu 22:47-53)

<sup>1</sup> \*Melemu at na lisingising, Iesu eburu mi lavaun pinivu ren diga vas kaxat la diga volo korop lasa dan Kidron. Lara laraamang olip ga nemen ap mo lenep, la ne Iesu ga vas beles go xeneng eburu mi lavaun pinivu ren.

<sup>2</sup> \*La ne Judas, mo laradi ga song araba ne Iesu, gaklen mo lenep laraamang gak lox e, mila buaang levenaleng ne Iesu eburu mi lavaun pinivu ren digat pot buru go.

<sup>3</sup> \*Lavamaasa silok mi lubang Parisi diga riki luvuttadi gugu atdi xusu dina emu mi ne Judas. Lev-entaba luvuttadi esep bok mo. La ne Judas gamgonga di uto at laraamang. Digap kip levenapti mi lenbabao, la levempanga esep atdi.

<sup>4</sup> Iesu garaklen pam levempanga axap mo ga lok do na vot parav i. Kuren la ni ga vas tangarang di la ga lok tidi, “Nege mo nemi mi reven tin?”

<sup>5</sup> La diga vorang i, “Iesu boro Nasaret.”

La ne Iesu ga lok, “Nenia vam na.” La ne Judas, laradi sosolo arup mo ga tu eburu midi.

<sup>6</sup> Se ne Iesu ga lok tidi do, “Nenia vam na,” digasko lili bilong la diga subu si ukopok at laxangka.

<sup>7</sup> La ne Iesu ga sue manga di, “Nege i mo nemi mi reven tin?”

La diga lok, “Iesu boro Nasaret.”

<sup>8</sup> La ne Iesu ga lok tidi, “Ara tong pam i do nenia vam na. Mo do nemi mi reven tia, mina ke aonon di na leventaba.”

<sup>9</sup> \*Ni ga tong i na xusu levelinga ren ni ga tong avot pam i na soxos, “Tamak, aga lok tatao avukat nedi na uga raba ia midi.”

<sup>10</sup> \*Simon Pita ga ruuna lavarise sepsep. Neni ga rev asu i la ga sep korop labaalung tino at lasaxaruki at lamaasa gomgo min. Laasen ap mo lasaxaruki ne Malkas.

<sup>11</sup> \*Iesu ga lok ti ne Pita, “Una ke xepe lavarise sepsep taram. Kereva, u doxoma i do nenia xopmen a noxo songot at langas ne Tamak gara raba vam ia min?”

### *Iesu Ga Ru Ro Melango At Ne Anas*

<sup>12</sup> Luvuttadi esep eburu mi laradi gomgo atdi la lavaeme silok me Judaia diga ranga alis ne Iesu, la diga xoxo i.

<sup>13</sup> La diga lam ka avor i uto at ne Anas. Neni ne nimino ne Kaiapas, la ne Kaiapas neni lamaasa gomgo ap mo lamaares.

<sup>14</sup> \*La neni mun na ne Kaiapas mo ga tong i ri luvuttadi amgomgo do i lox avukat do tegesa radi mun naba met nop limixin axap.

\* 17:24: Jo 12:26; 17:5    \* 17:25: Jo 8:55    \* 18:1: Mt 26:36    \* 18:2: Lu 21:37    \* 18:3: Jo 7:45

\* 18:9: Jo 17:12    \* 18:10: Lu 22:38    \* 18:11: Mt 26:39    \* 18:14: Jo 11:49-51

*Pita Ga Sok Tixirixes Ne Iesu*  
(Mt 26:69-70; Mk 14:66-68; Lu 22:55-57)

<sup>15</sup> \*Simon Pita mi lara lun pinivu bok duga mumu ne Iesu. Lamaasa gomgo gakleklen avukat mo laau, kuren la neni ga emu eburu mi ne Iesu uto xeneng at lemelua saporap loogu at lamaasa gomgo.

<sup>16</sup> La ne Pita ga nemen to maxamang at lumusmaragu. La mo laau ne Kaiapas gaklen avukar i, ga vas su ukamang, la ga tong i ri lara loolik go at lumusmaragu xusu ti siam abeles ne Pita ukeneng.

<sup>17</sup> La mo loolik go at lumusmaragu ga lok ti ne Pita, "Kereva, nenu bok pam lara atdi mo lavaun pinivu at nom laradi?"

Pita ga vorang i, "Nenia xopmen."

<sup>18</sup> Ga lamdut aleng, kuren la lavasaxaruki la lavaeme silok diga lox antos laxao la diga tu kangkan i xusu dina mamain. Kuren la ne Pita bok gat pas ugo la ga tu mamain eburu minedi.

*Lamaasa Gomgo Ga Susue Ne Iesu*  
(Mt 26:59-66; Mk 14:55-64; Lu 22:66-71)

<sup>19</sup> Ap mo mun loxonaleng lamaasa gomgo ga sue ne Iesu mumu lavaun pinivu ren la levenanasa bok teren.

<sup>20</sup> \*La ne Iesu ga lok, "Aga paase at lasaxaven ti limixin axap, la levenanasa rak aga lox i ro xeneng at laraogu singising la loogu laplavang. La limixin me Judaia digat pot buru amisik. A goxo vaase alipe tepanga.

<sup>21</sup> La tila ba u susue ia? Una sue limixin digang tonga ia. Diklen tinotno levelinga rak."

<sup>22</sup> \*Se ne Iesu ga tong i na, lara laradi rutu mu mo ga tu, ga vasa lavapaales at ne Iesu la ga lok, "I lok kapmek do u paase keretnom ti lamaasa gomgo."

<sup>23</sup> La ne Iesu ga vorang i rin keretna, "Dola nia go a vaase kapmek toxot, una tong i ri na limixin

axap do levelinga salai mo i lok kapmek. Ket do nia a tong asu levelinga ruturun, tila u vasa ia?"

<sup>24</sup> La ne Anas ga riki aonon i uto at ne Kaiapas, mi lavarooos move at lukngen. Kaiapas neni lamaasa gomgo.

*Pita Ga Sok Tixirixes Amu Manga Ne Iesu*  
(Mt 26:71-75; Mk 14:69-72; Lu 22:58-62)

<sup>25</sup> Pita move ga tu go gak lok mamain. La diga lok tin, "Nenu bok lun pinivu at nom laradi."

Ketla ne Pita ga sok tixirixes i, la ga lok, "Nenia xopmen."

<sup>26</sup> \*Lara lasaxaruki at lamaasa gomgo, neni at libibinat ap mo laradi ne Pita ga ra korop pes labaalung teren, ga lok, "Nenia a ven box u ro at laraamang olip."

<sup>27</sup> \*La ne Pita ga lok bok, "Kopmen." La ap mo mun loxonaleng laxaxak ga reng.

*Iesu Ga Tu Ro Melamgo At Ne Paelat*  
(Mt 27:1-2,11-14; Mk 15:1-5; Lu 23:1-5,9-10)

<sup>28</sup> Ga maxantamak suubu at labarakoxot lavamaasa silok diga lok ka ne Iesu boro at loogu at ne Kaiapas la uto at loogu nunuan at laradi gomgo boro Rom, laasen teren ne Pontias Paelat. Limixin me Judaia di goxo pubeles go xeneng at loogu nunuan mila diga xopara i xusu dina lox abilinga lorooro atdi at lemeren ne Moroa, la di noxo epovo do dina anan at leluxa at Lovovolo Pe.

<sup>29</sup> Kuren la ne Paelat ga vas su vot pasa di ro xamang la ga sue di xeretna, "Lavanga salai mo nemi mi vaase mumu na laradi min?"

<sup>30</sup> La diga vorang i xeretna, "Mo do neni xopmen laradi xapmek, ixo epovo xusu nema giba lok ka i ude saporav u."

<sup>31</sup> \*Paelat ga lok tidi, "Nemi xa mina lok ka i la mina rongalinga ren

\* 18:15: Jo 20:3; 21:20; Gu 3:1; Mt 26:58 \* 18:20: Mt 26:55; Jo 7:26 \* 18:22: Gu 23:2 \* 18:26: Jo 18:10 \* 18:27: Jo 13:38 \* 18:31: Jo 19:6-7; Gu 18:15

kerekngan Laulis Linga atnimi i tong i.”

La diga lok, “Nemi boro Rom kopmen mina mulus tinama do mana sev amet taradi.”

<sup>32</sup> \*Anai levelinga atdi ga soxos ti levelinga ne Iesu ga tong i mumu lanmet salai naba vot tin.

<sup>33</sup> Paelat gamlong ukeneng at loogu nunuan la ga ro ka ne Iesu la ga lok tin, “Kereva, nenu loorong at limixin me Judaia?”

<sup>34</sup> Iesu ga vorang i rin keretna, “Na lususue u sue ia min ataram axa, kopla teventaba vetpes di tong i ru?”

<sup>35</sup> \*Paelat ga vorang amlong i rin keretna, “Kereva, u doxoma i do nenia boro Judaia? Limixin axa ram la lavamaasa silok atdi, nedi di song araba ia minu. Lavanga salai uga lox i?”

<sup>36</sup> Iesu ga lok, “Nenia xopmen ana lok ngan lavaorong mede at na lavatbung menemen. Mo do nenia gi lok ngan di, luvuttadi di mumu asu ia giba esep eburu mi luvuttadi amgomgo xusu di noxo ranga alis ia. Lixitkis orong tarak kopmen mede xopok at na lavatbung menemen.”

<sup>37</sup> \*La ne Paelat ga sue, “Kereva, nenu loorong?”

Iesu ga vorang i rin keretna, “I raturun do nenia loorong. Lavasuun at lovotpot tarak ti na lavatbung menemen i lok keretna, ana tong asu luruturun. Do luruturun ik lok at tara, neni ing tonga ia.”

<sup>38</sup> Paelat ga sue i, “Lavanga salai nom luruturun?”

La ne Paelat gamlong amu manga uto xamang ti luvuttadi amgomgo la ga lok tidi, “Kopmen nia ana vuse ka tavasuun kusu ti sev amet na laradi.

<sup>39</sup> Ketla lara loklok atnimi do amisik ak soxomus asu laradi xokoxo at leluxa at Lovovolo Pe. Kereva, i epovo do ana soxomus asu loorong at limixin me Judaia rinimi?”

<sup>40</sup> La diga vorang ne Paelat mi luxupkup silok keretna, “Kopmen tinotno. Una soxomus asu ne Barabas.” Barabas neni laradi sep sev amet tadi la laradi sep paxat panga.

## 19

### *Paelat Ga Lok Li Lumumuat Mavana At Ne Iesu*

<sup>1</sup> La ne Paelat ga lox aonon ne Iesu xusu luvuttadi esep dinak pixis i.

<sup>2</sup> \*La luvuttadi esep diga vele lavatkiam tin mi livin gagas la diga lok li i ro at lavatlak teren. Diga lok ka labantamon memele at loorong la di ga lok li box i at ne Iesu.

<sup>3</sup> \*La digat pas li ren la diga saba xangka i, diga lok keretna, “Ma emi asu minu, loorong me Judaia.” La melemu diga pasa lemeren.

<sup>4</sup> \*Paelat ga vas su amu manga uto xamang la ga lok ti limixin, “Mina ronga i na. Ana lok ka i ude xamang tinimi, xusu miba xasep do axo ka tavasuun kusu ti lok li lumumuat teren.”

<sup>5</sup> La ne Iesu ga vas su ukamang mi lavatkiam diga vele i mi laban gagas la labantamon memele. La ne Paelat ga lok tidi, “Mina ven i. Neni nga na laradi.”

<sup>6</sup> \*Se lavamaasa silok la luvuttadi silok at loogu laplavang diga ven ne Iesu, diga xup keretna, “Paxarem i ro at laxaba! Paxarem i ro at laxaba!”

Paelat ga lok tidi, “Nemi xa mina lok ka i, la mina vaxarem i ro at laxaba. Nenia axo vuse ka tavasuun kusu ti lok li lumumuat teren.”

<sup>7</sup> \*Luvuttadi amgomgo diga lok tin keretna, “I epovo do neni na met mila ni ga los polo Laulis Linga atnama, i lok do neni ne Nitna ne Moroa.”

<sup>8</sup> Se ne Paelat ga ronga mo levelinga, neni ga marat aleng.

<sup>9</sup> \*Neni gamlong uto xeneng at loogu nunuan la ga sue ne Iesu

\* 18:32: Mt 20:19; Jo 3:14; 12:33    \* 18:35: Jo 1:11    \* 18:37: 1 Ti 6:13; Jo 8:47    \* 19:2: Lu 23:11  
 \* 19:3: Jo 18:22    \* 19:4: Jo 18:38    \* 19:6: Jo 18:31    \* 19:7: Mas 24:16; Jo 5:18    \* 19:9: Mt 26:62-63; 27:12; Lu 23:9

xeretna, “Nenu uga laa meva?” Ketla ne Iesu goxo vorang lususue ren.

<sup>10</sup> La ne Paelat ga lok tin, “U xopara una vaase ria? Una xasep do a ruuna lolos kusu ti soxomus asu u, la ri vaxarem box u at laxaba.”

<sup>11</sup> \*Iesu ga lok tin keretna, “U ruuna lolos mavana rak mila ne Moroa mun ga raba u min. Na lavanga u lox i ria i lok kapmek, ketla mo laradi ga song araba ia ru, laxakapmek teren i silok aleng.”

<sup>12</sup> \*Se ne Paelat ga ronga i na, neni ga lok tong pen i do na vuse ka tangas kusu ti soxomus asu ne Iesu. Ketla luvuttadi amgomgo diga xup silok keretna, “Mo do una soxomus asu i, i ven ngan ta do nenu xopmen lentangas at ne Kaisar. Nom laradi ga lox asilox i ngan loorong, kuren la neni laradi munepen mi ne Kaisar.”

<sup>13</sup> Se ne Paelat ga ronga na levelinga, neni ga lam asu ne Iesu ukamang la ni ga xis kopok to at loxot kitkis ting tonga linga, laasen teren do, “Langas Uat.” At lavapaase Ibru diga tong i do Gabata.

<sup>14</sup> Na levempanga ga ravasu at lasangaun mi legepu xonaleng at laaleng gagas ti mo laaleng at leluxa at Lovovolo Pe.

La ne Paelat ga lok ti mo limixin, “Loorong atnimi na.”

<sup>15</sup> Diga xup silok keretna, “Sev amer i. Sev amer i. Paxarem i ro at laxaba.”

Paelat ga sue di xeretna, “Kereva, mi vara i do ana vaxarem loorong atnimi ro at laxaba?”

La lavamaasa silok diga vorang i rin keretna, “Loorong mun atnema ma ruuna i, neni ne Kaisar.”

<sup>16</sup> La ne Paelat ga song araba ne Iesu ridi xusu dina vaxarem i ro at laxaba. La luvuttadi esep diga lok ka ne Iesu.

*Diga Vaxarem Ne Iesu  
At Laxaba  
(Mt 27:32-44; Mk 15:21-32; Lu 23:26-39)*

<sup>17</sup> La ne Iesu ga vas su la ga sosolok laxaba ren la gat pas uto at loxot,

laasen teren, “Lavatlak Tongan.” At lavapaase Ibru, laasen teren do Golgata.

<sup>18</sup> Mo go diga vaxarem ne Iesu ro at laxaba. La diga vaxarem bok legepu radi at luxaba, lara saparap lekngen tino ne Iesu la lara saparap lekngen kia. La ne Iesu ga merem kantubu atdu.

<sup>19</sup> La ne Paelat ga malagan langas linga la diga lok li i ro vana at laxaba. Mo levelinga ga lok keretna, IESU BORO NASARET, LOORONG AT LIMIXIN ME JUDAIA.

<sup>20</sup> La buaang atnedi limixin me Judaia diga us i na, mila mo loxot diga vaxarem ne Iesu ren, kopmen goxo vaxalom boro at lemenemen silok, Jerusalem. Na langas linga diga malagan i at lempapaase Ibru, Latin la Grik.

<sup>21</sup> La lavamaasa silok diga lok ti ne Paelat, “Nemen uta malagan i do, ‘Loorong at limixin me Judaia.’ Ketla una malagan i do, ‘Na laradi ga lok do neni loorong at limixin me Judaia.’”

<sup>22</sup> La ne Paelat ga lok, “Lavanga salai ara malagan pam i, keke i xuren.”

<sup>23</sup> Melemu at luvuttadi esep diga vaxarem ne Iesu ro at laxaba, diga lok ka levempanga singsiga ren la diga epes i ri lavanuet beleben, i epovo ri lavanuet luvuttadi esep. Ketla diga ke be lavanga singsiga ren boro maxeneng, mo lavanga singsiga di goxo sok gatga li toxot teren. Limixin diga lox i ngan legesa bantamon, ga ruka i ro vana la ukopok epopolo.

<sup>24</sup> La luvuttadi esep diga lok tinedi getgesara, “Nemen gat dik guta ba koxorov i, ata lu buru mi lengkonuat kusu ti lok kisip ka nege ba lok ka i.”

Anai ga vot kusu ti lox asoorun levelinga xeneng at Lovoang Kaala. I lok keretna,

“Diga epes levempanga singsiga rak kantubu atdi, la diga lu buru mi lengkonuat kusu ti lok kisip

\* 19:11: Jo 10:18; Gu 2:23; Ro 13:1 \* 19:12: Lu 23:2; Gu 17:7

ka nege ba lok ka labantamon tarak.” *Sam 22:18*

La luvuttadi esep diga lox i xerepmo.

<sup>25</sup> \*Leventaba lavakin diga tu aurret saparap laxaba at ne Iesu. Nenen, la neton ne Maria, la ne Maria ni latkin at ne Klopas, la ne Maria Magdalene.

<sup>26</sup> \*Iesu ga ven nenen eburu mi lun pinivu ren, neni ga vavara alengi, duga tu go. Kuren la neni ga lok ti nenen keretna, “Neni lamdak taram.”

<sup>27</sup> La neni ga lok ti lun pinivu ren keretna, “Neni nenam.” Ga ruka i ap mo loxonaleng mo lun pinivu ga lok ka i xusu na lok tatao i ro xolonu ren.

*Lanmet At Ne Iesu*  
(*Mt 27:45-56; Mk 15:33-41; Lu 23:44-49*)

<sup>28</sup> \*Melemu ne Iesu gaklen i do levempanga axap mo diga lok axap pam i ri lox asoorun levelinga xeneng at Lovoang Kaala mumu i. Neni ga lok, “Nia a minu.”

<sup>29</sup> \*Lara lavatbuxom tuntu mo ga nemen go, ga umsu mi lavaen mamo. Diga lox abeles loxonbantamon teren la diga lok li i at loxonuna isop, la diga lox aurur i saparap lungusno at ne Iesu.

<sup>30</sup> Iesu ga in mo lavaen la melemu ga lok keretna, “I xap ta.” La lavatlak teren ga riding si la neni ga met.

*Laradi Esep Ga Bo Labangbaangis At Ne Iesu Mi Lososo*

<sup>31</sup> \*Mo laaleng ni laaleng gagas, la laaleng melemu ren ni laaleng kaala, la luvuttadi amgomgo di goxopara i do labarongan nak lok at larakaba at laaleng kaala, mila ti mo laaleng kaala, ni laaleng silok tinotno. Kuren la diga sue ne Paelat do luvuttadi esep dina sep pit lengkangkedek at luvuttadi diga vaxarem di at larakaba xusu dinaba remet soso la dina lox asi nedi basinge larakaba.

<sup>32</sup> Kuren la luvuttadi esep digat pas la diga sep pit lengkangkedek

ap mo luradi duga merem at luxaba saparap ne Iesu.

<sup>33</sup> Ketla se diga vot go saparap ne Iesu, diga ven i do neni ga met pam. Kuren la di goxo sep pit luxangkedek teren.

<sup>34</sup> Ketla lara laradi esep ga bo rup mi lososo ro at labangbaangis at ne Iesu la soso mun lada eburu mi ladan ga sen su.

<sup>35</sup> \*Lara laradi ga ven na levempanga, neni i paase asu i ri limixin la levelinga ren i ruturun. La iklen i do levelinga ren i ruturun la i tong asu i xusu nemi bok mina nunu at ne Iesu.

<sup>36</sup> \*Na levempanga ga ravasu xusu ti lox asoorun levelinga at Lovoang Kaala, i lok keretna, “Kopmen tekosi ren naba repit.” *Pas 12:46*

<sup>37</sup> \*La lara lenep at Lovoang Kaala i lok bok keretna, “Limixin dinaba ven ti mo laradi diga bo i mi lososo.” *Sak 12:10*

*Digak Mit Labantuxu At Ne Iesu*

(*Mt 27:57-61; Mk 15:42-47; Lu 23:50-55*)

<sup>38</sup> \*Melemu at nai, Josep boro at lemenemen Arimatia, ga sing ne Paelat do ni na lok ka labantuxu at ne Iesu. Josep neni lun pinivu at ne Iesu. Ketla neni goxo mumu i at lasaxaven mila neni ga marat at luvuttadi amgomgo. Paelat ga tong i rin do i epovo do ni na lok ka labantuxu at ne Iesu. Kuren la ne Josep gamlong la ga lox asi labantuxu ren.

<sup>39</sup> \*Nikodimas, gano ga mu bung kusu na vaase mi ne Iesu, neni ga emu mi ne Josep, gap kip laxadan somavak ti lok li at labantuxu at ne Iesu. Mo ladan ga mumuat aleng.

<sup>40</sup> Nedu duga lok kaka labantuxu at ne Iesu la duga vaxais i mi labantamon di bom tongan min la duga lok li laxadan somavak teren. Kerepmo limixin me Judaia diga mumu asu i na ngan leretere atdi.

\* 19:25: Mt 27:55-56 \* 19:26: Jo 13:23 \* 19:28: Sam 22:15 \* 19:29: Sam 69:21 \* 19:31: Lal 21:22-23 \* 19:35: Jo 21:24 \* 19:36: Kex 9:12; Sam 34:20 \* 19:37: Li 1:7 \* 19:38: Jo 7:13 \* 19:39: Jo 3:1-2

41 Lara laraamang mo ga nemen saparap mo loxot diga vaxarem li ne Iesu ren, la keneng teren lara lamaaut maxat mo gak lok, la limixin di goxovisi na li rongan go. 42 Mo lamaaut ga nemen auret, kuren la diga lok li soso mun ne Iesu mila mo laaleng ni laaleng gagas at limixin me Judaia ri laaleng kaala.

## 20

### *Iesu Ga Roo Xat Amlong At Lanmet*

(Mt 28:1-8; Mk 16:1-8; Lu 24:1-9,12)

1 No mene maxantamak suubu at laaleng avot ap mo luik, lavanga move gak lok main. Ne Maria Magdalene gat pas uto at lamaaut la ga ven i do leventaba diga xuvun pes pam luuat boro at lungusungus at lamaaut.

2 \*Ni ga sixit kaxat la ga vot pasa ne Simon Pita la lara lun pinivu bok, ne Iesu ga vavara aleng tin, la ga lok tidu xeretna, "Dira lok ka vam Leeme Silok boro at lamaaut la nema maxoklen i do di lok li i ua."

3 La ne Pita mi mo lara lun pinivu duga vas kaxat uto at lamaaut.

4 La dugak sixit, ketla mo lara lun pinivu ga sixit polo ne Pita la ga vot avot to at lamaaut.

5 Ni ga rikbu si ukopok la ga ven lenbantamon mikmit tongan, ketla ni goxo vubeles ukeneng.

6 Ga melemu ren ne Simon Pita, la ni ga vubeles epolo ukeneng at lamaaut. Ni ga ven lenbantamon mikmit tongan gak midi go,

7 \*la mo loxontamon diga vaxais kangkan lavatlak at ne Iesu min, goxok midi eburu mi lenbantamon mikmit tongan, ketla ga repes pam la gak midi at lenep petpes.

8 Melemu mo lara lun pinivu, mo ga rupot avot to at lamaaut, neni bok ga vubeles ukeneng la ni ga ven i la ga nunu do ne Iesu ga roo xat pam.

9 \*Du goxovisi na xasep at levelinga at Lovoang Kaala, ga tong i do neni naba roo xat amlong bok basinge lanmet.

10 Melemu dugamlong uto xolonu.

### *Iesu Ga Ru Asuvos Ti Ne Maria Magdalene*

(Mt 28:9-10; Mk 16:9-11; Lu 24:10-11)

11 Maria mo ga tu go maxamang at lamaaut. Neni gang teng, la ga rikbu beles ukeneng at lamaaut,

12 la ga ven luangelo go, duga siga levempanga bunbun, la dugat kis at lenep labantuxu at ne Iesu gak midi e. Lara ro at lavatlak la lara ro at luxangkedek.

13 La duga sue i, "Latkin, ung teng atla?"

La ni ga lok, "Di lok ka vam Leeme Silok tarak uto, la axoklen i do di lok li i ua."

14 \*Se neni ga vaase axav i na, neni ga rem gili la ga ven ne Iesu ga tu go. Ketla neni goxoklen i do neni ne Iesu.

15 Iesu ga sue i, "Latkin, ung tingis laai? La nege mo nu u reven pupuke rin?"

Maria ga nua i do, neni laradi loklok tatao ap mo laraamang. Kuren la neni ga lok tin, "Mo do ura lok ka vam i uto, tong axasev ia do u lok li i ua, la abat pas la ana lok ka i."

16 Iesu ga lok tin, "Maria."

La ne Maria ga rem gili la ga vaase mi lavapaase Ibru, "Raboni." Lava-suun teren keretna, leeme loklox ase.

17 \*Iesu ga lok tin, "Nemen uta ranga tu rak, mila a xovisi ana onon uto vana at ne Tamak. Ketla una vot pasa luvutnetak la una tong i ridi do anamlong be uto at ne Tamak, neni ne Temen nimi bok, Moroa rak, neni ne Moroa bok atnimi."

18 La ne Maria Magdalene ga onon la ga tong i ri lavaun pinivu do neni ga ven pam Leeme Silok la ga tong levelinga at ne Iesu ridi.

\* 20:2: Jo 13:23 \* 20:7: Jo 11:44 \* 20:9: Gu 2:24-32; 1 Ko 15:4 \* 20:14: Lu 24:16; Jo 21:4

\* 20:17: Ro 8:29; Ib 2:11-12



*Iesu Ga Vot Asaxaven  
Ti Lavaun Pinivu Ren  
(Mt 28:16-20; Mk 16:14-18; Lu  
24:36-49)*

<sup>19</sup> \*Ga ukantinao at laaleng avot ap mo luik lavaun pinivu digak lok eburu ro xeneng at lara loogu la diga soxoba pe axap levenmusmaragu mila diga e amarat at luvuttadi amgomgo. La ne Iesu ga vot la ga ru go xantubu atdi, la ga lok, "Limila nak lok eburu minimi."

<sup>20</sup> \*Melemu at levelinga ren, neni ga vaxase lavaun pinivu ren mi lukngen la labangbaangis teren. La diga umsu mi lomomo ap mo loxonaleng diga ven Leeme Silok.

<sup>21</sup> \*La ne Iesu ga lox amu manga ridi, "Limila nak lok eburu minimi. Ne Tamak ga riki ia, kuren la nenia bok, ana riki nimi."

<sup>22</sup> La ni ga mas asu lamamas teren tidi la ga lok tidi, "Mina lok kaka Loroonan Kaala.

<sup>23</sup> \*Do mina doxoma xepe leveloklok kakapmek at tara, i lok ngan ne Moroa i doxoma xepe i. Do mixo doxoma xepe leveloklok kakapmek at tara, i lok ngan ne Moroa xopmen na doxoma xepe i."

*Iesu Ga Ru Asuvos Ti Ne Tomas*

<sup>24</sup> \*Tomas, laasen bok teren ne Didimas, neni lara at lasangaun mi legepura lavaun pinivu at ne Iesu. Neni goxok lok eburu mi lavaun pinivu ap mo laaleng ne Iesu ga vot pasa di.

<sup>25</sup> Diga tong i rin do diga ven Leeme Silok la ni ga lok tidi keretna, "Do a noxo ven levenin kooxing at lukngen la ana long tu ren la na long tu bok at labangbaangis teren, nenia a noxo nunu do neni ga roo xat amlong basinge lanmet."

<sup>26</sup> Melemu at lavanuti aleng, lavaun pinivu diga nemen manga ap mo loogu, Tomas bok mo gak lok. La diga soxoba pe axap levenmusmaragu, ketla ne Iesu ga

vot la ga ru xantubu atdi la ga lok tidi xeretna, "Limila na nemen eburu minimi."

<sup>27</sup> La ni ga lok ti ne Tomas, "Una long tu de, una ven lukngak. Una song asu mi lakngam la una long tu at labangbaangis tarak. Nemen lo-doxoma ram na sixit ekarakat, ketla una nunu rak."

<sup>28</sup> La ne Tomas ga lok tin, "Nenu Leeme Silok tarak la lo Moroa rak."

<sup>29</sup> \*La ne Iesu ga lok tin, "Ura ven pam ia, kuren la u nunu rak. Luvukat nabak lok tinedi di xovisi na ven ia, ketla di nunu rak."

<sup>30</sup> \*Iesu ga lok buaang levempanga sangsangu ro melamgo at lavaun pinivu ren, la levelinga ren kopmen nak lok at na lubuk.

<sup>31</sup> \*Ketla leventaba levempanga sangsangu ik lok at na lubuk kusu mina nunu do ne Iesu neni Lanarong la Nitna ne Moroa. La do mina nunu ren, minaba ruuna ka lorooro avolo at laasen teren.

## 21

*Lavanga Sangsangu Mumu Lax-  
amat*

<sup>1</sup> Melemu ne Iesu ga ru asuvos ti lavaun pinivu ren to saparap lavatdan kis, Tiberias. Ga ravasu xeretna.

<sup>2</sup> \*At lara laaleng ne Simon Pita, la ne Tomas, laasen bok teren ne Didimas, la ne Natanael boro Kena at lenep silok Galili, la lumdak at ne Sebedi, la lara lun pinivu bok digak lox eburu.

<sup>3</sup> La ne Pita ga lok tidi, "Nenia anat pas kusu ti sep mat." La diga lok tin, "Nema bok mana emu minu." La nedi axap diga vas kaxat la diga los kas at lese pang la digatla xat. Ketla ap mo laxanimin di goxo sep ka tepenmat.

<sup>4</sup> Maxantamak suubu ne Iesu ga ru ro loxon, ketla lavaun pinivu di goxo ven kibis i.

\* 20:19: Jo 19:38 \* 20:20: Jo 16:22; 19:34; 1 Jo 1:1 \* 20:21: Jo 17:18 \* 20:23: Mt 16:19  
\* 20:24: Jo 11:16; 14:5; 21:2 \* 20:29: 1 Pi 1:8 \* 20:30: Jo 21:25 \* 20:31: Jo 3:15; Ro 1:17; 1 Jo  
5:13 \* 21:2: Jo 1:45-51; 20:24 \* 21:5: Jo 20:14; Lu 24:41

5 \*Neni ga toro ridi xeretna, “Lox-ongkulao. Kereva, mi sep ka tevenmat?”

La diga vorang i rin keretna, “Kopmen.”

6 \*La ni ga lok tidi xeretna, “Mina lu mi laxatkat atnimi ro at lenep tino at lese pang la mina sep ka tevenmat.” Diga lox i xuren la di goxo epovo na sat amlong laxatkat mila ga umsu mi laxanmat solo.

7 \*La mo lun pinivu ne Iesu ga vavara aleng i, ga lok ti ne Pita, “Leeme Silok mo.” Pita ga ronga i nom la soso mun ni ga etara lavanga singsiga ren, no ni ga lok kepe i, la ga los si uto at ladan la ga xobok uto loxon.

8 Lavaun pinivu diga mumu mi lese pang, diga sasat laxatkat ga umsu mi laxanmat, mila digak lox auret mun loloxon. (100 meters)

9 Se diga oso, diga ven laxao mi levenmat gak lok teren la diga ven bok lengkongkide ga nemen saparap laxao. 10 La ne Iesu ga lok tidi, “Mina lok ka tevenmat at nom ude.”

11 \*La ne Simon Pita ga los kas at lese pang la ga oso mi laxatkat, ga umsu mi laxanmat silok ga epovo at legesa sangaun kobot mi lavalimo sangaun mi lavantun (153). Laxanmat solo ketla laxatkat kopmen goxo rem das.

12 La ne Iesu ga lok tidi, “Ude nimi la mina anan be.” Kopmen tara atdi lavaun pinivu gita sue i do neni nege mila digaklen i do neni Leeme Silok.

13 \*La ne Iesu gat pas la ga lok kaka lengkongkide la ga raba di min la ga raba bok di mi levenmat.

14 \*Na lovtopot sev avantun at ne Iesu saparap lavaun pinivu ren melemu at laxakatu kaxat amlong teren at lanmet.

### *Iesu Ga Epaase Mi Ne Pita*

15 \*Se diga an axap pam, Iesu ga sue ne Simon Pita, “Simon, lamdak at ne Jon. Kereva, labalamu ram tia

i silok aleng ti labalamu ram ti na luvuttadi?”

Ni ga vorang i rin keretna, “Laaba, Leeme Silok. Uklen i do a balamu u.”

La ne Iesu ga lok tin, “Una raba luxa laxannat sipsip tarak.”

16 \*La ne Iesu ga sue manga i, “Simon, lamdak at ne Jon. Kereva, u balamu ruturun ia?”

La ni ga vorang i, “Laaba, Leeme Silok. Uklen i do a balamu u.”

La ne Iesu ga lok tin, “Una lok tatao levesipsip tarak.”

17 \*La ne Iesu ga sue sev avantun box i xeretna, “Simon, lamdak at ne Jon. Kereva, u balamu ia?”

La ne Pita ga lok tuntun mila ne Iesu ga sue sev avantun box i, “Kereva, u balamu ia?” La ni ga lok ti ne Iesu, “Leeme Silok, ukleklempanga axap, uklen i do nia a balamu u.”

La ne Iesu ga lok tin, “Una raba luxa levesipsip tarak.

18 A tong tuturun i. Ga se nenu laau maxat mene, uga siga lempanga singsiga ram la ugat pas mu lavavara ram. Ketla do una sioxo, unabang song asu mi lukngam la tara vetpes nabak paxasiga u la dinabam lam ka u uto at lengkot u noxopara unat pas uve.”

19 \*Iesu ga tong i na xusu na lox ase ne Pita mi lanmet salai ni naba met teren kusu na lox aurut laasen at ne Moroa. La ni ga lok ti ne Pita, “Una mumu asu ia.”

20 \*Pita ga rem gili la ga ven i do mo lun pinivu ne Iesu ga vavara aleng i, ga mumu asu du. Neni mo lara ga sep sogo at lobongobong at ne Iesu at laanan kaala la ga lok tin, “Leeme Silok, nege ba song araba u ri limixin kakapmek?”

21 Pita ga ven i la ga sue ne Iesu, “Leeme Silok, lempanga salai mo ba vot saparap na laradi?”

22 \*Iesu ga vorang i rin keretna, “Do nenia a vara i do neni na rooro

\* 21:6: Lu 5:4-7 \* 21:7: Jo 13:23; Mt 14:29 \* 21:11: Lu 5:6 \* 21:13: Jo 6:11 \* 21:14: Jo 20:19,26 \* 21:15: Mt 26:33; Jo 1:42 \* 21:16: Gu 20:28 \* 21:17: Jo 13:38; 16:30 \* 21:19: Mt 16:24-25; Mk 1:17; 2 Pi 1:14 \* 21:20: Jo 13:23-25 \* 21:22: Mt 16:28

se at lomlong tarak, nemen uta doma solo i nom. Nenu una mumu asu ia.”

<sup>23</sup> Lavaun pinivu diga ronga na levelinga la diga tong i ri limixin nunu do mo lun pinivu noxo met. Ketla ne Iesu goxo tong i xuren, neni ga lok mun keretna, “Do nenia a vara i do neni na rooro se at lomlong tarak, nemen uta doma solo i nom.”

<sup>24</sup> \*Mo lun pinivu ga ven na lempanga la ga malagan levelinga at na lubuk, la maklen i do levelinga ren i ruturen.

<sup>25</sup> \*Iesu ga lok lempanga vetpes bok i buaang aleng. Do tara na malagan ali na lempanga axap, agut laxanbuk naba umsu aleng la na lavatbung menemen axap noxo epoverin.

**Leven Gugu**  
**Leven Gugu At Luvuttadi**  
**Vavang**  
**Levelinga Loklox**  
**Axasep**  
**Lumaares 61-62 A.D.**

Luk ga malagan na lubuk ti ne Tiopilas. Avot tinotno ri na lubuk, Luk ga malagan la ga lox axasep lev-entetere la levempapaase la lorooro at ne Iesu keneng at lubuk Luk. Nai lubuk ne Luk ga malagan i kusu ti lox axasep ne Tiopilas ti lempanga salai luvuttadi vavang at ne Iesu diga lox i melemu at lanmet teren. Lentaba leventetere at nai diga re i ri ne Luk, ketla lentaba neni ga xasep teren mila neni ga emu mi ne Pol. Kuren la keneng at luvut silok 16, ta ven i do Luk ga vot pasa ne Pol la ga emu min. Na lubuk i ruuna lavantun lengkot silok. Avot tinotno i lox ase dik mi luvuttadi vavang diga ruuna ka Loroonan Kaala ro Jerusalem la diga ruka lugugu. Melemu i lox ase dik do diga vavang la limixin diga beles keneng at luutus atnedi, limixin to at lengkot Judaia la Samaria. I lox ase bok dik do mo Lagale Lavavang mumu ne Iesu ga epeseves la buaang nedi limixin at na lavatbung menea- men diga rongga i. Na lubuk i lox ase dik do Loroonan Kaala ga raba lolos ti limixin nunu kusu dina lok buaang lempanga sangsangu kusu buaang nedi limixin diba nunu at ne Iesu.

**Lengkot silok keneng at na lubuk**

*1:1-5:42* Lurutu kaxat la lusuusu atnedi diga nunu.

*6:1-9:31* Limixin nunu di ekip tangar- ang mi levesongsongot.

*9:32-12:25* Lempapaase mumu levempavang at ne Pita.

*13:1-14:28* Lavatpas avot at ne Pol.

*15:1-41* Luvuttadi amgomgo diga vot buru ro Jerusalem.

*16:1-18:23* Lavatpas sepsev agepura at ne Pol.

*18:24-21:14* Lavatpas sepsev avan- tun at ne Pol.

*21:15-28:31* Larangtanga alis la lavatpas at ne Pol uto Rom.

<sup>1</sup>\*Saparap leeme silok ne Tiopilas.

At lovoang avot tarak aga malagan axasev u mi lempanga ne Iesu ga lox i la ga anasa min, ga ruka i ap mo laaleng ni ga vaxaru kaxat leven gugu ren,

<sup>2</sup>\*se at laaleng ne Moroa ga lam kaka i uto vana at laxalibet. Gox- ovisi ni goxo urut uto vana la ni ga vaase mi levelinga at Loroonan Kaala rinedi luvuttadi ni ga soxolik ka nedi do luvuttadi vavang teren.

<sup>3</sup>\*At lavanuet sangaun aleng melemu at lanmet teren, ni ga ru asuvos tinedi luvuttadi vavang teren ti lox asuusu i do ni i ruturun mo gara roo xat amlong pam basinge lanmet, la nedi axap diga ven i. La ni ga paase axasep limixin mumu Linintoo at ne Moroa.

<sup>4</sup>\*At lara laaleng diga vot pasa i la ni ga raba nedi mi lavapaase ali la ga tong lolos i ridi xeretna, "Nemen mita vas kaxat basinge lemenemen Jerusalem. Ketla mina nemen tangais laramtaba ne Tamak ga vaase ali min tinimi, i ngan nia aga tong pam i rinimi xeretna.

<sup>5</sup>\*Jon ga sep susu nimi mi ladan, ketla noxo lox abao bok ba la minaba lok kaka lesepe susu at Loroonan Kaala."

*Moraa Ga Lam Kaka Ne Iesu Uto Vana At Laxalibet*  
*(Mt 28:16-20; Mk 16:19-20; Lu 24:50-53)*

<sup>6</sup>\*At lara laaleng luvuttadi vavang digak lok eburu mi ne Iesu la diga sue i, "Leeme Silok. Kereva, uba riki xepe bok leme Rom, kusu nedik axa mede Israel ataba lok tatao nedik at na levenaleng?"

\* **1:1:** Lu 1:3    \* **1:2:** Mk 16:19; Lu 24:49-51    \* **1:3:** Lu 24:36-49; Gu 10:41    \* **1:4:** Lu 24:49; Jo 14:16-17; Gu 2:33    \* **1:5:** Mt 3:11    \* **1:6:** Lu 24:21    \* **1:7:** Mk 13:32

7 \*Iesu ga vorang i ridi xeretna, “Ne Tamak axa ga lok katling pam mo laaleng mo lavanga naba rupot teren, la ixo epovo xusu minaklen i do at ua laaleng.

8 \*Ketla nemi minaba umsu mi lolos at laaleng Loroonan Kaala na vubeles atnemi. La minaba paase katling mi lorooro rak tinedi limixin to at lemenemen silok Jerusalem, la to bok at lengkot axap at lunep silok Judaia la Samaria, la to at lengkot axap bok at na lavatbung menemen kopok.”

9 \*Melemu at na levelinga ren, Moroa ga lam kaka i upana la loxon-takabu ga lok pe i basinge levereven atnedi.

10 \*Nedi move diga reven lolos mu at ne Iesu upana at lamavangkap la soso mun lura luradi duga siga levesingsiga bunbun duga ru saparap nedi.

11 \*La duga lok, “Luvuttadi me Galili, laai mo mi tu mu i la mia reven upana at lamavangkap? Na ne Iesu, ne Moroa i lam kaka i basinge nemi uto vana, ni nabamlong bok kerekngan tai mo nemi mi ven i, i urut uto vana at laxalibet.”

### *Diga Soxolik Ka Lara Ri Lok Kun Ne Judas*

12 \*Melemu luvuttadi vavang digamlong uto Jerusalem boro at loxongkaana, laasen teren, Lakaana Olip, ik lok saparap lemenemen silok Jerusalem.

13 \*Diga rupot to at lemenemen silok Jerusalem la diga vubeles uto vana at loogu diga nemen teren. Pita, Jon, Jems la ne Endru, Pilip la ne Tomas, Batolomiu la ne Metiu, Jems nitna ne Alpias, Simon neni at lubang mixin me Selot. La ne Judas nitna ne Jems.

14 \*Digat pot eburu amisik mi lentaba lavakin la ne Maria nenen

ne Iesu mi luvutneton ngan loxonbinam tadi xusu dina ngising.

15 At lara laaleng Pita ga xatu kaxat kantubu atnedi legesa sangaun kobot mi legepu sangaun (120) luvuttadi nunu.

16 \*La ga lok tidi, “Luvutnetak mi luvurinu, levelinga keneng at Lovoang Kaala migomgo na ira soorun, kerekngan Loroonan Kaala ga tong asu i at lengkompixan at ne Devit, mu ne Judas. Neni laradi gam gomgo rinedi luvuttadi xusu dina ranga alis ka ne Iesu.

17 Judas neni mo lara atnedik ga gugu eburu minedik.”

18 \*Ni ga lok ka luunun ti mo laxakapmek teren, la neni ga un kaka loxongkangka min. Ni ga subu go la lorongtong teren gara repagam la labantine ren ga sixisu nga ukamang.

19 La nedi limixin axap diga nemen go Jerusalem, diga ronga mo lavanga, la diga so asen mo loxongkangka at lavapaase axa atdi, do Akeldama, lavasuun teren keretna, “Loxongkangka at Lada.”

20 La ne Pita ga lok bok, “Keneng at levempikpixan (Sam) i lok keretna, ‘Mo loogu ren na nemen gamasa. La tara noxo nemen bok ba ren.’  
*Sam 69:25*

Melemu bok,

‘Mo lugugu ren tara naba xip kaka i ren.’  
*Sam 109:8*

21-22 \*Kuren la ata soxolik ka tara, kusu na gugu eburu midik la na tong asu laxakatu kaxat amlong at Leeme Silok ne Iesu. Ata soxolik ka tara atnedi luvuttadi diga nemen eburu midik ap mo levenaleng Leeme Silok ne Iesu ga emu eburu midik. Ga vaxaru ka i ap mo laaleng ne Jon ga sep susu ne Iesu se at laaleng ne Moroa ga lam ka i uto vana at laxalibet. La neni naba xip ka mo lugugu at ne Judas.”

23 Kuren la diga soxolik ka legepu radi. Josep, laasen bok teren ne

\* 1:8: Mt 28:19; Lu 24:48; Gu 2:32; 3:15; 5:32 \* 1:9: Jo 6:62 \* 1:10: Lu 24:4 \* 1:11: Mt 26:64; Lu 21:27 \* 1:12: Lu 24:50-53 \* 1:13: Mt 10:2-4 \* 1:14: Jo 6:42; 7:5 \* 1:16: Sam 41:9 \* 1:18: Mt 27:3-10 \* 1:21-22: Jo 15:27

Basabas, la lara laasen bok ne Jastas. La ne Matatias.

<sup>24</sup> \*La diga sing keretna, “Leeme Silok, nenu ukleken lodoxoma at limixin. Una lox ase nama mi tara atdu na luradi nu ura soxolik ka vam i,

<sup>25</sup> kusu na xip ka mo lugugu at ne Judas ngan luvuttadi vavang la ni gat pas uto at lemenemen songsongot i epovo rin.”

<sup>26</sup> La diga lu buru mi lengkonuat la mo loxonuat at ne Matatias ga subu avot to at laxangka, kuren la ni ga vubeles eburu minedi lasangaun legesara xusu tip kip mo lugugu.

## 2

### *Lovotpot At Loroonan Kaala Saparap Limixin Nunu*

<sup>1</sup> \*At lara laaleng limixin me Judaia diga lok laanan silok, diga tong i do Pentikos. Nedi limixin axap diga nunu, diga vot eburu ro at lara loogu.

<sup>2</sup> La soso mun diga ronga lavanga ga rupot ngan lamanman silok boro vana at laxalibet, la ga lox aumsu mo loogu digat kis to xeneng teren.

<sup>3</sup> \*La diga ven lavanga ngan laxao ga rem epeseves ap mo loxot diga nemen teren la gat los kis atnedi getgesara. <sup>4</sup> \*Loroonan Kaala ga vubeles atnedi axap la diga lox epovo i do dina paase mi lempapaase petpes, i ngan Loroonan Kaala ga raba di min.

<sup>5</sup> Ap mo loxonaleng limixin at ne Moroa boro at lengkot axap at na lavatbung menemen digak lok go Jerusalem ti lotu saparap ne Moroa. Nedi at lubung mixin me Judaia.

<sup>6</sup> Diga ronga mo lavanga la buaang mun limixin diga rupot eburu ro ap mo loogu. Diga sangu mila nedi getgesara diga ronga i do luvuttadi vavang diga tong asu levelinga at ne Moroa mi lempapaase atdi xa.

<sup>7</sup> \*Diga sangu aleng la diga lok, “Na luvuttadi di paase xeretna nedi boro Galili.

<sup>8</sup> I lok kereva la nedik axap dia ronga nedi di epaase mi lempapaase axa atdik.

<sup>9</sup> \*Nedik na boro Patia, Midia, la Ilam. Boro bok Mesopotemia, Judaia la Kapadosia, Pontas la Asia.

<sup>10</sup> Pirigia la Pampilia la boro Isip la at lengkot bok Libia saparap Sairini. La lentaba bok atdik na boro Rom.

<sup>11</sup> Lentaba bok at lubung mixin me Judaia, la lentaba atdik boro vetpes, di lok kaka mun lununu at limixin me Judaia. La lentaba bok atdik boro Krit la Arabia ketla nedik axap di ronga di, di paase mi lempapaase axa atdik mumu lempanga sangsangu ne Moroa ga lox i.”

<sup>12</sup> Diga lingun la diga esue minedi getgesara, “Ua lavasuun at na?”

<sup>13</sup> Ketla lentaba diga lok kalise luvuttadi vavang, la diga lok keretna, “Na luvuttadi dia vinin solo laxangkadan lolos.”

### *Pita Ga Vavang Ti Limixin*

<sup>14</sup> La ne Pita eburu mi luvuttadi vavang diga tu kantubu at limixin axap la ni ga lok tidi xeretna, “Limixin me Judaia la nemi mo mik lok de Jerusalem, mina ronga levelinga rak. Nia ana soxomus lavasuun at na lavanga rinimi.

<sup>15</sup> Na luvuttadi xopmen dina in kerekngan nemi mi doma i, mo vam i vasik konaleng maxantamak suubu.

<sup>16</sup> Ketla nai ne Moroa ga vaase asu i at levelinga at leeme vapaase ali, ne Joel.

<sup>17</sup> Moroa ga lok keretna, ‘Auret ti laaleng kavaxap at lavatbung menemen nia anaba lox i na. Anaba riki asi Loroonan Kaala rak uto xantubu at limixin axap. Laxamdak mi laxaalik atnemi dinaba paase ali tempanga. Luvuraau maxat atnemi dinaba silimet tangarang ka tempanga. La luvuttadi asioxo atnemi dinabam tobo teventomtobo.

<sup>18</sup> Ap mo levenaleng anaba riki asi Loroonan Kaala rak uto xantubu at

\* 1:24: Jo 2:25 \* 2:1: Mas 23:15-21; Lal 16:9-11  
Mk 16:17 \* 2:7: Gu 1:11 \* 2:9: 2 Ti 1:15

\* 2:3: Mt 3:11 \* 2:4: Gu 4:31; 10:44-46; 19:6;

lavasaxaruki rak bok, lavatlok mi lavakin. La nedi dinaba paase ali tempanga.

<sup>19</sup> Anaba lok tempanga loklok katling to vana at laxalibet la tempanga sangsangu ro xopok at lavatkangka. Lada, laxao la lakbus at lusuxa naba rupot.

<sup>20</sup> Laxangking naba rem gili na ngan lamain la lagaaling naba memele ngan lada. La melemu mo laaleng silok at Leeme Silok naba rupot.

<sup>21</sup> \*La do tara na sing keneng at laasen tarak kusu ti loklok tooro, ni naba roo.’ ” *Jol 2:28-32*

<sup>22</sup> \*La ne Pita ga lok bok, “Leme Israel. Mina ronga na levelinga. Na ne Iesu me Nasaret ni laradi ne Moroa ga lox asilox i mi lempanga sangsangu kantubu atnimi la nemi axa miga ven pam mo lempanga ni ga lox i at lekngen ne Moroa.

<sup>23</sup> \*Moroa xa ga lox agagas i la gaklen pam lavanga naba ravasu, kerekngan lodoxoma axa ren. La nemi miga sev amer i xeretna, miga siam taba luvuttadi xapmek do dina vaxarem i ro vana at laxaba.

<sup>24</sup> \*Ketla ne Moroa ga lox arooro amlong i basinge lolos at lanmet mila kopmen goxo epovo kusu lanmet na ranga alis i.

<sup>25</sup> I lok ngan ne Devit ga paase mumu i xeretna,

‘Nia a reven Leeme Silok to melamgo rak at levenaleng axap. Ni mo i tu saparap lakngak tino, la kopmen tavanga noxo sev asubu ia.

<sup>26</sup> Kuren la lorooro rak i umsu mi lomomo, la levelinga rak i paase asu mun lososoro. Keke i do nenia laradi mun, a ruuna lodoxoma voovo,

<sup>27</sup> \*atla nenu u noxo raba rulu ia xusu anat pas uto at lemenemen at labarongan, la u noxo ke xepe Laradi Melemelengan taram la labantuxu ren napso.

<sup>28</sup> Uga lox ase ia mi langas it pas uto at loxot ti lorooro. Ut kis esogo minia, la a momo amisik.’ ” *Sam 16:8-11*

<sup>29</sup> \*La ne Pita ga lok bok, “Luvutnetak mi luvurinuk, ana vaase axasep nimi mumu lurubuno avolo atdik, ne Devit. Ni ga met pam la digak mir i, la lamaaut teren mo i nemen de, ise at na laaleng.

<sup>30</sup> \*Neni ga leeme vapaase ali at ne Moroa, la ni gaklen pam laxakaape ali at ne Moroa rin. Moroa ga vangpe do ni naba lok ka tara at livipisik li at ne Devit kusu ni naba lox asilox i, ngan loorong.

<sup>31</sup> \*Devit ga ven pam umelamgo ri lavanga salai ne Moroa naba lox i. Kuren la ni ga paase mumu laxakatu kaxat amlong at Lanarong. Ni ga lok, ‘Loroonan teren noxo nemen to at lemenemen at labarongan, la labantuxu ren noxopso.’

<sup>32</sup> \*Moroa ga lox aroo amlong ne Iesu basinge lanmet, la nema axap na maga ven lorooro amlong teren.

<sup>33</sup> \*Ni ga lam kaka i uto vana at laxalibet la ga vaxaxis li i ro at lixitkis orong la ne Moroa xa ga raba i mi lolos kusu ni na riki Loroonan Kaala ren tinama, kerekngan tai mo nemi mi ven i la mi ronga i.

<sup>34</sup> Mo levelinga ro vana xopmen na paase mumu ne Devit do ni ga urut uto vana at laxalibet. Ketla ne Devit ga lok keretna,

‘Moroa ga tong i ri Leeme Silok tarak. Unat kis de saparap lakngak tino,

<sup>35</sup> se nenia ana lok li limixin munepen minu, na ngan loxot burubut ti luxangkedek taram.’ *Sam 110:1*

<sup>36</sup> \*Kuren la limixin axap me Israel dinaklen avukar i do na ne Iesu, no miga vaxarem i ro at laxaba, ne Moroa ga lok li i xusu neni Leeme Silok la Lanarong.”

\* 2:21: Ro 10:13 \* 2:22: Jo 3:2 \* 2:23: Gu 4:28; 1 Pi 1:20 \* 2:24: Gu 3:15 \* 2:27: Gu 13:35  
\* 2:29: 1 Lav 2:10; Gu 13:36 \* 2:30: 2 Sml 7:12; Sam 89:3-4; 132:11 \* 2:31: Sam 16:10 \* 2:32: Gu 1:8 \* 2:33: Gu 1:4; 7:55-56 \* 2:36: Gu 5:30-31 \* 2:37: Lu 3:10,12; Gu 16:30

37 \*Mo limixin diga rongga i na, diga bulu aleng la diga lok ti ne Pita eburu mi luvuttadi vavang, “Luvutneton nama, maba lok lavanga salai?”

38 \*Pita ga lok tidi, “Nemi getgesara mina leeng basinge leveloklok kakapmek atnimi, la mina lok kaka lesep susu at laasen at ne Iesu Karisito kusu ne Moroa naba doxoma xepe leveloklok kakapmek atnimi la minaba ruuna ka na laramtaba at Loroonan Kaala.

39 \*Moroa ga lok na lavapaase alirini la livipisik li bok atnimi la tidi bok no di nemen paxalom, la tinedi axap ne Moroa naba ro xaka nedi.”

40 \*Pita ga paase aronga di mi laxalinga solo la ni ga sing tinotno bok di xeretna, “Mina lok tatao avukat nemi xusu mi noxo suma langsung losongsongot mo naba rupot saparap limixin kakapmek at na levenaleng.”

41 \*Buaang atnedi diga nunu ap mo levelinga la luvuttadi vavang diga sep susu di. Lavantun larabin sangsangaun kobot (3000) limixin diga beles saparap nedi luvuttadi nunu ap mo laaleng.

42 \*Diga tupot eburu amisik mi luvuttadi vavang kusu tik lok ka levenanasa at ne Moroa. Digak lok levengkitkis buru la levenanan buru la levesingising atdi.

#### *Lorooro Kantubu At Limixin Nunu*

43 \*Buaang lempanga sangsangu luvuttadi vavang diga lox i la ga lok buaang limixin diga sanga.

44 \*Mo luvuttadi nunu diga vot eburu amisik la diga vepes bok lempanga axap atdi xantubu atnedi.

45 Diga sesep bok mi lempanga atdi la mo levempilas teren diga epes i xantubu atnedi ga epovo at levempakpakes atnedi getgesara.

46 \*At levenaleng axap digat pot eburu amisik ngan loxonbinam tadi

ro xeneng at loogu laplavang la diga anan buru leveluxa atdi ro xolonu. Diga anan mo leveluxa eburu mi lumulus la lomomo keneng at lebelen di.

47 \*Diga emi asu mi ne Moroa la limixin axap diga lok ngangao atdi. At levenaleng axap Leeme Silok gam lam abeles bok luvuttadi diga lok kaka lununu at laasen at ne Iesu ukeneng ap mo luutus atdi.

### 3

#### *Pita Mi Ne Jon Duga Lox Aroo Laradi*

1 \*At lara laaleng Pita mi ne Jon dugat pas uto vana at loogu laplavang kusu duna lok lising at lavantun konaleng ukantinao, i ngan leme Judaia digak lox amisix i.

2 \*At lara langas povolo, laasen teren do Lumusmaragu Maraanu, lara laradi mo gat kis, luxangkedek teren ga molo axap. Nenen ga visik axa i xuren. At levenaleng axap limixin digap kip kaka i uto ap mo langas povolo xusu na ngising panga rin ap mo limixin digat pas uto at loogu laplavang.

3 Ni ga ven ne Pita mi ne Jon duga beles to ap mo loogu, la ni ga sing du xusu duna raba i mi tempanga.

4 \*Duga ru la duga ven tooro i la ne Pita ga lok tin, “Una ven tinama.”

5 Mo laradi ga milik tidu, ga nua i do ni mo naba lok ka tempanga atdu.

6 \*Ketla ne Pita ga lok tin, “Nia xopmen tevempilas gamgames kopla leven gol tarak, ketla ana raba u mi lavanga nia a ruuna i. Keneng at laasen at ne Iesu Karisito me Nasaret, a tong i ru do, una ru upana la una vas kaxat.”

7 La ne Pita ga ranga axatu i mi lekngen tino la ga lok aurur i upana. Ap mo mene loxonaleng luxangkedek teren ga lolos ta.

\* 2:38: Lu 24:47; Gu 3:19 \* 2:39: Ais 57:19 \* 2:40: Lal 32:5; Pl 2:15 \* 2:41: Gu 2:47; 4:4; 5:14  
 \* 2:42: Gu 20:7 \* 2:43: Gu 5:11 \* 2:44: Gu 5:12; 6:8; 4:32-35 \* 2:46: Lu 24:53 \* 2:47: Gu 2:41; 6:7; 11:21,24 \* 3:1: Gu 10:3,9,30 \* 3:2: Jo 9:1; Gu 14:8 \* 3:4: Gu 14:9 \* 3:6: Gu 3:16; 4:10; 16:18 \* 3:8: Jo 5:14; Gu 14:10



<sup>8</sup> \*Ni ga los kaxat mi luxangkedek teren la ga vas kaxat. La ni ga beles buru midu ukeneng at loogu laplavang gat pas la gat los momo la ga emi asu mi ne Moroa.

<sup>9</sup> Mo limixin diga ven mo laradi gat pas la ga emi asu mi ne Moroa,

<sup>10</sup> diga ven kibis i do ni laradi singising panga no gat kis to at Lumusmaragu Maraanu at loogu laplavang, diga sangu aleng ap mo lavanga ga rupot saparav i.

### *Pita Ga Paase Ri Limixin*

<sup>11</sup> Mo laradi move gam tebeng tu at ne Pita mi ne Jon la limixin axap mo diga rakdu aleng la diga sixit la diga vot pasa nedi ro at loxot silok saparap loogu laplavang diga tong i do "Lavatkon gu at ne Solomon".

<sup>12</sup> Pita ga ven mo limixin la ga lok tidi, "Leme Israel! Laai mo mi sangu ren mumu i na lavanga? La laai mo nemi mi tu la mia reven tooro nama min? Kereva, mi doxoma i do ma lox avukat na laradi mi lolos axa atnama xopla at loklok nunuan atnama xusu neni i lox epovo i rit pas? Kopmen!

<sup>13</sup> \*Moroa at ne Abaram, Aisak, la ne Jakop, Moroa at lavalabat atdik, neni ga lox asilok laasen at ne Iesu, lasaxaruki ren. Nemi miga song araba limixin kakapmek min kusu dina sev amer i. La miga sok tixirixes i ro melango at ne Paelat, ap mo loxonaleng ne Paelat ga lok do na soxomus asu i.

<sup>14</sup> Neni Laradi Melemelengan la Manmanton. Ketla nemi miga lok abulubun kepe i, la miga sing ne Paelat kusu na soxomus asu laradi sepsev amet tadi.

<sup>15</sup> \*La nemi miga sev amet ne Iesu, neni lavasuun at lorooro avolo. Ketla ne Moroa ga lox arooro amlong i basinge lanmet, la nema na ma paase katling i mi mo lavanga mila nema maga ven i.

<sup>16</sup> At lununu mun at laasen at ne Iesu la na laradi mi ven i la miklen i, ira lok ka lolos maxat keneng at

luxangkedek teren. Lununu keneng at laasen at ne Iesu na, i lox aroo na laradi de melango atnimi axap.

<sup>17</sup> \*La na, luvutnetak mi luvurinuk, nia aklen i do nemi eburu mi luvuttadi amgomgo atnimi miga lox i ri ne Iesu. Miga lox i mila mi goxo xasep at levelinga at ne Moroa.

<sup>18</sup> \*Gano migomgo ne Moroa ga vaase asu levelinga at lavaeme vapaase ali ren do Lanarong teren naba xip losongsongot silok. La ne Iesu ga lox asoorun mo levelinga.

<sup>19</sup> \*Kuren la mina leeng basinge laxakapmek atnimi xusu ne Moroa naba doxoma xepe laxakapmek atnimi,

<sup>20</sup> la naba raba nemi mi levenaleng avukat at nai lavatbung menemen kopok la ni naba riki asi amlong ne Iesu, neni Lanarong. Moroa gara soxolik ka vam i do rinimi.

<sup>21</sup> Ni naba nemen to vana at laxalibet se at laaleng ne Moroa naba lox amaxat lempanga axap, kerekngan neni ga tong asu i mi levelinga at lavaeme vapaase ali ren megano.

<sup>22</sup> \*Kerepmo ne Moses ga lok, 'Moroa, neni Leeme Silok atnimi naba sak tiki leeme vapaase ali naba vot kantubu atnimi lubung mixin me Judaia, i ngan ni ga sak tiki ia. Mina ronga levelinga axap neni naba tong i rinimi.

<sup>23</sup> Do tara i xopara na ronga levelinga ren, neni naba nemen petpes basinge mo limixin ne Moroa ga soxolik ka vam nedi do ateren to at lorooro melemu. La ne Moroa naba sev amet nedi axap ding tonga xepe levelinga ren.' " *Lal 18:15,18,19*

<sup>24</sup> La ne Pita ga lok bok, "Lavaeme vapaase ali ga vaxaru ka i at ne Samuel la nedi bok lentaba diga rupot melemu ren, nedi axap diga paase ali mumu lorooro at Leeme Silok.

<sup>25</sup> \*Nemi mi ruuna leveng kakaape at ne Moroa keneng at lavaeme va-

\* **3:13:** Pas 3:6,15; Mt 22:32; Lu 23:13-25; Gu 2:23; 7:32 \* **3:15:** Gu 1:8; 2:36; 4:10 \* **3:17:** Lu 23:34; 1 Ti 1:13 \* **3:18:** Lu 24:27 \* **3:19:** Gu 2:38 \* **3:22:** Gu 7:37 \* **3:25:** Ga 3:8

paase ali ren. La nemi mi nemen keneng at nom lekabus no ne Moroa ga lox i eburu mi lavalabat atnimi, kerekngan ni ga tong i ri ne Abaram keretna.

'Keneng at livipisik li ram, nia anaba lox anarong limixin axap at lavatbung menemen.' *Lur 22:18; 26:4*

26 \*La kerepmo ne Moroa ga soxolik ka lasaxaruki ren la ga sak tiki i saporap nemi avot kusu na lox anarong nimi xeretna. Ni na lok nimi xusu mina ven kibis laxakapmek atnimi la mina leeng basinge laxakapmek atnimi."

## 4

### *Pita Mi Ne Jon Duga Ru At Lavapaase*

1 \*Pita mi ne Jon move duga paase ri limixin la ap mo loxonaleng lava-maasa, mi laradi gomgo at limixin esep diga lok tatao loogu laplavang, la lubang Sadiusi diga vot pasa du.

2 \*Diga musak mila nedu duga tong i ri limixin do ne Iesu mo ga roo xat amlong pam basinge lanmet, ti lox asusu i do limixin di met, dinaba roo xat amlong bok.

3 \*Kuren la diga ranga alis du, la diga lok li du at loogu xokoxo se ap mo laaleng melemu, mila laxangking mo ga lok do na lotup ta.

4 \*Ketla buaang atnedi diga rongga i mo lavapaase at ne Pita, diga nunu. La luutus atnedi luvuttadi remes ga urut ti lavalimo larabin sangsanggaun kobot. (5000)

5 Ap mo laaleng melemu luvuttadi amgomgo at lubang mixin me Judaia, loxongkulao silok mi luvuttadi loklox ase at Laulis Linga diga rupot to Jerusalem.

6 Diga rupot eburu mi ne Anas neni lamgomgo at lubangmaasa, la ne Kaiapas, ne Jon, ne Aleksanda la nedi bok lentaba at libibinat at ne

Anas. 7 \*Diga vaxaru ne Pita mi ne Jon to melamgo atdi la diga sue du, "Lolos atnege nemu mu ruuna ka i xusu muna lox i na? La laasen atnege nemu mu gugu min?"

8 \*Pita ga umsu mi Loroonan Kaala la ni ga lok tidi, "Luvuttadi amgomgo at limixin, la nemi loxongkulao silok.

9 Mi sue nama lingina ri lempanga avukat mata lox i itinongo ri na laradi, luxangkedek teren ga molo, la kereva neni i lox avukat.

10 \*Minaklen i la limixin axap bok me Israel minaklen i do na laradi na i tu melamgo atnimi, ni ita lox avukat at lolos at laasen at ne Iesu Karisito me Nasaret, no nemi miga vaxarem i at laxaba. Ketla ne Moroa ga lox arooro amlong i basinge lanmet.

11 \*Iesu neni laradi Lovoang Kaala ga paase mumu i xeretna,

'Mo luuat nemi luvuttadi xipkip gu miga sok tixirixes kepe i, ga ravasu ngan Luuat Kis la lugugu ren i silok aleng.' *Sam 118:22*

12 \*Keneng mun at laasen teren nedik ataba lok ka lorooro avolo. Mila kopmen bok ba teta at na lavatbung menemen kopok, laasen teren ne Moroa ga raba limixin min kusu nedik ataba rooro mu i at lorooro avolo."

13 Luvuttadi amgomgo diga sangu aleng at ne Pita mi ne Jon duga paase lolos la kopmen du goxo marat. Diga ven kibis box i do nedu dugat pas amisik eburu mi ne Iesu. La nedu luradi mene xuren, la kopmen du goxok lok at toloklox ase.

14 Di goxo vorang tempanga mila diga ven mo laradi no duga lox avukar i mo ga tu eburu mi ne Pita la ne Jon.

15 Kuren la diga tong i ridu kusu duna vas su basinge mo loxot tongtonga linga. La diga epaase mumu mo lavanga kantubu atdi.

\* 3:26: Gu 13:46 \* 4:1: Lu 22:4,52 \* 4:2: Gu 23:8 \* 4:3: Gu 3:1 \* 4:4: Gu 2:41 \* 4:7: Mt 21:23 \* 4:8: Mt 10:19-20 \* 4:10: Gu 3:6,13-16 \* 4:11: Mt 21:42 \* 4:12: Mt 1:21 \* 4:16: Jo 11:47

16 \*Diga esue xeretna, “Ataba lok lavanga salai ridu na luradi? Limixin axap na di nemen de Jerusalem diaklen pam na lavanga sangsangu nedu na luradi duta lox i itinongo, la nedik kopmen ta epovo bok ba do ataba tong i do du toxo lox i.

17 Ketla ata rupe na lavanga xusu noxo epeseves kantubu at limixin. Ata tong i ridu do nemen bok ba duta vaase asu mo laasen ti tara.”

18 \*La diga ro abeles du ukeneng la diga tong alolos i ridu do nedu noxo tong bok ba mo laasen at ne Iesu la du noxo anasa mi mo laasen teren.

19 \*Ketla ne Pita mi ne Jon duga vorang i ridi keretna, “Nemi xa mina doxoma mumu i na, do ua i lox avukat at lemeren ne Moroa. Mana ronga res atnimi xopla mana ronga res at ne Moroa.

20 Kuren la nema ma noxo xap ti vaase asu mo lempanga nema maga ven i la maga ronga i.”

21 Luvuttadi amgomgo diga vaase lolos aleng tidu, la melemu diga soxomus asu du. Di goxo epovo do dina sev amarat du, mila buaang limixin diga emi asu mi ne Moroa ri mo lavanga sangsangu ga rupot kantubu atdi.

22 Mo laradi duga lok mo lavanga sangsangu rin, levenmaares teren ga volo lavanuet sangau.

### *Lisingising At Luvuttadi Nunu*

23 Melemu at losoksoxomus asu atdu, Pita mi ne Jon dugamlong saparap lentaba atdu, la duga tong mo levelinga, lavamaasa silok mi loxongkulao silok diga tong i.

24 \*Diga ronga i mo, la diga lok legesa doxoma mi lisingising saparap ne Moroa, diga lok keretna, “Leeme Silok, nenu luruntudum li at laxalibet, lavatbung menemen, laras la lempanga axap mo di rooro xeneng teren.

25 Uga vaase asu na levelinga mi Loroonan Kaala at lungusno at

ne Devit, lurubuno nama. Neni lasaxaruki ram, ni ga lok,

“Tila ba limixin at levenabung mixin petpes di musak la di sevut li leventaangas kapmek kusu dinoxo lok maxopok at ne Moroa.

26 Lavaorong at na lavatbung menemen di gagas ti esep eburu mi ne Moroa. La luvuttadi amgomgo dit kis buru ti puse ngas ti lox asi Leeme Silok eburu mi Lanarong, no neni ga soxolik ka i.’ *Sam 2:1-2*

27 \*Kerepmo ne Erodes mi ne Pontias Paelat diga rupot eburu at na lemenemen silok eburu minedi limixin me Judaia la limixin kopmen di me Judaia, kusu dina lox abulubun kepe ne Iesu. Neni Lasaxaruki Melemelengan taram, mo nu ga lok li i do Lanarong.

28 \*Diga rupot buru ri lok lempanga no nenu ugara gagas li vam i mi lolos taram la lodoxoma ram do naba vot.

29 \*Monga Leeme Silok, u ronga vam mo levelinga lolos di tong i. La una lox abelemes nema lavasaxaruki ram kusu mana vaase asu Lagale Lavavang.

30 Una song asu mi lakngam ti lox aroo levenanmeres la una lok bok tempanga sangsangu xeneng at laasen at Lasaxaruki Melemelengan taram, ne Iesu.”

31 \*Melemu at lisingising atdi, mo loxot nedi diga vot eburu ren gang nengne. Diga umsu mi lolos at Loroonan Kaala la diga vaxaru ka i xusu dina paase asu levelinga at ne Moroa la kopmen bok ba teanmarat.

### *Luvuttadi Nunu Diga Epes Lempanga Kantubu Atdi*

32 \*Mo luvuttadi nunu diga nemen mun keneng at legeso doxoma la legese belen. Kopmen teta atnedi ga lok do mo lempanga ren, ateren axa. Ketla diga epes di getgesara mi lempanga axap diga ruuna i.

\* 4:18: Gu 5:28,40  
Lu 23:7-11; Gu 3:13

\* 4:19: Gu 5:29  
\* 4:28: Gu 2:23

\* 4:24: Pas 20:11; Nem 9:6; Sam 146:6  
\* 4:29: Ep 6:19

\* 4:27: Mt 27:1-2;  
\* 4:31: Gu 2:4

\* 4:32: Gu 2:44  
\* 4:33: Gu 2:47

<sup>33</sup> \*Luvuttadi vavang diga ruuna ka lolos la diga paase asu Lagale Lavavang at laxakatu kaxat amlong at Leeme Silok ne Iesu. La ne Moroa ga suxa umsu di mi leveloklox anarong.

<sup>34</sup> \*Kopmen teta xantubu atdi gat kis pakpakes. Lentaba diga ruuna lengkongkangka la lentaba diga ruuna laraogu, diga sesep min la diga lok kaka levempilas at nom,

<sup>35</sup> la diga raba luvuttadi vavang min. La mo levempilas diga epes ba i xantubu atnedi ga epovo at lavakpakes atnedi getgesara.

<sup>36</sup> \*La ne Josep neni at libibinat at ne Levi, neni boro Saipras, mo luvuttadi vavang diga tong box i do Banabas. Lavasuun at laasen Banabas do, "Laradi loklox alolos."

<sup>37</sup> Neni ga sesep mi loxongkangka ren, ga lok ka levempilas, la ga song araba luvuttadi vavang min.

## 5

### *Ananias Mi Ne Sapira*

<sup>1</sup> Ketla lara laradi laasen teren ne Ananias eburu mi latkin teren ne Sapira. Ni ga sesep mi loxongkangka atdu,

<sup>2</sup> \*ketla ni ga ranga alis lenep unun ap mo levempilas do tin. Latkin teren gakleklen i, la ni ga raba lenep uto ri luvuttadi vavang.

<sup>3</sup> \*Pita ga lok tin, "Ananias, tila u siam abeles ne Satan ia umsu at lodoxoma ram? La ia lox u, ura xarang Loroonan Kaala, la ura ranga alis bok lenep pilas ap mo luunun uga lok ka i ap mo loxongkangka.

<sup>4</sup> Avot nu goxovisi na sesep min, ga taram axa. La melemu nu ga sesep min, levempilas bok ataram. Tila ba nenu u doxoma i do una lok na loklok? Nu xopmen una xarang limixin, nenu u xarang ne Moroa!"

<sup>5</sup> Ananias ga ronga i na la ga subu si ukopok la ga met. La nedi axap diga ronga i na, la diga marat aleng.

<sup>6</sup> La luvuraaau maxat diga beles ukeneng la diga bom labantuxu ren, diga xip asu i ukamang la digak mir i.

<sup>7</sup> Lavantun lengkon aleng ga volo la latkin teren ga vubeles, ketla ni goxoklen i do latlok teren ga met pam.

<sup>8</sup> Pita ga lok tin, "Una tong i ria. Kereva nai luunun axap nemu mi latlok taram muga ranga ka i ap mo loxongkangka?"

La ni ga siam la ga lok, "I ruturun, luunun axap."

<sup>9</sup> La ne Pita ga lok tin, "Tila nemu mi latlok taram mu doma i do muna lok tong pen Loroonan Kaala at Leeme Silok? Limixin no dik mit latlok taram no di tu at lumusmaragu monga, la diba xip kaka box u ukamang."

<sup>10</sup> Ap mo mene loxonaleng ni ga subu saparap luxangkedek at ne Pita la ni ga met ta. Mo luvuraaau diga beles ukeneng la diga ven i do latkin mo ga met, diga xip kaka i ukamang la digak mir i saparap latlok teren.

<sup>11</sup> Langsangan lanmarat ga ravasu xantubu atnedi axap limixin nunu la nedi bok mo diga ronga mo lavanga.

### *Luvuttadi Vavang Diga Lok Lempanga Sangsangu*

<sup>12</sup> \*Buaang lempanga sangsangu Leeme Silok ga lox i at levengiknigen di luvuttadi vavang teren kusu dina lox i xantubu at limixin. Nedi axap mo luvuttadi nunu digat pot eburu amisik ngan loxonbinam tadi to at loxot laasen teren "Lavatkon gu at ne Solomon."

<sup>13</sup> Mo limixin kopmen tununu atdi diga marat tik lok eburu minedi, keke i do buaang limixin diga lok ngangao aleng atdi.

<sup>14</sup> \*Ketla buaang nedi limixin, lavatlok mi lavakin diga lok kaka lununu at Leeme Silok la diga beles ap mo loxonbinam atdi.

<sup>15</sup> Kuren la limixin diga lok kaka luvuttadi mekmeres mi levenora

\* 4:34: Gu 2:45 \* 4:36: Gu 11:22-26; 13:2-3 \* 5:2: Gu 4:34-35 \* 5:3: Jo 13:2 \* 5:12: Gu 2:43; 14:3 \* 5:14: Gu 2:41; 21:20

atdi uto at levengkonngas kusu do, ne Pita na vas polo, mo lamamau at lovoovo ren naba lok pavaa di.

16 \*La buaang nedi limixin diga vas kaxat boro at leven menemen saparap Jerusalem, diga lok kaka levenanmeres atdi, la nedi bok lubung-gas ga suxuna nedi. La nedi axap diga lok avukat.

### *Luvuttadi Vavang Diga Xip Levesongsongot*

17 \*Ketla lamaasa gomgo at lava-maasa ga xatu kaxat eburu minedi limixin teren. Mo limixin diga tong nedi do lubang Sadiusi, diga umsu mi levereven peves ti luvuttadi vavang.

18 Diga ranga alis ka luvuttadi vavang la diga lok li nedi at loogu xokoxo.

19 \*Ap mo laxanimin laangelo at ne Moroa ga suang lumusmaragu ap mo loogu xokoxo la ni ga sat asu di ukamang la ga lok tidi,

20 “Uto nimi at loogu laplavang la mina tong asu Lagale Lavavang mumu lorooro maxat.”

21 Luvuttadi vavang diga ronga res la ga maxantamak suubu diga beles to at loogu laplavang la diga vaxaru ka i xusu dina anasa limixin.

Lamaasa gomgo eburu mi limixin teren, diga ro bubua ka lubang amgomgo at lubang mixin me Judaia kusu nedi axap dina lok lavapaase silok. La diga lox aonon levelinga uto at loogu xokoxo xusu dina lok taba nedi mi luvuttadi vavang.

22 Ketla at loxonaleng diga rupot di goxo ven luvuttadi vavang to at loogu xokoxo. Kuren la digamlong uto at luvuttadi amgomgo xusu dina tong axasep nedi min.

23 Diga lok keretna, “At loxonaleng ma rupot to at loogu xokoxo, ma ven i do i tu pipe rinotno, la nedi mo luvuttadi rutu mu mo bok di tu at lumusmaragu. La ma suang

mo lumusmaragu la nema maxo ven tara go xeneng.”

24 La mo lavamaasa silok la laradi gomgo at luvuttadi rutu mu diga ronga i na la diga rangku do laai mo ga rupot saparap mo luvuttadi vavang.

25 La lara laradi ga rupot la ga lok tidi, “Mina ronga i na. Luvuttadi mita lok li di itinongo ro at loogu xokoxo no di tu at loogu laplavang la dia anasa limixin.”

26 \*Kuren la laradi gomgo ga vas kaxat eburu mi luvuttadi rutu mu la diga lam ka amlong luvuttadi vavang. Kopmen di goxo sep nedi mila diga marat do limixin dina lu amet di mi laxanuat.

27 Nedi diga lam kaka luvuttadi vavang ukeneng, la diga vaxaru nedi ro melamgo at luvuttadi amgomgo at loxot tongtonga linga. La lamaasa gomgo ga lok tinedi xeretna,

28 \* “Maga raba nemi mi levelinga lolos do nemen gat nemi mita anasa mi mo laasen ap mo laradi. Ketla ming tonga xepe i. Mira vaase asu vam nom levenanasa at lengkot axap de xeneng Jerusalem, la nemi mi lox i xuren kusu do nema maba xip tutu mi lanmet teren.”

29 \*Pita eburu minedi luvuttadi vavang diga vorang i ridi xeretna, “Mana ronga res kusuk mun at ne Moroa la ma noxo ronga res at limixin mun.

30 \*Moroa, neni lomoroa at lavalabat atnedik, neni ga lox axatu ne Iesu basinge lanmet, melemu atnemi miga vaxarem i ro at laxaba.

31 \*Moroa ga xiv aurur i upana la ga vaxaxis i saparap lekngen tino mila neni Lamgomgo la Laradi Loklox Arooro xusu na raba limixin me Israel mi langas ti leeng basinge laxakapmek atdi la ne Moroa naba doxoma xepe i.

32 \*Nema na ma vaase asu na levelinga. Loroonan Kaala bok i vaase asu i, neni nom laramtaba ne Moroa

\* 5:16: Mk 6:56; Gu 19:11-12 \* 5:17: Gu 4:1-2,6 \* 5:19: Gu 12:7-10 \* 5:26: Mt 14:5 \* 5:28: Gu 4:18; Mt 27:25 \* 5:29: Gu 4:19 \* 5:30: Gu 3:15 \* 5:31: Gu 2:33-34; Ep 1:20; Ib 2:10; 12:2 \* 5:32: Gu 1:8 \* 5:33: Gu 7:54

ga raba i rinedi ding tonga res at levelinga ren.”

33 \*Diga rongga i mo la diga musak aleng, la diga lok do dina sev amet di.

34 \*Ketla legesara atdi, neni la Parisi laasen teren ne Gamaliel. Neni laradi loklox ase at Laulis Linga la limixin axap diga lok ngangao aleng teren. Ni ga xatu kaxat kantubu at luvuttadi amgomgo la neni ga sing nedi xusu dina riki asu be mo luvuttadi vavang ukamang at toxonaleng mutmut mun.

35 La neni ga lok tinedi luvuttadi amgomgo xeretna, “Leme Israel, mina doxoma avukat mumu lavanga salai mi lok do mina lox i ridi na.

36 \*Gano ne Tiudas ga vot, ga lok do neni mo i silok aleng. La mo limixin diga mumu asu i ga epovo at lavanuet sangaun kobot (400). Ketla neni ga uu la mo limixin teren diga epeseves la mo lugugu atdi ga met gamasa nga.

37 \*Melemu at na, ne Judas boro Galili ga rupot ap mo levenaleng at loklok ka asen. Neni bok ga sat ka buaang limixin saparav i. Ketla neni bok ga uu la mo limixin diga mumu asu i, diga epeseves.

38 Kuren la at na lempanga nanga, nia ana tong asu i rinimi. Nemen mita sev amet di. Mina ke mulus di xuren. Mila do na lugugu di lox i mi lodoxoma axa atdi, to gira xap gamasa vam.

39 Ketla do lugugu atdi boro vana at ne Moroa, nemi xopmen mina epovo xusu minaba rupe i. Miba ven i do nemi mi esep mi ne Moroa!”

40 \*Luvuttadi amgomgo diga mu asu na lavapaase at ne Gamaliel. Diga ro abeles luvuttadi vavang ukeneng, la digak pixis nedi. La diga tong alolos i ridi do nemen gat nedi ta tong asu laasen at ne Iesu, la diga soxomus asu di.

41 \*Luvuttadi vavang diga vas kaxat basinge luvuttadi amgomgo,

diga umsu mi lomomo mila ne Moroa ga siam do diga epovo rip kip lainmangan at laasen at ne Iesu.

42 \*La at levenaleng axap to xeneng at loogu laplavang la to at lev-entaogu at limixin, diga anasa la diga vavang mi Lagale Lavavang at ne Iesu, neni Lanarong.

## 6

### *Lavanuti Radi Ri Lok Tooro Luvuttadi Vavang*

1 \*Ap mo levenaleng leexes at luvuttadi nunu ga uturut amisik upana. La leedak ga ravasu xantubu atnedi limixin me Judaia mo diga paase Grik la nedi limixin me Judaia diga paase Judaia. Limixin mo diga paase Grik, diga lok do lempat naa atdi, di goxop kip ka epovo levempanga loklok tooro ridi at levenaleng axap.

2 Kuren la nedi na lasangaun mi legepura luvuttadi vavang diga ro bubua ka nedi axap lavaun pinivu la diga lok, “Kopmen nak mokso rinama xusu mana ke xepe na Lagale Lavavang at ne Moroa la mana raba panga nimi.

3 \*Luvutnetak mi luvurinuk, mina soxolik ka tavanuti tuvuttadi xantubu atnemi xa, mo nemi mikleklen di do di umsu mi Loroonan Kaala la lodoxoma avukat. La nema maba lok li di, kusu dina lok tatao na lugugu.

4 La nema xa maba raba lorooro axap atnema ri lugugu at lisingising la lugugu at lavapaase asu Lagale Lavavang.”

5 \*Nedi axap diga lok momo ap mo levelinga at luvuttadi vavang. Kuren la diga soxolik ka ne Stiven, laradi ga umsu mi lununu la Loroonan Kaala. La ne Pilip, Porokaras, Nakano, Timon, Pamenas. La ne Nikolaus neni boro Antiok, la goxopmen neni laradi me Judaia, ketla neni gam tebeng lununu ngan leme Judaia.

\* 5:34: Gu 22:3 \* 5:36: Gu 21:38 \* 5:37: Lu 2:1-2 \* 5:40: Gu 4:18 \* 5:41: Mt 5:10-12; 1 Pi 4:13 \* 5:42: Gu 9:22; 17:3 \* 6:1: Gu 4:35 \* 6:3: 1 Ti 3:7 \* 6:5: Gu 8:5

6 \*Nedi na diga raba nedi ri luvuttadi vavang la diga lok lising la diga lok li levengikngen di ro mavana atdi, kusu dina lox anarong di.

7 \*La levelinga at ne Moroa ga epeseves. Leexes at limixin nunu ro Jerusalem ga uturut amisik mene la buaang atnedi lavamaasa diga lok kaka lununu maxat ap mo Lagale Lavavang.

### *Luvuttadi Amgomgo Diga Xoxo Ka Ne Stiven*

8 \*Stiven neni laradi ga umsu mi letaba nabalamu at ne Moroa. La ni ga umsu bok mi lolos la ga lok lempanga sangsangu kantubu at limixin.

9 \*Ketla lentaba luvuttadi di goxopara rin, nedi luvuttadi boro at lumenemen Sairini la Aleksandria. Diga lotu at lara loogu singising, laasen teren, "Loogu Singising at Luvuttadi Sepsen." La lentaba leme Judaia boro Silisia la Asia di goxopara ne Stiven. Nedi axap eburu mi ne Stiven diga etep mi levelinga.

10 \*Ketla Loroonan Kaala ga raba ne Stiven mi lakleklen silok. Kuren la ni ga vaase mi lolos la di goxo epovo xusu dina vorang i.

11 \*La diga lok li lentaba xusu dina bala raba i, diga lok keretna, "Nema maga ronga ne Stiven, neni ga paase vupu ri ne Moses la ne Moroa."

12 Kerepmo diga lox axatu lodoxoma at limixin, loxongkulao silok la luvuttadi loklox ase at Laulis Linga. Diga vot pasa ne Stiven, la diga ranga alis i. La diga lam kaka i uto melamgo at luvuttadi amgomgo.

13 \*La diga lox abeles lentaba luvuttadi xusu ti xarang taba i. Diga lok, "Na laradi i paase vupu ri na loogu laplavang at ne Moroa la Laulis Linga at ne Moses.

14 Maga ronga i do ga lok do ne Iesu me Nasaret ba ut asi na loogu

laplavang la naba ba gili bok leretere ne Moses ga raba avolo dik min."

15 Nedi axap digat kis go, diga ven tooro ne Stiven la diga ven lemeren ga ngan ta lemeren laangelo at ne Moroa.

## 7

### *Levelinga At Ne Stiven*

1 La lamaasa gomgo ga sue ne Stiven, "Kereva na levelinga di lox i ru, i ruturun?"

2 \*La ne Stiven ga vorang i ridi xeretna, "Luvutnetak la luvuttamak. Mina ronga be levelinga rak. Moroa at laxasep ga rupot saparap ne Abaram ne temen dik ap mo laaleng neni ga nemen to Mesopotemia, la avot ti laaleng neni gat pas uto Aran.

3 \*La ne Moroa ga lok tin, 'Una on basinge lemenemen taram eburu mi libibinat taram, la unat pas ti mo lemenemen nia anaba lox ase u min.'

4 \*Kuren la ni ga vas kaxat basinge lenep silok, laasen teren Kaldia, la ni gat pas kusu ti nemen to Aran. Melemu at lanmet at ne temen ne Abaram, Moroa ga ro ka i xusu na on basinge mo lemenemen la na vubelles at na lenep silok, monga nemi mi nemen teren.

5 \*Moroa xopmen goxo raba ne Abaram mi tenep at nai laxangka do tin axa, kopmen tinotno tekot go at na laxangka. Ketla ne Moroa ga xaape min tin do ni naba raba i min la ateran axa, la mo livipisik li bok teren melemu. Ap mo laaleng ne Moroa ga lok na laxakaape ri ne Abaram, Abaram goxovisi na ruuna taxamdak.

6 \*Ketla ne Moroa ga lok tin, 'Livipisik li ram dinaba nemen to at lenep petpes, ap mo lenep dinaba lok ngan lavasaxaruki la dinaba xip buaang laxanmumuat at lavanuet sangaun kobot (400) levenmaares.

\* 6:6: Gu 13:3; 14:23 \* 6:7: Gu 2:41; 16:5 \* 6:8: Gu 2:43 \* 6:9: 2 Ti 1:15 \* 6:10: Lu 21:15  
 \* 6:11: Mt 26:59-61 \* 6:13: Jer 26:11 \* 7:2: Lur 11:31 \* 7:3: Lur 12:1 \* 7:4: Lur 11:31-12:5  
 \* 7:5: Lur 12:7; 15:18; 17:8; Lal 2:5 \* 7:6: Lur 15:13-14; Pas 12:40 \* 7:7: Pas 3:12

7 \*Ketla melemu anaba song araba langsung levengkokoxo rinedi limixin do dina lox asongot limixin tarak. Melemu bok dinaba vas kaxat basinge mo lenep la dinaba lotu saparav ia at na lenep.'

8 \*La ne Moroa ga raba ne Abaram mi leretere ri rivit kepe lengkontuxu, i ngan loklok katling ti limixin me Israel. Kuren la ne Abaram ga vit kepe loxontuxu at ne Aisak, melemu at lavanuan aleng latkin at ne Abaram ga visik asu i. Aisak ga vit kepe loxontuxu at ne Jakop, la ne Jakop ga vit kepe lengkontuxu at lasangaun legepura nedi lempareme avolo atdik.

9 \*Nedi na laxamdak at ne Jakop, diga reven peves at neton di, ne Josep. La diga sesep min ngan lasaxaruki uto Isip. Ketla ne Moroa ga nemen eburu min,

10 \*la ni ga lox asepsu i basinge mo laxanmumuat gat pot saparav i. Ap mo loxonaleng ne Josep ga ru ro melango at ne Parao, loorong me Isip, Moroa ga raba ne Josep mi lodoxoma avukat la loklok nunuan. Parao ga ven kibis i la ga lok li ne Josep kusu neni lamgomgo ap mo lenep silok la keneng bok at loogu nunuan teren.

11 \*Ketla loroxo silok ga vot ap mo lunep silok, Isip la Kanan, la ga lox asu buaang laxanmumuat. Goxopmen bok tempanga anan ti lavalabat atdik.

12 \*La ne Jakop ga ronga i do lev-eluxa mo gak lok to Isip, la ni ga sak tiki mo laxamdak teren uto. Ni lavatpas avot atdi ugo.

13 \*At lavatpas sepsev agepura atdi, ne Josep ga tong asu i ri luvutneton dola neni neton di. La ne Parao gaklen ba limixin at ne Josep ap mo laaleng.

14 \*La ne Josep ga lox aonon lava-paase uto ri ne temen, ne Jakop, la

ga tong i rin eburu mi libibinat teren kusu dinat pas uto Isip. Nedi axap diga epovo at lavanuti sangaun mi lavalimo.

15 \*La ne Jakop ga vas kaxat eburu mi limixin teren uto Isip. Ap mo lenep neni eburu mi lavalabat atnedik diga nemen e, se diga met.

16 \*Diga xip kaka amlong labarongan atnedi uto Sekem la digak mit di at loxot ne Abaram ga un kaka i at libibinat at ne Emo mi levempilas.

17 \*Mo laaleng ga sixit auret kusu ne Moroa na lox epovo laxakaapere ga lox i ri ne Abaram. Luutus at lubang mixin me Judaia ga uturut aleng upana.

18 \*Melemu lara loorong petpes, kopmen goxokleklen ne Josep, neni gam gomgonga limixin me Isip.

19 \*Ni ga bala vukpuk lavalabat atdik la ni ga musak di, ga lok nedi xusu dina lok pes laxamdak atdi uto kusu mo laxamdak lixilik atdi dinaba met.

20 \*Ap mo levenaleng lavalabat atdik digap kip levenmumuat, la lara latkin ga visik ne Moses, neni lagale lamdak la ga lox avukat at lemeren ne Moroa. Ni ga nemen maxopok at loklok tatao at ne temen at lavantun gaaling.

21 \*Ketla ne temen mi nenen duga lok li i ro xamang la loolik at ne Parao ga lok ka i xusu ni na lox asilox i ngan lamdak tin.

22 Ni ga lox ase ro Isip la ga umsu mi lakleklen at leveloklok atdi, la ni ga silok aleng at levempapaase la at lempanga axap ni gak lox i.

23 Moses ga lavanuet sangaun maares teren la ni ga vara i do na ven limixin teren me Israel.

24 \*Ni ga ven lara atnedi, lara me Isip gap sev i. Kuren la ni gat pas la ga lok do na lok tooro mo laradi me

\* 7:8: Lur 17:9-14; 21:4 \* 7:9: Lur 37:11,28; 39:1-3,21-23 \* 7:10: Lur 41:37-44; Sam 105:21  
 \* 7:11: Lur 41:54 \* 7:12: Lur 42:1-5 \* 7:13: Lur 45:1-4,16 \* 7:14: Lur 45:9-11; 46:27 \* 7:15:  
 Lur 46:1-7; 49:33 \* 7:16: Lur 23:2-20; 33:19; Jos 24:32 \* 7:17: Pas 1:7 \* 7:18: Pas 1:8 \* 7:19:  
 Pas 1:10-22 \* 7:20: Pas 2:2; Ib 11:23 \* 7:21: Pas 2:3-10 \* 7:24: Pas 2:11-15



Israel, la ni ga sev amer i xusu ti sepo i.

<sup>25</sup> Ni ga nua i do limixin teren mo digaklen pam i do ne Moroa ga soxolik ka i xusu ni naba soxomus asu di at loxokoxo. Ketla nedi xopmen di goxo xasep teren.

<sup>26</sup> Ap mo lara laaleng melemu ni ga ven manga legepu radi me Israel duga esep, la ni ga lok do na lok lumulum kantubu atnedu. Ni ga lok, 'Muna ronga i na. Nemu vam nom leton. Tila nemu mu esep?'

<sup>27</sup> Ketla mo lara ga vaxaru kaxat mo leesep ga so asu ne Moses la ni ga lok, 'Nege ga lok li u xusu nenu lamgomgo atnama la unang tonga linga atnama?'

<sup>28</sup> U vara manga i do una sev amer ia xerekngan nenu uta sev amet mo laradi me Isip itinongo?'

<sup>29</sup> \*Moses ga ronga i na la ga sixiro boro Isip la ni gara nemen to Midien ngan laradi xadiong. Mo go neni ga ruuna legepu madak.

<sup>30</sup> \*Ni ga nemen go Midien at lavanuet sangaun maares la melemu at na, laangelo at ne Moroa ga rupot saparav i ro at lamatbin, gak lok at lakaana, laasen teren Sinai. Mo laangelo gak lok to at lara luuna lixilik. Laxao gak lok ap mo luuna, ketla kopmen goxo rin kotos levempavaxan una ren.

<sup>31</sup> Moses ga sangu aleng teren, la ni ga vas saparap mo luuna xusu na ven avukar i. La ni ga ronga laxaka at Leeme Silok ne Moroa ga lok keretna.

<sup>32</sup> 'Nenia ne Moroa at lavalabat atnemi, Moroa at ne Abaram, Aisak la ne Jakop.' Moses ga dede mi lanmarat la ni goxo lok do na ven bok ba i.

<sup>33</sup> Moroa ga lok tin, 'Una lok pes luvanga vatpas taram, mila na loxot nenu u tu ren, ni i xaala aleng.

<sup>34</sup> Nia ara ven pam levenmumuat limixin tarak di suma i ro Isip. Nia ara ronga vam lerengteng atnedi la

nia ara si xusu ana lok tooro di. Ude nga u la nia aba sak tiki u uto Isip.'

<sup>35</sup> Moses neni laradi limixin me Israel di goxopara rin. Diga sue i, 'Nege ga lok li u do nenu lamgomgo atnama la laradi rongtonga linga atnama.' Ketla ni laradi ne Moroa ga sak tiki i ngan lamgomgo la laradi loklox asu, kerekngan laangelo ga tong i ro ap mo luuna, laxao gak lok teren.

<sup>36</sup> \*Neni ga lam asu ka limixin basinge lenep Isip, ga lok lempanga sangsangu ro Isip, la to bok at loxontas laasen teren, Laras Memele, la to bok at lamatbin at lavanuet sangaun maares.

<sup>37</sup> \*Moses neni laradi ga paase ri limixin me Israel do 'Moroa naba riki taradi vapaase ali rinimi xerekngan neni ga riki ia. La neni at tara xa atnimi.'

<sup>38</sup> \*Neni mo laradi ga nemen eburu mi limixin me Israel to at lamatbin, neni ga nemen eburu mi lavalabat atdik la laangelo bok mo ga paase rin to at lakaana Sinai. Neni ga lok ka Laulis Linga at ne Moroa xusu na raba i rinedik limixin me Israel.

<sup>39</sup> \*Ketla lavalabat atdik goxopara na ronga res teren, diga sok tixirixes xepe i la diga lok do dinamlong uto Isip.

<sup>40</sup> \*Diga tong i ri ne Aron, 'Una lok tevempoovo moroa rinama xusu namgo rinama at langas. Nema xopmen manaklen i do lavanga salai ga rupot saparap mo laradi, ne Moses mo ga lam asu nama boro Isip.'

<sup>41</sup> \*Ap mo loxonaleng mun diga lok lovoovo bulumaxao mi levengkikngan di la digaplavang saparav i mi leventamtaba la diga lok leluxa silok ti lok katling i.

<sup>42</sup> \*La ne Moroa ga lox abulubun kepe nedi, la ga ke xepe nedi xusu dina lotu saparap lempanga i nemen to vana at laxalibet. I lok ngan levelinga i nemen keneng at lubuk at lavaeme vapaase ali i lok keretna,

\* 7:29: Pas 2:21-22; 18:3-4 \* 7:30: Pas 3:1-10 \* 7:36: Pas 7:3; 14:21; Kex 14:33 \* 7:37: Gu 3:22  
 \* 7:38: Pas 19:3; Lal 5:5; 9:10; Gu 7:53 \* 7:39: Kex 14:3 \* 7:40: Pas 32:1,23 \* 7:41: Pas 32:2-6  
 \* 7:42: Jer 19:13

'Limixin me Israel! Kopmen mi goxoplavang mi lempanga mi lavanuet kangkedek tia la miga lok letaba min ti lara vetpes ap mo lavanuet sangaun maares to at lamatbin.

43 Ketla miga lok tatao loogu at lomoroa ne Molok, la lovoovo at lenti, ne Repan. Nedi axap nom laxampoovo vanga nom nemi miga lox i do ri lotu ren. Kuren la anaba riki xepe nemi uto melemu at lenep silok Babilon.'

*Amo 5:25-27*

44 \*Lavalabat atnedik diga lok tatao loogu kadis at ne Moroa ro at lamatbin. Diga gugu i ngan ne Moroa ga lox ase ne Moses min to at lakaana Sinai.

45 \*Melemu lavalabat atnedik no diga lok kaka mo loogu boro at luvuttemen nedi la diga xip kaka i eburu minedi at laaleng diga emu mi ne Josua. La diga lok kaka lara lenep kangka basinge lara libibinat petpes no ne Moroa ga lok kepe di ve, avot ti lovotpot atdi. La mo loogu ga nemen go se at levenaleng at ne Devit.

46 \*Moroa ga vara aleng ne Devit la ne Devit ga sue ne Moroa kusu na siam avolo i ri xip toogu laplavang ti ne Moroa at ne Jakop.

47 \*Ketla ne Solomon axa ga xip mo loogu ri ne Moroa.

48 Ketla Leeme Avolo kopmen na nemen at leven gu limixin dip kiv i. I lok ngan leeme vapaase ali ga tong i xeretna,

49 'Moroa ga lok keretna, laxalibet neni loxonin orong tarak, la laxangka ni loxot burubut at luxangkede tarak. Toogu xereva nemi miba xiv i ria? Ua ba toxot tia ri lox amas?

50 Nenia xa aga rudum li na lempanga axap.'

*Ais 66:1-2*

51 \*La ne Stiven ga lok bok tidi, "Miba baulang alika? Lingisa ba

minaba siam ka levelinga at ne Moroa ukeneng at lebelen nemi? La lingisa ba nemi minaba ronga res at levelinga at ne Moroa? Nemi mi lok ngan pam lavalabat atnemi. Nemi bok na mi xopara ri Loroonan Kaala!

52 \*Lavalabat atnemi diga lox asongot lavaeme vapaase ali axap. Digap sev amet luvuttadi at ne Moroa, no gano migomgo diga paase asu lovotpot at Laradi Manmanton. Ketla nanga nemi miga song araba i ri limixin esep la miga sev amer i.

53 \*Nemi vam na miga lok ka Laulis Linga at ne Moroa no lubung angelo diga song araba nemi min. Ketla nemi xopmen mina mumu asu i."

### *Diga Luvat Ne Stiven*

54 \*Mo luvuttadi amgomgo at loogu laplavang diga ronga i nom la diga musak aleng la diga atat etang levesangsa atdi ri ne Stiven mi lumukmusak.

55 \*Ketla ne Stiven ga umsu mi Loroonan Kaala, neni ga milik aurut upana at laxalibet la ni ga ven lisisixam at ne Moroa, la ne Iesu ga tu saparap lekngen tino.

56 \*Ni ga lok, "Mina ven i! Nia a ven laxalibet i rem suang. La Laradi Mevana i tu saparap lekngen tino at ne Moroa."

57 Digap kup silok la diga lok pe levenbaalung atnedi mi levengkikngen di. La diga sixit eburu uto saparap ne Stiven,

58 \*diga sar asu i basinge mo lemenemen silok, la diga luvur i. La mo luvuttadi diga luvat ne Stiven diga lok li levempanga singsiga atdi ro at lara laradi, laasen teren ne Sol.

59 \*Nedi move diga lulu uat ne Stiven mi laxanuat la ni ga sing keretna, "Iesu, Leeme Silok, una lok ka loroonan tarak!"

60 \*Ni ga xis tiktikbu mi luvatgulom teren la ni ga sing silok keretna,

\* 7:44: Pas 25:40 \* 7:45: Jos 3:14-17; 23:9; 18:1 \* 7:46: 2 Sml 7:1-16; Sam 132:1-5 \* 7:47: 1 Lav 6:1 \* 7:51: Pas 32:9; Jer 9:26; Ais 63:10 \* 7:52: 2 Let 36:16; Mt 23:31 \* 7:53: Gu 7:38; Ga 3:19; Ib 2:2 \* 7:54: Gu 5:33 \* 7:55: Mt 22:44; Gu 2:33-34; 5:31 \* 7:56: Kl 3:1 \* 7:58: Gu 22:20 \* 7:59: Sam 31:5; Lu 23:46 \* 7:60: Lu 23:34

“Leeme Silok. Nemen uta doxoma na laxakapmek atnedi di lox i ria.”  
Ni ga tong i mo la ni ga met ta.

## 8

### *Sol Ga Lox Asongot Limixin Nunu*

<sup>1</sup> \*La ne Sol ga siam ap mo laniu at ne Stiven.

Ap mo mun laaleng luvuttadi nunu ro Jerusalem diga vaxaru ka i xusu dina suma ka laxasongsongot silok. Luvuttadi nunu diga epeseves at lengkot axap Judaia la Samaria, ketla luvuttadi vavang diga nemen to Jerusalem.

<sup>2</sup> Ket lentaba luvuttadi diga lotu saparap ne Moroa digak mit ne Stiven, diga lok tuntun mu i.

<sup>3</sup> \*Ketla ne Sol ga lok tong pen i do na sev amet limixin axap diga nunu. La limixin esep digat pas uto at laraogu atnedi xusu dina ranga alis ka di, lavatlok eburu mi lavakin, la diga lok li di at loogu xokoxo.

### *Pilip Ga Vavang To Samaria*

<sup>4</sup> \*Luvuttadi nunu no diga epeseves, digat pas ti lengkot axap, la diga vavang mi Lagale Lavavang.

<sup>5</sup> Pilip gat pas uto at lara lemene-men at lenep Samaria la ni ga vavang mi Lagale Lavavang at Lanarong tinedi limixin me go.

<sup>6</sup> Buaang limixin diga ru pilo la diga rongga avukat mo levelinga at ne Pilip. Digang tonga i mo la diga ven bok lempanga sangsangu neni ga lox i.

<sup>7</sup> \*Laxan gas diga ravasu basinge buaang limixin mi langsung lerengteng. Buaang atnedi limixin mo lengkot atnedi ga molo la nedi bok lentaba di goxo epovo rit pas, diga lox avukat.

<sup>8</sup> Kuren la langsung lomomo ga rupot saparap limixin ap mo lemene-men.

<sup>9</sup> Keneng ap mo lemene-men lara laradi laasen teren ne Simon. Neni at lentaba levenaleng neni gak lox

asangu limixin me Samaria mi mo lempanga sangsangu ren. Ni ga lok do neni mo i silok tinotno.

<sup>10</sup> La buaang nedi ap mo lemene-men, nedi limixin mun kuren la nedi lentaba silok diga lok ngangao aleng teren. Diga lok, “Neni nom lara i ruuna lolos at ne Moroa la lolos teren i silok.”

<sup>11</sup> At levenaleng buaang neni gak lox asangu nedi mi mo lengkot at lemene-men (magic). Kuren la diga mumu asu levelinga ren.

<sup>12</sup> La nedi diga nunu at lavapaase at ne Pilip mumu Lagale Lavavang at Linintoo at ne Moroa la at laasen at ne Iesu me Nasaret, Pilip ga sep susu di, lavatlok la lavakin bok.

<sup>13</sup> Simon bok neni ga nunu, la melemu at lesep susu ren ni ga nemen auret ne Pilip, la ni ga sangu aleng at lempanga sangsangu ni ga ven ne Pilip gak lox i.

<sup>14</sup> Luvuttadi vavang to Jerusalem diga rongga i do limixin to Samaria diga nunu at levelinga at ne Moroa. Kuren la diga riki ne Pita mi ne Jon saparap nedi.

<sup>15</sup> Duga rupot la duga sing ne Moroa xusu nedi bok dina lok ka Loroonan Kaala.

<sup>16</sup> Loroonan Kaala goxovisi na vubeles at tara atdi, diga lok kaka mene lesep susu at laasen at ne Iesu neni Leeme Silok.

<sup>17</sup> \*La ne Pita mi ne Jon duga lok li levengkikngen du at lempatlak atdi, la nedi diga lok ka Loroonan Kaala.

<sup>18</sup> Simon ga ven i do ne Moroa ga suxa nedi mi Loroonan Kaala ap mo loxonaleng ne Pita mi ne Jon duga lok li levengkikngen du at lempatlak atdi. La ni ga lok do na raba ne Pita mi ne Jon mi levempilas

<sup>19</sup> la ni ga lok, “Muna raba ia mi nom lolos, kusu do nia ana lok li lukngak at tara, ni na umsu mi Loroonan Kaala.”

<sup>20</sup> Ketla ne Pita ga vorang i rin, “Nenu eburu mi lempilas taram unat pas uto at lemene-men songsongot

\* **8:1:** Gu 7:58; 8:4; 11:19    \* **8:3:** Gu 9:1,13; 22:4; Gu 26:9-11    \* **8:4:** Gu 6:5    \* **8:7:** Mt 10:1; Mk 16:17    \* **8:17:** Gu 19:6

mila nu u doxoma i do nenu mo una un ka laramtaba at ne Moroa mi lempilas!

<sup>21</sup>\*Nenu xopmen tekot taram at na lugugu atnama, mila labalam kopmen nak mokso at lemeren ne Moroa.

<sup>22</sup>Una lox ekun lorooro ram la una sing saparap Leeme Silok, kusu neni ba doxoma xepe na laxakapmek ik lok at labalam.

<sup>23</sup>\*Nia a ven i do nenu u umsu mi levereven peves, la lorooro ram i umsu mi laxakapmek la kopmen na epovo xusu una sixiro basinge i.”

<sup>24</sup>La ne Simon ga lok ti ne Pita mi ne Jon, “A vara i do muna sing ti Leeme Silok, kusu kopmen tara at na lempanga mu tong pam i, naba rupot saparav ia.”

<sup>25</sup>Melemu at lavapaase asu atnedu la levelinga at Leeme Silok, Pita mi ne Jon duga vas bilong uto Jerusalem. Ap mo lomlong atnedu duga vavang mi Lagale Lavavang to at laxanmenemen solo me go Samaria.

### *Pilip Eburu Mi Leeme Gomgo Boro Itiopia*

<sup>26</sup>Laangelo at ne Moroa ga vaase ri ne Pilip keretna, “Una lok agagas li u la una vas kaxat uto at langa i laa boro Jerusalem la uto Gasa.” (Na langa kopmen bok ba dinat pas teren.)

<sup>27</sup>\*La ne Pilip ga gagas la ga vas kaxat. La lara laradi boro Itiopia, neni la iunak. Ni leeme silok me go la ga lok tatao lempilas at latkin gomgo ne Kades boro Itiopia. Ni gat pas uto Jerusalem kusu naplavang saparap ne Moroa, la ni ga vas bilong mi lavatkaris teren.

<sup>28</sup>Ni gat kis la ga utus at lubuk at leeme vapaase ali ne Aisaia.

<sup>29</sup>Loroonan Kaala ga tong i ri ne Pilip, “Una vas tangarang mo lavatkaris la unat pas saparav i.”

<sup>30</sup>Pilip ga sixit soso mun uto at lavatkaris la ni ga rongga mo laradi

ga utus lubuk at leeme vapaase ali ne Aisaia. La ni ga sue i, “U xasep at levelinga mo nu u utus i?”

<sup>31</sup>\*Mo laradi ga vorang i rin, “Nia aba xasep teren kereva? Kopmen tara vetpes kusu naba tong axasev ia min.” La ni ga sing ne Pilip do na engurut la na xis to at lavatkaris eburu min.

<sup>32</sup>Mo levelinga at ne Moroa xeneng ap mo lubuk ni ga utus i, ga lok keretna,

“Neni ga lok ngan ta lisipsip no diga lok ka i xusu dina sev i. Neni ga lok ngan lisipsip maxat no xopmen nak lok gusugus do di sep korop levengkabinim teren, ni goxo tong tekolonga.

<sup>33</sup>Neni ga lox alixilix i la ni goxo vorang i mi tekolonga. Kopmen teta noxo lox epovo do na paase mumu livipisik teren, mila lorooro ren nade at lavatbung menemen ira vot pam at laxavaxap teren.” *Ais 53:7-8*

<sup>34</sup>Mo leeme silok ga lok ti ne Pilip, “Tong i ria, do nege mo na leeme vapaase ali ga paase mu i? Tin koplata tara vetpes?”

<sup>35</sup>Pilip ga vaase rin, ga vaxaru ka i ap mo loxot, neni ga utus i, Pilip ga tong Lagale Lavavang at ne Iesu rin.

<sup>36</sup>\*Nedu dugat pas ap mo langa la duga rupot to at lara loxot ladan ga nemen teren. La mo laradi gomgo ga lok, “Ladan na ik lok. Laai mo ik lok pe ia do ana lok kaka lesepe susu?”

<sup>37</sup>[Pilip ga lok tin, “Nenu u epovo do una lok ka lesepe susu, mo do u nunu ruturun mi lorooro axap taram.” Ni ga vorang i rin, “A nunu do Iesu Karisito neni Nitna ne Moroa.”]

<sup>38</sup>Mo leeme silok ga lox alis mo lavatkaris la lakaris ga ru. La Pilip eburu mi mo laradi duga vas si uto xopok at ladan la diga ru ro xeneng teren, la ne Pilip ga sep susu i.

<sup>39</sup>\*Diga vas su boro at ladan la Loroonan Kaala at ne Moroa ga lok ka ne Pilip uto vetpes. La mo laradi

\* **8:21:** Sam 78:37 \* **8:23:** Ib 12:15 \* **8:27:** Ais 56:3-7 \* **8:31:** Jo 16:13 \* **8:36:** Gu 10:47

\* **8:39:** 1 Lav 18:12

goxo ven bok ba i, ketla ni gat pas epolo mun at langa, la ga umsu mi lomomo.

<sup>40</sup> \*Pilip ga ven kibis i do ni mo ga nemen ta ro Asotas, la ni ga vas kaxat la gat pas keneng ap mo levenmenemen, la ni ga vavang mi Lagale Lavavang se neni ga rupot to Sisaria.

## 9

### *Sol Ga Ven Kibis Ne Iesu* (Gu 22:6-16; 26:12-18)

<sup>1</sup> \*Ap mo levenaleng Sol move ga lolos do nap sev amet limixin nunu at Leeme Silok. Ni gat pas uto at lamaasa gomgo,

<sup>2</sup> la ga sue i do ni na lok ka lava-paase axasep ti lox ase nedi limixin me Judaia diga nemen to Damasko. Neni ga vara i xusu na vuse ka nedi diga mumu asu langas at Leeme Silok go, la ni naba ranga alis di, lavatlok eburu mi lavakin la na sat ka di uto Jerusalem.

<sup>3</sup> At lavatpas teren uto Damasko, ga auret ti mo lemenemen silok, soso mun langsung laxasep boro vana at laxalibet ga soo pavaa i.

<sup>4</sup> Ni ga subu si ukopok at laxangka la ni ga ronga laxaka at lara ga lok tin, "Sol, Sol. Tila uk lox asongor ia?"

<sup>5</sup> \*Ni ga sue i, "Leeme Silok, nenu nege?"

Mo laxaka at lara ga lok tin keretna, "Nenia ne Iesu, mo nu uk lox asongor ia.

<sup>6</sup> Ketla una xatu la unat pas uto at lemenemen silok la mo go tara ba tong tempanga salai nenu uba lox i."

<sup>7</sup> Mo luvuttadi diga emu mi ne Sol, diga ru pilo, la di goxo tong tekolonga. Diga ronga laxaka at lara ketla di goxo ven teta.

<sup>8</sup> Sol ga xatu kaxat boro xopok at laxangka la ga valas luxatli ren, ketla ni goxo ven tempanga. Kuren la diga ranga ka i ro at lekngen la diga lam ka i uto Damasko.

<sup>9</sup> At lavantun aleng ni goxo epovo do na ven tempanga, la ap mo bok levenaleng ni goxo anan la goxo inin.

<sup>10</sup> Lara lun pinivu ga nemen to Damasko, laasen teren ne Ananias. Ni ga ven lisilimet, la keneng teren Leeme Silok ga lok tin, "Ananias."

La ni ga vorang i, "Leeme Silok, nenia na."

<sup>11</sup> \*Leeme Silok ga lok tin, "Una gagas la unat pas uto at langas, laasen teren, Langas Mokmokso, la mo go at loogu at ne Judas, una sue ri laradi me Tasas laasen teren ne Sol, neni mo i ngising.

<sup>12</sup> La at lisilimet teren ni i ven lara laradi, laasen teren ne Ananias i beles ukeneng la i lok li lukngen at lavatlok teren kusu ni na ven bok ba."

<sup>13</sup> \*Ananias ga vorang i rin keretna, "Leeme Silok, buaang limixin diga tong lempanga ria mumu nom laradi, la mumu bok lempanga xakapmek ni ga lox i ri limixin taram to Jerusalem.

<sup>14</sup> \*La ni gat pas ude Damasko mi levelinga lolos at lavamaasa silok, kusu na xoxo ka nedi di mumu asu laasen taram."

<sup>15</sup> \*Leeme Silok ga lok tin, "Una vot pasa i, mila nia ara soxolik ka vam i xusu ni na mumu asu ia, la ni naba lox axasep laasen tarak tinedi limixin kopmen di me Judaia la ti lavaorong la ti limixin me Israel.

<sup>16</sup> \*La nia anaba lox ase i mi mo lempanga ni naba songot teren mumu lununu ren saporav ia."

<sup>17</sup> La ne Ananias ga vas kaxat la ga rupot to at loogu at ne Judas la ga beles ukeneng la ga lok li lukngen to at ne Sol la ni ga lok, "Netak ne Sol, Leeme Silok i riki ia, Iesu axa, no ga rupot saporav u ro at langas at lavatpas taram ude. Ni i riki ia xusu una reven bok ba la una lok ka Loroonan Kaala."

<sup>18</sup> Ap mo mene loxonaleng, lavanga ga lok ngan lengkexeleng mat

\* **8:40:** Gu 21:8 \* **9:1:** Gu 8:3 \* **9:5:** Gu 5:39; 1 Ko 15:8 \* **9:11:** Gu 21:39; 16:9 \* **9:13:** Gu 8:3 \* **9:14:** Gu 9:1-2,21; 1 Ko 1:2 \* **9:15:** Gu 25:13; 27:24; Ro 1:5 \* **9:16:** 2 Ko 11:23-28

ga subu su boro at luxatli at ne Sol la ni ga epovo manga xusu ni na reven bok ba. Ni ga xatu kaxat la ga lok ka lesepe susu.

<sup>19</sup> La melemu at laanan teren, lolos teren garamlong bok ba. Sol ga nemen to Damasko eburu mi limixin nunu at lentaba levenaleng.

### *Sol Ga Vavang To Damasko*

<sup>20</sup> Sol ga beles to xeneng at laraogu singising la soso mun ni ga vaxaru ka i xusu na vavang mi laasen at ne Iesu. Ni ga lok, "Iesu neni Nitna ne Moroa."

<sup>21</sup> \*La nedi diga rongga i, diga rakdu la diga esue, "Kereva na? Na laradi ga nemen to Jerusalem la ni gap sev amet limixin diga nunu at ne Iesu. La ni gat pas ude xusu na ranga alis nedi la na lok kaka nedi uto at lavamaasa silok."

<sup>22</sup> \*Ketla lavavang at ne Sol ga mumuat amisik, la ni ga lox asusu i do ne Iesu mo neni Lanarong. La levelinga ren ga mumuat aleng la buaang atnedi limixin me Judaia mo diga nemen to Damasko di goxo epovo do dina vorang i.

<sup>23</sup> \*Buaang levenaleng gara volo, la limixin me Judaia diga vot buru la diga lok li lara langas linga ri sev amet ne Sol.

<sup>24</sup> Ketla ne Sol ga rongga ka levelinga atdi. At levenaleng kangking la levenaleng kanimin diga reven tin to at levenngas povolo ap mo lemenemen kusu dina sev amer i.

<sup>25</sup> \*Ketla ga at lara laxanimin luvuttadi no diga mumu asu ne Sol, diga lok ka i la diga suxa abeles i at laxaxi buso la diga lox asi i uto xopok at loxon musmaragu lixilik ga nemen to at lenep at langas uat diga rit kangkan mo lemenemen min.\*

### *Sol Ga Vot Pasa Luvuttadi Nunu To Jerusalem*

<sup>26</sup> \*Sol ga vas bilong uto Jerusalem la ni gak lok tong pen i do ni na

gugu eburu mi limixin nunu. Di goxo nunu do neni mo laradi nunu la diga e amarat teren.

<sup>27</sup> \*Melemu ne Banabas ga lok tooro i la ga lam ka i uto saparap luvuttadi vavang. Ni ga soxomus ba i ridi do ne Sol ga ven Leeme Silok to at langa la Leeme Silok ga paase rin. Ni ga tong box i ridi do ne Sol ga vavang mi laasen at ne Iesu ro Damasko la kopmen goxo marat.

<sup>28</sup> Kuren la ne Sol ga nemen eburu minedi la gat pas uto at lengkot axap Jerusalem, la ni ga vavang lolos mi laasen at Leeme Silok la kopmen goxo marat. Goxopmen tara ga rupe lugugu ren.

<sup>29</sup> Ni eburu minedi limixin me Judaia mo diga paase Grik diga etep mi levelinga, ketla diga lok tong pen i do dina sev amer i.

<sup>30</sup> \*Ketla limixin nunu diga rongga i mo la diga lam ka ne Sol uto loxon at lemenemen Sisaria la diga lox aonon i uto Tasas.

<sup>31</sup> Kuren la luvuttadi nunu at lengkot axap Judaia, Galili, la Samaria, diga ruuna limila la kopmen bok ba di goxo marat. La leexes at limixin nunu ga urut. Mila Loroonan Kaala ga gugu kantubu atdi, la diga lok ngangao aleng Leeme Silok.

### *Pita Ga Nemen To Jopa La Lida*

<sup>32</sup> Pita ga vas tangtagap at lengkot axap saparap Jerusalem, la at lara laaleng ni gat pas kusu na ven limixin at ne Iesu no diga nemen to Lida.

<sup>33</sup> Mo go ni ga ekip tangarang mi lara laradi, laasen teren ne Inias, labantuxu axap teren ga molo la ni goxo lox epovo i do na xatu kaxat at loora mikmidi ren at lavanuan maares axap.

<sup>34</sup> Pita ga lok tin, "Inias. Iesu Karisito i lox aroo u. Katu kaxat la una sa avukat loora ram." Ap mo

\* 9:21: Gu 8:3 \* 9:22: Gu 17:3; 18:5,28 \* 9:23: Gu 23:12 \* 9:25: 2 Ko 11:32-33 \* 9:25: Lentaba laraogu diga lox i ro mavana at larangas uat la diga ruuna larago lixilik uto maxamang at lemenemen silok. \* 9:26: Ga 1:17-19 \* 9:27: Gu 9:4,20; 1 Ko 9:1; 15:8 \* 9:30: Gu 11:25; Ga 1:21

mene loxonaleng Inias ga xatu kaxat upana.

<sup>35</sup> Mo limixin diga nemen go Lida la Seron diga ven mo laradi ga lox avukat nga la buaang atnedi diga nunu at Leeme Silok.

<sup>36</sup> To Jopa lara latkin ga nemen, laasen teren ne Tabita, neni latkin nunu. (Laasen bok teren at lavapaase Grik do ne Dokas). Ni ga raba axap lorooro ren kusu na lok tooro limixin pakpakes mi leven gugu nunuan.

<sup>37</sup> At lara laaleng ni ga meres la ni ga met. Labantuxu ren diga gos i la diga vaxamdi li i ro xeneng at lara loogu ga nemen to vana.

<sup>38</sup> Jopa xopmen goxo vaxalom boro Lida. La mo luvuttadi nunu ro Jopa diga rongga i do ne Pita mo gak lok to Lida. Kuren la diga riki legepu radi saparav i mi lavapaase keretna, "Soso mene u la unat pas uto Jopa."

<sup>39</sup> La ne Pita ga xatu kaxat la ga vas kaxat eburu midu. At loxonaleng neni ga rupot diga lam kaka i uto ap mo loogu mevana. Mo lempat naa diga ru bubua saparav i, digang teng la diga lox ase i mi lempanga singsiga la lenbantamon ne Dokas gak sox i ap mo levenaleng ni ga rooro ren.

<sup>40</sup> \*Pita ga lox asu axap di ukamang ap mo loogu, la ga xis tik-tikbu mi luvatgulom teren la ga sing. Melemu ren, neni ga rem gili mu ne Tabita la ga lok, "Tabita, katu kaxat." La ni ga valas luxatli ren la ga ven ne Pita la ga xis upana.

<sup>41</sup> Pita ga ranga axatu i mi lekngen. La ni ga ro bubua ka luvuttadi nunu la lempat naa, la ga lox ase di mi ne Tabita mo gara roo xat pam.

<sup>42</sup> Levelinga at na lavanga sangsangu ga rem epeseves at lengkot axap Jopa, la buaang limixin diga nunu at Leeme Silok.

<sup>43</sup> \*Pita ga nemen go Jopa at levenaleng buaang eburu mi laradi ga gugu lenbantuxu at levenbulumaxao laasen teren ne Simon.

## 10

### *Moroa Ga Siam Ka Limixin Kopmen Di Me Judaia*

<sup>1</sup> \*Lara laradi ga nemen to Sisaria laasen teren ne Konilias, neni laasep at limixin esep boro Rom diga tong nedi do, "Limixin esep me Itali."

<sup>2</sup> Konilias laradi ga lotu saparap ne Moroa. Nedi axap diga nemen ap mo loogu ren diga lok ngangao at ne Moroa. Buaang lempanga neni ga lox i xusu ti lok tooro limixin pakpakes boro Judaia, la ni ga ngising amisik ne Moroa.

<sup>3</sup> \*At lara laaleng at lavantun konaleng ga ukantinao, neni ga ven lisilimet la keneng ap mo lisilimet teren neni ga ven axasep avukat laangelo at ne Moroa ga vubeles ukeneng at loogu ren la ga lok tin, "Konilias!"

<sup>4</sup> La ni ga ven tooro laangelo mi lanmarat la ni ga lok, "Kereva mo, Leeme Silok?"

Laangelo ga lok, "Moroa ira siam ka vam levesingising taram la leven gugu nunuan taram, la ni ira dox-oma vam u.

<sup>5</sup> La nanga una riki tuvuttadi uto Jopa kusu dina lam ka lara laradi, laasen tinotno ren ne Simon Pita.

<sup>6</sup> \*Neni loose i nemen to at loogu at laradi i gugu lempanga singsiga mi lenbantuxu at levenbulumaxao, laasen teren ne Simon no i nemen saparap laras."

<sup>7</sup> La nom laangelo at ne Moroa ga vas kaxat ta, la ne Konilias ga ro xaka luradi saksaxaruki ren eburu mi laradi esep, neni laradi ga mumu asu ne Moroa la neni bok ap mo limixin esep diga gugu tooro ne Konilias.

<sup>8</sup> La ne Konilias ga tong axasep di mi lavanga salai mo ga vot saparav i la ni ga riki di uto Jopa.

<sup>9</sup> Ap mo lara laaleng melemu at lavatpas atnedi diga vas auret to Jopa, la ga xanangking ne Pita ga engurut uto vana at lavatlak gu xusu na lok lising.

<sup>10</sup> La ni ga roxo la ga vara i do na anan. Luvuttadi ap mo loogu diga lox agagas li vam mo leveluxa ketla neni ga ven lara lisilimet.

<sup>11</sup> \*Neni ga ven laxalibet ga rem suang la lara lavanga ga si boro vana at laxalibet ga lok ngan lavattamon silok, mo lavanga ga ruuna lavanuet mesuluk la diga lox asi i uto xopok saparap ne Pita. <sup>12</sup> Ma xeneng at nom labantamon silok buaang levenasen panga mi lavanuet kangkedek ga nemen eburu mi lempanga axap diga vokaxao mi lebelen di la levenasen pixa axap.

<sup>13</sup> La ni ga ronga laxaka at ne Moroa ga lok tin, "Pita, una xatu kaxat, la una sep ka na leveluxa la una anan i."

<sup>14</sup> \*Ketla ne Pita ga lok, "Kopmen tinotno, Leeme Silok. Nia xovisi a goxo anan tempanga xeretna mila i bilinga."

<sup>15</sup> \*La ne Moroa ga lok bok tin keretna, "Nemen uta tong tempanga do i bilinga mila nenia ara lox adadat pam i."

<sup>16</sup> La na lavatamon ga vot ga vantun la soso mun gamlong uto vana at laxalibet.

<sup>17</sup> Pita gam doma mu lavasuun ap mo lisilimet. La ap mo mun loxonaleng mo luvuttadi ne Konilias ga riki di, diga sue axasep ka loogu at ne Simon ga nemen ua. Monga diga tu ro melango at lumusmaragu ap mo loogu.

<sup>18</sup> Diga seega la diga sue, "Tara nade laasen teren ne Simon Pita?"

<sup>19</sup> \*Pita move gam doma i do ni naklen tinotno lavasuun ap mo lisilimet, la Loroonan Kaala ga lok tin, "Una ronga i na. Lavantun luvuttadi no di vara epaase minu.

<sup>20</sup> Una xatu la una vas si ukopok, la nemen uta doma solo ri emu minedi, mila nenia a riki nedi ude."

<sup>21</sup> La ne Pita ga vas si ukopok kusu na ven mo luvuttadi. La neni ga lok

tidi, "Nenia laradi nemi mi reven tin. Tila nemi mi vot de?"

<sup>22</sup> \*Diga lok tin, "Laasesep at luvuttadi esep, ne Konilias i riki nema. Neni lagale laradi la ni i lotu saparap ne Moroa la limixin me Judaia di lok ngangao aleng teren. Laangelo at ne Moroa ga tong i rin do ni ba lam ka u uto at loogu ren, kusu neni naba ronga levelinga nu na vaase i min."

<sup>23</sup> \*Pita ga xup abeles di ukeneng la ga tong i rinedi do dina nemen be go ap mo laxanimin.

Ap mo laaleng melemu Pita ga gagas, la ni ga emu minedi. La lentaba luvuttadi nunu bok boro Jopa diga emu eburu min.

<sup>24</sup> Ap mo laaleng melemu ni ga rupot to Sisaria. La ne Konilias ga nemen tangais i eburu mi lentaba ren la larapen tangas avukat teren no ni ga xup kaka nedi.

<sup>25</sup> At loxonaleng ne Pita ga lok do na beles ukeneng at loogu at ne Konilias, Konilias ga vas tangarang i, la ga xis tiktikbu mi luvatgulom teren to melango at ne Pita.

<sup>26</sup> \*Ketla ne Pita ga ranga axatu i la ga lok, "Una xatu kaxat upana, mila nenia mun laradi xuren."

<sup>27</sup> Pita ga epaase mi ne Konilias at loxonaleng ni ga beles la ni ga vot pasa buaang nedi limixin go xeneng.

<sup>28</sup> Ni ga lok tidi, "Nemi xa mi xasep do lotu me Judaia kopmen dina mulus do tara atnama na etangas minedi limixin kopmen di me Judaia. Ketla ne Moroa ga lox ase ia do nia a noxo tong taradi do i bilinga at lemeren ne Moroa.

<sup>29</sup> Kuren la ap mo laaleng uga xup mu ria la nia nga na ara rupot, la nia a goxo ronga xepe u. A sue nga u na, tila nenu uga xup mu ria?"

<sup>30</sup> \*Konilias ga lok, "At lavanuet aleng gara xap pam at lavantun konaleng ga ukantinao i epovo mi loxonaleng keretna, nia aga ngising to xeneng at loogu rak. La soso

\* 10:11: Gu 11:5-17 \* 10:14: Mas 11:1-47; Isi 4:14 \* 10:15: Mk 7:15,19 \* 10:19: Gu 11:12; 13:2  
\* 10:22: Gu 10:1-2 \* 10:23: Gu 10:45; 11:12 \* 10:26: Gu 14:13-15; Li 19:10 \* 10:30: Gu 3:1; 1:10



mun lara laradi ga siga labantamon gamgames ga ru ro melamgo rak.

<sup>31</sup> La ni ga lok, 'Konilias! Moroa ira ronga vam levesingising taram, la ni ira doxoma vam leven gugu loklok tooro ram.

<sup>32</sup> Una riki tentaba uto Jopa ri lam kaka lara laradi laasen teren ne Simon Pita. Neni loose i nemen eburu mi laradi i gugu lempanga singsiga mi lenbantuxu at lenbulumaxao, laasen teren ne Simon, no i nemen saparap laras.'

<sup>33</sup> Kuren la nenia aga riki soso luvuttadi gugu rak ap mo mun lox-onaleng kusu dina lam kaka u, la i lox avukat dola ura vot pasa ia. Nanga nema mak lok at lemeren ne Moroa, ma ngangais kusu mana ronga levelinga mo ne Moroa ga tong pam i ru do unaba vaase i rinama."

#### *Pita Ga Vavang Ti Ne Konilias Eburu Mi Limixin Teren*

<sup>34</sup> \*Pita ga vaase kaxat la ga lok, "Naaba, nia a ven kibis i do i ruturun tinotno do ne Moroa kopmen na ven kepe lentaba vetpes, i ven limixin axap ngan legesara mun.

<sup>35</sup> \*Do tara i lok ngangao ren la ik lok lempanga ik mokso, ne Moroa naba siam kaka i, keke i do neni at lubang mixin petpes.

<sup>36</sup> \*Nemi miklen Lagale Lavavang neni ga song araba limixin me Israel min. Na Lagale Lavavang i lok lumulum kantubu at ne Moroa la limixin mumu lanmet at ne Iesu Karisito. Neni Leeme Silok at limixin axap at na lavatbung menemen kopok.

<sup>37</sup> \*Nemi miklen leretere ri lempanga silok ne Iesu ga lox i at lengkot axap at na lenep silok Judaia. Ni ga ruka i ro Galili, melemu at ne Jon ga vavang mi lesepe susu ren.

<sup>38</sup> \*Nemi miklen i do ne Iesu me Nasaret, ne Moroa ga lox anarong i mi Loroonan Kaala la ga raba box i mi lolos teren. Ni gat pas at lengkot

axap la ga lok lempanga nunuan la ga lox aroo nedi bok ne Satan ga xoxo di, mila ne Moroa ga nemen eburu min.

<sup>39</sup> Nema na maga reven mo lempanga neni ga lox i ro at lenep Judaia la Jerusalem. Diga vaxarem i at laxaba la ni ga met.

<sup>40</sup> \*Ketla ne Moroa ga lox arooro amlong i basinge lanmet at laaleng sepsev avantun, la ga lox i xusu na ru asuvos,

<sup>41</sup> \*kopmen do ti limixin axap, ketla tinama xusuk mun, luvuttadi ne Moroa ga soxolik ka vam nama kusu ti vaase asu levelinga ren. Maga anan la maga inin eburu min melemu at laxakatu kaxat amlong teren.

<sup>42</sup> \*La ni ga tong alolos i rinama do mana paase asu Lagale Lavavang ti limixin la mana tong asu i do neni mun laradi ne Moroa ga soxolik ka i xusu neni naba ronga linga atnedi di rooro la nedi digara met pam.

<sup>43</sup> \*Nedi axap, lavaeme vapaase ali diga paase mumu vam i, diga tong ali i do tara i nunu ren, nom laxakapmek teren, ne Moroa naba doxoma xepe i xeneng at laasen teren."

#### *Limixin Kopmen Di Me Judaia Diga Ruuna Ka Loroonan Kaala*

<sup>44</sup> \*Pita move ga paase la Loroonan Kaala ga vubeles atnedi nom, mo digat kis la digang tonga levelinga ren.

<sup>45</sup> Luvuttadi nunu at limixin me Judaia, no diga vas kaxat eburu mi ne Pita boro Jopa, diga rakdu aleng mila ne Moroa ga riki asi Loroonan Kaala ren saparap nedi limixin kopmen di me Judaia.

<sup>46</sup> \*Diga ronga nedi diga epaase mi lempapaase vetpes la diga emi asu mi ne Moroa.

Pita ga lok,

\* **10:34:** 1 Sml 16:7; Ro 2:11; Ga 2:6 \* **10:35:** Jo 9:31 \* **10:36:** Sam 107:20; Ais 52:7; Li 17:14  
 \* **10:37:** Mt 4:12-17 \* **10:38:** Mt 3:16; Lu 4:17-20 \* **10:40:** 1 Ko 15:4-7 \* **10:41:** Jo 14:19,22-24;  
 15:27; Gu 1:8; Lu 24:42-43 \* **10:42:** Gu 17:31; 2 Ti 4:1; 1 Pi 4:5 \* **10:43:** Ais 33:24; 53:5-6; Jer 31:34;  
 Dan 9:24 \* **10:44:** Gu 11:15; 15:8 \* **10:46:** Gu 2:4; 19:6 \* **10:47:** Gu 8:36

47 \**“Na limixin dia ruuna ka vam Loroonan Kaala kerekngan pam nedik taga ruuna ka i. Ixo epovo do tara na sep pepe di, do di noxo lok ka lesepe susu mi ladan.”*

48 \**Kuren la ni ga tong i ridi xusu dina lok ka lesepe susu xeneng at laasen at ne Iesu Karisito. Melemu diga sue i do ni na nemen eburu minedi at tentaba tevenaleng.*

## 11

### *Pita Ga Vaase Asu Lugugu Ren To Jerusalem*

1 Luvuttadi vavang eburu mi luvuttadi nunu at lengkot axap Judaia diga rongga i do limixin kopmen di me Judaia bok mo diga siam ka vam levelinga at ne Moroa.

2 La ne Pita gamlong uto Jerusalem. La nedi limixin nunu diga lok do ik mokso ri rivit kepe lengkontuxu, diga musak aleng ne Pita.

3 \**Diga lok, “Nenu loose mun keneng at loogu atnedi limixin kopmen di me Judaia, kopmen dina rivit kepe lengkontuxu atnedi. La nenu uga anan eburu minedi.”*

4 La ne Pita ga tong axasepe nedi mi mo lempanga ga ravasu.

5 \**Ni ga lok keretna, “Nia aga ngising to Jopa la nia aga ven lisilimet. La aga ven lavanga ga si boro vana la ukopok, ga lok ngan lavattamon silok diga lox asi i boro vana at laxalibet ga ruuna lavanuet mesuluk, la ni ga los kis saporav ia.*

6 Nia aga ven avukat keneng teren la nia aga ven lempanga mi lavanuet kangkedek, limixin di lok tatao nedi la lentaba kopmen limixin dina lok tatao nedi, la lempanga axap di vokaxao mi lebelen di la levenasen pixa axap.

7 La nia aga rongga laxaka at ne Moroa ga lok tia xeretna, ‘Pita, una xatu upana, una sep di la una anan i.’

8 Ketla nia aga lok, ‘Kopmen tinotno, Moroa. Nenia a goxovisi na an tepempanga i bilinga.’

9 La ne Moroa ga vaase manga ria boro vana at laxalibet keretna, ‘Nemen uta tong tavanga do i bilinga, mila nenia ara lok pam do i lox avukat.’

10 Na lavanga ga ravasi ga vantun, la melemu nom lempanga axap garamlong bok nga uto vana at laxalibet.

11 Ap mo mene loxonaleng lavantun luvuttadi diga rupot boro Sisaria. Nedi diga rupot ap mo loogu nenia aga nemen teren.

12 \**La Loroonan Kaala ga tong i ria xusu anat pas eburu midi uto Sisaria la nemen nia ta doma solo i. La nedi na lavanna luvuttadi nunu boro Jopa, nedi diga emu eburu minia uto Sisaria. La nema axap maga beles ukeneng at loogu at ne Konilias.*

13 Ni ga tong i rinama do ni ga ven laangelo ga tu ro xeneng at loogu ren la ga lok tin keretna, ‘Una riki tentaba uto Jopa kusu dina lam kaka lara laradi, laasen tinotno ren ne Simon Pita.

14 \**Ni naba vaase tevelinga ru la nenu minedi axap na di nemen at loogu ram mina lok ka lorooro avolo.’*

15 \**La nia aga vaxaru xaka i do ana vaase, la Loroonan Kaala ga vubeles atnedi getgesara kerekngan ap mo laaleng Loroonan Kaala ga beles atdik.*

16 \**La nia aga doxomangke at levelinga at Leeme Silok ga lok keretna, ‘Jon ga sep susu limixin mi ladan mene, ketla nemi minaba lok ka lesepe susu at Loroonan Kaala.’*

17 I xasepe do ne Moroa ga raba limixin kopmen di me Judaia mi Loroonan Kaala, kerekngan ni ga raba nedik min. Nedik taga lok ka lorooro maxat at ne Iesu Karisito. Nenia nege la ana lok tong pen i do ana lok pe lugugu at ne Moroa.”

\* 10:48: Gu 2:38 \* 11:3: Gu 10:28; Ga 2:12 \* 11:5: Gu 10:9-48 \* 11:12: Gu 10:23,45 \* 11:14: Gu 16:31 \* 11:15: Gu 2:4 \* 11:16: Gu 1:5 \* 11:18: Gu 13:48; 14:27

18 \*Diga rongga i na la lodoxoma atdi ga lok mulus la diga emi asu mi ne Moroa. Diga lok, "Moroa ira suang pam langas ti lorooro xusu limixin kopmen di me Judaia, dina leeng basinge laxakapmek atnedi la dina ruuna ka lorooro maxat."

### *Luvuttadi Nunu At Ne Iesu Diga Rupot To Antiok*

19 \*Buaang neddi luvuttadi nunu diga epeseves uto at levengkot Judaia la at lengkot petpes bok mumu levesongsongot limixin kakapmek diga ruka i at loxonaleng diga sev amet ne Stiven. Lentaba atnedi digat pas upaxalom uto Ponisia la Saipras la Antiok, diga tong asu Lagale Lavavang at ne Iesu ti leme Judaia kusuk la kopmen ti levenabung mixin petpes. 20 Ketla lentaba luvuttadi nunu boro Saipras la Sairini, digat pas uto Antiok la diga vavang go ri limixin kopmen di me Judaia. Diga tong asu Lagale Lavavang at Leeme Silok ne Iesu.

21 \*La Leeme Silok ga lox alolos neddi la buaang neddi limixin diga nunu la diga leeng basinge laxakapmek atdi la diga raba lorooro atdi ri Leeme Silok.

22 \*Levelinga mumu i na lavanga ga rupot ti limixin nunu ro Jerusalem; kuren la diga riki ne Banabas uto Antiok.

23 \*Ni ga rupot la ni ga ven i do ne Moroa ga lox aumsu mo limixin mi letaba nabalumu ren. Ni ga lok momo la ga vaase alolos neddi axap kusu dina tu atmatkun mi lununu la luruturun atnedi saparap Leeme Silok mi lodoxoma atdi axap.

24 \*Banabas ga lok tooro di mila neni lagale laradi ga umsu mi Loroonan Kaala la lununu ren ga lolos. La buaang neddi limixin me Antiok diga raba lorooro atnedi ri Leeme Silok.

25 \*Melemu ne Banabas gat pas uto Tasas kusu na ven ti ne Sol.

26 \*La ne Banabas ga vot pasa i la ni ga lam kaka i uto Antiok. At legesa maares kudun nedu dugat pot eburu minedi buaang limixin ap mo loxot la duga anasa di. Mo go mun Antiok limixin nunu diga lok ka avot na laasen Kristien.

27 \*Ap mo levenaleng lentaba lavaeme vapaase ali diga vas kaxat boro Jerusalem la diga rupot to Antiok.

28 \*Lara atnedi ne Agabas ga xatu upana la at lolos at Loroonan Kaala ga vaase ali do lean kangking naba rupot at lavatbung menemen axap. Ga vot ap mo levenaleng ne Kolodias gam gomgo ri limixin me Rom.

29 Limixin nunu boro Antiok diga vaase i do dina lok tooro limixin nunu ro Judaia. Neddi diga ruuna lempilas buaang, diga raba i.

30 \*Diga lox i xuren la diga lox aonon lempilas at lukngen ne Banabas mi ne Sol, kusu duna raba luvuttadi amgomgo at lotu min, go Jerusalem.

## 12

### *Levesongsongot Ga Vot Manga Saparap Limixin Nunu*

1 Ap mo levenaleng loorong, ne Erodes ga ranga alis lentaba atnedi luvuttadi diga nunu at ne Iesu la ga lok li di at loogu xokoxo.

2 Neni ga ra korop laxaka at ne Jems, neton ne Jon mi lavarise sepsep.

3 \*La ni ga ven i do na laniu ga lox amomo luvuttadi amgomgo at leme Judaia, kuren la ni ga ranga alis bok ne Pita la ga lok li i at loogu xokoxo. Anai ga ravasu at levenaleng limixin me Judaia diga lok laanan at loxongkide diga ove vetpes i.

4 Melemu at larangtanga alis at ne Pita, diga lok li i ro at loogu xokoxo, mo go diga song araba lavanuet lara binam tadi esep, lavanuet at legesa binam kusu na lok tatao i. Erodes

\* 11:19: Gu 8:1-4 \* 11:21: Gu 2:41 \* 11:22: Gu 4:36 \* 11:23: Gu 13:43 \* 11:24: Gu 2:41; 6:5  
 \* 11:25: Gu 9:30 \* 11:26: 1 Pi 4:16 \* 11:27: Gu 13:1; 15:32 \* 11:28: Gu 21:10 \* 11:30: Gu 12:25 \* 12:3: Gu 4:3

ga doxoma i do ni naba lok li i at lavapaase melemu ap mo laanan, laasen teren, Lovovolo Pe.

<sup>5</sup> \*Kuren la ne Pita ga nemen to xeneng at loogu xokoxo, ketla luvuttadi nunu diga ngising amisik ne Moroa mi lorooro axap atnedi xusu ne Moroa na lok tooro i.

*Laangelo Ga Soxomus Asu Ne Pita At Loogu Xokoxo*

<sup>6</sup> \*At laxanimin avot ap mo laaleng kusu ne Erodes na lok li ne Pita at lavapaase ro melamgo at limixin, Pita ga unga xantubu at luradi rutu mu. Ni goxo epovo na sixiro mila diga xoxo i mi luvaroos sen, la luvuttadi rutu mu mo digak lok at lumusmaragu ap mo loogu xokoxo.

<sup>7</sup> Soso mun laangelo at ne Moroa ga ru go, la laxasep ga soo to xeneng ap mo loxot. La laangelo ga sox aus ne Pita ro at laxavis teren la ga lok tin, "Soso mun! Katu kaxat!" La mo luvaroos sen ga subu basinge lukngen ne Pita.

<sup>8</sup> La laangelo ga lok, "Una sevut atmatkun labaane ram, la una xoxo li luvanga vatpas taram." Pita ga lox i xuren la laangelo ga lok tin, "Una siga lavanga singsiga ram, la una mumu asu ia."

<sup>9</sup> Pita ga mumu asu i uto xamang. Ni goxo xasep at levelinga ap mo laangelo. Ni ga nua i do ni mo ga reven mun lapnobo.

<sup>10</sup> \*Duga vas polo lara loxot avot, mo luvuttadi rutu mu diga lok tatao i. La melemu duga volo loxot sepsev agepura. La melemu duga vot to at lumusmaragu mi lemparoos sen teren no ga tu raba uto at lemenemen silok. Mo lumusmaragu ga rem suang ka parang axa ridu, la duga vas su ukamang. Duga mu asu mo langas ap mo lemenemen la soso mun laangelo ga on basinge ne Pita.

<sup>11</sup> La ne Pita ga ven kibis mo lavanga ga rupot saparav i la ga lok, "Na nia aklen ba i do i ruturun

tinotno! Moroa i riki laangelo ren la ni ira lox asepsu ia at lolos at ne Erodes la basinge lempanga xakapmek leme Judaia di lok do dina lox i ria."

<sup>12</sup> \*Se ni ga ven kibis pam mo lavanga ga vot saparav i, la ni gat pas uto at loogu at ne Maria, nenen ne Jon Mak. Buaang limixin diga nemen go la diga ngising.

<sup>13</sup> Pita gapdipdi ro maxamang at lumusmaragu la lara loolik asaxaruki, laasen teren ne Rodi ga vas kaxat kusu na vorang linga ren.

<sup>14</sup> Ni ga ronga xibis laxaka at ne Pita la ni ga lok momo aleng la ni ga sixit beles manga ukeneng. Ketla ni xopmen goxo suang lumusmaragu. Ni ga vaase axasev i do ne Pita mo ga tu xamang.

<sup>15</sup> \*La diga lok tin, "U baulang!" Ketla ni ga tong amisix i do mo levelinga ren i ruturun. Kuren la diga lok, "Laangelo ren mo."

<sup>16</sup> Nedi move diga epaase la ne Pita garapdi amu bok. La diga suang mo lumusmaragu la diga ven i la diga rakdu aleng.

<sup>17</sup> \*Ni ga sep makmak nedi xusu dinak lok pilo, la ni ga soxomus ba i ridi do ne Moroa ga lox asu i boro at loogu xokoxo kereva. Ni ga lok, "Mina tong i na ri ne Jems la luvuttadi nunu. La ni ga on basinge nedi la gat pas uto at lemenemen petpes."

<sup>18</sup> \*Ga maxantamak luvuttadi rutu mu diga rangku aleng at lavanga salai mo ga rupot saparav ne Pita.

<sup>19</sup> Erodes ga raba linga di xusu dina ven tin, ketla di goxo long lenget kaka i. Kuren la ni ga lok li luvuttadi rutu mu at lavapaase la ni ga tong i ri luvuttadi esep do dina sev amet di.

Melemu at na, Erodes ga on basinge lenep Judaia la ga nemen at lentaba levenaleng to Sisaria.

*Lanmet At Ne Erodes*

\* 12:5: Je 5:16 \* 12:6: Gu 5:23 \* 12:10: Gu 5:19 \* 12:12: Gu 12:25; 15:37 \* 12:15: Gu 26:24; Mt 18:10 \* 12:17: Gu 13:16; 19:33; 21:40 \* 12:18: Gu 5:22-24 \* 12:20: 1 Lav 5:11; Isi 27:17

20 \*Erodes ga musak aleng mi limixin boro Taia la Sidon. Ketla mo limixin diga lok ka ne Balastas ti lok tooro nedi. Neni laradi ga lok tatao loogu at ne Erodes. Kuren la digat pas saparap ne Erodes keneng at legesa binam tadi. La diga vara aleng do na lok luburadong. Mila ap mo loxot atnedi, digak lok kaka leveluxa atnedi boro at lenep teren.

21 Diga lok katling pam lara laaleng at lixitkis buru atnedi, la ap mo laaleng ne Erodes ga sigaara mi lempanga singsiga nunuan teren. Ni gat kis to at loxonin orong teren, la ga lok lavapaase ri mo limixin.

22 Diga xup silok keretna, "Kopmen laradi nom i paase, ketla lomoroa nom."

23 \*Ap mo mene loxonaleng laangelo at ne Moroa ga sep ne Erodes mi lanmeres, atla neni goxo lok ngangao at ne Moroa. Laxangkolon ga anan labantuxu ren la ga met ta.

24 \*Ketla levelinga at ne Moroa ga epeseves uto at lengkot axap la buaang limixin diga nunu ren.

25 \*Banabas mi ne Sol duga lox axap lugugu atdu, la dugamlong boro Jerusalem. Duga lok kaka ne Jon Mak eburu midu.

## 13

### *Diga Sok Katling Ne Banabas Mi Ne Sol*

1 \*At loogu lotu go Antiok lentaba lavaame vapaase ali la lentaba luvut-tadi loklox ase mo gak lok. Banabas, Simion (diga tong box i do laradi bibi), Lusias (boro Sairini), Manaen (mo nedu mi laradi gomgo ne Erodes duga etangas eburu), la ne Sol.

2 \*At lara laaleng nedi diga lotu saparap Leeme Silok la diga mun anan, Loroonan Kaala ga lok tinedi, "Mina raba ia mi ne Banabas la ne Sol, kusu ti lok lugugu i ngan nia aga soxolik ka vam du rin."

3 \*La digan mun anan la diga ngising, la diga lok li levengkikngen di mavana atdu, la diga riki aonon ba du.

### *Banabas Mi Ne Sol To Saipras*

4 \*Loroonan Kaala ga riki ne Banabas mi ne Sol, la dugat pas uto Selusia la mo go duga los urut at lavatmon la duga mumu i uto at losoxan Saipras. 5 \*Duga rupot go Salamis, la duga tong asu levelinga at ne Moroa go at laraogu singising at limixin me Judaia. Jon Mak gak lok eburu minedu kusu ti lok tooro du at lugugu.

6 Diga vas kaxat basinge mo lemenemen la digat pas tangtagap ap mo losoxan axap, se diga rupot to Papos. Mo go diga ekip tangarang mi lara laradi laasen teren ne Ba-Iesu, ni laradi me Judaia la gakleklen lengkot at lemenemen (magic). Ni ga xarang limixin do neni leeme vapaase ali at ne Moroa.

7 Neni ga gugu ri laradi gomgo ap mo losoxan laasen teren ne Segias Paulus, ni laradi ga umsu mi lakleklen. Laradi gomgo ga ro xaka ne Banabas mi ne Sol uto saparav i, mila neni ga vara i do na ronga levelinga at ne Moroa.

8 \*Ketla ne Ba-Iesu ga lolos kusu na rupe levelinga atdu. Laasen bok teren ne Elimas (na laasen at lava-paase Grik). Ni ga lok tong pen i do na rupe laradi gomgo xusu noxo nunu at ne Iesu.

9 La ne Sol, laasen bok teren ne Pol, ga umsu mi Loroonan Kaala, ni ga saga xatli at ne Ba-Iesu,

10 la ga lok tin, "Nu lamdak at ne Satan! Nenu u xopara ri leveloklox axap i lox avukat. Buaang lempanga xaxarang la laxakapmek i umsu at lorooro ram. Nenu uk lox amisik do una baba gili levenanasa ruturun at Leeme Silok ne Moroa ri laxaxarang!

\* 12:23: Dan 5:20 \* 12:24: Ais 55:11; Gu 6:7; 19:20 \* 12:25: Gu 11:29-30; 12:12; 15:37 \* 13:1: Gu 11:27 \* 13:2: Gu 9:15 \* 13:3: Gu 6:6 \* 13:4: Gu 15:39 \* 13:5: Gu 12:12; 13:13 \* 13:8: 2 Ti 3:8 \* 13:11: Gu 9:8

11 \*Monga lolos at Leeme Silok ne Moroa na rupot saparav u, la luxatli ram na main. La nenu u noxo ven laxasep at laaleng kangking at lentaba levenaleng.”

Ap mo mun loxonaleng Elimas ga suma lamain ga lok pe luxatli ren, la ni gat pas tangtagap, gak lok tong pen i do na vuse ka tara xusu na ranga tu at lekngen la nam lam i.

12 Laradi gomgo ga ven mo lavanga la ga nunu. Ni ga sangu ap mo levenanasa ni ga ronga i mumu Leeme Silok.

### *Banabas Mi Ne Pol Duga Rupot To Antiok*

13 \*Pol eburu mi larapen tangas teren diga mu lavatmon boro Papos la diga rupot to Pega at lenep silok Pampilia. Ketla ne Jon Mak ga on basinge du go, la gamlong uto Jerusalem.

14 Duga vas kaxat boro Pega la duga rupot to Antiok at lenep silok Pisidia. La at laaleng kaala duga beles uto at loogu singising la duga xis kopok.

15 \*Melemu at leexes at Laulis Linga at ne Moses la levelinga at lavaeme vapaase ali, luvuttadi amgomgo at loogu singising diga lok tidu, “Lunetak, ma vara i do muna vaase ri limixin do nemu mu ruuna tevelinga loklox alolos tinedi.”

16 \*Pol ga xatu kaxat upana, la ga sep makmak di, la ga lok keretna, “Luvuttadi me Israel la nemi bok kopmen me Judaia mi lotu saparap ne Moroa. Mina ronga ia.

17 \*Moroa at lubang mixin me Israel ga soxolik ka lavalabat atdik, la ga lox asilok lubang mixin atdik at levenmaares nedi diga nemen ngan limixin kadiiong to at lenep silok Isip. Moroa ga lox asu di mi lolos silok teren basinge mo lenep silok.

18 \*La ga at lavanuet sangaun maares ni gak lok tatao di ro at lamatbin.

19 \*La ni ga nemen eburu minedi la diga sak tup mi lavanuti larabung mixin go ap mo lenep silok Kanan, la ni ga raba di mi mo lenep silok ngan laramtaba tidi.

20 \*Mo lempanga ga ravasu at levenmaares ga epovo at lavanuet sangaun kobot mi lavalimo sangaun (450).

Melemu at na, Moroa ga lok katling li luvuttadi ngan luvuttadi rongtonga linga kusu dinabam gomgonga di, se at lovtopot at leeme vapaase ali ne Samuel.

21 \*La melemu diga sing ti toorong la ne Moroa ga lok taba di mi ne Sol, lamdak at ne Kis, at libibinat at ne Benjamin, kusu neni loorong tinedi at lavanuet sangaun maares.

22 \*Melemu at loklok pes teren, Moroa ga soxolik ka ne Devit kusu nam gomgonga di. Anaa levelinga at ne Moroa ga paase mumu na ne Devit min,

‘Nia ara ven i do ne Devit nitna ne Jesi, neni laradi ik lox amomia. Neni laradi naba lok lempanga axap do nia ana vara i do ni na lox i.’ *1 Sml 13:14*

23 \*Keneng at lurubuno avolo mun at ne Devit, Moroa ga riki ne Iesu saparap leme Israel ngan Laradi Loklox Arooro ridi la kerepmo ne Moroa ga lox epovo laxakaape ren.

24 \*Avot ti lovtopot at ne Iesu, Jon ga vavang ti limixin solo xusu dina leeng basinge laxakapmek atnedi la dina lok ka lesep susu.

25 \*La ga auret do ne Jon na lox axap mo lugugu ren, la ni ga lok ti limixin keretna, ‘Nemi mi doma i do nia nege? Nia xopmen mo laradi mi nemen tangais i. Ketla neni mo naba vot melemu rak, i silok aleng la

\* **13:13:** Gu 13:5; 15:38    \* **13:15:** Gu 15:21    \* **13:16:** Gu 12:17    \* **13:17:** Pas 1:7; 6:6; 12:51

\* **13:18:** Pas 16:35; Kex 14:34; Lal 1:31    \* **13:19:** Lal 7:1; Jos 14:1    \* **13:20:** Amg 2:16; 1 Sml 3:20

\* **13:21:** 1 Sml 8:5,19; 10:20-24    \* **13:22:** 1 Sml 16:13; Sam 89:20    \* **13:23:** 2 Sml 7:12-16; Ais 11:1

\* **13:24:** Mt 3:1-2    \* **13:25:** Jo 1:20,27    \* **13:26:** Gu 13:16

axo epovo xusu ana soxomus asu luvanga vatpas at luxangkedek teren.'

26 \*Luvutnetak mi luvurinu. Nia ana tong na levelinga rinemi. Moroa ga riki ne Iesu ri livipisik li at ne Abaram, la tinemi bok kopmen me Judaia mi nemen de, mo mi lotu saparap ne Moroa. Ni ga raba nedik mi na Lagale Lavavang ti lorooro avolo!

27 \*Mo limixin diga nemen to Jerusalem, la luvuttadi amgomgo atdi, di goxo ven kibis ne Iesu. La di goxo xasep at levelinga ro xeneng at levenbuk at lavaeme vapaase ali no diga vutus i at levenaleng kaala. Ketla diga lox asoorun levelinga at lavaeme vapaase ali, mila diga sok tixirixes ne Iesu.

28 \*La nedi xopmen di goxo vuse ka tavasuun kusu dina sev amet ne Iesu, diga sing mun ne Paelat kusu na sev amer i.

29 \*La melemu at lempanga axap diga lox i rin, kerekngan Lovoang Kaala i tong i, diga lox asi i ukopok basinge laxaba, la diga li i ro at lamaaut.

30 \*Ketla ne Moroa ga lox aroo kaxat amlong i basinge lanmet,

31 \*la buaang levenaleng neni ga ru asuvos tinedi digat pas eburu min boro Galili la uto Jerusalem. La nedi nom di tong asu levelinga ren ti limixin me Israel.

32 \*La nema na, ma tong na levelinga rinimi do ne Moroa ga lox epovo vam laxakaape ren ti lavalabat atdik.

33 La mo laxakaape ira soorun pam tinedik luvuttubuno avolo atnedi limixin me Israel keretna. Moroa ga lox aroo amlong ne Iesu basinge lanmet. I lok ngan mo levelinga ik lok at levempikpixon (Sam) sepsev agepura. Moroa ga lok keretna,

'Nenu ne Nuruk. Lingina nia a lok ngan ne Tamam.' *Sam 2:7*

34 La ne Moroa ga paase mumu laxakatu kaxat amlong at ne Iesu basinge lanmet, la kopmen bok ba noxo met. Ni ga lok keretna,

'Nia anaba raba ruturun u mi leveloklox anarong tarak kerekngan nia aga xaape min ti ne Devit.' *Ais 55:3*

35 \*La kerepmo bok levelinga at ne Devit saparap ne Moroa i lok keretna,

'U noxo ke xepe Laradi Melemelengan taram la labantuxu ren napsol!' *Sam 16:10*

36 \*Devit gam tebeng lugugu at ne Moroa ap mo levenaleng teren, la melemu ni ga met, la digak mir i saparap lavalabat teren, la ni gap sopso.

37 Ketla nom laradi ne Moroa ga lox aroo amlong i basinge lanmet, ni goxopso.

38 \*Luvutnetak mi luvurinu. Nemi axap, minaklen avukar i do, keneng mun at ne Iesu, langas i rem suang kusu ne Moroa naba doxoma xepe laxakapmek at limixin. Monga ma tong asu na levelinga rinimi.

39 \*Minaklen box i do nedi axap di nunu ren, Moroa ira lox asepmus pam di basinge leveloklok kakapmek atdi. Laulis Linga at ne Moses kopmen na epovo na lox i xuren.

40 Mina lok tatao avukat nimi, mumu levelinga at lavaeme vapaase ali, i lok keretna,

41 'Nemi limixin mik lok kalise levelinga at ne Moroa, mina ronga i na. Minaba sangu la mina met! Nia anaba lok lara lugugu at levenaleng atnimi, ketla nemi xopmen mi noxo nunu ren. La do tara na soxomus box i rinimi, move mi noxo nunu ren.' " *Abk 1:5*

42 La ne Pol mi ne Banabas duga vas su basinge loogu singising, la limixin diga sing bok du do dubamlong ap mo lara laaleng kaala melemu, la duna vaase bok mo levelinga rinedi.

\* 13:27: Jo 16:3; Gu 3:17 \* 13:28: Mt 27:22-23 \* 13:29: Mt 27:59-60 \* 13:30: Gu 2:24 \* 13:31: Gu 1:3,8 \* 13:32: Gu 13:23 \* 13:35: Gu 2:27 \* 13:36: Gu 2:29 \* 13:38: Gu 10:43 \* 13:39: Ro 10:4 \* 13:43: Gu 11:23; 14:22

43 \*Melemu at limixin diga on basinge loogu singising, buaang atnedi limixin me Judaia la nedii bok kopmen di me Judaia, mo diga lok ka vam lotu at limixin me Judaia, diga mumu asu ne Pol mi ne Banabas. Duga paase ridi la duga lox alolos di xusu dina nemen keneng at letaba nabalamu at ne Moroa.

44 Ap mo laaleng kaala melemu nedii axap ap mo lemenemen digat pas kusu dina rongga levelinga at ne Moroa.

45 \*Ketla lentaba limixin me Judaia diga ven i, la diga umsu mi levereven peves. Diga paase tangarang mo levelinga ne Pol ga tong i, la diga paase xapmek tin.

46 \*Ketla ne Pol mi ne Banabas duga paase lolos aleng la kopmen du goxo marat. Duga lok keretna, "Ik mokso at lemeren ne Moroa do mana tong avot be levelinga at ne Moroa rinemi limixin me Judaia. Ketla nemi mi xopara rin, la kerepmo xopmen mina epovo ri ruuna ka lorooro avolo. Mana ke xepe nemi la mana tong asu levelinga at ne Moroa ri limixin kopmen di me Judaia.

47 I lok ngan levelinga at ne Moroa ga raba dik min. I lok keretna, 'La nia ara soxolik ka vam nemi, kusu nemi minaba lok ngan laxasep la mina tong asu levelinga rak tinedi limixin kopmen di me Judaia, la minaba lok ngan langas ti lorooro ri limixin to at lengkot axap at na lavatbung menemen.' " *Ais 49:6*

48 \*Mo limixin kopmen di me Judaia diga rongga i na la diga lok momo aleng, la diga emi asu mi Leeme Silok ne Moroa, mumu levelinga ren. La nedii ne Moroa ga soxolik ka vam di ri lorooro avolo, diga nunu at ne Iesu.

49 Levelinga at ne Moroa ga epe-seves at lengkot axap ap mo lenep silok.

50 \*Ketla limixin me Judaia diga lox axatu kaxat lodoxoma at luvuttadi amgomgo ap mo lemenemen silok. Diga lox axatu bok lodoxoma at lavakin diga ruuna levenasen silok la diga lotu saparap ne Moroa. Diga vaxaru kaxat leedak ti ne Pol mi ne Banabas, la diga lok kepe du basinge lenep silok atdi.

51 \*La luradi vavang duga pes kepe laxakup basinge lengkangkedek atdu saparap nedii xusu duna lox asu lebelemamao at ne Moroa ridi. La dugat pas uto Aikoniam.

52 Luvuttadi nunu me go Antiok diga umsu mi Loroonan Kaala la lomomo bok.

## 14

### *Pol Mi Ne Banabas Duga Vavang To Aikoniam*

1 Pol mi ne Banabas duga lok mun lugugu ro Aikoniam kerekngan diga lox i ro Antiok. Duga beles to at loogu singising at limixin me Judaia la duga vavang avukat tinotno. Kuren la buaang nedii limixin me Judaia eburu mi limixin bok kopmen di me Judaia diga nunu.

2 \*Ketla lentaba limixin me Judaia no di goxo nunu, diga lox axatu lodoxoma at lentaba limixin kopmen di me Judaia la diga vaase pe lusumsuma atnedii basinge nedu na luradi nunu.

3 \*Pol mi ne Banabas duga nemen go at lentaba leven gaaling. Du goxo marat la duga paase asu Lagale Lavavang atla Leeme Silok ga lok tooro levelinga atdu mumu letaba nabalamu mila ni ga lok lempanga sangsangu at levengikngan du.

4 Nedi mo limixin ap mo lemenemen diga epes nedii, lentaba ri leme Judaia la lentaba ri luradi vavang.

5 \*Melemu mo limixin kopmen di me Judaia la limixin me Judaia eburu mi luvuttadi amgomgo atdi, diga vaxaru kaxat kaka i xusu dina

\* 13:45: Gu 14:2 \* 13:46: Lu 7:30; Gu 3:26; 18:6 \* 13:48: Gu 11:18 \* 13:50: Gu 17:4,12  
\* 13:51: Mt 10:14; Gu 18:6 \* 14:2: Gu 13:45 \* 14:3: Mk 16:20; Gu 19:11; Ib 2:4 \* 14:5: Gu 14:19; 2 Ti 3:11



lok kapmek luradi vavang la dina lu amet du mi laxanuat.

6-7 \*Ketla luradi vavang duga rongga i na la duga sixiro uto at lenep Likonia. Mo go duga vavang mi Lagale Lavavang to at lumenemen Listra la Debi, la to at lengkot petpes bok ap mo lenep.

*Pol Mi Ne Banabas Duga Vavang To Listra La Debi*

8 \*Lara laradi ga nemen to Listra, luxangkedek teren ga molo axap. Mo lanmeres gak lok teren at laaleng nenen ga visix i la ni goxo epovo do nat pas.

9 \*Gat kis go la gang tonga levelinga at ne Pol. Pol ga saga xatli ren la ga ven kibis i do mo laradi ga nunu do ne Moroa ga epovo ri lox aroo i.

10 La ni ga vaase silok tin keretna, "Katu kaxat upana mi luxangkedek taram." La soso mun mo laradi ga xatu kaxat upana la gat pas tangtagap.

11 \*Nedi mo limixin diga ven i, la di ga vaxaru kaka i do dina xup at lavapaase Likonia xeretna, "Na leg-epu radi du lok ngan ta levenmoroo, duga si ude xopok saparap nedik!"

12 Diga raba ne Banabas mi lara laasen Sius, la ne Pol laasen Eemes, mila neni laradi vapaase.

13 Lamaasa at lomoroa Sius, loogu laplavang teren ga nemen go maxamang ap mo lemenemen, ni ga lok ka leven bulumaxao eburu mi levesisnang uto at langas povolo ap mo lemenemen. Ni eburu mi nom limixin diga vara i do dinaplavang mi mo leven bulumaxao saparap luradi vavang.

14 Ketla Banabas mi ne Pol duga rongga i nom, la duga lolos kusu duna lok pe di. Kuren la duga ba koxorop lempanga singsiga atdu la duga sixit uto xantubu at limixin la duga xup keretna,

15 \*"Nemi limixin, tila mi lox i na? Nema mun luradi, luradi xerekngan nimi! Nema na ma nemen de xusu mana tong asu Lagale Lavavang la mina ba gili lorooro atnimi basinge lempanga gamasa xeretnom. La mina mumu asu ne Moroa, Luntoo Avolo, ga rudum li laxalibet, laxangka, laras la lempanga axap mo di nemen maxeneng atdi.

16 \*Ganoxa ni ga mulus do limixin axap dina mumu xa lavavara atdi.

17 \*Ketla neni i lox asuvos amisix i ap mo lempanga ni ga rudum li i. La im taba nimi mi larakabu boro vana at laxalibet, la ga lok katling levenaleng tik lok li bubua leveluxa at levenaleng axa ren. Ni im taba nemi mi leveluxa solo la ik suxa umsu lorooro atnimi mi lomomo."

18 Limixin diga lok do dinaplavang saparap du, la ga lolos aleng kusu luradi vavang duna lok pe di mi na levelinga.

19 \*Lentaba limixin me Judaia diga laa boro Antiok at lenep Pisidia la boro bok Aikoniam. La diga lox axatu kaxat lodoxoma at limixin me go Listra la diga lu ne Pol mi laxanuat, la diga sar asu i basinge mo lemenemen. Diga nua i do ni mo ga met.

20 Ketla luvuttadi nunu diga ru kangkan i, la ni ga xatu kaxat, la gamlong bok uto ap mo lemenemen. Ap mo laaleng melemu nedu mi ne Banabas dugat pas uto Debi.

*Pol Mi Ne Banabas Dugamlong Uto Antiok*

21 \*Pol mi ne Banabas duga tong asu Lagale Lavavang to Debi, la duga lok ka buaang luvuttadi diga lok ka lununu maxat. Dugamlong bok uto Listra, la uto bok Aikoniam, la melemu dugat pas uto Antiok at lenep Pisidia.

22 \*Duga lox alolos lununu at luvuttadi nunu, la duga vaase alolos di xusu dina tu tuxuruxun at lununu

\* 14:6-7: Mt 10:23 \* 14:8: Jo 9:1; Gu 3:2 \* 14:9: Gu 3:4; Mt 9:28 \* 14:11: Gu 28:6 \* 14:15: Gu 10:26; Sam 146:6 \* 14:16: Gu 17:30 \* 14:17: Sam 147:8; Jer 5:24 \* 14:19: Gu 17:13; 2 Ko 11:25; 2 Ti 3:11 \* 14:21: Mt 28:19 \* 14:22: Mt 7:14; Gu 11:23; 15:32; 18:23; 1 Ts 3:3

atnedi. Duga lok, “Nedik ataba ekip tangarang mi laxanmumuat solo, la kerepmo ataba beles at Linintoo at ne Moroa.”

<sup>23</sup>\* At laraogu lotu getgesara luradi vavang duga sok katling loxongkulao silok ti lok tatao limixin. Duga ngising la duga mun anan la duga lok li di maxopok at loklok tatao at Leeme Silok, mo diga nunu ren.

<sup>24</sup> La nedu duga vas kaxat la dugat pas kantubu at lenep silok Pisidia, duga rupot to at lenep silok Pampilia.

<sup>25</sup> Duga vavang mi Lagale Lavavang to at lemenemen Pega, la melemu duga vas kaxat uto Atalia.

<sup>26</sup>\* La duga los kas at lavatmon go Atalia la duga sen uto Antiok. Ap mo lemenemen no limixin nunu diga raba nedu maxopok at letaba nabalamu at ne Moroa ri lugugu mo duga lox axap pam i.

<sup>27</sup>\* Duga rupot to Antiok la duga ro bubua limixin axap at lotu, la duga tong asu lempanga ne Moroa ga lox i at levengikngen du. La duga tong i do ne Moroa ga suang langas ti limixin kopmen di me Judaia xusu dina nunu.

<sup>28</sup> La buaang leven gaaling duga nemen go eburu mi limixin nunu.

## 15

### *Lovotpot Buru To Jerusalem*

<sup>1</sup>\* Lentaba luvuttadi nunu diga laa boro Judaia uto Antiok la diga lok ti luvuttadi nunu me go keretna, “Nemi xopmen mi noxo lok ka lorooro do xopmen mi noxo vit kepe lengkontuxu atnimi xerekngan Laulis Linga at ne Moses i tong i.”

<sup>2</sup>\* Pol mi ne Banabas duga ronga i na la duga vaase mukmusak aleng la duga etep mi levelinga minedi. Kuren la limixin nunu ro Antiok diga lok katling ne Pol mi ne Banabas la lentaba bok kusu dibat pas uto Jerusalem la dina vot pasa luvuttadi

vavang la loxongkulao silok la dina paase mumu na lavanga.

<sup>3</sup> Luvuttadi lotu me go Antiok diga sak tiki nedu uto Jerusalem, la digat pas maxeneng at lengkot Ponisia la Samaria. Diga tong asu i ri limixin nunu go, do limixin kopmen di me Judaia, mo diga leeng la diga nunu at ne Iesu. Lavavang at na ga lox amomo buaang nedu luvuttadi nunu.

<sup>4</sup>\* Se diga rupot to Jerusalem, limixin at lotu me go la luvuttadi vavang la loxongkulao silok diga seega rangarang di, la ne Pol mi ne Banabas duga tong mo lempanga ne Moroa ga lox i xantubu at lugugu atnedu.

<sup>5</sup> Ketla lentaba luvuttadi nunu, nedu lubung Parisi diga xatu kaxat la diga vaase lolos keretna, “Nedi mo limixin kopmen di me Judaia dina rivit kepe lengkontuxu atnedi la ata tong box i ridi do dina mumu asu Laulis Linga at ne Moses.”

<sup>6</sup> Luvuttadi vavang eburu mi loxongkulao silok diga vot eburu xusu dina paase mumu loklok ti rivit kepe lengkontuxu.

<sup>7</sup>\* Melemu at laxampapaase solo atdi ga xap, Pita ga xatu kaxat upana la ga lok, “Luvutnetak, mikleklen i do gano migomgo Moroa ga soxolik ka ia xantubu atnimi xusu ana tong asu Lagale Lavavang tinedi limixin kopmen di me Judaia kusu dina ronga i la dina nunu ren.

<sup>8</sup>\* La ne Moroa no ikleklen lurup-tuvuk at limixin, ga lox asusu i do ni ga siam ka limixin kopmen di me Judaia keretna. Ni ga raba di mi Loroonan Kaala xerekngan ni ga raba dik min.

<sup>9</sup>\* Moroa ga lok legesa ngas mun ti lorooro rinedik limixin me Judaia la tinedi limixin kopmen di me Judaia. Ni ga gos amaxat lebelen di mila diga nunu ren.

<sup>10</sup>\* Kuren la nemen dik ta lok tong pen ne Moroa la nemen dik ta raba limixin nunu mi na lumumuat ti

\* **14:23:** Gu 13:3    \* **14:26:** Gu 13:1-2; 15:40    \* **14:27:** Gu 11:18; 15:4,12    \* **15:1:** Ga 5:2    \* **15:2:** Gu 11:30; Ga 2:1    \* **15:4:** Gu 14:27    \* **15:7:** Gu 10:1-43    \* **15:8:** Gu 10:44; 11:15    \* **15:9:** Gu 10:34-35    \* **15:10:** Mt 11:30; Ga 3:10; 5:1

rivit kepe lengkontuxu kusu dina lox epovo Laulis Linga at ne Moses. Mila no migo lavalabat atdik la nedik ta goxo epovo ri lox epovo na Laulis Linga.

11 \*Nedik taga lok ka lorooro maxat keneng mun at letaba nabalamu at Leeme Silok ne Iesu, kerekngan bok nedi.”

12 \*Nedi axap mo diga xis pilo at loxonaleng ne Banabas mi ne Pol duga tong asu lempanga sangsangu ne Moroa ga lox i at levengkikngan du kantubu atnedi limixin kopmen di me Judaia.

13 \*Melemu at lavapaase atdu, Jems ga lok keretna, “Luvutnetak, mina rongga ia!

14 \*Anaa vam ne Simon ira soxomus pam i do ganoxa ne Moroa ga lox asu labalamu ren saparap limixin kopmen di me Judaia la ga lok kaka lentaba atnedi xusu tin.

15 Na levelinga rak i sixit epovo mi levelinga at lavaeme vapaase ali, i ngan lara atdi ga lok keretna,

16 ‘Leeme Silok ga lok keretna. Melemu at na, anabamlong, la nia anaba vaxaru amlong bok loogu at ne Devit no ga subu. Anaba lok li amlong lengkot to ap mo loogu ga lok kapmek la ana vaxaru amlong box i.

17 Nia anaba lox i na xusu limixin kopmen di me Judaia bok dinaba puse ria. Nedi mo, nia ara ro ka vam di do atarak.

18 Nenia, Leeme Silok atnemi, a tong i na la anaba lok epovo na levelinga kerekngan aga tong li i gano migomgo.’ ” *Amo 9:11-12*

19 Jems ga lok bok keretna, “At lodoxoma rak do nemen dik ta lox asoogong nedi limixin kopmen di me Judaia mo dit pas saparap ne Moroa.

20 \*Ketla ata malagan tevelinga ri vaase axasep nedi do kopmen di noxo anan leveluxa no diaplavang pam min ti laxampoovo moroa. La

dina ke loklok kakapmek maxamang at lixitkis epot, la di noxo anan lempanga mi lavanuet kangkedek no diga xur amer i la lada ren goxo sen su ukamang, la lempanga vetpes bok mi lada atnedi.

21 \*La kerepmo dinaba lok ngangao at leme Judaia, no di utus Laulis Linga at ne Moses to xeneng at laraogu singising at levenaleng kaala ga ruka i gano migomgo i se lingina. La mo levelinga ren dira vavang pam min at levenmenemen axap.”

### *Levelinga Ri Limixin Kopmen Di Me Judaia Di Nunu*

22 La luvuttadi vavang la loxongkulao silok eburu mi limixin axap at lotu, diga doma i do dina soxolik ka lentaba luvuttadi ap mo libinam tadi la dina sak tiki nedi uto Antiok eburu mi ne Pol la ne Banabas. Diga soxolik ka ne Judas, laasen bok teren ne Basabas, la ne Sailas. Nedu luradi silok kantubu at limixin nunu.

23 Diga raba nedu mi na lovoang ga lok keretna,

“Nema na luvuttadi vavang la loxongkulao silok, luvutneton nimi. Ma lox aonon lomomo atnama rinemi limixin kopmen nemi me Judaia mo mi nemen to Antiok, Siria, la Silisia.

24 \*Maga rongga i do lentaba atnama digat pas udo saparap nimi, la diga lox ekarakat nimi la diga lox abulu nimi mumu loklok ti rivit kepe lengkontuxu. Di xopmen di goxo lok ka tevelinga atnama xusu ti lox i mo.

25 Kuren la nema ma vot eburu la ma siam do mana soxolik ka teventaba tuvuttadi vapaase la mana riki nedi udom tinemi. Dinabat pas eburu mi larapen tangas atnama, ne Banabas mi ne Pol,

26 no duga raba lorooro atdu ri lugugu at Leeme Silok, ne Iesu Karisito. La kopmen du goxo marat at laniu.

\* 15:11: Ga 2:16; Ep 2:5-8 \* 15:12: Gu 14:27 \* 15:13: Ga 2:9 \* 15:14: Gu 15:7-9 \* 15:20: Lur 9:4; Pas 34:15-17; Mas 17:10-16 \* 15:21: Gu 13:15 \* 15:24: Gu 15:1

27 Ma riki bok nedu lura rinimi, ne Judas mi ne Sailas kusu duna vaase asu levelinga at lungusno atdu xerekngan nema ma malagan i.

28 \*Loroonan Kaala la nema mara siam pam do ma noxo lok li bok ba teventaangas mavana atnimi, ketla mina ronga res at na levelinga.

29 \*Mi noxo anan teveluxa no diraplavang pam min ti lempatpoovo moroa. Mi noxo anan lempanga mi lada atnedi. Mi noxo anan tempanga mi lavanuet kangkedek no diga xur amer i la lada ren kopmen goxo sen su. La mina ke loklok kakapmek maxamang at lixitkis epot. Naba lox avukat tinotno rinimi do mina ke xepe na lempanga. Atnimi bok be.”

30 Limixin lotu diga riki mo luvuttadi vapaase asu levelinga uto Antiok. Diga rupot la diga ro bubua ka mo axap limixin nunu la diga raba nedi mi levelinga loklox axasep keneng ap mo lovoang.

31 Limixin diga utus i mo levelinga, la diga umsu mi lomomo ti mo levelinga loklox alolos.

32 \*Judas la ne Sailas, nedu vam luradi vapaase ali, duga vaase abao aleng eburu mi luvuttadi nunu, la duga lox alolos nedi.

33 Melemu at lentaba levenaleng mo go, diga lox aonon du mi lenmila atnedi mo luvuttadi nunu. La dugamlong uto saparap nedi mo limixin no diga sak tiki avot be du.

34 Ketla Sailas ga doxoma i do na nemen go.

35 La ne Pol mi ne Banabas duga nemen go Antiok. Nedu eburu mi lentaba buaang diga anasa limixin la diga vavang mi levelinga at Leeme Silok.

### *Pol Mi Ne Banabas Duga Epeseves*

36 Lentaba levenaleng ga volo la ne Pol ga lok ti ne Banabas, “Atamlong la ata ven luvuttadi nunu ro at levenmenemen axap no neda taga vavang mi levelinga at Leeme Silok

e, la ataba ven i do nedi mo diak lok ta xereva.”

37 \*Banabas ga vara i do na lok ka ne Jon Mak eburu midu.

38 \*Ketla ne Pol ga doma i do goxo lox avukat do neni na emu eburu midu. Mila gano ne Jon Mak goxo nemen eburu minedu ap mo lugugu, ketla ni gamlong kot mene atdu ro Pampilia.

39 Duga vaase lolos aleng mumu i na xantubu atnedu, la duga epeseves. Banabas ga lam kaka ne Mak la duga mu lavatmon uto Saipras.

40 \*Ketla ne Pol ga soxolik ka ne Sailas. La luvuttadi nunu diga song araba ne Pol mi ne Sailas ti loklok tatao at Leeme Silok la duga vas kaxat.

41 Dugat pas maxeneng at lunep silok Siria la Silisia, la duga lox alolos luvuttadi nunu.

## 16

### *Timoti Ga Emu Eburu Mi Ne Pol La Ne Sailas*

1 \*Pol ga vas kaxat basinge mo lunep silok, la gat pas uto Debi la Listra. Lara laradi nunu laasen teren ne Timoti ga nemen go Listra. Nenen bok, ni latkin nunu at lubang mixin me Judaia, ketla ne temen neni at lubang mixin me Grik.

2 \*Luvuttadi nunu ro Listra la Aikoniam diga tong i do ne Timoti neni lagale laradi.

3 \*Pol ga vara i do ni na lok ka ne Timoti min, kuren la ni ga vit kepe loxontuxu ren. Ni ga lox i na mila lentaba limixin me Judaia digak lok ap mo lemenemen, digaklen i do ne temen ne Timoti at limixin kopmen di me Judaia.

4 \*Pol, la ne Sailas eburu mi ne Timoti digat pas kantubu ap mo laramenemen la diga tong asu mo leventaangas, luvuttadi vavang la loxongkulao silok diga tong li vam i ro Jerusalem. La ne Pol midi diga

\* 15:28: Mt 23:4 \* 15:29: Gu 15:20 \* 15:32: Gu 11:27; 13:1; 14:22 \* 15:37: Gu 12:12,25

\* 15:38: Gu 13:13; Kl 4:10 \* 15:40: Gu 4:36; 13:4; 14:26 \* 16:1: Gu 14:6; 2 Ti 1:5 \* 16:2: Pl

2:19-22 \* 16:3: Ga 2:3-5 \* 16:4: Gu 15:23-29

tong i ri limixin nunu do dina mumu asu i.

<sup>5</sup> \*Kuren la limixin nunu ap mo lengkot ga suu lolos at lununu atdi la leexes atnedi limixin nunu ga uturut amisik keneng at levenaleng getgesara.

#### *Pol Ga Ven Lisilimet To Troas*

<sup>6</sup> \*Pol mi larapen tangas teren digat pas epolo maxeneng at lunep silok Pirigia la Galesia, mila Loroonan Kaala goxo siam do dina vaase asu Lagale Lavavang ap mo lenep Asia.

<sup>7</sup> \*Diga rupot to at lapdopdo at lenep Misia, la diga lok tong pen i do dina beles at lenep mo go Bitinia, ketla Loroonan at ne Iesu goxo siam do dina beles.

<sup>8</sup> Kuren la digat pas kantubu at lengkot Misia la diga rupot to Troas.

<sup>9</sup> Ap mo laxanimin Pol ga ven lisilimet la ni ga ven laradi boro Masadonia ga tu, la ga sing i, "Unat pas ude Masadonia la una lok tooro nama!"

<sup>10</sup> Melemu at ne Pol ga ven na lisilimet, soso mun nema maga gagas kusu manat pas uto Masadonia, mila magaklen i do Moroa ga ro ka vam nama kusu mana vaase asu Lagale Lavavang ti limixin me go.

#### *Lidia Ga Ven Kibis Leeme Silok To Pilipai*

<sup>11</sup> Maga los kas at lavatmon la maga on basinge mo lemenemen Troas, la maga sen akmokso epolo uto Samoteres. La ap mo lara laaleng petpes melemu maga sen uto Neopolis.

<sup>12</sup> Maga vas kaxat me go uto Pilipai, lemenemen silok avot at lenep silok Masadonia. Ni lemenemen buaang limixin boro Rom diga nemen go. Maga nemen ap mo lemenemen silok at lentaba levenaleng.

<sup>13</sup> At laaleng kaala maga vas kaxat basinge lemenemen silok uto at lisigege at ladan. Maga nua i do toxot mo go at limixin me Judaia digat pot

buru e la diga ngising. Maga xis kopok la maga paase ri lavakin mo diga rupot eburu go.

<sup>14</sup> Lara atdi mo gang tonga nama, laasen teren ne Lidia, neni boro Taiaaira. Neni ga sesep mi lempanga singsiga nunuan. Ni latkin ga lotu saparap ne Moroa, la Leeme Silok ga suang lebelen kusu ni na siam kaka mo lavapaase at ne Pol.

<sup>15</sup> \*Neni eburu minedi diga nemen min ap mo loogu ren diga lok ka lesepe susu. Melemu ni ga xup kaka nama, "Ude nemi la mina nemen to at loogu rak, mo do nemi mi doxoma i do nenia latkin nunu ruturun at Leeme Silok." La ni ga sing lolos tinama la maga beles.

#### *Pol Mi Ne Sailas At Loogu Xokoxo To Pilipai*

<sup>16</sup> \*At lara laaleng magat pas uto at loxot singising, maga ekip tangarang mi lara loolik, ni lasaxaruki la lagas ga nemen teren la ga lox epovo i do na paase ali umelamgo. La kerepmo ni ga lox asusu laxampilas solo ri lamgomgo ren, mila ni ga tong levempanga salai naba rupot at levenaleng mo i tu migo ridi.

<sup>17</sup> \*Ni ga mumu asu nema mi ne Pol, la gap kup keretna, "Na luvuttadi nedi luvuttadi gugu at Leeme Avolo ne Moroa! Di tong asu langas at lorooro rinimi!"

<sup>18</sup> \*La buaang levenaleng, ni ga lox i na. Se ne Pol gara molo nga, la ni ga rem gili la ga lok ti mo lagas, "At laasen at ne Iesu Karisito, a tong i ru do una vas su basinge i!" Ap mo mene loxonaleng lagas ga on basinge i.

<sup>19</sup> Mo limixin digak lok tatao mo loolik diga ven i do langas atnedi rik lok ka pilas ga xap ta. Kuren la diga ranga alis ne Pol mi ne Sailas la diga sat kaka du uto at luvuttadi amgomgo at loxot tongtonga linga.

<sup>20</sup> \*Nedu duga ru ro melamgo at luvuttadi silok boro Rom. La nom

\* 16:5: Gu 2:47 \* 16:6: Gu 18:23 \* 16:7: 2 Ti 1:15 \* 16:15: Gu 16:33; 18:8 \* 16:16: Gu 19:24  
\* 16:17: Mk 1:24,34 \* 16:18: Mk 16:17 \* 16:20: Mk 13:9; Gu 17:6; Mt 5:11

limixin digak lok tatao mo loolik diga lok, “Na luradi nedu boro Judaia, la nedu du lok kaxat lekarakat de at lemenemen silok atdik.

<sup>21</sup> Nedu duk lox ase limixin mi leveloklok no xopmen na epovo at loklok atdik. Nedik at lubung mixin me Rom la ixo epovo do tana siam ka i la tana lok tong pen i.”

<sup>22</sup> \*Buaang limixin diga beles ap mo leedak silok la diga ru buru mi limixin amgomgo diga lok kepe lempanga singsiga at ne Pol mi ne Sailas, la diga tong i ri limixin esep do dinabak pixis du mi lubuso.

<sup>23</sup> Digak pixis aleng nedu mi lubuso la diga lok ka du uto at loogu xokoxo, la diga tong i ri mo laradi loklok tatao loogu xokoxo, kusu na lok pe avarang du la kopmen du noxo sixiro.

<sup>24</sup> Laradi loklok tatao at loogu xokoxo ga ronga na levelinga, la ni ga xoxo palaga lengkangkedek atdu kantubu at lempatkonuna mumuat.

<sup>25</sup> At laxanimin tubu Pol mi ne Sailas duga lok lising la dugak pixan momo saporap ne Moroa, la lentaba luvuttadi bok mo at loogu xokoxo, digang tonga du.

<sup>26</sup> La soso mun langsung langne silok ga vot la gak ma mo loogu xokoxo axap. Ap mo mene lox-onaleng lumusmaragu ga rem suang la lemparoos sen ga remus basinge nedi axap go xeneng at loogu xokoxo.

<sup>27</sup> \*Laradi loklok tatao at loogu xokoxo ga rakdu tuang la ni ga ven i do laramusmaragu ap mo loogu xokoxo ga rem suang axap pam, la ni ga nua i do limixin kokoxo digara sixiro vam. Kuren la ni ga rev asu ka lavarise sepsep teren la ni ga lok do na bo bang amer i min.

<sup>28</sup> Ketla ne Pol ga xup silok keretna, “Nemen uta sev u! Nema axap na ma nemen.”

<sup>29</sup> Laradi loklok tatao at loogu xokoxo ga xup ti tababao, ni ga

sixit beles ukeneng, la ni ga xis tik-tikbu mi luvatgulom teren la ga dede saporap lengkangkedek at ne Pol mi ne Sailas.

<sup>30</sup> \*Ni ga lam asu du ukamang la ga lok, “Luave, ana lok lavanga salai xusu anaba ruuna ka lorooro maxat?”

<sup>31</sup> Duga lok, “Una nunu at Leeme Silok ne Iesu, la nenu naba ruuna ka lorooro maxat, la nedi axap nom di nemen at loogu ram dinaba ruuna ka lorooro maxat.”

<sup>32</sup> La duga tong Lagale Lavavang at Leeme Silok tin la tinedi bok mo diga nemen ap mo loogu ren.

<sup>33</sup> \*Ap mo mene laaleng at laxanimin laradi loklok tatao at loogu xokoxo ga sat kaka du la ga gos levenin kooxing atdu. La neni eburu minedi diga nemen at loogu ren diga lok ka lesep susu ap mo mene lox-onaleng. <sup>34</sup> Ni ga lok ka ne Pol mi ne Sailas uto at loogu ren la ga raba nedu mi leveluxa ri anan. Nedi axap diga nemen at loogu ren diga umsu mi lomomo, mila diga nunu ba at ne Moroa.

<sup>35</sup> Ga maxantamak luvuttadi amgomgo diga sak tiki lavasaxaruki mi levelinga xeretna, “Mina soxomus asu du nom luradi uto.”

<sup>36</sup> Kuren la laradi loklok tatao at loogu xokoxo ga tong i ri ne Pol, “Luvuttadi amgomgo di lox aonon levelinga rinumu mi ne Sailas kusu mana soxomus asu numu. Muna onon ta, la munat pas keneng at lenmila.”

<sup>37</sup> \*Ketla Pol ga lok ti mo lavasaxaruki xeretna, “Di goxo vuse ka taxakapmek maxeneng atnama. Diga vixis nema at lemeren limixin, la kopmen nak mokso, mila nema na lunat boro Rom. Melemu diga lok li nama at loogu xokoxo. La at na di lok do dina lox aonon nemnem nama. Kopmen tinotno! I epovo do luvuttadi amgomgo axa dinabat pas ude la dina soxomus asu nama.”

\* 16:22: 2 Ko 11:25; Pl 1:30; 1 Ts 2:2 \* 16:27: Gu 12:18-19 \* 16:30: Gu 2:37 \* 16:33: Gu 16:15

\* 16:37: Gu 22:25

<sup>38</sup> Diga tong i na levelinga ri luvuttadi amgomgo. La diga rongga i do ne Pol mi ne Sailas nedu lunat boro Rom la kopmen luradi gamasa, la diga marat aleng.

<sup>39</sup> \*Kuren la digat pas la diga vaase loklok bukbulu ridu. La diga lam asu du basinge loogu xokoxo la diga sing du do duna vas kaxat basinge mo lemenemen.

<sup>40</sup> Pol mi ne Sailas duga on basinge loogu xokoxo, la dugat pas uto at loogu at ne Lidia. Mo go duga ekip tangarang mi limixin nunu, la duga lox alolos di mi levelinga la duga onon ta.

## 17

### *Pol Mi Ne Sailas Duga Xip Losong-songot To Tesalonia*

<sup>1</sup> \*Pol mi ne Sailas dugat pas kantubu at lunep silok Ampipolis la Apolonia, la duga vas pot to Tesalonia. Ap mo lemenemen loogu singising at lubang mixin me Judaia ga nemen e.

<sup>2</sup> Pol ga beles at loogu singising kerekngan ni gak lok amisix i. Mo go ni ga paase eburu mi limixin, la ga tong asu levelinga at Lovoang Kaala, at lavantun levenaleng kaala.

<sup>3</sup> \*Ni ga soxomus mo levelinga la ga lox asuusu i rinedi do ga epovo Lanarong na met, la na xatu kaxat amlong bok basinge lanmet. La ne Pol ga lok, "Na ne Iesu mo nia a tong asu i rinemi, neni Lanarong."

<sup>4</sup> \*Lentaba atnedi leme Judaia diga nunu la diga mu asu ne Pol la ne Sailas. La buaang nedi bok limixin me Grik no diga lotu saparap ne Moroa, la buaang bok atnedi lavakin doxodok diga nunu.

<sup>5</sup> Ketla lentaba at lubang mixin me Judaia diga reven peves aleng atdu la diga xup bubua ka limixin gamasa to at lengkot etang. La diga lox axatu lodoxoma atdi kusu dina esep. Diga lok li nom lemenemen axap at

langsangan lekarakat la diga ut das lumusmaragu at loogu at ne Jeson. Diga lok tong pen i do dina vuse ka ne Pol mi ne Sailas la dina lok ka du kusu duna ru at lavapaase.

<sup>6</sup> \*Ketla di goxo vuse ka du, kuren la diga sat kaka ne Jeson la lentaba luvuttadi nunu uto at limixin amgomgo ap mo lemenemen. Digap kup keretna, "Na luvuttadi di lok lekarakat silok at lengkot axap! La na dira beles pam at lemenemen atdik.

<sup>7</sup> \*La ne Jeson ira lam ka di uto at loogu ren. Nedi dira los polo vam leventaangas at laradi gomgo ne Kaisar. Di lok do lara loorong petpes mo, laasen teren ne Iesu."

<sup>8</sup> Neni na levelinga diga lox axatu lodoxoma at limixin mi luvuttadi amgomgo ap mo lemenemen ti langsangan leedak.

<sup>9</sup> Luvuttadi amgomgo ap mo lemenemen diga tong i ri ne Jeson la nedi luvuttadi nunu xusu dina lok li tempilas ti un asu di, la melemu diga lox aonon nedi.

### *Buaang Nedi Limixin Boro Beria Diga Nunu At Ne Iesu*

<sup>10</sup> Ap mo mene laxanimin luvuttadi nunu diga riki ne Pol mi ne Sailas uto Beria. Duga rupot, la at laaleng kaala dugat pas uto at loogu singising at lubang mixin me Judaia.

<sup>11</sup> \*Limixin me go diga lox avukat aleng mila diga siam ka levelinga atdu. Di goxo rongga xepe levelinga at ne Moroa kerekngan limixin to Tesalonia. Digang tonga mo levelinga mi langsangan lomomo. At levenaleng axap diga utus avukat levelinga at Lovoang Kaala, kusu dina ven i do levelinga at ne Pol ga ruturun.

<sup>12</sup> Buaang atnedi diga nunu, la buaang nedi lavakin silok boro Grik la buaang atnedi lavatlok boro Grik diga nunu bok.

<sup>13</sup> \*Ketla lentaba limixin me Judaia boro Tesalonia diga rongga i do ne

\* 16:39: Mt 8:34 \* 17:1: 1 Ts 1:1,2 \* 17:3: Lu 24:26; Gu 3:18; 9:22 \* 17:4: Gu 13:50 \* 17:6: Gu 16:20 \* 17:7: Lu 23:2; Jo 19:12 \* 17:11: Jo 5:39 \* 17:13: Gu 13:50; 14:19

Pol mo ga vavang mi levelinga at ne Moroa ro Beria. Diga vas kaxat ugo la diga lox axatu lodoxoma at limixin.

<sup>14</sup>La soso mun luvuttadi nunu diga sak tiki ne Pol uto loxon, kusu na mu lavatmon. Ketla Sailas mi ne Timoti duga nemen go Beria.

<sup>15</sup>La nedi diga emu mi ne Pol, digat pas eburu min uto Atens. Melemu digamlong uto Beria mi levelinga loklox axasep boro at ne Pol do ne Sailas mi ne Timoti dunaba vot pasa soso i.

### *Pol Ga Vavang Ti Limixin To Atens*

<sup>16</sup>Pol ga nemen tangais ne Sailas mi ne Timoti ro Atens, ni ga bulu aleng mila ni ga ven i do mo lemene-men ga umsu mi laxampoovo moroa.

<sup>17</sup>\*Kuren la ni ga paase ro at loogu singising eburu mi leme Judaia la limixin kopmen di me Judaia bok no diga lotu saparap ne Moroa. La at levenaleng axap ni ga vavang bok ti limixin mo digat pot amisik to at loxot potpot buru.

<sup>18</sup>Lentaba luvuttadi loklox ase diga tong nedi do Epikurian\* la Stoik\* diga etep mi levelinga eburu mi ne Pol. Lentaba diga sue, "Lavanga salai na laradi baulang i lok do na tong asu i?" Lentaba vetpes diga lok, "Ni i paase mumu levenmoroa at lengkot petpes."

Diga tong i na mila Pol ga vavang mumu ne Iesu la laxakatu kaxat amlong teren.

<sup>19</sup>Kuren la diga lam ka ne Pol, la diga vaxaru i ro melango at lixitkis buru at la Ariapagas\* la diga lok, "Nema ma vara i do mana rongga na loklox ase maxat, nenu u paase mumu i.

<sup>20</sup>Lentaba levelinga ram i reng petpes at lodoxoma atnema, la ma

vara i do manaklen i do ua lavasuun teren."

<sup>21</sup>(Limixin me go Atens la limixin petpes bok mo diga nemen go, diga vavara amisix i do dina tere la dinang tonga tevelinga mumu lempanga maxat).

<sup>22</sup>Pol ga xatu kaxat upana ro melango atdi ro at la Ariapagas la ga lok, "Limixin mede Atens! A ven i do at lorooro axap atnemi mi lotu saparap buaang levenmoroa,

<sup>23</sup>mila nia at pas tangtagap at levengkot at lemenemen silok atnemi la a ven lengkot nemi mi lotu ren. A long lenger i do loxonin laplavang mo, miga malagan i do 'Ti lomoroa kopmen dinakleken i.' Nemi mi lotu saparav i, ketla nemi xopmen minakleken i la nenia na ana tong asu i rinimi.

<sup>24</sup>\*Moroa ga rudum li lavatbung menemen axap la lempanga axap maxeneng teren. Ni Lamgongo at laxalibet la laxangka, la ni xopmen na nemen at laraogu lotu limixin di lox i.

<sup>25</sup>\*La ni xopmen nak pakes ti tavanga do tara na raba i min, mila neni xa im taba lorooro la lamamas la lempanga axap ti limixin.

<sup>26</sup>Moroa ga rudum li legesa radi la limixin axap livipisik li ren. Ni ga lok li nedi xusu dina nemen at lengkot axap at na lavatbung menemen. La neni xa ga sok katling levenaleng ti limixin la levenmenemen atdi.

<sup>27</sup>\*Moroa ga lox i na kusu dinaba ven tin, la dina vot pasa i mo do di vara i. Neni xopmen na nemen paxalom basinge dik.

<sup>28</sup>I lok ngan lentaba diga tong i xeretna.

'Moroa im taba dik mi lorooro la lolos.'

I ngan bok lentaba luvuttadi vapaase atnemi diga tong i do.

\* **17:17:** Gu 18:19 \* **17:18:** Lara libinam tadi diga nunu do lampeneves at labantuxu neni i silok aleng ti levelinga ruturun. \* **17:18:** Lara libinam tadi di goxo nunu at ne Moroa, ketla diga nunu axa at lolos atdi. Di goxok lox asusu bok lomomo koplai lainbulu keneng at lorooro atdi. \* **17:19:** Lara loxongkaana ro Atens la neni lenep digat pot buru e ri levengkitkis buru atnemi luvuttadi amgomgo me go. \* **17:24:** 1 Lav 8:27; Gu 7:48 \* **17:25:** Sam 50:12; Ais 42:5 \* **17:27:** Lal 32:8; Ais 55:6; Sam 145:18; Jer 23:23 \* **17:29:** Ais 40:18-20; 44:10-17; Gu 19:26



‘Nedik laxamdak teren.’

<sup>29</sup> \*Nedik laxamdak at ne Moroa, kuren la nemen dik ta doxoma i do lampoovo ren i lok ngan lampoovo at logol kopla lisiliva xopla levenuut limixin di lox i mi lakleklen la lolos atdi.

<sup>30</sup> \*Gano ne Moroa goxo doma solo laxakapmek at limixin ap mo levenaleng limixin kopmen di goxokleklen i. Ketla lingina i tong lolos i ri limixin at lengkot axap do dina leeng basinge laxakapmek atdi.

<sup>31</sup> \*Mila neni ira lok katling pam lara laaleng neni naba lok li limixin axap at lavapaase, la mo lavapaase ren nabak mokso aleng. La ni ga soxolik ka vam lara laradi xusu na ronga linga at laaleng ete. Ni ga lox asuvos pam mo laradi ri limixin axap mi loklok katling keretna, ni ga lox aroo amlong i basinge lanmet.”

<sup>32</sup> Diga ronga ne Pol ga vaase mumu laxakatu kaxat amlong at lanmet la lentaba atnedi diga lok kalise i. Ketla lentaba diga lok, “Ma vara i do mana ronga box u, una vaase amu box i.”

<sup>33</sup> Kuren la ne Pol ga on basinge loxot papaase.

<sup>34</sup> La lentaba luvuttadi mene diga mumu i la diga nunu. Kantubu atnedi ne Dionisias lara atnedi boro at la Ariapagas, la lara latkin, laasen teren ne Damaris, la lentaba vetpes bok.

## 18

### *Pol Ga Tong Asu Lagale Lavavang To Korin*

<sup>1</sup> Melemu at na, Pol ga on basinge lemenemen Atens la gat pas uto Korin.

<sup>2</sup> \*Mo go ni ga ekip tangarang mi laradi me Judaia laasen teren ne Akuila. Lemenemen aulis teren Pontas. Ni ga nemen to Itali at lemenemen Rom eburu mi latkin teren ne Pirikila. Ketla diga on basinge mo lemenemen, mila lakaisar ne

Kolodias ga tong i ri limixin me Judaia xusu nedi axap dina vas kaxat basinge lemenemen Rom. Pol gat pas kusu na ven tidu,

<sup>3</sup> \*la ni ga nemen midu la ga gugu eburu midu, mila neni gakleklen lugugu gu mi levengkadis, kereknangan du. La kerepmo diga lok kaka lempilas tidi. <sup>4</sup> Ni ga vavang amisik to at loogu singising at levenaleng kaala, gak lok tong pen i do na lok limixin me Judaia la me Grik dina nunu.

<sup>5</sup> \*At lara laaleng ne Sailas mi ne Timoti duga rupot boro Masadonia, la melemu ne Pol ga raba levenaleng axap teren ti vavang mi Lagale Lavavang la ga tong i ri limixin me Judaia do ne Iesu, neni Lanarong.

<sup>6</sup> \*Ketla limixin me Judaia diga lox abulubun i la diga vaase levelinga xapmek mumu i, la ni ga vaase lolos tidi la ga semla xepe laxakup at lavanga singsiga ren. La ni ga lok tidi, “Do nemi mi xopara levelinga at ne Moroa, nemi xa minabap kip lumumuat teren. Kopmen bok ba toxot tarak ap mo i. Nia anat pas kusu ana vavang ti limixin kopmen di me Judaia.”

<sup>7</sup> La ni ga on basinge di la ni gat pas kusu na nemen to at loogu at laradi xopmen neni me Judaia, laasen teren ne Tisias Jastas, neni ga lotu saparap ne Moroa. La loogu ren ga nemen saparap loogu singising.

<sup>8</sup> \*Krispas, neni laradi gomgo ap mo loogu singising ga nunu at Leeme Silok, nedi axap diga nemen at loogu ren diga nunu. La buaang bok atnedi go Korin diga ronga Lagale Lavavang, la diga nunu la diga lok ka lesepsusu.

<sup>9</sup> \*At lara laxanimin Pol ga ven lisilimet, la Leeme Silok ga lok tin, “Nemen utak marat, ketla una vavang amisik la nemen uta doxoma

\* 17:30: Gu 14:16 \* 17:31: Sam 9:8; 96:13; Gu 10:42 \* 18:2: Ro 16:3 \* 18:3: Gu 20:34; 1 Ko 4:12 \* 18:5: Gu 17:14-15; 9:22 \* 18:6: Gu 13:46,51; 20:26 \* 18:8: 1 Ko 1:14 \* 18:9: 1 Ko 2:3 \* 18:10: Jos 1:9; Ais 41:10; Jer 1:8; Jo 10:16

abulubun la una ke xepe na lugugu rak.

<sup>10</sup> \*Mila nenia ak lok eburu minu, kopmen tara noxo lok empana i do na sev u, mila buaang nedi at na lemenemen, nedi limixin tarak.”

<sup>11</sup> Kuren la ne Pol ga nemen go at legesa maares mi lavanna gaaling, ga vanasa limixin mi levelinga at ne Moroa.

<sup>12</sup> At lara laaleng ne Galio ga nemen ngan lamgomgo at limixin to Grik. Limixin me Judaia, diga vot eburu la diga ranga alis ne Pol la diga lok ka i uto at lavapaase.

<sup>13</sup> Diga lok, “Na laradi i lok tong pen i do na lok pes lununu at limixin di lotu saparap ne Moroa la i anasa di mi lara langas petpes kopmen na sixit emu mi Laulis Linga.”

<sup>14</sup> Pol ga lok do na vaase, la ne Galio ga lok ti limixin me Judaia, “Do ni ga lok laxakapmek, i epovo do nia ana ronga levelinga atnemi limixin me Judaia.

<sup>15</sup> \*Ketla nemi mi paase mumu mene levelinga la levenasen at Laulis Linga atnemi. Nia xopmen laradi rongtonga ri lempanga xerepmo. Nemi xa mina epaase mumu i nom.”

<sup>16</sup> La ni ga lox asu di ukamang basinge lavapaase.

<sup>17</sup> Ketla diga ranga alis ne Sositenes, laradi gomgo at loogu singising, la digap sev i ro melamgo at loxot tongtonga linga. Galio ga ven i na, ketla ni ga ven kepe mun i.

### *Pol Gamlong Uto Antiok*

<sup>18</sup> \*Pol ga nemen to Korin at levenaleng buaang. Melemu ni ga on basinge luvuttadi nunu la ni ga los kas at lavatmon la ni eburu mi ne Pirikila la ne Akuila diga sen uto Siria. Avot ti mo lavatpas, Pol ga lok laxakaape saparap ne Moroa to Senkiria, la ni ga gan pes levengkinim at lavatlak teren.

<sup>19</sup> \*Diga rupot to Epesas, la ne Pol ga on basinge ne Pirikila mi ne Akuila. Ni gat pas uto at loogu singising la neni eburu mi limixin me Judaia diga etep mi levelinga.

<sup>20</sup> Diga sing i xusu neni na nemen eburu minedi at tevenaleng, ketla ni goxo siam.

<sup>21</sup> \*La ni ga lok tidi, “Mo do lavavara at ne Moroa, anabamlong bok ude rinimi.” La ni ga los kas at lavatmon la ga sen kaxat boro at lemenemen Epesas.

<sup>22</sup> La ni ga rupot to Sisaria la gat pas uto Jerusalem la ga vot pasa mene limixin nunu me go. Melemu ni gat pas uto Antiok.

<sup>23</sup> Melemu at leventaba levenaleng at loklok teren go, ni ga vas kaxat, la gat pas maxeneng at lengkot axap, Galesia, la Pirigia, neni ga paase alo-los limixin nunu me go.

### *Apolos Ga Vavang To Epesas*

<sup>24</sup> Lara laradi me Judaia laasen teren ne Apolos, neni boro Aleksandria, gat pas uto Epesas. Ni laradi levelinga ren ga lok nunuan amisik la ni gakleklen avukat levelinga at Lovoang Kaala.

<sup>25</sup> \*Ni ga lok ka levelinga mumu langas at Leeme Silok. Ni ga ru-una langangan lomomo xusu ni na anasa limixin mi levelinga mumu ne Iesu, la levelinga ren gak mokso. Ketla neni gaklen kusuk mun lesepsusu at ne Jon.

<sup>26</sup> \*Ni ga vavang to xeneng at loogu singising la goxopmen lanmarat. La ne Pirikila mi ne Akuila duga ronga i la duga lam ka i uto at loogu atdu. La duga soxomus avukat box i rin, mi langas nunuan at Leeme Silok.

<sup>27</sup> \*Apolos ga doxoma i do ni nat pas uto at lenep silok Grik. Kuren la luvuttadi nunu ro Epesas diga paase tooro i la diga malagan lovoang ti luvuttadi nunu ro Grik. Diga tong i ridi do dina siam ka i ugo. Ni ga

\* **18:15:** Gu 23:29; 25:18-19; Jo 18:31    \* **18:18:** Gu 21:24    \* **18:19:** Gu 17:17    \* **18:21:** Ro 1:10; 1 Ko 4:19; Je 4:15    \* **18:25:** Ro 12:11; Gu 19:3    \* **18:26:** Gu 19:8    \* **18:27:** 2 Ko 3:1; Kl 4:10

rupot, la ni ga lok tooro avukat nedi mo diga nunu at ne Iesu mi loklok tooro at ne Moroa.

<sup>28</sup> \*At lemeren limixin axap ni ga volo aleng limixin me Judaia at loxonaleng diga etep mi levelinga. Ni ga lox asuusu i at Lovoang Kaala do ne Iesu, neni Lanarong.

## 19

### *Pol Ga Vavang Mi Laasen At Ne Iesu To Epesas*

<sup>1</sup> \*Ap mo levenaleng ne Apolos ga nemen to Grik at lemenemen Korin, la ne Pol gat pas at langas babaalom maxeneng ap mo lunep silok Galesia la Pirigia la ni ga rupot to Epesas. Mo go ni ga vot pasa lentaba luvuttadi nunu.

<sup>2</sup> \*La ni ga sue di, “Kereva, miga lok kaka bok Loroonan Kaala at loxonaleng nemi miga nunu?”

Diga vorang i xeretna, “Nema xovisi mana rongga i do Loroonan Kaala mo i nemen.”

<sup>3</sup> Pol ga sue di, “Lesepe susu salai nemi miga lok ka i?”

Diga vorang i xeretna, “Maga lok ka lesepe susu at ne Jon.”

<sup>4</sup> \*Pol ga lok, “Lesepe susu at ne Jon tinedi diga on basinge laxakapmek atdi. La ne Jon ga tong i ri limixin do dina nunu at lara mo ga mumu asu i, neni ne Iesu.”

<sup>5</sup> Diga rongga i na la diga lok ka lesepe susu at laasen at Leeme Silok ne Iesu.

<sup>6</sup> \*Pol ga lok li lukngen to mavana atdi, la Loroonan Kaala ga vubeles atdi la diga paase mi lempapaase vetpes la diga tong asu levelinga at ne Moroa.

<sup>7</sup> Nedi axap diga epovo at lasangaun mi legepura.

<sup>8</sup> Maxeneng at lavantun gaaling Pol ga pubeles at loogu singising, la ni ga vavang ti limixin la goxopmen lanmarat. Ni ga vetep mi levelinga eburu minedi la ga lok tong pen i do

na sat ka lununu atnedi ri Linintoo at ne Moroa.

<sup>9</sup> \*Ketla lentaba atdi di goxopara levelinga ren la di goxo nunu, la diga vaase kapmek ti langas at Leeme Silok to melamgo at limixin axap. Kuren la ne Pol ga on basinge di la ga lam ka luvuttadi nunu eburu min. La at levenaleng axap ni ga paase ro at loogu vapaase at ne Tirinas.

<sup>10</sup> \*Pol ga nemen go la ga anasa limixin at legepu maares. Kuren la limixin no diga nemen taba ro at lengkot Asia, nedi leme Judaia la leme Grik bok diga rongga levelinga at ne Moroa.

### *Lubunggas Digap Sep Laxamdak At Ne Siva*

<sup>11</sup> \*Moroa ga lok buaang lempanga sangsangu ga lok petpes aleng at lekngen ne Pol.

<sup>12</sup> \*La limixin diga soe ka lengkontamon at labantuxu ren, la diga lok li at labantuxu at limixin mekmeres la levenanmeres atdi gara xap, la lubunggas diga ravasu basinge di.

<sup>13</sup> \*Lentaba at leme Judaia mo digat pas tangtagap la digak lok pes lubunggas basinge limixin. Diga lok tong pen i do dina gugu mi laasen at Leeme Silok ne Iesu. Diga lok ti lubunggas keretna, “Nia a tong i rinimi do mina sixisu at laasen at ne Iesu, mo ne Pol i vavang min.”

<sup>14</sup> Nedi lavanuti laxamdak at laradi boro Judaia, ni laradi gomgo at lubungmaasa, laasen teren ne Siva, mo digak lox i na.

<sup>15</sup> \*Ketla lara lagas ga lok tidi, “Aklen ne Iesu la aklen bok ne Pol, ketla axoklen nemi.”

<sup>16</sup> Laradi mi nom lagas ga nemen teren ga xala di mi langangan lolos teren ga volo axap di, la gap sep kakapmek di. Diga sixiro basinge mo loogu ren la lengkot atdi ga lok kakapmek tinotno, la diga sixiro beleben nga.

\* 18:28: Gu 9:22 \* 19:1: 1 Ko 3:6 \* 19:2: Gu 2:38; 8:16 \* 19:4: Mt 3:11 \* 19:6: Gu 8:17; 10:44,46 \* 19:9: 2 Ko 6:14-18 \* 19:10: 2 Ti 1:15 \* 19:11: Gu 14:3 \* 19:12: Gu 5:15 \* 19:13: Mk 9:38 \* 19:15: Mk 1:24,34 \* 19:17: Gu 5:5,11

17 \*La nedi axap limixin me Judaia la boro Grik bok, no diga nemen to Epesas diga ronga i na. Diga lingu, la limixin axap diga lok ngangao aleng at laasen at ne Iesu.

18 Buaang atnedi luvuttadi nunu mi lavakin nunu diga vot eburu la diga tong asu lempanga xakapmek digak lox i gano.

19 Buaang atnedi mo digakleklen lengkot at lemenemen (magic), diga lok buru levenbuk kakapmek atnedi la diga xotos i ro melamgo at limixin axap. Diga exes luunun ap mo levenbuk diga un i min, ga volo lavalimo sangaun larabin sangsangaun kobot (50,000) levempilas siliva. 20 \*La kerepmo levelinga at Leeme Silok ga epeseves la ga lox alolos bok limixin nunu.

### *Langsangan Lekarakat To Epesas*

21 \*Melemu at na lempanga ga ravasu, Pol ga doma li be i do ni nat pas uto Jerusalem la na mu langas keneng at lenep silok Masadonia la at lenep silok Grik. Ni ga lok, "Melemu at lavatpas tarak uto Jerusalem, anabat pas uto Rom."

22 \*Kuren la ni ga riki ne Timoti mi ne Erastas, nedu luradi loklok tooro ren uto Masadonia, la ni ga nemen to Asia at lentaba levenaleng.

23 \*Ap mo levenaleng langsangan lekarakat ga nemen go Epesas mumu langas at Leeme Silok.

24 \*Lara laradi ga nemen go, laasen teren ne Demetrius. Ni ga gugu lempoovo moroa mi lisiliva, la gak lok bok lempoovo vanga at loogu laplavang at lomoroa rixin ne Artemis. Nedi luvuttadi diga gugu lugugu xerepmo diga xip kaka langsangan luunun ap mo lugugu.

25 Kuren la ni ga xup bubua ka nedi digak lok mo lugugu la ga lok tidi, "Nemi limixin, miklen i do luunun atdik ip tavasun mun at na leven gugu.

26 \*Nemi xa mira ven pam i la mira ronga vam mo levelinga ne Pol i tong i. Ni lok do levenmoroa limixin di lox i mi levengkikngen di, kopmen levenmoroa ruturun. La ni ira sat ka vam buaang nedi limixin mi levelinga ren, la ira lox asubu di basinge lomoroa rixin nade Epesas la at lengkot axap bok at na lenep Asia.

27 I lok kapmek do na ne Pol ira vot de la na lok limixin kusu dina lox abulubun kepe lempoovo vanga nedik tak lox i. I lok kapmek bok do limixin dina lox abulubun kepe loogu laplavang at lomoroa rixin ne Artemis la dina lok abulubun kepe bok ne Artemis. Limixin axap nade Asia la at na lemenemen axap di lotu saparav i."

28 Mo limixin diga ronga na levelinga la diga musak aleng la diga xup silok kaxat, "Artemis me Epesas neni i silok aleng."

29 \*Mo luxupkup ga epeseves ap mo lemenemen axap. Mo limixin diga ranga alis ne Gaius mi ne Aristakas, nedu boro Masadonia dugat pas amisik eburu mi ne Pol, la diga sixit eburu minedu uto at loxot papaase buru.

30 Pol ga vara i do nat pas uto melamgo at limixin axap, ketla luvuttadi nunu di goxo siam do ni nat pas.

31 \*Lentaba luvuttadi amgomgo at lenep silok Asia, nedi larapen tangas at ne Pol diga lox aonon bok lava-paase rin. Diga sing tin do ni noxovas uto at loxot papaase buru, kuren la ne Pol goxot pas tin.

32 La nedi limixin axap ap mo loxot papaase buru diga lok langsangan luxupkup. Ketla buaang atdi digak kup gamasa mene mila di goxoklen lavasuun ap mo loxotpot buru.

33 Lentaba atdi diga lok do ne Aleksanda neni lavasuun at nai, mila leme Judaia diga lok li i do ni na

\* 19:20: Gu 12:24 \* 19:21: Gu 23:11; Ro 1:13  
\* 19:24: Gu 16:16 \* 19:26: Gu 17:29; 2 Ti 1:15  
2 Ti 1:15

\* 19:22: Ro 16:23; 2 Ti 4:20 \* 19:23: 2 Ko 1:8  
\* 19:29: Gu 20:4; 27:2; Kl 4:10; Pm 1:24 \* 19:31:

ru ro melango at limixin. Kuren la ne Aleksanda ga sep makmak di mi lekngen kusu na lok lavapaase axasep tinedi limixin do neni eburu mi larapen tangas teren kopmen toxot atdi ap mo leedak.

<sup>34</sup> Ketla diga ven kibis i do neni laradi me Judaia, la digap kup amisik aleng ngan legesa radi xeretna, "Atemis me Epesas neni i silok aleng!"

<sup>35</sup> La melemu at nai leeme gomgo at limixin ga lox amila di. Ni ga lok, "Limixin me Epesas! Nemi axap miklen i do nedik mede Epesas tak lok tatao loogu laplavang at lomoroa silok ne Atemis la lovoovo ren, no ga subu boro vana at laxalibet.

<sup>36</sup> Ixok mokso do tara na tong i do na levelinga kopmen na ruturen. Kuren la minak lox atnaasan la nemen mita lok tempanga xapmek.

<sup>37</sup> Mi lam ka vam na luradi ude, ketla kopmen du goxo xip pilo tavanga ro at laraogu laplavang la du goxo vaase xapmek ti lomoroa rixin atdik.

<sup>38</sup> Dola ne Demetrius la nedi luvuttadi gugu bok eburu min di ruuna tekarakat eburu mi tentaba, levengkonaleng move ri lavapaase la luvuttadi amgomgo mo di nemen. Di epovo ri lok li tara at lavapaase ren.

<sup>39</sup> Ket do tavanga gove nemi mi vara rin, minaba epaase mu ba i ro at lovtopot buru atnimi xa.

<sup>40</sup> I epovo do dina lok li dik at lavapaase mumu na leedak i ngan mo lingina. Kopmen tavasuun at na leedak, la nedik ta noxo lox epovo i do ataba tong tavasuun nunuan ti nai."

<sup>41</sup> Melemu at lavapaase ren ni ga lox aepeseves nedi.

## 20

### *Pol Gat Pas Uto Masadonia La Grik*

<sup>1</sup> Melemu at leedak gara xap pam, Pol ga xup bubua ka luvuttadi nunu, la ni ga vaase loklok tooro rinedi la

diga xaduk aonon i. La ni ga on basinge nedi la gat pas uto Masadonia.

<sup>2</sup> Ni gat pas to xeneng ap mo loxot la ni ga vaase loklok tooro ri limixin nunu mi levelinga buaang. La melemu ni gat pas uto Grik.

<sup>3</sup> Ni ga nemen go at lavantun gaaling. Ga se ni ga gagas kusu ti mu lavatmon uto Siria, ni ga long lenger i do leme Judaia mo diga paase ali ri sev amer i. Kuren la ni ga doma li i xusu namlong kantubu at lenep silok Masadonia.

<sup>4</sup> \*Sopata, nitna ne Pairas boro Beria, gat pas eburu min. Lentaba bok digat pas, ne Aristakas la ne Sekandas boro Tesalonia, Gaius boro Debi, Timoti, Tikikas la ne Tropimas boro at lenep silok Asia.

<sup>5</sup> Digamgo rinama la diga ngangais tinama ro Troas.

<sup>6</sup> Maga sen kaxat boro Pilipai melemu at lara leluxa laasen teren Lovovolo Pe. La melemu at lavalimo aleng maga vot pasa di ro Troas, mo go maga nemen eburu midi at lavanuti aleng.

<sup>7</sup> \*At laaleng avot ap mo luik ga ukantinao maga vot buru ri lok katling laanan kaala at ne Iesu. Pol ga vaase ri limixin, la ni ga vavang babaalom se at laxanimin tubu mila ni ga lok do naba onon ap mo laaleng melemu.

<sup>8</sup> Buaang levenbabao ga nemen to vana ap mo loogu nema magak lok teren.

<sup>9</sup> Lara laau radi laasen teren ne Iutikas, gat kis to at loxon musmaragu lixilik. Pol ga vaase aleng la lemeren ne Iutikas ga unga aleng tinotno, se ni ga unga met, ni ga subu si boro vana xa ap mo loogu babaalom upana, la ukopok ti laxangka. Diga ranga axatu i, ga lavanga met ta.

<sup>10</sup> \*Ketla ne Pol ga vas si ukopok la ga subu pavaa i la ga ot kongkodaan ka i la ni ga lok tidi, "Nemen mita bulu, neni mo i rooro mene la kopmen na met!"

\* 20:4: Gu 19:29; 21:29; Ep 6:21 \* 20:7: Gu 2:42,46 \* 20:10: 1 Lav 17:21

11 Melemu digamlong upana ap mo loogu la diga lok laanan kaala. La ne Pol ga vaase babaalom tidi se at laxangking ga losu maxantamak suubu, la ni ga on basinge di.

12 Diga lok ka mo laau radi uto xolonu, la lebelendi gak lox atnaasan aleng mila ni goxo met.

13 La nema maga vas kaxat me go uto at lavatmon la maga sen kaxat uto Asos kusu manaba xas ka ne Pol upana ri lavatmon. Ni ga tong i rinama do manabak lok ngais i go, mila ni gat pas mene ugo.

14 La ni ga ekip tangarang minama ro Asos, la maga xas ka i upana at lavatmon la maga sen kaxat uto Matilini.

15 Maga sen kaxat me go la maga rupot to saparap losoxan Kios ap mo laaleng petpes. Melemu at lara laaleng bok nga, maga sesen uto saparap losoxan Samos, la ap mo manga lara laaleng petpes maga rupot to Mailitas.

16 \*Pol ga doxoma i do ni naba sen polo go Epesas, kusu ni noxo nemen abao ro at loxot Asia. Ni gak lok soso xusu ni naba rupot to Jerusalem, edompo mi laaleng ti lok katling la Pentikos.

### *Pol Ga On Basinge Limixin Nunu Boro Epesas*

17 \*Pol ga riki lara laradi mi levelinga boro Mailitas uto Epesas, ga sing loxongkulao silok at lotu xusu dina ekip tangarang min.

18 \*Diga vot pasa i la ni ga lok tinedi, "Miklen i do luruptuvuk tarak ga lox avukat ap mo levenaleng nia aga nemen eburu minemi, ga vaxaru ka i at laaleng nia aga rupot de at lenep Asia.

19 \*Mi langsgangan loklok ngangao la lanteng, aga lok leven gugu rak kerekngan lasaxaruki at ne Moroa, la aga ekip tangarang mi levenmuuat at leme Judaia diga lok li i rak.

20 Mikleklen i do nia a goxo lipe tekolonga ri lok tooro nemi limixin. Ketla nia agak lox ase nimi ro at lengkot potpot buru la to at leven-taogu atnimi.

21 Ti leme Judaia la limixin kopmen di me Judaia bok aga vaase los tinedi do dina leeng basinge laxakapmek atnedi, la dina vot parap ne Moroa, la dina nunu at Leeme Silok ne Iesu.

22 \*La ananga nia a ronga res at Loroonan Kaala, kusu anat pas uto Jerusalem. La nia axoklen i do lavanga salai naba rupot saparav ia go.

23 \*Nia akleklen i do at laramenemen axap Loroonan Kaala ik lok tia dola limixin dinaba lok li ia at loogu xokoxo la ana xip laxanmuuat aleng.

24 \*Ketla nia a lok do lorooro rak i lok ngan ta do lavanga gamasa mun tia. Nia a vara mun i do ana lox axap lavatpas tarak la ana lox axap lugugu at Leeme Silok ne Iesu ga raba ia min. Mo lugugu ri tong asu Lagale Lavavang mumu letaba nabalamu at ne Moroa.

25 Agarat pas tangtagap pam kantubu atnimi, aga tong asu langas ti Linintoo at ne Moroa. La na a tong tuturun i rinimi. Aklen i do kopmen tara atnimi noxo ven bok ba ia.

26 \*Kuren la a tong tuturun i rinimi na lingina. Mo do tara atnimi na ronga abulubun levelinga at ne Moroa, ni nabap kip lumumuat teren. Nia xopmen lavasuun teren,

27 mila nia a goxo lipe tevelinga. Ketla aga tong asu levelinga axap ne Moroa ga vara i xusu na gugu keneng at lorooro atnimi.

28 \*Mina lok tatao avukat nemi la mina lok tatao nedi bok limixin, Loroonan Kaala gara lok li vam nedi maxopok at loklok tatao atnimi. Mina lok ngan luvuttadi loklok tatao sipsip kantubu at limixin at ne Moroa, no ni ga lok li di do ateran axa mumu lanmet at ne nitna.

\* 20:16: 2 Ti 1:15 \* 20:17: Gu 18:21 \* 20:18: Gu 18:19; 19:10 \* 20:19: Gu 20:3 \* 20:22: Gu 19:21 \* 20:23: Gu 9:16; 21:4,11 \* 20:24: Gu 21:13; 2 Ti 4:7 \* 20:26: Gu 18:6 \* 20:28: 1 Ti 4:16; 1 Pi 5:2-4 \* 20:29: Mt 7:15; Jo 10:12

29 \*Aklen i do melemu at lox-onaleng nia ana onon, limixin kakapmek dinaba rupot kantubu atnimi, dina lok ngan lubungman atat la dinaba lok kapmek lununu at lentaba atnimi.

30 \*Laaleng move naba rupot la lentaba atnimi dinaba ba gili levelinga ruturun kusu ti sat ka limixin nunu basinge ne Moroa.

31 \*Mina lok tatao avukat nemi. Mina doma bilong ti mo lavantun maares nenia aga paase aleng tinemi axap at levenaleng kangking la kanimin, la agang teng mu nimi.

32 \*La ananga nia a lok li nimi maxopok at loklok tatao at ne Moroa la levelinga mumu letaba nabalamu ren naba lok tooro nimi. Neni xa i epovo ri lox alolos lununu atnimi la na raba nemi mi lapnovos no ni i gagas li i ri limixin teren.

33 \*Nia a goxom doma mu tempilas kopla tempanga singsiga atnimi.

34 \*Nemi xa miklen i do aga gugu mi na lukngak la aga lox epovo ka lempanga, nema mi larapen tangas tarak magak pakes tin.

35 \*At lempanga axap nia aga lox i, aga lox ase nimi do mina lolos kusu mina lok tooro mo limixin banbalo. Mina lox i xuren mila ne Iesu ga lok keretna, 'I lox avukat do tara i lok kaka levempanga, ketla i lox avukat aleng do tara na raba levempanga ri limixin petpes.' "

36 \*Pol ga vaase axap la ni ga xis tiktikbu mi luvatgulom teren eburu minedi axap limixin la ni ga sing.

37 Nedi axap digang teng aleng la diga votor i la digat nes i.

38 \*Diga lok bukbulu aleng at levelinga ni ga tong i do di noxo ven bok ba i. La diga emu min uto at lavatmon.

## 21

### *Pol Gat Pas Uto Jerusalem*

\* 20:30: 1 Jo 2:19 \* 20:31: Mk 13:37; Gu 19:8,10; 1 Ts 2:11 \* 20:32: Gu 26:18 \* 20:33: 1 Sml 12:3; 1 Ko 9:11-12 \* 20:34: Gu 18:3; 1 Ts 2:9 \* 20:35: Mt 10:8 \* 20:36: Gu 21:5 \* 20:38: Gu 20:25 \* 21:4: Gu 20:23 \* 21:6: Gu 20:36 \* 21:8: Gu 6:5; 8:40 \* 21:9: Gu 2:17

1 Limixin me Epesas diga lox abeese nama mi lainbulu silok la maga on basinge di. Maga sen kaxat la maga sen epopolo uto Kos. Ap mo laaleng melemu maga rupot to Rodes, la maga sen kaxat me go uto at lemenemen Patara.

2 Mo go maga long lenget lara lavatmon, mo ga lok do na sen kaxat uto Ponisia. Kuren la maga los kas ap mo lavatmon la maga sen kaxat.

3 Maga vot at lara loxot la maga ven losoxan Saipras, la maga sen polo i at lenep kia ap mo losoxan uto at lenep silok Siria. Maga oso ro Taia, mo go lavatmon ga oso xusu dina xip asu lentaba lempanga.

4 \*Maga long lenger i do lentaba luvuttadi nunu mo diga nemen go, la maga nemen eburu minedi at lavanuti aleng. Mi lolos at Loroonan Kaala diga tong i ri ne Pol do ni noxot pas uto Jerusalem.

5 Ketla levenaleng atnama ri nemen go ga xap, la maga on basinge mo lemenemen silok. Nedi axap, eburu mi lavakin atnedi la laxaalik kakalik atdi, diga vas kaxat eburu minema uto loxon. Maga xis tiktikbu mi lempatgulom atnama ro loxon la maga lok lising.

6 \*Melemu diga xaduk aonon nema, la maga los kas at lavatmon la nedi digamlong ukolonu.

7 Maga sen kaxat boro Taia la uto Potolemas, mo go maga vot pasa luvuttadi nunu la maga nemen eburu minedi at leges aleng.

8 \*Ap mo lara laaleng melemu maga on basinge di la maga rupot to Sisaria. Mo go magat pas uto at loogu at laradi vapaase asu Lagale Lavavang, laasen teren ne Pilip, la maga nemen eburu min. Neni lara atnedi lavanuti luvuttadi no diga soxolik ka di ro Jerusalem.

9 \*Neni ga ruuna lavanuet laxaalik kovisi di goxo epot, mo diga vavang

mi levelinga at ne Moroa.

10 \*Maga nemen go at lentaba levenaleng, la lara leeme vapaase ali, laasen teren ne Agabas ga rupot boro Judaia.

11 \*Ni ga vot pasa nama, la ga lok ka labaane at ne Pol, la ni ga xoxo ka lukngen ne Pol mi luxangkedek teren la ga lok, "Loroonan Kaala i tong i do laradi at na labaane, limixin me Judaia dinaba xoxo i. Dinaba lox i na ro Jerusalem, la dinaba song araba i ri limixin kopmen di me Judaia."

12 \*Maga ronga i na la nema eburu mi lentaba me go maga ngising tinotno ne Pol do ni noxot pas uto Jerusalem.

13 \*Ketla ni ga lok, "Laai nom nemi mik lox i, ming teng keretnom la mirak lox abulu lorooro rak? Nia a gagas pam kusu dinaba xoxo ia. La nia a gagas bok kusu ti met mo go Jerusalem kusu ti xip aurut laasen at Leeme Silok ne Iesu."

14 Ma goxo lox epovo i xusu ti ba gili lodoxoma ren, kuren la maga ke xepe i la maga lok, "Lavavara at ne Moroa do ni na lox i xuren."

15 Melemu at lentaba levenaleng maga nemen go, maga lok agagas li lempanga atnama la maga vas kaxat uto Jerusalem.

16 Lentaba luvuttadi nunu boro Sisaria bok mo digat pas eburu minema, la diga lok ka nama uto at loogu at lara laradi, laasen teren ne Nason boro Saipras, neni lara atnedi diga lok ka avot lununu saparap Leeme Silok.

### *Pol Ga Ven Ti Ne Jems*

17 At lovtopot atnama go Jerusalem luvuttadi nunu diga lok momo aleng minama.

18 \*Ap mo lara laaleng melemu nema mi ne Pol magat pas kusu mana ven ti ne Jems. Nedi axap luvuttadi amgomgo at lotu go

Jerusalem diga rupot to ap mo lovtopot buru.

19 \*Pol ga paase momo rinedi la ga tong asu lempanga axap no ne Moroa ga lox i at lekngen kantubu at limixin kopmen di me Judaia.

20 \*Melemu at levelinga at ne Pol, limixin diga emi asu mi ne Moroa. La diga lok ti ne Pol, "Neton nama. U ven i do, buaang limixin me Judaia di nunu, la nedi dim tebeng lolos Laulis Linga.

21 \*La lentaba vetpes di tong i do, nenu mo uk lox ase leme Judaia mo dik lok at laramenemen at limixin kopmen di me Judaia, la u tong i ridi do dina ke xepe Laulis Linga at ne Moses, la nemen nedi guta vit kepe lengkontuxu at laxamdak atdi la nemen diguta mumu asu leveloklok atnedik leme Judaia.

22 Dibaklen i do nenu mo u rupot pam. Ataba lok lavanga salai?

23 Una lok lempanga keretna. Lavanuet luvuttadi mo diga xaape saparap ne Moroa.

24 \*Una lam ka di la una mu asu mo loklok eburu minedi xusu una dadat at lemeren ne Moroa, la una lok bok luunun ap mo loklok tinedi. Kuren la diba epovo do dina gan kepe lempat kabinim at lempatlak atdi xusu dina lox epovo mo laxakaape atdi saparap ne Moroa. Kerepmo la limixin axap dibaklen i do mo levelinga mumu u xopmen na ruturun. La diba xasep do nenu ung tonga res at Laulis Linga at ne Moses.

25 \*Ketla mara lox aonon pam levelinga ri limixin kopmen di me Judaia no diga nunu. Mo levelinga i tong i ridi do di noxo anan teveluxa no diplavang min ti lempatpoovo moroa, la di noxo anan tavanga mi lada ren, la di noxo anan lempanga mi lavanuet kangkedek no diga xut amer i, la dina ke loklok ting longka tixin."

\* 21:10: Gu 11:28 \* 21:11: Jo 21:18; Gu 20:23; 21:33 \* 21:12: Mt 16:22 \* 21:13: Gu 20:24  
 \* 21:18: Gu 15:2,13; Ga 1:19 \* 21:19: Gu 15:12 \* 21:20: Gu 15:1,5 \* 21:21: Gu 16:3; Ga 2:3  
 \* 21:24: Kex 6:1-20; Gu 18:18 \* 21:25: Gu 15:29 \* 21:26: 1 Ko 9:20



26 \*Kuren la ne Pol ga lam ka di mo lavanuet luvuttadi la ga emu minedi la ap mo lara laaleng melemu ni ga lox epovo luunun tidi la digagan kepe levengkabinim at lempatlak atdi. La ni ga beles to xeneng at loogu laplavang la ga vaase axasep lavanisa levenaleng ti laxavaxap ap mo loklok la at ua laaleng diba raba laramtaba atdi.

### *Leme Judaia Diga Ranga Alis Ne Pol*

27 \*Levenaleng ap mo loklok ga lok do na xap ta, lentaba leme Judaia boro at lenep Asia diga ven ne Pol to xeneng at loogu laplavang. Diga lox axatu kaxat levendoxoma at limixin axap me go, la diga ranga alis i.

28 \*Digap kup keretna, “Nemi limixin me Israel. Ude nimi la mina lok tooro nama. Anai laradi na it pas tangtagap at lengkot axap la ik lox ase limixin do dina lox abulubun kepe limixin me Judaia la dina ke xepe Laulis Linga atdik la na loogu laplavang. La ananga ira lok ka laradi xopmen me Judaia ukeneng at loogu laplavang la kerepmo i lok puvula na loogu xaala!”

29 \*Diga tong i na mila diga ven ne Tropimas boro Epesas eburu mi ne Pol to xeneng ap mo lemenemen silok, la diga nua i do ne Pol ga lam ka i uto xeneng ap mo loogu laplavang.

30 Mo lemenemen silok axap ga umsu mi langsung leedak, la limixin digak sixit eburu, la diga ranga alis ne Pol la diga sat ka i ukamang basinge loogu laplavang. La soso mun diga vipe lumusmaragu ap mo loogu laplavang.

31 Mo limixin diga lok tong i do dina sep ne Pol la soso mun lara laradi ga lox aonon levelinga ri leeme gomgo at limixin esep boro Rom do limixin axap go Jerusalem mo diga lok lekarakat.

32 La soso mun mo leeme gomgo ga lok ka lentaba digak lok mu ren la lentaba limixin esep la diga sixit

uto saparap mo limixin. Mo limixin diga ven mo leeme gomgo eburu mi limixin esep, la diga xap ta lesepep ne Pol.

33 \*Leeme gomgo ga vas saparap ne Pol, la ga ranga alis i, la ga tong i ri limixin esep do dina xoxo i mi luvarooos sen. La ni ga sue, “Nege i na laradi, la lavanga salai mo ni i lox i?”

34 Lentaba xeneng atdi mo limixin diga tong lara levelinga vetpes. La lentaba diga tong leta lepelinga vetpes bok. Langsung lekarakat silok ga vot, la mo leeme gomgo goxo lox empana i do naklen ka lavasuun at na leedak. Kuren la ni ga tong i ri limixin teren kusu dina lam ka ne Pol uto at loogu matmatkun atdi.

35 Diga emu min uto at laata at loogu, la limixin esep diga xip ka i mila limixin diga musak aleng.

36 \*Diga mumu asu i la digap kup keretna, “Sev amer i!”

### *Pol Ga Vaase*

37 Mo limixin esep diga lok do na lok ka ne Pol uto at loogu matmatkun la ni ga vaase ri leeme gomgo mi lavapaase Grik, “I epovo bok do ana tong tevelinga ru?”

Mo leeme gomgo ga rakdu la ga sue i,

38 \*“Kereva. Nenu xopmen mo laradi boro Isip? At lentaba levenaleng ga xap pam, neni ga lok kaxat leesepe eburu mi lagavaman la gam gomgo rinedi lavanuet larabin sangsangaun kobot (4000) limixin esep uto at lamathin.”

39 Pol ga lok keretna, “Nenia lara at limixin me Judaia, boro at lemenemen Tasas at lenep Silisia. Nenia me go ap mo lemenemen doxodok. A sing u do i epovo ana vaase ri limixin.”

40 Leeme gomgo ga siam do ni na vaase. Kuren la ne Pol ga xatu kaxat to at laata ap mo loogu la ga sep makmak di. Diga lok pilo, la ne Pol ga vaase ridi mi lavapaase Ibru.

\* 21:27: 2 Ti 1:5

\* 21:28: Isi 44:7; Gu 6:13

\* 21:29: Gu 20:4; 2 Ti 4:20

\* 21:33: Gu 20:23

\* 21:36: Lu 23:18; Gu 22:22

\* 21:38: Gu 5:36-37

## 22

<sup>1</sup> “Luvutnetak mi luvuttamak, mina ronga ia. Ana paase de melango atnimi!”

<sup>2</sup> Diga ronga ne Pol ga vaase ridi mi lavapaase Ibru, la diga ru atnaasan, la ne Pol ga paase ridi.

<sup>3</sup> \* “Nenia lara at limixin me Judaia, boro at lemenemen Tasas at lenep Silisia, ketla ganoxa diga lok ka ia ude Jerusalem i ngan lun pinivu at ne Gamaliel. Aga lox ase avukat keneng at Laulis Linga at lavalabat atdik, la aga lolos tinotno ri mumu asu ne Moroa kerekngan nemi axap na lingina.

<sup>4</sup> \* Aga ranga alis buaang nedi limixin diga mumu asu ne Iesu la agap sev amet di. Agang tanga alis lavatlok mi lavakin la agak lok li di at loogu xokoxo.

<sup>5</sup> Lamaasa gomgo at luvuttadi laplavang la nedi bok luvuttadi amgomgo dikleken i do nia a paase ruturun. Aga lok ka levelinga loklox axasep boro atdi luvuttadi amgomgo rinedi leme Judaia ro Damasko. Kuren la nia agat pas ugo xusu ana xoxo ka mo limixin la ana lok ka amlong di uto Jerusalem kusu dina xip levenmumuat.

### *Pol Ga Tong Asu Lorooro Ren (Gu 9:1-19; 26:12-18)*

<sup>6</sup> Nia agat pas mu langa la aga vas saparap lemenemen Damasko. Ap mo loxonaleng laxangking ga xis tubu la aga ven langangan laxasep boro vana at laxalibet ga ngao pavaa ia.

<sup>7</sup> Aga subu ukopok ti laxangka la aga ronga laxaka at lara ga sue ia, ‘Sol, Sol. Tila uk lox asongor ia?’

<sup>8</sup> Aga sue i, ‘Leeme Silok, nenu nege?’

Ni ga lok tia, ‘Nenia ne Iesu boro Nasaret mo nu uk lox asongor ia.’

<sup>9</sup> Nedi luvuttadi diga emu minia diga ven mo laxasep, ketla di goxo

ronga laxaka ap mo laradi ga paase ria.

<sup>10</sup> Aga sue i, ‘Leeme Silok, aba lok lavanga salai?’

La Leeme Silok ga lok tia, ‘Una xatu kaxat la unat pas uto Damasko, la mo go tara ba tong lugugu no ne Moroa ira lok katling pam i ru.’

<sup>11</sup> Luxatli rak ga main mila mo laxasep ga lolos aleng. Kuren la nedi diga emu minia diga ranga tu at lakngak la diga lam ka ia uto Damasko.

<sup>12</sup> Lara laradi, laasen teren ne Ananias, laradi lotu la gang tonga res at Laulis Linga atdik la limixin me Judaia go Damasko diga lok ngangao aleng teren.

<sup>13</sup> Ni ga vot pasa ia la ga ru saparav ia la ga lok, ‘Netak ne Sol, una ven mi luxatli ram.’ Ap mo mene loxonaleng nia ga valas luxatli rak la aga reven bok ba min, la aga ven mo laradi.

<sup>14</sup> Ni ga lok, ‘Moroa at lavalabat atdik ga soxolik ka vam u do unaklen lodoxoma ren, la unaba ven kibis Lanarong teren, luruptuvuk teren in manton. La unang tonga levelinga ren.

<sup>15</sup> La nenu unaba tong asu levelinga ri limixin axap mumu mo lempanga nenu uga ven i la ugang tonga i.

<sup>16</sup> \* ‘La nemen utat kis gamasa. Katu kaxat la una lok ka lesepe susu la ne Moroa naba doxoma xepe lev-eloklok kakapmek taram, mo do una sing ti loklok tooro at Leeme Silok.’ ”

### *Pol Laradi Vavang Ti Limixin Kopmen Di Me Judaia*

<sup>17</sup> La ne Pol ga lok bok keretna, “Agamlong uto Jerusalem, la aga ngising to xeneng at loogu laplavang la aga ven lara lisilimet.

<sup>18</sup> \* ‘Keneng at na lisilimet nia aga ven Leeme Silok ga lok tia, ‘Soso u la una vas kaxat basinge lemenemen Jerusalem, mila limixin me de di noxo siam ka levelinga ram mumu ia.’

\* 22:3: Gu 5:34; Ro 10:2 \* 22:4: Gu 8:3; 22:19 \* 22:16: Gu 2:21 \* 22:18: Gu 9:29-30 \* 22:19: Gu 8:3; 26:9-11

19 \*Aga lok, 'Leeme Silok, diklen avukat tinotno i do nia agat pas uto at laraogu singising la agap sep mo limixin diga nunu ram.

20 \*La at laaleng diga sev amet laradi vapaase ram ne Stiven, nenia mo aga tu saparap di, la nia aga siam ti mo laniu ren la agak lok tatao levempanga singsiga ap mo limixin diga sev i.

21 \*Moroa ga lok tia, 'Una vas kaxat basinge na lemenemen. Nia anaba riki u uto vaxalom tinedi limixin kopmen di me Judaia.' "

22 \*Leme Judaia diga rongga levelinga at ne Pol at loxonaleng ni ga tong i na levelinga. Diga xup kaxat lolos keretna, "Tiki pes i! Sev amer i! Neni xopmen na epovo ri rooro at na lavatkangka!"

23 Digap kup silok la diga ba koxorop levempanga singsiga atdi la diga lulu mi laxakup upana.

24 Ketla leeme gomgo at limixin esep ga sak tiki limixin teren do dina lok ka ne Pol uto at loogu matmatkun, la ga tong i ridi do dinak pixis i xusu ti vuse ka ua lavasuun teren la leme Judaia diga vaase lolos tangarang i.

25 \*Se diga xoxo ka i do dinak pixis i, Pol ga lok ti laasesep mo ga tu go, "Kereva, ik mokso at leventaangas atnimi do minap sep lanat boro Rom, no xopmen di goxo rongga levelinga ren at lavapaase?"

26 Mo laasesep ga rongga i na la ni gat pas uto at leeme gomgo la ga sue i xeretna, "U lok do una lok lavanga salai?, Anaa laradi neni lanat boro Rom!"

27 Kuren la leeme gomgo ga vot pasa ne Pol la ga sue i, "Una tong i ria. Kereva, nenu lanat boro Rom?"

Pol ga vorang i xeretna, "I ruturun."

28 Leeme gomgo ga lok, "Nia bok lara xuren, mila nia aga xepe buaang laxampilas."

Pol ga lok, "Ketla nenia lanat boro Rom mila ne tamak gak lok bok kuren."

29 \*La soso mun mo limixin esep diga lok do dina sue i mi levesusue, digasko bilong basinge i. La mo leeme gomgo ga marat mila ni gaklen ba i do ne Pol neni lanat boro Rom, la diga xoxo aru i.

### *Pol Ga Ru Ro Melamgo At Luvuttadi Amgomgo La Ga Paase*

30 Leeme gomgo ga vara i do naklen ua lavasuun teren la leme Judaia diga lok li ne Pol at lavapaase. Kuren la ap mo lara laaleng melemu, ni ga soxomus asu ne Pol, la ga tong i ri lavamaasa silok la nedi luvuttadi amgomgo at leme Israel kusu dina rupot buru min. La ni ga lam ka ne Pol, la ga vaxaru i ro melamgo atdi.

## 23

1 \*Pol ga sok katli ka luvuttadi silok la ga lok tidi, "Luvutnetak. Luruptuvuk tarak i lox avukat axap at lemeren ne Moroa, ise at na laaleng lingina."

2 \*Ketla lamaasa gomgo ne Ananias ga tong i ridi luvuttadi diga tu auret ne Pol do dina vasa lungusno ren.

3 \*Pol ga lok tin, "Moroa naba vasa u, nenu u ngan ta laxapla ro maxamang i nunuan la to xeneng it pospa xapmek tinotno! Ut kis de xusu una mumu asu Laulis Linga at ne Moroa la una rongga linga rak. Ketla nenu xa u los polo Laulis Linga at ne Moroa la ura tong i ridi do dina vasa ia!"

4 Mo luvuttadi diga tu saparap ne Pol diga lok tin, "Nenu u paase kapmek ti lamaasa gomgo at ne Moroa!"

5 \*Pol ga vorang i ridi, "Luvutnetak, nia axoklen i do neni lamaasa gomgo. Levelinga ik lok to xeneng at Lovoang Kaala i lok keretna, 'U noxo vaase kapmek ti laradi gomgo at limixin.' "

\* 22:20: Gu 8:1 \* 22:21: Gu 9:15; 13:2 \* 22:22: Gu 21:36 \* 22:25: Gu 16:37 \* 22:29: Gu 16:38 \* 23:1: Gu 24:16 \* 23:2: Jo 18:22-23 \* 23:3: Mt 23:27 \* 23:5: Pas 22:28 \* 23:6: Gu 4:2; 24:15,21; 26:5

<sup>6</sup>\*La ne Pol ga ven i do lentaba atdi na limixin nedi lubung Sadiusi la lentaba bok atdi nedi lubung Parisi, la ni ga vaase silok tinedi luvuttadi, "Luvutnetak, nenia la Parisi, la ne tamak bok, neni la Parisi. A tu at lavapaase mila nia aklen i do ne Moroa naba lox arooro amlong nedi diga met pam."

<sup>7</sup>Diga ronga i na, la lubung Parisi mi lubung Sadiusi diga edak kaxat, la diga epeseves ti legepu binam tadi.

<sup>8</sup>\*Mila lubung Sadiusi dik lok do limixin di noxo roo xat amlong basinge lanmet, la do kopmen tubung angelo mi labaroonan. Ketla lubung Parisi di nunu at na lavantun lempanga.

<sup>9</sup>\*Luxupkup go ga silok la lentaba luvuttadi loklox ase at Laulis Linga, nedi at lenep at lubung Parisi diga xatu kaxat la diga vaase lolos, "Maxo vuse ka tavanga i lok kapmek at na laradi. Agut loroonan at na lorooro xopla laangelo mo ga paase rin!"

<sup>10</sup>Mo leedak ga lolos tinotno la leeme gomgo at limixin esep ga marat do limixin dina etep mi ne Pol la dina sev amer i. Kuren la ni ga tong i ri luvuttadi esep do dinat pas uto saparap mo limixin la dina lam ka ne Pol basinge di, la dina lok li i ro at loogu matmatkun.

<sup>11</sup>\*Ap mo laxanimin Leeme Silok ga ru saparap ne Pol la ga lok, "Una lolos! Ura tong asu vam levelinga rak nade Jerusalem, la unaba tong asu box i ro Rom."

### *Leme Judaia Diga Tong Li Langas Ti Sev Amet Ne Pol*

<sup>12</sup>Ga maxantamak suubu ap mo lara laaleng melemu, lentaba at leme Judaia diga rupot buru la diga tong li levempapaase. Diga xaape ri ne Moroa do di noxo an tempanga anan la di noxo in taxadan se dina sev amet ne Pol.

<sup>13</sup>Nedi axap diga epovo at lavanuet sangaun mo diga lok na lava-paase ri sev amet ne Pol.

<sup>14</sup>Kuren la diga vot pasa lava-maasa silok la loxongkulao silok la diga lok tidi, "Mara lok pam laxakaape saparap ne Moroa do nema axap ma noxo anan tempanga anan la ma noxo in taxadan se manaba sev amet ne Pol.

<sup>15</sup>\*Monga nemi eburu mi luvuttadi amgomgo mina lox aonon tevelinga ri leeme gomgo at limixin esep boro Rom kusu na lok taba nimi mi ne Pol. Mina xarang i dola mi vara i xusu mina ronga levelinga ruruturun mumu i. Ketla nema manaba nemen gagas go mun auret ti sev amer i, mo neni xovisi noxo rupot nade."

<sup>16</sup>Ketla lisixilik at ne Pol ga ronga mo lodoxoma gagas atdi. Kuren la ni gat pas la ga beles to xeneng ap mo loogu matmatkun la ga tong na levelinga ri ne Pol.

<sup>17</sup>Kuren la ne Pol ga ro xaka lara laasesep la ga lok tin, "Una lok ka na laau radi uto at leeme gomgo. Neni i ruuna levelinga xusu na tong i rin."

<sup>18</sup>Mo laasesep ga lam ka i uto at leeme gomgo at la ga lok, "Laradi xokoxo ne Pol i xup kaka ia la i sing ia xusu ana lam ka na laau radi ude saparav u, mila neni i ruuna levelinga xusu na tong i ru."

<sup>19</sup>Leeme gomgo ga ranga tu at lekngen la ga lam ka i uto at loxot mimila la ga sue i, "Laai mo nu u lok do una tong i ria?"

<sup>20</sup>La ni ga lok, "Leme Judaia di siam do dinaba sue u kantamak kusu una lok ka ne Pol uto saparap nedi axap luvuttadi amgomgo. Dinaba xarang i dola luvuttadi amgomgo di vara i do dina ronga levelinga ruruturun mumu i.

<sup>21</sup>Ketla nemen uta ronga res atdi, mila i vanuet sangaun la i soxope asu lenep bok mo dinaba lipe tangais i. Dira lok pam laxakaape saparap ne Moroa do di noxo anan tempanga anan la di noxo in taxadan, se dinaba sev amet ne Pol. Monga di gagas

\* 23:8: Mt 22:23 \* 23:9: Gu 25:25 \* 23:11: Gu 18:9; 19:21; 27:24; 28:16,23 \* 23:15: Gu 25:3

ti lox i, la di ngangais linga mun taram.”

<sup>22</sup> Leeme gomgo ga lok, “Nemen uta tong i na ri tara do nenu ura tong pam i ria.” La ni ga sak tiki aonon i uto.

*Leeme Gomgo Ga Lox Aonon Ne Pol Uto Saparap Ne Pelik*

<sup>23</sup> Leeme gomgo at luvuttadi esep ga ro xaka luasesep teren la ga lok tidu, “Muna lox agagas li tegepu sangaun kobot (200) luvuttadi esep la minat pas uto Sisaria, eburu mi lavanuti sangaun luvuttadi esep no dit kis at lemparos, la legepu sangaun kobot (200) luvuttadi esep mi levesoso. Mina gagas ti vas kaxat at lavasik konaleng at laxanimin.

<sup>24</sup> Mina lox agagas li bok temparos tip kip ne Pol la lempanga ren, la mina lok ka atnaasan i uto saparap laradi gomgo ne Pelik.”

<sup>25</sup> Kuren la leeme gomgo at luvuttadi esep ga malagan levelinga ga lok keretna,

<sup>26</sup> “Nenia ne Kolodias Lisias. Nia a malagan na levelinga ru laradi gomgo ne Pelik ma lok ngan-gao rino ram. Nia a lox aonon lavapaase momo ru.

<sup>27</sup> \*Leme Judaia diga ranga alis na laradi la diga lok do dina sev amer i. Agaklen ka ba i do na laradi neni lanat boro Rom. Kuren la nenia atat pas itinongo eburu mi luvuttadi esep tarak la mata lox aroo su i basinge di.

<sup>28</sup> \*Ata vara i do anaklen tinotno ua lavasuun at lumukmusak atdi rin. Kuren la nia ata lam ka i uto saparap luvuttadi amgomgo axap atdi.

<sup>29</sup> \*Nia ata long lenger i do ni xopmen toxo lok tepanga xapmek kusu ni naba met nov i xopla ana lok li i at loogu xokoxo. Lelinga dita lok li rin mumu mene Laulis Linga atdi.

<sup>30</sup> \*La lelinga i rupot tia do lentaba me Judaia mo di tong li leventaangas do ri sev amer i. Kuren la mo a lox aonon soso i udom saparav u. Aba

tong i ridi do dina lok li i at lavapaase ro melamgo ram.”

<sup>31</sup> Luvuttadi esep diga lox epovo levelinga at leeme gomgo. Diga lam ka ne Pol la diga emu eburu min ap mo laxanimin uto vaxalom at lemenemen Antipatris.

<sup>32</sup> Ap mo lara laaleng melemu, nedi luvuttadi esep mo digat pas at laxangka, digamlong uto at loogu matmatkun. Diga on basinge no limixin mi lemparos kusu dina emu mi ne Pol.

<sup>33</sup> Diga lam ka i uto Sisaria la diga raba lovoang mi levelinga loklox axasep ti laradi gomgo ne Pelik, la diga lok li ne Pol saparav i.

<sup>34</sup> Laradi gomgo ga exes mo levelinga la ga sue ne Pol do ni meva. La ni ga ronga i do neni boro Silisia.

<sup>35</sup> La ni ga lok tin, “Nia aba ronga linga ram at laaleng mo luvuttadi di lok li u at lavapaase dina rupot.” Kuren la ni ga tong i ri limixin loklok tatao do dina lok tatao ne Pol to at loogu nunuan at ne Erodes.

## 24

*Leme Judaia Diga Lok Li Ne Pol At Lavapaase*

<sup>1</sup> Melemu at lavalimo aleng lamaasa gomgo, ne Ananias gat pas uto Sisaria eburu mi lentaba at loxongkulao silok at limixin me Judaia, la lara leeme vapaase bok, laasen teren ne Tetalas. Diga ru ro melamgo at laradi gomgo ne Pelik la diga lok li lavapaase atdi ri ne Pol.

<sup>2</sup> Diga xup kaka ne Pol ukeneng ap mo loogu la ne Tetalas ga lok keretna, “Laradi silok ne Pelik! Loklok tatao ram tinama i lok li nama at langsung lumulum, la buaang lempanga loklok tooro mo nenu uga lox i ri limixin at lenep silok atnama.

<sup>3</sup> Ma lok momo aleng at na ro at lengkot axap at levenaleng getgesara, la ma tong avukat tinotno ru.

<sup>4</sup> Axo vara i do ana lox amolo u mi lempapaase rak, ketla a vara i do

\* **23:27:** Gu 21:30-33; 22:25-27 \* **23:28:** Gu 22:30 \* **23:29:** Gu 18:14-15 \* **23:30:** Gu 24:5-8

una ronga avukat na levelinga lixilik atnama.

<sup>5</sup> \*Maga long lenget ka i do na laradi i lox araut lekarakat. Ni ik paxaru kaxat levenesep to xantubu at leme Judaia no di nemen at lengkot axap at na lavatbung memen. Neni lamgomgo at loxonbinam tadi laasen teren Nasarin.

<sup>6</sup> \*Neni ga lok bok pam do na lok puvula loogu laplavang, la maga xoxo xaka i. [Maga lok do mana lok li i at lavapaase kerekngan Laulis Linga atnama i tong i.

<sup>7</sup> Ketla leeme gomgo ne Lisias eburu mi buaang limixin esep teren diga rupot pasa nama la diga lam ka i basinge nama.

<sup>8</sup> Kuren la ne Lisias ga lok tinama do maba sok taba ne Pol mi levelinga ro melango ram. Mo do una susue na laradi, nenu uba ronga i do levelinga rak i ruturun.”]

<sup>9</sup> La nedi axap leme Judaia diga lok tooro ne Tetalas ap mo lavapaase la diga tong lolos i do mo levelinga ga ruturun.

### *Pol Ga Vorang Levelinga Atdi Ro Melango At Ne Pelik*

<sup>10</sup> La ne Pelik ga lok loklok katling ti ne Pol kusu na vaase, la ne Pol ga lok, “Aklen i do nenu ugang tonga linga at na lenep silok at levenmaares buaang. Kuren la nia a momo ri vorang levelinga atdi de melango ram.

<sup>11</sup> \*Nenu xa uba long lenget ka i atdi do una sue di, do gat lasangaun mi legepura levenaleng ga xap pam, nia agat pas uto Jerusalem ti lotu saparap ne Moroa.

<sup>12</sup> Leme Judaia di goxo ven ia mi tara, do ma gita epaase musak to xeneng at loogu laplavang, kopla a gita lox axatu lodoxoma at limixin to xeneng at laraogu singising kopla to ap mo lemenemen silok.

<sup>13</sup> Ketla dixo epovo do dina lox asusu i do na levelinga atdi i ruturun.

<sup>14</sup> \*Ana tong i na ru. Nia a lotu saparap ne Moroa at lavalabat atnama keretna. A mumu asu mo langas di tong i do i xaxarang. Ketla a nunu at levelinga diga malagan i at Laulis Linga at ne Moses, la levenmalagan at lavaeme vapaase ali.

<sup>15</sup> \*Nia a doxoma voovo ri ne Moroa xerekngan bok di, di nunu do limixin axap, limixin avukat la limixin kakapmek, dinaba roo xat amlong basinge lanmet.

<sup>16</sup> \*Kuren la a lolos amisik ti ke laxakapmek la ana nemen manmanton at lemeren ne Moroa la limixin.

<sup>17</sup> \*Melemu at lentaba levenmaares aga nemen petpes basinge lemenemen Jerusalem, agat pas ugo ri xip ka lempilas tinedi limixin tarak mo dik pakes, la aga vara i do anaplavang saparap ne Moroa.

<sup>18</sup> \*Aga lox i na la aga lox epovo loklok tik lox adadat. Nedi na diga vot pasa ia ro at loogu laplavang. Goxopmen bok timixin solo diga nemen eburu minia la goxopmen bok tekarakat ap mo loxot.

<sup>19</sup> \*Ketla leme Judaia boro at lenep Asia mo diga nemen go. Ba lox avukat do nedi axa dina ru de melango ram la dina lok lavapaase, mo do di ruuna tevelinga xusu dina lok li i mavana rak.

<sup>20</sup> Kopla i epovo do na limixin na di tu de, dina tong lavanga salai diga ven i rak, aga bilinga ren ap mo laaleng nia aga tu ro melango at luvuttadi amgomgo.

<sup>21</sup> \*Nia aga tu mun at legesa vanga. Nia aga xup silok ap mo laaleng nia aga tu ro melango atdi xeretna, ‘Mi vaxaru ia at lavapaase mo lingina mila a nunu do limixin no diga met pam dinaba roo xat amlong ti lorooro.’ ”

<sup>22</sup> \*Kuren la ne Pelik, gakleklen tinotno mo langas at Leeme Silok ga lox axap mo lavapaase. Ni ga

\* 24:5: Gu 17:6    \* 24:6: Gu 21:28-30    \* 24:11: Gu 21:17    \* 24:14: Gu 24:5    \* 24:15: Jo 5:28-29  
 \* 24:16: Gu 23:1    \* 24:17: Ro 15:25-26; Ga 2:10    \* 24:18: Gu 21:26-27    \* 24:19: 2 Ti 1:15  
 \* 24:21: Gu 23:6    \* 24:22: Gu 23:26

lok tidi, “Aba ronga bok ba na levelinga melemu, la aba lok axav i, mo do leeme gomgo at limixin esep ne Lisias na rupot.”

<sup>23</sup>\*Ni ga tong i ri laradi loklok tatao at ne Pol do ni nak lok maxopok at loklok tatao at luvuttadi rutu mu. Ketla dina raba i mi tevengkonalleng tin kusu na vas tangtagap la dina siam abeles larapen tangas teren kusu dina raba i mi tempanga i epovo at lavakpakes teren.

### *Pol Ga Ru To Melamgo At Ne Pelik Mi Ne Darusila*

<sup>24</sup>Melemu at lentaba levenaleng Pelik ga rupot mi latkin teren ne Darusila, neni latkin me Judaia. Pelik ga tong mu ri ne Pol do neni na vubeles la ni ga ronga ne Pol ga paase mumu lununu at ne Iesu Karisito.

<sup>25</sup>Ketla ne Pol ga paase mumu luruptuvuk avukat, la loklok ti lok tatao avukat lodoxoma, la laaleng at ne Moroa naba lok li limixin at lavapaase. La ne Pelik ga marat aleng tinotno la ga lok, “I epovo nga. Aba ro xaka bok ba u do nia ana ruuna bok ba taaleng.”

<sup>26</sup>Pelik ga vara ri tempilas boro at ne Pol la ni ga tong i rin do ni naba soxomus asu ne Pol mo do neni na raba i mi tempilas. Kuren la ni gap kup kaka amisik ne Pol la ga paase mumu mo lempilas ti un asu i.

<sup>27</sup>\*Melemu at legepu maares gara volo, Pokias Pestas ga lok ka loxot at ne Pelik ngan laradi gomgo ap mo lenep silok. Pelik ga vara i do na lox atdan lodoxoma at leme Judaia, kuren la ni ga ke xepe ne Pol to at loogu xokoxo.

## 25

### *Pol Ga Sing Do Dina Lox Aonon I Uto Saparap Ne Kaisar*

<sup>1</sup>Pestas ga rupot go Sisaria, la melemu at lavantun aleng ga volo i, neni ga vas kaxat me go Sisaria la ga rupot to Jerusalem.

<sup>2</sup>\*Mo go lavaeme silok la luvuttadi amgomgo at leme Judaia diga lok li levelinga atdi mumu ne Pol.

<sup>3</sup>\*Diga sing lolos ne Pestas kusu na lok tavanga avukat tidi la na lox aonon ne Pol uto Jerusalem, mila diga lok li vam levelinga do dina sev amer i at loxonaleng neni na vas polo go at langa.

<sup>4</sup>Pestas ga vorang i xeretna, “Pol mo i nemen at loogu xokoxo to Sisaria, la nenia axa abamlong soso bok ugo.

<sup>5</sup>Mina riki tentaba at luvuttadi amgomgo atnimi xusu dinat pas uto Sisaria eburu minia la dina lok li lavapaase mumu mo laradi go, mo do neni gara lok pam tavanga xapmek.”

<sup>6</sup>Pestas ga nemen eburu minedi at lavanuan aleng kopla i sangaun aleng, la neni gamlong uto Sisaria. Ap mo lara laaleng melemu ni gat kis to at loxot tongtonga linga, la ga tong mu ri ne Pol kusu na beles uto xeneng saparav i.

<sup>7</sup>\*Pol ga rupot, la leme Judaia no diga vas kaxat boro Jerusalem diga ru xangkan i la diga lok li laxampaase lolos mumu i. Ketla kopmen di goxo lox asuusu i do levelinga atdi ga raturun.

<sup>8</sup>La ne Pol ga lok keretna, “Axo lok kapmek tempanga mumu Laulis Linga at leme Judaia, kopla loogu laplavang kopla at ne Kaisar.”

<sup>9</sup>\*Pestas ga vara i do na lox amomo leme Judaia, kuren la ni ga sue ne Pol, “U vara box i do unat pas uto Jerusalem la una ru ro melamgo rak e la nia ana ronga na levelinga di lok li i ram?”

<sup>10</sup>Pol ga lok, “A tu nade melamgo at loxot tongtonga linga at ne Kaisar. At na loxot mun minaba ronga linga rak. A goxo lok kapmek tempanga at leme Judaia, kerekngan nenu ukleklen avukat tinotno i.

<sup>11</sup>Dola nia agara los polo vam Laulis Linga la agara lok pam ta-

\* **24:23:** Gu 27:3; 28:16,30 \* **24:27:** Gu 25:9 \* **25:2:** Gu 24:1; 25:15 \* **25:3:** Gu 23:15 \* **25:7:** Gu 24:5-6,13 \* **25:9:** Gu 24:27

vanga xusu nia anaba met nov i, i lox avukat mene. A noxo sing do ana sixiro basinge i. Ket do na levelinga di lok li i rak kopmen na ruturun, ixo epovo do tara na song araba ia uto atdi. A vara i do una lox aonon ia uto at ne Kaisar.”

<sup>12</sup> Pestas ga epaase eburu mi limixin papaase ren la ni ga lok, “Ura sing pam do unat pas uto at ne Kaisar, kuren la nenu unaba vot pasa i.”

### *Pestas Ga Soxomus Lavapaase Mumu Ne Pol*

<sup>13</sup> Melemu at lentaba levenaleng gara volo la loorong, ne Agripa eburu mi neinen, laasen teren ne Benis duga rupot to Sisaria xusu duna ven ti ne Pestas la kusu duna vaase momo rin.

<sup>14</sup> \*Duga nemen go Sisaria at levenaleng buaang, la ne Pestas ga paase mumu ne Pol ti mo loorong keretna, “Lara laradi i nemen at loogu xokoxo, no ne Pelik ga on basinge i.

<sup>15</sup> Nia agat pas uto Jerusalem, la lavamaasa silok la loxongkulao silok at leme Judaia diga lok li levempa-paase rin la diga sing ia xusu ana lok li lumumuat teren.

<sup>16</sup> Ketla nia aga tong i ridi do nedik limixin boro Rom kopmen dik tana song araba gamasa taradi uto ri lanmet. Neni naba epen etang mi mo laradi nedu gi edak, kusu neni bok naba rongga levelinga ren la na vorang i.

<sup>17</sup> Mo luvuttadi silok diga rupot de, la nia xopmen a goxok lok sila. Ap mo mun lara laaleng melemu aga xis to at loxot tongtonga linga la aga tong i ri laradi esep kusu na lox abeles ne Pol ukeneng.

<sup>18</sup> La nedi mo limixin diga lok li i at lavapaase, diga xatu upana, kusu dina vaase. La nia aga nua i do diba sok taba i levelinga mumu taxap-mek. Ketla di goxo lox i.

<sup>19</sup> \*Diga ruuna mun levesusue eburu min mumu leventaangas at lotu atnedi la mumu bok lara laradi laasen teren ne Iesu, no gara met pam. Pol ga lok do neni mo i rooro.

<sup>20</sup> \*A goxo epovo do anaba lok ka tevelinga mumu na lavanga. Kuren la aga sing ne Pol kusu ni nat pas uto Jerusalem, la ana rongga mo lava-paase ren go.

<sup>21</sup> Ketla ne Pol ga sing do ni na nemen maxopok at loklok tatao rak nade Sisaria, la ne Kaisar axa naba rongga linga ren. Kuren la aga tong i ri luvuttadi esep kusu dina lok tatao avukar i se nia aba lox aonon i uto at ne Kaisar.”

<sup>22</sup> Agripa ga lok ti ne Pestas, “A vara i do nenia xa aba rongga linga bok ap mo laradi.”

Pestas ga vorang i xeretna, “Uba rongga linga ren kantamak.”

<sup>23</sup> \*Kuren la ap mo laaleng melemu Agripa la ne Benis duga rupot mi lisisinang avukat atdu, la limixin diga lok ngangao aleng atdu. La duga beles to xeneng at loxot tongtonga linga ua luvuttadi amgomgo at limixin esep la limixin silok ap mo lemenemen digat kis tangais i ve. La ne Pestas ga tong mu ri ne Pol la limixin esep diga lox abeles i ukeneng.

<sup>24</sup> \*Pestas ga lok, “Lorong ne Agripa, la nemi axap mik lok eburu minama. Mina ven na laradi ne Pol! Limixin me Judaia nade la boro bok Jerusalem diga raba linga ia mumu i. Diga paase lolos do ni naba met.

<sup>25</sup> Ketla a goxo vuse ka tempanga do ni ga lok kapmex i xusu ni ba met nov i. Ketla neni xa ga sing ti ne Kaisar. Kuren la nia a doma li vam i xusu ana sak tiki ne Pol uto saparav i.

<sup>26</sup> Ketla axo vuse ka tevelinga lok-lox axasep teren kusu ana malagan i uto ri leeme gomgo atdik ne Kaisar. Kuren la ana lok li i uto melamgo at-nimi la to melamgo ram, ne Agripa!

\* 25:14: Gu 24:27 \* 25:19: Gu 18:15 \* 25:20: Gu 25:9 \* 25:23: Mt 10:18; Mk 13:9 \* 25:24: Gu 22:22; 25:2,7



Kuren la, melemu at na lavapaase, aba malagan tevelinga.

<sup>27</sup> Mila ixok mokso do ana riki gamasa taradi xokoxo la xopmen tavapaase axasep ti levelinga diga lok li i ren.”

## 26

### *Pol Ga Vorang Lavapaase Ro Melamgo At Ne Agripa*

<sup>1</sup> La ne Agripa ga lok ti ne Pol, “I lox avukat do una lok lavapaase ram.”

Pol ga sep makmak di, la ga lok keretna,

<sup>2</sup> “Laradi silok ne Agripa, a vara na tong i do a lok momo mila ana lok bok lavapaase rak de melamgo ram na lingina, la ana vorang levelinga at leme Judaia diga lok li i rak.

<sup>3</sup> Anaa i ruturun mila nenu ukleken tinotno leretere la lev-enekarakat ik lok kantubu atnedi leme Judaia. A sing u, do una xis atnaasan la una rongga ia.

<sup>4</sup> Buaang atnedi leme Judaia diklen avukat lorooro rak ga vaxaru xaka i at laau rak. Diklen avukat luruvtuvuk tarak ga lok kereva to at lemenemen tarak la to bok Jerusalem.

<sup>5</sup> \*Buaang levenmaares digakleklen ia. La nanga dikleklen i do aga nemen keneng at lara libinam tadi at lotu atnama mo di mumu asu aleng Laulis Linga. Di tong nedi do lubang Parisi. Di epovo do dina tong i do na levelinga rak i ruturun, mo do di vara i.

<sup>6</sup> \*La na a tu nade at lavapaase atla a ngangais ne Moroa do ni naba lox empana laxakaape ren ga lox i ri lavalabat atdik. Na laxakaape ri lox axatu limixin basinge lanmet la dinaba vubeles at Linintoo at ne Moroa.

<sup>7</sup> La lasangaun mi legepura levenabung mixin atnama di ngangais ne Moroa xusu naba lox epovo na laxakaape ren tidi la dina lotu saporap amisix i at levenaleng axap. La mumu vam i na laxakaape, la

leme Judaia, limixin tino rak, dia lok li ia at lavapaase!

<sup>8</sup> Tila ba, i lolos aleng tinimi xusu nemi mina nunu do ne Moroa i epovo naba lox arooro amlong limixin diga met pam?

<sup>9</sup> \*Ganoxa nenia bok aga doxoma i do ana lok lempanga axap kusu ti rupe lugugu at ne Iesu boro Nasaret.

<sup>10</sup> Aga lok na lempanga ro Jerusalem la aga lok ka levelinga axasep boro at lavamaasa silok kusu ana lok li limixin buaang at ne Moroa ro at loogu xokoxo. Se diga lok do dina sev amet di, la nenia bok aga sisiam do dinap sev amet di.

<sup>11</sup> Buaang laxanaleng agak lox asongot di ro xeneng at laraogu singising, la agak lok di xusu dina sok tixirixes ne Iesu. Agak musak aleng tinotno di, kuren la agat pas bok uto vaxalom at lara menemen petpes kusu anak lox asongot nedi.

### *Pol Ga Ven Kibis Ne Iesu Ro At Langas*

*(Gu 9:1-19; 22:6-16)*

<sup>12</sup> La kerepmo agat pas uto Damasko mi lavapaase axasep boro at lavamaasa silok, diga raba ia mi lisisiam.

<sup>13</sup> Mo go mun ap mo langas ga xanangking tubu, aga ven lababao gamgames aleng, ga soosoo boro vana at laxalibet. Laxasep teren ga volo laxasep at laxangking la ga ngao pavaa ia eburu minedi luvuttadi diga emu minia.

<sup>14</sup> Nema axap maga subu ukopok at laxangka, la aga rongga laxaka at lara ga vaase lbru ria, ga lok keretna, ‘Sol, Sol! Tila uk lox asongor ia? Uk lox asongor axa u xerekngan lodongki i rubut alu mi laxangkedek teren la kerepmo i lox asongor i at loxonuna at laradi loklok tatao ren!’

<sup>15</sup> Aga sue, ‘Leeme Silok, nenu nege?’

La Leeme Silok ga lok, ‘Nia ne Iesu, mo nenu uk lox asongor ia.

<sup>16</sup> Ketla una xatu kaxat la una ru mi luxangkedek taram. Anaa, ara

vot asaxaven pam tu xusu ti soxolik ka u, i ngan lasaxaruki rak. Nenu uba tong asu na lavanga nenu u ven i rak lingina ri lentaba vetpes la lempanga bok anaba lox ase u min melemu.

<sup>17</sup> Anaba lox asepsu u basinge limixin me Judaia la basinge bok limixin kopmen di me Judaia, nia anaba riki u saparap di.

<sup>18</sup> \*Nenu uba suang lodoxoma atnedi la uba sat kaka nedi basinge lamain at ne Satan uto at laxasep at ne Moroa, la basinge lolos at ne Satan uto saparap ne Moroa, kusu dina nunu rak. La kerepmo ne Moroa naba doxoma xepe leveloklok kakapmek atnedi la dinaba ruuna ka loxot tidi xantubu ap mo limixin soksoxolik at ne Moroa.’ ”

#### *Pol Ga Vaase Asu Lugugu Ren Ngan Laradi Vavang*

<sup>19</sup> Pol ga lok bok tidi, “Kuren la laradi silok ne Agripa, a goxo ronga xepe mo lisilimet aga ven i boro vana at laxalibet.

<sup>20</sup> \*Aga vavang avot to Damasko la to bok Jerusalem, la melemu bok to at lengkot axap Judaia, la kantubu bok at limixin kopmen di me Judaia. Aga vavang do dina leeng basinge laxakapmek atnedi la dina mumu asu ne Moroa la dina lok lempanga ri lox asuusu i do dira leeng pam.

<sup>21</sup> \*Lavasuun mun at nai la leme Judaia diga ranga alis ia ro at loogu laplavang, la diga lok do dina sev amer ia.

<sup>22</sup> Moroa ga lok tooro aleng ia ise at na laaleng lingina. Kuren la nia a ru nade, a tong asu levelinga ruturun tinemi axap, limixin silok la limixin kopmen tevenasen silok atdi. La na levelinga rak nia a tong asu i, i epovo mi levelinga at lavaeme vapaase ali la ne Moses, nedi diga tong i do na lempanga naba vot.

<sup>23</sup> \*Diga tong i do Lanarong naba xip losongsongot la neni lara avot

naba roo xat amlong basinge lanmet, kusu ti vaase asu langas ti lok ka lorooro ri leme Judaia la ti limixin kopmen di me Judaia.”

<sup>24</sup> Pol move ga paase la ne Pestas ga xup tin keretna, “U baulang nom, ne Pol! Langsangan lakleklen taram i lox u la ura baulang!”

<sup>25</sup> Pol ga vorang i rin keretna, “Leeme silok! Nia xopmen ana baulang. Na levelinga rak i ruturun la ik mokso.

<sup>26</sup> \*Loorong ne Agripa! Ana vaase ru mi lolos la kopmen a noxo marat, mila nenu u xasep at na lempanga mumu ne Iesu. Nia a lok do nenu u xasep at na lempanga axap, mila na lempanga xopmen goxo ravasu ro at toxot lipe.

<sup>27</sup> Kereva, u nunu at levelinga at lavaeme vapaase ali? Aklen i do nenu u nunu xuren!”

<sup>28</sup> Agripa ga lok ti ne Pol, “Kereva, at na mun loxonaleng u lok do una lox ia ngan laradi nunu?”

<sup>29</sup> Pol ga lok, “At na loxonaleng koplaxonaleng melemu, lisingising tarak ti ne Moroa do nenu la nedi axap nom ding tonga ia mo lingina, dinaba nunu at ne Iesu xerekngan ia, ketla di noxo nemen ngan laradi xokoxo ngan ia.”

<sup>30</sup> La ne Agripa, la laradi gomgo ne Pestas, la ne Benis, la nedi bok lentaba vetpes diga xatu kaxat.

<sup>31</sup> \*La diga vas su la diga lok tinedi getgesara xeretna, “Na laradi ixo lok kapmek tepanga xusu ni naba met nov i xopla na nemen at loogu xokoxo.”

<sup>32</sup> \*La ne Agripa ga lok ti ne Pestas, “I epovo xusu ata lox asu na laradi mo do ni xopmen goxo sing ti ne Kaisar kusu na ronga linga ren.”

## 27

### *Limixin Esep Diga Lok Ka Ne Pol Uto Rom*

\* 26:18: Ais 35:5; 42:7,16; Ep 2:2; Kl 1:13; Gu 20:32

\* 26:23: Lu 24:44-47; 1 Ko 15:20

\* 27:1: Gu 25:12

\* 26:20: Mt 3:8

\* 26:21: Gu 21:30-31

\* 26:31: Gu 23:29; 25:25

\* 26:32: Gu

1 \*Lavaeme silok diga tong li levelinga rinama xusu mana sen kaxat mi lavatmon uto Itali at lemenemen silok Rom. Diga lok ka ne Pol la lentaba limixin kokoxo bok uto saparap ne Julias, neni laasesep at limixin esep boro Rom. Diga tong nedi do, "Limixin esep at ne Kaisar."

2 \*Nema mi ne Pol maga los kas at lavatmon boro Adramatiam, mo ga gagas kusu na sen kaxat uto at levesoolom at lenep silok Asia, la maga sixit kaxat. Aristakas, neni boro Masadonia at lemenemen Tesalonia, neni ga emu eburu minema.

3 \*Ap mo lara laaleng melemu maga rupot to Sidon. Julias gak lok loklox avukat aleng ti ne Pol la ni ga siam ti ne Pol kusu ni nat pas la na ven larapen tangas teren, kusu dina raba i mi levempanga salai neni gak pakes tin.

4 Maga sen kaxat basinge mo lenep, la maga sesen uto melemu ap mo losoxan Saipras kusu lamanman noxo mas tangarang lavatmon.

5 Maga volo laras saparap lenep Silisia la Pampilia, la maga vot to Mira at lenep Lisia.

6 Mo go laasesep ga rongga i do lara lavatmon boro Aleksandria mo ga lok do na sen kaxat uto Itali. Kuren la ni ga lox aurut nema uto vana ren.

7 Maga sesen sila at laxanaleng buaang, ga lolos aleng tinama xusu mana sesen saparap lemenemen Kinidas. La ma goxo lox epovo i xusu mana mu mo lenep tas mumu langangan lamanman. Kuren la maga sesen epopolo uto melemu at losoxan Krit, maga volo lungusungus laasen teren Salmoni.

8 Maga sesen auret tinotno ro loxon, la lavatpas ga lolos aleng. Ketla maga vot to at lara loxot diga tong i do Losoolom Avukat. Goxo vaxalom bok boro at lemenemen silok Lasia.

9 Maga nemen at lentaba levelinga mo go, ga lolos tinotno rinama ri sen mi lavatmon, mila leven

gaaing at lamanman ga rupot pam la laras ga tepit aleng. Laaleng at ne Moroa ti mun anan no gara volo vam, neni laaleng ga lok katling laxakatu kaxat at leven gaaling at lamanman. Kuren la ne Pol ga vaase aronga di. Ni ga lok keretna,

10 \*"Nemi limixin, a ven i do lavatpas atdik mede la uto, naba lok kapmek tinotno. Langangan lumumuat naba vot saparap lempanga atdik la ti lavatmon bok, la ti lorooro bok atdik."

11 Ketla laasesep ga mumu asu levelinga at laradi gang tanga lisitia ap mo lavatmon la at laradi gam gomgo ap mo lavatmon, la kopmen ni goxo nunu at levelinga at ne Pol.

12 Mo losoolom kopmen goxo lox avukat tinama xusu mana nemen teren ap mo leven gaaling at lamanman. Kuren la buaang atnedi diga lok do dina sen kaxat mi lavatmon la dina sen epopolo uto Pinisia mo do dina epovo. Ni lara losoolom to Krit ga nemen alipe at lamanman la diba nemen go at leven gaaling at lamanman.

#### *Langangan Lamanman Ga Rupot To At Laras*

13 Lamanman kakalik borou ga mas kaxat, la limixin diga lok do naba lox avukat mun mo lavatpas atnedi. Kuren la diga rep aurut laaga la diga sen auret tinotno ro loxon at losoxan Krit.

14 Ketla soso mun mo lamanman lolos ga mas kaxat boro at losoxan. Limixin diga so asen mo lamanman mi lamanman silok borois mero xopok.

15 Ga mas lolos mo lavatmon la lavatmon goxo epovo xusu na sixit tangarang mo lamanman. Maga molo ri lok tong pen i la maga ke xepe i la lamanman gat mas aonon lavatmon atnama.

16 Maga sesen alipe ro melemu ap mo losoxan kakalik, laasen teren Koda. Ga lolos aleng kusu mana lok li avukat lese pang kakalik mo maga sasar i go melemu at lavatmon.

\* 27:2: Gu 19:29 \* 27:3: Gu 24:23 \* 27:10: Gu 27:22

17 Maga xip aurur i la maga dos alis lavatmon mi lempatkua. Diga marat aleng mila lavanga dina sixit mavana at laxangkaneng to at lenep Libia la lavatmon na reporok. Kuren la diga lox asi laaga ap mo lavatmon la maga ke lavatmon, lamanman gat mas aonon gamasa i.

18 Mo langsung lamanman ga lolos aleng tinotno. Kuren la ap mo lara laaleng melemu diga lok kaxar i xusu dina lu asi mi lempanga go vana ap mo lavatmon ukopok ti laras.

19 La ap mo manga lara laaleng melemu diga lu asi mi lempanga gugu ap mo lavatmon.

20 Buaang laxanaleng ma goxo ven laxangking mi laxampenti. La lamanman mo gat mas lolos aleng, maga nua i do nema axap ma noxo roo su.

21 La buaang laxanaleng mo limixin di goxo anan la ne Pol ga ru ro melango atdi la ga lok, "Nemi loxongkulao, nemi mi goxo mumu asu levelinga rak la taga sen kaxat boro Krit. Do mi gita ronga res tarak, dik gixo ekip tangarang mi na lumumuat.

22 \*Ketla na a sing nimi do mina lolos! Kopmen teta atnimi naba met. Ketla lavatmon kusuk mun naba lok kapmek.

23 Nia aklen i na mila at laxanimin laangelo boro at ne Moroa no nenia aterena la a lotu saporav i, i vot pasa ia.

24 \*La i lok tia xeretna, 'Pol! Nemen uta marat gat. Unaba tu ro melango at ne Kaisar, la ne Moroa i balamu nimi la i siam pam do nedi axap at lavatmon dinaba roo su.'

25 Kuren la nemi limixin mina lolos mila nia a nunu at ne Moroa do ni naba lox epovo lempanga xerekngan ni i tong pam i ria.

26 \*Ketla lamanman naba rev aoso lavatmon uto loxon at lara losoxan."

27 At laxanimin at laaleng sev asangaun mi lavanuet at lamanman gap

kiv aonon nema ro at laras Adaria. At laxanimin tubu luvuttadi loklok tatao ap mo lavatmon diga nua i do nema mo maga sesen auret ta uto loxon.

28 Kuren la diga lu asi mi luxua, losoxovo ga nemen teren la maga long lenger i do mo laras ga epovo at legesa sangaun kobot mi legepu sangaun (120) lababaalom teren ukopok. Melemu xakalik diga soxovo manga i la diga long lenger i do ga vasik sangaun (90) lababaalom teren ukopok.

29 Diga marat aleng mila lavatmon naba ebaa ro at laxanuat. Kuren la diga lox asu lavanuet lemparaga ro melemu at lavatmon la maga sing kusu laxangking na losu.

30 Luvuttadi loklok tatao ap mo lavatmon diga lok do dina sixiro basinge lavatmon. Diga lox asi lesepang kakalik uto xopok at laras la diga lok poovo i do dina lok li laxanaga ro melango ap mo lavatmon.

31 \*Ketla ne Pol ga lok ti laasesep eburu mi limixin esep keretna, "Mo do na luvuttadi loklok tatao di noxo nemen de vana at lavatmon, nemi xopmen mi noxo roo su."

32 Kuren la limixin esep diga ra korop luxua no gang tanga mo lesepang lixilik la ni ga sen su basinge di la uto nga.

33 Laxangking mo ga lok do na losu nga, la ne Pol ga sing nedi axap kusu dina an tempanga anan. "Migak lok bukbulu la miga nemen gamasa at lasangaun mi lavanuet aleng ta, la at na axap levenaleng mi goxo anan tempanga anan.

34 \*A sing nimi, do monga mina an tempanga anan. Mik pakes tin kusu kopmen tara atnimi noxo met la kopmen tara atnimi noxo seeve."

35 \*Melemu at na lavapaase ren, Pol ga lok ka lengkongkide, la ga tong avukat ti ne Moroa ro melango atnedi axap, la ga sebex i la ni ga an kaxat.

\* 27:22: Gu 27:10,31 \* 27:24: Gu 23:11 \* 27:26: Gu 28:1 \* 27:31: Gu 27:22 \* 27:34: Mt 10:30 \* 27:35: Mt 15:36; 1 Ti 4:4-5

<sup>36</sup> Diga lok ka lolos at levelinga at ne Pol, la nedi getgesara bok diga an bok lempanga anan.

<sup>37</sup> Leexes atnama ga epovo at leg-epu sangaun kobot mi lavanuti sangaun mi lavanna (276) mo maga nemen go vana at lavatmon.

<sup>38</sup> Melemu atnedi diga an mais, diga lu asu mi laxampiao uto xopok ti laras kusu lavatmon naba balalak.

<sup>39</sup> Laxangking ga losu la luvuttadi loklok tatao ap mo lavatmon di goxo ven kibis mo losoxan. Ketla diga ven lara losoolom mi laxangkaneng teren la diga doxoma i do, mo i epovo, diba sen oso mi lavatmon atdi uto at laxangkaneng.

<sup>40</sup> Kuren la diga ra korop asu lemparaga la diga ke nedi diga dong si ukopok at laras. La ap mo mene loxonaleng diga soxomus lara kua no diga xoxo alis mo lisitia min. Diga lox aurut labantamon to melango at lavatmon kusu lamanman naba mas aonon lavatmon, la na sen epopolo uto loxon.

<sup>41</sup> Ketla lavatmon ga so ru ro mavana at laxangkaneng, la ga xis tino nga, no melango at lavatmon ga ebaa la goxo epovo ri sen bilong uto melemu la lara paxanao ga saava vovorok axakalik mo lavatmon.

<sup>42</sup> Limixin esep diga lok lodoxoma xusu ti sev amet luvuttadi xokoxo, kusu di noxo box oso uto loxon la dina sixiro.

<sup>43</sup> Ketla laasesep ga vara i xusu na lox arooro ne Pol, kuren la ni ga vaase vepe di do nemen di guta lox i mo. Ni ga tong i rinedi digakleklen ti xobok kusu dina losu boro at lavatmon la ukopok la dina box oso uto loxon.

<sup>44</sup> \*La nedi di goxo epovo ri xobok, diba mumu mi lengkonuna ga tepovorok ap mo lavatmon. La kerepmo nema axap maga rupot avukat to loxon.

## 28

### *Pol Ga Nemen To Malta*

<sup>1</sup> Maga rupot avukat go loxon, la maga long lenger i do mo losoxan laasen teren Malta.

<sup>2</sup> \*Limixin me go diga lok tooro avukat nama. Larakabu mo ga vot kaxat la maga mudut aleng tinotno. La diga xip kaka lengkumut la diga mas antos laxao la diga lox avukat tinotno nama.

<sup>3</sup> Pol ga lok ka lengkonuna la ga lok li i ro at laxao la lara lisii ga sixisu ukamang, basinge lengkonuna mumu liplivi ap mo laxao la ga at avarang at lekngen ne Pol.

<sup>4</sup> Limixin ap mo losoxan diga ven mo lisii ga merem to at lekngen ne Pol la diga lok tinedi getgesara xeretna, "Na laradi neni laradi sepsev amet tadi, kuren la ne Moroa noxo lox arooro i, keke i do ni goxo seeve ro at laras."

<sup>5</sup> \*Ketla ne Pol ga semla xepe mo lisii uto at laxao la tavanga xapmek goxo rupot saparav i.

<sup>6</sup> \*Diga ngangais mo lekngen ne Pol do naba dang kaxat kopla neni na subu la na met. Ketla melemu diga ngais babaalom aleng la kopmen di goxo ven tepanga xakapmek ga vot saparav i. Kuren la diga ba gili lodoxoma atdi la diga lok, "Neni lomoroa."

<sup>7</sup> Goxo vaxalom at langkolonu at laradi silok ne Pabilias, neni laradi gomgo ap mo losoxan. Ni ga lok tooro aleng nama, la at lavantun aleng maga nemen ngan lavaose ro at loogu ren.

<sup>8</sup> Temen ne Pabilias mo gak midi at loora, ni gak meres aleng mi liplivi la lebelen dedele. Pol ga beles uto xeneng at loogu ren, ga sing, la ga lok li lukngen to mavana ren, la ni ga lox avukat ta.

<sup>9</sup> Mo limixin diga ven i na la diga lok ka bok nedi limixin mekmeres me go ap mo losoxan uto saparap ne Pol la ni ga lox aroo nedi.

<sup>10</sup> Diga lok ngangao aleng atnema la diga raba nema mi buaang leven-tamtaba. Melemu at lavantun gaaling ga auret do mana sixit kaxat mi

lavatmon la diga lok li lempanga ri-nama ro vana at lavatmon, diga raba nama mi lempanga ri mo lavatpas atnema.

*Pol Ga Vas Kaxat  
Boro Malta Uto Rom*

<sup>11</sup> Maga nemen go at lavantun gaaling la maga sen kaxat mi lavatmon boro Aleksandria, laasen teren, "Luxalaisang Moroa." Mo lavatmon ga nemen go ap mo losoxan at leven gaaling at lamanman.

<sup>12</sup> Maga rupot to at lemenemen silok Sirakus la maga nemen go at lavantun aleng.

<sup>13</sup> Maga sen kaxat manga me go la maga rupot to at lemenemen Regiam. Ap mo laaleng melemu lamanman avukat ga vot, la ap mo manga lara laaleng melemu maga rupot to at lemenemen Putioli.

<sup>14</sup> Maga long lenget lentaba luvuttadi nunu mo go la diga sue nama xusu mana nemen eburu minedi at lavanuti aleng. La magak lox amisix i xuren at lavatpas atnama uto Rom.

<sup>15</sup> Luvuttadi nunu ro Rom diga ronga i do nema maga vot la digat pas epolo uto at lenep etang at ne Apias la uto at lemenemen laasen teren Lavantun Laraogu kusu ti ekip tangarang minama. Pol ga ven di la ga tong avukat ti ne Moroa la lodoxoma ren ga lolos ba.

*Pol Ga Ekip Tangarang  
Mi Leme Judaia Ro Rom*

<sup>16</sup> \*Maga rupot to Rom, la diga siam do ne Pol na nemen kusuk la lara laradi esep na lok tatao i.

<sup>17</sup> \*Melemu at lavantun aleng Pol ga xup bubua ka luvuttadi amgomgo at leme Judaia. Diga rupot buru, la ne Pol ga lok tinedi, "Luvutnetak! A goxo lok tepanga xapmek mumu limixin atdik kopla leretere at lavalabat atdik. Ketla diga lok li ia at loogu xokoxo ro Jerusalem la diga song araba ia uto at limixin me Rom.

<sup>18</sup> \*Diga susue ia la diga lok do dina soxomus asu ia, mila diga long lenger i do nia xopmen a goxo lok kapmek tepanga xusu nia aba met nov i.

<sup>19</sup> \*Ketla leme Judaia di goxopara i do dina soxomus asu ia la nia aga sing kusu uto ia at ne Kaisar kusu na ronga linga rak. Nia aga lox i nom ketla nia a goxo lok li tevempapaase mumu rinedi mo limixin me Judaia.

<sup>20</sup> \*Kuren la aga sing kusu ana ven nimi la ana epaase eburu minimi. Nia a nemen at loogu xokoxo mila a nunu at Lanarong, mo nedik limixin me Judaia ta nemen tangais i."

<sup>21</sup> Diga lok tin, "Maxo ruuna tevelinga loklox axasep boro Judaia mumu u, kopla tara atnema me Judaia ga laa me go mi tevelinga, kopla gita tong tevelinga xapmek mumu u.

<sup>22</sup> \*Ketla ma vara i do mana ronga levelinga ram, mila ma ronga i do at lengkot axap limixin di paase mumu nom libinam tadi nenu uk lok teren."

<sup>23</sup> Kuren la diga lok katling lara laaleng eburu mi ne Pol, la buaang limixin diga vot ap mo laaleng to ap mo loogu ne Pol ga nemen teren. Ga maxantamak suubu se at laxanimin neni ga soxomus lavasuun at levelinga at Linintoo at ne Moroa rinedi. Ni ga lok tong pen i do na sat ka lodoxoma atdi mi levelinga ma xeneng at Laulis Linga at ne Moses la levenmamalagan at lavaeme vappaase ali xusu dina nunu at ne Iesu.

<sup>24</sup> Lentaba atnedi diga nunu at levelinga ren, ketla lentaba xopmen di goxo nunu.

<sup>25</sup> \*Kuren la diga vas kaxat basinge i mila levendoxoma atnedi ga ekarakat melemu at levelinga at ne Pol. Ni ga tong i ridi xeretna, "Loroonan Kaala ga vaase ruturun at lungusno at leeme vappaase ali ne Aisaia tinedi lavalabat atnemi.

<sup>26</sup> Ni ga lok,  
'Una vot pasa nom limixin la una lok tinedi keretna, Mibang tonga,

\* 28:16: Gu 24:23 \* 28:17: Gu 25:8 \* 28:18: Gu 26:31 \* 28:19: Gu 25:11 \* 28:20: Gu 24:15; 26:6-7 \* 28:22: Gu 24:14 \* 28:25: Mt 13:14

ketla mi noxo xasep teren.  
Miba reven, ketla mi noxo ven  
kisiv i.

<sup>27</sup> Mila levendoxoma atnedi na limixin ira rebonot pam, dira lok pe vam levenbaalung atnedi. La dira vampe vam levengkatli atdi. Do dina ven mi levengkatli atdi, la dina rongga mi levenbaalung atdi, la levendoxoma atdi nakleklen, la dina rem gili saparav ia, la nia ana lox avukat nedi.’” *Ais 6:9-10*

<sup>28</sup>\*La ne Pol ga lok bok, “Minaklen avukar i do, levelinga loklox arooro at ne Moroa diga lox aonon pam i uto at limixin kopmen di me Judaia. Dinabang tonga i.”

<sup>29</sup> [Melemu at ne Pol ga tong i na, leme Judaia diga on basinge i, la diga epaase mukmusak aleng kantubu atdi.]

<sup>30</sup>\*Ga legepu maares Pol ga nemen mo go ap mo loogu neni ga unun amisix i, la gak lok momo aleng tinedi digat pot pasa i.

<sup>31</sup>\*Ni ga vavang mi Linintoo at ne Moroa la ga vanasa bok mi laasen at Leeme Silok, ne Iesu Karisito la kopmen tara goxo ru pe lugugu ren. Ni ga paase mi lolos la kopmen gita marat.

---

\* **28:28:** Sam 67:2; Lu 3:6; Gu 13:46; 18:6    \* **28:30:** Gu 28:16    \* **28:31:** Gu 28:23

**Rom**  
**Lovoang At Ne Pol Ti**  
**Limixin Nunu to Rom**  
**Levelinga Loklox**  
**Axasep**  
**Lamaares 58 A.D.**

Anai ni lovoang at ne Pol ga malagan i rinedi limixin nunu diga nemen to Rom. Pol gak lok to Korin la ni ga malagan na lovoang, la melemu neni ga raba lara loono min, laasen teren ne Poebe. Neni ga xip ka na lovoang uto at lemenemen silok Rom gak lok at lenep silok Itali. Ap mo levenmaares lara laradi mo gat kis sisilok ti limixin to Rom diga so asen i do ne Kaisar. Amo lemenemen ni lemenemen silok.

Pol ga vara i xusu na lox ase dik do nedik axap limixin ata gara xapmek pam at lemeren ne Moroa, la ixo epovo do nedik ataban manton at leven gugu atdik koplal leveloklok nunuan atdik. Mo dola nedik ata nunu mene at ne Iesu Karisito, Moroa naba lox asepmus nedik basinge laxakapmek atdik la neni naba doxoma xepe laxapmek atdik. Pol ga vara i xusu neni nat pas uto Rom la nak lok go mi levempavang teren. Mo limixin nunu lentaba atnedi, boro Judaia la lentaba atnedi, nedi limixin Grik.

**Lengkot silok keneng at na lovoang**

*1:1-17* Lavasuun teren la ne Pol ga malagan i na lovoang.

*1:18-3:20* Kopmen teta naba lok ka lorooro avolo mi lolos axa ren.

*3:21-4:25* Lavaturunen ti lok ka lorooro avolo ni lununu mun.

*5:1-8:39* Lixitkis la lavatpas atnedi di lok ka lorooro maxat.

*9:1-11:36* Moroa naba ro ka amu manga limixin me Israel.

*12:1-15:13* Lorooro at laradi nunu.

*15:14-16:27* Lavapaase momo la levelinga loklox axap.

*Lavapaase Axasep*

<sup>1</sup> \*Nenia ne Pol, lasaxaruki at ne Iesu Karisito, la nia lun pavang. Moroa ga soxolik ka ia la ga ro ka ia xusu ana vavang mi Lagale Lavavang teren.

<sup>2</sup> \*Na Lagale Lavavang ne Moroa ga vaase ali min ganoxa at levenngusno atdi lavaeme vapaase ali ren, la diga malagan li i xeneng at Lovoang Kaala,

<sup>3</sup> \*mumu ne Nitna ni Leeme Silok atnedik ne Iesu Karisito. Ni ga nemen ngan laradi mede at na lavatbung menemen, diga visik ka i at livipisik li at ne Devit.

<sup>4</sup> \*Ti loklok teren gan manton tino, ne Iesu ga lok kaka laasen do Nitna ne Moroa at loxonaleng ni ga roo xat amlong basinge lanmet mi langsgan lolos teren.

<sup>5</sup> \*Keneng mun at ne Iesu la ti lox aurut laasen teren, Moroa ga raba ia mi letaba nabalamu ren kusu nia ana ru katling i ri lok lugugu ngan laradi vavang at ne Karisito. La ana sasar asu ka limixin boro xamang at limixin kopmen di me Judaia, kusu dinaba nunu ren la dinang tonga res teren.

<sup>6</sup> La nemi bok limixin dom Rom, ne Moroa gara ro xaka vam nimi ri ne Iesu Karisito.

<sup>7</sup> \*Nia a malagan na levelinga rinemi axap mi nemen dom Rom. Moroa i balamu nimi la ga ro xaka nimi do nemi limixin axa ren.

Letaba nabalamu la lenmila rinimi boro at ne Moroa ne Temen nedik, la Leeme Silok ne Iesu Karisito.

*Lisingising Ti Tong Loklox Avukat*

<sup>8</sup> \*Avot be, nia a tong loklox avukat ti ne Moroa rak keneng at ne Iesu Karisito rinemi axap, atla limixin at lengkot axap at na lavatbung menemen di rongal levelinga mumu nom lununu atnemi.

\* **1:1:** Gu 9:15; 13:2; Ga 1:15    \* **1:2:** Ro 16:25-26; Ta 1:2    \* **1:3:** Mt 22:42; Ro 9:5; 2 Ti 2:8    \* **1:4:** Gu 13:33    \* **1:5:** Gu 26:16-18; Ro 15:18; Ga 2:7-9    \* **1:7:** Kex 6:25-26; 1 Ko 1:2; 2 Ko 1:1; Ep 1:2  
 \* **1:8:** 1 Ts 1:8



<sup>9</sup> \*Moroa nia a gugu rin mi lorooro axap tarak, la nia a vavang mi Lagale Lavavang at ne Nitna. Neni iklen i do na levelinga rak i ruturun aleng do nia am doma amisik nimi,

<sup>10</sup> \*keneng at levesingising tarak at levenaleng axap. Nia a ngising ne Moroa dola lodoxoma ren kuren, neni naba suang langas tia xusu anaba vot saparap tinotno ba nimi dom.

<sup>11</sup> Nia a vara aleng i do nia anaba ven nimi la ana raba nimi mi leveloklok tooro at Loroonan at ne Moroa ri lox alolos nimi.

<sup>12</sup> Nia a doma i do dik atanaba elok tooro ela. Nemi minaba lox alolos ia mumu lununu atnemi la nenia anaba lox alolos nemi mumu lununu rak.

<sup>13</sup> \*Luvutnetak mi luvurinu. Nia a vara i do mina xasep nunuan. Buaang laxanaleng nia agam doma i do anat pot pasa nimi, ketla lentaba lempanga ga tupe ia. Nia a vara i xusu ana vavang dom atnemi xusu teventaba dinaba nunu bok, kerekngan ia aga lox i ro at lengkot petpes kantubu at limixin kopmen di me Judaia.

<sup>14</sup> Nia a ruuna lugugu silok anaba lox i ri limixin axap, ti leme Grik la tinedi bok limixin petpes, ti limixin akleklen la tinedi bok kopmen takleklen solo atnedi.

<sup>15</sup> Kuren la lodoxoma rak iplivi aleng, kusu ana vavang tinemi bok limixin mi nemen dom Rom.

### *Lolos At Lagale Lavavang*

<sup>16</sup> \*Nia xopmen ana lok mamanan ti vavang mi Lagale Lavavang, atla ni lolos at ne Moroa ri lox arooro nedi axap di nunu, leme Judaia avot la melemu rinedi limixin kopmen di me Judaia.

<sup>17</sup> \*Atla Lagale Lavavang i lox asusu i do ne Moroa ik lox anmanton limixin mi legesa ngas mene nga, neni lununu la kopmen tangas

petpes bok ba, kerekngan Lovoang Kaala i tong i xeretna,

“Laradi ip sep sogo at ne Moroa mi lununu ren, ni naba roo su.”

*Abk 2:4*

### *Loklok Kakapmek At Limixin*

<sup>18</sup> \*Moroa ira lox axasep pam i ri limixin axap dola neni ixot kis epen mi leveloklok kakapmek at limixin, atla nom loklok kakapmek atnedi i sasar angtang kaka di basinge luruturun at ne Moroa. Kuren la ni naba lox asi nom lebelemamao ren ti sev asongot di.

<sup>19</sup> \*Moroa i lox asongot di atla di xasep nunuan pam ap mo leveloklok teren ni i lox axasep di min. Moroa xa i lox axasep di min,

<sup>20</sup> \*ga ru xaka i gano ne Moroa ga rudum li na lavatbung mennen, mo loklok eburu mi lolos lexen teren i nemen amisik. Limixin kopmen dina epovo na ven mo lolos eburu mi loklok teren, ketla di ven kakasep kaka i at levempanga ne Moroa ga rudum li i. Kuren la kopmen tevelinga atdi ri lox asepsu di basinge lebelemamao at ne Moroa.

<sup>21</sup> \*Digaklen ne Moroa, ketla digoxo emi asu min kopla digita tong loklox avukat tin. Levendoxoma atnedi ga rebonot axap, la levendoxoma rangtangu atnedi ga umsu mi lubuxumin.

<sup>22</sup> \*Diga lok do nedi luvuttadi leklen. Ketla xopmen, nedi luvuttadi baulang mene.

<sup>23</sup> \*Kopmen di goxo lotu saparap ne Moroa ruturun i rooro amisik. Ketla diga lotu saparap laxampoovo at luvuttadi mede xopok, la lavapixa eburu mi levempanga dit pas mi lavanuet kangkedek, kopla lempanga ngan laxangkavu.

<sup>24</sup> \*Mo limixin digang tangku xerepmo, kuren la ne Moroa ga ke xepe di ri lok leveloklok kakapmek

\* **1:9:** Ep 1:16; Pl 1:8; 1 Ts 2:5,10 \* **1:10:** Gu 19:21; Ro 15:23,32 \* **1:13:** Gu 19:21; Jo 15:16 \* **1:16:** Sam 119:46; Mk 8:38; 1 Ko 1:18-24; Gu 13:46 \* **1:17:** Ro 3:21-22 \* **1:18:** Ep 5:6; Kl 3:6; 2 Ts 2:12 \* **1:19:** Gu 14:15-17; 17:24-28 \* **1:20:** Jop 12:7-9; Sam 19:1; Ib 11:3 \* **1:21:** Ep 4:17-18 \* **1:22:** Jer 10:14; 1 Ko 1:20 \* **1:23:** Lal 4:15-19; Sam 106:20 \* **1:24:** Gu 14:16

maxamang at lixitkis epot ngan diga vavara rin. La i lok ngan bok pam nedi eburu diga lok lengkot mamangan la diga lox abilinga labantuxu atdi.

<sup>25</sup> \*Diga lox ekun luruturun at ne Moroa mi laxaxarang. Diga lotu saparap levempanga ne Moroa ga rudum li i, la diga domampe laradi runtudum kusu dina lotu saparav i. Leemi asu amisik tin la kopmen tekavaxap teren. Tuturun.

<sup>26</sup> Limixin diga lox asu i mo loklok, kuren la ne Moroa ga ke xepe di ri mo leveloklok i lox asuusu langsung lainmangan. Lavakin bok diga velongka, na ixo epovo do dina lox i.

<sup>27</sup> \*La lavatlok bok kuren di goxopara nak midi eburu mi lavakin, la levendoxoma atnedi ga ngaongao xa ridi. Lavatlok diga lok levempanga mun mamangan, kuren la livipisik teren do diga ruuna ka levesongsongot ga epovo mi nom loklok kakapmek atnedi.

<sup>28</sup> La limixin di goxopara i do dinam tebeng lakleken tuturun mumu ne Moroa. Kuren la ni ga ke xepe di ri mumu asu levendoxoma atdi xa i ekarakat, kerepmo la dik lok levempanga ixo epovo do dina lox i.

<sup>29</sup> Di umsu mi laxanasen kakapmek axap, i ngan lodoxoma xapmek, loklok ti belegao, la loklok kakapmek maxamang at lixitkis epot. Lorooro atdi i umsu mi loklok ngaongao ri lempanga at lentaba vetpes, di esev amet, di esep, di lok levenekarakat, di babala vukpuk, di doma xakapmek amisik ti leventaba vetpes, la di tere mumu.

<sup>30</sup> Di lox asi limixin mi levelinga, di belangatngas ti ne Moroa, di ekilu, dim simi di la dit las di, la di doma xaka bok leventaangas petpes ti lok laxakapmek, kopmen dina rongares at luvuttemen di mi luvutnen di.

<sup>31</sup> Kopmen dina ruuna tevendoxoma avukat, kopmen dina doma

xatling levelinga atnedi, la kopmen dina lox asuusu labalamu ela, la lox-okok ti lemet atdi.

<sup>32</sup> Diklen i do Laulis Linga at ne Moroa i tong i do limixin di mumu asu na leventaangas, dinaba seeve. Ketla move dik lok na leventaangas la di momo mun midi limixin petpes ua di lok mo langas.

## 2

### *Moraa Naba Ven Mumu Loklok At Limixin Axap*

<sup>1</sup> \*Nemi limixin, ixo epovo do mina viila mumu loklok at leventaba vetpes mila nemi mixo sepsu ap mo lev-eloklok kakapmek kerekngan nedi di lox i. Dola mi ila mumu loklok atnedi, la do mi lok bok nom levempanga di lox i, mi lok li xa lumumuat atnimi.

<sup>2</sup> Nema maklen i do ne Moroa in manton tino dola ni i ila mumu loklok at limixin di lok na leventaangas kapmek.

<sup>3</sup> Ketla nemi bok mi lok nom levempanga, no nemi mi viila mumu di min. Kereva, mi doma i do nemi limixin mun minaba sepsu at loklox asongot at ne Moroa?

<sup>4</sup> \*Kopla mi doma abalalak mene nom langsung labalamu ren, mi loklok mulus teren la kopmen ni noxo ila mumu soso loklok atnimi. Tuturun miklen i do ne Moroa i lox avukat, atla ni i vara i do mina ven kisiv i nom la mina leeng.

<sup>5</sup> Ketla levendoxoma atnemi i rebonot la mi xopara na leeng. Kuren la mi lox asilok nom loklox asongot tinemi ap mo laaleng ne Moroa naba ila mumu loklok at limixin la na lox asu lebelemamao ren ti lasaxaven.

<sup>6</sup> \*"Moraa naba raba unun ti legetgesara mumu xa levempanga ni ga lox i." *Sam 62:12*

<sup>7</sup> \*Leventaba at limixin dik lox amisik leveloklok i nunuan, kerepmo di puse ri lisisixam mi lisiinorong la lorooro nunuan. Ne

\* **1:25:** Jer 13:25; 16:19; Ro 9:5    \* **1:27:** Mas 18:22; 20:13; 1 Ko 6:9    \* **2:1:** Mt 7:1-2; Jo 8:7    \* **2:4:** Ep 1:7; 2:9; 2 Pi 3:15    \* **2:6:** Mt 16:27; Jo 5:29; 2 Ko 5:10    \* **2:7:** 2 Ts 1:8

Moroa naba raba di mi lorooro avolo.

<sup>8</sup> Ketla leventaba atnemi limixin di doxoma mene di, la di sok tixirixes levelinga ruturun at ne Moroa, di vavara i do dina mumu asu levempanga i lok kapmek. Nedi na dinaba ekip tangarang mi lebelemamao la lumukmusak at ne Moroa.

<sup>9</sup> \*Limixin dinaba ruuna ka loklox asongot mi levenmumu atla dik lok levempanga kopmen na lok nunuan, leme Judaia avot la melemu rinedi limixin kopmen di me Judaia.

<sup>10</sup> Ketla ne Moroa naba raba lisixam mi lasinorong, la limila rinedi axap di lok levempanga nunuan, ti leme Judaia avot la melemu rinedi bok limixin kopmen di me Judaia.

<sup>11</sup> \*Moroa i viila mumu loklok at limixin mi legesampoovo mene.

<sup>12</sup> Limixin kopmen di me Judaia dixo ruuna Laulis Linga at ne Moses, dik lok laxakapmek la dinaba seeve. Limixin me Judaia di ruuna na Laulis Linga, di lok laxakapmek la ne Moroa naba ila mumu loklok atnedi atla dixo mu asu Laulis Linga.

<sup>13</sup> \*Kopmen dina tong atkatla li limixin do din mantan tino atla ding tonga mun Laulis Linga. Ketla nedi di mumu asu levelinga at Laulis Linga din mantan tino at lemeren ne Moroa.

<sup>14</sup> \*Limixin kopmen di me Judaia, dixo ruuna Laulis Linga. Ketla levendoxoma nunuan atdi i lok di xusu dina mu asu leventaangas teren, keke i do dixoklen i. Kuren la i lok ngan ta do di ruuna Laulis Linga keneng at lebelen di.

<sup>15</sup> Loklok atnedi i lox asusu i do levempanga Laulis Linga i paase min, Moroa ga malagan i keneng at lebelen di. Levendoxoma nunuan atdi i lox asusu box i dola na i ruturun. Mila at leventaba levenaleng levendoxoma atnedi i sok taba di, la at lentaba levenaleng i su auru loklok atdi.

<sup>16</sup> \*Lagale Lavavang nia a vavang min, i tong asu i do ne Moroa naba ila mumu loklok at limixin at laaleng ete la keneng at ne Iesu Karisito neni naba ila mumu bok levendoxoma ali pe xapmek at limixin.

### *Limixin Me Judaia La Laulis Linga*

<sup>17</sup> \*La kereva nimi? Mi tong i do nemi luvuttadi me Judaia la mi nunu at Laulis Linga, la mit las nimi do mit kis esogo mi ne Moroa.

<sup>18</sup> La miklen bok levempanga ne Moroa i vara i xusu minak lox i. La mira lok ka vam lakleken keneng at Laulis Linga xusu mina ila xaka levempanga ik mokso.

<sup>19</sup> La mi tong lolos i do mim lam limixin kopmen dinaklen ne Moroa ngan lengkatli main, la nemi laxasep tinedi di nemen at lamain bonot.

<sup>20</sup> \*La mi tong i do nemi luvuttadi loklox ase rinedi limixin loklok atdi i bilinga, la nemi luvuttadi loklox ase rinedi limixin kopmen takleken atdi, mila keneng at Laulis Linga mi ruuna levelinga axap i ruturun.

<sup>21</sup> \*Mik lox ase leventaba vetpes kuren, la tila ba xopmen mina lox ase xa nimi? Mi vavang keretna, "Nemen mitap kip pilo." Ketla nemi xa luvuttadi xipkip pilo.

<sup>22</sup> Mi tong i xeretna, "Nemen mita velongka." Ketla nemi luvuttadi longlongka. Mi paase vupu ri laxampoovo moroa, ketla nemi mip kip pilo ro xeneng at laraogu lotu at laxampoovo moroa.

<sup>23</sup> Mit las nimi mi Laulis Linga at ne Moroa, ketla mik lox amangan ne Moroa atla mixo mu asu Laulis Linga ren.

<sup>24</sup> \*Lovoang Kaala i tong i xeretna, "Limixin kopmen di me Judaia di vaase xapmek ti laasen at ne Moroa mumu loklok atnemi leme Judaia." *Ais 52:5*

<sup>25</sup> \*Loklok ti rivit kepe lengkon-tuxu naba lok tooro mun taradi mo do i mumu asu Laulis Linga. Ketla

\* 2:9: Ro 1:16 \* 2:11: Ep 6:9; 1 Pi 1:17 \* 2:13: Mt 7:21; 1 Jo 3:7 \* 2:14: Gu 10:35 \* 2:16: 2 Ti 2:8 \* 2:17: Je 2:19 \* 2:20: 2 Ti 3:5,15; Mt 15:14; Lu 18:9 \* 2:21: Sam 50:16-21; Mt 23:3-4 \* 2:24: Isi 36:20 \* 2:25: Jer 4:4; 9:25

do laradi na los polo Laulis Linga, ni naba lok ngan mun mo laradi xopmen di goxo vit kepe loxontuxu ren.

<sup>26</sup> \*Dola laradi xopmen me Judaia la kopmen di goxo vit kepe loxontuxu ren, ketla i mumu asu levelinga at Laulis Linga, Moroa naba ven i ngan laradi diga vit kepe loxontuxu ren.

<sup>27</sup> Nedi limixin kopmen di me Judaia di mu asu Laulis Linga, keke i do kopmen dina vit kepe levengkontuxu atnedi. Dinaba sok taba nemi leme Judaia at laaleng ete, atla mixo mu asu levelinga at Laulis Linga, keke i do ne Moroa ga raba nemi min, la miga vit kepe bok levengkontuxu atnemi.

<sup>28</sup> \*Nege rinotno ni laradi me Judaia? Kopmen nom laradi i ruuna mene laasen do laradi me Judaia, la livirivit katling at labantuxu ren na lok ngan lavanga gamasa mene.

<sup>29</sup> \*Ketla laradi ruturen me Judaia ni i ruuna lorooro maxat keneng teren, la diga vit katling loroonan teren, la nai ni lugugu at Loroonan Kaala at ne Moroa, kopmen at Laulis Linga diga malagan i. Laradi xerepmo i lok kaka leemi asu ren boro at ne Moroa, la kopmen at limixin.

### 3

#### *Moroa I Ruturen Amisik*

<sup>1</sup> Kereva ba, limixin me Judaia di ruuna levenasen silok i volo limixin kopmen di me Judaia? Kopla di ruuna lisisilok mila diga rivit kepe lengkontuxu atnedi?

<sup>2</sup> \*Laaba, limixin me Judaia dik lox avot keneng at lodoxoma at ne Moroa, la ne Moroa ga doxoma rinotno i do ni na raba levelinga ren tidi kusu dina lok tatao i.

<sup>3</sup> \*Naba lok ba xereva do teventaba atnedi di goxo ruturen at levendoxoma atnedi ri ne Moroa? I milik

ngan ta do ne Moroa noxo ruturen ta, do?

<sup>4</sup> Kopmen tinotno! Moroa neni naba ruturen amisik la keke i do limixin axap laxampanga xaxarang. I ngan Lovoang Kaala i vaase i xeretna,

“Una lox asuusu i do nenu laradi manmanton at loxonaleng una paase, la unaba vas asi levelinga i ru ram at loxonaleng di sok taba u min.”

#### *Sam 51:4*

<sup>5</sup> La kereva ba, do laxakapmek atnedik na ravasu silok tinotno xusu limixin axap dina ven i do ne Moroa in manton tino, ataba tong ka lavanga sala? Ataba tong ka nga i do ne Moroa kopmen nan manton atla neni i lox asongot nedik? (Na levelinga i ngan levelinga at limixin at na lavatkangka.)

<sup>6</sup> Kopmen tinotno! Do ne Moroa xopmen nan manton tino, neni ixo epovo do na vaxaru limixin at lavatbung menemen at lavapaase.

<sup>7</sup> La kereva ba, do losoogong tarak na lok lisisixam la luruturen at ne Moroa na ravasu ri laxasep, ua lavasuun teren la neni naba lox asongor ia ngan laradi xapmek?

<sup>8</sup> \*Do laxapmek na lox asuusu lempanga avukat, kereva, i lox avukat ti tong asu levelinga xeretna, “Atak lok laxakapmek, kusu luvukat naba vot?” Lentaba luvuttadi diga lox asi ia la diga sok taba ia mi na levelinga! Luvuttadi di ruuna na lodoxoma, dinaba ru at lavapaase la dinaba lok ka losongsongot nop loklok atnedi.

#### *Kopmen Taradi Nan Manton Tino*

<sup>9</sup> \*Kereva, nedik limixin me Judaia taba sepsu basinge lebelemamao at ne Moroa mila nedik limixin tino ren? Kopmen tinotno! Ara malagan ase vam nemi min at levelinga avot tarak do, limixin me Judaia la nedi xopmen di me Judaia, nedi axap dik lok maxopok at lolos at laxakapmek.

\* **2:26:** Ga 5:6 \* **2:28:** Jo 7:24; 8:39 \* **2:29:** Lal 30:6; Kl 2:11; 1 Ko 4:5; 2 Ko 10:18 \* **3:2:** Sam 147:19-20; Ro 9:4 \* **3:3:** Ro 9:6; 11:29; 2 Ti 2:13 \* **3:8:** Ro 6:1,15 \* **3:9:** Ro 1:18-2:24; 3:23 \* **3:10:** Sam 14:1-3; 53:1-3; Akl 7:20

10 \*I ngan Lovoang Kaala i vaase i xeretna,

“Kopmen teta nan manton tino. Kopmen tinotno tegesara go.

11 La kopmen teta ikleklen loklok manmanton, kopla i puse ri ne Moroa.

12 Limixin axap digara raba rulu vam ne Moroa. Digara on pam at laxakapmek la kopmen tinotno tara atdi ik lok lempanga i lox avukat, kopmen tinotno tegesara.” *Sam 14:1-3*

13 \*“Lorooro atdi i umsu mi laxakapmek ngan lempatmaaut. La laxaxarang ip tavasu at levenngusno atnedi.” *Sam 5:9*

“La levengkolinga sepsev amet ngan lasak at lavatmoora, ip tavasu at levenbulubun atnedi.” *Sam 140:3*

14 \*“Levempapaase ren i umsu mi lavapaase aksaksa i so mamo.” *Sam 10:7*

15 \*“Soso mene nga nedi di vavara loklox asongot la dinap sev amet luvuttadi,

16 la dik paxaru levesongsongot mi lainbulu at levengkot axap nedi dit pas teren.

17 Kopmen dinaklen langas at limila.” *Ais 59:7-8*

18 \*“La kopmen dinaklen loklok tik lox asuusu loklok ngangao ri ne Moroa.” *Sam 36:1*

19 Anaaba nedik taklen i do, levempanga axap keneng at Laulis Linga, ik lok mu asu nedi dik lok maxopok at Laulis Linga, kusu ti lok pepe levempapaase vepe at limixin, la na lok kaka limixin at lavatbung menemen axap kusu dinak lok maxopok at lavapaase ro melango at ne Moroa.

20 \*Kuren la kopmen tinotno taradi go, neni na mumu asu rinotno levantaangas at Laulis Linga kusu ni na vee ngan laradi manmanton tino at

lemere ne Moroa. La mo levempanga Laulis Linga ik lox i, ik lok laradi xusu neni nabaklen i do neni ira lok pam laxapmek.

### *Langas Ne Moroa I Lox I Xusu Ti Lox Asepmus Limixin*

21 \*Ketla amonga, langas ti lok limixin ngan limixin manmanton tino at lemere ne Moroa ira ravasu vam, la kopmen tekot at Laulis Linga nak lok teren. Laulis Linga eburu mi levelinga at lavaeme vapaase ali di su auru i na.

22 \*Ketla ne Moroa ik lox anmanton tino limixin mumu lununu atnedi saparap ne Iesu Karisito. La ne Moroa ik lox i na rinedi axap di nunu at ne Karisito. Kopmen tevereven petpes atnedi leme Judaia la limixin kopmen di me Judaia.

23 \*Atla limixin axap digara lok pam laxakapmek la digara subu kot basinge loklok manmanton at ne Moroa.

24 \*Ketla ne Moroa ik lox asepmus di mumu letaba nabalamu ren at lekngen ne Iesu Karisito, mo ga un ka amlong di.

25 \*Moroa ga raba ne Iesu ngan laxaavuk tinedi limixin dina nunu do neni ga lox asu lada ren at laxaba xusu ti uu nop loklok atdi. Moroa ga lox i na xusu ti lox asuusu i do neni laradi manmanton tino, mila gano migomgo neni gak lok atnaasan, la goxo reven ti laxakapmek at limixin.

26 Ketla ananga at na levenaleng, neni i doxoma lolos laxakapmek at limixin, kusu ti lox asaxaven loklok manmanton tino ren. At na mun langas, la ne Moroa i lox asuusu i do neni xa in manton tino la ik lox asepmus limixin axap di nunu at ne Iesu.

27 \*Kereva, i epovo dik taba simi dik mi lorongtonga res at Laulis Linga? Kopmen tinotno. Ixo epovo do dik ta simi dik min mila nedik di nunu.

\* **3:13:** Sam 5:9; 140:3    \* **3:14:** Sam 10:7    \* **3:15:** Ler 1:16; Ais 59:7-8    \* **3:18:** Sam 36:1    \* **3:20:** Sam 143:2; Ro 7:7; Ga 2:16    \* **3:21:** Gu 10:43    \* **3:22:** Ro 1:17; Ga 2:16    \* **3:23:** Ro 3:9; 5:2    \* **3:24:** Ro 5:1; Ep 2:8    \* **3:25:** Ep 1:7    \* **3:27:** 1 Ko 1:31    \* **3:28:** Ga 2:16

28 \*La ata vaase box i xeretna do, laradi i sepmus basinge laxakapmek teren, mumu mun lununu la kopmen do mumu leventaangas at Laulis Linga.

29 \*Kereva, ne Moroa neni lomoroa xusuk mun at leme Judaia? La neni xopmen lomoroa atnedi xopmen me Judaia? Laaba, neni xuren.

30 \*Moroa neni legesara, la neni naba lox asepmus leme Judaia mumu lununu atnedi, la nedi bok kopmen di me Judaia xuren, mumu bok lununu atnedi.

31 \*Kereva ba Laulis Linga? Kereva, ata lok kepe nga i mila ata nunu xusuk ta? Kopmen la kopmen tinotno, ketla ata su auru Laulis Linga.

## 4

### *Lavapaase Poovo At Ne Abaram*

1 Ataba tong ka nga i do kereva mumu ne Abaram lavareme avolo at lavalabat atnedik? La neni gakleklen lavanga sala na loklok ti lox amanton laradi?

2 Do neni ga sepmus basinge laxakapmek at leven gugu neni gak lox i, neni gitaba ruuna tavanga neni gibam simi i ren. Ketla neni goxo epovo xusu na simi aurur i at lemeren ne Moroa.

3 \*Lovoang Kaala i vaase xeretna, "Abaram ga nunu at ne Moroa, la at lununu mun teren la ne Moroa ga siam kaka i ngan laradi manmanton." *Lur 15:6*

4 \*Laradi do i gugu, ik lok kaka luunun, luunun teren kopmen na lok ngan laramtaba, ketla ik mokso do neni na lok ka i.

5 Do laradi xopmen na nunu saga at leven gugu neni ik lox i, ketla i nunu at ne Moroa mo i lox asepmus limixin dik lok laxakapmek, lununu mun teren i lox i la ne Moroa i siam kaka i ngan laradi manmanton tino.

6 Neni na lavasuun at levelinga at ne Devit at loxonaleng neni ga

paase mumu luvukat ti mo laradi ne Moroa i siam kaka i ngan laradi manmanton tino, la kopmen mumu leveloklok teren ik lox i.

7 "Luvukat tinedi ne Moroa ga dox-oma xepe laxaloklok kakapmek atnedi, la neni gara sibope vam laxakapmek atnedi!

8 La luvukat ti mo laradi, Leeme Silok noxo doma rinotno bok ba laxakapmek teren." *Sam 32:1-2*

9 \*Kereva, na luvukat ne Devit ga paase min, atnedi xusuk mun di rivit kepe lengkontuxu atnedi? Kopmen. Tinedi bok kopmen dina vit kepe lengkontuxu atnedi. I ngan loxot at Lovoang Kaala i lok keretna, "Abaram ga nunu at ne Moroa, la mumu mun lununu ren, ne Moroa ga siam kaka i ngan laradi manmanton tino."

10 Na luvukat ga vot tinotno at ua loxonaleng? Ga vor avot koplaga, ga vot ba melemu at laaleng diga vit kepe loxontuxu at ne Abaram? Taklen i do ga vor avot, la kopmen do melemu ba.

11 \*Diga vit kepe loxontuxu ren ga melemu ba, la mo loklok diga lox i rin, ga lok ngan loklok katling ti lox asoorun i do at lununu mun at ne Abaram, ne Moroa ga siam kaka i ngan laradi manmanton tino, avot tinotno ri livirivit kepe loxontuxu ren. Kuren la ne Abaram i lok ngan ne temen nedik axap di nunu at ne Moroa la dik lok keneng at lisisiam ngan luvuttadi manmanton tino ren, nedi bok di goxovisi na vit kepe lengkontuxu atnedi.

12 \*Neni ne temen nedi bok mo diga vit kepe vam lengkontuxu atnedi la diga lok ka lununu ngan lununu at ne temen nedik ne Abaram ga ruuna i, avot tinotno ri laaleng diga vit kepe loxontuxu ren.

### *Laxakaape At Ne Moroa Naba Soorun At Lununu Mene*

\* 3:29: Ro 10:12 \* 3:30: Lal 6:4; Ro 4:11-12; Ga 3:20 \* 3:31: Mt 5:17; Ro 8:4 \* 4:3: Ga 3:6; Je 2:23 \* 4:4: Ro 11:6 \* 4:9: Ro 4:3 \* 4:11: Lur 17:10-11 \* 4:12: Mt 3:9 \* 4:13: Lur 17:4-6; 22:17-18; Ga 3:29

13 \*Ne Moroa ga lok laxakaape eburu mi ne Abaram do lavatbung menemen axap, ateren eburu mi livipisik li ren. Na laxakaape goxo vot mumu i do ne Abaram gang tonga res at Laulis Linga, ketla atla neni ga nunu. Kuren la ne Moroa ga siam kaka i ngan laradi manmanton tino.

14 \*Do levelinga ne Moroa ira xaape vam min kusu naba raba i rinedi ding tonga res at Laulis Linga, naba lok ngan do kopmen tavausun at lununu at laradi la laxakaape bok at ne Moroa neni lavanga gamasa.

15 \*Laulis Linga ik lox asuusu lebelemamao at ne Moroa, ketla do xopmen Taulis Linga, kopmen bok torongtonga xepe at Laulis Linga.

16 \*Kuren la laxakaape at ne Moroa naba soorun mun mumu lununu, kusu ne Moroa na lox asuusu letaba nabalamu ren la laxakaape ren naba soorun ti livipisik li axap at ne Abaram kerekngan levelinga at ne Moroa ga tong i. Kopmen do tinedi xusuk di mumu asu Laulis Linga, ketla tinedi bok di nunu ngan ne Abaram, neni ne temen nedik axap di ruuna lununu.

17 \*I ngan Lovoang Kaala i vaase i xeretna,

“Ara lok li vam u ngan ne temen limixin keneng at laxanabung mixin solo.” *Lur 17:5*

Kuren la na laxakaape naba soorun ngan ne Moroa ga tong ali i la ne Abaram ga nunu ren. Neni ne Moroa ik lox arooro limixin basinge lanmet la mi levelinga mun teren neni ga rudum li levempanga goxovisi na vot.

18 \*Ga lolos aleng ti ne Abaram kusu na nunu ap mo laxakaape at ne Moroa rin, ketla neni ga nunu ren la gam doma voovo rin. Kuren la neni ga ravasu ngan ne temen limixin at laxanabung mixin solo. I ngan Lovoang Kaala i vaase i xeretna,

“Livipisik li ram naba umsu.” *Lur 15:5*

19 \*Ga auret kusu levenmaares teren na lok ka lasangaun kobot (100) maares axap. Ketla lununu ren goxo molo at levenaleng neni gam doma mumu labantuxu ren, ua gak milik ngan laradi met, koplama mumu ne Sera ga sioxo nga la ni goxo ruuna taxaalik.

20 Lununu ren goxo on basinge i, la neni bok goxo lox abulubun laxakaape at ne Moroa. Ketla lununu ren ga suxa aumsu i mi lolos, la neni ga xip aurut laasen at ne Moroa.

21 Neni ga doxoma rinotno i do ne Moroa ga epovo ri lok levempanga neni ga xaape min.

22 Neni ba na lavasuun teren la ne Moroa ga siam abeles kaka i ngan laradi manmanton tino mumu mun lununu ren saparap ne Moroa.

23 Na levelinga i vaase xeretna do, “Moroa ga siam ka i ngan laradi manmanton tino.” *Lur 15:6*

Di goxo malagan i xusu tin kusuk mun.

24 \*Diga malagan box i rinedik do ne Moroa naba siam ka nedik ngan limixin manmanton tino, la di nunu at neni ga lox aroo amlong ne Iesu, Leeme Silok atnedik basinge lanmet.

25 \*Moroa ga song araba i xusu naba met mumu laxakapmek atnedik, la ni ga roo xat amlong kusu ti lox asepmus dik.

## 5

### *Lumulum Eburu Mi Ne Moroa*

1 \*Amonga mumu lununu atnedik, Moroa ga lox asepmus pam dik basinge laxakapmek. Kuren la nedik di ruuna ka lumulum eburu mi ne Moroa mumu Leeme Silok atdik ne Iesu Karisito.

2 \*La neni gara siam ka vam nedik mumu lununu atnedik, la levereven kibis atnedik ti letaba nabalamu at ne Moroa, monga nedik di rooro ren. Nedik di momo mumu levendoxoma

\* 4:14: Ga 3:18    \* 4:15: Ro 3:20; 5:13; 7:8    \* 4:16: Ga 3:7    \* 4:17: Ais 48:13    \* 4:18: Ib 11:1  
 \* 4:19: Lur 17:17    \* 4:24: Ro 15:4; 1 Pi 1:21    \* 4:25: Ais 53:4-5; 1 Ko 15:17    \* 5:1: Jo 14:27; Ro 3:24,28; 4:24    \* 5:2: Ep 2:18; 3:12

voovo atnedik do neni naba lox asu-usu lisisixam teren tidik.

<sup>3</sup> \*La dik ta xip aurut bok laasen teren keneng at levenmumuat atnedik, atla dik taklen i do levenmumuat im taba dik mi lolos kusu ata tu atmatkun keneng at leveloklok tong pen.

<sup>4</sup> La mo lolos ik lox asuusu lorooro mukun keneng atnedik, la na lorooro mukun ik lox asuusu levendoxoma voovo xeneng atnedik.

<sup>5</sup> \*Na lodoxoma voovo xopmen na lox abulu nedik, atla ne Moroa gara soli asu vam labalamu ren ukeneng at lorooro atnedik mi Loroonan Kaala, ni laramtaba at ne Moroa rinedik.

<sup>6</sup> La at levenaleng nedik move digoxo ruuna tololos, ne Karisito ga met nop limixin kakapmek, at loxonaleng ne Moroa ga vit li i.

<sup>7</sup> I lolos aleng ti tara xusu neni na met ti taradi manmanton. Nia a lok do agut tepenaleng ba go, tara naba mulus ti met ti laradi avukat.

<sup>8</sup> \*Ketla ne Moroa gara lox asuusu vam labalamu rinotno ren tinedik keretna. At loxonaleng nedik move diga nemen at laxakapmek, neni ga riki ne Nitna kusu ti met nop loklok atdik.

<sup>9</sup> \*Moroa ga lox asepmus dik mi lada at ne Karisito, kuren la keneng teren i epovo rinotno do nedik taba roo su basinge lebelemamao at ne Moroa.

<sup>10</sup> \*Nedik diga munepen mi ne Moroa, ketla neni ga vaxat ka buru nedik saporav i mumu lanmet at ne Nitna. La amonga Moroa ga lok lumulum eburu minedik, i epovo rinotno do nedik atanaba roo su mumu lorooro at ne Karisito.

<sup>11</sup> Ketla kopmen laxavaxap ta mo at na levelinga. Nedik ata xip aurut laasen at ne Moroa mumu Leeme Silok atnedik ne Iesu Karisito atla neni ga lok lumulum tinedik eburu mi ne Moroa.

### *Adam Mi Ne Karisito*

<sup>12</sup> \*Laxakapmek ga vubeles at lavatbung menemen mumu mun legesa radi, la laxapmek teren ga raba lanmet bok eburu min. La livipisik at na, lanmet ga epeseves ti limixin axap, atla limixin axap dik lok laxakapmek.

<sup>13</sup> \*Laulis Linga gaba vot mene melemu, ketla laxakapmek garak lok pam. At levenaleng Laulis Linga goxovisi na vot, ne Moroa kopmen goxom doma mu solo laxakapmek at limixin.

<sup>14</sup> \*Ketla ga ruka i at levenaleng at ne Adam i se at levenaleng at ne Moses, lanmet ga ru pavaa limixin axap, la ga ru pavaa bok nedi di goxo lok laxakapmek ngan mo laxapmek ne Adam ga lox i, ni ga ronga xepe levelinga at ne Moroa. Ne Adam ga ru katling lara laradi mo ga vot melemu.

<sup>15</sup> Ketla nedu xopmen duna epovo atla letaba nabalamu at ne Moroa kopmen na lok ngan laxapmek at ne Adam. I raturun do buaang limixin diga met mumu mun laxapmek at legesa radi. Ketla labalamu at ne Moroa i silok tinotno, la ga lox asuusu letaba nabalamu mene bok teren ti limixin axap mumu labalamu at legesa radi ne Iesu Karisito.

<sup>16</sup> La laramtaba at ne Moroa la laxakapmek at legesa radi, nedu xopmen duna epovo. Melemu at legesa xakapmek at ne Adam, loxokoxo ga vot ti limixin. Ketla melemu at laxang kakapmek solo ga vot, laramtaba at labalamu ga lox asuusu lesepmus basinge laxakapmek.

<sup>17</sup> I raturun mila at laxakapmek at legesa radi mene nga, la laxakapmek ga ru pavaa limixin axap, mumu mun legesa radi. Ketla i epovo rinotno do nedi dinaba lok kaka letaba nabalamu i umsu aleng la loklok manmanton boro at ne Moroa, la dinabat kis orong at lorooro avolo mumu mun legesa radi, ne Iesu Karisito.

\* 5:3: Je 1:2-3; 1 Pi 1:5-7    \* 5:5: Sam 22:5; 25:20; Ib 6:18-19    \* 5:8: Jo 3:16; 1 Jo 4:10    \* 5:9: Ro 1:18; 2:5,8    \* 5:10: Ro 8:7-8    \* 5:12: Lur 2:17; 3:6,19; Ro 6:23    \* 5:13: Ro 4:15    \* 5:14: 1 Ko 15:21-22,45    \* 5:18: 1 Ko 15:22



18 \*Kuren la legesa xapmek mene ga lok loxokoxo ri limixin axap. I ngan bok legeso loklok at laradi manmanton mene ga lox asepmus la ga raba lorooro ri limixin axap.

19 \*Lorongtonga xepe at legesa radi mun ga sat ka limixin axap ti laxakapmek. La kerepmo bok lorongtonga res at legesa radi naba lox anmanton tino limixin basinge laxakapmek atdi.

20 \*Laulis Linga ga ravasu kusu limixin dina ven kisiv i do loklok kakapmek atdi i lok kapmek aleng. Ketla at lengkot ua laxakapmek ga ravasu solo ren, letaba nabalamu bok at ne Moroa ga ravasu silok tinotno.

21 \*Kuren la at loxonaleng laxakapmek i tu ri sat ka limixin ti lanmet, letaba nabalamu bok at ne Moroa i tu xusu ti sat anmanton di, la na lam kaka di ri lorooro avolo mumu ne Iesu Karisito, Leeme Silok atnedik.

## 6

### *Laxakapmek Ik Lox Asu Lanmet, Ketla Lorooro Ik Lok At Ne Karisito*

1 \*Ataba tong i xereva? Ataba lok do atak lox amisik laxakapmek kusu ne Moroa naba lox asilok letaba nabalamu ren tinedik?

2 \*Kopmen tinotno! I lok ngan do nedik digara met pam basinge laxakapmek, kuren la nedik ataba rooro bok ba xeneng at laxakapmek kereva?

3 \*Nemi mikleklen tinotno i na. At loxonaleng nedik diga lok kaka lesep susu keneng at laasen at ne Iesu Karisito, i lok ngan do nedik diga lok ka loxot at lanmet teren.

4 \*La mumu bok lesep susu atnedik, i lok ngan digak mit nedik eburu min la digak lok eburu min at lanmet teren kusu nedik bok ataba roo xat mi lorooro maxat, kerekngan ne Iesu ga roo xat amlong at lanmet mi lolos at ne Temen.

5 \*Do nedik gitak lok eburu min keneng at lanmet teren, nedik gitaba roo xat bok eburu min, ngan neni ga lok kuren.

6 \*La nedik taklen i na, lorooro maut atnedik gara met pam eburu mi ne Karisito ro vana at laxaba, kusu ti sele utut lolos at laxakapmek atnedik getgesara, la kusu nedik ata xok lok at loxokoxo at laxakapmek,

7 \*atla do taradi na met, neni naba sepsu basinge lolos at laxakapmek.

8 Do nedik taga met pam eburu mi ne Karisito, nedik ta nunu do atanaba rooro bok eburu min.

9 Dik taklen i do ne Karisito gara roo xat pam at lanmet, la neni noxo met bok ba, atla lanmet kopmen na ruuna tololos ti lox asi i.

10 \*La mo lanmet ne Iesu ga suma i, ni lanmet ti laxakapmek atnedik, la neni ga met gesara mene nga. La lorooro monga neni i rooro ren, ni lorooro i esogo rinotno eburu mi ne Moroa.

11 \*At na mun langas mina doma mu i na do nemi miga met basinge laxakapmek. Ketla miga roo xat la mit kis esogo eburu mi ne Moroa xeneng at lixitkis eburu atnemi mi ne Iesu Karisito.

12 \*Kuren la nemen mita ke laxakapmek na lok tatao labantuxu gamasa atnemi mo naba met. La nemen mita rongga res at lavavara mun at labantuxu atnemi.

13 \*La nemen gat miguta raba tamangkot at labantuxu atnemi ri laxakapmek, kusu mina lok levempanga xapmek. Ketla mina raba axa nemi ri ne Moroa, na ngan laradi ga ravasu at lanmet ti lorooro. La mina raba lorooro axap atnemi rin kusu tik lok lugugu i nunuan la ik mokso.

14 \*Nemen gat miguta ke xepe laxakapmek nam lam nemi, atla nemi xopmen minak lok maxopok at loklok tatao at Laulis Linga. Ketla mik

\* 5:19: Ais 53:11 \* 5:20: Ro 4:15; Ga 3:19 \* 5:21: Ro 6:23 \* 6:1: Ro 3:5-8 \* 6:2: 1 Pi 4:1  
 \* 6:3: Ga 3:27 \* 6:4: Kl 2:12 \* 6:5: Pl 3:10-11 \* 6:6: Ga 5:24 \* 6:7: 1 Pi 4:1 \* 6:10: Ib  
 9:26-28; 1 Pi 3:18 \* 6:11: 2 Ko 5:15; Ga 2:19; 1 Pi 2:24 \* 6:12: Lur 4:7 \* 6:13: Ro 12:1; Ep 2:5;  
 5:14 \* 6:14: 1 Jo 3:6

lok maxopok at letaba nabalamu at ne Moroa.

### *Lavaanat Saxaruki At Loklok Manmanton*

<sup>15</sup> \*Nedik dixok lok maxopok at Laulis Linga, ketla dik lok maxopok at letaba nabalamu at ne Moroa. Kuren la ataba lok ba lavanga salai? Kereva, nedik atanak lok laxakapmek? Kopmen tinotno!

<sup>16</sup> \*Mikleklen tinotno i na. Mo do mina raba nemi ngan lavaanat saxaruki ring tonga res at tara vetpes, nemi mi lok ngan lavaanat saxaruki at laradi ming tonga res teren. Kuren la nemi lavaanat saxaruki at laxakapmek no im taba lanmet, koplana nemi lavaanat saxaruki at lorongtonga res no nabalama ka nemi ri lesepepmus.

<sup>17</sup> Ketla a tong loklox avukat tinotno ri ne Moroa. Gano nemi migak lok ngan lavaanat saxaruki at laxakapmek. Ketla melemu ren mi lorooro axap atnemi, miga ronga res at levelinga ruturen miga ronga i.

<sup>18</sup> \*La miga sepmus basinge laxakapmek, la miga lok ngan lavaanat saxaruki at loklok manmanton.

<sup>19</sup> A paase poovo mi lavaanat saxaruki la luvuttadi amgomgo atdi kusu minaba ronga xibis kaka na levelinga mila lununu atnemi kopmen na lolos. Gano nemi miga raba lorooro axap atnemi ri lugugu ngan lavaanat saxaruki at laxakapmek la laxanbilinga ga sisilok solo. Kuren pam, la mina raba bok lorooro axap atnemi ngan lavaanat saxaruki ri lok leveloklok manmanton kusu lorooro atnemi nan manton tino.

<sup>20</sup> At levenaleng migak lok ngan lavaanat saxaruki at laxakapmek, miga sepsu basinge leventaangas at loklok manmanton.

<sup>21</sup> \*Miga ven livipisik sala at laxaloklok nemi migak lox i, la mo ba mira mamangan teren? Livipisik ap mo levempanga, ni lanmet!

<sup>22</sup> Ketla, amonga migara sepmus pam basinge laxakapmek, la monga mi lok ngan lavaanat saxaruki at ne Moroa. Mo lavanga nemi minaba lok kaka i, neni lorooro in manton tino, la livipisik teren neni lorooro avolo.

<sup>23</sup> \*Luunun at laxapmek, ni lanmet. Ketla laramtaba at ne Moroa, ni lorooro avolo keneng at ne Iesu Karisito, Leeme Silok atnedik.

## 7

### *Lavapaase Poovo Boro At Loklox Epot*

<sup>1</sup> Luvutnetak mi luvurinuk. Nemi miklen lavanga salai na nenia a lok do ana vaase min, atla nemi axap miklen Laulis Linga. La Laulis Linga im gomgonga mun laradi at levenaleng mun neni i rooro ren.

<sup>2</sup> I ngan bok keretna. Latkin epot ik lok maxopok at loklok tatao at latlok teren. Ketla do latlok teren na met, neni xopmen bok ba nak lok at loklok tatao ren.

<sup>3</sup> Kuren la do neni ik lok eburu mi tatlok petpes at loxonaleng, latlok teren nove i rooro, dinaba tong mo latkin do neni latkin longlongka. Ketla do latlok teren na met, neni ira sepsu basinge loklok tatao ren, la mo do neni na epot kaka tatlok petpes, neni xopmen na lok laxakapmek.

<sup>4</sup> \*Luvutnetak mi luvurinuk. Nemi bok migak lok kuren. Nemi bok migara met pam eburu mi ne Karisito basinge Laulis Linga, atla nemi lengkot at labantuxu at ne Karisito, la amonga nemi mun teren. Neni ga roo xat amlong at lanmet kusu nedik atanaba pisik asu levempisik nunuan ti ne Moroa.

<sup>5</sup> \*At levenaleng nedik diga rooro mu asu lavavara at labantuxu atnedik, laxandoxoma xapmek ga umsu keneng at labantuxu atnedik, la Laulis Linga at ne Moroa ga lox aplivi mo lodoxoma. Kuren la nedik digak lok levempanga ga epovo ri lanmet.

\* 6:15: Ro 6:1 \* 6:16: Jo 8:34; 2 Pi 2:19 \* 6:18: Jo 8:32 \* 6:21: Ro 7:5; 8:6,13 \* 6:23: Ro 5:12,15 \* 7:4: Ro 6:2,11; Ga 2:19 \* 7:5: Ro 6:21 \* 7:6: Ro 8:2; 6:4

<sup>6</sup> \*Ketla amonga, nedik diga met basinge lorooro maut, mo ga otot tutu minedik, nedik dira sepsu ba basinge Laulis Linga, la ata gugu at langas maxat at Loroonan, la kopmen bok ba Laulis Linga migomgo.

### *Laulis Linga La Laxakapmek*

<sup>7</sup> \*Ataba tong kaka ba la? Kereva, ataba tong i do Laulis Linga neni ik lox asusu laxakapmek? Kopmen tinotno. Ketla neni ba na Laulis Linga ga lox aklen dik do laxakapmek ni lavanga xapmek at lemeren ne Moroa, la ga lox ase bok dik mi laxakapmek atdik. La nedik gi toxoklen bok loklok ti ngaongao ri lempanga at tara vetpes, do Laulis Linga gi toxo vaase do, "Nemen gat u guta ngaongao ri lempanga at tara vetpes."

<sup>8</sup> \*La mumu mun Laulis Linga, laxapmek ga ru kaxat keneng atdik la ga visik li solo mo laxakapmek keneng atdik. Ketla do kopmen Taulis Linga, laxakapmek bok noxo ruuna tololos ti lox asoogong dik.

<sup>9</sup> \*Nenia bok, agak lok petpes basinge Laulis Linga. Ketla at loxonaleng Laulis Linga ga vot, laxakapmek ga roo xat keneng tarak.

<sup>10</sup> \*Kuren la i lok ngan ta do loroonan tarak ga met. Aga ven i xeretna do, Laulis Linga ua ga vot kusu ti raba lorooro, ga raba ia mi lanmet.

<sup>11</sup> \*Laxakapmek ga lox epovo i xusu na xarang aruv ia mumu mun Laulis Linga. La mumu Laulis Linga, laxakapmek ga sev amer ia.

<sup>12</sup> \*Ketla Laulis Linga neni i nunuan axap, la leventaangas linga xeneng teren bok i nunuan axap, la ik mokso la i lox avukat.

<sup>13</sup> \*Kereva, lavasuun at na do luvukat at Laulis Linga ga raba ia mi lanmet? Kopmen tinotno. Laxakapmek axa ga raba ia mi lanmet keneng mun at Laulis Linga, mo i lox

avukat. Laulis Linga ga vot kusu anaba ven kibis i do laxapmek ni lavanga salai. La mumu mun lempapapase at Laulis Linga, laxapmek i ravasu ngan lavanga i lok kapmek tinotno.

### *Lodoxoma Soksokgu At Laradi*

<sup>14</sup> \*Nedik diklen i do Laulis Linga neni boro at Loroonan Kaala. Ketla nenia laradi mene nga la aga ravasu ngan lasaxaruki at laxakapmek.

<sup>15</sup> \*Nia xopmen anakleklen lempempanga nenia ak lox i. La axok lok lempempanga avukat nenia a vavara xusu anak lox i, ketla arak lok manga lempempanga xapmek nenia a xopara rin.

<sup>16</sup> At loxonaleng nenia ak lok lempempanga nenia a xopara xusu anak lox i, na loklok i lox asusu i do nenia a siam do Laulis Linga neni ik lox avukat.

<sup>17</sup> Kuren la kopmen nenia rinotno mo ak lok mo lempempanga xapmek. Ketla laxakapmek i nemen keneng tarak, neni ik lox i.

<sup>18</sup> \*Aklen i do luvukat kopmen na silok keneng at lorooro at labantuxu rak. I ruturun do lodoxoma rik lok luvukat ik lok keneng tarak, ketla nenia axo epovo xusu ana lox i.

<sup>19</sup> Kopmen anak lok loklox avukat no nenia a vavara xusu anak lox i, ketla arak lok laxakapmek no nenia axopavara xusu anak lox i.

<sup>20</sup> Do nenia ana lok lempempanga no nia a xopara xusu ana lox i, i lok ngan do kopmen nenia mo ak lox i mo, ketla laxakapmek no ik lok keneng tarak, neni ik lox i.

<sup>21</sup> Kuren la a long terex i do lara loklok mo ik lok lugugu ren keretna, at loxonaleng ak lok do anak lok luvukat, ketla kopmen, ak soxolik ka manga laxapmek.

<sup>22</sup> La to xeneng tinotno rak, a vavara rinotno ri Laulis Linga at ne Moroa.

\* 7:7: Pas 20:17; Lal 5:21 \* 7:8: Ro 4:15 \* 7:9: Je 1:15 \* 7:10: Mas 18:5; Ro 10:5 \* 7:11: Lur 3:13; Ib 3:13 \* 7:12: 1 Ti 1:8 \* 7:13: Ro 5:20 \* 7:14: Sam 51:5; Jo 3:6 \* 7:15: Ga 5:17  
\* 7:18: Lur 6:5; 8:21 \* 7:23: Ga 5:17; Je 4:1; 1 Pi 2:11

23 \*Ketla a reven lodoxoma vetpes i gugu xeneng at labantuxu rak la mo i vesep eburu mi lodoxoma avukat ik lok keneng tarak. La mo lodoxoma i lok li ia xeneng at loxokoxo at laxakapmek la i gugu keneng at labantuxu rak.

24 Lainbulu silok ik lok tarak, atla nege naba lox aroo su ia basinge na labantuxu im lam kaka ia ri lanmet?

25 \*A tong loklox avukat tinotno ri ne Moroa mumu ne Iesu Karisito, Leeme Silok atdik, atla neni naba lox arooro dik.

Kuren la lorooro rak ik lok keretna. Keneng at lodoxoma rinotno rak, nenia a lok ngan lasaxaruki at Laulis Linga at ne Moroa. Ketla keneng at labantuxu rak, i ngan nenia a gugu ngan lasaxaruki at laxakapmek.

## 8

### *Lorooro Keneng At Loroonan Kaala*

1 Kopmen bok ba toxokoxo tinedi di nemen keneng at ne Iesu Karisito.

2 \*Atla keneng at ne Iesu Karisito, Loroonan Kaala ga raba dik mi lorooro la gara lox asepmus pam dik basinge lolos at laxakapmek eburu mi lanmet.

3 \*Laulis Linga goxo epovo ri lox arooro limixin atla limixin diga ruuna laxakapmek keneng at lorooro atdi. Ketla ne Moroa ga lox arooro dik, neni ga riki asi lamdak tinotno ren, la neni ga lok kepe laxakapmek keneng at limixin. La ni ga ruuna ka labantuxu ngan labantuxu at limixin kusu na raba lorooro ren ngan laxaavuk.

4 \*Moroa ga lox i na xusu neni naba lox epovo leventaangas avukat at Laulis Linga tinedik, kopmen ata mumu asu lavavara at labantuxu, ketla di mumu asu lodoxoma at Loroonan Kaala.

5 Nedi di rooro mun keneng at labantuxu atnedi, levendoxoma

atnedi i mumu asu mun lavavara at labantuxu. La nedi di rooro mu asu Loroonan Kaala im lam di xuren, levendoxoma atnedi i mumu asu mun lavavara at Loroonan Kaala.

6 \*Do levendoxoma atnedi na mumu asu mun lavavara at labantuxu, laxavaxap teren, lanmet. Ket do levendoxoma atdi na mumu asu lavavara at Loroonan Kaala, laxavaxap teren, lorooro eburu mi lenmila.

7 \*Limixin dinaba ravasu ngan lavamunepen mi ne Moroa do, levendoxoma atdi na mumu asu mun lavavara at labantuxu atdi. Kopmen dina ronga res at levelinga at ne Moroa, la ixo epovo rinotno do dina ronga res teren.

8 La ixo epovo rinotno do nedi di ronga res at lavavara at labantuxu, dina lox amomo ne Moroa.

9 \*Ketla nemi xopmen mina rooro at lavavara at labantuxu. Mi rooro mu mun lavavara at Loroonan Kaala, mo do Loroonan Kaala at ne Moroa i nemen keneng atnemi. La do nege di, dixo ruuna Loroonan Kaala at ne Karisito, nedi xopmen limixin at ne Karisito.

10 \*Ketla do ne Karisito nak lok keneng atnemi, labantuxu atnemi naba met mumu laxakapmek. Ketla loroonan atnemi naba rooro atla ne Moroa naba siam kaka nemi ngan limixin manmantan.

11 Mo do Loroonan at ne Moroa, mo ga lox aroo ne Iesu basinge lanmet, nak lok keneng atnemi, ne Moroa, mo ga lox aroo ne Karisito basinge lanmet, neni naba raba bok labantuxu atnemi mi lorooro, atla Loroonan teren ik lok keneng atnemi.

12 Kuren la luvutnetak mi luvurinuk, nedik ta ruuna lugugu xusu tanaba lox i xeneng at lorooro atnedik. Ketla kopmen do nedik atap tuvuk gamasa mene nga mi lorooro at labantuxu.

13 \*Do mina rooro mu asu mene nga lavavara at labantuxu, nemi

\* 7:25: 1 Ko 15:57 \* 8:2: Ro 7:23-24 \* 8:3: Gu 13:38; 15:10; Pl 2:7; Ib 4:15 \* 8:4: Ga 5:16,25

\* 8:6: Ro 6:21 \* 8:7: Mt 12:34; Jo 8:43; 12:39; Je 4:4 \* 8:9: 1 Ko 3:16; 12:3 \* 8:10: Ga 2:20; Ep

3:17; 1 Pi 4:6 \* 8:13: Ga 6:8; Kl 3:5

minaba met. Ket do mina lok kaka Loroonan Kaala la mina sev amet leveloklok kakapmek atnimi min, minaba roo.

<sup>14</sup> Nedi no Loroonan at ne Moroa i sasat nedi, nedi luvutnitna ne Moroa,

<sup>15</sup> \*atla Loroonan no ne Moroa gara raba vam nimi min ik lok nimi xusu mi noxo marat ngan lasaxaruki. Ketla i lok nimi xusu nemi luvutnitna ne Moroa, la nedik di toro ri ne Moroa mi lolos at Loroonan Kaala keretna, "Tamak! Tamak!"

<sup>16</sup> \*Loroonan at ne Moroa i tu buru mi leventoonan atnedik, kusu ti lox asusu i do nedik luvutnitna ne Moroa.

<sup>17</sup> \*La nedik luvutnitna, kuren la atanaba ruuna xaka leveloklox anarong ne Moroa ga lok li i ri limixin teren, la nedik eburu mi ne Karisito atanaba ruuna ka bok leveloklox anarong no ne Moroa ga lok li i rin. Atla do nedik ata xip tooro ne Karisito mi losongsongot teren, nedik tanaba ruuna ka bok loxot at lasinorong teren.

### *Lasinorong Avolo Melemu*

<sup>18</sup> \*Nenia a doma i do nedik di suma losongsongot at na levenaleng, ixo epovo rinotno xusu ata lox epovo du mi lasinorong avolo mo ne Moroa naba raba dik min.

<sup>19</sup> \*Lempanga axap at ne Moroa ga rudum li di, di ngangais tinotno kusu ne Moroa na lox asuvos tinotno luvutnitna.

<sup>20</sup> \*Moroa ga lok li lasaxaek mavana at luruntudum li ren. Anai kopmen at lavavara at luruntudum li ketla at lavavara at ne Moroa ga lok li i xuren. Ketla lodoxoma voovo at luruntudum li i lok keretna,

<sup>21</sup> \*na luruntudum li naba sepmus basinge mo lasaxaek at tara taaleng la noxopso bok ba, ketla nabak lox asepmus la naba lok kaka lasinorong avolo ngan luvutnitna ne Moroa.

<sup>22</sup> La dik takleklen i do i se nga at na levenaleng, na luruntudum li axap it mes mi losongsongot i ngan latkin i visik.

<sup>23</sup> \*Ketla xopmen neni xusuk mun. Nedik bok di ruuna Loroonan Kaala ngan laramtaba avot at ne Moroa, nedik bok dit mes keneng axa atnedik at levenaleng dik di ngangais tinotno ne Moroa xusu neni na lok li nedik ngan luvutnitna, la na lox amaxat labantuxu atnedik.

<sup>24</sup> \*Nedik diga roo su mene i ngan nedik diga doxoma voovo xuren. Ketla do ata ven luruturun na vot at lodoxoma voovo atnedik, ataba tong i xeretna do, neni xopmen lodoxoma voovo mo, atla ixo epovo do di doma voovo ri tavanga di ven tu vam teren.

<sup>25</sup> Ket do nedik ata doma voovo ri tavanga dik dixo ven i, atanaba ngais atnaasan i.

<sup>26</sup> Keneng at na lodoxoma voovo, Loroonan Kaala naba lok tooro nedik do nedik taxo ru lolos, atla dik taxoklen i do ataba sing kereva. La Loroonan axa i ngising tinedik saparap ne Moroa mi levelinga metmes nia axo epovo xusu ana mii poovo i mi tekolinga.

<sup>27</sup> \*La ne Moroa neni i reven kibis lorooro at luvuttadi, la iklen lodoxoma at Loroonan atla Loroonan i tu katling limixin at ne Moroa ukeneng eburu mi lodoxoma at ne Moroa.

### *Limixin Nunu Dinaba Volo*

<sup>28</sup> \*Nedik ataklen i do ne Moroa i gugu mi luvukat at levempanga axap, keneng at lorooro atnedi di vavara aleng i, la nedi no neni gara ro xaka vam nedi xerekngan lodoxoma ren kuren.

<sup>29</sup> \*Avot ti luruntudum li at na lavatbung menemen ne Moroa gakleklen limixin teren la ga soxolik ka di kusu dina ravasu ngan ne Nitna ne Moroa, la neni naba lok ngan lamgomgo ri laxanneton solo.

<sup>30</sup> La ne Moroa ga ro xaka nedi neni ga soxolik ka nedi. La nedi bok

\* 8:15: 2 Ti 1:7; Mk 14:36 \* 8:16: 2 Ko 1:22 \* 8:17: Ga 4:5-7; Li 21:7 \* 8:18: Ro 5:2; 2 Ko 4:17  
 \* 8:19: Kl 3:4 \* 8:20: Lur 3:17-19 \* 8:21: 2 Pi 3:13; 1 Jo 3:2 \* 8:23: 2 Ko 5:2-4; Ga 5:5 \* 8:24:  
 2 Ko 5:7 \* 8:27: Sam 139:1; 1 Ko 4:5 \* 8:28: Ep 1:11 \* 8:29: Kl 1:18; Ib 1:6

neni gara ro xaka vam di, neni ga lox asepmus bok nedi. La nedi nom neni ga lox asepmus di, neni ga epes di mi lasinorong teren.

*Labalamu At Ne Moroa Keneng At Ne Iesu Karisito*

<sup>31</sup> \*Melemu at na ataba tong kaka lavanga salai? Do ne Moroa na tu eburu minedik, nege i epovo xusu na vas asi nedik?

<sup>32</sup> \*Neni xopmen tinotno goxo rebeng alis ne Nitna rinotno, ketla ga raba i ngan laxaavuk tinedik axap. Neni ga raba nedik mi ne Nitna. Kereva, neni naba raba gamasa bok nedik mi levempanga axap?

<sup>33</sup> \*Nege i epovo na lok li limixin soksoxolik ka at ne Moroa ro at lox-okoxo at laxakapmek? Kopmen tara atla ne Moroa axa ga lox asepmus dik.

<sup>34</sup> \*Nege naba epovo xusu na lok li dik at lavapaase? Kopmen tara, atla ne Iesu Karisito, mo neni ga met la ga roo xat amlong bok, monga it kis saparap lekngen tino at ne Moroa. La i ngising amisik ne Moroa xusu na lok tooro nedik!

<sup>35</sup> Nege rinotno ba, i epovo xusu na lox epeseves nedik basinge labalamu at ne Karisito? Kopmen tepanga. Ixo epovo do levenmumuat na lox i, koplal levenaleng lolos, koplal levesongsongot mumu lununu atdik, koplal loroxo, koplal loklok banbalo, koplal lempanga sepsev amet, koplal lanmet.

<sup>36</sup> \*I ngan Lovoang Kaala i vaase i xeretna,

“Nema limixin taram, kuren la amisik dip sep amet nema. Amisik dip sep amet etaba nema ngan ta lubang sipsip, mo kopmen tara ri tupe di.”

*Sam 44:22*

<sup>37</sup> \*Keneng at na levempanga axap, dik digara lok ka vam lixitkis nunuan mumu langas at laradi ua i balamu nedik!

<sup>38</sup> La nenia aklen tinotno i do kopmen tempanga naba lox epeseves nedik basinge labalamu ren; lanmet koplal lorooro, koplal taangelo, koplal tagas, koplal tepe lolos salai, koplal lorooro ningina, koplal lorooro melamgo atnedik;

<sup>39</sup> koplal lempanga ro mavana at lavatbung menemen, koplal lempanga ro maxopok teren, la kopmen tinotno tepanga de at luruntudum li at ne Moroa i epovo xusu ti lox epeseves nedik basinge labalamu at ne Moroa, mo ga lox asuusu i rinedik keneng at ne Iesu Karisito, Leeme Silok atdik.

## 9

*Moraa Eburu Mi Limixin Me Judaia*

<sup>1</sup> Nenia at ne Karisito la nenia axo xaxarang. Loroonan Kaala ik lok tatao lodoxoma avukat tarak la ik lox axasep box ia do nenia axo xaxarang.

<sup>2</sup> A paase ruturun i na dola lainbulu la lebelen tuntun tarak ti lubang mixin tarak i silok aleng.

<sup>3</sup> \*La i epovo dola nenia gita xip tutu mi lebelemamao at ne Moroa la gita lox epeseves ia basinge ne Karisito, kusu ti lok tooro luvutnetak, nedi limixin axa rak me Judaia.

<sup>4</sup> \*Nedi limixin soksoxolik ka at ne Moroa, la ni ga lok li nedi ngan luvutnitna. Ni ga lok levenekabus eburu minedi la lisisixam teren ga nemen kantubu atdi, la ga raba nedi mi Laulis Linga. Diklen langas kusu dina lotu saparav i mi luruturun, la dira ruuna ka vam leveng kakaape ren.

<sup>5</sup> \*Nedi lubang mixin diga ravasu at lempareme avolo megano. La ne Karisito, neni ga vot ngan laradi, neni atnedi na lubang mixin. Leemi asu ri ne Moroa neni ik lok tatao lempanga axap la kopmen taxavaxap teren! Tuturun.

\* **8:31:** Sam 118:6    \* **8:32:** Jo 3:16    \* **8:33:** Ais 50:8    \* **8:34:** Sam 110:1; Gu 7:55-56; 1 Jo 2:1  
 \* **8:36:** 2 Ko 4:11    \* **8:37:** Jo 16:33    \* **9:3:** Pas 32:32    \* **9:4:** Pas 4:22; Lal 7:6; 14:1-2    \* **9:5:** Mt 1:1-16; Jo 1:1; Ro 1:25    \* **9:6:** Kex 23:19; Ro 2:28

6 \*Nia axo vaase dola, ne Moroa goxo lox epovo laxakaape ren. Atla kopmen limixin axap me Israel nedi limixin soksoxolik ka at ne Moroa.

7 Nedi livipisik li at ne Abaram, ketla kopmen nedi axap luvutnitna ne Moroa. Ne Moroa ga vaase ri ne Abaram keretna,

“Lubung mixin at ne Aisak kusuk mun dinabak lok ngan livipisik li ram.” *Lur 21:12*

8 \*Lavasuun at na xeretna, kopmen nedi axap livipisik li at ne Abaram di lok ngan lubung mixin tuturun, ketla nedi mun ne Moroa ga xaape midi ri ne Abaram di lok ngan lubung mixin tuturun at ne Abaram.

9 La ne Moroa ga lok mo laxakaape mi na levelinga.

“Ap mo laaleng mokmokso nia anabamlong la ne Sera naba ruuna ka tamdak temes.” *Lur 18:10,14*

10 \*Ketla kopmen neni xusuk mun na. Lumdak at ne Rabeka duga ruuna legese temen du, la neni lurubuno avolo atnedik ne Aisak.

11 Ketla avot at livipisik at na lumdak koplak du gita lok tempanga avukat koplak tempanga xapmek, ne Moroa ga lox avot be losoksoxolik teren kusu mo losoksoxolik teren naba tu at lodoxoma ren.

12 Losoksoxolik teren keretna, neni goxo ven ti lugugu atdu, ketla neni ga doma mu lorotoro ren. Kuren la ne Moroa ga lok ti nenen du xeretna,

“Lara avot naba gugu taba lara mumu.” *Lur 25:23*

13 I ngan Lovoang Kaala i tong i xeretna,

“A vara aleng ne Jakop, ketla axo mulus ka ne Esao.” *Mal 1:2-3*

14 Ataba tong ka la? Taba tong ka i do na levelinga at ne Moroa ixok mokso? Kopmen tinotno.

15 I ngan mo levelinga ne Moroa ga vaase i ri ne Moses keretna,

“Anaba lox asuusu lebelen tuntun tarak ti nege a doma i, la anaba lox asuusu labalamu rak ti nege a doma i.” *Pas 33:19*

16 \*Loklok at laradi noxo lox i xusu ne Moroa naba soxolik ka i, ketla lebelen tuntun kusuk mun at ne Moroa.

17 I ngan Lovoang Kaala i vaase mumu ne Parao xeretna,

“Nenia aga lok li u ngan loorong. Lavasuun teren keretna, kusu anaba lox asuusu lolos tarak keneng at lorongtonga xepe ram, la keneng at nai limixin at lavatbung menemen axap dinabaklen laasen tarak.” *Pas 9:16*

18 \*Kuren la ne Moroa i lox asuusu lebelen tuntun tinedi do neni i doma di, la i lox amer avavarang leven-doxoma atnedi do neni i doma box i xuren.

19 Tara atnemi naba sue ia xeretna, “Dola kuren, Moroa naba sok taba taradi xereva? La nege i epovo xusu na esey eburu mi lodoxoma at ne Moroa?”

20 \*Ketla nege nenu, laradi gamasa, u gagang linga ne Moroa? Ixo epovo do lavat sosopen kangka na susue laradi ik lox i do, “Tila u lox ia xeretna?”

21 \*Laradi ga lok mo lososopen kangka, neni xa i epovo xusu neni na lok mo loxompong kangka at langas ua i doma i xuren, la na lok bok tegepu sosopen mi mo mun legese xompong kangka, tara nunuan ti ove at levenaleng silok la tara diba vove min at levenaleng axap.

22 La ne Moroa i lok bok losoksoxolik teren kuren. Neni ga vara i xusu na lox asu lumukmusak teren la na lox ase lolos teren. Ketla neni move naba ke amulus nedi limixin dik lox abelemamao i, keke i dola nedi limixin kakapmek la i epovo xusu neni na sele utut nedi.

23 \*La ni ga vara box i xusu neni na lox asu lagale lisisixam teren, no ni ga soli asu i rinedik limixin ua neni ga belen tuntun tinedik. La ti nege

\* 9:8: Ga 4:23 \* 9:10: Lur 25:21 \* 9:16: Ep 2:8 \* 9:18: Pas 4:21; 9:12; 14:4 \* 9:20: Ais 29:16; 45:9 \* 9:21: Jer 18:6 \* 9:23: Ro 8:29; Ep 1:3-12

atdik no neni gara gagas pam di xusu dinaba lok kaka lisisixam teren,

<sup>24</sup> mo nabak lok tinedik na, neni gara ro ka vam nedik, kopmen do at limixin me Judaia xusuk mun, ketla boro bok at limixin kopmen di me Judaia.

<sup>25</sup> I ngan neni ga vaase i ro xeneng at lubuk at ne Osea xeretna,

“Limixin di goxo ruuna ka ia ngan Lamgomgo atdi, nia anaba tong di do nedi limixin tarak. Lara lubung mixin no nenia a goxopara di, anaba tong di do nedi at laxat tinotno rak.” *Ose 2:23*

<sup>26</sup> La neni ga lok bok,

“La to ap mo loxot tino neni ga tong i do, nemi xopmen limixin tarak, mo go neni naba tong di do nedi luvutnitna ne Moroa, Luntoo Avolo.” *Ose 1:10*

<sup>27</sup> La ne Aisaia ga vaase mumu bok leme Israel keretna,

“Limixin bok me Israel di buaang aleng ngan levenit kangkangeng nou saparap laras, ketla teventaba mun atdi naba roo su.

<sup>28</sup> Leeme Silok naba lok soso mun ti vorang laxakapmek at limixin at lavatbung menemen axap.” *Ais 10:22-23*

<sup>29</sup> I ngan ne Aisaia gara tong pam i gano, ni ga lok keretna,

“Amo dola Leeme Silok, Lanaraavuk gi toxo ke xepe lavalabat atnedik, nedik na gitaba lok kapmek ngan limixin me Sodom, nedik gitaba uu ngan bok limixin me Gomora.” *Ais 1:9*

### *Lorongtonga Xepe At Leme Israel*

<sup>30</sup> \*Ataba tong ka toxolinga salai? Limixin kopmen di me Israel, nedi di goxok lok tong i xusu dinan mantan at lemeren ne Moroa, ketla digan mantan tino mumu lununu atnedi.

<sup>31</sup> \*Ketla leme Judaia, nedi lamaanat soksoxolik ka at ne Moroa diga puse ri teventaangas kusu dina

nemen manmantan at lemeren ne Moroa, la di goxo epovo.

<sup>32</sup> Tila ba la di goxo epovo? Atla levempanga diga lox i goxo ru rinotno at lununu atdi, ketla at leven gugu mun atdi. Digak sak kikixin at Luuat Kis,

<sup>33</sup> \*no Lovoang Kaala i paase min keretna,

“Mina ven ba i, a lok li Luuat Kis to xeneng at lemenemen Saion ti lok limixin dinaba sak kikixin teren. Mo Luuat Kis naba lok nedi dina subu. Ketla nege do i nunu ren, neni noxo doma saasaa.” *Ais 8:14; 28:16*

## 10

<sup>1</sup> Luvutnetak mi luvurinuk. Lodoxoma rinotno ro xeneng at laxat tarak do limixin tinotno rak dinaba roo su. La a ngising amisik ne Moroa rinedi.

<sup>2</sup> Nenia a epovo xusu ana tong i do nedi di lolos kusu ti lok lugugu ri ne Moroa. Ketla mo lavavara atnedi ri ne Moroa, kopmen na ru rinotno at lakleklen tuturun.

<sup>3</sup> Nedi di goxoklen langas ne Moroa ga lok li i xusu tik lox asepmus di basinge laxakapmek, ketla diga puse ngas axa at levendoxoma atnedi. Kuren la di goxo raba axa di ri ne Moroa la langas ne Moroa ga lox i rik lox anmantan tino limixin.

<sup>4</sup> \*La ne Karisito gara lox epovo vam Laulis Linga, kusu nege i nunu, neni laradi manmantan tino.

### *Langas At Limixin Axap Ti Linintoo*

<sup>5</sup> \*Moses ga malagan levelinga mumu langas ti lox anmantan limixin keneng at lorongtonga res at Laulis Linga, ni ga lok keretna,

“Nege do i mumu asu levempanga Laulis Linga i tong i, neni naba lox epovo axav i ri roo su ren.”

*Mas 18:5*

<sup>6</sup> Ketla anaa levelinga i paase mumu langas ti lox anmantan tino limixin at lemeren at ne Moroa mi lununu.

\* **9:30:** Ro 10:20 \* **9:31:** Ro 10:2-3 \* **9:33:** 1 Pi 2:6; Ro 10:11 \* **10:4:** Mt 5:17; Jo 3:18 \* **10:5:** Ro 7:10; Ga 3:12



“Nemen gat uguta doma raba u mi lususue do, ‘Nege naba urut uto vana at laxalibet?’ ”  
*Lal 30:12* (kusu ti lok ka ne Karisito ude xopok.)

<sup>7</sup> La i paase bok keretna,

“Nemen gat uguta lok bok do, ‘Nege naba si uto xopok at lemene-men at labarongan?’ ” *Lal 30:13* (kusu ti lox asu ne Karisito basinge limixin diga met pam.)

<sup>8</sup> Ketla Lovoang Kaala i lok keretna,

“Levelinga at ne Moroa mo ik lok saparap nimi, nom ik lok at levenbulubun atnimi la no xeneng bok at levempeve atnimi.” *Lal 30:14*

Neni na, levelinga at lununu nema ma vavang min.

<sup>9</sup> Do mina vaase asu mi levenbulubun atnimi do ne Iesu ni Leeme Silok, la mina nunu mi lebelen nimi axap do ne Moroa ga lox aroo amlong ne Iesu at lanmet, nemi minaba roo su.

<sup>10</sup> Kuren la nemi do mina nunu mi lebelen nimi axap, nemi minaba sep-mus. La do mina vaase asu i mi levenbulubun atnimi, minaba roo su.

<sup>11</sup> \*Lovoang Kaala i vaase i xeretna,

“Do nege do i nunu ren, neni noxo doma saasaa.” *Ais 28:16*

<sup>12</sup> \*Anaa levelinga i vung kimit limixin axap, atla kopmen tevereven petpes kantubu at limixin me Judaia la limixin kopmen di me Judaia. Moroa xusuk mun legese Eme Silok atnedik axap, la ik lox anarong aleng nedi di ngising ti loklok tooro boro ren.

<sup>13</sup> I ngan levelinga at Lovoang Kaala i vaase xeretna,

“Limixin axap di toro ke at laasen at Leeme Silok, dinaba roo su.” *Jol 2:32*

<sup>14</sup> Ketla dinaba sing kereva do nedi xovisi dina nunu? La dinaba nunu xereva do nedi xovisi dina rongga xaka levelinga? La dinaba rongga ka

tavanga salai do kovisi tara na vaase asu tevelinga ridi?

<sup>15</sup> La tevelinga naba ravasu xereva mo do dixo riki asu taradi ri vavang min? I ngan Lovoang Kaala i tong i xeretna,

“I lox avukat tinotno lavatpas atnedi di vot mi Lagale Lavavang.” *Ais 52:7*

<sup>16</sup> \*Ketla limixin axap di goxo siam kaka Lagale Lavavang. I ngan bok ne Aisaia ga lok keretna,

“Leeme Silok. Goxo buaang nedi diga nunu at levelinga maga vaase asu i.” *Ais 53:1*

<sup>17</sup> \*Kuren la lununu it pot do laradi ing tonga levelinga, la levelinga i laala boro at Lagale Lavavang at ne Karisito.

<sup>18</sup> Ketla a sue xeretna, i ruturun do di goxo rongga levelinga? Laaba, diga rongga i, i ngan pam Lovoang Kaala i vaase i xeretna.

“Levempapaase atdi ga ravasu ri limixin at lavatbung menemen axap. La levelinga atdi gat pas ti latnese at na lavatkangka.” *Sam 19:4*

<sup>19</sup> Nia ana sue bok lususue xeretna. Kereva, limixin me Israel di goxo xasep ap mo levelinga? Laaba, diga xasep teren. La ne Moroa ga lok tong i do na sar amlong di. Moses neni lara avot ga tong mo lodoxoma at ne Moroa xeretna,

“Anaba lok nemi xusu minaba reyen peves at limixin kopmen dina ruuna toxot keneng at losoksoxolik at ne Moroa. La anaba lok bok nemi xusu mina bele-mamao mumu lara lubang mixin kopmen dinaklen ne Moroa.” *Lal 32:21*

<sup>20</sup> La ne Aisaia ga vaase axasep tinotno xeretna,

“Lara lubang mixin di goxo puse ria ketla diga vuse ka ia, la nia aga vot saparap nedi di goxo susue vupuse ria.” *Ais 65:1*

<sup>21</sup> Ketla ti limixin me Israel, Moroa ga vaase xeretna,

“At levenaleng axap agara gagas pam kusu ti siam kaka amlong nedi luvuttadi rongtonga xepe la luvuttadi gagang linga.” *Ais 65:2*

## 11

### *Lebelen Tuntun At Ne Moroa Ri Limixin Me Israel*

<sup>1</sup> \*A sue bok keretna. Kereva, ne Moroa ga sok tixirixes kepe limixin tinotno ren? Kopmen tinotno! Nenia rinotno vam lara me Israel la nenia at livipisik li at ne Abaram la nenia at libibinat me Benjamin.

<sup>2</sup> Moroa goxo sok tixirixes limixin teren, neni gara soxolik ka vam nedi ganoxa at lurutu kaxat. Mina doxoma bok loxot ik lok at Lovoang Kaala i paase mumu ne Elaisa la at loxonaleng neni ga vaase ri ne Moroa mumu luruvtuvuk at leme Israel? Ni ga lok keretna,

<sup>3</sup> \*“Leeme Silok, digara sev amet pam lavaeme vapaase ali ram la digara ut asi levengkonin laplavang taram. Kuren la nenia xusuk ta na legesara ak lok, la mo manga diak lok tong i do dina sev amer ia.” *1 Lav 19:10,14*

<sup>4</sup> Lovoporang sala ne Moroa ga raba i min? Ni ga vorang i rin keretna,

“Nenia move a ruuna lavanuti larabin sangsangaun kobot (7000) limixin di ruturun tia la kovi dina lotu saparap lomoroa xaxarang ne Baal.” *1 Lav 19:18*

<sup>5</sup> \*Mo levenaleng i lok ngan pam na levenaleng it pot ningina, lentaba mun ne Moroa ga soxolik ka vam nedi keneng at letaba nabalamu ren.

<sup>6</sup> \*Losoksoxolik teren i tu at letaba nabalamu ren, la kopmen do at levempanga nedi diga lox i. Do losoksoxolik at ne Moroa gita ru at levempanga luvuttadi dik lox i, giba lok ngan do letaba nabalamu ren, kopmen tugugu ren.

<sup>7</sup> \*Kuren la limixin me Israel di goxo vuse ka lorooro nunuan no nedi diga puse rin. Lenep binam tadi lixilik mene nga no ne Moroa ga soxolik ka nedi, nedi diga vuse ka i. La nedi axap nom, levenbaalung atnedi ga repe ri lorotoro at ne Moroa.

<sup>8</sup> \*I ngan Lovoang Kaala i vaase xeretna,

“Moroa ga lox angtangku levempeve atnedi eburu mi levendoxoma atdi. Di noxo reven mi levengkatli atdi xopla dinang tonga mi levenbaalung atdi i se nga mo lingina.” *Lal 29:4*

<sup>9</sup> \*La ne Devit ga vaase bok keretna,

“Keke levenanan atdi nabak paxaru kaxat lasaxaek! Keke levempeluxa kaala atnedi naba lox ekarakat di kusu dina subu tup at leeteke!

<sup>10</sup> Una sep di mi lemeramain! Unak lox amolos amisik lempat sintun atdi!” *Sam 69:22-23*

<sup>11</sup> \*Nia ana sue bok mi lara lusue. Kereva, limixin me Judaia digak sak kikixin mene nga xopla diga subu epopolo? Digak sak kikixin mene nga. Nedi diga lok laxakapmek, kuren la loklox arooro gat pas tinedi limixin kopmen di me Judaia, kusu ti lok leme Judaia dina puse ri ne Moroa.

<sup>12</sup> Kerepmo laxakapmek at leme Judaia ga lox asusu leveloklox anarong ti limixin at na lavatbung menemen axap. Labaava atnedi ga lox asusu leveloklox anarong ti limixin kopmen di me Judaia. Ketla laxaloklox anarong naba umsu aleng ap mo laaleng do leme Judaia dina nunu la dina beles keneng at leexes at ne Moroa.

### *Loklox Arooro Ti Limixin Kopmen Di Me Judaia*

<sup>13</sup> Nia a paase nga na rinemi limixin kopmen nemi me Judaia. I ngan ta do nenia laradi vavang ti limixin

\* **11:1:** 1 Sml 12:22; Sam 94:14; Pl 3:5 \* **11:3:** 1 Lav 19:10,14 \* **11:5:** Ro 9:27 \* **11:6:** Ga 3:18  
\* **11:7:** Ro 9:31 \* **11:8:** Ais 29:10 \* **11:9:** Sam 35:8 \* **11:11:** Gu 13:46; Ro 10:19

kopmen di me Judaia la a momo ri lok na lugugu rak.

<sup>14</sup> Nia a lok do mo lugugu rak naba lok bok limixin tinotno rak dinaba ven peves tia. Kuren la anaba lox epovo i xusu ana lok ka amlong teventaba atdi.

<sup>15</sup> At levenaleng ne Moroa ga lok kepe nedi, neni ga vaxat ka limixin at na lavatbung menemen saparav i. Naba lox avukat tinotno do ne Moroa na lox amlong ka leme Judaia. Naba lok ngan ta do luvuttadi met di roo xat amlong ti lorooro.

<sup>16</sup> \*Do di raba toxongkide avot ti ne Moroa, mo axap bok lakde, ateren. La do di raba box i mi levenixe una, levengkakan bok at luuna ni at ne Moroa.

<sup>17</sup> \*Lentaba levengkakan at luuna olip toonu ga repit su basinge luuna ren, la levengkakan at luuna olip aaxa boro at laxairing gara ru kun ta i. Nemi limixin kopmen nemi me Judaia mi lok ngan na levengkakan una aaxa, la nanga mi lolos la mipnovos at lorooro at loroonan atnemi kerekngan leme Judaia.

<sup>18</sup> \*Kuren la nemen gat mita simi aurut nimi mavana ap mo lentaba lengkakan diga subu, atla nemi lengkakan mene nga. La nemi xopmen levenixe una, atla levenixe una ik lox alolos nimi.

<sup>19</sup> La nemi minaba lok keretna, "I ruturun, ketla levengkakan ga repit pes la di lox avolo loxot tinama."

<sup>20</sup> \*I ruturun. Diga repit pes atla di goxo nunu, la nemi miga ru kun nedi atla nemi miga nunu. Ketla nemen gat miguta doma i do mi silok. Mina lok tatao nimi kusu nemi bok mi noxo subu.

<sup>21</sup> Ne Moroa goxo ke atnaasan bok leme Judaia do lengkakan tinotno ba ren. Kereva, mi lok do ni naba ke atnaasan bok nimi? Kopmen tinotno.

<sup>22</sup> \*Kuren la mina ven kisip ba i do ne Moroa i belen tuntun la i tu bok mi loboat. Neni i tu mi loboat tinedi

diga subu vam, ketla i belen tuntun tinimi do nemi move mik lok keneng at lebelen tuntun teren. Ketla do mixok lok bok keneng teren, minaba repit pes bok.

<sup>23</sup> La do leme Judaia dina lok kepe lumun nunu atdi, dinaba ru amlong to at levengkot nunuan nedi diga tu ve gano, atla ne Moroa i epovo ri lok li amlong bok nedi.

<sup>24</sup> Nemi limixin kopmen nemi me Judaia mi lok ngan lengkakan at luuna olip aaxa no ga repit pes la ira ru manga rovana at luuna olip toonu. Ga lolos aleng ti lok mo langas. Limixin me Judaia di lok ngan lengkakan at luuna olip toonu. Kuren la ne Moroa i epovo rinotno do na vaxaru amlong lengkakan no ga repit su, atla ni na lok li amlong di ro at luuna akmokso atdi.

#### *Lebelen Tuntun At Ne Moroa Ti Limixin Axap*

<sup>25</sup> \*Luvutnetak mi luvurinuk. Levelinga ruturun mo ik lox alipe, la a vara i do minaklen i. La ni naba rupe levendoxoma atnemi la mina doma i do lakleklen atnimi i volo lentaba vetpes. Mo levelinga i lok keretna. Loonon taba rulu at limixin me Israel basinge ne Moroa noxok lox abao, naba se mun do buaang timixin kopmen di me Judaia dina rem gili saparap ne Moroa.

<sup>26</sup> \*La melemu at na, limixin axap me Israel dinaba roo su basinge loklok nedi digak lok teren. I ngan Lovoang Kaala i tong i xeretna, "Laradi Loklox Arooro naba laa boro Saion, la na lok kepe laxaloklok kakapmek at livipisik li at ne Jakop.

<sup>27</sup> \*Anaba lok na lekabus eburu minedi at loxonaleng nia ana doxoma kepe laxakapmek atnedi." *Ais 59:20-21*

<sup>28</sup> La limixin me Judaia diga xopara Lagale Lavavang, kuren la di lok ngan lavamunepen at ne Moroa la di ru kun tinemi limixin kopmen

\* **11:16:** Kex 15:17-21; Isi 44:30    \* **11:17:** Ep 2:11-19    \* **11:18:** Jo 4:22    \* **11:20:** Ro 12:16  
 \* **11:22:** Jo 15:2,4; Ib 3:14    \* **11:25:** Ro 12:16; Lu 21:24; Jo 10:16    \* **11:26:** Mt 23:3    \* **11:27:** Jer 31:33-34; Ais 27:9

nemi me Judaia. Ketla mumu mun losoksoxolik axa at ne Moroa, nedi di lok ngan axa larapen tangas teren mumu lempareme avolo atnedi megano.

<sup>29</sup> Moroa kopmen na baba pukus lodoxoma ren tinedi. Kuren la neni noxo lok kepe limixin soksoxolik ka ren la leveloklox anarong ni ga raba di min.

<sup>30</sup> Nemi limixin kopmen nemi me Judaia, nemi miga rongga xepe avot ne Moroa. Ketla anaa mira ruuna ka vam lebelen tuntun teren atla leme Judaia diga rongga xepe i.

<sup>31</sup> I sixit emu mene nga xeretna. Nemi mira ruuna ka vam lebelen tuntun at ne Moroa. Limixin bok me Judaia monga ding tonga xepe ne Moroa, nedi bok dinaba ruuna ka lebelen tuntun teren.

<sup>32</sup> \*La ne Moroa gara lok li vam limixin axap at loxokoxo at lorong-tonga xepe, kusu neni naba lox asusu lebelen tuntun teren tinedi axap.

### *Leemi Asu Ri Ne Moroa*

<sup>33</sup> \*"Lapnovos at ne Moroa i silok aleng. Lodoxoma ren la lakleklen teren i si aleng. Nege i epovo xusu na soxomus lava-suun at lodoxoma ren? Nege i epovo xusu naklen avukat leventaangas teren?"

<sup>34</sup> \*Nege iklen lodoxoma at Leeme Silok? Nege i epovo xusu na vaase aklen i?" *Ais 40:13*

<sup>35</sup> "Nege gara raba vam i mi tepanga, xusu neni giba vorang amlong i rin?" *Jop 41:11*

<sup>36</sup> \*Levempanga axap neni xa ga rudum li di, la levempanga axap ga ravasu mumu xa i la ateren axa. Leemi asu ri ne Moroa amisik la kopmen taxavaxap teren. Tuturun.

## 12

### *Lorooro Xeneng At Lugugu At Ne Moroa*

<sup>1</sup> \*Luvutnetak mi luvurinuk. I vasuun mun at lebelen tuntun silok at ne Moroa rinedik, kuren la a sing nemi xeretna. Mina raba axap nemi ngan laramtaba i rooro ri ne Moroa ri lok lugugu ren la ti lox amomo i. Neni na langas i lox asusu lotu ruturun, mina raba i min.

<sup>2</sup> \*Nemen gat mita reven seo at laxaloklok at na lavatbung menemen. Ketla mina ke ne Moroa na lox ekun levendoxoma atnemi mi lodoxoma ren kusu minaba ravasu ngan luvut-tadi maxat at levempanga mik lox i. La minaba epovo ba xusu mina long lenget ka lodoxoma at ne Moroa ri levempanga i lox avukat la ik lox amomo i la ik mokso.

<sup>3</sup> \*La mumu mun letaba nabalamu at ne Moroa ria, a vaase i na rinemi axap keretna. Nemen gat nemi miguta mi aurut nemi do mi silok ti mo lentaba vetpes. Ketla mina viila mumu avukat lorooro atnemi la mina ven nemi do lununu atnemi i epovo mun mi lodoxoma at ne Moroa tinemi xuren.

<sup>4</sup> \*Nedik di ruuna levenasen kot axap at labantuxu atnedik, la mo levenasen kot axap di ruuna levenasen gugugu vetpes.

<sup>5</sup> \*I lok ngan pam nedik axap na nedik di buaang, ketla nedik di lok ngan legesa bantuxu mene xeneng at ne Karisito. La nedik dik lok eburu ngan levenasen kot axap at legesa bantuxu mun.

<sup>6</sup> \*Nedik di ruuna leventamtaba vetpes. Kuren la nedik atana gugugu mi leventamtaba vetpes atnedik i ngan letaba nabalamu ne Moroa ga raba nedik min. Do laramtaba atnedik ti paase levelinga at ne Moroa, ata lox epovo i ngan lununu atnedik di ruuna i xuren.

<sup>7</sup> Do laramtaba atnedik tik lok tooro, atak lok tooro. Dola ti lox ase, atak lox ase.

<sup>8</sup> \*Mo dola ti paase tooro lentaba vetpes, ata lox epovo box i xuren. Mo dola tim taba, ata raba solo mi

\* **11:32:** Ga 3:22; 1 Ti 2:4 \* **11:33:** Ais 55:8-9 \* **11:34:** 1 Ko 2:16 \* **11:36:** 1 Ko 8:6 \* **12:1:** Ro 6:11,13; 1 Pi 2:5; Jo 4:24 \* **12:2:** Ep 4:23; 5:10,17 \* **12:3:** 1 Ko 12:11; Ep 4:7 \* **12:4:** 1 Ko 12:12 \* **12:5:** 1 Ko 12:27; Ep 4:25 \* **12:6:** 1 Ko 12:4-11; 1 Pi 4:10-11 \* **12:8:** 2 Ko 9:7

lempanga atdik. Mo dola ti lok tatao limixin ngan lamgomgo atdi, ata lok tatao avukat di. Mo dola ti lox asuusu lebelen tuntun ti leventaba vetpes, ata lox epovo i mi lomomo.

### *Labalamu*

<sup>9</sup> \*Nemen gat miguta voovo mene i do mi ruuna labalamu, ketla mina balamu rinotno limixin axap. La mina sok tixirixes kepe leveloklok kakapmek, la minam tebeng alolos at leveloklok i lox avukat.

<sup>10</sup> \*Mina balamu rinotno leventaba vetpes i ngan loxoeton tinotno xeneng at ne Karisito, la mina lolos amisik kusu ti lox asuusu loklok ngangao atnimi ri leventaba vetpes.

<sup>11</sup> \*Mina gugu lolos, la nemen gat migutak molo. Mina gugu taba Leeme Silok mi lebelen nimi la loxoxoma axap atnimi.

<sup>12</sup> \*Lodoxoma voovo atnemi na umsu mi lomomo. Minak lok atnaasan at levenaleng mi ekip tangarang mi levenmumuat, la mina ngising amisik.

<sup>13</sup> \*Mina lox epovo lavakpakes at limixin at ne Moroa, la mina lok maraose mi limixin petpes.

<sup>14</sup> \*Mina ngising ne Moroa xusu neni naba lox anarong nedi di raba nemi mi losongsongot la nemen gat mita tong taba di mi lasaxaek.

<sup>15</sup> \*Mina lok momo minedi di momo la minang teng buru minedi ding teng.

<sup>16</sup> \*Mina nemen eburu mi limixin axap at limila. La nemen gat mita xip aurut axa nemi, ketla mina siam kaka leven gugu ik lok kopok. Nemen gat miguta doma i do lakleklen atnimi i volo aleng.

<sup>17</sup> \*Do tara na lok laxakapmek tinemi, nemen gat miguta vorang i mi laxakapmek. Mina lok tong pen tinotno i xusu mina lok lempanga

ik mokso ro melamgo at limixin axap.

<sup>18</sup> \*Mina lok lempanga avukat i epovo atnimi, kusu minabak lok at lenmila eburu mi limixin axap.

<sup>19</sup> \*Larapen tangas tarak, nemen gat miguta belemamao kaxat kusu ti vorang tavanga. Ketla mina ke xepe ne Moroa na lox asuusu lebelemamao ren, atla Lovoang Kaala i vaase i xeretna,

“Leeme Silok ne Moroa i vaase xeretna, ‘Nenia anaba ru kun la ana lok lugugu rak, la nenia anaba lok lovoporang at lempanga.’ ” *Lal*

*32:35*

<sup>20</sup> \*Ketla nemi mina lox i ngan Lovoang Kaala i tong box i xeretna,

“Dola taradi munepen minemi na roxo, mina raba luxa i. Do neni na minu, mina raba i mi taxadan tin. La mo do mina lox i na loklok, i ngan ta do mim subunga li laxao liplivi ro at lavatlak teren.” *Ler*

*25:21-22*

<sup>21</sup> Nemen gat miguta ke xepe laxakapmek na sev asi nemi. Ketla mina sev asi laxakapmek mi loklox avukat.

## 13

### *Loklok Maxopok At Lubung Amgomgo*

<sup>1</sup> \*Limixin axap dinak lok maxopok at lubung amgomgo at lagavaman atnedik, atla kopmen taasen silok goxo vot gamasa, Moroa xa ga lok li nedi. La lagavaman atdik, ne Moroa ga lok li di.

<sup>2</sup> Kuren la, nege do kopmen na ronga res at lubung amgomgo, i lok ngan do neni i lox abulubun ne Moroa. La laradi do i lox i na, neni naba ru at lavapaase nop mo loklok teren.

<sup>3</sup> \*Limixin di lok luvukat, di noxo marat at luvuttadi amgomgo, ketla

\* **12:9:** 1 Ti 1:5; 1 Pi 1:22; Amo 5:15 \* **12:10:** 2 Pi 1:7; Pl 2:3 \* **12:11:** Gu 18:25; Li 3:15 \* **12:12:** 1 Ts 5:17 \* **12:13:** Ib 13:2 \* **12:14:** Mt 5:44; Gu 7:60; 1 Ko 4:12 \* **12:15:** Sam 35:13 \* **12:16:** Ro 15:5; 11:20; Ler 3:7; Ais 5:21 \* **12:17:** 1 Ts 5:15 \* **12:18:** Mk 9:50; Ib 12:14 \* **12:19:** Mt 5:39; Ro 13:4; 1 Ts 1:6-7; Ib 10:30 \* **12:20:** Mt 5:44 \* **13:1:** Ta 3:1; Ler 8:15; Jo 19:11 \* **13:3:** 1 Pi 2:13-14; 3:13

nedi di lok laxakapmek dinaba marat atdi. Kereva, mi vara i do mi noxo marat at luvuttadi di ruuna levenasen silok? Do mi vara i xuren, minak lok luvukat kusu dinaba emi asu minimi.

<sup>4</sup> \*Atla nedi luvuttadi gugu at ne Moroa la di gugu ri luvukat atnimi. Ketla do mina lok laxapmek, mina marat atdi, atla nedi di ruuna lolos ti lok li nemi at loogu xokoxo. Nedi lavasaxaruki at ne Moroa la dik lok na lugugu at ne Moroa xeneng atnedi dik lok laxapmek.

<sup>5</sup> Kuren la i epovo rinotno do minang tonga res at luvuttadi di ruuna levenasen silok, kopmen dola mina doma xusuk mun lumukmusak at ne Moroa, ketla mumu bok lodoxoma avukat atnimi i tong box i do minang tonga res.

<sup>6</sup> Ni lavasuun bok at na la nemi mi kepe vempilas atla nedi na luvuttadi amgomgo di gugu ri ne Moroa at loxonaleng di lox epovo lugugu atnedi xeneng atnedik.

<sup>7</sup> \*Mina raba di mi levempanga di ngising tin. Do nedi dina sing pilas, mina kepe pilas. Dola ri loklok ngangao, mina lox asu bok loklok ngangao atnimi rinedi.

### *Labalamu La Laulis Linga*

<sup>8</sup> \*Nemen gat miguta sing kaka tavanga at tara vetpes, kusu miba vorang bok ba i rin. Ketla mina lolos kusu mina raba labalamu ri leventaba vetpes. Nege do i balamu leventaba vetpes, na i lox asuusu i do neni ing tonga res at Laulis Linga.

<sup>9</sup> \*Lasangaun Levenaulis Linga i lok keretna,

“Nemen gat uguta longka. Nemen ugutap sev amet tadi. Nemen gat utam nem panga. Nemen gat lodoxoma ram na ngaongao mu levempanga at tara vetpes.” *Pas 20:13-15,17*

La leventaba levempanga bok ik lok keneng at Laulis Linga. La lavasuun

atnedi axap na levenngas linga i lok keretna,

“Una balamu leventaba vetpes ngan u balamu axa u.” *Mas 19:18*

<sup>10</sup> \*Nege do i balamu lara vetpes, neni xopmen tinotno noxo lok laxapmek tin. Do mina balamu, i ngan do mi ronga res at lasangaun axap Levenaulis Linga.

<sup>11</sup> \*Mina lox epovo loklok at labalamu, atla nemi miklen loxonatat aleng sala nga i mo. Loxonaleng ira vot pam tinimi ri aus kaxat at lanunga, atla loxonaleng tidik ti roo su, mo ira auret ta. Gano at laaleng nedik diga nunu kaxat avot teren ga vaxalom.

<sup>12</sup> \*Noxo lox abao la lamain na xap, la laaleng kangking na vot ta. Mina xap ta at loklok laxampanga at lamain, la mina lok kaka levempanga esep ti esep at laaleng kangking.

<sup>13</sup> \*Mina lok kaka luruptuvuk nunuan, na ngan do limixin dik lok keneng at laxasep at laaleng kangking. Nemen gat miguta raba gamasa lorooro atnemi ri levempanga ik lok kapmek lorooro, ngan liinin tangtangu laxangkadan lolos, loklok kakapmek maxamang at lixitkis epot, lengkot mamangan, lekarakat, la levereven peves.

<sup>14</sup> \*Ketla mina lok ka levempanga esep at Leeme Silok ne Iesu Karisito, la mina doxoma xepe leveloklok kakapmek ngan lavavara at labantuxu mun.

## 14

### *Nemen Uguta Viila Loklok At Tara Vetpes*

<sup>1</sup> \*Mina siam abeles kaka mo laradi keneng at lotu atnimi, lununu ren kopmen na lolos. Ketla nemen gat miguta etep mi levelinga eburu min mumu mo leveloklok ik paxaru kaxat lekarakat.

\* **13:4:** Ro 12:19 \* **13:7:** Mt 22:21 \* **13:8:** Mt 22:39-40; Je 2:8 \* **13:9:** Pas 20:13-15; Mas 19:18  
 \* **13:10:** 1 Ko 13:4-7 \* **13:11:** Ep 5:14; 1 Ts 5:6-7 \* **13:12:** 1 Jo 2:8; Ep 5:11; 6:11 \* **13:13:** Lu 21:34; Ep 5:18 \* **13:14:** Ga 3:27 \* **14:1:** Ro 15:7 \* **14:2:** Lur 1:29; 9:3

2 \*Lununu at laradi ik lox i xusu neni i epovo ri anan at levenasen luxa axap. Ketla laradi lununu ren kopmen na lolos, neni i anan mun levempanga boro xataamang.

3 \*Laradi do i anan gamasa guta lox abulubun gat lara do i anan mun levenbi. La neni do i anan levenbi, guta lox abulubun gat mo laradi ga siam kaka i ri anan levenasen luxa axap, atla ne Moroa gara siam kaka vam i.

4 \*Kopmen lugugu atnimi kusu mina viila mumu loklok at laradi gugugu at lara vetpes. Keke mulus i, do neni na ru lolos koplana subu, ketla anai lavanga xusuk mun atdu mi lamgomgo ren. Ketla neni naba ru lolos, atla Leeme Silok mun i epovo ri lox alolos i.

5 \*Tara taradi naba doma i do lara laaleng move neni laaleng silok tinotno la tara vetpes naba doma i do levenaleng axap i epovo mene nga. La nedu getgesara xa dunak lox alolos levendoxoma atnedu xuren.

6 Nege i doxoma alolos i do lara laaleng move i silok, neni i lox i mi loklok ngangao ren ti Leeme Silok. Nege do i anan gamasa levempanga axap, i lok box i mi loklok ngangao ren ti Leeme Silok, atla neni i tong loklox avukat ti ne Moroa ri levempanga anan. Nege do kopmen na anan teventaba teveluxa, neni i lok box i mi loklok ngangao ren ti Leeme Silok, la i tong loklox avukat bok ti ne Moroa rin.

7 Kopmen teta atdik na ruuna torooro xusu tin kusuk mun, la kopmen bok teta atdik na see ka lanmet do tin kusuk mun.

8 \*Nedik di rooro, di rooro ri Leeme Silok la nedik di remet nop bok laasen at Leeme Silok. Keke i do ata met koplana rooro, ketla nedik move at Leeme Silok.

9 Ni lavasuun teren la ne Karisito ga met la ga roo xat amlong kusu neni naba lok ngan Leeme Silok

tinedi di rooro la tinedi bok diga met pam.

10 \*Tila ba mi viila mumu leveloklok at luvutneton nimi? Tila la mi lox abulubun di? Nedik axap na tanabaru ro melamgo at ne Moroa, la neni naba reven mumu loklok atnedik axap.

11 \*I ngan Lovoang Kaala i vaase levelinga at Leeme Silok keretna,

“Leeme Silok ne Moroa i lok keretna. I raturun do nenia Luntoo Avolo, la i raturun bok do limixin axap dinaba xis mi lempatgulom atdi ro melamgo rak, la limixin axap dinaba tong asu i do nenia ne Moroa.”

*Ais 49:18*

12 \*Kuren la nedik axap ataba raba lavapaase axasep ti ne Moroa mumu lorooro atdik.

*Nemen Gat Uguta Lox Asubu Neta*

13 Kuren la mina xap ta at liviila mumu leveloklok at luvutneton nimi. La mina doma i do nemen gat miguta lok tavanga ri lok luvutneton nimi na sak kikixin koplana subu beles ti laxapmek.

14 \*Loklok tarak eburu mi Leeme Silok ne Iesu i lox ia la nia aklen tuturun i do kopmen tempanga anan na bilinga varang gamasa mene nga. Ketla do taradi xa na nunu do lempanga anan mo i bilinga, mo lempanga anan naba bilinga rin.

15 \*Mo do mina lox abulu luvutneton nimi at leveluxa nemi mi anan i, nemi mixo lox asuusu labalamu. Nemen gat miguta lok leveluxa no nemi mi anan i na lox asubu rinotno laradi no ne Karisito ga uu xorop tin.

16 \*Nemen miguta lok tavanga no nemi mi doma i do i lox avukat la na lok kapmek levenasen atnimi.

17 Linintoo at ne Moroa neni xopmen loklok ti anan la ti inin. Ketla neni lorooro manmanton, la limila, la lomomo at Loroonan Kaala im taba i.

\* 14:3: Kl 2:16 \* 14:4: Mt 7:1; Je 4:11-12 \* 14:5: Ga 4:10 \* 14:8: Lu 20:38; Ga 2:20; 1 Ts 5:10 \* 14:10: Mt 25:31-32; Gu 17:31; 2 Ko 5:10 \* 14:11: Ais 45:23; Pl 2:10-11 \* 14:12: Ga 6:5 \* 14:14: Gu 10:15; Ta 1:15 \* 14:15: 1 Ko 8:11-13 \* 14:16: Ta 2:5

<sup>18</sup> La dola nege i lox epovo lugugu ri ne Karisito at na langas, neni i lox amomo ne Moroa la limixin dinaba lok momo mi na loklok teren.

<sup>19</sup> \*Kuren la minak paxaru li leven-doxoma atnemi at levempanga naba raba nemi mi limila, la naba lok tooro bok ti lox alolos lununu at limixin axap.

<sup>20</sup> \*Nemen gat miguta sele utut lugugu ne Moroa gara lok pam i, mumu mun leveluxa mi anan i. Lev-eluxa axap, i epovo do mina anan i. Ketla i lok kapmek do mina an tavanga naba lox asubu luvutneton nemi uto xeneng at laxapmek.

<sup>21</sup> Langas avukat mene minaba lox i xeretna, mina xap ta at laanan levempanga lolos la liinin kadan lolos la teveloklok sala bok naba lok luvutneton nemi dina subu.

<sup>22</sup> Mina rebeng alis lununu atnemi at na levempanga xantubu atnemi mi ne Moroa. Luvukat ti mo laradi kopmen na suma xapmek at lox-onaleng ni i lok lempanga ua neni i doma i do ik mokso.

<sup>23</sup> \*Ketla do tara na anan aptap-tang gamasa tavanga ua ixo anan i, ne Moroa naba lox abaava i at loxonaleng do neni na anan i, atla neni xopmen na anan i mi lununu ren. Kuren la, levempanga salai do kopmen na tu at lununu atnemi la do mi lox i, neni laxapmek.

## 15

### *Mina Momo Mi Leventaba Vetpes La Kopmen Do Nemi Axa*

<sup>1</sup> Nedik lununu atnedik i lolos, ata xip tooro nedi dixo lolos mi leven-naknixip atnedi. La nemen gat dik guta doma xusuk mene nedik la ata lox amomo dik.

<sup>2</sup> \*Ketla ata lox amomo luvutneton nedik la ata lok tooro di, kusu ti lox aru alolos lununu atnedi.

<sup>3</sup> I ngan ne Karisito goxo momo axa min. Ketla loklok teren i lok ngan Lovoang Kaala i tong i xeretna,

“Levelinga xapmek atnedi diga tong asu i ru, ga subu mavana rak.”

*Sam 69:9*

<sup>4</sup> \*Levempanga axap ik lok at Lovoang Kaala, diga malagan i gano xusu ti lox ase nedik, kusu nedik atanaba lok kaka lodoxoma voovo xeneng at Lovoang Kaala mo im taba dik mi loklox atnaasan la lavapaase tooro.

<sup>5</sup> La a vara i do ne Moroa at loklox atnaasan la at lavapaase tooro na raba bok nemi mi luruburu xantubu atnemi xa na ngan langas ne Iesu Karisito gara lok pam i,

<sup>6</sup> kusu minaba ruuna mun legesa doxoma. La nemi eburu minaba emi asu mi laasen at ne Moroa la neni ne Temen Leeme Silok atnedik ne Iesu Karisito.

### *Lagale Lavavang Ti Limixin Kopmen Di Me Judaia*

<sup>7</sup> \*Kuren la mina esiam ela xaka atnaasan nemi getgesara, i ngan bok ne Karisito gara siam kaka vam nemi kusu mina lox asuusu leemi asu ri ne Moroa.

<sup>8</sup> \*Nenia a tong i rinemi do ne Karisito i lok ngan lasaxaruki at leme Judaia kusu ti lox asuusu i do ne Moroa neni i raturun mi levelinga ren la ti lox asoorun bok leveng kakaape at ne Moroa eburu mi lempareme avolo megano.

<sup>9</sup> \*La ti lox avolo limixin kopmen nedi me Judaia xusu dina epovo ri emi asu mi ne Moroa mumu lebelen tuntun teren. I ngan Lovoang Kaala i vaase i xeretna,

“Ni lavasuun teren la nia ana emi asu minu kantubu at limixin kopmen di me Judaia, la anak pixan emi asu mi laasen taram.” *Sam 18:49*

<sup>10</sup> La i vaase bok keretna,

“Nemi limixin kopmen nemi me Judaia mina momo eburu mi limixin at ne Moroa.” *Lal 32:43*

<sup>11</sup> La i vaase bok keretna,

“Nemi axap limixin kopmen nemi me Judaia, mina emi asu

\* **14:19:** Ro 12:18; 15:2    \* **14:20:** 1 Ko 8:13    \* **14:23:** Ta 1:15    \* **15:2:** Ro 14:19; 1 Ko 9:19; 10:24,33  
\* **15:4:** Ro 4:23-24; 1 Ko 10:11    \* **15:7:** Ro 14:1    \* **15:8:** Mt 15:24    \* **15:9:** Gu 3:25; Ro 11:30



mi Leeme Silok. Limixin at lengkot axap mina xip aurut laasen teren.” *Sam 117:1*

<sup>12</sup> \*La ne Aisaia i vaase bok keretna, “Lara at livipisik li at ne Jesi naba vot, la neni naba ravasu xusu ti lok tatao limixin kopmen nedi me Judaia, la dinaba lok li levendoxoma atnedi ren.” *Ais 11:10*

<sup>13</sup> A ngising do ne Moroa at levendoxoma voovo axap, na suxa aumsu nemi mi lomomo la limila mumu lununu atnemi saparav i, kusu levendoxoma voovo atnemi naba suu silok eburu mi lolos at Loroonan Kaala.

#### *Levelinga Loklox Alolos At Ne Pol*

<sup>14</sup> Luvutnetak mi luvurinuk. Nenia a suma rinotno i dola nemi mi umsu mi luvukat, la mi umsu bok mi lakleklen, la mi epovo xusu mina elox ase ela.

<sup>15</sup> Ketla keneng at na lovoang a malagan levelinga lolos kusu ti lox axasep levendoxoma atnemi ri levempanga nenia agara vaase vam nemi min. Nenia a epovo ri paase lolos tinimi mila gano ne Moroa ga raba ia mi na lugugu,

<sup>16</sup> \*i ngan laradi gugu at ne Iesu Karisito ti gugu ri limixin kopmen nedi me Judaia. A vavang mi Lagale Lavavang boro at ne Moroa ngan lamaasa, kusu ne Moroa naba siam kaka limixin kopmen di me Judaia ngan laramtaba at Loroonan Kaala ga gagas min tin.

<sup>17</sup> Nenia at kis esogo eburu mi ne Iesu Karisito, kuren la nia a epovo xusu ana momo at lugugu rak ti ne Moroa.

<sup>18</sup> \*Anaba paase xusuk mun at levempanga ne Karisito gara lok tooro vam ia min la ti lam kaka limixin kopmen di me Judaia xusu dina rongga res at ne Moroa xeneng at levelinga rak la leven gugu rak.

<sup>19</sup> La keneng bok at lolos at leveloklok katling la levempanga

sangsangu, la at lolos at Loroonan Kaala. La at lempatpas tarak boro Jerusalem uto Ilirikam la mo levenmenemen kantubu, agara vaase asu avukat pam Lagale Lavavang at ne Karisito.

<sup>20</sup> \*Lodoxoma amisik tarak kusu ana paase asu Lagale Lavavang to at levenmenemen di goxovisi gita rongga ka na Lagale Lavavang, kusu a noxo ru mun pana at lugugu laradi vetpes gara lok pam i.

<sup>21</sup> I ngan Lovoang Kaala i vaase i xeretna, “Nedi di goxo tong i ridi, dinaba ven kibis i, la nedi di goxovisi gita rongga i, dinabaklen i.” *Ais 52:15*

<sup>22</sup> \*Neni lavasuun teren la buaang levenaleng nenia goxo epovo agita vot saparap nemi.

#### *Lodoxoma At Ne Pol Kusu Tit Pas Uto Rom*

<sup>23</sup> Ketla amo ba ara lox axap ba lugugu rak at na levenmenemen, la agara vavara amisik at laxanmaares kusu anabat pas la ana ven nemi.

<sup>24</sup> \*La a doma i do anaba lox epovo ba i mo. A vara i do anaba ven nemi at loxonaleng nenia ana lok lavatpas tarak uto Spein, la minaba lok tooro box ia rit pas ugo melemu at loklok tarak eburu minemi at lentaba levenaleng.

<sup>25</sup> \*Ketla amonga, anat pas be uto Jerusalem kusu ti lok lugugu at ne Moroa xeneng at limixin teren go. Nia anabat pas ugo,

<sup>26</sup> \*atla limixin at ne Moroa boro Masadonia la boro Grik di vara i xusu dina raba leventamtaba loklok tooro atnedi ri limixin banbalo dik lok kantubu at limixin at ne Moroa ro Jerusalem.

<sup>27</sup> \*Nedi xa diga doma i do dina lox i, atla di suma i do diga lok kaka laxaloklox anarong solo xeneng at Lagale Lavavang ga ravasu at levenngusno at limixin nunu boro Jerusalem. Kuren la limixin kopmen

\* **15:12:** Li 5:5 \* **15:16:** Ro 1:5; 11:13; 12:3; Pl 2:17 \* **15:18:** 2 Ko 3:5 \* **15:20:** 2 Ko 10:15-16

\* **15:22:** Ro 1:10-13 \* **15:24:** 1 Ko 16:6 \* **15:25:** Gu 19:21 \* **15:26:** 1 Ko 16:1; 2 Ko 8:1; 9:2,12;

Gu 24:17 \* **15:27:** Ro 9:4; 1 Ko 9:11

nedi me Judaia di doma i do di gugu porang ti leme Judaia mi leveloklox anarong at labantuxu.

<sup>28</sup> Do ana lox epovo axav i na la ana raba axap levempilas diga gagas li i xusu tinedi, ana gagas ba rit pas uto Spein, la ap mo lavatpas tarak uto, anaba ven ba nemi.

<sup>29</sup> \*Do nenia ana vot pasa nemi, aklen tinotno i do anabat pas eburu mi loklox anarong silok tinotno at ne Karisito.

<sup>30</sup> \*Luvutnetak mi luvurinuk, a sing nemi xeneng at laasen at Leeme Silok ne Iesu Karisito la labalamu at Loroonan Kaala im taba i. A vara i xusu mina lok tooro ia mi levesingising ti ne Moroa ri loklok tatao ren tia.

<sup>31</sup> Mina ngising ti ne Moroa xusu neni nabak lok tatao ia at lavatpas tarak kantubu at limixin dixo nunu dik lok keneng at lenep Judaia, la lugugu bok tarak keneng at lemene-men silok Jerusalem kusu limixin at ne Moroa me go dinaba siam kaka i.

<sup>32</sup> Kuren la nenia anaba vot pasa nemi mi lomomo, do lavavara at ne Moroa xuren, la anaba lok kaka lolos eburu bok minemi.

<sup>33</sup> A vara i do ne Moroa at limila nak lok eburu minemi axap. I ruturun.

## 16

### *Levempapaase Loklok Momo*

<sup>1</sup> Na levelinga ti vaase axasep nemi mi lara neinen dik laasen teren ne Poebe, la neni ga lok lugugu silok keneng at lotu at lemenemen Senkiria.

<sup>2</sup> Mina seega rangarang i keneng at laasen at Leeme Silok, i epovo mi loklok at limixin at ne Moroa, la minabak lok tooro i at levempanga neni bak pakes tin. Atla neni garak lok tooro vam buaang limixin, la nenia bok.

<sup>3</sup> \*A lox aonon lavapaase momo rak ti ne Pirikila mi ne Akuila, nedu lenasun duga gugu eburu minia xeneng at lugugu at ne Iesu Karisito,

<sup>4</sup> la duga abelemes tinotno bok mi lorooro atdu ri lok tooro ia. La kopmen do nenia xusuk, ketla limixin axap bok at laraogu lotu atnedi kopmen di me Judaia.

<sup>5</sup> \*Lavapaase momo bok tinedi dit pot buru ro at loogu atdu. Lavapaase momo bok ti lentangas orong tarak ne Epinitas, neni laradi avot at lenep Asia ga nunu at ne Karisito.

<sup>6</sup> Lavapaase momo bok ti ne Maria ga gugu lolos ti lok tooro nemi.

<sup>7</sup> Lavapaase momo bok ti ne Endronikas mi ne Junias luradi me Judaia no dugak lok eburu minia ro at loogu xokoxo. La luvuttadi vavang diklen avukat nedu la nedu duga lok ngan luradi mumu asu ne Karisito avot tia.

<sup>8</sup> Lavapaase momo bok tarak ti ne Apilietas lentangas tarak keneng at lurutu buru at Leeme Silok.

<sup>9</sup> Lavapaase momo bok ti ne Eban laradi gugu bok tarak keneng at lugugu at ne Karisito la ti lentangas orong tarak ne Sitakis.

<sup>10</sup> Lavapaase momo bok ti ne Apelis, ga lox asuusu i do luruburu ren mi ne Karisito i tu atmatkun. Lavapaase momo bok ti ne Aristabalas midi loxoetemen.

<sup>11</sup> Lavapaase momo bok ti ne Ero-dian leeme me Judaia la ti luvutnetak at laasen at Leeme Silok dik lok at loogu at ne Nakiso.

<sup>12</sup> Lavapaase momo bok tarak ti ne Taraipina mi ne Taraiposa nedu lutkin du gugu lugugu at ne Moroa la ti lentangas orong bok tarak ne Pesis neni latkin gak lok lugugu silok at Leeme Silok.

<sup>13</sup> \*Lavapaase momo bok ti ne Rupas laradi i gugu avukat lugugu at Leeme Silok, la ti nenen bok no gak lok tatao ia ngan ta do ne nitna.

<sup>14</sup> Lavapaase momo bok tarak ti ne Asinkritas, la ne Peligon, la ne Eramas, la ne Patrobas la ne Eemes, la nedi bok luvutnetak keneng at laasen at ne Karisito mo dik lok eburu minedi.

\* 15:29: Ro 1:11 \* 15:30: 2 Ko 1:11; Kl 4:3; 2 Ts 3:1 \* 16:3: Gu 18:2,18,26 \* 16:5: 1 Ko 16:15,19; 2 Ti 1:15 \* 16:13: Mk 15:21

<sup>15</sup> Lavapaase momo bok ti ne Pilologas mi ne Julia, ti ne Nerius bok mi neinen, la ti ne Olimpas bok eburu mi limixin axap at ne Moroa mo dik lok eburu minedi.

<sup>16</sup> \*Mina eseega rangarang mi lenetnes i xaala. Limixin axap bok at laraogu lotu at ne Karisito di lox aonon lavapaase momo atnedi rinemi.

### *Levempapaase Avit*

<sup>17</sup> \*Luvutnetak mi luvurinu, monga a sing nemi xeretna. Minak lok tatao nemi basinge luvuttadi no dik lok do dinak lok levenekarakat, la dik lox antun lununu at limixin la nedi no dik lox abulubun leveloklox ase nemi migara lok kaka vam i. Minak lok petpes basinge nedi.

<sup>18</sup> \*Leventaba dik lok mo leveloklok, kopmen dina gugu ri Leeme Silok atnedik, ne Karisito, ketla di gugu mun tinedi xa. Levempapaase atnedi ik lox avukat tinotno eburu mi levendoxoma atnedi. Kerepmo dik lox atdan kaka limixin, lununu atdi xopmen na lolos, kusu dina sar asoogong di.

<sup>19</sup> \*Limixin axap digara rongga vam lorongtonga res atnemi saparap Lagale Lavavang, kuren la a momo aleng minemi. Ketla a vara i do minaklen leveloklox avukat, la mina ven kepe lavanga i lok kapmek.

<sup>20</sup> \*La ne Moroa laradi at lenmila, mo ma lixilik na but povorok ne Satan to maxopok at lengkangkedek atnemi.

Letaba nabalamu at Leeme Silok atdik ne Iesu nak lox eburu minemi.

<sup>21</sup> \*Ne Timoti bok laradi gugu rak i lox aonon lavapaase momo ren tinemi. Nedi mi ne Lusias, la ne Jeson, la ne Sosipata bok kuren. Nedi legesa vapaase rak boro Judaia.

<sup>22</sup> Nenia bok na ne Tetias, a ru katling ne Pol ti malagan na lovoang,\* a lox aonon lavapaase

momo xeneng at laasen at Leeme Silok.

<sup>23</sup> \*Ne Gaius laradi no nema mak lok lotu ro at loogu ren i lox aonon lavapaase momo bok teren tinemi.

La ne Erastas bok laradi ik lok tatao lempilas at lemenemen silok eburu mi neton nedik ne Kuatas nedu du lox aonon bok lavapaase momo atnedu.

<sup>24</sup> Letaba nabalamu at Leeme Silok atdik ne Iesu Karisito nabak lok eburu minemi axap. Tuturun.

### *Lisingising Loklox Axap*

<sup>25</sup> \*Ata emi asu mi laasen at ne Moroa. Neni i epovo ri lox aru lolos lununu atnemi, mumu Lagale Lavavang nenia a vavang min. Ni Lagale Lavavang at ne Iesu Karisito, mo lavapaase asu at luruturun gak lok lipe at laxanmaares buaang.

<sup>26</sup> Ketla amonga, mo levelinga ruruturun gara ru asuvos pam ti laxasep, keneng at levenmamalagan at luvuttadi vapaase ali. Ne Moroa laradi xopmen taxavaxap teren ga vaase asu i xusu limixin at larabung mixin axap dinabaklen i, la nedi axap dinaba nunu ren la dinang tonga res teren.

<sup>27</sup> \*Ata emi asu kusuk mun mi laasen at ne Moroa neni Laradi Akleklen la leemi asu bok tin amisik mumu lugugu at ne Iesu Karisito la kopmen taxavaxap teren. I ruruturun.

\* **16:16:** 1 Ko 16:20; 1 Pi 5:14 \* **16:17:** Mt 7:15; Ta 3:10 \* **16:18:** Pl 3:19; Kl 2:4; 2 Pi 2:3 \* **16:19:** Ro 1:8; Mt 10:16; 1 Ko 14:20 \* **16:20:** Ro 15:33; Lur 3:15 \* **16:21:** Gu 16:1-2; 19:22; 20:4 \* **16:22:** Pol ga vaase i na levelinga ri ne Tetias la neni ga malagan i. \* **16:23:** 1 Ko 1:14 \* **16:25:** Ep 1:9; 3:5,9; Kl 1:26; Ro 1:5 \* **16:27:** 1 Ti 1:17; Ju 1:25

**1 Korin**  
**Lovoang Avot At Ne Pol**  
**Ti Limixin Nunu To**  
**Korin**  
**Levelinga Loklox**  
**Axasep**  
**Lamaares 57 A.D.**

Ne Pol gak lok to Epesas la ni ga malagan na levelinga rinedi limixin nunu ro Korin. Korin neni lemenemen gak lok gomgo to lenep silok Grik. La keneng at nai lemenemen lentaba luvuttadi nedi leme Grik la lentaba nedi me Judaia. Mo luvuttadi digak lok go buaang atnedi digap novos aleng la diga ruuna buaang laxampanga solo la diga ruuna bok levenakleklen silok, ketla nedi diga lotu parap lempoovovanga la levesumsuma xapmek bok at na lavatbung menemen ga umsu nga xeneng at levendoxoma atdi.

At lavatpas sepsev agepura at ne Pol, neni ga vaase asu avot mo Lagale Lavavang tinedi limixin to Korin. Neni ga anasa go at lamaares kudun la loxot atat. (Leven Gugu 18:1-17) Melemu at nai Apolos gat pas ugo la ga vavang. La ne Pol ga ronga levelinga mumu nedi limixin nunu boro Korin do goxo lok nunuan. La nedi bok limixin me Korin diga malagan aonon lovoang ti ne Pol la diga sue i mi lentaba lempanga bok. Kuren la ne Pol ga lox aonon na lovoang tinedi la ga malagan li levelinga lolos tidi mumu leveloklok kakapmek atdi, la ga vorang bok levesusue atdi.

**Lengkot silok keneng at na lovoang**

- 1:1-9 Lempapaase loklok momo at ne Pol tinedi.
- 1:10-4:21 Pol ga vaase sok di mila digat kis epeseves.
- 5:1-7:40 Lorooro at laradi nunu la lavaun epot.
- 8:1-11:1 Leventuptuvuk diba mu asu i.

11:2-14:40 Limixin nunu di lok ngan labantuxu at ne Iesu.

15:1-58 Laxakatu kaxat amlong at ne Iesu boro at lanmet.

16:1-4 Lempilas uto at limixin boro Jerusalem.

16:5-24 Pol ga lox axap levelinga ren.

*Lavapaase Axasep*

<sup>1</sup> Nenia ne Pol. Nema mi ne Sositenes, neni neton dik at laasen at ne Karisito, ma vaase momo rinimi. Moroa ga ro ka ia kusu ana paase asu Lagale Lavavang at ne Iesu Karisito ngan lun pavang teren.

<sup>2</sup> \*A malagan i na lovoang tinemi limixin at ne Moroa dom Korin. Moroa ga lox anmanton luruptuvuk atnemi at lekngen ne Iesu Karisito xusu nemi limixin manmanton teren. Moroa ga ro xaka vam nemi do ateren. La nemi mit kis esogo amisik mi ne Iesu Karisito, kerekngan limixin to at lengkot axap di lotu parap Leeme Silok atdik ne Iesu Karisito, neni Leeme Silok atdi la Leeme Silok bok atdik.

<sup>3</sup> \*Letaba nabalamu mi lenmila rinimi boro at ne Temen nedik la Leeme Silok ne Iesu Karisito.

*Leveloklok Anarong Ne Moroa Ga Raba Nedik Min*

<sup>4</sup> Do nia a ngising, a tong loklox avukat amisik ti ne Moroa mumu nemi, mila ni ga raba nemi mi letaba nabalamu ren keneng at laasen at ne Iesu Karisito.

<sup>5</sup> La kantubu at nom mirapnovos pam at leveloklox anarong at ne Moroa, i ngan laramtaba ri tong asu levelinga at ne Moroa la lakleklen nunuan at levelinga at Lovoang Kaala.

<sup>6</sup> La kerepmo neni ga lox asusu i rinimi do lavavang mumu ne Karisito maga tong asu i rinimi ga ruturun.

<sup>7</sup> \*La livipisik teren keretna, ne Moroa ira raba vam nemi mi leveloklox anarong axap la mi noxot kis pakpakes bok ba se at nom laaleng Leeme Silok atdik ne Iesu Karisito

\* 1:2: 1 Ko 6:11; Gu 9:14 \* 1:3: Ro 1:7 \* 1:7: Lu 17:30; 2 Ts 1:7; Ta 2:13

naba vor asaxaven, i ngan tai mo mi nemen tangais i mi lomomo.

8 \*Neni bok naba lox alolos lununu atnimi se at laaleng kavaxap la kerepmo at laaleng ete at Leeme Silok ne Iesu Karisito neni noxo ven terek kaka laxakapmek atnimi.

9 \*Moroa ga ro xaka vam nimi xusu minat kis esogo mi ne Iesu Karisito, Nitna ne Moroa, neni Leeme Silok atdik. Moroa neni naba ruturun ti limixin teren la naba lox asoorun levelinga neni ga tong li i.

### *Pol Ga Vaase Lolos Mumu Lixitkis Ekarakat*

10 \*Luvutnetak mi luvurinuk. At laasen at Leeme Silok atdik ne Iesu Karisito, a sing nimi do nemi axap mina etaba belen, kusu lixitkis epe-seves noxo nemen kantubu atnimi. Nemi axap mina ru buru mi legeso doxoma la mi lumulus at lebelen nimi.

11 Luvutnetak mi luvurinuk. Nia a tong i na rinimi mila lentaba di nemen at loogu at ne Koloii digara tong asu vam i ria do lekarakat mo i nemen kantubu atnimi.

12 \*Lekarakat atnimi i lok keretna. Nemi getgesara mi epaase mi lev-empapaase xopmen nak mokso. Lentaba di lok, "Nema at ne Pol." La lentaba di lok, "Nema at ne Apolos." La lentaba di lok, "Nema at ne Pita." La lentaba di lok do, "Nema at ne Iesu Karisito."

13 Kereva, i lox avukat do limixin at ne Karisito dina epeseves? Kereva, nenia ne Pol aga uu nop loklok atnimi rovana at laxaba? Kereva, miga lok ka lesepe susu at laasen at ne Pol? Kopmen tinotno.

14 \*Nia a tong loklox avukat ti ne Moroa do nenia xopmen a goxo sep susu buaang tentaba atnimi, kusuk mun ne Krispas la ne Gaius.

15 Kuren la kopmen tara i epovo na tong i do miga lok ka lesepe susu at

laasen tarak la kerepmo nemi at ne Pol.

16 \*Aga sep susu bok ne Stepanas eburu minedi diga nemen at loogu ren, ketla axo xasep do aga sep susu bok tentaba vetpes.

17 \*Karisito goxo riki ia xusu ana sep susu limixin. Ni ga riki ia xusu ana tong asu Lagale Lavavang. La nenia xopmen goxo tong asu i mi lakleklen at limixin mun. Do kuren, a lok laniu at ne Karisito ngan lavanga gamasa la kopmen tololos teren.

### *Lolos Mi Lakleklen At Ne Moroa Ne Iesu Ga Lox Asuusu I*

18 \*Lagale Lavavang mumu laniu at ne Iesu rovana at laxaba i lok ngan lavanga gamasa rinedi dinaba seeve. Ketla tinedik, limixin atanaba roo su, Lagale Lavavang i lok ngan lolos at ne Moroa rinedik.

19 At Lovoang Kaala Moroa ga lok keretna,

"Anaba sele utut kepe levendoxoma atnedi limixin dokdodoxoma, la ana sok tixirixes kepe lakleklen atnedi limixin akleklen." *Ais 29:14*

20 \*La kereva ba levelinga at limixin dokdodoxoma? La kereva ba levelinga at limixin akleklen? La kereva ba levelinga at limixin di etep mi levelinga at na lavatbung menemen? Moroa ira lox asuusu vam i do levelinga at na lavatbung menemen ni lavanga gamasa.

21 \*Moroa i ruuna lakleklen solo la ni ga lok pe limixin akleklen kusu kopmen di noxo epovo na vuse sa ren mi lakleklen atdi xa. Ketla ne Moroa ga lok losoxovo do ni naba lox arooro nedi dina nunu at Lagale Lavavang, keke i do limixin di tong i do Lagale Lavavang ni lavanga gamasa.

22 \*Limixin me Judaia di vara tempanga sangsangu ri lox amuat Lagale

\* 1:8: Pl 1:6; 1 Ts 3:13; 5:23 \* 1:9: 1 Jo 1:3; 1 Ko 10:13; 1 Ts 5:24 \* 1:10: Pl 2:2 \* 1:12: 1 Ko 3:4; Gu 18:24-28; Jo 1:42 \* 1:14: Gu 18:8; Ro 16:23 \* 1:16: 1 Ko 16:15 \* 1:17: Mt 28:19; Jo 4:2 \* 1:18: 2 Ko 4:3; Ro 1:16 \* 1:20: Ais 19:12; 33:18; 44:25; Jop 12:17 \* 1:21: Mt 11:25 \* 1:22: Mt 12:38; Gu 17:28,32 \* 1:23: Ro 9:32; 1 Ko 2:14

Lavavang. La limixin me Grik di vara mene levendoxoma nunuan.

<sup>23</sup> \*Ketla nema ma vavang mene mi laniu at ne Karisito ga uu rovana at laxaba. I lolos aleng do leme Judaia dina nunu do Lanarong ga uu xerepmo, kuren la di noxo nunu at ne Karisito. La mo laniu i ngan lavanga rangtangu ri limixin me Grik.

<sup>24</sup> \*Ketla ne Moroa ga soxolik ka lentaba atnedi leme Judaia la leme Grik. Ma vavang mi laasen at ne Karisito, neni i lox asuusu lolos la lakleklen at ne Moroa rinedi.

<sup>25</sup> \*Lagale Lavavang mumu laniu at ne Iesu, nedi di tong i do lavanga gamasa. Ketla ni i volo aleng lakleklen at limixin. La nedi di tong box i do laniu at ne Karisito i lox asuusu i do ne Moroa neni ixo ruuna tololos, ketla lolos teren i volo lolos atnedi.

<sup>26</sup> \*Luvutnetak mi luvurinuk. Mina doma bilong ti lorooro atnimi ap mo laaleng ne Moroa ga ro xaka nemi. Kopmen goxo buaang atnimi digakleklen solo at lemeren limixin la kopmen goxo buaang bok atnimi diga ruuna levenasen silok la kopmen goxo buaang bok atnimi diga lox avukat at lemeren limixin.

<sup>27</sup> Ketla ne Moroa ga soxolik ka nedi limixin kopmen takleklen atdi xusu ti lox asi limixin akleklen at na lavatbung menemen. La ne Moroa ga soxolik ka vam nedi xopmen tevenasen silok kusu ti lox asi limixin silok at na lavatbung menemen.

<sup>28</sup> Moroa ga soxolik ka nedi, limixin diga ven asi ridi ngan lempanga gamasa la diga lox abulubun kepe di. Ne Moroa ga lox i nom kusu na lox alixilik mo lempanga i silok at lodoxoma at limixin,

<sup>29</sup> \*la kusu tara noxo xip aurut laasen teren to melango at ne Moroa.

<sup>30</sup> \*Ketla ne Moroa gara ro ka vam nemi ri lixitkis ekilen eburu mi ne Iesu Karisito. La ne Moroa ga sox-

olik ka vam ne Karisito ngan laxasep tidik. Keneng mun at ne Iesu Karisito, ne Moroa ga vaxaxis buru dik min, la ga lok dik ngan limixin melemelengan teren, la gara lox asepmus nedik basinge laxakapmek atdik.

<sup>31</sup> \*Kuren la i ngan Lovoang Kaala i tong i do,

“Do tara i vara na xip aurut laasen at tara, neni na xiv aurut laasen at Leeme Silok.” *Jer 9:24*

## 2

### *Lavavang Mumu Laniu At Ne Iesu Karisito*

<sup>1</sup> \*Luvutnetak mi luvurinuk. Nenia agat pas udo saparap nemi xusu ana vavang tinimi mi levelinga at ne Moroa. Kopmen lavapaase rak goxo sixit nunuan ngan laradi vapaase, la lavavang tarak goxo umsu mi lakleklen at na lavatbung menemen.

<sup>2</sup> \*At levenaleng nenia aga nemen eburu minimi, aga doxoma i do ana ke xepe be levelinga axap la ana vavang kusuk be mi laniu at ne Iesu Karisito ga uu at laxaba.

<sup>3</sup> \*Nenia aga rupot avot dom atnimi, la lengkot tarak goxo lolos avukat la aga dede aleng mi lanmarat.

<sup>4</sup> \*La leveloklox ase rak mi lavavang tarak kopmen goxo ravasu mi tengkolinga nunuan mi lakleklen at na lorooro. Ketla levelinga rak ga lox asuusu lolos at Loroonan Kaala at ne Moroa.

<sup>5</sup> Nia aga lox i xuren kusu lununu atnimi saparap ne Iesu Karisito noxo mumu levendoxoma at limixin at na lavatbung menemen, ketla na nemen kusuk at lolos at ne Moroa.

### *Levendoxoma Nunuan Loroonan Kaala*

#### *Im Taba Nedik Min*

<sup>6</sup> \*Tinedi mo dira mukun pam keneng at lununu, nema luvuttadi vavang, ma paase ridi mi lakleklen at

\* 1:24: Kl 2:3 \* 1:25: 2 Ko 13:4 \* 1:26: Mt 11:25; Jo 7:48; Je 2:1-5 \* 1:29: Ro 3:27; Ep 2:9  
 \* 1:30: Jer 23:5-6; Jo 17:19; 2 Ko 5:21 \* 1:31: 2 Ko 10:17 \* 2:1: 1 Ko 1:17 \* 2:2: Ga 6:14  
 \* 2:3: Gu 18:9; 2 Ko 10:1 \* 2:4: 1 Ts 1:5 \* 2:6: Ep 4:13; Pl 3:15

ne Moroa. Ketla kopmen lakleklen at na lavatbung menemen, koplav levendoxoma at luvuttadi amgomgo at na levenaleng. Mo lolos atnedi naba sonao kot.

<sup>7</sup>\*Maga tong asu Lagale Lavavang at ne Moroa rinimi, mo ga nemen alipe. Moroa gara tong li vam i xusu naba lox aurut levenasen atdik, avot ti loklok li at na lavatbung menemen.

<sup>8</sup>\*Kopmen teta at luvuttadi amgomgo at na lavatbung menemen ga xasep at na levelinga nunuan at ne Moroa. Mo do nedi gitaklen i, di gitoxo vaxarem Leeme Silok to vana at laxaba. Neni i ruuna lisisixam silok.

<sup>9</sup>Ketla levelinga at Lovoang Kaala i lok keretna,

“Buaang leveloklox anarong, ne Moroa ga gagas min tinedi di vavara aleng i. Tara goxo ven mo leveloklox anarong koplav gita rong i, la tara goxo doma ka i do naba vot.” *Ais 64:4*

<sup>10</sup>\*Ketla ne Moroa ga lox axasep pam na levempanga ridik keneng at lolos at Loroonan Kaala. Loroonan Kaala i sin axasep lempanga axap, eburu mi levendoxoma alipe at ne Moroa.

<sup>11</sup>\*At lorooro at laradi, loroonan axa ren ikeklen lempanga i nemen keneng at lorooro ren. La kerepmo Loroonan Kaala mun at ne Moroa ikeklen avukat ne Moroa.

<sup>12</sup>\*La nedik, kopmen dik ta goxo ruuna ka mo lodoxoma at limixin mede xopok at na lavatbung menemen. Ketla nedik taga ruuna ka Loroonan Kaala ne Moroa ga riki i ri lox ase dik, kusu atanabaklen leveloklox anarong, ne Moroa ga raba gamasa vam dik min.

<sup>13</sup>\*Na lavavang atnama luvuttadi vavang ma vavang min, kopmen at limixin akleklen at na lavatbung menemen. Ketla lavavang atnama boro xa at Loroonan Kaala mo ga anasa nama min. La kerepmo mak

soxomus levelinga mumu ne Moroa rinedi di ruuna Loroonan Kaala.

<sup>14</sup>\*Ketla laradi do kopmen na ruuna Loroonan Kaala xeneng at lorooro ren, neni ixo epovo ri siam ka levelinga at Loroonan Kaala at ne Moroa. Neni xopmen na xasep nunuan teren. I lok ngan lempanga gamasa rin, mila Loroonan Kaala xopmen na nemen keneng at lorooro ren kusu ti lok axasev i rin.

<sup>15</sup>\*Ketla laradi mun Loroonan Kaala i nemen keneng at lorooro ren, neni i epovo xusu na ila mumu lempanga axap. Do taradi xopmen na ruuna Loroonan Kaala, ixo epovo xusu na ila mumu laradi i nunu.

<sup>16</sup>\*I ngan levelinga at Lovoang Kaala i lok keretna,

“Nege iklen lodoxoma at ne Moroa? Nege i epovo xusu naba anasa i?” *Ais 40:13*

Ketla nedik mun ta xasep pam at lodoxoma at ne Karisito.

### 3

#### *Lavasaxaruki At Ne Moroa*

<sup>1</sup>\*Luvutnetak mi luvurinuk. Gano nia aga vot pasa nemi, miga lok ngan mun lengkadede, lununu atnemi dom Korin goxovisi na ru matmatkun. Kuren la levelinga rak tinimi xopmen goxo lok ngan lempapaase rinedi digara siam ka vam Loroonan Kaala kusu nam gomgonga di. Kopmen, nia aga paase rinimi ngan ta nemi limixin mede at na lavatbung menemen, atla lununu atnemi xovisi goxo lolos, ga lok ngan mun lununu at lengkadede.

<sup>2</sup>\*Lengkadede di inin mene levedan tus la kopmen dina anan levempanga anan i lolos. La nemi migak lok bok kuren, mila mi goxot kis gagas ti levelinga mumuat tarak. La ise nga mo kovisi mina gagas tin,

\* 2:7: Ro 16:25 \* 2:8: Lu 23:34; Je 2:1 \* 2:10: Mt 13:11 \* 2:11: Ler 20:27 \* 2:12: Jo 16:13-14  
 \* 2:13: 1 Ko 2:4 \* 2:14: Jo 8:47; 14:17; 1 Ko 1:23 \* 2:15: 1 Jo 2:20 \* 2:16: Ro 11:34 \* 3:1:  
 Jo 16:12 \* 3:2: Ib 5:12-13; 1 Pi 2:2 \* 3:3: 1 Ko 1:10-11; 11:18

3 \*mila nemi move mi rooro ngan limixin mede at na lavatbung menemen. Levereven peves mi lev-enekarakat move i nemen kantubu atnimi, la nai i lox asuusu i do nemi move mi rooro eburu mi loklok at na lavatbung menemen. La kerepmo loklok atnimi i lok ngan loklok at limixin at na lavatbung menemen.

4 \*Mi vetep amisik mi levelinga xantubu atnimi, lentaba di lok do, "Nema at ne Pol," la lentaba di lok do, "Nema at ne Apolos." Mi lok ngan tinotno limixin at na lavatkangka.

5 \*Ua lavasuun teren la nemi mi epaxara nema mi ne Apolos? Nema mun luasaxaruki at ne Moroa. Maga tong asu Lagale Lavavang tinimi la miga nunu ren. Nema buru ma lok mun leven gugu Leeme Silok ga raba nama min.

6 Nenia agatlotlo li levelinga at ne Moroa xeneng at lorooro atnimi. La ne Apolos ga soli dan at nom levelinga, ketla ne Moroa axa ga lox asuusu nom levelinga xeneng at lorooro atnimi.

7 Laradi itlotlo la laradi i soli dan, nedu xopmen duna silok. Ne Moroa xusuk mun i silok, mila neni i lox asuusu nom levelinga xeneng at lorooro atnimi.

8 Mo lara itlotlo la mo lara i soli dan, nedu du epovo mun, la nedu getgesara dunaba lok ka luunun naba epovo at lugugu atdu,

9 \*mila nema eburu mun luradi gugu at ne Moroa la nemi mi lok ngan laraamang teren. La nemi bok mi lok ngan loogu, ne Moroa ga vaxaru i.

### *Moróa Naba Lok Tong Pen Lugugu Atdik*

10 \*Moróa ga raba ia mi lakleklen kusu ana lok lugugu avukat. La kerepmo aga lok lugugu xantubu atnimi, i lok ngan laradi akleklen at lixipkip gu, la aga vaxaru li laabuxumpio at loogu, la lentaba vetpes dip

kip gu mavana ren. Ketla nedi xa dina lok tatao avukat di xusu dina lok lugugu avukat.

11 \*Ne Moróa gara lok li vam ne Iesu Karisito xusuk mun, neni laabuxumpio, la kopmen bok ba taabuxumpio vetpes tara naba lok li i.

12 Mavana at na laabuxumpio lentaba luvuttadi diba xip gu mi lempanga ngan logol, lisiliva kopla levenuto mi luunun teren i silok. La lentaba diba xip gu mavana at na laabuxumpio mi levenuna gamasa, la lempivilis kopla levenbeo mun.

13 \*At laaleng ete, ne Moróa naba lox asuvos ba luruturun at leven gugu at limixin getgesara. I lok ngan ta di lok tong pen leven gol keneng at laxao. La kerepmo ne Moróa naba lok tong pen bok lugugu at limixin getgesara, do kereva i lox avukat kopla xopmen.

14 Do nege laradi ga xip gu mavana at na laabuxumpio la do laxao noxo rin asonao i, neni naba lok ka luunun tin.

15 Ketla lugugu at laradi do laxao na rin asonao i, neni noxo lok kaka tuunun. Ketla neni xa naba roo ngan laradi ma lixilik mo na uu at laxao.

16 \*Miklen avukat pam i do, nemi xa laraogu laplavang at ne Moróa la Loroonan Kaala at ne Moróa i nemen keneng atnimi.

17 Dola tara na sele utut kepe loogu laplavang at ne Moróa, Moróa naba sele utut box i, mila loogu laplavang at ne Moróa, i melemelengan la nemi vam nom laraogu laplavang teren.

18 Nemen gat tara guta xarang axa i. Mo do tara xantubu atnimi i doxoma i do neni mo laradi akleklen ngan limixin at na lavatbung menemen. I epovo do neni na lox asi mo lakleklen teren la na lok kaka lakleklen tuturun at ne Moróa.

19 Limixin at na lavatbung menemen di lok do lakleklen atnedi i silok aleng tinotno. Ketla nom lakleklen atnedi i lok ngan mun lavanga

\* 3:4: 1 Ko 1:12 \* 3:5: Gu 18:11,27-28; 1 Ko 3:10 \* 3:9: Mt 13:3-9; Ep 2:20-22 \* 3:10: 1 Ko 15:10; 2 Pi 3:15 \* 3:11: Ais 28:16; 1 Pi 2:4-6 \* 3:13: 1 Ko 4:5; 2 Ts 1:7-10 \* 3:16: 1 Ko 6:19; 2 Ko 6:16



gamasa at lemeren ne Moroa. I ngan Lovoang Kaala i tong i xeretna,

“Moroa i vuulu lugugu at limixin akleklen.” *Jop 5:13*

<sup>20</sup> La at lara lenep bok keneng at Lovoang Kaala i lok keretna,

“Leeme Silok iklen axap levendoxoma at limixin akleklen, la iklen latnese at levendoxoma etaba atdi.” *Sam 94:11*

<sup>21</sup> Kuren la nemen tara na lox aurut laasen at laradi gomgo at lotu mila nedi axap di lok tooro nimi ngan lavasaxaruki.

<sup>22</sup> Pol mi ne Apolos la ne Pita, la lempanga at na lavatbung menemen, la lorooro, la lanmet, la mo lempanga ik lok ningina la mo lempanga axap naba ravasu melemu. Na axap ne Moroa ga lok li i xusu ti lok tooro nimi.

<sup>23</sup> Ketla na i ruturun dola nemi at ne Karisito, la ne Karisito at ne Moroa.

## 4

### *Leven Gugu At Luvuttadi Vavang*

<sup>1</sup> \*Kuren la mina doxoma mumu nema luvuttadi vavang, ma lok ngan lavasaxaruki at ne Iesu Karisito, la nema mak lok tatao losoxovo at ne Moroa mo ga nemen alipe, kusu mana paase axasep limixin min.

<sup>2</sup> \*Lara lavanga i silok aleng ti laradi loklok tatao at levelinga at ne Moroa i lok keretna. Neni na lox amisik lugugu ruturun ti laradi gomgo ren.

<sup>3</sup> Nenia, axo doxoma solo i do nemi koplala limixin at na lavatbung menemen mina ila mumu ia, atla nia axo ila mumu lorooro rak.

<sup>4</sup> \*Nenia axa aklen i do kopmen taxakapmek i nemen at lorooro rak, ketla anai xopmen na lox asuusu i do nenia laradi sepmus at ne Moroa. Ketla Leeme Silok naba viila mumu lugugu rak.

<sup>5</sup> \*Kuren la nemen mita ila mumu avot tara ri mo laaleng do naba vot. Laaleng ti ila mumu loklok at limixin noxo vot se Leeme Silok nabamlong.

La neni naba lok li lempanga monga ik lok at lamain bonot ti laxasep, la naba lox asaxaven levendoxoma i nemen alipe ro xeneng at lorooro at limixin. Ap mo laaleng Moroa naba lox asuusu leemi asu ri limixin.

<sup>6</sup> \*Luvutnetak mi luvurinuk. Ara vaase poovo vam minema mi ne Apolos, i ngan nema luampoovo ri nom axav i levelinga nenia a malagan i. La maxeneng at nom i, minaba xasep ap mo levelinga i lok keretna, “Mina ila mumu avukat levelinga at luvuttadi amgomgo, kerekngan Lovoang Kaala i tong i.” La kerepmo mi noxo xip aurut taasen at tara taradi gomgo atnimi la mi noxo lox asi taradi gomgo vetpes.

<sup>7</sup> \*Kopmen tara ga lok li nimi xusu mina silok ti mo lentaba vetpes. Moroa ga raba nimi mi nom lempanga axap mi ruuna i. Kuren la nemen mita xip aurut levenasen atnimi min, mila nom lempanga mi ruuna i, ne Moroa ga raba nimi min.

### *Pol Ga Paase Axalat Ti Limixin Me Korin*

<sup>8</sup> \*Kereva, mi doxoma i do mira mukun pam at lorooro atnimi at ne Iesu Karisito? La kerepmo mira doxoma i do nemi mi lok kaka vam leveloklox anarong axap. La mira doxoma i do mi silok ngan lavaorong, la mi silok tinema luvuttadi vavang. Do nemi mina silok kerepmo, nenia a doma i do naba lox avukat tinotno, atla nema bok mabat kis eburu minimi ngan lavaorong. Ketla nema xopmen mana silok kerepmo,

<sup>9</sup> \*mila nia a doma i do ne Moroa ira lok li vam nama, luvuttadi vavang, kusu mana ruuna levenasen gamasa at lemeren limixin. Ma lok ngan luvuttadi xokoxo, luvuttadi amgomgo di sev amer i ro at lemeren limixin axap at na lavatbung menemen la melamgo at lubang angelo.

<sup>10</sup> \*Limixin at na lavatbung menemen di tong i do nema luvuttadi baulang mun, mila ma gugu mi

\* **4:1:** Ta 1:7    \* **4:2:** Lu 12:42    \* **4:4:** Sam 143:2    \* **4:5:** 1 Ko 3:8    \* **4:6:** Ro 12:3    \* **4:7:** Ro 12:6    \* **4:8:** Li 3:17,21    \* **4:9:** Ro 8:36; Ib 10:33    \* **4:10:** 1 Ko 3:18

laasen at ne Karisito. Ketla nemi mi lok do mi nemen avukat keneng at ne Karisito. Limixin at na lavatbung menemen di lok do nema luvuttadi gamasa la nemi mi doma i do nemi limixin silok at lorooro at ne Iesu. Limixin at na lavatbung menemen dik lox abulubun nama, ketla dik lok ngangao atnimi.

<sup>11</sup> \*Ga ruka i gano se at na laaleng lingina, nema luvuttadi vavang, maga roxo la maga minu. Maga etara lenbantamon tekoxorop. La kopmen nom mene i, limixin digap sep bok nama la goxopmen temenemen aulis atnama rik lox amas teren.

<sup>12</sup> \*La maga gugu lolos kusu mana lok kaka levempanga ri lok tooro lix-  
itkis atnema. Diga vaase xakapmek tinama, ketla maga sing ne Moroa xusu na lox anarong nedi. Diga lox asongot nema, ketla maga momo ri xip tutu min.

<sup>13</sup> \*Diga vaase xapmek tinema, ketla maga vorang mun i mi levelinga nunuan. Di tong i do nema ma lok ngan mun luvuttadi baava la ma lok ngan ta laxanbibiong dip kupku xepe i at na lavatbung menemen ise at na levenaleng.

<sup>14</sup> A malagan i na levelinga rinimi, kopmen do ri lox amangan nimi. A malagan i xusu ti vaase aronga nimi. Nia a balamu nimi ngan nemi luvutnuruk tinotno.

<sup>15</sup> \*Keke i do mi ruuna buaang luvuttadi loklok tatao, ketla mi ruuna mun legesara ngan ne temen nimi. At lorooro atnimi at ne Iesu Karisito, nenia a lok ngan ne temen nimi, atla nia aga vavang tinemi mi Lagale Lavavang.

<sup>16</sup> \*Kuren la a sing lolos nemi do mina mumu asu loklok tarak.

<sup>17</sup> \*Lavasuun mun at nai la nia ara riki aonon pam ne Timoti udom saporap nimi. Neni ne nuruk tinotno at laasen at Leeme Silok, la a vavara

aleng i. Neni laradi ruturun at lorooro ren keneng at Leeme Silok. Neni naba vaase axasep manga nimi mi loklok tarak keneng at lorooro at ne Iesu Karisito. La loklox ase ren i epovo mi loklox ase rak kerekngan aga lox ase limixin min at laraogu lotu at lengkot axap.

<sup>18</sup> Lentaba atnimi mo di doma i do nedi di silok aleng, la di doxoma i do nenia noxo vot pasa bok ba nimi xusu ti vaase sok di.

<sup>19</sup> \*Mo do Leeme Silok na vara i, anaba vot pasa soso nimi xusu nia anaba xasep at lempanga salai luvuttadi loklox asilok di tong i, la nia anabaklen i do di ruuna ruturun pam lolos at Leeme Silok.

<sup>20</sup> \*Nia anaba ven kibis di mila lanat at Linintoo at ne Moroa i ruuna lolos at ne Moroa maxeneng at lorooro ren, la xopmen lavapaase gamasa mun.

<sup>21</sup> Kereva, mira lox anmanton pam lorooro atnimi? Do xopmen, nenia aba vaase lolos tinimi. Do mina ronga res tarak, nenia aba vot mi labalamu la loklox atnaasan.

## 5

### *Pol Ga Paase Mumu Loklok Kakapmek Ga Nemen At Lotu*

<sup>1</sup> \*Aga ronga i do loklok kakapmek maxamang at lixitkis epot mo i nemen kantubu atnimi, la na loklok it pospa aleng. La kopmen tavanga xerepno na nemen kantubu at lavamolom. Aga ronga i do lara laradi mo i nemen eburu mi latkin sev agepura at ne temen.

<sup>2</sup> Ua lavasuun teren la mi lok do mi silok, la kopmen mina doma mumu na laxakapmek silok i nemen kantubu atnimi? I epovo do nemi mina bulu la mina riki pes nom laradi bilinga basinge luruburu at lotu atnimi.

<sup>3</sup> \*Nenia a nemen paxalom basinge nimi, ketla a doxoma asu amisik atnimi at loroonan tarak. La kerepno

\* 4:11: 2 Ko 11:23-27 \* 4:12: Gu 18:3; 1 Ko 9:14-15; 2 Ts 3:8; Sam 109:28; Mt 5:44 \* 4:13: Lan 3:45 \* 4:15: Ga 4:19 \* 4:16: Pl 3:17; 1 Ts 1:6 \* 4:17: Gu 19:22; Pl 3:19-21 \* 4:19: Gu 18:21 \* 4:20: 1 Ko 2:4 \* 5:1: Mas 18:7-8; Lal 22:30; 27:20 \* 5:3: Kl 2:5

i lok ngan ta do nenia a nemen eburu minimi dom Korin. La keneng at laasen at Leeme Silok atdik ne Iesu, nenia ara lok li vam lumumuat at nom laradi ga lok mo lavanga bilinga. I lok ngan ta do nenia mo a nemen eburu minimi.

4 \*Do mina vot eburu at laasen at Leeme Silok ne Iesu, naba lok ngan ta do a nemen eburu minimi, la lolos at Leeme Silok atdik ne Iesu mo naba nemen bok.

5 \*Ap mo laaleng mina song araba ne Satan mi nom laradi xusu ni na suma ka losongsongot ap mo loklok kakapmek teren la kerepmo neni naba roo su ap mo laaleng Leeme Silok namlong teren.

6 \*Nemi mi lok do loklok atnimi i lox avukat la mi silok aleng, ketla kopmen. Ixok mokso rinimi xusu mina ke xepe nom laradi i lok nom loklok. Miklen levelinga i lok keretna, "Laxapmek kakalik at legesa radi naba lok kapmek limixin axap."

7 \*Mina lok pes nom loklox asilok basinge lotu atnimi xusu minaba nemen avukat tinotno ngan lavavara at ne Moroa. I lok ngan gano leme Judaia diga nemen to Isip, diga sep ka levempatnat sipsip atdi xusu ti lok pe lebelemamao at ne Moroa la nedi limixin di goxo met. La kerepmo ne Karisito i ngan lavatnat sipsip ga uu nop loklok atdik ngan laxaavuk tidik.

8 \*Kuren la limixin me Judaia dik lok katling amisik mo laaleng ne Moroa ga lam asu di basinge lenep silok Isip. La kerepmo dik ata doxoma amisik mo loklox arooro atdik, la ata lok kepe laxakapmek la ata lok kaka luruvtuvuk i dadat aleng la in manton.

9 \*Ap mo lavapaase aga lox aonon pam i rinimi, aga tong i rinimi do nemen gat mita etangas eburu mi limixin at lotu di lok laxakapmek maxamang at lixitkis epot.

10 Axo tong limixin maxamang at lotu di nemen kuren kopla limixin dik lok mokmorong, kopla limixin sepsep paxat panga, kopla nedi di lotu saparap laxampoovo moroa. Ixo epovo do mina nemen petpes basinge limixin kerepmo, mila limixin kakapmek di umsu at na lavatbung menemen.

11 \*Lavasuun at levelinga rak i lok keretna, nemen mita etangas eburu mi laradi lotu, neni laradi i lok laxakapmek maxamang at lixitkis epot, kopla ik lok loklok ti belegao la i lotu saparap laxampoovo moroa, ik lox asi lentaba vetpes mi levelinga, la i inin tangtangu, kopla ip sep paxat panga. Nemen mita etangas eburu mi laradi ik lok kerepmo la nemen gat mitat kis eburu min kusu ti anan.

12 \*Kopmen lugugu rak kusu ana ila mumu loklok atnedi lavamoln, ketla lugugu atdik kusu ata ila mumu loklok atnedi di nemen keneng at lotu la di lok laxakapmek kerepmo.

13 \*Ne Moroa xusuk mun naba ila mumu nedi lavamoln. I ngan Lovoang Kaala i tong i xeretna, "Nemi mina ila mumu loklok ap mo laradi xapmek la mina lok pes i basinge lotu atnimi." *Lal 17:7; 19:19*

## 6

### *Leven Ekarakat Kantubu At Limixin Lotu*

1 Mo do tara atnimi i ruuna tekarakat eburu mi tara taradi vetpes at lotu, nemen gat ni nat pas uto at lubang amgomgo at lavamoln kusu dina lox akmokso mo lekarakat. Ketla neni nat pas min uto at limixin di nunu at ne Moroa xusu dinaba lox akmokso du.

2 \*Mi xasep avukat pam do limixin di nunu at ne Moroa dinaba ila mumu loklok at limixin axap at laaleng ete. La do melemu nemi xa minaba ila mumu loklok at limixin axap, tila ba la mixo epovo xusu

\* 5:4: Mt 16:19; 2 Ko 13:10 \* 5:5: 1 Ti 1:20; 1 Pi 4:6 \* 5:6: Ga 5:9 \* 5:7: Pas 13:7; 12:21; Ais 53:7; 1 Pi 1:19 \* 5:8: Lal 16:3 \* 5:9: Mt 18:17; 2 Ts 3:14 \* 5:11: 2 Ts 3:6; Ta 3:10; 2 Jo 1:10 \* 5:12: Mk 4:11 \* 5:13: Lal 13:5; 22:24 \* 6:2: Li 3:21

mina ila mumu loklok at na lempanga lixilik mun.

<sup>3</sup> Miklen i do nedik luvuttadi nunu at ne Iesu atanaba ila mumu bok loklok at lubung angelo. La kerepmo dik ta epovo do tana ila mumu leveloklok at na lorooro.

<sup>4</sup> Kuren la mina lok katling tentaba at lotu xusu dina ila mumu loklok atnimi mo do teven ekarakat na vot kantubu atnimi. I epovo do nedik luvuttadi mene xuren at lotu dina xip ka mo lugugu mila maxeneng at na dinaba lox avukat ti laradi maxamang at lotu.

<sup>5</sup> A tong i na rinimi ri lox amaman-gan nimi. Kereva, kopmen taradi dom kantubu atnimi i epovo ri ila mumu loklok atnemi limixin at lotu?

<sup>6</sup> Ketla nemi mi mumu na loklok kakapmek. Taradi nunu na lok li bok taradi nunu at lavapaase ro melamgo at taradi xopmen tununu ren saparap ne Iesu Karisito.

<sup>7</sup> \*Anai levenekarakat kantubu atnemi limixin nunu mik lok ka i uto at lavapaase, i lox asusu i do nemi mira subu rino vam at lununu atnimi. Kuren la nemen mita vot pasa laradi maxamang at lotu ri lox amokso lumumuat mo do limixin dina vaxaxip nemi mi laxakapmek. La nemen mita vot pasa laradi maxamang at lotu ti lox amokso tumumuat mo do tentaba vetpes dina xip pilo ka levempanga atnimi.

<sup>8</sup> Atla nemi xa mi lok laxakapmek tinemi getgesara, la mi xip pilo bok lempanga atnemi, ketla mira domampe vam i do nemi loxoeton mun keneng at laasen at ne Iesu Karisito.

<sup>9</sup> \*Mi xasep pam do limixin kakapmek di noxo ruuna ka toxot to xeneng at Linintoo at ne Moroa. La mina xasep nunuan at na levelinga. Limixin di lok loklok kakapmek maxamang at lixitkis epot, la di lotu saparap laxampoovo moroa, la di elongka, kopla lavatlok axa di velongka.

<sup>10</sup> La nedi dip kip pilo, dik lok loklok ti belegaa, kopla di inin tangtangu, la dik lox asi lentaba mi levelinga, kopla dip sep paxat ka lempanga. Kopmen tara atdi noxo ruuna ka toxot to xeneng at Linintoo at ne Moroa.

<sup>11</sup> \*Lentaba atnimi digak lok kerepmo. Ketla ne Moroa ga gos nemi axap basinge laxakapmek atnimi, la nemi xa ga ravasu ngan limixin melemelengan at ne Moroa. La at laasen mun at Leeme Silok ne Iesu Karisito la mi Loroonan mun at ne Moroa, neni ga lox asepmus nimi basinge loklok kakapmek.

### *Mina Ke Xepe Loklok Ti Lok Laxakapmek*

<sup>12</sup> \*Lentaba atnimi dinaba tong i do, "I epovo do nia ana lok levempanga axap." I ruturun, ketla kopmen levempanga axap naba lok tooro nimi. La nenia ana tong i do, "I epovo do ana lok lempanga axap." Ketla anaba ke xepe levempanga xapmek mo i epovo na xoxo ia.

<sup>13</sup> \*La lentaba diba lok keretna, "Moroa ga lok levenbelen dik ti leveluxa la ga lok leveluxa ri lox aumsu levenbelen dik." I ruturun, ketla ne Moroa naba lox asonao buru labantuxu mi lengkot teren. I ruturun bok do labantuxu atdik kopmen tik lok laxakapmek maxamang at lixitkis epot. Ketla ne Moroa ga rudum li dik kusu ata emi asu mi Leeme Silok, la Leeme Silok axa ik lok tatao labantuxu atdik.

<sup>14</sup> \*Moroa ga lox axatu Leeme Silok basinge lanmet, la neni bok naba lox aroo amlong nedik mi lolos teren basinge lanmet.

<sup>15</sup> \*Miklen i do labantuxu atnimi neni i lok ngan levengkot at labantuxu at ne Karisito. Kereva, i lox avukat kusu ana lok pes tenep at labantuxu at ne Karisito la ana lox etang i mi labantuxu at latkin ngarangat? Kopmen tinotno.

\* **6:7:** Mt 5:39; 1 Ts 5:15; 1 Pi 3:9    \* **6:9:** Ga 5:19-21; Ep 5:5; Li 22:15    \* **6:11:** Ta 3:3-7    \* **6:12:** 1 Ko 10:23    \* **6:13:** 1 Ts 4:3-5    \* **6:14:** Ro 8:11; 1 Ko 15:20; 2 Ko 4:14    \* **6:15:** Ro 12:5; Ep 5:30  
\* **6:16:** Mt 19:5

16 \*Mi xasep pam do laradi i lox etang labantuxu ren mi latkin ngarangat, nedu du lok ngan legesara mun keneng at labantuxu atdu. Levelinga ro xeneng at Lovoang Kaala i tong axasep avukar i do,

“Nedu du lok ngan legesara mun keneng at labantuxu atdu.” *Lur 2:24*

17 \*Ketla laradi na xis etangas mi Leeme Silok, lороonan teren i lok ngan legesara eburu mi Leeme Silok.

18 Mina ke xepe rinotno loklok kakapmek maxamang at lixitkis epot. Laxakapmek petpes do lara i lox i, kopmen na lok kapmek labantuxu ren. Ketla laradi do i lok na loklok ti lok laxakapmek maxamang at lixitkis epot, neni i lox abilinga rinotno labantuxu ren.

19 \*Mi xasep pam do labantuxu atnimi, i lok ngan loogu laplavang at Loroonan Kaala, mo i nemen keneng atnimi, la ne Moroa axa ga raba nemi min. Nemi xopmen atnimi xa, ketla nemi at ne Moroa.

20 \*Neni ga xuruse ka vam nemi mi luunun. Kuren la mina ke xepe loklok kakapmek keneng at labantuxu atnimi la kerepmo mina lox asusu loklok ngangao ri ne Moroa.

## 7

### *Levesusue Mumu Loklox Epot*

1 A vara i do ana vorang levempapaase miga malagan i ria. Lara avot mumu leepot. I lox avukat do lubangnaa dina nemen gamasa la nemen dita epot.

2 Ketla mumu mene loklok kakapmek maxamang at lixitkis epot mo i umsu. Kuren la i lox avukat do lavatlok dina epot ka tavakin getgesara ridi, la lavakin dina epot ka tavatlok getgesara bok tidi.

3 I epovo do latlok na lox asoorun axap lugugu ren ngan latlok epot, la latkin na lox asoorun axap lugugu ren ngan latkin epot. La nedu xa

duna lox epovo lavakpakes atnedu xeneng at loklok at leepot.

4 Latkin epot noxo lok ngan lara loklok tatao xusuk ti labantuxu ren, ketla latlok teren bok na lok tatao i. La kerepmo bok latlok epot kusuk noxo lok ngan lara loklok tatao ri labantuxu ren, ketla latkin bok teren na lok tatao i.

5 Nemen duna emorong mi lubantuxu atnedu, ketla do duna epaase mumu i, la dola dura siam teren, i lox avukat do duna ke be mo loklok at tentaba tevenaleng ti lok levesingising atnedu saporap ne Moroa. Ketla melemu at nai duna nemen eburu manga. Mo do duna lox i na, Satan noxo lox epovo i xusu na lok li du at loklok tong pen. A tong i na rinimi mila nemi xopmen mina nemen lolos at loklok at leepot.

6 Na a vaase i na rinimi xopmen do nemi axap mina mu asu i la mina epot, ketla a vaase i na, i ngan lisisiam tarak tinimi.

7 \*I lox avukat do nemi axap minak lok naa kerekngan ia. Moroa ga lox ia xusu a epovo anak lok naa i ngan laramtaba ren tia. Ketla lentaba vetpes kopmen na epovo rik lok naa la ne Moroa im taba di mi leventamtaba vetpes.

8 Tinemi lavatlok mi nemen naa, la tinemi lavakin lavatlok atnimi diga met pam, a vara i do ana vaase rinimi xeretna. I lox avukat do minak lok naa kerekngan ia.

9 \*Ketla do mixo epovo xusu mina lok tatao avukat luruptuvuk atnimi, la levendoxoma atnimi move i ngaongao mumu loklok at leepot, i lox avukat mene do mina epot. I lox avukat do mina epot mila i lok kapmek do nom lavavara atnimi na lok nemi la levendoxoma atnimi na xalibi amisik ti mo loklok.

10 \*Lara lavanga bok, kopmen atarak ketla at Leeme Silok. Tinemi limixin epot a ruuna lara lavapaase lolos tinimi xeretna, latkin epot noxo soxope latlok teren.

\* 6:17: Jo 17:21-23; Ro 8:9-11 \* 6:19: 1 Ko 3:16  
Mt 19:12 \* 7:9: 1 Ti 5:14 \* 7:10: Mt 5:32; 19:9

\* 6:20: 1 Ko 7:23; 1 Pi 1:18-19; Pl 1:20 \* 7:7:

<sup>11</sup> Mo do neni na lox i xuren, neni nak lok naa la nemen bok ba na epot, kopla neni namlong mu latlok teren. La kerepmo bok latlok kopmen noxo ba korop leepot mi latkin teren.

<sup>12</sup> La tinemi limixin axap, a tong i do na levelinga ana vaase i, kopmen at Leeme Silok ketla atarak mun. Mo do latlok i lok kaka lununu maxat keneng at ne Karisito, ketla latkin teren kopmen na nunu at ne Karisito, la mo latkin i momo do nedu nak lok buru xeneng at leepot atdu, latlok kopmen noxo soxope i.

<sup>13</sup> La mo do latkin i lok kaka lununu maxat keneng at ne Karisito, la latlok teren kopmen na nunu at ne Karisito, la mo latlok i momo do nedu dunak lok eburu xeneng at leepot atdu, latkin noxo soxope i.

<sup>14</sup> Mila latlok kopmen na nunu, neni i lok ngan laradi dadat at ne Moroa mila neni i epot at latkin i nunu at ne Karisito. La latkin kopmen na nunu, neni i lok ngan latkin i nemen dadat at lemeren ne Moroa mila neni i epot at latlok i nunu at ne Karisito. La kerepmo laxamdak mi laxaalik kakalik atdu dixo lok ngan levempanga bilinga. Ketla di dadat at lemeren ne Moroa.

<sup>15</sup> \*Ketla do tara atdu xopmen na nunu at ne Karisito la i vara i do na soxope mo lara i nunu at ne Karisito, i lox avukat mene do mina ke xepe i na mu asu lodoxoma ren. La i lox avukat do lara i nunu, latlok kopla latkin, na siam do mo latlok kopla latkin na on basinge i. Moroa ga soxolik ka dik limixin nunu at ne Karisito kusu ata nemen at lumulum.

<sup>16</sup> \*La nemi lavakin nunu, mina ke xepe di do dina on basinge nemi, mila kopmen minaklen i do i epovo mina lok tooro di kusu dina ven kisip ne Karisito. La nemi bok lavatlok nunu, mina ke xepe di do dina on basinge nemi mila kopmen minaklen i do i epovo mina lok tooro di xusu dina ven kisip ne Iesu. La kerepmo i epovo do nedi dina ba korop leepot.

### *Mina Nemen Kerekngan Ne Moroa I Vara I*

<sup>17</sup> \*Ketla nemi getgesara mina nemen at lixitkis migak lok teren ap mo laaleng ne Moroa ga ro xaka nemi. Mo lixitkis atnemi i ngan laramtaba Leeme Silok gara raba vam nemi min. Anai lavapaase a lox ase limixin min at laraogu lotu at lengkot axap.

<sup>18</sup> I ngan ta do tara, digara vit kepe vam loxontuxu ren, la gara siam ka vam lorotoro at ne Moroa rin, nemen ni ta lok tong pen bok ba i do neni na lok pes nom liinin pirivit. Mo do tara di goxo vit kepe loxontuxu ren, la ni ga siam kaka lorotoro at ne Moroa rin, nemen bok ba i guta vit kepe loxontuxu ren.

<sup>19</sup> \*La kerepmo loklok ti rivit kepe loxontuxu kopla loklok ti ke xepe i, ni lavanga gamasa mun. Lavanga mun i mumuat ni laradi ing tonga res at levelinga at ne Moroa.

<sup>20</sup> Nemi getgesara mina nemen lolos ap mo lixitkis migak lok teren ap mo laaleng miga siam ka lorotoro at ne Moroa rinimi.

<sup>21</sup> Kereva, uga nemen ngan lasaxaruki se ne Moroa ga ro kaka u? Nemen gat uta bulu mu i, ketla mo do taaleng na vot tu xusu una nemen ngan laradi sepmus, una momo min.

<sup>22</sup> \*Lasaxaruki, Leeme Silok gara ro xaka vam i, neni i lok ngan laradi sepmus at Leeme Silok. La kerepmo bok laradi sepmus, ne Karisito gara ro xaka vam i, neni i lok ngan lasaxaruki at ne Karisito.

<sup>23</sup> Moroa gara xuruse ka vam nemi mi luunun. Kuren la nemen mita mumu asu levelinga at tara vetpes.

<sup>24</sup> Luvutnetak mi luvurinuk. Nemi getgesara minat kis esogo nunuan mi ne Moroa at nom lixitkis nemi migak lok teren ap mo laaleng ne Moroa ga ro xaka nemi.

<sup>25</sup> \*Monga a vara i do ana paase rinimi mumu lususue miga sue ia min mumu nedi dik lok naa. Agoxo

\* 7:15: Ro 14:19 \* 7:16: 1 Pi 3:1 \* 7:17: 1 Ko 7:20,24 \* 7:19: Ro 2:25; Ga 5:6; 6:15 \* 7:22: Pm 1:16; Ep 6:6; 1 Pi 2:16 \* 7:25: 1 Ti 1:12-13

lok ka lavapaase mumuat boro at Leeme Silok mumu na lavanga, ketla ana vaase nimi mi lodoxoma axa rak. Nia a epovo do ana tong i na rinimi mila Leeme Silok ga lox asuusu vam lebelen tuntun teren tia la iklen i do nenia laradi ruturun tin.

<sup>26</sup> Levenmumuat naba vot saparap limixin di nunu. Kuren la a doxoma i do i lox avukat do taradi na neman ngan ta i mo neni ik lok kuren.

<sup>27</sup> Dola tara i epot pam, neman ni guta ba korop leepot teren. Dola tara ik lok naa, neman ni guta epot bok ba.

<sup>28</sup> \*Mo do taradi i epot, koplalatin maxat i epot, kopmen taxakapmek teren. Ketla mo do tara i epot, i epovo do buaang laxanmumuat naba vot parav i. A xopara i do mina solok laxanmumuat solo at na lorooro.

<sup>29</sup> \*Luvutnetak mi luvurinuk. Lavasuun at na levelinga rak i lok keretna. Ixo lox abao bok ba levenaleng mo i neman ti lomlong at ne Karisito. La i ruka i mo ningina, lavatlok epot dina neman ngan ta luvuttadi at ne Moroa.

<sup>30</sup> La nedi dik bulu at levenmumuat atdi, dina xasep do nom lainbulu naba xap. La nedi dik lok momo, dina xasep do nom lomomo noxo neman amisik. La nedi di unun panga, dina xasep do nom lempanga noxo neman abao.

<sup>31</sup> \*La nedi dik lox arangtang mi lempanga at na lorooro, dina xasep do nom loklok kopmen lavanga i silok aleng. Lavasuun at na levelinga rak keretna. Leveloklok at na lavatbung menemen ik lok ningina naba xap asonao.

<sup>32</sup> A vara i do mi noxo ekip tangarang mi levenmumuat at na lorooro. Latlok naa ik lox angtang amisik mi leven gugu at Leeme Silok, mila neni ik lok tong i do ni nak lox amomo Leeme Silok.

<sup>33</sup> Ketla latlok epot ik lox angtang amisik mi lempanga at na lorooro, mila neni i vavara i do nak lox amomo amisik latkin teren.

<sup>34</sup> Kuren la lodoxoma ren i ekakan. La latkin naa bok mi latkin maxat duk lox angtang amisik mi leven gugu at Leeme Silok, mila du vara i do nedu duna neman dadat at lorooro atdu la loroonan bok atdu. Ketla latkin epot ik lox angtang amisik mi lempanga at na lorooro mila i vavara i do ni nak lox amomo mun latlok teren.

<sup>35</sup> A paase i na mila a vara rino i do ana lok tooro nemi. Axo lok do ana lok li teventaangas mumuat kusu miba mu asu i. Ketla kusus mun, a vara i xusu mina lok lempanga salai ik mokso la i lox avukat. La mina raba lorooro axap atnimi ri lugugu at Leeme Silok la neman mita ranga alis toxot teren.

### *I Lox Avukat Do Laradi Na Neman Naa Kusu Naba Lok Lugugu At Ne Moroa*

<sup>36</sup> Mo do tara i doxoma i do neni kopmen nap tuvuk avukat mun ti latkin diga ora i do tin, la i vara na epot kaka i, i lox avukat duna epot. Kopmen na lok kapmek.

<sup>37</sup> Ketla do mo laradi no di goxo pu soso i xusu na epot ap mo latkin diga ora i do tin, la neni i lok lodoxoma ren do neni noxo epot ap mo latkin. La do, mo lodoxoma ren i lox i mi lorooro axap teren, la lodoxoma ren ira doma vam lavanga salai neni naba lox i, i lox avukat mene do neni noxo epot ap mo latkin.

<sup>38</sup> Kuren la laradi i epot at latkin diga ora i do tin, neni i lok loklok i nunuan. Ketla, mo laradi kopmen na epot at latkin, diga ora ka i do tin, neni i lok loklok i nunuan aleng.

<sup>39</sup> \*Ixo epovo dola latkin epot na soxope latlok teren, ketla do latlok teren na met, i epovo do neni na epot kaka tatlok petpes do neni i vara rin. Ketla neman gat ni na epot at laradi xopmen na nunu at Leeme Silok.

<sup>40</sup> Kuren la mo latkin naba momo aleng, do neni na neman ngan lanaa. Anai lodoxoma rak la aklen i do loroonan Kaala at ne Moroa ik lok

tarak. Kuren la ara tong i na leven-doxoma rak tinimi.

## 8

### *Lususue Mumu Lempanga Lomlomon Ti Laxampoovo Moroa*

<sup>1</sup>\*A vara i do ana vorang lususue atnimi mumu lempanga lomlomon limixin diplavang min ti laxampoovo moroa. I ruturun aleng do, “Nedik axap ta ruuna levenakleklen,” kerekngan limixin di tong i. Do laradi i ruuna lakleklen solo, neni ba xip aurut laasen teren. Ketla mo laradi i umsu mi labalamu, ik lox aru lolos lorooro nunuan kantung at limixin nunu.

<sup>2</sup>\*Do laradi i doxoma i do neni mo i silok ti luvutneton mumu lempanga salai neni ikleklen i, neni xopmen na ruuna lakleklen avukat.

<sup>3</sup>\*Ketla do laradi i vavara aleng ne Moroa, ne Moroa ikleklen avukat mo laradi.

<sup>4</sup>\*Kuren la ana paase mumu lempanga lomlomon limixin diplavang min saparap laxampoovo moroa. Lentaba at limixin nunu di anan leveluxa, lentaba vetpes diplavang min ti laxampoovo moroa. Ata xasep do lovoovo vanga ni loklok katling ti lavanga kopmen na rooro la ataklen i do legeso Moroa mene nga i nemen.

<sup>5</sup>Limixin di tong i do tevenasen moroa go i nemen to vana at laxalibet koplal at na lavatkangka. La buaang atdi na laxan moroa la lempanga xerepno limixin di lotu saparap di.

<sup>6</sup>\*Ketla legeso Moroa mun tinedik axap. Neni ne Temen nedik la neni laradi loklok li at lempanga axap, la nedik ata rooro rin. La legesa Eme Silok atnedik mun ne Iesu Karisito, la keneng mun teren ne Moroa ga rudum li lempanga axap la keneng mun teren nedik di rooro.

<sup>7</sup>Ketla kopmen limixin axap at lotu dinaklen avukar i do laxampoovo

moroa ni lavanga gamasa. Lentaba atdi di arala nga di ri na laxampoovo moroa, ise nga at na levenaleng. Do di anan leveluxa limixin petpes diplavang min ti laxampoovo moroa, nedi move di doxoma i do di lotu saparap laxampoovo moroa. Ketla kopmen na ruturun. Lununu atdi xopmen na lolos, kuren la di doxoma i do nedi mo dira bilinga vam ap mo leveluxa di anan i.

<sup>8</sup>\*Leveluxa axap limixin nunu di anan i, kopmen noxo lox axis buru di mi ne Moroa. Do nedik ata anan mo leveluxa limixin diplavang min saparap laxampoovo moroa, lixitkis etangas atdik mi ne Moroa noxo rekorop, la luruburu atdik mi ne Moroa noxo xap.

<sup>9</sup>\*Ketla nemi limixin sepmus mina lok tatao avukat nemi, kusu mo loklok atnemi mumu mo lempanga anan noxo lox asubu lununu atnedi xopmen dina lolos.

<sup>10</sup>Dola taradi, lununu ren kopmen na lolos, na ven nemi limixin akleklen mina anan tempanga anan limixin petpes digaplavang min to xeneng at loogu laplavang at tavatpooovo moroa, la neni naba mulus kusu ti anan mo lempanga anan.

<sup>11</sup>\*Kuren la na laradi, lununu ren kopmen na lolos, ne Iesu Karisito ga uu nop bok loklok teren, neni naba subu atla nemi limixin akleklen mi anan mo leveluxa diplavang min ti laxampoovo moroa.

<sup>12</sup>La kerepno nemi mira lok pam laxakapmek ti luvutneton nemi atla mira lok kapmek tinotno vam lodoxoma avukat atdi la ira ekakan. La kerepno mira lok pam laxakapmek ti ne Karisito.

<sup>13</sup>\*Kuren la, do mo leveluxa nia a anan i, i lox asubu lununu at tara, nia a noxo epovo bok ba ri anan teveluxa xerepno, kusu nia noxo lox asubu bok ba taradi ri laxakapmek.

\* **8:1:** Gu 15:29    \* **8:2:** Ga 6:3    \* **8:3:** Ga 4:9    \* **8:4:** 1 Ko 10:19; Ga 4:8; Lal 4:35,39; 6:4    \* **8:6:** Mal 2:10; 1 Ko 12:5,6; Ep 4:5,6; Jo 1:3    \* **8:8:** Ro 14:17    \* **8:9:** Ro 14:13-15; Ga 5:13    \* **8:11:** Ro 14:15,20    \* **8:13:** Ro 14:21



## 9

*Pol Ga Vaase Pe I*

<sup>1</sup> \*Kereva, nenia laradi sepmus la nenia laradi vavang at ne Moroa? Kereva, nenia aga ven ne Iesu, Leeme Silok atdik? La kereva, nemi livipisik at lugugu rak ngan laradi vavang at Leeme Silok?

<sup>2</sup> \*Lentaba dixo ven kisiv ia do laradi vavang, ketla nemi miga ven kisiv ia. Nemi mit kis etangas mi ne Iesu, la kerepmo i lox asuusu i do nemi loklok katling at lugugu rak ngan laradi vavang at Leeme Silok.

<sup>3</sup> Tinedi di paase mumu ia atla nia axop kip unun at lugugu rak, nia a vaase pe ia xeretna.

<sup>4</sup> \*Kereva, ixok mokso xusu mina raba luxa la kadan ia ri lok tooro ia at lugugu rak?

<sup>5</sup> \*La kereva, i epovo do ana lok kaka tatkin nunu eburu minia at levempatpas tarak, kerekngan mun lentaba luvuttadi vavang, la luvutnton ne Iesu, la ne Pita dik lox i?

<sup>6</sup> Koplana nemi xusuk mi ne Banabas mana gugu lolos ti lixitkis atnema?

<sup>7</sup> Mina xasep at na levempapaase poovo. Ixok mokso do taradi esep na gugu at lugugu vetpes ti lok ka luunun tin. La i epovo do laradi lotlo, neni na anan akmokso livipisik at levempanga ni gatlotlo i. La i epovo bok do laradi loklok tatao sipsip na ruuna ka levendan tus at levesipsip teren.

<sup>8</sup> Anaa levelinga nia a tong i kopmen mede xopok at na lavatbung menemen. Kereva, Laulis Linga xopmen na tong bok na lavapaase?

<sup>9</sup> \*Levelinga keneng at Laulis Linga at ne Moses i tong i do, "Nemen mita velegum pe lungusno at lubulumaxao do i rubur asu levempeven piao." Kereva, ne Moroa im doma mumu solo mo lubulumaxao? <sup>10</sup> \*Kopla neni ga tong i na mumu mun luvuttadi

gugu ren? I ruturun tinotno do diga malagan i na levelinga rinama luvuttadi vavang. I lok ngan ta legepu radi duga lok laxantaamang la legesara atdu ga but povorok laxangka la gatlotlo levempanga at nom laraamang la melemu mo laradi vetpes ga vit kaka laxampiao. Nedu eburu duga gugu atla duga doxoma i do duba lok ka tevempipisik avukat ap mo laxantaamang atdu.

<sup>11</sup> \*La kerepmo nemi luvuttadi vavang, magatlo li vam levelinga at ne Moroa keneng at lebelen nemi la migara visik pam lempeven una nunuan. Kuren la i lox avukat do nemi mana lok ka teveloklok tooro medom atnemi.

<sup>12</sup> \*Lentaba luvuttadi vavang petpes diga lok ka levempilas la levempanga anan dom atnemi la i lox avukat kuren. Ga epovo bok do nemi gita lok tooro nama kerepmo, atla maga rupot avot tidi la maga tong asu levelinga at ne Moroa rinimi.

Ketla ma goxo sing panga nemi. Maga gugu lolos aleng ti lok tooro lixitkis atnama. Lavasuun teren keretna. Maga xopara i do tentaba atnemi dina lox abulubun kepe Lagale Lavavang at ne Iesu Karisito mumu levempilas ti luvuttadi vavang.

<sup>13</sup> \*Ketla miklen i do luvuttadi di gugu ro xeneng at loogu laplavang at ne Moroa, di lok ka levempanga anan tidi boro ap mo levempanga limixin dim taba min ti ne Moroa. La do limixin diplavang mi leveluxa lomlomon to at loxonin laplavang, luvuttadi gugu di lok ka bok levengkot ap mo leveluxa diplavang min tidi ri anan.

<sup>14</sup> \*La kerepmo bok Leeme Silok ga tong i rinama do nedi di vavang mi Lagale Lavavang, dinaba lok ka luunun tidi at Lagale Lavavang kusu naba epovo at lixitkis atnedi.

<sup>15</sup> \*Ketla nia a goxo mu asu i na

\* **9:1:** Gu 22:17-18; Gu 26:16; 1 Ko 15:8 \* **9:2:** 2 Ko 3:2-3 \* **9:4:** Lu 10:8; 1 Ko 9:13-14 \* **9:5:** Jo 1:42 \* **9:9:** Lal 25:4; 1 Ti 5:18 \* **9:10:** 2 Ti 2:6 \* **9:11:** Ro 15:27 \* **9:12:** Gu 20:34-35; 2 Ko 11:9; 1 Ko 13:7 \* **9:13:** Kex 18:8,31; Lal 18:1-3 \* **9:14:** Mt 10:10; Lu 10:7; Ga 6:6 \* **9:15:** Gu 18:3

langas kusu ana sing panga nimi. La kopmen ana malagan i na xusu minaba mu asu na langas la mina lok tooro ia. Kopmen teta goxo lok tooro ia la a doxoma i do anak lok mun kuren la keke leveloklok tooro. La kopmen tara noxo lok kun na lodoxoma rak do nia noxop kip unun at lugugu rak, se nia anaba met.

16 \*Nia a vavang mi Lagale Lavavang, ketla ixok mokso ria xusu ana xip aurut laasen tarak, mila Leeme Silok gara vaxaxip pam ia mi lugugu ren kusu ana lox i. Dola nia a noxo vavang mi Lagale Lavavang, naba lok kapmek aleng tino ria.

17 \*Dola nia gita lox i na lugugu mi lodoxoma axa rak, i epovo ba do nia ana lok ka luunun. Ketla nenia axa goxo lok katling ia ri na lugugu, ne Moroa axa ga xiv ia min.

18 Lavanga sala nia anaba lok ka i at na lugugu? I lok keretna. Dola nia ana vavang mi Lagale Lavavang, nia noxo ro unun at limixin. La kerepmo nenia a noxo siam ka luunun ti na lugugu, keke i do ik mokso do ana lok ka i.

19 \*Nenia laradi sepmus mun, ketla nenia a lox ia ngan lasaxaruki at limixin axap kusu anaba lok ka buaang nedi limixin ukeneng, kusu dina nunu at Lagale Lavavang at ne Iesu.

20 \*Do ana vavang ti limixin me Judaia, loklok tarak na ngan mun loklok atdi, kusu loklok axa rak noxo lok pe lugugu at ne Moroa xeneng at lorooro atnedi. Nenia xopmen anak lok maxopok at Laulis Linga at ne Moses, ketla a lok li ia xuren ap mo levenaleng a tong asu Lagale Lavavang tinedi dik lok maxopok at Laulis Linga. Lavasuun teren keretna, diba nunu at Lagale Lavavang.

21 \*La kerepmo bok do ana nemen eburu mi limixin kopmen di me Judaia, la di nemen maxamang at Laulis Linga, loklok tarak na ngan

loklok atnedi xusu dina nunu at ne Karisito. Anai, kopmen lavasuun teren do a ronga xepe Laulis Linga at ne Moroa, ketla a nemen tinotno maxopok at lavavara at ne Karisito.

22 \*Kantubu atnedi lununu atdi ixo lolos, ana nemen ngan bok di, kusu aba lok ka bok di la ana lox alolos lununu atdi. La kerepmo a lox ia ngan limixin axap, kusu ana sat ka bok tentaba atnedi uto xeneng at Linintoo at ne Moroa.

23 Na levempanga axap a lox i ri lok ka buaang limixin kusu dina nunu at Lagale Lavavang la kerepmo anaba lok ka bok tenep at leveloklox anarong boro at ne Moroa.

24 Miklen i do keneng at lekampoovo at limixin siksixit, dik sixit kusu ti lok ka luunun, ketla legesara mun atnedi i lok ka luunun. La kerepmo nemi mina lolos at lisiksixit kerepmo xusu mina lok ka luunun.

25 \*Do limixin di nemen keneng at lekampoovo, di mumu asu leventaangas linga axap. Di mu asu i xusu dina lok ka lavatbungorong kopmen na nemen amisik. Ketla nema ma mumu asu leventaangas kusu manaba lok kaka lavatbungorong, i ngan luunun naba nemen amisik.

26 Kuren la a lolos ti lox amomo ne Moroa, i ngan laradi siksixit ik sixit epopolo uto at latnese at loxot siksixit. Nenia a lok ngan bok laradi sepsep, kopmen ni na ke xepe gamasa lukngen kusu nat ket polo.

27 \*Nenia a gugu lolos ti lok kaka limixin uto xeneng at Linintoo la ba lok kapmek do nenia noxo vubeles teren. Kuren la a lok tatao amisik luptuvuk tarak kusu ana mumu asu leventaangas linga la kerepmo nenia aba epovo bok ti nom luunun mo ne Moroa naba raba limixin nunu min.

## 10

### *Lavapaase Aronga Ri Leveloklok Kakapmek*

\* 9:16: Jer 20:9    \* 9:17: 1 Ko 4:1    \* 9:19: Mt 20:26-27    \* 9:20: Gu 21:20-26    \* 9:21: Ga 2:3  
\* 9:22: 2 Ko 11:29; Ro 11:14    \* 9:25: Pl 3:14; 2 Ti 2:4-5; 4:7-8; Je 1:12; 1 Pi 5:4    \* 9:27: Ro 8:13;  
13:14    \* 10:1: Pas 13:21-22; 14:22-29

1 \*Luvutnetak mi luvurinuk. A vara i do mina doma su at levempanga ga vot saparap lavalabat atdik gano migomgo, at levenmaares diga mumu asu ne Moses. Diga nemen maxopok at loklok tatao at ne Moroa, ni gam gomgo ridi at loxontakabu, la diga vas polo tubu at loxontas, laasen teren Laras Memele.

2 Keneng at loxontakabu la keneng ap mo loxontas, i lok ngan ta diga lok ka lesepe susu atdi ngan loklok katling at lixitkis esogo atdi mi ne Moses.

3 \*Nedi axap diga anan at levempanga anan at ne Moroa,

4 \*la diga inin at legesa dan, ne Moroa ga raba di min at langas petpes. Diga inin at ladan boro ap mo luuat na roonan mo ga emu midi. La mo luuat neni ne Iesu Karisito.

5 \*Ne Moroa ga nemen eburu midi ketla buaang atdi diga lox amusax i, kuren la diga remet eteke mene ro at lengkot axap at lamatbin.

6 \*Na axap levempanga ni lampoovo ridik, ti lox aronga dik do nemen gat dik guta vavara solo ri levempanga xakapmek, i ngan limixin me Israel diga lox i.

7 Nemen gat mita lotu saparap lempatpooovo moroa i ngan lentaba atnedi digak lok kuren. I lok ngan levelinga at Lovoang Kaala i tong i do,

“Limixin digat pot buru ri leveluxa la melema diga tii mi leventinii xapmek la diga pubeles at laxapmek.”  
*Pas 32:6*

8 \*Nemen gat dik guta lok laxakapmek maxamang at lixitkis epot ngan buaang atnedi diga mumu asu i xuren. La keneng at leges aleng, ga legepu sangaun mi lavantun larabin sangsangaun kobot (23,000) nedi limixin diga uu.

9 \*Nemen gat dik guta lok tong pen Leeme Silok ne Moroa i ngan lentaba

atnedi diga lox i, la laxasii gap sev amet di.

10 \*Nemen mita paase ngunungun amisik ti ne Moroa i ngan lentaba atdi limixin me Israel digak lox i, la ne Moroa ga riki laangelo sepsep teren la ga sev amet di.

11 \*Anai levempanga ga vot saparap di i ngan lampoovo ridik ik lok at Lovoang Kaala, la i lok ngan levempapaase aronga ri nedik na, dik ta nemen ta at levenaleng i auret ti laxavaxap at na lavatbung menemen.

12 Dola nege go i doxoma i do lununu ren mo i tu atmatkun at lemeren ne Moroa, i lox avukat do ni na lok tatao nunuan i kusu neni noxo subu kot.

13 \*Leveloklok tong pen axap it pot saparap nimi, ni i lok ngan mun mo leveloklok tong pen it pot saparap limixin axap. La ne Moroa i ruturun, la ni noxo ke xepe nimi ri loklok tong pen, nemi xopmen mina epovo xusu miba xip tutu min. Se at nom laaleng do loklok tong pen na vot saparap nimi, neni naba lox alolos nimi xusu minaba tu atmatkun la minaba vas su basinge mo loklok tong pen kusu mi noxo subu.

### *Nemen Mitat Pas Ti Levenanan At Laxampoovo Moroa*

14 \*Kuren la, luvutnetak mi luvur-inuk, mina ru asepsu basinge loklok ti lotu saparap laxampoovo moroa.

15 A paase rinimi i ngan luvuttadi akleklen. Nemi xa mina ila avukat at na levelinga rak.

16 \*At leluxa at Leeme Silok nedik di tong loklox avukat ti ne Moroa mumu lakap orong i ngan lada at ne Karisito. La nedik di inin teren, i ngan ta do dik ta lok katling luruburu atdik maxeneng at ne Karisito. La do dik di anan at lakde, i ngan labantuxu at ne Karisito naba lox asusu i do dik

\* 10:3: Pas 16:35 \* 10:4: Pas 17:6; Kex 20:11

Ko 10:11; Kex 11:4,34 \* 10:8: Kex 25:1-9 \* 10:9: Kex 21:5-6 \* 10:10: Kex 16:41-49; Ib 3:11,17

\* 10:11: 1 Ko 10:6; 1 Pi 4:7 \* 10:13: 1 Ko 1:9 \* 10:14: 1 Jo 5:21 \* 10:16: Mt 26:26-28 \* 10:17:

Ro 12:5; Ep 4:16

ta lok katling luruburu atdik maxe-neng at ne Karisito.

17 \*Leges akde mene nedik ta anan teren, kuren la nedik ta lok ngan legesabung mixin, keke i do nedik di buaang.

18 \*Mina doma mumu limixin me Israel, mo limixin digak lok ka lempanga anan atdi riplavang ti ne Moroa, la kerepmo diga xis esogo min.

19 \*Kereva, mo lovoovo moroa neni lomoroa ruturun? Kopla leveluxa limixin diplavang min ti lovoovo moroa ni laramtaba ruturun?

20 \*Kopmen tinotno! A tong i rinimi do lavamolon diplavang ti laxan moroa xaxarang, i lok ngan diplavang ti lubunggas la xopmen ti ne Moroa, la a xopara i do mina lox esogo mi lubunggas.

21 \*La kerepmo ixo epovo do mina inin at lakap at Leeme Silok, la at lakap bok at lubunggas. La kopmen tinotno na epovo do mina anan at leveluxa at Leeme Silok la minam tebeng alis bok loklok at lotu saparap lubunggas.

22 \*Do nemi mina mu asu i na, nemi minaba lox amusak ne Moroa. La mikleklen i do, kopmen mina lolos ngan ne Moroa.

23 \*I epovo do dik ata lok levempanga axap, ketla kopmen levempanga axap i lox avukat. I epovo do dik ata lok levempanga axap, ketla kopmen nom levempanga axap naba lok tooro dik kusu atabaklen avukat ne Moroa la ata mumu asu leven-taangas teren.

24 \*Ixo lox avukat do tara na lok tavanga xusu naba epovo xusuk mun at lixitkis teren, ketla neni na lok leveloklok nunuan kusu na lok tooro lentaba vetpes min.

25 I epovo do mina anan leveluxa lomlomon di sesep min to at levengkot etang la nemen mita doma

mumu solo i do digaplavang pam min ti laxampoovo moroa,

26 \*mila Lovoang Kaala i tong i do, "Lavatbung menemen la levempanga axap di nemen keneng teren, ni at Leeme Silok."

27 \*Mo do luvuttadi xopmen dina nunu, la dina povot tinimi uto at larapeluxa atnedi, la mi doxoma i do minat pas, i lox avukat do mina anan levempanga anan axap di raba nimi min, la nemen mita doma mumu solo i do digaplavang pam min ti laxampoovo moroa.

28 \*Ketla do tara vetpes na lok tinimi xeretna, "Anai leveluxa digaplavang min ti laxampoovo moroa." Nemen gat mita an at nom leveluxa. I lox avukat do mina rongga res teren kusu mi noxo lok kapmek lodoxoma at nom laradi i tong i na rinimi.

29 Do mina anan mo leveluxa, noxo lok kapmek lodoxoma atnimi, ketla ap mo mun laradi vetpes.

Ketla tara ba lok keretna, "Kopmen nak mokso do lodoxoma at tara vetpes na lok pe ia xusu nia a noxo anan mo leveluxa.

30 \*La mo do ana tong loklox avukat ti ne Moroa ri mo leveluxa, ixo epovo do tara vetpes na mi abulubun taba ia min, atla nia ara tong avukat pam min ti ne Moroa."

31 \*I lox avukat mene, ketla levempanga salai do mi lox i, mina anan kopla mina inin, mina lox i xusu ti lox asu lisisixam at ne Moroa.

32 \*La mina rooro mi luruptuvuk nunuan kusu limixin me Judaia la limixin kopmen di me Judaia la limixin nunu di noxo sak kikixin at lununu atdi.

33 \*Minak lok levempanga i ngan nia ak lox i. A lok tong pen i do ana lox amomo limixin axap at levempanga nenia ak lox i. Nia xopmen ana lolos kusu ti lok lempanga ria, ketla a doma mumu loklok tooro ri

\* 10:18: Mas 7:6 \* 10:19: 1 Ko 8:4 \* 10:20: Lal 32:17; Li 9:20 \* 10:21: 2 Ko 6:15-16 \* 10:22: Lal 32:21 \* 10:23: 1 Ko 6:12 \* 10:24: Ro 15:2 \* 10:26: Sam 24:1 \* 10:27: Lu 10:8 \* 10:28: 1 Ko 8:7 \* 10:30: 1 Ti 4:4 \* 10:31: Kl 3:17 \* 10:32: Ro 14:13 \* 10:33: 1 Ko 9:20-22

limixin axap kusu dinaba lok kaka lorooro avolo.

## 11

<sup>1</sup> \*Mina mumu asu loklok tarak, kerekngan nia a mumu asu loklok at ne Karisito.

*Luruptuvuk At Limixin Keneng At Levenaleng Potpot Buru*

<sup>2</sup> Nenia a emi asu minimi mila mi doxoma amisix ia la mi mumu asu mo levelinga, agara anasa vam nimi min.

<sup>3</sup> \*Ketla a vara i do minaklen avukar i do ne Karisito neni i nemen mavana at lavatlok axap, la latlok neni i nemen mavana at latkin teren. La ne Moroa neni i nemen mavana at ne Karisito.

<sup>4</sup> Kuren la latlok do i ngising koplā i tong asu levelinga at ne Moroa la i kua pe lavatlak teren, neni xopmen na lok ngangao at ne Iesu Karisito.

<sup>5</sup> La nege tatkin do i ngising koplā i tong asu levelinga at ne Moroa la kopmen na xua pe lavatlak teren, neni xopmen na lok ngangao at latlok teren. I lok ngan mun latkin in gan pes axap levengkabinim at lavatlak teren.

<sup>6</sup> Mo dola tatkin kopmen na xua pe lavatlak teren, i lox avukat do neni na sep korop atmut lavatkabinim teren. Ketla ni lavanga loklok mamangan do tatkin na gan kepe levengkabinim at lavatlak teren koplā na sep korop lavatkabinim teren. Kuren la neni na kua pe amisik lavatlak teren to at lotu.

<sup>7</sup> \*Ixo epovo do latlok na xua pe lavatlak teren, mila neni i lox asusu lampoovo mi lisisixam at ne Moroa la kerepmo ni i emi asu mi ne Moroa. Ketla latkin na xua pe lavatlak teren at lotu mila neni i lox asusu lampoovo at loklok ngangao ren ti latlok teren.

<sup>8</sup> \*Na i raturun mila ne Moroa goxo rudum li latlok mi loxosi at latkin, ketla ne Moroa ga rudum li latkin mi loxosi at latlok.

<sup>9</sup> \*La ne Moroa goxo rudum li latlok ti lok tooro latkin teren, ketla ne Moroa ga rudum li latkin ti lok tooro latlok teren.

<sup>10</sup> Kuren la latkin na kua pe lavatlak teren. I ngan ta loklok katling ti latlok teren, i silok tin. Ni na lox i xuren mila lubung angelo dinaba ven i do latkin i lok ngangao at latlok teren.

<sup>11</sup> At lixitkis etangas atdik eburu mi Leeme Silok atdik, i lox avukat do latlok na nunu saga at latkin teren, la latkin na nunu saga at latlok teren.

<sup>12</sup> Mina lox i xuren mila ne Moroa ga rudum li latkin mi loxosi at latlok la lavakin di pisik lavatlok. Ketla levempanga axap ga ravasu at lodoxoma at ne Moroa.

<sup>13</sup> Nemi xa mina ilā mumu i na do kereva, ik mokso ri tatkin do na sing ti ne Moroa at lemeren limixin at lotu la kopmen na xua pe lavatlak teren? Kopmen.

<sup>14</sup> Leretere atdik i tong i do latlok do i ruuna lavatkabinim silok, mo lavatkabinim silok teren i sat ka lainmangan tin.

<sup>15</sup> Ketla lavatkabinim silok at latkin ni lampeneves ti limixin. Ne Moroa axa ga raba i mi lavatkabinim silok kusu ti xua pe lavatlak teren.

<sup>16</sup> Ketla do tara i vara i do na etep mi na levelinga rak, a tong i do kopmen teretere vetpes bok ba go i nemen mumu na loklok ti kua vatlak to xeneng at lotu, ik lok kantubu atnema luvuttadi vavang koplā limixin at lotu at ne Moroa.

*Leluxa At Leeme Silok*  
(Mt 26:26-29; Mk 14:22-25; Lu 22:14-20)

<sup>17</sup> Mumu na levenanasa, nia xopmen ana emi asu minimi, atla levempotpot buru atnimi ri lotu xopmen na lox asu tevempanga nunuan, i lox asusu mene levempanga i lok kakapmek.

<sup>18</sup> \*Lavanga avot i lok keretna. Nia aga ronga i do lixitkis epeseves mo

\* **11:1:** 1 Ko 4:16 \* **11:3:** Lur 3:16; Ep 5:23; 1 Ko 3:23 \* **11:7:** Lur 1:26-27; Je 3:9 \* **11:8:** Lur 2:21-23; 1 Ti 2:13 \* **11:9:** Lur 2:18 \* **11:18:** 1 Ko 1:10-12; 3:3 \* **11:19:** Lal 13:3; 1 Jo 2:19

ik lok kantubu at levempotpot buru atnimi. La a lok do nai i ruturun.

<sup>19</sup> \*Lixitkis epeseves ik lok kantubu atnimi, la kerepmo i lox asusu i do lentaba mene atnimi di mumu asu ruturun ne Moroa.

<sup>20</sup> Do mit pot buru ap mo levempotpot buru atnimi, xusu ti anan leluxa at Leeme Silok, nemi xopmen mina mumu asu loklok at nom leluxa.

<sup>21</sup> Legetgesara xa mo i anan avot ta, la kopmen dina ngangais be ri lentaba xopmen tevempanga anan atnedi, la nedi dit pot la dirak toxo mila leveluxa ira xap pam. La lentaba mo dira an mais la dira inin tangtangu nga. I lok kapmek tinotno.

<sup>22</sup> \*Kereva, kopmen taraogu atnimi getgesara ri anan la mina inin e? Nom loklok i lox asusu i do mi lox abulubun lotu at ne Moroa la mira lox amangan bok limixin at lotu mo xopmen tempanga anan atdi. La kereva levelinga rak mumu i na? Mi nua i do nia anaba emi asu minimi? Kopmen tinotno.

### *Levenanasa Mumu Leluxa At Leeme Silok*

<sup>23</sup> Na levenanasa Leeme Silok ga raba ia min, nia aga raba avolo vam nimi min. Ap mo laxanimin diga ranga alis kaka Leeme Silok ne Iesu ren, neni ga lok ka loxongkide.

<sup>24</sup> La ni ga tong orong ti ne Moroa, ni ga sebex i la ga lok ti lavaun pinivu ren keretna, "Labantuxu rak na, a raba i rinimi. Minak lox amisix i na xusu ti doxoma ia."

<sup>25</sup> \*Ap mo mun langas neni ga lok kaka lakap vaen melemu at laanan, la ni ga lok ti lavaun pinivu ren keretna, "Anaa lakap vaen ni lekabus maxat at ne Moroa ga lox amuar i mi lada rak eburu minimi. Mina lox amisix i na xusu ti doxoma ia, mo do mina in i."

<sup>26</sup> Lavasuun at na xeretna, dola mina anan at na lakde la mina inin at nai lakap vaen, mi lok katling i do Leeme Silok ga uu nop loklok atdik.

La ata mumu asu na loklok se neni nabamlong.

<sup>27</sup> \*Do nege i anan at lakde kopla i inin at lakap at Leeme Silok la ixo lox i mi loklok ngangao, neni i lok pam laxapmek ti labantuxu mi lada at Leeme Silok.

<sup>28</sup> \*Kuren la nemi getgesara mina ila mu avot be lorooro atnimi. Do mira leeng basinge vam laxakapmek atnimi, i epovo ba mina anan at lakde la mina inin ba at nom lakap.

<sup>29</sup> Do tara xopmen na ven kibis lavasuun at lakde mi lakap, neni ira sok ka vam loxot tin do neni i anan la i inin at nom leluxa at Leeme Silok.

<sup>30</sup> Nom mene i lavasuun teren la buaang atnemi dik meres la labantuxu atdi i molo, la lentaba dira remet.

<sup>31</sup> Ketla ne Moroa noxo lox asongot dik kerepmo, do nedik axa ata ila mumu avot be luruptuvuk atnedik la melemu ba ata anan ba at leluxa at Leeme Silok.

<sup>32</sup> \*Ketla ne Moroa ip sev amarat dik kerepmo, kusu nedik ta noxo seeve eburu minedi limixin at na lavatbung menemen dixo nunu at Leeme Silok.

<sup>33</sup> Kuren la, luvutnetak mi luvurinuk, a tong i rinimi xeretna. Dola mina vot buru kusu mina anan at leluxa at Leeme Silok, mina ngais ka be nedi kovisi dina rupot.

<sup>34</sup> La do tara i roxo, neni na anan avot be ro at loogu ren, la kerepmo mi noxo ekip tangarang mi lebelemamao at ne Moroa.

La ti mo levelinga vetpes bok miga sue ia mumu i, ana vaase bok ba nimi min do nia ana vot pasa nimi.

## 12

### *Leventamtaba At Loroonan Kaala*

<sup>1</sup> Luvutnetak mi luvurinuk. Ana anasa nimi mi leventamtaba boro at Loroonan Kaala, xusu mina xasep teren.

<sup>2</sup> \*Mikleklen i do ganoxa miga neman ngan lavamolon kopmen tununu atdi. Lempatpoovo moroa

\* 11:22: Je 2:5-6 \* 11:25: Pas 24:6-8; Sak 9:11; Ib 8:8-13 \* 11:27: Ib 10:29 \* 11:28: Mt 26:22; 2 Ko 13:5 \* 11:32: Ib 12:5-6 \* 12:2: Abk 2:18-19

gam gomgonga rinimi la ga sasar asoogong nimi.

<sup>3</sup> \*Kuren la mina ila mumu loklok at limixin do di nunu raturun kopla xopmen. Kuren la mina xasep do mo laradi, Loroonan Kaala at ne Moroa i suxuna i, kopmen noxo tong i do "Lasaxaek naba mu ne Iesu!" Ketla laradi do Loroonan Kaala at ne Moroa na suxuna i, neni xusuk mun i epovo na tong i do "Iesu, neni Leeme Silok."

<sup>4</sup> \*Buaang laxantamtaba at Loroonan Kaala, ketla na axav i leventamtaba i laala mun boro at Legeso Roonan Kaala im taba i.

<sup>5</sup> \*Buaang leventaangas ti lok tooro lugugu at ne Moroa, ketla nedik axap ta gugu ri legesa Eme Silok.

<sup>6</sup> Buaang leventaangas axap ti lok lugugu at ne Moroa, ketla legesa Moroa mun im taba levelolos ti limixin axap ti lok leven gugu ren.

<sup>7</sup> \*Moroa im taba legetgesa radi mi leventamtaba at Loroonan Kaala kusu tin ti lok tooro limixin axap di nunu.

<sup>8</sup> Loroonan Kaala i lox epovo i xusu na raba laradi mi laramtaba ri tong asu Lagale Lavavang. La ti lara vetpes na mun legeso Roonan Kaala i raba i mi laramtaba ri tong axasep levelinga at ne Moroa.

<sup>9</sup> La ti lara manga na Loroonan Kaala mun i raba i mi lununu i lolos aleng. La ti lara manga i raba i mi lolos kusu ti lox avukat limixin mekmeres.

<sup>10</sup> \*La Loroonan Kaala i raba lara mi lolos ti lok levempanga sangsangu. La ti lara vetpes manga i raba i mi laramtaba ri paase ali. La ti lara manga laramtaba xusu na ila leventamtaba dola i laa meva, boro at Loroonan Kaala xopla xopmen. La ti lara manga Loroonan Kaala i raba i mi laramtaba ri paase mi levempapaase vetpes. La ti lara i raba i mi laramtaba xusu tik soxomus lavasuun ap mo levempapaase vetpes.

<sup>11</sup> \*Ketla neni mun legeso Roonan Kaala ik lox i na. La im taba leventamtaba ri legetgesa radi ngan Loroonan Kaala i vara i.

### *Lavapaase Poovo Mumu Limixin Lotu Dina Ru Buru*

<sup>12</sup> \*Labantuxu at laradi i ruuna buaang laxangkot. Ketla neni mun legesa bantuxu mi levengkot axap ik lok teren. Karisito ik lok mun kuren.

<sup>13</sup> \*Nedik axap limixin, ne Moroa gara suxuna vam dik mi mo legeso Roonan Kaala ren, kuren mun la nedik at legesa bantuxu. Mila nedik axap ataga lok ka vam legeso Roonan Kaala ne Moroa ga raba nedik min. Keke i do buaang atnedik limixin, la nedik at levengkot petpes, lentaba at leme Judaia, la lentaba xopmen di me Judaia, la lentaba nedi levenasaxaruki, la lentaba nedi luvuttadi kopmen di lavasaxaruki.

<sup>14</sup> Kopmen tegesoxot mene xeneng at labantuxu, ketla buaang levengkot teren.

<sup>15</sup> Mo luxangkedek i nemen ngan axa luxot at labantuxu. Ixo epovo do luxangkedek na lok, "Nema xopmen lukngen, la kerepmo nema xopmen at labantuxu."

<sup>16</sup> La lubaalung naba nemen ngan axa luxot at labantuxu. Ixo epovo do duna lok, "Nema xopmen luxatli, kuren la nema xopmen lenep at labantuxu."

<sup>17</sup> Dola labantuxu axap ni luxatli, ni naba ronga levelinga xereva? La do ni mun lubaalung, neni naba sumak kereva?

<sup>18</sup> Ketla ne Moroa goxo lok labantuxu atdik kuren. Moroa ga lok li levengkot axap at labantuxu atdik kerekngan lavavara ren kusu naba lok kuren.

<sup>19</sup> Mo do levengkot axap at labantuxu ni legesoxot mun, kopmen bok ba tabantuxu.

<sup>20</sup> Ketla i ngan ta i do buaang levengkot ik lok at labantuxu, ketla nedi at legesa bantuxu mun.

\* 12:3: 1 Jo 4:2-3 \* 12:4: Ro 12:6; Ep 4:4 \* 12:5: Ep 4:11 \* 12:7: 1 Ko 14:26 \* 12:10: Gu 2:4; 1 Ko 14:5 \* 12:11: Ro 12:3; 1 Ko 7:7 \* 12:12: 1 Ko 10:17 \* 12:13: Ga 3:28

<sup>21</sup> Kuren la luxatli du noxo tong i ri lukngen do, “Maxok pakes tinumu!” La lavatlak noxo tong i ri luxangedek do, “Axok pakes tinumu!”

<sup>22</sup> Ketla ti levengkot at labantuxu, kopmen tugugu silok atdi, nedi di lok tooro aleng.

<sup>23</sup> La ti mo levengkot at labantuxu atdik, ixo lox avukat do limixin dina ven i, dik di etara pe nunuan tinotno i. La ri levengkot bok at labantuxu atdik ixo lox avukat do dik ata paase mumu i, nedik di ke xepe i.

<sup>24</sup> Ketla ti levengkot at labantuxu atdik i lox avukat, kerekngan lemeren dik, nedik dixo etara pe i. Moroa axa ga rudum li axap levengkot at labantuxu atdik kerepmo, kusu limixin dina lok ngangao ap mo levengkot at labantuxu limixin di lox abulubun i.

<sup>25</sup> Kuren la kopmen tekarakat nak lok at labantuxu, ketla levengkot axap di elok tooro ela.

<sup>26</sup> Mo do toxot at labantuxu na songot, nedi bok lentaba levengkot petpes at labantuxu diba songot eburu min. Mo do tenep at labantuxu na ruuna ka lomomo, mo bok levengkot petpes diba lok momo eburu min.

<sup>27</sup> \*La kerepmo nemi axap mi lok ngan labantuxu at ne Karisito, la nemi getgesara mi lok ngan levengkot ap mo labantuxu ren.

<sup>28</sup> \*Keneng at lotu Moroa gara sox-olik ka vam limixin ti lok leven gugugu. Neni ga lok katling ka luvuttadi vavang ngan neni lugugu avot la i silok ti lentaba vetpes, la lara mumu ren luvuttadi vapaase ali. La lara mumu luvuttadi ri anasa limixin mi levelinga at ne Moroa. La lara mumu manga ren nedi di lok levempanga sangsangu. Lara melemu manga nedi ne Moroa ga raba di mi lolos kusu ti lox avukat limixin mekmeres. Lentaba ri lok tooro limixin, lentaba ri gomgonga di la lara mumu rinotno

lentaba ri paase mi levempapaase vetpes.

<sup>29</sup> Kopmen nedi axap luvuttadi vavang, kopla luvuttadi vapaase ali, kopla luvuttadi loklox ase. Kopmen nedi axap di ruuna lolos kusu ti lok levempanga sangsangu,

<sup>30</sup> kopla ri lox avukat levenanmeres, kopla ri paase mi levempapaase vetpes, kopla ri soxomus lava-suun at levempapaase vetpes.

<sup>31</sup> \*Ketla lebelen nemi na ngaongao aleng kusu mina ruuna ka mo leventamtaba i silok aleng.

Lara lavanga i lox avukat tinotno ri na leventamtaba, i lok keretna.

## 13

### *Labalamu*

<sup>1</sup> I epovo do ana paase mi levempapaase axap limixin di paase min at na lavatbung menemen kopok, la ana paase bok mi levempapaase at lubung angelo. Ketla mo do axo ruuna labalamu, levempapaase rak naba lok ngan mun lanteng at laxavu mi lanteng at lagaamit kopmen tava-suun teren.

<sup>2</sup> \*La do a ruuna laramtaba at ne Moroa xusu ti vavang ali, la anaklen pipis levempanga axap, la anaklen avukat bok levendoxoma ali pe at ne Moroa. La lununu rak saparap ne Moroa i lolos aleng la a epovo xusu ana riki pes levempatkaana. Ketla mo do kopmen tabalamu na nemen tarak, nenia mun lavanga gamasa.

<sup>3</sup> \*La do ana raba xepe axap levempanga rak kusu ti lok tooro limixin banbalo, la ana siam kepe mi labantuxu rak kusu dina xotos i ro at laxao, ketla kopmen tabalamu na nemen tarak, nom axav i, noxo lok tooro ia.

<sup>4</sup> Laradi balamu ik lok mulus mene, la ik lok tooro luvutneton. Neni xopmen na ngaongao ri lempanga at lentaba vetpes la kopmen nap kip aurut laasen axa ren.

\* 12:27: Ro 12:5; Ep 5:30 \* 12:28: Ep 4:11-12  
Mt 6:2 \* 13:5: Pl 2:4

\* 12:31: 1 Ko 14:1 \* 13:2: Mt 17:20 \* 13:3:



<sup>5</sup> \*Laradi balamu i ruuna lurup-tuvuk nunuan la kopmen nak morong, la kopmen nak musak soso, la kopmen na doxoma amisik laxakapmek lara vetpes i lox i rin.

<sup>6</sup> \*Laradi balamu xopmen nak lok momo at laxakapmek limixin dik lox i, ketla ik lok momo at lununuan limixin dik lox i.

<sup>7</sup> \*Laradi balamu xopmen na porang laxakapmek lara vetpes ik lox i rin, la i nunua i do limixin dinaba lok lununuan la i doxoma aie xepe levenmumuat it pot saparav i.

<sup>8</sup> Anai leventamtaba at Loroonan Kaala, laramtaba ri paase ali, la laramtaba ri paase mi levempapaase vetpes, la laramtaba ri tong asu levelinga at ne Moroa. Di axap na lavantun di noxo nemen abao la dina sonao manga. Ketla labalamu naba nemen amisik la kopmen taxavaxap teren.

<sup>9</sup> Leventamtaba atdik boro at Loroonan Kaala i raba dik min, i ngan laramtaba ri tong asu levelinga at ne Moroa la laramtaba ri paase ali, nedik taxoklen avukat lugugu ren.

<sup>10</sup> Ketla melemu Laradi Manmanton nabamlong la mo leventamtaba kopmen ataklen avukar i, naba xap asoao.

<sup>11</sup> Ga lamdak kakalix ia, levempapaase rak mi lusumsuma rak la lodoxoma rak ga lok ngan mun at lamdak lixilik. Ketla nanga ara vee radi, ara lok kepe axap pam loklok at laxamdak lixilik.

<sup>12</sup> \*La nanga nedik kopmen ata xasep at levempanga nunuan ne Moroa i lox i ridik, i ngan laradi i reven lemeren at liriong kopmen na xasep. Ketla melemu at lomlong at ne Iesu Karisito, dik taba epen etang mi ne Moroa. Nanga lakleklen atdik mumu ne Moroa i lixilik mene, ketla melemu tanabaklen axav i, kerekngan ne Moroa ikleklen axap dik.

<sup>13</sup> \*Kuren la anaa lavantun levempanga naba nemen amisik, lununu saparav ne Moroa, lodoxoma voovo

ti lomlong at ne Karisito, la labalamu. La lara i silok aleng at nai lavantun, ni labalamu.

## 14

### *Leventamtaba At Loroonan Kaala*

<sup>1</sup> \*Mina lolos kusu lorooro atrimi na mumu asu loklok at labalamu. La lebelen nimi na ngaongao xusu mina lok kaka leventamtaba at Loroonan Kaala. Ketla mo laramtaba ri paase asu levelinga at ne Moroa, mina lolos ti lok ka i.

<sup>2</sup> Lara do i paase mi levempapaase vetpes, neni xopmen na paase ri limixin, ketla i paase ri ne Moroa, la kopmen tara na xasep nunuan at levempapaase neni i paase min. Neni i ngan ta do i paase mi levelinga lipe boro at loroonan teren la levempapaase ren ixo xasep at levendoxoma at limixin.

<sup>3</sup> Ketla mo laradi i paase asu levelinga at ne Moroa, ni i paase ri limixin, la kerepmo bok i lok tooro di, la i lox alolos di, la i lox aulis levendoxoma atdi.

<sup>4</sup> Laradi i paase mi levempapaase vetpes, neni i lok tooro xusuk mene i. Ketla lara i paase asu levelinga at ne Moroa, ni i lok tooro limixin axap kusu lununu atdi naba lolos.

<sup>5</sup> \*I lox avukat do nemi axap mina paase mi levempapaase vetpes, ketla lavanga i silok ti na. A vara i do nemi axap mina lok ka laramtaba ri paase asu levelinga at ne Moroa. Laradi do i paase asu levelinga at ne Moroa, mo levelinga ren i mumuat aleng ti lara i paase mi levempapaase vetpes, la mo levelinga ren i epovo na xasep ti limixin. Ketla i lox avukat mene do tara go i nemen la i ruuna bok laramtaba boro at Loroonan Kaala xusu ti soxomus avukat lavasuun ap mo levempapaase vetpes, kusu na lok tooro limixin at lotu.

<sup>6</sup> Kuren la luvutnetak mi luvurinuk, do nenia ana vot pasa nimi la ana paase rinimi mi levempapaase vetpes, mo lavapaase rak naba

\* 13:6: Ro 12:9 \* 13:7: Ro 15:1; 1 Pi 4:8; 1 Ko 9:12 \* 13:12: 2 Ko 5:7; Je 1:23 \* 13:13: 1 Ts 1:3; 1 Jo 4:16 \* 14:1: 1 Ko 12:31; 14:39 \* 14:5: Kex 11:29

lok tooro nimi xereva? Kopmen tinotno. Ketla do ana tong asu levelinga boro at ne Moroa rinimi kopla ana raba nemi mi tavapaase axasep at Lovoang Kaala, kopla ana vavang tinimi mi levempapaase ali, kopla ana anasa nimi, nom i naba lok tooro aleng nimi.

<sup>7</sup> Lavapaase poovo mumu i na, i lok keretna. Mina doxoma mumu be levempanga rengteng i ngan laxaatu dit mas i la loxontaaleng dip sev i. Do laradi xopmen nat mas avukat laxaatu, ataba ronga xibis mo loxompixan kereva? La do lara ip sep loxontaaleng, la kopmen nap sep avukar i, ataba ronga xibis mo loxompixan kereva?

<sup>8</sup> La mo do laradi it mas luru ri leesep la kopmen na mas aonon avukat lerengteng teren, limixin esep di noxo gagas avukat ti leesep. <sup>9</sup> La i lok mun kuren tinimi. Do mina tong asu levelinga at ne Moroa mi levempapaase vetpes, kopmen tara naba xasep nunuan teren. Levelinga atnimi naba ngan lamamas gamasa.

<sup>10</sup> Buaang laxampapaase axap at na lavatbung menemen, la na levempapaase axap, levempasuun mo ren i nemen.

<sup>11</sup> Ketla mo do nia xopmen anaklen lavapaase lara i vaase asu i, mo laradi i paase na levelinga, naba lok ngan laradi xadiong tia la nenia bok aba lok ngan laradi xadiong tin.

<sup>12</sup> La i lok bok kuren tinimi. Nia aklen i do nemi mi vara aleng i xusu mina ruuna ka leventamtaba at Loroonan Kaala. Kuren la mina lolos kusu mina lok kaka leventamtaba i epovo xusu ti su auru lotu.

<sup>13</sup> Ni lavasuun teren la do laradi i paase mi levempapaase vetpes, neni na sing bok ne Moroa ri laramtaba xusu ti soxomus avukat lavasuun ap mo levempapaase vetpes.

<sup>14</sup> Dola nia ana sing mi levempapaase vetpes, mo levelinga i ravasu at loroonan tarak, ketla mo levelinga xopmen na xasep at lodoxoma rak.

<sup>15</sup> \*Kuren la nia aba lok ba lavanga salai? Do nenia a sing saparap ne Moroa, a vara i xusu lisingising tarak na ravasu at loroonan tarak la naba ravasu bok at lodoxoma rak. La a vara box i xusu mo levengkompixan abak pixan i, naba ravasu at loroonan la at lodoxoma bok tarak.

<sup>16</sup> Do mina emi asu mi ne Moroa mi levempapaase vetpes boro xeneng at loroonan kusuk mun atnimi, la do taradi go xopmen na lotu i nemen eburu minimi ap mo lixitkis buru, la neni ixo xasep at levempanga salai mo mi paase asu i. La ni naba tong i do "I ruturun!" kereva, do mina lox axap lisingising loklox avukat atnimi?

<sup>17</sup> Keke i do lisingising loklox avukat atnimi ri ne Moroa mo i lox avukat, ketla nom lisingising atnimi xopmen noxo lok tooro mo laradi vetpes.

<sup>18</sup> Nenia a tong avukat ti ne Moroa mila a paase aleng mi levempapaase vetpes, la nemi kopmen.

<sup>19</sup> Ketla to at levempotpot buru at limixin keneng at lotu, i lox avukat do ana tong mene tavalimo tengkolinga i xasep kusu ti lox ase limixin. Ixo lox avukat do ana paase mi taxalinga solo at levempapaase vetpes la kopmen na lok tooro limixin.

<sup>20</sup> \*Luvutnetak mi luvurinuk, nemen levendoxoma atnemi na lok ngan loklok at laxamdak lixilik, ketla mina ke xepe laxakapmek kerekngan laxamdak lixilik. La mina doma mumu avukat na leventamtaba ngan limixin mukun.

<sup>21</sup> Keneng at Laulis Linga i lok keretna,

"Moroa ga lok, 'Nia anaba paase ridi na limixin tarak mi levempapaase vetpes at limixin kadiiong, la anaba paase ridi mi levelinga at limixin kadiiong, ketla di noxo ronga res tarak.' "

*Ais 28:11,12*

<sup>22</sup> Kuren la laramtaba ri paase mi levempapaase vetpes ni i lox asuvos

\* 14:15: Ep 5:19 \* 14:20: Ep 4:14; Pl 3:15

ne Moroa ridi limixin kopmen dina nunu la kopmen tidi limixin di nunu. La laramtaba ri tong asu levelinga at ne Moroa i nemen ti limixin teren, la kopmen tidi limixin kopmen dina nunu.

<sup>23</sup> \*Mo do limixin lotu axap dina vot buru la nedi axap dina ruka i do dina paase mi levempapaase vetpes la do tentaba tuvuttadi gamasa go kopla tuvuttadi xopmen dina nunu, dina vubeles, nedi diba nua i do nemi mo mi baulang.

<sup>24</sup> \*Ketla mo do mina paase mi levelinga at ne Moroa la do luvuttadi gamasa xopla tuvuttadi kopmen dina nunu, dina vubeles ukeneng, nedi dinaba rongga xibis mo levelinga nedi di rongga i. La mo levelinga nedi di rongga i, naba vuk gili lodoxoma atdi,

<sup>25</sup> \*la dinaba ven kibis levempanga xakapmek i nemen keneng at lorooro atnedi. At na mun i loklok dinaba xis tiktikbu la dina lok ngangao ri lotu saparap ne Moroa. La dina tong asu i do, "I ruturun tinotno, Moroa i nemen eburu minimi."

### *Loklok Ti Mumu Asu I Xeneng At Lotu*

<sup>26</sup> \*Luvutnetak mi luvurinuk. Ti lox axap na levelinga rak a vara i xusu ana tong axasep nemi keretna. Do minat pot buru ri lotu, lara na ruuna loxompixan. Lara ri loklox ase mi levelinga at ne Moroa. La lara mi levelinga loklox axasep boro at ne Moroa, la lara ri levempapaase vetpes, la lara ri soxomus mo levempapaase vetpes. Na levempanga axap mina lox i xusu ti lox alolos limixin at lotu.

<sup>27</sup> Do tentaba di lok do dina vaase mi levempapaase vetpes, nemen dita epaase at legeso xonaleng, ketla dina epangan asu. I lox avukat do tegepura xopla tavantun mene dina vaase. La tara vetpes bok naba ba gili mo levempapaase vetpes.

<sup>28</sup> Ketla do xopmen tara go i nemen kusu ti soxomus lavasuun ap mo levelinga, i lox avukat do, mo laradi i paase mi levempapaase vetpes, nat kis atnaasan la ni na emaangun pilo mene mi ne Moroa.

<sup>29</sup> \*Legepura xopla lavantun mo dira gagas pam kusu dina vaase asu levelinga at ne Moroa, la lentaba vetpes dinat kis atnaasan la dina ila mumu mo levelinga do ni levelinga ruturun pam at ne Moroa xopla xopmen.

<sup>30</sup> Ketla do tara go it kis ap mo lixitkis buru i lok ka tevelinga boro at ne Moroa, mo lara i paase, neni na vamngus be.

<sup>31</sup> Ixo epovo do nemi axap mina vaase asu levelinga at ne Moroa at legeso xonaleng. Mina epangan asu xusu nemi axap mina elox ase la mina elok tooro ela.

<sup>32</sup> La nedi di ruuna laramtaba ri paase asu levelinga at ne Moroa dina lok tatao avukar i,

<sup>33</sup> la kerepmo lotu atnemi nabak sixit nunuan. Mina lox i xuren mila ne Moroa ga xuruse kaka dik kopmen do rik lox angtang gamasa. Ketla ni ga xuruse kaka dik kusu lotu atdik nabak sixit nunuan, atla neni ne Moroa at limila.

To at laraogu lotu at limixin at ne Moroa,

<sup>34</sup> \*lavakin dinat kis pilo ro xeneng at levempotpot buru at lotu. Kopmen nak mokso ridi do dina paase. La di noxo gomgonga, kerekngan Laulis Linga at ne Moses i tong i.

<sup>35</sup> Mo do lavakin di vara i xusu dinaklen ka tavanga, i lox avukat do dina sue be lavatlok atdi min to at laraogu atdi. Lavanga mamangan aleng do latkin na vaase kaxat to xeneng at lovotpot buru at lotu.

<sup>36</sup> Kereva, levelinga at ne Moroa ga vas kaxat medom atnemi? Kopmen. Kereva, nemi xusuk miga lok kaka levelinga at ne Moroa? Kopmen.

<sup>37</sup> \*Mo do tara i doxoma i do neni laradi vavang at ne Moroa xopla i

\* **14:23:** Gu 2:13 \* **14:24:** Jo 16:8 \* **14:25:** Ais 45:14; Sak 8:23; Jo 4:19 \* **14:26:** 1 Ko 12:8-10; Ep 4:12 \* **14:29:** Gu 17:11; 1 Ts 5:21 \* **14:34:** 1 Ko 11:3; 1 Ti 2:12; Ta 2:5 \* **14:37:** 1 Jo 4:6

ruuna laramtaba at Loroonan Kaala, neni na ven kisiv i do na levelinga rak nia a malagan i, ni levelinga lolos at Leeme Silok.

<sup>38</sup> Ketla do xopmen dina ven kisiv i do na levelinga rak boro at ne Moroa, nemen mita rongga res at levelinga ren.

<sup>39</sup> Kuren la luvutnetak mi luvur-inuk, lebelen nimi na ngaongao xusu mina paase asu levelinga at ne Moroa, ketla nemen mita rupe tara i ruuna laramtaba xusu ti paase mi levempapaase vetpes.

<sup>40</sup> \*Ketla levempanga axap minak lox i mi lomokmokso xusu lotu nak sixit nunuan.

## 15

### *Karisito Ga Roo Xat Pam At Lanmet*

<sup>1</sup> Luvutnetak mi luvur-inuk. A vara i do mina doma amlong ti nom Lagale Lavavang, nenia aga vavang min tinimi. Miga siam ka i la lununu atnimi ga ru alolos teren.

<sup>2</sup> Mo do lununu atnimi natmatkun teren, minaba lok ka lorooro ren. Ket do kopmen mina nunu at levelinga xerekngan nia aga vavang min, lununu atnimi naba lok ngan lavanga gamasa.

<sup>3</sup> \*Nia aga raba nemi mi levelinga nia aga lok kaka i boro at ne Karisito. Mo levelinga ga lok keretna. Karisito ga uu xorop ti loklok kakapmek atdik ngan Lovoang Kaala i tong i.

<sup>4</sup> \*La digak mir i, la at laaleng sepsev avantun ni ga roo xat amlong manga, kerekngan Lovoang Kaala i tong i.

<sup>5</sup> \*La ni ga ru asuvos ti ne Pita la melemu rinedi lasangaun mi legepura luvuttadi vavang.

<sup>6</sup> La melemu bok neni ga ru asuvos tinedi lavalimo sangaun kobot (500) mi lenep mixin diga nunu ren. Lentaba atdi digara met pam ketla buaang atnedi move di rooro.

<sup>7</sup> \*La melemu neni ga ru asuvos ti ne Jems la tinedi bok luvuttadi vavang axap.

<sup>8</sup> \*Melemu rinotno ni ga vor asuvos ba ria ngan ta laxadede nenen i visik kubun i.

<sup>9</sup> \*La nenia a lok ngan laradi mumupit maxopok atnedi luvuttadi vavang. Kopmen ana epovo xusu limixin dina tong ia do laradi vavang, mila nia agap sev asongot limixin nunu at ne Moroa.

<sup>10</sup> \*Ketla ne Moroa ga lox asuusu langsung letaba nabalamu ren tia la ni ga lox amaxar ia, i ngan ta laradi vavang. La maxeneng at na letaba nabalamu ni ga raba ia min, laxampanga nunuan gara ravasu at lorooro rak, i ngan aga gugu lolos tinotno rinedi lentaba luvuttadi vavang. Ketla xopmen lolos tarak na nia aga gugu min, ketla letaba nabalamu at ne Moroa mo ga lox ia xusu a epovo ana gugu lolos.

<sup>11</sup> Kuren la kopmen na lok petpes, dola nia aga vavang kopla luvuttadi vavang diga vavang tinimi. Nema axap maga vavang mene mi legesa vavang la na Lagale Lavavang pam nemi miga siam kaka i.

### *Laxakatu Kaxat Amlong At Ne Karisito La Atnedik Bok*

<sup>12</sup> Lagale Lavavang maga vavang min tinimi dola, Moroa gara lox arooro xat amlong pam ne Karisito ri lorooro. Kuren la kopmen na ruturun i ngan ta i mo lentaba atnimi di tong i do limixin digara met pam, di noxo roo xat amlong.

<sup>13</sup> Mo do i ruturun do limixin di met la di noxo xatu kaxat amlong ti lorooro, i ven ngan tai do ne Moroa goxo lox arooro amlong ne Karisito.

<sup>14</sup> La mo do ne Karisito goxo roo xat amlong at lanmet, kopmen tava-suun tinotno ren kusu mana vavang tinimi la lununu bok atnimi ba lok ngan lavanga gamasa.

\* **14:40:** Kl 2:5 \* **15:3:** Ais 53:8-9 \* **15:4:** Mt 12:40; Gu 2:24-32 \* **15:5:** Lu 24:34; Mt 28:16-17  
 \* **15:7:** Lu 24:50 \* **15:8:** Gu 9:3-6; 1 Ko 9:1 \* **15:9:** Ep 3:8; 1 Ti 1:15 \* **15:10:** Gu 8:3; 2 Ko 6:1; 11:5,23 \* **15:15:** Gu 1:22; 4:33; 5:32

15 \*La mavana at nai, i ven ngan ta i do maga xarang taba ne Moroa do neni ga lox arooro amlong ne Karisito basinge lanmet. Mila do i ruturun do limixin diga met pam di noxo roo xat amlong ti lorooro, i lox asusu i do ne Moroa bok goxo lox arooro xat amlong ne Karisito.

16 Do xopmen taxakatu kaxat amlong, ne Karisito bok kopmen gi toxo roo amlong.

17 La do ne Karisito xopmen goxo roo amlong, lununu atnimi keneng at ne Karisito xopmen na ruturun. La laxakapmek atnimi move ik lok, ne Moroa xovisi na doxoma xepe i.

18 La tinedi bok diga met mi lununu atnedi at ne Karisito, nedi bok diba seeve, do laxakatu amlong at ne Karisito xopmen na ruturun.

19 La mo do lodoxoma voovo atdik ti ne Karisito at na mun lorooro la kopmen ti lorooro melemu, i epovo do limixin dina lox asusu langsan gan lebelen tuntun tinedik.

20 \*Ketla at na levenaleng, na levelinga i ruturun tinotno, Karisito gara roo xat amlong pam at lanmet ngan livipisik avot tinedi dinaba roo xat amlong. La kerepmo maklen tinotno i do mo limixin nunu diga met pam, dinaba roo xat amlong bok.

21 \*Lanmet ga vot ti nai lavatbung menemen mumu mene legesa radi. Kuren la lorooro xat amlong bok atnedi digara met pam i vasuun mun at ne Karisito,

22 mila keneng mun at laxakapmek at ne Adam ga raba avolo dik min. Kuren la lanmet ga vubeles mu limixin axap. La keneng at lixitkis esogo atdik mi ne Karisito, limixin axap di nunu, do dina met, dinaba roo xat amlong.

23 \*Ketla nedi getgesara dinaba roo xat amlong at levengkonalleng axa atdi. Avot tinotno ne Karisito ga xatu kaxat amlong, la at laaleng neni namlong ude xopok, nedi ba mo lim-

ixin digara met pam mi lununu atdi xeneng at ne Karisito, dinaba roo xat amlong.

24 La melemu ba, laxavaxap at na lavatbung menemen naba vot. Karisito naba ruuna lolos mavana at levelolos atnedi luvuttadi amgomgo, labaroonan kapmek, la lavaeme silok axap diga sok tixirixes ne Moroa. La neni naba raba avolo ba Linintoo ren ti ne Moroa ne temen.

25 \*Karisito naba nemen ngan Lamgomgo se ne Moroa naba sev asi axap nedi dit kis munepen min la na lok li di maxopok at luxangkedek at ne Karisito.

26 \*Moroa naba lok kepe be nedi axap la melemu ni na lok kepe axap ba lanmet.

27 \*I ngan Lovoang Kaala i tong i do, "Moroa ga lok katling di xusu dinam gomgonga levempanga axap neni ga rudum li i." Kopmen na ruturun do ne Moroa i nemen maxopok at ne Karisito, ketla ne Moroa ga lok li levempanga axap maxopok at ne Karisito. Na i xasep tinotno.

28 Do levempanga axap ne Moroa na lok li i maxopok at loklok tatao at ne Karisito, melemu ne Karisito, nitna naba lok li i maxopok at ne Moroa. Karisito ga lok li levempanga axap maxopok teren la ne Moroa nabak lok tatao axap mavana atdi.

29 Dola xopmen taxakatu kaxat amlong, kopmen tavasuuun teren kusu nemi mik lok ka lesep susu ridi limixin digara met pam. Do labarongan di noxo roo xat amlong, na loklok atnimi noxo lok tooro di.

30 \*La kereva ba nema. Do xopmen taxakatu kaxat amlong, tila ba nema ma nemen keneng at losongsongot mumu lugugu at ne Moroa at levenaleng axap?

31 Luvutnetak mi luvurinuk. At levenaleng axap nia a vekip tangarang mi limixin dik lok do dinap sev amer ia. La a lok momo rinotno atla nemi mi nunu saparap ne Iesu

\* 15:20: Kl 1:18 \* 15:21: Ro 5:12,18 \* 15:23: 1 Ts 4:16; Li 20:5 \* 15:25: Mt 22:44 \* 15:26: Li 20:14; 21:4 \* 15:27: Sam 8:6 \* 15:30: Ro 8:36

Karisito, Leeme Silok atnedik. La na lomomo i sok lodoxoma rak kusu ana tong asu i na levelinga rinemi.

<sup>32</sup> \*La do xopmen taxakatu kaxat amlong, kopmen tavasuun teren do agara esep eburu vam mi levempanga esep mi lavanuet kangkedek atdi ro Epesas. La do labarongan di noxo roo xat amlong, nenia aba ke xepe lugugu at ne Moroa la aba mumu asu loklok di tong i xeretna, “Ata anan la ata inin mila dik ataba met soso mun.” *Ais 22:13*

<sup>33</sup> Mina lok tatao nimi xusu tara noxo sar asoogong nimi ri laxakapmek kerepmo. La mina xasep do limixin kakapmek diba lok kapmek luruptuvuk nunuan atnimi.

<sup>34</sup> \*Minamlong ti levendoxoma nunuan atnimi la mina xap basinge leveloklok kakapmek atnimi, mila lentaba atnimi xopmen dina xasep nunuan at loklok at ne Moroa. A vaase i na xusu minaba mangan.

### *Loklok Ti Labantuxu Maxat At Lanmet*

<sup>35</sup> \*Ketla tentaba diba sue, “Labarongan dinaba roo xat ti lorooro xereva? Labantuxu salai dinaba ruuna xaka i?”

<sup>36</sup> Nemi laxampanga rangtangu. Do tara itlo liit panga ro at laxangka, noxo suu xat soso do xovisi na mang.

<sup>37</sup> La lavanga utlo li i at laxangka, ni liit panga gamasa mene nga, at lavatpiao, kopla tevempanga vetpes. Kopmen unatlo axap nom luuna xusu naba suu xat.

<sup>38</sup> \*La ne Moroa xa ik lok katling mo liit kusu na suu ngan lodoxoma ren ti mo liit panga. La neni xa ik lox asusu mo liit naba suu ngan luuna axa ap mo liit.

<sup>39</sup> Labantuxu at levempanga axap di rooro xopmen dina epovo. Laradi i ruuna labantuxu vetpes, la levempanga mi lavanuet kangkedek i lok petpes la ti lavapixa i lok petpes la ti lenmat i lok petpes.

<sup>40</sup> La levempanga di nemen to vana at laxalibet, di lok petpes ti levempanga mede xopok. Levereven ap mo levempanga boro vana at laxalibet i lok petpes ti levereven at levempanga at na lavatkangka.

<sup>41</sup> Levereven at laxangking i lok petpes, la lagaaling levereven petpes teren, larapenti levereven petpes la kantubu at nom larapenti, lentaba i lok petpes bok.

<sup>42</sup> Naba lok mun kuren do nedi digara met pam, dina roo xat amlong ti lorooro. Do dik mit lorongan, neni i mau. Do i roo xat, neni xopmen na mau bok ba.

<sup>43</sup> \*Do dik mir i, neni i ven kapmek. La do neni i roo xat, neni naba ven avukat tinotno la na lolos.

<sup>44</sup> Do dik mir i, neni labantuxu mene. La do na roo xat, ni labantuxu maxat boro at Loroonan Kaala. Nedik di ruuna labantuxu at na lavatbung menemen, kuren la i epovo bok do ata ruuna ka labantuxu maxat boro at Loroonan Kaala.

<sup>45</sup> \*I lok ngan Lovoang Kaala i tong i do, “Laradi avot ne Adam, ne Moroa ga rudum li i ngan laradi rooro.” Ketla ne Adam mumu pit, neni ne Karisito, im taba lorooro at loroonan kusu tidik.

<sup>46</sup> Kopmen loroonan nam gomgo avot, ketla labantuxu avot la melemu ba loroonan.

<sup>47</sup> \*La ne Adam, ne Moroa ga rudum li i mi laxakup at laxangka, ketla ne Karisito, neni ga si boro vana at laxalibet.

<sup>48</sup> Nedik diga ruuna ka labantuxu ne Moroa ga rudum i mi laxangka ngan laradi avot ne Adam. La dik atanaba ruuna ka bok labantuxu ngan at ne Karisito, ni ga si min boro vana at laxalibet.

<sup>49</sup> La dik ataga ruuna ka labantuxu at laradi at na lavatkangka. La melemu levereven at labantuxu maxat atdik naba lok ngan levereven at labantuxu at laradi ga si boro vana at laxalibet.

\* **15:32:** 2 Ko 4:10-11; Lu 12:19-20 \* **15:34:** Ro 13:11; Gu 26:8; 1 Ko 6:5 \* **15:35:** Jo 12:24 \* **15:38:** Lur 1:11 \* **15:43:** Pl 3:20-21 \* **15:45:** Lur 2:7; Jo 6:63; 2 Ko 3:6,17 \* **15:47:** Lur 2:7 \* **15:50:** 1 Ko 6:13

<sup>50</sup> \*Luvutnetak mi luvurinuk. Nia a tong tuturun i do labantuxu atdik at na lorooro xopok, kopmen na epovo ri vubeles at Linintoo at ne Moroa. La levempanga i mau, kopmen na epovo xusu na lok ka tenep at lorooro avolo.

<sup>51-52</sup> \*\*Mina rongga avukat na levelinga ga nemen alipe. Buaang atnedik kovisi di noxo met, ketla do laangelo na mas luru xusu ti lok katling laxavaxap at na lavatbung menemen, soso ap mo mun lox-onaleng nedik atanaba unus. Naba lok soso mun ngan ta do laradi i vamsi, mila do dina mas luru, labarongan axap dinaba roo xat la kopmen di noxo met bok ba la nedik axap atanaba unus.

<sup>53</sup> \*Labantuxu do i mau, ni naba ngan ta labantuxu xopmen na mau. La labantuxu i epovo na met, ni naba milik ngan ta labantuxu ixo epovo na met.

<sup>54</sup> La mo do levempanga na ravasu xerepmo, la lolos at lorooro na sev asi lolos at lanmet, neni na lavanga naba lox asoorun levelinga at Lovoang Kaala i lok keretna,

“Dira vas asi axap tinotno vam lanmet.”

*Ais*

<sup>25:8</sup>  
La i lok bok,

<sup>55</sup> “Moroa ga lox axap pam lanmet la ga lok kepe lolos teren tik lox asongot la ti lok lainbulu.” *Ose*  
<sup>13:14</sup>

<sup>56</sup> \*Lanmet i lok ka lolos tik lox asongot limixin boro at laxakapmek, la laxakapmek i lok ka lolos boro at Laulis Linga.

<sup>57</sup> Ketla ata emi asu mi ne Moroa mila neni ga raba dik mi lorooro la ga lok pes lanmarat at lanmet basinge dik. Ni ga lox i na xeneng at Leeme Silok atdik ne Iesu Karisito.

<sup>58</sup> \*Kuren la luvutnetak mi luvur-inuk orong, mina tu atmatkun at levelinga at ne Moroa la nemen tara

ta sar asoogong ka nimi basinge luruturun teren. Minak lox angtang amisik at leven gugu atnimi ri Leeme Silok, atla mikleklen i do leven gugu atnimi ri Leeme Silok, ni naba pisik avukat.

## 16

### *Levenetaba Ri Luvuttadi Nunu*

<sup>1</sup> \*Nanga a vara i do ana vaase rinimi mumu levempilas miga malagan axasep min tia xusu ti lok tooro limixin at ne Moroa di nemen to Judaia. Mina lox i ngan nia agara vaase vam i ri limixin at laraogu lotu ro at lenep silok Galesia xusu dibak lox i.

<sup>2</sup> Amisik at levenaleng kaala nemi getgesara mina lili levempilas i epovo mina xape i. La mina gagas li i xuren, kusu nenia a noxo sing pilas atnimi ap mo laaleng nenia aba vot pasa nimi.

<sup>3</sup> Melemu do nia ana vot, nenia aba riki tuvuttadi uto Jerusalem. La anaba malagan taba mo luvuttadi migara siam pam midi mi levelinga loklox axasep kusu tidi rip kip laramtaba atnimi.

<sup>4</sup> Mo do nenia ana lok mulus tit pas ugo, nedi bok diba emu eburu minia.

### *Levendoxoma Ali At Ne Pol Kusu Ti Lempatpas Teren*

<sup>5</sup> \*Nia aba vot pasa nimi melemu do nenia anat pas keneng at lenep silok Masadonia ketla a noxo nemen abao go.

<sup>6</sup> \*Agut aba nemen eburu minimi go at tentaba teven gaaling, kopla at leven gaaling axap at lamdut kusu nemi miba lok tooro ia at lavatpas tarak dom at levengkot salai nia anat teren.

<sup>7</sup> \*Axo vara i do ana vot pasa nimi monga la ana nemen eburu minimi at tentaba tevenaleng mene. A doxoma i do aba nemen eburu minimi

\* <sup>15:51-52:</sup> 1 Ts 4:15-17 \* <sup>15:51-52:</sup> Mt 24:31 \* <sup>15:53:</sup> 2 Ko 5:4 \* <sup>15:56:</sup> Ro 6:14; 7:13 \* <sup>15:58:</sup> 2 Let 15:7; Li 14:13 \* <sup>16:1:</sup> Ro 15:25-26; 2 Ko 8:1-9; Ga 2:10 \* <sup>16:5:</sup> Gu 19:21 \* <sup>16:6:</sup> Ro 15:24; Ta 3:12 \* <sup>16:7:</sup> Gu 18:21

at tentaba teven gaaling abao, mo do Leeme Silok na siam.

<sup>8</sup> Ketla nia anaba nemen nade Epe-sas se at laaleng at la Pentikos,

<sup>9</sup> \*mila langas ira rem suang pam tia ri lok leven gugu silok ketla buaang bok limixin di rupe lugugu rak.

<sup>10</sup> \*Mo do ne Timoti na vot pasa nimi, i lox avukat do mina seega rangarang i, mila neni mo ik lok lugugu at Leeme Silok, kerekngan mun ia.

<sup>11</sup> \*Nemen gat tara na lox abulubun kepe i, ketla mina lok tooro i xusu ti lok mo lavatpas teren keneng at lenmila, kusu neni nabamlong bok ude saparav ia. La a doxoma i do neni nabamlong eburu midi luvuttadi nunu.

<sup>12</sup> \*Ti neton nedik ne Apolos. A sing alolos i xusu naba vot pasa nimi eburu midi lentaba luvuttadi nunu. Ketla neni i xopara rinotno xusu ni mo nat pas ta. Do tevenaleng na sepemus tin, neni nabat pas.

### *Levelinga Loklox Alolos*

<sup>13</sup> \*Mina lok tatao avukat amisik lorooro atnimi. Mina tu tuxuruxun at lununu atnimi la nemen mita marat.

<sup>14</sup> At lorooro axap atnimi mina lox asuusu labalamu.

<sup>15</sup> \*Miklen ne Stiven midi loxoetemen, nedi avot diga lok ka lorooro maxat to Grik, la nedi xa diga raba axap pam di ri lugugu at ne Moroa xantubu at limixin teren. La a sing nimi, luvutnetak mi luvurinuk,

<sup>16</sup> \*kusu mina mumu asu levelinga at luvuttadi xerepmo, la atnedi bok di gugu eburu midi.

<sup>17</sup> A momo ri lovoapot at ne Stiven la ne Potunatas, la ne Akaikas boro atnimi e, mila dira ru katling pam nimi.

<sup>18</sup> \*La dira lox axis saga labalak kerekngan ta diga lox axis saga lebelen nimi. Luvuttadi xeretna mina lok ngangao aleng atdi.

### *Levelinga Loklox Axap*

<sup>19</sup> \*Limixin nunu at laraogu lotu xeneng at lenep silok Asia, di lox aonon lomomo atdi saparap nimi. Akuila la ne Pirikila la limixin nunu dit pot buru amisik to at loogu atdu, di lox aonon bok lomomo atdi.

<sup>20</sup> \*La nedi axap bok luvutnetak nade at laasen at ne Karisito di lox aonon bok lomomo atdi. Mina eseeega rangarang mi lenetnes i xaala.

<sup>21</sup> \*Nenia axa ne Pol a malagan i na mi lakngak akmokso. Lavapaase momo rinimi.\*

<sup>22</sup> \*Do nege xopmen na vavara aleng Leeme Silok atdik, lasaxaek na mu asu i.

Leeme Silok atnema, ude u.

<sup>23</sup> Letaba nabalamu at Leeme Silok atdik ne Iesu na nemen eburu minimi.

<sup>24</sup> Labalamu rak nak lok eburu minemi axap keneng at laasen at ne Iesu Karisito. I ruturun.

\* **16:9:** Gu 19:8-10; 2 Ko 2:12; Kl 4:3; Li 3:8 \* **16:10:** 1 Ko 4:17 \* **16:11:** 1 Ti 4:12 \* **16:12:** 1 Ko 1:12; 3:6 \* **16:13:** Sam 31:24; Ep 6:10 \* **16:15:** Ro 16:5; 1 Ko 1:16 \* **16:16:** 1 Ts 5:12 \* **16:18:** Pl 2:29 \* **16:19:** 2 Ti 1:15; Gu 18:2,18,26; Ro 16:5 \* **16:20:** Ro 16:16; 2 Ko 13:12 \* **16:21:** Kl 4:18; 2 Ts 3:17 \* **16:21:** Pol ga sok mene na lavapaase momo, la lara vetpes ga malagan levelinga keneng at na lovoang, ne Pol ga vaase i min. \* **16:22:** Ga 1:8-9



**2 Korin**  
**Lovoang Sepsev Agepura**  
**At Ne Pol**  
**Ti Limixin Nunu To**  
**Korin**  
**Levelinga Loklox**  
**Axasep**  
**Lamaares 57 A.D.**

At nai lovoang, Pol ga malagan aonon amu manga levelinga uto at limixin nunu boro Korin at lenep Masadonia. Korin neni lemenemen silok to Grik. At lovoang avot at ne Pol ga malagan i rinedi limixin to Korin, neni ga vaase sok di. La melemu at nai neni ga riki ne Taitas ugo saparap di, kusu neni naklen mumu ka avukat nedi la neni bamlong la na vaase ne Pol min. Ne Taitas gamlong la ga vaase la ga lok, "Limixin boro Korin mo diga ronga levelinga at ne Pol la mo diga leeng pam, ketla lentaba di goxopara levelinga lolos at ne Pol."

Keneng at nai lovoang i vanuet lempanga matmatkun ik lok teren. Lara avot, ne Pol ga momo aleng minedi mo luvuttadi diga leeng basinge leveloklok atdi. Lara i sev agepura ni ga vaase aronga amu manga di. Lara i sev avantun neni ga vaase i rinedi mumu laramtaba diba lok li bubua i xusu tinedi limixin banbalo. Lara i sev avanuet neni ga vaase axasep nedi do neni mo laradi vavang tuturun.

**Lengkot silok keneng at na lovoang**

*1:1-11* Lavapaase momo at ne Pol ti limixin.

*1:12-7:16* Pol ga vaase mumu lorooro at Loroonan Kaala.

*8:1-9:15* Leveloklok tooro ri limixin boro Jerusalem.

*10:1-13:10* Pol ga vaase pe i ngan laradi vavang.

*13:11-13* Pol ga lox axap lempapaase ren.

*Lavapaase Axasep*

<sup>1</sup> \*Nenia ne Pol, lun pavang at ne Iesu Karisito. Moroa xa ga soxolik ka ia ri mo lugugu. Ne Timoti, neton dik i paase aru box ia at na lovoang.

Nia a sok na lovoang tinemi limixin mi nunu at ne Moroa dom Korin, la tinemi bok limixin nunu mik lok to at lengkot axap at lenep silok Grik.

<sup>2</sup> \*Letaba nabalamu mi lenmila rinemi boro at ne Moroa ne Temen nedik la Leeme Silok atdik ne Iesu Karisito.

*Pol Ga Tong Aorong Ti Ne Moroa*

<sup>3</sup> \*Ata emi asu mi ne Moroa ne Temen Leeme Silok atdik ne Iesu Karisito. Temen dik kusuk mun lava-suun at labalamu, la neni lo Moroa at loklox amenemen.

<sup>4</sup> Neni xusuk mun i lox amenemen nama at levenmumuat it pot parap nama. Kuren la nema bok maba epovo xusu mana lox amenemen nedi di ruuna levenmumuat kerepmo mi na lavapaase amenemen, nema maga ruuna ka i boro at ne Moroa.

<sup>5</sup> \*Nema map kip buaang laxasongsongot keneng at lununu atnama saparap ne Karisito. Kuren la keneng at ne Karisito nema ma ruuna xaka bok loklox amenemen silok at ne Moroa.

<sup>6</sup> \*Mo do mana songot at lorooro axap atnama mumu nimi, naba lox avukat aleng mila losongsongot atnama naba lox asusu loklox amenemen eburu mi lorooro rinimi. Mo do mana lok kaka loklox amenemen ukeneng ti lorooro atnama, na bok naba ravasu ngan loklox amenemen ti lok tooro nimi. Mo loklox amenemen i su auru nimi xusu mina tu atmatkun tip kip mo levesongsongot ngan nema map kiv i.

<sup>7</sup> Nema maklen tinotno i do nemi minaba tu atmatkun at lununu atnimi, atla mi vekip tangarang mi mo levesongsongot eburu minama la mira ruuna xaka bok loklox amenemen ngan nama.

\* **1:1:** 1 Ko 1:1    \* **1:2:** 1 Ko 1:3    \* **1:3:** Ep 1:3; 1 Pi 1:3; Ro 15:5    \* **1:5:** Sam 34:19; 94:19    \* **1:6:** 2 Ko 4:15

8 \*Luvutnetak mi luvurinuk. Ma vara i xusu mina xasep ti levenmu-muat maga ekip tangarang min to Asia. Mo levenmumuat maga xip tutu min ga silok aleng la ga mu-muat aleng, la ma lixilik maga lok do mana doma abulubun ta at lorooro atnama.

9 I ruturun tinotno do maga nua i do nema mo mana met ta. Ketla anaa lumumuat ga vot ti lox alolos nama xusu ma noxo nunu at lolos axa at-nama, ketla at ne Moroa xusuk mun, mo ik lox arooro limixin basinge lanmet.

10 \*Neni ga ranga asepsu nema basinge mo langas ti lanmet la neni nabak lox amisik box i. La ma lok li lodoxoma voovo mavana ren do neni mo nabang tanga axatu bok nema at levenmumuat i nemen tan-gais nama at na levenaleng i tu ume-lamgo atnama.

11 Nemi bok minaba lok tooro nama mi levesingising. Kuren la buaang bok atnemi dinaba tong aorong ti ne Moroa do neni ga vo-rang levesingising atnemi la ga lox aroo nama basinge lanmet.

### *Pol Ga Lox Ekun Lodoxoma Ren*

12 \*Nema ma lok momo aleng, mila lodoxoma nunuan atnema i lox ase nema do, loklok atnema at na lavat-bung menemen ngan maga ebibinat ka minemi. Ga lok nunuan mene nga la kopmen taxakapmek teren ngan ne Moroa ga lok tooro nama min. Kuren mun maga mumu asu letaba nabalamu at ne Moroa la kopmen do at lakleklen maut at laradi at na laxangka.

13 Ma malagan na lovoang tinimi mi levelinga i xasep aleng la kopmen tevelinga ren go ik lox alipe. La nia am domam poovo i do mibaklen axasep nunuan ba mo levelinga,

14 \*nemi mi goxo xasep nunuan teren. Kuren la nemi minaba lok momo aleng mumu nama kerekngan nema manaba lok momo mumu

nimi ap mo laaleng Leeme Silok ne Iesu namlong teren.

15 Nia agaraklen tinotno vam i na. Kuren la nia aga doxoma i do anat pas avot be udom atnemi xusu minaba lok ka amu manga levelok-lox anarong.

16 \*Aga doma gagas i xusu at lavat-pas tarak uto Masadonia la lomlong bok tarak, aba vot pasa be nimi xusu anaba lok ka teveloklok tooro me dom atnemi ti lavatpas tarak uto Judaia.

17 Ise nenia aga soxovo li i na, aga soxovo li i mi luruturun. Nia xopmen agoxo soxovo li mene i mi loklok at na lavatbung menemen la ana sisiam gamasa mene do tuturun la kopmen.

18 Levelinga at ne Moroa i paase asu i, i ruturun la kerepmo levelinga rak tinimi xopmen loxolinga mene do tuturun kopla kopmen.

19 \*I lok ngan ne Iesu Karisito, Nitna ne Moroa, mo nema mi ne Sailas la ne Timoti maga vavang min kantubu atnemi. Neni xopmen na voovo ela mi levelinga ren, ketla kusuk mun neni i paase ruturun.

20 \*I ngan do buaang laxampa-paase ali at ne Moroa, ne Iesu ga lox asoorun i. Kuren la ne Iesu Karisito ni luruturun la ma vaase asu i ri lox asuusu lisisixam at ne Moroa.

21 Moroa xa ik lox alolos nema eburu minimi xusu dik ataba tu at-matkun keneng at ne Iesu Karisito. Neni ga soxolik ka dik,

22 \*la neni ga lok katling dik do ateran akmokso la ga lok li Loroon-nan Kaala ren keneng atdik ngan lampinebeng.

23 \*A sing ne Moroa xusu na vaase aru ia at na levelinga ana vaase i, la neni ikleklen axap keneng at lorooro rak. Nia a goxopara na lok li lumu-muat atnemi. Ni lavasuun teren la nia goxot pas udom Korin.

\* 1:8: Gu 19:23; 1 Ko 15:32 \* 1:10: 2 Ti 4:18 \* 1:12: Ib 13:18; 2 Ko 2:17; 1 Ko 1:17 \* 1:14: 2 Ko 5:12; Pl 2:16 \* 1:16: 1 Ko 16:5-6 \* 1:19: Gu 18:5 \* 1:20: Li 3:14 \* 1:22: 1 Jo 2:27; Ep 1:13-14; 2 Ko 5:5; Ro 8:16-17 \* 1:23: Ro 1:9; 2 Ko 11:31 \* 1:24: 1 Pi 5:3

<sup>24</sup> \*Ma xopara i do mana pu soso nimi ri levelinga salai miba nunu ren, mila mi tu atmatkun pam at lununu atnimi. Ketla ma gugu xantubu atnimi xusu miba ruuna ka lomomo.

## 2

<sup>1</sup> \*Nia aga doma i do nia noxo vot pasa bok ba nimi at tara tavatpas melemu, kusu a noxo lox abulu nimi.

<sup>2</sup> Mo do ana lox abulu nemi, nege bok ba naba lox amomo ia? La ixo epovo do nia aba lok ka tomomo boro at tara vetpes.

<sup>3</sup> Ni lavasuun teren la nia aga malagan mo lovoang petpes tinimi. Agoxopara i do ana vot pasa nimi la ana ruuna ka lainbulu mila nemi vam nom limixin do ri lox amomo ia. Aga nunu do mina momo eburu minia.

<sup>4</sup> \*Aga malagan mo lovoang tinimi mi langsung lumumuat la lanteng keneng at lorooro rak la lengkabili-dan bok gara sixisu at luxatli rak, la mo levelinga xopmen do ri lox abulu nemi. Ketla nia aga malagan i ti lox axasep nemi xusu mina ven kisip labalamu silok tarak tinimi.

### *Mina Doxoma Xepe Laxakapmek At Laradi Ga Lox I*

<sup>5</sup> \*Mo laradi xantubu atnimi goxo lox abulu solo ia, ketla neni ga lox abulu aleng lentaba atnemi limixin lotu. La nia axopara i do lumumuat teren na silok solo.

<sup>6</sup> Buaang atnemi miga siam mi mo lumumuat neni ga ruuna ka i, la na xap ta go.

<sup>7</sup> Ketla monga mina doxoma xepe laxapmek teren, la mina su auru i mi levelinga xusu ti lox axatu kaxat bok lodoxoma ren basinge lainbulu la loklox abulubun.

<sup>8</sup> Kuren la a sing alolos nemi do mina lox asusu amu bok mo labalamu atnemi rin.

<sup>9</sup> \*Aga malagan mo lovoang tinemi mumu mun i na. Aga vara i do ana long lenget ka i do mina ronga

res ap mo levelinga rak keneng at nom lumumuat la minabang tonga res amisik at levelinga rak.

<sup>10</sup> Do nemi mina doxoma xepe laxapmek teren, nenia bok anaba doxoma xepe i. Ketla axok pakes ti doxoma xepe laxakapmek teren. Ketla i epovo do nia ana lox i xuren kusu ana ru tooro nimi at lemeren ne Karisito.

<sup>11</sup> \*Kerepmo la ne Satan noxo epovo na sar asoogong nedik, mila nedik diklen levendomdoma la leven gugu ren.

### *Luvuttadi Vavang At Lekabus Maxat*

<sup>12</sup> \*Gase aga vot to Troas kusu ana vavang mi Lagale Lavavang mumu ne Karisito, aga long lenger i do Leeme Silok ga suang langas tia ri lok lugugu go.

<sup>13</sup> \*Ketla aga bulu aleng mila nia agoxo ven kora ka netak ne Taitas go. Kuren la aga on basinge di, la agat pas uto Masadonia.

<sup>14</sup> Ketla ata tong avukat ti ne Moroa, mo im gomgonga amisik nama at lugugu atnama. Anai i lok ngan at lavatpas momo atnema xeneng at ne Karisito ik sak tup mi lavamunepen minama. La at lekngen nama neni i paase asu Lagale Lavavang at lengkot axap la neni i so misigisigis tinedi dikleklen i.

<sup>15</sup> \*Nedik di ru katling ne Karisito ngan lavanga i so misigisigis ti ne Moroa. La nedi dik lok ka lorooro maxat, la nedi bok dinaba seeve, dim somax i.

<sup>16</sup> \*Tinedi dinaba seeve, di ven kibis lanmet. La tinedi di roo su vam, di ven kibis lorooro. Kuren la nege i epovo nap kip lugugu at Lagale Lavavang atla i silok aleng?

<sup>17</sup> \*Nema maxo lok ngan nedi mo buaang lentaba di tong asu levelinga at ne Moroa xusu dina lok kaka lempilas. Ketla ma paase asu levelinga at ne Moroa mi luruturun, ma gugu

\* 2:1: 1 Ko 4:21; 2 Ko 12:21 \* 2:4: Gu 20:31 \* 2:5: 1 Ko 5:1 \* 2:9: 2 Ko 7:15; 10:6 \* 2:11: Lu 22:31 \* 2:12: Gu 14:27; 1 Ko 16:9 \* 2:13: Gu 20:1 \* 2:15: 1 Ko 1:18 \* 2:16: Lu 2:34; 2 Ko 3:5-6 \* 2:17: 2 Ko 1:12; 1 Pi 4:11

at lemeren ne Moroa ngan lavaanat saxaruki at ne Karisito.

### 3

#### *Pol Ga Vaase Pe I Ngan Laradi Vavang*

<sup>1</sup> \*Kereva, nia ana vaxaru ka manga i do ana lox aru manga ia? Kopla mak pakes ti tovoang loklox axasep udom tinimi xopla me dom atnimi xerekngan lentaba luvuttadi di lox i.

<sup>2</sup> \*Keneng at lorooro axap atnama, aklen i do nemi xa mi lok ngan lovoang loklox axasep atnama xusu limixin axap dinaba us i la dina ven kisiv i do nema luvuttadi vavang tuturun at ne Moroa.

<sup>3</sup> \*I xasep do ne Karisito xa ga malagan na lovoang mumu nimi, la nai levempipisik at lugugu atnama. Kopmen goxo malagan i mi loxodan mamalagan to at tuuat. Ketla ni ga malagan li i mi Loroonan at ne Moroa, Luntoo Avolo, ga malagan i ro at levempeve at limixin.

<sup>4</sup> \*Ma vaase i na mila ma nunu saga at ne Moroa keneng mun at ne Karisito.

<sup>5</sup> Nema maxo epovo xusu mana vaase ka gamasa na lugugu at ne Moroa do ma epovo ri lox i. Lakleklen atnama, la lolos atnama, anaa axav i, ne Moroa im taba i.

<sup>6</sup> \*La ne Moroa axa ga lox aepovo nama xusu mana tong asu Lagale Lavavang mumu lekabus maxat. Anaa lekabus kopmen boro at Laulis Linga, ketla boro at Loroonan Kaala. Laulis Linga i lox asuusu lanmet, ketla Loroonan im taba lorooro.

#### *Lekabus Maxat Ni Lavanga I Silok Aleng*

<sup>7</sup> \*Laulis Linga, Moroa ga malagan i mi lengkonin mamalagan to at luuat mamasao, la lisisixam at ne Moroa ga vot at loxonaleng neni ga raba

ne Moses min. Keke i do lisisixam to at lemeren ne Moses goxo lolos bok ba. Ketla limixin me Israel di goxo ven tooro i, mila lemeren gan tanan aleng. Na Laulis Linga, lugugu ren ti raba lanmet, ga vot mi lisisixam.

<sup>8</sup> \*I raturun tinotno do lugugu at Loroonan naba lox asuusu lisisixam silok aleng.

<sup>9</sup> \*Lagale Lavavang, neni i nunuan aleng ti Laulis Linga mila lugugu at loklox arooro neni in tanan aleng ti lugugu at Laulis Linga ik lox asuusu loxokoxo.

<sup>10</sup> \*La Laulis Linga mo gan tanan, ketla lisisixam teren kopmen na soosoo lolos mila lisisixam at lekabus maxat i lolos aleng tin.

<sup>11</sup> Laulis Linga goxok lox abao la ga ruuna lisisixam silok. Ketla lisisixam at Lagale Lavavang i silok aleng tin mila ni naba nemen amisik.

<sup>12</sup> Nedik tam doma voovo ri mo lisisixam at Lagale Lavavang. Kuren la nedik di abelemes aleng.

<sup>13</sup> \*Nedik taxo lok ngan ne Moses, mo ga lok li loxontata at lemeren, kusu limixin me Israel di noxo ven mo lisisixam goxo nemen abao.

<sup>14</sup> \*Levendoxoma atdi ga rebonot pe aleng, la ise at na levenaleng levendoxoma atdi move i repe mi levengkontata i kubak pe i, at loxonaleng di utus levenbuk at lekabus migomgo. Na loxontata i repes mun basinge laradi at loxonaleng neni i lok ka ne Karisito.

<sup>15</sup> Mo at na levenaleng dola di utus Laulis Linga at ne Moses, mo loxontata move i tupe levendoxoma atdi.

<sup>16</sup> \*Ket do laradi i repukus uto saparap Leeme Silok, loxontata i repes.

<sup>17</sup> \*Loroonan, neni nom Leeme Silok la nedi limixin ua Loroonan at ne Moroa ik lok atnedi, dinaba sepmus basinge lolos at laxakapmek.

<sup>18</sup> \*La nedik axap di lox asuusu

\* **3:1:** 2 Ko 5:12; Gu 18:27; Ro 16:1    \* **3:2:** 1 Ko 9:2    \* **3:3:** Pas 24:12; Jer 31:33; Isi 36:26-27    \* **3:4:** 2 Ko 2:16    \* **3:6:** Jer 31:31; 1 Ko 11:25; Jo 6:63; Ro 7:6    \* **3:7:** Pas 34:30    \* **3:8:** Ga 3:2,5    \* **3:9:** Lal 27:26; Ro 1:17; 3:21    \* **3:10:** Pas 34:29    \* **3:13:** Pas 34:33-35    \* **3:14:** Ro 11:25    \* **3:16:** Pas 34:34; Ro 11:23,26    \* **3:17:** Jo 8:32,36; Ro 8:2; Ga 5:1    \* **3:18:** Pas 16:7; 24:17

lisisixam at ne Moroa, mila kopmen bok ba tengkontata nak lok pe lemeren dik. La na mun lisisixam i laala boro at Leeme Silok, neni Loroonan, la ik lox ekun dik ngan lampoovo ren la ti mo langsung lisisixam silok teren.

## 4

### *Lugugu At Ne Pol*

<sup>1</sup> \*Keneng at lebelen tuntun at ne Moroa, neni ga raba nama mi na lugugu, kuren la nema ma noxo lox abulubun bok ba.

<sup>2</sup> \*La keneng at na lugugu ma lok kepe leventaangas kakapmek la leveloklok kaxarang. La maxo bala vukpuk bok limixin mi lakleklen atnama, la kopmen mana lox ekun levelinga at ne Moroa. Ketla ma tong asu axasep aleng levelinga ruturun at ne Moroa la kerepmo ma lox aru nama ti limixin axap to at lemeren ne Moroa.

<sup>3</sup> La do Lagale Lavavang ma tong asu i, i lipe la kopmen na xasep, ni xopmen na xasep mene rinedi limixin dinaba seeve.

<sup>4</sup> \*Dixo nunu mila lewendomdoma atdi, lomoroa at na lavatbung menemen iram tu kobot pe vam i. La neni i tu kobot pe mo laxasep at Lagale Lavavang kusu noxo soosoo axasep di. Mo laxasep i suusu boro at lisisixam at ne Karisito, neni Lampenaxa at ne Moroa.

<sup>5</sup> \*Nema maxo vavang minama xa, ketla ma vavang mi ne Iesu Karisito ngan Leeme Silok. La nema ma lok ngan lavasaxaruki atnimi mumu lugugu at ne Iesu.

<sup>6</sup> \*Moroa axa ga lok keretna, "Laxasep na soosoo su at lamain." Neni mun ne Moroa mo ga lok laxasep teren i soosoo xeneng at lorooro atdik kusu tim taba dik mi laxasep at lakleklen mumu lisisixam at ne Moroa mo ga soosoo at lemeren ne Karisito.

<sup>7</sup> \*Ketla nema ma ruuna nom lakleklen i ngan lapnovos silok keneng at labantuxu gamasa atnama ti lox asuusu i do mo langsung lolos, ni at ne Moroa mun la kopmen atnama.

<sup>8</sup> \*Mang songot at levenaleng axap, ketla na levesongsongot kopmen na rubur asi nama. Ma baava mi levenmumuat, ketla kopmen man tun mu i.

<sup>9</sup> Limixin di lox asongot nama, ketla ne Moroa kopmen na domampe nama. Lavamunepen midik di sev asi nama, ketla kopmen dina sele utut nama.

<sup>10</sup> \*Amisik mat pas ti lengkot axap map kip levenmumuat, kerekngan ne Iesu ga suma i, kusu mo lorooro ren limixin dinaba ven kibis box i at labantuxu atnama.

<sup>11</sup> \*At lorooro axap atnema, ma nenen amisik keneng at levenmumuat at lanmet mumu laasen at ne Iesu, kusu mo lorooro ren limixin dina ven box i at labantuxu atnama, mo noxo nenen abao.

<sup>12</sup> Kuren la levesongsongot i aurret kusu na sev amet nama mumu Lagale Lavavang, ketla nemi mira ruuna ka vam lorooro avolo.

### *Mina Nemen Keneng At Lununu*

<sup>13</sup> \*Lovoang Kaala i tong i do, "Nia aga nunu saga at Leeme Silok, kuren la aga vaase." La kerepmo bok nema ma nunu kuren la ma paase asu Lagale Lavavang.

<sup>14</sup> \*Ataklen i do ne Moroa ga lox axatu kaxat amlong Leeme Silok ne Iesu ri lorooro, la neni naba lox axatu kaxat amlong bok dik keneng at ne Iesu, la na lok li nemi eburu minema ro melango at ne Moroa.

<sup>15</sup> \*Ma suma levesongsongot nop nimi. Kuren la do letaba nabalamu at ne Moroa na vot saporap bok teventaba tuvuttadi, nedi dinaba umsu aleng mi levelinga loklox avukat la dina lox asuusu leemi asu ri ne Moroa.

\* 4:1: 2 Ko 3:6 \* 4:2: 2 Ko 2:17; 1 Ts 2:5; 1 Ko 1:18 \* 4:4: Ep 2:2; Kl 1:15; Ib 1:3 \* 4:5: 2 Ko 1:24 \* 4:6: Lur 1:3; Ais 9:2; 2 Ko 3:18 \* 4:7: 2 Ko 5:1 \* 4:8: 2 Ko 1:8; 7:5 \* 4:10: 1 Ko 15:31 \* 4:11: Ro 8:36 \* 4:13: Sam 116:10 \* 4:14: 1 Ko 6:14 \* 4:15: 2 Ko 1:3-6

16 \*Neni mo lavasuun teren la ma noxo lox abulubun. Keke i do labantuxu atnama mo irak lok si nga. Ketla labaroonan atnama i suusu amaxat amisik at levenaleng getgesara.

17 \*La na levesongsongot lixilik i lox asuusu i do langsgangan luunun avolo i umsu aleng mi lisisixam at ne Moroa mo i gagas kusu tinama. La i silok aleng ti levesongsongot man tuuna xaka i.

18 \*La amisik ma reven ti ne Iesu, maxo reven ti levempanga at na lavatbung menemen mo noxo nemen abao, ketla ma reven ti levempanga nedik dixo reven i la i nemen amisik.

## 5

### *Loogu Atdik No Vana At Laxalibet*

1 \*Dik atakleklen i do lorooro atdik at na labantuxu noxo nemen abao, ba lok ngan mun loogu xukuxut. Mo do ira rem utut pam, nedik di ruuna lara loogu ro vana at laxalibet ne Moroa ga gagas li vam i ridik la naba tu amisik. Mo loogu limixin di goxo lox i mi levengikngan di.

2 \*Nade at na lavatbung menemen nedik tap kup sae mi levesongsongot la ata vara nga i do ata siga ka mo lorooro boro vana at laxalibet.

3 Do nedik ata siga i, ne Moroa noxo long lenget ka dik atak lok beleben.

4 \*Nedik nave tak lok at na lorooro, atap kup sae mi levesongsongot la tap kip levenaknixip. La kopmen do dik dira vara nga i do dina lok kepe labantuxu atdik, ketla ata vara i do ata siga ka nga lorooro boro vana at laxalibet, kusu lorooro at na labantuxu, lorooro avolo naba sumkonom ka i.

5 \*Moroa xa neni ga gagas pam nedik ti na lorooro avolo, la neni ga raba nedik mi Loroonan teren ngan

lampinebeng ti mo levempanga neni i ruuna i do ridik.

6 \*Kuren la amisik nedik di abelemes. Atakleklen i do nedik nave dik lok at na lorooro at na labantuxu, di nemen to vetpes basinge Leeme Silok.

7 \*La nedik dit pas mi lununu, keke i do nedik taxo reven mo lempanga dik di nunu ren.

8 \*Nedik di abelemes la ta vavara aleng i do ata on basinge na lorooro at na labantuxu la atana lok ka lorooro avolo ro at lemenemen aulis atdik eburu mi Leeme Silok.

9 \*Kuren la do nedik tak lok at na lorooro kopla ata met, ata lolos kusu atak lox amomo Leeme Silok.

10 \*Mila nedik getgesara atanaba ru asuvos to melamgo at lenep tongtonga linga at ne Karisito, kusu nedik getgesara atanaba lok ka luunun, i nunuan kopla i lok kapmek. La neni naba raba i na i epovo at loklok atnedik at na lorooro at labantuxu.

### *Atat Kis Ekilen Eburu Mi Ne Moroa Xeneng At Ne Karisito*

11 \*La nema luvuttadi vavang makleklen ua lavasuun teren kusu ata marat at lebelemamao at Leeme Silok, kuren la ma gugu lolos kusu ti lok ka buaang nedi limixin. Ne Moroa ikleklen avukat lorooro atnama, la a doma box i do keneng at lorooro atnimi miklen avukat bok lorooro atnama.

12 \*Nema maxo lok do mana lox aru lorooro atnema rinimi. Ketla ma vara i xusu mana lok nimi xusu mina mumu lorooro atnama. Kerepmo la miba epovo ri vorang nedi luvuttadi dik lox asilok di mumu lixitkis silok atdi la dixo ila mumu luruvtuvuk atdi.

13 Mo do mana vaase, la lodoxoma atnema na ngan ta do i baulang, ma lox i xusu ti lox aurut lugugu at ne Moroa. Do lodoxoma atnema na xasep, ma lox i ri lok tooro nimi.

\* 4:16: Ep 3:16 \* 4:17: Ro 8:17-18 \* 4:18: Kl 1:16; Ib 11:1-3 \* 5:1: 2 Ko 4:7; 2 Pi 1:13-14 \* 5:2: Ro 8:23 \* 5:4: 1 Ko 15:53-54 \* 5:5: Ro 8:16,23 \* 5:6: Ib 11:13-16 \* 5:7: 1 Ko 13:12 \* 5:8: Pl 1:23 \* 5:9: Kl 1:10; 1 Ts 4:1 \* 5:10: Akl 12:14; Ro 2:16; 14:10 \* 5:11: 2 Ko 4:2 \* 5:12: 2 Ko 3:1; 1:14

14 Labalamu at ne Karisito i sasat dik, la atakleklen tuturun i do legesara mun ga uu nop loklok at limixin axap. I lok ngan ta do limixin axap diga met.

15 \*Neni ga uu nop loklok at limixin axap kusu do nege nedi di rooro at na lavatbung menemen, di noxo rooro rinedi xa. Ketla dina rooro ri ne Karisito mo ga doxoma di la ga met la ga roo xat amlong.

16 Kuren la i ruka nga i mo, nema maxo doma mumu bok ba lodoxoma at na lavatbung menemen ti ila mumu loklok at limixin. I ngan no nema maga ila mumu bok loklok at ne Karisito xerepmo, ketla monga maxo lok bok ba i xuren.

17 \*Do tara i nunu at ne Karisito, neni i ngan laradi maxat at lороonan teren. Levempanga xapmek at lorooro maut ira xap pam, la lorooro maxat mo ira vot ta.

18 \*Anaa axav i boro at ne Moroa, la keneng at ne Karisito neni ga vaxat buru dik at lixitkis munepen midik eburu min kusu nedik ateran. La ni ga raba nema mi lugugu ri vaxat buru limixin uto saparap ne Moroa.

19 \*Moroa gak lok mo lugugu ren keneng at ne Karisito. Ni ga vaxat buru ka limixin at na lavatbung menemen do tin. La ni goxo doma mu laxakapmek digak lox i. La ni ga raba nema mi levelinga mumu na lugugu ri vaxat buru limixin uto saparap ne Moroa.

20 Kuren la nema ma paase katling ne Karisito, la ne Moroa i toro rinimi xeneng at levempapaase atnama. Ma sing nemi at laasen at ne Karisito do mina ke ne Moroa na vaxat ka nemi uto saparav i.

21 \*Karisito neni xopmen taxakapmek teren, ketla ti lununuan tidik, Moroa ga lox i ga xip tutu mi laxakapmek atdik. La keneng teren ataba ravasu ngan limixin manmanton at ne Moroa.

## 6

1 \*At leven gugu atnema eburu mi ne Moroa, ma sing nemi do nemen mita siam ka mo letaba nabalamu at ne Moroa mi lumun pipisik mun.

2 \*Mina rongga na levelinga ne Moroa ga tong i.

“Aga rongga nemi at loxonaleng mokmokso kusu ana lox asuusu letaba nabalamu rak. Aga lok tooro nemi at laaleng ti lox arooro limixin.” *Ais 49:8*  
Mina rongga i na. Anaa ni laaleng kusu mina siam ka mo letaba nabalamu at ne Moroa. Anaa ni laaleng kusu mina lok ka loklox arooro.

### *Levenmumuat Ne Pol Gap Kiv I*

3 Ma xopara i do tara na ven lenget ka tosoogong at lugugu atnema mila ma xovara i do mana lok pe langas ti lorooro.

4 \*Ketla keneng at levempanga axap ma lox i, ma lox asuusu loklok at lavasaxaruki at ne Moroa. La map kip levenmumuat, la levesongsongot, la levenaknixip mi lumulus.

5 \*Limixin dip sep nama, la di lok li nema at loogu xokoxo, la di soso antiriban nema. La di lok nema ma gugu lolos aleng la kopmen manak lok ka tevenanunga avukat la kopmen tevempanga anan atnema.

6 \*At loklok dadat atnema, la lakleklen, la loklok mumulus, la loklok nunuan, maga lox asuusu i do nema lavasaxaruki at ne Moroa, la at Loroonan Kaala bok mi labalamu rutorun.

7 \*La maga lox asuusu box i at levempapaase rutorun atnema, la mi lolos at ne Moroa. Ma ruuna lorooro manmanton ngan lavanga esep atnama, ti esep la ti see pe bok atnama.

8 Lentaba di lok ngangao atnama la lentaba di paase asi bok tinama. Lentaba di paase aksaksa rinama la lentaba di emi asu bok minama. Dik lok tinama do nema luvuttadi

\* 5:15: 1 Ti 2:6; Ro 14:7-8 \* 5:17: Ro 8:1,10; Ga 6:15; Ais 43:18; Li 21:5 \* 5:18: Ro 5:10 \* 5:19: Ro 3:23-25; Kl 1:19-20 \* 5:21: Jo 8:46; Ib 4:15; Ga 3:13; 1 Ko 1:30; Pl 3:9 \* 6:1: 2 Ko 5:20 \* 6:2: Lu 4:19-21 \* 6:4: 2 Ko 4:2 \* 6:5: 2 Ko 11:23-27 \* 6:6: 1 Ti 4:12 \* 6:7: 1 Ko 2:4

xaxarang, ketla ma paase mi luruturun.

<sup>9</sup> \*Limixin at na lavatbung menemen di lox abulubun nama, ketla limixin at ne Moroa diklen nama. Ma vekip tangarang amisik mi lanmet, ketla mina ven ba nema move ma rooro. Di raba songsongot nema, ketla kopmen dina sev amet nama.

<sup>10</sup> \*Keke i do ma suma lainbulu, ketla ma momo amisik mun teren. Mat kis banbalo, ketla ma lox apnovos nedi limixin buaang keneng at labaroonan atnedi. Mat kis apkap, ketla ma rebeng kobot ka levempanga axap.

<sup>11</sup> Larapen tangas atnama dom Korin. Mara paase palas avukat pam levelinga rinimi, la lebelen nama i rem suang tinimi.

<sup>12</sup> Kopmen mana rebeng alis lebelen nama rinimi. Ketla nemi xa mi vipe lolos lebelen nimi rinama.

<sup>13</sup> \*A paase nga na rinimi ngan nemi laxamdak tarak. Lusumsuma salai ma raba nemi min, nom i mina lox ase nama min. Mina suang levempeve atnimi.

### *Nemen Mita Etangas Eburu Mi Limixin Kopmen Dina Nunu*

<sup>14</sup> \*Nemen mita etangas eburu minedi limixin kopmen dina nunu, mila ixok mokso xuren. Lorooro manmanton mi laxapmek duba ru buru xereva? Laxasep mi lamain duba nemen eburu xereva?

<sup>15</sup> Karisito mi ne Satan duba mulus kereva at tara todoxoma? Laradi nunu mi laradi xopmen na nunu duba mulus kereva?

<sup>16</sup> \*Lumukmulus naba vot kereva at loogu laplavang at ne Moroa eburu mi laxampoovo vanga? Mila nedik axa laraogu laplavang at ne Moroa, Luntoo Avolo. La ne Moroa xa ga tong i xeretna,

“Anabak lok eburu midi la anat pas kantubu atdi, la nenia anaba ngan ne Moroa atdi la dinaba

lok ngan limixin tarak.” *Mas 26:12*

<sup>17</sup> \*Moroa ga tong box i xeretna, “Kuren la mina vas su basinge limixin kakapmek la mina nemen petpes basinge di. Nenia Leeme Silok ne Moroa a tong i na. La nemen mita vubeles at laxakapmek. Lavanga nia noxo siam ka nimi.” *Ais 52:11*

<sup>18</sup> \*“La nia anaba ngan ne Temen nimi, la nemi minaba lok ngan luvutnuruk. Nenia Leeme Silok Lanaraavuk la a tong na levelinga.” *2 Sml 7:14*

## 7

<sup>1</sup> Larapen tangas orong tarak. Na levelinga a tong pam i, ni leveng kakaape ne Moroa ga lox i ridik. Kuren la ata lox adadat dik basinge leveloklok kakapmek axap, mo i lox abilinga labantuxu la labaroonan atdik, la ata lok ka luruptuvuk i melemelengan, mi loklok ngangao atdik ti ne Moroa.

### *Lomomo At Ne Pol*

<sup>2</sup> \*Lebelen nimi na mulus ka nama. Ma goxo lok tavanga xapmek ti tara, la ma goxo lox asongot tara, kopla ma gita xip paxat ka tavanga at teta.

<sup>3</sup> \*Axo tong i na xusu ri lox amangan nimi, mila agara tong avot pam i rinimi do nemi mi nemen keneng at lempeve atnama, dola mana met kopla mana rooro.

<sup>4</sup> Lununu rak i rem saga atnimi, a ruuna lusumsuma momo i umsu aleng mumu nimi. Kuren la a umsu mi lolos la keneng at na laxanmuuat a lok momo aleng.

<sup>5</sup> \*Se magat pas uto Masadonia, lorooro atnama goxo lok mamana. Ketla limixin diga lox asongot nama at lengkot axap, la levenekarakat ga pubeles mu nama. Lainmarat ga vot saparap nama mumu nedi limixin diga lok ka lununu maxat.

\* **6:9:** 2 Ko 4:10; Sam 118:18    \* **6:10:** 2 Ko 7:4; Pl 2:17; Kl 1:24    \* **6:13:** 1 Ko 4:14    \* **6:14:** Ep 5:7,11    \* **6:16:** 1 Ko 3:16; Isi 37:27    \* **6:17:** Ais 52:11; Isi 20:34; Li 18:4    \* **6:18:** 2 Sml 7:14; Ais 43:6; Jer 31:9; Li 1:8    \* **7:2:** Gu 20:33; 2 Ko 12:17    \* **7:3:** 2 Ko 6:11-12    \* **7:5:** 2 Ko 2:13



<sup>6</sup> \*Ketla ne Moroa mo ik lox amenemen limixin bukbulu, ga lox amenemen nama mi lovotpot at ne Taitas saparap nema.

<sup>7</sup> Kopmen at lovotpot mene ren, ketla at levempapaase axasep bok teren mumu levempapaase loklox alolos atnimi rin. Ga tong i rinama do mi vara aleng i do mina ven ia, la mi bulu mu box ia. La mi gagas kusu mina su auru ia. Kuren la a momo aleng tinotno.

<sup>8</sup> \*Lovoang tarak aga malagan i rinimi ga lox abulu nimi, nia axo bulu mu box i. Avot be nia aga bulu mu i, ketla aklen i do mo lovoang ga lox abulu nimi at lentaba levenaleng mene nga.

<sup>9</sup> Ketla monga nia a momo aleng, kopmen do mumu nga i mo nia aga lox abulu nimi, ketla a lok momo mila lainbulu atnimi ga vaxat pukus lorooro atnimi. La ne Moroa xa ga siam mi mo lainbulu xeneng atnimi, kuren la nema ma goxo lok tavanga xapmek tinimi.

<sup>10</sup> \*Lainbulu ne Moroa i lok kaxar i, ni ik lok leretepukus keneng at leveve at laradi la im gomgonga i at langas ti lorooro, la neni noxo bulu mu mo lainbulu. Ketla lainbulu mede at lavatbung menemen im taba lanmet.

<sup>11</sup> Mina ven lempanga ne Moroa ga lox asuusu i mi na lainbulu atnimi ngan levereven kibis eburu mi lodoxoma ri vaase pe nimi. La loklox aronga mumu laxapmek kantubu atnimi la lusumsuma avukat tinama la lurutu eburu minema. La mi gagas ti raba songsongot nedi dik lok leveloklok kakapmek. Keneng at nai leveloklok, miga lox asuusu axa nemi do mi goxo ruuna tosoogong keneng at na lekarakat.

<sup>12</sup> Kerepmo la mo lovoang nia aga malagan i rinimi, a goxo malagan i mumu mo laradi ga lok laxapmek, koplamo lara ga suma mo laxapmek. Ketla aga malagan i ri lox axasev i rinimi, at lemeren ne Moroa, do

lodoxoma liplivi atnimi mumu nama i lolos aleng.

<sup>13</sup> Kuren la mo lovoang aga malagan i rinimi ga lok nemi miga repukus, la maga lok momo at nai. La ma goxo momo xusuk mun at nai, ketla maga lok momo bok at lovotpot at ne Taitas saparap nama la mumu bok leveloklok nunuan miga lox amomo i min.

<sup>14</sup> Gano aga tong i rin do nemi limixin avukat la miga lox asoorun levelinga rak, la mi goxo lox amangan ia. Maga paase luruturun tinimi, la at na mun langas levempapaase loklox aurut atnama maga lox i ri ne Taitas, ira ravasu raturun ta.

<sup>15</sup> \*La mo labalamu ren tinimi i lolos aleng tinotno at levenaleng neni im doma su at lorongtonga res atnimi rin, la miga siam ka atnaasan tinotno i mi loklok ngangao i silok.

<sup>16</sup> A momo aleng mila i epovo do ana nunu saga rinotno atnimi.

## 8

### *Laramtaba Ri Limixin Pakpakes To Judaia*

<sup>1</sup> \*Luvutnetak mi luvurinuk. Ma vara i do minaklen avukat letaba nabalamu at ne Moroa ga lox asuusu i ri limixin at lotu ro Masadonia.

<sup>2</sup> Digak lok keneng at levenmuuat ga lolos aleng, ketla lomomo atdi ga silok aleng tinotno. Kuren la digak lik kat asu rinotno mo leven-tamtaba atdi, keke i do nedi limixin pakpakes mun.

<sup>3</sup> A tong tuturun i rinimi do diga raba silok mavana at levempanga atdi diga ruuna i. At lodoxoma xusuk mun,

<sup>4</sup> \*diga sing lolos nama xusu mana siam kusu nedi bok dina raba teventamtaba ri limixin at ne Moroa to Judaia,

<sup>5</sup> la kopmen anaa xusuk mun i. Avot diga raba lorooro atnedi ri Leeme Silok, la at lavavara bok at ne Moroa diga raba bok lorooro atnedi ri ronga res atnama.

\* 7:6: 2 Ko 1:3-4 \* 7:8: 2 Ko 2:4 \* 7:10: Mt 27:3-5; Ib 12:16-17 \* 7:15: 2 Ko 2:9 \* 8:1: Ro 15:26 \* 8:4: 2 Ko 9:1-2

<sup>6</sup> Kuren la maga sing ne Taitas, mo ga vaxaru ka lugugu ti gagas mo laramtaba xantubu atnimi, kusu na lox epasum na lugugu la na lok tooro nemi ri lox axap na lugugu at labalamu.

<sup>7</sup> \*Mip novos aleng at levempanga nemi mi ruuna i, ngan lununu la laramtaba ti paase asu levelinga at ne Moroa. La at lakleklen bok atnimi, la keneng at lomomo atnimi ri lok tooro, la keneng bok at labalamu atnimi rinama. Kuren la mina lolos kusu minak lox aplivi na lugugu tik lox agagas li mo laramtaba.

<sup>8</sup> A noxo lok li teventaangas linga xusu miba mu asu i. Ketla a paase mumu leventamtaba limixin petpes diba raba i. Kerepmo ana lok tong mun labalamu atnimi do i silok aleng ti labalamu at limixin petpes kopla xopmen.

<sup>9</sup> \*Nemi mikleklen letaba nabalamu at Leeme Silok atdik ne Iesu Karisito. Neni gap novos aleng, ketla ti luvukat tinedik neni ga ravasu ngan laradi banbalo, kusu mibap novos.

<sup>10</sup> Lodoxoma rak at nai lavanga xeretna. I lox avukat tinimi do mina lox axap lugugu mumu letaba miga vaxaru ka i at no lamaares ga xap. Nemi avot tinotno migamgo, la kopmen do miga lok poovo mene i, ketla lebelen nemi ga vara aleng kusu mina lox i.

<sup>11</sup> Kuren la mina lox angtang mi mo lugugu, la mina lok axap avukar i. Lebelen nemi na xatu xusu mina lox axav i, kerekngan levendoxoma atnimi, la mina lox i mi nom levempilas mi ruuna i.

<sup>12</sup> \*Mo do lebelen nemi naplivi ri raba, ne Moroa ba siam ka laramtaba atnimi i epovo at levempilas mi ruuna i la kopmen at levempilas mixo ruuna i.

<sup>13</sup> Nia axo vara i do ana ke atnaasan teventaba la nemi xusuk mun mina xip mo lugugu at laramtaba pilas ngan lanknixip silok.

Ketla a vara i do nemi eburu midu mina epovo ela mun.

<sup>14</sup> \*At na levenaleng mo lapnovos atnimi, i epovo xusu mina lok tooro di min. La do melemu mina xis pakpakes manga, dinaba lok tooro nemi mi lapnovos atdi. Mo do mina mu asu i na, loklok tooro ela naba epovo mun kantubu atnimi limixin at nom lumenemen.

<sup>15</sup> I ngan Lovoang Kaala i tong i do, "Laradi gap naba solo, ni goxo ruuna ka tempanga ga volo aleng. La mo laradi ga lili lixilik, ni goxok pakes ti tempanga." *Pas 16:18*

### *Taitas Eburu Mi Larapen Tangas Teren*

<sup>16</sup> Ma tong avukat ti ne Moroa mila neni ga lox epovo box i do na lok li mo lebelen angtang keneng at ne Taitas kerekngan nema maga ruuna i xusu ti lok tooro nemi.

<sup>17</sup> La kopmen ap mo xusuk mun do neni ga siam ka lisingising atnama, kusu ri vot pasa nemi la na lok tooro nemi. Ketla at lavavara rinotno xa ren la neni nabat pas kusu na vot pasa nemi.

<sup>18</sup> Maba riki ne Taitas eburu bok mi lara neton nedik, mo limixin di lok ngangao aleng teren to at laraogu lotu axap mumu lugugu ren ti tong asu Lagale Lavavang.

<sup>19</sup> La kopmen anaa xusuk mun i, limixin at laraogu lotu diga soxolik ka i xusu na emu eburu minama uto Judaia la nap kip laramtaba. Na laramtaba naba xip aurut laasen at Leeme Silok, la naba lox asuusu box i do ma vara aleng i do mana lok tooro.

<sup>20</sup> Maba lok tatao avukat laramtaba xusu tara noxo vaase mumu nama mumu na laramtaba silok nema mabap kiv i.

<sup>21</sup> Lodoxoma atnama xeretna, ma vara aleng i do mana nemen manmanton, la kopmen to at lemeren Leeme Silok kusuk, ketla to bok at lemeren limixin.

\* **8:7:** 1 Ko 1:5; 16:1-2    \* **8:9:** Mt 8:20; Pl 2:6-7    \* **8:12:** Mk 12:43    \* **8:14:** 2 Ko 9:12

<sup>22</sup> La maba riki aonon bok neton nedik petpes eburu midu. Buaang levenaleng neni gara lox asuusu vam i rinama do i gagas amisik kusu na lok tooro. La monga i lolos aleng ti lok tooro mila lununu ren i rem saga atnimi.

<sup>23</sup> La ti ne Taitas, neni lara bok atarak la i gugu eburu minia xusu ti lok tooro nimi. La tinedu lunteton dik, nedu duba emu eburu min saparap nimi. Nedu du ru katling laraogu lotu, la loklok atdu i lox asuusu loklok ngangao ri ne Karisito.

<sup>24</sup>\*Kuren la mina lox asuusu labalamu atnimi ridi, kusu laraogu lotu axap dinaba xasep do levelinga atnama ti emi asu minimi i ruturen.

## 9

<sup>1</sup>\*Ixok pakes tia xusu ana malagan tinimi mumu loklok tooro minaba lox aonon i uto ri limixin at ne Moroa di nemen to Judaia.

<sup>2</sup> Akleklen i do nemi mi gagas amisik kusu ti lok tooro, kuren la a lox aru amisik nimi ri limixin Masadonia. Aga tong i ridi do nemi limixin to Grik mi gagas kusu ti lok tooro, ga ruka i at no lamaares ga xap. Mo lavavara atnemi ga lox axatu buaang levendoxoma xeneng atdi xusu nedi bok dina lok tooro.

<sup>3</sup> Monga nia ana riki aonon na luvutneton dik, kusu lavapaase aru atnama mumu nimi xeneng at laramtaba atnimi noxo ravasu ngan lavanga gamasa mun. Ketla i ngan nia ara tong pam i do, minaba gagas li mo loklok tooro atnemi.

<sup>4</sup> Panga tentaba me Masadonia na emu minia udom saparap nimi la dina long lenger i do nemi mixo gagas. Maba mangan aleng mumu nimi, la maba tong ka lavanga sala atla maga nunu abos do miba lox epovo i. La ni lavanga mamangan tinimi.

<sup>5</sup> Kuren la a doma i do i epovo do ana sing na luvutneton dik kusu dinango ria udom atnimi xusu dina gagas li avot be nimi ri laramtaba

nemi miga vaase ali min. Minaba gagas at loxonaleng do nia ana vot, la na laramtaba naba lox asuusu i do mi etaba mila miga vara i xuren, la kopmen do miga morong min.

### *Lavapaase Poovo Mumu Loklok Ti Raba*

<sup>6</sup>\*Mina doma i na, neni do itlotlo tevempanga lixilik mun naba ruuna tevempanga lixilik bok. La laradi do itlotlo taxanit panga solo, neni naba ruuna teveluxa solo.

<sup>7</sup> Nedi getgesara dina raba kerekngan lodoxoma atdi la nemen gat loklox angtungun koplara na pu soso di. Mila ne Moroa i momo mi laradi i raba mi lomomo xeneng teren.

<sup>8</sup> La ne Moroa xa i epovo na raba nimi mi leveloklox anarong axap naba umsu aleng, kusu at levenaleng axap minaba ruuna epovo amisik at levempanga axap. La ne Moroa xa naba lok levempanga atnimi mitlotlo i na pisik nunuan kusu minaba epovo rinotno do mina lok leven gugu nunuan.

<sup>9</sup> Kerekngan Lovoang Kaala i tong i do,

“Neni im taba leventamtaba solo mi lebelemulus ti limixin banbalo. La amisik ik lox asuusu labalamu ren ti limixin.” *Sam 112:9*

<sup>10</sup>\*Moroa im taba levenit panga ritlotlo mi levengkongkide ri anan. La kerepmo neni naba raba bok nimi mi levenit axap nemi mik pakes tin la na lox asuusu i xusu mina pisik asu leven gugu nunuan i buaang aleng.

<sup>11</sup>\*Neni nabak lok nimi minap novos aleng at levempanga axap, kusu mina lok tooro amisik limixin petpes. La buaang bok atnedi limixin dinaba tong aorong ti ne Moroa ri laramtaba atnimi ridi, no minaba raba mu nama min.

<sup>12</sup>\*Mo loklok tooro ap mo laramtaba atnimi naba ven ti lavakpakes at limixin at ne Moroa, la naba lox asuusu bok buaang lorotong

\* **8:24:** 2 Ko 7:13-14    \* **9:1:** 2 Ko 8:1-7    \* **9:6:** Ler 11:24; 22:9; Ro 12:8    \* **9:10:** Ais 55:10; Ose 10:12    \* **9:11:** 2 Ko 1:11; 4:15    \* **9:12:** 2 Ko 8:14

avukat keneng at lorooro atdi ri ne Moroa.

<sup>13</sup> Mo laramtaba atnimi naba lox asusu i do nemi limixin tuturun. La limixin petpes dinaba emi asu mi ne Moroa mumu lorongtonga res mi lurutu lolos atnimi ri Lagale Lavavang at ne Karisito, la mumu bok mo lomomo atnimi ri lok tooro mi leventamtaba ridi la ti limixin petpes bok.

<sup>14</sup> La dinaba sing lolos bok tinimi mi labalamu rinotno xeneng at lorooro atdi, mumu lugugu asusu atnimi ri lagale letaba nabalamu at ne Moroa, mo neni ga raba nimi min.

<sup>15</sup> Ata tong avukat tinotno ri ne Moroa ri mo laramtaba ren tidik i silok aleng tinotno.

## 10

### *Pol Ga Vaase Pe At Lugugu Ren*

<sup>1</sup> \*Nenia ne Pol. A sing nimi, mi mo loklok mumulus la loklox atnaasan at ne Iesu Karisito. Do nia a nemen eburu minimi, mi lok do nenia ne Pol ak lok mumulus mene. Ket do a nemen paxalom basinge nimi, mi lok do nia a paase lolos tinimi.

<sup>2</sup> \*A sing nemi do luruptuvuk atnimi na lox avukat mun kusu at laaleng nenia ana vot pasa nimi, noxo epovo bok ba xusu ana vaase lolos tinimi mi lolos axa rak. I ngan nia a doma i do ana lox asusu i rinedi leventaba luvuttadi di doma i do nema map tuvuk ngan luvuttadi at na lavatbung menemen.

<sup>3</sup> I ruturun do mat pas at na lavatbung menemen, ketla maxo vesep mi lewendoxoma mun at limixin at na lavatbung menemen.

<sup>4</sup> \*Levempanga esep atnama ri esep at na lavatbung menemen kopmen mede at na lavatangka. Ketla ni i ruuna lolos boro at ne Moroa la i epovo xusu ti sele utut kepe lengkot kitkis at laradi munepen midik min.

<sup>5</sup> Ma sesele utut kepe leventetere xaxarang la lewendoxoma silok i lok petpes ti lakleklen at ne Moroa, la

ma baba gili lewendoxoma axap at limixin kusu dina ronga res at ne Karisito.

<sup>6</sup> \*La melemu at loxonaleng mira ronga res nunuan axap, maba gagas ba xusu mana lok li tevenmumuat atnedi dik lok kantubu atnemi la ding tonga xepe.

<sup>7</sup> Nemi mi ven mumu levereven at labantuxu at laradi la kopmen mina reven lorooro axap teren. La do tara i doma ruturun i do neni at ne Karisito, i lox avukat do neni na xasep do nema bok at ne Karisito xerekngan i.

<sup>8</sup> \*Nia axo mangan do nia ana lox aru ia mumu lugugu rak ti tong asu Lagale Lavavang, Leeme Silok ga raba nama min. Mo Lagale Lavavang, no Leeme Silok ga raba i xusu ti lox alolos labaroonan atnimi la kopmen ti lok kapmek nimi.

<sup>9</sup> Nia a xopara i do mo lodoxoma na ravasu atnimi do nenia aba lox amarat nimi mi lempoang tarak.

<sup>10</sup> Mila leventaba di lok do, "Levempoang at ne Pol i lolos la i mumuat aleng. Ket do neni na nemen eburu midik, neni nabasko la levempapaase ren noxo mumuat solo."

<sup>11</sup> \*Luvuttadi xerepmo dina xasep nunuan do levempanga salai ma vaase i xeneng at lovoang, kopmen na lok petpes ti levempanga maba lox i at loxonaleng mabak lok eburu minimi.

<sup>12</sup> \*Maxo lok do mana mii poovo nema ri leventaba la mana ila mumu nema rinedi leventaba di lok do di silok aleng. Ketla di soxovo lorooro atnedi mi leventaba atdi xa, la dira ila mumu nedi ri leventaba atdi xa, nedi xopmen dinaklen tempanga.

<sup>13</sup> \*Ketla nema ma noxo paase asilok nema mumu levempanga vetpes, naba epovo mun mi lugugu ne Moroa ga raba nema min, la mo lugugu i vung kimit bok nimi.

<sup>14</sup> Nema ma epovo na lox aru nema mumu nimi, mila nema maga vot

\* **10:1:** 1 Ko 2:3 \* **10:2:** 1 Ko 4:21 \* **10:4:** Ep 6:13-17 \* **10:6:** 2 Ko 2:9 \* **10:8:** 2 Ko 12:6; 13:10 \* **10:11:** 2 Ko 13:2,10 \* **10:12:** 2 Ko 3:1; 5:12 \* **10:13:** Ro 12:3

dom atnimi xusu mana tong asu Lagale Lavavang at ne Karisito rinimi.

15 \*La kopmen mana lox aru nema mumu leven gugu at leventaba vetpes. Ketla lavavara atnema do mo lununu atnemi na sisilok, la manaba lok bok buaang teven gugu xantubu atnimi.

16 \*La melemu ren nema maba vavang mi Lagale Lavavang to at levenep kangka vetpes i nemen paxalom basinge nemi. Mila ma xopara na gugu at lengkot ua lentaba vetpes diga gugu vam go la mana lox aru nema mumu leven gugu leventaba vetpes digara lok pam i.

17 \*I ngan Lovoang Kaala i tong i xeretna,

“Do tara neni laradi loklox aru, neni nak lox aru Leeme Silok ne Moroa.”

*Jer 9:24*

18 \*Moroa xopmen na siam ka mo laradi ik lox aru axa i, ketla neni i siam ka mo laradi, Leeme Silok ne Moroa ik lox aru i.

## 11

### *Pol La Luvuttadi Vavang Kaxarang*

1 A vara aleng i do mina xip tooro ia at na lodoxoma rangtangu rak. A sing nemi do mina xip tooro ia ren.

2 \*A suma i do lodoxoma rak iplivi aleng mumu nemi mi mo liplivi at ne Moroa xa. Mila aga ora ka nemi do ri ne Karisito xusu ana raba nemi ngan loono dadat ti leges atlok teren.

3 \*Ketla a marat do lavanga tara na sasar asoogong levendoxoma atnemi la mina ke xepe lununu lolos la lotu ruturun atnemi ri ne Karisito, kerekngan ne Iva. Lisii ga xarang i mi lakleklen kapmek teren.

4 \*A marat do tara na vot la na vavang mi ne Iesu vetpes ti na ne Iesu nema ma vavang min. La mina lok ka lороonan kopmen at ne Moroa, eburu mi lavavang i lok petpes

aleng tinotno ri Lороonan Kaala at ne Moroa eburu mi lavavang nemi miga ronga ka i la miga siam kaka i.

5 \*Ketla a doma i do nia xopmen ana lixilik tinotno rinedi luvuttadi vavang kaxarang, di lok do di silok aleng.

6 \*Keke i do nia axoklen avukat lavavang, ketla a lok nunuan at lakleklen nia a ruuna i, la magara lox ase axasep tinotno vam nemi min.

7 \*Nia goxo ro unun tinimi at levenaleng nia aga vavang mi Lagale Lavavang at ne Moroa rinimi. Aga lox asi ia kantubu atnemi kusu ana lox aurut nemi mi Lagale Lavavang. Kereva, nenia aga lok laxapmek mi na loklok?

8 \*Aga lok kaka levempilas boro at laraogu lotu vetpes ngan luunun tia. Kuren la aga lox epovo i xusu ana vavang ti lok tooro nemi.

9 \*La at levenaleng nia aga nemen eburu minimi la agak pakes ti tempanga. Ketla a goxo lox angtang solo nemi, mila levempakpakes tarak limixin nunu boro Masadonia diga lok tooro ia min. Kuren la nia goxo ngising panga nemi la melemu bok nia noxo sing panga nemi. A xopara na raba nemi mi laknixip.

10 \*Luruturun at ne Karisito ik lok tarak, la kerepmo kopmen tara medo Grik naba rupe ia at na levelinga loklox aru do nenia axo lok kaka levempilas ti lugugu rak do.

11 La tila ba nia a vaase i na? Ti lox asu i do axo balamu nemi? Kopmen. Moroa iklen i do a balamu nemi.

12 La move nenia a noxo lok kaka lempilas boro atnedi limixin ding tonga levelinga rak. Kerepmo aba lox asuvos laxaxarang atnedi dik lox aru di do nedi mo luvuttadi vavang la di gugu ngan nema.

13 \*Limixin kerepmo kopmen di luvuttadi vavang tuturun. Nedi luvuttadi vavang kaxarang la di xaxarang

\* 10:15: Ro 15:20 \* 10:16: Gu 19:21 \* 10:17: 1 Ko 1:31 \* 10:18: 1 Ko 4:4-5 \* 11:2: Ep 5:26-27 \* 11:3: Lur 3:4,13 \* 11:4: Ga 1:8-9 \* 11:5: 1 Ko 15:10; 2 Ko 12:11; Ga 2:6 \* 11:6: 1 Ko 2:1,13; Ep 3:4 \* 11:7: 1 Ko 9:12,18 \* 11:8: Pl 4:15-18 \* 11:9: 2 Ko 12:13 \* 11:10: 1 Ko 9:15 \* 11:13: 2 Ko 2:17; Pl 3:2

mi leven gugu atdi la dik lok poovo i xusu dina ven ngan luvuttadi vavang at ne Karisito.

<sup>14</sup>Nia axo rakdu bok, mila ne Satan ik lok poovo box i ngan laangelo at laxasep.

<sup>15</sup>Kuren la ixo lolos ti luvuttadi gugu ren kusu dinak lok poovo nedi ngan luvuttadi gugu at levelinga mokmokso. At laxavaxap at lorooro atdi dinaba lok ka akmokso luunun i epovo mi leveloklok nedi diga lox i.

*Pol Ga Paase Axalat Ti Leme Korin*

<sup>16</sup>\*A vara na tong amu box i do, nemen tara ta nua i do nia a baulang. Ket do mi doma i xuren, mina siam ka ia do laradi baulang kusu aba lox aru lixilix ia.

<sup>17</sup>Na levelinga nia a vaase i ri lox aru ia, axo vaase i mi lavavara at Leeme Silok, ketla a vaase i ngan laradi baulang.

<sup>18</sup>Buaang nedi luvuttadi di lox aru di ngan limixin at na lavatkangka, kuren la nenia bok aba lox aru ia.

<sup>19</sup>Mi momo rip kip tutu mi mo luvuttadi xaxarang la mo loklok baulang atdi mila mi lok ngan luvuttadi akleken.

<sup>20</sup>I ruturen mi xip tutu mi nege i lok nemi ngan lavasaxaruki ren, kopl ip kip pilo levempanga atnemi, la i ven asi rinimi, kopl i vasa bobonot levenmeren nimi.

<sup>21</sup>\*A vara na tong i do a lok mangan aleng, mila maga marat ti lox i na rinimi.

Ketla do di vara i do dina lox aru di at tavanga, a vara box i do ana lox aru ia xerekngan di. (Na levelinga rak i lok ngan levelinga at laradi baulang.)

<sup>22</sup>Kereva, nedi limixin me Ibru? Nenia bok pam kuren. Kereva, nedi limixin me Israel? Nenia bok pam kuren. Kereva, nedi livisik li at ne Abaram? Nenia bok pam kuren.

<sup>23</sup>\*Kereva, nedi lavasaxaruki at ne Karisito? Nenia bok lasaxaruki at ne Karisito la a lok nunuan aleng

tidi. (A paase ngan laradi baulang tinotno.)

Agara lok pam laxan gugu buaang. Buaang levenaleng agara nemen pam at loogu xokoxo, la digak pixis aleng ia, la nia axo epovo xusu ana exes i, la agak lox auret ti lanmet. Nia a lok do nedi dixo ekip tangarang mi levempanga xerepmo.

<sup>24</sup>\*I valimo levenaleng limixin me Judaia digak pixis ia ga se at lavantun sangaun mi lavasik.

<sup>25</sup>\*I vantun levenaleng limixin boro Rom digak pixis ia mi levenakpiksa. La at leges aleng diga lu ia mi laxanuat. I vantun levenaleng lavatmon ga lok kapmek minama la at leges aleng kangking la kanimin agam kobok mun to at laras.

<sup>26</sup>\*Buaang levempatpas tarak aga nemen keneng at levenmumuat to at laradanut la boro bok at luvuttadi xipkip pilo. La aga nemen bok keneng at levenmumuat boro atnedi limixin axa rak me Judaia la boro bok atnedi limixin kopmen di me Judaia. Aga nemen bok keneng at levenmumuat to at laramenemen silok, la aga nemen bok at levenmumuat to at lamatbin, la to bok at laras, la boro bok atnedi diga voovo ngan limixin nunu.

<sup>27</sup>\*Aga nemen bok keneng at leven gugu ga lolos aleng, la a goxo lok ka tevenanunga avukat la agak toxo la agak minu la goxopmen tempanga anan tia la agak mudut aleng la goxopmen tevesingsiga avukat tia.

<sup>28</sup>\*La mavana at nai levempanga, lara lumumuat mo it pot parav ia at levenaleng getgesara la ni lodoxoma liplivi mumu limixin lotu.

<sup>29</sup>\*Do tara na lok molo at lununu ren, nia a doma mumu aleng lununu ren. Dola tara i los beles at laxapmek, nia a umsu aleng mi lainbulu.

<sup>30</sup>\*Dola ana lox aru ia, ana lox asilox ia mi na levempanga ga vot parav ia ua di lox asuusu lomolo rak.

\* 11:16: 2 Ko 12:6    \* 11:21: Pl 3:5    \* 11:23: Gu 16:23; 1 Ko 15:10    \* 11:24: Lal 25:3    \* 11:25: Gu 16:22; 14:19    \* 11:26: Gu 9:23; 14:5    \* 11:27: 1 Ko 4:11; 2 Ko 6:5    \* 11:28: Gu 20:18-21,31  
\* 11:29: 1 Ko 9:22    \* 11:30: 2 Ko 12:5    \* 11:31: 2 Ko 1:23

<sup>31</sup> \*Moroa ne Temen Leeme Silok ne Iesu, limixin axap dina emi asu min at levenaleng axap la iklen i do nia axo babala mi na levelinga.

<sup>32</sup> \*To Damasko laradi gomgo max-opok at loorong ne Aretas ga tong lolos i xusu dina rupe levenngas povolo ap mo lemenemen Damasko xusu dina ranga alis ia.

<sup>33</sup> Ketla larapen tangas tarak diga suxa abeles ia at laxaxi buso la diga lox asi ia ukopok boro at loxon mus-maragu lixilik gak lok at laxapla at loogu la aga roo su at lukngen.

## 12

### *Lisilimet At Ne Pol*

<sup>1</sup> A vara na lox aru ia, keke i do kopmen na lok tooro tara. Ketla monga a vara i xusu ana vaase levesilimet la levempapaase asuusu bok boro at Leeme Silok.

<sup>2</sup> Aklen lara laradi nunu at ne Karisito at lasangaun mi lavanuet maares gara xap pam, Loroonan Kaala ga lok ka i uto vana at laxalibet i sev avantun. Nia axoklen i do nai ga vot tuturun koplala ni ga ven mene lisilimet, Moroa xusuk mun iklen i.

<sup>3</sup> La aklen i do na laradi Moroa ga lok ka i uto at lagale lemenemen teren. Ketla nia axoklen i do labantuxu ren ga urut koplala loroonan mun teren, Moroa xusuk iklen i.

<sup>4</sup> La go ni ga ronga levelinga i xaala aleng la ixo epovo do tara na tong asu i.

<sup>5</sup> \*Aba lox aru mo laradi, a noxo lox aru ia. Ketla kusuk mun nia ba lox aru ia at levempanga i lox asuusu lomolo rak.

<sup>6</sup> \*Dola a vara i xusu ana lox aru ia, nia noxo lok ngan laradi baulang, mila a paase mi luruturun. Ketla axo xip tutu min, atla ixo lox avukat do tara i doxoma mumu solo ia ri levempanga salai neni i ven i rak la i ronga ia min.

<sup>7</sup> \*Ketla mumu mo levempanga nunuan aga ven i, nia aga ruuna ka losongsongot de at labantuxu

rak, la na losongsongot i lok ngan lasaxaruki at ne Satan kusu na sev asongot tinotno ia la ti rupe ia basinge loklox asilok.

<sup>8</sup> I vantun levenaleng aga sing ne Moroa mumu i na lavanga, la aga sing i xusu na lok pes i.

<sup>9</sup> \*Ketla ni ga vorang i ria xeretna, "Letaba nabalamu rak tu i epovo xuren, mila lolos tarak naba gugu lolos aleng mo do a lox asuusu i ri limixin, at levenaleng di molobe." Kuren la anaba lok momo aleng tinotno ri mo leveloklok molo rak, kusu mo lolos at ne Karisito naba nemen keneng tarak.

<sup>10</sup> Ti lox aru ne Karisito, a lok momo aleng kusu labantuxu rak na molobe la ana xip tutu mi levempapaase vupu la levenmumuat la levesongsongot la levenmumuat i lolos aleng. Mila anaba suma xaka lolos silok, keke i do labantuxu rak na molobe.

### *Pol Ga Paase Axalat Ti Leme Korin*

<sup>11</sup> \*A lok ngan tinotno laradi baulang mumu mo levelinga a tong pam i, ketla nemi xa miga pu soso ia rin. I epovo do nemi mina lox aru ia, mila nia xopmen ana lixilik tino ti nom luvuttadi vavang kaxarang mi lok do di silok aleng, keke i do nenia laradi lixilik mun.

<sup>12</sup> \*Nia aga lolos kusu ana lok levempanga i lox asuusu i do nenia laradi vavang aga lox i xantubu atnimi. I ngan leveloklok katling at ne Moroa la levempanga sangsangu.

<sup>13</sup> \*Nia aga gugu xantubu atnimi xerekngan aga gugu xantubu at limixin at laraogu lotu vetpes. Ketla nia goxo lox angtang nemi do ri toloklok tooro ria. Mina doxoma xepe na laxapmek tarak.

<sup>14</sup> \*A gagas tana xusu ana vot pasa nimi la ni lavatpas sepsev avantun tarak tinimi. La nia noxo lox angtang nimi mila nia axo vara levempilas atnimi, ketla a vara lorooro atnimi ri

\* 11:32: Gu 9:23-25 \* 12:5: 2 Ko 11:30 \* 12:6: 1 Ko 10:8; 11:16 \* 12:7: Jop 2:6 \* 12:9: Pl 4:11-13 \* 12:11: 2 Ko 11:5 \* 12:12: Ro 15:19 \* 12:13: 2 Ko 11:9 \* 12:14: 2 Ko 13:1

Leeme Silok. Laxamdak lixilix dixo lili bubua lapnovos ti luvuttemen di mi luvutnen di, ketla luvuttemen di mi luvutnen di, di lili lapnovos ti laxamdak atdi.

<sup>15</sup> \*Kerepmo aba lok momo aleng do ana raba axap lorooro rak, mi levenaleng tarak, la lolos tarak kusu ti lok tooro nimi. Kereva, ixo epovo do mina balamu lixilix ia xerekngan nia a balamu aleng tinotno nimi?

<sup>16</sup> Nemi axap miba siam do nia goxo lok ngan laknixip tinimi axap. Ketla leventaba diba lok do nia a babala vukpuk nimi mi levelinga xaxarang.

<sup>17</sup> Kereva, agut nia aga sing panga nimi at loxonaleng aga riki leventaba luvuttadi gugu rak udom?

<sup>18</sup> \*Aga sing ne Taitas do nat pas udom, la aga riki aonon bok lara laradi nunu eburu min. Kereva, Taitas ga babala vukpuk nimi? Kopmen tinotno. Kereva, neni la nenia, nema magap tuvuk at legeso doxoma la ma ruuna legesu ruptuvuk mene?

<sup>19</sup> Agut mi doxoma i do nema mo mak lok tong i do mana paase see atnama ro melamgo atnimi? Kopmen tinotno. Ma paase ngan limixin at ne Karisito to melamgo at lemeren ne Moroa. Larapen tangas orong tarak. Levempanga axap ma lox i xusu ti lok tooro nimi.

<sup>20</sup> \*A marat do at loxonaleng nia ana vot dom, aba long lenget nemi do mira lok petpes aleng pam ti lodoxoma nia a vara i do mibap tuvuk kuren. La nemi bok miba long lenger i do nenia bok aba lok petpes ti lodoxoma nemi miga vara i do nia aba lok kuren. A marat do aba ven lenget levenedak la levereven peves la levenmukmusak la levenekarakat la lavapaase nemnem la loklox asilok patlak la levempanga xopmen na sixit nunuan keneng at lotu.

<sup>21</sup> \*A marat do mo nia ana vot manga, ne Moroa rak naba lox ab-

ulu ia dom melamgo atnimi. La aba lok mamangan aleng mu buaang atnedi digara lok pam laxakapmek gano, la kovisi di goxo leeng basinge laxakapmek atdi diga lox i, ngan loklok ti elongka la loklok kakapmek maxamang at lixitkis epot la lengkot mamangan kerepmo.

## 13

### *Levempapaase Loklox Aronga*

<sup>1</sup> \*Na lavatpas, neni ba lok ngan lavatpas sepsev avantun tarak saparap nimi. Lovoang Kaala i tong i do, "Do tara na lok li tara at lavapaase, i lox avukat do tegepura kopla tavantun tuvuttadi dina paase be."

<sup>2</sup> At lavatpas sepsev agepura rak saparap nimi, agara vaase aronga vam nedi mo luvuttadi diga lok mo leveloklok kakapmek, la ti mo luvuttadi vetpes bok. La monga a nemen paxalom, ketla ana vaase aronga bok nemi xeretna. Dola melemu nia ana vot, a noxo maraanga tara atnimi,

<sup>3</sup> la minaba ven kisp avukat ba i do ne Karisito i paase keneng tarak. Neni kopmen lavanga mokmolo, ketla neni naba lox asuusu lolos teren kantubu atnimi.

<sup>4</sup> \*I ruturen do neni ga merem at laxaba, la ap mo loxonaleng goxopmen tololos teren. Ketla monga i rooro amisik mi lolos at ne Moroa. Kerepmo nema luvuttadi guguren, kopmen tololos atnama. Ketla at lugugu atnema xantubu atnimi, nema manaba ruuna lolos at ne Moroa, mila nema mat kis ekilen eburu mi ne Karisito.

<sup>5</sup> \*Mina ila mumu lorooro atnimi kusu mina ven kibis i do nemi mi ruuna lununu ruturen. Kereva, mixokleklen i do ne Iesu Karisito i nemen keneng atnimi? Do xopmen, i lox asuusu i do mira subu vam at loklok tong pen.

<sup>6</sup> A nunu do nemi mina ven kisiv i do nema ma goxo subu at loklok tong pen at luvuttadi vavang.

\* 12:15: Pl 2:17 \* 12:18: 2 Ko 8:6,16-18 \* 12:20: 2 Ko 2:1-4 \* 12:21: 2 Ko 13:2 \* 13:1: Lal 19:15; 2 Ko 12:14; Mt 18:16; 1 Ti 5:19 \* 13:4: Pl 2:7-8 \* 13:5: 1 Ko 11:28



<sup>7</sup> Ketla monga ma sing ne Moroa do nemi mi noxo lok taxapmek, kopmen ti lox asuusu i do nema maga volo vam ap mo loklok tong pen. Ketla ma sing tinemi xusu mina ravasu ngan limixin nunuan at ne Moroa la keke i do nema mana subu kot.

<sup>8</sup> \*Nema maxo epovo do maba lok tavanga ri rupe levelinga ruturun at ne Moroa, ketla ma gugu mene xusu ti su auru i.

<sup>9</sup> Ma lok momo do nemi mi tu atmatkun. Keke i do nema maxo ruuna lolos. La ma sing bok kusu mina ravasu nunuan axap keneng at lorooro atnimi.

<sup>10</sup> \*Ni lavasuun teren la nia a malagan i na at loxonaleng nia ak lok paxalom basinge nimi, kusu do nia ana vot, a noxo lok li lumumuat mavana atnimi mi mo lolos Leeme Silok ga raba ia min. Lugugu at na lolos i lok keretna, ti lox alolos lununu atnimi la kopmen do ri lox asi lununu atnimi.

#### *Levempapaase Avit*

<sup>11</sup> \*Atnimi bok be luvutnetak mi luvurinuk. Mina lolos ti ruuna ka luvruptuvuk i nunuan aleng mene nga la minang tonga res at levesingising tarak tinimi, la levendoxoma atnimi na ngan legesara mun. La mina nemen keneng at limila. La ne Moroa ni lavasuun at labalamu la limila, neni naba nemen eburu minimi.

<sup>12</sup> \*Mina eseega rangarang mi lenetnes i xaala.

<sup>13</sup> La limixin nunu axap mede di lox aonon lomomo atdi rinimi.

<sup>14</sup> Letaba nabalamu at Leeme Silok ne Iesu Karisito la labalamu at ne Moroa la loklok mukmulus at Loroonan Kaala nak lox eburu amisik minemi axap. I ruturun.

**Galesia**  
**Lovoang At Ne Pol**  
**Ti Limixin Nunu To**  
**Galesia**  
**Levelinga Loklox**  
**Axasep**  
**Lamaares 57 A.D.**

Galesia neni laasen at lara lenep silok. Keneng at nai lenep silok Galesia, lentaba lavaeme loklox ase mo digat pas saasaa la diga vavang mi levenanasa sixit emu mi Lagale Lavavang. Kuren la ne Pol ga malagan aonon i na lovoang. Na lavaeme loklox ase diga anasa xeretna. Nedik na ua ata nunu at ne Karisito, atana mumu asu bok leveloklok at leme Judaia la Laulis Linga, kusu atanaba lok ka lorooro ren. Ketla keneng at na lovoang ne Pol ga lox axasev i do ata nunu mene at ne Iesu xusuk mun, la keneng mun at nai, nedik ata ba lok ka lorooro avolo.

**Lengkot silok keneng at na lovoang**

1:1-5 Lavapaase momo at ne Pol ti limixin.

1:6-2:21 Dina lox abulubun kepe levenanasa xaxarang.

3:1-4:31 Nedik dixo lok ka lorooro mi lolos axa atdi.

5:1-6:10 Ataba lok ka lorooro mun keneng at ne Karisito.

6:11-18 Pol ga lox axap levelinga ren.

*Lavapaase Axasep*

<sup>1</sup> \*Nenia ne Pol, la nenia laradi ga lok ka lorotoro ngan lun pavang la mo lorotoro goxo ravasu at taradi gamasa. Ketla ga ravasu boro at ne Iesu Karisito eburu mi ne Moroa, ne Temen, no ga lox arooro amlong i at lanmet.

<sup>2</sup> Nema axap loxoeton nade ma lox aonon lomomo atnema rinemi limixin lotu at laramenemen do at lenep silok Galesia.

<sup>3</sup> \*Letaba nabalamu la lenmila rinemi boro at ne Moroa ne Temen nedik la Leeme Silok atnedik ne Iesu Karisito.

<sup>4</sup> \*Iesu ga raba lorooro ren ti ru kop ti laxakapmek atnedik kusu neni naba lox asepmus nedik basinge leveng kakapmek at na levenaleng lolos. Anaa ga ravasu ngan lavavara at ne Moroa ne Temen nedik.

<sup>5</sup> Ata xip aurut laasen at ne Moroa, la leemi asu rin amisik la kopmen taxavaxap teren. I ruturun.

*Leges Agale Lavavang*

<sup>6</sup> Nia a sangu aleng atnemi, atla goxo lox abao bok la mira ke xepe nga ne Moroa, mo ga ro xaka nemi mi letaba nabalamu ren keneng at ne Karisito, la monga mira sisiam kaka nga lavavang petpes.

<sup>7</sup> \*La i ruturun tinotno do kopmen bok ba tepavang avukat petpes. Ketla a vaase i na atla lentaba luvuttadi mo dik lox ekarakat lodoxoma atnemi la dirak lok tong i xusu dinaba ba gili Lagale Lavavang at ne Karisito ti langas petpes.

<sup>8</sup> \*Ketla do nema luvuttadi vavang kopla taangelo boro vana at laxalibet na vavang mi tevelinga xopmen na sixit emu mi Lagale Lavavang at ne Moroa, anaa nema maga vavang min tinemi, lasaxaek na mu asu di.

<sup>9</sup> Nema magara paase vam i na gano la amo manga ara vaase amu manga ren. Dola tara na vavang tinemi mi tavavang na lok petpes ti lara nemi migara ruuna xaka vam i, lasaxaek na mu asu mo laradi.

<sup>10</sup> \*Nenia xopmen ana vaase i na xusu do ti lok limixin diba lok momo minia, kopmen tinotno. Nenia a vaase i na xusu ti lox amomo ne Moroa. La nenia kopmen ana vaase i na xusu limixin dinaba emi asu minia. Kopmen. Do nenia gita lox i xuren, ixo epovo bok do nenia giba lok ngan lasaxaruki at ne Karisito.

*Langas Ne Pol Ga Mu Asu I Ri Lok Ngan Laradi Vavang*

\* 1:1: Ga 1:11-12 \* 1:3: Ro 1:7; Pl 1:2 \* 1:4: Ga 2:20; 1 Ti 2:6; Ta 2:14; 1 Jo 5:19 \* 1:7: Gu 15:1,24 \* 1:8: 1 Ko 16:22 \* 1:10: 1 Ts 2:4 \* 1:11: Mt 16:17

11 \*Luvutnetak mi luvurinu. A vara do ana tong i rinemi xeretna do, Lagale Lavavang nenia a vavang min, goxo ravasu at lodoxoma at taradi at na lavatkangka.

12 \*La a goxoklen kaka i at taradi, xopla taradi ga lox ase ia min. Ne Iesu Karisito axa ga lox asuvos taba ia min.

13 \*Limixin digara tong axasep pam lorooro rak tinemi at levenaleng nenia aga rooro rinotno xeneng at loklok at leme Judaia. Nenia agak lox asongot aleng limixin at lotu at ne Moroa, la aga lolos tinotno xusu ana sev asi rino lununu atnedi.

14 \*La loklok tarak keneng at lotu Judaia ga volo rinotno leventaba diga visik emu nema keneng at lenep Judaia. La nenia aga lolos tinotno xusu ana mumu asu leveloklok at lavalabat atnema.

15 \*Ketla avot ti livipisik tarak, ne Moroa gara soxolik kaka avot pam ia. La keneng at letaba nabalamu ren, neni ga ro xaka ia do ateren.

16 \*La at loxonaleng neni ga doma i xusu na lox asuvos ne Nitna ria, la kusu anaba vavang mi Lagale Lavavang teren ti limixin kopmen di me Judaia, nenia a goxo vot pasa bok ba teta xusu neni gita re ase ia.

17 Kopla agitat pas bok be uto Jerusalem kusu ti ven nedi lavaun pavang avot tia. Ketla agat pas epopolo uto Arabia, la melemu agamlong uto Damasko.

18 \*Ga melemu ba at lavantun maares la nenia agarat pas ba uto Jerusalem ti vot pasa ne Pita, la agak lok eburu min at lasangaun mi lavalimo levenaleng.

19 \*La nenia a goxo ven tu ap mo lentaba lavaun pavang bok, ketla ne Jems kusuk mene nga, neni neton Leeme Silok.

20 La na levempanga nenia a malagan i, i ruturun tinotno, la ne Moroa iklen i do nenia a xopmen ana

xaxarang.

21 \*La melemu agat pas uto at lunep silok, Siria la Silisia.

22 Ga ap mo levenaleng limixin at ne Karisito ro Judaia di goxokleklen ia.

23 Digakleklen mun levempanga, leventaba vetpes diga paase di min keretna do, "No laradi gak lox asongot limixin nunu, neni na i vavang mi mo lununu, neni gak lok tong i do na sele utur i."

24 Kuren la diga xip aurut laasen at ne Moroa la diga emi asu min mumu mo levempanga ga ravasu at lorooro rak.

## 2

### *Pol Eburu Mi Leventaba Lavaun Pavang Bok*

1 \*Ga melemu at lasangaun mi lavanuet maares, agamlong manga uto Jerusalem eburu mi ne Banabas, la ne Taitas bok ga emu minema.

2 Agat pas ugo atla, ne Moroa xa ga vaase i ria xusu anat pas ugo. La keneng at lara lixitkis buru atnama mi lubang amgomgo kusuk mun, nenia aga soxomus Lagale Lavavang a vavang min ti limixin kopmen di me Judaia. Nia aga lox i na xusu dina siam mu mo lugugu rak. Lavanga no lugugu avot tarak la anaa lugugu at na levenaleng na subu.

3 \*Ketla diga siam mu levelinga atnama mi ne Taitas, laradi loklok tooro rak. Neni laradi xopmen i me Judaia, la di goxo tong i do ni na vit kepe toxontuxu ren.

4 \*Ketla leventaba diga vara i xusu dina vit kepe lengkontuxu at luvuttadi nunu xopmen di me Judaia. Digak lok labala ngan nedi luvuttadi nunu la nedi na lemet tadi digak beles mun at libinam atnengan luvuttadi vereven ali. La diga vavara mun i xusu dinang long terek lesepepmus tinotno basinge Laulis Linga, nema magak lok kaka

\* 1:12: Ga 1:1 \* 1:13: Gu 8:3 \* 1:14: Gu 22:3 \* 1:15: Ais 49:1; Jer 1:5; Ro 1:1 \* 1:16: Gu 9:3-6; Ga 2:7 \* 1:18: Jo 1:42; Gu 9:26 \* 1:19: Mt 13:55 \* 1:21: Gu 9:30 \* 2:1: Gu 15:2 \* 2:3: Gu 16:3 \* 2:4: Ga 1:7; 5:1,13

i xeneng at ne Iesu Karisito. Diga vara mun i xusu dinak lok ka nema ukeneng at leveloklok atnedi, la manak lok maxopok at leventaangas at Laulis Linga.

<sup>5</sup> Ketla nema ma goxo ronga res atnedi at tekonaleng, atla ma goxopara i xusu mana lok lodoxoma atnemi na xipgas la mina doma xepe Lagale Lavavang i ruturun.

<sup>6</sup> \*Tinedi no limixin di tong di do lubang amgomgo at lotu, nenia axo doma solo i do nedid di silok kopla xopmen. Atla ne Moroa xopmen na viila mumu leveloklok at tara mi levereven teren. Nedi di goxo vaase bok ba tekolinga mavana at lavavang tarak.

<sup>7</sup> \*Ketla nedid diga ven kibis i do ne Moroa ga raba ia mi lugugu silok ti paase asu Lagale Lavavang ti limixin kopmen nedid me Judaia, ga lok ngan pam neni ga raba bok pam ne Pita mi lugugu silok ti vavang mi Lagale Lavavang ti limixin me Judaia.

<sup>8</sup> Moroa ga lox alolos ne Pita xusu neni laradi vavang ti limixin me Judaia la kerepmo bok neni ga lox alolos ia xusu nenia laradi vavang ti limixin kopmen di me Judaia.

<sup>9</sup> \*La ne Jems, ne Pita la ne Jon, nedid na lubang angkipkip at lotu, diga ven kibis i do ne Moroa ga raba nema mi ne Banabas mi na lugugu i lok petpes tinotno. Kuren la diga etep tikngen minama mi ne Banabas, ga lok ngan loklok katling do nema axap ma ruuna legesa gugu mene nga. La diga lok lisisiam do nema mi ne Banabas, manaba gugu xantubu at limixin kopmen di me Judaia, la nedid dinaba gugu ro at leme Judaia.

<sup>10</sup> \*La nedid diga vara i xusu nema mana doxoma bok levempakpakes at limixin banbalo kantubu atnedid, nenia aga ruuna lodoxoma liplivi rinotno ri lok na lavanga.

### *Pol Ga Vaase Lolos Ti Ne Pita Ro Antiok*

\* 2:6: Gu 10:34 \* 2:7: Gu 22:21 \* 2:9: Jo 1:42  
Gu 15:10-11; Ro 3:20-28; 4:5; 11:6; Ga 3:11

<sup>11</sup> Ketla at loxonaleng ne Pita gat pas uto Antiok, nenia aga vaase tangarang tinotno i at lemeren e, atla ga xasep tinotno do neni ga soogong.

<sup>12</sup> \*At lara laaleng ne Jems ga riki lentaba luvuttadi nunu me Judaia ugo. Avot ti lovotpot atdi, ne Pita nga no garak lok pam la gara vaanan eburu mi limixin kopmen di me Judaia. La melemu at loxonaleng na luvuttadi me Judaia diga vot, neni goxo an eburu bok ba minedi. Atla neni ga marat at Laulis Linga at leme Judaia mumu loklok ti ke laanan eburu mi limixin kopmen di me Judaia, la neni ga anan eburu mi luvuttadi no di goxo vit kepe lengkontuxu atdi.

<sup>13</sup> La nedid bok mo leme Judaia me go Antiok, digara lok ngan bok laxampanga makmarat ngan bok ne Pita. La ne Banabas bok gara mu asu bok nedid la nedid axap diga soogong.

<sup>14</sup> Kuren la at loxonaleng nia aga ven i do nedid di goxo mu asu langas mokmokso mi luruturun at Lagale Lavavang, aga vaase ri ne Pita ro melamgo rinotno atnedid axap keretna, "Nenu laradi me Judaia, ketla nenu nom e, u mumu asu leveloklok at limixin kopmen di me Judaia, la uxop tuvuk ngan laradi me Judaia. Kuren la ua lavasuun teren la u sat ka limixin kopmen di me Judaia xusu dina mumu asu leveloklok at leme Judaia?"

### *Limixin Di Roo Su Mumu Mun Lununu Atnedid*

<sup>15</sup> Limixin me Judaia di tong i xeretna, "Nema limixin me Judaia, la nema xopmen mana ngan nedid limixin kopmen di me Judaia dixo mumu asu Laulis Linga."

<sup>16</sup> \*Ketla nema leme Judaia maklen i do, laradi mun i nunu at ne Iesu Karisito, neni mun i sepmus basinge loklok kakapmek, la kopmen do i mumu asu Laulis Linga. La kerepmo bok ma nunu at ne Iesu Karisito xusu manaba sepmus basinge loklok kakapmek, kopmen do ti mumu asu

\* 2:10: Gu 11:29-30 \* 2:12: Gu 11:3 \* 2:16:

Laulis Linga. Anaa kopmen noxo ravasu at loklok ti mumu asu Laulis Linga, atla kopmen teta naba sepmus basinge loklok kakapmek do neni na mumu asu mun Laulis Linga.

<sup>17</sup> La amo do nema ma doma i do mana lok kepe Laulis Linga la mana sepmus basinge loklok kakapmek keneng at lununu atnema saparap ne Karisito, anai naba lox asuusu i do nema limixin ma ruuna laxakapmek mila ma lok kepe vam Laulis Linga. Kereva ba, lununu saparap ne Karisito i lok nema ngan luvuttadi xapmek, kuren la ne Karisito i lox asu laxakapmek? Kopmen tinotno.

<sup>18</sup> Do nenia anamlong ti loklok at Laulis Linga no nenia aga lok kepe i, anaba lox asuusu i xeretna do nenia laradi rongtonga xepe at Laulis Linga.

<sup>19</sup>\*Lavasuun at na xeretna. Laulis Linga ga lox ase ia do nenia laradi xapmek, kuren la aga lok ka lununu maxat la aga sepmus ba basinge Laulis Linga. La monga nia a epovo na rooro ti lok lugugu at ne Moroa.

<sup>20</sup>\*I lok ngan ta do diga vaxarem ia eburu mi ne Karisito ro at laxaba. La kopmen nenia xa na a rooro, ketla ne Karisito axa na i rooro xeneng tarak. La lorooro nenia ak lok keneng teren, ni lorooro mi lununu keneng at ne Nitna ne Moroa, la neni ga balamu ia la ga raba lorooro ren kusu na uu nop loklok tarak.

<sup>21</sup> Nenia a xopara i xusu ana sok tixirixes letaba nalamu at ne Moroa. Do taradi na doma i do neni naba sepmus basinge loklok kakapmek mumu lumumu asu ren at Laulis Linga, i milik ngan ta keretna do, goxopmen tavasuun ti lanmet at ne Karisito.

### 3

#### *Laulis Linga Xopla Lununu*

<sup>1</sup> Laxampanga rangtangu nemi leme Galesia. Nege rinotno ga sar asoogong lodoxoma atnemi basinge lununu ruturun, kusu mina mumu

asu Laulis Linga? Gano migara ven axasep pam lavasuun at lanmet at ne Iesu Karisito ro vana at laxaba.

<sup>2</sup> La mina tong be i ria. Kereva, nemi miga ruuna xaka bok Loroonan at ne Moroa mumu lumumu asu atnemi at Laulis Linga? Kopla, miga ruuna xaka Loroonan at ne Moroa mumu lorongtonga atnemi ri Lagale Lavavang la lununu atnemi saparav i?

<sup>3</sup> Ming tangku solo xereva? Miga ru kaxat avot lununu atnimi mi Loroonan at ne Moroa. La monga mi lok do mina ruuna ka lununu ngan limixin mukun mi lolos axa atnimi. Ketla kopmen mina epovo.

<sup>4</sup> Migarap kip levesongsongot mumu lununu atnemi. Kereva, migang songot gamasa mun?

<sup>5</sup> Kereva, Moroa im taba nemi mi Loroonan Kaala la ik lok levempanga sangsangu xeneng atnemi, atla mik lok levempanga Laulis Linga i paase i, kopla at levereven kibis atnemi ri Lagale Lavavang?

<sup>6</sup>\*Mina doma mu be lorooro at ne Abaram, ngan Lovoang Kaala i vaase i xeretna,

“Neni ga nunu at ne Moroa, la mumu mun lununu ren saparap ne Moroa, Moroa ga siam kaka i ngan laradi manmanton tino.”

*Lur 15:6*

<sup>7</sup> Kuren la mina ven kibis i do nedi limixin di ruuna lununu, dinaba ravasu ngan livipisik li rinotno at ne Abaram.

<sup>8</sup> Lovoang Kaala ga vaase avot be i xeretna do ne Moroa naba lok li limixin kopmen di me Judaia ngan nedi limixin manmanton mumu mun lununu atnedi. La avot ti lovtopot at Lagale Lavavang keneng at ne Iesu, Lovoang Kaala ga vaase asu i ri ne Abaram keretna, “Mumu mun lununu ram, nenia anaba lox anarong limixin axap at na lavatbung mene-men.”

<sup>9</sup> Ne Abaram ga nunu, kuren la neni ga lok ka leveloklox anarong, la nedi di nunu, dinaba lok kaka bok leveloklox anarong ngan i.

\* **2:19:** Ro 7:6 \* **2:20:** Jo 13:1; Ga 1:4 \* **3:6:** Ro 4:3,6,22; Ga 3:8-9; Lur 12:1-3; 15:6; Gu 3:5

10 La nedi axap ding tonga res kusuk mun at Laulis Linga at leme Judaia xusu dina lok kaka lorooro, nedi dik lok maxopok at lasaxaek ne Moroa im taba i. I ngan Lovoang Kaala i vaase i xeretna,

“Do nege do ixong tonga res amisik at levengkot axap keneng at Laulis Linga, neni ik lok maxopok at lasaxaek ne Moroa im taba i.” *Lal 27:26*

11 \*Amonga, i xasep tinotno do, kopmen teta naba sepmus basinge loklok kakapmek mumu mun lumumu asu ren at Laulis Linga. I ngan Lovoang Kaala i vaase i xeretna,

“Laradi xusuk mun ua neni i sepmus keneng at lununu ren, neni naba ruuna ka lorooro avolo.” *Abk 2:4*

12 \*La Laulis Linga ixo ruuna tekot keneng at lununu, ketla Lovoang Kaala i vaase i xeretna,

“Do nege i lox epovo levempanga axap Laulis Linga i paase i, neni naba ruuna ka lorooro avolo.” *Mas 18:5*

13 \*Ketla ne Karisito ga ruuna ka lasaxaek at loxonaleng neni ga ru korop ka lasaxaek, no ne Moroa im taba nedi di mumu asu Laulis Linga min. Kerepmo neni ga un ka amlong nema basinge nom lasaxaek. I ngan Lovoang Kaala i vaase i xeretna,

“Do nege na rem to vana at laxaba, neni i ruuna xaka lasaxaek boro at lebelemamao at ne Moroa.” *Lal 21:23*

14 Ne Karisito ga un ka amlong nama kusu no loklox anarong ne Moroa ga xaape min ti ne Abaram naba volo bok ti limixin kopmen di me Judaia. Ne Iesu Karisito ga lox epovo i na rinama, kusu mumu mun lununu atnama maba ruuna xaka Loroonan no ne Moroa ga xaape min.

### *Iesu Neni Livisik Li At Ne Abaram*

15 Luvutnetak mi luvurinuk. Ana vaase poovo mi legepu radi do nedu du paase mi tavanga at laxanaleng

axap la du siam teren la du malagan tovoang ti lox axasep livirivit li atdu. Ixo epovo bok ba xusu teta naba ba gili i xopla na soxurung arup tepempanga ukeneng teren.

16 \*La i ngan pam ne Moroa ga lok laxakaape ren ti ne Abaram eburu mi legesi visik li ren. Lovoang Kaala kopmen na vaase mi loxolinga ri limixin solo, ngan loxolinga “Livipisik li ren.” Lavasuun teren do buaang limixin, kopmen. Legesara mene nga, ngan loxolinga, “Legesi visik li ren,” la neni ne Karisito.

17 \*Lavasuun at levelinga rak keretna. Ne Moroa ga lok laxakaape eburu mi ne Abaram la neni ga vit li i xusu neni noxo doma xepe i. La Laulis Linga no ga vot ba melemu at lavanuet sangaun kobot mi lavantun sangaun maares (430) la ixo epovo xusu na los polo xopla na lok kepe mo laxakaape at ne Moroa ri ne Abaram.

18 \*Do laramtaba at ne Moroa ri ne Abaram ga vot mumu mene nga Laulis Linga, naba milik ngan ta do, mo laramtaba ren kopmen nak lok at laxakaape ren. Ketla mumu mun laxakaape ren, neni ga lox asusu letaba nabalamu ren la ga raba laramtaba ren ti ne Abaram.

19 \*Lavanga sala ba i neni lugugu at Laulis Linga? Laulis Linga ga vot kusu ti lox aven kibis limixin mi lavanga sala rinotno laxakapmek, la gak lok mun se at lovtopot at livisik li at ne Abaram, la neni ne Moroa ga xaape min. La ne Moroa xa ga raba lubang angelo ren mi Laulis Linga xusu dina raba ne Moses min ngan laradi me xantubu, la ne Moses ga raba limixin min.

20 Ketla at laaleng ne Moroa ga raba ne Abaram mi laxakaape ren, neni axa ga lox i, kopmen teangelo xopla laradi me xantubu gita raba ne Abaram min.

21 \*Kereva ba, Laulis Linga i ra korop leveng kakaape at ne Moroa?

\* 3:11: Ro 1:17; Ga 2:16 \* 3:12: Ro 10:5 \* 3:13: Ro 8:3; 2 Ko 5:21; Ga 4:5 \* 3:16: Lur 13:15; Gu 7:5 \* 3:17: Pas 12:40 \* 3:18: Ro 4:14; 11:6 \* 3:19: Ro 5:20; Gu 7:38 \* 3:21: Ro 8:2-4

Kopmen tinotno. Amo dola neni gita raba bok Taulis Linga rim taba lorooro, i lok ngan do limixin axap ding tonga res at Laulis Linga, nedi dinaban manton tino basinge loklok kakapmek. Ketla kopmen na ruturun.

<sup>22</sup> \*Ketla Lovoang Kaala i vaase i xeretna do, limixin axap at na lavatbung menemen, dik lok maxopok at lolos at laxakapmek. Kuren la na laramtaba ne Moroa ga xaape min ti limixin, it pot mumu mun lununu saparap ne Iesu Karisito, la ne Moroa im taba i rinedi di nunu.

<sup>23</sup> \*Ketla, avot ti langas at lununu ga vot, Laulis Linga gak soxoba pe nedik ngan luvuttadi dik lok at loxokoxo se rinotno at laaleng lununu saparap ne Karisito ga ravasu.

<sup>24</sup> \*Kuren la Laulis Linga gak lok tatao luruptuvuk atnedik la ga gagas li dik ti mo laaleng ne Karisito ga vot teren. Neni ga vot kusu tana sepmus basinge loklok kakapmek keneng at lununu atnedik.

<sup>25</sup> Kuren la amonga, lununu ik lok atnedik, la Laulis Linga ixo lok tatao bok ba nedik.

#### *Nemi Luvutnitna At Ne Moroa*

<sup>26</sup> \*Nemi axap luvutnitna ne Moroa mumu mene lununu atnemi saparap ne Iesu Karisito.

<sup>27</sup> \*Nemi miga sep susu keneng at laasen at ne Karisito, la amonga Moroa ga lok nimi xusu mina vee ngan ne Karisito.

<sup>28</sup> \*Kuren la limixin me Judaia eburu minedi xopmen di me Judaia, di epovo axap mun, kuren bok pam at luvuttadi asaxaruki la luvuttadi dik lok gamasa, la nedi bok lavatlok la lavakin. Nemi axap mi lok ngan mun legesara keneng at lurutu eburu mi ne Iesu Karisito.

<sup>29</sup> \*Do nemi at ne Karisito, mi lok ngan pam do nemi livipisik li at ne Abaram, la minaba ruuna xaka mo

loklox anarong ne Moroa ga xaape min ti ne Abaram.

## 4

<sup>1</sup> La ti lox epasum levelinga rak, keretna. No lamdak naba ruuna xaka lempanga apnovos at ne temen, neni i lok ngan laradi saksaxaruki at levenmaares neni i aau la i mumu asu levelinga at ne temen. Ketla melemu neni naba silok la naba ruuna ka levempanga axap at ne temen.

<sup>2</sup> La neni nabak lok levempanga, luvuttadi loklok tatao ren na tong i rin kusu neni nak lox i, naba se rinotno at loxonaleng ne temen ga vit li i, xusu na lox asilox i.

<sup>3</sup> \*I lok ngan pam gano nedik ta goxo xasep nunuan at luruturun la dik taga nemen maxopok at Laulis Linga eburu mi leventaangas teren nade xopok at na lavatbung menemen.

<sup>4</sup> \*Ketla loxonaleng ga vot ne Moroa ga vit li i, neni ga riki ne Nitna rinotno. La neni ga ravasu ngan lamdak at latkin at na lavatkangka, la neni gak lok maxopok at Laulis Linga at leme Judaia,

<sup>5</sup> \*kusu ti un ka amlong nedi digak lok maxopok at Laulis Linga, la kusu nedik ataba ravasu ngan luvutnitna ne Moroa.

<sup>6</sup> \*Nedik luvutnitna ne Moroa, kuren la neni ga riki asu Loroonan i nemen keneng at ne Nitna ukeneng ti lorooro atnedik. Neni mo Loroonan ik lok nedik la diram doma su at ne Temen nedik la dira toro rin keretna, "Tamak, Tamak!"

<sup>7</sup> \*Kuren la nemi mixo lok ngan bok ba lavaanat saxaruki, ketla nemi luvutnitna. Kuren la ne Moroa naba raba nemi mi leveloklox anarong neni ga gagas li i xusu ti luvutnitna.

#### *Lodoxoma Rinotno At Ne Pol Mumu Laulis Linga*

\* 3:22: Ro 3:9-19; 11:32 \* 3:23: Ga 4:3 \* 3:24: Ro 10:4 \* 3:26: Jo 1:12 \* 3:27: Ro 6:3; 13:1  
 \* 3:28: Ro 10:12; 1 Ko 12:13 \* 3:29: Ro 4:13 \* 4:3: Ga 3:23; Kl 2:20 \* 4:4: Ep 1:10; Jo 1:14; Ro 1:3  
 \* 4:5: Ga 3:13 \* 4:6: Ro 8:15-16 \* 4:7: Ro 8:17; Ga 3:29 \* 4:8: 1 Ko 8:4-6

8 \*Gano, nemi mi goxoklen ne Moroa, kuren la miga lok ngan lavaanat saxaruki at laxampoovo moroa.

9 Ketla amo manga miraklen ne Moroa, i ruturun aleng do ne Moroa iklen nemi. Ira lok bok ba mo xereva la miramlong mu manga mo leveloklok la leventaangas gamasa at Laulis Linga la mira lok li nemi maxopok teren? Tila la mira vara manga i xusu mina lok ngan lavaanat saxaruki at na laxaloklok?

10 \*La mi mumu asu manga mo leveloklok ti lok katling levenaleng la leven gaaling la levenaleng at laavat la lamaares.

11 Nenia am doma solo mumu nemi. Kereva, leven gugu rak aga lox i xantubu atnemi, neni naba ngan lugugu asen kepe mun?

12 Luvutnetak mi luvurinuk, a sing tinotno nemi xusu mina ke xepe mo leveloklok la leventaangas at Laulis Linga kerekngan nenia aga ke xepe i. La kerepmo nia axok lok maxopok teren kerekngan nemi bok mi goxok lok maxopok teren. Ap mo levenaleng nenia aga nemen eburu minimi, nemi mi goxo lok tepanga xapmek tia.

13 \*Miklen bok ua lavasuun teren la nenia aga vavang avot mi Lagale Lavavang tinemi. Lavasuun teren atla nenia aga lok mekmeres.

14 Keke i do mo lanmeres tarak megano ga lox angtang nemi. Ketla nemi mi goxo sok tixirixes ia la mi goxo raba rulu ia. Ketla miga seega rangarang kaka ia ngan nemi giba lox i ri laangelo boro vana at laxalibet kopla ne Iesu Karisito axa.

15 Lomomo ga umsu atnemi, ketla ananga, ira on ta ua? Do nemi gita epovo xuren, la nemi ro mi gita lik gogo su vam mi levengkatli atnemi la mi gita raba ia min.

16 \*Kereva, nemi mi munepen minia, atla aga paase nemi mi luru-turun?

17 Limixin petpes mo di tong asu

lavavang petpes di doma solo nimi la di lok tong i xusu dina sat kaka nimi. Ketla na loklok atdi i lok kapmek tinotno, atla di vara mun i xusu dinak lox epeseves nemi basinge ia, kusu nemi minaba etangas eburu minedi.

18 I lox avukat do limixin dina doma solo mumu tentaba vetpes, mo do loklok nedi dik lox i, i lox avukat. La i lox avukat do mina doma mumu solo amisik tentaba vetpes la kopmen do ap mo mun levenaleng nenia ak lok eburu minemi.

19 Luvutnuruk orong! Nenia a suma losongsongot mumu nemi ngan latkin ing songot at laaleng pipisik teren, la anaba suma na losongsongot se at laaleng lorooro at ne Karisito naba suxuna axap nemi.

20 Aram doma matai do nenia mo a dirak lok eburu bok minemi, kusu agiba xasep at loklok atnemi la agiba lok kun lavapaase rak la agira paase atnaasan tinimi. A lok bukbulu mu aleng nemi.

### *Lampoovo At Ne Agar Mi Ne Sera*

21 A vara i xusu ana sue be nemi lentaba do ua lavasuun teren la mi vara i do minak lok maxopok at Laulis Linga? Kereva, ming tonga xaka bok lempanga Laulis Linga i paase i?

22 \*I paase xeretna do, ne Abaram, ga ruuna legepu madak, ga lara lamdak at latkin asaxaruki ren, la lara at latkin tinotno ren.

23 \*La lamdak neni ga ruuna xaka i at latkin asaxaruki ren, ga ravasu at loklox araut madak. Ketla lamdak ua neni ga ruuna xaka i at latkin tinotno ren, diga visix i mumu laxakaape at ne Moroa.

24 \*Mo lempanga ga vot kantubu ap mo legeputkin, neni lampoovo at legepu ekabus. I ngan lara at ne Agar, i ru katling limixin ua diga visik abeles di at loxokoxo, eburu mi lekabus mumu Laulis Linga ua diga lok ka i ro at lakaana Sinai.

\* 4:10: Ro 14:5; Kl 2:16 \* 4:13: 1 Ko 2:3 \* 4:16: Amo 5:10 \* 4:22: Lur 16:15; 21:2 \* 4:23: Ro 9:7-9 \* 4:24: Ro 8:15; Ga 5:1



<sup>25</sup> La ne Agar, neni i ru katling bok lakaana Sinai, keneng at lenep taba Arabia. Neni lampoovo ri lemene-men silok Jerusalem ik lok keneng at loxokoxo eburu mi limixin axap me Judaia.

<sup>26</sup> \*Ketla Jerusalem ua ik lok to vana at laxalibet, neni xopmen nak lok at loxokoxo, la neni, nenen dik.

<sup>27</sup> I ngan Lovoang Kaala i vaase xeretna,

“Nenu latkin uxu ruuna laxamdak, una momo. La nenu latkin ua u xovisi una suma losong-songot ngan lavakin dim suma i at loxonaleng di pisik laxamdak, unap kup la una momo mi lososoro. La latkin latlok teren ga on basinge i, neni naba ruuna taxannitna solo polo mo lara ua latlok teren kopmen na vonon basinge i.”

*Ais 54:1*

<sup>28</sup> \*Luvutnetak mi luvurinuk. Nemi luvutnitna ne Moroa, mumu lusuusu at laxakaape ren, ngan laxakaape ren ti ne Abaram mi lamdak ne Aisak.

<sup>29</sup> Ap mo levenaleng mo lamdak ua diga visix i at langas tik lox araut madak, neni ga lox asongot mo lamdak diga visix i mumu Loroonan at ne Moroa. La at na levenaleng, ik lok bok kuren.

<sup>30</sup> \*Ketla Lovoang Kaala i vaase lavanga salai? I vaase xeretna,

“Una riki aonon latkin asaxaruki eburu mi ne nitna, mila nitna noxo ruuna xaka toxot at levempanga at ne temen, kerekngan lamdak at latkin tinotno ram.”

*Lur 21:10*

<sup>31</sup> \*Kuren la luvutnetak mi luvur-inuk, nedik kopmen luvutnitna mo latkin asaxaruki, ketla nedik luvutnitna at latkin sepsepmus at ne Abaram.

## 5

### *Lesepsepmus Atnedik Keneng At Ne Karisito*

\* **4:26:** Ib 12:22; Li 3:12; 21:2,10    \* **4:28:** Ro 9:7; Ga 3:29    \* **4:30:** Jo 8:35    \* **4:31:** Ga 3:29    \* **5:1:** Jo 8:32,36; Ga 2:4; 5:13; Gu 15:10    \* **5:6:** 1 Ko 7:19; Ga 6:15    \* **5:7:** Ga 1:6    \* **5:9:** 1 Ko 5:6

<sup>1</sup> \*Nedik di sepmus tinotno, mila ne Karisito gara lox asepmus pam nedik basinge leveloklok la leven-taangas at Laulis Linga. Kuren la mina tu tuxuruxun at lununu at-nimi, la mi guta ke bok ba lorooro atnemi la nak lok ngan manga lavaanat saxaruki at Laulis Linga.

<sup>2</sup> Mina ronga avukar i na. Nenia ne Pol a tong tinotno i rinemi do, amo do mina doma i do mina vit kepe lengkontuxu atnemi, naba milik ngan keretna do, lugugu at ne Karisito ixo epovo na lok tooro nemi.

<sup>3</sup> Nia ana vaase aronga amu bok nemi xeretna. Do taradi na siam min kusu dina vit kepe toxontuxu ren, i epovo rinotno do mo laradi na mumu asu axap Laulis Linga.

<sup>4</sup> La nemi mi lolos tinotno xusu mina sepmus basinge laxakapmek atla mi mumu asu Laulis Linga. Nemi mi lok ngan ta do, mi ra korop pes axa nemi basinge ne Karisito. La nemi mik lok ta maxamang at letaba nabalamu at ne Moroa.

<sup>5</sup> Ketla nema na ma ruuna lugugu at lolos at Loroonan keneng at lununu atnema ma ngangais mi lomomo ri mo laaleng lorooro atnema naban mantan tino.

<sup>6</sup> \*Do nema mak lok eburu mi ne Iesu Karisito, mo loklok ti rivit kepe lengkontuxu kopmen lavanga silok. Ixo lok petpes tinotno xantubu at taradi diga vit kepe toxontuxu ren la tara di goxo vit kepe toxontuxu ren. Ketla legesa vanga mene nga i silok aleng, neni lununu la labalamu i ravasu ren.

<sup>7</sup> \*Gano nemi miga mumu asu avukat tinotno levelinga at ne Moroa. Ketla lavanga sala gara sep pepe bok ba nemi xeneng at lorongtonga res at luruturun? Nege gara sat amlong bok ba lodoxoma atnemi?

<sup>8</sup> Ixo epovo rinotno xusu ne Moroa na lox i na rinemi, neni xa ga ro xaka nemi ri langas sepmus.

9 \*La lere avolo i lok keretna, “Tegesa radi mene atnemi naba lok nemi la mina ekip kaxat ti langas petpes.”

10 \*Keneng at Leeme Silok nia a nunu rinotno do nemi mi noxo mu bok ba langas petpes. Neni no nege ga lok ekarakat lodoxoma atnemi, ne Moroa naba lok li lumumuat teren.

11 \*Luvutnetak mi luvurinuk. Lentaba di tong i do nenia move a vavang do loklok ti rivit kepe levengkontuxu i lox avukat. Do kuren, tila ba la leme Judaia move di lox asongor ia? Dola amo langas ti rivit kepe lengkontuxu i ruturun, naba milik ngan ta do levempavang tarak mumu laxaba at ne Karisito, noxo vaxaru kaxat tepenekarakat.

12 Nia a lok do mo limixin dik lox ekarakat lodoxoma atnemi, di noxo repes basinge mo loklok. I lox avukat do dina mumu asu mo loklok la dina vit kepe axap ta i.

### *Lorooro Keneng At Loroonan Kaala*

13 \*Luvutnetak mi luvurinuk. Lorotoro gak lok tinemi xusu minaba sepmus basinge leveloklok la leventaangas at Laulis Linga. Ketla nemen gat mi guta ke na loklok at lesepepmus basinge Laulis Linga na lok ngan mun lavanga ri sisiam avolo nemi xusu lorooro at labantuxu atnemi na sasat nemi. Ketla mina ke labalamu ri lok tooro nemi xusu minaba elok tooro ela.

14 \*Mila lengkot axap at Laulis Linga ik lok mene nga at legesa ngas linga xeretna, “Una balamu limixin ngan pam do u balamu axa u.”

15 Ketla do minap tuvuk ngan lempanga mi lavanuet kangkedek atdi la minak lox asongot ela axa nemi, mina memek avukat, atla lavanga mina eso rele.

### *Loroonan Eburu Mi Lorooro At Labantuxu*

16 \*Na levelinga nenia a vaase i, i lok keretna. Mina lok ka loklok at Loroonan Kaala la mi noxo vavara solo levendoxoma at labantuxu atnemi.

17 \*Atla levempanga labantuxu atnedik i vavara i, neni i lok petpes ti levempanga Loroonan i vavara i. La levempanga Loroonan i vavara i, i lok petpes ti levempanga labantuxu atnedik i vavara i. Nedu na dixo vepen, la Loroonan Kaala i lok nemi xusu mi noxo lok lempanga, labantuxu atnemi i vavara i.

18 \*La amo do Loroonan im lam nemi, nemi mixok lok bok ba at loxokoxo at Laulis Linga.

19 \*La levendoxoma xapmek i ravasu at labantuxu, i xasep tinotno at lemeren limixin. La i lox asuusu rinotno loklok kakapmek maxamang at lixitkis epot, la lengkot mamangan la leveloklok kerepmo it pospa aleng.

20 La i lox asuusu bok loklok ti lotu saparap laxampoovo vanga la ik lok lengkot at lemenemen (magic). La limixin ua di munepen la dira vesepe, la levereven peves eburu mi lebele-mamao la laradi itlasi polo limixin axap. La levenekarakat la loklok ti vepeseves ti lara nep binam axap.

21 La loklok ti ngaongao ri levempanga at leventaba vetpes, la di vavara inin kadan lolos amisik la di lok levenanan ua i umsu mi levenasen kapmek, la mo bok lekampanga vetpes bok keretnom. Amonga a vaase aronga nemi ngan aga vaase aronga vam nimi gano do nedi dik lok na levempanga, di noxo ravasu ngan lavaanat at Linintoo at ne Moroa.

22 \*Ketla mo lara i ruuna Loroonan Kaala at lorooro ren i pisik asu labalamu, lomomo, lenmila, loklox atnaasan, loklox anare, luvukat, loklok tuturun,

23 \*loklok mulus, la lodoxoma avukat ti sasar i. Kopmen bok ba

\* 5:10: Ga 1:7; 2 Ko 11:15 \* 5:11: 1 Ko 1:23 \* 5:13: 1 Pi 2:16 \* 5:14: Mas 19:18; Mt 5:43; Ro 13:9 \* 5:16: Ro 8:4; Ga 5:25 \* 5:17: Ro 7:15-23; 1 Pi 2:11 \* 5:18: Ro 6:14; 8:14 \* 5:19: 1 Ko 6:9-10 \* 5:22: Ep 5:9 \* 5:23: 1 Ti 1:9 \* 5:24: Ro 6:6; Kl 3:5; 1 Pi 2:11

tevelinga go i ru pepe nedi na levempanga.

<sup>24</sup> \*La nedi limixin at ne Iesu Karisito, digara ke xepe vam lorooro maut la levendoxoma xapmek eburu mi lavavara at labantuxu atnedi.

<sup>25</sup> \*Loroonan Kaala gara raba vam nedik mi lorooro. Kuren la ata ke i namgo nga lorooro atnedik.

<sup>26</sup> \*Nemen gat nedik guta simi aurut nedik kopla ata velox abelema-mao ela minedik kopla ata reven peves mumu lempanga vetpes at lentaba atnedik.

## 6

### *Ata Ekip Tooro Ela Mi Levenmuat Atnedik*

<sup>1</sup> \*Luvutnetak mi luvurinuk. Amo dola limixin nunu dina long terek tara xantubu atdi do neni i lok tavanga i lok kapmek, nemi limixin tongtonga res at Loroonan Kaala, mina lox akmokso mo laradi. Ketla mina lox i mi lumulus. La mina lok tatao avukat lorooro atnemi axa, kusu mo laxakapmek teren noxo lok tong pen nemi.

<sup>2</sup> \*Mina ekip tooro ela mi levenmuat atnemi. Do mina lox i xuren, i lok ngan pam do ming tonga res at levelinga at ne Karisito.

<sup>3</sup> Do tara na doma i do neni mo laasen teren i volo rinotno ketla neni laradi gamasa mene, neni mo laradi i xarang axa i.

<sup>4</sup> \*Nemi getgesara mina viila avukat luruptuvuk atnemi. Dola luruptuvuk at tara atnemi na lox avukat, i epovo ba do neni na momo at levempanga neni ga lox i. Ketla ixok mokso do neni na mii poovo i mi luruptuvuk at leventaba vetpes.

<sup>5</sup> \*La nedik axap ata lok tatao avukat luruptuvuk atnedik getgesara.

<sup>6</sup> \*Do lara i lok kaka levenanasa ti mumu asu ne Karisito, i epovo do

neni na raba mo leeme loklox ase mi levempanga avukat ti lok tooro i.

<sup>7</sup> \*Nemen gat mi guta ke tara na xarang arup nimi xusu mina lok laxakapmek. Ixo epovo do tara na xarang arup ne Moroa, atla lavanga sala laradi itlo li i, neni axa naba lok kaka levempipisik teren. <sup>8</sup> Do neni natlo li lavavara mun at labantuxu ren, neni naba dik kaka levempeven teren, neni lanmet. La do neni natlo li levempanga at Loroonan, neni naba dik kaka lorooro avolo.

<sup>9</sup> \*Nemen gat nedik guta molo basinge leven gugu i lox avukat. Do nedik ata xo molo basinge i, mo laaleng tinotno naba vot la nedik ataba dik kaka levempeven teren.

<sup>10</sup> Kuren la amonga nedik move di ruuna levenaleng, i lox avukat do atanak lok loklok i lox avukat ti limixin axap, i ngan tinedi rinotno bok dik lok eburu minedik keneng at lununu atnedik.

### *Levempapaase Aronga Avit*

<sup>11</sup> Mina ven i do nenia a malagan lempatkolinga silok tinotno la nenia xa a malagan i mi lakngak.\*

<sup>12</sup> \*Nedi limixin dik lok tong pen i xusu dinak sok aruru parang nemi do ri rivit kepe lengkontuxu atnemi. Nedi luvuttadi dim simi aurut nedi mumu lavatpas atdi keneng at Laulis Linga. La dik lok mene nga i xusu di naba sepsu basinge losongsongot mumu laxaba at ne Karisito.

<sup>13</sup> La nedi bok no dik lox arala xaka di mi livirivit kepe lengkontuxu atdi, nedi dixong tonga res at Laulis Linga. Di vara i do dina rivit kepe lengkontuxu atnemi xusu dina lox aurut levenasen atdi mila mi rongga res atdi la mi rivit kepe lengkontuxu atnemi.

<sup>14</sup> \*Ketla nenia anaba lolos kusuk mun ti paase aurut laxaba at Leeme Silok atdik ne Iesu Karisito. Mumu mun mo laxaba ren, levendoxoma momo rak ti loklok at na lavatbung

\* 5:25: Ro 8:4 \* 5:26: Pl 2:3 \* 6:1: Mt 18:15; Je 5:19 \* 6:2: Ro 15:1 \* 6:4: 1 Ko 11:28

\* 6:5: Ro 14:12 \* 6:6: 1 Ko 9:11,14 \* 6:7: Jo 3:6; 6:63; Ro 8:13 \* 6:9: 1 Ts 3:13 \* 6:11: Lara

vetpes ga malagan i na levelinga keneng at na lovoang ne Pol ga vaase min. \* 6:12: Ga 5:11; Pl 3:18

\* 6:14: 1 Ko 1:31; 2:2

menemen ga met axa gano, la lev-empanga bok gak lox angtang ia at na lavatbung menemen ga met axa gano.

<sup>15</sup> \*Ixo lok petpes tinotno xantubu at taradi diga vit kepe toxontuxu ren, la tara di goxo vit kepe toxontuxu ren. Mo loklok kopmen lavanga silok. Ketla lavanga mene nga i silok keretna, laradi i ba gili lorooro ren kusu na lok ka lorooro maxat.

<sup>16</sup> Lenmila eburu mi lebelen tuntun nabak lok eburu minedi di mumu asu na levelinga xeneng at lorooro atnedi, la nedi axap bok limixin tuturun at ne Moroa.

<sup>17</sup> \*Ti lox axap na levelinga rak keretna, a xopara i xusu teta me go na raba ia mi tekarakat, atla labantuxu rak ira umsu yam mi laxanbuluo at laxanandas i lox asuusu i do nenia laradi saksaxaruki at ne Iesu.

<sup>18</sup> Luvutnetak mi luvurinuk. Letaba nabalamu at Leeme Silok atnedik ne Iesu Karisito nabak lok eburu axap minemi.

---

\* **6:15:** Ga 5:6; 2 Ko 5:17      \* **6:17:** 2 Ko 4:10

**Epesas**  
**Lovoang At Ne Pol**  
**Ti Limixin Nunu To**  
**Epesas**  
**Levelinga Loklox**  
**Axasep**  
**Lamaares 62 A.D.**

Pol gak lok at loogu xokoxo to Rom. Neni ga malagan i na lovoang tinedi limixin to Epesas, kusu nedi diba utus avot be i la melemu nedi limixin nunu mo diga nemen to at lentaba levenmenemen silok dinaba exes box i. Epesas neni lemene-men doxodok to at lenep Asia. Mo limixin diga nemen go diga vavara aleng lapnovos silok la diga raba aleng lorooro atdi ti lotu parap lomoroa xaxarang laasen teren ne Diana (Atemis). Buaang atnedi na limixin nunu boro Epesas kopmen di me Judaia, ketla kusuk mun goxo buaang nedi lentaba me Judaia mo diga nemen eburu minedi. Pol ga anasa nedi do keneng mun at ne Iesu, limixin me Judaia la nedi kopmen di me Judaia di ru buru nunuan. At na levenaleng limixin axap dina ru buru nunuan eburu mi ne Karisito la dina lok ngan mun legesa binam tadi.

**Lengkot silok keneng at na lovoang**

1:1-2 Lurutu kaxat at levelinga.

1:3-3:21 Lorotoro ri limixin la lununu atdi saporap ne Iesu.

4:1-6:9 Loklok at lorooro maxat.

6:10-20 Atana esep at lenep at Leeme Silok.

6:21-24 Pol ga lox axap levelinga ren.

*Lavapaase Axasep*

<sup>1</sup> \*Nenia ne Pol, lun pavang at ne Iesu Karisito. Moroa ga soxolik ka ia ri na lugugu.

Nia a malagan na levelinga rinemi limixin nunu boro Epesas, mi nunu ruturun keneng at ne Iesu Karisito.

<sup>2</sup> \*Letaba nabalamu mi lenmila rinemi boro at ne Temen dik la Leeme Silok ne Iesu Karisito.

*Leveloklox Anarong At Loroonan Kaala Ri Limixin Nunu*

<sup>3</sup> \*Nedik ata emi asu mi ne Moroa, Temen ne Iesu Karisito, Leeme Silok atdik. Neni gara lox anarong pam nedik mi leveloklox anarong axap boro vana at laxalibet tinedik limixin at ne Karisito.

<sup>4</sup> \*Ni ga soxolik ka nedik mumu ne Karisito, avot ti luruntudum li at lavatbung menemen, kusu dik tana dadat basinge laxakapmek la tanan mantan tino at lemeren. Neni i umsu mi labalamu la kerepmo,

<sup>5</sup> \*ga paase ali do ne Iesu Karisito naba lok tomtom buru ka nedik axap ngan luvutnitna, i ngan lomomo la lodoxoma ren kuren.

<sup>6</sup> \*Kuren la nedik axap ata emi asu mi ne Moroa ri letaba nabalamu ren i nunuan aleng. Ni ga raba gamasa dik min, maxeneng at lugugu at ne Nitna, mo ne Moroa i balamu i.

<sup>7</sup> \*Ni ga met la lada ren ga sen su kusu ti un ka amlong dik, la kusu ne Moroa naba doxoma xepe leveloklok kakapmek atdik. Kerepmo ne Moroa ga lox asuusu letaba nabalamu ren i silok aleng,

<sup>8</sup> mo ni ga lox aumsu dik min eburu mi lodoxoma avukat la lakleklen teren.

<sup>9</sup> \*La at lavavara ren ni ga tong axasep dik mi lodomdoma ali ren, mo ga nemen ali pe la ni ga doma ali i do ne Karisito ni lavasuun teren.

<sup>10</sup> \*La at laaleng mokmokso ne Moroa naba lox epovo nom lodomdoma ali la naba sat tomtom buru ka lempanga axap, mo ik lok to vana at laxalibet la ik lok bok nade xopok at lavatbung menemen, kusu ne Karisito naba nemen ngan Lamgomgo atdi.

\* **1:1:** Ro 1:1,7; 1 Ko 1:1; Kl 1:1; Gu 18:19-21; 19:1 Jo 15:16; 17:24; 2 Ts 2:13; Ep 5:27; Kl 1:22  
 \* **1:5:** Jo 1:12  
 \* **1:9:** Ro 16:25  
 \* **1:10:** Ga 4:4; Kl 1:16,20

\* **1:2:** 2 Ko 1:2; Kl 1:2  
 \* **1:3:** Ep 2:6  
 \* **1:4:** Jo 1:12  
 \* **1:6:** Mt 3:17; Kl 1:13  
 \* **1:7:** Ep 2:7;

11 \*Maxeneng at ne Karisito, Moroa ga soxolik ka dik do ateren. Ganoxa ni ga tong li i xuren, la na i epovo mi lodomdoma ali at ne Moroa, mo ik lok lempanga i ngan lodoxoma la lavavara ren.

12 Ni ga lox i xuren kusu nema avot leme Judaia maga nunu at ne Karisito, manaba emi asu mi ne Moroa la mana lox aurut laasen teren.

13 \*La nemi bok miga ravasu ngan limixin at ne Karisito at loxonaleng miga ronga xisip levelinga ruturun teren. Ni Lagale Lavavang i vaase axasep loklox arooro ri limixin. Ap mo loxonaleng miga ruka lununu saparap ne Karisito, Moroa ga lok li nemi ngan limixin teren la ga raba nemi mi loklok katling teren. Ni Loroonan Kaala, mo ne Moroa ga paase ali min ti limixin teren.

14 \*Na Loroonan Kaala i lok ngan lampinebeng ti loklox arooro atdik kusu nedik tanaba lok ka mo lev-entamtaba ne Moroa gara vaase ali vam min ti limixin teren. La nabak lok kuren se at laaleng ne Moroa naba lox epovo loklox arooro ridik. Ata emi asu mi ne Moroa i silok aleng.

### *Lisingising At Ne Pol*

15 \*Nia aga ronga levelinga mumu lununu atnemi maxeneng at Leeme Silok, ne Iesu, la labalamu atnemi ri limixin axap at ne Moroa.

16 \*Kuren la, nia xopmen na xap korop ti tong loklox avukat ti ne Moroa mumu nemi. La at levesingising tarak a doma mumu nemi,

17 \*la a sing amisik lagale lo Moroa, ne Temen Leeme Silok atdik, Iesu Karisito, ti song araba nemi mi Loroonan teren, mo naba suxa nemi mi lodoxoma nunuan la laxasep kusu nemi minakleken avukat ne Moroa.

18 \*Nia a sing bok ne Moroa do lodoxoma atnemi na rem suang

kusu mina xasep ap mo leveloklox anarong, neni ga ro ka nemi ri lok ka i. Mo leveloklox anarong i ngan lapnovos silok i lox avukat aleng la i nemen tangais limixin axa ren.

19 \*La minaba xasep ap mo lolos teren i silok aleng, mo i lok tooro nedik limixin nunu. Mo lolos i ravasu at lolos silok at ne Moroa,

20 \*mo ni ga lox asu i ap mo laaleng neni ga lox axatu ne Karisito basinge lanmet la ga vaxaxis i saparap lekngen tino ro vana at laxalibet.

21 Neni ga lok li ne Karisito tim gomgonga leventoonan eburu mi lubungangelo la luvuttadi amgomgo atdi la limixin lolos kerepmo. Laasen teren i silok ti levenasen atdi, la ik lok kuren at na levenaleng la nabak lok bok kuren ap mo levenaleng mo naba vot.

22 \*Moroa ga lok li lempanga axap maxopok at luxangkedek at ne Karisito la ga lok li i ngan Lamgomgo at lempanga axap at lotu.

23 \*Limixin at lotu nedi di lok ngan labantuxu at ne Karisito, mo i nemen ampana atnedi axap la i nemen ampana bok at lengkot axap at na lavatbung menemen.

## 2

### *Lorooro Maxat Maxeneng At Ne Karisito*

1 \*Ganoxa nemi miga lok ngan laxampanga met mene, mumu laxakapmek,

2 \*mo ga umsu at lorooro atnemi ap mo levenaleng miga mumu asu leveloklok at na lavatangka la levelinga at ne Satan. Ni laradi gomgo la lixitkis orong teren ik lok to vana at lamavangkap. La na loroonan kapmek i gugu keneng at limixin tongtonga xepe.

3 \*Nedik axap taga nemen kuren. Taga lok lempanga kusu ti lox

\* 1:11: Ro 8:28-29 \* 1:13: Kl 1:4-6; Ep 4:30 \* 1:14: 2 Ko 1:22 \* 1:15: Kl 1:4 \* 1:16: Kl 1:3;  
1 Ts 1:2 \* 1:17: Kl 1:9 \* 1:18: Ep 4:4; Kl 1:12 \* 1:19: Kl 1:11 \* 1:20: Mt 28:18; 2 Ko 13:4; Kl  
2:12; Ib 1:3 \* 1:22: Sam 8:6; Mt 28:18 \* 1:23: Ep 4:10,15; Ro 12:5; Kl 1:18 \* 2:1: Kl 1:21; 2:13  
\* 2:2: Kl 3:7; Ta 3:3; Jo 12:31; Ep 5:6; 6:12 \* 2:3: Kl 3:6

amomo mun lodoxoma la labantuxu atdik, mo ga umsu mi lavavara kapmek at lorooro maut. La nedik taga nemen maxopok at lebelemamao at ne Moroa kerekngan nedik.

<sup>4</sup> \*Ketla ne Moroa i umsu mi lebelen tuntun, ga lox asu langsung labalamu ren tidik,

<sup>5</sup> la ga lox arooro nedik mumu laxakatu kaxat amlong at ne Karisito, keke i do nedik taga lok ngan laxampanga met la taga umsu mi laxakapmek. Neni ga lox arooro nedik keneng mun at letaba nabalamu ren.

<sup>6</sup> \*I lok ngan ta do ne Moroa ga lox axatu amlong dik eburu mi ne Karisito la ga lox axis dik eburu min to vana at laxalibet. Na i ravasu boro at lugugu at ne Iesu Karisito.

<sup>7</sup> \*Neni ga lox i na xusu at levelaleng i tu melamgo, neni naba lox asuusu i do letaba nabalamu ren i nunuan axap. Mo letaba nabalamu ga ravasu at labalamu ren tidik maxeneng at lugugu at ne Iesu Karisito.

<sup>8</sup> \*Moroa ga lox arooro nedik maxeneng at letaba nabalamu ren, mo letaba nabalamu ik lok tinedi di nunu at ne Iesu Karisito. Limixin kopmen dina epovo kusu dina lox arooro nedik xa. Ketla mo letaba nabalamu, ni laramtaba boro at ne Moroa.

<sup>9</sup> \*Kopmen tara i epovo na lok kaka loklox arooro mumu leven gugu nunuan teren, mila mo do xuren, limixin diba simi aurut di.

<sup>10</sup> \*Nedik ta lok ngan loogu ne Moroa ga vaxaru i, mila neni ga rudum li nedik at lekngen ne Iesu Karisito, kusu nedik tanaba lok leven gugu nunuan, mo ne Moroa ga gagas li avot pam i xusu dik tanaba lox i.

### *Nedik Ta Lok Ngan Legesara Eburu Mi Ne Iesu*

<sup>11</sup> \*Nemi limixin kopmen me Judaia. Leme Judaia di so asen nemi do,

“Limixin kopmen toloklok katling.” Nedi di vit kepe lengkontuxu atdi i ngan loklok katling at ne Moroa.

<sup>12</sup> \*Nemen mita domampe i do miga lok kereva ganoxa. Ap mo levelaleng nemi goxoklen ne Karisito. Nemi miga lok ngan limixin kadiiong ti leme Judaia la goxopmen tenep atnemi keneng at levenekabus no ne Moroa ga lox i eburu mi limixin me Judaia. La goxopmen todoxoma voovo rinotno atnemi, la at na lavatbung menemen mi goxoklen ne Moroa.

<sup>13</sup> \*Miga nemen paxalom basinge i, ketla nanga, keneng at lada at ne Iesu Karisito, Moroa ga lox axis bus nemi eburu min.

<sup>14</sup> \*Iesu, neni lavasuun at lumulum atdik la ga lox axis eburu leme Judaia la limixin kopmen di me Judaia. Ni ga das asi laxapla no gak lox epe-seves di la neni ga lok kepe lekarakat kantubu atdi.\*

<sup>15</sup> \*At lanmet teren neni ga sep koprop kepe loklok ti mumu asu Laulis Linga at leme Judaia eburu mi levelinga lolos la leventaangas teren. Ni ga vara i do na lok kaka nom luabung mixin la na lok legesabung mixin tin, la na langas mun naba lok kaxat lumulum.

<sup>16</sup> \*At lanmet teren ni ga lok lumulum kantubu atdi. La at nom laxaba ni ga lox etang nom legepu bung mixin ngan legesa bantuxu la ga lam ka di kusu dina xis etaba belen.

<sup>17</sup> \*Karisito ga rupot la ga vavang mi Lagale Lavavang mumu lumulum tinemi limixin kopmen me Judaia miga nemen paxalom basinge ne Moroa la tinedi leme Judaia diga nemen saparav i.

<sup>18</sup> \*Maxeneng at ne Iesu nema leme Judaia eburu minemi limixin kopmen me Judaia dik ta epovo na vot pasa ne Temen dik mi legesa

\* 2:4: Lu 15:24,32; Ro 6:13; Ep 2:1; Gu 15:11 \* 2:6: Kl 2:12 \* 2:7: Ep 1:7 \* 2:8: Jo 4:10; Ib 6:4  
 \* 2:9: 1 Ko 1:29-31; 2 Ti 1:9 \* 2:10: Ta 2:14 \* 2:11: Ep 5:8 \* 2:12: Kl 1:21; Ro 9:4; 1 Ts 4:13  
 \* 2:13: Kl 1:20 \* 2:14: Ais 9:6; 1 Ko 12:13; Kl 2:14 \* 2:14: Lavasuun at na i do avot ti lovotpot at ne Karisito, limixin me Judaia mi limixin kopmen di me Judaia di goxo etangas eburu. \* 2:15: 2 Ko 5:17; Kl 1:20,22 \* 2:16: Sak 9:10 \* 2:17: Ais 57:19 \* 2:18: Ep 3:12

doxoma la legesa Roonan Kaala.

19 \*Kuren la nemi limixin kopmen me Judaia kopmen mina lok ngan bok ba limixin kadiiong. Nemi lavaanat at Linintoo ren eburu mi limixin teren la i lok ngan ta do mi nemen at loogu at ne Moroa.

20 \*Nom loogu luvuttadi vavang mi lavaeme vapaase ali diga vaxaru i, la keneng ap mo loogu, ne Iesu Karisito ni lubuxumpio ren.

21 \*La mo loogu it kis atmatkun pana ren la neni i lox asilox i la i vee ngan loogu xaala ri Leeme Silok ne Moroa.

22 \*La ne Karisito i lox abeles bok nimi kusu miba lok ngan lengkot ap mo loogu, la Loroonan Kaala at ne Moroa i nemen pam e.

### 3

#### *Pol Ga Ruuna Lugugu Ri Paase Asu Lagale Lavavang*

1 \*Nenia ne Pol, a ruuna mo lugugu ri lox axis saga nemi, limixin kopmen nemi me Judaia eburu mi ne Iesu Karisito, la ni lavasuun bok teren la nenia ak lok de at loogu xokoxo.

2 \*Nia a doxoma i dola nemi miga ronga vam ne Moroa ga raba ia mi lugugu ti paase asu mo levelinga mumu letaba nabalamu ren tinimi.

3 \*Mo levelinga ganoxa ga nemen lipe, ni ne Moroa ga lox asuvos i ria, la nia aga malagan i rinimi at lovoang mutmut gano.

4 La mo dola nemi mina us i, minaba xasep at lodoxoma rak mumu mo levelinga lipe at ne Karisito.

5 At levenaleng axap gano, Moroa xopmen goxo lox asuvos mo levelinga lipe tinedi lavaola. Ketla na mun Loroonan Kaala at ne Moroa ga lox asuvos i rinema luvuttadi vavang eburu mi lavaeme vapaase ali ren

ngan nema lavaanat soxolik at ne Moroa.

6 \*Mo levelinga lipe i lok keretna. At Lagale Lavavang limixin kopmen di me Judaia di epovo na lok kaka leveloklox anarong at ne Moroa kerekngan limixin me Judaia. La nedi legepu bung mixin dinaba lok ngan lengkot at legesa bantuxu mun la nedi eburu dinaba lok kaka mo lempanga ne Moroa ga xaape min tinedi di nunu at ne Iesu Karisito.

7 \*Moroa ga lok li ia ngan lasaxaruki ren ti paase asu Lagale Lavavang. Na lugugu i ngan letaba nabalamu ria, mo ga ravasu at lolos teren, la i lox alolos ia at na lugugu.

8 \*Nenia laradi lixilik tinedi axap limixin at ne Moroa, ketla neni ga lox asu letaba nabalamu ren tia kusu nenia ana vavang mi ne Karisito. Ni i lok ngan lapnovos i silok aleng la kopmen tara i epovo na vuse ka tempanga silok kerekngan neni. La a vavang ti limixin kopmen di me Judaia,

9 \*kusu nedi eburu mi limixin axap dina xasep ap mo levelinga lipe. Ni mo levelinga ne Moroa ga raba ia min kusu ana tong asu i. Nom levelinga Moroa ga lipe i gano la ga nemen kuren at laxanmaares buang, ga ruka i at levenaleng ne Moroa ga rudum li lempanga axap.

10 \*Lavavara ren ga lok keretna, neni na lox asuvos lagale lodoxoma ren la monga limixin lotu dinap kip ka mo lugugu ti lox asuusu mo lodoxoma ren ti lubang angelo la leventoonan to vana at laxalibet.

11 Nom lodoxoma ren i epovo mi lodomdoma ali avolo ren, neni ga lox epovo i mi lugugu at ne Iesu Karisito, Leeme Silok atnedik.

12 \*Maxeneng teren nedik ta epovo na vot pasa ne Moroa, kopmen tavanga i rupe dik la kopmen tainmarat, mo do dik ta nunu at ne Iesu

\* 2:19: Ep 3:6; Ib 12:22-23 \* 2:20: Mt 16:18; 1 Ko 3:11 \* 2:21: Ep 4:15-16; Kl 2:19; 1 Ko 3:16  
 \* 2:22: 1 Pi 2:5 \* 3:1: Ep 4:1; Pl 1:7,13; Pm 1:1,9 \* 3:2: Kl 1:25 \* 3:3: Ep 1:9-10; Kl 1:26  
 \* 3:6: Ep 2:13,16-19 \* 3:7: Kl 1:23,25 \* 3:8: 1 Ko 15:9-10; Ga 1:16; Ep 1:7 \* 3:9: Ro 16:25  
 \* 3:10: Ro 11:33; 1 Pi 1:12 \* 3:12: Jo 14:6; Ro 5:2; Ib 4:16



Karisito.

<sup>13</sup> \*Kuren la nia a sing nimi do mina lolos la nemen mita subu kot kantubu at lununu atnimi mumu levesongsongot nia ap kiv i. Na levesongsongot ga vot mila agak lok tooro nimi, ketla mina lok momo mun teren.

*Lisingising At Ne Pol  
Ti Limixin Me Epesas*

<sup>14</sup> Do nenia a doxoma na lodomoma ali ren, nia a xis tintiding to melamgo at ne Tamak.

<sup>15</sup> Neni ne Temen limixin axap teren, nedi boro vana at laxalibet la nedi bok at na lavatbung menemen. Nedik axap di lok ngan legesi xitkis koetemen.

<sup>16</sup> \*Nenia a sing ne Moroa do maxeneng at langsung lapnovos teren, neni naba lox alolos lorooro axap atnimi mi lolos boro at Loroonan Kaala.

<sup>17</sup> \*La at lununu atnemi, ne Karisito naba nemen to at lebelen nimi. La a sing ne Moroa do mina umsu mi labalamu kusu lununu atnimi na tu atmatkun, kerekngan levenixe at luuna ing tanga alis laxangka la luuna ira tu atmatkun.

<sup>18</sup> \*La kusu mina umsu mi lolos eburu minedi limixin at ne Moroa kusu mina xasep do labalamu at ne Karisito i babaalom, ip teplas, i urut, la i si aleng tino,

<sup>19</sup> \*la mina xasep do nom labalamu ren i silok polo lakleklen at limixin la kerepmo minaba umsu mi leveloklok nunuan axap at ne Moroa xa.

<sup>20</sup> \*Ata emi asu mi ne Moroa, i epovo na lok laxampanga solo, mo i volo axap mo lempanga nedik di ngising tin la di doxoma i, la mo levempanga i ravasu at lolos teren, mo i gugu xeneng at lorooro atdik.

<sup>21</sup> La limixin lotu dinap kip aurut laasen at ne Moroa to at lotu, la keneng at laasen at ne Iesu Karisito, la lavaola move i tu umelamgo dinap

kip aurut laasen teren amisik la kopmen taxavaxap teren. I ruturen.

## 4

*Nedik Limixin Nunu Di Lok Ngan Labantuxu At Ne Iesu*

<sup>1</sup> \*Nenia ak lok at loogu xokoxo mumu lugugu at Leeme Silok. Kuren la nia a sing nimi do lorooro atnimi naba lok nunuan axap, i epovo mi lorotoro at ne Moroa tinimi la i epovo bok mi lavavara ren.

<sup>2</sup> \*Lorooro axap atnimi na umsu mi langsung loklok ngangao la loklox anare. Mina nemen mulus mene la mina lox asuusu labalamu rinedi di lok laxakapmek.

<sup>3</sup> \*La mina lolos kusu mina tu buru mi legesa doxoma at Loroonan Kaala, la lorooro atnimi nat kis atnaasan mi limila.

<sup>4</sup> \*Legesa bantuxu mene nga la legesa Roonan Kaala, kerekngan mun ne Moroa gara ro xaka vam nimi ti legesa doxoma voovo,

<sup>5</sup> \*la leges Eme Silok, legesa nunu la legesa sep susu,

<sup>6</sup> \*legesa Moroa la neni ne Temen nedik axap. Neni Lamgomgo at limixin axap teren, ni ik lok at lengkot axap la i nemen keneng atnedik limixin axap teren.

<sup>7</sup> \*Karisito ga lox epes letaba nabalamu ren tinedik getgesara.

<sup>8</sup> \*I ngan Lovoang Kaala i tong i, "Ap mo laaleng ni gat pas uto vana, ni ga emu ka buaang limixin kokoxo eburu min, la ni ga raba levenasen tamtaba ri limixin teren." *Sam 68:18*

<sup>9</sup> \*Anai, i tong i do neni gat pas uto vana at laxalibet, kuren la avot ti nom neni ga si ukopok ti na lavatbung menemen.

<sup>10</sup> Neni ga si ukopok, la melemu gat pas uto mavana xa at laxalibet kusu laasen teren na epeseves ti lengkot axap.

\* **3:13:** Kl 1:24    \* **3:16:** Kl 1:11    \* **3:17:** Jo 14:23; Kl 1:23; 2:7    \* **3:18:** Kl 2:2    \* **3:19:** Kl 2:10  
 \* **3:20:** Kl 1:29    \* **4:1:** Ep 3:1; Kl 1:10    \* **4:2:** Kl 3:12-13    \* **4:3:** Kl 3:14-15    \* **4:4:** Ro 12:5;  
 Ep 2:16,18    \* **4:5:** Jo 10:16    \* **4:6:** 1 Ko 12:6    \* **4:7:** Ro 12:3,6    \* **4:8:** Kl 2:15    \* **4:9:** Jo 3:13  
 \* **4:11:** 1 Ko 12:28

11 \*Neni vam ga raba leven-tamtaba ri limixin teren. Ni ga soxolik ka lentaba ri gugu ngan luvuttadi vavang la lentaba ri gugu ngan luvuttadi vapaase ali. Lentaba diga lok ka lugugu ngan luvuttadi vapaase asu levelinga at ne Moroa, la lentaba ri gugu ngan luvuttadi loklok tatao lotu la lentaba ti lox ase limixin mi levelinga at ne Moroa.

12 \*Karisito ga raba leventamtaba kerepmo ri lox agagas limixin teren ti lok lugugu ren kusu dinaba epovo na elok tooro ela la dina lox alolos labantuxu at ne Karisito.

13 \*La na loklok naba gugu xeneng atnedik axap se tanaba lok ngan legesara rinotno at lununu saparap ne Nitna ne Moroa la tanaba ruuna ka nom lakleklen mumu ne Nitna ne Moroa. Kerepmo la nedik tanaba vee ngan limixin mukun ap mo lununu la lorooro atdik naba nunuan axap kerekngan ne Karisito.

14 \*Do lorooro atdik nak lok kuren, lununu atdik noxo lok ngan lununu at laxamdak lixilik, it los ekat ngan laras i repit la iap sep tang at lisim la ira onon taba ugo la ude to at lamaxat. Kerepmo lavaeme loklox ase xaxarang di lok tong i xusu dina sar asoogong lununu atdik basinge ne Karisito mi leveloklox ase xaxarang la levelinga babala arup.

15 \*Ketla nedik ta paase asu levelinga rurunun at ne Moroa, la lorooro atdik na umsu mi labalamu. La at lorooro axap atdik, tanaba ravasu lolos la tana sep sogo ri Lamgomgo atdik ne Karisito.

16 Nedik axap tak lok ngan labantuxu ren la maxeneng teren dik tat kis buru. La lengkot axap at labantuxu ren na elok tooro ela, la kerepmo labantuxu ren naba suu lolos la naba lox aru axa i mi labalamu, mo do lengkot axap na gugu nunuan.

### *Lorooro Maxat Maxeneng At Ne*

\* 4:12: 2 Ti 3:17 \* 4:13: Kl 1:28 \* 4:14: 1 Ko 14:20 \* 4:15: Ep 1:22; 5:23; Kl 1:18 \* 4:17: 1 Pi 1:14; Ro 1:21 \* 4:18: Ep 2:12 \* 4:19: Kl 3:5 \* 4:22: Ro 8:13; Kl 3:9 \* 4:23: Ro 12:2 \* 4:24: Lur 1:26; Kl 3:10 \* 4:25: Kl 3:8-9; Sak 8:16 \* 4:26: Sam 4:4; Je 1:19-20 \* 4:28: 1 Ts 4:11

### *Karisito*

17 \*Nia a sing lolos nemi keneng at laasen at Leeme Silok do mina rongga res at na levelinga. Mina xap ti mu asu leveloklok kakapmek at lavamolun. Mo levendoxoma atdi noxo lok tooro di.

18 \*Levendoxoma atnedi i nemen keneng at lamain. Nedi xopmen dina ruuna ka toxot keneng at na lorooro ne Moroa im taba i, mila kopmen takleklen tinotno atnedi la lebelen atnedi i rebonot pe.

19 \*Nedi xopmen dina suma lainmangan mumu leveloklok kakapmek dik lox i. La dira xap kusu dina lok leveloklok nunuan la dia vubeles at leveloklox axap i bilingot. La levendoxoma atdi i vekip kaxat ti lok laxakapmek.

20 Levenanasa mumu ne Karisito xopmen na lok kuren.

21 Nemi migara rongga xaka vam levelinga ren la diga lox ase nimi min, ik sixit emu mi levenanasa rurunun at ne Iesu.

22 \*Miga lox ase kusu mina lok kepe lorooro maut mo gak lok at lorooro atnemi ganoxa, la lodomdoma ri laxakapmek gara lok kapmex i.

23 \*La miga lox ase kusu levendoxoma atnemi na maxat.

24 \*La miga lox ase kusu mina lox ekun nom lorooro maut mi lorooro maxat, mo i lok ngan lampoovo at ne Moroa la i umsu mi loklok manmanton i rurunun la loklok i dadat.

25 \*Kuren la nemi getgesara mina lok pes kepe levelinga xaxarang la mina paase mi lururunun ti limixin at ne Moroa, mila nedik axap lengkot at labantuxu at ne Karisito.

26 \*Mi guta ke gat lebelemamao na sat arup nemi at laxapmek. Lumukmusak atnemi na xap avot ti laxangking na lotup.

27 Nemen mita raba ne Satan mi toxonin angavang.

28 \*Mo laradi xipkip pilo gutap kip pilo bok ba. Ketla neni na lok lugugu mi lukngen la na lok leven gugu nunuan kusu neni na epovo na lok tooro nedi limixin pakpakes.

29 \*La lavapaase kapmek noxo ravasu at levenngusno atnemi. Levelinga avukat mene nga mina paase asu i, kusu na lox alolos nedi limixin dik pakes ti levelinga avukat la kusu na lok tooro limixin di ronga nimi.

30 \*Nemen mita lox abulu Loroonan Kaala at ne Moroa. Loroonan Kaala neni loklok katling ne Moroa ga raba vam nimi min, i ngan lampinebeng kusu minaba lok kaka lorooro avolo at laaleng loklox arooro.

31 \*Nemi mina lok kepe axap loklok ti lebelen kapmek, lebelemamao, lumukmusak, loxoxo xaka, lava-paase mumu, la mo axap leveloklok kakapmek.

32 \*La mina suxa lorooro atnemi mi lebelen tuntun la labalamu kantubu atnemi limixin nunu. La mina dox-oma xepe laxakapmek atnemi getgesara kerekngan ne Moroa ga lok pes laxakapmek atnemi at laasen at ne Karisito.

## 5

### *Lorooro Atdik Keneng At Laxasep*

1 \*Nemi luvutnitna ne Moroa, mo i balamu aleng nimi. Kuren la mina mu asu lampoovo ren.

2 \*La lorooro atnemi na umsu mi labalamu kerekngan ne Karisito ga lox asuusu labalamu ren tidik la ga raba lorooro ren. Mo loklok at ne Karisito i lok ngan laramtaba i so misigisigis la lavanga laplavang saparap ne Moroa.

3 \*Ketla nemen tara atnemi guta lok laxakapmek i lok keretna, loklok kakapmek maxamang at lixitkis epot, lengkot mamangan, loklok ti belegao. Na lempanga xopmen nak

mokso ri limixin dadat at ne Moroa kusu dina lox i.

4 \*La mina ke xepe lavapaase kapmek, levelinga rangtangu, la lava-paase sese i lok kapmek. Na lempanga kopmen na lox avukat. Ketla mina umsu mi levelinga ti tong avukat saparap ne Moroa.

5 \*Nemi mina xasep at na. Do tara na lok loklok kakapmek maxamang at lixitkis epot, kopla na lok lengkot mamangan, kopla loklok ti belegao (na loklok i ngan loklok ti lotu saparap lempoovo moroa), kopmen toxot tin to xeneng at Linintoo at ne Karisito la ne Moroa.

6 \*Nemen tara na bala arup nimi ri laxakapmek mi levelinga gamasa mila, do tara na lok nom lempanga la na ronga xepe levelinga at ne Moroa, lebelemamao ren naba vot saparap nom laradi.

7 Kuren la nemen mitat kis etangas eburu mi mo limixin tongtonga xepe.

8 \*Gano nemi miga nemen at lamain. Ketla nanga Leeme Silok ga lok li nemi at laxasep. Nemi minat pas ngan luvuttadi at laxasep.

9 Mo laradi i ruuna laxasep at lorooro ren i lox asuusu luvukat, loklok manmanton la loklok at lava-paase i raturun.

10 \*La mina lok tong pen i kusu mina xasep ap mo leveloklok, i lox amomo Leeme Silok.

11 \*Nemen mita etangas eburu minedi luvuttadi dik lok leveloklok at lamain. Mo leveloklok i ngan lavanga gamasa la noxo visik asu lempanga avukat, ketla mina vaase sok nedi limixin di lox i.

12 Mila lavanga mamangan do tara na vaase asu mo levengkakapmek i lipe ro at lemeren limixin.

13 \*Ketla laxasep i lox asuvos leveloklok kakapmek la limixin dira xasep ba do mo lempanga i lok kapmek,

\* 4:29: Ep 5:4; Kl 3:8; 4:6 \* 4:30: Ais 63:10; 1 Ts 5:19; Ep 1:13-14 \* 4:31: Kl 3:8 \* 4:32: Mt 6:14; 18:22-35; Kl 3:12-13 \* 5:1: Mt 5:48 \* 5:2: Ro 14:15; Ga 2:20; Ib 10:10; Pas 29:18 \* 5:3: Kl 3:5 \* 5:4: Ep 4:29 \* 5:5: 1 Ko 6:9-10; Kl 3:5 \* 5:6: Kl 2:4,8; Ro 1:18 \* 5:8: Ep 2:11,13; Kl 1:13; 1 Pi 2:9; Jo 12:36 \* 5:10: Ro 12:2 \* 5:11: 2 Jo 1:10-11 \* 5:13: Jo 3:20-21

14 \*mila lamain kopmen na epovo nak lok eburu mi laxasep. I lok ngan na levelinga,

“Nenu laradi mo u vunga, soso una aus. Nenu una aus basinge lanmet kusu ne Karisito naba raba u mi laxasep.” *Ais 26:19*

15 \*Nemi mina lok tatao avukat lavatpas atnemi. Nemen mitat pas ngan laradi kopmen takleklen teren. Minat pas ngan laradi i ruuna lakleklen.

16 Amisik mina gagas kusu mina lok leven gugu at ne Moroa, mila na levenaleng i umsu mi laxakapmek.

17 \*Kuren la nemen nemi mita lok lempanga rangtangu, ketla mina xasep at lavavara at Leeme Silok.

18 \*La nemen mita inin tangtangu mi laxadan lolos, mo loklok naba lok kapmek nemi. Ketla mina umsu mi Loroonan Kaala,

19 \*la mina paase kantubu atnemi mi levengkompixan at ne Devit la lengkompixan at lotu la lengkompixan emi asu. Minak pixan la mina lok levempanga kerepmo mi lorooro axap atnemi saporap Leeme Silok.

20 \*At levenaleng axap mina tong avukat ti ne Moroa ne Temen dik at lempanga axap neni i lox i at laasen at Leeme Silok atnedik, ne Iesu Karisito.

21 \*Mina lox asi nemi maxopok at luvutneton nemi kusu mina lox asusu loklok ngangao atnemi ri ne Karisito.

### *Levelinga Ri Lavaun Epot*

22 \*Nemi lavakin. Minang tonga res at levendoxoma at lavatlok atnemi, kerekngan ming tonga res at levelinga at Leeme Silok.

23 \*Mila latlok ni lamgomgo at latkin teren, kerekngan ne Karisito ni Lamgomgo at lotu. Lotu ni labantuxu at ne Karisito, la ne Karisito neni Laradi Loklox Arooro atdik.

24 Lotu i nemen maxopok at ne Karisito, la kerepmo bok lavakin dinang tonga res at lavatlok atdi at leveloklox axap.

25 \*Nemi lavatlok. Mina balamu lavakin atnemi, kerekngan ne Karisito ga balamu limixin lotu la ni ga raba lorooro ren tidi.

26 \*Neni ga lox i xuren kusu ti lox adadat di basinge laxakapmek. Ni ga lox adadat di mi levelinga ren i ngan ladan.

27 \*Neni ga vara i do na lox agagas li di kusu dina ven nunuan tinotno at lemeren. La nedi di noxo ruuna taxakapmek, toxot kapmek la tevenasen panga xerepmo, dinaba nemen manmanton la kopmen taxapmek atdi.

28 At na mun langas lavatlok, mina balamu lavakin atnemi, kerekngan mi balamu axa labantuxu atnemi. Mo laradi i balamu latkin teren, i lox asusu i do i balamu axa i.

29 La kopmen taradi na munepen mi labantuxu axa ren, ketla neni i raba luxa i la ik lok tatao avukar i, kerekngan ne Karisito ik lok tatao limixin at lotu.

30 \*Mila nedik lengkot at labantuxu at ne Karisito.

31 \*I ngan Lovoang Kaala i tong i xeretna,

“Ni lavasuun teren la laradi remes i onon basinge ne temen mi nenen kusu neni na nemen eburu mi latkin teren, la nedu duna lok ngan legesara mun keneng at labantuxu atdu.”

### *Lur 2:24*

32 \*Na levelinga ni lavanga i silok aleng la i lolos kusu dik tana xasep teren. Ketla nia a doxoma i do i ru katling ne Iesu eburu mi lotu ren.

33 Ketla nemi getgesara mina balamu lavakin atnemi, kerekngan mi balamu axa nemi. La lavakin dina lok ngangao at lavatlok atdi.

\* 5:14: Ais 26:19; 60:1; Ro 13:11 \* 5:15: Kl 4:5 \* 5:17: Ro 12:2; Kl 1:9 \* 5:18: Lu 21:34 \* 5:19: Kl 3:16; Sam 33:2-3 \* 5:20: Kl 3:17 \* 5:21: 1 Pi 5:5 \* 5:22: Kl 3:18; 1 Pi 3:1 \* 5:23: 1 Ko 11:3; Ep 1:22 \* 5:25: Kl 3:19; 1 Pi 3:7; Ga 1:4 \* 5:26: Ta 3:5; Ib 10:10 \* 5:27: 2 Ko 11:2; Kl 1:22 \* 5:30: 1 Ko 6:15; Ep 1:22-23 \* 5:31: Mt 19:5 \* 5:32: Li 19:7

## 6

*Levelinga Ri Laxamdak Mi Laxaalik*

<sup>1</sup>\*Nemi laxamdak mi laxaalik. Minang tonga res at levelinga at luvuttemen nimi mi luvutnen nimi at laasen at Leeme Silok, mila na loklok ik mokso ti mu asu i.

<sup>2</sup>\*Lovoang Kaala i tong i,  
“Mina lok ngangao at luvuttemen nimi mi luvutnen nimi.” *Pas 20:12*

Na loxot at Lasangaun Levenaulis Linga, ni lara avot i tong asu loklox anarong tinedi di ronga res teren.

<sup>3</sup>Nom loxot i lok keretna,  
“Mina lok ngangao at luvuttemen nimi mi luvutnen nimi kusu lorooro atnimi naba lox avukat mun la naba nemen babaalom at na lavatangka.” *Lal 5:16*

<sup>4</sup>\*Nemi luvuttemen laxamdak mi laxaalik. Nemen mita lok kapmek lebelen laxamdak mi laxaalik atnimi la dina musak. Ketla mina lok tatao di mi loklok tik lox akmokso di at luruptuvuk atdi la mina anasa di mi levenanasa at Leeme Silok.

<sup>5</sup>\*Lavasaxaruki. Minang tonga res at luvuttadi amgomgo atnimi la mina umsu mi loklok ngangao la lanmarat. La lebelen nimi nak lox avukat tidi. Minang tonga res atdi kerekngan nemi ming tonga res at ne Karisito.

<sup>6</sup>Minang tonga res atdi kopmen do ap mo mene nga loxonaleng di reven tatao nemi. Ketla mina gugu amisik ngan lavasaxaruki at ne Karisito la mina lox epovo lavavara at ne Moroa mi lorooro axap atnimi.

<sup>7</sup>Mina lok leven gugu atnemi mi lorooro axap atnimi. I lok ngan ta do mi gugu ri Leeme Silok, la kopmen ti limixin mun.

<sup>8</sup>\*Mila miklen i do Leeme Silok naba raba luunun tinedi axap dik lok luvukat, keke i do nedi lavasaxaruki xopla xopmen.

<sup>9</sup>\*Nemi lubang amgomgo. Luruptuvuk atnemi na lok mun kuren parap lavasaxaruki atnimi la mina xap at loklok ti paase mukmusak tidi. Mina doxoma i do ne Karisito laradi gomgo atnimi la atnedi bok. Ik lok to vana at laxalibet la i viila mumu nedik axap mi leges ampoovo mene nga.

*Mina Gagas Ti Leesep*

<sup>10</sup>\*Ti lox axap na lovoang. Mina lox alolos lorooro atnimi keneng at Leeme Silok la mina lok kaka lolos teren i silok pologat.

<sup>11</sup>\*Mina siga levempanga singsiga no ne Moroa ga raba nemi min kusu mina epovo ri esep la mina tu atmatkun tangarang laxanbabala at ne Satan.

<sup>12</sup>\*Nedik na kopmen ta esep tangarang mi limixin ketla nedik di esep tangarang mi laxampanga lolos at lamain at na lavatbung menemen. Nedi lubangangelo xapmek, lubanggas, la luvuttadi amgomgo atdi. La dik ta esep tangarang mi lubang mixel kapmek at ne Satan dik lok to vana at lamavangkap.

<sup>13</sup>Kuren la mina siga axap levempanga singsiga at ne Moroa i raba i ri leesep kusu mina gagas avukat ti mo laaleng kapmek at leesep, la minaba epovo na tu atmatkun. La do mi gagas avukat pam, minaba tu tuxuruxun at nom leesep.

<sup>14</sup>\*Kuren la mina tu tuxuruxun. Mina rebeng ka levelinga ruturun, i ngan labanbaane di sevut li i at labangbaangis atnimi. La mina suxa lorooro atnimi mi loklok manmantan, i ngan labantaape at lobongobong.

<sup>15</sup>\*La mina gagas ti paase asu Lagale Lavavang at lumulum i ngan labantaape at lengkangedek tit pas avukat at nom leesep.

<sup>16</sup>La mina sosolok bok nom lununu i ngan lenban kusu ti sep

\* **6:1:** Kl 3:20 \* **6:2:** Mt 15:4 \* **6:4:** Kl 3:21; Lal 6:7,20-25; Sam 78:4; Ler 22:6 \* **6:5:** Kl 3:22-23; Ta 2:9-10; 1 Pi 2:18 \* **6:8:** 2 Ko 5:10; Kl 3:24-25 \* **6:9:** Kl 4:1; Ro 2:11 \* **6:10:** 1 Ko 16:13 \* **6:11:** Ro 13:12; 2 Ko 10:4; Ep 4:14 \* **6:12:** Jo 14:30; 1 Pi 5:8-9 \* **6:14:** Ais 11:5; 59:17; 1 Ts 5:8 \* **6:15:** Ais 40:9; Nam 1:15; Ro 10:15

banpe nom axap levesoso xao at ne Satan i soso min.

<sup>17</sup> \*La mina lok ka loklox arooro i ngan lavatkiam tik lok pe lesepsep la minaklen ka levelinga at ne Moroa i ngan lavarise sepsep at Loroonan Kaala.

<sup>18</sup> \*Mina lox i na levempanga xeng at levesingising atnemi, kusu minaba sing ka loklok tooro at ne Moroa. At levenaleng axap mina ngising at leventaangas axap no Loroonan i sasat ase nemi min. La mumu mun na langas, minaba tu atmatkun la mi noxo subu kot. Mina ngising amisik ti limixin at ne Moroa.

<sup>19</sup> \*La mina ngising bok tia, kusu ne Moroa naba raba ia mi levenngas linga at levenaleng nia a lok gagas ti paase, kusu nia noxo marat la anaba lox axasep Lagale Lavavang mo ga nemen alipe.

<sup>20</sup> \*Ni lavasuun teren la nenia, laradi xipkip levelinga at ne Moroa, ak lok de at loogu xokoxo. Mina ngising bok do nenia noxo marat ti tong asu Lagale Lavavang kerekngan ne Moroa i vara i.

### *Levempapaase Avit*

<sup>21</sup> \*Tikikas, neni neton orong atdik la lasaxaruki ruturun at Leeme Silok. Neni naba vot pasa nimi la naba raba nimi mi lavapaase axasep mumu lorooro rak la lugugu rak nade.

<sup>22</sup> Ni lavasuun teren la nenia anaba riki i udom saparap nimi xusu mina xasep do lorooro atnema ik lok kereva, la kusu neni naba lox alolos nimi.

<sup>23</sup> Moroa ne Temen dik la Leeme Silok ne Iesu Karisito duna raba nemi luvutneton nama mi lenmila, la labalamu eburu mi lununu,

<sup>24</sup> \*la letaba nabalamu naba nemen eburu minedi axap di balamu Leeme Silok atnedik, ne Iesu Karisito la mo labalamu noxo xap.

\* **6:17:** 1 Ts 5:8; Ais 49:2; Ib 4:12  
\* **6:18:** Lu 18:1; Kl 4:2; 1 Ts 5:17  
\* **6:20:** 2 Ko 5:20; Pm 1:9  
\* **6:21:** Gu 20:4; Kl 4:7-8; 2 Ti 4:12

\* **6:19:** Gu 4:29; Kl 4:3-4; 2 Ts  
\* **6:24:** 1 Pi 1:8

**Pilipai**  
**Lovoang At Ne Pol**  
**Ti Limixin Nunu To**  
**Pilipai**  
**Levelinga Loklox**  
**Axasep**  
**Lamaares 62 A.D.**

Pol gak lok at loogu xokoxo to Rom la neni ga malagan i na lovoang uto rinedi limixin nunu to Pilipai. Keneng at nai lovoang neni ga malagan i, neni ga tong avukat ti limixin boro Pilipai mumu laramtaba atdi. Na laramtaba diga lok li i at lekngen ne Epaprodaitas la neni ga lok ka i uto at ne Pol ti lok tooro i. Pilipai neni lemenemen matmatkun at lenep Masadonia. At lavatpas sepsev agepura at ne Pol neni gat pas uto Pilipai la mo go neni ga vavang mi Lagale Lavavang tinedi, la lusuusu ren lentaba luvuttadi diga nunu.

**Lengkot silok keneng at na lovoang**

- 1:1-11 Pol ga vaase momo ri limixin.  
 1:12-30 Levenmumuat ne Pol ga ekip tangarang min.  
 2:1-30 Limixin dina suma levenmumuat mi loklok mumulus.  
 3:1-21 Pol ga vaase aronga di mumu lavaeme loklox ase xaxarang.  
 4:1-20 Pol ga tong avukat tinedi ri laramtaba atdi.  
 4:21-23 Pol ga lox axap levelinga ren.

*Lavapaase Axasep*

<sup>1</sup>\*Nenia ne Pol. Nema mi ne Timoti, luasaxaruki at ne Iesu Karisito.

Ma sok na lovoang tinemi limixin at ne Moroa mi nemen keneng at lemenemen silok Pilipai, la ti luvuttadi amgomgo bok at lotu la luvuttadi loklok tooro, mo miga siam kaka

ne Iesu Karisito ukeneng at lorooro atnimi.

<sup>2</sup>\*Letaba nabalamu la lenmila rinemi boro at ne Moroa ne Temen nedik la ne Iesu Karisito, Leeme Silok atdik.

*Lisingising At Ne Pol*

<sup>3</sup>\*Nenia a tong avukat ti ne Moroa ap mo levenaleng axap do nenia a doxoma su atnimi.

<sup>4</sup>La at levesingising axap tarak tinemi axap, a ngising mi lomomo.

<sup>5</sup>Mila miga lok tooro ia mi lugugu at Lagale Lavavang ga ruka i at laaleng nia aga vaxaru xat ka lugugu dom kantubu atnimi la ise ningina.

<sup>6</sup>\*Kuren la aklen tinotno i do ne Moroa, ni ga vaxaru ka i na lugugu nunuan keneng atnimi, neni naba lox epovo i at na levenaleng la naba se at laxavaxap at lugugu atdik at laaleng ete at ne Iesu Karisito.

<sup>7</sup>Am doma su amisik atnimi mi lomomo. La at lusumsuma rak ik mokso do ana doma mumu nemi. Nemi miga gugu eburu minia ap mo lugugu ne Moroa ga raba ia min la ni ga raba nimi mi lolos kusu minap kiv i, i se nga na nenia ak lok at loogu xokoxo. La ap mo bok levenaleng nenia agat pas tangtagap kusu ana lox asuusu i do Lagale Lavavang i raturun, la kusu ana lok limixin nunu kusu dina ru lolos teren.

<sup>8</sup>\*La ne Moroa iklen i do nom nabalamu rak saparap nimi, i laa boro at labalamu at ne Iesu Karisito.

<sup>9</sup>Lisingising tarak saparap ne Moroa i lok keretna. Nenia a ngising do labalamu atnimi na sisilok, eburu mi lakleklen tuturun, la lodoxoma nunuan.

<sup>10</sup>\*Kuren la minaba epovo do mina soxolik ka lempanga sala i nunuan la kerepmo lorooro axap atnimi naba dadat, la kopmen teveloklok kakapmek noxo nemen teren se at laaleng ete at ne Karisito.

<sup>11</sup>\*La lorooro atnimi naban manton xusu minaba visik asu levempipisik nunuan, ne Iesu Karisito

\* 1:1: Gu 16:12-40 \* 1:2: Ro 1:7; Ga 1:3; Pm 1:3 \* 1:3: Ro 1:8; 1 Ko 1:4 \* 1:6: 1 Ko 1:8; Pl 2:13  
 \* 1:8: Ro 1:9; 2 Ko 1:23 \* 1:10: Ib 5:14; Pl 1:6; 2:16; 1 Ts 5:23 \* 1:11: Jo 15:8

naba lox asusu i at lorooro atnimi. Kerepmo lisisixam eburu mi leemi asu nabat pas ti ne Moroa.

*Pol Ga Nemen At Loogu Kokoxo*

<sup>12</sup> \*Luvutnetak mi luvurinuk. A vara i xusu minaklen nunuan i do mo levesongsongot gat pot saporav ia, ga lok tooro aleng tinotno lusuusu at Lagale Lavavang.

<sup>13</sup> \*Kuren la na luvuttadi esep at loorong eburu mi luvuttadi di nemen de, diklen i do nia ak lok at loogu xokoxo mila nenia lasaxaruki at ne Karisito.

<sup>14</sup> Mo lemenemen tarak nade xeneng at loogu xokoxo i lox alolos bok buaang nedi limixin nunu kusu dina vavang abelemes mi levelinga at ne Moroa la kopmen tanmarat atdi.

<sup>15</sup> I ruturun leventaba di vavang mi ne Karisito kusu ti lox asilok levenasen atdi. Di umsu mi loklok ti ngaongao ri lempanga at lentaba vetpes la loklok tik lox asilok di. Ketla leventaba di vavang mi luruptuvuk atdi i nunuan.

<sup>16</sup> Di lox i mi labalamu, atla diklen i do ne Moroa ga raba ia mi lugugu ri vaase pe Lagale Lavavang.

<sup>17</sup> Nedi nom luvuttadi di paase asu ne Karisito, di vara i do dina lox asilok levenasen atdi. Di doxoma i do dina lox aurut gamasa levesongsongot mavana rak atla nia a nemen at loogu xokoxo.

<sup>18</sup> Nia xopmen ana doxoma solo i nom. A momo mun dola at leventaangas axap dina vavang mi ne Karisito, keke i do lavavara atdi xopmen nak mokso.

<sup>19</sup> \*La a lok momo bok mila aklen i do at levesingising atnimi la loklok tooro at Loroonan Kaala at ne Iesu Karisito, dinaba soxomus asu ia basinge na loogu xokoxo.

<sup>20</sup> \*Lavavara axap at labalak do nenia a noxo subu basinge lugugu rak la ana lok mamangan. Ketla at levenaleng axap nia a noxo marat tangarang kaka tara xusu limixin

dinaba ven kisip ne Karisito keneng at lorooro rak do nenia move ana rooro xopla at loxonaleng do nenia ara met pam.

<sup>21</sup> \*Lavanga salai lorooro? Tia, ne Karisito mun. Do nia ana met, naba lox avukat aleng.

<sup>22</sup> \*Dola lorooro rak nak lox abao, nenia ba lok teven gugu nunuan. Kerepmo la nia axoklen i dola ua langas nenia aba soxolik ka i.

<sup>23</sup> \*Lodoxoma rak i ekarakat ti legepu nep. A vara aleng i do ana on basinge na lorooro la ana nemen buru mi ne Karisito, nom i lox avukat tinotno.

<sup>24</sup> Ketla i epovo rinotno bok do nenia aba nemen kusu ti lok tooro nimi.

<sup>25</sup> Aklen tinotno i la a xasep do anaba nemen. Nenia anaba nemen eburu minemi axap, ti lox asilok lusuusu at lununu atnimi, la kusu lomomo na silok keneng at lorooro atnimi.

<sup>26</sup> Kuren la do nia ana nemen buru bok minemi, anaba lok nimi xusu lomomo atnimi naba suusu aleng keneng at laasen at ne Iesu Karisito.

<sup>27</sup> \*Nemen mita doxoma solo ri lavanga salai mo naba vot saporav ia, ketla luruptuvuk atnemi na epovo mi Lagale Lavavang at ne Karisito. Kuren la do nia ana vot pasa bok nimi kopla a noxo vot, anaba rongga i do mi tu atmatkun mi legese belen la legese doxoma. La mit kis eburu ngan legesara kusu mina esep lolos ti lununu mumu Lagale Lavavang.

<sup>28</sup> Nemen mita marat atnedi di munepen minimi. Amisik mina belemes, la nom lurutu lolos atnimi naba lok ngan loklok katling tidi do nedi dinaba seeve. Ketla nemi minaba ruuna ka lorooro avolo, mo ne Moroa xa naba raba nimi min.

<sup>29</sup> \*Moroa ga raba nimi mi lugugu at ne Karisito, kopmen do at lununu xusuk ketla minaba ekip tangarang bok mi losongsongot.

\* 1:12: 2 Ti 2:9 \* 1:13: Gu 28:30; Ep 3:1 \* 1:19: 2 Ko 1:11 \* 1:20: 1 Pi 4:16 \* 1:21: Ga 2:20  
\* 1:22: Ro 1:13 \* 1:23: 2 Ko 5:8 \* 1:27: Ep 4:1; 1 Ts 2:12; Pl 4:3 \* 1:29: Gu 16:19-40 \* 1:30: Pl 1:13



<sup>30</sup> \*Nedik ta nemen ap mo leesep. Nom mun leesep miga reven ia aga esep teren migomgo, la miga rongga i do nia move a vesep tin at lorooro rak.

## 2

### *Langsangan Loklok Ngangao La Lisisilok At Ne Karisito*

<sup>1</sup> Lorooro atnimi keneng at ne Karisito i lox alolos nimi la labalamu ren i lox amenemen bok nimi. Nemi mit kis esogo mi Loroonan Kaala la mira ruuna ka vam lebelen tuntun.

<sup>2</sup> Kuren la a sing alolos nimi xusu mina lox epampana lomomo rak mi leveloklox avukat keretna. Mina ruuna ka legesa doxoma, labalamu ela, mi legese belen.

<sup>3</sup> \*Nemen mita doma i do mina lox asilok nimi, ketla mina lox asi nimi maxopok at limixin. Amisik mina doxoma mumu nunuan nedi avot la melemu ba nemi, la mina umsu mi langsangan loklok ngangao.

<sup>4</sup> \*Nemi getgesara nemen gat mita reven mun ti levempanga nemi mikpakes tin. Ketla i lox avukat do mina reven bok ti levempanga luvuttadi vetpes dik pakes tin.

<sup>5</sup> Levendoxoma atnimi na mumu asu mene lodoxoma at ne Iesu Karisito.

<sup>6</sup> \*Neni gat pas mi lamakmaran at ne Moroa, ketla neni goxo doma i do mi lolos axa ren la neni naba silok ngan ne Moroa.

<sup>7</sup> \*Ketla ti na, at lavavara xa ren, ni ga on basinge nom lixitkis silok teren, la ga lok ka lorooro at lasaxaruki. Neni ga vee radi,

<sup>8</sup> \*la ga vas su ngan laradi mun. Neni ga lox axakalix i la gat pas at langas tongtonga res uto epopolo at lanmet teren to at laxaba.

<sup>9</sup> \*Na mun i lavasuun teren la ne Moroa ga lox aurur i uto vana xa la ga lox asilox i mi laasen i silok ti laxanasen axap.

<sup>10</sup> \*Kuren la limixin axap dina lok ngangao at laasen at ne Iesu. Nedi limixin no vana at laxalibet la nedi bok at na lavatbung menemen la nedi bok diga met pam, nedi axap dinaba xis tiktikbu mi lempatgulom atdi.

<sup>11</sup> \*La nedi axap dinaba tong asu i dola ne Iesu Karisito neni Leeme Silok la kerepmo dina emi asu mi ne Moroa, ne Temen dik.

### *Mina Babao Ngan Laxampenti*

<sup>12</sup> \*Larapen tangas orong tarak. Migang tonga res amisik tarak ap mo levenaleng, nenia aga nemen eburu minemi. La nemi move mirang tonga res bok tarak at na levenaleng nia a nemen paxalom basinge nemi. Kuren la mina gugu lolos kusu lorooro atnimi nabak lok nunuan at lemeren ne Moroa, eburu mi loklok ngangao.

<sup>13</sup> \*Mila ne Moroa i gugu amisik keneng at lorooro atnimi ri lox amisik nemi xusu mina vara lodoxoma ren la minaba epovo xusu mina mu asu i.

<sup>14</sup> At levempanga axap mi lox i, nemen mita gagalinga la mita etep mi levelinga,

<sup>15</sup> \*kusu luruptuvuk atnimi na nunuan la minaba dadat basinge laxakapmek atnimi la nemi minaba lok ngan laxamdak at ne Moroa ap mo levenaleng mi nemen kantubu at limixin kakapmek at na lavatbung menemen, mo di umsu mi laxakapmek. Do lorooro atnimi na nemen kuren, minaba babao ngan laxampenti i soosoo axasep bok lama-vangkap.

<sup>16</sup> Minam tebeng alis levelinga at lorooro at levenaleng mi tong asu i rinedi. Dola mina lox i kuren, nenia bok anaba xip aurut nimi at laaleng ete at ne Karisito, mo naba lox asusu i do lugugu rak la lolos tarak goxo xap gamasa at lugugu ren.

\* **2:3:** Ga 5:26; Ro 12:10    \* **2:4:** 1 Ko 10:24,33    \* **2:6:** Jo 1:1-2; 17:5    \* **2:7:** 2 Ko 8:9; Jo 1:14  
 \* **2:8:** Ro 8:3; Jo 10:17; Ib 5:8; 12:2    \* **2:9:** Gu 2:33; Ep 1:20-21; Ib 1:3-4    \* **2:10:** Ro 14:11    \* **2:11:** Ro 10:9    \* **2:12:** Sam 2:11; 1 Pi 1:17    \* **2:13:** Jo 15:5; 1 Ko 12:6; 15:10; 2 Ko 3:5; 1 Ts 2:13    \* **2:15:** Dan 12:3; Mt 5:14; 10:16; Gu 2:40; Pl 1:10; 1 Ts 2:19; Ais 49:4; Ga 2:2    \* **2:17:** Ro 15:16; 2 Ti 4:6

17 \*Ketla i lox avukat mun do dina sev amer ia, kusu labantuxu rak naba lok ngan laplavang atnimi saparap ne Moroa la na laramtaba naba lox asuusu lununu atnimi. Mo do kuren a lok momo eburu minimi.

18 \*La kerepmo bok mina lok momo la mina sosoro eburu minia.

### *Timoti La Ne Epaprodaitas*

19 Dola lavavara at Leeme Silok ne Iesu, a doxoma i do aba riki soso ne Timoti udom saparap nemi, kusu nenia aba rongga tevelinga mumu nemi, kusu naba lox alolos ia.

20 Kopmen tara i lok ngan ne Timoti, im doma amisik lorooro atnimi.

21 \*Buaang limixin dik lox angtang axa mi levempanga atdi, ketla kopmen dinam doma solo lugugu at ne Iesu Karisito.

22 La nemi miklen pam i do neni gara lox asuusu vam lugugu avukat teren, atla neni ga gugu eburu minia ri tong asu Lagale Lavavang, kerekngan lamdak i gugu eburu mi ne temen.

23 Kuren la a gagas ti riki soso i udom saparap nemi dola anaklen i do dina lok lavanga salai ria.

24 La a nunu at Leeme Silok dola nenia xa aba vot soso saparap nemi.

25 \*A doxoma i do i lox avukat bok do ana riki amlong neton dik ne Epaprodaitas udom saparap nemi. Neni ga gugu la ga gugu lolos at lenep tarak, la ni ga lok ngan lasaxaruki atnemi atla neni gap kip leveloklok tooro atnemi ria.

26 Neni i vara aleng i do na ven nemi axap ketla i lok bukbulu atla miga rongga i do neni ga meres.

27 I ruturun neni ga meres la ma lixilik ga lok do na met. Ketla ne Moroa ga balamu i, kopmen do neni xusuk, Moroa ga balamu box ia la ga lox asepsu ia basinge lainbulu silok atla ni ga lox aroo ne Epaprodaitas. Kuren la nenia agoxo suma manga lainbulu silok.

28 La a vara rino i do ana riki i saparap nemi, kusu nemi ba lok momo dola mina ven tu ren. Kuren la lodoxoma rak naba xis aulis.

29 \*Mina seega rangarang i mi lomomo silok ngan neton nemi at Leeme Silok. Mina lok ngangao at luvuttadi ngan i,

30 mila neni ga raba lorooro ren la ma lixilik gita met mumu lugugu at ne Karisito, kusu ti lok tooro ia mi mo lugugu nemi xa xopmen mi goxo epovo na lox i.

## 3

### *Laradi Manmanton Tukuran*

1 \*Luvutnetak mi luvurinuk. Ti lox axap levelinga rak, mina momo at Leeme Silok. I lox avukat mene do nia ana sox amu bok mo levelinga nia aga malagan pam i rinimi, mo naba lok tooro nemi xusu mi noxo subu.

2 \*Mina lok tatao avukat nemi basinge nedi di lok leveloklok kakapmek. Di pu soso limixin kusu dina vit kepe levengkontuxu atnedi. Loklok atnedi i lok ngan lubangman.

3 \*Nedik na digara ruuna ka vam loklok katling tuturun at ne Moroa la nedik di lotu saparap ne Moroa keneng at Loroonan Kaala la nedik di momo xeneng at lititkis atdik eburu mi ne Iesu Karisito. Nedik kopmen tana nunu do mo loklok ti rivit kepe lengkontuxu la leveloklok kerepmo at leme Judaia ba lok tooro dik.

4 \*Nenia xa a ruuna lempasuun kusu ti nunu ap mo leveloklok at leme Judaia.

Dola tara na doxoma i dola neni i epovo xusu na mu asu mo leveloklok, nenia a epovo rinotno. Lempasuun i lok keretna.

5 \*Diga vit kepe loxontuxu rak melemu at lavanuti aleng ne naga ga visix ia. Nenia lanat me Israel at libibinat at ne Benjamin, la nia laradi ruturun me Ibru. Nenia aga nemen eburu lubang Parisi, la aga

\* 2:18: Pl 3:1; 4:4    \* 2:21: 2 Ti 4:10    \* 2:25: Pl 4:18    \* 2:29: 1 Ko 16:16,18; 1 Ti 5:17    \* 3:1: Pl 2:18    \* 3:2: Sam 22:16,20; Li 22:15    \* 3:3: Ro 2:29    \* 3:4: 2 Ko 11:18,21    \* 3:5: Lu 1:59; Ro 11:1; 2 Ko 11:22; Gu 23:6

mumu asu Laulis Linga at leme Judaia kerekngan la Parisi.

6 \*Ganoxa nenia agak lox asongot limixin at lotu, atla nia aga lok do mo loklok nia agak lox i naba lox amomo ne Moroa la mo ga lox asuusu i do lusumsuma rak ti ne Moroa ga lolos. Nenia aga doma i do laradi naban manton tino mun at lemeren ne Moroa, do neni na mu asu rinotno Laulis Linga, kuren la agoxo subu at toxtot teren.

7 \*Nia aga nua i do na levempanga ba lok tooro ia ro melango at ne Moroa, ketla xopmen. Ara ke xepe vam i na la aga lok kun i mi ne Karisito.

8 Kopmen mo levempanga xusuk mun, ketla levempanga axap at lorooro rak i ngan lavanga gamasa la lorooro rak keneng at ne Iesu Karisito, Leeme Silok tarak, ni lavanga i silok aleng tinotno. La mo leveloklok at leme Judaia ara lu xepe axap pam min kusu ana mumu asu mene ne Karisito. A doxoma i do mo leveloklok i ngan lavanga kakapmek mun la aga lok kepe i xusu ana ruuna ka ne Karisito,

9 \*la anat kis esogo min. Nenia a goxo lok ka lorooro manmanton tino at lemeren ne Moroa mumu i do agang tonga res at Laulis Linga. Kopmen. Nenia na a nemen manmanton at lemeren ne Moroa mumu lununu rak keneng at ne Karisito. La ne Moroa axa ga lok li ia xusu ana sepmus basinge loklok kakapmek.

10 \*A vara i xusu anaklen ne Karisito la ana lok kaka lolos i ngan mo lolos at laxakatu kaxat amlong teren basinge lanmet, la a vara i do ana vubeles at losongsongot teren kusu anap kiv i la ana lok kepe lorooro xapmek, i ngan ta do ana met basinge i kerekngan ne Karisito ga met basinge na lorooro.

11 \*La nia am doma voovo do anaba roo xat bok basinge lanmet la

ana rooro.

### *Lisiksixit Uto At Laxavaxap At Lorooro*

12 \*Nenia axo doma i do ara rebeng ka vam mo lorooro la ara ravasu ngan laradi xopmen taxapmek teren. Nenia move a lolos kusu ana rebeng atmatkun ka mo loklok i nunuan, mila ne Iesu Karisito ga un ka ia do tin.

13 Luvutnetak mi luvurinuk, nia a doxoma raturun i do nia xovisi ana lox epovo i. Ketla legesa vanga mun, a lox i. Nia a domampe mo levempanga ga vot saparav ia gano la nia a lolos kusu ana rebeng kaka mo levempanga ne Karisito i gagas li i ria, mo naba vot melemu.

14 \*Kuren la ak sixit mokmokso ruuna ka mo levempanga, mo ne Moroa ga ro ka ia rin keneng at ne Iesu Karisito ri lorooro no vana.

15 \*Tinedik axap dira mukun pam, lodoxoma atdik naba lok kuren. Ketla do leventaba di ruuna lodoxoma vetpes, Moroa naba lox axasev i ridi.

16 \*Ketla lavatpas atdik at na lorooro naba epovo mi lorooro maxat miga lok ka vam i.

17 \*Luvutnetak mi luvurinuk. Nemi axap mina mumu asu lampoovo rak, la mina ven mumu nedi di mumu asu mo levelinga nema maga lox ase nimi min.

18 \*Agara tong amisik pam i rinemi ganoxa, la nanga ana tong amu box i mi lainbulu silok, do buaang atnedi diga sok tixirixes kepe levelinga at lanmet at ne Karisito ro vana at laxaba ngan nedi lavamunepen min.

19 \*Nedi dinabat pas uto at lemenemen songsongot, dim doma mun levempanga anan la lavavara mun at labantuxu. Di momo mun ti levempanga i lox asuusu lainmangan silok, la dim doma mun levempanga at na lavatbung menemen.

\* 3:6: Gu 8:3 \* 3:7: Mt 13:44,46 \* 3:9: Ro 3:21-22 \* 3:10: Ro 6:3-5; 8:17; Ga 6:17 \* 3:11: Gu 4:2; Li 20:5-6 \* 3:12: 1 Ti 6:12,19; Gu 9:5-6 \* 3:14: 1 Ko 9:24 \* 3:15: 1 Ko 2:6 \* 3:16: Ga 6:16 \* 3:17: 1 Ko 4:16; 1 Ts 1:7; 1 Pi 5:3 \* 3:18: 1 Ko 1:23; Ga 6:12 \* 3:19: Ro 16:18; 8:5-6 \* 3:20: Ep 2:6,19

20 \*Ketla nedik lavaanat boro vana at laxalibet, la di ngangais mi lomomo ti Laradi Loklox Arooro, Leeme Silok ne Iesu Karisito, naba si boro vana at laxalibet.

21 \*Neni naba lox asuusu lolos silok teren kusu levempanga axap naba mu asu mun lavavara ren la neni naba lox ekun labantuxu gamasa atnedik kusu naba lok ngan labantuxu ren imgames la i lolos.

## 4

### *Levelinga Loklox Axap*

1 \*Luvutnetak mi luvurinu. Mi ronga vam na levelinga rak. Kuren la mina tu atmatkun at lorooro atnimi keneng at Leeme Silok. Larapen tangas orong tarak. A balamu aleng nimi la a sosoro aleng ti tong asuusu nimi ri limixin, mila labalak i lok momo aleng mumu nimi.

2 Iuodia la ne Sintike, nia a sing lolos numu, xusu muna mulus ti lok ngan leton keneng at Leeme Silok.

3 \*La a vaase bok tu, lagale laradi. Uga gugu nunuan eburu minia. Una lok tooro na lutkin, la una lok lumulum kantubu atdu kusu duba xis eburu, atla gano nedu duga gugu lolos ti tong asu Lagale Lavavang, eburu bok mi ne Klemen. Nedi vetpes bok digara gugu vam eburu minia, nom levenasen atnedi ira nemen pam at lubuk at lorooro at ne Moroa.

4 \*Lomomo atnimi keneng at Leeme Silok na nemen amisik. A tong amu box i do mina momo.

5 \*Mina lox ase limixin axap mi loklok mulus mo i umsu at lorooro atnimi. Noxo lox abao la Leeme Silok naba vot.

6 \*Nemen mita bulu mu tempanga, ketla mina sing ne Moroa ri levempanga axap mik pakes tin, la at lorooro axap atnimi mina tong loklox avukat tin.

7 \*La lenmila at ne Moroa i volo lakleklen at luvuttadi, mo lenmila

naba xubak pe lorooro axap atnimi xusu mina tu tuxuruxun keneng at ne Iesu Karisito.

8 \*Ti lox axap levelinga rak, luvutnetak mi luvurinu. Mina suxa umsu lodoxoma atnimi mi levempanga nunuan la nom i lox asuusu leemi asu, levempanga mo i ruturun, loklok manmanton la loklok i dadat, la loklok ti balamu, la loklok ti lok ngangao at leventaba vetpes.

9 \*Mina lok mo levempanga nia aga lox ase vam nimi min la miga lok ka box i rak, at levempapaase la at loklok la at lugugu bok tarak. La ne Moroa nom im taba dik mi lenmila naba nemen eburu minimi.

### *Pol Ga Tong Avukat Ti Laramtaba*

10 Nia a lok momo aleng keneng at lorooro rak eburu mi Leeme Silok mumu mo laramtaba miga raba ia min. Gano loklok tooro atnimi ria ga xap ketla miga lok kaxat manga i. Aklen i do labalamu atnimi saparav ia goxo xap, ketla mi goxo lok epovo mene i, atla goxopmen tangas tinimi.

11 \*Nenia a tong i na, kopmen do nia anak pakes ti tevempanga. Ketla nia a lok momo mun ti levempanga salai nia a ruuna i. Mo do i buaang koplaxo buaang, i lox avukat mun.

12 At leventaba levenaleng agak pakes la at leventaba levenaleng aga ruuna epovo. A xasep eburu at na luxonaleng. Nenia axo doxoma solo i do a nemen at lavakpakes koplaxo ruuna laxampanga solo. Keke i do a roxo xoplaxo an mais, ketla nia a lok momo mun at levenaleng axap.

13 \*Nenia a epovo xusu ana lok levempanga axap mi lolos mun, ne Karisito im taba ia min.

14 Ketla i lox avukat do miga lok tooro ia ap mo levenaleng mumuat ga vot saparav ia.

15 \*Nemi limixin boro Pilipai miklen avukar i dola nia aga on basinge lenep silok Masadonia ap

\* 3:21: Ro 8:29; 1 Ko 15:28,43-53 \* 4:1: 1 Ts 2:19-20 \* 4:3: Sam 69:28; Lu 10:20; Li 20:12 \* 4:4: Pl 3:1 \* 4:5: Ib 10:25,37; Je 5:8-9 \* 4:6: Mt 6:25-34; Kl 4:2 \* 4:7: Ais 26:3; Jo 14:27; Kl 3:15 \* 4:8: Ro 12:17 \* 4:9: Ro 16:20; 1 Ko 14:33; 1 Ts 5:23 \* 4:11: 1 Ti 6:6 \* 4:13: 2 Ko 12:10; 2 Ti 4:17 \* 4:15: 2 Ko 11:9

mo levenaleng nia aga vavang avot mi Lagale Lavavang, la kopmen teventaba vetpes di goxo lok tooro ia, nemi xusuk migam taba ia.

<sup>16</sup> Ap mo levenaleng nenia aga nemen pakpakes to Tesalonia, la miga lox aonon leveloklok tooro ria, kopmen at teges aleng mun, ketla amisik migak lox i.

<sup>17</sup> At lorooro rak nia axo doma solo ri ruuna ka leventamtaba, ketla a vara i do ana ven bok tuunun tinimi mavana ap mo luunun mo i ngangais nimi ro vana.

<sup>18</sup> \*Nia ara lok ka vam leventamtaba atnimi, no ne Epaprodaitas gap kiv i ria ude boro atnimi, la i volo mo levempanga agak pakes tin. Na leventamtaba i lok ngan leventamtaba somavak limixin di xotos i ri ne Moroa, la ni i sisiam kaka i la i sosoro rin.

<sup>19</sup> Moroa rak naba raba nemi mi levempanga axap mik pakes tin, i epovo mi langsung lapnovos keneng at ne Iesu Karisito.

<sup>20</sup> Leemi asu amisik ti ne Moroa ne Temen dik la kopmen taxavaxap teren. I raturun.

### *Lavapaase Momo*

<sup>21</sup> Nia a lox aonon lavapaase momo rinemi limixin axap mi nunu at ne Iesu Karisito. Luvutnetak mi luvurinuk, dik lok eburu minia de, di lox aonon bok lavapaase momo rinemi.

<sup>22</sup> \*Nedi axap limixin at ne Moroa nade, di lox aonon lavapaase momo rinemi. Nedi rinotno limixin gugu at loogu at ne Kaisar di lox aonon lavapaase momo rinimi. I raturun.

<sup>23</sup> Letaba nabalamu at Leeme Silok ne Iesu Karisito na nemen keneng at lorooro atnemi.

**Kolosi**  
**Lovoang At Ne Pol**  
**Ti Limixin Nunu To**  
**Kolosi**  
**Levelinga Loklox**  
**Axasep**  
**Lamaares 62 A.D.**

Pol gak lok at loogu xokoxo to Rom, la neni ga malagan i na lovoang la ga raba ne Tikikas mi ne Onesimas min la duga lok ka i la duga raba limixin at lotu min to Kolosi. Lavasuun at na lovoang i lok keretna. Ne Pol gak lok at loogu xokoxo mumu Lagale Lavavang la ne Epapras gat pas parav i la ga tong i rin do lentaba luvuttadi mo diga tong levelinga xaxarang at lotu tinedi limixin nunu to Kolosi. Mo levelinga xaxarang atdi ga lok keretna. Lentaba lubungangelo mo nedik ata lotu parap di. Lara ne Iesu mo ik lok petpes, la neni xopmen na lok ngan ne Moroa, ketla i lok ngan lubungangelo. Pol ga ronga i na la neni ga malagan i na la ga lox aonon i xusu ti lox asuusu laxaxarang ap mo leveloklox ase xaxarang.

**Lengkot silok keneng at na lovoang**

- 1:1-2 Lavapaase momo at ne Pol.
- 1:2-14 Pol ga emi asu aleng mi limixin boro Kolosi.
- 1:15-23 Lempapaase mumu lisisilok at ne Iesu Karisito.
- 1:24-2:5 Lempapaase mumu leven gugu at ne Pol.
- 2:6-3:4 Limixin me Kolosi dina sok tixirixes levenanasa xaxarang.
- 3:5-4:1 Leventaangas nunuan ti limixin nunu.
- 4:2-18 Lempapaase loklox alolos mi lavapaase abeese ren.

*Lavapaase Axasep*

<sup>1</sup> \*Nenia ne Pol, lun pavang at ne Iesu Karisito, Moroa ga soxolik ka ia xuren, la ne Timoti bok, neton dik.

<sup>2</sup> \*Nema ma malagan na lovoang tinemi limixin nunu dom Kolosi. Nemi limixin at ne Moroa la mi nunu ruturun at ne Karisito.

Letaba nabalamu la lenmila tinemi boro at ne Moroa ne Temen dik.

*Lisingising Ti Tong Loklox Avukat*

<sup>3</sup> \*At levesingising atnama ma tong loklox avukat amisik ti ne Moroa, ne Temen Leeme Silok atdik ne Iesu Karisito.

<sup>4</sup> Mila maga ronga i do lununu atnimi saparap ne Iesu Karisito i tu tuxuruxun, la lorooro atnimi i umsu mi labalamu saparap limixin nunu.

<sup>5</sup> \*Na lununu la labalamu atnimi i nemen lolos at lorooro atnimi, mila mi ngangais mi lomomo ri mo leveloklox anarong i nemen tangais nimi ro vana at laxalibet. Mo leveloklox anarong miga ronga vam i ap mo levenaleng diga vavang mi levelinga ruturun tinimi, mo levelinga ni Lagale Lavavang.

<sup>6</sup> Na Lagale Lavavang i ruuna laxampipisik solo la i sat kaka limixin at na lavatbung menemen axap kusu dina nunu at ne Iesu Karisito la dina lok leveloklok i nunuan. La kerepmo bok Lagale Lavavang i pisik kantubu atnimi, ga ruka i ap mo laaleng miga ronga i la miga ven kibis letaba nabalamu at ne Moroa, mo letaba nabalamu i ruturun tinotno.

<sup>7</sup> Epapras ga anasa nimi mi nom letaba nabalamu. Neni lagale laradi i gugu eburu minema la ni laradi ruturun i lok lugugu at ne Karisito ti lok tooro nimi.

<sup>8</sup> Neni ga tong i rinama do lorooro atnimi i umsu mi labalamu, Loroonan Kaala ga suxa aumsu nimi min.

<sup>9</sup> \*Maga ronga i nom, kuren la kopmen mana xap mi lisingising tinimi. Ma sing ne Moroa, kusu na suxa aumsu nimi mi lakleken at lavavara ren, la kerepmo minaba ruuna ka lodoxoma avukat keneng at lorooro atnimi. Mo lodoxoma i ravasu boro at Loroonan Kaala.

\* 1:1: Ep 1:1    \* 1:2: Ro 1:7    \* 1:3: Ep 1:15,16    \* 1:5: Ep 1:13,15-16; 1 Pi 1:4; Ro 1:13; 1 Ti 3:16; Kl 4:12; Pm 1:23    \* 1:9: Ep 1:9,16,17; Pl 1:9    \* 1:10: Pl 1:27; Ep 2:10

10 \*Ma lok levesingising kerepmo kusu lorooro atnimi na epovo mi lavavara at Leeme Silok la kusu mina lok lempanga naba lox amomo i. Nom lempanga i lok keretna, lorooro atnimi naba pisik asu leveloklok nunuan solo, la nemi minaba lok kaka lakleklen at ne Moroa.

11 \*La minaba ruuna ka bok lolos, mo i laa boro vana at lolos silok at ne Moroa kusu mina tu tuxuruxun at lununu atnimi la mi noxo subu kot kantubu. Minaba umsu mi lomomo,

12 \*la minaba tong loklox avukat ti ne Temen dik, ni ga lok nimi xusu mina epovo rinotno ri ruuna ka loxot atnimi ap mo luunun ni ga lox agagas li vam i ri limixin teren to xeneng at Linintoo i umsu mi laxasep.

13 \*Neni naba raba nimi mi nom, mila ni ga lox aroo su dik basinge lamain lolos at ne Satan, la neni ga lox arooro dik kusu tana vubeles at Linintoo at ne Nitna, mo ne Moroa i balamu i.

14 \*Keneng at ne Iesu, Moroa ga un ka amlong dik, la ni ga doxoma xepe bok leveloklok kakapmek atdik.

### *Iesu Neni Lamgomgo*

15 \*Karisito neni lampoovo at ne Moroa nedik kopmen tana reven tu ren. Neni lanat meren avot, la i silok tinedi levempanga ne Moroa ga rudum li di.

16 \*Moroa ga rudum li levempanga xeneng at lolos at lekngen ne Nitna. Levempanga axap to vana at laxalibet la de xopok at lavatbung menemen, lempanga dik ta reven di la lempanga dik dixo epovo ta reven di. Ni ga rudum li bok leventoonan eburu mi lubungangelo, la luvut-tadi amgomgo atdi la limixin lolos kerepmo dik lok to vana. Moroa ga rudum li nom lempanga axap keneng at lolos at lekngen ne Nitna kusu dina lox aurut laasen at ne Nitna.

17 \*Karisito ga rooro avot ti nom lempanga axap, la neni lusu auru atdi.

18 \*Neni Lamgomgo at lotu ren kerekngan lavatlak at laradi, ni Lamgomgo at labantuxu ren. Neni lava-suun at lorooro maxat, la neni lara avot ga roo xat amlong basinge lanmet. Ni ga lox i xuren kusu neni xusuk naba ruuna ka lixitkis silok ti levempanga axap.

19 \*At lodoxoma axa at ne Moroa do ne Nitna, naba venaxa ka ren.

20 \*La at lodoxoma bok at ne Moroa do, ne Nitna naba lok lumulum kantubu at ne Moroa la limixin axap, nedi limixin mede xopok at na lavatbung menemen la nedi limixin to vana at laxalibet. Karisito ga lok lumulum mi lada ren, mo ga sen su ro vana at laxaba.

21 \*Gano migomgo miga nemen paxalom basinge ne Moroa, leveloklok atnimi la lodoxoma atnimi ga lok kapmek la kerepmo migak lok ngan limixin munepen min.

22 \*Ketla monga, Moroa ga lok lumulum eburu minimi mumu mun lanmet at labantuxu at lamdak teren, kusu lorooro atnimi nan mantan tino ap mo laaleng minaba tu saxaven to melango ren. La taxakapmek noxok lok bok ba atnimi la tara noxo lok li bok ba nemi at lavapaase mumu loklok kakapmek.

23 \*Naba lok kuren mo do mina tu tuxuruxun at lununu atnimi la kopmen tara naba sat kaka nemi basinge lununu atnimi saporap Lagale Lavavang. At nom mun Lagale Lavavang la nia ne Pol a tong asu i ngan lasaxaruki at ne Moroa. La na Lagale Lavavang mo di vavang min ti limixin axap at na lavatbung menemen, ni levelinga nemi miga rongga i.

### *Lugugu At Ne Pol Keneng At Lotu*

\* 1:11: Ep 1:19; 3:16 \* 1:12: Ep 1:11,18 \* 1:13: Lu 22:53; Ep 2:2 \* 1:14: Ep 1:6,7 \* 1:15: 2 Ko 4:4; Jo 1:18 \* 1:16: Jo 1:3,10 \* 1:17: Jo 1:1; 8:58 \* 1:18: Ep 1:22-23; Gu 26:23; Li 1:5 \* 1:19: Jo 1:16; Kl 2:9 \* 1:20: Ep 1:10; 2:16; Ro 5:1; Ep 1:7; 2:13; 1 Jo 2:2 \* 1:21: Ro 5:10; Ep 2:12; 4:18 \* 1:22: Ep 2:14-16; 5:27 \* 1:23: Ep 3:17; Ib 3:14; Mk 16:15; 1 Ti 3:16 \* 1:24: Ep 3:13

24 \*La nanga nia a lok momo mumu levesongsongot tarak nia ap kiv i ti lok tooro nimi. La kerepmo a lox epovo levesongsongot no ne Moroa ga lok katling i ria kusu na lok tooro limixin at lotu min, mo i lok ngan labantuxu at ne Karisito.

25 \*La aga lok ka na lugugu ngan lasaxaruki ti limixin at lotu. La ne Moroa axa ga soxolik ka ia rin kusu ana paase asu levelinga at ne Moroa rinimi, la a noxo ke xepe toxot teren.

26 \*Moroa ga lox alipe mo levelinga basinge lavaola axap diga nemen gano, ketla melemu ga lox asuvos i ri limixin teren.

27 \*Moroa ga soxovo li i do na lox asuvos Lagale Lavavang ti limixin teren. Mo levelinga i lok ngan lapnovos silok la i lox asuusu lisixam at ne Moroa. Mo levelinga i lok keretna, Karisito nabat kis esogo eburu mi limixin kopmen di me Judaia la nedi bok dinaba ruuna ka loxot at lasinorong teren.

28 \*Nema ma vavang mi ne Karisito ri limixin. Ma vaase aronga di la ma anasa di mi lakleklen at ne Moroa kusu nedi axap dinaba ruuna ka luruptuvuk manmanton kerekngan ne Karisito la kopmen taxakapmek atdi. La dinaba nemen kuren se ap mo laaleng dinaba tu ro melamgo at ne Moroa.

29 \*Ti lox empana na lugugu, nenia a gugu lolos, mi nom lolos ne Karisito i vetaba min tia la i gugu keneng tarak.

## 2

1 Ana tong axasep nimi do nia a gugu lolos ti lok tooro nimi eburu mi limixin nunu boro Lodisia eburu minedi bok kovisi dina epen etang minia.

2 \*Lavavara rak i lok keretna. Lununu atnemi axap na nemen lolos la mina tu eburu mi labalamu ela kusu lorooro atnemi na umsu mi laxasep

silok, mo i lok ngan lapnovos silok tinimi. Ap mo mun langas nemi minabaklen lodomdoma lipe at ne Moroa, la mo lodomdoma lipe neni ne Karisito.

3 \*Neni mun lengki ti suang mo lodomdoma lipe, kusu limixin dina epovo dinaklen ka mo lodoxoma la lakleklen silok at ne Moroa.

4 \*A malagan na levelinga rinimi, kusu tara noxo xarang arup nimi mi tevelinga xaxarang, keke i do i reng nunuan mene nga.

5 \*Nia a tong i na rinimi mila nenia xopmen anak lok eburu minimi. Ketla a nemen eburu minemi keneng at lodoxoma rak, la a momo do mi tu buru la mi tu tuxuruxun at lununu atnemi keneng at ne Karisito.

### *Keke Mo Leventaangas Linga Kopmen Boro At Ne Moroa*

6 Nemi miga siam kaka ne Iesu Karisito ngan Leeme Silok atnemi, kuren la minat kis esogo eburu min.

7 \*Minam tebeng lolos teren la lununu atnemi na tu tuxuruxun teren kerekngan mo diga lox ase nimi min kuren. La mina umsu mi loklok ti tong loklox avukat ti ne Moroa.

8 \*Mina lok tatao avukat nimi kusu teta noxo lox asoogong nimi mi leventetere xaxarang, kopmen tava-suun teren. Mo lakleklen i laa boro at leveloklox ase at limixin mun la boro bok at leveloklok mede xopok at na lavatkangka, kopmen boro at ne Karisito.

9 \*Lampenaxa at ne Karisito i lok ngan mun ne Moroa. Neni ga lox asuusu nom leveloklok de xopok at na lavatbung menemen ngan laradi.

10 \*La nemi bok miga lok ka vam nom leveloklok at ne Karisito, neni Lamgomgo ri lubang angelo eburu mi limixin lolos atdi.

11 \*Nemi miga lok ka loklok katling at ne Karisito, kopmen mo loklok katling ua limixin di rivit kepe

\* 1:25: Ep 3:2,7-8 \* 1:26: Ro 16:25-26; Ep 3:3-5,9-10 \* 1:27: Ep 1:18; 1 Ti 1:1 \* 1:28: Ep 4:13  
 \* 1:29: Ep 3:7,20; Pl 4:13 \* 2:2: Ep 3:4,18; Kl 1:26 \* 2:3: Ais 45:3; 1 Ko 1:24,30; Ep 3:19 \* 2:4:  
 Ro 16:18; Ep 5:6; Kl 2:8 \* 2:5: 1 Ko 5:3 \* 2:7: Ep 2:20-22; 3:17 \* 2:8: Kl 2:3 \* 2:9: Jo 1:14,16  
 \* 2:10: Ep 1:21-22 \* 2:11: Ro 2:29



lengkontuxu at laxamdak lixilik atdi. Ketla mo loklok katling at ne Karisito i ngan mira lok kepe vam lorooro maut mumu mun lugugu at ne Karisito.

12 \*Se nemi miga lok ka lesep susu, i lok ngan ta do miga vutup at lamaaut eburu mi ne Karisito la ap mo lesep susu bok nemi miga xatu kaxat amlong eburu mi ne Karisito keneng at lununu atnemi la lolos at ne Moroa, mo ga lox aroo xat ne Karisito basinge lanmet.

13 \*Ganoxa nemi miga lok ngan laxampanga met mene, atla migak lok leveloklok kakapmek la mi goxovisi na lok kepe lorooro maut. Ketla ne Moroa ga sar asu nemi ri lorooro eburu mi ne Karisito. Moroa ga doxoma xepe leveloklok kakapmek axap atdik.

14 \*Neni ga lok kepe vam mo lovoang lolos eburu mi leventaangas linga ren mo ga paase axasep laxakapmek atdik. Mo lovoang ga lok ngan lavanga loklok pe kantubu atnedik mi ne Moroa. Moroa ga lok kepe i at loxonaleng ne Iesu ga uu ro vana at laxaba.

15 \*La ne Moroa ga volo kepe laxalolos at laxantoonan kapmek la laxanamgomgo xaxarang keneng at lanmet at ne Karisito to at laxaba. Neni ga lox asuusu i do dinaba lok kaka lainmangan silok.

### *Nemen Mita Mumu Asu Leventaangas Gamasa At Na Lavatkangka*

16 \*Kuren la ixok mokso do tara na ila mumu loklok atnemi mumu mo leveluxa mi anan i la levengkadan mi inin i, koplama mumu larapeluxa at ne Moroa koplama mumu larapeluxa loklok katling ti lagaaling i vot maxat koplama ti laaleng kaala.

17 \*Nom lempanga axap i ngan lamamau mun at lempanga mo naba

vot melemu. Ketla ne Karisito ni luruturun teren.

18 Ixok mokso do tara na tong i rinimi do mixo epovo kusu mina lok kaka leveloklox anarong at ne Moroa. Laradi xerepmo i lok poovo i do i lox asi aleng lorooro ren. I nua i do i ruuna laasen silok mila i lotu saparap lubungangelo la mumu bok levesilimet teren. Ketla i ruuna loklok papavas la i mumu asu mene lodoxoma kopmen tavasuun teren boro at na lavatkangka.

19 \*La ira xap tim tebeng lolos ne Karisito, neni lavatlak at labantuxu. Karisito xa neni imgomgonga na labantuxu, la labantuxu im tem saga mun at lavatlak. La mo do labantuxu na repes boro at lavatlak, neni ixo epovo rinotno na suu maraanu.

20 \*I lok ngan ta do nemi miga met eburu mi ne Karisito la miga sepemus basinge mo leventaangas at na lavatkangka. Tila ba nemi mi mumu asu i nom kerekngan limixin mede xopok? Mi mumu asu na levelinga keretna,

21 "Nemen mita long tu at na. Nemen mita dem pinga i na. Nemen mita rebeng ka i na."

22 \*Na levenngas linga i tu katling levempanga gamasa mun la naba xap gamasa mene mila kopmen na laa boro at ne Moroa. Nedi boro at lodoxoma at limixin mun.

23 Di ven tai mo leventaangas do i ruturun mila nedi di mumu asu i, di lotu amisik, la dik lok poovo i do di lox asi aleng lorooro atdi la dik lox asi aleng labantuxu atdi.\* Ketla mo leventaangas kopmen na lok tooro di kusu dina ke xepe leveloklok kakapmek at labantuxu.

## 3

### *Leventaangas Ti Lorooro Nunuan*

\* 2:12: Ro 6:4; Ep 1:19-20; Kl 3:1 \* 2:13: Ep 2:1,4-5 \* 2:14: Ep 2:14-16; 1 Pi 2:24 \* 2:15: Kl 1:13 \* 2:16: Ro 14:1-12 \* 2:17: Ib 8:5; 10:1 \* 2:19: Ep 2:21; 4:15-16 \* 2:20: Ga 4:3-5,9; 1 Ti 4:3 \* 2:22: Ais 29:13; Mt 15:9 \* 2:23: Anai ni lotu xaxarang la diga lox i na lempanga ri lok poovo i do nedi mo luvuttadi nunu ruturun. \* 3:1: Kl 2:12; Mk 12:36; 16:19; Ep 1:20

1 \*Nemi miga lok kaka lorooro maxat, i lok ngan ta do miga roo xat amlong basinge lanmet eburu mi ne Karisito. Kuren la lebelen nimi na ngaongao ri mo lempanga boro vana at laxalibet, no ne Karisito it kis ap mo loxonin orong teren saparap lekngen tino at ne Moroa.

2 \*Mina lok li alolos lodoxoma atnemi ap mo lempanga la mina ke nom leveloklok mede xopok at lavatkangka.

3 \*Mila lorooro maut atnemi gara met pam, la lorooro maxat atnemi i nemen avukat mi ne Karisito saparap ne Moroa.

4 \*Karisito, ni lavasuun at lorooro ruturun atnemi, la do neni naba ru asuvos, kerepmo nemi bok miba ru asuvos eburu min la minaba ruuna ka lagale lisisinang teren.

5 \*Kuren la mina lok kepe leveloklok kakapmek i nemen atnemi, kerekngan loklok kakapmek maxamang at lixitkis epot, loklok kakapmek at labantuxu, lodoxoma liplivi tik lok laxakapmek, lavavara rik lok laxakapmek, la loklok ti belegaa, mo i lok ngan nom loklok ti lotu parap levempooovo moroa.

6 Na leveloklok naba lox asuusu lebelemamao at ne Moroa mo naba vot.

7 Gano lorooro atnemi ga umsu mi nom lempanga, la migak lox amisix i.

8 \*Ketla monga nemi mina lu xepe mi na leveloklox axap, lumukmusak, lebelemamao, lodoxoma xapmek, loklok ti lox asi tara mi levelinga, la lavapaase xapmek.

9 \*Nemen mita ekarang ela kantubu atnemi, mila nemi miga lok kepe vam mo lorooro maut eburu mi leveloklok teren.

10 \*La miga sang ka lorooro maxat, mo ne Moroa ik lox amaxat amisix i mi lakleklen teren kusu miba lok

ngan lampoovo at ne Moroa, Lanat Tuntudum Li.

11 \*La ti lusuusu ba ren keretna, kopmen bok ba leme Grik dina lok petpes ti leme Judaia, leme Judaia la nedi kopmen di me Judaia, limixin etaba, limixin at lamain, limixin saksaxaruki la limixin di nemen gamasa mun. Legesa Karisito mun ik lok la i suxuna lorooro atnedi axap.

12 \*Nemi lavaanat soksoxolik at ne Moroa la neni i balamu nemi. Kuren la, mina siga ka lebelen tuntun, labalamu, langsung loklok ngangao, loklox anare la loklox atnaasan.

13 \*Mina mulus kaka nedi limixin di vamigis nemi la mina doxoma xepe laxakapmek atnedi di lok laxakapmek tinimi. Mina doxoma xepe laxakapmek atnedi kerekngan Leeme Silok i doxoma xepe laxakapmek atnemi.

14 \*La lara lavanga bok mo i silok ti nom levempipisik nunuan at lorooro, ni labalamu. La mina lox aumsu nemi mi labalamu mo naba lok eburu avukat limixin axap.

15 \*Mina ke limila na suxuna lorooro atnemi, mo limila ne Karisito im taba i. Mila ne Moroa ga ro xaka nemi kusu mina nemen keneng at limila ngan legesa bantuxu. La amisik mina tong loklox avukat ti ne Moroa.

16 \*La mina ke levelinga at ne Karisito na nemen atmatkun keneng at lorooro atnemi. Mina umsu min mo do mina lox ase la mina vaase axasep ela nemi mi lakleklen at ne Moroa. La minak pixan ti ne Moroa mi lengkompixan at ne Devit la lengkompixan at lotu la lengkompixan emi asu. La lorooro atnemi na umsu mi loklok ti tong avukat saparap ne Moroa.

17 \*Levempanga axap mi lox i la mi vaase i, mina lox i at laasen at Leeme Silok ne Iesu. La mina tong loklox avukat ti ne Moroa, ne Temen

\* 3:2: Mt 6:33 \* 3:3: Ro 6:2; 2 Ko 5:14 \* 3:4: Pl 1:21; 1 Ko 15:43; 1 Jo 3:2 \* 3:5: Ro 6:6,11; 8:13; Ep 4:19; 5:3-6 \* 3:8: Ep 4:25-31; 5:4 \* 3:9: Ep 4:22,25 \* 3:10: Ep 4:24 \* 3:11: Ga 3:28 \* 3:12: 1 Pi 2:9; Ep 4:2,32 \* 3:13: Ep 4:32; 5:2 \* 3:14: Ro 13:8-10; 1 Ko 13:13; Ep 4:3 \* 3:15: Pl 4:7; 1 Ko 12:13,27; Ep 4:4 \* 3:16: Ep 5:19 \* 3:17: 1 Ko 10:31; Ep 5:20

nedik mumu leveloklox anarong at ne Karisito.

### *Loklok At Lixitkis Koetemen*

18 \*Nemi lavakin. Minang tonga res at levendoxoma at lavatlok atnimi mila na loklok, ni loklok at lavakin di nunu at Leeme Silok.

19 \*Nemi lavatlok. Mina balamu lavakin atnimi, la nemen mita metlaa tidi.

20 \*Nemi laxamdak mi laxaalik. At lorooro axap atnemi, minang tonga res at luvuttemen nimi mi luvutnen nimi. Do mina lox i xuren, nom loklok naba lox amomo Leeme Silok.

21 \*Nemi luvuttemen laxamdak mi laxaalik. Nemen gat mita lox abulu laxamdak mi laxaalik atnimi. Lavanga dina lok tuntun aleng.

22 \*Nemi lavasaxaruki. Minang tonga res at luvuttadi amgomgo atnemi at levempanga axap. Kopmen do ap mo mene nga loxonaleng di reven tatao nemi kusu mi vara i do dinaba ven lenget luruptuvuk nunuan atnimi. Ketla mina lok lugugu atnimi mi lomomo at lebelen nimi la loklok ngangao saparap Leeme Silok.

23 Mo do lavanga salai mi lox i, mina gugu ren mi lorooro axap atnimi, kerekngan tai do mi gugu at Leeme Silok la kopmen ti laradi mun at na lavatbung menemen.

24 Mina xasep do Leeme Silok naba raba nimi mi leventamtaba, i ngan luunun tinimi, mila nemi mi gugu ri ne Karisito, neni Leeme Silok atnimi.

25 \*La limixin bilinga axap naba lok ka luunun naba epovo mi leveloklok kakapmek dik lox i, mila ne Moroa i viila limixin axap mi legesampoovo mene nga.

## 4

1 \*Lavaeme amgomgo, minak lok tatao nunuan lavasaxaruki atnimi la loklok nemi minak lox i rinedi na lox avukat. Mina lox i xuren mila nemi

bok mi ruuna Leeme Silok no vana at laxalibet.

### *Mina Ngising Amisik*

2 \*Mina ngising amisik, la levesingising atnimi na ruturun mene nga, la mina tong loklox avukat ti ne Moroa.

3 \*La mina ngising bok tinema kusu ne Moroa naba suang lumusmaragu nade rinama ti paase asu Lagale Lavavang mumu ne Karisito, gano mo Lagale Lavavang ga nemen ali-pe. La nenia a nemen at loogu xokoxo mumu mun i mo Lagale Lavavang.

4 \*Mina ngising ne Moroa do nia ana valas axasep nunuan levelinga ren kusu limixin dina xasep teren. La levelinga at ne Moroa naba xasep kerekngan ne Moroa i vara i.

5 \*Mina ruuna ka loklok nunuan at lorooro atnimi rip tuvuk avukat saparap nedi nom kopmen dina nunu. La mina gagas at levenaleng axap ti tong asu Lagale Lavavang tidi.

6 \*Levempapaase atnimi nap tavasuu nunuan amisik kusu tik lox amomo limixin. La mina gagas do minaba vorang avukat limixin mi levelinga at ne Moroa.

### *Levelinga Xavaxap*

7 \*Netak orong ne Tikikas, ni laradi i ruturun at lugugu ren la lasaxaruki eburu minema at lugugu at Leeme Silok. Neni naba raba nemi mi lava-paase axasep mumu ia.

8 \*La nenia aga lox aonon i udom saparap nemi, kusu ti lok kaxat lomomo atnemi la na tong i do nema mo map tuvuk kereva.

9 \*Neni ba emu eburu bok mi ne Onesimas, neni laradi ruturun la netak orong. Neni at libinam tadi atnemi. Nedu dunaba tong asu lempanga salai mo it pot nade.

\* 3:18: Ep 5:22 \* 3:19: Ep 5:25 \* 3:20: Ep 6:1 \* 3:21: Ep 6:4 \* 3:22: Ep 6:5-8 \* 3:25: Ro 2:11 \* 4:1: Mas 25:43,53; Ep 6:9 \* 4:2: Ep 6:18; Pl 4:6 \* 4:3: Ro 15:30; Ep 6:19; 1 Ko 16:9 \* 4:4: Ep 6:20 \* 4:5: Ep 5:15-16; 1 Ts 4:11-12 \* 4:6: Ep 4:29; 1 Pi 3:15 \* 4:7: Ep 6:21 \* 4:8: Ep 6:22 \* 4:9: Pm 1:10-12 \* 4:10: Gu 19:29; 12:12; Pm 1:24

10 \*Aristakas, mo i nemen eburu minia at loogu xokoxo, i lox aonon bok lavapaase momo ren. La ne Mak, lovopno at ne Banabas bok kuren. Nemi migara lok ka vam lava-paase axasep ti siam abeles ne Mak dola ni na mu langas uto atnemi.

11 Josua, laasen bok teren ne Jastas, i lox aonon bok lavapaase momo rinimi. Nedi na lavantun mene boro Judaia kantubu atnedi di gugu eburu minia rik lok ka limixin uto at Lin-intoo at ne Moroa, la dik lox amene-men ia.

12 \*Lavapaase momo rinimi boro at ne Epapras, lara at libinam tadi atnemi. Neni lasaxaruki at ne Iesu Karisito. Neni i ngising lolos amisik tinemi, i ngising ne Moroa ri lox alolos nemi kusu mina tu tuxuruxun keneng at lununu atnemi kerekngan limixin mukun la minaba xasep aleng at lodoxoma at ne Moroa.

13 Na nenia a tong asu langsung lugugu ren tinimi la ti limixin bok to Lodisia la to Irapolis.

14 Lentangas orong atdik ne Luk, leeme loklok tatao anmeres, nedu mi ne Demas du lox aonon lavapaase momo rinemi.

15 Mina lox aonon lavapaase momo rak ti luvutneton dik mo di nemen to Lodisia la ti mo latkin ne Nimpas, la tinedi limixin lotu mo dit pot etang amisik to at loogu ren.

16 Melemu do mina us axap na levelinga i nemen keneng at na lovoang, mina xasep bok do mina us box i ro xeneng at loogu lotu to Lodisia. La mina us bok mo lovoang, luvutneton dik me Lodisia dinaba raba nimi min.

17 \*La mina vaase bok ti ne Akipas keretna, “Una lolos kusu una lox epovo mo lugugu Leeme Silok ga raba u min.”

18 \*A malagan i na lavapaase momo mi lakngak akmokso. Lava-paase momo rinimi boro at ne Pol. Nemen mita domampe i do nenia ak lok de at loogu xokoxo.\*

Mo letaba nabalamu at ne Moroa na nemen amisik eburu minemi.

\* 4:12: Kl 1:7; 2 Ti 4:10-11; Pm 1:24 \* 4:17: Pm 1:2 \* 4:18: 1 Ko 16:21 \* 4:18: Pol ga sok mene lavapaase momo, la lara vetpes ga malagan levelinga ne Pol ga vaase i min.

# 1 Tesalonia

## Lovoang Avot At Ne Pol

### Ti Limixin Nunu To

### Tesalonia

## Levelinga Loklox

## Axasep

### Lamaares 52 A.D.

Ise ne Pol gak lok to Korin neni ga malagan i na lovoang avot tinedi limixin nunu to Tesalonia. Tesalonia neni langsung lemenemen silok at lenep Masadonia. At lavatpas sepsev agepura at ne Pol neni ga vavang tinedi limixin mi Lagale Lavavang mo go Tesalonia, la ni lavavang avot teren ti mo lemenemen. Keneng mun at nai lavavang teren la lentaba luvuttadi diga ravasu ngan luvuttadi nunu (Leven Gugu 17:1-14). Lentaba atdi na luvuttadi nunu nedi me Judaia, ketla buaang atnedi na luvuttadi diga nunu, nedi kopmen di me Judaia. La tinedi na luvuttadi me Judaia, lentaba atdi diga nunu la diga on basinge lotu at leme Judaia. Kuren la luvuttadi amgomgo at limixin me Judaia diga reven peves atdi la diga xala aonon ne Pol eburu mi larapentangas teren, la digat pas uto Beria. Melemu at nai ne Pol ga riki aonon ne Timoti la ni gat pas uto Tesalonia. Se neni gamlong, neni ga tong asu levelinga avukat mumu nedi.

#### **Lengkot silok keneng at na lovoang**

1:1 Lavapaase momo at ne Pol.

1:2-10 Pol ga tong aorong ti ne Moroa.

2:1-3:13 Levelinga mumu lorooro at ne Pol kantubu atnedi.

4:1-12 Leventaangas ua i lox avukat ti limixin nunu.

4:13-5:11 Levenanasa mumu lomlong sepsev agepura at ne Iesu.

5:12-28 Lempapaase loklox alolos.

#### *Lavapaase Axasep*

<sup>1</sup>\*Nenia ne Pol. Nema mi ne Sailas la ne Timoti, ma malagan na lovoang tinemi limixin nunu dom Tesalonia. Nemi limixin at ne Moroa, ne Temen dik la Leeme Silok, ne Iesu Karisito.

Letaba nabalamu la lenmila rinemi boro at ne Moroa.

#### *Lorooro La Lununu At Limixin Boro Tesalonia*

<sup>2</sup>\*Ma tong avukat amisik ti ne Moroa mila nemi mi tu atmatkun at lununu atnemi. La ma ngising amisik tinemi at levesingising atnama.

<sup>3</sup>\*Mam doma su amisik atnemi at lemeren ne Moroa mumu leven gugu nunuan miga lox i, mila mi nunu at ne Iesu Karisito, la mi balamu box i. La mi tu atmatkun mila mim doma voovo ri lovtopot at Leeme Silok, ne Iesu Karisito.

<sup>4</sup>Luvutnetak mi luvurinu. Moroa i balamu nemi la ma ven kibis i do gano neni ga soxolik ka nemi xusu mina nunu ren.

<sup>5</sup>\*Maklen i na mila ap mo levenaleng nema maga tong asu Lagale Lavavang tinimi, goxopmen levelinga mene nga. Ketla levelinga ga lolos la maga lok bok levempanga sangsangu mi lolos at Loroonan Kaala. La miga ven i do nema maga nunu ruturun at Lagale Lavavang. La luruptuvuk atnama ga lox avukat kusu mana lok tooro nemi.

<sup>6</sup>\*Miga siam kaka Lagale Lavavang mi lomomo. La limixin diga lox asongot nemi, ketla nemi move miga umsu mi lomomo, mo Loroonan Kaala ga raba nemi min. La kerepmo miga mumu asu loklok at Leeme Silok la atnema bok.

<sup>7</sup>\*La limixin nunu boro at lunep silok Masadonia la Grik diga ronga levelinga ap mo loklok atnemi, la diga mumu asu i.

<sup>8</sup>\*Buaang limixin ap mo lunep silok la ap mo levennep petpes bok diga ronga i do miga nunu at levelinga at Leeme Silok. Kuren la nema ma noxo tong asu bok ba mo

\* 1:1: Gu 17:1-10; 2 Ts 1:1    \* 1:2: Pl 1:3-4; Kl 1:3; 2 Ts 1:11    \* 1:3: 1 Ko 13:13; Kl 1:4-6    \* 1:5: 1 Ko 2:4-5; 4:20    \* 1:6: 1 Ko 4:16; 2 Ts 3:9; Gu 17:5-9    \* 1:7: 1 Pi 5:3    \* 1:8: Ro 1:8

levelinga do nemi miga siam kaka vam Lagale Lavavang.

<sup>9</sup> \*Nedi xa diga tong i rinama do miga siam abeles kaka nama mi lomomo, la miga lok kepe laxampoovo moroa la miga lok kaka lununu maxat saparap ne Moroa, neni ne Moroa ruturun la Luntoo Avolo.

<sup>10</sup> \*La di tong box i do nemi mit kis tangais ne Nitna, mo naba vot boro vana at laxalibet. Moroa ga lox arooro amlong ne Iesu basinge lanmet, la ni ik lox arooro bok dik kusu ta noxo ekip tangarang mi lebelema-mao ren, mo naba rupot.

## 2

### *Lugugu At Ne Pol To Tesalonia*

<sup>1</sup> \*Luvutnetak mi luvurinuk. Nemi mikleklen i do lovtopot atnama saparap nemi ga visik asu levempipisik nunuan.

<sup>2</sup> \*Miklen i do maga vavang avot to Pilipai la limixin me go diga lox asongot nama, la diga paase sese kapmek tinama. Melemu magat pas uto at lemenemen atnemi dom Tesalonia, la buaang atnedi diga xopara nama. Ketla ne Moroa ga lok kepe lanmarat basinge nama, la maga tong asu Lagale Lavavang tinimi.

<sup>3</sup> Se maga vavang tinimi, maga paase mokmokso, la luruptuvuk atnama ga lox avukat aleng la ma goxo xarang nemi.

<sup>4</sup> \*Ganoxa ne Moroa ga ven i do lorooro atnama ga lox avukat la ga raba nama mi Lagale Lavavang teren kusu mana tong asu i. Maga xopara na emi asu minama, ketla maga vavang kusu ne Moroa na lok momo minama. Neni iklen lodoxoma atnama do i lox avukat kopla kopmen.

<sup>5</sup> \*Ap mo levenaleng maga vavang tinimi, ma goxo lox atdan kaka tevempanga atnemi la ma goxo ruuna loklok belegao. Nemi miklen i

na la ne Moroa bok iklen i do loklok atnama ga lox avukat mun.

<sup>6</sup> \*La maga xopara limixin petpes eburu minemi mina emi asu minema.

<sup>7</sup> Ketla nema luvuttadi vavang at ne Iesu Karisito. La keneng at na maga epovo ri sing panga nemi, ketla ma goxo lox i xuren. La ma goxo paase lolos tinimi. Ketla loklok atnama gak lok mulus atnaasan mun kerekngan latkin i lok tatao laxamdak mi laxaalik kakalik teren.

<sup>8</sup> La maga lolos aleng kusu mana tong asu Lagale Lavavang tinimi la magap kip levenmumuat. Kerepmo maga balamu nemi.

<sup>9</sup> \*Luvutnetak mi luvurinuk. Mina doma bilong ti mo lugugu lolos atnama. Maga tong asu Lagale Lavavang at ne Moroa rinimi, la maga gugugu at lengkangking la at lengkangimin. Maga gugugu pilas kusu nemi mi noxo kepe tevempilas atnemi xusu ti lok tooro nama.

<sup>10</sup> Miga reven loklok atnama, la ne Moroa bok ga reven i, dola luruptuvuk atnama gan mantan la ga lox avukat aleng kantubu atnemi limixin nunu la goxopmen taxakapmek gak lok atnama.

<sup>11</sup> \*Miklen i do maga anasa nemi getgesara ngan laradi i anasa lamdak teren.

<sup>12</sup> Maga paase tooro nemi, la maga paase amenemen nemi. Maga paase aronga nemi xusu lorooro atnemi na lox avukat kerekngan ne Moroa i vara i. Moroa ga ro ka nemi xusu minaba nemen eburu min to xeneng at Linintoo ren la minaba lok kaka loxot at lasinorong teren.

<sup>13</sup> \*La nema ma tong avukat amisik ti ne Moroa mumu nemi. Ap mo laaleng miga siam kaka levelinga at ne Moroa maga tong asu i rinimi, miga doma i do mo levelinga boro at ne Moroa, la goxopmen levelinga at limixin mun. Mo levelinga i gugugu

\* **1:9:** Gu 14:15    \* **1:10:** Ta 2:13; Gu 17:31; 1 Ts 5:9    \* **2:1:** 1 Ts 1:5,9    \* **2:2:** Gu 16:19-24; 17:1-9  
 \* **2:4:** 1 Ti 1:11; Ga 1:10; Jer 11:20    \* **2:5:** Gu 20:33; 2 Pi 2:3; Ro 1:9; 1 Ts 2:10    \* **2:6:** Jo 5:41,44  
 \* **2:9:** Gu 20:34; 1 Ko 4:12    \* **2:11:** Gu 20:31; Pl 1:27; 1 Pi 5:10    \* **2:13:** 1 Ts 1:2; 2 Ts 2:13; Ga 1:11-12

xeneng at lorooro atnemi limixin mi nunu.

<sup>14</sup> \*Luvutnetak mi luvurinuk. Lorooro atnemi ga vee ngan lorooro at limixin nunu at ne Moroa to Judaia, mo di nunu at ne Iesu Karisito. Nedi digap kip levesongsongot mumu lununu atdi, mila limixin me Judaia axa diga lox asongot di. La kerepmo nemi bok migap kip levesongsongot, mila limixin mi legesa vapaase atnemi diga lox asongot nimi.

<sup>15</sup> \*La mo limixin me Judaia diga sev amet Leeme Silok ne Iesu. Ganoxa lavalabat atdi diga sev amet lavaeme vapaase ali at ne Moroa. La nedi diga riki xepe nama boro at lenep silok Judaia. Moroa i xopara ri mo loklok atdi. La dik lok kapmek lixitkis at limixin axap keretna.

<sup>16</sup> \*Digak lok pe nama xusu ma noxo tong asu bok Lagale Lavavang tinedi limixin kopmen di me Judaia, kusu di noxo vubeles at Linintoo at ne Moroa. Laxakapmek atnedi limixin me Judaia i silok la mo laxakapmek ti lok pe limixin kopmen di me Judaia i lox asilok laxakapmek atdi. Kuren la lebelemamao at ne Moroa ira rupot pam saparap di.

#### *Pol Ga Vara Aleng I Xusu Na Ven Limixin Boro Tesalonia*

<sup>17</sup> \*Luvutnetak mi luvurinuk. Lev-entaba limixin dom Tesalonia diga riki xepe nama basinge nimi, la maga nemen to Atens at leventaba leven gaaling. Ketla maga doxoma amisik nimi, la maga lok bukbulu aleng la maga lolos kusu mana vot pasa nimi.

<sup>18</sup> \*Maga lok do mana vot pasa nimi. Nenia xa, ne Pol, amisik aga lok tong pen i xusu ana vot pasa nimi, ketla ne Satan ga tupe nama.

<sup>19</sup> \*Maga lolos do mana vot pasa nimi mila lununu atnemi i lox alolos lorooro atnama, la mi lox amomo nama. La manaba lok momo aleng

ap mo laaleng Leeme Silok, ne Iesu nabamlong teren, mila mi tu atmatkun at lununu atnemi.

<sup>20</sup> I ruturun tinotno. Mi lox amomo aleng nama.

## 3

### *Timoti Gat Pas Uto Tesalonia*

<sup>1</sup> \*La ma goxo epovo do mana ngangais gamasa ro Atens. Kuren la maga siam do nema mi ne Sailas manak lok be ro Atens,

<sup>2</sup> \*la maga riki ne Timoti kusu na vot pasa nimi. Neni i lok ngan neton dik la neni bok ik lok lugugu at ne Moroa, la i vavang mi Lagale Lavavang at ne Iesu Karisito. Maga riki i xusu neni na lox alolos lununu atnemi la na paase tooro nimi.

<sup>3</sup> \*Mila nemi mip kip levesongsongot la ma xopara i do tara atnemi na subu at lununu ren. Miklen i do ne Moroa ga soxolik ka nedik, kusu atap kip levesongsongot.

<sup>4</sup> \*Maga nemen eburu minemi, la maga tong i rinimi do nedik atanabap kip levesongsongot. La nemi mi xasep do mo levelinga atnama ga vot tuturun, levesongsongot ga rupot saparap dik.

<sup>5</sup> \*Kuren la nenia a goxo epovo do ana ngangais gamasa, la aga riki ne Timoti saparap nimi xusu neni naklen ka be lununu atnemi, do i ruturun ne Satan ga lok tong pen nimi la miga subu vam. La mo lugugu maga lox i xantubu atnemi ga ravasu ngan lavanga gamasa.

<sup>6</sup> \*Ketla nanga ne Timoti gamlong basinge nimi ude la neni ga tong asu levelinga avukat tinama. Neni ga tong i rinama do lununu mi labalamu atnemi move i lolos la lodoxoma atnemi i lok momo minema. La mi vara aleng i do mina ven nama ngan nema ma vara aleng i do mana ven nimi.

\* **2:14:** Gu 17:5    \* **2:15:** Gu 2:23; 7:52    \* **2:16:** Mt 23:32-33    \* **2:17:** 1 Ts 3:10    \* **2:19:** Pl 2:15-16; 4:1; 2 Ts 1:4    \* **3:1:** Gu 17:15    \* **3:2:** Gu 16:1-3    \* **3:3:** Ep 3:13; 2 Ti 3:12    \* **3:4:** Gu 14:22    \* **3:5:** Pl 2:16    \* **3:6:** Gu 18:5    \* **3:7:** 2 Ts 1:4

7 \*Luvutnetak mi luvurinuk, map kip levesongsongot mi levenmu-muat, ketla ma lok momo mila lununu atnimi i tu atmatkun.

8 La ma rooro avukat mila lununu atnimi i tu atmatkun at Leeme Silok.

9 Nema ma emi asu mi ne Moroa mumu nimi. Nemi mi lox amomo aleng nama at lemeren ne Moroa.

10 At levenaleng kanimin la levelaleng kangking ma ngising amisik ne Moroa do mana vot pasa nimi la mana lok tooro nimi, kusu mana lox epovo lavakpakes at lununu atnimi.

11 \*Lisingising atnama keretna. Moroa ne Temen dik eburu mi ne Iesu, Leeme Silok atdik duna lok tangas tinama xusu manaba vot pasa nimi.

12 La Leeme Silok na lox asilok labalamu atnimi xusu mina ebalamu ela la mina balamu aleng limixin petpes bok, kerekngan nema ma balamu nimi.

13 \*La kerepmo neni na lox alolos lorooro atnimi xusu lorooro atnimi nan manton tino at lemeren ne Moroa ne Temen dik, ap mo laaleng ne Iesu, Leeme Silok atdik nabamlong eburu mi limixin melemelengan teren.

## 4

### *Loklok Ne Moroa I Momo Aleng Tin*

1 \*Nia ana lox axap levelinga rak. Luvutnetak mi luvurinuk. Maga lox ase vam nimi mi lavatpas at limixin di nunu xusu mina rooro avukat la mina lok mo levempanga avukat ne Moroa i vara i. Mik lox i xerepmo, ketla ma sing nimi at lemeren Leeme Silok, ne Iesu keretna. Mina lolos kusu lorooro atnimi naba lok nunuan axap.

2 Mi xasep pam at levelinga at Leeme Silok, ne Iesu, maga tong i rinimi.

3 \*Moroa i vara i do lorooro atnimi nan manton tino. Mina ke xepe

loklok ti elongka la loklok kakapmek maxamang at lixitkis epot.

4 \*Nemi getgesara mina xasep at loklox avukat ti epot kaka tatkin la mina lox i nom mi loklok nunuan.

5 La kerepmo nemen mita mumu asu mo loklok kakapmek at labantuxu kerekngan nedi dixoklen ne Moroa.

6 \*La kerepmo bok nemen mita lok kapmek lixitkis at luvutneton nimi di nunu at ne Iesu. Maga tong axasep pam i do Leeme Silok ne Moroa naba lox asongot nedi di lok kapmek lixitkis epot.

7 \*Moroa ga ro ka nimi xusu mina nemen manmanton tino, kopmen do ri lox abilinga lorooro atnimi.

8 \*Kuren la nedi mo di noxo rongares at na levelinga atnama, dixo lox abulubun kepe nama, ketla di lox abulubun kepe levelinga at ne Moroa, mo ga raba nimi mi Loroonan Kaala ren.

9 \*Nema noxo malagan tevelinga mumu labalamu atnimi saparap limixin nunu. Mila ne Moroa ga lox ase vam nimi do mina ebalamu ela.

10 \*Luvutnetak mi luvurinuk. I rurun do mi balamu nedi axap luvutneton dik to at lenep silok Masadonia. Ketla ma tong alolos i rinimi do mina balamu aleng di.

11 \*La mina lolos kusu minat kis mulus at lorooro atnimi la mina lok tatao avukat levempanga atnimi. Mina gugu xusu mina lok kaka levempanga mik pakes tin at na lorooro. Mina lox i na xerekngan magara tong pam i rinimi gano.

12 \*Kerepmo lavamolon dinaba lok ngangao atnimi la mi noxok pakes ti loklok tooro at limixin petpes.

### *Leeme Silok Naba Ro Xaka Limixin Teren*

13 \*Luvutnetak mi luvurinuk. Ma vara i do mina xasep mumu nedi digara met pam. La ma xopara i do

\* 3:11: 2 Ts 2:16 \* 3:13: Pl 1:10; 2 Ts 1:7,10 \* 4:1: 2 Ts 3:6 \* 4:3: 1 Ts 5:23; Ib 10:10; 1 Pi 1:16  
 \* 4:4: 1 Ko 6:13,15; Sam 79:6 \* 4:6: Sam 94:1 \* 4:7: 2 Ts 2:13-14; 1 Pi 1:15-16 \* 4:8: Lu 10:16; Isi 36:27; 37:14; 2 Ko 1:22 \* 4:9: Jo 13:34 \* 4:10: 2 Ts 3:4 \* 4:11: Ep 4:28; 2 Ts 3:8,12 \* 4:12: 1 Ko 5:12-13; Kl 4:5 \* 4:13: Ep 2:12



minak lok bukbulu xerekngan nedi limixin kopmen dina nunu at ne Iesu Karisito. Do tara atdi na met, di lok bukbulu aleng mila dixo doxoma voovo ri lorooro melemu.

<sup>14</sup> \*Ketla nedik ta nunu do ne Iesu ga met la ga roo xat bok. Kuren la ata nunu do ne Moroa naba ro xaka nedi limixin nunu diga met pam. La dinabat pas eburu mi ne Iesu uto vana at laxalibet.

<sup>15</sup> \*Na lavapaase axasep boro at Leeme Silok. Nedi limixin nunu move di rooro at lomlong at Leeme Silok, di noxomgo avot upana rinedi diga met pam.

<sup>16</sup> \*Ap mo laaleng limixin dinaba ronga luxupkup silok la laangelo gomgo naba toro. Luru at ne Moroa nabang teng, la Leeme Silok naba si ukopok boro vana at laxalibet. La nedi limixin nunu diga met pam, dinaba roo xat amlong la dinaba urut avot.

<sup>17</sup> \*La nedi limixin nunu move di rooro ap mo laaleng, dinaba urut la dinaba vot pasa nedi digamgo vam at labantakabu. La dinaba ekip tangarang mi Leeme Silok to at lamavangkap la nedik tanaba nemen amisik eburu min.

<sup>18</sup> Kuren la mina elok tooro ela mi na levelinga xeneng atnemi.

## 5

### *Lagagas Ali Ti Lomlong At Leeme Silok*

<sup>1</sup> \*Luvutnetak mi luvurinuk. Nema ma noxo tong i rinimi at ua laaleng ne Iesu nabamlong teren.

<sup>2</sup> \*Mila mi xasep tinotno do mo laaleng naba rupot ngan laradi xipkip pilo i rupot at laxanimin.

<sup>3</sup> \*Limixin dinaba lok keretna, "Limila ik lok at na lavatbung mennen. Lanmarat kopmen nak lok de." Ketla leeteke silok naba vot saparap limixin at na lavatbung menemen. Mo laaleng naba rupot soso mun.

Naba lok ngan mo losongsongot it pot at latkin i suma lamdak. La kopmen tara noxo epovo na sixiro basinge i.

<sup>4</sup> Ketla nemi luvutnetak mi luvurinuk, mi noxo rakdu ap mo laaleng ngan laradi xipkip pilo i lox arakdu limixin, atla kopmen minak lok at lamain.

<sup>5</sup> \*Nemi axap mik lok at laxasep at ne Moroa. I lok ngan ta do mi nemen at laaleng kangking la levempanga i xasep.

<sup>6</sup> Kuren la nemen dik guta vunga xerekngan limixin kopmen dina nunu at ne Iesu. Ketla ata gagas avukat la nemen dik guta nemen tangtangu.

<sup>7</sup> Mila nedi di vunga la di inin tangtangu, di nemen at lamain.

<sup>8</sup> \*Ketla nedik limixin at laxasep, atam tebeng lodoxoma nunuan la ata umsu mi lununu mi labalamu, i lok ngan lenban tik lok pe laxakapmek. La ata lok ka lodoxoma voovo ri loklox arooro at ne Moroa. Na lodoxoma i lok ngan lavatkiam ti lok tooro nedik at lorooro atdik.

<sup>9</sup> \*Moroa xopmen goxo soxolik ka nedik kusu tana ekip tangarang mi lebelemamao ren. Ketla neni ga soxolik ka dik kusu taba lok kaka loklox arooro at Leeme Silok, ne Iesu Karisito.

<sup>10</sup> \*Ni ga met kusu dik tanaba nemen eburu min. Do nedik taga met pam koplak move taba rooro se at lomlong teren, tanaba nemen amisik eburu min.

<sup>11</sup> \*Kuren la mina elok tooro ela mi na levelinga la mina lox alolos lorooro atnemi ngan migara lok pam i.

### *Lavapaase Loklox Axap*

<sup>12</sup> \*Luvutnetak mi luvurinuk. Ma sing nemi dola mina lok ngangao

\* **4:14:** Ro 14:9; 1 Ko 15:3-4,12 \* **4:15:** 1 Ko 15:51 \* **4:16:** 1 Ts 1:10; 2 Ts 1:7; 1 Ko 15:52 \* **4:17:** Jo 12:26 \* **5:1:** Mt 24:36 \* **5:2:** Mt 24:42-44; 2 Pi 3:10; Li 3:3 \* **5:3:** Isi 13:10; Mt 24:39; Lu 21:34-35; Jo 16:21-22 \* **5:5:** Ro 13:12; Ep 5:9 \* **5:8:** Ep 6:14,17 \* **5:9:** 1 Ts 1:10; 2 Ts 2:14 \* **5:10:** Ro 14:8-9; 1 Ts 4:14 \* **5:11:** Ju 1:20 \* **5:12:** 1 Ko 16:18; 1 Ti 5:17

atnedi limixin, Leeme Silok gara sox-  
olik ka vam di xusu dinam gom-  
gonga rinimi at lotu. Nedi dik lok  
tatao lorooro atnimi la dik lox ase  
nimi mi levelinga at Leeme Silok.

<sup>13</sup> La mina balamu aleng di mila di  
gugu at lugugu at ne Moroa. La mina  
umsu mi limila at lixitkis atnimi.

<sup>14</sup> \*Luvutnetak mi luvurinuk. Ma  
tong i rinimi do mina paase aronga  
nedi dik molo. La mina paase tooro  
nedi dik marat soso. La mina lok  
tooro nedi lununu atdi xopmen na  
lolos, la minat kis mulus mi limixin  
axap.

<sup>15</sup> \*Nemen gat tara guta vorang  
laxakapmek mi laxakapmek. Ketla  
mina lolos amisik kusu mina lox asu-  
usu loklox anare kantubu atnimi la ti  
limixin petpes bok.

<sup>16</sup> \*Minak lok momo amisik.

<sup>17</sup> \*Mina ngising amisik saparap ne  
Moroa.

<sup>18</sup> \*Mina tong avukat ti ne Moroa at  
levenaleng axap. At lorooro atnemi  
mi nunu at ne Iesu Karisito, mina lok  
na leveloklok mila ne Moroa i vara i.

<sup>19</sup> \*Nemen mita rupe lugugu at  
Loroonan Kaala.

<sup>20</sup> \*Nemen mitang tonga xepe lev-  
elinga atnedi di vavang tinimi.

<sup>21</sup> \*La mina lok tong pen levem-  
papaase maxat. Minam tebeng lolos  
mo levelinga i lox avukat

<sup>22</sup> la mina ke xepe mo levelinga i  
lok kapmek.

<sup>23</sup> \*A sing ne Moroa i umsu mi  
limila, do neni na lox adadat lorooro  
atnimi la neni na lox alolos lodox-  
oma eburu mi lorooro la labantuxu  
atnimi, kusu minaba nemen man-  
manton at lemeren ne Moroa ap mo  
laaleng Leeme Silok, ne Iesu Karisito  
nabamlong teren.

<sup>24</sup> Moroa ga ro xaka nimi xusu neni  
na lox arooro nimi la levelinga ren  
i ruturun. Neni xa naba lok mo  
levempanga at lorooro atnimi ngan  
ni ga tong ali vam i.

<sup>25</sup> \*Luvutnetak mi luvurinuk.  
Mina sing ne Moroa xusu ni naba  
lok tooro nama.

<sup>26</sup> \*Mina seega rangarang limixin  
nunu mi lenetnes i xaala.

<sup>27</sup> A tong i rinimi at lemeren Leeme  
Silok do mina exes na lovoang ti  
limixin axap at lotu.

<sup>28</sup> Letaba nabalamu rinemi boro at  
Leeme Silok atdik, ne Iesu Karisito.

\* 5:14: 2 Ts 3:6,11,15 \* 5:15: Ler 20:22; Ro 12:17; 1 Pi 3:9 \* 5:16: Pl 4:4 \* 5:17: Lu 18:1  
\* 5:18: Ep 5:20 \* 5:19: Ep 4:30 \* 5:20: 1 Ko 14:1,39 \* 5:21: 1 Jo 4:1; Jop 1:1,8; 2:3 \* 5:23:  
1 Ko 1:9; 2 Ts 3:3 \* 5:25: Kl 4:3; 2 Ts 3:1 \* 5:26: Ro 16:16

**2 Tesalonia**  
**Lovoang Sepsev Agepura**  
**At Ne Pol**  
**Ti Limixin Nunu To**  
**Tesalonia**  
**Levelinga Loklox**  
**Axasep**  
**Lamaares 53 A.D.**

Pol move gak lok to Korin la ni ga malagan i na lovoang sepsev agepura uto rinedi luvuttadi nunu to Tesalonia. Pol gara ronga xora vam i do lentaba luvuttadi boro mo Tesalonia mo di goxo nunu at lomlong sepsev agepura at ne Iesu. Diga doxoma ekarakat i do ne Iesu mo garamlong pam, kuren la digaptuvuk gamasa la di goxo lok tepempanga. Keneng at nai lovoang ne Pol ga anasa di do laradi sosolo arup naba vot la na bala arup buaang limixin ti laxakapmek. La melemu ba Laradi Manmanton ne Iesu Karisito nabamlong kusu limixin kakapmek dinaba lok ka luunun kapmek tidi. Pol ga vaase lolos bok tidi la ga vara i xusu dina lox ekun lorooro atdi, kusu dina lox asusu teven gugu nunuan.

**Lengkot silok keneng at na lovoang**

1:1-2 Lavapaase momo at ne Pol.

1:3-12 Pol ga tong aorong ti ne Moroa ti lurutu lolos atdi.

2:1-17 Levenanasa mumu laradi sosolo arup la lomlong at ne Iesu.

3:1-15 Lempapaase loklox alolos mumu leven gugu nunuan.

3:16-18 Pol ga vaase abeese.

*Lavapaase Axasep*

<sup>1</sup>\*Nenia ne Pol. Nema mi ne Sailas la ne Timoti, ma malagan na lovoang tinemi limixin nunu dom Tesalonia. Nemi limixin at ne Moroa ne Temen dik la Leeme Silok, ne Iesu Karisito.

<sup>2</sup>\*Letaba nabalamu la lenmila boro at ne Moroa ne Temen dik la Leeme Silok, ne Iesu Karisito na nemen eburu minemi.

*Laaleng Ete La Lovotpot At Ne Iesu*

<sup>3</sup>\*Luvutnetak mi luvurinuk. I lox avukat do nema ma tong avukat amisik ti ne Moroa mumu nimi. I lox avukat mila lununu atnimi ira suusu silok la labalamu ela xantubu atnimi ira sisilok bok.

<sup>4</sup>\*Kuren la nema ma xip aurut nimi ri limixin at lotu at ne Moroa, mila nemi mi tu atmatkun at lununu atnimi kantubu at levesongsongot mi levenmumuat, mo mip kiv i.

<sup>5</sup>\*Lununu atnimi i tu atmatkun, la na i lox asusu i do lodoxoma at ne Moroa ik mokso aleng la at laaleng ete neni naba ila mumu loklok atnimi la minaba epovo xusu mina vubeles uto xeneng at Linintoo ren. Ni lavasuun at levesongsongot atnimi.

<sup>6</sup>\*Moroa in manton tino la neni naba vorang levesongsongot atnedi dim taba nimi min.

<sup>7</sup>\*La neni naba lok kepe levesongsongot basinge nimi la atnema bok ap mo laaleng Leeme Silok, ne Iesu naba si ukopok boro vana at laxalibet. Neni naba vot eburu mi lubungangelo lolos teren la lisisixam silok, naba soosoo ngan laxao bokbolot.

<sup>8</sup>\*La ne Moroa naba lox asongot nedi, dixokleklen i la nedi bok kopmen dinang tonga res at Lagale Lavavang at Leeme Silok atdik ne Iesu.

<sup>9</sup>\*La Leeme Silok naba sev asongot di mi langangan leeteke mo naba nemen amisik. Dinaba nemen amisik to vetpes basinge lemeren Leeme Silok la di noxo suma lolos nunuan at ne Moroa.

<sup>10</sup>\*Dinaba lok ka na lumumuat ap mo laaleng ne Iesu naba si ukopok. La limixin axap teren dinaba emi asu min la dinaba raba i mi lasinorong.

\* **1:1:** 1 Ts 1:1    \* **1:2:** Ro 1:7    \* **1:3:** 1 Ts 1:2-3; 2 Ts 2:13    \* **1:4:** 2 Ko 7:4; 1 Ts 2:19; Li 1:9    \* **1:5:** Pl 1:28    \* **1:6:** Ro 12:19; Li 18:6-7    \* **1:7:** Mt 25:31; 1 Ts 3:13; 4:16    \* **1:8:** Sam 79:6; Ais 66:15; Ro 2:8; 1 Pi 4:17    \* **1:9:** Ais 2:10,19,21    \* **1:10:** Kl 3:4; 1 Ts 3:13

La nemi bok minaba emi asu min, mila miga siam kaka Lagale Lava-vang maga tong asu i rinimi.

<sup>11</sup>\*Kuren la ma ngising amisik ne Moroa do neni na lox epovo nimi ri mo lorooro melemu, mo ne Moroa atdik ga ro ka nimi rin. La neni na lok tooro nimi mi lolos teren kusu mina epovo do minaba lok leven gugu nunuan kerekngan limixin nunu di vara na lox i.

<sup>12</sup>\*La kerepmo limixin dinaba ven leven gugu nunuan atnimi la dinaba emi asu mi ne Iesu Karisito la dinaba emi asu bok minimi. Naba ravasu xuren mila ne Moroa atdik mi Leeme Silok ne Iesu Karisito du lox asuusu letaba nalamu rinimi.

## 2

### *Laradi Rongtonga Xepe*

<sup>1</sup>\*Mumu lomlong at Leeme Silok atdik ne Iesu Karisito, la lovtopot atdik ti nemen eburu min. Luvutnetak mi luvurinuk, ma sing nimi

<sup>2</sup>do nemen mita lok bukbulu soso kopla mina rakdu at levelinga leventaba di tong i do mo laaleng at lovtopot at Leeme Silok ga rupot pam. Leventaba diga xarang nimi do na levelinga ni lavapaase ali boro atnama kopla maga lox aonon i saparap nimi ro xeneng at lovoang maga malagan i rinimi.

<sup>3</sup>\*Mi guta ke avolo tara na xarang nimi kerepmo, mila lekarakat silok naba rupot avot ti lovtopot at Leeme Silok. Ap mo levenaleng mumuat, buaang limixin dinaba lox abulubun kepe ne Moroa. La lara laradi rongtonga xepe naba ru asuvos. Ketla ni naba ekip tangarang mi leeteke.

<sup>4</sup>\*Avot be mo laradi rongtonga xepe naba sok tixirixes ne Moroa la levelotu axap. La neni naba tong i do neni i silok aleng la nabat kis to at loogu laplavang at ne Moroa la neni naba lok ti limixin keretna, "Nenia ne Moroa."

<sup>5</sup>Mina doma su ap mo levelinga, nenia aga tong i rinimi ap mo levelaleng agak lok eburu minimi.

<sup>6</sup>La mi xasep pam do lara lavanga ik lok pe nom laradi rongtonga xepe kusu neni noxo ru asuvos naba se ap mo laaleng ne Moroa ga lok katling pam i.

<sup>7</sup>La ne Satan ga lox aonon pam lodoxoma ting tonga xepe ude at na lavatbung menemen la mo lodoxoma i gugu nemnem to xeneng at lorooro at limixin. Ketla buaang limixin kopmen dina xasep teren. Mo lavanga loklok pe nabak lok pe mo loklok kakapmek at ne Satan se ne Moroa naba lok kepe mo lavanga loklok pe la

<sup>8</sup>\*ap mo laaleng laradi rongtonga xepe naba suvos ba. Ketla at lovtopot at Leeme Silok ne Iesu, neni naba lok kepe mo laradi rongtonga xepe mi lamamas teren la naba sev amer i mi lovtopot nunuan teren.

<sup>9</sup>\*At lovtopot at nom laradi rongtonga xepe, Satan naba lok tooro i. Neni naba ruuna lolos silok la ni naba lok levempanga sangsangu la leveloklok katling kusu na xarang arup limixin min.

<sup>10</sup>La neni naba lok leveloklok i lok kapmek kusu na xarang arup limixin mo dinaba seeve. Dinaba onon uto at lemenemen songsongot mila dinaba ronga xepe levelinga ruturun mo im taba limixin mi loklox arooro.

<sup>11</sup>\*Kuren la ne Moroa naba lox angtangku lodoxoma atdi xusu dina nunu ap mo levelinga xaxarang,

<sup>12</sup>la dinaba lok kaka lumumuat silok, ni lemenemen songsongot. Mila di noxo nunu at levelinga ruturun teren la dinabak lok momo mene mi levempanga kopmen nak mokso.

### *Moraa Ga Soxolik Ka Vam Nimi Ri Lorooro*

<sup>13</sup>\*Luvutnetak mi luvurinuk. Leeme Silok i balamu nimi. La ik mokso do mana tong avukat amisik

\* **1:11:** Kl 1:9; 1 Ts 1:2-3 \* **1:12:** Ais 24:15; Mal 1:11 \* **2:1:** 1 Ts 4:13-17 \* **2:3:** 1 Ti 4:1; 1 Jo 2:18; 4:3; Jo 17:12 \* **2:4:** Dan 11:36; Isi 28:2 \* **2:8:** Jop 4:9; Ais 11:4; Li 19:15 \* **2:9:** Mt 24:13; Li 13:11-13 \* **2:11:** 2 Ti 4:4 \* **2:13:** 2 Ts 1:3; Jo 15:16; Ep 1:4; 1 Ts 4:7; 5:9

ti ne Moroa mumu nimi, mila ne Moroa gara soxolik ka vam nimi ganoxa at lereot kusu neni na lox arooro nimi. Na loklox arooro ga ravasu keretna. Miga nunu at levelinga ruturun at ne Moroa, la Loroonan Kaala ga lox amaxat lorooro atnimi.

<sup>14</sup> Moroa ga ro ka nimi ri lorooro avolo xeneng at Lagale Lavavang, maga tong i rinimi. Neni ga ro xaka nimi xusu mina ruuna xaka loxot at lasinorong at Leeme Silok atdik ne Iesu Karisito.

<sup>15</sup> Kuren la luvutnetak mi luvur-inuk, mina tu atmatkun la minam tebenglolos mo levenanasa maga lox ase vam nimi min. Maga tong asu i nom tinimi gano la maga lox aonon bok mo levelinga at levempoang.

<sup>16</sup> Lisingsing atnama i lok keretna. Leeme Silok atdik, ne Iesu Karisito la ne Moroa ne Temen nedik duga balamu nedik, la duga raba dik mi levelinga loklok tooro, naba nemen amisik la duga raba dik mi lodoxoma voovo ti lorooro avolo.

<sup>17</sup> \*Ma sing du do duna lox alolos lorooro atnimi xusu mina lok leven gugu nunuan la mina tong asu levelinga i nunuan.

### 3

#### *Mina Ngising Tinama*

<sup>1</sup> \*Luvutnetak mi luvur-inuk. Na laxavaxap at na lovoang. Mina ngising ne Moroa do neni na lok tooro nama xusu levelinga at Leeme Silok na epeseves soso la limixin dina siam kaka i mi leemi asu kerekngan nemi miga siam kaka i.

<sup>2</sup> La mina sing bok dola limixin kakapmek di noxo rupe lugugu atnama, mila buaang limixin mo, kopmen tununu atdi.

<sup>3</sup> \*Ketla Leeme Silok ik lok tooro ruturun amisik limixin teren la neni naba lox alolos lorooro atnimi la naba lok tatao nimi basinge ne Sattan.

<sup>4</sup> \*La nema ma nunu ruturun do Leeme Silok naba lok tooro nimi la nanga mi mumu asu levelinga atnama la melemu bok minaba mumu asu i.

<sup>5</sup> La ma sing Leeme Silok do neni na lok tooro nimi xusu mina xasep avukat ti labalamu at ne Moroa, la mina tu atmatkun kerekngan ne Iesu Karisito ga tu atmatkun at lorooro ren.

#### *Nemen Limixin Guta Molo At Lugugu*

<sup>6</sup> \*Luvutnetak mi luvur-inuk. Ma sing nimi at laasen at Leeme Silok atdik ne Iesu Karisito, do mina ru asepsu basinge di nom limixin nunu dik molo at lugugu, la kopmen dina mumu asu mo levenanasa nia aga anasa nimi min.

<sup>7</sup> \*Nemi mi xasep do ik mokso rinimi xusu mina mumu asu mo loklok atnama, maga ruuna i ap mo leveling maga nemen kantubu atnimi. Maga gugu lolos, la ma goxok molo.

<sup>8</sup> \*Ma goxo lok kaka gamasa tevempanga atnimi, maga un kaka leveluxa la levempanga vetpes bok magak pakes tin. Maga gugu lolos at levenaleng kangking la at levenaleng kanimin kusu mi noxo xepe pilas ti lok tooro nama.

<sup>9</sup> \*Gak mokso do mana sing kaka tevempanga atnimi, ketla ma goxo lox i xuren. Mila maga vara i do mana lok lampoovo xerepmo rinimi.

<sup>10</sup> \*Maga nemen kantubu atnemi, la maga tong i rinimi xeretna, "Do tara i xopara na gugu, nemen gat ni ta anan eburu minimi."

<sup>11</sup> \*Ma tong i na rinimi mila magang tonga i do leventaba atnimi dik molo mene la dit pas tangtagap mi lavapaase mumu la kopmen dina gugu.

<sup>12</sup> \*At laasen at Leeme Silok ne Iesu Karisito ma tong lolos i ridi do dina nemen atnaasan la dina gugu ri levempanga dik pakes tin.

\* 2:17: 1 Ts 3:13 \* 3:1: 1 Ts 5:25 \* 3:3: 1 Ts 5:24 \* 3:4: 2 Ko 7:16; Ga 5:10; 1 Ts 4:10 \* 3:6: Mt 18:17; Ro 16:17 \* 3:7: Pl 3:17; 1 Ts 1:6 \* 3:8: 1 Ts 2:9 \* 3:9: 1 Ko 9:4; 1 Ts 1:6 \* 3:10: 1 Ts 4:11 \* 3:11: 1 Ti 5:13 \* 3:12: 1 Ts 4:11 \* 3:13: Ga 6:9

13 \*Luvutnetak mi luvurinuk, nemen mitak molo rik lok leven gugu i nunuan.

14 \*Do tara noxo rongga res at na levelinga, mina malagan katling i, la mina ke xepe i xusu neni na lok mamangan.

15 \*Nemen mita edax i, ketla mina paase aronga i ngan neton nimi.

*Lavapaase Momo*

16 \*A sing Leeme Silok at limila do neni xa na raba nimi mi limila ren at levenaleng axap la at leventaangas axap. Leeme Silok na nemen eburu amisik minemi axap.

17 \*Nenia ne Pol, a malagan na levengkolinga mi lakngak akmokso. Lavapaase momo rak tinimi. A malagan na levelinga keretna.\*

18 Letaba nabalamu at Leeme Silok atdik ne Iesu Karisito na nemen eburu minemi axap. I ruturun.

---

\* **3:14:** 1 Ko 5:9,11    \* **3:15:** 1 Ts 5:14    \* **3:16:** 1 Ts 5:23    \* **3:17:** 1 Ko 16:21    \* **3:17:** Pol ga sok mene nga na laxakan. La laradi vetpes ga malagan levelinga ne Pol ga vaase i min.

# 1 Timoti

## Lovoang Avot At Ne Pol

### Saparap Ne Timoti

### Levelinga Loklox

### Axasep

### Levenmaares 63-67 A.D.

Timoti neni boro at lenep Asia. Ne temen neni boro Grik la nenen neni latkin boro Judaia. At lavat-pas sepsev agepura at ne Pol neni ga soxolik ka ne Timoti ngan laradi loklok tooro rin la duga gugu buru. (Gu 16:1-3) Melemu Pol ga raba ne Timoti mi lentaba leven gugu kusu neni naba lok tatao lotu ro Epesas. At nai lovoang Pol ga vaase aronga ne Timoti mumu luvuttadi loklox ase xaxarang. Lavanga dina lok lununu at luvuttadi nunu dina subu. Neni ga vaase alolos box i mumu lotu at luvuttadi nunu. Melemu neni ga vaase mumu mo leventaangas ua i nunuan kusu luvuttadi amgomgo dinak lox i. Neni ga vaase alolos bok ne Timoti mumu leveloklok ua in manton ti ne Timoti, atla neni laradi gugu at ne Karisito kantubu at limixin nunu.

#### **Lengkot silok keneng at na lovoang**

- 1:1-2 Pol ga tong avukat ti ne Timoti.
- 1:3-20 Lempapaase mumu levenanasa nunuan.
- 2:1-15 Lempapaase mumu leveloklok at lotu.
- 3:1-16 Lempapaase mumu nedi luvuttadi amgomgo at lotu.
- 4:1-16 Timoti na lok tatao avukat lorooro ren la levenanasa ren.
- 5:1-6:21 Lempapaase mumu lugugu at ne Timoti la lurutu migo ren ti limixin nunu.

#### *Lavapaase Axasep*

<sup>1</sup> \*Nenia ne Pol, lun pavang at ne Iesu Karisito, mo nedik ta doxoma voovo rin. Nedu mi ne Moroa, Laradi

Loklox Arooro atdik, duga soxolik ka ia ri na lugugu.

<sup>2</sup> \*Nia a malagan na lovoang ti ne Timoti, lamdak tinotno rak maxeneng at legesa nunu.

Letaba nabalamu, lebelen tuntun, la lenmila bok tu boro at ne Temen dik la ne Iesu Karisito, Leeme Silok atdik.

#### *Levempapaase Aronga Mumu Leveloklox Ase Xaxarang*

<sup>3</sup> \*Nia a vara i do una nemen go Epesas, kerekngan aga tong i ru ap mo laaleng nia aga vas kaxat uto Masadonia. Leventaba luvuttadi me go Epesas di vanasa limixin mi levenanasa xaxarang. Kuren la una tong i ridi do dina xap ta ap mo loklok.

<sup>4</sup> \*La una tong i ridi do dina xap ta ap mo laxampapaase solo mumu leventetere, la levenasen at lavalabat, mila nai ik lox asu mun levededak. La ik lox asi lugugu at ne Moroa, mo lugugu i lox alolos lununu at limixin.

<sup>5</sup> Lavasuun at nai levelinga rak, ti lox axatu labalamu xantubu at limixin nunu. Nom labalamu i ravasu boro xeneng at lorooro kopmen taxakapmek teren la boro bok at lodoxoma, kopmen tusumsuma mangan teren la boro bok at lununu ruturun.

<sup>6</sup> Leventaba luvuttadi digara rem gili su vam basinge i na la dira domampe vam langas at lununu la di tong asu mun levelinga kopmen tavasuun teren.

<sup>7</sup> \*Di vara i do dina anasa limixin mi Laulis Linga at ne Moroa, ketla dixo xasep teren la dixo xasep bok ap mo levelinga di anasa limixin min.

<sup>8</sup> \*Nedik ataklen i do Laulis Linga i lox avukat, mo do tara im tebeng avukar i.

<sup>9</sup> Ataklen box i do Laulis Linga at ne Moroa, kopmen tinedi limixin avukat. Ketla tinedi limixin di los polo Laulis Linga, la tinedi limixin tongtonga xepe, la tinedi limixin kopmen dina lotu saparap ne Moroa, la ti luvuttadi xapmek, la

\* 1:1: Kl 1:27 \* 1:2: Gu 16:1-3; Ta 1:4 \* 1:3: Pl 2:24 \* 1:4: 1 Ti 4:7; Ta 1:14 \* 1:7: 1 Ti 6:4,20; Ta 1:10 \* 1:8: Ro 7:12,16

tinedi bok kopmen dina lok ngangao at ne Moroa la levempanga at lotu, la tinedi dip sev amet luvuttemen di mi luvutnen di, la tinedi dip sev amet limixin petpes,

<sup>10</sup> \*la tinedi bok di lok laxakapmek maxamang at lixitkis epot, la tinedi lavatlok di velongka, la tinedi bok di babala ka limixin kusu dina gugu taba di. La tinedi bok di xaxarang la di tong asu levelinga xaxarang mumu laradi i tu at lava-paase. Tinedi bok di lok levempanga xerepmo xopmen na epovo mi levelinga ruturun at ne Moroa.

<sup>11</sup> \*Na levelinga ik lok to xeneng at Lagale Lavavang, mo ne Moroa ga raba ia min, kusu ana tong asu i. Lagale Lavavang boro at ne Moroa, ni lagale lo Moroa la i epovo rinotno do limixin dina emi asu min.

#### *Pol Ga Tong Avukat Mumu Labalamu At Ne Moroa*

<sup>12</sup> \*A tong avukat ti ne Iesu Karisito, Leeme Silok atdik, ni gara raba vam ia mi lolos ti lok lugugurak. A tong avukat tinotno rin mila ni ga ven ia do nenia laradi ruturun tin, la ni ga soxolik ka ia xusu ana gugu rin.

<sup>13</sup> Keke i do gano migomgo aga paase vupu rin, la agap sep limixin teren, la agak lox asongot di. Ketla ne Moroa ga lox asuusu lebelen tuntun teren tia, mila nenia agoxoklen levempanga salai gak mokso la goxopmen tununu rak.

<sup>14</sup> La Leeme Silok atdik ga sobang asi mo letaba nabalamu ren mavana rak la ga raba box ia mi lununu la labalamu, no i ravasu at ne Iesu Karisito.

<sup>15</sup> \*Anai levelinga ruturun tidik, ata siam ka i la ata nunu bok teren. Iesu Karisito ga si ude xopok at na lavatbung menemen kusu ti lox arooro limixin kakapmek. Loklok kakapmek tarak ga silok aleng ti loklok kakapmek atnedi.

<sup>16</sup> Ketla ni lavasuun mun teren la ne Moroa ga lox asuusu lebelen tuntun teren tia, kusu ne Iesu Karisito na ngangais aleng tia ri leeng basinge leveloklok kakapmek tarak, keke i do nenia laradi aga lok kapmek aleng ti limixin axap. La nai loklok at ne Iesu Karisito, ni lampoovo rinedi limixin axap diba nunu ren melemu la dina lok ka lorooro avolo.

<sup>17</sup> \*Kuren la ata emi asu mi Loorong Silok naba rooro amisik, la kopmen noxo met la dik taxo epovo ri ven i. Neni xusuk mun ne Moroa. Ata lox asuusu amisik lasinorong la leemi asu rin la kopmen taxavaxap teren! Tuturun.

<sup>18</sup> \*Timoti, nenu lamdak tarak. Ana raba u mi na levelinga ik sixit emu mi levelinga vapaase ali at lugugu ram saparap ne Moroa gano migomgo. Do una mumu asu i, naba lox alolos u xusu unaba esep avukat ap mo leesepp nunuan,

<sup>19</sup> \*la unabam tebeng lolos lununu la u noxo suma loklok mamangan at lorooro ram. Leventaba luvuttadi diga rongaxepe na levelinga, la diga lok kapmek pam lununu atdi.

<sup>20</sup> \*Kantubu atdi, ne Aimenias la ne Aleksanda, aga song araba vam du ri lekngen ne Satan, kusu dubaklen ka i do du noxo paase vupu ri ne Moroa.

## 2

#### *Pol Ga Paase Lolos Mumu Leveloklok At Lotu*

<sup>1</sup> Lavanga avot keretna. Nia a sing lolos u do limixin at lotu dina tong asu amisik levesingising la levelinga loklox avukat kusu ti lok tooro limixin axap.

<sup>2</sup> \*La levesingising bok ti lok tooro lavaorong la tinedi limixin amgomgo, kusu ataba nemen atnaasan at lorooro nunuan eburu mi limila. La lorooro atdik na umsu mi

\* **1:10:** Ta 1:9    \* **1:11:** 1 Ti 6:15    \* **1:12:** Gu 9:15; Ga 1:15-16; 1 Ko 15:9-10    \* **1:15:** Lu 15:2; 19:10  
 \* **1:17:** Ro 16:27    \* **1:18:** 1 Ti 6:12; Ju 1:3    \* **1:19:** 1 Ti 3:9    \* **1:20:** 2 Ti 3:17; 4:14-15; 1 Ko 5:5  
 \* **2:2:** Ep 6:18; Pl 4:6



loklok ngangao saparap ne Moroa la kopmen taxakapmek teren.

<sup>3</sup> Anaa i lox avukat la i lox amomo aleng ne Moroa, Laradi Loklox Arooro atdik.

<sup>4</sup> \*Neni i vara i do limixin axap dinaba ruuna ka lorooro avolo, la dinabaklen avukat levelinga ruturun teren.

<sup>5</sup> Mila legesa Moroa mun, la legesa radi mun ik lok lumulum kantubu at ne Moroa mi limixin, neni ne Iesu Karisito.

<sup>6</sup> \*Ni ga raba xa i ngan laxaavuk ti lox arooro limixin axap basinge laxakapmek atdi. Ni ga vor asuvos at loxonaleng mokmokso ren.

<sup>7</sup> \*La nai lavasuun teren la ni ga sak tiki ia ngan laradi vavang la laradi loklox ase ti limixin kopmen di me Judaia, kusu ti tong asu levelinga ruturun at lununu ridi. Nia xopmen ana xaxarang, nia a tong asu levelinga ruturun.

<sup>8</sup> A vara i do lavatlok at levengkot axap dina ngising amisik, la dina song aurut mi levengkikngen di upana keneng at levesingising atdi la kopmen teven mukmusak la levedadak noxo nemen at lorooro atnedi.

<sup>9</sup> \*A vara box i do lavakin dina lok tatao avukat luruptuvuk atnedi la dina ven mumu avukat levesingsiga atdi la dina sinang avukat di. Nemen dita meva lempatkabinim atnedi la nemen bok dita sinang mi leven gol la levenpeal, la levempanga singsiga, luunun teren i silok.

<sup>10</sup> \*Ketla dina lox asu leven gugu nunuan, mo ik mokso ri lavakin di lotu ruturun saparap ne Moroa.

<sup>11</sup> I lox avukat do at loxonaleng lavakin dinang tonga levelinga at ne Moroa, dinat kis atnaasan la dina lox axakalik di.

<sup>12</sup> \*Axo vara i do lavakin dina lox ase lavatlok to xeneng at lotu la di noxomgomgo ri lavatlok. Dinak lox atnaasan mun.

<sup>13</sup> \*Lavasuun at nom keretna. Moroa ga rudum li avot ne Adam la melemu ba ne Iva.

<sup>14</sup> \*Lara lavasuun bok teren i lok keretna. Kopmen ne Adam ga mu asu laxaxarang at ne Satan. Nom latkin ga mu asu i la ga los polo levelinga at ne Moroa la ga lok laxakapmek.

<sup>15</sup> Ketla lavakin di pisik laxamdak lixilik. Kuren la dinaba lok ka lorooro, mo do dina nemen lolos at lununu la labalamu la lixitkis dadat mi loklok mulus.

### 3

#### *Luvuttadi Amgomgo At Lotu*

<sup>1</sup> \*Anai ni levelinga ruturun. Mo do tara i vara i do na xip ka lugugu at laradi gomgo at lotu, neni i vara lavanga avukat.

<sup>2</sup> \*Laradi gomgo at lotu neni laradi kopmen tosoogong teren at lemeren limixin. Neni latlok at leges atkin mun la it kis atnaasan. La ik lok tatao avukat luruptuvuk teren, loklok teren i lok nunuan mene nga. Neni ik lok maraose minedi limixin boro vetpes, la neni i epovo ri lox ase limixin.

<sup>3</sup> Neni ixo inin tangtangu mi levengkadan lolos la kopmen neni laradi sepsep. Ketla neni it kis atnaasan la lorooro ren i umsu mi lumumulus la limila. Neni ixo vara solo ri levempilas.

<sup>4</sup> Neni i epovo ri vaxaxis avukat lixitkis atdi loxoetemen, la i lox ase avukat laxamdak mi laxaalik teren kusu dinang tonga res la dina lok ngangao bok teren.

<sup>5</sup> Do tara xopmen naklen ti vaxaxis avukat lixitkis koetemen teren, naba lok ba kereva la ni na lok tatao avukat limixin at ne Moroa?

<sup>6</sup> Laradi gomgo neni laradi mi lununu ren i xus pam. Mila i lok kapmek do neni na lox asilox i la ni na subu beles at lebelemamao at ne Moroa, kerekngan ne Satan.

\* 2:4: Isi 18:23; 1 Ti 4:10; 2 Pi 3:9; Ro 3:29-30; Ib 12:24 \* 2:6: Ga 1:4 \* 2:7: Gu 9:15; Ga 2:7-8; 2 Ti 1:11 \* 2:9: 1 Pi 3:3-5 \* 2:10: 1 Ti 5:10 \* 2:12: 1 Ko 14:34 \* 2:13: Lur 2:7,22; 1 Ko 11:8-9 \* 2:14: 2 Ko 11:3 \* 3:1: Gu 20:28 \* 3:2: Ta 1:6-9 \* 3:7: 2 Ko 8:21

<sup>7</sup> \*Neni laradi limixin di nemen maxamang at lotu, di lok ngan-gao ren, kusu neni noxo ruuna ka tevelinga xakapmek at limixin dina lox i rin la ni na subu tup ti lelixo at ne Satan.

#### *Luvuttadi Loklok Tooro Xeneng At Lotu*

<sup>8</sup> Luvuttadi loklok tooro xeneng at lotu dina umsu mi luruptuvuk avukat at lemeren limixin, la levelinga atdi na nunuan. Di noxo inin tangtangu levengkadan lolos, la di noxok lok kaka levempilas at langas kopmen nak mokso.

<sup>9</sup> Dinam tebeng amisik luruturun at leveloklox ase at lununu atdik. La lodoxoma atdi di noxo suma loklok mamangan keneng at lorooro atdi.

<sup>10</sup> Una lok tong pen avot be di, la dola dina gugu avukat, dina lok ka ba nom lugugu loklok tooro.

<sup>11</sup> \*Lavakin bok atdi dinap tuvuk nunuan la di noxo tere mumu, ketla dinat kis atnaasan mun la dina ruturun at levempanga axap.

<sup>12</sup> Na laradi loklok tooro, neni latlok at leges atkin mun, la neni i epovo na vaxaxis avukat laxamdak mi laxaalik teren la nedi axap bok to at loogu ren.

<sup>13</sup> Do na luvuttadi loklok tooro dina lok leven gugu avukat, dinaba lok ka levenasen silok la dina vaase basabas mi lununu atdi xeneng at ne Iesu Karisito.

#### *Lavasuun At Lununu Atdik*

<sup>14</sup> Nia a malagan na levelinga ru ketla a doxoma i do aba vot pasa soso box u.

<sup>15</sup> \*Do nia a noxo vot soso, nenu u epovo na lox ase limixin kusu dina lok tatao avukat di keneng at lixitkis koetemen atdi mi ne Moroa. Na loklok, ni lavasuun at lotu ruturun at ne Moroa, Luntoo Avolo, neni luxus una la lusu auru at levelinga ruturun.

<sup>16</sup> \*I ruturun aleng do lotu atdik, ni lavanga i silok aleng mumu Leeme Silok atdik.

“Neni ga rupot ngan laradi. Loroonan Kaala ga lox asuusu i do lorooro ren ga nemen manmanton, la lubungangelo diga ven i. Limixin diga vavang min to at lengkot axap la limixin diga nunu ren nade at na lavatbung menemen. La ne Moroa ga lok ka i uto vana at laxalibet.” *Sam 9:11*

## 4

#### *Luvuttadi Loklox Ase Xaxarang*

<sup>1</sup> \*Loroonan Kaala i vaase axasev i do leventaba dinaba soxope lununu atnedi at na levenaleng i tu melango. Dinaba ronga res at labaroonan kaxarang la dina mumu asu leveloklox ase at lubunggas.

<sup>2</sup> Na levenanasa xerepmo luvuttadi xaxarang dinaba lox ase limixin min. No levendoxoma avukat atdi gara sonao vam, i lok ngan din boo i mi lavaruat liplivi la kopmen dina suma i.

<sup>3</sup> \*Luvuttadi xerepmo di anasa limixin do i lok kapmek ti epot la ti anan bok leventaba levenasen luxa. Ketla ne Moroa ga rudum li nom leveluxa axap kusu ti limixin nunu, mo diklen levelinga ruturun. La dina lok lisingising ti tong loklox avukat ti mo leveluxa.

<sup>4</sup> \*Levempanga axap ne Moroa ga rudum i, i lox avukat. Kopmen tevempanga ataba sok tixirixes i, ketla ata lok ka levempanga axap mi lisingising ti tong loklox avukat.

<sup>5</sup> Mila levelinga at ne Moroa la nom lisingising, i lox avukat mo leveluxa xusu ne Moroa na siam teren.

#### *Lasaxaruki Avukat At Ne Iesu Karisito*

<sup>6</sup> Dola una vaase asu na levenngas linga tinedi luvutnetam, unaba lok ngan lasaxaruki avukat at ne Iesu Karisito. Mila loroonan taram i anan mais at lununu la at levenanasa avukat, nu ugara mumu asu vam i.

\* **3:11:** Ta 2:3    \* **3:15:** Ep 2:19-22    \* **3:16:** Jo 1:14; Mk 16:19    \* **4:1:** 2 Ti 3:1; 2 Pi 3:3; 1 Jo 2:18; Ju 1:18    \* **4:3:** Lur 9:3; Ro 14:6; 1 Ko 10:30-31    \* **4:4:** Lur 1:31; Gu 10:15    \* **4:7:** 1 Ti 1:4; 6:20; 2 Ti 2:16

7 \*Ketla una ru asepsu basinge nom leventetere xaxarang mo ixo lox avukat ti paase asu i. Ketla una lolos amisik kusu una ruuna ka luruptuvuk avukat at ne Moroa.

8 \*Lugugu at labantuxu i lox asusu loklok tooro ri labantuxu. Ketla leveloklok at Loroonan at ne Moroa, naba lox asusu leventaangas axap i nunuan, la uba ruuna ka lorooro avukat at na lorooro xopok la at lorooro melemu bok.

9 \*Na levelinga i ruturun, ata siam ka i la ata nunu ren.

10 \*Ni lavasuun teren la dik ata gugu lolos la atam tabaavat, mila dik ta lok li vam lodoxoma voovo atdik at ne Moroa, Luntoo Avolo. Neni Laradi Loklox Arooro at limixin axap la atnedi rinotno bok di nunu.

11 Una paase na levempanga ri limixin at lotu la una vanasa bok di min.

12 \*Nemen uta ke xepe tara na vas asi u ukopok atla nenu laradi maxat mun. Ketla una lok ngan lampoovo ri limixin nunu, at levempapaase ram, luruptuvuk taram, labalamu ram, lununu la loklok i dadat.

13 Avot ti lovtopot tarak, una raba axap lorooro ram ti utus levelinga keneng at Lovoang Kaala ti mo limixin, la una vavang la una vanasa bok di.

14 \*Nemen uta lox abulubun kepe laramtaba at Loroonan nom i nemen keneng taram. Uga lok ka i ap mo laaleng luvuttadi vapaase ali diga paase ali i la luvuttadi mukun diga sa li levengkikngen di mavana ram.

15 \*Una mumu asu amisik na levempanga la una raba lorooro axap taram tin, kusu limixin axap dinaba ven lusuusu at lugugu ram.

16 Una lok tatao avukat lorooro ram eburu mi nom levenanasa uga anasa limixin min. Unak lox amisix i na levempanga. Dola una lox i xuren, unaba lox arooro u eburu minedi nom ding tonga levelinga ram.

## 5

### *Lugugu At Ne Timoti Saparap Limixin Nunu*

1 \*Do taradi mukun na lok laxakapmek, nemen uta paase lolos tin, ketla una vaase amulus tin ngan neni ne tamam. Una lox anares ka luvuraau maxat ngan ta luvutnetam,

2 la lavakin mukun ngan luvutnenam, la lovosono maxat ngan ta luvurinum, mi loklok i dadat aleng.

### *Levelinga Ri Lavakin, Lavatlok Atdi Gara Met Pam*

3 Limixin at lotu dina lok tatao lempatnaa rixin, kopmen teventaba na lok tatao di.

4 Do lanaa rixin i ruuna laxamdak mi laxaalik kopla luvuttubuno di, i lox avukat do dina lox amuat lununu atdi keretna. Dina vorang ba loklok tatao at luvuttemen di mi luvutnen di la luvuttubuno di, atla ne Moroa i lok momo mi mo loklok.

5 \*Latkin do neni lanaa, la kopmen tara ri lok tatao i, neni nak lok li lodoxoma ren ti loklok tatao at ne Moroa rin, la na ngising amisix i at levenaleng kanimin la at levenaleng kangking.

6 Ketla lanaa no im taba amisik labantuxu ren ti loklok kakapmek, neni ira met pam, keke i do neni move i rooro.

7 Una tong axasep limixin mi na levelinga, kusu kopmen tara noxo ven kaka tosoogong atnedi.

8 Ketla do tara xopmen na lok tatao avukat leventaba akmokso ren, neni ira sev apkap pam at lununu la neni i lok kakapmek tinotno ri laradi kopmen na nunu.

### *Lubungnaa Lotu I Lok Tooro Di*

9 Nemen uta exes abeles tanaa ukeneng ti leexes at lubungnaa, do kovisi levenmaares teren na volo lavanna sangaun, la ni ga epot mene at leges atlok,

10 \*la lorooro ren i umsu mi leven gugu nunuan la lorooro ren ga lok keretna. Neni latkin loklok tatao

\* 4:8: 1 Ti 6:6 \* 4:9: 1 Ti 1:15 \* 4:10: 1 Ti 2:3-4 \* 4:12: Ta 2:15 \* 4:14: 2 Ti 1:6; Gu 6:6; 8:17  
\* 4:15: 1 Ti 5:22 \* 5:1: Mas 19:32 \* 5:5: Lu 2:37; 18:7 \* 5:10: Ib 13:2

avukat laxamdak mi laxaalik teren, la ni ga lok maraose mi limixin kading diga vot to at loogu ren. La ni ga lok levempanga nunuan tinedi limixin nunu la ni ga lok tooro nedi diga xip tutu mi levenmumuat, la ga raba axap lorooro ren ti lok leven gugu nunuan.

<sup>11</sup> Ketla nemen uta lox abeles lavakin maxat, lavatlok atdi diga met pam, ukeneng ti leexes at lubungnaa, mila do levendoxoma atdi na ngaongao ri epot, dinaba repukus basingene ne Karisito.

<sup>12</sup> La kerepmo dinaba ekip tangarang mi losongsongot mila di los polo nom laxakaape atdi diga lox avor i.

<sup>13</sup> \*La di lox arala ka box i xusu dina gosogos gamasa, la dinam simgu. Ketla i lok kapmek tino bok atla di lox arala ka bok leretere mumu ri leventaba vetpes, la di lox angtang di mi larangtagap gamasa, la di tong levempanga xopmen na lox avukat.

<sup>14</sup> \*Kuren la a vara i do nedi lavakin maxat, lavatlok atdi diga met pam, dina epot la dina ruuna madak, la dina lok tatao avukat levempanga ro xeneng at laraogu atnedi, kusu limixin munepen minedik, di noxo epovo xusu dina vaase xapmek mumu dik.

<sup>15</sup> Mila leventaba lubungnaa dira rem gili su vam kusu dina mumu asu ne Satan.

<sup>16</sup> Ketla do tara tatkin, neni latkin nunu la i ruuna tubungnaa ro at libibinat teren, neni na lok tatao avukat di la neni noxo lok li lumumuat mavana at lotu. Atla lotu naba lok tatao mene nedi lubungnaa no dik pakes aleng tinotno.

<sup>17</sup> \*Luvuttadi amgomgo at lotu mo di lok leven gugu avukat ngan lubung amgomgo, i epovo do dina lok ka bok luunun mavana at luunun atnedi. Nedi mene di gugu lolos mi lavavang la di anasa.

<sup>18</sup> \*Atla Lovoang Kaala i vaase xeretna,

“Nemen uta velegum lungusno at lubulumaxao, mo i rubut asu levempevem piao.” *Lal 25:4*

La i lok bok keretna,

“Laradi gugu i epovo na lok ka luunun teren.” *Lu 10:7*

<sup>19</sup> \*Nemen uta ronga res at levelinga at legesa radi i vaase asu i mumu laxakapmek at laradi mukun at lotu. Ket do legepura kopla lavantun di vaase asu i, una ronga res atdi.

<sup>20</sup> \*Do tara atdi na lok taxakapmek, una vaase sox i ro melamgo at limixin, kusu dinaba marat.

<sup>21</sup> At lemeren ne Moroa la at ne Iesu Karisito la at lubung angelo melemelengan, a sing alolos u xusu una mumu asu na levelinga. Nemen uta lox asilok taradi mavana at limixin axap la nemen uta lox asi tara at levempanga axap nenu u lox i.

<sup>22</sup> Nemen gat uta takas kusu una sali lukngam to mavana at taradi ri lok lugugu at Leeme Silok, la nemen uta vubeles at laxakapmek at tara vetpes. La lorooro ram na nemen mantanton amisik basing laxakapmek.

<sup>23</sup> Nemen uta inin dan kusuk mun, ketla una inin levengkondan kakalik at lavaen kusu ti lok tooro lorongtong taram mila uk meres amisik.

<sup>24</sup> Laxakapmek at leventaba i nemen saxaven mene, i epovo dik ataba ven kaka i. La nom laxakapmek atnedi i solo arup nedi uto at loxot papaase. Ketla laxakapmek at leventaba, nedik taba ven ba ren melemu.

<sup>25</sup> La kerepmo mun lentaba leven gugu nunuan i nemen saxaven. Ketla leven gugu nunuan bok mo limixin kopmen dina ven i, la naba nemen at lasaxaven melemu.

## 6

<sup>1</sup> \*Nedi lavasaxaruki di nunu at ne Iesu, dina lok ngangao at luvuttadi amgomgo atdi, kusu kopmen teta noxo vaase xapmek ti laasen at ne Moroa la at levenanasa bok atnama.

\* 5:13: 2 Ts 3:11 \* 5:14: 1 Ko 7:9 \* 5:17: 1 Ko 16:18 \* 5:18: 1 Ko 9:9; Mt 10:10 \* 5:19: 2 Ko 13:1 \* 5:20: Ga 2:14; Ep 5:11 \* 6:1: Ep 6:5

<sup>2</sup>\*Lavasaxaruki at luvuttadi nunu, nemen di guta lox amangan luvuttadi amgomgo atdi, mila nedi vam loxoeton di. Ketla i lox avukat do dina lok lugugu avukat tidi, mila nedi di ru orong mumu lugugu atnedi nom luvuttadi amgomgo atdi. Una lox ase limixin mi na levelinga.

### *Leveloklox Ase Xaxarang*

<sup>3</sup>\*Do nege na anasa limixin mi levelinga vetpes, la kopmen na sixit eburu mi levelinga ruturun at Leeme Silok atdik ne Iesu Karisito, la eburu bok mi levenanasa atdik,

<sup>4</sup>neni i umsu mi loklox aaso la kopmen naklen tevempanga. Lorooro ren kopmen na lox avukat. Ni i vavara mun i xusu ni na etep mi levelinga la ik musak amisik. La na, i lox asuusu mun levereven peves, lekarakat, la lavapaase xapmek, la lodoxoma xapmek.

<sup>5</sup>\*La levededak ik lox amisik kantubu at limixin kerepmo. Lodoxoma atdi kopmen na xasep la di kopmen naklen luruturun. La di doxoma i do lotu saparap ne Moroa ni langas tip novos.

### *Lapnovos Tuturun*

<sup>6</sup>\*Ketla do laradi i ruuna ka vam lorooro at ne Iesu la i lok momo mun mi mo lempanga i ruuna i, i lok ngan ta do neni ip novos aleng.

<sup>7</sup>\*Levempanga salai dik taga rupot eburu min ti na lavatbung mennen? Kopmen! La levempanga salai dik ataba xip kaka i basinge na lavatbung menemen? Kopmen!

<sup>8</sup>\*Kuren la, mo do nedik ata ruuna levempanga anan mi levempanga singsiga, nom i epovo atdik.

<sup>9</sup>\*Ketla nedi di vara i do dinap novos aleng, dinaba ekip tangarang mi leveloklok tong pen la dina vonon axa at lara pelixo ngan leveloklok baulang. Levempanga xapmek naba

lox asubu di ukopok ti losongsongot la labaava.

<sup>10</sup>\*Lavavara pilas ni lavasuun tinotno at laxaloklok kakapmek. Leventaba diga vara aleng kusu dina ruuna ka i la dira vas basinge vam lununu atdi la dira ekip tangarang mi loklok tuntun at lorooro atnedi.

### *Levelinga Ri Ne Timoti*

<sup>11</sup>\*Ketla nenu, laradi at ne Moroa, una ru asepsu at nai levempanga. La una lolos ti ruuna ka loklok manmanton at ne Moroa, lununu, labalamu, la loklok ti tu atmatkun kantubu at levenmumuat, la lixitkis atnaasan.

<sup>12</sup>\*Unak sixit lolos at lekampoovo at lununu, kusu unaba ruuna ka mo lorooro i nemen amisik. Ti mo mene lorooro ne Moroa ga ro ka u rin ap mo laaleng nenu ga vaase asu lununu ram to melamgo at limixin buaang.

<sup>13</sup>\*At lemeren ne Moroa, neni im taba lorooro ri levempanga axap, la at lemeren ne Iesu Karisito, mo ga vaase mi luruturun to melamgo at ne Pontias Paelat. A sing lolos u do

<sup>14</sup>una mu asu ruturun na levelinga la nemen uta ke taxakapmek na vubeles at lorooro ram, se at lovtopot at Leeme Silok atdik ne Iesu Karisito.

<sup>15</sup>\*Mo lovtopot teren naba vot akmokso at loxonaleng ne Moroa gara lok katling pam i. Neni i umsu mi leveloklox anarong la neni xusuk mun Lamgomgo atdik, Loorong Silok mavana at lavaorong axap, la Leeme Silok mavana at lavaeme silok axap.

<sup>16</sup>\*Neni xusuk mun noxo met bok ba la i nemen keneng at langangan laxasep la kovisi tara goxo ven tu ren, la tara noxo ven box i. Lasi-norong kusuk tin eburu mi lolos amisik! Tuturun.

### *Levelinga Xavaxap*

\* **6:2:** Pm 1:16 \* **6:3:** 2 Ti 1:13; Ga 1:6-9 \* **6:5:** 2 Ti 3:8; 4:4; Ta 1:14 \* **6:6:** 1 Ti 4:8; Pl 4:11-12; Ib 13:5 \* **6:7:** Jop 1:21; Akl 5:15 \* **6:8:** Ler 30:8 \* **6:9:** Ler 23:4; 28:22 \* **6:10:** Ep 5:5 \* **6:11:** 2 Ti 2:22 \* **6:12:** 1 Ko 9:25-26; 1 Ti 1:18; 2 Ti 4:7 \* **6:13:** Jo 18:36-37; 19:11 \* **6:15:** Lal 10:17; Li 17:14 \* **6:16:** Pas 33:20 \* **6:17:** Sam 62:10; Lu 12:20

17 \*Una vaase axasep di dip novos aleng mi laxampanga at na lorooro xeretna. Nemen ditak lox asilok di, la di noxo lok li lodoxoma atdi keneng at levenapnovos at na lorooro, mila lapnovos noxo nemen amisik. Ketla dina lok li levendoxoma atdi at ne Moroa xusuk mun, mo im taba amisik dik mi levempanga axap ti lox amomo dik.

18 Una tong i ridi xusu dina lok mun luvukat, la dinap novos mi leven gugu nunuan, kusu dina episa levempanga atdi mi limixin petpes.

19 \*At na mun langas dinaba lok li bubua lapnovos silok, mo naba nemen tangais di, ngan loogu avukat at lorooro melemu, la dina ruuna ka nom lorooro, ni lorooro ruturen.

20 \*Timoti, una lok tatao avukat nom leven gugu ne Moroa gara raba vam u min. Una ke xepe levelinga kopmen at ne Moroa, la levelinga rangtangu. Leventaba di so asen mo levelinga do "Levelinga at lakleklen." Ketla kopmen nak mokso.

21 \*Leventaba di lok do di lok ka vam mo lakleklen la kerepmo dira lok kepe vam lununu atdi.

Letaba nabalamu at ne Moroa na nemen amisik eburu minu.

**2 Timoti**  
**Lovoang Sepsev Agepura**  
**At Ne Pol**  
**Saparap Ne Timoti**  
**Levelinga Loklox**  
**Axasep**  
**Levenmaares 67-68 A.D.**

Anai ni lovoang sepsev agepura ri ne Timoti. Pol ga malagan i na lovoang to Rom ap mo levenaleng neni ga nemen at loogu xokoxo. Diga lok li i at loogu xokoxo atla neni ga vavang mi ne Iesu Karisito. Pol ga doma i do noxo lox abao la dina sev amer i. Kuren la ap mo levenaleng neni ga malagan i na. Timoti neni laradi loklok tooro at ne Pol la nedu duga gugu buru la neni bok gamgomgo rinedi luvuttadi nunu mo digak lok to Epesas. Timoti mi ne Pol du buru duga nunu at ne Karisito. Kuren la ne Pol ga so asen ne Timoti do lamdak teren. At nai lovoang Pol ga paase mumu labalamu ren ti ne Timoti la ni ga vara i do neni na tu atmatkun tip kip mo levesong-sogot neni ga ven i xeneng atnedi di munepen mi ne Iesu Karisito. Pol ga vara box i do ne Timoti na raba axap lorooro ren ti levenanasa mokmokso.

**Lengkot silok keneng at na lovoang**

1:1-5 Pol ga tong avukat ti ne Moroa mumu ne Timoti.

1:6-2:13 Timoti na tu atmatkun la na visik asu leven gugu nunuan.

2:14-26 Leveloklok katling ti lox ase dik mi luvuttadi gugu at ne Karisito.

3:1-9 At laxavaxap laxakapmek at limixin naba suu silok aleng.

3:10-4:5 Pol ga vaase alolos ne Timoti ri lugugu ren.

4:6-18 Lusumsuma at ne Pol mi lavavara ren.

4:19-22 Pol ga vaase abeese lentaba at lempapaase momo.

*Lavapaase Axasep*

<sup>1</sup>\*Nenia ne Pol, lun pavang at ne Iesu Karisito. Moroa ga soxolik ka ia xusu ana tong asu levelinga at lorooro keneng at ne Iesu Karisito.

<sup>2</sup>\*A malagan na levelinga ru ne Timoti, nenu lamdak orong tarak.

Letaba nabalamu, lebelen tuntun, la lenmila bok tu boro at ne Moroa ne Temen dik la ne Iesu Karisito, Leeme Silok atdik.

*Levelinga Emi Asu La Loklox Alo-*  
*los*

<sup>3</sup>\*Nenia a tong avukat ti ne Moroa. Nia a gugu rin ngan lavalabat tarak diga gugu rin la kopmen taxapmek i nemen keneng tarak. Nia a emi asu amisik mi ne Moroa at levenaleng kangking la levenaleng kanimin keneng at levesingising tarak.

<sup>4</sup>A doma su bok ap mo laaleng aga on basinge u la ugang teng. La monga a vara i do ana ven box u xusu lorooro rak naba umsu mi lomomo.

<sup>5</sup>\*A doma su bok at lununu ram. Lununu lolos bok ga nemen at lorooro at ne tubum tixin ne Lois la at lorooro bok at nenam ne Iunis. La nenia aklen i do lununu lolos kerepmo ik lok bok at lorooro ram.

<sup>6</sup>\*Na mun i lavasuun teren la nia a vaase alolos u xusu unam tebeng alolos nom laramtaba ne Moroa gara raba vam u min ap mo loxonalleng nenia aga sa li lukngak mavana ram.

<sup>7</sup>\*Atla Loroonan ne Moroa ga raba dik min kopmen nak lox araut lanmarat keneng atdik. Ketla mo Loroonan teren ik suxa aumsu dik mi lolos, labalamu la lodoxoma avukat.

<sup>8</sup>\*Kuren la nemen uta lok mamangan ti paase asu levelinga at Leeme Silok atnedik. La nemen uta lok mamangan mu box ia atla nenia a nemen at loogu xokoxo mumu ne

\* 1:1: Ep 1:1    \* 1:2: 1 Ti 1:2    \* 1:3: Pl 3:5; Gu 23:1    \* 1:5: Gu 16:1    \* 1:6: 1 Ti 4:14    \* 1:7: Ro 8:15    \* 1:8: Ro 1:16    \* 1:9: Ep 2:8-9; Ta 3:5

Karisito. Ketla atap kip levesongsongot mumu Lagale Lavavang mi lolos ne Moroa im taba dik min.

<sup>9</sup> \*Neni ga lox arooro dik la ga xuruse ka dik kusu ataba lok ngan limixin teren. Kopmen mumu levempanga dik gara lok pam i. Ketla at lavavara ren, i lok ngan letaba nabalamu ren tidik keneng at ne Iesu Karisito. Ni ga raba dik mi na letaba nabalamu avot ti luruntudum li at na lavatbung menemen.

<sup>10</sup> \*Ketla ne Iesu Karisito ga rupot pam de at na lavatbung menemen, la ga lox asuusu vam nom letaba nabalamu ren ngan Laradi Loklox Arooro atdik la ni ga lox axap lolos at lanmet. La at na levelinga at Lagale Lavavang ni ira lox asuusu vam lorooro avolo.

<sup>11</sup> \*Ne Moroa gara soxolik ka vam ia ngan lun pavang la laradi loklox ase ri paase asu Lagale Lavavang.

<sup>12</sup> Ni lavasuun teren la nia arap kip levesongsongot. Ketla nia move a tu atmatkun mila nia a nunu at ne Iesu Karisito. La akleken tinotno i do neni i epovo na lok tatao ia la na lok tatao bok mo lugugu ne Moroa ga raba ia min, se ap mo laaleng neni nabamlong teren.

<sup>13</sup> \*Unam tebeng alolos nom levelinga ruturun at ne Moroa, nia aga anasa u min gano. Ni lampoovo una mumu asu i, la una nemen alolos at lununu ram. La labalamu ram saparap ne Iesu Karisito na nemen lolos.

<sup>14</sup> \*At lolos at Loroonan Kaala nom i nemen keneng at lorooro atnedik, una lok tatao avukat nom levelinga ruturun uga lok ka i.

<sup>15</sup> Uklen i do nedi axap limixin nunu boro at lenep silok Asia eburu mi ne Pigalas la ne Eremogenes diga on basinge vam ia.

<sup>16</sup> \*Ketla a sing Leeme Silok do ni naba lox asuusu lebelen tuntun teren ti ne Onisiparas midi loxoetemen. Atla neni gak lox alolos amisix

ia la neni goxo lok mamangan do nia aga nemen at loogu xokoxo.

<sup>17</sup> Se neni ga rupot de Rom, neni ga puse ria se ni ga vuse ka ia.

<sup>18</sup> \*A sing Leeme Silok atdik dola neni na lox asuusu lebelen tuntun teren ti ne Onisiparas ap mo laaleng at Leeme Silok. Nenu u xasep nunuan do ne Onisiparas gak lok tooro aleng ia ro Epesas.

## 2

### *Laradi Esep Tuturun At Ne Iesu Karisito*

<sup>1</sup> Timoti, nenu lamdak tarak. Nia a tong i na ru do una lolos at letaba nabalamu nedik tan tuuna ka i at ne Iesu Karisito.

<sup>2</sup> Unam tebeng alolos levenanasa nu uga ronga ia aga paase asu i at lemeren nedi buaang limixin. Una raba nedi limixin min no di epovo nam tebeng avukar i, la di epovo na lox ase limixin petpes bok min.

<sup>3</sup> \*Do levesongsongot na vot saparav u, una tu atmatkun at lununu ram kerekngan laradi esep at ne Iesu Karisito.

<sup>4</sup> Laradi esep i gugu lolos kusu laradi gomgo ren na lok momo min, la neni noxo gugu at teven gugu vetpes.

<sup>5</sup> \*Una lok ngan bok laradi ik sixit at lekampoovo. Do neni i vara na sixit polo nedi dik sixit eburu min, neni na mu asu avukat levelinga at luvuttadi di lok tatao mo lekampoovo.

<sup>6</sup> \*Una lok ngan bok laradi gugu taamang. Neni i gugu lolos kusu neni avot na lok kaka loxot at levempipisik at laraamang.

<sup>7</sup> Una doxoma na levelinga nia a paase i, mila Leeme Silok naba lox axasev u mi lavasuun teren.

<sup>8</sup> \*Una doxoma ne Iesu Karisito, neni ga roo xat amlong basinge lanmet, neni livisik li at ne Devit. Anai

\* **1:10:** 1 Ko 15:55-57; Ib 2:14 \* **1:11:** 1 Ti 2:7 \* **1:13:** 1 Ti 1:10; 4:6; 6:3; Ta 1:9; 2:1 \* **1:14:** 1 Ti 6:20 \* **1:16:** 2 Ti 4:16 \* **1:18:** Ju 1:21 \* **2:3:** 2 Ti 1:8; 4:5 \* **2:5:** 2 Ti 4:8 \* **2:6:** 1 Ko 9:7,10 \* **2:8:** 1 Ko 15:4,20; Ro 1:3



levelinga ni Lagale Lavavang nia a vavang min.

9 \*La nenia aga ekip tangarang mi levesongsongot atla nia aga vavang mi Lagale Lavavang, la diga xoxo alis ia ngan laradi xapmek mi lavaros sen. Ketla levelinga at ne Moroa xopmen na nemen at lavaros sen.

10 \*Kuren la nia a tu atmatkun keneng at levesongsongot kusu ti lok tooro mo lavaanat soxolik at ne Moroa la kusu nedi bok dinaba lok kaka loklox arooro at ne Iesu Karisito la ri lox asuusu bok lisisixam avolo ren.

11 \*Na levelinga i ruturun.

“Do dik taga met buru vam min, dik atanaba roo xat eburu bok min.

12 \*Do dik tana tu atmatkun keneng at levesongsongot, dik tanabam gomgonga limixin eburu min. Do dik ata sev apkap kepe i, neni bok naba sev apkap kepe dik.

13 \*Do dik kopmen ata ruturun tin, neni move na ruturun tidik, mila neni noxo los polo levelinga ren.”

### *Laradi Gugu Ruturun At Ne Moroa*

14 \*Una tong aronga amisik limixin at lotu mi na levelinga la una paase lolos tidi at lemeren ne Moroa do nemen dita etep mi levelinga. Na loklok ixo lok tooro di la naba lok kapmek lodoxoma at limixin tongtonga.

15 \*Nenu xa una lolos kusu luruvtuvuk taram naba lox avukat at lemeren ne Moroa ngan laradi xopmen na lok mamangan mi luguguren, la neni i anasa avukat mi levelinga ruturun at ne Moroa.

16 \*Nemen uta paase eburu mi limixin di paase rangtangu la di paase ngan ta xopmen dina lok ngangao at ne Moroa. La mo loklok atdi i sat kaka limixin basinge ne Moroa.

17 \*Levelinga xerepmo i lok ngan laxanabi silok, mo i anan labantuxu

at laradi. Legepu radi du anasa xerepmo, ne Aimenias mi ne Pilatas.

18 Nedu duga soogong basinge levelinga ruturun at ne Moroa. La duga lok kapmek lununu at leventaba limixin, duga xarang di keretna, “Moroga ga lox arooro vam limixin at na lorooro la noxo lox axatu amlong bok ba limixin basinge lanmet.”

19 \*Ketla levelinga at ne Moroa i tu atmatkun ngan luuat kis la kopmen tara i epovo na ba gili i. La levelinga i lox amuar i keretna,

“Leeme Silok ikleklen nedi ateren  
axa.” *Kex 16:5*

La i lok bok,

“Nedi di tong asu i do nedi limixin at Leeme Silok, dina lok kepe laxakapmek at lorooro atdi.”  
*Ais 28:16*

20 \*At loogu silok at lara leeme silok leventingtigon mo ik lok. Diga lox i mi levempanga i nunuan ngan leven gol la levenuto gamgames. La leventaba leventingtigon bok diga lox i mi levengkonuna la lentaba vetpes diga vov i mi lengkongkangka mila leventaba di ove min at levenaleng silok, la mo leventaba vetpes di ove min at levenaleng gamasa.

21 \*Lavasun at nom keretna. Do tara i lok kepe leveloklok kakapmek teren, neni naba lok ngan nom leventingtigon avukat di anan min at levenaleng silok, atla ni i lok lugugu avukat ti leeme silok teren la ni i gagas kusu na lok leven gugu nunuan.

22 \*Kuren la una ke xepe leveloklok kakapmek, kerekngan loklok at luvuraau. La una lolos kusu una mu asu leveloklok keretna, loklok manmanton, lununu, labalamu, la limila. Una lok na levempanga eburu minedi limixin di nunu at Leeme Silok la nedi lorooro atdi i lok nunuan.

23 \*Ketla una nemen petpes basinge limixin tangtangu la di etep

\* 2:9: Ep 3:1,13; Pl 1:12-14 \* 2:10: Kl 1:24 \* 2:11: 2 Ko 4:11 \* 2:12: Mt 10:33 \* 2:13: Ro 3:3-4; Kex 23:19; Ta 1:2 \* 2:14: 1 Ti 6:4; Ta 3:9 \* 2:15: 1 Ti 4:6; Ta 2:7-8 \* 2:16: 1 Ti 4:7 \* 2:17: 1 Ti 1:20 \* 2:19: Jo 10:14; 1 Ko 8:3; Ais 52:11 \* 2:20: 1 Ko 3:12 \* 2:21: 2 Ti 3:17 \* 2:22: 1 Ti 6:11 \* 2:23: 1 Ti 4:7

mi levelinga rangtangu. Limixin dik lok kerepmo, di lox asusu levenekarakat.

<sup>24</sup>\*Lasaxaruki at Leeme Silok, kopmen noxo lok levenekarakat, neni na etaba belen mi limixin axap, la neni lagale laradi loklox ase.

<sup>25</sup>\*Neni na lok ngan laradi mulus do ni nak lox akmokso nedi xopmen dina etaba belen min, kusu ne Moroa naba siam ka amlong di la ni na doxoma xepe laxakapmek atnedi la dinabaklen luruturun.

<sup>26</sup>La melemu levendoxoma atnedi naba xasep, la dina sixiro basinge lelixo at ne Satan, ga ranga alis kaka di xusu dina mumu asu i.

### 3

#### *Levenaleng Kavaxap*

<sup>1</sup>\*Una xasep avukat at na levelinga. Ap mo levenaleng i auret ti laxavaxap at na lavatbung mennen, laxanmumuat solo naba rupot saparap limixin nunu.

<sup>2</sup>\*Buaang limixin dinaba doxoma xa di, di noxo ruuna bok ba labalamu ri limixin petpes, dinaba vavara solo lempilas, dinaba lox asilok axa di, dinaba emi asu xa midi, dinaba paase kapmek ti limixin petpes. Di noxo rongga res at luvuttemen di mi luvutnen di, di noxo paase avukat ti tara, di noxo lok ngangao at ne Moroa.

<sup>3</sup>Labalamu noxok lok atdi, di noxo doxoma xepe laxakapmek leventaba vetpes di lox i ridi, dinaba lox asi tentaba mi levelinga, di noxo mumu asu loklox avukat, dinaba esep amisik, la dinaba ke xepe ri leveloklok nunuan.

<sup>4</sup>Dinaba song araba limixin avukat ti limixin kakapmek tip sep di, dinaba lok levempanga rangtangu, di noxo ruuna loklok ngangao, dinaba ngaongao aleng ti levempanga at na lavatbung menemen, la di noxo vara ne Moroa.

<sup>5</sup>\*Dinaba voovo ngan limixin lotu ketla dinaba tong i do kopmen tolo-los at lotu. Una nemen petpes basinge limixin kerepmo.

<sup>6</sup>\*Leventaba atnedi dit pas tangtagap ti lox ase limixin, la di etangas mi leventaba larakoenasun la di sat ka xapmek lodoxoma at lavakin, lununu atdi kopmen na lolos. Mo lavakin dip kip levenmumuat mumu leveloklok kakapmek atdi la soso mun di mumu asu lodoxoma kapmek atdi xa.

<sup>7</sup>Ding tonga res at nom luvuttadi xaxarang la dixo epovo naklen ka levelinga ruturun at ne Moroa.

<sup>8</sup>\*Gano ne Janes mi ne Jambris dugang tonga xepe levelinga at ne Moses la kerepmo bok nom luvuttadi xaxarang ding tonga xepe levelinga ruturun. Nedi na limixin, lodoxoma atdi xopmen na sixit nunuan la lununu atdi ira subu vam.

<sup>9</sup>Ketla mo lugugu xakapmek atdi naba xap soso, mila limixin axap dinaba xasep ap mo loklok tangtangu atdi, kerekngan mo loklok at ne Janes mi ne Jambris.

#### *Lempapaase Ali Ri Ne Timoti*

<sup>10</sup>Ketla nenu u mumu asu avukat levenanasa rak la loklok tarak. Ura lok kaka vam lorooro rak, la ura ven kibis lununu rak, la leveloklok tarak ngan loklok mulus, labalamu la a tu atmatkun bok at lununu rak.

<sup>11</sup>\*Nenu ukleken i do limixin diga lox asongor ia mumu lununu rak, la agap kip levesongsongot kerepmo ro Antiok, Aikoniam, la to bok Listra. Mo levesongsongot ga lolos aleng, ketla nia aga tu atmatkun. La Leeme Silok ga lox asepsu ia basinge limixin kakapmek ap mo levenmenemen.

<sup>12</sup>\*Nedi axap di vara i xusu dina nemen manmanton at lununu atdi saparap ne Iesu Karisito, dinabap kip levesongsongot.

\* **2:24:** 1 Ti 3:3; Ta 1:7    \* **2:25:** 1 Ti 2:4    \* **3:1:** 1 Ti 4:1    \* **3:2:** Ro 1:29-31    \* **3:5:** Mt 7:15,21; Ro 2:19-20; Ta 1:16    \* **3:6:** Ta 1:11    \* **3:8:** 2 Ti 2:25; Pas 7:11,22; 1 Ti 6:5    \* **3:11:** Gu 13:50; 14:5,19; Sam 34:19    \* **3:12:** Mt 16:24; Jo 15:20; Gu 14:22

<sup>13</sup> Ketla nedi limixin kakapmek mi limixin pereven ka dinaba lok kapmek aleng, la dinaba xarang limixin la limixin petpes dinaba xarang nedi.

<sup>14</sup> \*Ketla nenu ne Timoti, unam tebeng lolos mo levelinga ruturunia agara anasa vam u min la ura nunu lolos teren. Ukleklen di luvuttadi loklox ase ram.

<sup>15</sup> \*Ga vaxaru ka i ga lamdak kakalix u, ugaraklen pam levelinga at Lovoang Kaala, la u xasep teren. Na levelinga i epovo na lox axasev u mi langas ti lorooro mo do una nunu at ne Iesu Karisito.

<sup>16</sup> \*Levelinga axap keneng at Lovoang Kaala, ne Moroa ni lava-suun teren. La mo levelinga ik lok tooro aleng nedi di anasa limixin. Di paase aronga limixin di lok laxakapmek. La di lox akmokso lorooro at limixin la di lox ase limixin mi loklok manmanton,

<sup>17</sup> kusu limixin at ne Moroa naba gagas kusu dina epovo ri lok leven gugu nunuan.

## 4

<sup>1</sup> \*At lemeren ne Moroa la at lemeren ne Iesu Karisito, mo naba ila mumu lorooro at limixin di rooro la at limixin diga met pam. Neni nabamlong la naba nemen ngan Loorong Silok. Kuren la a sing alolos u xeretna.

<sup>2</sup> \*Una vavang mi levelinga at ne Moroa. Una gagas at levenaleng axap ti tong asu i. Una lox anmanton lorooro at limixin, una paase aronga di, la una paase tooro di. Lorooro ram na umsu mi loklok mulus, ketla una lox ase nunuan limixin.

<sup>3</sup> \*Laaleng naba vot la limixin di noxo ronga xaka na levenanasa ruturun at ne Moroa. Ketla dinaba mu asu lavavara atdi xa. Dinabaro xaka buaang lavaeme loklox ase

xaxarang, kusu dina lox ase nedi mi levelinga di vavara nang tonga i.

<sup>4</sup> \*Dinaba ke xepe levelinga ruturun at ne Moroa la dinaba mu asu leventetere xaxarang.

<sup>5</sup> Ketla nenu ne Timoti, una lok tatao avukat lorooro ram at levelinaleng axap. Una tu atmatkun at lixipkip levesongsongot. Una lok lugugu at laradi i vavang mi Lagale Lavavang, la una lox epovo leven gugu axap taram.

<sup>6</sup> \*Loxonaleng mo i auret ta do nenia ana met. Lanmet tarak naba lok ngan laramtaba saparap ne Moroa.

<sup>7</sup> \*Nenia aga lolos kusu ana sixit avukat at lekampoovo, la arak sixit pam at loxot i vaxalom, ketla am tebeng avarang lununu.

<sup>8</sup> \*Lavatbungorong tia i ngan lunun ti luvuttadi manmanton mo i nemen tangais ia. Leeme Silok ni laradi rongtonga linga la loklok teren in manton tino, ni naba raba ia mi nom luunun ap mo laaleng neni nabamlong teren. La kopmen tia xusuk ketla tinedi bok di ngangais mi lodoxoma liplivi ri lomlong teren.

### *Levelinga Xavaxap*

<sup>9</sup> \*Una lolos kusu una rupot soso de,

<sup>10</sup> \*mila ne Demas, ga vara lorooro at na lavatkangka la neni ga on basinge ia la gat pas uto Tesalonia. Kresen gat pas uto Galesia, Taitas ga onon uto Dalmatia.

<sup>11</sup> \*Luk kusuk mene na i nemen eburu minia. Una lam ka bok ne Mak ude eburu minu atla neni i epovo na lok tooro ia mi lugugu.

<sup>12</sup> \*Nenia aga riki ne Tikikas uto Epesas.

<sup>13</sup> \*At lavatpas taram ude, uba lok kaka bok lavanga singsiga rak aga lok li i ro Troas at loogu at ne Sipas. Unaba lok kaka bok leven gun linga

\* **3:14:** 2 Ti 2:2 \* **3:15:** Jo 5:39; 1 Pi 1:20-21

14:9-10 \* **4:2:** Gu 20:20,31 \* **4:3:** 1 Ti 4:1; 2 Ti 1:13

Ti 6:12 \* **4:8:** 1 Ko 9:24-25; Li 2:10 \* **4:9:** 2 Ti 1:4

15:37-39 \* **4:12:** Ep 6:21-22 \* **4:13:** Gu 20:6

\* **3:16:** Ro 15:4; 2 Ti 2:21 \* **4:1:** Gu 10:42; Ro

\* **4:2:** 1 Ti 4:7 \* **4:6:** Pl 2:17 \* **4:7:** 1

\* **4:10:** Kl 4:14; Ta 1:4 \* **4:11:** Kl 4:14; Gu

\* **4:14:** 1 Ti 1:20; Sam 62:12; Ler 24:12; Ro 2:6

rak, a vara aleng mo leventaba, diga lox i mi labantuxu at levesipsip.

<sup>14</sup> \*Aleksanda, neni nom laradi i gugu aen, ni ga lok kapmek aleng lugugu rak. La Leeme Silok naba vorang mo laxakapmek teren mumu mo lavanga neni ga lox i ria.

<sup>15</sup> Una lok tatao avukar u mila ne Aleksanda i tupe alolos na Lagale Lavavang nedik ata paase asu i.

<sup>16</sup> \*Ap mo laaleng avot nenia aga tu at lavapaase, goxopmen tara ga rupot ti lok tooro ia. Limixin axap tarak diga sixiro basinge ia. A sing ne Moroa do neni noxo vorang nom laxakapmek atdi.

<sup>17</sup> \*Ketla Leeme Silok ga nemen eburu minia la ni ga lox alolos ia, kusu nia aga epovo xusu ana tong asu Lagale Lavavang tinedi limixin kopmen di me Judaia la diga rongga i. La Leeme Silok ga lox asepsu ia basinge lanmet.

<sup>18</sup> La neni naba lox asepsu ia basinge leveloklok kakapmek axap, la neni naba lam abeles ia uto vana at laxalibet at Linintoo ren. Leemi asu amisik tin la kopmen taxavaxap teren. I raturun.

### *Lavapaase Momo*

<sup>19</sup> \*A lox aonon lavapaase momo ri ne Pirikila mi ne Akuila la tinedi axap di nemen to at loogu at ne Onisiparas.

<sup>20</sup> \*Erastas ga nemen to Korin, la nenia aga on basinge ne Tropimas to Mailitas, atla neni ga meres.

<sup>21</sup> Una lolos kusu una rupot soso de avot ti leven gaaling at lamdut.

Iubulas, ne Pudén, Lainas, mi ne Kolodia di lox aonon lavapaase momo bok tu. Nedi axap bok lutneton dik di lox aonon levelinga momo ru.

<sup>22</sup> Leeme Silok na nemen eburu mi lóroonan taram. Letaba nabalamu at ne Moroa na nemen eburu minu. I raturun.

\* **4:16:** 2 Ti 1:15    \* **4:17:** Gu 23:11; 27:23; Dan 6:22    \* **4:19:** Gu 18:2; 2 Ti 1:16-17    \* **4:20:** Gu 19:22; 20:4

**Taitas**  
**Lovoang At Ne Pol**  
**Saparap Ne Taitas**  
**Levelinga Loklox**  
**Axasep**  
**Lamaares 67 A.D.**

Taitas neni xopmen laradi me Judaia, ketla mumu mun levenanasa at ne Pol, neni ga nunu at ne Iesu Karisito. Ap mo lavatpas at ne Pol ti tong asu Lagale Lavavang, ne Taitas neni lara atdi la nedi diga emu tangtagap amisik. Pol ga riki ne Taitas la ni gat pas uto Korin ga gepura nga. Melemu ne Pol ga tong i ri ne Taitas la neni ga ravasu ngan laradi gomgo mavana at luvuttadi nunu diga nemen to at losoxan Krit.

**Lengkot silok keneng at na lovoang**

1:1-4 Lavapaase momo at ne Pol ti ne Taitas.

1:5-16 Lempapaase mumu luvuttadi amgomgo at limixin nunu.

2:1-15 Levenanasa mumu leveloklok i nunuan.

3:1-11 Leveloklok nunuan ti lorooro at luvuttadi nunu.

3:12-15 Lentaba lempapaase bok at ne Pol la lavapaase abeese.

*Lavapaase Axasep*

<sup>1</sup> Nenia ne Pol, lasaxaruki at ne Moroa la lun pavang at ne Iesu Karisito. Nenia a gugu rik lox alo los lununu at lavaanat soxolik at ne Moroa. Nia a vanasa nom limixin mi levelinga ruturun at ne Moroa xusu lorooro atdi nan manton tino,

<sup>2</sup>\* la dinam doma voovo ri lorooro avolo. Na lorooro avolo ne Moroa ga tong ali i ganoxa at lereot. La levelinga ren i ruturun tinotno, neni xopmen laradi xaxarang.

<sup>3</sup>\* La neni ga lok katling na levelanaleng kusu neni na lox asuvos na

levelinga mumu lorooro avolo ri limixin. La neni ga soxolik ka ia xusu nenia ana tong asu nom levelinga ren. Neni ne Moroa la neni Laradi Loklox Arooro atnedik.

<sup>4</sup>\* Nenia a malagan na levelinga ru ne Taitas. Nenu u lok ngan ne nuruk tino, mila nenu u nunu at ne Iesu Karisito xerekngan ia.

Letaba nabalamu mi lenmila tu boro at ne Moroa ne Temen dik eburu mi ne Iesu Karisito, Laradi Loklox Arooro atnedik.

*Lugugu At Ne Taitas To At Losoxan Krit*

<sup>5</sup> Nenia aga lok li u, ne Taitas, to Krit la aga on basinge u. Lavasuun teren keretna. Leventaba leven gugu at lotu to Krit kovisi na sixit avukat. La a vara i do una gugu axap nom levempanga nenia goxo epovo na gu axav i. Una soxolik ka tuvuttadi mukun ti lox ase limixin at laraogu lotu keneng at levenmenemen getgesara. Una lox i na, kerekngan nia aga tong i ru gano.

<sup>6</sup>\* Loklok ap mo luvuttadi mukun na lok nunuan la nedi getgesara dina epot ka leges atkin mun, la laxamdak mi laxaalik atdi dina nunu at ne Iesu, la loklok atdi nan manton kusu limixin petpes noxo epovo na tong i do nom laxamdak mi laxaalik di lox amisik laxakapmek, la kopmen dinang tonga res.

<sup>7</sup>\* Nedi nom luvuttadi amgomgo dina lok tatao lugugu at ne Moroa maxeneng at lotu ren. Kuren la lorooro atdi nan manton at lemeren limixin. Di noxo paase xuxurung. Nemen ditak musak soso, di noxo inin tangtangu mi lengkadan lolos. Nemen dita vesep. Nemen dita vavara pilas solo.

<sup>8</sup> Ketla nedi dina lok maraose mi limixin boro vetpes. Dina mumu asu loklok i nunuan ti lok tooro limixin. Lodoxoma atdi na lox avukat mun. Dina mumu asu loklok i nunuan. Loklok atdi xopmen taxakapmek teren. La di epovo

\* 1:2: Kl 1:27 \* 1:3: Ep 1:9-10; Ta 2:10; 3:4; 1 Ti 1:1,11 \* 1:4: 2 Ko 8:23; Ga 2:3; 2 Ti 1:2; 4:10; Ro 1:7 \* 1:6: 1 Ti 3:2-7; 2 Ti 2:24-26 \* 1:7: 1 Ko 4:1 \* 1:9: 2 Ti 4:3; Ta 2:1

ri lok tatao avukat luruptuvuk atdi basinge lempanga ua xopmen na lox avukat.

<sup>9</sup> \*Nedi dinam tebeng lolos levelinga ruturun at ne Iesu, kerekngan nia aga lox ase vam di min. Dina nemen kuren kusu dina lox alolos lununu at limixin mi levelinga ik mokso, la kusu dina lox akmokso lodoxoma atnedi limixin di xopara na mumu asu levelinga at ne Iesu.

<sup>10</sup> \*Una soxolik ka nedi, loklok atnedi in manton kerepmo, kusu dina sep pepe buaang nedi limixin nunu ro Krit ding tonga xepe levelinga ruturun. Mo limixin di paase gamasa mun la di babala arup limixin. Nedi limixin me Judaia, mo dim tebeng alolos levelinga at ne Moses.

<sup>11</sup> \*Una sep pepe di xusu di noxo vaase bok ba ro xeneng at laraogu lotu, mila dik lox ase limixin mi levelinga xopmen nak mokso la kerepmo dik lok kapmek lununu at limixin la dik lok kapmek bok lixitkis koetemen. Di lok na lavanga xusu dina lok kaka levempilas la na loklok atdi i lok kapmek tinotno.

<sup>12</sup> Lara leeme vapaase me go Krit ga lok keretna, "Limixin me Krit nedi limixin kaxarang, loklok atdi i lok kapmek ngan lababo sio la nedi dik molo at lugugu la di xoxo anan amisik."

<sup>13</sup> \*Na levelinga ren i ruturun. Kuren la una vaase sok di, kusu dina tu atmatkun at lununu atdi.

<sup>14</sup> \*Una paase lolos bok tidi xusu di noxo mumu asu leventetere at lubang mixin me Judaia, la kusu di noxo mu asu levelinga atnedi ding tonga aie levelinga at ne Moroa.

<sup>15</sup> \*Di lok do leventaba leveluxa i xaala. Ketla i lox avukat do limixin nunu dina anan leveluxa axap. Nedi limixin kakapmek kopmen dina nunu at ne Iesu Karisito la di ke xepe leventaba leveluxa mila lodoxoma atdi xopmen na lox avukat la loklok atdi i lok bilinga.

<sup>16</sup> \*Di tong i do di nunu at ne Moroa, ketla kopmen na ruturun. Mila levempanga nunuan kopmen na ravasu at lorooro atdi. Loklok atdi i lok kapmek at lemeren ne Moroa la at lemeren limixin. Nedi limixin tongtonga xepe mun, la dixo epovo na lok tevempanga i nunuan.

## 2

### *Leveloklox Ase Nunuan Ti Luvuttadi Nunu*

<sup>1</sup> \*Ketla nenu ne Taitas, una lox ase limixin nunu mi loklok nunuan ik sixit eburu mi levelinga at ne Moroa.

<sup>2</sup> Una lox ase luvuttadi mukun keretna. Di noxo inin tangtangu mi laxadan lolos. Dinam tebeng loklox avukat kusu limixin dina lok ngangao atdi. Levempanga axap dina lox i, na lox avukat mun la lununu atnedi nat kis aulis. Dina umsu mi labalamu. Dola teventaba dina lok tong pen di, di noxo subu, ketla dinaba tu atmatkun at lununu atdi.

<sup>3</sup> \*La kerepmo bok una tong i ri lavakin mukun keretna. Luruptuvuk atnedi na dadat la nan manton. Di noxo tere mumu tara. Di noxo inin amisik lengkadan lolos. Ketla loklok nunuan na ravasu at lorooro atdi, kusu limixin dina ven di la dina mumu asu nom loklok nunuan atdi.

<sup>4</sup> Loklok atdi na lox avukat, kusu dinaba epovo na tong asu levelinga ri lavakin maxat keretna. Dina balamu lavatlok atdi la dina balamu laxamdak mi laxaalik atdi.

<sup>5</sup> \*Dina mumu asu loklox avukat. Luruptuvuk atdi na dadat. Dina gugugu avukat to xolonu atdi. Dina lok tooro limixin axap. Dinang tonga res at levelinga at lavatlok atdi. Dina mumu asu luruptuvuk nunuan, kusu limixin maxamang at lotu di noxo epovo na tong i do levelinga at ne Moroa i lok kapmek.

<sup>6</sup> La kerepmo bok una tong i ri luvuraau maxat do dina mumu asu loklox avukat.

\* **1:10:** 1 Ti 4:7 \* **1:11:** Jo 10:12; 1 Pi 5:2; 2 Ti 3:6  
15:11; Ro 14:20 \* **1:16:** 2 Ti 3:5; 1 Jo 1:6; 2:4

\* **1:13:** 2 Ti 4:2 \* **1:14:** 1 Ti 4:7 \* **1:15:** Mt  
**2:1:** Ta 1:9 \* **2:3:** 1 Ti 3:11 \* **2:5:** Ep 5:22

7 \*At levempanga axap nenu una lok leveloklok i nunuan ngan lampoovo ridi xusu nedi bok dina lok levempanga nunuan. Dola una lox ase limixin, una paase ruturun tidi la levelinga ram nak sixit nunuan.

8 \*Una vavang bok mi levelinga nunuan, kusu nedi di munepen midik, di noxo epovo na vaase mumu dik, ketla dinaba lok mangan.

9 \*La una tong i ri lavasaxaruki do nedi dinang tonga res at luvuttadi amgomgo atdi at levempanga axap. La dina gugu avukat kusu luvuttadi amgomgo atdi dina lok momo mi lugugu atdi. La nemen di guta vorang linga mi levelinga xapmek tinedi.

10 \*Nemen ditap kip pilo xaka levempanga at luvuttadi amgomgo atdi. Ketla dina mumu asu loklok nunuan kusu luvuttadi amgomgo atdi dinaba ven i, do di epovo na gugu avukat at levempanga axap. Dina mumu asu na leveloklok kusu limixin kopmen dina nunu at ne Iesu dinaba ven kibis i do levelinga at ne Moroa, Laradi Loklox Arooro atdik, i lox avukat tinotno.

11 Nom limixin nunu dina mumu asu avukat levelinga at ne Moroa, mila ne Moroa ga lox asusu letaba nabalamu ri limixin axap. Neni ga riki ne Iesu Karisito xusu na lox arooro di.

12 \*Kuren la ata ke xepe leveloklok kakapmek keretna. Ata ke xepe lorooro xapmek. Nemen dik ta ngaongao ri levempanga at na lavatbung menemen. Nemen dik gutak lok tangtangu, ketla lorooro atdik na dadat. La ata lok mo levempanga ne Moroa i vara i at na lavatbung menemen kopok.

13 \*La kerepmo atam tebeng loklox avukat ap mo levenaleng atat kis tangais ti mo langsung laaleng avukat, la lovotpot nunuan at ne Iesu

Karisito, neni ne Moroa silok atdik la neni Laradi Loklox Arooro atdik. Neni naba rupot mi lisisixam silok at ne Temen.

14 \*Neni ga raba i xusu neni na un kaka amlong nedik basinge laxakapmek atdik ngan limixin melemelengan la kusu tana nemen ngan limixin teren kusuk mun la tana lolos ti lok leven gugu nunuan.

15 \*Na levelinga a tong pam i ru, ne Taitas, una anasa limixin me Krit min, kusu una lox alolos lorooro atdi mi na levelinga. La kerepmo bok una vaase sok di, atla kopmen torooro avukat atdi. La tara atdi guta lox abulubun kepe u, mila nenu leeme vasaase at ne Moroa.

### 3

#### *Luruptuvuk At Limixin Nunu*

1 \*La ne Taitas, una tong box i ri nom limixin nunu do dina doxoma mumu lixitkis atdi maxopok at lagavaman mi lavaeme silok. La dinang tonga res at levelinga atdi la dina gagas kusu dina lok leven gugu nunuan,

2 \*la di noxo paase xapmek mumu tara. Ketla limila na nemen at lebelen di, dina balamu limixin, la dina lok ngangao ruturun at limixin axap, limixin nunu la limixin bok maxamang at lotu.

3 \*Gano nedik limixin ta goxoklen lorooro avukat, ta goxo rongga res at levelinga at ne Moroa la levelinga bok at lavaeme silok. Satan ga xarang dik la tagara ngaongao ri levempanga at na lavatbung menemen. La taga mumu mene nga lavavara atnedik. Lorooro atdik ga umsu mi laxakapmek mi levereven peves at lempanga at limixin petpes. La limixin diga musak dik la ta goxo epen avukat.

4 \*Ketla lebelen tuntun la labalamu at ne Moroa, Laradi Loklox Arooro atdik ga rupot,

\* 2:7: 1 Ti 4:12; 1 Pi 5:3 \* 2:8: 1 Pi 2:15 \* 2:9: 1 Ti 6:1 \* 2:10: Ta 1:3 \* 2:12: 1 Jo 2:16; Ep 1:4  
 \* 2:13: 1 Ko 1:7; Pl 3:20 \* 2:14: Ga 1:4; Pas 19:5; Lal 7:6; Sam 130:8; Isi 37:23; 1 Pi 2:9 \* 2:15: 1 Ti 4:12 \* 3:1: Ro 13:1-7; 1 Pi 2:13-14 \* 3:2: Pl 4:5 \* 3:3: 1 Ko 6:11; Ep 2:2; 5:8 \* 3:4: Ta 1:3

<sup>5</sup> \*Ia neni ga lox arooro dik. Neni goxo lox arooro dik mumu leven gugu nunuan atdik. Lebelen tuntun teren ni lavasuun at loklox arooro ren. Moroa ga lox arooro dik keretna. Loroonan Kaala ren ga gos kepe vam leveloklok kakapmek atdik la ga raba dik mi livipisik amaxat la lorooro maxat.

<sup>6</sup> \*Moroa ga sak tiki Loroonan Kaala ren saparap dik kusu na lok tooro dik. I epovo xuren, mila ne Iesu Karisito, Laradi Loklox Arooro atdik, ga uu nop loklok atdik.

<sup>7</sup> \*Kerepmo ne Moroa ga lox asepmus dik mumu letaba nabalamu ren la kerepmo ga tong atkatla li i do nedik limixin manmanton tino. La nedik tanaba ruuna ka lorooro avolo, mo dik tat kis tangais i.

<sup>8</sup> Na levelinga mumu loklox arooro at ne Moroa i ruturun. Una lolos ti tong asu amisix i na ri limixin nunu me Krit, kusu dina lolos ti lok leven gugu nunuan. Na leven gugu nunuan i lox avukat la ik lok tooro limixin axap.

<sup>9</sup> \*Ketla nemen uta vetep mi levelinga at levempanga gamasa. Na levelinga i lok ngan ta levenasen at lavalabat at lubang mixin me Judaia. La i lok ngan bok levelinga ik lok to xeneng at Laulis Linga at ne Moses. Una ke xepe na levempanga, mila na levempanga noxo lok tooro limixin nunu.

<sup>10</sup> \*Una vaase sok nege taradi i lok leven ekarakat. Do neni move na lox axis epeseves limixin, una vaase sok amu box i. Dola neni noxo rongares at levelinga ram, nemen utat kis etangas eburu min.

<sup>11</sup> \*Una lox i xuren mila limixin kerepmo lodoxoma atdi i xaxarang arup di la lorooro atdi i umsu mi laxakapmek. La mo laxakapmek teren i lox asuusu i do levelinga bok teren i lok kapmek.

<sup>12</sup> \*Leventaba levelinga bok na, nenia ana tong i ru. Ana sak tiki ne Atemas kopla ne Tikikas saparav u. Dola neni na rupot, neni na lok kun u la una lolos ti vot pasa ia ro at lemenemen Nikopolis. Nenia anaba nemen go at leven gaaling at laavat.

<sup>13</sup> \*La una lok tooro avukat ne Sinas, laradi likling at levelinga, eburu mi ne Apolos at lavatpas atdu. Una lok taba du mi levempanga duk pakes tin ti mo lavatpas.

<sup>14</sup> \*La limixin axap atnedik, dina lolos amisik ti lok leven gugu nunuan kusu dinaba lox epovo lavakpakes atdi la dina lok tooro limixin petpes.

<sup>15</sup> Nema eburu mi limixin nunu dik lok de, ma lox aonon lavapaase momo ru. Una raba bok lavapaase momo atnema rinedi limixin di etangas minema xeneng at lununu atnedi.

Letaba nabalamu na nemen eburu minemi axap. I ruturun.

### *Levelinga Loklox Axap*

\* **3:5:** 2 Ti 1:9; Ep 5:26; Jo 3:5    \* **3:6:** Gu 2:17-18    \* **3:7:** Ro 3:24    \* **3:9:** 2 Ti 2:14,16,23    \* **3:10:** Mt 18:15-17; 2 Jo 1:10    \* **3:11:** 1 Ti 6:3-5    \* **3:12:** Ep 6:21-22    \* **3:13:** Gu 18:24; 1 Ko 3:5-6; 16:12  
\* **3:14:** Ep 4:28; Ta 2:14; Mt 7:19



**Pilimon**  
**Lovoang At Ne Pol**  
**Saparap Ne Pilimon**  
**Levelinga Loklox**  
**Axasep**  
**Lamaares 62 A.D.**

Pilimon neni laradi gap novos aleng. Neni bok laradi nunu boro at lemenemen silok Kolosi. Ne Pilimon ga ruuna lara laradi ga ngan laradi gugu ren la neni ga lasaxaruki mene laasen teren ne Onesimas. Na lasaxaruki ren ga sixiro basinge ne Pilimon. Ni ga sixiro la ga ekip tangarang mi ne Pol ap mo levenaleng neni gak lok at loogu xokoxo. At lempapaase ren eburu mi ne Pol ne Onesimas ga leeng la ga nunu at ne Iesu Karisito. Pol mi ne Onesimas dugak lok buru la ne Pol ga vara i do ne Onesimas namlong mu ne Pilimon. Kuren la neni ga malagan i na lovoang uto ri ne Pilimon. At nai lovoang ne Pol ga paase ti ne Pilimon la ga vara i do neni na siam ka amlong ne Onesimas mi lomomo. Neni naba siam ka amlong i mi lomomo, kopmen do neni lasaxaruki ketla neni laradi nunu at ne Iesu Karisito.

**Lengkot silok keneng at na lovoang**

- 1:1-3 Levelinga momo at ne Pol ti ne Pilimon.  
 1:4-7 Pol ga tong avukat ti ne Moroa mumu ne Pilimon.  
 1:8-22 Pol ga vara i do ne Pilimon na lok ka amlong ne Onesimas.  
 1:23-25 Pol ga vaase abeese.

*Lavapaase Axasep*

<sup>1</sup>\*Nenia ne Pol, nia a nemen de at loogu xokoxo mila nenia a tong asu Lagale Lavavang at ne Iesu Karisito. Timoti, neton dik, ik lok eburu minia.

Nema mi ne Timoti ma malagan na lovoang tu, ne Pilimon. Nenu lentangas avukat atnama la nu laradi gugu at ne Moroa ngan nema.

<sup>2</sup>\*Na lovoang bok ti ne Apia, neni i lok ngan neinen nama, la ti ne Akipas, neni bok laradi gugu at ne Moroa ngan nema, la tinedi limixin nunu di lotu amisik to at loogu ram.

<sup>3</sup>\*Letaba nabalamu eburu mi lenmila tu boro at ne Moroa ne Temen dik la Leeme Silok, ne Iesu Karisito.

*Lisingising At Ne Pol*

<sup>4</sup>\*Do nenia a ngising ne Moroa, a tong avukat amisik tin mumu u, ne Pilimon.

<sup>5</sup>Mila ang tonga i do lununu ram saparap Leeme Silok, ne Iesu i lolos, la u balamu bok limixin teren.

<sup>6</sup>\*A sing ne Moroa do lixitkis ekilen atnema eburu minemi limixin nunu naba lox asusu leveloklox anarong ne Karisito im taba dik min.

<sup>7</sup>\*Netak orong. Nenia a lok momo aleng la lorooro rak i lolos atla nom labalamu silok taram saparap limixin nunu i umsu aleng. La kerepmo bok uga lox alolos lorooro at limixin axap di nunu.

<sup>8</sup>Nenia a epovo ana vaase basabas tu mila nenia laradi gugu at ne Karisito,

<sup>9</sup>\*ketla nia noxo vaase lolos, ana paase mi labalamu. Nenia a tu katling ne Iesu Karisito la at na loxonaleng nia a nemen to at loogu xokoxo.

<sup>10</sup>\*La nia a sing u mumu ne Onesimas, neni i lok ngan lamdak tarak mila neni ga ru kaxat lununu maxat nade at loogu xokoxo.

<sup>11</sup>Ganoxa neni ga gugu ru, neni goxo gugu avukat, ketla nanga lingina i epovo na lok tooro avukar u, la na lok tooro box ia.

<sup>12</sup>Ana riki amlong i udom saparav u, a balamu aleng i.

<sup>13</sup>\*I lox avukat do neni na nemen eburu minia xusu neni na lok tooro ia mi Lagale Lavavang de at loogu

\* 1:1: Ep 3:1 \* 1:2: Kl 4:17; 2 Ti 2:3 \* 1:3: Ga 1:3 \* 1:4: Ro 1:8-9 \* 1:6: Pl 1:9; Kl 1:9 \* 1:7: 2 Ko 7:4 \* 1:9: Pm 1:1 \* 1:10: Kl 4:9; 1 Ko 4:15 \* 1:13: Pl 2:30

xokoxo. Nenu xopmen unak lok de xusu unaba lok tooro ia, ketla ne Onesimas, i lok ngan ta do i lok kun u.

<sup>14</sup> \*Nenia aga vara i do neni na nemen be de eburu minia, ketla neni lasaxaruki ram, kuren la nenia a noxo lox alis gamasa i. I lox avukat do una sep siam be.

<sup>15</sup> A lok do neni ga sixiro basinge u at leventaba leven gaaling mene, ketla neni naba nemen amisik eburu minu ngan netam tinotno xeneng at ne Karisito.

<sup>16</sup> \*Neni noxopmen lasaxaruki mene nga, neni naba lok ngan netam orong la ba lok lempanga avukat tu. Neni ik lok tooro aleng ia ketla neni naba lok tooro aleng tinotno u ngan lasaxaruki la neni netam tinotno keneng at Leeme Silok.

<sup>17</sup> Dola u doma i do nenia lentangas avukat taram, una seega rangarang i ngan u seega rangarang ia.

<sup>18</sup> Do neni ga lok kapmek tevempanga ram koplala neni ga nem kaka tevempanga, nenia anaba vorang i ru.

<sup>19</sup> \*Nenia ne Pol, a malagan na levelinga ru. Na levelinga rak i raturun la nenia anaba vorang levempanga ram. Ketla una doma i do nenia aga lok tooro u xusu una lok ka lorooro.

<sup>20</sup> Netak. Una siam ka ne Onesimas kusu naba lok ngan lavanga avukat tia at laasen at Leeme Silok la unaba lox amomo aleng ia.

<sup>21</sup> A malagan na levelinga la aklen tinotno i do nenu unaba rongares tarak la unaba lok levempanga vetpes bok tia.

<sup>22</sup> \*La lara lavanga bok. Una gagas li toxot mikmidi ria. A lok do ne Moroa naba vorang levesingising at nemi xusu nenia aba vot pasa bok nimi.

<sup>23</sup> \*Epapras neni i lox aonon lavapaase momo ren tu. Neni bok na ik lok at loogu xokoxo atla neni ga tong asu Lagale Lavavang at ne Iesu Karisito.

<sup>24</sup> \*La nedi bok di gugu eburu minia di lox aonon lavapaase momo ru. Mak, ne Aristakas, ne Demas, ne Luk, la nedi axap di gugu eburu minia.

<sup>25</sup> Letaba nabalamu at Leeme Silok ne Iesu Karisito na nemen eburu minemi.

\* **1:14:** 2 Ko 9:7; 1 Pi 5:2      \* **1:16:** 1 Ti 6:2      \* **1:19:** 1 Ko 16:21; Ga 6:11      \* **1:22:** Pl 1:25; 2:24  
\* **1:23:** Kl 1:7      \* **1:24:** Kl 4:10,14; 1 Ti 4:10

**Ibru**  
**Lovoang Ti Limixin**  
**Nunu Me Ibru**  
**Levelinga Loklox**  
**Axasep**  
**Levenmaares 67-69 A.D.**

Se ne Iesu ga urut uto vana at laxalibet, lavantun sangaun mi lavalimo levenmaares ga men pe i la lara laradi ga malagan i na lovoang tinedi limixin me Judaia, diga so asen bok di do leme Ibru. Laradi ga malagan i na lovoang kopmen neni goxo malagan li laasen teren. Na limixin me Ibru nedi diga nunu at ne Iesu, la lentaba luvuttadi diga lox asongot di la diga doma i do dinamlong ti loklok at lotu atnedi me Judaia la dina ke xepe lununu atdi keneng at ne Iesu Karisito. Laradi ga malagan i na lovoang tinedi ga vaase pe di do nemen di guta mu asu i na. Mila ne Iesu Nitna ne Moroa neni mun i silok ti ne Moses. Ne Iesu neni lamgomgo ruturun at lotu, neni imgomgonga nedi luvuttadi di lok levengugu at lotu. Lara langas mo ga nemen kusu ti sev amet lempanga mi lavanuet kangkedek atdi xusu dinamtaba min ti ne Moroa. Anai ni lenep at lekabus migomgo, ketla ne Iesu ga lok kepe mo loklok. Neni ga vot at na lavatbung menemen kusu ti lok pes laxakapmek basinge dik, neni ga met la ga raba labantuxu ren. Laradi ga malagan na lovoang ni ga lox axasep na langas tinedi xusu nedi di noxo repes basinge ne Iesu, ketla dinamtembeng atmatkun teren.

**Lengkot silok keneng at na lovoang**

1:1-4 Moroa ga tu asuvos min tidik keneng at ne Nitna.

1:5-2:18 Karisito neni i silok tinedi lubungangelo.

3:1-4:13 Karisito neni i silok ti ne Moses.

4:14-7:28 Karisito neni i silok ti lubungmaasa.

8:1-9:28 Lekabus maxat ne Karisito ga lox i, ni i silok ti lekabus migomgo.

10:1-39 Karisito ga raba lorooro ren at legesa xonaleng ti limixin axap.

11:1-40 At lununu mun nedik tabat kis aulis.

12:1-13:19 At lurutu alolos atdik, nedik ata nunu la ta ronga res at ne Karisito.

13:20-25 Levelinga loklox abeese.

*Nitna Ne Moroa I Silok Ti Lubung Angelo*

<sup>1</sup> Ganoxa ne Moroa ga vaase ri lavalabat atdik at levenngusno atnedi lavaeme vapaase ali, at levengkonaleng getgesara la at leventaangas axap.

<sup>2</sup> \*Ketla at na levenaleng melemu at lovtopot at ne Iesu, Moroa ira paase nga ridik limixin nunu at lungusno ne Nitna. Neni ga soxolik ka i xusu naba ruuna ka levempanga axap, la keneng at ne Iesu, ne Moroa ga rudum li levempanga axap.

<sup>3</sup> \*Ne Nitna i lox asuusu lisisixam at ne Moroa la ni lampenaxa rinotno ren. Ne Nitna ik lok tatao levempanga axap at na lavatbung menemen la mo levempanga i mumu asu levelinga ren i lolos aleng. Neni ga lok langas ti limixin kusu dina dadat basinge laxakapmek. Melemu at na, neni ga xis saparap lekngen tino at Loorong Silok ne Moroa to vana at laxalibet.

<sup>4</sup> \*Kuren la neni ga ruuna ka lix- itkis silok mavana at lubung angelo, kerekngan mo laasen neni ga ruuna ka vam i, ni laasen i silok tidi.

<sup>5</sup> \*Moroa goxo vaase ri tara ta angelo do,

“Nenu ne Nuruk. Ningina nia a lok ngan ne Tamam.” *Sam 2:7*

La ni goxo vaase mumu taangelo xeretna,

\* 1:2: Mt 21:38; Jo 1:3

\* 1:3: 2 Ko 4:4; Gu 2:33-34; Kl 1:20; Ib 8:1

\* 1:4: Pl 2:9

\* 1:5: Gu 13:33;

Ib 5:5; 1 Let 17:13

“Nenia ana lok ngan ne Temen, la neni na lok ngan ne Nuruk.” <sup>2</sup>

*Sml 7:14*

<sup>6</sup> \*La at loxonaleng ne Moroa ga riki asi lamdak avot teren ude xopok ti na lavatbung menemen, neni ga lok,

“Lubung angelo axap tarak dina lotu saparav i.” *Lal 32:43*

<sup>7</sup> Moroa ga vaase mumu lubung angelo la neni ga lok,

“Neni i lok lubung angelo ren di lok ngan laramera manman, la lavasaxaruki ren di lok ngan laxao at lavanga i mam.” *Sam 104:4*

<sup>8</sup> Ketla neni ga lok ti ne Nitna xeretna,

“Nenu ne Moroa, lixitkis orong taram naba nemen amisik la kopmen texavaxap teren. Nenu unabam gomgonga limixin taram mi lodoxoma manmanton la levelinga rurun.

<sup>9</sup> Nenu u vavara aleng ti loklok manmanton la u xopara ri laxakapmek. Kuren la Moroa, ne Moroa ram ira suxa aumsu vam u mi lomomo i silok aleng, mo i volo lomomo atnedi larapen tangas taram.” *Sam 45:6,7*

<sup>10</sup> Neni ga lok bok ti ne Nitna xeretna,

“Nenu Leeme Silok, ganoxa at lereot uga rudum li lavatbung menemen mi laxalibet mi lukngam.

<sup>11</sup> Na levempanga uga rudum li di, naba sonao la dina lok ngan lempanga gamasa, ketla nenu unaba rooro amisik. La dinaba rem teterek ngan labantamon.

<sup>12</sup> Unaba vegun pes di ngan labanmo mikmidi, la ngan lavanga singsiga unaba soxun kepe i, ketla nenu xopmen unak lox ekun lodoxoma ram, la kopmen bok taxavaxap at lorooro ram.” *Sam 102:25-27*

<sup>13</sup> Moroa goxo vaase ri tara atnedi lubung angelo xeretna do,

“Unat kis de saparap lakngak tino, se nenia ana lok limixin munepen minu, na ngan

loxot burubut ti luxangkedek taram.” *Sam 110:1*

<sup>14</sup> \*Lubung angelo nedi leventoonan avukat mun, dik lok tooro ne Moroa. La neni ik sak tiki di rik lok tooro nedi limixin ne Moroa ga soxolik ka vam di xusu dinaba lok kaka loklox arooro.

## 2

### *Minam Tebeng Lolos Lununu At-nimi*

<sup>1</sup> Nitna ne Moroa ga raba dik mi loklox arooro, kuren la minam tebeng lolos lununu atnimi mumu mo levenanasa miga ronga ka vam i, kusu mi noxo soronga basinge mo lununu.

<sup>2</sup> \*Lubung angelo diga raba ne Moses mi Laulis Linga la ixo epovo do tara na los polo i. Do nege ga ronga xepe i xopla goxo mu asu i, neni ga ba lok ka losongsongot ga epovo at loklok teren.

<sup>3</sup> \*La kerepmo bok do nedik ata ronga xepe Lagale Lavavang, ixo epovo do nedik tana sepsu basinge lebelemamao at ne Moroa. Leeme Silok neni avot ga ruka lavavang at langas ti loklox arooro, la nedi luvuttadi vavang diga ronga xaka mo levelinga ren, la diga lox amuar i ridik.

<sup>4</sup> \*Moroa ga lox asuusu box i do mo levelinga ren i rurun mi leveloklok katling la levempanga sangsangu la leventamtaba at Loroonan Kaala, ne Moroa gara epes pam limixin teren min, ga epovo at lavavara ren.

### *Iesu Ga Ravasu Ngan Limixin*

<sup>5</sup> Moroa goxo lok li lubung angelo xusu dinam gomgonga limixin ap mo lemenemen move naba vot melemu, na nema ma paase mumu i.

<sup>6</sup> Ketla limixin at ne Moroa dinabam gomgonga limixin axap kerekngan lara ga tong i keneng at Lovoang Kaala. I lok keretna,

\* **1:6:** Ro 8:29; Sam 97:7 \* **1:14:** Sam 34:7; 91:11  
Mk 16:20; 1 Ko 12:4,11

\* **2:2:** Ga 3:19 \* **2:3:** Ib 10:29; 12:25 \* **2:4:**

“Limixin nedi lempanga salai, la uram doma mu solo di? Nedi lempanga gamasa mun, ketla uk lok tatao avukat tino di.

<sup>7</sup> Nenu uga raba di mi lolos pana at lempanga axap. Ketla lolos atdi i lixilik mun ti lolos taram ne Moroa, la uga lox anarong di mi levenasen silok la lisisinang nunuan.

<sup>8</sup> \*Uga lok katling di xusu dinam gomgonga levempanga axap nu ga rudum li i.”

*Sam 8:4-6*

Ne Moroa ga lok li levempanga axap maxopok at loklok tatao atdik, kopmen goxo ke xepe tavanga. Na lingina kovisi nedik ata ven i do levempanga ik lok maxopok at loklok tatao at limixin.

<sup>9</sup> \*Ketla nedik ata ven kibis i do ne Iesu neni ga ruuna lixitkis silok tinedi lubang angelo. Ne Moroa ga lox asi lixilik mun i maxopok atdi xusu na xip lumumuat at lanmet ti lox asusu lodoxoma at ne Moroa do limixin axap diba lok ka lorooro avolo. Kuren la lingina Iesu ira lok ka vam lixitkis silok la limixin dim taba asinorong i.

<sup>10</sup> \*Gak mokso do ne Moroa, neni ga rudum li levempanga axap la ik lok tatao bok di, do neni na ke xepe ne Iesu xusu neni na xip laxasong-songot kusu na lox agagas avukat ti lugugu ren. Kuren la neni ga ruuna ka laasen do Luntoo Avolo la ga lok ka bok buaang limixin kusu dina ruuna ka loklox arooro.

<sup>11</sup> \*Ne Iesu eburu minedi limixin ni ga lox adadat di, nedi dik lok keneng at legesa xitkis koetemen. Kerepmo la ne Iesu neni i lok momo aleng ti tong di do luvutneton.

<sup>12</sup> Neni ga lok ti ne Moroa,

“Nenia anaba tong asu laasen taram ti luvutnetak la anabak pixan emi asu minu ro melamgo at lovtopot buru atdi.”

*Sam*

*22:22*

<sup>13</sup> La ne Iesu ga lok bok,

“Anaba nunu saga at ne Moroa kerekngan di.”

*Ais 8:17*

La ga lok bok,

“Nenia na, ak lok eburu mi limixin ne Moroa ga raba ia midi.”

*Ais 8:18*

<sup>14</sup> \*I raturun do nedi luvuttadi mun, la kerepmo ne Iesu ga vee radi xusu at lanmet teren neni naba sele utut kepe lolos at ne Satan, mo ik lok limixin kusu dinak marat at lanmet.

<sup>15</sup> Ketla ne Iesu ga lox asepmus di basinge loxokoxo at ne Satan, mila at lorooro axap atdi xeneng ap mo loxokoxo, digak marat at lanmet.

<sup>16</sup> \*La na nedik ta ven kibis i do neni goxo vot ti lok tooro lubang angelo, ketla neni ik lok tooro nedi di ruuna lununu ngan ne Abaram.

<sup>17</sup> \*Kuren la na lavasuun teren la neni ga vee radi at lorooro axap teren ngan luvutneton kusu neni na ravasu ngan laradi ga umsu mi lebelen tuntun. La neni ga ravasu bok ngan laradi raturun at lugugu at lamaasa gomgo ri ne Moroa, la ga ravasu ngan laxaavuk kusu ne Moroa na doxoma xepe laxakapmek at limixin.

<sup>18</sup> Neni xa ga xip lumumuat at loxonaleng ne Satan ga lok tong pen i, ketla ne Iesu goxo subu. Kuren la neni i epovo na lok tooro nedi di ekip tangarang mi leveloklok tong pen.

### 3

#### *Iesu I Silok Ti Ne Moses*

<sup>1</sup> \*Luvutnetak mi luvurinuk. Nemi bok lavaanat soxolik at ne Moroa mo ga ro ka vam nimi ngan limixin teren. Kuren la mina doxoma mumu ne Iesu, neni Lun Pavang la Lamaasa Avolo. La na nedik dira nunu ren.

<sup>2</sup> Neni ga raturun ti ne Moroa mo ga soxolik ka i ri lugugu ren, kerekngan ne Moses ga raturun ap mo levenaleng neni gak lok tatao limixin at ne Moroa.

<sup>3</sup> La ne Iesu ga ruuna ka laasen i silok ti ne Moses, kerekngan mun

\* **2:8:** 1 Ko 15:27 \* **2:9:** Pl 2:8-9 \* **2:10:** Ro 11:36 \* **2:11:** Mt 25:40; Mk 3:35; Jo 20:17 \* **2:14:** Jo 12:31; 1 Jo 3:8; Li 12:10 \* **2:16:** Ais 41:8-9 \* **2:17:** Pl 2:7; Ib 2:14; 1 Jo 2:2; 4:10 \* **3:1:** Ib 4:14; 6:20; 7:26; 8:1; 9:11; Kex 12:7

laradi gugu gu, neni i ruuna laasen silok ti mo loogu neni i lox i.

<sup>4</sup> Na i ruturun mila levenabung mixin getgesara di ruuna lara laradi ga lok li di. Ketla ne Moroa ga lok li levempanga axap.

<sup>5</sup> \*Moses ga ruturun ngan laradi gugu ri lok tatao limixin at ne Moroa la neni ga paase asu levempanga mo naba vot melemu.

<sup>6</sup> \*Ketla ne Karisito i ruturun at lugugu ri lok tatao limixin at ne Moroa xerekngan lanarong i lok tatao libibinat teren. Do atam tebeng lolos lununu atdik la tana ngangais mi lomomo ri lomlong teren, i lox asusu i do nedik limixin at ne Karisito.

#### *Loklok Mamana Ri Limixin At Ne Moroa*

<sup>7</sup> Nedik limixin at ne Karisito, kuren la nemen mita ronga xepe levelinga ren. I ngan levelinga at Lovoang Kaala, Loroonan Kaala ga vaase i xeretna,

“Mo do mina ronga laxaka at ne Moroa lingina,

<sup>8</sup> \*mi gutak lox ametarauat lebelen nemi ngan lavalabat atnemi diga ronga xepe ne Moroa ap mo levelingaleng ne Moroa ga lok tong pen lununu atdi ro at lamatbin.” *Sam 95:7-8*

<sup>9</sup> La ne Moroa ga lok keretna, “Lavalabat atnemi diga edak minia go la diga lok tong ia, keke i do diga ven levempanga silok nenia aga lox i ridi at lavanuet sangaun maares.

<sup>10</sup> Anai lavasuun teren la nia aga bele songsongot tinotno mi limixin ap mo loola. Aga lok keretna, ‘Lebelen di i onon petpes amisik basinge ia, la diga ronga xepe levempapaase ali rak.’

<sup>11</sup> \*Kuren la aga belemamao nedi la ga lok laxakaape matmatkun tinotno xeretna, ‘Dixo epovo rinotno xusu dina beles ap mo loxot loklox amas tarak.’” *Sam 95:9-11*

<sup>12</sup> Luvutnetak mi luvurinuk. Mina lok tatao avukat nemi xusu xopmen tara atnemi noxo ruuna taxakapmek la loklok ting tonga xepe levelinga at ne Moroa keneng at lorooro ren, la kerepmo na sok tixirixes kepe ne Moroa, Luntoo Avolo.

<sup>13</sup> Ketla at na levenaleng nemi move mi rooro ren, mina epang aru xusu laxakapmek noxo solo arup tara atnemi la lebelen nemi na repe ri levelinga at ne Moroa.

<sup>14</sup> \*Nedik tat kis esogo mi ne Karisito mo do nedik tam tebeng lolos lununu se at laxavaxap at lorooro atdik, kerekngan nedik taga nunu ruturun ap mo levenaleng taga lok kaka lununu maxat.

<sup>15</sup> \*I lok ngan Lovoang Kaala i tong i do,

“Mo do mina ronga laxaka at ne Moroa lingina, mi gutak lox ametarauat lebelen nemi ngan lavalabat atnemi diga ronga xepe ne Moroa.” *Sam 95:7-8*

<sup>16</sup> \*Nege di nom diga ronga laxaka at ne Moroa la melemu diga ronga xepe i? Nedi mo limixin me Israel, ne Moses ga lam asu ka di boro Isip.

<sup>17</sup> \*At lavanuet sangaun maares diga lok laxakapmek la diga raba rulu ne Moroa. Kuren la ne Moroa ga musak di la buaang atnedi diga remet eteke mun to at lamatbin.

<sup>18</sup> \*La ne Moroa ga vangpe do di noxo vubeles tinotno ri mo loxot loklox amas teren, mila diga ronga xepe levelinga ren.

<sup>19</sup> Kuren la nedik di ven i do buaang atnedi di goxo lox epovo i xusu dina vubeles mila di goxo nunu at ne Moroa.

## 4

#### *Loklok Amas Ti Limixin At Ne Moroa*

<sup>1</sup> Lumusmaragu move i rem suang kusu ti pubeles ti mo loxot loklox amas teren. Kuren la mina lok tatao

\* **3:5:** Kex 12:7 \* **3:6:** Kl 1:23; Ib 3:14 \* **3:8:** Pas 17:7; Kex 20:2-5 \* **3:11:** Kex 14:21-23 \* **3:14:** Ib 3:6 \* **3:15:** Ib 3:7-8 \* **3:16:** Kex 14:1-35 \* **3:17:** 1 Ko 10:10 \* **3:18:** Ib 3:11

avukat nimi xusu teventaba atnimi di noxo subu kot ti mo loklox amas.

<sup>2</sup> Nemi bok miga ronga Lagale Lavavang kerekngan nedi diga ronga i. Ketla mo lavavang diga ronga i, goxo lok tooro di mila di goxo nunu ren.

<sup>3</sup> \*Monga nedik dira nunu vam, i lok ngan ta do tara vubeles pam ap mo loxot loklox amas kerekngan ne Moroa ga tong i do,

“Kuren la aga belemamao nedi la ga lok laxakaape matmatkun tinotno xeretna, ‘Dixo epovo rinotno xusu dina beles ap mo loxot loklox amas tarak.’”

*Sam 95:11*

Ketla lugugu ren gara xap pam ga ruka i at luruntudum li at na lavatbung menemen.

<sup>4</sup> To xeneng at Lovoang Kaala ne Moroa ga vaase mumu laaleng sepsev avanuti mi na levelinga,

“At laaleng sepsev avanuti, Moroa ga lox amas basinge leven gugu axap teren.” *Lur 2:2*

<sup>5</sup> La ap mo levelinga a tong pam i, ga lok bok keretna,

“Dixo epovo rinotno xusu dina beles ap mo loxot loklox amas tarak.” *Sam 95:11*

<sup>6</sup> I ruturun do leventaba move dinaba vubeles ap mo loxot loklox amas. La nedi gano diga ronga Lagale Lavavang, di goxo vubeles teren mila diga ronga xepe levelinga at ne Moroa.

<sup>7</sup> Kuren la ne Moroa ga lok katling bok lara laaleng, ga tong i do ningina. La at leventaba levenmaares melemu at lavatpasu at leeme Israel boro Isip, neni ga vaase at lungusno ne Devit kerekngan levelinga neni ga tong i gano, ga lok keretna,

“Mo do mina ronga laxaka at ne Moroa lingina, mi gutak lox ametarauat lebelen nimi.” *Sam 95:7,8*

<sup>8</sup> \*Do ne Josua gita raba di mi loklox amas ap mo levenaleng neni ga lam abeles limixin uto Kanan, Moroa xopmen gixo vaase bok ba melemu

mumu taaleng petpes, kusu nedik taba lok ka loklox amas teren.

<sup>9</sup> Loxonaleng ti vubeles to xeneng at loxot loklox amas at ne Moroa move i rem suang ti limixin teren.

<sup>10</sup> \*Do tara i ruuna loklox amas at lorooro ren, neni ira on basinge vam lugugu axa ren at na lavatbung menemen. I lok ngan ne Moroa ga lox amas basinge lugugu ren.

<sup>11</sup> Kuren la mina raba axap lodoxoma atnimi xusu mina vubeles ap mo loklox amas la kopmen tara noxo subu kot la na mu asu lampoovo atnedi leme Israel, diga raba rulu ne Moroa.

<sup>12</sup> \*Lenavolo at ne Moroa i ruuna lorooro la i lolos aleng. I lok ngan lavarise ing sengsen evan, mo i tara xoxorop laranin etudum la laramomodong atdik. La kerepmo bok levelinga at ne Moroa i pubeles uto xa xeneng at lodoxoma la lorooro atdik kusu na lox asu leveloklok kakapmek. Kuren la nedik toxo epovo xusu ata lipe at lemeren ne Moroa, neni ikleklen levendoxoma atdik la levesumsuma at lebelen dik.

<sup>13</sup> Kopmen tevempanga at na lavatbung menemen axap i epovo na nemen ali pe at lemeren ne Moroa. Neni ne Pen Axasep la i reven leveloklox axap at limixin dim doma i xopla dim suma i. La neni naba lok li limixin at lavapaase mumu mo leveloklok.

### *Iesu Neni Lamaasa Avolo*

<sup>14</sup> \*Nedik di ruuna Lamaasa Avolo, neni ga urut pam uto vana at laxalibet, la monga it kis saparap lekngan tino at ne Temen. Neni ne Iesu, Nitna ne Moroa. Kuren la nedik atam tebeng lolos mo lununu atnedik tagara ruuna ka vam i.

<sup>15</sup> Mo Lamaasa Avolo atdik, neni i epovo na suma rooro dik at leveloklok tong pen mila neni ga suma bok laxaloklok tong pen ngan dik. Ketla neni xopmen goxo lok taxakapmek.

\* **4:3:** Ib 3:11 \* **4:8:** Lal 31:7; Jos 22:4 \* **4:10:** Ib 4:4 \* **4:12:** 1 Pi 1:23; Ep 6:17; Li 1:16; 19:15; Jo 12:48 \* **4:14:** Ib 3:1; 10:23 \* **4:16:** Ib 10:19

<sup>16</sup>\*Kuren la nemen dik guta marat kusu tana vot pasa ne Moroa mi levendoxoma atdik mila neni i umsu mi lebelen tuntun la nedik tanaba ruuna ka letaba nabalamu ren la loklok tooro do nedik atak pakes tin.

## 5

<sup>1</sup> Lavamaasa amgomgo axap Moroa i soxolik ka di xantubu at limixin kusu dina ru katling di at lugugu at ne Moroa. Dim taba leventamtaba ri tong loklox avukat ti ne Moroa la diplavang bok mi levempanga mi lavanuet kangkedek ti vung kimit laxakapmek at limixin.

<sup>2</sup>\*Lamaasa gomgo im suma lev-eloklok tong pen, kuren la i epovo do ni na suma rooro nedi di lok laxakapmek mila kopmen dinaklen i do mo levempanga i lok kapmek. <sup>3</sup>\*Ni lavasuun teren la lamaasa gomgo naba lok laplavang mi levempanga ri laxakapmek axa ren, la ri laxakapmek bok at limixin.

<sup>4</sup>\*Kopmen na epovo do tara na lok ka mo lugugu mi lavavara mun teren, ketla ne Moroa xa naba soxolik ka i ngan neni ga soxolik ka ne Aron.

<sup>5</sup>\*La ne Karisito bok kopmen goxo xip ka mo lugugu silok at lamaasa gomgo mi lavavara ren. Ketla ne Moroa ga lok tin keretna,

“Nenu Nuruk, ningina nia a lok ngan ne Tamam.” *Sam 2:7*

<sup>6</sup>\*La at loxot petpes at Lovoang Kaala Moroa ga lok bok tin keretna,

“Nenu Lamaasa Avolo ngan ne Melkisedek, la kopmen taxavaxap at lugugu ram.” *Sam 110:4*

<sup>7</sup>\*Ap mo levenaleng ne Iesu ga rooro ren at na lavatbung menemen, neni ga sing eburu mi lerengteng silok ti ne Moroa do na lox arooro i basinge lanmet. La ne Moroa ga sepo lisingising teren mila neni ga lox asi i maxopok at lavavara at ne Moroa.

<sup>8</sup> I raturun do neni ne Nitna ne Moroa, ketla mo losongsongot neni

gap kiv i, ga lox epovo i xusu na mu asu lavavara at ne Temen.

<sup>9</sup> Kerepmo la ne Moroa ga lox agagas li i, la neni ga vot ngan ta lavasuun at lorooro avolo rinedi ding tonga res teren.

<sup>10</sup>\*La ne Moroa ga lok li i ngan Lamaasa Avolo ngan ne Melkisedek.

### *Nemen Mita Subu Kot Kantubu*

<sup>11</sup> Ma ruuna laxalinga solo mumu ne Iesu atla neni Lamaasa Avolo. Ketla naba lolos ti soxomus asu na levelinga rinimi mila lodoxoma atnimi kopmen na gagas ti lok ka na levenanasa.

<sup>12</sup>\*At na levenaleng i epovo do mina lok ka lugugu ri anasa limixin mi levelinga at ne Moroa. Ketla kopmen mina epovo mila move mik pakes kusu tara na lox ase amu manga nimi mi levenanasa avot at levelinga at ne Moroa. I lok ngan ta do nemi move mi lok ngan lubung kadede, di tus at luvutnen di. Kovisi mina epovo kusu mina anan leveluxa lolos.

<sup>13</sup> Lara do i rooro mi ladan tus at nenen, i ngan laxadede. I lok ngan ta do nemi xovisi mina ven kibis levempanga i lox avukat la levempanga i lok kapmek.

<sup>14</sup>\*Ketla tinedi dira mukun pam at lununu atdi, di epovo dina ven kibis levempanga i lox avukat la levempanga i lok kapmek, mila di xoxonom kaka amisik levelinga at ne Moroa.

## 6

<sup>1</sup> Kuren la nemen mitam tebeng mun mo levenanasa miga lok ka avor i. Ketla mina lolos ti lok kaka levenanasa at ne Karisito kusu mina lok ngan limixin mukun. Mina ke be mo levenanasa avot, i lok keretna. Laanasa mumu loklok ti leeng basinge laxakapmek kusu mo laxakapmek noxo lox asuusu lanmet. Laanasa mumu lununu ri ne Moroa.

\* 5:2: Ib 4:15 \* 5:3: Mas 9:7; 16:6 \* 5:4: Pas 28:1 \* 5:5: Ib 1:5 \* 5:6: Ib 6:20; 7:1,17 \* 5:7: Mt 26:39-46; Pl 2:6-8 \* 5:10: Ib 5:6 \* 5:12: 1 Ko 3:1-3 \* 5:14: Ro 16:19; Pl 1:10 \* 6:2: Ib 9:14



<sup>2</sup> \*Laanasa ri lesep susu. Laanasa ri loklok ti sa li levengkikngen mavana at teventaba rik lox anarong di; laanasa ri laxakatu kaxat basinge lanmet. La laanasa ri lugugu at ne Moroa ngan laradi rongtonga linga at laaleng ete.

<sup>3</sup> Do ne Moroa na mulus, mina ke be na levenanasa la mina lok kaka be mo levenanasa mumu.

<sup>4-6</sup> \*\*Nedi limixin diga ronga Lavavang la diga nunu ren la digara suma vam lomomo at lorooro avolo la digara lok ka vam Loroonan Kaala, la digaraklen pam lorooro nunuan ne Moroa ga vaase ali min ti limixin, la digara ven pam ne Moroa ga lok levempanga sangsangu. Do mo limixin dina raba rulu ne Moroa, ixo epovo xusu dina leeng basinge mo laxakapmek mila ap mo mun loklok i lok ngan ta do nedi xa dira vaxarem amu manga ne Nitna ne Moroa ro at laxaba, la kerepmo dira lok li manga i at lainmangan to at lemeren limixin.

<sup>7</sup> Lavapaase poovo mumu i na loklok i lok keretna. Laxantaamang do larakabu it pot amisik teren la i lox asuusu levempipisik nunuan naba lok tooro nedi di gugu i, la mo laxantaamang naba ruuna ka loklox anarong at ne Moroa.

<sup>8</sup> \*Ketla do livin gagas mi laxampivilis kapmek kusuk mun na suu ap mo laxantaamang, mo laxantaamang i lok kapmek axap, la i nemen maxopok at lebelemamao at ne Moroa, la kopmen bok ba tara noxotlo tevempanga go.

<sup>9</sup> Larapen tangas tarak. Ma paase lolos tinimi ketla nemen mita doma solo i nom, mila ma nunu ruturun do leveloklok i nunuan naba ravasu atnimi, mo levempanga naba lox asuusu i do mira lok ka vam loklox arooro.

<sup>10</sup> \*Moroa neni Laradi Manmanton la neni noxo domampe leveloklok

nunuan nemi miga lox i, la mo labalamu nemi miga lox asuusu i at laasen teren ap mo levenaleng miga lok tooro limixin teren la move mik lok tooro di.

<sup>11</sup> \*Nema ma vara i do nemi getgesara mina lox asuusu leveloklok kerepmo se at laxavaxap at lorooro atnimi, la kerepmo minaba ruuna ka ruturun mo leveloklox anarong mim doma ngangais tin.

<sup>12</sup> Ma xopara i do mina molo at lununu atnimi ketla mina mu asu loklok atnedi lavalabat atnimi diga tu atmatkun amisik at lununu atdi la digat kis tangais mo leveloklox anarong ne Moroa ga paase ali min tidi.

*Lavapaase Ali At  
Ne Moroa Naba Soorun*

<sup>13</sup> Ap mo laaleng ne Moroa ga lok lavapaase ali ren ti ne Abaram, neni ga vara i do na lox amumuat levelinga ren. Ketla goxopmen tara ga silok tin kusu neni naba vangpe min. Kuren la neni ga vangpe xa mi laasen teren.

<sup>14</sup> \*Mo lavapaase ali ren ga lok keretna, "At laasen tarak nia anaba lox anarong u, la livipisik li ram dinaba umsu aleng."

<sup>15</sup> La ne Abaram gat kis atnaasan mun la ga ngangais ne Moroa, se ni ga lox asoorun mo lavapaase ali rin.

<sup>16</sup> \*Do tara i vara na vangpe, neni na vangpe mi laasen at laradi i silok tin, la mo lavangpangpe naba lox amuat levelinga ren. Lavangpangpe i epovo ri lox axap leven ekarakat.

<sup>17</sup> La ne Moroa ga vara i do limixin teren dinaklen tuturun i do neni naba lox epovo levelinga ren tinedi la dinaba ruuna ka leveloklox anarong neni ga vaase ali min tidi. Kuren la neni ga lox amuar i mi lavangpangpe.

<sup>18</sup> \*Legepu vanga mo ik lok kusu na lox amuat levelinga ren, i lok keretna. Lavapaase ali ren la lavangpangpe ren, la ixo epovo do ne

\* **6:4-6:** 1 Pi 2:3 \* **6:4-6:** Mt 12:31; Ib 10:26-27; 1 Jo 5:16 \* **6:8:** Lur 3:17-18 \* **6:10:** Ib 10:32-34  
\* **6:11:** Ib 3:14 \* **6:14:** Lur 22:16-17 \* **6:16:** Pas 22:10-11 \* **6:18:** Kex 23:19; 1 Sml 15:29

Moroa na xarang limixin. Kuren la ne Moroa ga lox i na xusu na lox alolos lununu atnedi diga on basinge laxakapmek kusu dina rebeng kaka mo levempanga nunuan ne Moroa ga vaase ali min.

<sup>19</sup> Nedik takleklen i do ne Moroa naba lox asoorun levempapaase ali ren. Kuren la lebelen dik nat kis aulis ngan lese pang it kis aulis do di sepkaa alis i ro xopok at lavaruat. La kerepmo bok i epovo do nedik tana xis esogo mi ne Moroa no vana at laxalibet. I lok ngan gano lamaasa gomgo ga vubeles at loxot i xaala aleng, mo loxot gak lok to melemu at lavatbantamon silok to xeneng at loogu laplavang.

<sup>20</sup>\*La kerepmo bok ne Iesu gamgo ridik uto vana xusu na lok lugugu ngan Lamaasa Avolo kerekngan ne Melkisedek, la lugugu at Lamaasa Avolo noxo xap.

## 7

### *Melkisedek Neni Lamaasa*

<sup>1</sup>\*Na leeme ne Melkisedek, gano neni loorong to Salem la neni lamaasa at Leeme Avolo ne Moroa. Neni ga ekip tangarang mi ne Abaram at laaleng ne Abaram eburu mi limixin teren digamlong boro at lesep no diga sep kepe leventaba lavaorong la limixin atdi. La ne Melkisedek ga lox anarong i.

<sup>2</sup> La ne Abaram ga raba ne Melkisedek mi loxot i sev asangaun ap mo levempanga neni ga lok kaka i ap mo lavaorong.

Avot, lavasuun at laasen ne Melkisedek do, "Lorong at loklok manmanton." La laasen bok do loorong boro Salem i epovo mi levelinga xeretna, "Lorong at lenmila."

<sup>3</sup>\*Nedik kopmen ataklen leretere at ne temen mi nenen la leretere at lavalabat teren, la dik taxoklen i do diga visix i la ni ga met lingisa. La kerepmo Nitna ne Moroa i lok ngan

ne Melkisedek, mo i nemen amisik ngan lamaasa.

<sup>4</sup> Mina doma i do ne Melkisedek ga silok aleng. Ataklen i do neni ga silok mila ne Abaram, temen nedi lubang mixin me Israel ga raba i mi loxot i sev asangaun ap mo levempanga ni ga lok kaka i at laaleng neni ga esep eburu mi lavaorong. Mo loxot ga lox avukat aleng.

<sup>5</sup>\*Laulis Linga i tong i do livipisik li at ne Levi mo digap kip lugugu ngan lavamaasa, dinak lok ka loxot i sev asangaun boro xa at limixin atdi, keke i do nedi axap mun livipisik li at ne Abaram.

<sup>6</sup> Na laradi ne Melkisedek, neni goxopmen livisik li at ne Levi, ketla neni ga lok ka loxot i sev asangaun boro ap mo lempanga ne Abaram ga lok ka i ap mo lavaorong. Ni mo lara ga ruuna ka lavapaase ali boro at ne Moroa. Ni lavasuun teren la ne Melkisedek ga lox anarong i.

<sup>7</sup> La i ruturun aleng do lara i silok, neni na lox anarong mo lara i lixilik tin. La kerepmo ne Melkisedek ga silok ti ne Abaram.

<sup>8</sup> La nedi limixin me Israel diga raba loxot i sev asangaun ti lava-maasa. Mo lavamaasa di goxo rooro amisik, ketla ne Melkisedek nedik kopmen ataklen i do neni ga met, limixin di lok do move i rooro.

<sup>9</sup> I epovo na tong i do ne Levi la lavamaasa melemu ren, dik lok kaka loxot i sev asangaun boro at limixin me Israel. Nedi xopmen na silok ti ne Melkisedek, mila lurubuno di ne Abaram ga raba ne Melkisedek mi loxot i sev asangaun.

<sup>10</sup> I epovo ana tong i xuren mila ap mo laaleng ne Abaram ga raba ne Melkisedek mi loxot i sev asangaun, i lok ngan ta do ne Levi mi lavamaasa melemu ren diga raba ne Melkisedek mi loxot i sev asangaun, keke i do luvutnen di goxovisi na visik di.

### *Iesu Neni Lamaasa Ngan Ne Melkisedek*

\* **6:20:** Mas 16:2-3,12,15; Ib 5:6 \* **7:1:** Lur 14:17-20 \* **7:3:** Sam 110:4 \* **7:5:** Kex 18:21

11 Limixin me Israel di goxo epovo do dinan manton tino basinge laxakapmek mila xopmen di goxo epovo xusu dina mu asu rinotno leventaangas la levelinga at lava-maasa mo digak lok at libibinat at ne Levi. Mo leventaangas, ni lavasuun at Laulis Linga, ne Moroa ga raba limixin me Israel min. Kuren la limixin digak pakes ti lamaasa vetpes kusu na vot, la giba lok ngan ne Melkisedek. Neni gitoxo lok ngan ne Aron mi lavamaasa at libibinat at ne Levi.

12 La ne Moroa ga soxolik ka Lamaasa vetpes kusu na lox adadat limixin basinge laxakapmek. Kuren la neni ga lox ekun Laulis Linga mi lekabus maxat, mila do tara na lox ekun leventaangas at lavamaasa, neni na lox ekun bok Laulis Linga.

13 La mo Lamaasa vetpes, neni ne Iesu la neni at libibinat petpes la goxopmen tara ap mo libibinat ga ruuna ka lugugu ngan lamaasa.

14 \*I xasep do Leeme Silok atdik, neni at libibinat at ne Juda, la ne Moses kopmen goxo tong i do teventaba at na libibinat naba ravasu ngan lavamaasa.

15 La levelinga atnama mumu lekabus maxat i xasep aleng mila lamaasa vetpes kerekngan ne Melkisedek gara vot pam.

16 Laulis Linga i tong i do, nedi mun at libibinat at ne Levi, di epovo xusu dina xip ka lugugu ngan lava-maasa. Ketla ne Iesu ga lok ka mo lugugu at langas petpes. Neni ga lok ka i mila neni ga ruuna lolos silok la kopmen taxavaxap at lorooro ren.

17 \*I lok ngan ne Moroa ga tong i at Lovoang Kaala, levelinga ren i lok keretna,

“Nenu unaba nemen amisik ngan lamaasa kerekngan ne Melkisedek.” *Sam 110:4*

18 Moroa ga vaxaxis ase Laulis Linga at ne Moses mila goxopmen

ta tololos teren la kopmen ta goxo epovo ri lok tooro limixin.

19 \*Laulis Linga xopmen goxo epovo na lox adadat limixin basinge laxakapmek. La ne Moroa ga lok li langas maxat, i lox avukat ti Laulis Linga la maxeneng ap mo langas maxat, i epovo do tana xis esogo mi ne Moroa.

20 La ne Moroa ga vangpe do ne Iesu na xip ka lugugu at lamaasa, ketla ne Aron la lavamaasa melemuren diga xip ka mo lugugu. Ketla goxopmen tavangpangpe at ne Moroa ridi.

21 \*Ketla ne Moroa ga vangpe do ne Iesu na lok ka lugugu ngan lamaasa at laaleng ne Moroa ga lok tin keretna,

“ ‘Nenu unaba nemen amisik ngan Lamaasa.’ Leeme Silok ne Moroa ga vangpe vam kuren, la neni noxo lox ekun lodoxoma ren.” *Sam 110:4*

22 \*Moroa ga vangpe xerepmo, kuren la ne Iesu neni i lok ngan losok-soxoba pe ri lekabus maxat, mo i nunuan aleng ti Laulis Linga.

23 Buaang atnedi lavamaasa amgomgo diga lok lugugu mila diga vekukun mi lugugu do lara ga met.

24 Ketla ne Iesu, kopmen taxavaxap at lorooro ren la kerepmo neni nabak lox amisik lugugu at lamaasa.

25 \*Kuren la neni i epovo na lox arooro rinotno nedi di vot pasa ne Moroa, mo do dina sep sogo at ne Iesu mi lununu. Mila ne Iesu i nemen amisik saparap ne Moroa la i ngising i xusu na lok tooro di.

26 \*Lamaasa gomgo xerepmo i lox epovo lavakpakes atdik. Lurup-tuvuk teren in manton tino, neni xopmen goxo ronga xepe levelinga at ne Moroa, goxopmen taxakapmek gak lok teren. Ap mo levenaleng neni ga nemen de at na lavatbung menemen, neni goxo vubeles ti laxakapmek eburu mi limixin kakap-

\* 7:14: Lur 49:10; Ais 11:1; Mt 2:6; Li 5:5 \* 7:17: Ib 5:6 \* 7:19: Ib 9:9 \* 7:21: Ib 5:6 \* 7:22: Ib 8:6; 12:24 \* 7:25: Ro 8:34 \* 7:26: Ib 3:1

mek. Melemu ne Moroa ga lox anarong i ro vana at laxalibet.

<sup>27</sup> \*Neni xopmen goxo lok ngan mo leventaba lavamaasa amgomgo, nedi xa digaplavang amisik ti laxakapmek atdi, la ti laxakapmek bok at limixin. Ketla ne Iesu ga lok laplavang ti laxakapmek at limixin axap, ni ga lok legesa laplavang mun, at laaleng ni ga raba lorooro ren kusu na uu nop loklok atdik.

<sup>28</sup> \*Maxeneng at Laulis Linga luvuttadi diga lok lugugu ngan lavamaasa amgomgo, la lorooro atdi goxo manton tino xerekngan ne Iesu. Ketla ne Moroa ga raba limixin mi Laulis Linga, la melemu ni ga vangpe do ne Nitna na lok kaka lugugu at lamaasa gomgo, luruvtuvuk teren naban manton tino amisik.

## 8

### *Iesu Neni Lamaasa Gomgo At Lekabus Maxat*

<sup>1</sup> \*Lavasuun at na levelinga atnama i lok keretna. Nedik ta ruuna lamaasa gomgo xerepmo, mo it kis at lenep tino at loxonin orong at Loorong Silok ne Moroa, to vana at laxalibet.

<sup>2</sup> Neni ik lok lugugu at ne Moroa ro xeneng at loxot i xaala aleng mo ik lok at loogu i xaala la i ruturun, kopmen limixin di goxo lox i, ketla ne Moroa xa ga lox i.

<sup>3</sup> Nedi axap, lavamaasa amgomgo dip kip lugugu xusu dina raba ne Moroa mi leventamtaba la levempanga laplavang, la kerepmo bok i epovo do Lamaasa gomgo ne Iesu na ruuna tavanga xusu ni na raba ne Moroa min.

<sup>4</sup> Do neni gik lok nade at na lavatbung menemen, neni gi toxo ruuna ka lugugu ngan lamaasa mila leventaba luvuttadi mo gik lok pam kusu tim taba leventamtaba ngan Laulis Linga i tong i.

<sup>5</sup> \*Nedi di gugu ro at loxot kaala nade xopok at na lavatbung menemen, na loxot kaala neni lampoovo mun ap mo loxot kaala no vana at laxalibet. Ni lavasuun teren la ne Moroa ga vaase aronga ne Moses at laaleng neni ga lok do na xip loogu kadis at ne Moroa. Ne Moroa ga lok tin keretna, "A vara i do una xip avukat na loogu ngan lampoovo nia aga lox ase u min to at lakaana Sinai."

<sup>6</sup> \*Ketla mo lugugu ne Iesu ga lok ka i, i lox avukat ti lugugu at lavamaasa mede xopok, i ngan bok lekabus maxat i lox avukat ti lekabus migomgo. La leveloklox anarong at lekabus maxat i lox avukat ti leveloklox anarong at lekabus migomgo. La ne Iesu neni lavasuun at lekabus maxat, ni ga lok lumulum kantubu at limixin mi ne Moroa.

<sup>7</sup> Lekabus migomgo goxo epovo na lox axis eburu ne Moroa mi limixin, kuren la ne Moroa ga lok lekabus maxat.

<sup>8</sup> Moroa ga ven kibis i do lekabus migomgo goxo epovo mila limixin diga soogong aleng. Ni ga lok,

"Mina ronga i na. Laaleng mo naba vot la nia anaba lok lekabus maxat mi limixin tarak to Israel la limixin tarak at libibinat me Juda.

<sup>9</sup> Mo lekabus maxat ba lok petpes ti lekabus migomgo, mo nia aga lox i eburu mi lavalabat atdi ap mo levelnaleng nia aga lam asu di boro Isip. Nia anaba lok lekabus maxat mila di goxo ruturun ti lekabus migomgo, la nia aga raba rulu di.

<sup>10</sup> \*Nenia ne Moroa, mina ronga na levelinga. Melemu nia anaba lok lekabus maxat mi limixin me Israel. Mo lekabus naba lok keretna. Nia anaba lox adoxoma di mi Lenavolarak, la anaba malagan i keneng at lebelen di. Nia anabat kis esogo mididi la anabak lok tatao di ngan limixin tarak.

<sup>11</sup> Kopmen bok ba tara naba anasa lentangas teren kopla neton mi lev-

\* 7:27: Ib 5:3 \* 7:28: Ib 5:1-2 \* 8:1: Ib 1:3; 3:1; 10:12; 12:2 \* 8:5: Kl 2:17; Ib 9:23; Pas 25:40

\* 8:6: Ib 7:22; 9:15 \* 8:10: Ib 10:16

elinga keretna, 'Unaklen ne Moroa.' Mila nedi axap dinaba xis ekilen eburu minia. Nedi limixin silok la nedi bok limixin kopmen tevenasen silok atdi.

<sup>12</sup>\*Nia anaba doxoma xepe laxakapmek atdi la nia noxo domangke rinotno bok ba at laxakapmek atdi."

*Jer 31:31-34*

<sup>13</sup> Moroa ga soxot na lekabus do lekabus maxat, kuren la Moroa ga ke xepe lekabus migomgo mila kopmen bok ba tugugu ren la i auret do na sonao axap.

## 9

### *Leveloklok At Lekabus Migomgo*

<sup>1</sup>\*At lekabus migomgo Moroa ga raba leme Israel mi leventaangas kusu dina mu asu i ri lok leven gugu xeneng at lotu, la diga bak kangkan loxot silok ti lotu saparap ne Moroa.

<sup>2</sup>\*To xeneng teren diga xip lara loogu kadis. La keneng ap mo loogu kadis diga lok legepu xonnep gu. At loxonnap gu avot diga lok li loxot kusu lababao nak lok teren, la loxonin eburu mi levengkongkide gak lok bok teren, mo levengkongkide di etaba min ti ne Moroa. Na loxot diga soxor i do Loxot Kaala. <sup>3</sup>\*To melemu at na loxonnap gu, ni lenep gu i sev agepura. Diga soxor i do loxot i xaala aleng tino. Lara lavattamon ga merem to xantubu ri lox epeseves mo lunep gu.

<sup>4</sup>\*To melamgo at lavattamon lara loxonin laplavang mo gak lok, diga lox i mi logol la digaplavang go mi levempavaxan una ga so mavak. La to xeneng at loxot i xaala aleng tinotno, lara lobokis bok mo gak lok, diga vop pe i ro maxeneng la maxamang teren mi logol. Mo lobokis ga lok katling lekabus ne Moroa ga lox i eburu mi limixin teren. To xeneng ap mo lobokis lara lavanga lukluxa

mo gak lok, diga lox i mi logol, la keneng teren diga lok li levengkoluxa ap mo leveluxa limixin me Israel diga anan i ro at lamatbin. Diga so asen i mi lamaana. Lakdak bok at ne Aron no ga suudun, gak lok go xeneng eburu mi legepuxon uat no ne Moroa ga malagan li lasangaun Levenaulis Linga ren. <sup>5</sup>\*To mavana at na lobokis luvanga raptava (cherubim) at ne Moroa mo dugak lox asuusu lisisixam silok boro vana at laxalibet. Duga tu puvung mo loxot, ua lavamaasa diga sep susu i mi lada at levempanga mi lavanuet kangkedek atdi xusu ne Moroa na doxoma xepe laxakapmek at limixin. Ketla monga nia xopmen na epovo kusu ana re axap na levempanga.

<sup>6</sup>\*Melemu at na, do digara lox agagas li vam na loogu kadis, lavamaasa diga ruka ba i kusu dina lok leven gugu atdi. Diga pubeles uto xeneng mun at lenep gu avot at levenaleng axap ti lok lugugu atdi ngan lava maasa.

<sup>7</sup>\*Ketla lamaasa gomgo xusuk mun neni ga pubeles ti mo loxonnap gu maxeneng tino, mo loxot ga xaala aleng tinotno. Neni ga vubeles go at leges aleng mun keneng at legesa maares. Neni goxo pubeles gamasa, ni ga ba pubeles axa eburu mi lada at levempanga mi lavanuet kangkedek. La neni ga lok letaba mi mo lada ti laxakapmek teren la laxakapmek bok at limixin do digara soogong pam, ketla di goxoklen i do mo levempanga ga lok kapmek.

<sup>8</sup>\*Loroonan Kaala i lox ase dik, mumu na lavanga do langas povolo uto saparap ne Moroa goxovisi na rem suang, ap mo levenaleng loogu kadis move ga tu.

<sup>9</sup>\*Anaa lavanga ni lampoovo mun ti na levenaleng ti lox asuusu i do leventamtaba la levelaplavang diga etaba min kopmen goxo epovo na

\* **8:12:** Ib 10:17 \* **9:1:** Pas 26:1-30 \* **9:2:** Pas 25:23-40 \* **9:3:** Pas 26:31-33 \* **9:4:** Pas 16:33; 25:10-16; 30:1-6; Kex 17:8-11; Lal 10:3-5 \* **9:5:** Pas 25:18-22 \* **9:6:** Kex 18:2-6 \* **9:7:** Pas 16:2-34 \* **9:8:** Ib 10:19 \* **9:9:** Ib 10:1-2

lok kepe loklok mamangan at laxakapmek atnedi diga etaba mi mo levempanga.

10 \*Mo leveloklok ti laanan la liinin la leventaangas ti sogos panga, mo leventaangas ga nemen mun kusu mo limixin dina mumu asu i se at laaleng lekabus maxat ga vot.

### *Lada At Ne Karisito*

11 \*Ketla ne Karisito ga vot ngan Lamaasa Avolo xusu na lox agagas leveloklox anarong at lekabus maxat, ne Moroa im taba limixin teren min. Neni xopmen goxo vubeles at loogu kadis mede xopok. Ketla neni ga vubeles uto xeneng at loxot i xaala aleng la i lox avukat aleng no vana at laxalibet. Mo loxot limixin kopmen di goxo lox i mi levengkikngen di. Lavasuun at na do mo loxot kopmen nak lok de at na lavatbung menemen la ixo epovo nedik ataba ven i mi levengkatli atdik.

12 Karisito xopmen goxo lok kaka lada at lubulumaxao la at lavatme la ga vubeles min. Ketla neni ga vubeles mi lada axa ren ti mo loxot ga xaala aleng no vana at laxalibet, la ga lok letaba min at legesa xonaleng mun. Ga lox i xuren kusu na un avolo dik mi lada ren la dik atanaba ruuna ka lorooro avolo.

13 \*Lada at laxanme la laxanbulumaxao la laxakup at lanatpalak bulumaxao diga kotos i, lamaasa gomgo ga sep susu limixin min, nedi nom diga lok laxakapmek kusu dina dadat to maxamang mun.

14 \*Ketla na loklok at lekabus migomgo kopmen na epovo mi mo loklok ne Karisito ga lox i. At loklok tooro at Loroonan at ne Moroa Iesu ga raba xa i ri ne Moroa ngan laplavang avolo, goxopmen taxakapmek teren, kusu na lox adadat dik basinge laxakapmek mo naba lox asusu lanmet. Kerepmo i epovo do ata mu asu lavavara at ne Moroa, Luntoo Avolo.

15 \*Kuren la Karisito, neni laradi ga lok lumulum kantubu at limixin mi ne Moroa, la at na langas neni ga lok lekabus maxat. La nedi ne Moroa gara soxolik ka vam di, dinaba ruuna ka leveloklox anarong neni ga vaase ali min tidik, la mo leveloklox anarong naba nemen amisik. Karisito ga met ngan laxaavuk kusu na lox asepmus limixin teren basinge laxakapmek diga lox i ap mo levenaleng diga mumu lekabus migomgo.

16-17 Do temen lara i auret na met, neni i epes laxamdak teren mi levempanga ren. Ketla nedi noxo ruuna ka soso mo levempanga do neni move i rooro. Se do ne temendi na met, i epovo ba do mo laxamdak dina ruuna ka mo levempanga at ne temen di.

18 Ni lavasuun teren la lada at lavanga mi lavanuet kangkedek do ga met pam, ga lox amuat lekabus migomgo.

19 \*Ne Moses ga tong asu vam levenngas linga at Laulis Linga ri limixin axap, neni ga lok ka lada at levempatnat bulumaxao, la ga lok eburu i mi ladan. La neni ga lok lavanga sep susu mi lavatkabinim sipsip diga lox amemele i la mi levengkakan una at luuna isop. Neni ga lok ka lada min la gap sep susu lugun linga at Laulis Linga la limixin bok.

20 \*Moses ga lok keretna, "Na lada neni loklok katling at lekabus no ne Moroa ga tong i do ata mumu asu i."

21 \*La at nom langas neni ga sep susu loogu kadis la levempanga axap diga lok mo lugugu at ne Moroa min.

22 \*I ruturun aleng do levempanga axap diga lok mo lugugu min, diga lox amaxat di mi lada xerekngan Laulis Linga i tong i. La do lada noxo sen, Moroa noxo doxoma xepe laxakapmek at limixin.

23 \*Kuren la ga epovo do limixin

\* 9:10: Mas 11:2,25; 15:18; Kex 19:11-13 \* 9:11: Ib 3:1; 10:1 \* 9:13: Mas 16:3,14-16; Ib 10:4; Kex 19:9,17-19 \* 9:14: 1 Pi 1:18-19; 1 Jo 1:7; Ib 6:1 \* 9:15: 1 Ti 2:5; Ib 8:6 \* 9:19: Pas 24:3,6-8; Mas 14:4,6 \* 9:20: Pas 24:8 \* 9:21: Mas 8:15,19 \* 9:22: Mas 17:11; Ep 1:7 \* 9:23: Ib 8:5; 10:1

dina lox adadat mo levempanga at loogu kadis mi lada at levempanga digaplavang min. Ketla mo levempanga at loogu kadis ni lampoovo mun ap mo levempanga no vana at laxalibet. Ketla mo levempanga ruturun no vana at laxalibet gak pakes ti lada at ne Karisito. La mo lada ren i lolos aleng ti lada at lavat bulumaxao, la mo lada ren ik lox agagas li mo loxot tidik.

<sup>24</sup> \*Karisito goxo lok lugugu ren to xeneng at loxot kaala limixin diga lox i. Mo loxot ni lampoovo mun ap mo loxot tuturun no vana at laxalibet. Ketla neni ga vubeles to vana at laxalibet kusu na tu ro at lemeren ne Moroa la na ngising i ri lok tooro dik.

<sup>25</sup> Neni ga vubeles uto vana at laxalibet, kopmen tim taba amisik lorooro ren ngan lamaasa gomgo ga pubeles amisik mi lada uto xeneng at loxot i xaala aleng at levenmaares axap, ketla mo lada xopmen lada axa ren.

<sup>26</sup> Do ne Karisito gita mumu mo loklok, neni gitaba suma amisik losongsongot, ga ruka i at lavakpaxaru kaxat at na lavatbung menemen. Ketla at na levenaleng kavaxap, ne Karisito ga vot gesara mun kusu na raba lorooro ren ngan laplavang ti lok kepe laxakapmek la ti lox arooro dik basinge lolos at laxakapmek.

<sup>27</sup> \*Limixin axap dinaba met la melemu at na, Moroa naba lok li di at lavapaase.

<sup>28</sup> La kerepmo ne Karisito ga met gesara mun ngan laplavang kusu na lox adadat buaang limixin basinge laxakapmek atdi. La neni nabamlong bok sev agepura, kopmen ti met nop bok ba loklok atdik. Ketla, neni naba lox arooro rino nedi dit kis tangais i.

## 10

### *Karisito Ga Raba Lorooro Ren*

<sup>1</sup> \*Laulis Linga at leme Judaia ni lampoovo mun ti mo leveloklox anarong at ne Moroa mo naba vot. Laulis Linga ni xopmen mo leveloklox anarong. Kuren la mo leveloklok tiplavang diga lox amisix i at levenmaares axap, goxo epovo rinotno xusu na lox adadat nedi diga vot pasa ne Moroa kusu dina lotu saparav i.

<sup>2</sup> Do gita epovo na lox adadat di, na loklok tiplavang to gita xap pam. Mila mo langas i epovo giba lox adadat tinotno limixin, la kerepmo di gitoxo epovo na suma lainmangan bok ba mumu laxakapmek atdi.

<sup>3</sup> Ketla mo levelaplavang ga lox adoxoma mun limixin mi laxakapmek atdi la kerepmo digam suma lainmangan.

<sup>4</sup> \*Mila ixo epovo do lada at laxanbulumaxao la laxanme na lox amaxat limixin basinge leveloklok kakapmek atdi.

<sup>5</sup> Kuren la ap mo loxonaleng ne Karisito ga lok do na si ude at lavatbung menemen, neni ga lok ti ne Moroa xeretna,

“Nenu u xovara solo ri levelaplavang la leventamtaba, ketla ugam doma gagas kusu una riki asi ia la anaba vee radi ngan limixin kusu anaba raba u minia ngan laplavang.

<sup>6</sup> Nenu uxo ngising ti levempanga mi lavanuet kangkedek kusu limixin dina kotos asonao i ro vana at loxonin laplavang, koplari levelaplavang ti ves kepe laxakapmek.

<sup>7</sup> Kuren la aga lok tu keretna, ‘Morora rak. Nenia nga na. Levelinga mumu ia i nemen keneng at Laulis Linga. O Moroa, nia a vot pam kusu ana gugu mu asu mun lavavara ram.’ ” *Sam 40:6-8*

<sup>8</sup> Avot be ne Iesu ga lok keretna, “Nenu u xovara solo ri levelaplavang la leventamtaba, la levempanga mi lavanuet kangkedek kusu mana kotos asonao i ro vana at loxonin laplavang, koplari levelaplavang ti ves

kepe laxakapmek. La u goxo lok momo mi na loklok.” Keke i do Laulis Linga at ne Moses ga tong i do limixin dina mu asu mo loklok.

<sup>9</sup> La neni ga lok bok, “Nenia nga na. Nia a vot pam kusu ana gugu mu asu mun lavavara ram.”

Kerepmo la ne Moroa ga lok kepe mo leveloklok tiplavang megano la ga lox ekun i mi mo laplavang i sev agepura, ne Karisito xa ga lox i mi lada ren.

<sup>10</sup> \*Ne Karisito ga mu asu lavavara at ne Moroa, la neni ga raba lorooro ren ngan laplavang at legesa xonaleng mun kusu na lox adadat limixin basinge laxakapmek atdi.

<sup>11</sup> \*At levenaleng axap lavamaasa diga tu ro xeneng at loogu kadis la digak lok lugugu at lotu. At levenaleng axap diga etaba mi leges asen panga laplavang mun. Mo levempanga goxopmen tinotno na epovo xusu ti lox adadat limixin basinge laxakapmek atdi.

<sup>12</sup> Ketla Lamaasa Avolo ga etaba mi legesa laplavang mun ti laxakapmek, u ningina la amisik bok. La melemu neni ga xis to saparap lekngen tino at ne Moroa.

<sup>13</sup> \*Ga ruka i ap mo laaleng neni ga ngangais ne Moroa na lok li limixin munepen min na ngan loxot burubut ti luxangkedek teren.

<sup>14</sup> Karisito ga raba lorooro ren ngan laplavang. Kuren la ni ga lok langas kusu limixin dina dadat amisik la nanga ne Moroa ik lok kepe laxakapmek at limixin di nunu ren.

<sup>15</sup> Loroonan Kaala bok i tong asusu i na. I lok keretna,

<sup>16</sup> \* “Melemu nia anaba lok lekabus maxat mi limixin tarak. Anaba buradong levelinga rak keneng at lebelen di la nia anaba lox adoxoma di mi levelinga rak.”

*Jer*  
**31:33**

<sup>17</sup> \*La i lok bok,

“Nia a noxo domangke rinotno bok ba at laxakapmek atdi.” *Jer*

**31:34**

<sup>18</sup> La do ne Moroa ira doxoma xepe vam laxakapmek at limixin, kopmen dinak pakes bok ba ri lok laplavang kusu ti lok kepe laxakapmek.

*Langas Maxat*

*Tim Taba Lorooro*

<sup>19</sup> \*Luvutnetak mi luvurinu. I epovo do ata vot pasa ne Moroa ap mo loxot i xaala aleng, mila ne Iesu gara suang pam mo langas mi lada ren.

<sup>20</sup> \*Mo langas neni langas maxat im taba lorooro, Iesu ga suang pam i ridik ap mo laaleng neni ga raba labantuxu ren kusu na uu at laxaba. Lavattamon silok to xeneng at loogu kadis ga ru katling labantuxu at ne Iesu la mo lavattamon ga rem lais tubu, i ngan ta do ga suang mo langas tidik.

<sup>21</sup> La nedik ta ruuna Lamaasa Avolo, neni Lamgomgo ri limixin at ne Moroa.

<sup>22</sup> \*Kuren la mina vot pasa ne Moroa do lebelen nimi iran mantan pam la lununu atnimi irat matkun pam la lebelen nimi xopmen tusumsuma xapmek teren mila ne Moroa ga lox adadat pam nimi kerekngan di gos labantuxu atdik mi ladan i nunuan.

<sup>23</sup> \*Minam tebeng lolos lununu atnimi ri mo leveloklox anarong mo naba vot mila ne Moroa naba lox asoorun levempapaase ali ren.

<sup>24</sup> La mina doxoma ka teventaangas kusu mina lox axatu lebelen nimi ri elok tooro ela la lorooro atnimi na umsu mi labalamu la leveloklok i nunuan.

<sup>25</sup> \*Nemen mita ke xepe mo leveloklok tit pot buru ri lotu, kerekngan leventaba atnimi dira ke xepe vam i. Ketla nemi xa mina epang aru xusu lununu atnimi naba lolos. La mina lox amisix i na, mila laaleng ete i auret na vot.

\* **10:10:** Ib 9:12,28 \* **10:11:** Pas 29:38 \* **10:13:** Ib 1:3; Sam 110:1 \* **10:16:** Ib 8:10 \* **10:17:** Ib 8:12 \* **10:19:** Ib 4:16 \* **10:20:** Mt 27:51; Ib 9:8 \* **10:22:** Mas 8:30; Isi 36:25; Ep 5:26 \* **10:23:** Ib 4:14 \* **10:25:** Ib 3:13 \* **10:26:** Ib 6:4-8



26 \*Do tara atnimi ga siam ka vam luruturun at Lagale Lavavang, ketla iramlong ti laxakapmek, i lok ngan ta do i raba rulu ne Moroa la kopmen tavanga laplavang bok ba kusu ba lox arooro i.

27 \*Ketla neni naba suma mun lanmarat silok at lebelemamao at ne Moroa at laaleng ete mila laxao bokbolot mo naba anan limixin di munepen mi ne Moroa.

28 \*Do tara ga los polo Laulis Linga at ne Moses, la do tegepu radi xopla tavantun tuvuttadi diga venemet mo laradi ga lok laxapmek, neni gaba met etaba mun.

29 \*Kerepmo la do tara na sok kepe lununu ren at ne Iesu, i lok ngan ta dola i vas axangka ne Nitna ne Moroa, la neni i lok lada at ne Iesu ngan ta lavanga gamasa. Mo lada at lekabus maxat ga sen kusu na lok kepe laxakapmek teren. La ira vaase vupu vam ti Loroonan Kaala, mo i lox asuusu letaba nabalamu at ne Moroa ridik. Do tara na lok na leveloklok kakapmek, neni naba lok ka loklox asongot silok.

30 \*Ataklen i do ne Moroa xa ga lok keretna,

“Nenia xa anaba sepo laxakapmek at limixin.” *Lal 32:35*

La ga lok bok,

“Moroa naba vaxaru limixin teren at lavapaase, mo do dina soogong basinge levelinga ren.” *Lal 32:36*

31 Naba lok kapmek aleng do tara na ekip tangarang mi lebelemamao at ne Moroa, Luntoo Avolo.

32 Mina doma amlong ti mo levenaleng miga lok ka avot lununu. Ap mo levenaleng miga ekip tangarang mi levenmumuat la leveloklox asongot mumu lununu atnimi. Ketla miga tu atmatkun la mi goxo subu.

33 \*At lentaba levenaleng diga sok taba nimi mi laxalinga xapmek la diga lox asongot nimi ro melamgo

at limixin axap. At leventaba levenaleng bok miga ru eburu mi nedi diga xip mo levesongsongot.

34 \*Miga balamu nedi digak lok at loogu xokoxo la miga lok momo mene nga do limixin diga sak paxat ka levempanga atnimi mila migaklen i do nemi xa minaba ruuna ka lapnovos i lox avukat aleng no vana at laxalibet, mo lapnovos naba nemen amisik.

35 Kuren la nemen mita soxope lununu atnimi. Do minam tebeng lolos teren, Moroa naba raba nimi mi leveloklox anarong i nunuan aleng.

36 \*Do mina suma levenmumuat at lorooro atnimi, mina tu atmatkun at lununu atnimi xusu minaba ruuna ka mo leveloklox anarong ne Moroa ga vaase ali min tidik, mo do mina mu asu lavavara ren.

37 Kopmen noxo lox abao la Lanarong nabamlong kerekngan ne Moroa ga tong i xeretna,

“Mo laradi diga tong i do naba vot, neni naba vot tuturun, neni noxok lok sila.

38 \*Ket do nege laradi do luruptuvuk teren in manton tino, neni naba ruuna ka lorooro avolo, mo do neni nat pas eburu mi lununu. La do neni na raba rulu ia, labalak noxo lox avukat tin.” *Abk 2:3,4*

39 Ketla nedik kopmen na lok ngan nedi di raba rulu ne Moroa la dira seeve. Ketla nedik ta lok ngan nedi di nunu at ne Moroa la dira ruuna ka vam lorooro avolo.

## 11

### *Limixin Diga Nunu At Ne Moroa*

1 \*Lununu neni loklok tim doma ngangais ti leveloklox anarong ne Moroa naba raba limixin teren min. La lununu ik lox aklen dik ti mo levempanga nedik kopmen ta reven tu ren.

2 Kerepmo la ne Moroa ga emi asu minedi lavalabat atdik gano, mila diga ruuna lununu.

\* 10:27: Ais 26:11 \* 10:28: Lal 17:6; 19:15 \* 10:29: Pas 24:8; Ib 13:20 \* 10:30: Ro 12:19; Sam 135:14 \* 10:33: 1 Ko 4:9 \* 10:34: Mt 6:20; 19:21,29 \* 10:36: Lu 21:19; Ib 6:12 \* 10:38: Ro 1:17; Ga 3:11 \* 11:1: Ro 4:18; 2 Ko 5:7 \* 11:3: Lur 1:1; Sam 33:6; 2 Pi 3:5

3 \*Nedik ta ruuna lununu, kuren la ataklen i do ne Moroa ga rudum li levempanga axap mi levelinga ren, la ataklen i do levempanga nedik di ven i mi levengkatli atdik ga ravasu at levempanga nedik goxo ven i.

4 \*Abel ga ruuna lununu, kuren la neni ga raba ne Moroa mi laplavang ga lox avukat ti laramtaba at ne Kaen. Abel ga ruuna lununu, kuren la ne Moroa ga emi asu min la ga raba i mi laasen do laradi manmanton, ap mo laaleng ne Moroa ga siam ka leventamtaba ren. Lununu ren move i ngan lampoovo ridik kusu ata mumu asu i, keke i do neni ga met pam.

5 \*Enok ga ruuna lununu, kuren la neni goxo met, ketla ne Moroa ga lok ka i uto vana at laxalibet. Limixin diga puse rin la di goxo vuse ka i, mila ne Moroa ga lam ka vam i uto vana. Avot at na, Moroa ga emi asu min, mila loklok teren ga lox amomo i.

6 La mo do tara xopmen tununu ren, ixo epovo ni na lox amomo ne Moroa, mila do tara i vara na vot pasa ne Moroa, neni na nunu do ne Moroa mo i rooro la neni i epovo naba lox anarong nedi lebelen di i ngaongao xusu dinaklen ne Moroa.

7 \*Noa ga ruuna lununu, kuren la at laaleng ne Moroa ga tong i rin do laraan naba vot, ni ga ronga res la ga lok lavatmon silok kusu na lox arooro nedi loxoetemen. Neni ga ruuna lununu la kerepmo ga lox asuusu i do loklok at limixin ap mo levenaleng ga lok kapmek. La neni ga ravasu ngan laradi manmanton at lemeren ne Moroa mila neni ga ruuna lununu saporap ne Moroa.

8 \*Abaram ga ruuna lununu. Kuren la at lara laaleng ne Moroa ga tong i rin do na on basinge lemenemen teren kusu nat pas ti lara lemenemen to vaxalom. Moroa ga vaase ali rin do neni naba raba i min

melemu ngan lemenemen tino rin. La ne Abaram ga ronga res teren la ga vas kaxat, neni goxoklen i do mo lemenemen gak lok ua.

9 \*Neni ga ruuna lununu la ga lox araut lemenemen tin ap mo loxot ne Moroa ga vaase ali min tin. Ketla ap mo lenep neni ga nemen ngan laradi xadiong, gak lok mun at loogu kadis. La melemu ne Aisak, nitna ne Abaram, la ne Jakop, tubuno ne Abaram dugak lok bok at laraogu kadis. Nedu bok duga ruuna mo lavapaase ali boro at ne Moroa ngan ne Abaram.

10 Neni ga ronga res mila neni gam doma ngangais ti mo lemenemen silok, bak lox amisik la ne Moroa ga lox agagas mo lemenemen silok ti limixin teren.

11 \*Abaram ga ruuna lununu, keke i do gara sioxo vam, la latkin bok teren ne Sera goxo epovo do na visik, ketla nedu duga visik lara lamdak. Kuren la ne Abaram ga ravasu ngan ne temen mo lamdak, mila ne Abaram ga nunu do ne Moroa naba lox asoorun lavapaase ali ren.

12 \*La ne Abaram, neni lasioxo rinotno nga, ketla ga buaang aleng livipisik li ren, ga umsu aleng ngan laxampenti mede vana la laxangka-neng to loxon, nedik taxo epovo ri exes di, na livipisik li ga ravasu at na legesa radi mun.

13 \*Nedi axap luvuttadi diga ruuna lununu at lorooro axap atdi se at loxonaleng diga met. Nedi goxo ruuna ka mo levempanga ne Moroa ga vaase ali min tidi. Ketla diga ven avaxalom ka mo levempanga la diga momo ka i, keke i do di goxovisi na ruuna ka i. La diga siam ka mun lorooro alua at na lavatbung menemen.

14 Limixin di paase xerepmo, i lox asuusu i do temenemen aulis gove di puse rin.

\* 11:4: Lur 4:3-10 \* 11:5: Lur 5:24 \* 11:7: Lur 6:13-22; 7:1; 1 Pi 3:20; Ro 3:22; 4:13 \* 11:8: Lur 12:1-5; Gu 7:2-4 \* 11:9: Lur 26:3; 35:12,17 \* 11:11: Lur 18:11-14; 21:2 \* 11:12: Ro 4:19; Lur 15:5; 22:17; Lal 10:22 \* 11:13: Lur 23:4; 1 Let 29:15; Sam 39:12; 1 Pi 2:11

15 Do nedi gove gitam doma am-long ti mo lemenemen no nedi diga on basinge i, nedi ro gitamlong pam ti mo lemenemen atdi.

16 \*Ketla lodoxoma atdi move ga vara ri temenemen avukat tinotno, mo lemenemen ik lok to vana at laxalibet. Kuren la ne Moroa i lok momo xusu dina soxor i do ne Moroa atdi mila neni ga lox agagas lemene-men tidi.

17 \*Abaram ga ruuna lununu, kuren la ap mo laaleng ne Moroa ga lok tong pen i, neni ga ronga res la ga raba ne Aisak ngan laplavang. Abaram neni mo laradi ne Moroa ga vaase ali rin do livipisik li ren naba umsu aleng. Ketla melemu manga ni ga gagas kusu naplavang mi mo legesa nitna.

18 Ne Moroa gara tong pam i rin do, "Aisak neni laradi naba lox asilok livisik li ram."

19 \*Abaram gaklen i do ne Moroa i epovo na lox arooro luvuttadi met. Ketla ne Moroa ga sep pepe i la ni goxo sev amet ne Aisak. I lok ngan ta do ne Moroa ga lox arooro ne Aisak basinge lanmet.

20 \*Aisak ga ruuna lununu, kuren la neni ga lox anarong ne Jakop mi ne Esao mi levelinga mumuat mumu mo levempanga naba ravasu at lorooro atdu la at livipisik li bok atdu melemu at levenaleng at lanmet teren.

21 \*Jakop ga ruuna lununu, kuren la neni ga lox anarong lumdak at ne Josep la ga lotu saparap ne Moroa, ap mo loxonaleng neni ga sox auru i mi lakdak teren, mila neni gara sioxo vam la ga auret levenaleng kusu neni na met.

22 \*Josep ga ruuna lununu, kuren la ga auret ti lanmet teren, neni ga vaase ali do at tara taaleng limixin me Israel dinaba vas kaxat basinge lemenemen Isip. Neni ga vaase ali

bok at limixin teren kusu dinaba xip ka levesi ren do dina vas kaxat uto Kanan.

23 \*Temen ne Moses mi nenen duga ruuna lununu, kuren la duga lipe ne Moses at lavantun gaaling melemu at livipisik teren. Mila duga ven i do mo lamdak goxopmen lamdak gamasa, ketla lamdak ga lok petpes tino. La du goxo marat at lavapaase lolos at loorong, ga tong i do dina sev amet axap levengkadede remes at limixin me Israel do dina visik asu di.

24 \*Moses ga ruuna lununu, kuren la neni ga silok, la ni ga xopara i xusu limixin dina soxor i do lamdak at loolik at ne Parao.

25 Ketla neni ga vara i xusu na xip laxasongsongot eburu mi limixin at ne Moroa la neni ga xopara i xusu na lox amomo lorooro ren mi laxakapmek, mo naba xap asonao mun.

26 \*Moses ga doma i do ik mokso do neni na lok ka lainmangan eburu mi limixin teren at lugugu at Lanarong. Mo lainmangan ga lox avukat aleng ti lapnovos boro Isip, mila neni ga reven ti mo luunun move ne Moroa naba raba i min.

27 \*Neni ga ruuna lununu, kuren la neni ga vas kaxat basinge lemenemen Isip la goxo marat at lumukmusak at loorong me go. Ketla neni ga tu atmatkun at lununu ren, mila neni ga ven kibis ne Moroa, mo limixin di goxo epovo na ven i.

28 \*Moses ga ruuna lununu, kuren la neni ga tong i ri limixin me Israel kusu dina sep ka tevempatnat sipsip la dina saba li lada ap mo laxasipsip to at laramusmaragu at laraogu atdi. Na loklok ga lok kaxat mo leluxa diga soxor i do Lovovolo Pe. Diga lox i na xusu mo laangelo sepsep noxo sev amet lavaanat meren at limixin me Israel. Ketla Moroa ga riki i do na sev amet lavaanat meren at limixin me Isip.

\* 11:16: Pas 3:6,15; Mk 12:26 \* 11:17: Lur 21:12; 22:1-14; Ro 9:7; Je 2:21-22 \* 11:19: Ro 4:17  
 \* 11:20: Lur 27:27-29,39-40 \* 11:21: Lur 48:15-16 \* 11:22: Lur 50:24-25; Pas 13:19 \* 11:23:  
 Pas 1:22; 2:2 \* 11:24: Pas 2:10-12 \* 11:26: Ib 10:34-35 \* 11:27: Pas 12:51; 14:13,14; Ro 1:20; 1  
 Ti 1:17; Ib 11:1 \* 11:28: Pas 12:21-30 \* 11:29: Pas 14:21-31

29 \*Limixin me Israel diga ruuna lununu, kuren la diga vas korop Laras Memele, digat pas mun at laxangka mesemes. Ketla at loxonaleng limixin esep boro Isip diga lok tong pen i xusu dina vas polo, laras gak mit di la diga xong axap.

30 \*Limixin me Israel diga ruuna lununu, kuren la lara langas uat lolos mo ga tu xangkan lemenemen silok Jeriko ga rebubuxup si ukopok. Mo lavanga ga vot melemu at lavanuti aleng limixin me Israel digat pas kangkan mo lemenemen.

31 \*Raap, latkin ngarangat ga ruuna lununu, kuren la neni goxo uu eburu minedi limixin boro Jeriko diga ronga viribang. Mila neni ga lok tooro luradi esep at leme Israel mo dugakling lemenemen at laaleng ne Josua ga riki du xusu dunakling mo lemenemen Jeriko.

32 Aba tong ka bok ba lavanga salai? Nia xopmen ana epovo xusu ana vaase bok ba mila loxonaleng kopmen na epovo kusu aba tong asu axap lorooro atnedi loxongkulao nunu kerekngan ne Gidion, Barak, Samison, Jepita, Devit, Samuel, la leventaba vetpes bok eburu mi lavaeme vapaase ali.

33 \*Diga ruuna lununu, kuren la leventaba atdi diga sep kepe levenabung mixin, leventaba atdi diga lok tatao limixin atdi mi loklok manmanton, la kerepmo ne Moroa ga lok tooro di xerekngan neni ga vaase ali min tidi. La leventaba atdi, lavamolon diga lu arup midi uto at laramet laion la lubunglaion di goxo epovo na anan di, mila ne Moroa ga vamngus lubunglaion.

34 \*Leventaba atdi lavamolon diga lu arup midi uto xeneng at laxao ketla laxao goxo epovo na rin di. Leventaba atdi diga ves avolo levemparise sepsep at limixin esep. La leventaba atdi levengkot atdi ga molo ketla ne Moroa ga lox alolos di. La

leventaba diga ravasu ngan luvuttadi lolos tino, kuren la diga xala xepe limixin esep boro at levengkot petpes.

35 \*Leventaba lavakin diga ruuna lununu kuren la leventaba atnedi digara met pam, ketla ne Moroa ga lox arooro amlong bok di.

Leventaba atnedi luvuttadi nunu, diga lok ka losongsongot kapmek tinotno. Lavamolon diga lok mo leveloklok ti lok kepe lununu atdi, ketla diga tu atmatkun la diga siam ka mo laxanmumuat. Mila diga nunu do melemu dinaba lok ka lorooro avolo.

36 \*Lavamolon diga lok kalise xapmek leventaba atdi la digak pixis kapmek tino di, la diga koxo alis leventaba bok la diga lox abeles di at laraogu xokoxo.

37 \*Diga lu amet leventaba atdi mi laxanuut, la diga soo xorop avu leventaba atdi mi lempasoo, la diga sev amet leventaba atdi mi lemparise.

Leventaba atdi luvuttadi nunu diga siga mun levenbantuxu sipsip la levenbantuxu me. Mila kopmen tevempanga singsiga avukat atdi la di goxo ruuna tevempanga at lorooro atdi. Diga xip laxasongsongot la lavamolon diga lok kapmek tinotno di.

38 Lavamolon diga doma i do mo limixin nunu diga lok kapmek aleng. Ketla at lemeren ne Moroa nedi limixin manmanton, la ixo epovo do dina nemen at na lavatbung menemen. Digat pas tangtagap to at lamatbin la to at levempatkaana la diga nemen to xeneng at laxantabuang la at laramamara ro xeneng at laxangka, mila goxopmen taramenemen atdi.

39 Diga ruuna lununu, kuren la ne Moroa ga emi asu midi. Ketla tara atdi goxo lok ka mo leveloklox anarong at lekabus maxat ap mo levenaleng diga rooro ren. Mo leveloklox anarong ne Moroa ga vaase ali min ti limixin teren.

\* 11:30: Jos 6:12-21 \* 11:31: Jos 2:1-21; 6:21-25; Je 2:25 \* 11:33: Dan 6:22 \* 11:34: Dan 3:23-27  
\* 11:35: 1 Lav 17:17-24; 2 Lav 4:18-37 \* 11:36: 1 Lav 22:24-27; Jer 20:2; 37:15; 38:6 \* 11:37: 2 Let 24:21

<sup>40</sup> Moroa ga lox agagas lekabus maxat kusu neni na lox adadat dik. La kerepmo bok neni ga lox adadat nedik eburu minedi na limixin digap kip laxasongsongot.

## 12

### *Moroa Ik Lox Aleeng Limixin Teren*

<sup>1</sup> \*Buaang nedi lavalabat atdik no vana at laxalibet mo di reven dik ngan laneelen di reven lekampoovo. Kuren la mina ke xepe levempanga axap mo ik lox angtang lununu atnimi la mina ke xepe bok laxakapmek mo nemi mik sak kikixin teren. La minak sixit eburu mi lolos ap mo lekampoovo ne Moroa ga lox agagas i rinimi.

<sup>2</sup> \*Lodoxoma atnimi na tu atkatla at ne Iesu, neni lavasuun la lurutu kaxat at lununu atdik. Neni ga siam ka laxasongsongot la lainmangan at laxaba mila ni ga doma mun mo lomomo neni naba ruuna ka i. La nanga neni it kis at lenep tino at loxonin orong at ne Moroa.

<sup>3</sup> Mina doma mumu mo laxasongsongot limixin kakapmek diga lox i rin. At na loklok neni lampoovo rinimi, xusu nemi mi noxo molo la mina noxo doma abulubun.

<sup>4</sup> At na levenaleng mira raba rulu vam laxakapmek la mira tu atmatkun, ketla limixin kakapmek kovisi dina sev amet teventaba atnimi.

<sup>5</sup> Nemen gat mita domampe mo levelinga loklox alolos, i ngan laradi i anasa ne nitna min. Mo levelinga i lok keretna,

“Nuruk, nemen gat uta doxoma abulubun do ne Moroa, Leeme Silok na lox aleeng u do u lok laxapmek. La nemen gat uta bulu ap mo loklok,

<sup>6</sup> \*mila Leeme Silok ik lox aleeng nedi, neni i vavara aleng di. La do neni na lox asongot nemi, anaa i lox asusu i do nemi mi lok ngan laxamdak tinotno ren.” *Ler 3:11-12*

<sup>7</sup> \*Mina tu atmatkun tip kip levesongsongot mi lomomo mila ne Moroa i ke xepe mo levenmumuat kusu na vot saparap nemi ri lox aleeng nemi. I lok ngan bok nade xopok at na lavatbung menemen, luvuttemen laxamdak di lox aleeng laxamdak atdi, do di lok tavanga i lok kapmek.

<sup>8</sup> Limixin axap di lok leveloklox aleeng. Do ne Moroa ixo lox aleeng nemi, anaa i lox asusu i do nemi xopmen laxamdak tuturun teren, ketla nemi mi lok ngan mun laxamdak mexalanga.

<sup>9</sup> Lara lavanga bok, nedik axap di ruuna luvuttemen dik, mo diga lox aleeng dik la nedik ga lok ngangao atdi mumu mo loklok. Kuren la i lox avukat aleng do mina siam ka mo leveloklok at ne Moroa, ne Temen nemi. Neni ga rudum li dik la lev-entoonan atdik la kerepmo atanaba ruuna ka lorooro avolo.

<sup>10</sup> Luvuttemen dik diga lox aleeng dik at leventaba levenmaares mun mumu lodoxoma atdi. Ketla ne Moroa i lox aleeng dik kusu ataba vee radi avukat la ataba lok ka mo loklok teren in mantan tino.

<sup>11</sup> \*Na leveloklok kopmen na lox amomo dik ketla i lox asongot dik. Melemu at na leveloklok, lorooro atnimi naba lox asusu loklok mantan la lenmila do mina siam ka mo loklox aleeng.

<sup>12</sup> \*Kuren la mina raba axap levendoxoma atnimi xusu mina mumu lavavara at ne Moroa. La minaba lok ka levempanga neni ga vaase ali vam min tinimi, kerekngan laradi i lox alolos labantuxu ren kusu tik sixit at lekampoovo.

<sup>13</sup> \*Mina lok tatao avukat lavatpas atnimi, xusu do teventaba atnimi mo lununu atdi xopmen na lolos, di noxo soxope axap lununu atdi at ne Karisito. Ketla dinaba ven mo leveloklox avukat atnimi, la dina mu asu i la kerepmo lununu atdi naba lolos.

\* **12:1:** Ro 7:21; 1 Ko 9:24-25 \* **12:2:** Ib 1:3 \* **12:6:** Li 3:19 \* **12:7:** Lal 8:5; 2 Sml 7:14 \* **12:11:** Je 3:17-18 \* **12:12:** Ais 35:3 \* **12:13:** Ler 4:26

*Lavanga Mina Ronga Xepe Ne Moroa*

14 \*Mina lolos kusu mina nemen at lumulum eburu mi limixin axap, la mina nemen manmanton, mila do tara noxo ruuna loklok in mantontino, neni noxo ven ne Moroa at lorooro melemu.

15 \*Mina lok tatao avukat nimi xusu tara atnimi noxo sok tixirixes kepe letaba nabalamu at ne Moroa la na seeve. La nemen nimi guta ke xepe teventaba atnimi dina lok lekarakat la dina lox asubu lununu at limixin, kerekngan lara laradi i sev amet limixin.

16 \*Mina lok tatao avukat nimi xusu tara atnimi noxo vubeles ti loklok i lok kapmek maxamang at lixitkis epot la kerepmo na lok kapmek lara kitkis epot atnimi. Kopla na lok ngan ne Esao, neni goxo lok ngangao at ne Moroa. Neni ga xip kepe laasen silok do lanarong, mila lavaanat meren digak lok ka loklox anarong at luvuttemen di. Ketla neni ga xip kepe mo loklox anarong kusu ni na lok ka levempanga anan mun ti labantuxu ren.

17 \*Nemi miklen i do melemu bok ba neni ga lok do na lok ka amlong mo loklox anarong, ketla ne temen ga sok tixirixes kepe i. Neni goxo epovo na lox ekun lodoxoma at ne temen, keke i do neni ga reng mu mo loklox anarong.

18 \*Do mina vot pasa ne Moroa, mi noxo ven mo levempanga limixin me Israel diga ekip tangarang min at lavatpas atdi boro Isip. Diga vot to at lakaana Sinai la ne Moroa ga sep pepe di do di noxo long tu ren. La diga ven mo lakaana, laxao silok ga anan teren, la lamain silok mi lusugao ga vung kimir i. Langsungan lamanman eburu mi leretepaavat la lavanga ga mam to ap mo lakaana.

19 \*La diga rongga lerengteng at luru la diga rongga laxaka at ne Mo-

roa. Diga rongga i na, la diga marat aleng la diga sing i xusu noxo vaase bok ba tevelinga ridi.

20 \*Di goxo epovo na rongga ne Moroa mila diga marat aleng at levelinga ren, ni ga lok keretna, "Limixin axap gi noxo long tu at na lakaana, la do tavanga mi lavanuet kangkedek teren na los polo na levelinga rak, limixin dina lu amer i."

21 \*Diga ven i mo lavanga la diga umsu mi lanmarat, kuren la ne Moses ga lok, "Nia a marat aleng, kuren la a dede."

22 \*Ketla nemi mi goxo ekip tangarang mi tevempanga xeretna at lovtopot atnimi saparap ne Moroa. I lok ngan ta do mira vot pam to saparap lakaana Saion la lemenemen Jerusalem, neni lemenemen at ne Moroa, Luntoo Avolo. Mira vot pam ap mo lemenemen i umsu aleng mi lubung angelo, kopmen tara i epovo ri exes di, mo dik lok buru la dik pixan emi asu saparap ne Moroa.

23 \*La mira vot eburu vam mi limixin nunu nedi lavanarong at ne Moroa, mo ga malagan li vam levenasen atdi ro vana at laxalibet. Mira vot pasa bok pam ne Moroa, neni laradi rongtonga linga at limixin axap. La mira vot pam saparap labaroonan atnedi limixin mokmokso no digara met pam la ne Moroa ga lox adadat pam di. La nanga dik lok to vana at laxalibet.

24 \*Mira vot pasa vam ne Iesu, neni ga lok lumulum ti lekabus maxat kantubu at ne Moroa eburu mi limixin, la mira vot pam ap mo loxot ne Iesu ga semla li lada ren to melango at ne Moroa ngan luunun ti laxakapmek at limixin. Mo lada ren i lox avukat ti lada at ne Abel, mila lada at ne Abel ga lox asuusu lebelemamao at ne Moroa ketla lada at ne Iesu i lox asuusu lumulum.

25 \*Mina lok tatao avukat nimi xusu mi noxo rongga xepe ne Moroa,

\* 12:14: Sam 34:14; Ro 12:18 \* 12:15: Gu 8:23 \* 12:16: Lur 25:33-34 \* 12:17: Lur 27:30-40

\* 12:18: Pas 19:16-20; Lal 4:11-12 \* 12:19: Pas 20:18-21; Lal 5:22-27 \* 12:20: Pas 19:12-13

\* 12:21: Lal 9:19 \* 12:22: Ga 4:26; Li 5:11 \* 12:23: Lu 10:20 \* 12:24: Ib 8:6; 10:22; 1 Pi 1:2;

Lur 4:10 \* 12:25: Ib 2:1-3; 10:26-29

mo i paase rinimi. Moroa ga paase ri lavalabat atdik to Sinai, ketla buaang atnedi diga rongga xepe levelinga ren la diga ekip tangarang mi lebelema-mao ren. La kerepmo bok, do nemi mina rongga xepe levelinga at ne Moroa no vana at laxalibet, ixo epovo do mina sepsu at lebelemamao ren. Mila levelinga ren tidik i mumuat aleng ti mo levelinga neni ga raba di min.

<sup>26</sup> \*Ap mo levenaleng Moroa ga paase ri lavalabat atdik to Sinai, la lavatbung menemen axap gang nengne. Ketla melemu neni ga vaase do,

“Abangma gesara bok na lavatbung menemen eburu mi laxalibet.” *Aga 2:6*

<sup>27</sup> Na levelinga do “gesara bok,” i lox asuusu i do ne Moroa naba sele utut kepe axap levempanga neni ga rudum li di at na lavatbung menemen la laxalibet bok, kusu mo levempanga neni i vara i do nak lok, naba nemen amisik.

<sup>28</sup> Nedik ata lok ka lixitkis at Linintoo ren mo noxo xap. Kuren la ata tong avukat ti ne Moroa la ata lotu ruturun saparav i. La lorooro atdik na umsu mi langsgangan loklok ngangao saparav i,

<sup>29</sup> \*mila ne Moroa atdik neni laxao sesele utut.

## 13

### *Levelinga Xavaxap*

<sup>1</sup> \*Mina balamu ela nimi mila nemi limixin at ne Moroa.

<sup>2</sup> \*Nemen mita ke xepe loklok ti lok maraose mi luvuttadi xadiong. Lev-entaba diga mu asu na loklok, ketla di goxoklen i do diga lok maraose mi lubang angelo at ne Moroa.

<sup>3</sup> \*Mina lox asuusu labalamu atnemi rinedi limixin nunu di nemen at loogu xokoxo, i lok ngan ta do nemi bok mik lok eburu midi at

loogu xokoxo. La mina lok tooro limixin nunu mo dip kip losongsongot mumu lununu atdi, mila nemi bok migap kip levenmumuat kerepmo.

<sup>4</sup> \*Nemi axap mina mu asu avukat loklok keneng at leepot la mina ke loklok ti elongka mila nedi di mu asu loklok ti elongka, Moroa naba lok li di at lavapaase, eburu minedi bok limixin di los polo levelinga at ne Moroa mumu loklok keneng at leepot.

<sup>5</sup> \*Mina ke xepe loklok ti vavara solo levempilas la mina lok momo mi mo levempanga mi ruuna i, mila ne Moroa ga lok keretna,

“Nia noxo on basinge rinotno nimi la loklok tatao rak kopmen tinotno noxo xap.” *Lal 31:6*

<sup>6</sup> Kuren la i epovo do ata tong tuturun mo levelinga kerekngan Lovoang Kaala i tong i,

“Leeme Silok neni Laradi Loklok Tooro rak, la nia xopmen a noxo marat at lempanga limixin kapmek diba lox i ria.” *Sam 118:6*

<sup>7</sup> \*Mina doma loklok at luvuttadi amgomgo atnemi gano, mo diga vaase nimi mi Lagale Lavavang at ne Moroa. Mina doma lununu diga ruuna i at lorooro atdi se diga met, la mina lok ka lununu xerepmo.

<sup>8</sup> \*Diga nunu do ne Iesu Karisito ixok lox ekun levelinga ren. Levelinga ren ga soorun gano la i soorun lingina la naba soorun bok melemu.

<sup>9</sup> \*Nemen gat mitang tonga nedi di lox ase nimi mi levenanasa vetpes, mo ba sar asoogong nimi basinge lununu atnemi at ne Iesu. I lox avukat do mina lok ka letaba nabalamu eburu mi loklok tooro at ne Moroa xusu mina lox alolos lebelen nimi. La mina ke xepe mo leveloklok at Laulis Linga mumu leveluxa salai ri anan la leveluxa salai kopmen ti anan. Na loklok noxo lok tooro lorooro atnedi di mumu asu i.

\* **12:26:** Pas 19:18; Sam 68:8; Aga 2:6 \* **12:29:** Lal 4:24; 9:3; Ais 33:14 \* **13:1:** Jo 13:34 \* **13:2:** Ro 12:13; 1 Pi 4:9; Lur 18:1-8; 19:1-3 \* **13:3:** Mt 25:36; Ib 10:34 \* **13:4:** Ga 5:19,21; Ep 5:5 \* **13:5:** 1 Ti 6:8; Jos 1:5 \* **13:7:** 1 Ko 4:16; Ib 6:12 \* **13:8:** Ep 4:14 \* **13:9:** Ro 14:17

<sup>10</sup> Ketla nedik ta ruuna Laradi Lok-lox Arooro. Ni ga lox epovo luunun ti laxakapmek atdik la kopmen toxot at na rinedi di mumu asu lekabus migomgo.

<sup>11</sup> \*At leventaangas at lekabus migomgo lamaasa gomgo ga lok ka lada at levempanga mi lavanuet kangkedek la ga vubeles min uto xeneng at loxot ga xaala aleng. Mo lada ga lok ngan laplavang ti laxakapmek at limixin. Ketla diga lok ka mo levempanga mi lavanuet kangkedek la diga rin asonao i ro maxamang at lemenemen.

<sup>12</sup> \*La kerepmo ne Iesu bok ga xip losongsongot to maxamang at lemenemen silok Jerusalem kusu na lox adadat limixin basinge laxakapmek mi lada xa ren.

<sup>13</sup> \*Kuren la mina xis esogo mi ne Iesu, la minap kip lainmangan kerekngan ne Iesu gap kiv i ap mo laaleng neni ga merem at laxaba ro maxamang ap mo lemenemen.

<sup>14</sup> \*Mila kopmen temenemen tino ridik nade xopok at lavatbung menemen. Ketla nedik ta ngangais ti mo lemenemen ne Moroa ga lox agagas li i ridik.

<sup>15</sup> \*Iesu ga uu ngan laxaavuk tidik, kuren la ata emi asu amisik mi ne Moroa, i lok ngan laplavang atdik tin la i lok ngan bok livipisik atnedi di nunu at laasen teren.

<sup>16</sup> \*La nemen mita domampe loklok tik lok lununuan la loklok tim taba panga nedi dik pakes, mila anaa leveloklok i lok ngan laramtaba atdik ti ne Moroa la neni i momo ren.

<sup>17</sup> \*Mina ronga res at luvuttadi amgomgo at lotu la mina mu asu levelinga atdi mila nedi di lok tatao nimi la ne Moroa nabakling lugugu atdi, mo do diga lok tatao avukat nimi. Mina ronga res atdi xusu diba lok momo mun at lugugu atdi. Do mina ronga xepe levelinga atdi, na loklok ting tonga xepe naba lok li

lumumuat mavana atdi la naba lok kapmek lununu atnimi.

### *Levempapaase Avit*

<sup>18</sup> \*Mina ngising amisik ne Moroa do neni na lok tooro nama. Nema xopmen mana ruuna tusumsuma xapmek mila maklen i do lebelen nama ip sepsen tino, la ma vara aleng i do mana ruuna luruptuvuk i nunuan axap.

<sup>19</sup> A vara i xusu anamlong soso uto atnimi, kuren la at langsung lavavara rak, do mina sing ne Moroa ri na lavanga.

<sup>20</sup> \*Moroa at lumulum ga lox arooro amlong Leeme Silok atdik ne Iesu basinge lanmet. La at lada ren neni ga vaxaru kaxat lekabus maxat mo naba nemen amisik. Neni laradi loklok tatao atdik ngan laradi i lok tatao lubangtipsip teren.

<sup>21</sup> A sing ne Moroa do na lox agagas li avukat nimi xusu minaba mu asu lavavara ren la neni na gugu at lebelen nimi xeneng at loklok tooro at ne Iesu Karisito. Ata lok mo levempanga neni naba momo ren la ata emi asu min la na leemi asu rin noxo xap. Tuturun.

<sup>22</sup> Luvutnetak mi luvurinu. Nia a sing nimi do mina siam ka levelinga rak keneng at na lovoang. Na levelinga kopmen na baalom solo, i xubulik mene nga.

<sup>23</sup> A vara i xusu minaklen i do neton dik ne Timoti diga soxomus asu vam i boro xeneng at loogu xokoxo. Do neni na vot pasa soso ia, nema eburu manaba vot pasa nimi.

### *Lavapaase Momo*

<sup>24</sup> A lox aonon lavapaase momo rak ti luvuttadi amgomgo atnimi la ti limixin axap at ne Moroa. La nedi bok limixin nunu boro Itali di lox aonon lavapaase momo rinimi.

<sup>25</sup> Letaba nabalamu at ne Moroa na nemen amisik eburu minemi axap. I ruturun.

\* **13:11:** Mas 16:27 \* **13:12:** Mt 21:39; Jo 19:17 \* **13:13:** Ib 11:26; 12:2 \* **13:14:** Ib 11:10,16; 12:22 \* **13:15:** 2 Let 29:31; Sam 50:14,23; Ose 14:2 \* **13:16:** Pl 4:18 \* **13:17:** Isi 3:17; 1 Ts 5:12 \* **13:18:** Gu 24:16; 2 Ko 1:12 \* **13:20:** Sak 9:11; Ais 55:3; Jer 32:40; Isi 37:26; 1 Pi 2:25



## Jems Lovoang At Ne Jems Levelinga Loklox Axasep Lamaares 62 A.D.

Laradi ga malagan i na lovoang neni ne Jems. Buaang nedi luvuttadi akleklen di lok do nai ne Jems neni neton ne Iesu. Neni ga malagan i na lovoang ti lara libinam tadi at ne Moroa ua nedi diga raba lorooro atnedi ri ne Iesu Karisito. Anai libinam tadi diga ekip tangarang aleng mi levesongsongot boro at limixin munepen mi ne Karisito. Kuren la diga epeseves at lengkot axap. Digak lok at levenmenemen silok buaang la digak lok ngan limixin me xadiong. Ti nai ne Jems neni laradi gomgo atnedi limixin nunu digak lok to Jerusalem.

### Lengkot silok keneng at na lovoang

- 1:1 Levelinga momo at ne Jems ti limixin.
- 1:2-8 Langas ti lok ka lununu mi lewendomdoma nunuan.
- 1:9-11 Lempapaase mumu limixin banbalo la limixin nopnovos.
- 1:12-18 Nemen dik tana subu kot la tana lok laxapmek.
- 1:19-27 Nedik ta noxo rongga aie xepe mene levelinga at ne Moroa.
- 2:1-13 Legesu ruptuvuk mun kantubu at limixin axap.
- 2:14-26 Atana lox asu lununu atdik, mi loklok tik lok tooro limixin.
- 3:1-18 Atana lok tatao avukat levementapaase atdik.
- 4:1-5:6 Lorooro atdik na nemen nunuan ngan laradi nunu.
- 5:7-20 Levenanasa vetpes bok.

### Lavapaase Axasep

<sup>1</sup> \*Nenia ne Jems, lasaxaruki at ne Moroa la at Leeme Silok ne Iesu

Karisito. Nia a malagan na levelinga ri lasangaun mi legepura larabibinat me Judaia di epeseves at na lavatbung menemen axap.

Nia a malagan lavapaase momo rinemi.

### *Levenmumuat I Lox Asu Lununu Lolos*

<sup>2</sup> \*Luvutnetak mi luvurinuk. Do levenasen panga mumuat na vot parap nimi, i lox avukat do mina momo mene,

<sup>3</sup> \*atla miklen i do nom levenmumuat i tupot parap nimi kusu ti lox alolos lununu atnemi la melemu minaba tu tuxuruxun keneng at lununu atnemi.

<sup>4</sup> Mina tu atmatkun amisik maxeneng at levenmumuat, la nemen mita subu kot. La kerepmo minaba vee ngan limixin mukun at lununu atnemi la kopmen tempanga xapmek nak lok at lorooro atnemi mo naba umsu aleng mi leveloklok nunuan.

<sup>5</sup> \*Ketla do tara atnemi ik pakes ti lodoxoma avukat, ni na sing ne Moroa, atla ne Moroa naba raba aleng i min. Moroa im taba buaang lempanga ri limixin getgesara la neni xopmen noxo rebeng alis toxot teren mumu loklok atdik.

<sup>6</sup> \*Ketla mina nunu lolos at lengkonaleng mi ngising parap ne Moroa, la nemen lodoxoma atnemi na sixit ekarakat. Laradi xopmen na nunu lolos, i ngan lovotas i repit to at laras la ik sixit la lamanman i mas ekapus i uto la uto at lengkot axap.

<sup>7</sup> Laradi xerepmo noxo nua i do naba lok ka levenasen panga boro at Leeme Silok.

<sup>8</sup> Neni xopmen na epovo ri lox ali lodoxoma at lorooro axap teren la ni xopmen na epovo ri lox aulis lununu ren parap ne Moroa.

### *Laradi Banbalo La Laradi Nopnovos*

<sup>9</sup> \*Do laradi banbalo ik lok kantubu atnemi limixin nunu, neni na lok momo mun, keke i do kopmen

\* 1:1: Ga 1:19; Gu 15:23; 1 Pi 1:1    \* 1:2: Ro 5:3-5    \* 1:3: 1 Pi 1:7    \* 1:5: Ler 2:3-6    \* 1:6: Mk 11:24    \* 1:9: Je 2:5

tevempanga ren. Laaleng move ne Moroa naba xip aurur i.

<sup>10</sup> \*Ketla do laradi nunu i ruuna buaang levempanga, neni naba lok momo mo do ne Moroa na lox asi i. Neni i lok ngan mun lempusuvus aaxa i nemen lixilik mun la ia met ta.

<sup>11</sup> Laxangking i urut la iplivi aleng la i lox amolos axap nom lempusuvus aaxa la i subu uto xopok at laxangka. Lampeneves teren ira xap. At nom mun langas laradi i ruuna levempanga solo naba met basinge leven gugu axap teren ap mo levenaleng i lok lugugu ren.

### *Leveloklok Tong Pen Ti Laradi Nunu*

<sup>12</sup> \*I lox avukat aleng do laradi nunu na tu tuxuruxun maxopok at leveloklok tong pen. Mo do laradi ira sak tup pam mi leveloklok tong pen, i lox avukat mila ne Moroa naba raba i mi lavatbungorong, ni lorooro avolo. Ganoxa ne Moroa ga paase ali i do ni naba raba i ri mo limixin di vavara aleng i.

<sup>13</sup> Do loklok tong pen i vot parap tara la i lok laxakapmek, ni noxo lok do ne Moroa i raba na loklok tong pen tin. Kopmen tara i epovo ri lok tong pen ne Moroa ti lok laxapmek, la neni xa noxo lok tong taradi.

<sup>14</sup> \*Ketla laradi i suma loklok tong pen at loxonaleng lavavara xapmek axa ren i sar asoogong i.

<sup>15</sup> La mo lavavara xapmek teren naba sisilok la na lox asuusu laxakapmek. Melemu at na, laxakapmek na sisilok la na lox asu lanmet.

<sup>16</sup> Luvutnetak mi luvurinuk orong. Nemen tara na xarang nimi mumu i na.

<sup>17</sup> \*Leventamtaba mo i lox avukat aleng, ni axap nom boro vana at laxalibet. I si boro vana at ne Temen dik, mo ga rudum li laxangking, lagaaling, la laxampenti. Kopmen teretepukus at loklok teren la kopmen toxot at lamain ik lok keneng teren.

<sup>18</sup> \*Neni ga mumu asu lavavara ren la ga raba nedik mi lorooro maxat, mo ga laa boro at levelinga ruturun teren, kusu nedik taba lok ngan levempipisik avot, la kerepmo ga lox asilok dik to mavana at lempanga axap, ni ga rudum li i.

### *Nemi Mina Ronga Na Levelinga, La Mina Mumu Asu Box I*

<sup>19</sup> Luvutnetak mi luvurinuk. Mina doxoma na lavanga. Nemi axap mina lok soso ri ronga res, ketla nemen mita vaase porang soso levelinga, la mita musak soso.

<sup>20</sup> \*Mila lumukmusak at laradi kopmen na lox asuusu luruptuvuk avukat, kerekngan ne Moroa i vara i.

<sup>21</sup> \*Kuren la, leveloklox axap i bilingot la laxakapmek i umsu aleng at na lavatbung menemen, ni nom mina lok pes kepe i. La mina lox asi nimi la mina xonom ka levelinga at ne Moroa, ni gatlo li i ro xeneng at lorooro atnimi. Ni mun nom levelinga i epovo na lox arooro nimi.

<sup>22</sup> \*Nemen mita lok ngan luvuttadi rongtonga xepe mun. Di ronga levelinga at ne Moroa, la kopmen dina mumu asu i.

<sup>23</sup> Do laradi i ronga mo levelinga, ketla kopmen na gu mu asu i, ni i ngan laradi i ven loroonan teren at liriong.

<sup>24</sup> La i reven avukat lemeren la melemu i vas kaxat, la soso mun i domampe mo lemeren i lok kereva.

<sup>25</sup> \*Ketla do tara i ven kibis mo Lenavolo ik mokso rinotno, mo levelinga naba lox asepmus i basinge loxokoxo at laxakapmek. Do neni nang tonga amisix i la noxo domampe i, ketla na gu mu asu i, Moroa naba lox anarong i at lempanga ni i lox i.

<sup>26</sup> \*Lentaba dik lok keretna, "Nenia laradi nunu la loklok tarak i lox avukat at lemeren ne Moroa." Ketla do ni xopmen na lok tatao

\* 1:10: Ais 40:6-7; 1 Pi 1:24 \* 1:12: 2 Ti 4:8 \* 1:14: Ro 7:7-10 \* 1:17: Mt 7:11 \* 1:18: Jo 1:13  
 \* 1:20: Akl 7:9 \* 1:21: Kl 3:8; 1 Pi 2:1 \* 1:22: Mt 7:26; Ro 2:13 \* 1:25: Ro 8:2; Je 2:12; Jo 13:17  
 \* 1:26: Sam 34:13; 141:3

avukat lavapaase ren, ni i xaxarang axa lebelen, la lununu ren i ngan lavanga gamasa.

<sup>27</sup> Leveloklok mo i nemen, ne Moroa i vara i do limixin dina lox i. Do dina lox epovo i, i lox asuusu i do di nunu ruturun. Nom leveloklok i lox avukat aleng la i lok keretna. Limixin dina lok tatao avukat lubungkarun la lavakin, lavatlok atdi diga met pam. La dina lok tooro di at levenmumuat atdi. La lara lavanga bok, nedik ata lok tatao avukat lavatpas atnedik, la loklok at na lavatkangka noxo lox abilingot lorooro atnedik.

## 2

### *Labalamu Atnedik Na Evan Mi Limixin Axap*

<sup>1</sup>\*Luvutnetak mi luvurinuk. Nemi mi nunu parap Leeme Silok ne Iesu Karisito, mo i umsu mi lisisixam. Kuren la nemen mita lox asi laradi kopmen taasen silok teren la nemen mita lox aurut tara vetpes. Ketla mina ven limixin axap ngan lege-sara.

<sup>2</sup> Mo dola laradi nopnovos i ru-una laarung molot at lekngen la i siga lempanga singsiga nunuan la ia vubeles at loogu lotu atnimi, i lox avukat mene. La do laradi kopmen tempanga ren i siga lempanga maut mun, la neni i beles bok at loogu lotu, loklok atnimi ridu na epovo mun.

<sup>3</sup> Ixo lox avukat do nemi mi lox asuusu loklok ngangao aleng ti nom laradi i siga lempanga singsiga nunuan la mi tong i rin do ni na lok ka loxot kitkis avukat. Ketla ti laradi banbalo mi tong i rin, do ni na tu mun koplana xis to vetpes koplana xis kopok at laxangka parap lengkangkedek at limixin.

<sup>4</sup> Mo do nemi mi lok na loklok, nemi mi lok laxakapmek, atla mi lox abulubun kepe limixin banbalo keneng at lotu atnimi. Na lodoxoma i lok kapmek aleng.

<sup>5</sup>\*Luvutnetak mi luvurinuk orong. Nemi axap mina ronga ia. Luvuttadi mo di lok ngan luvuttadi gamasa at lemeren limixin at na lavatkangka, Moroa ga soxolik ka vam di kusu dina umsu mi lununu la dina nemen ngan lavaanat too at Linintoo ren. Neni ga paase ali i do nedi limixin di vavara aleng i, dinaba lok ka loxot at Linintoo ren.

<sup>6</sup> Ketla nemi mi lox abulubun kepe limixin banbalo. Nemi miklen i do, limixin nopnovos di lox abulu nemi la di lok kaka lempilas atnimi. Nedi vam nom di lok li nemi at lavapaase.

<sup>7</sup> La di paase kapmek ti laasen avukat at ne Iesu, mo ne Moroa ga lox anarong nemi min.

<sup>8</sup>\*Nemi minaba lok levempanga ik mokso, mo do mina mu asu mo levelinga i silok aleng la ik lok keneng at Lovoang Kaala, mo i lok keretna, "Mina balamu limixin petpes ngan mi balamu nemi."

<sup>9</sup>\*Ketla do mi lox asi tara la mi lox aurut tara vetpes, nemi mi lok laxakapmek, la mira los polo vam Laulis Linga at ne Moroa. La kerepmo mi lok ngan limixin tongtonga viribang.

<sup>10</sup>\*Do taradi i mumu asu avukat Laulis Linga at ne Moroa, ketla i ronga xepe loxot lixilik teren, i lok ngan neni ia los polo axap pam i.

<sup>11</sup>\*I lok ngan i na. Moroa ga vaase levelinga keretna, "Nemen gat lelongka." La ga vaase bok, "Nemen gat uta sev amet taradi." Mo do mixo lok loklok ti elongka, ketla mi sev amet taradi, nemi mi los polo vam levelinga axap at ne Moroa la mi lok ngan limixin tongtonga viribang.

<sup>12</sup>\*Lavapaase la loklok atnimi na lox avukat axap mila ne Moroa naba lok li nemi at lavapaase mo do loklok atnimi kopmen na epovo mi levelinga ren, mo ik lox asepmus nedik.

<sup>13</sup>\*At lorooro atnimi do kopmen mina ruuna lebelen tuntun, Moroa naba vaxaru nemi at lavapaase la

\* **2:1:** Gu 10:34; Je 2:9 \* **2:5:** 1 Ko 1:26-28 \* **2:8:** Mt 19:19; Ga 5:14 \* **2:9:** Lal 1:17 \* **2:10:** Mt 5:19 \* **2:11:** Pas 20:13-14; Ro 13:9 \* **2:12:** Ga 6:2; Je 1:25; 1 Pi 2:16 \* **2:13:** Mt 5:7; 18:32-35

ni noxo lox asuusu lebelen tuntun teren tinimi. Loklok ti vaxaru tara at lavapaase ixo lox avukat solo, ketla loklok ti lox asuusu lebelen tuntun i lox avukat aleng.

### *Leven Gugu Nunuan Eburu Mi Lununu*

<sup>14</sup> \*Luvutnetak mi luvurinuk. Do taradi i tong i do i ruuna lununu, ketla kopmen teveloklok nunuan at lorooro ren, lununu ren i lok ngan lavanga gamasa la ixo epovo do lununu kerepmo na lox arooro i.

<sup>15</sup> \*Dola luvutneton nimi xopla luvurinen nimi dik pakes ti levempanga singsiga, la kopmen dina lok ka epovo teveluxa anan.

<sup>16</sup> La do tara atnimi na vot pasa di la na lok tidi keretna, "Moroa na lox anarong nimi, mina nemen avukat la mina anan avukat." Ketla kopmen na lok tooro di mi lempanga singsiga la lempanga anan, mo levelinga ren kopmen na lok tooro di.

<sup>17</sup> \*La at na langas bok, mo do lununu xusuk ik lok la kopmen teven gugu nunuan nak lok eburu min, mo lununu i ngan lavanga gamasa.

<sup>18</sup> \*Taradi na lok keretna, "I lox avukat mun do lara i ruuna lununu la lara vetpes i lok leven gugu nunuan." Ketla nia a tong i rin keretna, "Do tara xopmen na lok teven gugu nunuan, neni xopmen na ruuna lununu. Nia a lok leven gugu nunuan, mo i lox asuusu lununu rak."

<sup>19</sup> \*I lox avukat do una nunu do legesa Moroa xusuk mun. I ruturun, ketla lubanggas bok di nunu xuren la dik marat aleng.

<sup>20</sup> Mo laradi, neni lavanga baulang. Lununu ren i ngan lavanga gamasa mo do i ruuna lununu xusuk la kopmen teven gugu nunuan i nemen at lorooro ren.

<sup>21</sup> \*Nenia ana lox asuusu i do na levelinga rak i ruturun mi lorooro at ne Abaram. Lurubuno atdik ne Abaram ga ronga res at ne Moroa. Ni

ga raba lamdak teren ne Aisak ngan laplavang. La kerepmo ne Moroa ga tong i do ne Abaram ni laradi manmanton.

<sup>22</sup> \*I xasep do mo loklok at ne Abaram ga lox asuusu lununu ren la ga lox amuat lununu ren.

<sup>23</sup> \*Loxot at Lovoang Kaala ga soorun keretna,

"Abaram ga nunu at ne Moroa la Moroa ga siam ka ba i ngan laradi manmanton." *Lur 15:6* La ne Moroa ga so asen ba i do lentangas teren.

<sup>24</sup> Kuren la nemi axap mina ven avukar i do ne Moroa na lox asepmus laradi mo do i ruuna leven gugu nunuan eburu mi lununu. Do i ruuna lununu xusuk mun, ixo epovo.

<sup>25</sup> \*La at na langas mun ne Raap, latkin ngarangat, gan manton tino at lemeren ne Moroa. Neni ga lok tooro luradi likling boro Israel la ga riki du uto vetpes kusu limixin esep di noxo ranga alis du.

<sup>26</sup> \*Kuren la mina xasep keretna, labantuxu kopmen toroonan teren, ni ira met pam. La kerepmo bok lununu kopmen teven gugu nunuan teren, ni ira met pam.

## 3

### *Mina Lok Tatao Avukat Lavapaase Atnimi*

<sup>1</sup> \*Luvutnetak mi luvurinuk. Kopmen na lox avukat do buaang atnimi na lok ka lugugu ngan luvuttadi loklox ase at levelinga at ne Moroa, mila ne Moroa naba ila mumu aleng lugugu at luvuttadi loklox ase. Mira xasep pam at na.

<sup>2</sup> Nedik axap tak sak kikixin at leventaangas buaang. Ket do laradi kopmen nak lok laxakapmek at lavapaase ren, neni laradi manmanton tinotno la ni iklen bok ti lok tatao lorooro axap teren.

<sup>3</sup> Nedik ta lok li loxonaen lixilik at lungusno at lavaros ti lox i xusu

\* **2:14:** Mt 7:21    \* **2:15:** 1 Jo 3:17    \* **2:17:** Je 2:20,26    \* **2:18:** Ga 5:6    \* **2:19:** Mt 8:29    \* **2:21:** Lur 22:9-12    \* **2:22:** Ib 11:17-18    \* **2:23:** Ro 4:3,9,22; 2 Let 20:7; Ais 41:8    \* **2:25:** Ib 11:31    \* **2:26:** Je 2:17    \* **3:1:** Lu 12:47

naba ronga res atdik, la nedik ta epovo na sixit min uto at lengkot ta vara i. <sup>4</sup> Koplana mina doxoma mumu lavatmon i silok aleng la lamanman lolos ik lox asen i at laras. Lisitia at lavatmon i lixilik mun, ket do laradi gomgo ren na vara i do na sen min ti toxot, ni naba vaxar akmokso lisitia la lavatmon ira sen ti mo lenep i vara i.

<sup>5</sup> Na lisitia i lok ngan lagam at laradi. Ni loxot lixilik mun at labantuxu ren, ketla lagam i epovo do na tong asu levelinga loklox asilok. Nemi minam doma mumu i na. Laxao lixilik i epovo ri an kaka axap laxairing silok.

<sup>6</sup> \*La lagam i lok ngan mo laxao. Ni i ngan lavanga xapmek ti lengkot axap at labantuxu, la ik lox axatu kaxat leveloklok kakapmek at labantuxu, la ik lox axatu kaxat bok leveloklok i bilingot at lorooro axap at laradi. La laxao xerepmo ip tavasus at lemenemen songsongot.

<sup>7</sup> Limixin di epovo na lox amenemen levenasen panga rooro axap at na lavatbung menemen, ngan levempanga mi lavanuet kangkedek boro at laxairing, levempixa, lempat sii la lempanga di kaxao mi lebelen di, la levenmat at laras.

<sup>8</sup> \*Ketla kopmen taradi i epovo ri lox amenemen lagam. Amisik lagam ik lox axatu kaxat laxakapmek. Neni i epovo na sev amet tara kerekngan mun luxuasep.

<sup>9</sup> \*Mi leven gam atdik nedik di xip aurut laasen at ne Moroa, ne temen dik. La nedik di paase kapmek bok min ti limixin petpes no ne Moroa ga rudum li di kerekngan lampoovo ren.

<sup>10</sup> Levelinga ri xip aurut laasen at ne Moroa la levelinga xapmek bok ip tavasus at legesa gam mene nga. Luvutnetak mi luvurinuk, na loklok kopmen nak mokso.

<sup>11</sup> I lok ngan na lempapaase poovo. Ladan mumudut eburu mi ladan i so

\* **3:6:** Mt 12:36-37; 15:11,18-19 \* **3:8:** Ro 3:13  
5:9; Ais 32:17; Ib 12:11 \* **4:1:** Ro 7:23

mamao noxo sen su at legesa xatli dan.

<sup>12</sup> Luvutnetak mi luvurinuk. Luuna pik ixo epovo ri visik levempeven olip. La luuna vaen ixo epovo ri visik levempeven pik. La ixo epovo bok do tara na lok ka ladan mumudut boro at ladan i so mamao.

### *Lodoxoma Avukat Ne Moroa Im Taba I*

<sup>13</sup> Do tara xantubu atnemi i ruuna lodoxoma avukat mi lakleken solo, neni na lox asusu i mi lavatpas teren i lox avukat axap la i umsu mi leveloklok nunuan. Neni i lox i na mi langangan loklok ngangao la lodoxoma avukat.

<sup>14</sup> Ket dola tara i ruuna levereven peves ti lempanga at tara vetpes la loklox asilok, ixo epovo do neni na lox aurur i do neni laradi avukat. La ixo epovo na sev apkap do neni laradi rongtonga xepe at levelinga raturun.

<sup>15</sup> \*Lodoxoma kerepmo kopmen na laa boro vana at ne Moroa. Ni loklok at na lavatkangka mun at ne Satan.

<sup>16</sup> Do limixin at lara lemenemen di ruuna levereven peves ti lempanga at tara vetpes la loklox asilok, lix-itsik atnedi naba ekarakat la buaang leveloklok kakapmek nabap tavasus kantubu atdi.

<sup>17</sup> Ketla nedi limixin di ruuna lodoxoma at ne Moroa, di ruuna leveloklok keretna. Lara avot, luruptuvuk atdi i dadat, limila i nemen kantubu atdi, loklok mulus bok mo, la ding tonga res at lentaba vetpes. Di umsu mi lebelen tuntun la dik lox amisik leveloklok nunuan. La di ke xepe loklok tik lox asi tara, la loklok kaxarang.

<sup>18</sup> \*Nedi dik lok lumulum kantubu at limixin, mo lugugu atdi ba pisik asu lorooro nunuan kantubu at limixin axap.

## 4

### *Lentangas At Laxakapmek Neni I Munepen Mi Ne Moroa*

\* **3:9:** 1 Ko 11:7 \* **3:15:** Je 1:5,17 \* **3:18:** Mt

1 \*Nom levenekarakat la lev-enedak kantubu atnimi i laa meva? Ni nom ik sixisu boro at lebelen nimi. Lavavara ri laxakapmek i nemen atnimi la na loklok ik paxaru kaxat levenesep keneng at lorooro atnimi.

2 Nemi mi vara levempanga, ketla kopmen mina epovo ri lok kaka i. Nemi mi sev amet limixin la mi ngaongao ri lempanga at lentaba vet-pes, ketla kopmen mina epovo ri lok kaka nom levempanga mi vara rin. Mi vetep mi levelinga la mi vesep. La kopmen mina lok kaka tempanga avukat mila kopmen mina ngising ne Moroa rin.

3 Do nemi mi ngising ne Moroa ri levempanga mi vavara rin, kopmen minak lok kaka i, atla lodoxoma atnimi kopmen nak mokso. La mi vavara mun i xusu tik lox amomo labantuxu atnimi.

4 \*Loklok atnimi i lok ngan loklok at laradi ing longka tixin. Do laradi i vara mu loklok at na lavatkangka, neni i sok tixirixes kepe ne Moroa. Kerepmo la laradi i vara na etangas mi loklok at na lavatkangka, neni i munepen mi ne Moroa.

5 \*Nemen mita doma i do Lovoang Kaala i tong i do Loroonan Kaala, mo ik lok atdik, i sasat limixin ti levereven peves.

6 \*Ketla ne Moroa i raba dik mi letaba nabalamu i lolos aleng ti nom laxapmek, kerekngan Lovoang Kaala i tong i,

“Moroa ixo ru ebelen minedi di lox aurut levenasen atdi. Ketla neni i lox asuusu letaba nabalamu ren tinedi di lox asi lorooro atnedi maxopok teren.” *Ler 3:34*

7 \*Kuren la nemi mina lox asi lorooro atnimi la mina nemen maxopok at ne Moroa. Nemi mina sok tixirixes kepe levelinga at ne Satan la ni naba ke xepe nimi la naba sixiro.

8 \*Nemi mina nemen auret ne Moroa la ni naba nemen tino eburu

minimi. Nemi luvuttadi at laxakapmek, lorooro atnimi na maxat bi-long, i ngan laradi i gos lukngen la ira maxat manga. Nemi mi ru-una legepu doxoma, mina lok pes nom levendoxoma xapmek basinge lorooro atnimi.

9 Mina bulu, la minang teng. Nemi ming longon, mina soxun loklok ting longon la minang teng. Nemi mi sosoro, mina soxun nom loklok ti sosoro la mina bulu.

10 \*Nemi mina lox asi xa nimi at lemeren ne Moroa. Do mina lox i xuren, Moroa naba xip aurut nemi.

### *Nemen Mita Vaase Asi Luvutneton Nimi*

11 Luvutnetak mi luvurinuk. Nemen mita vaase asi tara kantubu atnimi mi tevelinga. Do taradi na vaase asi neton mi levelinga, koplana ila mumu loklok teren, i lok ngan ta do i ronga xepe Laulis Linga at ne Moroa la i lox asi i. Do mina vaase asi levelinga at ne Moroa, kopmen mina ronga res teren, la mi lox aurut nimi mavana ren.

12 \*Moroa xusuk mun im taba levelinga ngan Laulis Linga kusu limixin dina mumu asu i. La ni xusuk mun i viila mumu loklok atdik. Ni xusuk mun i epovo ri lox arooro laradi koplana riki i uto at lemenemen songsongot. Ketla kopmen nak mokso do mina viila mumu loklok at limixin di nemen saparap nimi.

### *Nemen Mita Lox Aurut Levenasen Atnimi*

13 \*Na mina ronga ia. Nemi lentaba luvuttadi mi paase xeretna, “Lingina koplana kantamak nedik tabat pas uto at lemenemen silok, la taba nemen go at legesa maares la taba lok leven gugu rip novos ka buaang levempilas.”

14 \*Ketla levelinga keretnom kopmen na mokso, mila nemi mixoklen i do lorooro atnimi naba lok kereva kantamak. Nemi mi lok ngan mene lamantakabu, ik lok lixilik mun la ira sonao gamasa manga.

\* 4:4: Ro 8:7; 1 Jo 2:15 \* 4:5: Pas 20:3,5 \* 4:6: 1 Pi 5:5 \* 4:7: Ep 6:12 \* 4:8: Sak 1:3; Mal 3:7; Ais 1:16 \* 4:10: Jop 5:11; 1 Pi 5:6 \* 4:12: Ro 2:1; 14:4 \* 4:13: Lu 12:18-20 \* 4:14: Ler 27:1; Sam 39:5,11 \* 4:15: Gu 18:21

15 \*Ketla nemi mina tong i keretna, “Mo do ne Moroa i vara i, nedik ata rooro, la ataba lok lempanga.”

16 Ketla nemi xa mi xip aurut levenasen atnimi la mi tong asu levelinga loklox asilok. Mo axap leveloklox asilok patlak kerepmo, ni i lok kapmek.

17 \*Kuren la do laradi iklen lurup-tuvuk nunuan, ketla neni kopmen na mu asu i, na laradi i lok laxakapmek.

## 5

### *Levempapaase Ri Luvuttadi Nopnovos*

1 \*Nemi limixin nopnovos mina ronga ia. Minang teng la mina bulu mila levenmumuat naba vot saparap nemi.

2 \*Lapnovos atnimi ira xap pam, la levesingsiga atnemi, laxampide ira ngas koxorop pam i.

3 Leven gol atnimi la levesiliva ira lok kapmek pam mi libilinga, la na libilinga naba lox asuusu laxakapmek atnimi at laaleng ete la neni naba rin labantuxu atnimi ngan laxao. Nemi migak lok li bubua laxampilas solo at na levenaleng kavaxap.

4 \*Nemi xovisi mina raba luunun at luvuttadi di kaxat panga ro xataamang. Mina lox empana levesingising atdi! Levenanteng atdi, ne Moroa ira ronga vam i. Neni Leeme Silok la Lanaraavuk.

5 \*Lorooro atnimi at na lavatkangka i umsu mi laxampanga avukat la nemi mik lok momo. Nemi mira anan avukat la mirang pong solo, ketla laaleng at ne Moroa rip sep kutkut limixin kakapmek mo naba vot.

6 Nemi mi lok li limixin avukat at lavapaase la mip sev amet nedi di goxo lok taxakapmek, la kopmen digoxo esep tangarang minimi.

### *Lorooro Atnedik Na Tu Tuxuruxun Mi Lising*

\* 4:17: Lu 12:47 \* 5:1: Lu 6:24 \* 5:2: Mt 6:19 \* 5:4: Lal 24:14-15; Mal 3:5 \* 5:5: Lu 16:25; Jer 12:3; 25:34 \* 5:7: Lu 21:19; Lal 11:14; Jer 5:24; Jol 2:23 \* 5:8: Ro 13:11-12; Ib 10:25; 1 Pi 4:7 \* 5:9: Mt 24:33 \* 5:11: Pas 34:6; Sam 103:8; 111:4 \* 5:12: Mt 5:34-37 \* 5:13: Kl 3:16 \* 5:14: Mk 6:13

7 \*Luvutnetak mi luvurinuk. Mina ngangais mi lomomo se Leeme Silok nabamlong. Mina doma mumu laradi loklok tatao at laraamang. I tu tuxuruxun, la ia ngangais se laxangka na lox asuusu lempanga. Neni i nemen kangais bok ti larakabu mo na vot at leven gaaling teren.

8 \*Nemi bok mina tu tuxuruxun la mina ngangais mi lomomo, mila lovtopot at Leeme Silok i auret.

9 \*Luvutnetak mi luvurinuk. Nemen nemi mita gagalinga mu luvutneton nemi, mila ne Moroa naba vaxaru nemi at lavapaase. Lovtopot at laradi rongtonga linga i auret.

10 Luvutnetak mi luvurinuk. Mina doma bilong ti lavaeme vapaase ali. Nedi diga vavang mi laasen at Leeme Silok la limixin diga lox asongot di, ketla diga tu tuxuruxun. La nedi di lok ngan lampoovo rinimi kusu mina tu tuxuruxun, mo do levenmumuat na vot saparap nemi.

11 \*Nedik di so asen nedi lavaeme vapaase ali do limixin nunuan mila diga tu atmatkun. Nemi miga ronga vam leretere at ne Jop. Neni ga tu tuxuruxun la ga sosolok laxanmumuat gat pot parav i, la melemu Leeme Silok ga lox anarong i. Leeme Silok i umsu mi labalamu la lebelen tuntun.

12 \*Luvutnetak mi luvurinuk. Lara lavanga i silok aleng, i lok keretna. Nemen mita vangpe mi laxalibet koplaxangka koplaxangka levempanga vetpes bok. Dola nemi mina tong i do, “tuturun,” koplaxangka “kopmen,” Moroa naba lok momo. Do mina lok lavangpangpe xerepmo, Moroa naba raba luunun kapmek tinimi.

### *Lising At Laradi Avukat I Ruuna Lolos*

13 \*Kereva, tara go atnimi ip kip tevenmumuat? Neni nak lok lising. Tara bok go i lok momo? Neni nak pixan emi asu.

14 \*Tara bok go atnimi i meres? Neni na ro ka loxongkulao silok at lotu la dina lok levesingising tin la dina saba i mi loxodan momonok at la olip at laasen at Leeme Silok.

15 \*Mo do nedi di nunu ruturen do Leeme Silok naba lox aroo mo laradi, Leeme Silok naba lox aroo i. La do neni ga lok laxakapmek, Leeme Silok naba doxoma xepe laxakapmek teren.

16 Kuren la mina soxomus ela laxakapmek atnimi, la mina sing tinemi getgesara, kusu Leeme Silok naba lox aroo limixin basinge levenanmeres. Do laradi nunu loklok teren in manton, levesingising teren naba lolos aleng la naba epovo rinotno ri lok tooro limixin.

17 \*I lok ngan levesingising at ne Elaia. Ni laradi ga lok ngan dik. Neni ga ngising lolos ne Moroa ri larakabu noxo vot la larakabu goxo vot ti laxangka at lavantun maares la lavanna gaaling.

18 \*La melemu ni ga lok bok lising la ne Moroa ga lox asi larakabu ri lavatkangka la leveluxa ro at lentamang ga suu avukat.

#### *Laradi Nunu I Lox Amlong Laradi Xapmek Basinge Lanmet*

19 \*Luvutnetak mi luvurinuk. Mo do tara atnimi i vas tabaara basinge langas tuturun, mina sar amlong ka i.

20 \*Nemi mina ven kisip na lavanga. Do taradi i lok tooro laradi xapmek, la laradi xapmek i on basinge langas at lanmet la iamlong parap ne Moroa, neni ira lox arooro vam mo laradi basinge lanmet lexen la ne Moroa naba doxoma xepe buaang laxaloklok kakapmek teren. I ruturen.

\* 5:15: Mk 16:18    \* 5:17: 1 Lav 17:1; Lu 4:25    \* 5:18: 1 Lav 18:42-45    \* 5:19: Ga 6:1    \* 5:20: Sam 51:13; Ler 10:12; 1 Pi 4:8



# 1 Pita

## Lovoang Avot At Ne Pita

### Levelinga Loklox

### Axasep

### Lamaares 65 A.D.

Pita ga malagan i na lovoang la na lovoang gat pas tinedi limixin nunu mo diga epeseves at lengkot axap at lavatbung menemen. Na limixin nunu diga nemen at lengkot petpes ngan limixin me xadiong. Ise ne Pita gak lok to Rom, neni ga malagan i na lovoang. Limixin nunu diga ekip tangarang mi lentaba leveloklox asongot boro at lagavaman boro Rom mumu lumumu asu atdi ti ne Iesu Karisito. Pita ga vara i xusu na lox alolos di kusu dina tu atmatkun keneng at lununu atdi. Pita ga vaase aronga bok di mumu loklox arooro atnedi, la mumu bok ne Iesu la dina tu atmatkun amisik at levenmumuat kerepmo, la mumu bok lomlong at ne Iesu, kusu nedi diba doma mumu i na lempanga. Neni ga vaase aronga bok di mi leventaangas i nunuan ua ik mokso xusu ti limixin nunu at ne Iesu Karisito dina mu asu i.

#### **Lengkot silok keneng at na lovoang**

1:1-2 Lempapaase momo.

1:3-12 Lavapaase axasep mumu loklox arooro at ne Moroa.

1:13-2:10 Lixitkis atdik eburu mi ne Moroa.

2:11-3:12 Lorooro at limixin nunu.

3:13-4:19 Ataba ekip tangarang mi levesongsongot mumu lununu atnedik.

5:1-9 Lentaba lempapaase bok mumu limixin nunu.

5:10-14 Loklox anarong la lava-paase abeese.

#### *Lavapaase Axasep*

<sup>1</sup> \*Nenia ne Pita lun pavang at ne Iesu Karisito. Nia a malagan na lovoang tinemi limixin soksoxolik

at ne Moroa. Mi lok ngan limixin kadiiong ti na lavatbung menemen la mik lox epeseves to at levennep taba ro Pontas, Galesia, Kapadosia, Asia, la Bitinia.

<sup>2</sup> \*Ganoxa, Moroa ne Temen dik ga doxoma ali i do ni na soxolik ka nimi ngan limixin teren la na lox adadat nemi mi Loroonan Kaala ren, kusu minaba ronga res at ne Iesu Karisito, la neni naba lox adadat nemi mi lada ren.

Letaba nabalamu ren la lenmila na umsu xeneng at lorooro atnemi.

#### *Lodoxoma Voovo*

<sup>3</sup> \*Leemi asu ri ne Moroa neni ne Temen Leeme Silok atnedik ne Iesu Karisito, mumu mun lebelen tuntun silok teren tinedik. Neni ga lox arooro xaka amlong ne Iesu Karisito basinge lanmet kusu ti raba nedik mi lorooro maxat. La nai, ik suxa nedik mi lodoxoma voovo ri lorooro avolo.

<sup>4</sup> \*La nedik ta epovo xusu tana ven tu at laaleng ua tanaba lok kaka levenapnovos at leveloklox anarong no ne Moroa i gagas li i ri limixin teren to vana at laxalibet, kusu mo leveloklox anarong noxo lok kapmek la na xap gamasa.

<sup>5</sup> \*La ne Moroa i gagas li i rinemi limixin nunu la neni ik lok tatao nemi mi lolos teren kusu ti loklox arooro, mo ne Moroa naba lox asu-voos i at laxavaxap at na lavatbung menemen.

<sup>6</sup> \*La mik lok momo aleng at na lavanga, keke i do mi ekip tangarang lixilok bok be mi tavanga i lox abulu nemi mumu buaang leveloklox tong pen ik lox asongot nemi.

<sup>7</sup> \*Ketla anaa levempanga it pot ti lox asusu mun i do lununu atnemi i lolos. I ngan bok leven gol ni i epovo xusu dina lok kapmex i, din tin tong pen box i ro at laxao. La lununu atnemi, neni lavanga i silok aleng ti logol, neni dinaba lok tong pen i xusu ti long lenget ka i do i lolos kopla kopmen. Melemu minaba ruuna ka leemi asu, la lasinorong eburu mi

\* 1:1: Je 1:1; 2 Ti 1:15 \* 1:2: Ro 8:29; 2 Ts 2:13; Ib 12:24 \* 1:3: 2 Ko 1:3 \* 1:4: Kl 1:12 \* 1:5: Jo 10:28; 17:11 \* 1:6: 1 Pi 5:10; Je 1:2 \* 1:7: Jop 23:10; Ler 17:3; Ais 48:10; Sak 13:9; Mal 3:3; Je 1:3

loklok ngangao at laaleng ne Iesu Karisito naba ru asuvos.

8 \*Nemi xovisi mina ven tu ren, ketla mi vara aleng i. La monga mixo ven tu ren, ketla mi nunu ren. La mi umsu mi lomomo i silok aleng, la neni mo lomomo nenia axo epovo xusu ana mii poovo i mi tepanga, mila i silok aleng tinotno.

9 \*Lavasuun teren keretna, nemi min tuuna xaka loklox arooro xeng at labaroonan atnemi, mumu mun lununu atnemi saparav i.

10 \*La luvuttadi vapaase ali diga terea mumu avukat tinotno levelinga mumu mun i na loklox arooro. Nedi diga vaase ali mi letaba nabalamu no ne Moroa im taba nemi min.

11 \*Diga puse i xusu dinaklen kaka rinotno loxonaleng at lovotpot at ne Karisito la naba vot kereva. La digam doma vupuse do Loroonan at ne Karisito no gak lok keneng atnedi, ga paase ali mi levesongsongot ne Karisito naba ekip tangarang min. Neni naba ru pavaa mo levesongsongot, la melemu ren neni naba lok kaka langangan lisisixam.

12 \*Ne Moroa ga raba asu na levelinga rinedi na luvuttadi vapaase ali xusu nedi di noxo gugu xusuk tik lok tooro nedi xa, ketla ti lok tooro nemi, at loxonaleng diga vaase mumu mo levelinga. Anaa nemi mira rongga xaka vam i at luvuttadi xipkip linga di vaase asu Lagale Lavavang mi lolos at Loroonan Kaala boro vana at laxalibet. Neni na Lagale Lavavang lubang angelo bok di vara aleng i xusu dinaklen i.

### *Lavapaase Asu At Lixitkis Kaala*

13 Kuren la mina lox agagas levendoxoma atnemi ri lok mo levempanga ne Moroa i vara i. Mina lok tatao avukat luruptuvuk atnemi la mina lok li axap levendoxoma atnemi pana at lorooro avolo, no

minaba lok ka i at laaleng ne Iesu Karisito na ru asuvos.

14 \*Minang tonga res at ne Moroa, la nemen gat mi gutam lomlong ti mo lavavara xapmek miga ruuna i gano at levenaleng migak lok at larangtangu.

15 La levempanga minak lox i, minak lox i eburu mi lorooro axap atnemi nan manton tino. Atla ne Moroa neni ga ro xaka nemi, neni in manton tino.

16 \*I ngan Lovoang Kaala i vaase xeretna, "Mina lok ka loklok in manton tino mila nenia an manton tino."

17 \*La minaklen i do ne Temen nemi no vana at laxalibet, no nemi mi ngising tin, neni i viila mumu luruptuvuk at limixin la i viila mumu loklok atdi mi legesampoovo mun. Kuren la mina raba axap lorooro atnemi at na lavatbung menemen eburu mi loklok ngangao saparav i.

18 \*La nemi miklen luunun, ne Moroa ga un kaka amlong nemi min basinge lorooro etaba ga ravasu at lavalabat atnemi. La mo luunun ixo epovo xusu tara na lok kapmex i, ngan lisiliva xopla logol.

19 \*Ketla ne Moroa ga un ka nemi mi lada, ni luunun silok at ne Karisito kopmen taxakapmek teren la kopmen bok tibira at Lanasip at ne Moroa.

20 \*Avot ti luruntudum li at na lavatbung menemen, Moroa ga soxolik ka i xusu ti lok lugugu ren la neni ga ravasu at na levenaleng kavaxap kusu ti lok tooro nemi.

21 \*La at na mun langas neni ga lox i la nemi mira nunu at ne Moroa, no ga lox arooro amlong i at lanmet la ga raba box i mi laasen silok. Kuren la lununu atnemi la levendoxoma voovo atnemi i tu rinotno at ne Moroa.

22 \*La monga, mira rongga ka vam levelinga ruturun la kerepmo

\* 1:8: Jo 20:29; 2 Ko 5:7 \* 1:9: Ro 6:22 \* 1:10: Mt 13:16-17 \* 1:11: Sam 22; Ais 53; Lu 24:26-27  
 \* 1:12: Ep 3:10 \* 1:14: Ro 12:2; Ep 2:3; 4:17-18 \* 1:16: Mas 11:44-45; Mt 5:48 \* 1:17: Mt 6:9;  
 Ro 2:11; 2 Ti 4:14; Li 2:23 \* 1:18: 1 Ko 6:20 \* 1:19: Gu 20:28; Ib 9:12-14; 1 Pi 1:2 \* 1:20: Gu  
 2:23; Ep 1:4 \* 1:21: Jo 14:6; Ro 4:24; 5:1-2; 10:9 \* 1:22: Jo 13:34; Ro 12:10

lorooro atnemi ira dadat pam la labalamu ruturun i ravasu at lorooro atnemi ti luvutneton nimi. Kuren la mina ebalamu ela mi lorooro axap atnemi.

<sup>23</sup> \*Mila miga ruuna xaka livipisik amaxat la na lorooro maxat noxo xap ngan laradi at na lavatkangka, ketla naba nemen amisik. Na lorooro ga ravasu at levelinga at ne Moroa la na levelinga i rooro la naba nemen amisik.

<sup>24</sup> \*I ngan Lovoang Kaala i vaase xeretna,

“Limixin axap di noxo nemen abao ngan levempivilis. La lampeneves atnedi na xap ngan levempusuvus aaxa. Levempivilis naba mang, la levempusuvus naba subu su.

<sup>25</sup> Ketla levelinga at Leeme Silok, ne Moroa ik lox amisik la kopmen taxavaxap teren.” *Ais 40:6-8*

Na levelinga neni Lagale Lavavang nemi miga rongga xaka i.

## 2

<sup>1</sup> \*Kuren la mina lok pes laxaloklok kakapmek basinge nemi. La nemen bok ba mita xaxarang, koplama lili aage levelinga, la mina reven peves, koplama lox asi tara mi levelinga.

<sup>2</sup> \*Ketla minak lok ngan laxam-dak mumulum, no di vavara inin amisik levendan tus at loroonan. Do mina inin amisix i, minaba mukun at lununu atnemi la minaba lok kaka lorooro avolo.

<sup>3</sup> I ngan Lovoang Kaala i tong i xeretna,

“Nemi xa miga long terex i do lebelen tuntun at Leeme Silok i lox avukat.” *Sam 34:8*

### *Luuat Too*

<sup>4</sup> \*Mina vot parap Leeme Silok, neni Luuat Too no limixin diga lu xepe min do goxo epovo ri lok tugugu. Ketla ne Moroa ga soxolik

kaka i ngan luuat, luunun teren i silok aleng la i epovo ri lok tugugu.

<sup>5</sup> \*Nemi bok mira lok ngan pam larauat too rip kip gu, la ne Moroa xa i xip loogu laplavang minemi, kusu nemi minaba gugu ngan lavamaasa at ne Moroa. La minam taba i mi lev-entamtaba at loroonan mo ne Moroa naba siam kaka i xeneng at ne Iesu Karisito.

<sup>6</sup> \*I ngan Lovoang Kaala i tong asu levelinga at ne Moroa xeretna,

“A soxolik kaka luuat i ruuna luunun i silok aleng la anaba lok li i ngan luuat ti lemesuluk at lemenemen Saion la do nege na nunu ren, neni kopmen tinotno noxo ruuna ka lain-mangan.” *Ais 28:16*

<sup>7</sup> \*Mo luuat neni i silok at levendoxoma atnemi limixin mi nunu ren. Ketla tinedi dixo nunu ren, i lok ngan Lovoang Kaala i lok keretna,

“Mo luuat luvuttadi xipkip gu diga sok tixirixes kepe i, ga ravasu ngan Luuat Kis la lugugu ren i silok aleng.” *Sam 118:22*

<sup>8</sup> \*La loxot bok at Lovoang Kaala i vaase xeretna,

“Na Luuat Kis naba lok limixin kusu dina sak kikixin la naba lox asubu nedi.” *Ais 8:14*

Dik sak kikixin atla xopmen dina nunu at levelinga at ne Moroa. Anai i epovo mi lavavara at ne Moroa rinedi.

<sup>9</sup> \*Ketla nemi lavaanat soxolik ka. Nemi lavamaasa at Loorong Silok, la nemi lubang mixin melemelengan la nemi limixin at ne Moroa akmokso. Neni ga soxolik ka nemi xusu minaba lox asusu leven gugu nunuan teren. Neni ga ro xaka nemi boro xeneng at lamain bonot la uto xeneng at laxasep maraanu ren.

<sup>10</sup> \*Ketla avot at na, nemi goxo ngan limixin at ne Moroa, ketla amonga nemi mi lok ngan limixin

\* **1:23:** Jo 1:13; Ib 4:12    \* **1:24:** Je 1:10-11    \* **2:1:** Ep 4:22; Je 1:21    \* **2:2:** Mt 18:3; 1 Ko 3:2  
 \* **2:4:** Mt 21:42; Ais 28:16    \* **2:5:** Ep 2:21-22; Pas 19:6; Ais 61:6; Li 1:6; Ro 12:1    \* **2:6:** Ro 9:33; Ep 2:20  
 \* **2:7:** Mt 21:42    \* **2:8:** Ro 9:33    \* **2:9:** Ais 9:2; 40:20-21; 1 Pi 2:5; Ta 2:14; Gu 26:18; Ep 5:8  
 \* **2:10:** Ro 9:25

teren. I ngan bok gano nemi mi goxoklen lebelen tuntun at ne Moroa, ketla amonga, mira ruuna ka vam lebelen tuntun teren.

### *Lavasaxaruki At Ne Moroa*

11 \*Larapen tangas orong tarak. A sing nemi mi lodoxoma axap tarak. Nemi mi lok ngan mun limixin kadiong de at na lavatbung menemen. Kuren la mina ru asepsu basinge leveloklok kakapmek at labantuxu, atla neni na leveloklok i vesep eburu mi labaroonan atnemi.

12 \*La minap tuvuk avukat at lemeren nedi lavamolon. Mo do dina sok taba parang nemi mi toloklok kakapmek, nedi dinaba ven kibis ba leveloklok nunuan atnemi la dinaba emi asu mi ne Moroa at laaleng pot-teren.

13 \*Minang tonga res atnedi axap luvuttadi amgomgo, limixin di lok katling di, mila Leeme Silok i vara i xuren. Minang tonga res at loorong at lenep kangka atnemi, neni lamgomgo at limixin axap.

14 La minang tonga res bok atnedi luvuttadi amgomgo at levennep silok, loorong ik sak tiki nedi xusu dina lox asongot nedi dik lok laxakapmek la dina emi asu minedi dik lok luvukat.

15 \*Mila ne Moroa i vara i do minak lok leven gugu nunuan kusu minaba sep pepe levelinga gamasa at luvuttadi rangtangu.

16 \*Minap tuvuk avukat ngan limixin sepsepmus at ne Moroa. La nemen gat mita se bopbop pe laxakapmek atnemi mi leveloklok sepse at lemeren mun at limixin. Ketla minap tuvuk ngan lavaanat saxaruki at ne Moroa.

17 \*Mina lok ngangao bok at limixin axap, la mina balamu limixin nunu. La mina lok ngangao at ne Moroa la at loorong bok.

### *Lampoovo At Losongsongot At Ne Iesu*

18 \*Nemi lavasaxaruki. Minak lok mu asu levendoxoma at lubang amgomgo atnemi la mina lox asu rinotno loklok ngangao atnemi rinedi, kopmen do mina lok ngangao xusuk atnedi di lox asuusu lebelen tuntun tinemi, ketla tinedi bok do di tu mi loboat.

19 Moroa naba lox anarong nemi do dina lox asongot nemi mumu mun loklox avukat atnemi na mu asu lodoxoma ren.

20 \*Ketla mi noxo lok kaka loklox anarong do dina sep nemi xusu laxakapmek nemi miga lox i. Ketla do mina lok ka mun i at loxonaleng mina lok loklox avukat la dina lox asongot nemi xusu nen, Moroa naba lox anarong ba nemi do mina tu tuxuruxun at na levenaleng di lox asongot nemi.

21 \*La ne Moroa ga ro xaka nemi mumu i na langas at losongsongot, mila ne Karisito axa ga suma losongsongot tinemi la ga lok taba nemi mi na langas, kusu minaba mumu asu lenaim teren.

22 \*"Neni goxo lok bok tekakapmek, la teta goxo ronga asu bok tekaxarang ga ravasu at lungusno ren." *Ais 53:9*

23 \*At loxonaleng diga paase aksaksa rin, neni goxo vorang di mi teloklok bok kuren. La at laaleng neni ga lok kaka loklox asongot, neni goxo lok tepanga. Ketla neni ga lok li levendoxoma axap teren at ne Moroa neni Laradi Rongtonga Linga la na lugugu ren in mantan tino.

24 \*Ne Karisito axa neni ga xip leveng kakapmek atnedik keneng at labantuxu ren uto at laxaba kusu nedik tanaba sepmus basinge loklok kakapmek atnedik la ata rooro tik lok leveloklok ik mokso. La nemi mi lox avukat pam mumu mun laranin kooxing teren.

\* 2:11: Sam 39:12; Ga 5:17,24; Je 4:1 \* 2:12: Mt 5:16; Lu 19:44 \* 2:13: Ta 3:1 \* 2:15: 1 Pi 3:16  
 \* 2:16: Ga 5:13 \* 2:17: Ro 12:10; Ler 24:21; Mt 22:21 \* 2:18: Ep 6:5 \* 2:20: 1 Pi 3:14,17; 1 Pi 4:14 \* 2:21: Mt 16:24; Jo 13:15 \* 2:22: Jo 8:46 \* 2:23: Ais 53:7; 1 Pi 3:9 \* 2:24: Ib 9:28; Ro 6:2,11; Ais 53:5

25 \*Nemi miga lok ngan laxasipsip diga soronga. Ketla ananga, migaramlong pam kusu mina mumu asu Lamgomgo atnemi la neni Laradi Loklok Tatao bok at lorooro at loroonan atnemi.

### 3

#### *Lara Koenasun*

1 \*At na mun langas bok la nemi lavakin minang tonga res at levendoxoma at lavatlok atnemi, kusu do tentaba atnedi do dixo nunu at levelinga at ne Moroa, loklok mun atnemi naba lok nedi la dina nunu. La ixo epovo bok do minaba vaase axa toxolinga ri lok kun levendoxoma atnedi.

2 Dinaba ba gili mun lorooro atnedi mumu mun loklox avukat la loklok ngangao atnemi rinedi.

3 \*Nemen gat migutak lok kaka leveloklok tooro me maxamang kusu ti lok nemi mina milik maraanu, ngan langas mik lox i at levengkabinim at lempatlak atnemi, kopla levenpun mi vonga i la levesingsiga ming siga i.

4 Ketla lorooro atnemi nak milik maraanu la mina umsu mi loklox atnaasan i lok nunuan aleng. Neni mo loklok i silok aleng ti ne Moroa.

5 Naba lok ngan lavakin manmanton megano digak lok li levendoxoma atnedi at ne Moroa la diga sising amaraanu nedi mila diga mumu asu levendoxoma at lavatlok atnedi.

6 \*Ne Sera gak lok kerepmo. Neni gang tonga res at ne Abaram, la neni ga toro rin do leeme silok teren. Nemi miba lok ngan laxaalik teren do minak lok luvukat la mi noxok marat at tepempanga.

7 \*Kuren pam la nemi bok lavatlok, mina ekilen ela mi levempakpakes at lavakin atnemi la minaklen avukat box i do nedi dixo ruuna tololos solo la mina lok tooro nedi. Mina raba nedi mi loklok ngangao mila nemi buru axap minaba ruuna xaka

lorooro, ni laramtaba boro at ne Moroa. Mina mu asu i na levelinga xusu, kopmen tekarakat naba lok pe levesingising kantubu atnemi lara koenasun eburu mi ne Moroa.

#### *Losongsongot Mumu Leveloklox Avukat*

8 \*Ti lox axap na levelinga xeretna, nemi axap mina ruuna legesa doxoma eburu mi legesa sumsuma xeretna. Mina doma mumu nedi di ruuna levenmumuat. La mina ebalamu ela ngan nemi loxoeton la mina lox asusu lebelen tuntun tinedi la mina lox asi nemi.

9 Nemen gat miguta vorang laxapmek mi laxapmek kopla mina vorang lavapaase kapmek mi lavapaase kapmek bok. Ketla mina vorang i na leveloklok mi loklox anarong, atla loklox anarong neni lavanga ne Moroa ga xaape xusu neni naba raba nemi min at laaleng neni ga ro xaka nemi.

10 I ngan Lovoang Kaala i vaase i xeretna,

“Do nege i vara i xusu na ruuna lorooro nunuan, la i vara i xusu neni na ven levenaleng avukat, neni na ke xepe lavapaase kapmek, la na axav i at laxaxarang.

11 La neni na ke xepe laxakapmek la nak lok luvukat, la neni na lolos ti lok ka lenmila keneng axap at lorooro axap teren.

12 Leeme Silok i reven tatao limixin manmanton la ing tonga res at levesingising atnedi. Ketla ik sok tixirixes kepe nedi dik lok laxakapmek.”

*Sam*  
34:12-16

13 Nege naba lox asongot parang nemi do levendoxoma atnemi naplivi rik lok luvukat?

14 \*Ketla do mina lok kaka loklox asongot mumu loklox avukat mi lox i, minaba ruuna xaka bok leveloklox anarong. Kuren la nemen gat miguta marat at teta, kopla mina bulu.

\* 2:25: Ais 53:6; Isi 34:5-6; Mt 9:36; Jo 10:14 \* 3:1: Ta 2:5 \* 3:3: 1 Ti 2:9 \* 3:6: Lur 18:12  
\* 3:7: Ep 5:25 \* 3:8: Mt 5:44; 1 Ts 5:15; 1 Pi 2:23 \* 3:14: Ais 8:12-13; Mt 5:10; 1 Pi 2:20; 4:14

15 Ketla keneng at lorooro atnemi mina lok ngangao at ne Karisito, atla neni Leeme Silok. Mina gagas at levenaleng axap ti porang levesusue at limixin at levenaleng dina susue nemi mi levendoxoma lolos atnemi saparap ne Karisito.

16 \*Ketla mina vaase ridi mi lumulus la loklok ngangao, la lorooro atnemi nak lok nunuan. Do dina paase xapmek mumu lorooro avukat atnemi keneng at ne Karisito, dinaba mangan at levelinga kapmek nedi di paase i.

17 \*I lox avukat kusu mina xip kaka losongsongot at leveloklox avukat, do neni lavavara at ne Moroa xuren, la kopmen do at leveloklok kakapmek.

18 \*Karisito ga met gesara mene nga ri ru korop ti laxakapmek axap atnemi. Neni laradi manmanton tino ga met ti rukun levesongsongot ti limixin di lok laxakapmek, kusu ti lam kaka di uto saparap ne Moroa. Diga sev amet labantuxu ren, ketla Loroonan Kaala ga lox aroo xat amlong i.

19 La at lorooro xat at loroonan teren, neni ga vavang ti limixin, labaroonan atnedi gak lok at lox-okoxo.\*

20 \*Nedi labaroonan at na limixin digang tonga xepe ne Moroa at levenaleng neni ga ngangais atnaasan nedi at levenaleng ne Noa ga gugu lavatmon teren. Keneng teren ga lavanuan mun nedi diga roo su basinge laraan,

21 \*la ga lok ngan neni lampoovo at lesepe susu, ananga nemi bok mi roo su ren. Ni xopmen do rit gos kepe laxakapmek at labantuxu, ketla neni laxakaape mi lox i ri ne Moroa mi lodoxoma avukat. La neni na i lox aroo nemi mumu mun lorooro xat amlong at ne Iesu Karisito,

22 \*la neni gara urut pam uto vana at laxalibet, la amonga it kis saparap

lekngen tino at ne Moroa. Neni Lamgomgo at lubung angelo axap eburu mi luvuttadi loklok tatao la limixin lolos boro vana at laxalibet.

## 4

### *Lorooro Maxat*

1 \*Karisito ga suma losongsongot at labantuxu ren, kuren la nemi bok mina ru lolos ngan mo levendoxoma neni ga ruuna i. Mo do nege i ekip tangarang mi losongsongot at labantuxu ren mumu lununu ren saparap ne Karisito, i lox asuusu i do neni ixok lok bok ba xeneng at laxakapmek.

2 \*Kuren la mina ke axap lorooro atnemi at na lavatbung menemen kusu mina mu asu lodoxoma at ne Moroa, la kopmen lavavara kapmek mun at limixin at na lavatkangka.

3 \*Levenaleng mo gara xap pam migak lok laxaloklok kakapmek mo kerekngan luvuttadi at lamain di vavara nak lox i. I ngan loklok kakapmek at labantuxu, loklok kakapmek maxamang at lix-itkis epot, la levereven peves, liinin kadan lolos, lengkot mamangan, la laplavang ti laxampoovo vanga, ni laxapmek bok no i bilingot tinotno.

4 Limixin no dik lox amisik at na laxakapmek, di sangu rinotno at loxonaleng nemi mixo emu minedi rik lok mo leveloklok i lok kapmek. Kuren la di paase aksaksa mumu nemi.

5 \*Ketla nedi dinaba raba levelinga loklox axasep atnedi ri ne Moroa mumu laxakapmek diga lox i. Neni laradi i gagas kusu na viila limixin axap di rooro la nedi bok diga met pam.

6 \*Neni ba na lavasuun teren la ne Iesu ga vavang bok mi Lagale Lavavang ti limixin diga met pam, atla neni naba viila axap limixin mumu mo leveloklok diga lox i at lorooro atdi. Ketla Lagale Lavavang gat pas

\* 3:16: 1 Pi 2:12 \* 3:17: 1 Pi 2:20 \* 3:18: Ro 6:10; Ep 2:18 \* 3:19: Na lemenemen di so asen i do Edesa. \* 3:20: Lur 6-7 \* 3:21: Ib 10:22 \* 3:22: Mt 22:44; Ep 1:20-21 \* 4:1: Ro 6:2,7 \* 4:2: 1 Jo 2:16 \* 4:3: Ep 2:2-3 \* 4:5: Gu 10:42 \* 4:6: Ro 8:10; 1 Ko 5:5

tinédi xusu labaroonan atnedi naba roo la dinaba epovo ri rooro avolo ngan ne Moroa.

### *Laradi Loklok Tatao Avukat At Leventamtaba At Ne Moroa*

<sup>7</sup>\*Laxavaxap at levempanga axap, monga i auret. Kuren la levendoxoma atnemi na xasep nunuan la mina lok tatao avukat levempatpas atnemi, kusu miba epovo na lok levesingising.

<sup>8</sup>\*Mavana at levempanga axap, mina ebalamu ela nemi mi lorooro axap atnemi atla labalamu at limixin naba rupe laxangkakapmek solo.

<sup>9</sup>\*Mina lok maraose kaka lev-entaba vetpes uto xeneng at laraogu atnemi la nemen gat mita gagalinga.

<sup>10</sup>\*Nemi getgesara mi ruuna lugugu at loklok tatao levenasen tamtaba at ne Moroa. Kuren la mina gugu avukat mi nom leventamtaba axap no ne Moroa ga raba nemi min, ti lok tooro leventaba vetpes.

<sup>11</sup>\*I ngan nege do neni laradi vavang, neni na vavang akmokso mi levelinga at ne Moroa. La do nege i gugu taba, neni na gugu taba mi lolos ne Moroa im taba i min, kusu keneng mun at na leventamtaba axap, leemi asu nabat pas ti ne Moroa mumu mun ne Iesu Karisito. Leemi asu la lolos tin amisik la kopmen taxavaxap teren. Tuturun.

### *Losongsongot At Laradi I Mumu Ne Karisito*

<sup>12</sup>\*Larapen tangas orong tarak. Nemen gat miguta sangu at leveloklox asongot lolos ik lok tong pen nemi, la na ngan ta lavanga maxat petpes i vot parap nemi.

<sup>13</sup>\*Ketla mina sosoro atla nemi mi ru buru mi ne Karisito at losongsongot teren, kusu minaba umsu mi lomomo at laaleng lisisilok teren na ru asuvos.

<sup>14</sup>\*La do limixin di paase aksaksa rinimi mumu laasen at ne Karisito,

luvukat nabat pas tinemi. Lavasuun at nai keretna, mo loroongan i lox asuusu lisisixam, ni Loroongan at ne Moroa la ik lok keneng atnemi.

<sup>15</sup>La do teventaba atnemi na lok kaka loklox asongot, ixo lox avukat do dina lok ka i ngan luvuttadi sepsep tadi, koplaluvuttadi xipkip pilo xopla luvuttadi xapmek, koplal nemi mik lox angtang lorooro at leventaba vetpes.

<sup>16</sup>\*Ketla do mina lok ka loklox asongot mumu mun i do nemi luvuttadi mumu asu at ne Karisito, nemen gat nemi guta mangan at loklok di lox i rinimi. Ketla mina tong avukat ti ne Moroa atla nemi mip kip laasen at ne Karisito.

<sup>17</sup>\*Laaleng ira auret pam ti laaleng ete na ru kaxat, la ne Moroa naba viila mumu avot be loklok at limixin tinotno ren. Do na ru kaxat avot minedik, naba lok kapmek tinotno rinedi, dixo ronga res at Lagale Lavavang at ne Moroa.

<sup>18</sup>\*I ngan Lovoang Kaala i vaase i xeretna,

“I lolos aleng do luvuttadi manmanton dina roo su, ketla naba lok ba xereva rinedi luvuttadi xopmen dinaklen ne Moroa la dik lok laxakapmek?” *Ler 11:31*

<sup>19</sup>\*Kuren la nedi dik lok kaka losongsongot mila dik lok mu asu lavavara at ne Moroa, dina tu atmakun at leveloklok nunuan, la lununu atnedi na tu tuxuruxun at ne Moroa, Laradi Runtudum Li, la neni kopmen na domampe leveng kakaape ren.

## 5

### *Lubung Sipsip At Ne Moroa*

<sup>1</sup>\*Nenia lamgomgo at lotu ngan lubung amgomgo dik lok kantubu atnemi. Nenia aga ven levesongsongot ne Karisito gap kiv i, la nenia anaba ruuna ka lisisixam eburu minemi

\* **4:7:** Ro 13:11-12; 1 Ko 10:11; 1 Jo 2:18    \* **4:8:** 1 Pi 1:22; Je 5:20    \* **4:9:** Ib 13:2    \* **4:10:** Ro 12:6-8    \* **4:11:** 1 Ko 10:31    \* **4:12:** 1 Pi 1:6-7    \* **4:13:** Gu 5:41; Ro 8:17; 2 Ti 2:12; Je 1:2    \* **4:14:** Sam 89:50-51; 1 Pi 2:20    \* **4:16:** Gu 11:26; Pl 1:20    \* **4:17:** Jer 25:29; 2 Ts 1:8    \* **4:18:** Lu 23:31  
\* **4:19:** Sam 31:5    \* **5:1:** Ro 8:17

mo naba ru asuvos. La a sing nemi lubung amgomgo xeretna,

2 \*mina lok tatao avukat laxasipsip ne Moroa gara raba vam nemi min. La minak lok tatao nedi mi lavavara axap atnemi, ngan ne Moroa i vara i xuren. Nemen gat miguta lok lugugu atnemi mi lodoxoma rip kip unun teren, ketla mina lox i mi lodoxoma rinotno ri gugu.

3 \*Nemen gat miguta ru polo nedi dik lok maxopok at loklok tatao atnemi, ketla minap tuvuk ase nedi.

4 \*La do Lamgomgo Rinotno at Lubungsipsip na vot, minaba ruuna xaka luunun, ni lempatbungorong i ruuna lisisixam, la mo lisisixam teren noxo repes.

5 \*La nemi bok luvuraau minang tonga ka levelinga at limixin mukun la mina mumu asu i. La nemi axap mina lok kaka langsung loklok ngangao kusu na umsu kantubu atnemi. I ngan Lovoang Kaala i vaase xeretna,

“Moroa naba vaase asi luvuttadi di simi aurut nedi, ketla i lox asu letaba nabalamu ren tinedi dik lox asi di.” *Ler 3:34*

6 \*Kuren la mina lox asi nemi maxopok at lukngen lolos at ne Moroa, kusu neni naba xip aurut nemi at laaleng ni ga lok katling i.

7 \*Mina ke raba i mi levenanbulu atnemi, atla neni im doma loxokok tinemi.

8 \*Mina lok tatao avukat lavatpas atnemi la mina reven avukat, atla laradi munepen minemi neni ne Satan im booro saasaa ngan lavatlaion mukmusak, la i puse ri tuvuttadi xusu neni na lok kapmek di. 9 \*Ketla mina tu atmatkun at lununu atnemi la mina tu munepen min, atla mikleklen i do luvuttadi axap at na lavatbung menemen di nunu, dip kip na legesemet songsongot mun.

10 \*Noxo lox abao la levesongsongot atnemi naba xap, la ne Moroa

i umsu mi letaba nabalamu la ni ga ro xaka nemi kusu mina ruuna ka lisisixam avolo ren keneng at ne Karisito. Neni naba lox axatu nemi, la neni naba lox alolos nemi la na lok li nemi ro at lixitkis avukat.

11 La ateren kusuk mun lolos amisik la kopmen taxavaxap teren. Tuturun.

### *Levelinga Loklox Axap*

12 Sailas ga lok tooro ia xusu ti malagan na lovoang mutmut tinemi, la neni netak at laasen at ne Karisito. A vara i xusu ana lox alolos nemi mi levelinga at na lovoang, anai neni letaba nabalamu rinotno at ne Moroa. Kuren la mina tu atmatkun keneng teren.

13 \*Luvutneton nemi at lotu keneng at lemenemen Babilon, nedi limixin soksoxolik ka, di lox aonon lavapaase momo atnedi rinemi, la ne nuruk bok ne Mak i lox aonon lavapaase momo rinemi.

14 \*Mina eseega rangarang nemi mi lenetnes ti lok katling lixitkis etangas atnemi.

Lenmila nak lok eburu axap minemi limixin at ne Karisito. I ruturun.

\* 5:2: Jo 21:15-17; Gu 20:28; Pm 1:14; Ta 1:11 \* 5:3: 2 Ko 1:24; Pl 3:17; Ta 2:7 \* 5:4: Ib 13:20; 1 Ko 9:25 \* 5:5: Ep 5:21; Je 4:6 \* 5:6: Mt 23:12; Je 4:10 \* 5:7: Sam 55:22; Mt 6:25-30 \* 5:8: 1 Ts 5:6 \* 5:9: Ep 6:11-13; Je 4:7 \* 5:10: 1 Ts 2:12; 1 Pi 1:6 \* 5:13: 2 Ti 4:11 \* 5:14: 1 Ko 16:20



## 2 Pita Lovoang Sepsev Agepura At Ne Pita Levelinga Loklox Axasep Lamaares 66 A.D.

Anai ni lovoang sepsev agepura at ne Pita ga malagan i ri limixin nunu mo diga nemen tangtagap at lengkot axap. La nai lovoang ni lempapaase aronga rinedi atla buaang nedi luvuttadi loklox ase xaxarang mo digat pas tangtagap. Na luvuttadi loklox ase xaxarang diga tong i do, leven-taangas kapmek ni i lox avukat la diga lok dola ne Iesu noxomlong bok ba. Kuren la ne Pita ga vaase axasep nedi mi lakleklen tuturun mumu ne Iesu xusu keneng at ne Iesu nedi diba tu atmatkun. Lavasuun at lomlong at ne Iesu, kopmen noxomlong soso ni i lok keretna. Moroa i vara i xusu limixin axap diba leeng avot mun be la melemu neni namlong ba.

### **Lengkot silok keneng at na lovoang**

1:1-2 Lempapaase momo.

1:3-15 Moroa ga soxolik ka dik kusu ti ruuna ka mo lorooro ren.

1:16-21 Levempapaase at lavaeme vapaase ali do ne Iesu ni i ruturun.

2:1-22 Lavapaase aronga mumu luvuttadi loklox ase xaxarang.

3:1-18 Lempapaase mumu lomlong at ne Iesu.

### *Lavapaase Axasep*

<sup>1</sup> Nenia ne Simon Pita, lasaxaruki la lun pavang at ne Iesu Karisito.

Nia a malagan i na levelinga rinemi limixin miga ruuna xaka lununu xeneng at loklok manmanton at ne Moroa atnedik, neni ne Iesu Karisito, Laradi Loklox Arooro. La mo lununu atnimi i nunuan ngan lununu atnama.

<sup>2</sup>\* La mumu mun lakleklen atnemi xeneng at ne Moroa la ne Iesu Leeme Silok atnedik, a sing do letaba nabalamu eburu mi lenmila na suu silok keneng at lorooro atnemi.

### *Lorotoro La Losoksoxolik At Ne Moroa*

<sup>3</sup>\* Lolos at ne Moroa gara raba vam nedik mi levempanga axap nedik dik pakes tin ti lok kaka lorooro avolo la ti ruuna ka luruptuvuk nunuan mumu lakleklen atnedik ti ne Iesu Karisito. Ni ga ro xaka nedik kusu atak lok eburu min keneng at lisisixam la luvukat teren.

<sup>4</sup> Keneng at na lempanga, neni gara raba vam nedik mi leventamtaba i nunuan aleng. Neni ga xaape min tinedik, kusu na leventamtaba naba beng pe nemi basinge levendoxoma xapmek at na lavatkangka la lepneves kapmek, la kusu na leventamtaba naba lam kaka nemi la minaba ruuna xaka luruptuvuk nunuan la minan manton tino xerekngan neni.

<sup>5</sup> Neni lavasuun ba ren la mina lolos tinotno xusu minak lox epasum luvukat ukeneng ti lununu atnemi. La minak lok epasum lakleklen ukeneng at luvukat atnemi.

<sup>6</sup>\* La minak lox epasum lavatpas adoxoma at luruptuvuk atnemi ukeneng at lakleklen atnemi. La minak lox epasum lurutu lolos ukeneng at lavatpas adoxoma atnemi. La minak lok epasum loklok manmanton ukeneng at lurutu lolos atnemi.

<sup>7</sup> La minak lox epasum luvukat ti luvutneton nemi ukeneng ti loklok manmanton. La minak lox epasum labalamu ukeneng at luvukat ti luvutneton nemi.

<sup>8</sup> Do mina ruuna xaka i na levempanga la dina umsu xeneng at lorooro atnemi, dinaba lok nemi la mina lox asuusu leveloklok nunuan mumu lakleklen atnemi keneng at Leeme Silok atnedik ne Iesu Karisito.

<sup>9</sup> Ketla nege do ixo ruuna i na leveloklok nunuan, neni i lok ngan laxatli main no ixo epovo xusu neni

na reven la ira domampe nga i do Moroa gara gos adadat pam i basinge laxakapmek teren megano.

<sup>10</sup> Kuren la luvutnetak mi luvur-inuk, mina lolos kusu mina doma amuat lorotoro la losoksoxolik at ne Moroa rinemi. Do mina lox i na, kopmen tinotno mi noxo subu basinge lununu atnemi.

<sup>11</sup> Do mina mu asu i na langas, lumusmaragu naba rem suang tinotno xusu mina vubeles ukeneng at Linintoo ik lox amisik. Neni Linintoo at Laradi Loklox Arooro atnedik, Leeme Silok ne Iesu Karisito.

<sup>12</sup> \*Kuren la nenia anabak lox adoxoma amisik nemi ri na langas, keke i do miraklen pam i la mira tu atmatkun keneng at luruturun miga ruuna xaka i.

<sup>13</sup> \*Nia a lok do, ik mokso mun tia xusu anak lox axatu levendoxoma atnemi mi na levempanga at na levenaleng nenia move a rooro.

<sup>14</sup> \*Atla aklen i do, noxo lox abao la ana on basinge labantuxu at na lavatbung menemen, ngan levelinga at Leeme Silok atdik ne Iesu Karisito ga tong taba ia min.

<sup>15</sup> Anaba lolos tinotno xusu ana vuse xaka tangas ti lok nemi xusu minabam doma aklen ti na levempanga at levenaleng melemu at lanmet tarak.

### *Nema Maga Reven Lisisixam At Ne Moroa*

<sup>16</sup> \*Nema ma goxo mumu asu mun leventetere gamasa boro at levendoxoma at limixin at levenaleng maga tong asu Lagale Lavavang tinimi mumu lolos la lovotpot at Leeme Silok atnedik ne Iesu Karisito. Ketla nema maga ven tinotno lisisilok teren mi levengkatli atnema.

<sup>17</sup> At loxonaleng ne Moroa ne Temen ga raba i mi lasinorong la lisisixam, nema mo magak lok, la maga rongga laxaka tadi ga laa boro at lisisixam silok ga vaase xeretna, "Neni na ne Nuruk, a balamu i la a momo min!" *Mt 17:5*

<sup>18</sup> La nema xa maga rongga mo laxaka tadi ga ravasu boro vana at laxalibet at loxonaleng nema magak lok eburu min to vana at lakaana xaala.

<sup>19</sup> La nema ma nunu rinotno at levelinga at lavaeme vapaase ali diga paase i. I lox avukat mina rongga ka avukat na levelinga, atla neni naba lok ngan lababao i soosoo at laxanimin la ira se at labarakoxot, la naba lok ngan lavatpention i soosoo ro xeneng at lorooro atnemi.

<sup>20</sup> La pana axap at levempanga axap, minakleklen box i do ixo epovo rinotno xusu tara naba lox asuusu lavasuun at levempapaase ali no xeneng at Lovoang Kaala mi lodoxoma axa ren atla,

<sup>21</sup> \*kopmen tepempapaase ali ga ravasu mun at lodoxoma mene nga at taradi at na lavatangka. Ketla lavaeme vapaase ali, diga vonon mumu mene nga Loroonan Kaala at levenaleng diga paase asu levelinga ga laala boro at ne Moroa.

## 2

### *Leveloklox Ase Xaxarang*

<sup>1</sup> \*Luvuttadi vapaase ali xaxarang diga ravasu gano xeneng at limixin me Israel. La lavaeme loklox ase xaxarang bok, dinaba ravasu xa maxeneng atnemi. La dinaba lox abeles nemnem levenanasa xaxarang kusu ti lox asubu lununu atnemi. Dinaba sok tixirixes Leeme Silok mo ga un kaka amlong nedi. Kuren la nedi xa dinaba ekip tangarang soso mi leeteke.

<sup>2</sup> La buaang atnemi minaba mu asu leveloklox ase xaxarang atdi, la laxakapmek atnedi maxamang at lixitkis epot. Kuren la mumu mun mo leveloklok atnedi, limixin maxamang at lotu dinaba vaase kapmek ti langas at luruturun.

<sup>3</sup> \*La loklok ti belegaa bok at na lavaeme loklox ase xaxarang naba silok la dinaba lok ka lempilas atnemi

\* **1:12:** Ju 1:5    \* **1:13:** 2 Pi 3:1    \* **1:14:** 2 Ko 5:1; Jo 21:18-19    \* **1:16:** Mt 17:1-5    \* **1:21:** 2 Ti 3:16; 1 Pi 1:11    \* **2:1:** Mt 24:11; Ju 1:4    \* **2:3:** Ro 16:18; 1 Ts 2:5

mi leventetere xaxarang diga dox-oma xaka i. La buaang laxanaleng, Laradi Rongtonga Linga ira gagas pam kusu na lok li lumumuat atdi la naba sele utut kepe nedi.

### *Moroa Naba Vorang Laxakapmek At Limixin*

<sup>4</sup>\*Kerepmo ne Moroa goxo ke xepe lubungangelo diga lok laxakapmek, ketla neni ga lu arup midi uto at lemenemen songsongot. Dik lok keneng at loogu xokoxo at lamain, la dinaba nemen go se at laaleng ete.

<sup>5</sup>\*La kerepmo bok ne Moroa goxo ke atnaasan bok lavatbung menezemen gano. Neni ga lox asu laraan ti limixin di goxo mu asu lodoxoma ren. La neni ga lox aroo asu xusuk mun ne Noa, neni laradi ga vavang mumu loklok manmanton, la eburu bok mi lavanuti leventaba luvuttadi.

<sup>6</sup>\*I lok ngan bok pam ne Moroa ga sele utut bok lumenemen silok to Sodom la Gomora mi laxao. La neni ga lox i na ngan ni lampoovo ri lavanga salai naba vot atnedi dixo mumu asu lodoxoma ren.

<sup>7</sup>\*Neni ga lox aroo su ne Lot laradi manmanton. Neni laradi gak bulu aleng mumu lorooro bilinga at limixin to Sodom la Gomora di goxo mumu asu levelinga at ne Moroa.

<sup>8</sup>Mo laradi avukat gak lok eburu minedi, at laxanaleng axap. La neni gang songot mi lanbulu at levelaleng neni ga reven i la gang tonga leveloklok kakapmek atnedi.

<sup>9</sup>\*Kuren la Leeme Silok ne Moroa i epovo ri lox asepsu limixin avukat basinge levesongsongot. La i epovo bok kusu na lok li limixin tongtonga xepe ro xeneng at loxokoxo la na lox asongot nedi se at laaleng ete.

<sup>10</sup>\*Naba lok tinotno xuren tinedi di mumu asu levendoxoma xapmek at labantuxu la ding tonga xepe levelinga at ne Moroa.

### *Loklok At Lavaeme Loklox Ase Xaxarang*

La nedi na lavaeme loklox ase xaxarang, di abelemes tinotno la dik lox asilok di. Dixok lox asu loklok ngangao atnedi ri lagale limixin di nemen to vana at laxalibet, ketla di paase xapmek mumu di.

<sup>11</sup>\*Ketla lubung angelo di ru-una lolos silok mavana atnedi na lavaeme loklox ase xaxarang, dixo babala raba na lavaeme loklox ase xaxarang at lemeren Leeme Silok.

<sup>12</sup>\*Ketla anaa limixin kaxarang, di tu eburu xusu ti paase xapmek mumu limixin keneng at levempanga nedi dixokleklen i. La dip tuvuk baulang ngan levempanga aaxa mi lavanuet kangkedek atnedi. Lugugu mun atnedi keretna, diga visik mun di xusu dinabak lox alis kaka di la dinap sev amet nedi. La dinaba seeve ngan laxampanga aaxa mi lavanuet kangkedek atnedi.

<sup>13</sup>\*La ne Moroa naba vorang nedi mi losongsongot mumu levesongsongot nedi diga raba limixin min. La dik lox amomo nedi xeretna, dik lok levempanga xakapmek at laxasep at laaleng kangking kusu tik lox epovo lavavara xapmek at labantuxu atnedi. La loklok atdi ik token kantubu atnemi la di mumu asu loklok kakapmek at levenaleng di anan eburu minemi.

<sup>14</sup>Di vavara xusuk mene nga i xusu dinak lok mu lavakin dik lok lengkot kapmek. La lavavara atnedi rik lok leveloklok kakapmek, kopmen na vaxap. La di sasat kaka limixin, lununu atdi xopmen na lolos, kusu dina lok laxakapmek. La dik lok arala levempeve atnedi mi loklok ti belegao. Kuren la nedi dik lok maxopok at lasaxaek ne Moroa naba raba di min!

<sup>15</sup>\*Kerepmo diga on basinge langas mokmokso la dirat pas soogong gamasa nga. Dira mumu asu nga langas no ne Balam ne nitna ne Beo

\* 2:4: Ju 1:6 \* 2:5: Lur 6-8; 8:18; 2 Pi 3:6 \* 2:6: Lur 19:24; Ju 1:7 \* 2:7: Lur 19:1-16 \* 2:9: 1 Ko 10:13; Ju 1:6 \* 2:10: Ju 1:7-8,16 \* 2:11: Ju 1:9 \* 2:12: Ju 1:10 \* 2:13: Ju 1:12 \* 2:15: Kex 22:7; Ju 1:11; Li 2:14

ga mumu i. Neni ga vavara solo i xusu neni nak lok laxakapmek la nabak lok kaka levempilas.

16 \*Ketla ne Moroa ga musax i mumu laxapmek teren. Kuren la lodongki goxo epovo ri paase, ketla ga ba gili laxaka ren ngan laradi la ga vaase rin kusu na xav i at loklok tangtangu.

17 \*Nedi na limixin di lok ngan larasa mes, la di lok ngan bok lengkon takabu, lamanman takabu it mas kepe i. Ne Moroa gara lok li agagas pam loxot tidi ro xeneng tinotno at lamain bonot.

18 \*Dim simi aurut nedi mi levendoxoma rangtangu la levelinga gamasa. La dik lok lengkot mangan kusu dinang kan kaka nedi dik lok do dinak sixiro basinge limixin di mumu asu langas kapmek.

19 \*Di tong taba limixin do dinaba sepmus basinge Laulis Linga. Ketla nedi xa, di nemen at loxokoxo at laxakapmek mila limixin kerepmo di nemen ngan lavasaxaruki maxopok at laxapmek salai imgomgo ridi.

20 \*Amo dola limixin digara sixiro vam at laxakapmek at lavatbung menemen mumu lakleklen atnedi xeneng at Leeme Silok atnedik, la Laradi Loklox Arooro ne Iesu Karisito, la melemu, nedi diramlong mu manga loklok megano. Nedi na limixin dik lok keretna, dik lok tinotno xeneng at loxot kapmek aleng la i lok kapmek tinotno ri no lorooro xapmek avot nedi digak lok teren.

21 \*Gitaba lox avukat tinotno rinedi xusu di gitoxoklen langas at lorooro nunuan. La i lok kapmek tinotno mila di garaklen pam i la melemu diga repukus basinge manga mo levelinga melemelengan ne Moroa ga raba nedi min.

22 La lavanga nedi dik lox i, i lox asoorun leventetere avolo, i lok keretna,

“Laman imlomlong kusu na anan laxan biromto ren.” *Ler 26:11*  
La i lok bok keretna,

“Lobo do ira susu avukat pam, irat pas bok la ira soe i ro xeneng at lapke.”

### 3

#### *Lavapaase Ali At Lovotpot At Leeme Silok*

1 \*Larapen tangas orong tarak. Neni na lovoang sepsev agepura nenia a malagan i rinemi. La keneng atdu buru na luvoang, aga malagan levelinga xusu ti lox aus levendoxoma atnemi la ti lox adoxoma manga nemi mi levelinga i nunuan.

2 \*A vara i xusu anak lox adoxoma nemi mi levelinga megano at luvuttadi vapaase ali at ne Moroa la levelinga at Leeme Silok atnedik la Laradi Loklox Arooro. La ni na levelinga, luvuttadi vavang diga paase nemi min.

3 \*Avot be, minaklen avukar i do, at levenaleng kavaxap teventaba tuvuttadi rongtonga xepe dinaba rupot, la dinaba mumu asu mun levendoxoma xapmek atdi xa. La nedi na luvuttadi, dinaba paase aksaksa rinemi.

4 \*La dinaba susue sese xeretna, “Neni ga tong li i rinemi do neni nabamlong, do? Ua nga i no? Luvuttemen nema no digara met axap pam, ketla levempanga move ik lok at lengkot atdi, ga ru kaxat ka i at luruntudum li at lavatbung menemen!”

5 \*Nedi na dinaba doxoma abulubun i do ganoxa ne Moroa ga rudum li laxalibet mi lavatkangka. Moroa ga tong levelinga mun la laxalibet ga vot la laxangka ga ravasu mun at ladan.

6 \*La neni vam na ladan, neni ga vee danut la ga sele utut lavatbung menemen gano.

\* 2:16: Kex 22:28-35 \* 2:17: Ju 1:12-13 \* 2:18: Ju 1:16 \* 2:19: Jo 8:34 \* 2:20: Mt 12:45  
\* 2:21: Lu 12:47-48 \* 3:1: 2 Pi 1:13 \* 3:2: Ju 1:17 \* 3:3: 1 Ti 4:1; Ju 1:18 \* 3:4: Ais 5:19; Isi 12:22; Mt 24:48 \* 3:5: Lur 1:6-9 \* 3:6: Lur 7:11-21; 2 Pi 2:5

7 Ketla, laxalibet eburu mi lavatkangka move duk lok mumu asu levelinga at ne Moroa, la duk lox agagas kusu laxao naba sele utut nedu. La nedu dunabak lok se ap mo laaleng limixin ua dixo mumu asu ne Moroa dinaba ru at lavapaase la ne Moroa naba sele utut nedi.

8 \*Ketla larapen tangas orong tarak, nemen mi guta domampe lara lavanga keretna. Leeme Silok kopmen na ven leges aleng, la legesa abin sangaun kobot (1000) maares do nedu du ruuna levenampoovo vetpes. Kopmen, at levereven teren keretna, nedu na, du epovo mun.

9\*Leeme Silok kopmen nak lok sila rik lok levempanga neni gara tong li vam i xuren, na ngan tepentaba go dim doma i xuren. Ketla neni ik lox atnaasan nemi, mila neni i xopara i xusu teta na seeve. Neni i vara i xusu limixin axap dina leeng basinge laxakapmek atnedi.

10 \*Ketla laaleng at Leeme Silok naba vot ngan laradi xipkip pilo. Ap mo laaleng, laxalibet naba sonao eburu mi leretepaavat lolos, la levempanga axap to vana at lamavangkap naba aan la na lok kapmek axap. La lavatkangka eburu mi levempanga dik lok keneng teren naba sonao axap at laxao.

11 Kuren la nemi minaba lok ngan limixin sala rinotno, do minaklen i do na lavatbung menemen naba rem utut axap kerepmo? Lorooro axa atnemi na ruturun la kopmen taxapmek noxok lok teren.

12 \*Ap mo levenaleng mina ngangais mi lomomo ti laaleng at ne Moroa, mina lox alolos mo laaleng kusu na vot soso mun. Ap mo laaleng laxalibet naba aan, la na rem utut, la levempanga axap naba releus at lipli.

13 \*Ketla nedik ata ngangais mi lomomo ri lempanga ne Moroa ga tong li i rinedik. Neni laxalibet maxat

la lavatkangka maxat, la lorooro nunuan la loklok manmanton nabak lok go.

### *Levempapaase Avit*

14 Kuren la, larapen tangas orong tarak, at na levenaleng mi ngangais mi lomomo ri mo laaleng, a vara i do, mina tu atmatkun kusu noxopmen toxot kakapmek koplak toxot ik token nak lok at lorooro atnemi. La minak lok eburu mi ne Moroa keneng at lenmila ren.

15 \*Mina doxoma avukat do Leeme Silok atnedik i ngangais mi lumulus, kusu limixin dina roo su. I ngan pam neton orong atnedik ne Pol ga malagan tinemi mi lakleklen, ne Moroa ga raba i min.

16 Neni i paase amisik keneng at lempoang teren mumu na levempanga. Leventaba levempanga lolos mo ik lok keneng at lempoang teren la i lolos kusu ata xasep teren. La limixin dixo tu atmatkun at lununu atnedi, di ba gili xapmek lempasuun ap mo levelinga ren, la di ba gili xapmek bok levelinga xeneng at Lenavolo. Kuren la mumu mun mo langas dik lox i, dinaba seeve.

17 \*Larapen tangas orong tarak, miraklen pam i do lavaeme loklox ase xaxarang mo naba vot. Kuren la mina lok tatao avukat nemi, kusu mi noxo mu asu laxakapmek at limixin dixo mumu asu levelinga at ne Moroa la mina subu bilong basinge lengkot avukat nemi mi tu ren.

18 \*Ketla minak lox epasum i xusu mina suusu silok keneng at letaba nabalamu la lakleklen at Leeme Silok atnedik la Laradi Loklox Arooro ne Iesu Karisito. La leemi asu xusuk tin, ningina la amisik! I ruturun.

\* 3:8: Sam 90:4 \* 3:9: Abk 2:3; 1 Ti 2:4 \* 3:10: 1 Ts 5:2; Mt 24:29,35 \* 3:12: Ais 34:4 \* 3:13: Ais 65:17; 66:22; Li 21:1,27 \* 3:15: Ro 2:4; 2 Pi 3:9 \* 3:17: Mk 13:5,33; 1 Ko 10:12 \* 3:18: Ju 1:25

# 1 Jon

## Lovoang Avot At Ne Jon

### Levelinga Loklox

### Axasep

### Levenmaares 90–95 A.D.

Jon neni lun pinivu at ne Iesu. I se neni gak sokso neni ga nemen to Epe-sas. Neni ga malagan i na lovoang tinedi limixin nunu diga nemen to Asia, mumu legepu vanga. Lara avot i lok keretna: neni ga malagan i na xusu ti lox asuvos luruturun mumu lorooro ruturun. Ni ga lok keretna, do “Ata ebalamu mila ne Moroa ni lavasuun at labalamu.” Lara mumu i lok keretna: lentaba luvuttadi ba-bala diga vot la diga xarang taba limixin nunu mi levelinga xeretna, “Labantuxu atdik, neni lavanga ua i lok kapmek. Neni loxot tinotno at laxakapmek. Kuren la ne Iesu goxo vot mi labantuxu. Neni ga vot la neni ga milik ngan laradi ketla neni goxo ruuna labantuxu.”

Na levelinga limixin babala diga tong i la di goxopara limixin dina ruuna loklok nunuan la dina lox asu-usu labalamu. La diga doma i do ne Iesu xopmen lamdak tuturun at ne Moroa. Kuren la ne Jon ga malagan i na lovoang kusu ti lok kepe i mo laxaxarang atdi.

### Lengkot silok keneng at na lovoang

1:1-4 Lavasuun tinotno at na lovoang.

1:5-2:17 Langas at laxasep mi langas at lamain nedu xopmen duna epovo.

2:18-29 Jon ga vaase aronga nedi mumu limixin munepen.

3:1-4:6 Nege nedi limixin at ne Moroa la nege nedi limixin at ne Satan.

4:7-5:5 Ik mokso do limixin nunu dina ebalamu ela.

5:6-21 Lempapaase mumu lavan-tun lempanga i paase katling ne Iesu.

### Lavapaase Im Tabu Lorooro

<sup>1</sup>\*Nema lavaun pavang ma malagan li na levelinga mumu mo laradi ga rooro avot ti luruntudum li at na lavatbung menemen. Nema maga ronga levelinga ren la maga ven i mi levengkatli atnema. Maga reven kisip lugugu ren la maga long tu ren. Neni Lenavolo im taba lorooro la ma vavang min tinimi.

<sup>2</sup>\*Mo laradi im taba lorooro ga vor asuvos, nema maga reven i la ma tong asu i rinimi. La ma vavang bok min tinimi, neni Luntoo Avolo, la neni gat kis esogo eburu mi ne Temen dik la melemu ga vor asuvos tinama.

<sup>3</sup>Lempanga axap mo laradi ga lox i, maga ven pam i, la maga ronga vam levelinga ren. Ma vavang bok min tinemi, kusu nemi minat kis esogo eburu minema kerekngan nema mat kis esogo mi ne Temen dik la mi ne Nitna bok ne Iesu Karisito.

<sup>4</sup>\*Nema ma malagan na levelinga nunuan tinimi kusu lomomo atdik naba umsu aleng.

### Lavatpas Atdik Keneng At Laxasep

<sup>5</sup>\*Na levelinga nema mara ronga vam i boro at ne Nitna la ma vavang min tinemi keretna, Moroa neni Laxasep la kopmen lamain nak lok teren.

<sup>6</sup>\*La mo do tara atdik na lok do it kis esogo mi ne Moroa, ketla lamain i umsu keneng at lorooro ren, neni laradi xaxarang la lorooro ren kopmen nak mokso la kopmen na sixit emu mi levelinga ruturun.

<sup>7</sup>\*Ketla mo do nedik ta nemen at laxasep, kerekngan ne Moroa i nemen at laxasep, nedik atat kis esogo eburu. La lada at ne Iesu, nitna ne Moroa i lox adadat nedik basinge levengkakapmek axap.

\* 1:1: Jo 1:1-2,4; 1 Jo 2:13-14 \* 1:2: Jo 1:14 \* 1:4: Jo 16:24 \* 1:5: 1 Ti 6:16; Je 1:17 \* 1:6: 1 Jo 2:4 \* 1:7: Jo 3:21; Ais 2:5; Ib 9:14; Li 1:5; 7:14 \* 1:8: Sam 32:5; Ler 28:13

<sup>8</sup> \*Dola tara na lok keretna, “Kopmen taxapmek tarak,” neni i xarang axa i, la levelinga ruturun kopmen nak lok teren.

<sup>9</sup> Ketla mo do nedik ta soxomus asu laxakapmek atnedik ti ne Moroa, ni naba doxoma xepe i la ni naba lox adadat nedik basinge leveloklok kapmek axap atdik, mila neni Laradi Ruturun la Laradi Manmanton.

<sup>10</sup> Dola tara na lok keretna, “Nenia a goxo lok taxapmek,” neni mo laradi i lox asuusu i do ne Moroa i ngan leeme xaxarang, mila ne Moroa ga tong i do limixin axap di lok laxakapmek. La do mo laradi i paase kerepmo, levelinga at ne Moroa kopmen na nemen keneng teren.

## 2

### *Iesu Neni Laradi Loklox Arooro Atdik*

<sup>1</sup> \*Luvutnuruk orong. Nia a malagan na levelinga rinemi kusu mi noxo lok taxapmek. Ketla do tara na lok laxakapmek, ne Iesu Karisito neni Laradi Manmanton naba lok tooro i. Iesu naba sing saparap ne Moroa ne Temen dik, kusu ne Moroa naba doxoma xepe mo laxakapmek ap mo laradi.

<sup>2</sup> \*Iesu neni laxaavuk tidik la ni ga lok langas kusu ne Moroa na doxoma xepe laxakapmek atdik. La ni noxo doxoma xepe laxakapmek atnedik kusuk mun. Ketla neni naba doxoma xepe bok laxakapmek at limixin axap at na lavatbung menemen.

<sup>3</sup> Dola nedik ta mu asu levelinga at ne Moroa, i ngan nedik taklen tinotno i do nedik limixin teren.

<sup>4</sup> \*Mo do tara na lok dola neni at ne Moroa, ketla neni kopmen na mu asu levelinga ren, neni laradi xaxarang, la levelinga ruturun at ne Moroa xopmen nak lok keneng at lorooro ren.

<sup>5</sup> \*Ketla mo do tara na mu asu levelinga at ne Moroa, i lox asuusu i do labalamu at ne Moroa ik lox

ampana keneng at lorooro ren. Neni na langas nedik ataba ven asuusu ba i do nedik dit kis esogo mi ne Moroa.

<sup>6</sup> Do taradi na doma i do lorooro ren ik lok keneng at ne Moroa, loklok teren na lok ngan tinotno ne Iesu Karisito.

### *Lereterere Maxat*

<sup>7</sup> \*Larapen tangas orong tarak. Na levelinga a malagan li vam i, kopmen lereterere maxat. Levelinga ganoxa min, la miga ruuna ka i at lurutu kaxat at lununu atnimi saparap ne Iesu Karisito, la mo levelinga migara ronga vam i ni levelinga me migomgo.

<sup>8</sup> \*Ketla nia ana malagan li lereterere maxat, ne Iesu ga lox asuusu i at lorooro ren la ik lok bok keneng at lorooro atnimi. Do tara na mu asu na levelinga, i lox asuusu i do lamain ira xap la laxasep i vubeles pam at lorooro ren.

<sup>9</sup> \*Do tara na tong i do neni i nemen at laxasep, ketla neni i belengatngas ti neton, ni move i nemen keneng at lamain.

<sup>10</sup> \*Do tara na balamu neton, neni i nemen keneng at laxasep la kopmen taxapmek nabak lok teren kusu na lox asak kikixin i.

<sup>11</sup> \*Ketla do tara na belengatngas ti neton, neni i nemen keneng at lamain. La lavatpas teren at na lorooro xopok ik lok bok at lamain kerekngan laradi luxatli ren i main, la it pas tangtagap gamasa mila laxakapmek ik lok pe luxatli ren.

<sup>12</sup> \*Nenia a malagan na lovoang tinemi luvutnuruk orong. Lavasuun teren keretna, Moroa ira doxoma xepe vam laxakapmek atnimi maxeneng at laasen at ne Iesu Karisito.

<sup>13</sup> \*Nenia a malagan na lovoang tinemi limixin mukun. Lavasuun teren keretna, nemi miklen ne Iesu Karisito mo gak lok ganoxa at lereot. Nenia a malagan na lovoang tinemi

\* **2:1:** Ib 7:25; 9:24 \* **2:2:** Jo 1:29; 11:52; Kl 1:20; 1 Jo 4:10,14 \* **2:4:** 1 Jo 1:6,8 \* **2:5:** Jo 13:15; 14:21,23; 1 Jo 4:12,17; 5:3 \* **2:7:** 2 Jo 1:5-6; 1 Jo 2:24; 3:11 \* **2:8:** Jo 13:34; Ro 13:12; Jo 1:9 \* **2:9:** 1 Jo 3:10,15; 4:20 \* **2:10:** Jo 11:9; Ro 14:13 \* **2:11:** Jo 11:10; 12:35 \* **2:12:** 1 Ko 6:11 \* **2:13:** 1 Jo 1:1

limixin maxat. Lavasuun teren keretna, nemi mira on basinge vam loklok kakapmek at ne Satan. Nia a malagan na lovoang tinemi luvutnuruk orong. Lavasuun teren keretna, miklen ne Moroa, ne Temen dik.

<sup>14</sup> Nia a malagan na lovoang tinemi limixin mukun. Lavasuun teren keretna, nemi miklen ne Iesu Karisito mo gak lok ganoxa at lereot. Nia a malagan na lovoang tinemi limixin maxat. Lavasuun teren keretna, nemi mi tu tuxuruxun at lununu atnemi la levelinga at ne Moroa i lox asuusu lempanga nunuan at lorooro atnemi. La mira on basinge vam loklok kakapmek at ne Satan.

#### *Nemen Mita Mumu Asu Loklok At Na Lavatkangka*

<sup>15</sup> \*Nemen mita ngaongao mu loklok at na lavatkangka eburu mi lapnovos teren. Mo do tara na ngaongao mu i, naba lox asuusu i do labalamu at ne Moroa, ne Temen dik kopmen nak lok keneng teren.

<sup>16</sup> \*Leveloklox axap at na lavatkangka ngan levempavara kapmek at labantuxu, levereven peves, la loklox asilok, nedi na leveloklok kopmen na laa boro at ne Temen dik. Mo leveloklok i suusu at loklok at lavatkangka.

<sup>17</sup> \*La na lavatkangka eburu mi leveloklok kakapmek teren, naba xap. Ketla laradi do i mumu asu lavavara at ne Moroa, neni naba rooro avolo.

#### *Lavapaase Aronga Mumu Nedi Di Munepen Mi Ne Iesu*

<sup>18</sup> \*Luvutnuruk orong. Levenaleng kavaxap at na lavatbung menemen ira rupot pam. Gano nemi miga ronga levelinga do laradi munepen naba rupot, la buaang limixin munepen dira rupot pam. Kuren la nedik diraklen i do levenaleng kavaxap i rupot pam.

<sup>19</sup> \*Gano diga nemen eburu minedik ngan limixin at ne Iesu Karisito. Ketla nedi goxopmen limixin teren, kuren la diga on basinge dik. Nedi do gita nunu at ne Iesu Karisito, nedi gitoxo on basinge dik. Ketla diga on basinge vam dik, kuren la dik ta xasep do nedi xopmen at ne Iesu Karisito.

<sup>20</sup> \*Ketla ne Iesu Karisito, Laradi Melemelengan, ga raba vam nemi mi Loroonan Kaala at ne Moroa. Kuren la nemi axap miga ruuna ka vam levelinga ruturun teren.

<sup>21</sup> Nia a malagan na lovoang tinimi kopmen do mixoklen levelinga ruturun teren. Ketla a malagan i na mila mikleken levelinga ruturun la kopmen taxaxarang i nemen atnedi di ruuna levelinga ruturun at ne Moroa.

<sup>22</sup> \*Nege neni laradi vapaase xaxarang? Ni laradi i paase keretna, "Iesu neni kopmen Lanarong at ne Moroa." Ni na laradi ik sok tixirixes kepe ne Temen dik eburu mi ne Nitna, kuren la neni laradi munepen mi ne Moroa.

<sup>23</sup> \*Do taradi i sok tixirixes kepe ne Nitna ne Moroa, i ngan do neni i sok tixirixes kepe bok ne Temen. Do taradi i nunu at ne Nitna ne Moroa, neni i nunu bok at ne Moroa, ne Temen nedik.

<sup>24</sup> Minam tebeng lolos amisik mo levelinga miga ronga i, ap mo levenaleng miga ruuna ka lununu maxat. Do kuren, minabat kis esogo amisik mi ne Nitna, la ne Temen.

<sup>25</sup> \*La neni naba lox epovo lava-paase ali ren, no ni ga xaape min tinedik keretna, neni naba raba nedik mi lorooro avolo.

<sup>26</sup> Nia a malagan na levelinga rinemi ri lox axasep nemi mi loklok at limixin di lok tong i xusu dina sar asoogong nemi.

<sup>27</sup> \*Ketla nemi miga ruuna ka vam Loroonan Kaala, ne Iesu Karisito

\* 2:15: Ro 8:7 \* 2:16: Ro 13:14; Je 4:16; 1 Pi 2:11  
Mt 24:5,24; 2 Jo 1:7 \* 2:19: Gu 20:30; 1 Ko 11:19  
Jo 1:7 \* 2:23: Jo 5:23; 15:23; 1 Jo 4:15; 5:1; 2 Jo 1:9

\* 2:17: Mt 7:21; 1 Ko 7:31 \* 2:18: 1 Pi 4:7;  
\* 2:20: 1 Ko 2:15; 1 Jo 2:27 \* 2:22: 1 Jo 4:3; 2  
\* 2:25: Jo 3:15; 6:40 \* 2:27: Jo 16:13



ga raba nimi min, la mo Loroonan Kaala ik lok keneng atnemi. La ixo epovo do tara na anasa nimi, ketla Loroonan Kaala i lox axasep nimi mi lempanga axap. La mo Loroonan Kaala xopmen laxaxarang mun, ketla ni i ruturun. La nemi minat kis esogo mi ne Iesu kerekngan Loroonan Kaala ira lox ase vam nemi min.

<sup>28</sup> \*Luvutnuruk orong. Minat kis esogo amisik mi ne Iesu kusu at lovotpot teren mi noxo marat la mi noxo mangan.

<sup>29</sup> \*Nemi mi xasep do ne Iesu neni Laradi Manmanton, la kerepmo nemi mi xasep bok do laradi ik lok leveloklok nunuan, i lox asuusu i do neni i ruuna ka vam livipisik amaxat.

### 3

#### *Monga Dik Gi Nemen Ngan Luvutnitna Ne Moroa*

<sup>1</sup> \*Labalamu at ne Temen dik i silok aleng, ni gara lox asuusu vam i ridik keretna. Neni ga soxot nedik do luvutnitna ne Moroa. La i ruturun tinotno, nedik luvutnitna ne Moroa. Limixin at na lavatkangka dixokleklen ne Moroa, kuren la nedi xopmen dinaklen bok dik.

<sup>2</sup> \*Larapen tangas orong tarak. Monga nedik luvutnitna ne Moroa, ketla kovisi bok ata xasep do nedik taba unus tinotno xereva. Ketla nedik takleklen i do at laaleng ne Iesu na ru asuvos, nedik tanaba lok ngan i mila tana epen etang tinotno ba min.

<sup>3</sup> Nedi axap di ngangais mi lomomo ti mo laaleng, amisik di lok kepe laxakapmek at lorooro atdi kusu dina dadat basinge laxakapmek la lorooro atnedi naba dadat axap kerekngan ne Iesu.

<sup>4</sup> Do tara na lok laxakapmek, i los polo levelinga at ne Moroa, mila laxakapmek ni loklok ti los polo levelinga at ne Moroa.

<sup>5</sup> \*La nemi mikleklen i do ne Iesu ga rupot kusu ti lox asepmus limixin basinge laxakapmek atdi. La kopmen taxapmek nak lok at ne Iesu.

<sup>6</sup> \*La nedi dit kis esogo mi ne Iesu, di noxo lox amisik laxakapmek. Ketla do tara i lox amisik laxakapmek, i lox asuusu i do neni xovisi na ven kibis ne Iesu la kopmen naklen i.

<sup>7</sup> \*Luvutnuruk orong. Mina lok tatao avukat nemi kusu tara noxo sar asoogong nimi. Do tara ik lox amisik lempanga in manton, neni laradi manmanton, kerekngan ne Karisito in manton tino.

<sup>8</sup> \*Do tara ik lox amisik laxakapmek, neni at ne Satan, mila ne Satan ga lok laxakapmek, ga ruka i ganoxa at lereot. Lavasuun at lovotpot at ne Nitna ne Moroa do neni na sele utut kepe lugugu at ne Satan.

<sup>9</sup> \*Do tara i ruuna livipisik amaxat at lorooro ren keneng at ne Moroa, ni noxok lox amisik laxakapmek, atla lorooro maxat at ne Moroa i nemen keneng teren. Do tara i ruuna ka vam livipisik amaxat at ne Moroa, neni ixo epovo ri lox amisik laxakapmek.

<sup>10</sup> Anai i lox axasep dik do nege di luvutnitna ne Moroa, la nege bok di luvutnitna ne Satan. Lara do i lok tavanga kopmen nak mokso, kopla kopmen na balamu neton, neni xopmen ne nitna ne Moroa, ketla neni ne nitna ne Satan.

#### *Mina Balamu Ela Nimi Ngan Limixin At Ne Moroa*

<sup>11</sup> \*Mo levelinga miga ronga i, ga ruka i at lurutu kaxat at lununu maxat atnemi saporap ne Iesu Karisito, la mo levelinga i lok keretna. Nedik ata ebalamu ela.

<sup>12</sup> \*Nemen dik ta lok ka loklok at ne Kaen. Neni laradi at ne Satan la neni ga sev amet neton, laasen teren ne Abel. Tila ba ne Kaen ga sev amet ne Abel? Lavasuun teren do ne Kaen ga ven kibis i do luruptuvuk teren ga

\* 2:28: 1 Jo 3:2; 4:17 \* 2:29: 1 Jo 3:7,10 \* 3:1: Jo 1:12-13; 16:3 \* 3:2: 2 Ko 3:18; Pl 3:21 \* 3:5: 2 Ko 5:21; 1 Pi 2:22-24; 1 Jo 2:2 \* 3:6: Ro 6:1-2,14; 1 Jo 3:9 \* 3:7: 1 Jo 2:29 \* 3:8: Jo 8:44 \* 3:9: 1 Jo 5:18 \* 3:11: Jo 13:34 \* 3:12: Lur 4:8

lok kapmek la luruptuvuk at ne Abel ga lox avukat.

13 \*Luvutnetak mi luvurinu. Nemen mita sangu dola limixin at na lavatangka dina belangatngas tinemi.

14 \*Nedik ataklen i do nedik gara on basinge vam lolos at lanmet, la nedik dira beles pam ti lorooro. Nedik takleklen i na mila nedik ta ebalamu ela. Do tara kopmen tabalamu ren, neni move i nemen maxopok at lolos at lanmet.

15 \*Do tara i belangatngas ti neton, neni i lok ngan laradi sepsev amet tadi, la atakleklen i do laradi sepsev amet tadi kopmen torooro avolo rin.

16 \*At na loklok at ne Iesu Karisito nedik ta xasep at lavasuun at labalamu. I lok keretna, Iesu Karisito ga met nop loklok atdik. Kuren la nedik bok ata raba lorooro atnedik ti lok tooro limixin at ne Moroa.

17 \*La kerepmo, do taradi apnovos i ven ti neton ik pakes aleng, ketla kopmen na raba i mi tempanga, kereva, i vara ne Moroa? Kopmen tinotno.

18 \*Luvutnuruk orong. Labalamu atnedik kopmen noxo lok ngan levelinga la lempapaase gamasa mene nga. Ketla ata ruuna ka labalamu ruturun, kusu leveloklok atdik naba lox asusu i do labalamu ruturun mo ik lok keneng atdik.

19 Do nedik ta ruuna labalamu xerepmo, i lox asusu i do nedik luvuttadi at ne Moroa, mo i ruturun. La kerepmo nedik ta noxo suma lanmarat ap mo laaleng dik taba ru ro melango at ne Moroa.

20 Do nedik ata suma xapmek ap mo laaleng mumu laxakapmek nedik ga lok pam i gano, ata xasep do nedik limixin at ne Moroa, la neni noxo lok li lumumuat atdik, mila ne Moroa noxo doma solo mo lusumsuma atdik la ikleklen lem-

panga axap la naba doxoma xepe laxakapmek atdik.

21 \*Larapen tangas orong tarak. Nedik ta noxo ruuna ka lumumuat mumu lusumsuma atdik, kuren la nedik ta noxo suma lanmarat to melango at ne Moroa,

22 \*la i epovo do ata sue ne Moroa ri lempanga ta vara rin. La neni naba raba dik min mila nedik ta mumu asu levelinga ren la tak lok lempanga ik lox amomo i.

23 \*La levelinga ren tidik i lok keretna, nedik tana nunu at laasen at ne Nitna, neni ne Iesu Karisito la atana ebalamu ela kerekngan ne Iesu ga tong i ridik.

24 \*Do tara i mumu asu levelinga at ne Moroa, neni it kis esogo mi ne Moroa la ne Moroa it kis esogo min. La nedik takleklen i do ne Moroa it kis esogo midik mila neni ga raba dik mi Loroonan Kaala ren.

## 4

### *Mina Ila Mumu Avot Be Levenanasa Vetpes*

1 \*Larapen tangas orong tarak. Nemen gat mita rebeng alis soso levenanasa atnedi di tong i do di ruuna Loroonan Kaala. Ketla mina viila mumu avot be levenanasa atdi do i sixit epovo mi levenanasa at ne Moroa. Mina lox i xuren atla buaang lavaeme vapaase xaxarang dit pas tangtagap at lengkot axap.

2 \*I epovo do mina ven kibis mo laradi i ruuna levenanasa at Loroonan Kaala at ne Moroa. Do neni i tong asu i do ne Iesu, neni Lanarong at ne Moroa la ga vee radi ngan nedik, la neni i ruuna Loroonan Kaala at ne Moroa.

3 \*Ketla do tara kopmen na tong i do ne Iesu ga rupot boro at ne Moroa, neni kopmen at ne Moroa. Limixin kerepmo nedi luvuttadi munepen mi

\* 3:13: Mt 5:11-12; Jo 5:18-19 \* 3:14: Jo 5:24; 1 Jo 2:11; Mt 5:21-22 \* 3:15: Li 21:8 \* 3:16: Jo 13:1; Ga 1:4; 1 Ts 2:8 \* 3:17: Lal 15:7 \* 3:18: Je 2:15-16 \* 3:21: Ib 4:16 \* 3:22: Mt 21:22 \* 3:23: Jo 6:29; 13:34 \* 3:24: Ro 8:9; 1 Jo 4:13 \* 4:1: Mt 7:15; 1 Jo 2:18; 2 Jo 1:7; 1 Ts 5:21 \* 4:2: 1 Ko 12:3 \* 4:3: 1 Jo 2:18; 2 Jo 1:7

ne Iesu. Nemi miga rongga i do dinaba rupot la monga dira nemen pam at na lavatbung menemen.

<sup>4</sup> \*Luvutnuruk orong. Nemi limixin at ne Moroa. Mira ke xepe vam lavaeme vapaase xaxarang atla ne Moroa i nemen keneng atnemi la lolos teren i volo lolos at ne Satan, neni lamgomgo at limixin at na lavatbung menemen.

<sup>5</sup> \*Nedi mede at na lavatbung menemen mun, kuren la di anasa mi levempanga at na lavatbung menemen, la limixin at na lavatbung menemen ding tonga res atdi.

<sup>6</sup> \*Ketla nedik limixin at ne Moroa, la mo do laradi ikleklen ne Moroa, neni nabang tonga res atdik. La mo laradi do kopmen neni at ne Moroa, neni noxong tonga res atdik. La kerepmo i epovo ta ven kibis i do nege i ruuna Loroonan Tuturun, la nege i ruuna loroonan kaxarang.

### *Moraa Ni Laradi Balamu*

<sup>7</sup> \*Larapen tangas orong tarak. Ata ebalamu ela mila ne Moroa ni lava-suun at labalamu. Mo lara do i umsu mi labalamu, ni ne nitna ne Moroa la ikleklen ne Moroa.

<sup>8</sup> \*Mo lara do kopmen tabalamu ren, neni kopmen naklen ne Moroa atla ne Moroa neni Laradi Balamu.

<sup>9</sup> \*La ne Moroa ga lox asuusu labalamu ren tinedik keretna, neni ga riki legesamdak teren ude at na lavatbung menemen, kusu nedik taba ruuna ka lorooro avolo ma xeneng at lugugu ren.

<sup>10</sup> \*Labalamu i lok keretna. Kopmen dola nedik diga vavara solo ne Moroa, ketla neni ga balamu dik la ga riki ne Nitna ngan laxaavuk ti ru korop ti laxakapmek atnedik.

<sup>11</sup> \*Larapen tangas orong tarak. Do ne Moroa i balamu nedik kerepmo, nedik bok ata ebalamu ela.

<sup>12</sup> \*Kopmen tara goxo ven tu at ne Moroa. Ketla do nedik ta ebalamu

ela, i lox asuusu i do ne Moroa i nemen keneng atdik, la labalamu ren i lox ampana keneng at lorooro atdik.

<sup>13</sup> \*Nedik di xasep dola nedik di rooro at ne Moroa la ne Moroa i rooro atdik, atla ni ga raba vam dik mi Loroonan Kaala ren.

<sup>14</sup> \*La nema magara ven pam ne Nitna la ma tong asu i dola ne Temen dik ga riki ne Nitna ngan Laradi Loklox Arooro ri limixin at na lavatbung menemen.

<sup>15</sup> \*Do tara i tong asu i do ne Iesu Nitna ne Moroa, ne Moroa i nemen keneng teren la neni i nemen keneng at ne Moroa.

<sup>16</sup> \*La nedik axa takleklen i do ne Moroa i balamu dik la kerepmo ta xasep do ik lok tatao dik.

Moraa neni Laradi Balamu la do tara i rooro keneng at labalamu, ni i nemen keneng at ne Moroa la ne Moroa i nemen keneng teren.

<sup>17</sup> \*At na mun langas labalamu at ne Moroa ik lox ampana keneng at lorooro atdik kusu at laaleng ete ata noxo ruuna lanmarat, mila lorooro atnedik at na lavatbung menemen i lok ngan mun lorooro at ne Iesu.

<sup>18</sup> Do tara i ruuna labalamu, ixo epovo do lanmarat na nemen keneng at lorooro ren. La mo labalamu ruturun teren naba lok kepe mo lanmarat i nemen at lorooro ren. Lanmarat ik lok at laradi i lok laxakapmek la naba xip lumumuat. Do tara i ruuna lanmarat, kovisi labalamu na epampana at lorooro ren.

<sup>19</sup> Nedik ta umsu mi labalamu atla ne Moroa ga balamu avot dik.

<sup>20</sup> Do tara i lok dola i vavara ne Moroa ketla i belangatngas ti neton, ni laradi xaxarang. Atla neni ixo epovo xusu ni na vavara ne Moroa no neni goxovisi na ven tu ren do neni noxo balamu avot be neton ua neni ira ven tu vam teren.

<sup>21</sup> \*Mo lavapaase ne Karisito gara raba vam dik min i lok keretna. Do

\* **4:4:** Mt 12:29; 1 Jo 5:4-5    \* **4:5:** Jo 15:19    \* **4:6:** Jo 8:47    \* **4:7:** 1 Jo 2:29    \* **4:8:** 1 Jo 4:16  
 \* **4:9:** Jo 3:16    \* **4:10:** Ro 5:8-10; 1 Jo 2:2    \* **4:11:** Mt 18:33    \* **4:12:** Jo 1:18; 1 Jo 2:5-6    \* **4:13:** 2 Jo 1:22; 1 Jo 3:24    \* **4:14:** Jo 3:17    \* **4:15:** 1 Jo 5:5    \* **4:16:** 1 Jo 4:8    \* **4:17:** 1 Jo 2:28    \* **4:21:** Mt 5:44-45; Mk 12:29-31

tara i vavara aleng ne Moroa, neni na balamu bok neton.

## 5

### *Limixin At Ne Moroa Di Los Kimit Laxakapmek*

<sup>1</sup> \*Do tara i nunu do ne Iesu neni Lanarong at ne Moroa, i lox asuusu i do i ruuna ka vam livipisik amaxat at lorooro ren keneng at ne Moroa. La do tara i balamu ne temen, i balamu bok laxamdak mi laxaalik teren.

<sup>2</sup> Do tara i vavara aleng ne Moroa la i ronga res at levelinga ren, i lox asuusu i do neni i balamu limixin at ne Moroa.

<sup>3</sup> \*Do nedik ta ronga res at levelinga ren, i lox asuusu i do dik ta vavara aleng ne Moroa. La noxo lolos tinedik kusu tana mumu asu levelinga ren.

<sup>4</sup> \*Do tara i ruuna ka vam livipisik amaxat at lorooro ren keneng at ne Moroa, i lox asuusu i do neni ira on basinge vam leveloklok at na lavatbung menemen. Do tara i nunu at ne Iesu, na i lox asuusu i do neni ira on basinge vam loklok at na lavatbung menemen.

<sup>5</sup> \*Nege i epovo kusu na los kimit loklok at na lavatbung menemen? Neni xusuk mun laradi i nunu dola ne Iesu neni Nitna ne Moroa.

### *Levelinga Loklok Katling Mumu ne Iesu*

<sup>6</sup> \*Iesu Karisito ga si boro vana at laxalibet la lempanga loklok katling ga rupot ti lox asuusu i do neni ne Nitna ne Moroa. Ladan ga ru katling lesepe susu at ne Iesu la lada ga ru katling lanmet teren. Ni goxo lok ka mun lesepe susu, ketla neni ga met bok. La Loroonan Kaala i tong asu i do ne Iesu neni ne Nitna ne Moroa la i epovo do ata siam ka levelinga ren atla levelinga ren i ruturun.

<sup>7</sup> Kerepmo na lavantun lempanga i lox asuusu i.

<sup>8</sup> \*Ni Loroonan Kaala, ladan, la lada. La na lavantun axap di lox asuusu legesa vanga mun.

<sup>9</sup> \*I epovo dik ta nunu at levelinga at taradi, ketla levelinga at ne Moroa i mumuat aleng ti mo levelinga, mila neni levelinga mumu ne Nitna.

<sup>10</sup> \*Do tara i nunu at ne Nitna ne Moroa, neni i ruuna ka vam mo levelinga keneng at lorooro ren. Do tara kopmen na nunu at ne Moroa, i lok ne Moroa ngan laradi xaxarang, atla ni kopmen na nunu ap mo levelinga ne Moroa ga vaase i mumu ne Nitna.

<sup>11</sup> Mo levelinga i lok keretna, Moroa ga raba vam dik mi lorooro avolo, la ne Nitna, ni Luntoo Avolo.

<sup>12</sup> \*Dola tara i nunu at ne Iesu, i ruuna ka vam nom lorooro. Do tara kopmen na nunu at ne Iesu, ne Nitna ne Moroa, neni noxo ruuna ka nom lorooro.

### *Lorooro Avolo*

<sup>13</sup> \*Nia a malagan na lempanga rinemi mi nunu at laasen at ne Nitna ne Moroa kusu mina xasep do mira ruuna ka vam lorooro avolo.

<sup>14</sup> \*Nedik taklen tuturun i do dik ta epovo na vot pasa ne Moroa, neni i ronga dik mo do dik ta sing ti lempanga i epovo at lavavara ren.

<sup>15</sup> Nedik ta xasep pam do ne Moroa ing tonga levesingising atdik, kuren la nedik ta xasep bok do neni im taba dik mi mo lempanga ta ngising tin.

<sup>16</sup> \*Do tara na ven neton na lok laxapmek, la mo laxapmek kopmen na lolos kusu tara naba seeve ren, neni na sing ti ne Moroa, la ne Moroa naba raba i mi lorooro avolo. Nia a paase mumu nom limixin di lok laxakapmek la di noxo seeve ren. Ketla lara laxakapmek mo, do limixin dina lox i, dinaba seeve mu i.\* Nia xopmen na paase mi nom.

<sup>17</sup> Do tara na lok lempanga kopmen na mokso, ni i lok laxakapmek.

\* 5:1: 1 Jo 4:15 \* 5:3: Jo 14:15,23-24; 2 Jo 1:6; Mt 11:30 \* 5:4: Jo 16:33 \* 5:5: Ro 8:37; 1 Jo 4:4 \* 5:6: Jo 1:29-34 \* 5:8: Jo 15:26 \* 5:9: Jo 5:32-37; 8:18 \* 5:10: Ga 4:6 \* 5:12: Jo 3:36 \* 5:13: Jo 20:31 \* 5:14: Jo 14:13; 16:23; 1 Jo 3:21-22 \* 5:16: Mt 12:31 \* 5:16: Tinedi di vas gasinge ne Moroa la di sok tixirixes kepe rinotno i. \* 5:18: 1 Jo 3:9; Jo 17:5

La leveloklok kakapmek mo, do tara na lox i, neni noxo seeve ren.

<sup>18</sup> \*Nedik takleklen i do tara i ruuna ka vam livipisik amaxat at lorooro ren keneng at ne Moroa, neni noxo nemen at laxakapmek. La ne Nitna ne Moroa i lok tatao i xusu laradi kapmek ne Satan noxo lok kapmex i.

<sup>19</sup> \*Nedik takleklen i do nedik limixin at ne Moroa, la limixin at na lavatbung menemen kopmen dina nunu at ne Iesu Karisito, di nemen maxopok at lolos at laradi xapmek, ne Satan.

<sup>20</sup> \*Nedik ta xasep bok pam keretna, ne Nitna ne Moroa ga rupot la ga raba vam dik mi laxasep, kusu nedik tabakleklen ne Moroa, neni Laradi Ruturun. Nedik dik lok at ne Moroa i ruturun la at ne Nitna, Iesu Karisito. La ne Moroa neni Luntoo Avolo.

<sup>21</sup> \*Luvutnuruk orong, mina lok tatao nimi basinge lempoovo moroa.

**2 Jon**  
**Lovoang Sepsev Agepura**  
**At Ne Jon**  
**Levelinga Loklox**  
**Axasep**  
**Levenmaares 95-100 A.D.**

Jon neni goxo lox axasep solo laasen teren keneng at nai lovoang neni ga malagan i. Ketla limixin akleken at na levenaleng di doxoma i do ne Jon neni ga malagan i na levelinga. At lodoxoma atdi do, Jon ga doxoma solo lavamunepen. Kerepmo la neni goxo tong asuvos laasen teren. Keneng at levelinga ua neni ga suang na lovoang teren min neni ga lok, "latkin," la "laxaalik mi laxamdak," neni gam doma mu lotu la kerepmo la neni ga lipe levenasen atdi mi levelinga xerepmo. Nedik dixo xasep solo do neni ga malagan na levelinga ri limixin at lotu xopla ti lara latkin. Lentaba limixin digam doma i do ne Iesu ga vot ngan loroonan panga la goxopmen labantuxuren. Ketla ne Jon ga malagan na lovoang kusu na sok tixirixes kepe mo lodoxoma. Neni ga tong i do ne Iesu ga vot mi labantuxu. La neni ga lok ngan bok laradi nunuan mene. Neni ne Moroa ruturun pam la laradi ruturun pam. Jon neni ga malagan i na levelinga ren mi levenanasa xerepmo.

**Lengkot silok keneng at na lovoang**

1:1-3 Levelinga mumu asu.

1:4-6 Labalamu ela.

1:7-11 Lempapaase aronga mumu luvuttadi loklox ase xaxarang.

1:12-13 Lavapaase abeese.

*Lavapaase Axasep*

<sup>1</sup> \*Nenia lamgomgo at lotu. A malagan na levelinga ru, latkin soksoxolik at ne Moroa la ti laxaalik

mi laxamdak taram. Nia a balamu ruturun nimi. Kopmen nenia xusuk mun, ketla nedi axap diklen levelinga ruturun at ne Moroa di balamu bok nimi,

<sup>2</sup> mila levelinga ruturun at ne Moroa i nemen keneng at lorooro atdik la naba nemen amisik eburu midik.

<sup>3</sup> Letaba nabalamu, lebelen tuntun, la lenmila rinedik boro at ne Temen dik, la ne Iesu Karisito, Nitna ne Moroa. La lorooro atdik naba lox asusu levelinga ruturun la labalamu.

*Levelinga Ruturun La Labalamu At Limixin Lotu*

<sup>4</sup> \*Nenia a lok momo aleng mila nia aga ronga i do lentaba at laxamdak mi laxaalik taram di mumu asu levelinga at ne Moroa, kerekngan ne Temen dik ga tong taba dik min.

<sup>5</sup> \*La monga a sing u, latkin orong, do dik tana ebalamu ela. Na xopmen leretere maxat a malagan i ru. Na leretere dik taga ronga ka i ap mo laaleng nedik taga lok ka lorooro maxat at ne Iesu Karisito.

<sup>6</sup> \*Lavasuun at na labalamu i lok keretna. At lorooro axap atdik ata ronga res at levelinga at ne Moroa. Mo leretere, nemi miga ronga i ap mo laaleng miga lok ka lorooro maxat i lok keretna. Lorooro atnimi na umsu mi labalamu.

<sup>7</sup> \*Buaang nedi luvuttadi sosolo arup diga vas epeseves su uto at na lavatbung menemen. Mo limixin kopmen na tong asu i dola Iesu Karisito ga vot ngan laradi ruturun. Luvuttadi xerepmo nedi lavaanat sosolo arup, la di munepen mi ne Karisito.

<sup>8</sup> Mina lolos kusu mina lok tatao avukat luruptuvuk atnimi, la kopmen mi noxo ke aie mo lununu atnimi, la miba ruuna xobot luunun.

<sup>9</sup> \*Do tara ixo mumu asu levenanasa at ne Karisito, la i lox epasum i mi levenanasa vetpes, neni xopmen nat kis esogo mi ne Moroa. Ketla do tara i mumu asu levenanasa at

\* 1:1: 1 Pi 5:1; 3 Jo 1:1    \* 1:4: 3 Jo 1:3    \* 1:5: 1 Jo 2:7; 3:11    \* 1:6: 1 Jo 5:3    \* 1:7: 1 Jo 4:1-3

\* 1:9: 1 Jo 2:23

ne Karisito, neni it kis esogo mi ne Temen dik la ne Nitna.

<sup>10</sup> \*Do tara i vot pasa nimi la i vaase asu levenanasa kopmen at ne Karisito, keket mita mulus ka i. La keket mita lok maraose min la mina seega rangarang i.

<sup>11</sup> Do tara i mulus ka i, naba lok ngan dola neni i tu eburu min keneng at lempanga xakapmek teren.

*Levempapaase Abeese*

<sup>12</sup> \*A ruuna buaang lempapaase xusu ana tong i rinimi. Ketla axo vara i xusu ana malagan i at lovoang mi lavanga mamalagan. Kusuk mun a doxoma i do anaba vot pasa nimi, la ana epaase eburu minimi kusu nedik tanaba lok momo aleng.

<sup>13</sup> Laxamdak mi laxaalik at netam orong di lox aonon lomomo rinimi.

### 3 Jon

## Lovoang Sepsev Avantun At Ne Jon

## Levelinga Loklox Axasep

### Levenmaares 95-100 A.D.

Jon neni lun pinvu at ne Iesu, neni ga malagan i na lovoang ti lentangas teren ne Gaius. Anai ni lovoang tuturun. At nai lovoang ne Jon goxo tong asuvos laasen teren, ketla limixin diga doma i do ne Jon neni ga malagan i. Keneng at nai lovoang at lengkakan 9-11 neni levelinga matmatkun. Jon ga tong i ridi do dina gugu mi lodoxoma nunuan kusu ti soxolik ka luvuttadi loklok tatao ri lotu. Goxo lox avukat do dina soxolik ka luvuttadi amgomgo at na lavatkangka kusu dinam gomgo at lotu, atla ne Diotrepes ga lox axatu laxakapmek kantubu at limixin lotu, la lorooro atdi goxok mokso. Kuren la nedi dina soxolik ka nedi luvuttadi ua di vavara aleng ne Moroa, kusu dina lok tatao avukat ngan luvuttadi amgomgo at lotu, la kusu limixin diba mumu asu di.

#### **Lengkot silok keneng at na lovoang**

1:1-4 Lavapaase momo.

1:5-8 Lavapaase mumu asu ri ne Gaius.

1:9-12 Lavapaase mumu ne Diotrepes la ne Demetrius.

1:13-15 Lavapaase abeese.

#### *Lavapaase Axasep*

1 \*Nenia lamgomgo at lotu.

A malagan na lovoang ti lentangas orong tarak, ne Gaius. Nenia a balamu ruturun u.

2 Lentangas tinotno rak. Nia a sing ne Moroa do una momo mi lorooro avukat u ruuna ka i at labantuxu ram kerekngan loroonan taram i ruuna lorooro avukat.

3 \*Nenia aga lok momo aleng at loxonaleng leventaba at luvutneton dik diga rupot la diga vaase asuusu lorooro ram, do u ruturun amisik, i ngan do lorooro ram ik sixit emu mi levelinga ruturun at ne Moroa.

4 Ise nenia a ronga i do luvutnuruk di mumu asu luruturun, nenia a lok momo aleng.

#### *Jon Ga Emi Asu Mi Ne Gaius*

5 Lentangas orong tarak. At lugugu ram ti lok tooro luvutneton dik, uk lox ampana avukar i, keke i do nenu uxoklen di.

6 \*Diga vaase asuusu labalamu ram to melamgo at limixin at lotu nade. La naba lox avukat do una lok tooro nedi at lavatpas atdi, mila loklok kerepmo i epovo at lavavara at ne Moroa.

7 \*Diga on basinge lara menemen atdi ri vaase asu laasen at ne Karisito la di goxo lok kaka tevempanga anan kopla tevempilas boro at lavamolun.

8 Kuren la i epovo rinotno do nedik limixin nunu ata lok maraose mi nom luvuttadi kusu nedik axap ata gugu eburu ti tong asu levelinga ruturun.

#### *Diotrepes Mi Ne Demetrius*

9 Aga malagan pam lovoang tinemi limixin at lotu mumu i na lavanga. Diotrepes neni laradi i vavara aleng i do na lok ngan lamgomgo atnimi, ketla neni ixo mu asu levelinga atnama.

10 Kuren la do nenia ana vot saparap nemi, anaba tong asu axap lempanga neni ira lok pam i, mo i lok kapmek. Ik lok levempapaase ren mumu nama ua i lok kapmek aleng. Neni xopmen nak lok mene nga mo loklok, ketla neni ixok lok tooro bok luvuttadi vavang do dit pot to at lemenemen teren la neni ip sep pepe limixin at lotu mo di vavara nak lok tooro mo luvuttadi vavang. La ik lok kepe bok mo limixin basinge lixitkis keneng at lotu.

11 \*Lentangas tinotno rak. Nemen gat uguta mu asu loklok at luvuttadi

\* 1:1: 2 Jo 1:1 \* 1:3: 2 Jo 1:4 \* 1:6: Ta 3:13

\* 1:7: 1 Ko 9:12,15 \* 1:11: 1 Jo 3:6-10



xapmek. Ketla una mu asu leveloklox avukat. Do nege i lok leveloklox avukat, neni at ne Moroa. La do nege i lok laxakapmek, neni kovisi na ven kibis ne Moroa.

<sup>12</sup> \*Limixin axap di paase levelinga avukat mumu ne Demetrius la lorooro ren ik sixit epovo mi levelinga ruturun. Nema bok ma paase levelinga avukat mumu i, la nemi miklen i do na levelinga atnama i ruturun.

*Levempapaase Abeese*

<sup>13</sup> \*A ruuna laxalinga solo xusu ana tong i ru, ketla a xopara i xusu ana malagan i mi lempanga mamalagan.

<sup>14</sup> Am doma ali i do aba ven ba u melemu la ataba epentu la ata epaase.

<sup>15</sup> Lenmila na nemen eburu minu. Nedi larapen tangas axap taram nade di lox aonon levelinga momoru. Nenu xa una raba levelinga momo ri larapen tangas atnama medo.

## Jut Lovoang At Ne Jut Levelinga Loklox Axasep Lumaares 66–67 A.D.

Jems neni ga ruuna lara neton laasen teren ne Jut, la neni ga malagan i na lovoang. Ketla ti na ne Jems, neni lamgomgo atnedi limixin nunu diga nemen to Jerusalem. Buang nedi luvuttadi akleken di doma i do na ne Jut neni neton ne Iesu (Mk 6:3; Mt 13:55). Keneng at na lovoang ne Jut ixo lox axasep dik do na lovoang neni ga malagan i ri nege limixin nunu. Neni ga malagan i la ga vara i xusu na vaase mumu loklox arooro atdik boro at ne Moroa. Neni ga malagan i na lovoang mila lentaba levelinga nedi luvuttadi loklox ase xaxarang diga lox ase xapmek limixin nunu mi levenanasa atdi. Kuren la at na mun loklox i na la neni ga malagan i na lovoang la ga vaase aronga di. Neni ga vaase alolos di do leveloklox ase ruturun mumu ne Iesu neni Lenban tinedi.

### **Lengkot silok keneng at na lovoang**

1:1-2 Lavapaase emi asu.

1:3-16 Lempapaase mumu luvuttadi loklox ase xaxarang.

1:17-23 Dina tu atmatkun at lununu atdi.

1:24-25 Leemi asu ri ne Moroa la ne Iesu Karisito.

### *Lavapaase Axasep*

<sup>1</sup> \*Nenia ne Jut, lasaxaruki at ne Iesu Karisito, la neton ne Jems.

Nia a malagan na lovoang tinemi limixin, mo ne Moroa gara ro xaka vam nimi do tin. Nemi rooro xeneng at labalamu at ne Moroa ne Temen dik, la mik lok keneng at loklok tatao at ne Iesu Karisito.

<sup>2</sup> \*Lebelen tuntun, lenmila, la labalamu at ne Moroa na umsu xeneng at lorooro atnimi.

### *Luvuttadi Loklox Ase Xaxarang*

<sup>3</sup> \*Larapen tangas orong tarak. Nia a vara aleng i xusu ana sok levelinga rinimi mumu mo langas ti lorooro avolo, ne Moroa im taba dik min. Ketla lara lavanga silok ira vot pam la a tong i rinimi do minam tebeng lolos levelinga at ne Moroa, mo ni ga raba avolo gesara mun i ri limixin teren.

<sup>4</sup> \*Nia a tong i na rinimi mila lentaba limixin kopmen dina nunu at ne Moroa, dira vubeles nemnem pam keneng at lotu atnimi. Nedi di ba gili xapmek levelinga mumu letaba nabalamu at ne Moroa atdik, kusu dinaba mu arup levelinga atdi ri lok laxakapmek maxamang at lix- itkis epot. La di sok tixirixes ne Iesu Karisito, ni Leges Orong Silok kusuk mun atnedik axap la Leeme Silok atnedik. Ganoxa levelinga xeneng at Lovoang Kaala ga tong li i do nedi dinaba ruuna ka levesong-songot silok.

<sup>5</sup> \*Nemi mira xasep pam at na, ketla a vara i do ana vaase adoxoma manga nimi xeretna. Moroa ga sar asu limixin teren basinge lenep silok Isip. Ketla melemu ni ga sev amet nedi di goxo nunu ren.

<sup>6</sup> \*Mina doma avukat box i na. Gano lentaba at lubangangelo diga ke xepe lixitkis silok atdi la diga onon tino basinge lemenemen atdi ro vana at laxalibet. Kuren la ne Moroa ga lok li di ro at lamain bonot la ga xoxo di mi lemparoos sen, mo naba nemen amisik atdi. La dinaba nemen go se at laaleng silok ne Moroa naba rongga linga at limixin axap. Ap mo laaleng ne Moroa naba lok li lumumuat atdi.

<sup>7</sup> \*La kerepmo bok limixin diga nemen to at lumenemen Sodom la Gomora la to bok at levenmenemen gak lox auret ti mo lumenemen.

\* 1:1: Mt 13:55    \* 1:2: 2 Pi 1:2    \* 1:3: 1 Ti 1:18    \* 1:4: Ga 2:4; 2 Pi 2:1    \* 1:5: 2 Pi 1:12; 1 Ko 10:5    \* 1:6: 2 Pi 2:4,9    \* 1:7: Lur 19:1-25; 2 Pi 2:6,10

Diga lok laxakapmek maxamang at lixitikis epot la lengkot mamangan kerepmo. Moroa ga sele utut kepe mo limixin la levenmenemen atdi mi laxao bokbolot. Anai neni lavapaase aronga ri limixin axap, do limixin kapmek dinaba vubeles at lemene-men songsongot ua laxao sesele utut naba nemen amisik.

<sup>8</sup> \*La kerepmo bok mo luvuttadi loklox ase xaxarang dira vubeles pam at lotu atnimi. Dim tobo mun la levenapnobo atdi i sasat nedi ri laxakapmek la dik lok laxakapmek mi lenbantuxu atdi. Ding tonga xepe levelinga at ne Moroa, la di paase vupu ri lagale limixin silok no vana at laxalibet.

<sup>9</sup> \*I ngan ganoxa laangelo gomgo ne Mikael ga etep mi levelinga eburu mi ne Satan. Nedu ga etep mi levelinga do nege naba lok ka labantuxu at ne Moses. Mikael goxo sok taba ne Satan mi levelinga xapmek. Ni ga lok mene xeretna, "Satan. Moroa axa i vaase sox u."

<sup>10</sup> \*Ketla nom limixin di paase xapmek mumu lempanga salai nedi xopmen dina xasep teren. Nedi di lok ngan mun lempanga mi lavanuet kangkedek atdi la di mumu asu mun lodoxoma atdi xa, la mo loklok naba lok kapmek axap lorooro atdi.

<sup>11</sup> \*Naba lok kapmek aleng tidi. Nedi di mu asu loklok at ne Kaen. La di ke lodoxoma avukat tik lok ka lempilas kerekngan ne Balam. Nedi limixin tongtonga xepe xerekngan ne Kora la dinaba uu bok kuren.

<sup>12</sup> \*Nedi dit kis eburu minimi mo do mi anan leveluxa at Leeme Silok. Ketla nedi di lok ngan lempanga ik token kantubu atnemi la kopmen dinak lok mamangan mumu laxakapmek atdi. Nedi dixo doma bok ba teta, ketla di doma xusuk mun di. Nedi di lok ngan lempotakabu, lamanman it mas aonon di, ketla kopmen tarakabu atdi. Nedi di lok

ngan levenuna kopmen na pisik at laaleng pipisik teren la di xe su min la ira met tino.

<sup>13</sup> \*Nedi di lok ngan lovopaxanao silok boro at laras. La loklok mamangan atdi ik lox asuvos ngan lovopaxanao i repoposok. Nedi di lok ngan laxampenti ik sixit ekarakat to vana at laxalibet. Moroa ga lox agagas lamain bonot aleng tidi, la dinaba nemen amisik go.

<sup>14</sup> \*Enok ni laradi sepsev avanna melemu at ne Adam, la neni ga paase ali mumu nom luvuttadi kapmek. Ni ga lok keretna, "Mina reven avukat. Leeme Silok naba rupot eburu minedi buaang limixin melemelengan teren,

<sup>15</sup> la ni naba lok li limixin axap at lavapaase la nedi di goxo nunu ren la nedi diga lok lempanga xapmek, la nedi diga tong asu levelinga xapmek mumu i, neni naba lok li lumumuat atdi."

<sup>16</sup> \*Nedi na limixin di paase xuxurung amisik, la dik sok taba xusuk mun limixin petpes mi laxakapmek atdi. Di mumu asu mun lavavara xapmek atdi xa, la di lox asilok levenasen atdi. La dik lox atdan limixin petpes kusu dinap kip paxat ka lempanga atnedi.

### *Mina Tu Lolos*

<sup>17</sup> \*Larapen tangas orong tarak. Nemi mina doxoma lavapaase at luvuttadi vavang at Leeme Silok atdik ne Iesu Karisito.

<sup>18</sup> \*Diga paase rinimi xeretna, "At levenaleng kavaxap at na lavatbung menemen, limixin mo dinaba rupot la dina paase sese xapmek leven-tangas nunuan at limixin nunu. La dinaba mumu lavavara xapmek atdi mo xopmen na sixit emu mi lavavara at ne Moroa."

<sup>19</sup> \*Nedi dinaba lok kaxat ka levenekarakat kantubu at limixin at lotu. Dinaba mu asu xusuk loklok at limixin at na lavatkangka la

\* **1:8:** 2 Pi 2:10 \* **1:9:** Dan 10:13,21; 12:1; 2 Pi 2:11; Li 12:7; Sak 3:2 \* **1:10:** 2 Pi 2:12 \* **1:11:** 1 Jo 3:12; 2 Pi 2:15; Kex 16:1-35 \* **1:12:** 2 Pi 2:13,17; Isi 34:8 \* **1:13:** 2 Pi 2:17; Ais 57:20 \* **1:14:** Lur 5:21-24; Lal 33:2; Mt 25:31 \* **1:16:** 2 Pi 2:10,18 \* **1:17:** 2 Pi 3:2 \* **1:18:** 2 Pi 3:3 \* **1:19:** 1 Ko 2:14

Loroonan Kaala noxok lok keneng at lorooro atdi.

<sup>20</sup> \*Ketla larapen tangas orong tarak, mina lox alolos amisik lorooro atnimi mi lununu i nunuan aleng. La mina ngising lolos amisik mi loklok tooro at Loroonan Kaala.

<sup>21</sup> La minam tebeng alis amisik labalamu at ne Moroa kusu labalamu atnimi na umsu ap mo levenaleng mit kis tangais Leeme Silok atnedik ne Iesu Karisito, la ni naba raba nimi mi lorooro avolo mumu lebelen tuntun teren.

<sup>22</sup> Nemi mina lox asuusu lebelen tuntun tinedi limixin, lununu atnedi xopmen na lolos la mina lok tooro di.

<sup>23</sup> \*La mina sat kaka amlong limixin di subu vam at lununu atdi, la kerepmo minaba lox arooro di basinge laxao at lemenemen song-songot. La mina lox asuusu lebelen tuntun tinedi limixin petpes, la mina lok tatao bok nimi kusu mo laxakapmek atdi noxo lox asubu nimi. La mina ke xepe bok leveloklok i bira at limixin kakapmek di ruuna i.

*Leemi Asu Ri Ne Moroa*

<sup>24</sup> \*Leemi asu ri ne Moroa i epovo ri xubak pe avukat nimi la nemi noxo subu ri laxakapmek. La neni i epovo ri lox axis nimi ro melamgo ren keneng at lisisixam silok la kopmen taxakapmek atnimi ketla minaba umsu mi lomomo i silok aleng.

<sup>25</sup> \*Leemi asu ri ne Moroa, neni Laradi Loklox Arooro atdik. Neni legesa Moroa xusuk mun. La lolos axap la loklok ngangao gat pas tin ganoxa at lereot, it pas bok tin at na levenaleng lingina, la nabat pas bok tin ap mo levenaleng axap i tu melamgo. At laasen at ne Iesu Karisito, Leeme Silok atdik. I ruturun.

---

\* **1:20:** Kl 2:7; 1 Ts 5:11    \* **1:23:** Amo 4:11; Sak 3:2; Li 3:4    \* **1:24:** Pl 1:10; 2 Pi 3:14    \* **1:25:** Ro 16:27; 2 Pi 3:18

## Lisilimet Lisilimet At Ne Jon Levelinga Loklox Axasep

### Lumaares 95–96 A.D.

Melemu at lanmet at ne Iesu la luruturut teren uto vana at laxalibet lavanna sangaun koplavanna sangaun mi lavalimo lenmaares ga men pe i la ne Jon ga malagan i na lovoang ti lotu. Jon ga vara i do mo lotu na lolos tinotno, mila limixin munepen diga lox asongot limixin at ne Moroa mumu levereven kisip atdi ri ne Iesu Karisito i ngan Leeme Silok. I se ne Jon ga nemen at loogu xokoxo to at losoxan Patimos, Moroa ga lox i xusu na ven lisilimet la ga lox ase i mi lempanga salai naba vot melemu. Keneng ap mo lisilimet Iesu ga vas asi lolos at ne Satan mi mo lentaba lavamunepen bok min, la ga lox ase ne Jon do nedik ua ata nunu at ne Iesu ataba nemen to vana at laxalibet.

#### **Lengkot silok keneng at na lubuk**

- 1:1-8 Jon ga lox aonon lavapaase momo ren ti limixin.  
 1:9-3:22 Jon ga ven Leeme Silok keneng at lisilimet.  
 4:1-8:1 Jon ga ven levenmumuat mo naba vot.  
 8:2-11:19 Jon ga ven lavanuti levenangelo.  
 12:1-13:18 Satan la luradi vapaase ren diga ravasu.  
 14:1-20 Lanasip naba sele utut kepe limixin kakapmek.  
 15:1-16:21 Lavanuti levesong-songot silok.  
 17:1-20:10 Moroa naba lok li ne Satan at laxao.  
 20:11-15 Laaleng ete.  
 21:1-22:21 Laxalibet maxat mi lavatbung menemen maxat.

#### *Lavapaase Axasep*

<sup>1</sup> \*Anaa lovoang, ni lisilimet boro at ne Iesu Karisito, ne Moroa ga raba i min, kusu na lox ase lavasaxaruki ren mi lempanga salai mo naba vot soso mun. La ne Iesu ga riki laangelo ren kusu na vaase axasev i ri ne Jon, lasaxaruki ren,

<sup>2</sup> la neni naba tong asu mo lempanga axap ni ga ven i. La anai, ni levelinga boro at ne Moroa, la mumu bok mo levelinga ruturun ne Iesu Karisito ga vaase i.

<sup>3</sup> \*Luvukat ti mo laradi do na us na levempapaase ali, la luvukat bok tinedi di ronga na levelinga, la di mu asu levelinga ik lok keneng at na lovoang. Mila levenaleng ira auret pam ti na lempanga naba vot.

#### *Lavapaase Momo*

<sup>4</sup> \*Nenia ne Jon, a malagan na levelinga tinemi lavanuti leventaogu lotu mik lok at lenep silok Asia.

Letaba nabalamu la lenmila at ne Moroa nak lok eburu minimi. Neni ga nemen gano, i nemen lingina la naba vot bok melemu. La lavapaase momo bok tinemi boro at lavanuti leventoonan, mo di tu ro melamgo at loxonin orong at ne Moroa.

<sup>5</sup> \*La lavapaase momo bok boro at ne Iesu Karisito, neni laradi ruturun at lavapaase ruturun la neni lara avot mo ne Moroa ga lox axatu kaxat amlong i basinge lanmet. La ni Lamgomgo at lavaorong at na lavatbung menemen.

Ne Iesu ga balamu nedik la ga lox asepmus dik basinge laxakapmek mi mo lada ren.

<sup>6</sup> \*La ga lok li nedik ngan lava-maasa at Linintoo ren, kusu dik tana lok lugugu at ne Moroa, ne Temen. Ata emi asu mi ne Iesu, lisisixam mi lolos axap teren. Neni naba nemen amisik. I ruturun.

<sup>7</sup> \*Mina reven avukat tin. Neni mo naba vot eburu mi loxontakabu, la larabung mixin axap eburu minedi diga vaxarem i at laxaba, dinaba ven lovotpot teren. La limixin axap at na

\* **1:1:** Dan 2:28-29; Li 1:19; 22:6    \* **1:3:** Li 22:7,10    \* **1:4:** Pas 3:14-15; Li 1:8; 3:1; 4:5,8; 5:6; 11:17; 16:5    \* **1:5:** Jo 18:37; Kl 1:18; Sam 89:27; Li 3:14; 17:14; 1 Jo 1:7; 4:10    \* **1:6:** 1 Pi 2:5,9; Li 5:10; 20:6  
 \* **1:7:** Mt 24:30; Jo 19:34-37

lavatbung menemen dinabang teng mumu i. La nai naba ravasu ruturun kuren. I ruturun.

<sup>8</sup> \*Moroa, Leeme Silok ga lok keretna, “Nenia mun Lurutu Kaxat la Lumumupit at lempanga axap. Nia aga nemen gano, a nemen lingina, la anaba vot bok melemu. Nenia Lanaraavuk.”

### *Levelinga Ri Ne Jon*

<sup>9</sup> \*Nenia ne Jon, neton nemi limixin mi nunu at ne Iesu. La nenia na ap kip levesongsongot eburu minimi. Nedik eburu lavaanat at Linintoo ren. Ata tu tuxuruxun at lununu atdik, do nedik ata ekip tangarang mi levesongsongot.

Nenia agak lok at losoxan to Patimos, nia aga nemen go ngan laradi xokoxo mila nia aga tong asu Lagale Lavavang at ne Moroa mi levelinga ruturun at ne Iesu.

<sup>10</sup> At lara laaleng, ni laaleng at Leeme Silok, Loroonan at ne Moroa ga suxuna ia, la aga silimet tang ka ne Iesu. La keneng at na lisilimet, aga ronga laxaka linga silok to melemu rak, gang teng ngan lurus.

<sup>11</sup> La mo laxaka linga ga lok, “Una lok kaka lugun la una malagan asu na lempanga nenu unaba ven i. La una lox aonon i uto at lavanuti leventaogu lotu, tara uto Epesas, la tara uto Smena, la tara uto Pegamam, la tara uto Taiataira, la tara uto Sadis, la tara uto Piladelpia, la tara bok uto Lodisia.”

<sup>12</sup> Aga rem gili kusu ana ven i do nege mo laradi ga paase ria, la aga ven lavanuti levenbabao gol gak lok.

<sup>13</sup> \*La kantubu at nom levenbabao lara laradi ga tu go, neni ga lok ngan Laradi Mevana, ga sigaara mi lavanga singsiga baalom, la loxontamon tantanan ga is korop lobongobong teren min.

<sup>14</sup> \*La lavatlak teren eburu mi levengkabinim teren gan bun aleng tinotno, ga ngan lovopaxanao i

sovosok. La luxatli ren ga babao ngan laxao bokbolot.

<sup>15</sup> La luxangkedek teren ga ngan-gao ngan loxonuat, no laxao i an amemeles i. La laxaka linga ren ga reng ngan lenaonkaka at lavatdan silok it los ukopok.

<sup>16</sup> \*At lekngen tino, neni gam tebeng lavanuti larapenti, la to at lungusno lavarise sepsep ga anan evan gak lok teren. La lemeren ga lok ngan laxangking i soosoo bobonot mi lolos teren.

<sup>17</sup> Se nia aga ven i, aga subu mididi saparap luxangkedek teren la nia aga met aroo. Ketla ni ga sogo tu rak mi lekngen tino, la ga lok tia, “Nemen gat uta marat. Nenia mun Lurutu Kaxat la Lumumupit.

<sup>18</sup> \*Nenia mun Luntoo Avolo. Aga met pam, ketla nanga a ruuna ka lorooro kopmen taxavaxap teren. La a ruuna bok lolos mavana at lanmet kusu ana suang lumusmaragu at lanmet, la a ruuna lolos mavana at lanmet la a lok tatao lumusmaragu ro Edesa.

<sup>19</sup> \*Kuren la una malagan asu lempanga salai u ven pam i la lempanga salai mo naba vot melemu.

<sup>20</sup> \*Levelinga ali pe at lavasuun at lavanuti larapenti nenu u ven i de saparap lakngak tino, di lok katling lavanuti nedi lubang angelo dik lok tatao mo lavanuti leventaogu lotu. La lavanuti levenbabao gol, di ru katling nom lavanuti leventaogu lotu.”

## 2

### *Lempapaase Uto Saparap Limixin Lotu Ro Epesas*

<sup>1</sup> \*Leeme Silok ga lok bok tia, “Una malagan na levelinga ti laangelo ik lok tatao limixin lotu ro Epesas.

Na levelinga boro ap mo lara im tebeng lavanuti larapenti at lekngen

\* **1:8:** Li 1:4; 15:3; 21:6; 22:13 \* **1:9:** Li 6:9 \* **1:13:** Dan 7:13; 10:5 \* **1:14:** Dan 7:9; 10:6; Li 2:18; 19:12 \* **1:16:** Ib 4:12; Li 1:20; 2:12,16; 19:15,21 \* **1:18:** Ais 44:6; 48:12; Li 2:8; 22:13 \* **1:19:** Li 1:1 \* **1:20:** Li 1:16; 2:1; 3:1 \* **2:1:** Li 1:16,20 \* **2:2:** Li 2:19; 3:1,8,15; 1 Jo 4:1

tino la neni it pas kantubu at lavanuti levenbabao gol.

<sup>2</sup> \*Akleklen lorooro atnimi, la aklen bok leven gugu lolos atnimi la aklen i do mi tu atmatkun kantubu at levesongsongot mo nemi mip kiv i. Aklen box i do mixo esuuxun mi limixin kakapmek, la mira lok tong pen pam nedi di lok do nedi mo luvuttadi vavang. Ketla mira long lenget ka i do nedi limixin kaxarang.

<sup>3</sup> Aklen i do nemi mira tu tuxuruxun pam at lununu atnimi, la migap kip levesongsongot mi lomomo, mo levesongsongot mumu laasen tarak, la mixo molo xepe lununu atnimi.

<sup>4</sup> Ketla a ruuna na lempapaase mumu nemi at levempanga miga lox i, kopmen na lox avukat. Lavavara atnimi ria kopmen na lolos kerekngan miga vavara avor ia at laaleng miga ravasu ngan limixin nunu.

<sup>5</sup> \*Mina doma bilong ti mo lavavara avot atnimi ria, kusu mina ven kibis i do mira subu vam basinge ia. La mina leeng tinotno la minamlong ti mo leveloklok nunuan nemi miga lox avor i. Mo do mi noxo leeng, anaba vot saparap nemi la ana lok kepe nom lababao atnimi.

<sup>6</sup> \*Ketla lara lavanga mo, nia a lok momo minimi ren, mila mi xopara aleng mo leveloklok kakapmek atnedi limixin di mumu asu ne Nikolaus. La nenia bok axo vara rino mo loklok.

<sup>7</sup> \*Do tara i ruuna lubaalung, i lox avukat do neni na ronga res at na levelinga at Loroonan at ne Moroa i tong asu i ri limixin lotu. Do tara i tu tuxuruxun la it pas asi lolos at laxakapmek, anaba lox epovo i rin kusu ni na anan at levempeven at luuna at lorooro, mo ik lok to at lagale lemenemen at ne Moroa.”

### *Lempapaase Uto Saparap Limixin Lotu To Smena*

\* **2:5:** Li 2:16,22; 3:3,19

\* **2:6:** Sam 139:21

\* **2:7:** Lur 2:9; Li 22:2,14,19

\* **2:8:** Li 1:17

\* **2:9:**

2 Ko 11:14-15; Je 2:5; Li 3:9

\* **2:10:** Mt 10:28; 2 Ti 4:8; Je 1:12; Li 3:11

\* **2:11:** Li 20:14; 21:8

\* **2:12:** Ais 49:2; Li 1:16

\* **2:13:** Li 3:8

<sup>8</sup> \*Leeme Silok ga lok bok tia, “Una malagan na levelinga ri laangelo ik lok tatao limixin lotu to Smena.

Anai ni levelinga ap mo Lara neni Lurutu Kaxat la Lumumupit, mo ga met ketla gara roo xat amlong pam.

<sup>9</sup> \*Aklen levesongsongot nemi mip kiv i, la aklen i do mit kis pakpakes. Ketla nemi mip novos aleng mi lempanga boro vana at laxalibet. Aklen levelinga xaxarang atnedi limixin di tong i rinimi do nedi me Judaia. Ketla kopmen, nedi mun limixin di lotu saparap ne Satan.

<sup>10</sup> \*Nemen mita marat ap mo levenmumuat minabap kiv i. Mina ronga i na, Satan naba lok li teventaba atnemi ri loklok tong, la naba lok li teventaba atnemi at loogu xokoxo. La minabap kip mo levesongsongot at lasangaun aleng mun. Mina tu atmatkun mi lununu atnimi saparap ia, keke i do miba met mumu i, la anaba raba nemi mi lorooro avolo ngan lavatbungorong tinimi.

<sup>11</sup> \*Do tara i ruuna lubaalung, i lox avukat do neni na ronga res at na levelinga at Loroonan at ne Moroa i tong asu i ri limixin lotu. Do tara i tu tuxuruxun keneng at levenmumuat, neni noxo suma rinotno lanmet sepsev agepura.”

### *Lempapaase Uto Saparap Limixin Lotu Ro Pegamam*

<sup>12</sup> \*La Leeme Silok ga lok bok tia, “Una malagan na levelinga ri laangelo ik lok tatao limixin lotu ro Pegamam.

Anai levelinga boro ap mo laradi i ruuna lavarise sepsep i anan evan.

<sup>13</sup> \*Akleklen i do mik lok at lemenemen, ne Satan i nemen keneng teren ngan lamgomgo. Ketla mim tebeng alolos laasen tarak. La nemi xopmen mi goxo soxope lununu atnimi ap mo levenaleng ne Antipas ga uu ren. Neni ga nemen ngan laradi raturun la laradi vapaase asu levelinga rak.

Limixin at ne Satan diga sev i dom kantubu at lemenemen silok atnimi, nom ne Satan i nemen teren.

14 \*Ketla a ruuna lempapaase lixilik mun mumu nimi at lempanga mi lox i kopmen na lox avukat. Lentaba atnimi dom dim tebeng alolos levenanasa at ne Balam, mo ga lox ase ne Balak kusu na sar asoogong limixin me Israel ti laxakapmek. Ni ga tong i ridi do dina anan leveluxa laplavang ri lempoovo moroa la ni ga sar asoogong di kusu dina lok laxakapmek maxamang at lixitkis epot.

15 La lentaba luvuttadi bok kantubu atnimi di mumu asu levenanasa at ne Nikolaus.

16 \*Kuren la mina leeng tinotno. Mo do mi noxo leeng, anaba vot soso mun la ana esep eburu midi mi lavarise sepsep naba sixisu mede at langasuk.

17 \*Do tara i ruuna lubaalung, i lox avukat kusu neni na rongga na levelinga Loroonan at ne Moroa i tong asu i ri limixin lotu. Ti mo lara do i tu tuxuruxun la it pas asi amisik laxakapmek, anaba raba i mi leveluxa boro vana at laxalibet, laasen teren lamaana, no i nemen alipe. La anaba raba box i mi luuat bunbun, eburu mi laasen maxat, mo nabak lok at luuat bunbun. Kopmen teta naklen mo laasen, ketla mo laradi xusuk mun naba ruuna ka mo luuat nabaklen i.”

### *Lempapaase Uto Saparap Limixin Lotu Ro Taiataira*

18 \*La Leeme Silok ga lok bok, “Una malagan bok na levelinga ri laangelo ik lok tatao limixin lotu to Taiataira.

Anai levelinga boro at ne Nitna ne Moroa, luxatli ren i babao ngan laxao bokbolot, la luxangkedek teren i ngangao ngan loxonuat, laxao i an amemeles i.

19 Akleklen lorooro atnimi, la aklen bok labalamu atnimi la lununu atnimi, la leveloklok nunuan

atnimi. Aklen levesongsongot nemi mip kiv i, la mo leveloklok nunuan atnimi at na levenaleng i buaang aleng ti mo leveloklok nunuan nemi miga lox i ap mo levenaleng miga ravasu ngan limixin nunu.

20 \*Ketla axo lok momo minimi mumu i na. Mira siam kaka nom latkin ne Jesebel, i tong i do neni latkin papaase ali at ne Moroa. Ketla neni i sar asoogong limixin tarak ti lok laxakapmek maxamang at lixitkis epot la i lok nedi kusu dina anan leveluxa diplavang min ti lempoovo moroa.

21 Ara tong taba vam nom latkin mi levenaleng kusu ni na leeng basinge nom loklok kakapmek, ketla i xopara.

22 Kuren la anaba sev i mi levesongsongot silok, la nedi digang longka i, anaba lok li nedi at losongsongot silok do nedi di noxo leeng basinge leveloklok kakapmek ap mo latkin.

23 \*La anaba sev amet bok laxam-dak teren. La limixin axap di nunu dinabaklen i do nenia ne Penasiak, aklen lorooro at limixin axap la anaba vorang laxakapmek atnemi mi levesongsongot i epovo at loklok at legetgesa radi.

24 Ketla lentaba limixin nunu atnimi dom Taiataira mixo lok momo at nom laanasa at ne Jesebel. Mixo siam ka laanasa ren la miga ke xepe bok mo levenanasa mumuat di tong i do levendomdoma alipe at ne Satan. Nenia a noxo tong bok tevelinga lolos tinimi xusu mina mu asu i.

25 \*Ketla na legesa vanga xusuk mun, minam tebeng lolos mo lorooro nunuan atnimi, se at lom-long tarak.

26 \*Do tara i tu atmatkun la it pas asi lolos at laxakapmek la i lox epovo lavavara rak se at laxavaxap at na lavatbung menemen, anaba raba i mi lolos kusu tim gomgonga

\* 2:14: Kex 22-24; 25:1-2; 31:16; 2 Pi 2:15 \* 2:16: Li 1:16; 3:11; 22:7,12,20 \* 2:17: Pas 16:4,14-15; Jo 6:48-50; Ais 62:2; Li 3:12; 19:12 \* 2:18: Li 1:14-15 \* 2:20: 1 Lav 16:31; 2 Lav 9:22; Li 2:14 \* 2:23: Sam 7:9; Jer 11:20; 17:10; 2 Ti 4:14; Li 20:12-13 \* 2:25: Li 3:11 \* 2:26: Sam 2:8-9



ridi buaang limixin at na lavatbung menemen.

<sup>27</sup> \*I lok ngan ne Tamak ne Moroa ga raba ia mi lolos kusu nia anam gomgonga limixin. Anai i lok ngan nom levelinga at Lovoang Kaala, i lok keretna,

‘La neni nabam gomgonga di mi lakdak aen i lolos, la neni naba sep povorok nedi ngan lengkong sosopen kangka i re-porok.’ *Sam*  
2:9

<sup>28</sup> \*La nia anaba raba bok nedi limixin tarak mi lentian.

<sup>29</sup> Do tara i ruuna lubaalung, i lox avukat do neni na ronga res at levelinga Loroonan at ne Moroa i tong asu i ri limixin lotu.”

### 3

#### *Lempapaase Uto Saparap Limixin Lotu Ro Sadis*

<sup>1</sup> \*La Leeme Silok ga lok bok tia, “Una malagan i na levelinga ri laangelo ik lok tatao limixin lotu ro Sadis.

Anai levelinga boro ap mo laradi i ruuna lavanuti leventoonan dik lok to melamgo at ne Moroa, la im tebeng lavanuti larapenti. Akleklen leveloklok atnimi. Limixin di lok do mi ruuna lorooro, ketla kopmen, mi ruuna mun lanmet.

<sup>2</sup> Araklen pam i do lorooro atnimi xopmen na mu asu lavavara at ne Moroa rak. Kuren la mina xatu kaxat basinge mo lanmet la mina lox alolos mo lorooro. Lavanga mina met epopolo.

<sup>3</sup> \*Mina doxoma bilong ti mo levenanasa miga ronga ka vam i, la mina mu asu i. La mina leeng tinotno basinge mo leveloklok kakapmek atnimi. Mo do mi noxo xatu kaxat basinge mo laxakapmek, anaba vot pasa nimi ngan laradi xipkip pilo, la nemi xa mi noxoklen loxonaleng potpot tarak.

<sup>4</sup> \*Ketla lentaba mun atnimi ro Sadis kopmen di goxo lok laxakapmek. Nedi mo dinaba sigaara mi levesingsiga bunbun la dinaba emu minia mila nedi mo di epovo rinotno.

<sup>5</sup> \*La nedi di tu atmatkun at lununu atdi, nedi bok dinaba sigaara mi levesingsiga bunbun. Nia xopmen tinotno a noxo lok kepe levenasen atdi ro at lubuk at lorooro, ketla nia anaba tong i ri ne Tamak eburu mi lubang angelo ren do nedi limixin tarak.

<sup>6</sup> Do tara i ruuna lubaalung, i lox avukat do neni na ronga res at na levelinga at Loroonan at ne Moroa i tong asu i ri limixin lotu.”

#### *Lempapaase Uto Saparap Limixin Lotu Ro Piladelpia*

<sup>7</sup> \*Leeme Silok ga lok bok tia, “Una malagan na levelinga ri laangelo ik lok tatao limixin lotu dik lok to Piladelpia.

Anaa levelinga neni boro at laradi i melemelengan la i ruturun. La neni im tebeng lengki at ne Devit, loorong megano. Mo lengki i susuang lumusmaragu at Linintoo at ne Moroa. Mo lumusmaragu neni i susuang i, kopmen tara na epovo xusu na vi pe i, la mo lumusmaragu neni i vi pe i, ixo epovo do tara na suang i.

<sup>8</sup> \*Aleklen leveloklok atnimi. Ketla mina ronga i na, ara suang taba vam nimi mi lumusmaragu, la ixo epovo do tara na sat pe i. Aklen i do nemi mi ruuna lolos lixilik mene la aklen box i do nemi migang tonga res at levelinga rak, la kopmen migoxo sok tixirixes laasen tarak.

<sup>9</sup> \*Lentaba limixin mo di tong i do nedi me Judaia, ketla kopmen, nedi lamaanat babala la nedi limixin di lotu saparap ne Satan. Anaba lok nedi la dina vot pasa nimi la dina xis tiktikbu mi lempatgulom atdi dom melamgo atnimi la dinaba tong asu i do nenia a balamu aleng tinotno nimi.

\* 2:27: Li 12:5 \* 2:28: Li 22:16 \* 3:1: Li 1:4,16; 2:2 \* 3:3: Li 2:5; 1 Ts 5:2 \* 3:4: Ju 1:23  
\* 3:5: Mt 10:32; Lu 10:20; Li 3:18 \* 3:7: Ais 22:22 \* 3:8: 1 Ko 16:9; Li 2:2 \* 3:9: Li 2:9; Ais 45:14; 49:23; 60:14 \* 3:10: Lu 21:19; 2 Ti 2:12

10 \*Nemi miga momo ri mumu asu levelinga rak, ga lok keretna, 'Mina tu atmatkun kantubu at levenmu-muat.' Kuren la anaba lok kepe nemi basinge nom levenmaares mumuat mo naba vot at na lavatbung menemen, kusu na lok tong pen limixin axap.

11 \*Anaba vot soso mun. Minam tebeng alolos mo lununu atnimi kusu tara noxo xip pilo ka mo lempatbungorong atnimi.

12 \*Do tara na tu tuxuruxun, anaba lox i ngan luxus una at loogu laplavang at ne Moroa rak, la ixo epovo rinotno do neni naba vas su basinge i. Anaba malagan li laasen at ne Moroa rak teren la laasen orong bok at lemenemen silok at ne Moroa rak. Mo lemenemen silok, ni Jerusalem maxat mo naba ravasi boro vana at laxalibet basinge ne Moroa rak. La anaba malagan bok laasen maxat tarak go ren.

13 Do tara i ruuna lubaalung, i lox avukat do neni na ronga res at na levelinga at Loroonan at ne Moroa i tong asu i ri limixin lotu."

#### *Lempapaase Uto Saparap Limixin Lotu Ro Lodisia*

14 \*La Leeme Silok ga lok bok tia xeretna, "Una malagan na levelinga ti laangelo ik lok tatao limixin lotu ro Lodisia.

Anaa levelinga boro at ne Luruturun, ni Laradi Ruturun i tong asu levelinga at ne Moroa la ni Lamgomgo at luruntudum li at ne Moroa.

15 \*Aklen leveloklok atnimi la aklen i do lodomdoma atnimi xopmen naplivi ri lok lugugu at ne Moroa. A vara i do lotu atnimi naplivi aleng kopla na mumudut tinotno.

16 Kuren la nenia anaba riki xepe nemi basinge ia mila nemi mik lok kantubu, lotu atnimi kopmen naplivi la kopmen na mumudut tinotno.

17 \*Nemi mi tong i do, 'Nema mo map novos aleng la ma ruuna lempanga axap la maxok pakes bok ti tempanga.'

Ketla mixoklen i do nemi limixin etaba la mi baava. Nemi mi lok ngan limixin pakpakes, lengkatli atdi i main, la dik lok beleben.

18 \*Kuren la a tong lolos i na rinimi do mina un ka logol nunuan mede rak. Ni logol laxao in tin pes levenmexexe basinge i la imgames aleng. La kerepmo minabap novos aleng. Mina un ka bok levesingsigaara bunbun kusu minaba etara pe lengkot mamangan atnimi min, kusu mi noxok lok beleben. Mina un ka bok levendan momonok kusu minaba saba li i dom at lengkatli atnimi, kusu mina reven.

19 \*Nedi nia a balamu di, a vaase aronga di la a lox aleeng di. Kuren la nemi bok mina doma avukat la mina leeng.

20 \*Mina ronga i na. A tu ro at lumusmaragu la ap dipdi. Do tara i ronga xibis laxaka rak la na suang lumusmaragu, anaba vubeles ukeneng at loogu ren la mana anan eburu.

21 \*Do tara na tu atmatkun at lununu ren la it pas asi lolos at laxakapmek, anaba mulus ka i xusu ni nabat kis eburu minia ro at loxonin orong tarak, kerekngan ia aga sak tup mi lavamunepen minia la nanga nia at kis eburu mi ne Tamak to at loxonin orong teren.

22 Do lubaalung mo at tara, i lox avukat do neni na ronga res at na levelinga at Loroonan at ne Moroa i tong asu i ri limixin lotu."

## 4

### *Loxonin Orong At Ne Moroa Ro Vana At Laxalibet*

1 \*Melemu at na, aga ven manga lara lisilimet. Maxeneng teren aga ven lara lumusmaragu ga rem suang to vana at laxalibet. La aga ronga

\* 3:11: Li 2:10,16 \* 3:12: Ais 62:2; 65:15; Isi 48:35; Li 14:1; 21:2 \* 3:14: Li 1:5; 19:11; Kl 1:15  
 \* 3:15: Ro 12:11; Li 2:2 \* 3:17: Ose 12:8; 1 Ko 4:8; Lu 12:21 \* 3:18: Ais 55:1; Je 2:5; Li 3:5; 4:4; 16:15 \* 3:19: 1 Ko 11:32; Li 2:5 \* 3:20: Jo 14:23; 1 Jo 2:24 \* 3:21: Mt 19:28 \* 4:1: Li 1:1,10

laxaka at Lara xerekngan no avot nia aga ronga i, gang teng ngan lurus. Ga lok tia, "Ude vana u, la ana lox ase u mi lempanga naba rupot melemu at nai."

<sup>2</sup> \*La soso mun Loroonan at ne Moroa ga suxuna ia, la to at laxalibet loxonin orong mo gak lok mi Lara gat kis teren.

<sup>3</sup> \*La mo laradi gat kis teren, neni ga milik ngan tinotno limikmilik at la jessa, loxonuat gamgames i memele la ga milik bok ngan lakanilian, loxonuat gamgames i memele aleng ngan lada. La laxaburi gak lok kangkan mo loxonin orong ga milik ngan la emeral, loxonuat gamgames i mamaxa.

<sup>4</sup> \*La legepu sangaun mi lavanuet bok lengkot kitkis orong gak lok kangkan mo loxonin orong la legepu sangaun mi lavanuet loxongkulao amgomgo digat kis teren. Diga sigaara mi levesingsiga bunbun la lempatbungorong i gol gak lok to at lempatlak atnedi.

<sup>5</sup> \*Boro at nom loxonin orong, langangao at lavanga i mam ga ravasu. La nia aga ronga leretepaavat ga oon, la to melamgo at nom loxonin lavanuti levenbabao mo ga babao. Nedi lavanuti leventoonan at ne Moroa.

<sup>6</sup> \*La to melamgo ap mo loxonin orong, lara lavanga bok mo ga milik ngan ta langsung liriong silok ga xasep aleng la ga silok ngan lavatdan kis.

La lavanuet levempanga rooro diga tu kangkan amisik loxonin orong, diga umsu mi laxangkatli to melamgo la to melemu bok.

<sup>7</sup> Lara avot ga lok ngan la laion, lara sepsev agepura ga lok ngan lubulumaxao, lara sepsev avantun ga ruuna lamakmaran at lavatlak at laradi, la lara sepsev avanuet ga ven ngan lamaalom taptava.

\* **4:2:** Sam 47:8; Ais 6:1; Li 4:9  
 \* **4:3:** Isi 1:28  
 \* **4:4:** Ais 24:23; Li 3:18; 6:11  
 \* **4:5:** Isi 1:13; Li 1:4; 8:5; 11:19; 16:18  
 \* **4:6:** Isi 1:5-10,22; 10:14  
 \* **4:7:** Dan 4:34; 6:26; 12:7; Li 4:2,10  
 \* **4:8:** Ais 6:2,3; Isi 1:18; 10:12; Li 1:4,8  
 \* **4:9:** Dan 4:34; 6:26; 12:7; Li 4:2,10  
 \* **4:10:** Li 4:9; 5:1,7,13; 6:16; 7:10,15; 19:4; 21:5  
 \* **5:1:** Li 4:2,10; Ais 29:11; Isi 2:9-10

<sup>8</sup> \*Ti nom lavanuet levempanga rooro dik lox amisik, nedi getgesara diga ruuna lavanna levempapa, diga umsu mi levengkatli digak lok at lengkot axap la to bok maxopok at levempapa atdi. La at levenaleng kangking la kanimin kopmen dina xap ti tong na levelinga,

"I melemelengan, i melemelengan, i melemelengan. Neni Leeme Silok ne Moroa la Lanaraavuk. Ni ga nemen ganoxa la i nemen mo, la naba vot bok melemu." *Ais 6:2-3*

<sup>9</sup> \*La mo lavanuet levempanga rooro di tong asu amisik leemi asu la lasinorong la levelinga rotong avukat ti mo Lara it kis amisik to at loxonin orong teren. La ni naba rooro amisik. Do dina tong i nom,

<sup>10</sup> \*mo legepu sangaun mi lavanuet loxongkulao amgomgo dit kis tiktikbu mi lempatgulom atdi to melamgo at ne Moroa mo it kis at loxonin orong teren la di lotu parap ne Moroa naba rooro amisik la kopmen taxavaxap teren. La di lok li lempatbungorong atdi ro melamgo at loxonin la di lok keretna,

<sup>11</sup> "Moroa, Leeme Silok atnama, nenu xusuk mun u epovo na lok kaka leemi asu, lasinorong mi lolos, mila nenu uga rudum li lempanga axap. La at lavavara mun taram uga rudum li di la uga lok li di xusu dina rooro."

## 5

### *Lanasip Ga Lok Ka Lugun Linga Boro At Ne Moroa*

<sup>1</sup> \*Melemu nia aga ven lugun linga ro at lekngen tino ap mo Lara gat kis to at loxonin orong. Mo lugun linga ga umsu mi levenmamalagan to melamgo la to bok melemu ren, digam lut avarang i mi lavanuti lev-elumlut.

<sup>2</sup> La nia aga ven laangelo lolos gap kup silok mi lususue xeretna, “Nege i epovo do na ba kaxat na levelumlut la na obes na lugun linga?”

<sup>3</sup> Ketla goxopmen teta ro vana at laxalibet koplā de xopak at lavatbung menemen koplā ro maxopak at lavatkangka gita epovo xusu na obes mo lugun linga la gita us mo levelinga ga nemen keneng teren.

<sup>4</sup> La nia agang teng aleng mila kopmen teta gita epovo xusu gita obes i nom lugun linga la ri us mo levelinga.

<sup>5</sup> \*Melemu lara atdi luvuttadi amgomgo ga lok tia, “Nemen utang teng. Mo laion, ni at libibinat at ne Juda, la livisik li at ne Devit, neni ira but asi vam lavamunepen min, la neni mun i epovo ri sak korop mo lavanuti levelumlut la na obes mo lugun linga.”

<sup>6</sup> \*La aga ven lara Lanasip ga tu kantubu rinotno at nom loxonin orong, la mo lavanuet levempanga rooro eburu mi loxongkulao amgomgo diga tu kangkan i. Lanasip ga tu, ga ven ngan ta do limixin diga sev amet pam i. Neni ga ruuna lavanuti levengkom la lavanuti levengkatli, nedi leventoonan mo ne Moroa ga riki asi di ri lengkot axap at na lavatbung menemen.

<sup>7</sup> \*La mo Lanasip gat pas la ga lok ka mo lugun linga boro at lekngen tino at ne Moroa, mo gat kis at loxonin orong.

<sup>8</sup> \*Neni ga lok ka mo lugun linga, la nom lavanuet levempanga rooro eburu mi nom legepu sangaun mi lavanuet loxongkulao amgomgo diga xis tiktikbu mi lempatgulom atdi ro melamgo at Lanasip. Nedi getgesara digam tebeng lengkon taaleng eburu mi leventingtigon gol mo ga umsu mi levempavaxan una so mavak. Ni ga ru katling levesingising atnedi limixin at ne Moroa.

<sup>9</sup> \*La nom lavanuet levempanga

rooro eburu minedi loxongkulao amgomgo diga vixan lara loxompixan maxat, i lok keretna,

“Nenu u epovo rinotno xusu una lok ka lugun linga la una ba kaxat kepe mo levelumlut teren mila limixin diga sev amer u. Ketla uga roo xat amlong la at nom mun lada ram uga un ka amlong limixin ti ne Moroa. Nedi at levenabung mixin axap la boro bok at levempapaase vetpes, la boro bok at lenbantuxu vetpes, la boro bok at larabibinat petpes.

<sup>10</sup> \*La uga lok katling di ngan lava maasa at Linintoo ram kusu dina lok lugugu at ne Moroa, la dinabam gomgonga limixin axap at na lavatbung menemen ngan limixin amgomgo atdi.”

<sup>11</sup> \*Melemu aga milik la aga ronga buaang nedi laxanangelo, diga umsu aleng la a goxo epovo xusu ana us di. Diga tu kangkan mo loxonin orong eburu mi lavanuet levempanga rooro la loxongkulao amgomgo.

<sup>12</sup> \*La diga vixan silok keretna, “Lanasip, no limixin diga sev amer i. Neni i epovo rinotno xusu na ruuna ka lolos, lapnovos, lakleklen, lasinorong, leemi asu la leveloklox anarong.”

<sup>13</sup> \*Melemu aga ronga leemi asu boro at lempanga axap ne Moroa ga rudum li di, nedi limixin eburu mi levempanga mi lavanuet kangkedek atdi, la nedi bok lempanga at laxalibet la lempanga nade xopak at lavatbung menemen la lempanga bok dik lok keneng at lebelen laxangka la lempanga dik lok at lebelen laras. Diga vixan,

“Ti mo Lara it kis at loxonin orong la ti Lanasip bok, ma raba numu mi leveloklox anarong, lasinorong, leemi asu la lolos

\* 5:5: Lur 49:9; Ais 11:1,10; Li 22:16 \* 5:6: Sak 4:10; Jo 1:36; Li 1:4; 5:12; 13:8 \* 5:7: Li 4:2,10  
 \* 5:8: Li 8:3-4; 14:2; 15:2; Sam 141:2 \* 5:9: Sam 33:3; 40:3; 96:1; 144:9; Li 14:3 \* 5:10: Pas 19:6;  
 Ais 61:6; Li 1:6; 20:6; 22:5 \* 5:11: Dan 7:10; Ib 12:22 \* 5:12: 1 Let 29:11; Li 5:6 \* 5:13: 1 Let  
 29:11; Li 4:2,10

na nemen amisik la kopmen taxavaxap teren.”

<sup>14</sup> La mo lavanuet levempanga rooro diga lok, “I ruturun.” La mo loxongkulao amgomgo diga xis tiktikbu mi lempatgulom atdi la diga lotu parap ne Moroa eburu mi Lanasip.

## 6

### *Lanasip Ga Ba Kaxat Kepe Levelumlut At Lugun Linga*

<sup>1</sup> \*Melemu aga ven Lanasip ga ba kaxat kepe lumlut avot at nom lavanuti levelumlut. La aga ronga lara atnedi lavanuet levempanga rooro ga vaase silok ngan leretepaavat ga lok ti lara, “Ude u.”

<sup>2</sup> \*La nia aga milik kaxat la aga ven lavaros bunbun, la mo laradi gat kis teren, neni gam tebeng labanara. La ni ga lok ka lavatbungorong, la ni ga sixit kaxat uto at lengkot axap at na lavatbung menemen ngan ta laradi esep kusu na sev asi limixin munepen min.

<sup>3</sup> La melemu Lanasip ga ba kaxat kepe manga levelumlut sepsev agepura. La aga ronga lavanga rooro sepsev agepura ga lok ti lara, “Ude u.”

<sup>4</sup> La lara lavaros manga ga vas su, ga memele aleng. La mo laradi gat kis teren, ga lok ka lolos kusu na lok kepe lumulum kantubu at limixin at na lavatbung menemen, kusu limixin dinaba esev amet. La neni ga lok ka bok lavarise sepsep i baalom aleng.

<sup>5</sup> La melemu Lanasip ga ba kaxat kepe manga levelumlut sepsev avantun. La aga ronga lavanga rooro sepsev avantun ga lok ti lara, “Ude u!” La aga ven lara lavaros ga bibi aleng, la mo laradi gat kis teren gam tebeng lisikel to at lekngen.

<sup>6</sup> La aga ronga lavanga ga lok ngan laxaka linga boro xantubu ap mo lavanuet levempanga rooro, ga lok, “I epovo do una lox aurut luunun

at lempanga anan. Legesa buxom piao ni luunun lixilik ti laradi i gugu at leges aleng. La lavantun buxom balirais ni luunun lixilik ti laradi i gugu at leges aleng. Ketla nemen uta lok kapmek ladan momonok la laxadan vaen.”

<sup>7</sup> La Lanasip ga ba kaxat kepe levelumlut sepsev avanuet. La aga ronga laxaka linga at lavanga rooro sepsev avanuet ga lok ti lara, “Ude u.”

<sup>8</sup> \*La nia aga milik kaxat, la aga ven lara lavaros ga ngangan la mo laradi gat kis teren, laasen teren ne Lanmet. La lara ga mumu ro melemu, laasen teren ne Edesa. La duga lok ka lolos mavana at lenep i sepsev avanuet at limixin axap at na lavatbung menemen, kusu duna sev amet di keneng at levenesep silok. La loroxo la levenanmeres silok la levempanga mi lavanuet kangkedek atdi dinaba sev amet bok limixin.

<sup>9</sup> La Lanasip ga ba kaxat kepe manga levelumlut sepsev avalimo. La aga ven uto saparap loxonin laplavang la maxopok teren aga ven labaroonan at limixin nunu diga met gano. Limixin diga sev amet di mila diga tong asu levelinga at ne Moroa la levelinga ruturun at ne Iesu Karisito.

<sup>10</sup> \*Digap kup silok mi laxaka linga xeretna, “Moroa, nenu Lanaraavuk la u melemelengan la u ruturun aleng. Lingisa ba uba vaxaru li limixin at lavapaase la una sev amet di ri vorang laniu nema maga ekip tangarang min?”

<sup>11</sup> \*La nedi getgesara diga lok kaka levesingsigaara bunbun la diga lok ka levelinga do dina ngangais be la dina lox amas, se limixin dina sep bok tentaba at luvutneton di eburu mi lavasaxaruki xerekngan nedi diga uu. Do luutus at nom limixin na epovo, Moroa naba vorang laniu atnedi axap.

\* **6:1:** Li 4:6; 5:1 \* **6:2:** Sak 1:8; 6:1-6 \* **6:8:** Jer 15:1-3; Isi 5:12,17; 14:21; 33:27 \* **6:10:** Li 16:7; Lal 32:43; Sam 79:10 \* **6:11:** Li 3:18; 7:9,13; 19:14 \* **6:12:** Mt 24:29; Gu 2:20; Li 8:12

12 \*La aga ven Lanasip ga ba kaxat kepe manga levelumlut sepsev avanna. La langne silok ga vot, la laxangking gak maxat ngan lavanga singsiga limixin di lox i mi laxabinim bibi at lavatme. La lagaaling axap kopmen goxo soosoo axasep bok ba, ketla ga soosoo memeles ngan ta lada.

13 \*La laxampenti boro vana at laxalibet diga subu si ukopok ti lavatbung menemen kerekngan lempeven at luuna pik mo i mada vam, im subu si do lamanman silok it mas i.

14 \*La lamavangkap ga sonao ngan lugun diga vegun i, la lempatkaana axap eburu mi levesoxan diga vas kaxat uto vetpes.

15 \*Melemu lavaorong at lavatbung menemen la limixin amgomgo la luvuttadi amgomgo at limixin esep, la limixin dip novos la limixin lolos, la nedi bok lavasaxaruki la limixin bok kopmen di lavasaxaruki, diga lipe ro at laratabuang la ro xantubu at lempattaavut silok to at larakaana.

16 \*Digap kup ti lempatkaana mi lemparuat keretna, "Mina subu pavaa nama la mina lox ali pe nama basinge mo laradi it kis to at loxonin orong la basinge bok lebelemamao, Lanasip naba lox asu i rinama.

17 \*Mila mo laaleng silok at lebelemamao atdu nanga ira vot pam la ixo epovo xusu tara naba ekini min."

## 7

### *Limixin Boro Israel (144,000)*

1 \*Melemu at nai nia aga ven lavanuet lubungangelo diga tu ro at lavanuet mesuluk at na lavatbung menemen, digam tebeng alis lavanuet laramera manman at lavatbung menemen kusu lamanman noxot mas lavatbung menemen koplara laras koplara larauna.

2 La nia aga ven manga lara laangelo ga vas su boro at loxot, laxangking it losu e. Neni gap kip lavanga loklok katling at ne Moroa, Luntoo Avolo. La ni gap kup mi laxaka silok ti mo lavanuet lubungangelo diga lok ka lolos kusu ti lok kapmek lavatkangka eburu mi laras.

3 \*La ni ga lok, "Nemen mita lok kapmek lavatkangka koplara laras koplara larauna, ise do mana lok li loklok katling to at levenmang at lavasaxaruki at ne Moroa."

4 \*La diga tong i ria do leexes atdi axap mo limixin diga ruuna loklok katling at ne Moroa ro at levenmang atdi ga epovo at legesa sanggaun kobot mi lavanuet sanggaun mi lavanuet larabin sanggaun kobot (144,000). Nedi at lasangaun mi legepura larabinat me Israel.

5 Lasangaun mi legepura larabin sanggaun kobot (12,000) diga lok katling di at libibinat at ne Juda; lasangaun mi legepura larabin sanggaun kobot (12,000) at libibinat at ne Ruben; lasangaun mi legepura larabin sanggaun kobot (12,000) at libibinat at ne Gat.

6 Lasangaun mi legepura larabin sanggaun kobot (12,000) at libibinat at ne Asa; lasangaun mi legepura larabin sanggaun kobot (12,000) at libibinat at ne Napitali; lasangaun mi legepura larabin sanggaun kobot (12,000) at libibinat at ne Manase.

7 Lasangaun mi legepura larabin sanggaun kobot (12,000) at libibinat at ne Simion; lasangaun mi legepura larabin sanggaun kobot (12,000) at libibinat at ne Levi; lasangaun mi legepura larabin sanggaun kobot (12,000) at libibinat at ne Isaka.

8 Lasangaun mi legepura larabin sanggaun kobot (12,000) at libibinat at ne Sebulon, lasangaun mi legepura larabin sanggaun kobot

\* 6:13: Ais 34:4 \* 6:14: Ais 34:4; Li 16:20 \* 6:15: Ais 2:10,19,21 \* 6:16: Lu 23:30; Li 4:2,10  
\* 6:17: Jol 2:11; Nam 1:6; Mal 3:2 \* 7:1: Jer 49:36; Dan 7:2 \* 7:3: Isi 9:4,6; Li 9:4 \* 7:4: Li 14:1,3

(12,000) at libibinat at ne Josep, la lasangaun mi legepura larabin sangsangaun kobot (12,000) at libibinat at ne Benjamin.

*Buaang Limixin Diga Sigaara Levempanga Singsiga Bunbun*

<sup>9</sup> \*Melemu at nai aga ven buaang nedi limixin, ixo epovo do tara na us nedi. Nedi boro at lengkot axap at na lavatbung menemen, la at larabibinat axap la at levenasen bantuxu axap la boro at lempapaase axap, diga tu ro melango at loxonin orong la to melango bok at Lanasip. Diga sigaara mi levempanga singsiga bunbun. La digam tebeng lempavaxan bisi at levengkikngen di.

<sup>10</sup> \*La digap kup silok keretna, "Loklox arooro boro at ne Moroa, mo it kis at loxonin orong teren la boro bok at Lanasip."

<sup>11</sup> La mo lubungangelo axap diga tu kangkan loxonin orong la nedi legepu sangaun mi lavanuet loxongkulao amgomgo eburu mi lavanuet levempanga rooro, diga xis tiktikbu mi lempatgulom atdi ro melango at loxonin orong la diga lotu parap ne Moroa.

<sup>12</sup> \*Diga lok keretna, "Tuturun pam. Loklox anarong, la leemi asu, lakleken, luvukat, la lasinorong, mi lolos ti ne Moroa atdik amisik la kopmen taxavaxap teren. Tuturun tinotno."

<sup>13</sup> \*La lara atnedi loxongkulao amgomgo ga sue ia, "Nege di na limixin di sigaara mi levesingsiga bunbun, la di laa rinotno meva?"

<sup>14</sup> \*La aga lok tin keretna, "Leeme silok. Axoklen i, nenu uklen i."

La ni ga lok tia, "Nedi na limixin digap tavasu basinge mo levenmaares, laxanmumuat solo ga vot teren. La dira gos pam levesingsigaara atdi mi lada at Lanasip la dira lox anbun axap pam i.

<sup>15</sup> \*Kuren la di tu amisik to melango at loxonin orong at ne Moroa la di gugu amisik tin at lengkangking mi lengkanimin keneng ap mo loogu laplavang teren. La ne Moroa, mo it kis at nom loxonin orong, neni naba lok tatao avukat di ro xeneng at loogu ren.

<sup>16</sup> \*Di noxo roxo bok ba, la di noxo minu bok ba. La laxangking noxo soosoo lolos bok ba mavana atdi la liplivi at laxangking noxo sep polo ridi.

<sup>17</sup> \*Mila Lanasip mo ik lok kantubu at loxonin orong, neni naba lok tatao di kerekngan laradi ik lok tatao levesipsip teren. La neni naba sat kaka nedi uto at levendan tooro i puuvut su la ne Moroa naba lok kepe axap levengkamkabili dan basinge lengkatli atnedi."

## 8

*Lanasip Ga Ba Kaxat Kepe Levelumlut Sepsev Avanuti*

<sup>1</sup> \*La Lanasip ga ba kaxat kepe levelumlut sepsev avanuti, la lenmila aoon ga nemen to vana at laxalibet at lavantun sangaun minit.

<sup>2</sup> La aga ven lavanuti lubungangelo mo di tu amisik to melango at ne Moroa, la diga lok ka lavanuti leventu.

<sup>3</sup> \*La lara laangelo vetpes, mo gam tebeng logol tingtigon kusu ti xotos levempavaxan una mavak, neni ga vot la ga tu saparap loxonin laplavang to melango at ne Moroa. La ni ga lok ka laxampavaxan una kusu na xotos i ri ne Moroa la ga raba bok ne Moroa mi levesingising at limixin teren. Neni ga lox i na ap mo loxonin i gol aleng, ga tu ro melango at loxonin orong at ne Moroa.

<sup>4</sup> \*La lusuxa at nom levempavaxan una mavak ga urut boro at lekngen mo laangelo uto vana saparap ne

\* 7:9: Li 3:18 \* 7:10: Sam 3:8; Li 4:2,10 \* 7:12: Li 5:12; 11:17 \* 7:13: Li 3:18 \* 7:14: Mt 24:21 \* 7:15: Li 4:2,10 \* 7:16: Ais 49:10 \* 7:17: Sam 23:2; Ais 25:8; Jo 10:11; Li 5:6; 21:4 \* 8:1: Abk 2:20 \* 8:3: Li 5:8; 9:13; Pas 30:1-3 \* 8:4: Li 5:8

Moroa eburu mi mo levesingising atnedi limixin at ne Moroa.

<sup>5</sup> \*La laangelo ga lok ka lavattingtigon la ga suxa i mi laxao boro at loxonin laplavang la ga lu asi min uto at laxangka, la leretepaavat ga repat aon mi lavanga ga mam eburu mi langne silok.

### *Lubungangelo Diga Mas Leventu Atnedi*

<sup>6</sup> Melemu mo lavanuti lubungangelo diga gagas mi lavanuti laratu atnedi kusu dina mas di.

<sup>7</sup> \*Laangelo avot ga mas mo lururen. La lengkos uat gan bun aleng eburu mi laxao ga subu ukopok ti laxangka eburu mi lada. La lenep sepsev avantun at laxangka ga aan axap mi laxao la lenep sepsev avantun bok at larauna ga aan axap mi laxao la lempivilis avukat ga an axap.

<sup>8</sup> \*La laangelo sepsev agepura ga mas lururen, la mo lara lavanga ga lok ngan lavattaavut silok, laxao gak lok teren, lara ga lu asi min uto xopok at laras. La lenep sepsev avantun at laras ga vee da.

<sup>9</sup> La lenep sepsev avantun at lempanga axap di rooro at lebelen laras diga met. La lenep sepsev avantun at levempatmon diga lok kapmek.

<sup>10</sup> La laangelo sepsev avantun ga mas lururen la langsung lavapenti ga subu si boro vana at laxalibet ga ngangao lolos ngan loxonaros kao silok, la ga subu at lenep sepsev avantun at larataadan.

<sup>11</sup> \*Laasen ap mo lenti ne Laksoxobi. Lenep sepsev avantun at laradan axap ga so mamao. Buaang nedi limixin diga in ap mo laradan diga met, mila mo levendan ga rem gili la ga so mamao.

<sup>12</sup> \*La laangelo sepsev avanuet ga mas lururen la laxangking la lagaaling la larapenti, lara ga sep di la lenep sepsev avantun at laxangking

ga buxumin, la lenep sepsev avantun bok at lagaaling ga buxumin, la lenep sepsev avantun at larapenti goxo soosoo. Lenep sepsev avantun at levenaleng kangking, laxangking kopmen goxo soosoo. La lenep sepsev avantun at levenaleng kanimin, lagaaling kopmen goxo soosoo bok.

<sup>13</sup> \*Nia aga reven i na, la aga ronga lamaalom, gang teng lolos to vana at lamavangkap la ni gang teng keretna, "Naba lok kapmek aleng, naba lok kapmek aleng tinedi limixin di rooro at na lavatbung menemen, mila levenmumuat lolos naba vot at loxonaleng mo lavantun lubungangelo dina mas laratu atdi la mo loxonaleng ira auret ta."

## 9

<sup>1</sup> \*La laangelo sepsev avalimo ga mas mo lururen la aga ven lenti no xopok at laxangka ga subu si vam boro vana lamavangkap. La mo lenti ga lok ka lengki ri suang lumusmaragu at lemeroon.

<sup>2</sup> \*La ni ga suang lumusmaragu at lemeroon la lusuxa ga ravasu ngan lusuxa at langsung laxao. La mo lusuxa ga vula pe laxangking eburu mi lamavangkap la laxangking goxo epovo ri soosoo.

<sup>3</sup> \*La laxanasku ga ravasu boro at lusuxa uto at laxangka, la diga lok ka lolos ngan lolos at laksoxomet at na lavatkangka.

<sup>4</sup> \*La diga lok ka levelinga do nemen gat di guta lok kapmek lempivilis at na lavatkangka kopla levenasen ang bok, kopla levenuna. Ketla dina lox asongot mene limixin, kopmen di goxo ruuna loklok katling at ne Moroa ro at levenmang atdi.

<sup>5</sup> La diga lok ka lolos kusu ti lox asongot nedi at lavalimo gaaling mun, ketla nemen gat di guta sev amet di. Mo losongsongot nedi diga

\* **8:5:** Mas 16:12; Pas 19:16-19; Li 4:5; 11:19; 16:18  
 Pas 7:20-21 \* **8:11:** Jer 9:15 \* **8:12:** Li 6:12-13  
 Lur 19:28; Pas 19:18; Jol 2:2,10 \* **9:3:** Pas 10:12,15

\* **8:7:** Pas 9:23-26; Isi 38:22; Jol 2:30 \* **8:8:**  
 \* **8:13:** Li 9:12; 11:14 \* **9:1:** Li 20:1 \* **9:2:**  
 \* **9:4:** Li 7:3 \* **9:6:** Jop 3:21; Jer 8:3; Li 6:16



suma i, ga lok ngan losongsongot at laksoxomet do i bi asongot laradi.

6 \*La keneng ap mo lavalimo gaaling limixin dinabam suma mo losongsongot silok la dinaba vara ri lanmet, ketla di noxo suma ka i. Dinaba vara meremet ketla lanmet naba oo basinge di.

7 \*Mo laxanasku diga ven ngan laxanos diga gagas kusu ti lesep. La to at lempatlak atdi diga siga lempatbungorong, ga lok ngan logol. La levenmeren diga lok ngan levenmeren at luvuttadi.

8 \*Lengkabinim atdi ga baalom ngan lengkabinim at lavakin la levesangsa atdi ga lok ngan levesangsa at laion.

9 \*Diga siga pe lenbongobong atdi mi levempanga singsiga aen. La lasasang at levempapa atdi ga lok ngan lasasang at laxanos eburu mi laxangkaris digak sixit uto at lesep.

10 La diga ruuna bok levenatketke la ga soxobi ngan at levenaksoxomet. La mo lolos ti sev asongot gak lok at levenatketke atdi la diga epovo na lox asongot limixin keneng ap mo lavalimo gaaling.

11 Diga ruuna loorong, neni laangelo ik lok tatao lemeroon. Laasen teren keneng at lavapaase Ibru do ne Abadon la at lavapaase Grik do ne Apolion. Lavasuun at na laasen do "Laradi sesele utut kepe."

12 \*Lumumuat avot mo gara xap pam, ketla legepu mumuat move gara vot bok.

13 \*La laangelo sepsev avanna ga mas luru ren, la aga ronga laxaka linga boro at lavanuet mesuluk ap mo loxonin laplavang i gol la i tu ro melamgo at ne Moroa.

14 \*La ni ga lok ti mo laangelo sepsev avanna xeretna, "Una soxomus asu lavanuet lubungangelo mo dik lok at loogu xokoxo to at ladan silok Iupretis."

15 \*Ni ga soxomus asu mo lavanuet lubungangelo la mo diga gagas ti mo loxonatat aleng ap mo laaleng ap mo lagaaling la ap mo lamaares kusu dina sev amet lenep sepsev avantun at limixin axap.

16 La aga ronga luutus at limixin esep ga buaang aleng, digat kis at laxanos atdi ga epovo at legepu san-gaun kobot milion. (200,000,000)

17 La keneng at na lisilimet tarak aga ven mo laxanos la mo luvuttadi digat kis atdi diga siga pe lenbongobong atdi, mi levempanga singsiga aen mo ga memele aleng, la ga mamaxa ngan la sapai, ni loxonuat gamgames i mamaxa. La nom lempanga singsiga ga ngangan bok ngan salpa, mo i lok ngan laxakup ngangan. La lempatlak ap mo laxanos ga lok ngan lempatlak at laxan laion, la laxao eburu mi lusuxa la lasalpa ga ravasu boro at levenngusno atdi.

18 La na lavantun levempanga, laxao, lusuxa, la lasalpa ga sev amet lenep sepsev avantun at limixin axap.

19 Lolos ap mo laxanos gak lok to at levenngusno atdi, la to at levenatketke atdi. Mo levenatketke atdi ga lok ngan lempasii la diga ruuna lempatlak atdi kusu dina sev asongot limixin min.

20 \*La nedi limixin di goxo met ap mo levesongsongot, kopmen di goxo leeng basinge leveloklok kakapmek atdi. La move di goxo xap ti lotu saparap lubunggas la lempoovo moroa diga xovox i mi levenuut ngan logol, la siliva la borons la levenuut petpes bok la levengkonuna, mo lempanga dixo epovo do dina reven la dinang tonga la dinat pas.

21 La kopmen bok nedi limixin di goxo leeng basinge loklok ti sev amet tadi, la lengkot at lemenemen (magic) la loklok kakapmek maxamang at lixitkis epot la loklok kipkip pilo.

\* 9:7: Jol 2:4 \* 9:8: Jol 1:6 \* 9:9: Jol 2:5 \* 9:12: Li 8:13 \* 9:13: Li 8:3 \* 9:14: Li 16:12  
\* 9:15: Li 8:7-12 \* 9:20: Li 16:9,11; Ais 2:8,20; 1 Ko 10:19-20; Sam 115:4-7; 135:15-17; Dan 5:23

## 10

### *Laangelo La Lugun Linga Lixilik*

<sup>1</sup> Melemu aga ven manga lara laangelo lolos ga si boro vana at laxalibet. La loxontakabu ga itis i ngan lavanga singsigaara, la laxaburi gak lok to mavana at lavatlak teren. La lemeren ga soosoo ngan laxangking la luxangkedek teren ga lok ngan legepu xus una, laxao gak lok teren.

<sup>2</sup> To at lekngen neni gam tebeng loxon gun linga lixilik mo ga repalas pam. La laxangkedek tino ren ni ga vaxaru i ro at laras la laxangkedek kia ren ni ga vaxaru i ro at laxangka.

<sup>3</sup> La ni ga xup mi laxaka linga silok ga lok ngan lavatlaion im booro lolos. Neni ga xup kerepmo la lavanuti levempanga tepaavat diga vaase porang i.

<sup>4</sup> \*Aga gagas kusu ana malagan mo levelinga diga tong i. Ketla aga ronga laxaka linga at Lara ro vana at laxalibet ga lok tia, "Nemen uta malagan mo levelinga atdi, ni na nemen alipe mun."

<sup>5</sup> \*La mo laangelo aga ven i, ga tu ro at laras la to at laxangka, ga song urut mi lekngen tino upana ri laxalibet,

<sup>6</sup> \*la ga vangpe mi laasen at ne Moroa mo i rooro amisik la kopmen taxavaxap teren, la ga rudum li laxalibet la lempanga dik lok teren, la lavatkangka la lempanga dik lok teren, la laras la lempanga dik lok keneng teren. Ni ga lok keretna, "Moroa kopmen noxo ngais abao."

<sup>7</sup> \*Ketla laangelo sepsev avanuti naba mas luru ren, la ne Moroa naba lox asoorun mo lodoxoma alipe ren, kerekngan neni gara tong axasep pam i ri lavaeme vapaase ali ren, nedi lavaanat saxaruki ren.

<sup>8</sup> La mo laxaka linga nia aga ronga avor i, ga paase ria boro vana at laxalibet, ga lok manga ria, "Unat pas la una lok ka lugun linga mo i repalas

pam la mo ik lok at lekngen laangelo mo i tu ro at laras la laxangka."

<sup>9</sup> \*La aga vot pasa mo laangelo la aga sue i mi lugun linga kusu na raba ia min. La ni ga lok tia, "Una lok ka na lugun linga la una anan i. Naba so mamao to at labalam ketla ro at langsum ni naba so avukat ngan limisiu."

<sup>10</sup> Aga lok ka mo lugun linga lixilik boro at lekngen laangelo la aga an i, la ni ga lok ngan tinotno ladan misiuro at langsuk. Se aga linge i, ni ga so mamao ro at labalak.

<sup>11</sup> La laangelo ga lok tia, "Mo manga una tong asu levelinga at ne Moroa mumu laxanabung mixin solo, levennep silok i buaang, la levempapaase la lavaorong."

## 11

### *Moraa Ga Riki Legepu Radi Xusu Duna Vavang*

<sup>1</sup> \*La mo laangelo ga raba ia mi lakdak soksoxovo, la ni ga lok tia, "Unat pas la una soxovo loogu laplavang at ne Moroa la loxonin laplavang keneng teren, la una us bok nedi di lotu go.

<sup>2</sup> \*Ketla nemen uta soxovo lemelua ik lok kangkan mo loogu laplavang, mila nom lemelua ik lok ti limixin kopmen di me Judaia. La nedi dinabat pas axangka lemenemen kaala Jerusalem at lavanuet sangaun mi legepu gaaling.

<sup>3</sup> La nia anaba riki aonon luradi vapaase rak mi lolos kusu duna vavang mi levelinga rak ap mo legesa abin sangsangaun kobot mi legepu sangaun kobot mi lavanna sangaun aleng (1,260). La dunaba siga mun lengkontamon gurusek at limixin di duudu."

<sup>4</sup> \*Mo luradi vapaase, nedu legepu una olip la nedu bok lubabao di tu gagas to melamgo at ne Moroa, ni lo Moroa at na lavatbung menemen.

\* **10:4:** Dan 8:26; 12:4,9    \* **10:5:** Lal 32:40; Dan 12:7    \* **10:6:** Nem 9:6; Sam 146:6    \* **10:7:** Dan 9:6,10; Amo 3:7    \* **10:9:** Isi 2:8; 3:1-3    \* **11:1:** Isi 40:3; Sak 2:1-2    \* **11:2:** Lu 21:24; Li 12:6; 13:5  
\* **11:4:** Sak 4:3,11-14    \* **11:5:** 2 Sml 22:9; 2 Lav 1:10; Sam 97:3; Jer 5:14

5 \*La do tara na lok tong i xusu na sep du, laxao naba soli su boro at lungusno du, la naba rin asonao lavamunepen midu. La at na mun langas do tara na lok tong i xusu na sep du, neni naba met kerepmo.

6 \*Dunaba ruuna lolos kusu ti rupe larakabu la noxo vot ap mo levenaleng do nedu dunaba vavang teren, la dunaba ruuna bok lolos kusu duna ba gili levendan ti lada. La dunaba ruuna bok lolos tip sep amisik limixin at na lavatbung menemen mi levenasen songsongot axap, mo do duba vara i do duna lox amisix i.

7 \*Do duna lox axap mo lugugu ri vaase asu levelinga at ne Moroa, lara lavatpanga sio mi lavanuet kangkedek teren naba vasu ap mo lemeroon la naba esep mi mo luradi at ne Moroa la naba ranga alis du la na sev amet du.

8 \*La lubantuxu atdu nabak midi ro at langas ap mo lemenemen silok, ap mo mun loxot Leeme Silok atdu ga met at laxaba ve. Luasen poovo ap mo lemenemen ne Sodom la ne Isip.

9 La limixin boro at levengkot axap, la larabibinat, la levempa-paase, la levenbantuxu dinaba reven lubantuxu atdu at lavantun mi loxon atat aleng la di noxo mulus kusu dina lok li lubantuxu atdu at lamaaut.

10 La limixin axap at lavatbung menemen dinaba momo aleng mumu lanmet atdu. Dinaba lok larapeluxa silok la dinaba etaba ela mi leventamtaba atdi. Lavasuun teren do na luradi vapaase dunaba lok buaang levempanga songsongot mavana at limixin.

11 \*Ketla melemu at lavantun mi loxon atat levenaleng, Moroa naba raba mamas du, la dunaba xatu kaxat. La nedi limixin dinaba ven du, dinaba marat aleng.

12 \*La na luradi vapaase dunaba

ronga Lara na vaase ridu boro vana at laxalibet la na lok, "Ude numu vana." La dunaba urut uto vana at laxalibet keneng at loxontakabu, la limixin munepen midu mo dinaba tu la dina reven du.

13 \*La ap mo mun loxonaleng langangan langne naba vot, la lenep i sepsev asangaun ap mo laraogu xeneng ap mo lemenemen silok naba rem tereve axap. La lavanuti lara-bin sangsangaun kobot (7000) limixin dinaba met at nom langne. La nedi limixin dinaba roo su ap mo langne dinaba marat aleng tinotno la dina emi asu mi ne Moroa no vana at laxalibet.

14 \*La mo lumumuat sepsev agepura nanga ira xap, ketla lumumuat sepsev avantun move la i auret do na vot.

### *Laangelo Sepsev Avanuti*

15 \*La laangelo sepsev avanuti ga mas luru ren, la aga ronga laxaka linga silok at lentaba to vana at laxalibet ga lok keretna,

"Amonga Leeme Silok atdik eburu mi Lanarong teren du ruka i xusu dunabam gomgonga na lavatbung menemen. La nedu dunabam gomgonga amisix i la kopmen taxavaxap teren."

*Sam 145:13*

16 \*La nedi legepu sangaun mi lavanuet loxongkulao amgomgo mo digat kis at levengkoni orong atdi to melango at ne Moroa, diga xis tiktikbu mi lempatgulom atdi la diga lotu parap ne Moroa.

17 \*Diga lok keretna,

"Ma tong avukat tu, Leeme Silok, ne Moroa nu Lanaraavuk. Mo uga nemen gano la u nemen bok lingina, mila ura gu asu vam mi langangan lolos taram la ura ruka vam lamgomgonga ram at na lavatbung menemen.

\* **11:6:** 1 Lav 17:1; Pas 7:17-20; 1 Sml 4:8 \* **11:7:** Dan 7:21; Li 12:17; 13:1,7; 17:8 \* **11:8:** Lu 13:34  
 \* **11:11:** Isi 37:5,10 \* **11:12:** 2 Lav 2:11 \* **11:13:** Li 8:5; 16:18 \* **11:14:** Li 9:12 \* **11:15:** Pas 15:18; Sam 10:16; 145:13; Dan 2:44; Obe 21 \* **11:16:** Li 4:4,10 \* **11:17:** Li 1:4,8; 15:3 \* **11:18:** Sam 2:1; 46:6; Ro 2:5; Li 9:5; 20:11-13; Sam 115:13

18 \*Nedi lavamolon diga musak teng tino, ketla laaleng ira vot pam kusu una lox asuusu lebelemamao ram, la unaba lok li limixin digara met pam at lavapaase. Ni laaleng bok kusu unaba raba luunun avukat ti lavaeme vapaase ali ram. Nedi lavasaxaruki ram la tinedi limixin nunu la nedi bok dik lok ngangao at laasen taram. Nedi limixin kopmen tevenasen silok atdi la nedi bok di ruuna levenasen silok. La laaleng ira vot pam kusu una sele utut kepe nedi limixin diga lok kapmek lixitkis nunuan at na lavatbung menemen.”

19 \*Melemu at na, loogu laplavang at ne Moroa ga rem suang to vana at laxalibet, la limixin diga ven lobokis kaala, mo ga lok katling lekabus maxat at ne Moroa. La limixin diga ven lavanga ga mam etitit, la diga ronga leretepaavat gak lox epasum la diga suma lavarangne silok la lengkos uat gan bun aleng ga subu.

## 12

### *Latkin La Ne Satan*

1 Lara loklok katling silok ga ravasu to vana at lamavangkap. Lara latkin ga rupot, laxangking ga itis i ngan lisingsigaara ren, la lagaaling gak lok to maxopok at luxangkedek teren, la ni ga siga lasangaun mi legepura larapenti ro at lavatlak teren ngan lavatbungorong.

2 \*Neni ga balan madak, la ga auret ta do na visik, la losongsongot teren ga lolos la neni ga reng.

3 \*La lara loklok katling bok ga ravasu to vana at lamavangkap. Lara langsung lavattulaava memele ga rupot. Ni ga ruuna lavanuti lempatlak la lasangaun lempatkom, la lavanuti lempatbungorong gak lok at nom lavanuti lempatlak teren.

4 \*Latketke ren ga rev asi lenep sepsev avantun at larapenti boro

vana at laxalibet la ga lu asi midi ude xopok at lavatkangka. La na lavattulaava ga tu ro melamgo at nom latkin kusu neni na anan lamdak teren do ni na visik asu i.

5 \*La neni ga visik lamdak temes, mo nabam gomgonga limixin axap at na lavatbung menemen la lamgomgonga ren naba lolos aleng. Ketla ne Moroa ga lok ka mo lamdak uto vana at loxonin orong teren.

6 \*La mo latkin ga sixiro uto at lamatbin at lara loxot ne Moroa ga lox agagas li i. La neni naba lok tatao i go at legesa abin sangsangaun kobot mi legepu sangaun kobot mi lavanna sangaun (1,260) aleng.

7 \*La lara leesep ga xatu kaxat to vana at laxalibet. Mikael, ni laangelogomgo eburu mi lubungangelo ren diga esep eburu mi nom lavattulaava. La nom lavattulaava eburu mi lubungangelo ren diga esep tangarang midi.

8 Ketla ne Mikael eburu mi lubungangelo ren diga sak tup mi mo lavattulaava, la neni eburu mi lubungangelo ren goxopmen bok ba toxot tidi xusu tik lok to vana at laxalibet.

9 \*La ne Mikael eburu mi lubungangelo ren diga lu asi mi mo lavattulaava eburu mi lubungangelo ren. Neni lavattulaava me gaxatnak, luasen teren ne Devel la ne Satan, mo i sasar asoogong limixin axap ti laxakapmek. Nedi diga lu asi midi ude xopok at na lavatbung menemen.

10 \*La aga ronga laxaka linga silok to vana at laxalibet ga lok keretna,

“Monga loklox arooro at ne Moroa la lolos teren eburu mi Linintoo ren naba ru asaxaven. La nanga Lanarong teren naba lox asuusu lolos teren to xopok at lavatbung menemen. Mila ne Satan mo ga tu ro melamgo at ne Moroa xusu neni na babala raba luvutneton dik at levenaleng kangking la kanimin. La

\* 11:19: Ib 9:4; Li 8:5; 15:5; 16:21 \* 12:2: Mai 4:10 \* 12:3: Dan 7:7 \* 12:4: Dan 8:10 \* 12:5: Ais 7:14; 66:7; Sam 2:9; Li 19:15 \* 12:6: Li 11:2-3 \* 12:7: Ju 1:9 \* 12:9: Lur 3:1,14; Lu 10:18; 22:31; Li 20:2 \* 12:10: Jop 1:9-11; Sak 3:1

lubungangelo at ne Moroa digara lu asi vam min uto xopok.

<sup>11</sup> La luvutneton nedik dira sak tup pam mi ne Satan mila diga nunu at lada at Lanasip la at lempapaase ruturun at ne Moroa, mo levelinga diga tong asu i. Ap mo leesep di goxo marat mi lorroo atdi, diga gagas kusu dina met.

<sup>12</sup> \*Kuren la mina momo, nemi limixin mik lok de vana at laxalibet. Ketla naba lolos aleng tinedi limixin di nemen to xopok at lavatbung menemen la to saparap laras. Mila ne Satan ira si vam saparap nimi. I musak aleng tinotno, mila ikleklen i do neni noxo nemen abao ro xopok.”

<sup>13</sup> Nom lavattulaava ga ven kibis i do lubungangelo diga lu asi min ude xopok at lavatbung menemen, la neni ga xala mu mo latkin, no ga visik mo lamdak temes.

<sup>14</sup> \*Ketla ne Moroa ga raba nom latkin mi legepu vapa at lamaalom silok kusu tin ti rava basinge mo lavattulaava la uto at lamatbin. Mo go ne Moroa ga lox agagas li vam loxot tin, kusu ni nabak lok tatao i go at lavantun mi loxonatat levenmaares.

<sup>15</sup> La ladan sen silok ga rem sobang su boro at lungusno at lavattulaava, kusu ladanut naba suxu xepe nom latkin la na sev amer i.

<sup>16</sup> Ketla lavatkangka ga lok tooro nom latkin, la lara lamamara ga rem suang la lavatkangka ga xanom mo ladan silok ga sixisu boro at lungusno at nom lavattulaava.

<sup>17</sup> \*La melemu mo lavattulaava ga musak teng aleng mumu nom latkin, la ni ga vas kaxat basinge i, la ga onon uto at lenep petpes kusu na esep eburu mi livipisik li at nom latkin. Nedi mo ding tonga res at levelinga at ne Moroa la di nunu at levempapaase ruturun at ne Iesu.

<sup>18</sup> La mo lavattulaava ga tu ro loxon at lisigege at laras.

## 13

### *Lavatpanga Sio Mi Lavanuet Kangkedek Teren*

<sup>1</sup> \*La nia aga ven lara lavatpanga sio mi lavanuet kangkedek teren ga ravasu boro at laras, ni ga ruuna lasangaun kom la lavanuti lempatlak, la lasangaun lempatbungorong gak lok ap mo lasangaun kom. La at nom lavanuti lempatlak, lavanuti levenasen aksaksa gak lok ti vaase vupu ri ne Moroa.

<sup>2</sup> \*La mo lavatpanga sio ga lok ngan lavatlepat, la lengkangkedek teren ga lok ngan at lavatbea, la lungusno ga lok ngan at lavatlaion. La mo lavattulaava ga raba i mi lolos teren la lixitkis teren tim gomgonga limixin la lisisilok teren mavana at lempanga axap.

<sup>3</sup> \*La ga milik ngan lara at nom lempatlak at nom lavatpanga sio ga ruuna lining kooxing, lara ga sev aroogo i, ketla neni ga lox avukat manga. La limixin axap at na lavatbung menemen diga sangu aleng at nom lavatpanga sio la diga mumu asu i.

<sup>4</sup> La diga lotu parap nom lavattulaava mila neni ga raba lolos teren ti lavatpanga sio. La mo limixin diga lotu parap bok lavatpanga sio, diga lok keretna, “Kopmen tara i epovo mi na lavatpanga sio, la kopmen tara i epovo na sak tup min.”

<sup>5</sup> \*La lavatpanga sio ga lok ka lolos kusu na vaase vupu la aksaksa ri ne Moroa. La ni ga epovo bok ti lok lempanga salai i vara rin at lavanuet sangaun mi legepu gaaling.

<sup>6</sup> La ni ga ruka i xusu na paase vupu ri ne Moroa, la ri laasen teren, la loxot kitkis teren, la tinedi bok dik lok to vana at laxalibet.

<sup>7</sup> \*La ni ga lok ka lolos kusu na esep mi limixin at ne Moroa la na sak tup midi. La ni ga lok ka bok lolos mavana at limixin boro at larabung

\* **12:12:** Sam 96:11; Ais 44:23; 49:13 \* **12:14:** Dan 7:25; 12:7 \* **12:17:** Li 11:7; 14:12 \* **13:1:** Li 12:3; 17:3,7-12 \* **13:2:** Dan 7:4-6 \* **13:3:** Li 17:8 \* **13:5:** Dan 7:8,25; 11:36; Li 11:2 \* **13:7:** Li 11:7

mixin axap la boro bok at levenasen bantuxu la boro bok at lempapaase axap la boro bok at levenep silok axap.

<sup>8</sup>\*La limixin axap at na lavatbung menemen dinaba lotu parav i. Nedi limixin kopmen levenasen atdi ik lok at lubuk at lorooro, mo lubuk ga nemen avot ti luruntudum li at na lavatbung menemen, la ni lubuk at Lanasip, mo ga uu at laxaba.

<sup>9</sup>Do tara i ruuna lubaalung, i lox avukat do neni na ronga ka na lev-elinga.

<sup>10</sup>\*“Do ne Moroa gara tong li vam i do tara nabat pas ti loxokoxo, neni naba vubeles ti loxokoxo. La do ne Moroa gara tong li vam i do dina sep tara mi lavarise sepsep, neni naba uu at leesep mi lavarise sepsep.” Kuren la limixin at ne Moroa dina tu tuxuruxun at lununu atdi la dina ngangais mi lomomo keneng ap mo levenmumuat.

### *Lavatpanga Sio Ga Vasu Boro Maxopok At Laxangka*

<sup>11</sup>La nia aga ven bok lara lavatpanga sio vetpes ga vasu boro maxopok at laxangka. Neni ga ruuna legepu kom, ga lok ngan luvatkom at lanat sipsip. La mo lavatpanga sio ga paase aksaksa ngan mo lavattulaava silok.

<sup>12</sup>Neni ga ruuna ka lolos ap mo lavatpanga sio avot la ga pu soso limixin kusu dina lotu parap mo lavatpanga sio avot, no diga sev aroogo i, ketla neni ga lox avukat manga.

<sup>13</sup>\*La mo lavatpanga sio sepsev agepura ga lok buaang lempanga sangsangu. Ni ga lok laxao ga si boro vana at lamavangkap la ukopok ti laxangka. Ni ga lox i na ro melamgo at limixin axap kusu dina ven i.

<sup>14</sup>\*La neni ga ruuna lolos ti lok levempanga sangsangu kusu na lox asilok lavatpanga sio avot. La kerepmo neni ga xarang arup

limixin at na lavatbung menemen. Ni ga tong i ridi xusu dina lok lovoovo vanga ap mo lavatpanga sio avot, mo ga ruuna linin kooxing at lavarise sepsep, ketla kopmen goxo met teren.

<sup>15</sup>\*La mo lavatpanga sio sepsev agepura ga ruuna ka lolos tin kusu na mas arup lamamas tooro uto xeneng at nom lovoovo vanga at lavatpanga sio avot, kusu neni na epovo ri paase la na sev amet nedi di xopara na lotu parav i.

<sup>16</sup>La na lavatpanga sio sepsev agepura ga pu soso limixin axap. Nedi limixin kopmen tevenasen atdi la nedi bok limixin silok, nedi limixin nopnovos la limixin banbalo, la nedi limixin sepmus la limixin saksaxaruki. Ni ga pu soso di xusu dina lok li loklok katling ap mo lavatpanga sio to at levengkikngen tino di xopla to at levenmang atdi.

<sup>17</sup>\*La do tara i vara na un ka lempanga kopla na sesep mi lempanga, neni na ruuna be mo loklok katling. Nom loklok katling ni laasen at nom lavatpanga sio xopla leexes at laasen teren.

<sup>18</sup>Mina lok ka lodoxoma avukat ti na. Do tara ikleklen aleng, neni na gu asu na leexes at lavatpanga sio. Na leexes i lok katling lara laradi, la leexes teren i epovo at lavanna sangaun kobot mi lavanna sangaun mi lavanna. (666)

## 14

### *Lanasip Eburu Mi Limixin Teren*

<sup>1</sup>\*La nia aga milik kaxat la aga ven Lanasip ga tu ro at lakaana Saion. La aga ven bok buaang limixin eburu min, mo diga epovo at legesa sangaun kobot mi lavanuet sangaun mi lavanuet larabin sangsangaun kobot (144,000). Diga ruuna laasen at ne Iesu eburu mi laasen at ne Temen to at levenmang atdi.

\* **13:8:** Sam 69:28; Li 3:5; 5:6; 17:8; 20:12,15; 21:27 \* **13:10:** Jer 15:2; 43:11; Mt 26:52; Li 14:12

\* **13:13:** Mt 24:24; 1 Lav 18:24-39 \* **13:14:** Lal 13:1,4; Li 19:20 \* **13:15:** Dan 3:4-6 \* **13:17:** Li

14:9,11; 16:2; 19:20; 20:4 \* **14:1:** Li 3:12; 7:3,4 \* **14:2:** Isi 1:24; 43:2; Li 1:15; 19:6

2 \*La aga ronga laxaka linga boro vana at laxalibet ga ninni ngan ladan silok i sesen lolos la ga ninni ngan bok lavanga i repaavat. Mo laxaka linga aga ronga i ga lok ngan bok luvuttadi diga sep lengkon taaleng.

3 \*La mo digak pixan mi loxompixan maxat to melamgo at loxonin orong at ne Moroa, la to melamgo at lavanuet levempanga rooro la to melamgo at loxongkulao amgomgo. Kopmen teta goxo epovo nak lok kaka mo loxompixan, ketla nedi na limixin kusus mun, Moroa gara un ka amlong nedi kantubu at limixin at lavatbung menemen.

4 \*Nedi mun na limixin di goxo lok taxakapmek maxamang at lixitkis epot, mila diga tu asepsu basinge loklok ti elong ka. Nedi na limixin di mumu amisik Lanasip. Moroa ga un ka amlong di xantubu at limixin la diga lok ngan levempipisik avot ti ne Moroa la Lanasip.

5 \*La kopmen di goxo tong asu toxolinga xaxarang at lorooro axap atdi. La kopmen tavanga xapmek ik lok atdi.

#### *Lempapaase Asu At Lavantun Lubungangelo*

6 La nia aga ven manga lara laangelo gap tava to vana at lamavangkap, la ni gap kip Lagale Lavavang i nemen amisik kusu na tong asu i ri limixin axap at na lavatbung menemen. Nedi boro at levenep silok axap, la boro bok at larabung mixelin axap, la boro bok at levempapaase axap, la boro bok at levenasen bantuxu axap.

7 \*Ni ga vaase silok keretna, "Mina lok ngangao aleng at ne Moroa la mina emi asu min, mila loxonaleng i auret kusu neni na ronga linga at limixin axap. Mina lotu parap ne Moroa, mo ga rudum li laxalibet, lavatkangka, laras, la laradan axap."

8 \*La na laangelo avot ga onon la laangelo sepsev agepura ga rupot manga la ga lok, "Lemenemen silok Babilon ira xapmek pam, mo ga pu soso limixin at levengkot axap kusu dina vubeles at laxakapmek silok teren."

9 \*Melemu atdu, laangelo sepsev avantun ga rupot manga la ga xup silok keretna, "Mo do tara na lotu saparap mo lavatpanga sio la lavatpooovo vanga ren, la na ruuna ka loklok katling ap mo lavatpanga sio to at lamang teren, kopla to at lekngen,

10 \*neni bok naba suma ka lebelemamao at ne Moroa i lolos aleng. La neni nabang songot aleng to xeneng at laxao at lasalpa to melamgo at lubungangelo at ne Moroa la to melamgo bok at Lanasip.

11 \*La mo losongsongot naba lok ngan lusuxa i urut amisik la kopmen noxo xap at levenaleng kangking la kanimin bok. Tara naba ekip tangarang mi na losongsongot do neni ga lotu saparap lavatpanga sio la lavatpooovo ren, kopla neni ga ruuna loklok katling at laasen at lavatpanga sio."

12 \*Na lavanga naba rupot, kuren la nedi limixin nunu at ne Moroa mo ding tonga res at levelinga ren la di tu tuxuruxun at lununu atdi saparap ne Iesu, i epovo xusu dina nemen mulus ap mo laaleng levenmumuat naba rupot.

13 \*La nia aga ronga levelinga ga si boro vana at laxalibet ga lok tia, "Una malagan i na. Luvukat tinedi dinaba met mi lununu atdi keneng at Leeme Silok ne Iesu, i ruka nga i mo." La Loroonan Kaala ga lok bok keretna, "I ruturun aleng. At lorooro melemu dinaba ruuna ka loklox amas basinge levenmumuat la levesongsongot atdi, mumu mo leveloklok nunuan digara lok pam i."

\* 14:3: Sam 149:1; Ais 42:10; Li 5:9; 7:4 \* 14:4: Ep 5:27 \* 14:5: Sam 32:2; Sep 3:13 \* 14:7: Li 10:6 \* 14:8: Ais 21:9; Jer 51:7,8; Li 17:2; 18:2,3 \* 14:9: Li 13:12-17 \* 14:10: Lur 19:24; Sam 11:6; 75:8; Ais 51:17,22; Jer 25:15; Isi 38:22; Li 15:7; 16:19; 19:20; 20:10; 21:8 \* 14:11: Ais 34:10; Li 13:12-17; 19:3 \* 14:12: Li 12:17; 13:10 \* 14:13: 1 Ko 15:58; Ib 4:10

### *Lisilimet At Laaleng Ete*

14 \*La nia aga milik kaxat, la aga ven loxontakabu bunbun, la to mavana ap mo loxontakabu aga ven Lara gat kis teren, ga milik ngan Laradi Mevana, la lavatbungorong gol gak lok at lavatlak teren, la neni gam tebeng lavarise sengsen.

15 \*La lara laangelo vetpes manga ga vas su boro xeneng at loogu laplavang, la gap kup silok ti mo laradi gat kis at loxontakabu la ga lok, "Una ruka lugugu mi nom lavarise ram, mila laaleng mo ira vot ta, kusu una sep korop ka levempiao at na lavatbung menemen mo ira mukun pam."

16 La mo laradi gat kis ap mo loxontakabu ga gu xat mi mo lavarise ren at lavatbung menemen la ni ga lok bubua ka limixin axap at ne Moroa.

17 La lara laangelo vetpes manga ga vasu at loogu laplavang to vana at laxalibet, la neni bok gam tebeng lavarise sengsen.

18 \*La lara laangelo vetpes mo gak lok tatao laxao, ga laa boro at loxonin laplavang. La ni ga xup silok ti mo laangelo gam tebeng lavarise sengsen. Ni ga lok keretna, "Una gugu mi nom lavarise sengsen taram la una lok bubua ka levempisik at lavaen at na lavatbung menemen, mila lempeven teren ira mukun pam."

19 Kuren la laangelo ga gu xat mi lavarise ren at na lavatbung menemen la ga lok bubua ka lempeven at lavaen, la ga lu abeles midi ro xeneng at loxot lili at levempeven vaen, mo i ru katling lebelemamao at ne Moroa.

20 \*La mo lempeven vaen limixin digat pas puuvus asu ladan teren to maxamang ap mo lemenemen silok, la lada ga sixisu boro xeneng ap mo loxot lili at levempeven vaen. Mo lada ga umsu aleng ngan ladanut la lamaxat ap mo ladan ga si aleng

ngan lababaalom at laradi la ga sesen uto vaxalom, ga epovo at lavantun sangaun kobot (300) leveng kilomita.

## 15

### *Lavanuti Lubungangelo La Lavanuti Levesongsongot Silok*

1 \*La nia aga ven manga lara loklok katling to vana at laxalibet, ga silok aleng la ga ven nunuan. Lavanuti lubungangelo mi lavanuti levesongsongot mo, nedi lumumupit ti leveloklox asongot axap, la di ru katling laxavaxap at lebelemamao at ne Moroa, mo ni naba lox asusu i.

2 \*La aga ven lara lavanga ga milik ngan loxontas gan tanan eburu mi laxao. La aga ven bok nedi limixin diga sak tup mi mo lavatpanga sio la lavatpoovo vanga ren, la leexes at laasen teren. Diga tu saparap mo loxontas gan tanan la digam tebeng lengkon taaleng to at levengkiknggen di, ne Moroa ga raba di min. 3 \*La digak pixan mi loxompixan at ne Moses, lasaxaruki at ne Moroa la digak pixan bok mi loxompixan at Lanasip. Diga lok keretna,

"Moroa Leeme Silok, nenu Lannaraavuk. Lempanga axap nenu uk lox i, i silok la i lox avukat aleng. Leventaangas taram la leveloklok taram in mantan tino la i ruturun aleng. Nenu Loorong Silok mavana at limixin axap at na lavatbung menemen.

4 \*Leeme Silok. Limixin axap dinaba lok ngangao ram la dinaba emi asu mi laasen taram, mila nenu xusuk mun u melemelengan. Limixin axap at na lavatbung menemen dinaba vot pasa u la dinaba lotu parav u, mila levendomdoma manmantan taram ga ravasu vam at lasaxaven."

5 \*Melemu at na nia aga ven loogu laplavang ga rem suang to vana at

\* 14:14: Dan 7:13 \* 14:15: Jol 3:13 \* 14:18: Jol 3:13 \* 14:20: Ais 63:3; Lan 1:15; Li 19:15

\* 15:1: Mas 26:21; Li 15:6-7 \* 15:2: Li 4:6; 5:8 \* 15:3: Pas 15:1; Li 11:17; 16:7; Sam 92:5; 139:14;

111:2 \* 15:4: Jer 10:6-7; Sam 86:9 \* 15:5: Pas 38:21 \* 15:6: Li 15:1



laxalibet la aga ven mo lenep i xaala aleng to xeneng teren.

6 \*La lavanuti lubungangelo eburu mi lavanuti leveloklox asongot diga vas su boro xeneng ap mo loogu laplavang. Diga sinang mi levesingsigaara gamgames, gan tanan aleng la levengkontamon gol ga itis korop lenbongobong atdi.

7 \*La lara ap mo lavanuet levempanga rooro ga raba na lavanuti lubungangelo mi lavanuti leventingtigon gol ga umsu mi langsung lebelemamao at ne Moroa, mo naba nemen amisik, la kopmen taxavaxap teren.

8 \*La loogu laplavang ga umsu mi lusuxa boro at lisisixam la lolos at ne Moroa la goxo epovo do tara gita beles ukeneng at loogu laplavang ise at laxavaxap ap mo lavanuti leveloklox asongot at lavanuti lubungangelo.

## 16

### *Lavanuti Leventingtigon At Lebelemamao At Ne Moroa*

1 \*La nia aga ronga laxaka linga silok ga vaase su boro xeneng at loogu laplavang, la ga lok ti mo lavanuti lubungangelo xeretna, "Minat pas la mina soli asu lebelemamao at ne Moroa i nemen keneng at nom lavanuti leventingtigon to at lavatbung menemen."

2 \*La laangelo avot gat pas la ga soli asu mo lebelemamao ri limixin at na lavatbung menemen. La lemparabi silok gang songot aleng, ga vot saparap mo limixin diga ruuna loklok katling ap mo lavatpanga sio la diga lotu parap lavatpoovo vangan.

3 \*La laangelo sepsev agepura ga soli asu lebelemamao at ne Moroa ti laras la laras ga ravasu ngan ta lada at laradi i met, la lempanga axap at lebelen laras ga met.

4 \*La laangelo sepsev avantun ga soli asu mo lebelemamao at ne Moroa ti laradan silok la levempuuvut dan bok, la diga ravasu ngan lada.

5 \*La aga ronga laangelo ik lok tatao laradan ga lok ti ne Moroa,

"Lodoxoma ram ti lok li na losongsongot ura lok li vam i at lavatbung menemen ik mokso aleng. Kuren la ne Moroa, nenu u melemelengan lingina la gano bok.

6 \*Mila nedi limixin kakapmek diga sev amet limixin nunu eburu mi lavaeme vapaase ali ram. Kuren la ura raba nedi limixin kakapmek mi lada kusu nedi dina in i, la ik mokso aleng do nedi limixin kakapmek dina in mo lada."

7 \*La melema aga ronga lempa-paase boro at loxonin laplavang ga lok keretna, "I raturun aleng. Nenu ne Moroa, Leeme Silok, nenu Lanaraavuk. La lodoxoma ram ti lox asuusu mo levesongsongot, ik mokso la i epovo rinotno at loklok, mo limixin diga lox i."

8 La laangelo sepsev avanuet ga soli asu lebelemamao at ne Moroa ro at laxangking. La laxangking ga lok kaka lolos kusu nan bonbo limixin mi liplivi silok teren.

9 \*La laxangking gan bonbo nedi, la diga paase aksaksa ri laasen at ne Moroa, mo i ruuna lolos mavana at nom levesongsongot. Ketla nom limixin di goxopara rinotno xusu dina leeng basinge laxapmek atdi la dina emi asu mi ne Moroa.

10 \*La laangelo sepsev avalimo ga soli asu manga lebelemamao at ne Moroa ro at loxot kitkis at lavatpanga sio, la mo lixitkis teren ga nemen at lamain bonot. La limixin diga atat aleng leven gam atdi mumu losongsongot silok atdi.

11 \*La diga paase aksaksa ri ne Moroa no vana at laxalibet mumu losongsongot la laxanabi atdi. Ketla

\* 15:7: Li 14:10 \* 15:8: 1 Lav 8:10-11; Ais 6:4; Isi 44:4 \* 16:1: Ais 66:6; Li 16:17; Sam 69:24; Jer 10:25; Sep 3:8 \* 16:2: Pas 9:10; Lal 28:35; Li 13:12-17 \* 16:3: Pas 7:17-21 \* 16:4: Sam 78:44 \* 16:5: Sam 119:137; Li 1:4 \* 16:6: Sam 79:3; Ais 49:26 \* 16:7: Sam 19:9; Li 15:3; 16:14; 19:2 \* 16:9: Li 9:20-21; 16:21 \* 16:10: Pas 10:22; Ais 8:22 \* 16:11: Li 9:20-21; 16:21

di goxopara rinotno xusu dina leeng basinge mo laxakapmek diga lox i.

12 \*La laangelo sepsev avanna ga soli asu lebelemamao at ne Moroa to at ladan silok Iupretis. La mo ladan ga mes axap, kusu ti lox agagas li langas ti lavaorong boro at lenep laxangking it losu e.

13 La nia aga ven lavantun lubanggas ga milik ngan laxarokrok. Lara ga sixisu boro at lungusno at lavatulaava, la lara boro at lungusno at lavatpanga sio, la lara boro at lungusno at laradi vapaase ali xaxarang.

14 \*Nedi na leventoonan at lubanggas di ruuna lolos kusu dinak lok lempanga sangsangu. La diga epe-seves ti lavatbung menemen axap, kusu dina lok bubua ka lavaorong eburu mi limixin esep atdi ri mo leesep naba vot ap mo langsung laaleng silok at ne Moroa ni Lannaraavuk.

15 \*La ne Iesu ga lok keretna, "Nia anaba vot ngan laradi xipkip pilo. Luvukat ti mo lara i gagas amisik la ik lok gagas nunuan lisingsigaaren kusu neni noxo lok beleben la noxo lok mamangan."

16 \*La mo leventoonan kapmek diga lok bubua ka lavaorong to at lemenemen laasen teren at lava-paase Ibru do "Amagedon."

17 \*La laangelo sepsev avanuti ga soli asu lebelemamao at ne Moroa ti lamavangkap. La langsung lava-paase silok ga ravasu boro at loxonin orang, mo ik lok keneng at loogu laplavang. Ga lok keretna, "Ira xap ta."

18 \*La lavanga ga mam etitit ga vot, la leretepaavat boro vana at laxalibet ga tit la langsung langne silok ga vot. La goxovisi tangne silok kerepmo ga vot, ga ruka i at luruntudum li at limixin, la mo langne ni ga lok kapmek aleng.

19 \*La mo lemenemen silok ga epe-seves ti lavantun levengkot la mo levenmenemen silok at na lavatbung menemen ga rem utut axap. La ne Moroa ga doma asu laxakapmek at limixin to at lemenemen silok, Babilon, la neni ga lox asusu lebelemamao silok teren ti mo limixin.

20 \*La levesoxan axap mi lempat-taavut diga sonao.

21 \*La langsung larakabu ga vot la lengkos teren ga lok ngan lemparuat. Lumumuat teren ga epovo at lavanuet sangaun mi lavalimo leven kilogerem. Ga subu at limixin, la diga paase aksaksa ri ne Moroa mila losongsongot at na lavatakabu ga lok kapmek aleng.

## 17

### *Latkin Ngarangat*

1 \*La lara atdi na lavanuti lubanggelo, mo digam tebeng mo lavanuti leventingtigon, ga vot pasa ia la ga lok, "Pen ba i na, la ana lox ase u mi losongsongot silok, ne Moroa naba sep mo latkin ngarangat min, mo it kis saparap laxan taadan solo.

2 \*Lavaorong axap at na lavatbung menemen digang longka i la limixin at na lavatbung menemen diga lok laxakapmek min, i lok ngan ta do diga inin tangtangu mi lavaen."

3 \*La Loroonan Kaala ga vubeles tarak la nom laangelo ga xip kaka ia uto at lamatbin. La nia aga ven lara latkin gat kis to vana at lara lavatpanga sio ga memele aleng la ga ruuna lavanuti lempatlak la lasangaun lempatkom. La laxanasen kapmek, ni levelinga vupu ri ne Moroa ga umsu at labantuxu ren.

4 \*Na latkin ga sigaara mi lisingsiga ga memele aleng la ga umsu mi logol eburu mi lengkonuat gamgames, luunun silok ap mo lengkonuat. Leven peal inbun gak lok bok ap

\* 16:12: Ais 11:15; Jer 50:38    \* 16:14: Li 16:7; 19:6,15,19    \* 16:15: Li 3:3,18    \* 16:16: Amg 5:19; Sak 12:11    \* 16:17: Li 16:1    \* 16:18: Li 4:5    \* 16:19: Li 14:10    \* 16:20: Li 6:14    \* 16:21: Pas 9:24; Li 11:19; 16:9,11    \* 17:1: Jer 51:12-13; Li 17:15    \* 17:2: Ais 23:17; Li 14:8    \* 17:3: Li 13:1  
\* 17:4: Isi 28:13,16; Jer 51:7; Li 18:16

mo lisingsigaara ren. Ni gam tebeng lavattingtigon gol ga umsu mi laxangkakapmek teren eburu mi libilinga at loklok teren.

<sup>5</sup> \*La levelinga ga nemen to at lamang teren ketla lavasuun teren goxo xasep. Mo levelinga ga lok keretna,

“Lemenemen silok Babilon, ni lavasuun at loklok ngarangat la neni bok lavatturunen at leveloklok kakapmek axap at na lavatbung menemen.”

<sup>6</sup> \*La nia aga ven mo latkin ga inin tangtangu mi lada at limixin at ne Moroa, la atnedi bok limixin diga met mila diga nunu at ne Iesu.

Se nia aga ven i, aga sangu aleng.

<sup>7</sup> \*Ketla laangelo ga lok tia, “Tila u sangu? Ana soxomus lavasuun at nom latkin eburu mi lavatpanga sio, neni it kis pana ren, la i ruuna lavanuti lempatlak teren la lasangaun lempatkom.

<sup>8</sup> \*Mo lavatpanga sio ga rooro gano, kopmen na rooro lingina. Ketla melemu naba vasu boro at lemeroon la naba seeve ro at lemenemen songsongot. La nedi limixin at na lavatbung menemen, kopmen levenasen atnedi goxok lok keneng at lubuk at lorooro, ga ruka i at lurutu kaxat at na lavatbung menemen, dinaba sangu aleng do dina ven na lavatpanga sio. Neni ga rooro be, ketla monga neni kopmen na rooro, ketla naba rupot melemu.

<sup>9</sup> Do tara i vara na xasep at na, neni na doma mumu avukar i. Mo lavanuti lempatlak i ru katling lavanuti lengkong kaana la latkin ngarangat it kis to mavana atdi. La mo lavanuti levempatlak i ru katling bok lavanuti lavaorong.

<sup>10</sup> La lavalimo atdi diga met pam, la legesara atdi monga it kis ngan loorong. La legesara bok naba vot ketla naba nemen at lentaba levelnaleng mun.

<sup>11</sup> La lavatpanga sio, mo ga rooro la nanga i met pam, neni loorong sepsev avanuan. La neni bok lara atnedi lavanuti lavaorong la ni naba seeve.

<sup>12</sup> \*La mo lasangaun lempatkom nenu ura ven pam i, di ru katling lasangaun lavaorong kovisi dina lok ka lixitkis atdi kusu dinam gomgonga limixin. Ketla nedi eburu mi lavatpanga sio dinaba lok ka lolos ngan lavaorong at lavanna sangaun minit mene.

<sup>13</sup> La nedi dinaba ruuna legesa doxoma mun la dinaba raba lavatpanga sio mi lolos atdi la dinaba mumu asu i.

<sup>14</sup> \*La na lavatpanga sio eburu mi lasangaun lavaorong dinaba esep eburu mi Lanasip. La Lanasip eburu minedi neni ga ro xaka di, la nedi bok neni ga soxolik ka di la nedi bok di mumu asu ruturun i, dinaba sak tup mi na lavatpanga sio eburu mi lasangaun lavaorong. Mila Lanasip neni Leeme Silok mavana at lavaeme silok axap la neni Loorong Silok mavana at lavaorong.”

<sup>15</sup> \*La nom laangelo ga lok bok tia, “Mo laxantaadan nenu ura ven pam i, la latkin ngarangat it kis saparav i, ni i ru katling limixin boro at levenasen bantuxu, la boro at larabung mixin axap, la boro at levennep silok axap, la boro at levempapaase axap.

<sup>16</sup> \*La mo lavatpanga sio eburu mi lasangaun levempatkom nenu ura ven pam i, nedi dinaba munepen mi latkin ngarangat. Dinaba lok kapmek tinotno i la dinaba ke i nak lok beleben. La dinaba anan levenbaaxin teren la dinaba xotos labantuxu ren mi laxao.

<sup>17</sup> Dinaba lox i na mila ne Moroa ira lok pam di xusu dina mumu asu lodoxoma at ne Moroa. Kuren la dinaba mulus kusu dina raba axap lolos atdi ri lavatpanga sio la neni naba lok lugugu ren min, naba se at levelinga at ne Moroa mumu na

\* 17:5: Li 14:8 \* 17:6: Li 18:24; 19:2 \* 17:7: Li 13:1 \* 17:8: Dan 12:1; Li 11:7; 13:8 \* 17:12: Dan 7:24 \* 17:14: 1 Ti 6:15 \* 17:15: Ais 8:7; Jer 47:2 \* 17:16: Li 18:8

levesongsongot naba soorun.

<sup>18</sup> La mo latkin ngarangat ura ven i, i ru katling mo lemenemen silok, ni im gomgonga laramenemen silok at lavaorong at na lavatbung menemen.”

## 18

### *Moroa Ga Sele Utut Lemenemen Silok Babilon*

<sup>1</sup> Melemu at nai nia aga ven lara laangelo vetpes manga ga si boro vana at laxalibet, mi langsung los teren. La na lavatbung menemen axap ga xasep mi losoosoo ap mo laangelo.

<sup>2</sup> \*La ni ga xup silok keretna, “Lemenemen silok Babilon ira xapmek pam. La nanga ira lok ngan pam lemenemen aulis ti lubanggas mi laxantoonan kapmek. La lavapixa axap di bilingot la di lok kapmek, dik lok teren.

<sup>3</sup> \*La limixin boro at levennep silok axap dira in pam laxandan vaen teren, mo i ru katling loklok ti elongka. La lavaorong axap at na lavatbung menemen diga elongka min, la nedi limixin diga sesep mi lempanga atdi digap novos aleng mila mo latkin, lebelen ga ngaongao aleng ti mo lempanga diga sesep min.”

<sup>4</sup> \*La aga ronga laxaka linga vetpes ga si boro vana at laxalibet ga lok, “Limixin tarak. Mina vas kaxat basinge lemenemen Babilon. Lavanga mina sok ka toxot tinimi at laxakapmek at limixin at nom lemenemen. La lavanga minang songot eburu minedi mi mo losongsongot nenia anaba raba nedi min.

<sup>5</sup> \*Laxakapmek at nom latkin ira ekovana upana at laxalibet i ngan ta lavatkaana, la ne Moroa ira doma asu vam laxakapmek teren.

<sup>6</sup> \*Mina vorang amlong taba i mi laxakapmek ngan neni ga lox i rinimi. La mo laxakapmek neni ga lox i rinimi, mina vorang i rin na gepura. La mina raba i mi laxadan vaen no i so bobo aleng ti lara neni ga raba nemi min.

<sup>7</sup> \*Mina raba i mi langsung losongsongot aleng la lainbulu silok mo naba silok kerekngan ni ga simi aurut axa i mi leemi asu axa rin la lapnovos. La keneng at lebelen ni i lox asilox i xeretna, ‘Nenia latkin gomgo. Nenia kopmen lavatnaa, la nia xopmen noxo suma lainbulu at lorooro axap tarak.’

<sup>8</sup> \*Kuren la at legesa aleng mene, ne Moroa naba sev i mi tangsangan tevesongsongot. Lemeremet, la lainbulu silok la langsung loroxo silok naba vot parav i. La laxao naba rin asonao i mila Leeme Silok ne Moroa i lolos la neni naba ila mumu loklok teren.”

<sup>9</sup> \*La lavaorong at na lavatbung menemen, mo digang longka mo latkin la digak lok laxakapmek eburu min, dinabang teng la dina duudu, mo do dina ven lusuxa ap mo laxao na xotos asonao lemenemen Babilon.

<sup>10</sup> \*Dinaba tu ro vaxalom mi lainmarat mumu mo losongsongot, la dina lok, “I lok kapmek aleng. Babilon ira xapmek pam. Ni lemenemen silok la i lolos aleng. Ketla at lavanna sangaun minit mene ira lok kapmek pam.”

<sup>11</sup> \*La limixin sesep at na lavatbung menemen dinabang teng la dinaba duudu mumu i, mila kopmen teta noxo un kaka bok ba lempanga atdi.

<sup>12</sup> \*I lok ngan leven gol, levesiliva, levenasen uat gamgames, leven peal, levenasen bantamon avukat, lenbantamon memele, levenasen una avukat, levempanga axap limixin di lox i mi la ivori, levenuna

\* **18:2:** Li 14:8; Ais 13:21; 34:11; Jer 50:39 \* **18:3:** Li 14:8 \* **18:4:** Ais 48:20; Jer 50:8; 51:6,45; 2 Ko 6:17 \* **18:5:** Lur 18:20-21; 19:15; Jer 51:9 \* **18:6:** Sam 137:8; Jer 50:15,29; 2 Ts 1:6 \* **18:7:** Ais 47:7-9 \* **18:8:** Lur 19:15; Jer 50:34; Li 17:16 \* **18:9:** Li 17:2; Isi 27:30-35 \* **18:10:** Isi 26:17; Dan 4:30 \* **18:11:** Isi 27:36 \* **18:12:** Isi 27:12,13,22

mi luunun silok teren, borons, aen, lemparuat nunuan.

<sup>13</sup> La sinomon, spais, levempavaxan so mavak, la laxadan i so mavak, la laxadan vaen, la laxadan monok at la olip, la palava avukat eburu mi levempiao, laxanbulumaxao, la laxasipsip, laxanos, lempatkaris, lavasaxaruki, la i ruturun do diga sesep bok mi limixin. La na lempanga axap no xopmen bok ba teta ba un kaka i.

<sup>14</sup> La mo limixin sesep dinaba lok ti mo lemenemen, “Lempanga nunuan taram uga xovox i, ira sonao vam, la lapnovos taram eburu mi lempanga nunuan taram ira xap pam, la u noxo lok ka amlong bok ba i.”

<sup>15</sup> \*La limixin sesep digap novos aleng ap mo lemenemen, dinaba tu ro vaxalom la dinaba marat aleng mumu mo losongsongot la dinabang teng.

<sup>16</sup> \*La dinaba lok, “I lok kapmek aleng. Lemenemen silok Babilon ira xapmek pam. Ni ga umsu mi levesingsigaara ga lok nunuan aleng la ga memele aleng, la ga vonga logol eburu mi levenuto gamgames la leven peal.

<sup>17</sup> \*La keneng mun at lavanna sangaun minit mo lapnovos silok teren ira sonao la ira xap pam.”

La nedi limixin amgomgo at lempatmon la nedi di gugu go xeneng, la nedi bok limixin dik lok ka luunun at lugugu ro saparap laras, dinaba tu ro vaxalom,

<sup>18</sup> \*la dinaba ven lusuxa silok ap mo lemenemen, la dinabap kup keretna, “Goxopmen temenemen at na lavatbung menemen kerekngan na lemenemen silok.”

<sup>19</sup> \*La dinaba revi laxakup to mavana at lempatlak atdi la dinabang teng, la dinabang teng galinga xeretna, “I lok kapmek aleng. Lemenemen silok Babilon

ira xapmek pam. Laxanmon ga oso go kusu na lox asu lapnovos silok ti limixin ap mo lemenemen silok. La keneng mun at lavanna sangaun minit la lempanga axap teren ira rem utut axap pam.”

<sup>20</sup> \*La lara laxaka linga ga lok bok, “Nemi axap mik lok to vana at laxalibet, mina momo. Nemi limixin at ne Moroa, la luvuttadi vavang la lavaeme vapaase ali, mina sosoro aleng. Mila ne Moroa ira vorang taba vam mo lemenemen silok mi langsung losongsongot mumu lempanga xapmek neni ga lox i rinimi.”

<sup>21</sup> \*La lara laangelo lolos ga ranga ka lara langsung lavaruat la ga lu arup min to at laras la ga lok keretna, “Lemenemen silok Babilon. At na mun langas dinaba lu asi mi na lemenemen kerekngan na lavaruat, la kopmen tara noxo vuse ka bok ba i.

<sup>22</sup> \*La teta noxo ronga ka bok ba lerengteng at lengkon taaleng, lerengteng kaka tadi, lerengteng kaatu eburu mi lerengteng at luru keneng teren. La taradi gugu noxo lok bok ba lugugu ren go, la kopmen bok ba tavaruat noxo sax amumus levempiao.

<sup>23</sup> \*Di noxo ven kaka bok ba lososoo at lababao do xeneng at nom lemenemen, la di noxo ronga bok ba teepang amomo at teloklox epot maxat. La luvuttadi apnovos me go nedi diga lolos aleng keneng at lavatbung menemen axap, la diga sak tup mi limixin at lara menemen axap mumu mun lengkot at lemenemen (magic) digak lox i.

<sup>24</sup> \*La na lemenemen Babilon i ruuna ka losongsongot mila diga sev amet lavaeme vapaase ali eburu mi limixin at ne Moroa ro xeneng ap mo lemenemen silok. Laaba, nedi axap no limixin diga sep amet nedi at na lavatbung menemen.”

\* **18:15:** Isi 27:31,36 \* **18:16:** Li 17:4 \* **18:17:** Isi 27:27-29 \* **18:18:** Isi 27:32 \* **18:19:** Isi 27:30-34 \* **18:20:** Ais 44:23; Lal 32:43; Jer 51:48-49 \* **18:21:** Jer 51:63-64; Isi 26:21 \* **18:22:** Ais 24:8; Isi 26:13 \* **18:23:** Jer 7:34; 16:9; 25:10; Ais 47:9 \* **18:24:** Jer 51:49; Mt 23:35; Li 17:6

## 19

### *Ata Emi Asu Mi Ne Moroa*

<sup>1</sup> Melemu at nai, aga ronga laxaka linga atnedi buaang limixin to vana at laxalibet, digap kup silok keretna, “Leeme asu ri ne Moroa, neni Laradi Loklox Arooro atdik, la i ruuna lisixam la lolos teren i silok aleng.

<sup>2</sup> \*Mila lodoxoma ren ti raba limixin mi levesongsongot ik mokso aleng la i ruturun. Moroa ira lok li vam lumumuat at latkin ngarangat, mo ga lox abilinga limixin at na lavatbung menemen mi loklok ti elongka. La ne Moroa ira vorang pam laxakapmek ap mo latkin ga sev amet lavasaxaruki at ne Moroa.”

<sup>3</sup> \*La digap kup bok, “Leemi asu ri ne Moroa. Neni ga sele utut lemene-men Babilon la lusuxa ren i urut uto vana la mo laxao noxo xap.”

<sup>4</sup> \*La mo legepu sangaun mi lavanuet loxongkulao amgomgo la lavanuet levempanga rooro diga xis tiktikbu mi lempatgulom atdi la diga lotu parap ne Moroa. Diga lok, “I ruturun, leemi asu ri ne Moroa.”

<sup>5</sup> \*La nia aga ronga laxaka linga ga laa boro at loxonin orong at ne Moroa la ga lok keretna, “Leemi asu ri ne Moroa. Nemi lavasaxaruki ren, la nemi mi lok ngangao ren la nemi limixin kopmen tevenasen silok atnimi la nemi limixin silok, mina emi asu mi ne Moroa.”

### *Loklox Epot At Lanasip*

<sup>6</sup> \*La aga ronga laxaka linga at limixin buaang ga ninni ngan ladan silok i sesen lolos la ga lok ngan bok leretepaavat boro vana at laxalibet i tit. La mo laxaka linga ga ravasu xeretna, “Leemi asu ri ne Moroa, mila Leeme Silok atdik ne Moroa, neni i silok aleng la naba nemen amisik ngan Lamgomgo at lempanga axap.

<sup>7</sup> Ata momo la ata sosoro la ata emi asu min, mila laaleng loklox epot at

Lanasip mo ia vot ta la loono maxat tin monga ira gagas li vam i.

<sup>8</sup> \*La ni ira lok ka vam labantamon avukat in bun aleng, in tanan la im games aleng.”

Na labantamon bunbun i ru katling leveloklok nunuan at limixin at ne Moroa.

<sup>9</sup> \*La mo laangelo ga lok tia, “Una malagan i na, ‘Luvukat tinedi limixin ne Moroa ba xup ka di ri leluxa at loklox epot at Lanasip.’ ”

La ni ga lok bok tia, “Anai, ni levelinga ruturun boro at ne Moroa.”

<sup>10</sup> Nia aga ronga i na la aga xis tiktikbu mi luvatgulom tarak to saparap luxangedek teren kusu ana lotu parav i, ketla ni ga lok tia, “Nemen gat uta lotu parav ia. Nenia lasaxaruki mun at ne Moroa kerekn-gan nenu eburu mi luvutnetam, mo mim tebeng levelinga ruturun at ne Iesu. Una lotu parap ne Moroa. Mo levelinga ruturun ne Iesu ga tong asu i, ni lavasuun at levempavang at luvuttadi vapaase asu levelinga.”

### *Laradi Ruturun Gat Kis At Lavaros Bunbun*

<sup>11</sup> \*La nia aga ven laxalibet ga rem suang la aga ven lara lavaros bunbun. La mo laradi gat kis go mavana ren, laasen teren, ne Lurururun. Lodoxoma ren in manton tino la kerepmo neni laradi ing tonga linga la ik paxaru kaxat levenesep.

<sup>12</sup> \*Luxatli ren i soosoo ngan laxao i ngangao, la ni ga xua buaang lempatbungorong to at lavatlak teren. La lara laasen ik lok teren la kopmen teta naklen lavasuun teren, ketla neni xusuk mun iklen i.

<sup>13</sup> \*La mo lavanga singsigaara ren i umsu mi lada la laasen ap mo laradi “Lenavolo at ne Moroa.”

<sup>14</sup> La limixin esep boro vana at laxalibet di mumu asu i, dit kis at lemparos bunbun la di sigaara mi levesingsiga i nunuan la in bun aleng la i dadat.

\* 19:2: Li 6:10; 16:7    \* 19:3: Ais 34:10; Li 14:11    \* 19:4: Li 4:2,10    \* 19:5: Sam 22:23; 115:13; 134:1; 135:1; Li 11:18    \* 19:6: Li 11:15; 14:2; 15:3; 21:2    \* 19:8: Ais 61:10    \* 19:9: Mt 22:2-3; Gu 10:25-26; Li 22:8-9    \* 19:11: Li 1:5; 6:2; Sam 96:13; Ais 11:4    \* 19:12: Li 1:14; 2:17    \* 19:13: Ais 63:1-3; Jo 1:1,14

15 \*Lavarise sengsen i sixisu boro at lungusno ren kusu ti sak tup mi levenabung mixin di munepen min. La neni nabam gomgonga di ngan lamgomgo atnedi, la lamgomgonga ren naba lolos aleng. Neni naba lox asuusu lebelemamao silok at ne Moroa, ni Lanaraavuk.

16 \*La lara langas linga ik lok to at lisingsigaara ren la to bok at laaon teren. Nom langas linga i lok keretna, "Lorong Silok mavana at lavaorong la Leeme Silok mavana at lavaeme silok."

17 \*La nia aga ven lara laangelo ga tu ro mavana at laxangking. La ni ga xup silok ti lavapixa axap dip tava de vana at lamavangkap keretna, "Ude nimi la mina vot buru ri langsung leluxa at ne Moroa.

18 Ude nimi la mina anan levenbaaxin at lavaorong la luvuttadi amgomgo at limixin esep, la levenbaaxin at luvuttadi lolos, la levenbaaxin at lemparos eburu minedi limixin dit kis teren, la levenbaaxin atnedi limixin sepmus eburu mi limixin saksaxaruki, la atnedi bok limixin kopmen tevenasen silok atdi la nedi limixin mi levenasen silok."

19 \*La aga ven bok lavatpanga sio eburu mi lavaorong at na lavatbung menemen eburu mi limixin esep atdi. Diga vot eburu xusu dina esep eburu mi nom laradi gat kis at lavaros bunbun la limixin esep teren.

20 \*La nedi diga ranga alis lavatpanga sio eburu mi leeme vapaase ali xaxarang, mo gak lok lempanga sangsangu ri sar asoogong limixin kusu dina lox asilok laasen at lavatpanga sio. Ni ga lok mo lempanga sangsangu xusu na bala arup buaang nedi limixin la diga ruuna ka loklok katling at lavatpanga sio la diga lotu parap lavatpoovo vanga ren. La Laradi Ruturun eburu mi limixin esep teren diga lu arup mi lavatpanga sio la leeme vapaase ali

xaxarang, move duga rooro, ro at lemet kao, mo i tos amisik mi lasalpa.

21 \*La mo lavarise sepsep ga sixisu boro at lungusno ap mo Lara gat kis at lavaros bunbun, la ga sep kutkut axap limixin esep at lavatpanga sio. La lavapixa axap diga anan tino at levenbaaxin atdi.

## 20

### *Satan Nabak Lok At Loogu Xokoxo*

1 \*La nia aga ven lara laangelo ga si boro vana at laxalibet, neni gam tebeng lengki at lemeroon la gam tebeng bok lavaros sen silok.

2 \*La mo laangelo ga ranga alis lavattulaava la ga xoxo i kusu na nemen kuren at legesa abin sangsangaun kobot (1000) levenmaares. Mo lavattulaava ga nemen ganoxa, neni ne Devel la laasen bok teren ne Satan.

3 \*La mo laangelo ga lu arup min ukopok at lemeroon, la ni ga vipe lavatban la gam lut pe avarang lumusmaragu ap mo lemeroon. La ne Satan nabak lok go at legesa abin sangsangaun kobot (1000) levenmaares la ap mo levenaleng neni noxo bala arup bok ba limixin at lavatbung menemen ba se at laxavaxap ap mo levenmaares. Melemu at nom neni naba sepmus at lentaba levenaleng mene.

4 \*La nia aga ven lengkonin at lavaorong, la nedi limixin digat kis teren, diga ruuna lolos kusu dina ila mumu loklok at limixin. La aga ven bok leventoonan atnedi limixin la limixin petpes diga ra korop lengkaka atdi mila diga tong asu lununu atdi keneng at ne Iesu, la diga nunu bok at levelinga at ne Moroa. At lorooro atdi di goxo lotu parap lavatpanga sio la lavatpoovo vanga ren la di goxo lok ka loklok katling at lavatpanga sio to at lenmang atdi koplavengikngan di. Diga roo xat

\* 19:15: Li 1:16; 12:5; 14:20; 4:8; 21:22 \* 19:16: Li 17:14 \* 19:17: Isi 39:17-20 \* 19:19: Sam 2:2 \* 19:20: Li 13:12-17; 20:10,15; Ais 30:33 \* 19:21: Li 19:17-18 \* 20:1: Li 9:1 \* 20:2: Li 12:9 \* 20:3: Ju 1:6 \* 20:4: Dan 7:9,22,27; 1 Ko 6:2; Li 13:17

amlong la nedi eburu mi ne Karisito digam gomgonga limixin at legesa abin sangsangaun kobot (1000) levenmaares.

<sup>5</sup> La nedi limixin petpes diga met pam, kopmen di goxo roo xat amlong se at laxavaxap ap mo legesa abin sangsangaun kobot (1000) levenmaares. Anai, ni laxakatu kaxat amlong avot at labarongan.

<sup>6</sup> \*Naba lox avukat aleng tinedi na lavaanat soxolik at ne Moroa, dinaba nemen ap mo laxakatu kaxat amlong avot. Di noxo suma lanmet sepsev agepura ketla dinaba lok ka lugugun ngan lavamaasa ri ne Moroa la ri ne Karisito. La nedi eburu mi ne Karisito dinabam gomgonga limixin at legesa abin sangsangaun kobot (1000) levenmaares.

#### *Lanmet At Ne Satan*

<sup>7</sup> Melemu ap mo legesa abin sangsangaun kobot (1000) levenmaares na xap, Moroa naba soxomus asu ne Satan boro at loogu xokoxo.

<sup>8</sup> \*La ni naba vasu ri bala limixin at lengkot axap at na lavatbung menemen. La nedi lubang mixin me Gok la Magok, Satan naba lok bubua ka di kusu ti leesep. Luutus atdi naba umsu aleng kerekngan laxangkaneng to loxon.

<sup>9</sup> \*Dinabat pas boro at lengkot axap la dinaba rupot to ap mo lemenemen silok at ne Moroa i vavara aleng tin, la dinaba ru xangkan i. Ketla laxao naba si boro vana at laxalibet la naba xotos axap di.

<sup>10</sup> \*La mo laradi babala arup, ne Satan, Moroa naba lu arup min uto at lemet kao at lasalpa. Mo lemet kao lavatpanga sio eburu mi laradi vapaase ali xaxarang dunabak lox e, la ap mo lenep nedi lavantun dinaba ruuna ka losongsongot silok at levenaleng kangking la kanimin la kopmen taxavaxap teren.

#### *Laaleng Ete Silok*

<sup>11</sup> La nia aga ven langsung loxonin orong bunbun la mo Laradi gat kis teren. La lavatkangka eburu mi laxalibet duga sixiro basinge i la duga sonao nga.

<sup>12</sup> \*La aga ven nedi diga met pam, limixin silok la limixin kopmen tevenasen silok atdi, diga tu ro melango at loxonin orong at ne Moroa. Lentaba lempatbuk mo ga repalas. La lara lubuk ap mo levenbuk diga suang i, ni lubuk at lorooro. La ne Moroa ga ila mumu loklok atnedi limixin, la mo leveloklok atdi gak lok ap mo levenbuk.

<sup>13</sup> \*La nedi limixin diga met to at laras la nedi bok limixin diga met la diga nemen to Edesa, la limixin axap diga met, diga tu ro melango at ne Moroa la neni ga ila mumu loklok atdi la diga lok ka luunun ga epovo mi leveloklok digara lok pam i.

<sup>14</sup> \*La ne Moroa ga lu arup axap tino nga mi lanmet eburu mi lenep Edesa uto at lemet kao. Mo lemet kao, ni lanmet sepsev agepura.

<sup>15</sup> \*La nedi limixin levenasen atdi goxok lok at lubuk at lorooro, Moroa ga lu arup bok midi uto at lemet kao.

## 21

#### *Laxalibet Maxat Mi Lavatkangka Maxat*

<sup>1</sup> \*La nia aga ven laxalibet maxat la lavatkangka maxat, mila laxalibet avot mi lavatkangka avot ga xap la laras ga sonao.

<sup>2</sup> \*La aga ven lemenemen melemlengan, ni lemenemen maxat Jerusalem, ga si boro vana at laxalibet boro at ne Moroa. Ni ga nganang ngan latkin i gagas kusu na epot maxat at latlok teren.

<sup>3</sup> \*La aga rongga luxupkup silok boro at loxonin orong at ne Moroa

\* **20:6:** Li 1:6 \* **20:8:** Isi 38:2,9,15-16 \* **20:9:** 2 Lav 1:10; Isi 39:6 \* **20:10:** Lur 19:24; Sam 11:6; Li 19:20; 21:8 \* **20:12:** Dan 7:9-10; Mt 25:31-46; Gu 17:31; 2 Ko 5:10; Li 13:8 \* **20:13:** Ro 2:6; 1 Pi 1:17; Li 2:23; 22:12 \* **20:14:** 1 Ko 15:26,55 \* **20:15:** Li 13:8; 19:20 \* **21:1:** 2 Pi 3:13 \* **21:2:** Ais 52:1; 61:10; Ib 11:16; 12:22; Li 3:12 \* **21:3:** 2 Let 6:18; Sak 2:10; 2 Ko 6:16; Li 7:17



ga lok, “Mina ven ba i, lemenemen aulis at ne Moroa monga ira si vam la neni nak lok eburu mi limixin. La ne Moroa naba nemen eburu minedi, la nedi dinaba ravasu ngan limixin teren, la ni naba nemen ngan ne Moroa atdi.

4 \*Neni naba ves kepe lengkabili dan basinge lengkatli atnedi. La limixin kopmen di noxo met bok ba, la di noxo duudu bok ba kopla dinang teng la di noxo songot bok ba. Mila lavatangka avot ga sonao vam eburu mi lempanga axap gak lok keneng teren.”

5 \*La mo Laradi gat kis to at loxonin orong teren ga lok, “Monga ana lox amaxat lempanga axap.” La ni ga lok bok tia xeretna, “Una malagan i na mila na levelinga i ruturun la i epovo do limixin dina nunu ren.”

6 \*La ni ga lok bok, “Nia ara lox empampana vam lugugu rak. Nenia Lurutu Kaxat la Lumumupit. Anaba vaxain nedi limixin do di minu mi mo ladan i puuvut su boro at lavatturunen at ladan at lorooro la kopmen di noxo un i.

7 \*Dola nege na vas asi lolos at laxakapmek, neni naba ruuna na leveloklox anarong keretna. Nenia anaba nemen ngan ne Moroa ren la neni naba nemen ngan ne nuruk.

8 \*Ketla nedi limixin makmarat la nedi dina sok tixirixes lununu atdi, la nedi dina lok laxakapmek silok la nedi dina sev amet parang limixin, la nedi dina lok loklok kakapmek maxamang at lixitkis epot, la nedi dina lok lengkot at lemenemen (magic), la nedi dina lotu parap levempooovo moroa, nedi limixin babala. Nedi axap na, nenia anaba lu arup midi uto xeneng at lemet kao i ngangao mi lasalpa. Na losongsongot, ni lanmet sepsev agepura.”

### *Lemenemen Maxat Jerusalem*

- \* 21:4: Ais 35:10; 65:19    \* 21:5: 2 Ko 5:17; Li 4:2,10    \* 21:6: Sam 36:9; Jer 2:13; Jo 7:37; Li 1:8,17; 22:17    \* 21:7: 2 Sml 7:14    \* 21:8: Mt 25:41; Ib 10:38-39; Li 19:20; 21:27; 22:15    \* 21:9: Li 15:1  
\* 21:10: Isi 40:2; Li 21:2    \* 21:11: Ais 60:1-2,19    \* 21:12: Isi 48:30-35    \* 21:15: Li 11:1

9 \*La lara at nom lavanuti lubungangelo mo gam tebeng lavanuti lempattingtigon ga umsu mi lavanuti levesongsongot. Ni ga lok tia, “Ude u, la ana lox ase u mi mo loono maxat, neni latkin ti Lanasip.”

10 \*La Loroonan Kaala ga vubeles tarak, la nom laangelo ga xip kaka ia uto at lakaana silok la ga lox ase ia mi lemenemen melemelengan Jerusalem, mo ga si boro vana at laxalibet la boro at ne Moroa.

11 \*La mo lemenemen gan tanan aleng mi lisisixam at ne Moroa. Mo lemenemen ga soosoo aleng ngan lengkonuat gamgames, luunun teren i urut aleng, i ngan jespa, i gamgames la i xasep aleng.

12 \*La langsgangan larangas uat matmatkun ga baalom aleng upana la ga tu xangkan mo lemenemen silok Jerusalem. La lasangaun mi legepura laramusmaragu gak lok ap mo larangas uat. Lasangaun mi legepura lubung angelo ga lok tatao mo laramusmaragu, legesa angelo at legesa musmaragu. La ap mo laramusmaragu levenasen atnedi lasangaun mi legepura larabibinat at limixin boro Israel gak lok atdi, leges asen at legesa musmaragu.

13 Lavantun laramusmaragu gak lok to meso, lavantun levenmusmaragu gak lok to mero, lavantun laramusmaragu gak lok to mexun, la lavantun laramusmaragu gak lok to mesi.

14 La mo langas uat gat kis mavana ap mo lasangaun legepura larauat kis, la levenasen atnedi lasangaun mi legepura luvuttadi vavang at Lanasip gak lok teren.

15 \*La mo laangelo ga paase tia, ni ga ruuna losoxovo i gol, kusu na soxovo mo lemenemen silok eburu mi laramusmaragu ren la larangas uat teren.

16 Lababaalom at larangas uat ap mo lemenemen silok mi lereptelas

teren la lababaalom upana ukopok ga epovo mun. La nom lababaalom teren ga epovo at legepu abin sangsangaun kobot mi lavalimo sangaun kobot (2500) kilomita.

<sup>17</sup> La ni ga soxovo bok lereptelas ap mo larangas uat la ga epovo at lavantun sangaun mi legepu asongo. Laangelo ga soxovo mo lemenemen kerekngan limixin di soxovo lemenemen.

<sup>18</sup> Langas uat ap mo lemenemen diga lox i mi la Jespa, la mo lemenemen silok diga lox i mi logol tinotno, la ga xasep ngan lagalas.

<sup>19</sup> \*La mo larauat kis at larangas uat diga xovox i mi laxanasen uat axap i gamgames. Lara avot neni la Jespa; lara mumu neni la Sapai; lara sev avantun neni la Aget; la lara sev avanuet neni la Emeral.

<sup>20</sup> Lara sev avalimo neni la Onikis; lara sev avanna neni la Kanelien; lara sev avanuti neni la Krisolait; lara sev avanuan neni la Beril; la lara sev avasik neni la Topas; la lara sev asangaun, neni la Kirisoperes; la lara sev asangaun mi legesara, neni la Jasin, la lara sev asangaun mi legepura, neni la Emetis.

<sup>21</sup> La mo lasangaun mi legepura laramusmaragu, nedi lasangaun legepura leven peal la at legetgesa musmaragu diga lox i mi legesa peal mun, la langas lom ap mo lemenemen ga gol tinotno la ga xasep ngan lagalas.

<sup>22</sup> \*La nia a goxo ven toogu laplavang go xeneng at nom lemenemen silok, mila ne Moroa xa Leeme Silok neni Lanaraavuk eburu mi Lanasis duk lox amisik ap mo lemenemen silok. Kuren la limixin dixok pakes ti toogu kusu dina lotu parap ne Moroa mi Lanasis go.

<sup>23</sup> \*La mo lemenemen silok ixok pakes ti laxangking mi lagaaling

kusu duna soosoo axasev i. Lisixam at ne Moroa im taba amisik losoosoo at levenaleng axap, la Lanasis ni lababao ren.

<sup>24</sup> \*La limixin axap at na lavatbung menemen dinaba nemen at nom losoosoo, mo i soosoo su boro ap mo lemenemen silok. La lavaorong axap at na lavatbung menemen dinaba xip beles levenapnovos atdi ukeneng teren.

<sup>25</sup> \*La laramusmaragu ap mo lemenemen silok noxo tu vipipe, la noxopmen bok ba taxanimin go.

<sup>26</sup> \*La limixin at lavatbung menemen diba xip beles mi levenapnovos atdi uto xeneng ap mo lemenemen silok.

<sup>27</sup> \*Ketla kopmen tinotno taxakapmek naba beles keneng teren, nedi dik lok lengkot mamangan kopla di xaxarang, di noxo vubeles teren. Nedi xusuk mene levenasen atdi ik lok to at lubuk at lorooro at Lanasis dinaba beles keneng teren.

## 22

### *Ladan Tooro*

<sup>1</sup> \*La laangelo ga lox ase ia mi ladan at lorooro ga xasep aleng. La ga puuvut su boro at loxonin orong at ne Moroa la Lanasis,

<sup>2</sup> \*la ga sesen to xantubu at langas lom at lemenemen silok. La to meo la meo at na ladan, luuna at lorooro i tu go la keneng at legesa maares mo luuna i pisik, i epovo at lasangaun mi legepu aleng, la i pisik gesara at legetgesa gaaling. Lempavaxan una ren dik lok ka i ri lox aroo limixin at lavatbung menemen.

<sup>3</sup> La mo lasaxaek ik lok mavana at na lavatbung menemen noxok lok ap moi lemenemen silok. Loxonin orong at ne Moroa eburu mi Lanasis naba nemen go la lavasaxaruki ren dina lotu parav i.

\* 21:19: Ais 54:11-12 \* 21:22: Li 15:3 \* 21:23: Ais 60:19-20; Li 22:5 \* 21:24: Ais 60:3,5

\* 21:25: Ais 60:11 \* 21:26: Sak 14:7; Li 22:5 \* 21:27: Ais 52:1; 1 Ko 6:9-10; Li 13:8; 21:8 \* 22:1:

Isi 47:1 \* 22:2: Jol 3:18; Sak 14:8; Lur 2:9; Isi 47:12; Li 22:14,19 \* 22:4: Sam 42:2; Mt 5:8; Li 3:12

\* 22:5: Dan 7:18,27; Li 5:10; 20:6; 21:23,25

4 \*La dinaba epen etang mi ne Moroa, la laasen teren nabak lok to at lenmang atdi.

5 \*La noxopmen bok ba taxanimin, la limixin di noxok pakes bok ba ri taxasep at lababao xopla laxangking. Mila Leeme Silok ne Moroa neni naba lok ngan laxasep tidi, la dinaba ruuna lixitkis silok ti lok tatao limixin la dinaba nemen amisik kuren, la kopmen taxavaxap teren.

6 \*La laangelo ga lok tia, “Na levelinga i ruturun amet la i epovo do limixin dina nunu ren. La Leeme Silok, ne Moroa im taba Loroonan Kaala ren ti lavaeme vapaase ali ren la ni ga riki laangelo ren kusu na lox ase lavasaxaruki ren mi lempanga salai naba vot soso.”

#### *Iesu Mo Naba Vot*

7 \*Iesu ga lok keretna, “Mina rongga i na, anaba vot soso mun. Luvukat tinedi di mumu asu levempapaase ali at na lubuk.”

8 \*Nenia ne Jon. Aga rongga na levelinga la aga ven na lempanga, la aga xis tiktikbu mi luvatgulom tarak ti lotu parap laangelo mo ga lox ase ia mi na lempanga.

9 Ketla neni ga lok tia, “Nemen uta lotu parav ia. Nenia mun lasaxaruki at ne Moroa kerekngan u la luvutnetam, nedi lavaeme vapaase ali la nedi bok ding tonga res at levelinga at na lubuk. Una lotu parap kusuk ne Moroa.”

10 \*La ni ga lok tia, “Nemen uta lipe levelinga vapaase ali at na lubuk, mila loxonaleng monga i auret kusu na levelinga na soorun.

11 \*La nedi dik lok laxakapmek, una ke nedi dinak lok laxakapmek. La nedi loklok atdi i bilinga, dina nemen kuren. La nedi dik lok leveloklok i nunuan, dina lox epasum i mi leveloklok i nunuan. La nedi di ruuna loklok i melemelengan, dina nemen kuren.”

12 \*La ne Iesu ga lok, “Mina rongga ia. Nenia anabamlong soso mun! Nia anaba xip ka luunun eburu minia, kusu anaba raba limixin getgesara mi luunun naba epovo mi lempanga salai diga lox i.

13 \*Nenia Lamgomgo la Lavaxap, Lurutu Kaxat mi Lumumupit.

14 \*Luvukat tinedi dira gos adadat pam levesingsiga atdi, kusu lorooro atdi naba epovo xusu dina anan at lempeven una boro at luuna at lorooro, la dina beles keneng at levenngas povolo uto at lemenemen silok.

15 \*Ketla limixin kakapmek la nedi di lok lengkot at lemenemen (magic), la nedi limixin diga lok laxakapmek maxamang at lixitkis epot la limixin sepsev amet tadi, la nedi di lotu parap lempoovo vanga, la nedi bok di vavara aleng i xusu dina paase babala la dik lox amisix i. Nedi axap na di noxo vubeles to xeneng ap mo lemenemen silok.

16 \*Nenia ne Iesu. Ara riki vam laangelo rak tinemi limixin at lotu xusu ni na vaase axasep nimi mi na levelinga. Nenia lavatturunen la livisik li at ne Devit. La nenia lentian i soosoo aleng.

17 \*Loroonan Kaala eburu mi latkin epot maxat du lok keretna, ‘Ude nimi.’ La nedi di rongga i na, dina lok bok keretna, ‘Ude nimi.’ Do nege i minu, i epovo do neni na rupot, la nege i vara ladan tooro, neni na lok ka i, mila kopmen tuunun teren.”

18 \*Nenia ne Jon. A vaase aronga nemi axap mira rongga vam na lempapaase ali at na lubuk. Do tara na tong abeles parang tengkot ukeneng at na lubuk, Moroa naba raba i mi nom levesongsongot ik lok keneng at na lubuk.

\* 22:6: Li 1:1 \* 22:7: Li 1:3; 2:16 \* 22:8: Li 19:10 \* 22:10: Li 1:3; 10:4 \* 22:11: Dan 12:10  
 \* 22:12: Ais 40:10; 2 Ko 11:15; Li 2:16,23 \* 22:13: Li 1:8,17; 21:6 \* 22:14: Li 22:2 \* 22:15: Li 21:17 \* 22:16: Kex 24:17; Ro 1:3; Li 2:28; 5:5 \* 22:17: Lem 8:14; Li 21:6 \* 22:18: Lal 4:2; 12:32; Li 15:1,6 \* 22:19: Li 22:2

<sup>19</sup> \*La do tara na lok pes tempanga basinge na lempapaase ali at na lubuk, Moroa naba lok kepe levempeven una ren to at luuna at lorooro la neni noxo nemen bok baro xeneng at lemenemen melemlengan at ne Moroa. Mo luuna la mo lemenemen, ik lok at na lubuk.

<sup>20</sup> \*La neni mo i paase aru i na, i lok keretna, "I raturun aleng. Nenia mo anaba vot soso nga."

I raturun. Ude u, Leeme Silok ne Iesu!

<sup>21</sup> Letaba nalamu at Leeme Silok ne Iesu nak lok eburu mi limixin at ne Moroa. I raturun.

---

\* **22:20:** Li 2:16

# **Lenavolo**

**Lovoang Kaala Maxat  
La Sam**

**Madak  
Lenavolo Lovoang Kaala  
Maxat La Sam  
Madak New Testament and  
Psalms**

## **Levelinga Keneng At Lubuk Sam I Paase Mumu Ne Iesu**

**Sam 2:6-9 Lixitkis orong naba nemen amisik. Gu 13:33; Ib 1:5**

**Sam 8:2,4-6 Laxamdak di emi asu mi ne Iesu. Mt 21:15-16 Iesu i ruuna lixikis silok la lisisixam nunuan, la ni Lamgomgo at lempanga axap. Ib 2:6-11**

**Sam 16:8-10 Laxakatu kaxat amlong at Lanarong. Gu 2:25-31; 13:25; 15:12-17**

**Sam 22 Lanmet at laxaba. Mt 27:35,39,46; Mk 15:20-24; Jo 19:23-24,28; Ib 2:12**

**Sam 24:1-4 Iesu ga rudum li lavatbung menemen. Li 14:7**

**Sam 34:20 At lanmet at ne Iesu, kopmen toxosi ren ga repit. Jo 19:31-37**

**Sam 35:11 Digak sok taba ne Iesu mi leveloklok kakapmek. Mk 14:57**

**Sam 40:6-10 Iesu ga raba lorooro ren ngan laplavang. Ib 10:5-7**

**Sam 41:9 Lentangas tino bok, (Judas) la neni bok ga raba rulu ne Iesu. Lu 22:48**

**Sam 45:2,6,7,17 Loklok manmanton la lixikis orong teren noxo xap. Ib 1:8-9**

**Sam 68:18 Iesu gat pas uto vana at laxalibet. Ep 4:8**

**Sam 69:4,9,21 Goxopmen tava-suun at lebele ngatngas atdi saparap ne Iesu. Mt 27:34,48; Jo 2:17; 15:25; Ro 15:3**

**Sam 72:11,18 Iesu gak lok mo levempanga maraanu. Mt 9:33. Neni nabam gomgonga ri limixin at legesa abin sangsangaun kobot (1000) levenmaares. Li 11:15; 20:6**

**Sam 89:4 Lixitkis orong teren naba nemen amisik...la noxo xap. Lu 1:32-33,69; Gu 13:23,35-37**

**Sam 91:11-12 Loklok tong pen at ne Iesu. Mt 4:1-11; Lu 4:1-11**

**Sam 102:25-27 Iesu ga rudum li lavatbung menemen mi laxalibet.**

**Neni xopmen na lox ekun. Ib 1:10-12**

**Sam 110 Neni Leeme Silok la Loorong la Lamaasa Avolo la Laradi Rongtonga Linga. Mt 22:44; Gu 2:33-35; Ib 5:6; 6:19-7:28**

**Sam 118:22-23 Neni Luuat Kis. Mt 21:42; Mk 12:10; Gu 4:11; 1 Pi 2:7**

## Loklox Axasep Ti Lengkolina Silok

**Bali** -- (Barley) Neni lutpenit panga i lok ngan levenuto (levempiao). La limixin digak lok levengkide (bread) mi levenit teren, ketla mo levengkide (bread) dik lox i mi levenbali, ixo lox avukat solo ngan lentaba dik lox i mi levempiao (wheat). (Jo 6:9,13)

**Belsebul** -- Neni laasen at lara lomoora xaxarang ua limixin petpes no digak lok auret leme Israel diga lotu saporav i. La diga so asen i mi ne Belsebul. La neni i lok ngan bok ne Satan neni lamgomgo at laxantoonan kapmek (lubunggas). (Mt 12:24-27; Lu 11:14-23)

**Dadat** -- (Clean) Neni lavasuun teren do lorooro axap tinotno atnedik ixo ruuna taxapmek at lemeren ne Moroa. La nedik dixo bilinga atla lada at ne Iesu ga gos adadat dik basinge laxakapmek atnedik at loxonaleng neni i doxoma xepe laxakapmek atnedik. (Ib 1:3; 2:11; 1 Ko 1:3)

**Edesa** -- (Hades) Neni loxot ua limixin diga met pam digat pas ue at levenmaares avot ti lanmet at ne Iesu. La ga legepu nep gak lok go Edesa. Lenep avukat neni ua limixin avukat digat pas ue, la lenep kapmek tinedi limixin kapmek digat pas ue. Ketla at laaleng ne Iesu ga met, neni ga lok ka axap limixin avukat no digak lok to Edesa, kusu dina nemen eburu min to Lememen Nunuan at ne Moroa. La limixin kapmek at na levenaleng do di remet, move di vonon to Edesa. (Lu 16:19-31) Ketla limixin di ruuna lununu dit pas uto at lemenemen at ne Moroa. (Li 1:18; 20:13)

**Israel** -- (Israel) Na laasen ni laasen at lara lenep silok, ga nemen kuren at levenaleng at

ne Iesu la move i nemen lingina. Nedi limixin diga nemen go, maga so asen di mi "Limixin me Israel" kopla "Leme Israel." Gano at levenmaares melemu at loorong ne Devit, limixin at ne Moroa diga epeseves uto at legepu nep, Israel la Juda (Judaia). Ketla at levenaleng at ne Iesu diga nemen eburu ngan legesa binam tadi. Ketla nedi diga ruuna gepu asen, limixin me Israel la limixin me Judaia. Kuren la keneng at Lovoang Kaala Maxat nedu na kopmen duna lok petpes. Du tu katling mun legesa bungmixin. (Ro 9:6-7) Israel ni laasen bok at ne Jakop, lamdak at ne Aisak. (Lur 32:28)

**Jems** -- (James) Neni neton ne Jon. Nedu na lunitna ne Sebedi, la nedu luun pinivu at ne Iesu. (Mt 4:21) Melemu ne Erodes ga sev amet ne Jems. (Gu 12:1-2)

**Jems** -- (James) Jems bok neni lara laradi vetpes bok la neni ne nitna ne Alpias, la neni lun pinivu bok at ne Iesu. (Mt 10:3)

**Jems** -- (James) Jems lara vetpes bok, neni neton ne Iesu. La neni na laradi ua ga ravasu ngan lamgomgo at lotu to Jerusalem la neni na laradi ua ga malagan lovoang ti limixin axap at na lavatbung menemen ik lok keneng at Lovoang Kaala Maxat. (Gu 21:18; Ga 1:19; Je 1:1)

**Jon** -- (John) Neni lun pinivu at ne Iesu la neton ne Jems. Nedu lunitna ne Sebedi. La neni vam na laradi ga malagan Lagale Lavavang at ne Jon, lavantun lem-poang boro at ne Jon la Lisilimet. (Mk 1:19-20)

**Jon laradi sep susu** -- (John the Baptist) Neni ne nitna ne Sakaria mi ne Elisabet. Neni laradi ua ga vot kusu na gagas li langas ti ne Iesu la neni ga sep susu i. (Lu 1:1-25,57-80; 3:1-20)

**Josep** -- (Joseph) Neni latlok at ne Maria nenen ne Iesu. (Mt 1:18-25)

**Josep** -- (Joseph) To xeneng at Lovoang Kaala Migomgo ga neni lamdak ua ne Jakop gang kongkat min. La mo laradi ga ravasu ngan lamgomgo at lixitkis silok maxopok at ne Parao ro at lenep silok Isip. (Ib 11:22)

**Josep me Arimatia** -- (Joseph of Arimathea) Neni laradi ua ga mumu asu amisik ne Iesu, ketla limixin di goxokleklen i do neni lun pinivu at ne Iesu. Ga neni laradi apnovos la neni vam no laradi ga lok ka ne Iesu xusu dinak mir i ro at lamaaut maxat teren. (Mt 27:57)

**Judaia** -- (Judea) Na laasen ni laasen at lara lenep silok, ga nemen at levenaleng at ne Iesu. Nedi limixin diga nemen go, maga so asen di mi "Limixin me Judaia" kopla "Leme Judaia." Gano at levenmaares melemu at loorong ne Devit, limixin at ne Moroa diga epeseves uto at legepu nep, Israel la Juda (Judaia). Ketla at levenaleng at ne Iesu limixin diga nemen eburu ngan legesa binam tadi. Ketla nedi diga ruuna gepu asen, limixin me Israel la limixin me Judaia. Kuren la keneng at Lovoang Kaala Maxat nedu na kopmen dugoxok lok petpes. Duga tu katling mun legesa bungmixin. (Ro 9:1-5)

**Kaisar** -- (Caesar) Ni na laasen diga tong lubang amgomgo min ngan loorong kopla leeme silok at limixin me Rom. Limixin me Rom diga ru pavaa buuang levenep silok. Kuren la ne Kaisar gak lok ngan lamgomgo atdi axap. La lubang amgomgo axap at limixin me Rom, diga tong di mi lubang Kaisar. (Lu 2:1; 20:19-25; Pl 4:22)

**Kamel** -- (Camel) La kamel neni lavanga mi lavanuet kangkedek teren, ketla i silok aleng la limixin dit kis to vana ren la neni ip kip di uto at lengkot petpes.

La ip kip bok levenaknixip silok. Lepenaleng dik lok ka levengkabinin teren ti lok levempanga singsiga lolos. (Mt 3:4; Mk 10:25)

**Laangelo** -- (Angel) Neni lara laradi it pas ngan lороonan la i rooro amisik. Ketla neni lasaxaruki mun at ne Moroa la ing tonga res amisik teren. La lentaba bok di mumu asu ne Satan (lubunggas). (Mt 4:11; Lu 1:11-26; Ib 1:6-7,14)

**Laasesep** -- (Centurion) Na laradi ga silok keneng at limixin esep boro Rom. Neni gamgomgo ri legesa sangaun kobot (100) limixin esep. (Gu 10:1) Keneng at lubuk Leven Gugu, di tong i do loxolinga Inglis do "commander." Neni ga nemen mavana at leges abin sangsangaun kobot limixin esep (1000) la maga so asen i do leeme gomgo at limixin esep. (Gu 21:31)

**Labantamon Memele** -- (Purple or red cloth) Limixin me Judaia digak lok lempanga singsiga atdi. Ketla digoxok lok amisik lempanga singsiga memele mila luunun teren ga silok aleng. Limixin kusuk mun diga ruuna laasen silok la lapnovos silok bok atdi digang siga lempanga singsiga memele. (Lu 16:19; Jo 19:2; Li 18:12)

**Lagas** -- (Evil Spirit, demon) Lubunggas di leventoonan no di mumu asu ne Satan. Nedi na leventoonan ua di vavara xusu dinak lox abixurun lorooro at limixin kusu dinaba ronga xepe ne Moroa la dina mu asu ne Satan. (Mt 9:32-33; 12:43-45; 15:21-28; Mk 7:24-30; Lu 4:41; Gu 19:11-16)

**Lamaasa** -- (Priest) Lavamaasa nedi lara lenep binam tadi ua diga soxolik ka di xusu ti tu katling limixin me Israel kusu tiplavang ti ne Moroa. At levenmaares ne Iesu ga rooro ren, nedi na digaplavang to xeneng at loogu laplavang



ga nemen to at lemenemen Jerusalem. La digak soxolik ka na lavamaasa boro at livipisik li at ne Aron. Lamaasa gomgo neni ga silok aleng keneng at lavamaasa axap. La digak soxolik ka lamaasa gomgo xusu neni nabak lok mun at legesa maares, la melemu at legesa maares digak soxolik ka manga lara vetpes ti lok kun i. La mo lamaasa gomgo xusuk mun ga pubeles to xeneng at Loxot Kaala ro xeneng at loogu laplavang, kusu tiplavang ti ne Moroa ri laxapmek teren eburu mi laxakapmek at limixin axap digak lox i. Lentaba atnedi lavamaasa diga ruuna levenasen silok eburu mi lamaasa gomgo, la nedi bok mo lentaba diga gugu ngan lavamaasa silok at levenmaares gara on pam. (Mk 14:10-11; Lu 1:5-23; Ib 9:6-14; 1 Pi 2:9)

**Lamatbin** -- (desert, wilderness) Lamatbin neni lenep kangka silok ua larakabu ixot pot amisik e, la kopmen taxampivilis na susu go. La levenuna bok ixo susu ren. La kopmen bok timixin na nemen ap mo loxot. (Mt 3:1; Mt 4:1; Gu 7:36)

**Lanarong** -- (Christ, Messiah) At lavapaase Inglis, loxolinga Messiah di tong box i ri loxolinga Karisito (Christ). Na loxolinga Karisito boro at lavapaase Girik, la Messiah boro at lavapaase Judaia (Hebrew). La lavasuun ap mo loxolinga do "Laradi di sep susu i mi laxadan momonok." Lavasuun at na atla, ganoxa do ne Moroa ga lok katling tara ngan loorong ti leme Judaia, digabap sep susu i mi lengkadan momonok ngan loklok katling do neni loorong. Ne Moroa ga xaape min do neni naba riki taradi loklox arooro ri limixin teren. La diga so asen mo laradi mi "Lanarong" atla neni laradi

ua ne Moroa ga soxolik ka i la gara riki asi i. (Mt 16:13-16; Mk 14:61-62; Jo 1:35-41; Gu 17:2-3)

**Laradi Loklox Arooro** -- (Saviour) Diga tong ne Iesu mi Laradi Loklox Arooro at na lavatbung menemen, atla neni ga suang langas ti limixin kusu ti roo su basinge loklox asongot mo i gagas kusu na vot parap nedi. Atla, ne Iesu ga met la ga ruuna ka mo losongsongot ga gagas kusu ti limixin, la ne Moroa ga doxoma xepe laxakapmek atnedi di nunu sogo ren. La neni in tuuna xaka di la ira reven di ngan luvuttadi manmanton tino atla, mumu mun lanmet at ne Iesu. (Lu 2:11; Jo 4:42; 1 Ti 4:10)

**Laradi Loklox Ase At Laulis Linga** -- (Scribe, teacher of the Law) Nedi na luvuttadi loklox ase diga vanasa limixin mi Laulis Linga no ne Moroa ga raba ne Moses min ti limixin me Judaia. Lavalimo levenbuk at ne Moses (Lurutu Kaxat, Lavatpasu, Lavamaasa, Lexekexes, Laulis Linga Sepsev Agepura), nedi na, Laulis Linga ne Moroa ga raba ne Moses min. (Lu 5:17-26; Gu 4:5-12)

**Laradi Mevana** -- (Son of Man) Ganoxa mo laradi vapaase ali ne Daniel ga tong na laasen ti mo Laradi Loklox Arooro mo ne Moroa naba riki asi i xusu ti lok arooro limixin teren basinge laxakapmek atnedi. Lavasuun at na laasen i sixit emu mi loxolinga Lanarong. La ne Iesu ga tong na laasen at lengkonalleng neni ga tong axa i min do Laradi Mevana, i ngan neni ga tong i do neni laradi ua ne Moroa ga riki asi i, la neni ga ruuna lolos boro at ne Moroa. La neni ga vee radi at na lavatbung menemen, ketla neni ne Moroa bok. (Mt 16:27; Lu 5:24; Jo 1:51)

**Laradi Vapaase Ali** -- (Prophet) Laradi vapaase ali neni laradi ua ga paase asu levelinga at ne

Moroa ti limixin. La neni ga tu katling ne Moroa ri paase ri limixin. I ngan gano ne Moroa ga riki buaang luvuttadi vapaase ali ngan ne Elaia, ne Aisaia, la ne Jeremaia. La ne Moroa ga lox asaxaven bok lempanga naba vot melemu ridi na luvuttadi. Buaang levenmaares avot ti livipisik at ne Iesu, nedi na diga paase asaxaven avot mo lovoatpot teren mi leven gugu neni naba lox i la lavanga sala naba vot at lorooro ren. Diga paase ali bok mi lavanga sala naba vot at levenaleng avit at na lavatbung menemen, la avot ti ne Iesu nabamlong kusu ti vaxaru li limixin at leete. (Gu 28:25; Ro 1:2)

**Lasaxaruki** -- (Slave) Neni laradi ua i gugu taba lara vetpes la ik lok bok maxopok ap mo lara neni i gugu taba i. La i epovo bok do lamgomgo ren na sesep min kusu tara vetpes na un ka manga i rin. Lubung asaxaruki gano digak lok ka di ro at levennep petpes, la mo lasaxaruki gaba lok ka ba loklok mamana ren at lavanna maares melemu at lugugu ren. Lentaba ren diga epovo na un ka asu i basinge laradi gomgo ren. (Mt 20:26-27; Ep 6:5-8; Pl 1:1)

**Laulis Linga** -- (Law) Laulis Linga at ne Moroa diga malagan i xeneng at lavalimo levenbuk avot at Lovoang Kaala Migomgo. Lasangaun Levenaulis Linga no ne Moroa ga lox asusu i ri ne Moses kusu ti limixin teren, nedi loxot mun at Laulis Linga. Moroa ga raba Laulis Linga ti limixin teren me Judaia kusu nak lok tatao di basinge laxakapmek se lovoatpot at lununu saparap ne Iesu Karisito. Laulis Linga ik lok tooro bok dik lingina. Ik lox ase dik do ua leveloklok i lox avukat la ua leveloklok i lok kapmek. Lavalimo levenbuk at ne Moses (Lurutu

Kaxat, Lavatpasu, Lavamaasa, Lexekexes, Laulis Linga Sepsev Agepura), nedi na, Laulis Linga ne Moroa ga raba ne Moses min. (Ga 3:19-25; Ro 3:19-24; 8:3)

**Lavamolon** -- (Heathen) Nedi limixin ua dixo nunu at ne Iesu Karisito do neni ne Nitna ne Moroa, la mo limixin dinabat pas uto at lemenemen songsongot. (1 Ko 5:12-15; Mt 18:17)

**Laxaavuk** -- (Atoning Sacrifice) At laaleng ne Karisito ga met to vana at laxaba, neni ga ravasu ngan laxaavuk tinedik atla neni ga ru korop laxapmek atnedik ti ne Moroa xusu ne Moroa naba doxoma xepe laxakapmek atnedik. (Ro 3:25; 1 Ko 5:7; Ib 2:17)

**Leelongka** -- (Adultery) Lavasuun teren do lara i mu asu lavavara axa ren la i midi eburu mi latlok koplak latkin at lara vetpes. Ni laxapmek i lok kapmek aleng. (Mt 5:27-28; Mk 10:10-12; Mas 20:10; 1 Ko 6:9-10)

**Leeme Silok** -- (Lord) At lentaba lengkot at Lovoang Kaala Migomgo, di tong na luxolinga ri ne Moroa la kopmen ti ne Iesu. Ketla at lengkot keneng at Lovoang Kaala Maxat, di tong bok ne Iesu min. (Gu 2:36)

**Lekabus** -- (Covenant) Lekabus neni lavanga luradi du lox i xusu dubam doma amlong amisik tin at lorooro atdu. La do tara na lok lekabus, neni i xaape xusu neni naba lok tavanga ri mo laradi, la mo bok laradi naba lox i ri mo lara. I ngan lekabus at ne Moroa neni i lok ngan laxakaape ren do neni naba lok ngan ne Temen limixin axap do dina mu asu i. Legepu ekabus mo ne Moroa ga lox i. Lara avot neni ga lox i xantubu atdu mi ne Moses. La ne Moroa ga vaase i do neni naba lok ka nedi limixin tinotno ren no diga mumu asu Laulis Linga ren. Ketla goxopmen teta gita rongga res at Laulis Linga axap teren, kuren la kopmen

tinotno tara gan manton tino at lemeren ne Moroa keneng at lekabus avot. Lekabus avot – (Lu 1:72; Gu 3:25; 7:8; Ga 3:17; Ib 9:1-2). La keneng at lekabus maxat, ne Moroa ga vaase i do mo do taradi na nunu at ne Iesu Karisito, Moroa naba siam ka i ngan laradi manmanton, i ngan do nedi di goxo lok laxapmek koplaga gita los polo Laulis Linga ren. Lekabus sev agepura – (Mt 26:28; Mk 14:24; Lu 22:20; Ro 11:27; 1 Ko 11:25; 2 Ko 3:6; Ib 7:22; 8:6-13; 10:16,29; 12:24; 13:20).

**Lemenemen Nunuan At Ne Moroa** -- (Paradise) (Lu 23:43; 2 Ko 12:3-4; Li 2:7) Paradais lavasuun teren do laramenemen i milik maraanu la i lox avukat axap. La limixin di tong na laasen kusu ti mii poovo i mi mo lemenemen maraanu gak lok to Iden at loxot ua ne Moroa ga lok li ne Adam mi ne Iva at lavakpaxaru kaxat at lavatbung menemen to xeneng at Lovoang Kaala Migomgo. Na loxolinga Paradais, i lok do na lok ngan laxalibet, ua neni lemenemen avukat la neni lenep ua do limixin nunu at ne Moroa dina met, dinaba beles teren.

**Lemenemen Songsongot** -- (Hell) Neni lenep ua limixin kapmek dinaba beles teren at laaleng ete. La dinaba nemen amisik go xeneng at losongsongot la mo lenep ik lok paxalom basinge ne Moroa. (Mt 5:22; 18:9; 2 Pi 2:4)

**Lempareme Avolo** -- (Patriarchs) Na luxolinga i ru rinedi loxongkulao silok at limixin me Israel diga rooro avot gano at levenmaares migomgo. Keneng at Lovoang Kaala, limixin diga rooro at levenaleng ne Iesu gak lok nade xopok, diga tong luxolinga lempareme avolo la na ga ru katling ne Abaram, Aisak, la ne Jakop. Koplaga ru katling nedi limixin digat pas to at lamatbin at levenaleng at ne Moses. (Gu 7:32,44; 28:17; Ro

4:1-3)

**Lenavolo** -- (Scriptures, Bible) Lenavolo ni levelinga Moroa ga raba limixin min. Kantubu mun at na levelinga ne Iesu Karisito i nemen, atla ni lavasuun teren la Luntoo Avolo. Lenavolo i tu mavana at levelinga axap at na lavatbung menemen. Lenavolo i ruturun la ik mokso axap atla ni levelinga at ne Moroa. (Jon 1:1-14; Ib 4:12; 8:10; Je 1:25)

**Lenetnes I Xaala** -- (Holy kiss) Neni levelinga ri lox axasep lara loklok at limixin migo digat nes levempop at luvuttadi ri lox asuusu loklok ngangao xopla ri seega avot mo laradi. Keneng at lotu at limixin nunu at ne Karisito mo lenetnes i xaala digak lox i xopmen do ti seega rangarang mun. Ketla ga ngan loklok katling atnedi ngan diga ebalamu ela, la diga eton keneng at ne Karisito. Lubungkavus dixok lok bok ba na loklok, ketla limixin at lentaba lepenep silok petpes move di tu ap mo loklok. (1 Ko 16:20; 1 Ts 5:26)

**Lengkon Uat In Tanan** -- (Jewel, gem) Keneng at lubuk Lisilimet (Li 21:18-21) ne Jon ga tong poovo lemenemen silok neni ga silimet tang ka i. La levenngas uat ap mo lemenemen silok diga lox i mi lasangaun mi legepura (12) laramet uat tantanan maraanu ro xopok at laabuxumpio teren. La mo levenuut tantanan ga milik mavana rinotno. La digan tanan at laramet tantanan petpes axap. Levenasen ap mo lasangaun mi legepura laramet uat na.

1. Jespa (jasper) – ga lok ngan lagalas mamaxa.
2. Sapai (sapphire) – mamaxa buxumin ngan laras.
3. Aget (agate) – diga tong box i mila kalsedoni (chalcedony) laramet tantanan axap.
4. Emeral (emerald) – mamaxa xasep.

5. Onikis (onyx) – diga tong box i mila sadonikis (sardonyx). Lentaba levenmet tantanan ik lok teren.
6. Kanelien (carnelian) – memele xitkit da.
7. Krisolait (Chrysolite) – diga tong box i mila kuates (quartz) i ngangan.
8. Beril (beryl) – i mamaxa ngan lempavaxan una.
9. Topas (topaz) – i ngangan.
10. Kirisoperes (chrysoprase) – di tong box i mi la kalsedoni (chalcedony) i bunbun kakup.
11. Jasin (jacinth) – di tong box i mi la takois (turquoise) i mamaxa ngan laxalibet.
12. Emetis (amethyst) – i mamaxa buxumin la memele.

**Levempeluxa Loklok Katling** -- (Festivals) Lentaba levempeluxa loklok katling mo at leme Judaia digak lok katling amisix i at levenmaares. Na levempeluxa loklok katling neni levenaleng ua digam doma amlong ti leveloklox avukat ne Moroa gak lox i rinedi at levenmaares digara si alu vam i. (Pas 23:14-17; Jo 7:2) Lara leluxa loklok katling i lok keretna. Leluxa at Lovovolo Pe. (Mt 26:2,5,17-19) Na leluxa at Lovovolo Pe neni i silok aleng at lodoxoma at leme Judaia. La lavasuun ap mo loxolinga do laradi ga vas polo pe. La ap mo laaleng at leluxa at Lovovolo Pe, leme Judaia dim doma amlong ti laaleng diga vasu basinge lenep silok Isip. La ap mo bok laaleng ne Moroa ga riki asi laangelo ren tip sep amet laxamdak temes avot at laraogu at leme Isip. Ketla neni ga tong i ri leme Judaia xusu dina malagan pe levenbus at levenmusmaragu atdi mi lada at levesipsip maxat. La at loxonaleng laangelo ga reven lada, neni ga volo pe mo loogu, la goxo sev amet tamdak teren. Neni bana lavasuun teren la ap mo

levenaleng at leluxa at Lovovolo Pe, leme Judaia dip sep levesipsip maxat la dira anan buru i ro xeneng at laraogu atnedi. (Mk 14:12; Lu 2:41-44)

**Levempiao** -- (wheat) Na loxolinga i ru katling luit, neni lutpenit panga lixilik no limixin dik lok lengkongkide min (bread), la mo leveluxa ga silok tinotno xeneng at lorooro at leme Judaia. Diga tit povorok mo levenit uit la gara xaxa bang ngan levempalava (flour) la digarak lok ba levengkongkide min. (Mt 24:41; Mk 4:26-29)

**Levempilas** -- (money) Buaang levenasen pilas mo gak lok to lenep silok Judaia.

1. Peni – Ana luxuven pilas neni ik lok ngan 10t atdik. (Mk 12:42; Lu 12:6)
2. Denarias – Anai ni epovo at luunun laradi i lok kaka i mo do neni na gugu at leges aleng. (Lu 10:35; Jo 6:7)
3. Derakma – Anai la derakma ga ruuna legepura, lara silok la lara lixilik. Lara silok ga epovo luunun laradi ga lok ka i mo do neni na gugu at lavanuet aleng. (Mt 17:24-27)
4. Livilas gamgames – Anai ni epovo at luunun laradi i lok kaka mo do neni na gugu at lavantun aleng. (Mt 27:3-9; Gu 19:19)
5. Minas – Ana lempilas neni ga gol la ni ga epovo at lempilas laradi na gugu rin at lavanuet gaaling. (Lu 19:13-25)
6. Talen – Ana luxuven pilas ni ga epovo at K1,000. (Mt 18:24; Mt 25:15-28)

**Leven Gugu Nunuan** -- (Good Works) Neni lentaba leveloklok nunuan no limixin dik lox i rik lok tooro lentaba vetpes keneng at limixin at ne Moroa. Mo loklok do ata lox i, atanaba lok ka lovoporang teren to vana at laxalibet. (Je 2:14-20; 1 Jo 3:17-18)

**Levenaleng Kavaxap** -- (Last days) Na levelinga i paase mumu leventaba levenaleng ngan amonga dik ata rooro. Avot ti na xeretna. Ga vaxaru ka i at luruntudum li se at ne Abaram neni levenaleng avot. Ga ru ka manga i at levenaleng at ne Abaram eburu mi lavakpaxaru kaxat at limixin me Judaia, ga se at levenaleng at ne Moses, ni mo levenaleng sepsev agepura. Melemu ren, ga vaxaru xaka i at laaleng ne Moses ga lok ka Lasangaun Levenaulis Linga la ga se at livipisik at ne Iesu. La levenaleng kavaxap ga ru ka i melemu at lorooro xat amlong at Lanarong la naba se at lomlong teren. (Ib 1:2; 2 Pi 3:3)

**Levenmamalagan At Lavaeme Vapaase Ali** -- (The writings of the prophets) Na levelinga i tu katling mo levenbuk keneng at Lovoang Kaala Migomgo do lavaeme vapaase ali diga malagan i. Nedi xeretna; Aisaia, Jeremaia, Isikel, Daniel, Osea, Joel, Amos, Obedia, Jona, Maika, Naum, Abakuk, Sepania, Agai, Sakaria, Malakai. (Mt 26:56; Lu 16:29; 18:31; Gu 13:15)

**Liis** -- (Yeast) Liis neni lavanga ua dik lok eburu i mi levempalava kusu tik lok lengkongkide (bread). La neni dik lok li mun lengkoniis lixilik at levempalava la mo liis naba lox angpong mo loxongkide (palava). (Mt 13:33; 16:6,12; 1 Ko 5:6-8; Ga 5:9)

**Limixin Kopmen Di Me Judaia** -- (Gentiles) Ana lengkolinga i ru katling nedi axap limixin ua kopmen di me Judaia. La loxolinga diga tong i at lavapaase Grik do "laxannep silok." Lava-suun teren do laranep silok axap at na lavatbung menemen, la ixo epovo xusu ta tong leme Judaia min. Leme Judaia digak lok momo aleng atla ne Moroa ga lok katling ka mo lubangmixin atdi, kusu nedi limixin teren.

Ketla diga lox abulubun limixin at levenabung mixin petpes. (Gu 22:21; 26:19-23; Ro 2:9-11)

**Limixin Nunu** -- (believers) Nedi limixin di nunu rinotno do ne Iesu neni ne Nitna ne Moroa, la di nunu bok do neni ga met nop laxakapmek atnedik. (Gu 6:7; 1 Ko 7:15; Ep 4:32)

**Limixin Soksoxolik** -- (Elect) Moroa ga soxolik ka limixin, avot ti luruntudum li at na lavatbung menemen, kusu dinaba ravasu ngan luvutnitna la kusu dinaba lok ka lorooro avolo la dinaba lox asusu loklok ngangao rin. (Ep 1:4; 1 Pi 1:2; 2:9)

**Linintoo** -- (Kingdom) Na loxolinga i ru ri limixin nunu i ngan nedi dik lok keneng at libinam tadi la maxopok at loklok tatao la lolos at ne Moroa. Kuren la di ravasu ngan dik lok keneng at luutus maxopok at Linintoo mumu livipisik amaxat atnedi. (Mt 18:3; Mk 1:14-15; Jo 3:3-5)

**Lisilimet** -- (Vision) Lisilimet neni lavanga i lok ngan lovoovo i ravasu ro xeneng at lodoxoma at laradi la neni naba suma i ngan ta do im tobo. Ketla at loxonaleng lodoxoma ren namlong, neni naba suma ngan ta i do i rakdu aus at lanunga ro at loxot petpes. Lisilimet, ni laasen ap mo lubuk Jon ga malagan i mumu mo lempanga ne Iesu Karisito ga lox ase i min. (Lu 1:22; Gu 9:10-12; 16:9-10)

**Lisisixam** -- (Glory) Na loxolinga i ruuna buaang lempasuun. I vasuun teren do ata lox asu leemi asu mi loklok ngangao ri laradi (2 Ko 3:18), koplari ne Moroa (1 Ko 10:31). I vasuun bok teren do laxasep, at losoosoo in tanan at levereven at ne Moroa (Li 21:11,23). Lara lavasuun bok teren do loklox asusu at lixitkis silok at ne Moroa, mi lolos la lixitkis melemelengan teren. (Sam 19:1; Jo 1:14; Ib 1:3)

**Livirivit Kepe Xontuxu** -- (Circumcision) At loklok at leme Ju-

daia, diga rivit kepe lengkon-tuxu at levesokpas at laxamdak temes atdi at lavanuan aleng melemu at livipisik atdi. La ne Moroa xa ga tong i ri ne Abaram kusu dina lok mo loklok. (Lur 17:9-14). La livirivit kepe xontuxu neni loklok katling ti mo laradi do neni laradi me Judaia. La diga tong di do, "Limixin Pirivit Kepe Xontuxu." At leve-naleng limixin diga vavang avot mi Lagale Lavavang, lentaba leme Judaia diga tong i do limixin kopmen di me Judaia no diga vara i xusu dina ba gili lorooro atdi, dina mu asu na loklok. Ne Pol goxo momo mi na lodoxoma la ni ga malagan mumu i na at lovoang teren ti limixin me Galesia, la keneng bok at lentaba levenmenemen petpes. Neni ga tong i do legesa vanga mene nga mo xusu laradi i epovo na lox i xusu neni naba roo su ren, la neni lununu saparap ne Iesu Karisito. (Ga 6:12-16; Kl 2:11; 3:11; Ep 2:11)

### **Lobokis At Laxakaape/Lekabus**

-- (Ark of the Covenant) (Ib 9:4; Li 11:19) Mo lobokis diga lox i mi levenuna la diga vop pe i ro maxamang teren mi logol. La diga lok li luxonuat no ne Moroa ga malagan Lasangaun Laulis Linga ren to xeneng ap mo lobokis (Ib 9:4-5). La limixin me Israel digap kip saasaa amisik mi mo lobokis at leve-naleng digat pas to xeneng at lamatbin, la digak lok li i ro xeneng at loogu kadis at ne Moroa. Amo lobokis eburu mi levempanga gak lok to xeneng teren ga xaala aleng tinotno, atla ga lok ngan leveloklok katling at lekabus no ne Moroa ga lox i eburu mi limixin me Israel.

**Lodoxoma Nunuan** -- (Conscience) Na loxolinga i lox asusu i rinedik do nedik ta ruuna lodoxoma nunuan kopla lakleklen ti ven kibis luvukat ik lok ua la laxapmek ik lok ua.

Moraa ik lok li na lodoxoma nunuan to xeneng at lorooro at limixin axap. Ketla lentaba di lox abulubun kepe na lodoxoma. (Ro 2:15; Jo 8:9)

**Loklok Manmanton At Ne Moroa** -- (Righteousness) Neni lara loklok at ne Moroa kerekngan luvukat, loklok dadat, lununu, la luruturun. La nedik dip tavasun ngan limixin manmanton tino keneng at lenep at ne Moroa atla nedik di nunu at langas ne Iesu ga lox i rinedik mi lanmet teren nop laxakapmek atnedik. La kopmen do mumu leven gugu nunuan nedik tak lox i. (Ro 3:21-26)

**Loklox Asepmus** -- (Justify) Neni lavanga ne Moroa ik lox i ri limixin di nunu ren. Limixin axap dik lok laxakapmek la di nemen to vaxalom basinge ne Moroa. Do laradi na leeng basinge laxakapmek teren, la i nunu do ne Iesu ga met nop teren, Moroa i tong atkatla li i do neni laradi sepsen. Kuren la neni laradi sepmus atla ne Moroa gara lox asepmus i. La neni i epovo nat kis esogo mi ne Moroa. (Ro 3:24; Ga 2:16)

**Loogu Kadis** -- (Tabernacle) Ganoxa at levenaleng limixin me Israel digat pas to xeneng at lamatbin, ne Moroa ga tong i ri ne Moses kusu na lok toogu vetpes tinotno. La ni ga re ase i min kusu neni naba lox i xerekngan lodoxoma ren. Ni ga tong i rin do neni naba lox i mi leventuxu at lempanga mi lavanuet kangkedek teren. La mo loogu kadis digak lok li lobokis at lekabus go xeneng teren eburu mi luxonuat to xeneng ap mo lobokis at lekabus. Limixin me Judaia diga lotu saparap ne Moroa go xeneng ap mo loogu kadis, la digaplavang bok ti ne Moroa go ga se rinotno at laaleng ne Solomon ga vaxaru ba loogu laplavang. (Ib 9:1-10;

Gu 7:44-45)

**Loogu Laplavang** -- (Temple)

Mo loogu gak lok to Jerusalem lemenemen silok at leme Israel. La neni loogu ua leme Judaia digat pot buru ve xusu dina lotu saparap ne Moroa la dinak lok katling levenaleng silok, la dinaplavang mi leventamtaba ri ne Moroa. La limixin kopmen di me Judaia diga epovo xusuk mun kusu dina beles to maxamang at lemelua. La to xeneng tinotno ren neni loxot ga xaala aleng tinotno. Lamaasa gomgo xusuk mun ga pubeles ap mo loxot, la at leges aleng mun at legesa maares. Lara lavatbantamon silok gak lok pe mo lumusmaragu ap mo Loxot Kaala. La neni mo lavatbantamon no ga rem lais at loxonaleng ne Iesu ga met teren. (Mt 27:51) Mo lavanga ga lox asusu i do, ga ruka i ap mo levenaleng ise lingina, ne Moroa gara suang pam langa ri limixin axap kusu dina beles pot pasa i, mo do dina nunu at ne Iesu Karisito. (Mk 11:15-16; Lu 1:8-10; 1 Ko 6:19)

**Loogu Singising** -- (Synagogue)

Levenmenemen axap keneng at lenep silok at leme Judaia diga ruuna laraogu singising. La neni loogu ua digat pot buru ren at levenaleng kaala ti lotu saparap ne Moroa. (Sabat) Diga vutus levelinga at ne Moroa go xeneng ap mo loogu, la diga vanasa bok limixin mi Laulis Linga at ne Moses. La diga ngising bok mi loklok ngangao ri ne Moroa go xeneng teren. At lepenaleng digak lok levenete go xeneng bok ap mo loogu singising. (Mt 4:23; Lu 4:16; Gu 13:14-16)

**Loroonan Kaala** -- (Holy Spirit)

Nedi mi ne Karisito la ne Moroa, nedi legesara mun. (Mt 28:19) Loroonan Kaala at ne Moroa i pubeles keneng at limixin di nunu at ne Iesu Karisito. La

lugugu ni ik lox i, i lok keretna.

1. Ik lox aklen limixin kusu dinaklen luruturun. (Jo 16:13; 1 Ko 2:10-13) 2. Neni i tu katling limixin di nunu at ne Iesu Karisito xusu na ngising ti ne Moroa. (Ro 8:26) 3. Ik lox ase limixin mi lorooro ne Moroa i lok momo min. (Gu 13:2; 16:6-7) 4. Neni im taba leventamtaba ri limixin kusu dinak lok lugugu rik lox alolos lotu. (1 Ko 12:1-11)

**Lovoang Kaala Maxat** -- (New Testament)

Na levengkolinga i ru ri levelinga at ne Moroa no i paase mumu livipisik, la lorooro, leven gugu, lanmet, la lorooro xat amlong at lanmet eburu mi luuturut at ne Iesu Karisito, neni Laradi Loklox Arooro la na ik lox asoorun ti lempanga Lovoang Kaala Migomgo ga tong asu i. La i tong axasep bok nedik mi lavakpaxaru kaxat at lotu la loklok salai ne Moroa i lok momo min.

**Lovoang Kaala Migomgo** -- (Old Testament)

Na levengkolinga i ru ri levelinga at ne Moroa no i paase mumu luruntudum li at lavatbung menemen, la lavakpaxaru kaxat at limixin soksoxolik ka at ne Moroa, nedi leme Judaia (leme Israel). Levempaase ali bok at Lanarong neni Laradi Loklox Arooro at limixin la lavatbung menemen axap.

**Loxonin Orong** -- (Throne)

Loxot kitkis at loorong. Neni loxot kitkis ua i milik maraanu rinotno, la laradi it kis teren neni ik lok tatao limixin buang, la i ruuna bok lolos pana axap at lempanga ap mo lenep silok. Na levelinga di tong box i do nege it kis teren i ruuna lolos silok la loklok ngangao rin ngan ne Moroa. (Li 4:2)

**Lun Pinivu** -- (Disciple)

At lava-paase Inglis na loxolinga "disciple", neni i lok ngan lun pinivu. I ngan limixin diga doxoma rinotno i do dina mumu asu ne Iesu atla diga nunu ren. Lentaba

levengkot to xeneng at levenbuk at ne Metiu, Mak, Luk la ne Jon, di tong lasangaun mi legepura lavaun pinivu. Nedi na lasangaun mi legepura luvuttadi mumu asu, no ne Iesu ga soxolik ka di xusu tik lok eburu min. La ni ga riki asu bok di xusu nedi luvuttadi vavang teren i ngan diga malagan i ro at lubuk (Mt 10:1-4). Ketla buaang limixin diga mumu asu ne Iesu la diga ruuna laasen do lavaun pinivu. (Jo 8:31; Gu 6:2; Mt 28:19) Lubung Parisi la ne Jon laradi sep susu diga ruuna luvuttadi ua diga mumu asu di la nedi bok diga ruuna laasen do lavaun pinivu. (Lu 5:33)

**Luvuttadi Loklok Ka Pilas** -- (tax collectors) Kantubu at leme Judaia lentaba limixin me Judaia diga gugu ngan luvuttadi loklok ka pilas. Digak lok kaka levempilas ti limixin boro Rom, mo gak lok tatao leme Judaia. Nedi nom luvuttadi loklok ka pilas digoxo lok lugugu avukat, digak lok kaka lempilas mavana at loklok katling at limixin. Kuren la leme Judaia diga belengatngas di. (Mt 5:46; 9:9-13; Lu 18:11-14)

**Luvuttadi Vavang** -- (Apostle) Ne Iesu ga soxolik ka avot lasangaun mi legepura lavaun pinivu ren ti gugu ngan luvuttadi vavang teren - (Mt 10:1-4; Mk 3:13-19; Lu 6:12-16). La diga nemen eburu min la neni gak lox ase di. At loxonaleng ne Iesu ga met la ga roo xat amlong bok, nedi diga ven i mi lengkatli atdi. La neni ga riki di xusu dina tong asu mo lempanga diga ven i ri limixin la dina vavang mi Lagale Lavavang. La diga lok ngan luvuttadi amgomgo at limixin nunu at ne Iesu. At lubuk Leven Gugu at Luvuttadi Vavang, ne Pol mi ne Banabas la lentaba limixin bok, diga tong di do luvuttadi vavang. Nedi bok na limixin ne Iesu Karisito ga lok katling nedi

ri lok lugugu ren.

**Maria** -- (Mary) Neni nenen ne Iesu la neni latkin at ne Josep. (Lu 2:1-7)

**Maria** -- (Mary) Maria bok lara neton ne Mata la neinen ne Lasaro, la nedi loxoinen boro Beteni. (Jo 11:17-19)

**Maria** -- (Mary) Maria vetpes bok na. Lara laasen bok teren ne Magdalene. Neni ne Iesu ga lox aroo i la ga neni avot ga ven ne Iesu melemu at lorooro xat amlong teren. (Jo 20:11-18)

**Maria** -- (Mary) Maria bok lara latkin, neni nenen ne Jon Mak. (Gu 12:12)

**Maria** -- (Mary) Lara vetpes bok, ga neni latkin at ne Kolopas. (Jo 19:25)

**Mastet** -- (Mustard) Neni lara luuna ua i ruuna lupenit lixilik tinotno (i ngan levenit kemkem) la mo luuna i susu urut silok, la lababaalom upana i vepovo at legepu asongo la loxon atat. (Lu 13:18-19; Mt 13:31-32)

**Olip** -- (Olive) (Ro 11:17,24) Neni luuna ua i pisik levempeven panga, la mi levempeven teren dik lox asu levendan momonok teren ngan longo - ladama. La leme Judaia dik lok ka levempeven panga ren la dirap loplok ka levendan momonok teren. Mo levendan teren digak lok ka i xusu ti ove luxa, la ti voo lempat kabinim at lempatlak la ti lentaba leven gugu vetpes bok. La mo luuna ga silok aleng keneng at lorooro at leme Judaia. Mo loxongkaana Olip di tong i, neni laasen at lakaana gak lok pampan lemenemen Jerusalem, la laxanuna olip ga susu go. (Lli 24:20; Mt 24:3; 6:17; Lu 10:34)

**Parisi** -- (Pharisee) Neni laasen at lara libinam tadi ua diga silok aleng keneng at leme Judaia. Buaang atnedi diga nemen ngan luvuttadi loklox ase at Laulis Linga. La nedi digaklen avukat tinotno Laulis Linga ua ne Moroa ga raba ne Moses min. Di-



gak lox ase bok mi leveloklok at limixin la levenngas petpes ua nedi xa digak lox abeles i mi lodoxoma atdi. La nedi xa diga vemi midi do nedi mo diga lox avukat ti lentaba vetpes. Buaang levenaleng digam simi di la digak lox asuusu i do digak lox avukat, ketla diga belengatngas ti ne Iesu la diga lok lodoxoma xusu dina sev amer i. (Mt 23:2-36; Gu 23:6-8)

**Peal** -- (Pearl) Peal neni lara lemet uat ua in tanan la luunun silok bok teren. I milik maraanu rinotno la in tanan levereven teren in bun. Limixin dik lok ka i xusu tik lok levempun ti vonga la leventaba lempanga bok ti nganang limixin. (Mt 7:6; 13:45-46; 1Ti 2:9; Li 17:4; 8:12,16; 21:21)

**Pik** (fig) Neni laasen at luuna ua i pisik levempeven panga la i so misigisigis tinotno. (Lu 13:6-9)

**Rabai** -- (Rabbi) Neni laasen ua leme Judaia diga tong lubang amgomgo min kopla luvuttadi loklox ase silok min. La limixin diga ruuna lakleken silok, di tong di min lubang Rabai. La lara loxolinga vetpes bok diga tong i ri mo loxot, neni Raboni. La lavasuun atdu i epovo mun. (Jo 1:38; 3:2)

**Sadiusi** -- (Sadducee) Nedi na lara lenep binam tadi ua diga ruuna levenasen silok keneng at leme Judaia. Nedi digak lox ase limixin do dina mumu asu Laulis Linga eburu bok mi leveloklok at leme Judaia xa. Loklok atnedi ga sixit emu mi lubang Parisi (una ven bok ne Parisi). Nedi na lubang Parisi diga nunu do melemu at lanmet at laradi, neni naba roo xat amlong ti lorooro, ketla lubang Sadiusi digoxo nunu xuren. (Gu 23:6-8; Mt 16:5-12)

**Saion** -- (Zion) Saion ni laasen at lara loxongkaana mo diga vaxaxis li lemenemen silok Jerusalem teren. La loogu

laplavang i nemen pana ap mo loxongkaana, la mo loxot i xaala aleng keneng ap mo lemenemen silok. Lentaba levenaleng di tong axap mo lemenemen silok Jerusalem mi na laasen Saion. La lentaba levenaleng di tong bok ne Jerusalem ua ik lok to vana at laxalibet mi ne Saion, la neni lampoovo ri lenep ne Moroa ik lok teren. (Ib 12:22; Mt 21:5; Jo 12:15; Ro 9:33; 11:26; 1 Pi 2:6)

**Salpa** -- (Sulphur) La salpa neni lavanga di tong box i mi la (bir-imston). Neni lavanga i lok ngan laxakup ngangan la ik sixit emu mi lababao lolos la uba somak loso panga ren i lolos aleng. La dik lok ka i xusu tik lok levempanga i tepat, ngan la bom, la kateres la lempanga vetpes bok kerepmo. (Li 9:17)

**Seeve** -- (Perish) Na loxolinga, lavasuun teren keneng at Lovoang Kaala do laradi i met la noxo rooro bok ba eburu mi ne Moroa ro at lemenemen teren. (Jo 3:16; 2 Pi 2:12; 3:9)

**Selot** -- (Zealot) Nedi lara lenep binam tadi kantubu at leme Judaia ua diga nunu lolos tinotno do ne Moroa xusuk mun, i epovo xusu nam gomgonga nedi leme Judaia. Diga xopara rinotno i do lubang amgomgo boro Rom dinam gomgonga nedi. (Lu 6:15; Gu 1:13)

**Un Ka Amlong** -- (Redeem) Na loxot ta tong i ri ne Karisito ga lox i xeneng at lanmet teren kusu ti un ka amlong limixin basinge loxokoxo ne Satan ik lox i ridi, atla nedi digang tonga res at ne Satan. Mo luunun ne Karisito ga un ka amlong dik min, ni lada axa ren. La mo luunun neni ga raba ne Moroa min kusu na lox asu dik. (Ga 3:13; Ep 1:7; 1 Pi 1:18-19)

# Levelinga Loklok Tooro Keneng At Lovoang Kaala Lamakmaran at ne Moroa mi ne Nitna la Loroonan Kaala.

1. Lamakmaran at ne Moroa ne Temen dik i lok keretna.

--Lubung amgomgo diga vaxaru ne Iesu at lavapaase xusu dina sev amer i.

Mt 26:47-68	Mt 27:1-2	Mt 27:11-31	Mk 14:
Lu 22:47-53	Lu 22:63-71	Lu 23:1-25	Jo 18:1
Jo 18:28-19:16			

--Diga vaxarem ne Iesu at laxaba.

Mt 27:32-56	Mk 15:21-41	Lu 23:26-49	Jo 19:17-50
-------------	-------------	-------------	-------------

Mk 10:27	Mk 12:29-30	Lu 1:37	Lu 6:35-36	Jo 4:23-24
Gu 14:14-17	Gu 17:22-31	Ro 1:18-23	Ro 11:33-36	1 Ko 8:4-6
2 Ko 1:3	1 Ti 1:17	1 Ti 6:15-16	Ib 4:13	Ib 10:30-31
Je 1:17	1 Pi 1:14-17	1 Jo 1:5	Mt 27:57-66	2 Mk 11:42-47
Ju 1:24-25	Li 4:8-11	Li 15:3-4		

--Iesu ga roo xat basinge lanmet la buaang limixin diga ven i.

2. Lamakmaran at ne Nitna ne Moroa, ne Iesu Karisito i lok keretna.  
--Iesu Karisito neni ne Nitna ne Moroa.

Mt 28:1-20	Mk 16:1-8	Lu 24:1-49	Jo 20:1-10
Gu 2:24-32	Gu 3:15	Gu 4:10	Gu 4:33
Gu 13:29-39	Gu 17:2-3	Gu 17:30-31	Ro 1:4
1 Ko 1:13-18	Jo 5:19-22	Li 1:18	

Mt 11:27-30	Mt 16:13-17	Lu 1:35	1 Ko 1:13-18	Jo 5:19-22
Jo 6:35-40	Jo 8:58	Jo 11:25-27	Jo 14:5-11	Jo 17:1-5
Jo 20:26-31	Gu 3:13-16	Gu 4:10-12	Ro 1:3-4	1 Ko 3:11
2 Ko 4:4-6	2 Ko 5:21	Ga 4:4-5	Pl 2:5-11	Kl 1:15-20
Kl 2:9-10	Ib 1:1-14	Ib 7:26-28	1 Jo 2:1-2	1 Jo 5:20
Li 1:12-18	Li 19:11-16		Lu 24:50-51	Gu 1:9-11
			Ep 1:20-23	Pl 2:9-11
			Ib 7:25-26	Ib 10:12-14
				Gu 2:32-36
				Gu 5:30-31
				Ib 1:3-11
				Ib 2:9
				1 Pi 3:22

--Ne Nitna ne Moroa ga vee radi la diga visix i.

3. Lamakmaran at Loroonan Kaala i lok keretna.

Jo 1:14	Lu 1:26-38	Mt 1:18-25	Lu 2:1-20	Mt 2:1-23
Ga 4:4-5	Pl 2:6-7	Ib 2:14-18		
			Mt 28:19	Mk 1:9-11
			Mt 28:19	Mk 3:28-30
			Lu 4:1	Lu 11:13
			Lu 4:1	Lu 12:12
			Jo 7:37-39	Jo 14:15-17
			Jo 7:37-39	Jo 14:26
			Jo 20:19-23	Gu 1:4-5
			Jo 20:19-23	Gu 1:8
			Gu 4:31	Gu 5:3-5
			Gu 4:31	Gu 8:14-17
			Gu 15:28	Gu 16:7-10
			Gu 15:28	Gu 19:1-7
			Ro 8:19-16	Ro 8:26-27
			Ro 8:19-16	1 Ko 2:4
			1 Ko 6:11	1 Ko 2:9-11
			1 Ko 6:11	2 Ko 1:21-23
			2 Ko 13:14	Ga 3:2-5
			2 Ko 13:14	Ga 4:6
			Ep 1:13-14	Ep 1:17
			Ep 1:13-14	Ep 3:16
			Ep 5:18-20	1 Ts 1:5-6
			Ep 5:18-20	1 Ts 5:19
			Ta 3:5-6	Ib 2:4
			Ta 3:5-6	Ib 9:14
			2 Pi 1:20-21	1 Jo 2:20
			2 Pi 1:20-21	1 Jo 3:24
			Mt 9:18-33	Mt 12:9-14
			Mt 9:18-33	Mt 15:32-38
			Mt 12:9-14	Mt 17:14-18

--Ne Iesu ga anasa limixin la gak lox aroo nedi diga meres.

4. Moroa ga rindum lempanga axap.

Mt 4:23-25	Mt 7:28-29	Mt 9:35-36	Ro 8:19-16	Lu 4:14-17
Gu 10:36-38	Jo 20:30-31		1 Ko 6:11	1 Ko 6:19
			1 Ko 6:11	1 Ko 12:1-13
			2 Ko 13:14	Ga 3:2-5
			Ep 1:13-14	Ep 1:17
			Ep 5:18-20	Ep 6:17-18
			Ta 3:5-6	Ib 2:4
			2 Pi 1:20-21	1 Jo 2:20
			2 Pi 1:20-21	1 Jo 3:24
Mt 8:1-15	Mt 8:23-33	Mt 9:1-7	Mt 9:18-33	Mt 12:9-14
Mt 12:22	Mt 14:15-32	Mt 15:22-28	Mt 15:32-38	Mt 17:14-18
Mt 20:29-34	Mt 21:18-22	Mk 1:21-28	Mk 7:32-37	Mk 8:22-25
Lu 5:4-8	Lu 7:11-15	Lu 13:10-13	Lu 14:1-4	Lu 17:12-14
Lu 22:50-51	Jo 2:1-11	Jo 4:46-54	Mt 9:35-9	Jo 1:30
Jo 11:11-44	Jo 21:4-6	Gu 2:22	Kl 1:15-16	Ib 1:2
			Ib 1:2	Ib 11:3
				Li 4:11
				Gu 17:24-26
				1 Ko 8:1

5. Moroa i reven tatao lempanga axap.

Mt 26:26-29	Ro 3:25	Ro 5:9-10	Ep 1:7	Ib 9:1
1 Jo 1:6-7	Li 7:14-17			

Mt 6:25-34 | Mt 10:29-31 | Gu 14:15-17 | 2 Ro 8:28 | Ro 14:26 | Moroa i rooxona xepe laxakapmek atnedik.

## Loklok at limixin i lok keretna.

6. Limixin axap digara lok pam laxakapmek.

Gu 5:31	Gu 10:43	Gu 26:18	Ep 1:7	Ep 1:7
Kl 1:13-14	Kl 2:13-14	Ib 10:17-18	1 Jo 1:8-10	

13. Moroa ik lok nedik kusu atana-ban manton tino at lemeren.

Jo 8:7-9	Ro 3:9-20	Ro 3:23	Ro 5:12	Ga 3:22
1 Jo 1:8-10				Gu 13:38-39
				Ga 3:6-9
				Ro 1:16-17
				Ro 3:21-26
				Ro 5:18-19
				Ta 3:7

7. Limixin dik lok laxakapmek, loklok atdi i lok keretna.

14. Moroa im taba nedik mi lorooro maxat.

Ro 1:18-32	Ro 8:5-8	Ga 5:19-21	Ep 2:1-3	Ep 5:3-5	Ep 5:19-29	Jo 10:10	Jo 11:25-26	Jo 11:25-26
Kl 3:5-10	Je 4:17	1 Pi 4:3	1 Jo 3:1-3	Jo 3:1-3	Jo 20:31	Ro 5:21	Ro 6:5-14	Ro 6:5-14
					2 Ko 5:17	Ga 2:20	Ep 2:1-6	Kl 2:13
					2 Ti 1:10	Ta 3:4-7	1 Pi 1:23	1 Jo 5:11-13

8. Ik pakes ti limixin kusu dina roo su basinge loklox asongot mumu laxakapmek atnedi.

15. Moroa ik lok nedik ngan luvut-nitna.

Mt 10:28	Mt 13:41-42	Jo 3:18-20	Jo 3:36	Gu 17:30-31
Ro 1:18-19	Ro 6:23	Ga 6:7-8	Ro 8:12-13	Ro 8:14-17
Ib 9:27	Ib 10:26-31	1 Pi 1:17	1 Pi 4:3-5	Ju 1:7
Li 20:11-15				

## Moraa i lox arooro limixin basinge laxakapmek atnedi xeretna.

9. Moroa i balamu limixin axap, kuren la i vara i xusu na lox arooro ned.

## Lempanga nedik atabak lox i at levenaleng dik atara lok ka vam lorooro maxat.

16. Nedik di lok bukbulu mumu laxakapmek atnedik la di xap at loklok kakapmek.

Jo 3:16	Ro 5:8	1 Ti 2:3-6	2 Pi 3:9	1 Jo 4:9-10
---------	--------	------------	----------	-------------

10. Nitna ne Moroa ne Iesu Karisito ga met kusu ri lox arooro nedik.

Mt 4:17	Mk 6:12	Lu 13:1-5	Lu 15:1-31
Gu 2:37-40	Gu 3:19-20	Gu 17:29-31	Gu 20:21
2 Ko 7:8-11	2 Pi 3:9	Li 9:20-21	

17. Dik ta nunu do ne Iesu ira lox arooro nedik.

Mk 10:45	Jo 3:16	Ro 4:25	Jo 1:12	Jo 3:15-18	Jo 3:36	Jo 6:47	Jo 6:47
2 Ko 5:19-21	Ga 3:13	1 Ti 2:5-6	Jo 20:31	Gu 4:12	Gu 16:30-31	Ro 3:20-24	Ro 3:20-24
1 Pi 1:18-20	1 Pi 2:24-25	1 Pi 3:18	Ro 5:8	Ep 4:15			
			Ga 2:9	Ep 9:28			
			1 Jo 2:2	Li 5:8-10			

11. Iesu ga met la lada ren i sogos kepe laxakapmek atnedik.

18. Dik ta utus Lovoang Kaala xusu ataklen lavavara at ne Moroa ri loklok neni i vavara nedik kusu ata mu asu i.

Mt 4:1-4	Mt 5:17-20	Mt 22:29	Jo 8:16-32-13	Jo 10:31-11		Mt 18:19-20	Mk 11:24-2
Gu 20:32	Ro 15:4	Ro 16:26	Kl 3:1618:1-8	1 Ts 2:136		Jo 14:13-14	Jo 15:7
1 Ti 4:13	2 Ti 3:14-17	Ib 4:12	1 Pr 2:25272	Rol 1:9121		Ep 2:18	Ep 6:18
2 Jo 9-10	Li 1:3		Kl 4:2	1 Ts 5:17		1 Ti 2:1-4	1 Ti 2:8
			Ib 4:16	Ib 10:19-22		Je 1:5-8	Je 4:2-3
			1 Pi 4:7	1 Jo 3:21-22		1 Jo 5:14-15	

19. Nedik di lok ka lesepe susu.

Mt 28:18-20	Jo 3:22	Jo 4:1-2	Gu 2:37-42	Gu 8:12
Gu 8:36-38	Gu 10:44-48	Gu 16:14-15	Gu 16:31-33	Gu 19:1-7
Gu 22:12-16	Ro 6:1-4	Ga 3:26-27	Kl 2:12	1 Pi 3:20-22

20. Nedik tanat pas ti lempotpot buru mi limixin nunu.

Mt 18:19-20	Gu 2:41-47	Ro 12:4-8	Ep 6:19-20	Pl 1:3-5	Pl 1:9-11	Kl 1:9-12
Kl 3:15-17	1 Ti 4:13	Ib 10:24-25	1 Ts 3:9-13	Ep 7:11-16	2 Ts 3:1-5	Ib 5:7

21. Nedik tanat pot buru xusu rik lok ka leveluxa at Leeme Silok.

Levenampoovo at levesingising limixin dha lox Exeretha.

Mt 11:25-26	Mt 14:23	Mt 19:13-15	Mk 1:35
Lu 6:12	Lu 22:32	Lu 22:39-46	Jo 11:41-
Gu 4:24-31	Gu 16:25	Gu 20:36	Gu 21:5
Ro 10:1-2	Ro 15:30-33	2 Ko 12:7-10	Ep 1:15-2
Ep 6:19-20	Pl 1:3-5	Pl 1:9-11	Kl 1:9-12
1 Ts 3:9-13	Ep 7:11-16	2 Ts 3:1-5	Ib 5:7

26. Tana tong avukat amisik ti ne Moroa.

Mt 26:26-30	Mk 14:22-26	Lu 22:14-20	Lu 17:11-19	Jo 6:11	Ro 1:21	Ep 5:20	Pl 4:4-7
			Kl 2:7	Kl 3:17	Kl 4:2	1 Ts 5:18	1 Ti 2:1
			1 Ti 4:4-5				

### Nedik di nunu at ne Iesu Karisito, atap tuvuk keretna.

22. Ata rongga res at ne Moroa ne Temen dik la ne Iesu Karisito Leeme Silok atdik.

Jo 14:15	Jo 14:21	Jo 14:23-24	Jo 15:10-17	Ro 13:8-10
1 Pi 1:14-16	1 Jo 2:3-8	1 Jo 3:22-24	2 Jo 5:6	2 Jo 5:6

23. Nedik ta vavara aleng ne Moroa la ta balamu limixin at na lavatbung menemen.

27. Tanak lok tooro lentaba vetpes.

Mt 6:1-4	Mt 7:12	Mt 25:31-46	Lu 3:10-1
Gu 11:27-30	1 Ko 10:24	2 Ko 8:1-15	2 Ko 9:1-1
Pl 4:14-19	Ib 10:24	Ib 13:1-3	Ib 13:16
Je 2:15-16	1 Jo 3:16-18		

28. Tanak lox asi nedik.

Mt 5:3-12	Mt 18:1-5	Lu 14:7-11	Lu 18:9-14	Ep
Pl 2:3-11	Kl 3:12-13	Je 4:5-10	1 Pi 5:5-7	

24. Nedik tap tuvuk ngan lurup-tuvuk at ne Karisito.

Jo 13:34-35	Jo 14:27	Ro 12:9-13	Ga 5:22-26	Kl 3:12-17
1 Ts 5:16-18			Mt 5:25-26	Mt 5:38-42
			Mt 18:15-17	Ro 12:14-21

25. Nedik ta ngising. Ta lok lising keretna.

29. Ata reven levempilas mi levenapovo at nedik keretna.

Mt 22:34-40	Mk 12:28-34	Lu 10:25-37	Jo 14:21	1 Jo 5:3
Mt 5:43-48	Jo 13:34-35	Jo 15:12-17	Ro 12:9-10	Ro 13:8-10
1 Ko 13:1-3	1 Ko 16:14	Ga 5:13-15	1 Ts 4:9-10	1 Pi 1:8
1 Pi 4:8	1 Jo 2:9-11	1 Jo 3:11-18	Mt 6:19-21-2	Mt 6:24-34
			Lu 12:13-21	Lu 12:32-3
			1 Ti 6:6-10	1 Ti 6:17-19
			Ib 13:5-6	Je 2:1-9

30. Atat pes avolo levelinga ik lok do na tu atnedik.

31. Dik tana lok ngangao atnedi dimgonga lagavaman atnedik.

Mt 22:15-22	Gu 5:27-29	Ro 13:1-7	1 Ti 2:1-4	39. Dik ta lok ngangao at lubung amgomgo at lotu at nedik.
1 Pi 2:13-17				

32. Nedik taxo lotu saparap laxam-poovo vanga.

1 Ko 9:14	Ga 6:6	1 Ts 5:12-13	1 Ti 5:17-22	Ib 13:17
-----------	--------	--------------	--------------	----------

Mt 4:10	Gu 17:22-31	1 Ko 5:11	<b>Limixin ko tetemen dik lok keretna.</b>
1 Ko 10:1-22	2 Ko 6:14-18	Ga 5:19-21	1 Ts 1:1-2
Li 21:8	Li 22:15		40. Loxoenasun dinap tuvuk keretna.

33. Nedik dixoplavang mi lempanga mi lavanuet kangkedek.

Mt 19:4-6	1 Ko 7:1-16	Ep 5:21-33	Kl 3:18-19	Ta 1:1-2
Ib 13:4	1 Pi 3:1-7			

Mt 9:13	Mk 12:33	Ro 12:1	Ib 9:6-10:18
---------	----------	---------	--------------

34. Nemen dik guta elongka keneng at leepot la keneng bok at lubung-naa.

41. Laxamdak mi laxaalik dinap tuvuk keretna.

Mt 15:3-6	Lu 2:51	Ep 6:1-3	Kl 3:20	1 Ti 5:4
-----------	---------	----------	---------	----------

Mt 5:27-30	Jo 8:2-11	Ro 13:8-10	1 Ko 5:5-8	1 Ko 6:9-20
Ga 5:19	Ep 5:3	Kl 3:5-6	1 Ts 4:1-8	Ib 13:4
Ju 1:7				

42. Luvuttemen mi luvutnen laxamdak dinap tuvuk keretna.

35. Nedik dixo inin tangtanguku.

Ep 6:4	Kl 3:21	1 Ti 3:4-5	
--------	---------	------------	--

Ro 13:13	1 Ko 5:11	1 Ko 6:9-11	Ga 5:19-21	Ep 5:18
1 Ti 3:1-3	Ta 1:7	1 Pi 4:3-5		

43. Lempatnaa dinap tuvuk keretna.

### Limixin at ne Moroa dip tuvuk keretna.

Gu 6:1	Ro 7:2-3	1 Ko 7:39-40	1 Ti 5:3-16	Je 1:2
--------	----------	--------------	-------------	--------

36. Limixin dik lok keneng at lotu dip tuvuk keretna.

44. Nemen dik guta soxope lavakin kopla lavatlok atdik.

Mt 16:13-20	Gu 2:41-42	Ro 12:4-8	1 Ko 12:12-30	Ep 1:22-23
Ep 2:19-22	Ep 4:1-16	Kl 1:18	Mt 6:24-27	Mt 19:24-10
Li 19:5-10				

37. Lubung amgomgo keneng at lotu, dik ta soxolik ka di, dinak lok keretna.

### Limixin di mumu asu loklok at ne Iesu, di vekip tangarang amisik mi levenmumuat.

Gu 6:1-6	Gu 14:23	1 Ti 3:1-13	Ta 1:5-9	45. Dina gagas ti ekip tangarang mi lempanga abinis.
----------	----------	-------------	----------	--

38. Lubung amgomgo at lotu dinabap tuvuk keretna.

Ro 8:18-25	Ro 8:28	2 Ko 1:4	2 Ko 4:16-18
1 Pi 1:6-9	1 Pi 2:19-21	1 Pi 5:8-10	

Mt 18:18-20	Lu 22:24-27	Gu 20:17-35	1 Ts 2:1-12	1 Ti 4:1-16
2 Ti 2:1-26	2 Ti 3:10-17	2 Ti 4:1-5	46. Dina gagas ti levetloklok asongot.	1 Pi 3:1-4

Mt 5:10-12	Mk 13:9-13	Lu 12:4-9	Mt 12:31-25	Mt 9:15-14	Mt 11:2-5	Gu 3:1-6
Gu 5:41	Ro 8:35-37	Ro 12:12-14	Gu 9:1-11	Gu 8:8-11	Ko 12:9	1 Ko 12:29-30
2 Ko 4:8-11	2 Ko 12:10	Pl 1:28-29	1 Ti 5:13-8	2 Ti 4:20-4	Je 5:14-15	
2 Ti 3:10-13	Ib 10:32-39	Ib 12:3-4	1 Pi 3:13-17	1 Pi 4:12-19		
Li 2:10			<b>Lavanga sala naba vot melemu.</b>			

47. Di noxo marat at lanmet.

52. Iesu nabamlong ti na lavatbung menemen.

Jo 6:39-40	Jo 11:17-27	Jo 14:1-4	Ro 8:10-11	Ro 8:38-39		
Ro 14:7-9	1 Ko 15:12-58	2 Ko 5:1-10	Pl 1:20-24	1 Ts 4:13-18		
Ib 2:14-15	Li 14:13	Li 21:1-4	Mt 24:29-44	Jo 14:1-3	Gu 1:10-11	Gu 3:19-21

48. Moroa ik lok eburu minedi la ik lok tooro nedi.

Kl 3:4	1 Ts 1:9-12	1 Ts 3:13	1 Ts 4:13-5
2 Ts 2:1-4	1 Ti 6:13-15	2 Ti 4:8	Ib 9:28
1 Jo 3:1-3	Li 1:7	Li 22:12-13	

Mt 18:19-20	Mt 28:19-20	Jo 14:16-23	3. Ro 8:35-39	2 Ko 6:16-18	Moroa
Ep 3:17-19	Pl 4:13	Kl 2:6-7	ti la tsunio	lok lok at limixin.	

49. Satan i vara i do nak lok kapmek lorooro atnedi.

Mt 7:21-23	Mt 16:24-27	Mt 25:31-46	Jo 3:18-21
Gu 17:30-31	Ro 2:1-11	Ro 14:10-12	1 Ko 3:10
2 Ko 5:9-10	2 Ts 1:5-10	Ib 9:27-28	Ib 10:26-3

Mt 13:19	Lu 4:1-13	Lu 22:3-4	Jo 8:42-44	2 Ko 2:10-15
2 Ko 4:4	2 Ko 11:13-15	Ep 2:2	1 Pi 4:38	1 Ti 2:9-12
1 Pi 5:8-9	1 Jo 3:8-10	Li 12:7-12	Li 20:1-3	Li 20:10

50. Moroa im taba di mi lolos tik lox asi ne Satan la na tu pavaa levenmu-muat.

54. Nedi diga roo su, dinaba nemen to vana at laxalibet.

Mt 4:1-11	Mt 6:13	Lu 22:31-32	Lu 12:32-34	Jo 14:1-3	2 Ko 5:1-8	Pl 1:23
Ro 12:12	Ro 16:19-20	1 Ko 10:12-13	Li 4:1-11	Jo 17:14-19	Li 21:1-4	Li 21:22-22:5
Ep 3:20-21	Ep 6:10-18	Pl 4:13	Jo 17:14-19	Ro 8:31-39	Li 21:22-22:5	Li 22:14-15
2 Ti 1:7-8	Ib 2:18	Ib 4:14-16	55. Nebo digoxo	2 Ts 3:3	Jo 4:7	dinaba nemen to la limixin songsongot.
1 Pi 1:5	1 Pi 5:8-11	1 Jo 4:4	Ib 12:1-2	1 Jo 5:3-5	Li 12:7-12	

51. Moroa ik lox aroo limixin dik meres.

Mt 10:28	Mt 13:41-42	Mt 13:47-50	Mt 25:41	Li 22:14-15
2 Ts 1:9	Li 20:10-15	Li 21:8		